


Yosë nanamën



New Testament in Chayahuita (PE:cbt:Chayahuita)

**Yosë nanamën
New Testament in Chayahuita (PE:cbt:Chayahuita)**

copyright © 2011 Wycliffe Bible Translators, Inc.

Language: Chayahuita

Translation by: Wycliffe Bible Translators, Inc.

Chayahuita

cbt

Peru

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Chayahuita

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 11 Nov 2022 from source files dated 29 Jan 2022

2b907844-bec1-5cc7-a0e4-401d867c40e7

Contents

Génesis	1
Mateo	75
Marcos	138
Lucas	174
Juan	234
Hechos	276
Romanos	329
1 Corintios	353
2 Corintios	377
Gálatas	393
Efesios	403
Filipenses	413
Colosenses	420
1 Tesalonicenses	426
2 Tesalonicenses	431
1 Timoteo	434
2 Timoteo	441
Tito	446
Filemón	449
Hebreos	451
Santiago	471
1 Pedro	478
2 Pedro	486
1 Juan	491
2 Juan	498
3 Juan	499
Judas	500
Apocalipsis	503

Ya'ipi ma'sha caniaritërinso'

Yosë nani ma'sha acorinso'

¹ Yosë nani ma'sha acorinso sha'huichinquëma': Iráca co manta ya'huërinhuë'. Yoséíchin ya'huërin. Caniaritapon, pi'iro'të'ton acorin. Ina quëran isoro'panta', acorin.

² Naporor' isoro'paso', co ipora pochin nishátérarinhuë'. Ya'ipi marésáchin ninin, pa'pi anpotérin. Tashiri noyá i'copitérin. Naporor chachin Yosë ispiritónenso', i' aipi yanpo yanpónantarin.

³ Naporor' Yosë tapon: “¡Tashinantérinso nii'sohuanchin huachi!” ténin. Topachina, nii'sohuantérin huachi.

⁴ Nii'sohuantérinso nóya nicaton, nisha acorin. Tashinta', nisha acorin.

⁵ Nii'sohuantérinsoso': “Tahuëri,” itérin. Tashinaonta': “Tashi’,” itérin. Tashirahuaton tahuëriantahuachina, i'huaraya huarë' a'na tahuëririra', nanirin huachi.

⁶ Ina quëran Yosë taantarín: “¡Niquë niquë i' ya'huëcaso marë' ya'copinamën ya'huë'in!” ténin. Topachina, inachachin ya'huërin huachi.

⁷ Yosëri i' ya'copinamën nipachina, ina aipi i' ya'huërin. Inaanaquënta', i' ya'huërin.

⁸ Nani acohuachina, inápaquë ya'huërinsoso': “Pi'iro'të',” itérin. Tashiantarahuaton tahuëriantahuachina, i'huaraya huarë' cato tahuëri nanirin huachi.

⁹ Ina quëran Yosë taantarín: “¡Yaniro'pa' ya'nocaso marë' pi'iro'tëanaquë i' ya'huërinso', inaquéráchin niyonto'in!” ténin. Topachina, inachachin ya'huërin huachi.

¹⁰ Yaniro'paso': “no'pa',” itérin. I' niyontoninsoso': “marë,” itérin.

Ya'ipi acorinsopita noyasáchin nissarin ni'nin. Ina nicaton, ¹¹ Yosë taantarín: “¡Nisha nisha sharo'sa papoina!” Nisha nisha panpatororo'santa nisha nisha ya'pirihuánpiso', papoina'. ¡Nisha nisha nararo'santa nisha nisha nitopisopita no'paquë papoina'!” ténin. Topachina, inachachin ya'huërin huachi. ¹² Ina nohuan-ton nisha nisha sharo'sa', panpatororo'sa', nararo'sa', inapita isoro'paquë paporin. Acorinsopita nicaton: “¡Ma nójacha acorahuë paya!” ténin. ¹³ Tashiantarahuaton tahuëriantahuachina, i'huaraya huarë' cara tahuëri nanirin huachi.

¹⁴⁻¹⁵ Ina quëran Yosë taantarín: “¡A'pininsopita pi'iro'tëquë ya'huë'in. Tahuëri, tashi a'pintacaso marë' ya'huë'in. Inapita a'pinpachina, tahuëri, tashi', nisha nisha acoarin. Naporahuaton yoquiro'sa', pi'ipiro'sa', inapitanta piyapiro'sa nitotapi huachi!” ténin. Topachina, inachachin ya'huërin huachi.

¹⁶ Tahuëri a'pinacaso marë' panca masho acorahuaton, tashinta a'pinacaso marë' huahuishin miachin acorin. Tayoraro'santa acorin.

¹⁷⁻¹⁸ Yosëri inapita isoro'pa' a'pintacaso marë' pi'iro'tëquë acorin. Tahuëri, tashi a'pintarin. Acorinsopita nicaton: “¡Ma nójacha acorahuë paya!” ténin.

¹⁹ Tashiantarahuaton tahuëriantahuachina, i'huaraya huarë' catapini tahuëri nanirin huachi.

²⁰ Ina quëran Yosë taantarín: “¡Nisha nisha ma'sharo'sa i'quë ya'huëcaiso marë' ya'huë'in! Nisha nisha samiro'santa ya'huë'in. ¡Naporahuaton, nisha nisha inairaro'sa yanponacaiso marë' ya'huë'in!” ténin. Topachina, inachachin ya'huërin huachi.

²¹ Panca ma'sharo'sa nisha nisha nipesopita, marëquë ya'huëcaiso marë' acorin. Nisha nisha samiro'santa', acorin. Anpiantéhuano'santa', acorin. Acorinsopita nicaton: “¡Ma nójacha acorahuë paya!” ténin.

²² I'quë ya'huëcaiso nipesopita noya yonquirapiton iso pochin sha'huitérin: “¡Na'amiatatoma maréro'saquë ya'huëco'!” itérin. Naporahuaton anpiantéhuano'santa', sha'huitérin: “¡Na'amiatatoma canpitanta isoro'paquë ya'huëco'!” itérin.

- ²³ Tashiantarahuaton tahuëriantahuachina, i'huaraya huarë' a'natérápo tahuëri nanirin huachi.
- ²⁴ Ina quëran Yosë taantarín: “¡Nisha nisha ma'sharo'sa ya'huë'in! Tananquë ya'huëcaiso nipsisopita, pë'tahuacaiso nipsisopita, niohuaratacaino nipsisopita. ¡Inapita ya'huë'in!” ténin. Topachina, inachachin ya'huërin huachi.
- ²⁵ Inapita ma'sharo'sa', ya'ipi Yosëri acorin. Acorinsopita nicaton: “¡Ma nójacha aco-rué paya!” ténin.
- ²⁶ Naporó tahuëri chachin tapon: “¡Iporaso huachi piyapi niahua! Inaso canpoa pochachin nisarin. Chiníquén nanantaton, samiro'sa', anpiantéhuano'sa', inapita hua'anéntarin. Ma'sharo'sa pë'tahuacaiso nipsisopita, tananquë ya'huëcaiso nipsisopita, niohuaratérinsopita, ya'ipi inapitanta hua'anéntarin,” ténin.
- ²⁷ Yosëri piyapi acoapon, inaora pochachin acorin.
A'nara quëmapi, a'nara sanapi. Inaíchin ninin.
- ²⁸ Noya yonquirapiton iso pochin sha'huitérin: “Noya ya'huëco'.
Na'a hua'huasha ya'huëchinquëma'.
Shiparimapita na'atona', ya'ipi parti ya'huë'ina'.
Ya'ipi hua'anéntoco'. Samiro'sa', ma'sharo'sa',
anpiantéhuano'sa', niohuaratérinsopita, inapita hua'anéntoco',” itérin.
- ²⁹ Napotahuaton, itaantarín: “Ni'quë'. Nisha nisha sharo'sa apapotérahuë nitérinso capamaso marë'. Notohuaro' nisha nisha nararo'santa nitérinso ca'quë', iroquë'.
- ³⁰ Ma'sharo'sa', anpiantéhuano'sa', niohuaratérinsopita, inapitaso niperinhuë', panpatoro acotérahuë capacaiso marë” itérin. Napotohuachina, inachachin nipi huachi.
- ³¹ Naporó' Yosëri ya'ipi acorinsopita nicaton: “¡Ma nójacha ya'ipi acorahué paya!” ténin. Tashiantarahuaton tahuëriantahuachina, i'huaraya huarë' saota tahuëri nanirin huachi.

2

- ¹ Inapoaton Yosë: Isoro'pa', pi'iro'të', ya'ipi inaquëpita ya'huërinopitarë chachin ténirin huachi.
- ²⁻³ Ya'ipi acorinsopita ténirahuaton, tahuërininquë chinotérin. Napoaton, ina tahuëri noya ni'nin. Noya nicaton, chinoto tahuëri acorin. Napoaton piyapi pënénin: “Naporó tahuëri chinotatoma', casáchin yonquico,” itérin.
- ⁴ Ina pochin Yosë iráca: Isoro'pa', pi'iro'të', inapita acorin. Ya'ipi no'tequén sha'huitaranquëma'.

Itin nararoquë piyapi acorinso'

Sinioroso* Yosë ni'ton, inapita ya'nan acoaponahuë', ⁵ co sharo'sa ya'huëyátérarinhuë'. Co panpatoronta papoyátérarinhuë'. Co o'nan térranta acoyátérarinhuë'. Naporahuaton co insonta isoro'paqué sha'tacaso marë' ya'huëyátérarinhuë'. ⁶ Napoaponahuë', no'pa quëran chachin i'sha pipiton, së'cotérotárin. ⁷ Naporó' Sinioroso Yosë ni'ton, yaniro'pa' amocan quëran quëmapi ninin. Nani nisahuaton, nanopicaso marë' pihuinitérin. Inapotohuachina, niirahuaton nanopirin huachi.

⁸ Ina piquëran, Sinioroso noyápiachin nararo Itin itopiquë acorin. Inaso no'pa', Cor-tanii' quëran pi'i pipirinso parti quëparitérin. Inaquë ya'huëcaso marë' quëmapi nininso acorin. ⁹ Naporahuaton, nisha nisha noyápiachin cashino'sa apapotérin. Yashi yashin ca'chináchin nitérinsopita apapotérin. Nararo huancánachin nanopirin nara apapotérin. Inaquë chachin a'nanta', apapotérin. Anitotacaso nara itopiso'. Ina ca'pachina', noya nininsopita nitotaponahuë', co noyahuë' nininsopitanta nitotapi huachi.

* ^{2:4} Sinioro: Sinioroso', iráca iprioro'sari Yosë nininén Yapı (YHWH) itopi. Ina pochin nohuitopiso', cacharonquë, Sinioro itopi.

¹⁰ Itinquë a'nara i' pipirin. Ya'ipi nararo asë'cotërotacaso marë' naporin. Ina quëran chachin catapini së'parai' pa'térin. ¹¹ Ya'natii rinsoso', Pisonii' itopi. Inaso', Apira parti conimarin. Inaquë oro ya'huërin. ¹² Inaquë oro ya'huërinso', noya noya ninin. Pimo yaquinta noya noya nininso ya'huërin. Nisha na'pinta ya'huërin, onisi itopiso'. ¹³ Ina quëran niantarinsonta', Quiconii' itopi. Inaso', ya'ipi Coso parti pa'térin. ¹⁴ A'nanta', Tiquirisii' itopi. Inaso', Asiria ninano pi'i ya'coninso parti quëran acorin. Ya'natomarinsoso nipi rhinhuë', Iopiratisii' itopi.

¹⁵ Sinioroso Yosë ni'ton, Itin nararoquë quëmapi acorin. Inaquë sacataton a'paicaso marë' acorin. ¹⁶ Napororiso pochin camairin: "Ya'ipi isopita nararo'sa nitérinso', noya ca'quë', iroquë', inapoquë'. ¹⁷ Anitotacaso nara nitérinsoíchin, co nohuantérahuë capamaso'. Inaso ca'patan, noya nininso nitotaponahuë', co noyahuë' nininsonta nitotaran. Ama ina nitérinso ca'quësohuë'. Ina ca'patan, têhuëñchachin chiminaran," itérin.

Yosëri sanapi nininso'

¹⁸ Ina quëran Siniroso Yosë ni'ton, taantarin: "Quëmapi inaora ya'huëcaso', co noyahue'. A'na nianta'i nipachin, inari noya catahuacaso marë'," tënín. ¹⁹⁻²⁰ Ina quëran ya'ipi ma'sharo'sa', anpiantëhuano'sa', inapita no'pa quëran ninin huachi. Inapita nisahuaton, quëmapi quëshirin inari nininën acotacaso marë'. Pë'tahuaro'sa', anpiantëhuano'sa', ma'sharo'sa tananquë ya'huërinsopita, inapita nininën acotërin. Ma nininënsona acotohuachina, ina chachin ninihuapi huachi. Napoaponahuë', co a'na ma'shari têranta nanitërinhuë', quëmapi noya catahuacaso'.

²¹ Napohuachina, quëmapi noyá ahue'ëtérin. Huë'ëso', a'nara nininpítën ocoitérin. Ocoitahuaton, anoyataantarin huachi. ²² Ina nininpítë quëran chachin sanapi ninin. Capayatohuachina, sanapi nininso a'notérin. ²³ Quënanahuaton, quëmapi pa'yaniñ. Pa'yataton, tapon: “¡Isocha tëhuëñchinso', ca pochachin Yosëri ninin! Cá quëran ninin ni'ton, sanapi itarahuë,” ténin.

²⁴ Napoaton quëmapi sa'apachin, pa'pin, a'shin inapita patahuaton, sa'inë' nichinpita-caso ya'huërin. Catoya'pi nimirinahuë', a'naíchin pochin nipi huachi.

²⁵ Quëmapiso sa'inë chachin noya ya'huërapí. Co a'moanaponaraihuë', co manta tapanpihuë'.

3

Co Yosë natëtonaraihuë', oshahuanpiso

¹ Sinioroso Yosë ni'ton, ya'ipi tananqué ma'sharo'sa ya'huérinsopita acorin. Ya'huanso nimirinhue', a'napita ma'sharo'sa quérän yonqui yonquínahuan ninin. Sanapi yanopintaton, paaparin nontacaso marë':

—¿Tēhuēñchachin ta'ma Yosë apiratérinquëma ya'ipi isopita nararo'sa nitérinso capamaso to? itérin.

2-3—Ya'ipi nitérinso', noya capa'huaiso'. A'naíchin huancánachin huanirinso', co Yosë nohuantérinhüë: "Ama ina nitérinso', ca'cosohuë". Ama së'huacosohuë". Ca'patama', têhuëñchachin chiminarama', "itérincoi Yosë, itérin.

4-5 —Co napoarinhuë'. Co' chiminaramahuë'. Ca'patamaso', ya'ipi noya nininsopita, ya'ipi co noyahue' nininsopitanta', nitotarama huachi. Inapita nitotatoma', Yosë pochachin nisarama'. Ina nitotaton, Yosë aspiratérinquëma', itérin.

⁶ Ina natanaton, sanapiso nara nitérinso ni'sárin: Noyápiachin nicaton ca'chináchin cancantërin.

"Ina ca'pato, ya'ipi nitotarahuë huachi," ténin. Napoyan quëran, së'pashorahuaton ca'nin. So'ionta quêtóhuachina, inanta ca'nin. ⁷ Napororachachin nisha yonquipi huachi: "Inanpirashitë canposo pa'saré!", niitopi. Ninapotatona', iquirahuëron pipitopi. Inapoatona', nipa'shianatopi.

⁸ I'huanahuanquë huisontapaso', Yosëri nararoquë huëcapairinso natanpi. Natanahuatona', na'picaiso marë' ta'api. ⁹ Na'pitopirinahuë', inariso pérarin:

—Atan*. ¿Inséquéta ya'huaran? itérin. ¹⁰ Natanahuaton, quëmapiso tapon:

—Co'ta o'maranso' natanai. I'nampirashitécoi ni'toi, tē'huatérainquën. Naporahuaton tapantatëinquën, na'pirai, itérin.

¹¹ —¡l'yan! ¿Onporahuatomata nitotapanamaso'? Nara a'naíchin nininso': “Ama isoso nitérinso ca'quësohuë,” itopiranquënhuë': ¡Nani ca'nan! itérin.

¹² —Iso sanapi quëtérancoso', quëtérinco ni'ton, ca'nuhüe, itérin.

¹³ Napotohuachina, sanapi ya'huëre' tahuérétahuaton, itapon:

—¿Onpoatonta naporanso'? itérin.

—Ya'huan nonpintérinco ni'ton, ca'nuhüe, ténin sanapi.

¹⁴ Naporor Sinioroso Yosë ni'ton, ya'huan ya'huëre' tahuérétahuaton, co huachi noya ya'huëcaso marëhuë' sha'huitérin:

—Piyapi nonpintéranso marë' a'napita ma'sharo'sa quëran, pa'pi co noyahuë' ni'nanquën. Napoaton ipora quëran huarë' cancanën quëran no'pa' pa'taran. Inapoaton, chiminaquë huarë' nosorotaran. ¹⁵ Ca nohuanto sanapi inimicotarinquën. Quëmarinta ina inimicotaran. Quëmá quëran pipipisopitanta', sanapi quëran pipipisopitarë' niin-imicotapona'. A'na tahuëri sanapi quëran pipirinsoari† minsëmiatarinquën. Napoaponahuë', quëmarinta chiniquën ina aparisitaran, itérin.

¹⁶ Ina quëran sanapi ya'huëre' itapon:

—Co natérancoso marëhuë', hua'huanpatan pa'pi iquin quëran huaiaran. Napoaponahuë', so'yan ya'cariantaran. Naporahuaton, so'yan camaiinquënsa ya'huërin, itérin.

¹⁷ Ina quëran quëmapinta itapon:

—Sa'an natëton, nara nitérinso co capacasohuë nimirinhuë', ca'nan. Naporanso marë' ya'ipiro'pa' co huachi noyatacao marëhuë' sha'huitarahuë. Napoaton nitaparin. Pa'pi chiniquën sacataquë huarë' coshataran. Chiminaquë huarë' inapoaran.

¹⁸ Naporahuaton, nahuano'sa', shihuarino'sa', inapita na'con na'con papotapon huachi. Nisha nisha canoméro'sa', nararayaro'sa', inapita yoniton, capon. ¹⁹ Pa'pi chiniquën sacatahuarë' coshataran. Napoin quëran chiminaran huachi. No'pa quëran ninanquën ni'ton, no'pa chachin niantamaso ya'huërin, itérin.

²⁰ Atanso', sa'in nininëñ acotérin, Ipa itérin. Ina quëran ya'ipi piyapi na'acaiso ni'ton, ina pochin nohuitérin. ²¹ Quëmapi sa'inë chachin a'mocaiso marë' ma'sha sha'huëte quëran Yosëri nitérin. Ina quëtohuachina, a'moanpi huachi. ²² Naporor chachin ténin: “Iporaso', piyapi canpoa pochachin nitotérin. Noya nininso nitotahuaton, co noyahuë' nininsonta nitotérin. Ni'quëna nanopirin nara nitérinsonta ca'pachin. Napohuachinso', nanopimiatarin,” ténin.

²³ Napoaton Sinioroso Yosë ni'ton, noyápiachin nararo quëran quëmapi ocoirin. Ocoirahuaton, niqué acorin. Inaquë sacatacaso marë' acorin. No'paquë chachin sacatapon huachi. ²⁴ Piyapi ocoirahuaton, pi'i pipirin parti quëran a'paito anquëniro'sa acorin. Inapitaso', quiropino'sa itopi. Noyápiachin nararo a'paicaiso marë' acorin. Ina ya'carinta', sahuëni orotaton huënin huëntárin acorin. Ama incari térranta nanopirin nara ya'caricaso marëhuë', a'pairapi.

4

Atan ya'nan hui'ninpita napopiso'

¹ Atan sa'in hua'huanpachina, quëmapia'huaya huairin. “Yosë catahuarinco ni'ton, quëmapia'huaya hua'huanahuë huachi,” ta'ton, nininëñ acotérin. Caino itérin.

² Ina quëran hua'huaantarin. Quëmapi chachin huaiaantahuachina, Apiri itérin.

* ^{3:9} Atanso': Piyapi tapon naporin. † ^{3:15} Sanapi quëran pipirinso topachina: Quisocristo ninoton napotérin.

Hui'napitohuachinara, Apiriso ohuicaro'sa pë'tahuarin. Cainoso nipirihuë', imin camayo.

³ A'na tahuëri cato chachin ofrenda quëcatona', Yosë chinotapi. Cainoso', sha'ninso quëran Yosë chinotacaso marë' quënin. ⁴ Apiriso nipirihuë', ohuicanënpita ya'nan hua'huatopiso quënin. Amo amoshin nininsopita Yosë chinotaton tēpacaso marë' quënin. Yosëso Apiri noya ni'nin. Ofrendanëonta noya ni'nin. ⁵ Cainoso nipirihuë', co noyahue' ni'nin. Ofrendanëonta co noyahue' ni'nin. Ina marë' Cainoso', pa'pi no'huitërin. No'huitaton, aquinorárin. ⁶ Ina nicaton, Siniorori itapon: “¿Onpoatonta no'huitaton aquinoráran? ¡Ama huachi no'huitëquësohuë!” ⁷ Noya ninan naporini, noya cancan-chitonhuë'. Nipirihuë', co nohuantëranhuë' noya nicacaso ni'quëhuare', co noyahue' nisápaso marë' oshanën minsëarinquën. Ina nipirihuë', noya nipatan, nanitëran ina minsëcaso”, itërin.

⁸ Natanauponahuë', co yanatëtérinhue'. A'na tahuëri iin itapon:

—Huëquë iyara iminquë pa'a, itërin. Inaquë canconpachinara, iin ahuëaton, tēparin.

⁹ Siniorori nitotaton, Caino itapon:

—¡Ma'sona iyaya onporinso', sha'huitoco! itërin. Napotohuachina, Cainoso tapon:

—Co nitotërahuë'. ¡Co ina a'pairápa'huaso ya'huërinhue'! itërin. ¹⁰ Napotohuachina, Siniorori itapon:

—¿Onpoatonta naporan? Iyaya tēpaton, pa'pi co noyahue' ninan. Huénainën a'patëran ni'ton, co huachi noya ya'huëcamaso marëhuë' sha'huitaranguen. ¹¹ Iya'hua tēparanso marë' pa'pi co noyahue' ni'nanquen. Huénainënquë no'pa' asë'cotëtëran ni'ton, ocoiaran-quen. ¹² Iminaton, sha'topiranhuë têranta', co huachi noyatarinhue'. Co huachi ya'huëmia ya'huaponhuë', patë patérantapon. Co huachi sano cancantaranhue', itërin.

¹³ —¡Ma'huantacha nisarahuë paya! Co ahuantochináchinhue' ana'intaranco. ¹⁴ Ipora tahuëri iso ro'të quëran ocoiaranco. Co huachi ya'huëmia ya'huapohue', patë patéranta'huaso ya'huërin. Co huachi sano cancanta'huaso ya'huaponhuë'. Co chinota'huanquenso têranta nanitapohue'. Napoaton inso têranta quënanpachinco, tēpaponco tênhue', itërin Cainori.

¹⁵ —Insosona tēpahuachinquen, inanta na'con na'con ana'intacaso ya'huërin. Cancisëro ana'intacaso ya'huërin, itërin Siniorori. Napotahuaton marca acotërin. Quënanpachina ama tēpacaiso marëhuë', inapotërin.

¹⁶ Ina quëran Caino pa'nin. Yosë quëran pipirahuaton, Noto parti ya'huëconin. Inaso no'pa', Itin quëran pi'i pipirinso parti quëparitërin.

Caino shinpita napopiso'

¹⁷ Caino sa'apachina, hui'nahuanin. Hui'nin nasitohuachina, Inoco itërin. Ina quëran Caino ninano ocoihuachina: “Inoco ninano”, itërin.

¹⁸ Inoco hui'nahuanpachina, Irato itërin. Iratonta hui'nahuanpachina, Miocairo itërin. Miocairo ya'huëre' hui'nahuanpachina, Mitosairo itërin. Mitosaironta hui'nahuanpachina, Namico itërin. ¹⁹ Namicoso', cato sa'ahuanin. A'naso', Ata itopi. A'nanta', Sira itopi. ²⁰ Ataso hua'huanpachina, Caparo itopi. Caparo shinpitaso' pë'tahuatona'piro'sa'. Napoaton në'mëtë pëiro'saque' ya'huëpi. ²¹ Caparoso', a'nara iya'huain ya'huëtërin, Coparo itopiso'. Coparo shinpitaso', arpa míso pi'nipi. Nisha nisha pirinaonta míso pihiupi. ²² Siraso nipirihuë', hua'huanpachina, Toparo-caino itopi. Inaso', hua'na camayo ya'conin. Hua'namia nitotahuaton, sha'pi hua'nanta nitotërin. Toparo-cainoso', a'nara oshin ya'huëtërin, Naama itopi.

²³ A'na tahuëri Namicoso', sa'inpita itapon:

“Natanquë Ata. Quëmanta Sira, noya natanco sha'huichinquëma':

A'na quëmapi tēparahuë pë'sharincoso marë'.

Hui'napi nipirihuë', ahuérincoso marë' napotërahuë.

²⁴ Iin tēparinso marë' Caino tēpahuachinaso',

canchisëro aquëtë Yosëri i'huërëtapon.

Caso nimirinhüë', tēpatérahuëso marë' tēpahuachinaco,
canchisë shonca canchisëro aquëtë i'huërëtacaiso ya'huërin," itérin.

Sito nasitérinso'

²⁵ Oshaquérán Atan sa'in, hua'huaantahuachina, Sito itérin. "Cainori tēparinso ya'huërënamën Yosë quëtaantarínco," ta'ton, ina pochin nininëñ acotérin. ²⁶ Sitonta hui'nahuanpachina, Inosë itérin. Naporo quëran huarë' piyapiro'sa caniaritopi Yosë chinotatona', "Sinioro" itacaiso'.

5

Atan shinpita napopiso'

¹ Atan shinpita napopiso sha'huichinquëma nitotoco'. Yosëri piyapi nipachina, inaora pochachin ninin. ² Quëmapi, sanapi, nisahuaton, noya ya'huëcaiso marë' noya yonquirapiton sha'huitérin. Acorinso tahuëri chachin nohuitaton: "Isopitaso': 'Piyapiro'sa', itarahuë," ténin.

³ Atan pasa cara shonca pi'ipitaso', hui'nin nasitérin. Nasitohuachina, Sito itopi. Inaso', pa'pin noyá quëparin. ⁴ Sito nasitérin piquérán Atanso', posa pasa pi'i aquëtë ya'huantañtarin. A'napita hui'ninpítanta quëmapi'sa', sanapi'sa', ya'huëtérin. ⁵ Ya'ipiya quëran Atanso', iscon pasa cara shonca pi'i icanin. Ina quëran chiminin huachi.

⁶ Sito pasa a'natérápo pi'ipitaso', hui'nin nasitérin. Nasitohuachina, Inosë itopi. ⁷ Inosë nasitérin piquérán Sitoso', posa pasa canchisë pi'i aquëtë ya'huantañtarin. A'napita hui'ninpítanta quëmapi'sa', sanapi'sa', ya'huëtérin. ⁸ Ya'ipiya quëran Sitoso', iscon pasa shonca cato pi'i icanin. Ina quëran chiminin huachi.

⁹ Inosënta iscon shonca pi'ipitaso', hui'nin nasitérin. Nasitohuachina, Cainan itopi. ¹⁰ Cainan nasitérin piquérán Inosëso', posa pasa shonca a'natérápo pi'i aquëtë ya'huantañtarin. A'napita hui'ninpítanta quëmapi'sa', sanapi'sa', ya'huëtérin. ¹¹ Ya'ipiya quëran Inosëso', iscon pasa a'natérápo pi'i icanin. Ina quëran chiminin huachi.

¹² Cainan canchisë shonca pi'ipitaso', hui'nin nasitérin. Nasitohuachina, Maarariro itopi. ¹³ Maarariro nasitérin piquérán Cainanso', posa pasa catapini shonca pi'i aquëtë ya'huantañtarin. A'napita hui'ninpítanta quëmapi'sa', sanapi'sa', ya'huëtérin. ¹⁴ Ya'ipiya quëran Cainanso', iscon pasa shonca pi'i icanin. Ina quëran chiminin huachi.

¹⁵ Maarariro saota shonca a'natérápo pi'ipitaso', hui'nin nasitérin. Nasitohuachina, Carito itopi. ¹⁶ Carito nasitérin piquérán Maarariroso', posa pasa cara shonca pi'i aquëtë ya'huantañtarin. A'napita hui'ninpítanta quëmapi'sa', sanapi'sa', ya'huëtérin. ¹⁷ Ya'ipiya quëran Maarariroso', posa pasa iscon shonca a'natérápo pi'i icanin. Ina quëran chiminin huachi.

¹⁸ Carito pasa saota shonca cato pi'ipitasso', hui'nin nasitérin. Nasitohuachina, Inoco itopi. ¹⁹ Inoco nasitérin piquérán Caritoso', posa pasa pi'i aquëtë ya'huantañtarin. A'napita hui'ninpítanta quëmapi'sa', sanapi'sa', ya'huëtérin. ²⁰ Ya'ipiya quëran Caritoso', iscon pasa saota shonca cato pi'i icanin. Ina quëran chiminin huachi.

²¹ Inoco saota shonca a'natérápo pi'ipitaso', hui'nin nasitérin. Nasitohuachina, Matosarino itopi. ²² Inocosó', nani tahuëri Yosë chinotatón, ina nohuantérinsoráchin ninin. Matosarino nasitérin piquérán Inocosó', cara pasa pi'i aquëtë ya'huantañtarin. A'napita hui'ninpítanta quëmapi'sa', sanapi'sa', ya'huëtérin. ²³ Ya'ipiya quëran Inocosó', cara pasa saota shonca a'natérápo pi'ipi ya'huëtérin. ²⁴ Inaso', Yosë nohuantérinsoráchin nininso marë' a'nanaya ayarin. Yosëri inápaquë quëparin.

²⁵ Matosarino pasa posa shonca canchisë pi'ipitaso', hui'nin nasitérin. Nasitohuachina, Namico itopi. ²⁶ Namico nasitérin piquérán Matosarinoso', canchisë pasa posa shonca cato pi'i aquëtë ya'huantañtarin. A'napita hui'ninpítanta quëmapi'sa', sanapi'sa',

ya'huëtérin. ²⁷ Ya'ipiya quëran Matosarinoso', iscon pasa saota shonca iscon pi'i icanin. Ina quëran chiminin huachi.

²⁸ Namico pasa posa shonca cato pi'ipitaso', a'nara hui'nin nasitérin. ²⁹ Nasitohuachina, Noi itérin. "Siniorori piyapi co huachi noya ya'huëcaso marëhuë' sha'huitaton, ana'intérin. Napoaton isoro'pa' nitapirin. Pa'pi chiníquën sacataquë huarë' cosharo manë'. Iso hua'huashaso nimirinhuë', nanan anoyatatonpoa achinotarinpoa'," ta'ton, ina pochin nininën acotérin. ³⁰ Noi nasitérin piquëran Namicoso', a'natérápo pasa iscon shonca a'natérápo pi'i aquëtë ya'huaantarin. A'napita hui'ninpítanta quëmapi'sa', sanapi'sa', ya'huëtérin. ³¹ Ya'ipiya quëran Namicoso', canchisë pasa canchisë shonca canchisë pi'i icanin. Ina quëran chiminin huachi.

³² Noiso', a'natérápo pasa pi'ipitaquë huarë' hui'nin paninantérinso nasitérin. Ina quëran cato hui'ninpita ya'huëtaantarin. Hui'ninpítaso': Simo, Camo, Cahuito, inapita itopi.

6

Piyapi'sa nitapicancanpiso'

¹ Piyapi'sa na'asahuatona', yanquëpi huachi. Itohua itohua ninanoro'sa ocoiatona ya'huërapi. Na'a hui'ninpita nano'sa ya'huëtopi. ² Yosë hui'ninpítari* ina nano'sa ni'sahuatona', pa'yatopi. Napoaton huayonatona huayonatona', costapiso mara'piapi. ³ Napoaponahuë', Siniorori co costatonhuë' tapon: "Co piyapi'sa ya'huëmiatápaiso ya'huërinhuë'. Piyapi ni'ton, chiminacaiso ya'huërin. Napoaton pasa cato shonca pi'pira', nanoppona'", ténin.

⁴ Yosë hui'ninpítari ina sanapiro'sa macatona', hui'nahuanpi. Hui'nahuanpachinara, panca piyapiro'sa ya'huërin huachi. Ina quëran inapitaso', iráca quëran huarë' hua'ano'sa nahuinpisopita ya'huëpi. ⁵ Napoaponaraihuë', pa'pi co noyahue' cancantopi. Co noyahue' nicacaisoráchin yonquipi ni'ton, Yosëri co noyahue' ni'nin. ⁶⁻⁷ Ina nicaton, sétérin: "Ma'marëcha piyapi acorahuë paya. Ata'huanchi nipachin. Ya'ipi pë'tahuar'o'sa', anpiantëhuano'sa', no'paquë niohuaratérinsopita, inapitarë chachin ata'huantarahuë huachi," ténin. ⁸ Napoaponahuë', Noiso nöya ni'nin.

Noi panca nancha nininso'

⁹ Noi naporinso sha'huichinquëma': Noiso Yosëíchin natéton, nöya ninin. Naporo tahuëri'sa inaíchin Yosë nohuantérinso ninin. ¹⁰ Inaso', cara hui'ninpita quëmapisáchin ya'huëtérin: Simo, Camo, Cahuito, inapita.

¹¹⁻¹² Naporo' ya'ipi isoro'paquë ya'huëpisopita nitapicancanpi. Pa'pi co noyahue' nicatona', ahuëtacaisoráchin cancantopi. Napopiso Yosëri ni'nin. ¹³ Ina nicaton, Noi itapon:

"Ya'ipi piyapiro'sa ata'huantarahuë. Pa'pi co noyahue' nipi ni'ton, piyapi'sa co huachi sano cancantopihuë'. Napoaton ya'ipiro'paquë ya'huëpisopita ata'huantarahuë huachi. ¹⁴ Quëmaso nimirinhuë', panca nancha niquë'. Yaquihuan nara quëran nisahuaton, aipi quëran, acopo quëran, to'ni pochin nininquë to'niquëtëquë'. Patoanaro'santa acotëquë'. ¹⁵ Nancha nipatan, iso pochin acoquë': Pasa cara shonca a'natérápo mitro naporopitérinso'. Cato shonca cato mitro miria pancanatérinso'. Shonca cara mitro miria inaparinso'. ¹⁶ Naporahuaton, cara pa'cotë acotëquë'. Pëirapiranso ya'cari', miria mitro aquërinquë huintana acotëquë'. Ya'coananta', a'natérán acotëquë'. ¹⁷ A'na tahuëri panca pacon a'paarahuë, ya'ipiro'pa' imotarin. Ya'ipi piyapiro'sa', ma'sharo'sa', inapita taquittapi. ¹⁸ Quëmaro'coso nimirinhuë', anoyatarahuë ni'ton, nancha tñihuatan, sa'anë'quën chachin ya'conaran. Hui'nampítanta', sa'inarë chachin

* ^{6:2} Yosë hui'ninpita topachina, ma'sona tapon naporinso': co insonta nitotérinhuë'. "Yosë imaro'sa hui'nina'", topi a'naquën.

ya'conapi. ¹⁹ Naporahuaton, ma'sharo'santa nisha nisha nipesopita quëran, a'nara quëmapi, a'nara sanapi yontonquë'. Inapitanta campita pochin cha'ëcaiso marë' yontonquë'. ²⁰ Anpiantëhuano'sa', pë'tahuar'o'sa', no'paquë niohuaratérinsopita, ya'ipi inapita catoya catoya ya'conapona'. Campitarë chachin ya'huaantacaiso marë' ya'conapona'. ²¹ Notohuaro' cosharo nisha nisha nininsopita ayontonahuaton nanchaquë po'moquë'. Campita capacamaso nisahuaton, ma'sharo'santa capacaiso marë' po'moquë', itérin.

²² Napotohuachina, Noiso' ya'ipi Yosëri camairinso chachin ninin huachi.

7

Nanchaquë ya'conpiso'

¹ Ina quëran Siniorori Noi itapon: "Ya'ipi ipora ya'huëpisopita a'porinaco. Quëmasáchin nohuantérahuëso ninan. Napoaton iporaso', sa'anë'quën chachin nanchaquë ya'conquë huachi. Hui'nampitanta', sa'inarë chachin ya'coina'. ² Chinotamacoso marë' ma'sharo'sa tēpacaiso nipesopitaso', canchisë quëmapi nisahuaton canchisë sanapi nanchaquë po'moquë'. Ya'huëre' co ina marë' nipesopitasohuë', a'nara quëmapi, a'nara sanapi inaichin po'moquë'. ³ Nisha nisha anpiantëhuano'santa', nanchaquë po'moquë'. Canchisë hua'anën, canchisë sanapinën na'antacaiso marë' po'moquë'. ⁴ Canchisë tahuëri quëran ca nohuanto o'nanapon. Catapini shonca tahuëri, tashirë chachin o'namiatapon. ¡Inapotato ya'ipi isoro'paquë acorahuësopita ata'huantarahuë!" itérin.

⁵ Noiso', ya'ipi Siniorori camairinso chachin ninin.

⁶ Noi saota pasa pi'ipitaso', paconi isoro'pa' imotérin. ⁷ Naporoi inaso', sa'inë chachin nanchaquë ya'conin. Hui'ninpitanta sa'inarë chachin cha'ëcaiso marë' ya'conpi. ⁸⁻⁹ Yosë chinotacaso marë' ma'sharo'sa tēpacaiso nipesopitanta', Noirë chachin catoya catoya nanchaquë ya'conpi. A'nara quëmapi, a'nara sanapi ya'conpi. Co ina marë' nipesopitahuënta ya'conpi. Anpiantëhuano'sa', niohuaratérinsopita, inapitanta inapochachin ya'conpi. Yosëri sha'huitérinso chachin nipi.

¹⁰ Yosëri sha'huitérinso chachin, canchisë tahuëri quëran paconi isoro'pa' imotarin huachi. ¹¹ Naporoi Noiso', saota pasa pi'i, cato yoqui, shonca canchisë tahuëritarin. Naporoi chachin isoro'pa' huëñcharoatë pochin ninin. Marënta acoporo ya'huërinso', pipimiatérin. Naporahuaton inapaquënta', i' ya'copinamën ya'huërinso' nii'soatérin. Napohuachina, pa'pi i' isoro'paquë anotimarin. ¹² Catapini shonca tahuëri tashirë chachin isoro'paquë o'namiatarin huachi. ¹³ Naporoi tahuëri chachin Noi sa'inë nanchaquë ya'conin. Hui'ninpitanta', Simo, Camo, Cahuito, inapitanta sa'inarë' sa'inarë' ya'conpi. ¹⁴ Tananquë ma'sharo'sa ya'huërisopita, pë'tahuar'o'sa nipesopita, niohuaratérinsopita, anpiantëhuano'sa', inapitanta ya'conpi. ¹⁵ Yosë nohuanton, ma'sharo'sa catoya catoya nanchaquë ya'conpi. ¹⁶ Nisha nisha nipesopita quëran, a'nara quëmapi, a'nara sanapi ya'conpi. Yosëri Noi camairinso chachin nipi. Nani ya'conpachinara, Siniorori chachin nancha ya'coananën oncorapirin huachi.

Pacon pa'ninso'

¹⁷ Catapini shonca tahuëri o'nanárin. Pamatohuachina, nanchaso no'pa quëran yanponin huachi. ¹⁸ Pamaso' aquëtë chachin mëntaintararin, nanchaso niperinhue', noya yanponarin. ¹⁹⁻²⁰ Pa'pi pacon pa'sahuaton, ina inápa motopiro'sa quëran huarë' imotérin. Inapita motopiro'sa imotahuaton, canchisë mitro aquëtë pantarin. ²¹⁻²² Naporoi ya'ipi piyapiro'sa isoro'paquë ya'huëpisopita, taquiti. Anpiantëhuano'sa', pë'tahuar'o'sa', tananquë ma'sharo'sa ya'huërinso', niohuaratérinsopita, inapitanta ta'huantopi. Ya'ipi nii o'huatona nanpipisopita, taquiti. ²³ Noisáchin cha'érin. Panca nanchaquë ya'conpisopitarë', cha'érin. A'napitaso niperinhue', ya'ipi ta'huantopi. Pë'tahuar'o'sa', anpiantëhuano'sa', niohuaratérinsopita, inapitanta ya'ipi taquiti. ²⁴ Pasa a'natérápo shonca tahuëri isoro'pa' iiri imotaton, napotérin.

8

Pacon huinquintomarino'

¹ Naporor' Yosëri Noi, ya'ipi ma'sharo'sa nanchaquë ya'huëapisopita, inapita yacatahuarin. Ina nohuanton pacon huinquintacaso marë' ihuan pa'nin. ² Co'huara huinquincháterasohuë', o'nan'ton më'tarin. Naporor' marë acoporo quëran pipirinso', nioncotérin. Inápaquë i' ya'copinamën nii'soatérinsonta inaporin. ³ Pasa a'natérápo shonca tahuëri quëran, i' pi'piyan pi'piyan huinquintomarín. ⁴ Canchisë yoqui, shonca canchisë tahuëri quëran, Ararato motopiro'sa hui'nimotënquë nanchaso', ya'mitérin. ⁵ Iscon yoqui nanirahuaton tahuëririnqüë, motopiro'sa hui'nimotëna ya'nopi huachi.

⁶ Inapita ya'nohuachinara, catapini shonca tahuëri quëran, Noiso nancha huintananën i'soatérin. ⁷ Naporor' a'nara itatan a'parin. Inaso', itohua itohua yanpo yanpónantarin. I' huinquintacaso ninaton, naporin. ⁸ Ina piquëran, Noiso' i' huinquintérinso nitotacaso marë', nëpë ya'huërë' a'paantarin. ⁹ A'papirinhuë', co intopa huënsëcasohuë ni'ton, yanpo yanpónantarin. Naporarin quëran, nanchaquë chachin huënantarin. Huëntahuachina, Noiri masahuaton po'moantarin.

¹⁰ Canchisë tahuëri quëran, naquëranchin a'paantarin. ¹¹ Nëpëso pa'sahuaton, i'huarayasha huarë' huënantarin. Oripo nara së'para'huaya monoquëñë chachin naquërahuaton quëntarin. Naporor' Noi, yaniromarino nitotérin huachi. ¹² Canchisë tahuëri quëran naquëranchin nëpë a'paantapirinhuë', co huachi huëntarinhuë'.

¹³ Noi saota pasa a'na pi'itapaso', ya'ipiro'pa' yaniromarin huachi. Caniariterinso yoquiquë, ya'natirinso tahuëri chachin, napopinchin nancha pëirapirinso oquirin. Naporor' ya'ipiro'pa' yaniromarino nocorin. ¹⁴ A'na yoqui, cato shonca canchisë tahuëri nanihuachina, ya'ipiro'pa' noyá yaniromarin huachi.

¹⁵ Naporor chachin Yosëri Noi itapon: ¹⁶ "Iporaso huachi sa'anë'quën chachin nancha quëran pipiquë'. Hui'nanpitanta', sa'inarë chachin pipiina'. ¹⁷ Ya'ipi ma'sharo'santa ocoiquë pa'ina'. Anpiantëhuano'sa', pë'tahuar'o'sa', no'paquë niohuaratérinsopita, ya'ipi inapitanta pipiina'. Notohuaro' hua'huatatona', ya'ipiro'paquë yanquë'ina', itérin.

¹⁸ Napotohuachina, ya'ipi piyapi'sa cha'ëpiso pipipi. ¹⁹ Ma'sharo'santa pipipi: Pë'tahuar'o'sa', niohuaratérinsopita, anpiantëhuano'sa', inapitanta pipipi huachi. ²⁰ Nani pipihuachinara, Noiso a'nara artaro ninin. Yosë chinotacaso marë' ma'sharo'sa têpacaiso nipisopita masahuaton, têparin. Anpiantëhuano'santa', manin. A'naya a'naya nisha nisha nipisopita quëran têparin. Têparahuaton, Sinioro chinotacaso marë' artaro aipi ya'ipi ahuiquitérin. ²¹ Ma'sharo'sa ahuiquitérinso pimóchin imërahuaton, Yosëri nöya ni'nin. Naporor' inaso tapon: "Hua'huatapona quëran huarë' piyapi'sa', co noyahue' nicacaisoráchin cancantopi. Inaso niponahuë', co huachi ipora ana'intérahuëso pochin, isoro'pa' ana'intaantapohuë'. Co huachi ma'sharo'santa inapotapohuë'.

²² Isoro'paquë ya'huapona pochin, piyapi'sa noya sha'tapona'.

Nitérinsonta macapona'.

Huënocanta ya'huërahuaton, sëhuëonta ya'huapon.

Pi'ipi tahuëri'santa nanirahuaton, o'napinta nanipon.

Tahuëri, tashi', inapitanta ya'huapon," ténin.

9

Yosë Noirë' anoyatérinso'

¹ Naporor' Noi, hui'ninpitarë chachin, Yosëri nöya yonquirapiton iso pochin sha'huitérin: "Na'a hui'nahuanatoma', ya'ipiro'paquë ya'huëco'. ² Ya'ipi ma'sharo'sa', anpiantëhuano'sa', marëquë ya'huërinopita, inapita hua'anëntarama'. Inapitaso tê'huatarinëñquëma'. ³ Carima ya'ipi inapita capamaso marë' quëtaranquëma'. Nisha nisha huërono'santa ca'co'. Ma'sona téranta nayaramaso ca'co'. ⁴ Huënaiso nipirinhuë',

ama ca'cosohuë'. Ma'sha tēpahuatama', huēnainën noyá inquitahuatoma', ca'co'. Huēnainëni ananpirin ni'ton, ama inaso ca'cosohuë'. ⁵ Canpita capiniso', co nitëpamaso ya'huérinhue'. Tēpatohuatama', ana'inta'huanquëmaso ya'huérin. Ma'sharo'sarinta piyapi tēpahuachin, ana'intarahuë. Tēpatohuatama', a'naya a'nayanquëma tēhuēnchachin ana'intaranquëma'.

⁶ Insosona piyapi tēpahuachin, a'nari i'huérétarin.

Cá pochachin nicamaso marë' acoranquëma'.

Napoaton, co nitëpamaso ya'huérinhue'.

⁷ ¡Napoaponahuë', campitaso na'a hui'nahuanatoma', ya'ipiro'paqué ya'huéco!" itérin.

⁸ Ina quëran itaantarin: ⁹ "Ni'co'. Ipora campitaro'co anoyatérahuëso', shiparimapitanta yonquiato, napotaranquëma'. ¹⁰ Ya'ipi ma'sharo'santa yonquiato napotaranquëma': Anpiantéhuano'sa', pë'tahuar'o'sa', tananquë ma'sharo'sa ya'huérinso', nisha nisha nipesopita nancha quëran pipipiso yonquiato, sha'huitaranquëma'. ¹¹ Ipora campitaro'co anoyatato sha'huitéranquëmaso', co onporonta nishataponhuë'. Co huachi piyapi'sa', ma'sharo'sa', inapita pacon quëran ata'huantaantapohue'. Co huachi paconi isoro'pa' ata'huantaantapohue'.

¹²⁻¹³ Campitarë'co nani anoyatomiatérahuë. Ma'sharo'sarë'conta', nani anoyatérahuë. Ina yonquicamaso marë' yahua'tanéhuë inápaqué acoarahuë. ¹⁴ Chitoro inápaqué ya'nohuachin, yahua'tanéhuënta ya'noarin. ¹⁵ Naporo' campitaro'co anoyatato sha'huitéranquëmaso', yonquiarahuë. Ama huachi i' quëran, isoro'pa' ata'huaanta'huaso marëhuë', yonquiarahuë. ¹⁶ Yahua'tan chitoroquë ya'nohuachin ni'sarahue. Ina ni'pato, ya'ipi piyapi'sarë'co ya'ipi ma'sharo'sarë'co anoyatérahuëso', ayonquiarinco. ¹⁷ Nani ina acorahuë ayonquiinpoaso marë'. Campitarë'co anoyatérahuëso ayonquiarinpoa'. Ma'sharo'sarë'conta anoyatérahuëso ayonquiarinpoa', itérin. Ina pochin Yosëri Noi sha'huitérin.

Noi hui'ninpitarë' naporinso'

¹⁸ Noi hui'ninpita nancha quëran pipipisopita, iso nápo ya'huépi: Simo, Camo, Cahuito, inapita. Camoso', a'nara hui'nin ya'huétérin. Inaso', Canaan itopi. ¹⁹ Caramiáchin Noi hui'ninpita niperinahuë', inayaquéranchin isoro'paqué piyapi'sa na'antapi. ²⁰ Ina piquérän Noi iminaton, inaquë opasáchin shacaton, oparotérin. ²¹ A'na tahuëri Noi huino o'oton, no'pirin. No'piton, në'mëtë pëinën huáncana notataton, i'nanpirashité quëhuéánin. ²² Camoso', inaquë ya'conahuaton ni'pirinhuë', pa'pin no'piton huë'ësárin quénanconin. Quénanahuaton iiinpita sha'huitapon pa'nin: "Tata no'piton i'nanpirashité quëhuéánin ni'conahuë," itérin. (Nani sha'huirahuëso chachin Camoso', Canaan pa'pin.) ²³ Ina natanahuatona', Simo, Cahuito, inapitaso a'nara a'mopiso mapi. Ina masahuitona', niimopitopi. Niimopitopiquéranchin, pinëna quëran ya'conatona', pa'pina imotopi. Niquë notëtopi ni'ton, co pa'pina ni'pihuë'.

²⁴ Noi nonatohuachina, hui'nin hua'hua nininsoari, napotérinso natantérin.

²⁵ Natantahuaton, Canaan itapon:

"¡Tata tēhuérin ni'ton, pa'pi co noyahuë' nicatënquëen co huachi noya ya'huécamaso marëhuë' sha'huitaranquën!"

Yosë chiníquëni ana'ichinquëni.

Ipora quëran huarë' iyaro'sa camaiáponquëni.

Shiparimapitanta inaporápona', itérin.

²⁶ Ina quëran taantarín:

"Sinioroso', Yosënéhuë. Inari Simo noya nicaton noya ya'huécaso marë' catahuain.

Canaanso', Simo piyapinëni niin.

²⁷ Yosë nohuanton, Cahuito, pancana hua'anëñchin.

Simo ya'huérinquë noya ninicatona ya'huë'ina'.

Canaanso', Cahuito piyapinën niin," tēnin.

²⁸ Pacon pa'ninso piquëran, Noiso' cara pasa a'natérápo shonca pi'ipi ya'huaantarin.
²⁹ Ya'ipiya quëran iscon pasa a'natérápo shonca pi'i icanin. Ina piquëran chiminin huachi. Ina pochin Noi ninin.

10

Noi shinpita napopiso'

¹ Iporaso', Simo, Camo, Cahuito, inapita shinpita napopiso sha'huichinquëma'. Pacon pa'ninso piquëran hui'nahuanatona na'antapiso', sha'huichinquëma'. Simo, Camo, Cahuito, inapitaso nani sha'huirahuëso chachin, Noi hui'ninpita.

² Cahuito hui'ninpitaso', isopita: Comiri, Macoco, Matai, Capano, Toparo, Misico, Tirasi, inapita. ³ Comiri hui'ninpitanta': Asiquinasi, Nipato, Tocarama, inapita. ⁴ Capano hui'ninpitanta': Inisi, Tarsis, Quitimo, Notanimo, inapita. ⁵ Ina nápo Cahuito hui'ninpita, shinpita inapita ya'huëpi. Inapitaso', marë yonsano'sa parti, ya'huëpi. Inatohua ninanoro'sa ocoirahuatona', a'naya a'naya nacionënaquë, a'na huënton a'na huënton, nisha nisha ya'huëpi. Inahuara no'panënaquë ya'huëpi. Naporahuatona', inahuara nonpiso nananquë nonatona', ya'huëpi.

⁶ Camo hui'ninpitanta isopita: Coso, Misiraimo, Oto, Canaan, inapita. ⁷ Coso hui'ninpitanta': Sipa, Apira, Sapota, Naama, Sapitica, inapita. Naama hui'ninpitanta': Sipa, Titan, inapita. ⁸ Cososo', a'na hui'nin ya'huëtérin anta', inaso', Nimoroto itopi. Ina'ton chini chiníquen nanantaton, isoro'paquë hua'an ya'conin. ⁹ Nimorotoso Siniorori catahuarin ni'ton, pa'pi míso inantérin. Napoaton piyapi'sa nonpachinara pa'yatopi napocaiso': "Siniorori Nimoroto catahuarin ni'ton, míso inantérin. Inapochachin quëmanta catahuainquën," topi. ¹⁰ Nimoroto hua'anentérin no'paquë, ninanoro'sa panca panca nipesopita, isopita ya'huërin: Papiri, Irico, Acato, Carini, inapita. Inapita ninanoro'saso', Sinaro parti ya'huëpi. ¹¹ Ina parti quëran Asoronta pipirahuaton, ninanoro'sa ocoirin: Ninhui, Niopoto-iri, Cara, inapita itopiso'. ¹² Naporahuaton, Nisin ninanonta ocoirin. Inaso', panca ninano'. Ninhui, Cara, inapita ninanoro'sa huáncana ya'huërin.

¹³⁻¹⁴ Misraimo shinpitaso': Notoro'sa', anamoro'sa', niapiro'sa', napotoro'sa', patrosoro'sa', casonoro'sa', capotoro'sa', inapita. Capotoro'sa quëran huiristino'sa pipipi.

¹⁵ Canaanso', paninan hui'nahuanpachina, Siton itérin. Ina quëran hui'nahuaantahuachina, Iti, itérin. ¹⁶⁻¹⁸ Canaan shinpitanta isopita: Quiposoro'sa', amororo'sa', quiriquiro'sa', iporo'sa', arasiro'sa', siniro'sa', arapatiro'sa', simariro'sa', amatiro'sa', inapita. Ina piquëran Canaan huëntono'sa niquë niquë yanquëepi. ¹⁹ Canano'sa no'pa' hua'anentopiso', Quiraro parti huarë' icanin. Siton ninano quëraonta', Casa ninanoquë huarë' icanin. Naporahuaton, Sotoma, Comora, Atoma, Sipoin, inapita ninanoro'sataquëchin no'pa' mapi. Nasa ninanoquë huarë' no'pa' hua'anentopi. ²⁰ Ina nápo Camo hui'ninpita, shinpita inapita ya'huëpi. A'naya a'naya nacionënaquë, a'na huënton a'na huënton, nisha nisha ya'huëpi. Inahuara no'panënaquë ya'huëpi. Naporahuatona', inahuara nonpiso nananquë nonatona', ya'huëpi.

²¹ Cahuito iin mashonënso', Simo itopi. Inanta', hui'ninpita ya'huëtérin: Ipiri hui'ninpitaso', Simo shinpita nipi. ²² Simo hui'ninpita isopita ya'huëpi: Iramo, Asoro, Arapasato, Noto, Aramo, inapita. ²³ Aramonta hui'ninpita isopita ya'huëpi: Osi, Ori, Quitiri, Masi, inapita. ²⁴ Arapasatonta', Saro pa'pin. Saronta', Ipiri pa'pin. ²⁵ Ina quëran Ipirinta cato hui'ninpita ya'huëtérin: A'naso', Piriqui itopi. Naporahuatona' piyapi'sa itohua itohua yanquëepi ni'ton, ina pochin ninihuanin. Iya'huainta Cotano itopi. ²⁶⁻²⁹ Cotanoso', iso nápo hui'ninpita ya'huëtérin: Aromota, Siripi, Asaromapi, Quira, Atorambo, Osaro, Tiquira, Oparo, Apimairo, Sipa, Opiro, Apira, Copa, inapita. ³⁰ Inapitaso Misa parti ya'huërahuatona', Sipari parti huarë' ya'huëpi. Ina partiso',

motopiro'saráchin niconin. Cortanii' quëran, pi'i pipirinso parti ya'huërin. ³¹ Ina nápo Simo hui'ninpita, shinpita, inapita ya'huëpi. A'naya a'naya nacionënaquë, a'na huënton a'na huënton, nisha nisha ya'huëpi. Inahuara no'panënaquë ya'huëpi. Naporahuatona', inahuara nonpiso nananquë nonatona', ya'huëpi.

³² Ina nápo Noi hui'ninpita quëran pipipi. Nisha nisha huënton nipesopita. Nisha nisha shimashonëna quëran pipitona', nisha nisha parti no'pa' hua'anëntopi. Pacon pa'ninsopita piquëran itohua itohua yanquëpi. Yanquërahuatona', nisha nisha naciono'sa isoro'paquë ya'huërinso ocoipi.

11

Nisha nisha nananquë Yosëri anoninso'

¹ Pacon piquëran notohuaro' piyapi'sa na'antapi. Naporo' ya'ipiya a'na nananquësáchin nonpi. ² Pi'i pipirinso parti quëran pipirahuatona', Sinaro parti canquipi. Inaso no'pa', noyápiro'tëchin ni'ton, inaquë ya'huëcaiso marë' quëparitopi.

³ A'na tahuëri inahua capini ninontatona', napopi: "Huëco pa'ahua', natëricho no'pa quëran nicatëhua', a'pëahua'", nitopi. Ina nisahuatona', natëricho quëran na'pi ya'huërenamën pëipi. Achinpitacaiso marënta', to'ni pochin nininquë achinpitopi. Siminto pochin nininsopita piquëran ninontaantapi: "Huëco chiníquën cancantatëhua', ninano ocoia'ahua'. Ina nisahuatëhua', a'na torinta pi'iro'tëquë huarë' nincaninsopita niahua'. Inapoatëhua', sacóshin nahuinarihua'. Naporahuatona, co huachi itohua itohua yanquëcaso ya'huaponhuë'", nitopi.

⁵ Napopirinahuë', Sinioroso o'marin. O'marahuatón ninano', tori, inapita nisapiso ni'quimarin. ⁶ Ni'quimarahuatón, yonquirin: "Isopitaso inaquësáchin ya'huatona', ina nananquësáchin nonpi ni'ton, nani caniaritopi sacatacaso'. Po'pachinara, co incari téranta nanitarinhüe atanapitacaso". ⁷ Napoaton acopitacaso marë', pa'matëhua nonpiso anishatahua'. Ama huachi ninatanacaiso marëhuë', napotahua'", ténin. ⁸ Inapotaton, Siniorori piyapi'sa itohua itohua ayanquëërin. Ninano nisapisonta a'porahuatona', tananpitopi huachi.

⁹ Inaquë chachin Siniorori, ya'ipi piyapi'sa nonpiso anishatërin. Ina quëran chachin, ya'ipi isoro'paquë ayanquëërin. Napoaton ina ninanoso', Papiri* itopi.

Simo shinpita napopiso'

¹⁰ Simo shinpita napopiso sha'huichinquëma'. Pacon pa'ninsopita piquëran cato pi'ipitason. Simo pasa pi'ipitarin. Naporo' a'nara hui'nin nasitërin. Nasitohuachina, Aropasa, itërin. ¹¹ Ina piquëran Simoso', a'natérápo pasa pi'i aquëtë ya'huantarin. A'napita hui'ninpítanta quëmapi'sa', sanapi'sa', ya'huëtërin.

¹² Aropasa cara shonca a'natérápo pi'ipitason. hui'nin nasitërin. Nasitohuachina, Saro itërin. ¹³ Ina piquëran Aropasaso', catapini pasa cara pi'i aquëtë ya'huantarin. A'napita hui'ninpítanta quëmapi'sa', sanapi'sa', ya'huëtërin.

¹⁴ Saro cara shonca pi'ipitason. hui'nin nasitërin. Nasitohuachina, Ipiri itërin. ¹⁵ Ina piquëran Saroso', catapini pasa cara pi'i aquëtë ya'huantarin. A'napita hui'ninpítanta quëmapi'sa', sanapi'sa', ya'huëtërin.

¹⁶ Ipiri cara shonca catapini pi'ipitason. hui'nin nasitërin. Nasitohuachina, Piriqui itërin. ¹⁷ Ina piquëran Ipiriso', catapini pasa cara shonca pi'i aquëtë ya'huantarin. A'napita hui'ninpítanta quëmapi'sa', sanapi'sa', ya'huëtërin.

¹⁸ Piriqui cara shonca pi'ipitason. hui'nin nasitërin. Nasitohuachina, Nio itërin. ¹⁹ Ina piquëran Piriqui cato pasa iscon pi'i aquëtë ya'huantarin. A'napita hui'ninpítanta quëmapi'sa', sanapi'sa', ya'huëtërin.

* ^{11:9} Papiriso': "Co ninatananpiquëhuë", tapon naporin.

20 Nio cara shonca cato pi'ipitaso', hui'nin nasitérin. Nasitohuachina, Siroco itérin. **21** Ina piquéran Nioso', cato pasa canchisë pi'i aquëtë ya'huaantarin. A'napita hui'ninpita quëmapi'sa', sanapi'sa', ya'huëtérin.

22 Siroco cara shonca pi'ipitaso', hui'nin nasitérin. Nasitohuachina, Nacoro itérin. **23** Ina piquéran Sirocoso', cato pasa pi'i aquëtë ya'huaantarin. A'napita hui'ninpita quëmapi'sa', sanapi'sa', ya'huëtérin.

24 Nacoro cato shonca iscon pi'ipitaso', hui'nin nasitérin. Nasitohuachina, Tari itérin. **25** Ina piquéran Nacoroso', pasa shonca iscon pi'i aquëtë ya'huaantarin. A'napita hui'ninpita quëmapi'sa', sanapi'sa', ya'huëtérin.

26 Tari canchisë shonca pi'ipitaso', hui'nin paninantérinso nasitérin. Ina quëran cato hui'ninpita ya'huëtaantarin. Hui'ninpitaso': Apran, Nacoro, Aran, inapita.

Tari, naporinso'

27-28 Sha'huitérinquëmaso chachin Tari hui'ninpitaso', isopita: Apran, Nacoro, Aran, inapita. Aran hui'ninsö', Noto itopi. Aranso', Orë ninanoquë chiminin. Ina ninanosö', Cartia parti ya'huërin. Co'huara pa'pin chiminyátérasohuë', chiminin. Hua'huatérinso ninanoquë chachin naporin. **29** Apranso', Sarai manin. Nacoronta', Mirica manin. Miricaso', Aran hui'nin. Inaso', a'nara caipayain ya'huëtérin, Isca itopiso'. **30** Saraiso co hua'huana'pihuë ni'ton, co hua'huanihuë'.

31 Tariso', Orë ninano quëran pipirin. Cartioro'sa ya'huërin quëran pipirahuaton, Canaan parti chinoton, pa'nin. Hui'nin Apran itopiso Sarairë chachin quëparin. Naporahuaton, shionta Noto itopiso quëparin. Pa'sapirinahuë', Aran ninanoquë canconpachinara, inaquë quëparitonpi. **32** Inaquë ya'huëasoi', Tariso chiminin. Cato pasa a'natérápo pi'ipitaso chiminin huachi.

12

Piyapinënpita shimashonën nicacaso marë' Yosëri Apran acorinso'

1 A'na tahuëri Siniorori Apran itapon: "Ya'huëran quëran pipimiatëquë". Quëmopinënpita, tataparin ya'huërinso no'pa', inapita patëquë'. A'na no'pa' carinquën a'notaranquë. Inaquë ya'huëconquë huachi. **2** A'na tahuëri ca nohuanto, shiparinpita panca nacion ocoiapona'. Carinquën catahuamiataranquë. Inapotaranquëni'ton, sacóshin nahuinaran. Naporahuaton, quëmá quëran a'napitanta catahuuararahuë. **3** Inpitasona noya nicaténen catahuahuachinën, carinta inapita inapotarahuë. Inpitasona co huachi noya ya'huëcamaso marëhuë' sha'huitohuachinën, carinta inapita napotarahuë. Quëmá quëran, ya'ipi piyapi'sa nisha nisha nipesopita catahuuararahuë," itérin.

4-6 Apranso Yosëri sha'huitérinso chachin, Aran ninano quëran pipirin. Canaan parti paacaiso marë' pipirin. Canchisë shonca a'natérápo pi'ipitaso napoarin. Sa'inë chachin pa'nin. Sa'insö', Sarai itopi. Apin Noto itopisonta', quëparin. Ya'ipi ma'shanënapitarë chachin pa'pi. Piyapinënpitanta quëmapi'sa', sanapi'sa asacatacaso marë' Aranquë pa'anpiso', quëpapi. Ya'ipi quiquipi. Canaan parti canconpachinara, Apranso piyapinënpitarë chachin ya'ipi ina no'pa' pa'tatona', pëntontopi. Siquimo ninanoquë huarë' canconpi. Inaquë panca insina nara ya'huërin. Ya'huëhuano'sa mamanshinëna moshapiquë ni'ton: "Mori insina," itopi. Ina parti naporo canano'sa ya'huëapi. **7** Inaquë Siniorori, Apran ya'notahuaton, itérin: "Ya'ipi iso no'pa', shiparinpita quëtarahuë hua'anëntapona'," itérin. Naporo chachin Apran Sinioro chinotacaso marë' a'nara artaro ninin. Inaquë ya'notërin ni'ton, chinotérin.

8 Ina quëran motopiro'sa parti pa'pi. Ina motopiro'saso', Pitiri ninano quëran, pi'i pipirinso parti quëparitérin. Inaquë në'mëtë pëiro'sa otënpí ya'huëcaiso marë'. Pitiri ninanosö', pi'i ya'coninso parti acorahuatona', Ai ninanonta', pi'i pipirinso parti acopi. Ina huancánachin ya'huëipi. Inaquë naquëranchin Apran Sinioro chinotacaso marë' a'na

ya'huérë' artaro niantarin. ⁹ Ina piquëran Apran piyapinënpitarë chachin paantapi. Oshaquëran pa'sápatona', Niquipi parti canconpi.

Apran Iquipitoquë pa'nins'

¹⁰ Naporo tahuëri'sa ina parti panca tanarotopi. Napoaton Apran piyapinënpitarë chachin Iquipito parti yacapatacaiso marë' pa'pi. Ya'huépique co manta capacaiso ya'huérinhue' ni'ton, inatohua pa'pi. ¹¹ Iquipito no'paquë ya'caritohuachina Apranso', Sarai itapon: "Ni'quë', quëmaso tëhuëñchachin noyápiroyanchinquën. ¹² Iquipitoro'sa ni'pachinëñ noyaponëñ nimara: 'Isoso quëmapi, paso sanapi so'in,' ta'tona', caso tëpaponaco. Quëmaso nimirinhue', macainëñquëñso marë' co tëpaponënhue'. ¹³ Napoaton ama quëma na'in quëran tëpainacoso marëhuë': 'Isoso yo'yohuë,' tëquë', topirahuë," itérin.

¹⁴ Iquipito no'paquë Apran camahuachina, Iquipitoro'saso Sarai ni'sahuatona', pa'yatopi: "Ma noyápiroyanchinchay paya," topi. ¹⁵ Iquipito copirnoso', "huaraon" itopi. Ina catahuapisopita hua'ano'santa', Sarai ni'pi. Ni'sahuatona', noyápiroyanchin nininso hua'anëna sha'huitonpi. Natanahuaton huaraonso': "Quëshico," ténin. Napoaton Saraiso', ina pëinëñquë quëpapi. ¹⁶ Sarai marë' huaraonso', Apran pa'pi payarin. Nani ma'sha topinan quëtérin. Ohuicaro'sa', ohuacaro'sa', camiyoro'sa', moraro'sa', inapita quëtérin. Naporahuaton piyapinënpita camaicaso marë' quëmapi'sa', sanapi'sa', quëtérin.

¹⁷ Napoaponahuë', Sarai na'inin ni'ton, Yosëri huaraon ana'intérin. Sa'in, hui'ninpitarë chachin chiníquëñ canio quëran ana'intérin. ¹⁸ Napoaton Apran amataton, itapon: "¿Onpoatonta napotéranco? ¡Iso sanapi sa'an nimirinhue', sha'huichitonco pora! ¹⁹ 'Oshihuë' ténanso marë', cari shimanahuë. ¡Ma'tana sa'an, macaton quëpaquë huachi!" itérin. ²⁰ Napotahuaton piyapinënpita camairin: "¡Apran, sa'inë chachin ocoico pa'in. Ma'shanënpitanta quëpa'in!" itérin.

13

Apran, Notorë' nia'popiso'

¹ Apranso sa'inë chachin Iquipito quëran pipirin. Ma'shanënpitarë chachin Niquipi parti huënantatona ya'huéinantapi. Apin Noto itopisonta', inarë chachin huënantarin. ² Apranso', notohuar'o' oro, prata, pë'tahuar'o'sa', inapita ya'huëtaton pa'pi ma'huan. ³ Niquipi parti quëran oshaquëran pa'sápatona', Pitiri ninanoquë huarë' huënantapi. Ina quëran paantarahuatona', ihua ya'huérinquë chachin ya'huéinantapi. Pitiri ninano', Ai ninano', inapita ninanoro'sa huáncana ya'huéinantapi. ⁴ Ihua artaro nininquë chachin, Siniro chinotaantarin. ⁵ Notonta', apin pochachin pa'pi ma'huan. Notohuar'o' ohuicaro'sa', ohuacaro'sa', inapita ya'huëtérin. Piyapinënpitanta na'a ya'huëtérin. ⁶ Nimirinhue', notohuar'o' pë'tahua ya'huëtopi ni'ton, co huachi pasto nanirinhue pë'tahuar'o'sa capacaiso'. Napoaton co huachi nanitopihuë cato chachin inaquéráchin ya'huëcaiso'. ⁷ Apran pë'tahuanëñ a'paipisopita, Noto pë'tahuanëñ a'paipisopitarë', pasto niapiratatona yánino'huipi. Naporoso', canano'sa', huirisiro'sa', inapitanta inaquë chachin ya'huërapí.

⁸ Napoaton a'na tahuëri Aprani Noto itapon: "Canposo', quëmopinpo ninë'. Co canpo capini nino'huicaso ya'huérinhue'. Co piyapinënpopitanta', nino'huicaso ya'huérinhue'. ⁹ Niquë niquë nipachin, ya'huëa'a. Ni'quë'. No'paso panca ya'huërin. Inséquësona ya'huëcamaso marë' nohuantéränquë, quëma huayonquë'. Pë'natë parti huayonpatan, caso pëtëte parti pa'sarahuë. Pëtëte parti huayonpatan, caso pë'natë parti pa'sarahuë," itérin. ¹⁰ Natanahuaton Notoso', motopia'hua quëran, Cortanii' yonsan noyarotomarinso nocorin. Sohuaro ninanoa'huaquë huarë' notérinso' icanin. Inaquëso', notohuar'o' i' ya'huërin ni'ton, pa'pi noyaro'pa' ninin. Siniro sha'térinquë pochin ni'ton, Iquipito no'pa' pochin ninin. (Ina pochin iráca ina no'pa' nimirinhue', co'huara Siniro Sotoma,

Comora, inapita ninanoro'sa ata'huanchátérasohue', naporin.) ¹¹ Ina ni'sahuaton, Notoso ya'ipi ina no'pa' huayonin. Inaso no'pa', pi'i pipirinso parti ya'huérin. Inapoatona', Apran Notore' nia'popi. ¹² Apranso', Canaan parti quëparitérin. Notoso', Cortanii' yonsan ninanoro'sa parti ya'huéconin. Sotoma ya'cariya ya'huéconin. ¹³ Inaquëso', ya'huéhuano'sa pa'pi co noyahuë' nipi. Inapoatona oshahuanpi ni'ton, Yoséri no'huípiro ni'nin.

¹⁴ Noto pa'pachina, Siniorori Apran ya'notaton itapon: "Huaniran quëran ya'ipi parti notetéquë": Pë'natë parti, pëtëtë parti, pi'i pipirinso parti, pi'i ya'coninso parti, ya'ipi inaquëpita noteton, noya ni'quë'. ¹⁵ Ya'ipi no'pa' ni'nanso', carinquën hua'anëntacaso marë' quëtaranquë. Quëmari hua'anëntomiataran. Naporahuaton, shiparinpitarinta hua'anëntomiatapona'. ¹⁶ Ca nohuanto shiparinpita pa'pi notohuarro' na'amiatapona'. Mo'shi co pichicasohue' ninin. Inapochachin shiparinpitanta co onpo pichicasohue' na'apona'. ¹⁷ Iporaso', paaton ya'ipi iso no'pa' pa'téquë'. Itohua itohua pa'téquë'. Carinquën quëtaranquë ni'ton, inapotéquë", itérin.

¹⁸ Ina natanaahuaton, Apranso piyapinënpitarë chachin në'mëtë pëiro'sa ótënpiso mapi. Masahuatona', insina nararoquë pa'pi. Inaquë pa'sahuatona', ya'huëconpi huachi. Ina nararoso', Mamiri itopisoari hua'anëntérin. Ipron ninano ya'cariya inaso'. Inaquë Apran Sinioro chinotacaso marë' a'na artaro niantarin.

14

Aprani Noto nicha'ërinso'

¹ Napor' Misopotamia parti: Sinaro ro'téquë, Amarahuero itopiso' copirno nisarin. Irasaro ro'téquënta', Arioco itopiso copirno nisarin. Iran ro'téquëso nípirinhuë', Quitaraomiro itopiso copirno nisarin. Coimo ro'téquënta', Titaro itopiso copirno nisarin. ²⁻³ Inapitaso', isopita a'natérápo copirnoro'sarë', niinimicotatona niahuerápi: Pira, Pirsa, Sinapo, Simipiri, inapita itopisoarë' niahuerápi. Piraso', Sotoma ninano copirno. Pir-santa Comora ninano copirno. Sinaposo nípirinhuë', Atoma ninano copirno. Simipirinta Sipoin ninano copirno. Pira ninanoa'huá copirnonta', inapita catahuarin. (Pira ninanoa'huaso', Soaro itopi anta'.) Inapitarë', a'natérápo copirnoro'sa', Sitin motopiana itopiquë, sontaronënapita yontonpi ahuétacaiso marë'. Inaso motopiana, Chimirii' marë parti quëparitérin. ⁴ Ina nápo copirnoro'sa chachin Quitaraomiro iráca canaton, shonca cato pi'ipi camairin. Napoaponahuë', ina pi'i niantarinquë a'natérápo copirnoro'saso napopináchin yonquiatona', Quitaraomiro yaahuëpi huachi. ⁵ Ina pi'i huéantarinquë Quitaraomiroso', cara copirno catahuarinsopitarë chachin, huéantarín. Asotaroto Carnain parti hué'sahuatona', nihuaimoro'sa canaipi. Ina quëran sosiro'sa ya'huérë', An nianquo'ya'huépisopita canaantapi. Imiro'santa', Sapi-quiritain nianquo'ya'huépisopita canaantapi. ⁶ Orioro'santa Séir motopiro'saque canatona', Ir-paran nianquo'ya'huépisopita canaantapi. ⁷ Quitaraomiroso cara copirno catahuarinsopitarë chachin tahuéréantarahuatona', In-mispa nianquo'ya'huépisopita canaantapi. Ina nianoso', Catisé itopi anta'. Huéantapona pochin amaricoro'sa ya'huériso parti tiquitëriapi. Naporahuaton amororo'santa', Asison-tamarqué ya'huépisopita inapotopi.

⁸⁻⁹ Naporiatona', Sitin motopianaque canquipi huachi. Napor' Sotoma, Comora, Atoma, Sipoin, Pira, inapita ninanoro'sa copirnonënaso', inaquë pa'mapi. Sontaronënapitarë chachin pa'mapi. Inaquë inapita a'natérápo copirnoro'saso', Quitaraomiro, catahuarinsopita, inapitarë' niahuerápi huachi. ¹⁰ Ya'ipi Sitin motopianaque, notohuarro' to'ni pochin nininso' posoro'sa ya'huérin. Napor' quira nipachinara, Sotoma, Comora, inapita copirnoro'sa', piyapinënapitarë chachin ta'api. Ta'apirinahuë', ina posoro'saque anotopi. A'napita cara copirnoro'saso nípirinhuë', motopiro'sa ta'atopi.

¹¹ Canatoro'saso', Sotoma, Comora inapita ninanoro'saquë ya'conpi. Inaqué ya'conatona', cosharo', ma'sharo'sa pa'ton nininsopita, inapita ya'ipi macatona quiquipi. ¹² Sotomaquë, Apran apin Notonta', ya'huérin ni'ton, inanta quëpapi. Ya'ipi ma'shanënpitarë chachin quëpapi. ¹³ Napoapónahuë', a'nara quira quëran cha'ërahuaton, Apran sha'huitapon pa'nin. (Apranso', iprio* piyapi itopi.) Naporó inaso', Mamiriri hua'anentérinso insina nararoquë ya'huérarin. Mamiriso', amoro piyapi. Iin mashonënpitaso': Aniri, Iscoro, inapita. Inapitaso' Apran payatona', catahuapi.

¹⁴ Apranso apin quëpapiso natantahuaton, piyapinënpita natëtono'sa nipiso huayonin. Inapitaso', pëinënqué chachin hua'huatatona so'sopiso'. Ayontonpachina, cara pasa shonca posa quëmapi'sa ya'ipiya quëran icanpi. Inapitarë', Apran pa'nin copirnoro'sa imacaso maré'. Tano ninanoa'huauquë huarë' imarin. ¹⁵ Pa'sahuatona', inimicoro'sa quënanconpi. Yono tashi nisahuaso', ya'copirahuatona', ahuëpi. Copirnoro'sa canarahuatona', imapi. Opa ninanoquë huarë' imapi. Ina ninanosó, Tamasco ninano quëran norti parti quëparitérin. ¹⁶ Inapoatona', ya'ipi ma'sha quëpapiso' matopi. Notonta nicha'ërahuatona', ya'ipi ma'shanënpitanta quëpatopiso', mataantarín. Naporahuaton, na'a piyapiro'sa nicha'érin. Sanapi'santa quëparapirinahuë', nicha'érin.

Miriquisi Apran nacapirinso'

¹⁷ Apranso' Quitaraomiro canarin. Cara copirno catahuarinsopitarë chachin canarin. Inapita canarahuaton huénantarín. Huëntaso', Sotoma copirnori nacapirin. Sapi motopianaque' nacapirin. Inaso', "copirno motopiana," itopi anta'. ¹⁸ A'na copirnointa', Apran nacapirin. Inaso', Miriquiso itopi. Sarimoqué copirno ya'conahuaton, corto hua'an nimantarin. Yosë chini chiníquën nanantérinso maré' sacatérin. Inaso Apran a'carahuaton, huinonta o'shitérin. Piyapinënpitanta', a'carin, o'shitérin, napotérin. ¹⁹ Nani a'carahuaton, Miriquisi Apran iso pochin sha'huitérin: "Yosë chini chiníquën nanantérinso', catahuainquën.

Inaso', pi'iro'të', isoro'pa', inapita acorin.

²⁰ ¡Ma noyacha Yosëso chini chiníquën nanantérin paya! itahua'.

Ina nohuanton, inimiconënpita minséran," itérin.

Naporó Aprani inimicoro'sa ma'sha matérinso', shonca quëran a'nara Miriquiso quëtérin. Inaso', diesmo itopi.

²¹ Ina piquéran Sotoma copirnori, Apran itapon:

—Piyapi'sara' quëtoco, ya'huérë' ma'shaso', quëmari maquë', itérin.

²²⁻²³ Napotopirinhuë', Apraniso' itapon:

—Yosë chini chiníquën nanantaton, pi'iro'të', isoro'pa', inapita acorin. Ina ni'sárinco ni'ton, co pi'shi térranta', co sapatë nonin térranta caora maré' macapohuë': "Cari, Apran ama'huanahuë." Ama técamaso maréhuë', co macapohuë'. ²⁴ Caso caora maré' co manta nohuantérahuë'. Piyapinëhuépita ca'pisoíchin téhuéñchinso', nani matatë pochin nitérinquen. Naporahuaton, Aniri, Iscoro, Mamiri, inapitanta ahuëta'huaso', catahuari-naco. Inapita téhuéñchinso' ma'sha mapiso', onpopionta macacaiso ya'huérin, itérin.

15

Yosë, Apranë anoyatérinso'

¹ Ina piquéran Siniorori, Apran ya'notérin. Co huë'ëponahuë', hua'narëso pochin nontérinso' natanin:

—Apran, ama té'huaquësohuë', carinquen pa'poyaranquen. Panca acanamiataranquen, itérin. ²⁻³ Napotopirinhuë', Apraniso' itapon:

* ^{14:13} Iprioso': Nisha nisha tapona ina pochin nohuitopi. Co nitotéréhuahuë' ma'chachinsona tapon napopiso'. A'naquénso': "Ipri shinpita ni'ton, napa nohuitopi," topi.

—Sinioro. Quëmaso Yosënquën. Panca acanamiatopirancohuënta', co hui'nahue ya'huëtérincohuë' ni'ton, topinan quëran nisarin. Co a'naya téranta hui'nahue quëtérancouë ni'ton, piyapinëhuë Iriséro itéraiso ya'huërtaponco. Inaso Tamasco piyapi nimirinhue', chiminpato ya'huërtaponco, itérin. ⁴ Siniororiso nimirinhue', itapon:

—Co ina ya'huërtaponquënhue'. Hui'nan chachin ya'huërtaponquën, itérin.

⁵ Itahuaton, né'mëtë pëinën quëran ocoirin. Ocoirahuaton, sha'huitérin:

—Pi'iro'të né'përahuaton, tayloraro'sa pichiquë'. Nanitohuatan pichiquë'. Ina nápo shiparinpita ya'huëtarinquën, itérin. ⁶ Naporinso natanahuaton: "Yosë no'tequën nontérinco," ténin Apran. Naporinso marë' Siniorori noya ni'nin huachi. ⁷ Napoaton itapon:

—Caso Sinioroco. Orë ninano quëran ocoiranquën. Inaquëso cartiaro'sa ya'huërin. Iso no'pa' quëtaranquën hua'anëntomiatacaso marë', itérin.

⁸ —¿Onporahuatota hua'anëntomiata'huaso nitotapo? ténin Apran.

⁹ —A'nara ohuaca', a'nara capra, a'nara carniro, inapita cara pi'ipitopiso' quëshico. Naporahuaton, a'nara nëpë', a'nara pë'tahua nëpëa'hua', inapitanta quëshico, itérin Yoséri. ¹⁰ Aprani, inapita ma'sharo'sa Yosë quëshirin. Tëparahuaton huancánachin nichatéra'piarin. Nichatérinsopita, cato pashinqué ya'carisha acorahuaton, anotéra'piarin. Inairaro'saso nimirinhue', co nichatérinhue'. ¹¹ Ma'sha tëparinsopita, capita marë' tamëro'sa o'mapirinahuë', Apraniso a'parárin.

¹² Nani tashiahuachina, Apranso' noyá huë'ëtérin. A'nanaya pa'pi tashirori imotérin ni'ton, të'huatérin. ¹³ Napororo' Siniorori itapon:

—A'na tahuëri shiparinpita, nisharo'sataquë yacapatapona'. Inaquë piyapitaton'a, camaiyapona'. Aparisitapona'. Catapini pasa pi'i inapoapona'. ¹⁴ Cariso nimirinhue', aparisitérinsopita ana'intarahuë. Ina piquëran shiparinpita, noya cha'ëpona'. Ma'huano'sa pipipona'. ¹⁵ Quëmaso nimirinhue', noyá mashoya nicama huarë' chimi-napon. Co parisitaranhue'. Inapoaton shimançonpita quënancoanan. ¹⁶ Catapini shin-pita huënton, ya'huërin piquëran, shiparinpita isëquë chachin huëntapona'. Amororo'sa co noyahue' nipo', co aquëtë huarë' nishatérarinahuë'. Napoaton napororo tahuëri'sa huarë' ana'intarahuë huachi.

¹⁷ Nani tashihuachina, a'nanaya orno conai' tomontárinso ya'norin. Naporahuaton, panca yanatëtë pochin pën orótahuaton, ma'sharo'sa nichatérinsopita huáncana, na'huërin. ¹⁸ Napororo tahuëri chachin, Sinioro Apranë anoyatérin. Anoyataton itapon:

—Shiparinpita iso no'pa' quëtarahuë: Iquipito i' quëran huarë' Iopiratisii' pancaip'a', hua'anëntopiso naniarin. ¹⁹⁻²¹ Iporaso': Quiniro'sa', siniséro'sa', catomono'sa', itiro'sa', huiriséro'sa', nihuaimoro'sa', amororo'sa', canano'sa', quiriquiro'sa', quiposoro'sa', in-apitari iso no'pa' hua'anëntapi. Hua'anëntapirinahuë', quëma shiparinpita quëtarahuë, itérin.

16

Ismairo nasitérinso'

¹ Sarai co hua'huana'pihuë ni'ton, co Apran hui'nahuanahuë'. Napoaponahuë', Saraiso a'nara cosonanëñ ya'huëtérin. Inaso iquipitoron. Acara itopi. ² A'na tahuëri Saraiso', so'in itapon:

—Ni'quëchi, Sinioro co nohuantérinhue ni'ton, co hua'huana'pihuë'. Napoaponahuë', cosonanëhuë acoanchinquën topirahuë. Tapona inaso', hua'huana'pi nisápirinhuë'. Hua'huana'pihuë cari masarahue hua'huana'pihuë pochachin nicacaso marë', itérin.

Napotohuachina, Apranta nohuantérin. ³ Napororo chachin Saraiso', Acara masahu-aton, so'in acoantérin. Nani shonca pi'ipi Canaan parti ya'huapona pochin, napoapi.

⁴ Shiarahuaton Acaraso', cayorin huachi. Inaporahuaton, hua'anëñ nocanin. Nocan-aton, co yanatérinhue'. ⁵ Napororo' Sarairi Apran itapon:

—Quëma tēhuëran ni'ton, Acara nocaninco. Cari chachin acoantopiranquënhuë', iporaso' hua'huanaton, nocaninco huachi. Sinioro chachin inquënposona tēhuérëso' anitochinpo': Quëma tēhuëmaranquën, ca a'na napomaraco, itérin. ⁶ Napotohuachina, Apraniso' itapon:

—Ni'quë', cosonanënso', natëinquënsa ya'huérin. Ma'sona nohuantéranso' nitëquë', itérin.

Naporó quëran huarë' Saraiso', Acara pa'pi aparisitérin. Napoaton, inaso ta'arin huachi. ⁷ Ta'apirihuë', Sinioro anquëninëni* inotëro parti quënanin. Shor iraquë i'sha pipirinso' ya'cari', quënanin. ⁸ Quënanahuaton, natanin:

—Quëmaso' Acaranquën, nohuitéranso' Sarai cosonanënquën. ¿Intoparanta huëcaton, intopata pa'saran? itérin.

—Patronanëhuë Sarai itopiso' ta'anappiarahuë, ténin Acara. ⁹ Naporó' Sinioro anquëninëni, itapon:

—Naquëranchin patronanën paapantaquë'. Ma'sona camairinquënsopita, natëquë', itérin. ¹⁰ Napotahuaton itaantarín:

“Ca nohuanto, hua'huayátérahuë amiparinpita ya'huëtarinquën.

Co pichicasohuë' na'apona'.

¹¹ Ipora cayoranso', quëmapia'huaya huaiyaran.

Huaihuatan, Ismairo itëquë'.

Co napion ancantaton na'néranso',

Sinioro nataninquën ni'ton, ina nininën acotëquë'.

¹² Mashotohuachin, tanan cahuario pa'pi notëraya pochin nisarin.

Ya'ipiya inimicotarin. Inanta', ya'ipiya quëran, inimicotapona'.

Quëmopinënpitari co quë'yapirinahuë',

inahua notënanquë chachin ya'huapon,” itérin.

¹³ Siniorori nontérin ni'ton, Acaraso' pa'yanënquë tapon: “¿Yosë chachin nontapohahuë co chiminahuë ti?” ténin. Ina yonquiatón, iso pochin Sinioro nohuitérin: “Nicanco, catahuarincoso Yosë,” itérin. ¹⁴ Napoaton inaquë poso ya'huërinsonta', “Nanpitón, ni'sárinco' posonën,” itopi. Ina pososo', Catisë ninano', Piriti ninano', imapita ninanoro'sari ahuancanapirin. ¹⁵⁻¹⁶ Acaraso' anquëni natërahuaton, patronanënquë chachin paantarin. Tahuëri nanihuachina huairin. Apran posa shonca saota pi'ipitaso', hui'nin nasitarin. Nasitohuachina, Ismairo itérin.

17

Marca niacotacaiso' camaitërinso'

¹ Apran iscon shonca iscon pi'ipitaso', Siniorori ya'notahuaton, itapon:

—Caso Yosëco, ya'ipi nanitaparahuë. Natëtonco, nohuantérahuësoráchin niquë'.

² Napohuatan, quëmarë'co anoyatarahuë. Ca nohuanto, hua'huayátérahuë shiparinpita ya'huëtarinquëen, itérin. ³ Naporó' Apranso', isonin. Isonin quëran, no'paquë huarë' monshomarin. Inapoaso Yosëri sha'huitaantarín:

⁴ —Ni'quë', iso pochin quëmarë'co anoyatarahuë. Quëmá quëran na'a naciono'sa pipiarin. ⁵ Naporahuaton, co huachi Apran itaponenhuë'. Ipora quëran huarë' Apraan itaponen. Ca nohuanto na'a naciono'sa quëmá quëran pipipona ni'ton, ina pochin nohuitaponen. ⁶ Carinquën catahuaranquën ni'ton, notohuaro' shiparinpita ya'huëtarinquëen. A'naquën shiparinpita, copirno ya'conapona'. A'naquëonta', naciono'sa ocoiapona'. ⁷ Quëmarë'co ipora nani anoyatérahuë. Shiparinpitarë'conta a'na tahuëri anoyatarahuë. Yosënëncó ni'to, catahuaráponquën. Shiparinpitanta inapotápo.

* ^{16:7} Sinioro anquëninëni topachina: Yosë chachin tapon naporin.

⁸ Ya'ipi Canaan no'pa' ipora ya'huëranquë, hua'anëntacaso marë' quëtaranquën. Shiparinpitanta iso no'pa chachin hua'anëntomiatapona'. Inapitanta', casáchin chinotaponaco, itérin.

⁹ Napotahuaton, taantarin:

—Napoaponañuë', quëmarë'coso nani anoyatérahuë ni'ton, natëco. Inapochachin shiparinpitanta natëinaco. ¹⁰ Ina pochin canpitare'co anoyatérahuë. Canpitanta anoyatérahuaso yonquicamaso marë' ya'ipi quëmapinquëma', marcahuanañmaso ya'huërin. Naporahuaton, ya'ipi shiparimapitanta inachachin natëina'. ¹¹ Taparonëmaquë, sha'huëchin imorayatérinso', niyashitétoco'. Inaporamaso', ayonquiarinquëma carë'quëma anoyatéremaso'. ¹² Ipora quëran huarë' ya'ipi quëmapinquëma ninamasopita, nasitérin quëran posa tahuëritapaso', marcanëñ acotoco'. Hui'namanta', inapotoco'. Piyapinëma nisharo'sa pa'antéramasonta inapotoco'. ¹³ Ya'ipinquëma niacotacaso ya'huërin. Co a'naya téranta topinan nicamaso ya'huërinhuë'. Inapohuatama', canpitare'co anoyatérahuëso', nonëmaquë chachin chiminamaquë huarë' ya'huëápon. ¹⁴ Nipirinhuë', insosona co marcanëñ niacotohuachinhuë', ya'huërama quëran ocoimiatoco'. Canpitare'co anoyatérahuëso', co natërinhuë ni'ton, inapotoco', itérin.

¹⁵ Naporo chachin, Yosëri Apraan itaantarin:

—Sa'aonta' Sarai itopiramahuë', co huachi inapochin nohuitaramahuë'. Ipora quëran huarë' Sara* itapoma'. ¹⁶ Inanta noya nicato catahuararahuë ni'ton, hua'huanarin huachi. Tëhuëñchachin cari noya nicato inapotarahuë. Na'a naciono'sa', ina quëran pipipona'. Ina quëran pipipisopita a'naquënsö', copirno ya'conapona', itérin.

¹⁷ Napotohuachina, Apraanso isonin. Isonin quëran no'paquë huarë' monshorahuatón têhuarin. Tëhuapon pochin yonquirin: “¡Pasa pi'ipotihuachinara, co huachi hui'nahuaniñpihuë! ¡Saranta iscon shonca pi'ipitaton, co huachi onporonta nanitérinhuë hua'huanacaso!” ténin yonquinëñquë. ¹⁸ Napoaton iso pochin Yosë nontérin:

—¡Ma'cha Siniñro sha'huitérancoso chachin Ismairo catahuaranhuë paya! itérin.

¹⁹ Yosëriso nipirinhuë', itapon:

—Sa'anquë chachin hui'nahuanañaran ta'to, napotaranquën. Hui'nan nasitohuachin, Isaco† itaran. Quëmarë'co anoyatérahuëso', inanta sha'huitarahuë. Sha'huitérahuëso chachin, shinpitanta catahuamiatarahuë. ²⁰ Ismairo marënta nontérancoso', nani natanañquën. Inanta catahuararahuë. Ca nohuanto na'a hui'ninpita ya'huëtapon. Ina quëran pipipisopita na'amiatapona'. Shonca cato hua'ano'sa nicacaiso' hui'nahuanañpon. Ina shinpitita quëran panca nacion pipipon. ²¹ Napoaponañuë' quëmaro'co anoyatato sha'huitérancosopitaso', Sara hua'huinquëñ nisarin. A'na pi'i quëran, ipora tahuëri'sa pochin, Isaco nasitapon, itérin. ²² Apraan nontérinso tonitahuaton, Yosëso ina quëran pa'nin huachi.

²³ Naporo tahuëri chachin Apraanso', hui'nin Ismairo itérinso marca acotérin. Piyapinëñpita pëinëñquë chachin nasitopisonta', inapotérin. A'napitanta coriquinëñ quëran pa'aninso', acotérin. Ya'ipi quëmapi'sa Apraan pëinëñquë ya'huëpisopita, marca niacotopi huachi. Yosë camaitérinso chachin nipi. ²⁴⁻²⁵ Apraan iscon shonca iscon pi'ipitaso', taparonëñ sha'huëchin yashitétopi. Ismaironta shonca cara pi'ipitaso', inapotopi. ²⁶⁻²⁷ Naporo tahuëri chachin ya'ipi quëmapi'sa nipesopita marca niacotopi. Apraan, Ismairo, inapita niacotopi. Piyapinëñpitanta inapopi. A'naquëñ pëinëñquë chachin nasitopi. A'naquënsö', coriquinëñ quëran nisharo'sa pa'antérin. Ya'ipiya niacotopi huachi.

18

Sara hua'huanacaso sha'huitérinso'

* ^{17:15} Saraso': Copirno hui'nin tapon naporin. † ^{17:19} Isacoso': Tëhuarinso' tapon naporin.

¹ Insina nararo', Mimiriri hua'anëntérinquë Apraan ya'huëarin. Inaquë niso', Siniorori, ya'notaantarin. Camotëchin pochin nisapaso' ya'notérin. Në'mëtë pëinën ya'coananënquë huënsaso', napoarin. ²⁻³ Apraanso ni'pirihuë', cara quëmapi ina notënanquë huaniapi quënanin. Quënanahuaton, a'naroáchin paaparin nontacaso marë'. Isonin quëran no'paquë huarë' monshorahuaton, itapon:

—Sinioro, pi'pian yanontérinquë. Ama na'huëtocosohuë'. ⁴ Canpita topatama', nipa'morantëcamaso marë' piyapinëhuë i'sha quëshiinquëma'. Inapoatoma', nara tashinantérinquë, na'yapoma pochin, chinototaco'. ⁵ Ya'huërahuëtaquëchin na'huëarama ni'quëhuarë', ma'sha téranta capamaso quëshiinquëma'. Ina quëran chiníquën cancantatoma', paantamaso marë', itérin.

—Naporan ni'quëhuarë', inta nipachin, itopi.

⁶ Napotohuachinara, Apraanso në'mëtë pëinënquë ya'conahuaton, Sara itapon:

—Manorahuaton, cato shonca quiro pochin, noya noya tricoro'mo nininso' maquë'. Ina masahuaton, pan niquë', itérin. ⁷ Sa'in sha'huitahuaton, ta'arë'nachin ohuacaro'sa ya'huarinquë pa'nin. Noya noya nininso' toroa'hua huayonin. Huayonahuaton, a'nara piyapinën quëtérin. Quëtohuachina, inaso' tëparahuaton a'naroáchin capacaiso marë' anpirin. ⁸ Ina a'capon pochin, ohuaca sho'shoi' atachirotopisonta', acotérin. Naporahuaton ohuaca sho'shoi' o'shitérin. Inapoaton, a'capon pochin ninararin pahuantomuachina acotacaso marë'. Ni'toro'sa nara tashinantérinquë coshatasoi naporin.

⁹ Nani coshatohuachinara, ni'toro'sari Apraan natanpi:

—¿Sa'anpo huachi? itopi.

—Ma'tana në'mëtë pëi acoana ya'huëarin, itérin. ¹⁰ Naporor' a'nari itapon:

—A'na pi'i quëran, nicaponquën huëantarahuë. Naporor' Sara hua'huanaton, hua'huin ipoarin huachi, itérin.

Napoasoi Saraso', ya'ipi nonpiso' natanárin. Apraan pinën quëran, në'mëtë pëi acoana, ya'coana pirayan natanárin. ¹¹ Apraan, Sara, inapitaso nani mashotopi. Saraso yaniton, co huachi onpo hua'huanchináchinhuë', ninin. ¹² Ina yonquiaton, co huachi huina cacotatonhuë', têhuarin huachi. Têhuapon pochin, yonquirin: “Inaporahuë naporini, noya cancanchitohuë'. Napoaponañahuë', catocoi chachin nani mashotërai ni'ton, co quiyaso inapoasocoihuë' ayapoi,” ténin yonquinënquë.

¹³ Siniororiso niperihuë', Apraan itapon:

—¡Sara co têhuacasohuë niperihuë', têhuarin! “Nani paiyaco” ta'ton, ¿co natëtérinhue' hua'huanacaso ti? ¹⁴ ¡Caso Sinioroco ni'to, ya'ipi nohuanterahuë' nanitaparahuë nica'huaso! A'na pi'i quëran, nicaponquën huëantarahuë. Naporor' Sara hua'huanaton, hua'huin ipoarin huachi, itérin. ¹⁵ Sinioro naporinso natanaton, tê'huanënquë Saraso tapon:

—Co têhuarahuë', ténin. Napoaponañahuë', Siniorori itapon:

—Napopiranahuë', têhuaranso' nitoterahuë, itérin.

Sotomaro'sa marë' Yosë nontérinso'

¹⁶ Nani coshatohuachinara, paantacaiso marë' ni'toro'saso' huanipi huachi. Sotoma ninanotaquëchin pa'sahuachinara, Apraani chi'yarín. Nontaton patacaso marë' chi'yarín. ¹⁷⁻¹⁸ Papon pochin, Sinioroso' yonquiraarin. “Apraan quëran a'na tahuëri panca nacion pipiarin. Naporahuaton ina nacionso', chiníquën nanantarin. Napoaton ma'sona yaninahuë', sha'huita'huaso ya'huërin. Nani sha'huiterahuë ya'ipi naciono'sa isoro'paquë ya'huërinsopita, ina quëran catasthua'huaso marë'. ¹⁹ Nani ina huayonahuë hui'ninpita, shinpitá, inapita noya pënenacaso marë'. A'chinterahuësopita natëtona', noya nicacaiso marë' pënenarin. Inapohuachin, sha'huiterahuëso chachin quëtarahuë huachi,” ténin yonquiaton. ²⁰ Napoaton, Siniorori itapon:

—Sotomaquë, Comoraquë, inaquëpita ya'huëpisopita, panca oshahuapi. Inapoatona pa'pi co noyahue' nahuinpi. ²¹ Napoaton inatohua pa'sarahue. ¿Sha'huitérinacoso chachin ta'ma nisapi? ta'to, nitota'huaso marë' pa'sarahue.

²² Cato ya'piso quëchitahuatona', Sotoma ninanoquë pa'pi. Apraanso nimirinhue', Siniororë' ninontacaso marë' quëpariterin. ²³ Napoaton ya'carirahuaton, natanin:

—Tëhuëpisopitaso' no'tequen chachin ata'huantamaso ya'huërin. Co tëhuëpisopitasohue' nimirinhue', co inapotamaso ya'huërinhue'. ²⁴ Tapona a'natérápo shonca ya'pi', co tëhuëpisopitasohue' ninanoquë ya'huëpi. Ina nápo ya'huëpiso yonquiaton: ¿Co ninano nicha'ësaranhue'? ²⁵ ¡Ama Sinioro napoquësuhue'! ¡Tëhuëpisopita, co tëhuëpisopitahuë' co napopináchin oshahuanpiso pochin ana'intamaso ya'huërinhue'! ¡Ama napoquësuhue'! ¡Quëmaso', noya noya coisë ya'ipi isoro'pa' marë' ninan ni'ton, no'tequenáchin ana'intamaso ya'huërin! itérin. ²⁶ Napotohuachina, Siniorori itapon:

—A'natérápo shonca co tëhuëpisopitahuë', Sotoma ninanoquë ya'huëhuachin, inapita nosoroato ya'ipi ina ninanoquë ya'huëpisopita nicha'ësarahue, itérin. ²⁷ Apraaniso nimirinhue', naquëranchin nontaantarín:

—Quëmaso Yosënquen, caso topinan piyapico nimirahuë', naquëranchin nontaanta'inquen. Ama ina marë' no'huicosohue'. ²⁸ Catapini shonca a'natérápora' co tëhuëpisopitahuë' nanihuachina', a'natérápo pahuaninso' marëáchin, ¿ya'ipi Sotomaquë ya'huëpisopita, ata'huantapon ti? itérin.

—Catapini shonca a'natérápo téranta co tëhuëpisopitahuë' ya'huëhuachina', co ninano ata'huantarahue', itérin.

²⁹ —Tapona catapini shoncara', co tëhuëpisopitahuë' ya'huëpi, taantarín Apraan.

—Ina napoya téranta ya'huëhuachinaso', co ata'huantarahue', ténin Yosë. ³⁰ Apraaniso nimirinhue', naquëranchin Yosë nontaantarín:

—Inachin inachin nontápiranquënhue', ama ina marë' no'huicosohue' topirahuë. Tapona cara shoncara' ya'huëpi, itérin.

—Cara shoncaya téranta ya'huëhuachina', co ata'huantarahue', itérin.

³¹ —Tëhuëñchachin caso Sinioro co natantonhue' pochin nontáranquen. Cato shoncara', co tëhuëpisopitahuë' ya'huëhuachina': ¿Onpoaranta'? itaantarín.

—Cato shoncanta co tëhuëpisopitahuë' ya'huëhuachina', co ninano ata'huantarahue', itérin Yosëri.

³² Apraani naquëranchin nontaantarín:

—Iporaíchin Sinioro nontaantaránquen. Ina quëran co huachi apiponquënhue ni'ton, ama no'huicosohue'. Shoncaíchin co tëhuëpisopitahuë' quënanpatan: ¿Onpoaranta'? itérin. Napotohuachina, Siniorori itaantarín:

—Shoncaya téranta co tëhuëpisopitahuë' ya'huëhuachina', co ninano ata'huantarahue'.

³³ Apraan nontérinso toquitahuaton, Sinioroso pa'nin huachi. Apraaonta', në'mëtë pëinënqué'pa' panantarín.

19

Sotomaro'sa', Comoraro'sa', inapita ata'huantérinso'

¹ Nani yatashirahuaso', cato anquëniro'saso Sotoma ninanoquë camapi. Ninano ya'coanaquë chachin Noto huënsaso', camapi. (Inaqué ya'huëhuano'sa niyontonpi ma'sha yonquiatona anoyatacaiso marë'.) Cato ya'pi canquipiso quënanahuaton, paa-parin nontapon. Isonin quëran no'paquë huarë' monshorin. ² Monshorin quëran itapon:

—Caso siniororo'sa piyapinëma pochincó. Huëco pëinëhuëqué onpopionta huë'ëcamaso nohuantoco'. Inaqué nanitërama nipa'morantëcamaso'. Tashiraya yapa'patama paantaco', itérin. Napotopirinhue', inapitaso co nohuantopihuë'.

—Naporinchi paya. Napopiranhue' co nohuantérailhue'. Caniquë téranta noya huë'ëpoi, itopi. ³ Napotopirinahuë', Notori naquëranchin naquëranchin

sha'huitohuachina, napoin quëran pëinënqué pa'pi huachi. Canconpachinara, noya cosharo nitérin. Pan co ahuëpocatopinanhuë' anpitaton, inapitarë' acotohuachina, ni'toro'sa coshatopi huachi.

⁴ Napoaponahuë', co'huara chinocháterasoihuë' ya'ipi ya'huëhuano'sari Noto pëinën tancapitopi. Hui'napiro'sa quëran, mashoro'saquë huarë' yamoipi. ⁵ Noto no'huitona', chiniquén nontiipi:

—¡Quëmapi'sa pëinënqué canquipiso! ¿Intopata ya'huapi? ¡Ocoiqué tēcari'i! itopi. ⁶⁻⁷ Naporo' Notoso' pëinën noyá oncotahuaton, inapita nontapon pipirin.

—Ama iyaro'sa napocosohuë', pa'pi co noyahuë' yonquirama'. ⁸ Cato hui'nahuëpita nano'sa co quëmapiri së'huayáterarinsohuë', ya'huëtérinco. Inapita nipachin ocoichin-quëma', nohuantéramaso' nitoco'. Isopita quëmapi'saso nimirinhuë', ama napotocosohuë'. Cari pérarahuë pëinëhuëquë ya'conquipi ni'ton, napotaranquëma', itérin. ⁹ Inapitariso nimirinhuë', itapona':

—¡Po'shaquë quëmaso! Nisha piyapinquén niperahuë', ¿yacamairancoi ti? ¡Iporaso huachi inapita quëran na'con na'con, quëma nitarainquén! itopi. Napotatona', Noto ahuërapi. Pëinën ya'coananta', yapaparapitopi huachi. ¹⁰ Napoaponahuë', ni'toro'sari Noto mapi. Masahuatona', acoana po'mopi. Napotatona', ya'coana oncotaantapi. ¹¹ Naporo chachin piyapiro'sa aipiran nisapisopita, a'naroáchin asomarayapi huachi. Hui'napiro'sa quëran, mashoro'saquë huarë' ya'ipi somarayapi. Ina nimirinhuë téranta', amiai huarë' ya'coana yonípi.

¹² Naporo' ni'toro'sari, Noto itapona':

—¿Ya'huëtérinquén aquëtë huarë' quëmapiro'sa isëquë? Hui'nampita quëmapi'sa', sanapi'sa', mi'séro'sa nicacaiso nipesopita ya'ipi inapita, iso ninano quëran ocoiqué'. Ocoiaton áquë quëpaquë'. ¹³ Iso ro'të ata'huantarai ni'ton, quëpaquë'. Iso ninanoquë pa'pi co noyahuë' nipo', na'a piyapi'sari Sinioroquë sha'huirapipi. Napoaton, ata'huanta'huaiso marë' a'parincoi, itopi.

¹⁴ Napotohuachinara, Notoso mi'sënpita nicacaiso nipesopita sha'huitacaso marë' pa'nin:

—¡Manóton huëco pa'ahua! Iso ninano quëran pipia'ahua'. ¡Siniorori iso ninano ata'huantarai ni'ton, huëco pa'ahua'! itérin. Itopirinhuë', co natëpihuë'. ¹⁵ Nani tahuëri ya'cari nipachina, anquëniro'sari Noto itapona':

—¡Pashi tēquë! Sa'an, cato hui'nampita, inapita masahuatón, iso ninano quëran ocoiqué huachi. Ninano ata'huantérainquë, chimintama'. ¹⁶ Napotopirinahuë', Notoso' co manorinhuë' ni'ton, Yoséri nosoroaton, yanicha'érin. Napoaton anquëniro'sari, sa'inë chachin maimirarin. Hui'ninpítanta maimirarahuatona', ninano quëran cha'ëcaiso marë' ocoipi.

¹⁷ Ninano quëran nani pipihuachinara, a'na anquëniro itapon:

—¡Cha'ëcamaso marë' manóton ta'aco! Ama pinëma parti tahuërcosohuë'. Pa'mia paco'. Ama ma'sha marë' téranta iso motopianaquë chinicosohuë'. Cha'ëcaso nohuantohuatama', motopiro'sa parti ta'aco', itérin. ¹⁸⁻¹⁹ Notoriso nimirinhuë', itapon:

—¡Co Siniororo'sa topirahuë! Téhuëñchachin canpitaso', na'con catahuaramaco huachi. Noyanquëma ni'ton, nicha'éraramaco. Napoaponahuë', motopiro'sa parti ta'aca'huaso', co nanitarahuë'. Huancopi ni'soi', ayaro' icantatoncoi tiqiuahuachincoi. ²⁰ Ni'co', pasëyáquë a'na ninanoa'huaya ya'huërin. Inaqué téhuëñchins' noya pacáhuaiso' topirahuë. Nohuantoco inaqué pa'i cha'ëca'huaiso marë'. ¡Co'ta inaso', co panca ninanoyahuë? itérin. ²¹ Napotohuachina a'na anquëniro itapon:

—Nani natananquén nontérancoso'. Nohuantéranso chachin nisarahuë. Co ina ninanoso', ata'huantapohuë'. ²² Napoaponahuë', ¡manóton inatohua paco! Inatohua canama huarë' Sotoma ninano ata'huantarai huachi. Napoaton ina ninanoso', Soaro*

* ^{19:22} Soaroso': Pi'pira'huaya tapon naporin.

itopi. ²³ Nani tahuërihuachina Notoso', Soaro ninanoquë camarin. ²⁴ Naporo' Siniorori, pën o'nan pochin a'paimarin. Sha'pi mo'shirë chachin, a'paimarin. Sotoma, Comora, inapita ninanoro'sa aipi a'paimarin. ²⁵ Inapotaton, ata'huantérin. Ya'ipi inaquë ya'huëpisopitarë chachin ata'huantérin. Ina motopianaque papotérinsopitanta', ya'ipi tiquirin. ²⁶ Noto sa'inso nimirinhue', co Soaroquë camarinhue'. Oshaquëran so'in imaquiáponahuë', pinën parti tahuërhüachina, inaquë chachin yamora moto' taranaton, chiminin.

²⁷ Tashiramiachin Apraanso', i'huara Siniro nontérintaquëchin pa'nin. ²⁸ Ina quëran, Sotoma, Comora, inapita ninanoro'sa nocorin. Ya'ipi ina motopiananta nocomapirinhue', ina ro'të quëran pa'pi huëhuëpiro conai pipirarin ni'nin. Panca orno quëran tomontérinso pochin, pipirarin. ²⁹ Ina pochin, ina motopianaque ninanoro'sa Yosëri ata'huantérin. Noto yacapatérinso parti noyá ata'huantérin. Notoso nimirinhue', co ata'huantérinhuë'. Apraan yonquiaton, cha'ëcaso marë' ina quëran ocoirin.

Moaporos'a', amono'sa', inapita ya'huërinso'

³⁰ Inapita ninanoro'sa ta'huantopi piquëran, Notoso' të'huatérin. Të'huataton, Soaroquë ya'huëcaso co nohuantérinhuë'. Napoaton cato hui'ninpitarë chachin motapiro'sa parti, ya'huëcaiso marë' pa'pi. Inaquë a'na motopi naninquë, cara chachin ya'huëpi. ³¹ A'na tahuëri paya paya nininsoari, caia'huain, itapon:

—Ni'quë caira. Ya'ipi parti sanapi'sa ya'huërinso', so'yatona hua'huanpi. Canposo nimirinhue', isoporinquë quëmapi pahuanin quëran, co inapochináchinhue' niné'. Tataíchin mini nimirinhue', nani inanta mashotarin. ³² Napoaton, huëquë pa'a o'shitatë têpaita'a. Inapotatë, hua'huanpo ya'huëtiinposo marë' huë'ëpa'a, itérin.

³³ Naporo tashi chachin pa'pina huino o'shitomiatopi. Nani ano'pihuachinara, paninanso' pa'pin quëhuënaparin. No'pirahuë ni'ton, co nataninhue' hui'nini quëhuënaparinso'. Co pa'ninsa têranta nataninhue'. ³⁴ Tahuëriantarinquë paninanso', caya'huain itaantapon:

—Ni'quë caira, achin tashi caso tata quëhuënaparahuë. Quëma ya'huëre' quëhuënapasco marë' ipora tashinta ano'pianta'a. Inapoatë catonpo chachin tatanpo quëran têranta hua'huasha ya'huëchinpo', itérin. ³⁵ Ninapotatona', naporo tashi naquëranchin pa'pina huino o'shitaantapi. Nani ano'pihuachinara, hua'hua nininso ya'huëre', pa'pin quëhuënaparin. No'pirahuë ni'ton, Notoso' co nataninhue' hui'nini quëhuënaparinso'. Co pa'ninsa têranta', nataninhue'. ³⁶ Inapoatona', cato chachin cayopi. Pa'pina quëran napopi. ³⁷ Paninanso' huaihuachina, quëmapia'huaya huairin. Inaso', a'shini Moapo† itérin. Iso quirica ninshitasoco huarë', ina ipora moaporos'a ya'huërinso shimashonëna ninin. ³⁸ Hua'hua nininsonta huaihuachina, quëmapia'huaya chachin ya'huëtérin anta'. Inanta a'shini Pin-ami‡ itérin. Iso quirica ninshitasoco huarë', ina ipora amono'sa ya'huërinso shimashonëna ninin.

20

Apraan Apimiricorë naporinso'

¹ Apraanso', piyapinënpitarë chachin ya'huëapi quëran pipipi. Pipirahuatona', Niquipi parti paantapi. Quiraro ninanoquë canconahuatona', inaquë ya'huëcaiso marë' quëparitopi. Ina ninanosso', Catisë ninano quëran Shor parti ira pa'ninsa' huáncana quëparitérin. ² Apraanso inaquë ya'huapon pochin, Sara sa'in nimirinhue': "Oshi-huë," toconin. Napoaton Quiraro copirno Apimirico itopisori yamanin. Camaito-huachina, macacaso marë' Sara quëpatopi. ³ Napoaponahuë', naporo tashi chachin Yosëri huë'enquë pënénin: "Quëmaso chiminaran. Sanapi mananso so'yahuan ni'ton,

† **19:37** Moaposo': Pa'pin quëran ya'huërinso', tapon naporin. ‡ **19:38** Pin-amiso': Piyapinëhuëpita hui'nin tapon naporin.

chiminamaso ya'huérin," itérin. ⁴ Apimiricoso', co Sara ichihuë'ësháterarinhue'. Napoaton Sinioro itapon: "Sinioro co manta onporahuë ni'ton, co tēpaancoso ya'huérinhue'. ⁵ Co'ta Apraan chachin naporin: 'Oshihuë,' ténin. Saranta': 'Yo'yohuë,' ténin. Cato chachin napopi ni'ton, co nitotatohuë manahuë," itérin. ⁶ Napotohuachina, Yosérinta huë'enquë chachin a'paniantarin: "Téhuenchachin co nitotatonhuë' naporan. Napoaton ca nohuanto co ichihuë'ëranhuë'. Carinquën ya'copiranquën ama oshahuanaton tēhuétancoso marëhuë'. ⁷ Iporaso nipurinhue', so'in chachin quëtaantauquë'. Inaso pénéntona'pi ni'ton, quëma marë' nontarinco. Ama chiminamaso marëhuë', nontarinco. Co'so' quëtaantahuatanhuë', sa'an, hui'nanpita, inapitarë'quën chachin, ta'huantaran," itérin huë'enquë.

⁸ Tahuërianpitohuachina, Apimiricoso huënséintarahuaton, piyapinënpita amatérin. Huë'pachinara, ya'ipi hua'narinso sha'huitérin. Natanahuatona', piyapinënpitaso pa'pi pa'yanpi. ⁹ Ina quëran Apraan amatahuaton, itapon:

—¡Ma'huantacha nitapirancoihuë paya! ¡Caso co maquë tēranta tēhuétéranchuë'! Quëmaso nipurinhue', napotatoncoi panca yaaoshahuanpirancoihuë'. Ca aoshahuanatonco, quëmopinëhuëpita, piyapinëhuëpita, inapita, na'inchitonhuë'. ¡Co naporëhuë'! ¹⁰⁻¹¹ ¿Ma'ta yonquiaton, napotopirancohue'? itérin. Napotohuachina, Apraani itapon:

—Iséquëso', co manta Yosë natëpihuë'. Sa'ahuë matiinacoso marë' tēpaponaco caso', ta'to naporahuë. ¹² Naporahuaton Sarasó', oshihuë anta'. Ina tataquëranchin nipurahuë', mamahuëi quëranso', nisha ninai. Napoaton cari manahuë. ¹³ Yosë chachin, tatahuë ya'huérin quëran pipicaso' camaihuachincora, sa'ahuë sha'huitérahuë: "Inséquë tēranta pa'nëhuaquë: 'Inaso yo'yo masho,' tēquë ta'a, itérahuë," ténin Apraan.

¹⁴ Ina natanahuaton, Apimiricoso sa'in quëtaantarín. Naporahuaton, ohuicaro'sa', ohuacaro'sa', inapita quëtérin. Piyapinënpita camaicaso marënta': Quëmapi'sa', sanapi'sa', inapita quëtérin. ¹⁵ Ina quëtahuaton, itérin:

—Ni'quë iya, no'panëhuëso pancana, inséquëso costaranquë ya'huëquë', itérin. ¹⁶ Saranta', itapon:

—Ni'quë imoya, yo'yo masho huaranca coriqui prata quëran nininso' quëtérahuë. Ya'ipiya quëran co tēhuéransohue' nitotacaiso marë' ina nápo quëtarahuë. Co insonta pinoinquëso ya'huérinhue'. ¹⁷ Ina quëran Apraan, Yosë nontérin Apimirico marë'. Ina sa'in, cosonanënpita, inapita marënta', Yosë nontérin. Nontohuachina, Yosëri anoyatérin. Naquëranchin hua'huasha ya'huétaantacaiso marë' anoyatérin. ¹⁸ Siniorori nani Apimirico ya'huérinquë, sanapi'sa ana'intopirinhue'. Ama hua'huanacaiso marëhuë', Sara na'in quëran napotopirinhue'. Napoaton Apraani Yosë nontérin inari anoyatacaso marë'. Napohuachina, Yosëri Apimirico sa'in, piyapinënpita sa'ina', inapita anoyatérin. Hua'huasha ya'huétaantacaiso marë' anoyatérin.

21

Isaco nasitérinso'

¹ Sha'huitérinso chachin, Siniorori Sara catahuarin. ² Ina nohuanton napoin quëran cayorin huachi. Tahuëri nanihuachina, quëmapia'huaya huairin. Inaso', Apraan mashoya nicaquë huarë' hui'nahuaninso hua'huatérin. Yosëri sha'huitérinso tahuëri'sa chachin, hui'nin nasitérin. ³ Sa'inquë chachin hui'nahuaninso nasitohuachina, Isaco itérin. ⁴ Yosë camaitérinso chachin posa tahuëritohuachina, marca acotérin. ⁵ Apraan pasa pi'ipitaso', hui'nin Isaco itérinso', nasitarin. ⁶ Naporo' Sara yonquirin: "Yosë catahuarinco ni'ton, capa cancantato, tēhuarahuë. A'napitanta', hua'huanahuëso nitohuachina', ya'ipiya quëran capa cancantatona tēhuapona'. ⁷ Co hua'huana'picohuë ni'to, co inso tēranta Apraan nontaton: 'Téhuenchachin Saraquë hui'nahuanaran,' co ichitonhuë'. Inaso nipurinhue', máshoya niponahuë', hui'nahuanin huachi," ténin.

Acara, Ismairo, inapita Apraani a'parinso'

⁸ Isacoa'huaya oshaquëran so'sohuachina, a'shini a'potérin. A'potérinso tahuëri, capa cancantacaiso marë' Apraan panca pita ninin. ⁹ Capa cancantapirinahuë', Saraso' co noyahuë' cancantërin. Cosona hua'huini Isaco monaton ya'nipitarin ni'nin. ¹⁰ Napoaton Apraan sha'huitérin: "¡Cosonaso', hua'huinë chachin, a'paquë pa'in! Isacoso hua'huahuë chachin ni'ton, co nohuantërahuë' quëma ma'shanënpita cosona hua'huionta quëtacaso'!" itérin. ¹¹ Ina natanaton, Apraan panca sétérin. Hui'nin ni'ton, sétëyarin. ¹² Sëtopirinhuë', Yosëri itérin: "Ama hui'napi marë' sétëquësuhuë'. Co cosonanën marë' téranta sétacaso ya'huërinhuë'. Ma'sona Sara nohuantërinso niquë'. Isaco quëran pipipisopita, noya noya catahuararahuë. Inapita mini yonquiatu nani sha'huitëranquëen nisapaso'. ¹³ Cosona hua'huionta catahuararahuë. Ca nohuanto, shinpita panca nacion ocoiapona'. Hui'nin chachin anta ni'ton, catahuararahuë," itérin.

¹⁴ Tahuëririnquë tashiramiachin Apraanso', Acara quëtacaso marë' cosharo manin. A'nara sha'huëtë morsaquë i'sha ta'panahuaton, quëtérin. Hui'nionta Ismairo itérinso', a'paantërin quëpacaso marë'. Inahuaso pa'pachinara, Piirsipa inotëro parti chihuëatona', topinan pa'sápi. ¹⁵ I'sha sha'huëtë morsaquë ya'huërinso', ta'quipi. Ta'quihuachinara Acaraso', naraa'huaya tashinantërianaquë hua'huin acorahuaton, patérin. ¹⁶ Aquëmiachin pa'sahuaton, huënsëconin. Ama hua'huin chiminiso nicacaso marëhuë', inaquë huënsëconin. Huënsëhuachina, hui'napiro na'nérin huachi.

¹⁷ Yosëri, hui'napi na'nérinso' natanin. Napoaton Yosë anquëninëni, inápa quëran pérasahuaton nontërin: "¿Ma'ta Acara onporan? ¡Ama pa'yanquësuhuë!" Yosëri, hui'napi na'nérinso' natanin. ¹⁸ Manóton pa'sahuaton, macontaquë'. Ama patëquësuhuë'. Ca nohuanto, hua'huán quëran panca nacion pipipon," itérin. ¹⁹ Naporor Yosë nohuanton, Acara a'na posoquë i'sha quënanin. Inaquë pa'sahuaton, sha'huëtë morsaquë manin. Ina masahuaton, hua'huin o'shitonin.

²⁰⁻²¹ Yosëri, hui'napi catahuarin ni'ton, noya a'shinin. Paran inotëro parti ya'huëpi. Míso pë'chinantërin. Oshaquëran a'shini Iquipito sanapi yoniton, acoantërin.

Apimirico Apraanë anoyatopiso'

²² Naporor tahuëri'sa pochin Apimirico pa'nin Apraan nontapon. Huicororë' pa'nin. Inaso', Apimirico sontaronënpita camairinso'. Inaquë Apimiricori Apraan itapon:

—Téhuëñchachin quëmaso' nani ma'sha nipatana, Yosë catahuarinquënsi ni'nai.

²³ Napoaton isëquë chachin Yoscoarë' ta'ton sha'huitoco: Ama hui'nahuëpita, shihuëpita, ama ca téranta', ma'sha onpotancoso marëhuë', sha'huitoco. Carinquënsi nosoroatëñquëen co ma'sha onpotéranchuë'. Inapochachin quëmanta noya ni'coi. A'napita ya'huëhuano'santa', noya ni'camaso marë' Yoscoarë' ta'ton sha'huitoco, itérin.

²⁴ Napotohuachina Apraan tapon:

—Yoscoarë' co ma'sha onpotaranquëmahuë', itérin.

²⁵ Napoaponahuë', Apraani itaantapon:

—Carinquëmaso', noya yonquirapiranquëma'. Quëma piyapinënpitaso niperinhuë', a'nara poso ihuairo matérinaco, itérin. ²⁶ Ina natanahuaton, Apimiricori itapon:

—Co sha'huitérancohuë' ni'ton, ipora huarë' namaso natanahuë. Inpitaso inapotomarinquëen. Co caso nitotërahuë', itérin. ²⁷ Napotohuachina, naporo tahuëri cato chachin, noya ninitona ya'huëcaiso marë' anoyatopi. Yoscoarë' ta'tona', anoyatopi. Ina quëran anoyatopiso yonquicaiso marë' Apraani ohuicaro'sa', ohuacaro'sa', inapita manin. Masahuaton Apimirico quëtérin. ²⁸ Naporahuaton canchisë ohuica nanoyan nipesopita huëntonëñ quëran nisha acoarin. ²⁹⁻³⁰ Nisha acoaso', Apimiricori itapon:

—¿Ma'marëta canchisë ohuicaro'sa nisha acoaran? itérin.

—Isopita canchisë ohuica, quëtaranquëen: "Téhuëñchachin Apraani ina poso ninin," ta'camaso marë' quëtaranquëen, itérin. ³¹ Napoaton ina ro'tëso', Piirsipa itopi. Inaquë cato chachin Yoscoarë' ta'tona', anoyatopi ni'ton, ina pochin nohuitopi. ³² Nani anoyatohuachina Apimiricoso', Huicororë chachin huiristino'sa no'panëñ parti paantapi.

³³ Nani pa'pachinara, Apraanso inaranchin Sinioro chinotérin. Inaso': “Yosë ya'huëmiatérinso”, itopi anta'. Inaquë chinotaton, a'nara tamarisco nara sha'nin. Nani sha'huirahuë chachin ina no'paso', Piirsipa itopi. ³⁴ Hua'qui Apraan huirstino'sa no'panënaquë, yacapatérin.

22

Yosëri Apraan ténirinso'

¹ Ina piquéran Yosëri: “¿Téhuëñchachin ta'ma Apraan natérinco to?” ta'ton, ténicaso marë' pérarin:

—Apraan, itérin.

—Ma'ta Sinioro ya'huëarahuë, ténin Apraan. ² Naporor Yosëri itapon:

—Hui'nan Isaco itéranso', a'naíchin ni'ton, nosoromiatérán. Ina niperinhue', masahuatón Moria parti quëpaquë'. Inaquë canconpatan, a'na motopi a'notaranquén. Inaquë chinotancoso marë' ina tēparahuaton, ya'ipi ahuiquitéquë', itérin.

³ Tahuërinquë Apraanso', tashiramiachin huënséintarahuaton, tapatarin huachi. Ihuë Yosë chinotaton ahuiquitacaso marë' pë'shitérinso', moranénquë a'mitérin. Ina quéran hui'nin, cato piyapinénpita, inapita quëparin. Yosëri sha'huitérinquë pa'nin huachi.

⁴ Cara tahuëri quéran Apraanso', Yosëri sha'huitérinso' no'pa' notérin. ⁵ Naporor piyapinénpita itapon:

—Iséquë ninatacoi. Moranta iséquë patarahuë. Quiyaso' amasha aquëcha pa'sahuatoi, Yosë chinotarai. Nani chinotohuatoi o'mantarai, itérin. ⁶ Ihuë Yosë chinotaton ahuiquitacaso', Isaco apitentérin. Inaoranta cosoroa'hua, pë'to ra'pi, inapita manin. Ina quéran pa'pi huachi.

⁷ Papon pochin Isacori, Apraan itapon:

—¡Tata! itérin.

—¿Ma'ta conpaa'hua? itérin pa'pini.

—Ni'quë tata, nani ihuë ya'huërin. Pë'to ra'pinta ya'huërin. Carniroa'hua ya'ipi ahuiquitacaso marëso': ¿Intoparanta manë'? itérin Isacori.

⁸ —Yosë nohuanton conpa ya'huapon, itérin pa'pini. Ina quéran, paantapi.

⁹ Yosëri sha'huitérinquë canconpachinara, Apraanso a'nara artaro ninin. Ténirahuaton, ina aipi ihuë acorin. Ina quéran hui'nin tonporahuaton, ihuë aipi acorin. ¹⁰ Inaquë acorahuaton tēpacaso marë' cosoroa'hua manantérin. ¹¹ Naporor chachin Sinioro anquëninëni, inápa quéran pérarin:

—¡Apraan! ¡Apraan! itérin.

—Ma'ta Sinioro ya'huëarahuë, itérin Apraani. ¹² Sinioro anquëninëiso', itapon:

—Ama hui'nan tēpaquësohuë'. Téniponquén napotopiranquënhue', iporasor nani nitotérahuë. Ya'ipi cancanën quéran huarë' imaranco ténahuë. Hui'nan a'naíchin niperinhue', co apiratérancihuë ni'ton, nitotérahuë, itérin. ¹³ Naporor Apraan tahuërerahuaton ni'pirinhue', a'nara carniro quënanin. Yosë nohuanton pomonén quéran, nara'huaya së'paquenquë a'ténin. Ina masahuaton hui'nin ya'huërenamén tēparin. Inapotaton, Yosë chinotacaso marë' ya'ipi ahuiquitérin. ¹⁴ Ina quéran Apraani ina ro'të aninihuánin. “Pahuantérinpoaso' Sinioro quëtérinpoaque”, itérin. Napoaton, iporahuanta ina pochin nohuitapi. “Motopiquëso', pahuantérinpoasopita Sinioro quëtérinpoa”, topi nonatona'.

¹⁵⁻¹⁶ Sinioro anquëninëni, naquëranchin inápa quéran Apraan pératon itapon:

—Sinioro naporin: “Ya'ipi cancanën quéran huarë' natëtonco, a'naíchin hui'nan niperinhue' co apiratérancihuë'. Inaporanso marë' noya ni'nanquén. Caso Yosëco ni'to, no'tequén sha'huitaranquén. ¹⁷ Noya nicaténquén catahuamiataranquén. Ca nohuanto shiparinpita, tayloraro'sa nápo na'apona'. Marë yonsanquë inotéra'huaya nápo, na'amiatapona'. Naporahuaton, inapitaso inimiconëna minséra'piapona'. ¹⁸ Quëma

natéranco ni'ton, ya'ipi isoro'paquë naciono'sa ya'huërinsopita, shiparinpita quëran catahuararahuë," itérin.

¹⁹ Nani Yosë chinotahuatona', Apraanso hui'ninë chachin piyapinënpita quëparitopiquë, pa'mantapi. Ina quëran ya'ipi chachin, Piirsipaquë panantapi. Inaquë Apraan hua'qui ya'huërin.

Nacoro hui'ninpita nipiso'

²⁰ Hua'quimiachin ya'huapona pochin, Apraanso natantérin. "Miricanta', Nacoro sa'in nininso', Sara pochachin hua'huanin anta'," itopi. ²¹ Paninanso', Os itopi. Ina quëran niantarinso', Pos itopi. Ina quëran a'nanta niantarinso', Quimoino itopi. (Quimoinonta hui'nahuanpachina, Aramo itopi.) ²² Quimoino quëran nasitaantapi: Quisito, Aso, Piritasi, Itarapi, Pitoiro, inapita. ²³ Ina Pitoiro mini, Nipica pa'pin. Nacoroso', Apraan iya'huain. Ya'ipiya quëran Miricaso', posa hua'huinpita ya'huëtérin. Ina nápo Nacoroso', sa'inquë chachin hui'nahuanin. ²⁴ Naporahuaton a'na sa'inquënta hui'nahuanin. Ina sa'inso', Nioma itopi. Inaquë hui'nahuaninsopitaso': Tipa, Caamo, Taas, Maaca, inapita.

23

Sara chimininso'

¹ Sarasó', pasa cato shonca canchisë pi'i icanin. ² Ina quëran Quiria-arpa ninanoquë chiminin. Ina ninanoso', Ipron itopi anta'. Inaso Canaan parti ya'huërin. Sa'in chimininso marë' Apraanso', sétaton, na'nérárin, ayanárin, naporin.

³ Ina quëran, sa'inco' nonën patahuaton, ya'huëhuano'sa nontapon pa'nin. Ya'huëhuano'saso', itiro'sa itopi. Hua'ano'sa nipesopita niyontoyantopiquë, quénanconin. Inaquë nontahuaton itapon:

⁴ —Caso co ya'huëhuancohuë' naporahuë', yacaparanquëma'. Sa'ahuë chiminin ni'ton, chiminpatamara nipo'moramaso' no'pa' pa'antoco canta topirahuë, itérin.

⁵ Napotohuachina, Iti hua'ano'sari itapona':

⁶ —Natanquë sinioro sha'huichinquë. Yosë huayoninquëni'ton, quëmaso' chiníquënanantéran. Nipo'moraiso' no'pa' insosona noya noya ni'nanquë, sa'anco' po'moquë'. Co incoi téranta apiratarainquënhuë', itopi. ⁷⁻⁸ Napotohuachinara, Apraanso huanirahuatón, itiro'sa nontaantacaso marë' móñsho ténin:

—Téhuëñchachin isoporinquë sa'ahuëco' po'moca'huaso nohuantohuatama', catahuaco. Capitari ya'huërenaméhuë Sohuaro hui'nin Ipron itopiso', nontoco topirahuë. ⁹ Maquipiraquë nanin ya'huërinso', pa'anchinco. Inaso no'panën intonquë ya'huërinso'. Onposona pa'térinso' no'tequë pahuërtarahuë. Inapohuato, chiminpatoi nipo'moca'huaiso marë' isoporinquë ya'huëtarinco huachi. ¹⁰ Ipronta Iti piyapi. Inanta inaquë chachin nisarin ni'ton, a'napita hua'ano'sa natantonënquë inaora chachin Apraan sha'huitérin. Chiníquënonin ninano ya'coanataquëchin, na'huëpisopitanta', natanacaiso marë'.

¹¹ —Ama sinioro napoquësohuë'. Topinan naninso quëtaranquë. Inainpichin no'pa' ya'huërinsonta', quëchinquë. A'napitanta natantonënquë sha'huitaranquë. Napoaton sa'anco' po'moquë huachi, itérin.

¹² Napotopirinhuë', Apraanso ya'huëhuano'sa inachintopiso nitotaton, anoyatarin. Naquëranchin ya'huëhuano'sa ni'tonënquë móñsho taantarín. ¹³ A'napitanta natantonënquë, Ipron itaantapon:

—Natanquë api nontaanta'inquë topirahuë. Onpopionta no'pa marë' pahuëre' maquë'. Naporo huarë' sa'ahuëco' po'moarahuë, itérin.

¹⁴⁻¹⁵ —Noya sinioro pa'. Ina no'paso', catapini pasa coriqui prata quëran nininso' pa'térin. Canpoaso ma'huaënpoa ni'tehua', co inaíchin marë' aquëtë huarë' nonsápaso ya'huërinhuë'. Napoaton, po'mochanquë sa'anco huachi, itérin.

¹⁶ Napohuachina, Apraanso ina nápo marë' anoyatérin. Ina quëran Iti hua'ano'sa ni'tonénquë, no'tequën pahuérétérin. ¹⁷⁻¹⁸ Inapoaton Apraani, Ipron no'panën Maquipiraquë ya'huérinso', pa'anin. Ina no'paso', insina nararo Mamiriri hua'anéntérin quëran, pi'i pipirinso parti quëparitérin. No'pa', nanin, nararo'sa inainpichin ya'huérinso', inapita Apraani hua'anéntérin huachi. Iti hua'ano'sari ya'ipiya quëran nitotopi. Ninano ya'coanataquëchin na'huépisopitanta', nitotopi.

¹⁹ Nani anoyatahuaton Apraanso', Maquipira naninquë sa'inco' po'morin huachi. No'pa' pa'aninquë napotérin. Ina no'paso' sha'huirahuëso chachin, Mamiriri hua'anéntérinso no'pa quëran, pi'i pipirinso parti quëparitérin. Ina ro'tëso', Ipron itopi anta'. Canaan parti ya'huérin. ²⁰ Ina pochin Apraan, no'pa', nanin, inapita pa'anaton, hua'anéntérin. Itiro'sari, pa'antérin nipa'pitacaiso marë'.

24

Isaco marë' sanapi yonípiso'

¹ Apraan nani noyá mashotérin huachi. Nani ma'sha nininquë Siniorori catahuamiatérin. ²⁻³ A'na tahuëri, piyapinën masho masho nininso', pérarin. Inari ya'ipi ma'shanénpita a'pairin. Hué'pachina itapon:

—Natéancoso nitota'huaso marë', tonaroana së'huatoco. Së'huatatonco: “Sinioroso Yosë ni'ton, inápaquë hua'anéntaton, isoro'panta hua'anéntérin. Ina ni'sárinco ni'ton, no'tequën natéaranquën. Co isoporinquë Canaan sanapi nininso', Isaco macacaso ya'huérinhueü”, itoco. ⁴ Quëma chachin hua'huatérahuëso no'paquë paquë'. Inaqué pa'sahuaton, quémopinéhuëpita quëran sanapi yonítéquë', itérin.

⁵ Napotohuachina, piyapinënsi itapon:

—Napopiranhuë', sanapi yonirahuëso co yaima quintahuachinco huë': ¿Onpochita? ¿Hua'huatéranso parti hui'nan quëpamanta'i ti? itérin. ⁶ Napotohuachina, Apraani itapon:

—¡Ama napoquësuhueü! ¡Co inaquë quëpamantacaso ya'huérinhueü! ⁷ Sinioroso' Yosë ni'ton, inápaquë hua'anéntérin. Nani ina sha'huitérinco iso no'pa' shihuëpitari hua'néntacaso'. Iráca tatahuë ya'huérin no'pa quëran ocoirinco. Quémopinéhuëpita ya'huérin parti quëran ocoirinco huachi. Ocoirahuatonco iséquë quëninco. Inari chachin anquëninën a'pararin catahuainquënsi marë'. Ina nohuanton, sanapi nohuantarín iséquë huëcacaso'. ⁸ Sanapi iséquë huëcacaso co nohuantuohuachinhuë', naporohuarë' Yoscoarë' ténanso co na'intarinquënhueü'. Nipirinhueü' ama onporonta inatohua hui'nuhüe quëpaquësuhueü', itérin.

⁹ Napotohuachina, piyapinëni Apraan tonaroananen së'huatérin. Së'huatahuaton: “Yoscoarë', sha'huitérancoso chachin, nisarahuë,” itérin. ¹⁰ Itahuaton, tapatarin huachi. Hua'anén ma'shanénpita, pa'ton pa'ton nininsopita, huayonahuaton, nicanatacaso marë' tapararin. Shonca camiyóquë apë'pëtahuatona', Nacoro ninano itopiquë, pa'pi huachi. Inaso ninano', Misopotamia parti ya'huérin.

¹¹ Pa'sápatona', canconpi huachi. Ninano aipiran, yatashirahuaso canconpi. Naporohuaquë nano'sa i'sha macapona posoquë huë'sapi. Apraan piyapinënsi camiyoro'sa a'na poso pirayan achinotarin. ¹² Naporahuaton inaquë chachin Yosë nontérin: “Ni'quë Sinioro, quémasco Yosënquën. Hua'anéhuë Apraan, natérinquë. Hua'anéhuë nosoroaton catahuaco. ¹³ Nano'sa i'sha macapona huëcasoi', iso poso pirayan ninatapo. ¹⁴ Insoso nanon: ‘Yonshanén chinohuaraquë', canta pi'piyan i'sha o'opainquë, itohuato: ‘O'oquë api, camiyonénpitanta machi o'oina', ichinco. Ina quëran piyapinënsi Isaco marë' sanapi huayonanso', nohuitarahuë. Ina pochin nitohuachinco: Téhuëñchachin hua'anéhuë Yosëri nosoroaton catahuarin, tosarahueü,” itérin.

¹⁵ Orarinso' co tiquiyátérasuhueü', a'nara nanon yonsha piténahuaton, huë'sarin ni'nin. Inaso nanon, Pitoiro hui'nin. Nipica itopi. (Pitoiroso', sha'huirahuëso chachin Nacoro hui'nin. Miricaquë hui'nahuaninso'. Nacoronta Apraan iya'huain.) ¹⁶ Nipicaso',

noyápiroyanchin. Naporahuaton nanon, co quëmapiri së'huayátérarinhuë'. Canquirahuatón posoquë nohuaramarin. Yonshanën amëntaitérinso piténahuaton, panantapirinhuë', ¹⁷ Apraan piyapinëni ta'arahuatón, icantonin. Icantahuaton, itapon:

—Canta apia'hua, yonshanën quëran pi'pian i'sha o'opainquëñ topirahuë, itérin.

¹⁸ —O'oquë api, itérin Nipicari. Napotahuaton, yonshanën chinohuararin. Inapoaton o'shitacaso marë' së'quëtérin. ¹⁹ Nani o'opachina, Nipicari itapon:

—I'sha maantarahuato, camiyonënpitanta o'opiquë ta'panchi nohuantopiso' o'oina', itérin. ²⁰ Itahuaton, a'naromarëáchin pë'tahuaros'a o'opiquë, ta'panarin. Ya'ipi camiyoro'sa', o'ocai huarë' inaporin. ²¹ Inapoaso', Apraan piyapinëns'o co manta taponahuë', topinan ni'sárin: "Téhuëñchachin Siniro cataluarinco ni'ton, ¿co topinan iratomaraco-huë ti?" ténin yonquiaton. ²² Camiyoro'sa nani o'opachinara, Apraan piyapinëns'o, oro quëran po'moitëra pochin nipiso' manin. Saota cramo pochin quë'ninso'. Ina masahuaton, Nipica nitéananënqué a'tëntérin. Naporahuaton cato a'sontanpa oro quëran nipiso', quëtérin. A'naya a'naya pasa na'con cramo quë'ninso', quëtérin. ²³⁻²⁵ Inapita quëtahuaton, natanin:

—¿Ma'ninta quëmaso' tata?

—Caso tatahuë Pitoiro. A'shinso', Mirica itopi. Tata pa'pinso' Nacoro itopi.

—¿Ya'huërin campita pëinëmaquë chinota'huaiso to?

—Ya'huërin mini. Camiyoro'santa capacaiso ya'huërin, itérin Nipicari.

²⁶⁻²⁷ Ina natanaton, Apraan piyapinëns'o isonin. Isonin quëran Yosë chinotaton itapon: "¡Ma noyacha Siniroso paya! Inaso Yosë, hua'anëhuë Apraan natérinso'. Téhuëñchachin hua'anëhuë nosoroaton, noya cataluaantarin. ¡Quëmopinënpita pëinënqué huarë' no'tequëñ quëninco!" ténin.

²⁸ Nipicaso' ta'arë'nachin a'shin pëinënqué pa'nin. Inaquë ya'ipi naporinso sha'huiontarin. ²⁹⁻³⁰ Nipicaso' a'na yo'in mashonën ya'huëtérin. Inaso', Napano itopi. Po'moitëra pochin nininso' oshin quëtopiso' nicaparin. A'sontanparinsopitanta', nicaparin. Sha'huirinsonta natanahuaton, Apraan piyapinëñ yonicaso marë' posoquë ta'amarin. Ina pirayan, camiyonënpitarë chachin huaniárin quënamarin. ³¹ Inaquë nontaton itapon:

—Huëqué api. Quëmaso' Siniro noya cataluarinquëñ. ¡Co aipiran quëparitamaso ya'huërinhuë! Nani pëi taparahuë campita marë'. Camiyoro'santa huë'ëcaiso', nani taparahuë, itérin.

³² Napotohuachina, pëiquë pantapi huachi. Inaquë Napanori pë'pëtoros'a chino-huararahuaton, camiyoro'sa a'carin. Apraan piyapinëñ, ca'taninsopitarë chachin nipa'morantëcaiso marënta', i'sha quëshirin. ³³ Cosharo acotohuachinara, Apraan piyapinëns'o tapon:

—Co'huara coshachátérapohuë', ma'marësona huë'nahuësoton, sha'huita'huanquëmaso ya'huërin, ténin.

—Ina'ton nipachin sha'huitoco, itérin Napanori.

³⁴ —Caso Apraan piyapinënc. ³⁵ Siniroori hua'anëhuë cataluamiatérin ni'ton, pa'pi notohuaros'a ma'sha ya'huëtérin: Ohuacaro'sa', ohuicaro'sa', inapita notohuaros'a pë'tahuarin. Naporahuaton oro, prata inapita ya'huëtérin. Piyapinënpitanta quëmapi'sa', sanapi'sa', inapita ya'huëtérin. Camiyoro'sa', moraro'sa', inapitanta na'a pë'tahuarin. ³⁶ Naporahuaton sa'in Sara itopisonta', a'naíchin hua'huanin. Paiya nicaponahuë', quëmapi hua'huanin. Inari iporaso', ya'ipi hua'anëhuë ma'shanënpita, hua'anëntapon huachi. ³⁷ Hua'anëhuë camairincoso', natëca'huaso marë' nani Yoscoarë' ta'to sha'huitérahuë. Naporos'a napotérinco: "Co isoporinquë Canaan sanapi nininso', Isaco macacaso ya'huërinhuë". ³⁸ Tatahuëi quëran quëmopi ninaisopita ya'huëpiso parti téhuëñchino' paquë'. Inaquë pa'sahuaton, huëntonëhuë quëran chachin sanapi hui'nahuë marë' matomaquë', itérinco. ³⁹ Napotohuachincora, cari itérahuë:

“Quëmaso' hua'anëhuënquën nipiранhuë' nonchinquën: Pa'pato, co'so' sanapi yaimaquintahuachincohuë' ¿Ma'ta onpo'i?” itérahuë. ⁴⁰ Napotohuatora, sha'huitérinco: “Ni'quë', caso Sinioro iranën no'tequën pa'terahuë ni'ton, anquëninën a'pararin catahuainquënso marë'. Ina nohuanton, noya pa'sahuaton sanapi quënamaran. Tatahuëi quëran quëmopinëhuë hui'nin chachin, hui'nahuë marë' matomaran. ⁴¹ Quëmopinëhuë co hui'nin yaa'pantihuachinquënhuë', naporor huaréachin Yoscoarë' ténanso', co na'intarinquënhuë”, itérinco.

⁴² Napoaton huë'sápatoi, ipora tahuëri posoquë canquirai. Inaquë Yosë nontato napotérahuë: “Sinioro quëmaso Yosënquën. Hua'anëhuë Apraan chinotérinquen. Ni'quë Sinioro. Téhuëñchachin quëma catahuararanco noya huë'nahuë nipaçinso', ⁴³⁻⁴⁴ iso poso pirayan nontaranquënso' natanco. Apira sha'huitohuatënquen inachachin niin ténahuë. Inso nanonsona, i'sha macapon o'marinso', cari natapato: ‘Canta pi'piyan yonshanën quëran i'sha o'opainquën,’ ichi. Napotohuato: ‘O'oquë api. Camiyonënpitanta machi o'oina’, ichinco. Ina quëran hua'anëhuë hui'nin marë' sanapi huayonanso', nohuitarahuë,” itérahuë. ⁴⁵ Orarahuëso', co tiquiyátérasocohuë', Nipica o'marin ni'nahuë. I'sha macacaso marë' yonshanën pitënhauaton, posoquë o'marin. Paaparahuato: “Canta api i'sha quëtoco topirahuë,” itérahuë. ⁴⁶ Napotohuatora, yonshanën a'naroáchin chino-huararahuaton, itaponco: “O'oquë api, camiyonënpitanta machi o'oina”, itahuatonco, o'shitérinco. Camiyoro'santa', o'shitérin. ⁴⁷ Ina quëran cari natanahuë: “¿Ma'ninta quëmaso' tata?” itérahuë.

“Caso tatahuë, Pitoiro. Inaso', Nacoro hui'nin. Miricaquëya hui'nahuaninsos,” itérinco. Itohuachincora, a'nara po'moitéra pochin nininsos nitéananenquë a'tentérahuë. Naporahuaton cato a'sontanpacaso quëtérahuë. ⁴⁸ Ina quëran isonahuato, Sinioro chinotérahuë: “¡Ma noyanquëncha quëmaso' Sinioro paya! Quëmaso Yosënquën, hua'anëhuë Apraan natérinquen. Noya quënanco ni'ton, no'tequën canquirahuë. Hua'anëhuë hui'nin acoantacaso marë' quëmopinë hui'nin chachin quëpatarahuë,” itérahuë, Sinioro chinotato. ⁴⁹ Iporaso huachi, sha'huitoco nitochi. ¿Téhuëñchachin hua'anëhuë nosoroapoma ti? Co'so' nohuantohuatamahuë', sha'huitoco inanta nitochi. Nani nitotohuato ma'sona nica'huaso' yonquiarahuë huachi, itérin.

⁵⁰ Napotohuachina, Napano, Pitoiro, inapitari itopi:

—Ya'ipi naporansopita Sinioro nohuanton naporin ténai. Napoaton, so'yachin nipaçin. ⁵¹ Ma'tana Nipica ya'huéarin. Siniorori ina pochin nohuantérin ni'quëhuarë', quëpaquë'. Hua'anëhui'nin so'yachin, itopi.

⁵² Napopiso natanahuaton, Apraan piyapinënsos isonin. Isonahuaton, no'paquë huarë' monshomarin: “Yosparinquen Sinioro,” itérin. ⁵³ Ina quëran notohuaro' ma'sha quëninsopita o'quirin. Oro quëran, prata quëran, ina quëranpita nipo'so', Nipica nicanarin. A'mocasonta', pa'ton nininsopita quëtérin. A'shin, yo'in, inapitanta notohuaro' ma'sha pa'ton nininsopita quëtérin. ⁵⁴ Naporor huarë' Apraan piyapinë, ca'taninsopitarë chachin, coshatopi, o'opi, napopi. Naporahuatona naporor tashi inaquë chinotopi huachi.

Tahuërinquë capayatahuaton, Apraan piyapinënsos Nipica pa'pin, yo'in inapita itapon:

—Ipora tahuëri hua'anëhuë ya'huërinquë yapaantaráhuë ta'a, ténin. ⁵⁵ Napopirinhue', Nipica yo'insos a'shinë chachin, itapona':

—Shonca tahuëri térranta nanon quëparichin. Ina piquëran noya imasarinquen huachi topiraihuë', itopi. ⁵⁶ Itopirinahuë', Apraan piyapinënsos napoantarin:

—Ama aquëtë huarë' ahua'quicosohuë'. Yosë nohuanton, noya huécato, co topinan iratérahuë'. Napoaton hua'anëhuë ya'huërinquë pananta'huaso ya'huérin ténahuë, itérin.

⁵⁷ Napohuachina, itaantapi:

—Pa'ahua nipachin nanon përahua'. ¿Ma'tama ichinpoa pa'? topi. ⁵⁸ Nipica përasahuatona', natanpi:

—¿Ipora tahuëri chachin nohuantëran iso quëmapi imacaso to? itopi.

—Nohuantërahuë mini, tënин.

⁵⁹ Napohuachina, Nipica pacacaso nohuantopi huachi. Ina aso'sorinso sanapinta', a'pantopi. Naporahuaton a'napitanta piyapinënpita, sanapi'sa nininso' a'pantopi. Apraan piyapinëñ, ca'taninsopita, inapitanta noya a'papi huachi. ⁶⁰ Nani yapa'pachina, yo'ini nôya yonquirapiton iso pochin sha'huitérin:

“Oshira, Yosë catahuainquën.

Pa'pi nohuantërai, noya hua'huanaton, notohuaro' amiparinpita ya'huëtiinquenso'.

Naporahuaton amiparinpitanta',

Yosëri catahuain inimiconënapita minsëra'piaina',” itérin.

⁶¹ Nani nontohuachinara, Nipicaso piyapinënpitarë chachin, camiyoro'saquë ya'mitëahuatona', Apraan piyapinëñ imapi. Ina pochin Apraan piyapinëñ, Nipica matomarahuaton, huënantarin huachi.

⁶²⁻⁶³ Naporor' Isacoso', Niquipi parti ya'huëarin. “Nanpiton ni'sárincoso' poso,” itopiquë Yosë yonquiapon pa'nin quëran, huënantárin. Nani yatashirapaso', a'nanaya ni'pirinhuë', ni'toro'sa camiyonënapitarë chachin canquirapi ni'nin. ⁶⁴ Nipicanta', Isaco ni'sahuaton, camiyonëñ quëran nohuuararin. ⁶⁵ Nohuararahuaton Apraan piyapinëñ natanin:

—¿Inta pasoso' quëmapi canpoataquëchin huë'sarin? itérin.

—Ina mini Isaco. Hua'anëhuë Apraan hui'nin, itérin. Ina natanahuaton, Nipicaso niimomotötérinso' në'mëtëquë, nipa'shinayatérin. ⁶⁶ Canconpachinara, piyapinëni ya'ipi naporinso Isaco sha'huitérin. ⁶⁷ Ina quëran Isacoso', a'shinch në'mëtë pëinënquë Nipica quëparin. Co hua'quiya quëranhuë' macaton, noya cancantérin. Pa'pi nosoromiatérin. A'shin marë' sëtäpirinhuë', inapoaton noya cancantérin huachi.

25

Apraan Sitoraquë hui'nahuaninsopita

¹ Apraanso', a'na sa'in ya'huëtaantarin. Inaso', Sitora itopi. ² Inaquënta hui'nahuaantarin. Inaquë hui'ninpitaso': Simiran, Cocosan, Mitan, Matian, Isopa, Soa, inapita. ³ Cocosan hui'ninpitaso': Sipa, Titan, inapita. Titan quëran pipipisopitaso': Asororo'sa', nitosoro'sa', niomoro'sa inapita. ⁴ Matian hui'ninpitaso': Ipan, Ihuri, Anoco, Apitan, Iritan inapita. Ya'ipi inapitaso', Sitora quëran pipipi.

⁵⁻⁶ Na'a hui'ninpita Apraan ya'huëtopirinhuë', Isacoráchin pochin ya'ipi ma'shanënpita, quëtérin. Sitoraquë, Acaraquë hui'nahuaninsopitaso', pi'piyan pi'piyan ma'sha nicanarin. Naporahuaton, nanopiso chachin niquë a'parin. Pi'i pipirinso parti ya'huëcaiso marë' a'parin. Co nohuantërinhuë' Isacorë' napopináchin ya'huëcaiso'.

Apraan chiminins'

⁷ Apraanso ya'ipiya quëran, pasa canchisë shonca a'natérápo pi'i icanin. ⁸ Nani noyá mashoya nipachina, mashori quëparin. Chiminpachina, shimashonënpita, quënancontarin huachi. ⁹ Hui'ninpita: Isaco, Ismairo, inapitari, pa'pitopi. Maquipira naninquë po'mopi. Maquipiraso', sha'huirahuëso chachin, insina nararo Mamiriri hua'anentérin quëran, pi'i pipirinso parti quëparitérin. Soaro hui'nin Ipron itopisoari, ina no'paso' hua'anentopirinhuë'. (Inapitaso' itiro'sa'.) ¹⁰ Ina no'pa chachin iráca Apraan nanoppon itiro'sa', pa'antérin. Inaquë inanta', sa'inco' Sara itopiso' pirayan, po'mopi.

¹¹ Apraan chiminpachina, Yosëri Isaco, catahuamiatérin. Inaso Nipicarë chachin: “Nanpiton ni'sárincoso' poso,” itopiso' pirayan, ya'huërapi.

Ismairo quëran pipipisopita

¹² Sha'huitëranquëmaso chachin, Apraan Acaraquëya hui'nahuanpachina, Ismairo itopi. Acaraso', iquipitoron. Sara piyapinën. Ismairo hui'ninpitaso', isopita: ¹³⁻¹⁵ Paninantérinso' Nipayo itérin. Ina piquëran niantapisopitaso': Sitaro, Atipiri, Mipisan, Misma, Toma, Masa, Atar, Tima, Quitoro, Nahui, Sitima inapita. ¹⁶ Ina nápo Ismairo hui'ninpita ya'huëpi. Shonca cato ya'ipiya quëran. A'naya a'naya no'panëna hua'anëtopiso', niapora'piapi. Ya'huëpisonta inapotopi. Naporahuaton, inapitaso inahuara inahuara huëntonénaquë, hua'an ya'conpi.

¹⁷ Ismairo pasa cara shonca canchisë pi'ipitaso' chiminin. Chiminpachina, pa'pitopi huachi. ¹⁸ Ismairo quëran pipipisopitaso', Apira parti, Shor parti, inapita partiro'sari ahuananapirin. Inaquë, no'pa' macatona ya'huëpi. Iquipito notënanquë ya'huëpi. Ina partitaquëchin Iquipito quëran, Asiriaquë ira pa'nins' na'huërin. Iinpitari, co nohuantopirinahuë', inaquë no'pa' macatona', ya'huëpi huachi.

Isaco hui'ninpita nasitérinso'

¹⁹ Iporaso Isaco naporinso sha'huichinquëma': Inaso', Apraan hui'nin. ²⁰ Catapini shonca pi'ipitaso', sa'arin. Pitoiro hui'nin Nipica itopiso', manin. Inaso yo'in, Napano itopi. Inapitaso' arano'sa itopi. Patan-aran parti ya'huëpi. ²¹ Nipicaso', co nanitérinhuë hua'huanacaso'. Ina marë' Isaco Siniro nontérin. Napohuachina, nontérinso' natanahuaton, catahuarin ni'ton, Nipica cayorin huachi.

²² Catopia'huaya cayoaton, yo'namënquë niahuerapi natanin. Napoaton yonquirin. "Hua'huahuëpita iporaquëranchin niahuerapi ni'quëhuarë": ¿Ma'marëta aquëtë huarë' nanpiiso?" ténin. Inapochin yonquiaton, Siniro nontérin. ²³ Natanpachina, Siniro nontérin:

"Catopia'huaya cayoran.

Inapita shinpita quëran cato nacion pipipon.

Cato huënton nicatona', niahuerápona'.

Ipora shimaslonëna co'huara nasichátëraponahuë', niahuepiso pochin nicapona'.

A'nara chini chiníquën nanantapon.

Naporahuaton hua'huas nininsoari

masho masho nininso camairápon," itérin.

²⁴ Napoin quëran, Nipica huaicaso nanirin. Catopia'huaya huairin. ²⁵ Quëchitérinsoso' quëhuashin aina'huatahuaton, ya'ipi anporotérin. Napoaton Isao* itopi. ²⁶ Ina pa'taso chachin, iionta', a'na imirin quëran Isao matocanahuaton, hua'huataantarín. Naporinso marë' inaso', Cacopo† itopi. Isaco saota shonca pi'ipitaso', hui'ninpita nasitapi.

Isao tëhuërinso'

²⁷ Catopia'huaro'sa noya so'sopi. Isaoso' hui'napitahuaton, ma'sha yonicaso pa'yatérin. Miso inantérin. Cacoposo niperihuë', co inaporihuë'. Ya'huëpique pa'yatérin ya'huápaso'. ²⁸ Isaoso', pa'pini na'con na'con pa'yatérin. Inantérinso capaton, napotérin. Ya'huëre' Nipicaso', Cacopo na'con na'con pa'yatérin.

²⁹ A'na tahuëri Cacopo shantë a'itarin. Inapoaso Isaonta', inantapon pa'nin quëran, pa'pi canotérin huënantarin. ³⁰ Cacopo a'itérinso ni'sahuaton itapon:

—Nosoroco iya, tana yatëparinco caso'. Quëhuashin‡ cosharo anpiranso', canta quëtoco ca'i, itérin. ³¹ Napotohuachina, Cacopori itapon:

* ^{25:25} Isao: Isaoso' piyapi anporo yonquiatona', ina pochin nohuitopi. † ^{25:26} Cacopo: Cacoposo', monatona'pi tapon naporin. ‡ ^{25:30} Itomo: Itomoso', quëhuashin cosharo téninso marë' inapochin Isao apoyatopi.

—Paninanquën ni'ton, na'con ya'huëtarinquën canacamaso'. Carinquën nipachin ya'huërëchinquën. Naporo huarë' iso cosharo quëtaranquën, itérin. ³² Napotohuachina, Isaoso' tapon:

—Ni'quë iyasha, tana caso yatépararino. Chiminpatoso', paninan ninahuëso marë' cana'huaso' ya'huëtérincosopita, topinan quëran nisarin, itérin.

³³ —Yoscoarë' quëtaranquën itoco nipachin, itaantarin Cacopori. Napotohuachina, "Yoscoarë' quëtaranquën," itérin. Inapoaton, Isaoso paninan nininso marë' canacaso ya'huëtérinsopita, co pa'yatérinhue'. ³⁴ Naporo huarë' Cacopori, pan acotahuaton, shantë a'itérinsonta o'huintérin. Nani ca'sahuaton, o'osahuaton, Isaoso' pa'nin huachi. Paninan nininso marë' canacaso ya'huëtérinso', co manta pa'térinhue' pochin nitérin.

26

Isaco Quiraro ninanoquë naporinso'

¹ Naporo tahuëri'sa Isaco ya'huërinso parti panca tanarotopi. Apraan nanopiso tahuëri'sa napopiso pochin, ninin. Napoaton sa'in, piyapinënpita, inapitarë chachin Quiraro ninanoquë pa'pi. Huiristino copirno, Apimirico itopiso ya'huërinquë pa'pi.

² Inaquë Siniorori ya'notahuaton, itérin: "Ama Iquipitoquë pa'maquësihuë". Inséquësona quëparitacaso', carinquën sha'huitaranquën. ³ Ipora marëso', iso no'paqué ya'huëtaco'. Carinquën ca'tanaténquën catahuararanquën. Ya'ipi iso no'pa', carinquën quëtaranquën. Shiparinpitanta', ina chachin quëtarahuë. Tataparin Apraan nani sha'huiterahue ni'ton, quëtaranquëma'. ⁴ Ca nohuanto quëma shiparinpita, na'amiatapona'. Tayoraro'sa pi'iro'tequë ya'huërinso nápo, ya'huapona'. Inapitari ya'ipi iso no'paro'sa hua'anëntapona'. Naporahuaton, ya'ipi isoro'paqué naciono'sa ya'huërinsopitanta', shiparinpita quëran catahuararahuë. ⁵ Apraanso': Ya'ipi sha'huiterahue'sopita, camairahuësopita, pënënhahuësopita, a'chinterahue'sopita, ya'ipi inapita natérin ni'ton, napoarahue," itérin.

⁶ Siniorori napotohuachina, Quiraro ninanoquë quëparitopi. ⁷ Ya'huëhuano'sari Nipica ni'sahuatona', so'in natampachinara: "Sa'ahuë," ta'caso niperinhuë, tē'huaton nonpinin: "Oshihuë," ténin. "Nipica noyápiroyanchin ni'ton, ya'huëhuano'sari macapona'. Ya'huëre' caso tēpaponaco," ta'ton naporin.

⁸ Hua'qui quëran pochin Apimiricoso', huintananën quëran notëtarin. Notëtapirinhuë', Isacori Nipica apinorarin quënanin. ⁹ Naporo' amatahuaton:

—¡Nipicaso', sa'an ténahuë! Ina naponahuë: ¿Onpoatonta', "oshihuë," ténan? itérin.

—Ina na'intérinco tēpaponaco caso'," ta'to naporahuë, itérin Isacori. ¹⁰ Napopirinhuë', Apimiricori itapon:

—¡Co napochitoncoihuë pora! Onpichin sa'an inso ya'huëhuani téranta', ichihuë'érin. Ina marë' quiyaso' oshahuaintoihuë', itérin. ¹¹ Napotahuaton, piyapinënpita camairin:

—Inquëma téranta iso quëmapihuë nípon, sa'ihuë nípon së'huahuatama', tēhuëñchachin chiminarama', itérin.

¹² Ina pi'iquë Isaco inaquë iminapatérin. Sha'tohuachina, Yosëri catastuarin ni'ton, pa'pi notohuaro' nitérinso' manin. ¹³ Notohuaro' ma'sha ya'huëtahuaton, pa'pi ma'huan quëparitérin. ¹⁴ Pa'pi notohuaro' ohuicaro'sa', ohuacaro'sa', piyapinënpita, inapita ya'huëtérin. Ina marë' huiristino'sari noyapatona', no'huipi. ¹⁵⁻¹⁷ Napoin quëran Apimiricori Isaco itapon:

—Quëmaso' quiya quëran na'con na'con ma'huanan ni'ton, pipiquë huachi, itérin. Napotohuachina Isacoso', sa'in, piyapinënpita, pë'tahuanënpitarë chachin pa'pi. Quiraro motopianaquë, pa'sahuatona', inaquë quëparitopi. Iráca Apraan nanopiron, ina piyapinënpitari posoro'sa ihuapiso', huiristino'sari amëntarotopi.

¹⁸ Inaquë ya'huëapona pochin, naquéranchin ina posoro'sa ihuaantatarin. Iráca pa'pincori nanopiron ihuapisopita, inapotaantapi. Ina chiminpachina huiristino'sari,

amëntarotopirinahuë', ina posoro'sa chachin ihuaantarin. Iráca pa'pincori ina posoro'sa nohuitérinso chachin, inarinta nohuitaantarin.

19 A'na tahuëri Isaco piyapinënpitari motopianaque a'na poso ihuarapi. Ihuarapiri-nahuë', no'pa quëran i' pipirinso' quënanpi. **20** Napoaponahuë', Quiraro motopianaque, huiristino'sa ohuicanëna a'paipisopita, no'huitopi. Isaco ohuicanënpita a'paipisopitarë', nino'huitona niahuepi: "¡Also i'shaso', quiyaquën!" Niitatona', niahuepi. Napoaton Isacori, apoyatérin: "Niahueyatopiso' poso," itérin. **21** Ina piquëran piyapinënpitari, a'na ya'huërë' ihuaantapi. Ina marënta', naquëranchin niahueantapi. Ínanta', Isacori apoyataantarin: "Niinimicotopiso' poso," itérin. **22** Isacoso', sa'in, piyapinënpita, pë'tahuanënpita, inapitarë chachin, áquë pa'pi huachi. Inaquë a'na poso ihuantapi. Ina marëso' co huachi niahuepihuë' ni'ton: "Cha'ëpisopita, posonën," itérin. "Ipora têhuëñchinso' Siniro nicha'ërinpoa noya noya isëquë ya'huëcaso marë" ta'ton, ina pochin ina poso nohuitérin.

23 Ina quëran, Piirsipa parti paantapi. **24** Naporo tashi Sinirori ya'notahuaton itapon: "Caso Yosëco. Tataparin Apraan chinotérinco.

Ama të'huaquësohuë'.

Carinquën ca'tanatënquën catahuamiataranquën.

Piyapinëhuë Apraan natérinco ni'ton,
ca nohuanton shiparinpita na'amiatapon," itérin.

25 Napotohuachina Isacoso', a'nara artaro inaquë ninin. Ina nisahuaton, Siniro chinotérin. Inaquë ya'huapona pochin piyapinënpitari a'na ya'huërë' poso ihuaantapi.

Isaco Apimiricorë anoyatérinso'

26 A'na tahuëri Apimiricoso', Quiraro quëran Isaco nontapon huë'nin. Aosato, Huicoro, inapitari ca'tanin. Aosatoso', amiconën. Huicoroso niperinhuë', capitan, sontaronënpita camairinso'. **27** Canquiuhuachinara, Isacori itapon:

—Canpitaso co quë'yatamacohuë', ya'huërama quëran ocoiramaco. ¿Ma'marëta iporaso' yaniantaramaco? itérin.

28 —Têhuëñchachin quëmaso', Siniro catahuamiatérinquen ni'nai. Napoaton yonquirai quëmarë'coi anoyata'huaiso'. Iso pochin anoyatahua': **29** Quiyaso ya'huëraiquë, co ma'sha onpotérainquënhuë', noya nicatëinquen, noya quëran a'parainquen. Napoaton quëmanta', ama ma'sha onpotocoisohuë'. Yosë quëmaso' ipora noya nicatëinquen catahuarinquen ni'ton, napotarainquen, itérin. **30** Napotohuachinara, naporo chachin Isacori panca pita nitérin ni'ton, coshatopi, o'opi, napopi. **31** Tahuëririnquë tashiramichin, huënsëantahuachinara itohuara capini: "Yoscoarë' noya nini'tehua' ya'huarihua'," nitopi. Ina quëran, nani anoyatahuatona': "Pa'sarai huachi," topachinara, Isacori itapon: "Osharan paco', Yosë catahuainquëma'," itérin.

32 Naporo tahuëri chachin, Isaco piyapinënpitari huë'sahuatona', sha'huitiipi: "Poso ihuaráaiso', nani i'sha quënanai," itiipi. **33** Napotohuachinara, Apimiricorë anoyata-tona': Yoscoarë' niitopiso', yonquiaiton, ina pososo' aninuhanin, "Sipa" itérin. Napoaton ina ninanoso', ipora Iso quirica ninshitasoco huarënta' Piirsipa itopi.

34 Isao catapini shonca pi'ipotihuachina, Cotita manin. Inaso', Piiri itopiso' hui'nin. Piiriso', Iti piyapi. Ina piquëran Isaoso', a'na maantarín, Pasima itopiso'. Inaso', Iron hui'nin. Ironta Iti piyapi chachin. **35** Ina catoro'sa co Yosë imatonahuë', Isaco, Nipica inapita na'con asëtatona', aparisisitopi.

Cacopo nonpinaton, iin ya'huëretérinso'

1 Isaco noyá mashotohuachina, pëtorayataton co huachi quënantérinhuë'. A'na tahuëri hui'nin paninan Isao itopiso' përarin. Huë'pachina:

—Conpa, itérin.

—Ma'ta tata ya'huarahuë, itérin Isaori.

² —Ni'quë conpa, nani caso mashotérahuë. Payo chiminapo huachi. ³ Napoaton pë'chinanën, shinérénënpita, inapita masahuaton ma'sha yoníquë'. ⁴ Nani tēpahuatan, costarincoso chachin po'morahuaton, quëshico ca'i. Ina quëran noya ya'huëcamaso marë' sha'huitaranquën huachi. Co'huara chiminyáterasocohuë', inapochinquën, itérin.

⁵⁻⁶ Napoaponahuë', Nipicanta Isao napotérinso natanarin. Napoaton ina tananquë paaso chachin, a'naroáchin Cacopo pératon sha'huitérin:

—¡Natanquë hua'huásha'huichinquën. Nani iya masho tatari napotérinso' natay-atérahuë! ⁷ “Ma'sha yoníquë'. Nani tēpahuatan, costarincoso chachin po'morahuaton, quëshico ca'i. Ina quëran Sinioro ni'tonénquë chachin noya ya'huëcamaso marë' sha'huitaranquën huachi. Co'huara chiminyáterasocohuë', inapochinquën,” itérin. ⁸ Napoaton noya natanquë sha'huichinquën. ⁹ Pë'tahuaros'a ya'huérinquë pa'sahuaton, cato chipoa'huásha'huichinquën huachi. Co'huara chiminyáterasocohuë', inapochinquën, itérin.

¹⁰ Nani anpitohuato, quëmari quëpatéquë ca'in. Inapotohuatan, quëma noya ya'huëcamaso marë' sha'huitarinquën huachi. Co'huara chimiyantérasohuë', inapochinquën, itérin.

¹¹ A'shini napotopirinhuë', Cacoporiso itapon:

—Iyahuëso anporohuan. Caso niperinhuë', tomapico. ¹² Tatahuë së'huahuachinco, nohuitarinco. Nohuitatonco: “Cacopo nonpintarinco,” topachin, co inapotatoncohuë' ama huachi noya ya'huëca'huaso marëhuë' sha'huitarinco, itérin.

¹³ Itopirinhuë', a'shini itapon:

—Co huachi noya ya'huëcamaso marëhuë' sha'huitohuachinquën hua'huásha'huichinquën huachi, ca marë' niin. Quëmaso sha'huitéranquënsa chachin nicaton, cato chipoa'huásha'huichinquën huachi, itérin.

¹⁴ Cacoposo', macontarahuaton a'shin quëshirin. Tëparahuaton, inari Isaco costarinso chachin, po'motérin. ¹⁵ Isao noya noya a'morinsopita në'mëtë pëinénquë taparinsonta', manin. Inaquë Cacopo a'moantérin. ¹⁶ Naporahuaton, chipoa'huásha'huichinquën huachi, tanpaquënpita, cononën, inapita achinpítérin. ¹⁷ Inapotohuaton, po'morinso sënanquë o'huintérin. O'huintahuaton, panë chachin pa'pin quëtacaso marë' hua'huin quëtérin.

¹⁸ Cacoposo', pa'pin ya'huérinquë ya'conahuaton, nontoonin:

—¡Tata! itérin.

—Ya'huarahuë conpa. ¿Inso hui'nahuëñquënta quëmaso'? itérin pa'pini.

¹⁹ —Ca mini Isaoco, paninantérancoso'. Nani sha'huitérancoso' quëshiranquën. Huënséaton tata, ma'sha inanahuëso', ca'quë'. Ina piquëran noya ya'huëca'huaso marë' sha'huitoco huachi, itérin. ²⁰ Napotohuachina, Isacori natanapon:

—¿Onporahuatonta conpa a'naroáchin quënan quënanaranso'? itérin.

—Sinioro chinotéranso', inaso Yosë ni'ton, catastuarinco quënana'huaso', itérin Cacopori. ²¹ Pa'piniso niperinhuë', itaantarín:

—Ya'carico nipachin së'huainquën. Tëhuëñchachin Isaonquën ninanso yanitotérahuë, itérin. ²² Napotohuachina, pa'pini së'huacaso marë' ya'caririn. Së'huarahuaton, tapon: “Isao pochin tanpaquënsa' níponahuë', Cacopo pochin nohuiantérahuë,” tënín. ²³⁻²⁴ Isao tanpaquënsa' níponahuë', inapotohuachina, Isacoso', noya coshatahuaton, o'orin, naporin. Napoaponahuë' co'huara noya ya'huëcaso marë' sha'huichátérasohuë', naquëranchin nataantarín:

—¿Tëhuëñchachin quëma Isaonquën? itaantarín.

—Inaco mini, itérin Cacopori. ²⁵ Napotohuachina, Isacori itapon:

—Acotoco nipachin conpa inantéranso ca'i. Ina quëran nani coshatahuato, noya ya'huëcamaso marë' sha'huitaranquën huachi, itérin. Napotohuachina, Cacoposo' pa'pin capacaso acotérin. Huinonta quëshirin. Isacosó', noya coshatahuaton, o'orin, naporin.

²⁶ Inaporahuaton hui'nin itapon:

—Ya'cariatonco conpa apinoco, itérin. ²⁷ Cacopori pa'pin apinocaso marë' ya'caritohuachina, Isacori a'morinso huë'ëropinën imérin.

Naporor noya ya'huëcaso marë' iso pochin sha'huitérin:

“Naporin ta'a, ina pochin mini huë'ëropitëran.

Siniorori catahuahuachina imin noya noyatérin.

Napohuachina pimoanahuaninso pochin quëmanta huë'ëropitëran.

²⁸ Yosë nontërahuë ina nohuanton o'nan ya'huëchinquën.

Sha'tohuatan noya noya nitacaso marë' ya'huëchinquën.

A'napita nitërinso' mapi quëran, noya noya maquë quëmaso'.

Notohuaro' trico nitërinso' maquë capamaso'.

Notohuaro' huinonta ya'huëchinquën o'ocamaso'.

²⁹ Hua'huayáterahuë piyapi'sa camaiquë'.

Naciono'santa të'huatatënën natëinënquën.

Iyaparinpitanta camaiquë'. Të'huatatënën inapitanta natëinënquën.

No'huitënën co huachi noya ya'huëcamaso marëhuë' sha'huitohuachinën, Yosërinta in-apotarin.

Inpitasona noya ya'huëcaso marë' sha'huitohuachinën, Yosërinta inapotarin,” itérin.

³⁰ Isacori, Cacopo noya ya'huëcaso marë' sha'huitérinso', tonitérin. Tonitohuachina, inaso pa'pin ya'huërin quëran pipirin. Pipiso chachin, Isaonta inantapon pa'nin quëran huëntararin huachi. ³¹ Huëntarahuaton, inantërinso po'mointarin. Anpirahuaton, pa'pin quëpataton, itapon:

—Huënsëquë tata, inantërahuëso po'motëranquën ca'quë'. Capaton noya ya'huëca'huaso marë' sha'huitoco huachi, itérin. ³² Napotohuachina Isacori natanin:

—¿Inquënta quëmaso'? itérin.

—Ca mini Isaoco, paninatérancoso', itérin. ³³ Hui'nin natanahuaton, Isaco pa'pi pa'yantérin. Pa'yanaton ropa ropátarin quëran itapon:

—¿Inta nipachin apípora inantërinso po'morahuaton, quëshirinco? Co quëma can-quiyáterasënquënhuë quëshirinco ni'ton, nani ya'ipi ca'nahuë: “Isao mini,” ta'to, nani noya ya'huëcaso marë' sha'huitérahuë. Ipora inaso', noya noya ya'huapon huachi, itérin. ³⁴ Pa'pin naporinso natanahuaton, Isaoso co napion cancantaton na'nëmiatérin. Na'nëton pa'pin nontërin:

—¡Canta tata, noya ya'huëca'huaso marë' sha'huitoco! itérin ³⁵ Itopirinhuë', pa'pini itapon:

—Iyaa'hua huë'sahuaton nonpintiirinco ta'a. Quëma pochin ancantato, noya ya'huëcaso marë' sha'huitérahuë, itérin.

³⁶ —¡No'tén chachin inaso', Cacopo itopi paya! ¡Nani catoro monararinco! Pani-nan ninahuëso marë' ya'huëtiincoso nininso'ton, matérinco. Iporanta', tatahuë noya ya'huëca'huaso marë' sha'huitiincoso' mataantarincos. ¿Co'tama canta', pi'piyan téranta noya ya'huëca'huaso marë' sha'huitaponcohuë' to? itérin. ³⁷ Napotohuachina, Isacori itapon:

—Ni'quë conpa: Nani Cacopo sha'huitérahuë camairápainquëns. Ya'ipi quëmopinënpita camairápaso marë' nani sha'huitérahuë. Hua'huayáterahuë, trico, huino, inapita ya'huëtacaso marë' Yosë nontërahuë. Inasá tiquiantérahuë ni'ton, ¡quëma marëso' capa huachi ta'a! itérin. ³⁸ Itopirinhuë', Isaoriso chiníquën nontaantarincos:

—¿Iyayáchin noya ya'huëcaso marë' sha'huitacaso ya'huërin ti? ¡Canta onpopionta inapotoco! itérin. Napotahuaton chiníquën na'nëantarincos.

³⁹⁻⁴⁰ Napohuachina, Isacori itapon:

“Quëmaso niperinhuë', noyaro'pa' aquëtë ya'huaran.

O'nan pahuaininquë ya'huéapon.

Noya ya'huëcaso marë' ahuëtápamaso ya'huapon.

Iya'huá camairáponquén.
Napoaponahué', chini chiníquén nipatan,
iya'huá quëran, pipiaran huachi," itérin.

Cacopo iin ta'anapirinso'

⁴¹ Naporo quëran huarë' Isaori Cacopo pa'pi no'huirin huachi. Inasá pa'pini noya ya'huëcaso marë' sha'huitérin ni'ton, naporin. Napoaton yonquirárin: "Payo tata chiminapon. Ina chiminpachin, Cacopo tépaarahué," ténin. ⁴² Isao napo yonquitérinso', Nipicaso nitotérin. Napoaton Cacopo amatahuaton, itapon:

—Ni'qué hua'huá. Iya masho, napotéranso marë' yatéparinquén natantérahué. ⁴³ Napoaton noya natanco sha'huichinquén. A'naroáchin Aran ninanoquë ta'aquë'. Api masho Napano pëinënqué paqué'. ⁴⁴⁻⁴⁵ Inaqué paaton, hua'quimiachin yaca-paontaqué'. Iya masho no'huiterinso' sanoquë huarë', inaqué ya'huëcontaqué'. Co huachi quënanpachinquénhué', napotéranso' nariantapon. Naporo' huënantamaso marë' amataranquén. Co nohuantérahué' naporo chachin catonquëma chiminamaso', itérin.

⁴⁶ Ina quëran Nipicaso', Isaco nontapon pa'nin:

—Iti sanapi'sa Isaori maninso' co noyahue' nipi ni'ton, chiminchináchin can-cantérahué. Cacopo ya'huérë' ina sanapi chachin, iso Canaan ro'tequë ya'huérinso maantahuachin, chimina'huaso noya noya nisarin, ténahué, itérin.

28

¹ Nipicari napotohuachina, Isacori, Cacopo amatahuaton, noya nontérin. Co no'huirinhue'. Noya ya'huëcaso marë' sha'huitaton itapon: "Yosë noya catahuainquén conpa," itérin. Napotahuaton pënénin: "Ama iso Canaan no'paqué sanapi máquësuhue'". ² Patan-aran parti téhuëñchino' paqué'. Tata masho Pitoiro ya'huërinqué pa'sahuaton, api Napano hui'ninpita a'nara maqué'. ³ Yosë ya'ipi nanitaparinso' catahuainquén. Na'a hui'ninpita quëchinquén. Quëmá quëran na'a naciono'sa pipicaso marë' inapochinquén. ⁴ Yosëri Apraan noya ya'huëcaso marë' sha'huitérinso chachin, quëmanta quëchinquén. Quëma shiparinpitanta', inachachin quëchin. Iso no'pa' ipora yacapatérëhuaso', quëchinquëma'. Yosëri nani Apraan sha'huitérin ni'ton, quëtarinquëma'," itérin. ⁵ Ina pochin Isacori Patan-aran parti Cacopo a'parin. Cacoposo' pa'sahuaton, Napano ya'huërinqué canconin. Nani sha'huirahuëso chachin inaso', Pitoiro hui'nin. Pitoiroso' Aran piyapi. Napanoso', Nipica yo'in miáchin. Nipicanta', Cacopo, Isao, inapita a'shina'.

Isao sa'antarinso'

⁶ Isaoso', pa'pini, Cacopo noya ya'huëcaso marë' sha'huitérinso' ni'nin. Patan-aranquë sa'acaso marë' a'parinsonta', ni'nin. Naporahuaton, pa'pini noya ya'huëcaso marë' sha'huitapon pochin: "Ama Canaan sanapi máquësuhue'," itérinsonta natanin. ⁷ Pa'pini, a'shini, sha'huitérinso chachin Cacoponta', Patan-aranquë pa'ninso' ni'nin. ⁸ Pa'pin inaporin ni'ton, Isaoso': "Canaan sanapiso', co tatahuë costarinhue'," ténin. ⁹ Napoaton, Ismairo nicapon pa'nin. Inaso', Apraan hui'nin. Inatohua paaton, Ismairo hui'nin Maarata itopiso' maantarin. Inaso', Nipayo oshia'huain. Nani cato Canaan sanapi macaponahe', inanta maantarin.

Yosëri Cacopo ya'notérinso'

¹⁰⁻¹¹ Cacopo Piirsipa quëran pipirahuaton, Aran ira pa'térin. Ihuatohuachina, quëparitérin huë'eton pacacaso marë'. A'nara na'pi masahuaton, motoantacaso marë' acorin. Ina motoantaton huë'erin. ¹² Naporo tashi huë'eton, hua'narin: A'nara nanpénan no'paqué paquérahuaton, Yosë ya'huërinqué huarë' nincanin ni'nin. Ina nanpénanqué chachin, pancatë ni'ton, Yosë anquéninénpita a'naquén pantarapi, a'naquénso o'marapi. ¹³ Naporahuaton, Siniro chachionta', ina pirayan huaniarin ni'nin. Inari nontaton,

itapon: “Caso Siniroco. Quëmaquën Tata masho, Apraan itopiso' chinotérinco. Tata parionta chinotérinco. Quëhuéntéranso' no'pa' quëtaranquën. Shiparinpita', iso no'pa chachin hua'anéntapona'. Isoso no'pa', Canaan itopi. ¹⁴ Ca nohuanto shiparin-pita na'amiatapona'. Mo'shi pochin na'apona'. Norti parti, sor parti, pi'i pipirinso parti, pi'i ya'coniniso parti, ya'ipi inapita parti hua'anéntapona'. Quëmá quëran, ya'ipi piyapi'sa nisha nisha nipesopita catahuararahuë. Shiparinpita quëraonta inapotarahuë. ¹⁵ Ni'quë'. Carinquën ca'tanaranquën. Intópanta pa'patan, carinquën a'paiaranquën. Carinquën chachin iso no'paquë quënantaranquën. Co onporonta pataranquënhuë', ya'ipi sha'huitérinquenzo' naniquë huarë' catahuararanquën,” itérin.

¹⁶ Cacoposo' capayatahuaton, yonquirin: “Tëhuëñchachin Siniro isëquë ya'huéapirinhuë', co caso nitotérahuë”, ténin. ¹⁷ Napoaton, pa'pi pa'yanin. Pa'yanaton tapon: “Iso ro'tëso', Yosë chinotacaso marë' noya. Isëquë chachin, Yosë pëinën* ya'huérin. Naporahuaton ¡Yosë ya'huérinso ya'coananën!” ténin.

¹⁸ Tahuéririnquë Cacoposo', tashíramiachin capayatahuaton na'pi motoantérinso manin. Masahuaton, nohuitacaso marë' onë pochin ahuanirin. Naporahuaton ina aipi toma opotérin. Inapotahuaton, Yosë marë' acorin. ¹⁹ Inaquë chachin iráca a'na ninano ya'huérin. Noso itopiso'. Ina pochin nohuitopirinhuë', Cacopori nisha nininën acotaton, Pitiri itérin. ²⁰⁻²¹ Inaquë Cacopori Yosë sha'huitaton itapon: “Quëma chachin ipora iratérahuëquë ca'tanco. Quëma nohuanton cosharo', a'moca'huaso', inapitanta ya'huéchinco. Naporahuaton quëma nohuanton tatahuë ya'huérinquë, noya huënanta'i. Inapo catahuahuatanco: ‘Siniroíchin Yosënëhuë’, ta'to, chinotaranquën. ²² Iso na'pi onë pochin ahuanirahuësonta', quëma pëinën nisarin. Naporahuaton, ya'ipi quëtéranco quëran, pi'pian quëtáponquën. Shonca canahuato a'nara quëchinquën,” itérin.

29

Cacopori Napano yacaparinso'

¹ Cacopo pa'sápaton, pi'i pipirinso parti ya'huépisopita ya'huérinquë canconin. ² Ninano ya'cari', a'na poso quënanconin. Ina pirayan cara huënton ohuicaro'sa i'sha o'shitacaiso marë' achinotapi. Ina pososo', pancatë na'piquë a'tantopi. ³ Ya'ipi ohuica huëntono'sa niyontonpachinara, a'paipisopitarí naní quëran yamotahuatona', chi'huincapi. Ohuicanëna o'shitacaiso marë' inapopi. Nani o'opachinara, naquëranchin inaquë chachin a'tantaantapi.

⁴ Cacopori a'paipisopita natanin:

—¿Intoparanta campitaso iyaro'sa'? itérin.

—Aran quëran quiyaso' ta'a, itopi.

⁵ —¿Nohuitérama campita Nacoro hui'nin, Napano itopiso' to? taantarin Cacopo.

—Nohuitérail mini, itaantapi.

⁶ —¿Noya ya'huéarin? itaantarin.

—Noya mini ya'huarin, itopi. Napotahuatona':

—¡Ma'tana hui'nin Naquira itopiso' huë'sarin! Ohuicanënpitarë chachin huë'sarin, itaantapi. ⁷ Naporor'Cacopo tapon:

—Yono pi'i ya'huéarin ni'ton, pahuanarin ohuicaro'sa huë'érinquë oncorapicaso'. ¿Onpoatonta co o'shitatoma pasto capacaiso marë' quëpaantaramahuë'? itérin.

⁸ —Co nanitérailhuë' inapoca'huaiso'. Ya'ipi ohuica huëntono'sa a'paipisopitarë chachin niyontonacaiso' ninarai. Naporor huarë' nanitérail na'pi chi'huincatahuatoi, ohuicaro'sa o'shita'huaiso', itopi.

⁹⁻¹⁰ Inapita nontaso', Naquiraso' pa'pin ohuicanënpitarë chachin canquirin. Inari pa'pin ohuicanënpita a'paitérin. Ina ni'sahuaton, Cacoposo' a'naroáchin posoquë pa'nin.

* ^{28:17} Yosë pëinën: Iprio nananquëso', Pitiri itopi.

Pa'sahuaton, na'pitē masho chi'huincatahuaton, apin ohuicanënpita o'shitérin. ¹¹ Ina quëran Naquira apinorahuaton: "Ihuata oshi," itérin. Napotahuaton, na'nérarin. ¹² Cacopori sha'huitérin: "Caso quëmaquën tata, apihuëmiáchin. Quëmaquën a'shacha Nipica itérmaso hua'huinco ni'to, naporahuë," ténin. Ina natana-ton, Naquiraso ta'arë'nachin pa'pin sha'huitapon pa'nin.

¹³ Cantonahuaton sha'huitérin: "A'shacha Nipica hua'huin, Cacopo itopiso' canquirin," itérin. Ina natanahuaton, Napanoso ta'arë'nachin nicapon pa'nin. Quënanconahuaton apinorin. Apinorahuaton: "Ihuata api," itérin. Nontahuaton pëinënqué quëparin. Inaquë Cacopori ya'ipi naporinso apin sha'huitérin. ¹⁴ Napanori natanahuaton itapon: "Quëmaso' tēhuëñchachin quëmopinëhuëñquën ninan," itérin.

Sanapi marë' Cacopo sacatérinso'

Cacoposo' Napano pëinënqué a'na yoquira' nani yacapatérin. ¹⁵ Ina piquëran Napanori itapon:

—Quëmopinëhuëñquën niperanhue', co topinan asacata'huanquënso ya'huërinhue'. Sha'huitoco onposo canacamaso nohuantéranso'. ¹⁶ Napanoso' cato hui'ninpita nano'sa ya'huëterin: Paninanso' Nia itopi. Ina piquëran niantarinsoso', Naquira itopi. ¹⁷ Niaso', noyápiachin ya'pirahuanin. Naquiraso niperinhue', noyápiroyanchin, co máquen téranta tēhuërinhue'. ¹⁸ Cacoposo' Naquira costaton, apin itapon:

—Hui'nan hua'hua nininso', Naquira itérmaso nohuantérahuë. Ina marë' canchisë pi'ipi quëma marë' sacatarahuë, itérin. ¹⁹ Napotohuachina, Napanori itapon:

—Naporan ni'quëhuarë', quëmari maquë nipachin. Nishaso quëtacaso', co noyahue'. Yacapatonco sacatéquë nipachin, itérin. ²⁰ Inapoaton Cacoposo' Naquira marë' canchisë pi'ipi sacatérin. Hua'qui sacatopirinhue', Naquira pa'pi nosoraoton, cara tahuëriíchin sacatérinso pochin cancantérin.

²¹ Nani canchisë pi'i sacatohuachina, Cacopori Napano itapon:

—Acoantoco huachi hui'nan. Sha'huiteranquënso' nani nanirahuë huachi, itérin. ²² Napotohuachina Napanoso' ya'ipi ya'huërin pirayan ya'huëpisopita, amatérin. Cacopo sa'arinqué pita nicacaso marë' amatérin. ²³ Napoaponahuë' nani tashihuachina, Napanoso Naquira ya'huërenamën Niasa', Cacopo acoantérin. Inaso co nohuitatonhue', ichihuë'erin. ²⁴ Naporahuaton Napanori, a'nara piyapinën sanapi nininso Nia nicanarin. Camaicaso marë' nicanarin. Inaso sanapi Siripa itopi.

²⁵ Tahuëririnquë tashíramiachin Cacoposo', Nia ichihuë'erino ni'nin. Ni'sahuaton, pa'pi pa'yantérin. Napoaton Napano chiníquën nontérin:

—¡Co napochitoncohuë pora! ¡Co'ta Naquira marë' nani sacatérahuë! ¡Nani non-pintéranco ni'sora! itérin.

²⁶ —Iséquëso api, co hua'hua nininso'ton, aso'yaraihuë'. ²⁷ Nia mananso marë' a'na simana pita nicacaso ya'huërinso', naniqué'. Ina nanihuatan, Naquira ya'huëre' acoantaranquën. Canchisë pi'i chachin ca marë' sacatacaso' nohuantohuatan, in-apotaranquën, itérin Napanori. ²⁸ Napotohuachina, Cacopo nohuantérin. Nia maninso marë' simana pita imapiso nanihuachinara, Napanori, Naquira ya'huëre' acoantérin. ²⁹ Napanori, a'nara piyapinën sanapi nininso' camaicaso marë' Naquiranta nicanarin. Ina sanapiso' Pira itopi. ³⁰ Nani acoantohuachina, Cacoposo', Naquira ichihuë'erin huachi. Inapoaton ina na'con na'con nosororin. Niaso niperinhue', co onpopinchin nosororinhue'. Canchisë pi'ipi chachin Napano marë' sacataantacaso' naponahuë', nosororin.

Cacopo hui'ninpita nininso'

³¹ Cacoposo', Nia co onpopinchin nosororinhue'. Ina nitotaton, Siniórori catahuarin hua'huanacaso marë'. Naquiraso niperinhue', ina nohuanton chachin, co nito hua'huaninhue'. ³² Niaso', cayorahuaton quëmapia'huaya huairin. Inaso', Nopino itérin.

“Sinioro sëtérahuëso' nicaton, catahuarinco. Hua'huanahuë ni'ton, iporaso' so'yahuë nosoroaponco huachi,” ta'ton, ina pochin hua'huin nohuitérin. ³³ Naquéranchin, cayoantarahuatón, quëmapia'huaya huariantarin. Inaso', Simion itérin. “Nocaninacoso' Sinioro natanin. Natanaton catahuarinco. Napoaton a'na hua'huasha quëtaantarínco,” ta'ton, ina pochin hua'huin nohuitérin. ³⁴ Naquéranchin cayoantarahuatón, quëmapi chachin hua'huantarin. Inaso', Nihui itérin. “Nani cara hua'huanahuë ni'ton, iporaso' so'yahuë na'con na'con chinpitaponco huachi,” ta'ton, ina pochin hua'huin nohuitérin. ³⁵ Niaso', naquéranchin cayoantarahuatón quëmapia'huaya chachin huariantarin. Inaso Cota itérin. “Iporaso' huachi, Sinioro pa'yatato chinotarahuë,” ta'ton ina pochin hua'huin nohuitérin. Nani catapini hua'huanahuatón, copi ténin huachi.

30

¹ Naquira co nito hua'huanatonhuë', cainpain noyaparin. Napoaton so'in itapon:
—Hua'huantoco canta'. Co'so' hua'huantohuatancohuë', chiminarahuë, itérin.

² Cacoporiso niperinhuë', no'huiton itapon:

—¡Co caso Yosécohüe! Ina co nohuantérinhuë ni'ton, co hua'huanahuë', itérin.

³ Napotohuachina, so'in itapon:

—Ni'quë'. Piyapinëhuë Pira itéréhuaso', maquë topirahuë. Ina mapatan hua'huanpachin, cari masarahuë. Hua'huahuë chachin nicacaso marë' masarahuë.

⁴ Inapoaton, Naquirari piyapinën Pira itopiso', so'in acoantérin. Acoantohuachina, ichihuë'érin. ⁵ Piraso', cayorahuatón quëmapia'huaya huairin. ⁶ Naporó' Naquira tapon: “Isoso hua'huasha, Tano itarahuë. Yosé nontérahuëso' natanatonco: ‘Téhuëñchachin quëmaso' noya ninan ni'ton, catahuananquën huachi,’ itérinco. Napoaton a'nara hua'huasha quëtérinco,” ténin. Ina yonquiaton ina pochin nohuitérin. ⁷ Ina quëran Pira cayoantarahuatón, quëmapia'huaya chachin huariantarin. ⁸ Naporó' Naquira taantarín. “Iso hua'huashaso', Nipitari itarahuë. Na'con caipayarë'co nichinitérain, iporaso huachi nani minsérahuë,” ta'ton ina pochin nohuitérin.

⁹ Nianta co huachi hua'huanacaso nanitérinhuë'. Napoaton piyapinën Siripa itopiso' Cacopo acoantérin. ¹⁰⁻¹¹ Siripa ya'huérë' cayoaton hua'huanpachina, Niaso tapon: “¡Ma noyacha nisharahuë paya!” ténahuë. Napoaton iso hua'huashaso', Caro itarahuë,” ténin. ¹² Ina piquérán Siripaso', a'na ya'huérë' hua'huantarin. ¹³ Naporó' Niaso' tapon: “¡Ma noyacha ya'huérahuë paya! Iporaso ya'ipi sanapiro'sa': ‘¡Ma noyacha inaso ya'huérin paya!’ itaponaco ta'to, iso hua'huashanta', Asiri itarahuë,” ténin.

¹⁴ Trico macacaso tahuëri'sa', Nopino pa'sahuatón, mantracora huayo itopiso' quënanconin. Ina masahuatón, a'shin quëshimarin. Ina quënapataton Naquirari itapon:

—Hua'huan mantracora huayo quëshirinquënsö', quëtoco canta topirahuë, itérin.

¹⁵ Napotopirinhuë', Niari itapon:

—Ayon caira. ¡Ama napopitéraquësuhüe! ¡So'yahuë nani osérëtérancó! Hua'huahuë ya'huérë' mantracora huayo quëshirincosonta' ¿yaosérëtaantamarancó ti? itérin.

—Ina quëtohuatanco, ipora tashi Cacopo quëmarë' huë'épon, itérin Naquirari. ¹⁶ Tashi huarë' Cacopo pasto quëran huénantahuachina, Niari nacapirahuatón:

—Hua'huahuë mantracora huayo quëshirincosö', nani Naquira quëtérahuë. Quëmaro'co ipora tashi huë'ëca'huaso marë' inaquë pahuérëtérahuë, itérin.

Napotohuachina, naporo tashi Niaso', Cacopo huë'éparin. ¹⁷ Hua'huanacaso marë' orarinso Yoséri natanahuatón, catahuarin. Napoaton Niaso', a'natérápo hua'huinpita nicacaso' cayoantarin. ¹⁸ Nasitohuachina tapon: “Isoso' hua'huasha, Isacaro itarahuë. Camairahuëso sanapi so'yahuë acoantérahuë ni'ton, Yosé acanarinco,” ta'ton, ina pochin hua'huin nohuitérin. ¹⁹ Ina quëran Nia cayoantarahuatón, saota nicacaso' hua'huantarin. ²⁰ Nasitohuachina taantarín: “Iso hua'huashaso', Saporono itarahuë.

Noya nininso chachin Yosë nicararinco. Nani saota hua'huasha a'noterahueü ni'ton, iporaso' so'yahuë noya noya ni'sarinco," ta'ton, ina pochin nohuitérin. ²¹ Nitiquioninquë Niaso', sanapia'huaya hua'huanin. Nasitohuachina, Tina itérin.

²² Naquiraso co hua'huana'pihuë ni'ton, na'con Yosë nontérin. Napohuachina, napoian quëran nosoroaton a'panirin. Ina nohuanton hua'huanin huachi.

²³ Paninantérinso' huaihuachina, tapon: "Co hua'huana'picohueü' nicato tapanápirahuë". Yosë chachin catahuarinco ni'ton, hua'huanato co huachi tapana'huaso ya'huérinhueü".

²⁴ A'na ya'huérë' Siniro quëtaanta'inco topirahuë," ta'ton, Cosi itérin.

Cacopo Napanorë', ninonpintopiso'

²⁵ Cosi nasitérin piquérän Cacoposo', Napano itapon:

—Ya'huérahuëquë chachin yapanantapirahuë'. ²⁶ Sa'ahuëpita, hui'nahueüpita, inapita quëtoco. Nani inapita marë' sacatérahueü' nanirin. Quëma nitotérän onpo sacatérahueü' sona ni'ton, quëpai huachi topirahuë, itérin. ²⁷ Napotopirinhueü', Napanoriso' itapon:

—Ama napoquësohuë api. Quëma yacaparanco ni'ton, Siniro catahuarinco. Ani'tato, ina nitotérahuë. Napoaton quëparitéquë ténahuë. ²⁸ Sha'huitoco onposona canacamaso nohuantéranso'. Nápo chachin pahuérë'inquën, itérin.

²⁹ Napohuachina, Cacopori itapon:

—Quëma marë' onpo sacatérahueü', nani nitotérän. Pë'tahuanënpitanta noya a'pairahuëü', nani nitotérän. ³⁰ Co'huara huë'shátérapohueü', caraíchin ya'huétérinquë. Iporaso niperinhueü', pa'pi notohuaro' na'amiatérin. Huë'nahueü quëran huarë' Siniro catahuarinquë. Iporaso huachi canta', caora marë' sacata'huaso' nanirin huachi, itérin.

³¹ —Caquë chachin sacataantacaso marë' ¿onpota pahuérë'inquën? taantarín Napano.

—Ama coriqui pahuérëcosohueü'. Apira sha'huitaranquënsö' nohuantohuatan, quëma marë' sacataantarahuë. ³² Ipora tahuëri pë'tahuanënpita huëntónenquë pa'sarahueü. Pa'sahuato, yaráton carniroa'huaro'sa', niquë acoarahuë. Naporahuaton chipoa'huaro'santa ninshipiton nipo', niquë acoarahuë. I'coapi nipesopitanta inapotarahuë. Inapita quëran pahuérë' quënanana'huaso marë' napoarahueü.

³³ Inapohuato, a'na tahuëri canarahueü' ni'quihuatan, no'tequën sacatérahueü' nitotaran. Pë'tahuatérahueü', i'coapiro'sa', ninshipitono'sa inaporáchin chiporo'sa quënanaran. Naporahuaton, yaráton carniro'saráchin quënanaran. Nisha quënanpatanso', ihuaranquëñ ni'ton, naporin, itérin Cacopori.

³⁴ —Noyapa'. Inapoa'a nipaçhin, ténin Napano.

³⁵ Napoaponahuë', naporin tahuëri chachin inaso chiporo'sa hui'tonpi nipesopita, i'coapi nipesopita, nisha acorin. Chipo sanapi'santa ninshipiton, nipo', inaque acorin. I'coapiro'sa', máquenzo térranta huiritopisopita, inapitanta inaque chachin acorin. Ya'ipi yaráton carniroa'huaro'santa', inapotérin. Inapohuato hui'ninpitar a'paicaiso marë' quëtérin. ³⁶ Ina quëran, pë'tahuar'o'sa huayoninsopitarë chachin Napanoso', Cacopo ya'huéarin quëran, cara tahuëri iratatë pa'në'pa', pa'pi.

Cacoposo niperinhueü', co manta taponahuë', a'napita ohuicaro'sa Napanonquëñ a'paitarin. A'paitapon pochin canacaso marë' isoporin: ³⁷ Nara së'paro'sa huara napapiráchin nanpi së'patérinso' pë'shitérin. Isopita nararo'sa së'paquëñ napotérin: Aramo, ni'to', tanpapi, inapita së'paquëñ manin. Masahuaton, hui'tona'piarin. Hui'toninsopitanta', i'shotéra'piarin. Acopo huiritérinso ya'nocaso marë', inapotérin.

³⁸⁻³⁹ Ina quëran huararo'sa hui'tonanpinan nininso', pë'tahuar'o'sa huëntónen noténanquë acorin. I'sha o'opiquë acorin. Inaque pë'tahuar'o'sa nito'quëpi ni'ton, naporin. Huararo'sa notérahuatona quëmapi nipesopita to'quëtopi. Inapohuachinara hui'ninpitaso': Hui'tontono'sa', ninshipitono'sa', i'coapiro'sa', inapita hua'huatapi.

⁴⁰ Naporin Cacoposo', inapita nisha acorarin huachi. Inapotérinso', Napano

pë'tahuanënpita yaratono'sa', hui'tontono'sa', inapita notënanquë acooinin. To'quëcaiso marë' acooinin. Inapoaton Cacoposo', Napano pë'tahua huëntonën quëran na'apisopita, inaora huëntonënpita acoaton ana'atarin huachi. ⁴¹ Panca panca pë'tahuar'o'sa nippisopita huënaitochuachinara, i'sha o'opiquë huararo'sa acorin. Nito'quëapona pochin huararo'sa notëcaiso marë' naparin. ⁴² Mashiraa'huar'o'sa huënaitochuachinaraso', co huararo'sa acorinhuë'. Napoaton pi'pira'huaya nippisopitaso', Napano marë' ninin. Ya'huërë' panca pancaro'saso', inaoranquën ninin. ⁴³ Inapoaton inaso', pa'pi ma'huanin. Pa'pi notohuar'o' ohuica ya'huëtahuaton, piyapinënpitanta quëmapi'sa', sanapi'sa', ya'huëtérin. Notohuar'o' camiyoro'sa', moraro'sa', inapitanta ya'huëtérin.

31

Cacopo, mi'sën ta'anapicaso yonquirinso'

¹ Ina quëran Cacoposo', mi'sënpitari pinorinso' natantérin: "Cacoposo' tata pë'tahuanënpita matahuaton, pa'pi ma'huanin," topi natantérin. ² Naporahuaton Napanori chachinta', co huachi iráca pochin nitërinhuë' ni'nin. ³ Napor'o Siniorori Cacopo itapon: "Tataparin, quëmopinënpita, inapita ya'huërinso parti panantaquë'. Carinquën ca'tanatënpita catastahuaranquën," itérin.

⁴ Ina natanaton, Naquira, Nia inapita pastoquë amatérin. Inaora ohuicanënpita a'pairinquë amatérin. ⁵ Huë'pachinara, itapon:

—Tataparima co huachi iráca pochin noya ni'nincohuë'. Yosëo nippirinhue', ca'tanatonco catastahuarinco. Inaso' tatahuëri chinotërinso'. ⁶ Canpitaso', nani nitotërama tata marë' chiniquen sacatërahuë'. ⁷ Naporahuaton nonpintahuatonco co no'tequen pahuërérincosohuënta', nitotërama'. Napoaponahuë', Yosë catastahuarinco ni'ton, co aquëtë huarë' ihuarincohuë'. ⁸ A'na tahuëri tataso' ténin: "Ninshipitono'sa quëchinquen sacatëranso marë'," topachina, ya'ipi sanapi ninshipitonáchin hua'huanpi. A'na tahuërinta': "Hui'tontono'sa quëchinquen sacatëranso marë," taantahuachinaso', hui'tontono'sáchin hua'huateantapi. ⁹ Yosë nohuanton ina pochin tata pë'tahuanënpita hua'huatopi. Canpoanquën nicacaso marë' napopi.

¹⁰ A'na tahuëri pë'tahuar'o'sa huënaitoaso', hua'narahuë. Chipo mashoro'sari, chipo sanapi'sa to'quësapi hua'narahuë. To'quëtona'piro'saso', a'naquënso hui'tonpiro'sa', a'naquënso ninshipitono'sa', a'naquëonta i'coapiro'sa', inapita quënanahuë. ¹¹ Napor'o chachin Yosë anquënenpita pérarinco: "¡Cacopo!" itérinco. Itohuachincora: "Iséquë nisarahuë," itérahuë. ¹² Napor'o anquëni itérinco: "Noya ni'quë', ya'ipi chipo mashoro'sa', chipo sanapi'sa to'quëpisopita, hui'tonpiro'sa', ninshipitono'sa', i'coapiro'sa', inapitaráchin to'quërapí. Napano nonpintërinquen nitotato, ni'nanso chachin a'ninquënta nicacaso marë' catastahuaranquën. ¹³ Ca mini Yosëco, iráca Pitiriquë ya'notëranquën. Inaquë na'pi tomaquë opotahuaton, chinotaancoso marë' acoran. Naporahuaton inaquë chachin casáchin chinotaancoso marë' sha'huitéranco. ¡Manóton huëquë pa'a! Iso no'pa quëran pipirahuaton, hua'huateranso no'pa parti panantaquë'," itérinco, ténin Cacopo.

¹⁴ Ina topachina, Naquira, Nia, inapitari itapon:

—Quiyanta mini tata chiminpachin, co huachi ma'sha téranta maca'huaiso ya'huërinhuë'. ¹⁵ Naporahuaton ipora chachin nisharo'sa pochin tata ni'nincoi huachi. ¡Pa'anpitërarinco ni'ton, quiya marë' pahuërétaton ina nápo sacatëran! ¹⁶ No'tequen chachin Yosëri, tata ma'shanënpita, matahuaton, canpoa quëterinpoa'. Inaso' canpoanquën, hua'huanpoapitanquën. Napoaton, ma'sona Yosë sha'huitérinquen, niquë huachi, itopi.

Cacopo ta'arinso'

¹⁷⁻¹⁹ Sa'inpitari napotërin ni'ton, Cacoposo Canaan parti panantacaso yonquirin. Pa'pin ya'huërinso no'paquë paantacaso marë' tapatarin huachi. Napanoso' a'na

parti ohuicanënpita ya'iapon pa'nin. Inaquë pa'ninso' Naquirari, pa'pin mamashinënpita ihuarin. Ya'ipi quëmopinënpitarë chachin mosharinso', ihuarin. Cacoposo' sa'inpita, hui'ninpita, inapita, camiyoro'saquë a'mitérin. Pë'tahuánënpita, ma'shanënpita, ya'ipi inapita quiquirin. Ya'ipi inapitaso', Patan-aranquë sacataton canarinso'. ²⁰ Inapoaton Cacopori, Napano nonpintahuaton, co sha'huitaponahuë' huëshirin. ²¹ Ya'ipi ma'shanënpitarë chachin Cacoposo', ta'arin. Co hua'quiya quëranhuë', Iopiratisiiquë pëntoitahuatona', Carata motopiro'sa parti, noteëtérin.

Napanori Cacopo imaquirinso'

²² Cara tahuëri quëran Napanoso', Cacopo ta'arinso' nitotérin. ²³⁻²⁴ Ina nitotaton, quëmopinënpitarë chachin, imaquirin. Canchisë tahuëri quëran, Carata motopiro'sa parti canquipi. Napoaponahuë', napor tashi Yosëri huë'enquë ya'notaton itapon: "Natanquë Napano sha'huichinquën. Ni'quëna Cacopo no'huiton ma'sha onpototan. Tananpitëquë pa'in," itérin. Tahuërianpitahuaton Napanoso', ²⁵ piyapinënpitarë chachin Carata motopiro'saquë Cacopo nincantopi. Ina motopiro'saquë inanta', huëntonënë chachin chinotopi. Napanonta ina motopiro'saquë chinotaponahuë', co niquënananyätérapihuë'. ²⁶ Cacopo quënanahuaton, chiniquën nontérin:

—¡Pa'pi co noyahue' ninan! ¡Co nonpinchitoncohuë' pora! Ahuëtahuatë sanapi'sa manëso pochin hui'nahuepita quëshiaranco. ²⁷ Nonpintatonco, co sha'huitaponcorahuë' ta'aiaran. ¡Co naporëhuë! Ya'huëranquë yapaantaranso sha'huitéranco naporini, noya ninontatëhua capa cancanchitërihuahuë'. Pita nicatëhua': Tonton, arpa, inapita pi'nipiquë ninonchitërihuahuë'. ²⁸ Hui'nahuepita, shihuëpitanta', ichita'airan ni'ton, co apinoto nonta'huaso' quëtérancohue'. ¡Co manta yonquirëhuë pochin ninan! ²⁹ Nohuantërahuë naporini, ma'shätërahuë ya'ipinquëma ana'inchitënquémuahue'. Napoaponahuë', achin tashi chachin Yosë nontérinco. Inaso' tataparionta chinotérin. Huë'ëhuëquë ya'notatonco nontérinco: "Natanquë Napano sha'huichinquën. Ni'quëna Cacopo no'huiton ma'sha onpototan. Tananpitëquë pa'in," itérinco. ³⁰ Tataparin ya'huërinquë ya'nipishahuë yapantaton huë'saran ni'quëhuarë', ¡co mamanshinëhuëpitaso' ihuattonco quëitonhuë' pora! itérin Napanori.

³¹ Napotohuachina, Cacopori Napano itapon:

—Të'huatatëñquëñ topinan huë'sarahuë: "Paanta'huaso sha'huitohuatoso', sa'ahuëpita osérëtamarinco," ta'to, naporahuë. ³² Nipirinhue', insosona téranta mamanshinënpita matahuatëñquëñ, quësahuachin, ¡chimiin! Ma'sona téranta quëmaquëñ nininso' quësahuato, ya'ipi quëmopinënpoapita ni'tonëñquë a'noquë'. Inapotaton quëpamantaquë', itérin. Napopirinhue Cacoposo', Naquirari pa'pin mamanshinënpita ihuarinso', co nitotérinhuë'. ³³ Napor' Napanoso', mamanshinënpita yoniton patë patérantarin. Cacopo në'mëtë pëinëñquë'ton ya'conin. Pipirahuaton, Cacopo cosonanënpita nininquë, ya'coantarain. Nianquëñ nininquënta ya'conaponahuë', co mamanshinënpita quënaninhue'. Ina quëran pipirahuaton, Naquiranquëñ nininquë ya'huë're' ya'coantarain. ³⁴ Naquiraso' mamanshiro'sa masahuaton, po'orin. Camiyoquë huënsëcaiso marë' nitopisoanaquë po'orin. Inapotahuaton, ina aipi huënsëtérin. Pa'pinso' ya'ipi në'mëtë pëianaquë yonípirinhue', co quënaninhue'. ³⁵ Naquirari itapon:

—Tata, co huanirahuëso marëhuë', ama no'huicosohue'. Sanapicoi inachintëraiso tahuëri nanitérinco ni'ton, huënsëárahuë, itérin. Napanori mamanshinënpita yonisápirinhue', co quënaninhue'.

³⁶ Co quënanpachinahuë', Cacopo ya'huë're' no'huitaton Napano chiniquën nontérin.

—¿Maquëta téhuëtéranguëñ ni'nan? ¿Ma'ta onpoato oshahuanahuë ni'ton, co napión cancantaton imaquirancoso'? ³⁷ Ya'ipi ma'shanëhuëpita o'quiaton yoniran. ¿Ma'ta quënaparanco quëmaquëñ nininso'? Ma'sona quënanpatan, a'ninquëchin, quëmopinënpita notënanquë acoquë'. Quëmopinëhuëpitarinta', ni'in. Inapita sha'huichinpoa' insosona no'tequëñ noninso'. ³⁸ Cato shonca pi'i quëma marë' sacatérahuë. Napor' co a'na ohuica

téranta', co a'na chipo téranta ana'huarinhü'. Huëntonënpita quëran, co a'na carniro téranta', capitéranchü'. ³⁹ Ni'niro'sari pë'tahuanënpita tëpahuachinara, co onporo téranta a'nota'huanquënso marë' quëshiranquënhü'. Caoranquën masahuato, acoantarahuë. Tahuërihuë nípon, tashihuë nípon, ihuatohuachinanta', ca apahuërtérano. ⁴⁰ Tahuëri nípachina pi'i acorinco, tashinta nípachina sëhuën acorinco. Pë'tahuaros'a a'paító, huë'ëi natanahuë. Inapoato nohuantaso' parisitérahuë. ⁴¹ Cato shonca pi'i quëma marë' sacatato, ya'ipi inapita ahuantérahuë. Cato hui'nampita marë' shonca catapini pi'ipi sacatérahuë. Pë'tahuanënpita marënta', saota pi'i sacatérahuë. Naporahuaton, apira apira pochin nisha nisha cana'huaso sha'huitérano. ⁴² Apraan chinotérinso catahuarinco. Tata Isaconta', inachachin chinotérin. Co'so' ina catahuarincohuë naporini, topinamiáchin ya'huërahüquë a'pa'itoncohuë'. Yosëo nípirinhü', parisitérahuë' nitotérin. Chiníquën sacatato ma'sha ya'huëtérincosonta', nitotérin. Napoaton achin tashi pënéninquën, itérin Cacopori.

Cacopo, Napanorë' anoyatopiso'

⁴³ Cacopori napotohuachina, Napanoso' tapon:

—Isopita catoro'saso', hui'nahuëpita. Isopita hua'huaro'santa shihuëpita. Pë'tahua huëntono'santa', caquën. Ya'ipi isëquë ni'nanso', caquënáchin. Napoaponahuë', hui'nahuëpita catahua'huaso marë' ya'ipi quëchi nípachin. Shihuëpitanta quëchi.

⁴⁴ Napoaton huëquë pa'a Yoscoarë' niitatë anoyata'a. Catonpo chachin anoyatérahuaso ayonquiinposo marë' inapoa'a, itérin. ⁴⁵ Napotohuachina, Cacoponta', "Noyapa," tēcaton, a'nara na'pi manin. Ina masahuaton, onë pochin ahuanirin. ⁴⁶ Naporo' quëmopinënpita camairin:

—¡Na'piro'sa yontonco'! itérin. Itohuachina, ya'ipiya quëran na'piro'sa yontonpi. A'mité a'mitétahuatona', panca imopi. Ina quëran, ya'ipiya coshatopi, na'piro'sa a'mité a'mitétopiso pirayan coshatopi. ⁴⁷ Napanoso' inaora nanamënquë, ina ro'të nohuitaton, "Quicaro Saatota," itérin. Cacoporiso nípirinhü', inaora nanamënquë ina ro'të chachin, Carata, itérin. ⁴⁸ Naporo' Napano tapon:

—Iso na'piro'sa imorëso', catonpo chachin ayonquiarinfo Yoscoarë' ta'të ipora tahuëri anoyatérëso'. Napoaton, ina no'paso' ipora huanta Carata, itopi. ⁴⁹⁻⁵⁰ Naporahuaton Mispa itopi anta': "Nipatohuatë, co huachi niquënanarihuë". Napoaponahuë', Sinioro chachin ni'info'. Co insonta ya'huërëquë naporëso ni'pirinpohü', Yosë chachin ni'info'. Napoaton ama hui'nahuëpita no'huiton aparisitérquësuhü'. Ama aquëtë chachin sanapi'sa maantaquësuhü'. Ina marë' Yoscoarë' ta'ton sha'huitoco," itérin. Ina naporinso marë' ina pochin ina no'pa' nohuitopi.

⁵¹ Napanoso' aquëtë chachin Cacopo sha'huitaantarín:

—Ni'quë'. Na'pi imorahuëso ya'huëarin. Onë pochin na'pi ahuanirahuësonta ya'huarin. Ya'huëröhüso huáncana inapita acorahuë. ⁵² Inapita ayonquiarinfo ama quëmanta ma'sha onpotancoso marëhuë', isëquëran pëntonquësuhü'. Co ca téranta ma'sha onpota'huanquënso marë' isëquëran pëtona'huaso ya'huërinhuë'. ⁵³ Canpo capini nanan ya'huëhuachin, Yosë chachin anitochinfo', inquënposona tēhuërëso'. Ina Yosë chachin quëmaquën tata masho Apraan, chinotérin. Caquën tata masho Nacoronta chinotérin. Inquënposo tēhuëhuatë', ina chachin ana'inchinfo', itérin. Napotohuachina, Cacoposo': "Caquën tata chinotérinso ni'sárinco ni'ton, co napoarahuë", ténin. ⁵⁴ Inapoatona anoyatohuachinara, Cacoposo inaquë chachin Yosë chinotacaso marë' ma'sharo'sa tēparin. Nani Yosë chinotohuachinara, quëmopinënpita ichicoshatérin. Ya'ipiya coshatopi. Nani coshatohuachinara, inaquë chachin huë'ëantapi.

⁵⁵ Tahuëririnquë tashíramiachin Napanoso' huënsëintarahuaton, hui'ninpita, shinpita, inapita apinora'piarin: "Yosë catahuainquëma noya paco'," itahuaton ya'huërinquë pa'mantarin huachi.

32

Cacopo, Isaorë' niquënanpiso'

1-2 Napano piyapinënpitarë chachin pa'mantahuachina, Cacoponta piyapinënpitarë chachin paantarin. Paasoi Cacoposo', Yosë anquënинënpitari nacapirin. Inapita quënanahuaton, tapon: "Isopitaso', Yosë sontaronënpita huënton. Catahuainacoso marë' a'paimarinso'," ténin. Napoaton ina ro'tëso': Maanain*, itérin.

3-4 Naporo' Cacoposo', comisiono'sa Isao sha'huitacaiso marë' Sëir no'paquë a'parin: "Iya'hua huënantárin ni'ton, iso pochin nanan a'patiarinquën: 'Ca iya masho huënantárahuë. Ma'sona quëma camaitéranso nisarahuë. Cato shonca pi'ipi api Napano ya'huërinquë yacapatérahuë. **5** Na'a ohuacaro'sa', moraro'sa', ohuicaro'sa', inapita ya'huëtérinco. Piyapinëhuëpitanta', quëmapi'sa', sanapi'sa', ya'huëtérinco. Iso nanan, a'pataranquën noya ninicate ya'huëantacaso marë' ténin, itoco'," itérin. Napotahuaton a'parin.

6 Comisiono'sa huënantahuachinara, Cacopo sha'huitiintapi:

—Iya masho Isao nicapoi a'parancoi ni'toi, pa'nai. Huë'saranso nitotaton, inaora chachin nacapiinquënso marë' huë'sarin. Catapini pasa quëmapi'sari imaquierin, iti-
ipi. **7-8** Ina natanahuaton, Cacoposo pa'pi pa'yanin. Pa'yanaton yonquirárin. Yon-
quirárin quëran, piyapinënpita, ohuicanënpita, ohuacanënpita, camiyonënpita, inapita
cato huënton acorin. "Iya mashori, a'na huënton ahuëhuachina', a'na huëntonso
ta'ararin," ta'ton naporin.

9 Ina quëran iin tē'huataton, iso pochin Yosë nontérin: "Siniro, quëmaso Yosënquën. Tata masho Apraan chinotérinquën. Tata Isaconta chinotérinquën. Quëma sha'huitéranco ni'ton, ya'huërahuëquë huë'sarahuë. Quëmopinëhuëpita ya'huërinquë huë'sarahuë. Naporahuaton: 'Ca nohuanton noya pa'saran,' itéranco. **10** Tëhuëñchachin co noyacohuë' ni'to, co nosoroancoso' ya'huërinhuë'. Co no'tequénáchin catahuaancoso ya'huëpirinhuë'. Iráca ya'huërahuë quëran pipipo, Cortaniiquë pëントérahuë. Naporo' co ma'sha téranta quëparahuë. Pitananëhuëro'coáchin pa'nuhüe. Napopirahuë', iporaso' cato huënton pochin hua'anëntérahuë. **11** ¡Nosoroatonco Siniro iya masho Isao quëran, nicha'ëco! Nani huë'sarin ni'ton, ahuërahuatonco, sa'ahuëpita, hui'nahuëpitarë'co chachin niquito-
huachinco. **12** Nani quëma chachin, catahuancoso marë' a'ninquëchin sha'huitéranco. Naporahuaton, shihuëpitanta caquëran pipipisopita, inotëra'huaya pochin na'acaiso' sha'huitéranco. Marë yonsanquë inotërahuaya ya'huërinso', co pichicasohuë'. Ina pochin na'acaiso' nani sha'huitéranco," itérin.

13 Naporo tashi inaquë Cacopo huë'erin. Tahuërinquë capayatahuaton, ya'cariya ya'huërinsopita quëran, pëtahuar'o'sa huayonin. Iin masho Isao nicanacoso marë' huay-
onin: **14-15** Cato pasa chipo sanapi, cato shonca chipo, cato pasa ohuica, cato shonca carniro, cara shonca camiyo paya nasha huaipiso hua'huinpitarë chachin, catapini shonca ohuaca', shonca toroa'hu, cato shonca mora sanapi nininso', shonca mora quëmapi, inapita.

16 Inapita huayonahuaton, piyapinënpita quëtérin a'na huënton a'na huënton quëpacaiso marë'. Co'huara pa'shätérasoihuë', ma'sona nicacaisonta sha'huitérin:

—Canpitaso quëchitoco'. A'na huënton'ton pa'in. Amasha aquëmiachin nipachin a'na ya'huëre', paanta'in. Ama napopináchin pacosohuë', itérin. **17-18** Quëchinamën huënton quëpana'pi sha'huitérin:

—Iya masho Isao nacapiatënquën natanpachinquën: "¿Inta quëmaso' hua'anë? ¿In-
tohuata pa'saran? ¿Inquënta pë'tahuar'o'sa quëpaaranso'?" itohuachinquën, quëmari
iso pochin sha'huitëquë: "Isopita pë'tahuar'o'saso', quëma marë' quësarahuë. Cacopo

* **32:1-2** Maanainso': Cato huënton sontaro'sa', tapon naporin.

a'patiarinquën. Inaso', quëma piyapinën pochin cancantérin. Nani inanta piquëran huë'sarin," itëquë', itérin. ¹⁹ A'napita huënton quëpana'piro'santa', sha'huitérin:

—Canpitanta iya masho Isao quënanpatama', inachachin sha'huitoco'. ²⁰ Nani sha'huitohuatama', napotaantaco': "Inaora chachinso', piquëran huë'sarin," itoco', itérin.

Isopochin yonquiaton Cacopo naporin: "Isopita pë'tahuaro'sa quëtato no'huirincoso asanoarahuë. Ina piquëran caora chachin ni'sarahuë. Tapona inapotërahuëso marë' inanta noya nontaantarínco," ténin yonquinënqué. ²¹ Inapoaton Isao quëtacaso'ton, aquëchitérin. Inaoraso nípirinhuë', huë'ëcaso marë' ya'huëarinquëranchin quëparitérin.

Cacopo anquënirë nípaniriso'

²²⁻²³ Napoaponahuë', naporor tashi chachin co'huara huë'ëshátërasoihuë', Cacoposo' huanirin. Huanirahuaton, cato sa'inpita, cato cosonanënpita, inapita ayontonin. Shonca a'na hui'ninpítanta inaquë chachin ayontonin. Ayontonahuaton Capocoi' pëntoinantaquëchin, apëntoitérin. Ya'ipi pë'tahuanënpita, ya'ipi ma'shanënpita, inapitarë chachin aquëtérin a'parin.

²⁴ Cacoposo' inaora quëparitohuachina, a'nara quëmapi ya'norin. Inarë tahuërianpitaquë huarë' nohuantaso' nípanipi. ²⁵ Napoaponahuë quëmapi ya'norinsoso', co Cacopo minsëcaso nanitérinhue'. Co nanitatonhuë', Cacopo tonaransën, ahuëtérin. Catantën nipaquëtërintaquëchin ahuërin ni'ton, notohuëtérin. Nipanisoi napotërin. ²⁶ Quëmapi ya'norinsoso', Cacopo itapon:

—A'poco huachi, nani tahuëririarin, itérin.

—Co'so' noya ya'huëca'huaso marë' sha'huitohuatancohuë', co a'poaranquënhue', itérin inarinta'.

²⁷ —¿Ma'ninquënta quëmaso'? itaantarín quëmapiri.

—Cacopo itérinaco, taantarín inanta'. ²⁸ Naporo' ina quëmapiriso' itapon:

—Co huachi Cacopo itarinënhue'. Ipora quëran huarë' Israiro itarinën. Yosë chinitérán, piyapi'santa chinitérán. Chinitaton canatérán ni'ton, ina pochin nohuitarinën, itérin.

²⁹ —Iporaso' quëmanta' nininën sha'huitoco, itérin Cacopori. Napotopirinhuë', inariso itapon:

—Co quëmaso' nininëhuë natanancoso ya'huërinhuë', itérin. Ina quëran inaquë chachin Cacopo noya ya'huëcaso marë' sha'huitérin. ³⁰ Napoaton Cacoposo' ina ro'të anini-huanin: "Pinoiro†," itérin. "Isëquë chachin, Yosë nirayarahuë. Ina níponahuë' co chiminahuë'," ta'ton, ina pochin ina ro'të nohuitérin.

³¹ Pi'i pipiriahuso', Pinoiro quëran huë'sarin huachi. Catantëntaquëchin, tonaransë notohuëtérin ni'ton, sonpariarin. ³² Napoaton iso quirica ninshitasoco huarënta Israiro shinpitaso', ma'sharo'sa catantënqué pancarin ipatë ya'huëtérinso', co ca'pihuë'. Inaquë Cacopo ahuëpi ni'ton, co ca'pihuë'.

33

Cacopo Isaorë' nanan anoyatopiso'

¹ Cacoposo', Isao catapini pasa quëmapi'sarë chachin huë'sarin ni'nin. Ina ni'sahuaton, cara huënton hui'ninpita acorin. Niataquë a'na huënton, Naquirataquë a'na huënton, cosonaro'sataquë, a'na huënton. ² Cosonaro'sa'ton hua'huinpitarë chachin aquëchitérin. Ina quëran Nia hua'huinpitarë chachin ahuananatérin. Naquiraso', Cosiré' piquëran acorin. ³ Inaporahuaton, Cacoposo quëchitérin. Iin masho ya'cariapon pochin, canchisëro mosharin. Isonin quëran no'paquë huarë' monshorahuaton mosharin.

⁴ Cacoposo' të'huaton naporin. Napopirinhuë Isaoriso', ta'aquirahuaton iin iporin. Iporahuaton, apinorin, naporin. Cato chachin noya ancantatona', nina'nëtopi. ⁵ Ina quëran Isaoso', sanapi'sa', hua'huaro'sa inapita ni'nin. Ni'sahuaton iin natanin:

† ^{32:30} Pinoiroso': Yosë ya'pirin tapon naporin.

—¿Isopita po'? ¿Inpitata? itérin.

—Hui'nuhüepita ta'a. Yosë nohuanton ya'huërinso', ténin Cacopo. ⁶ Naporo' cosonaro'saso hua'huinpitarë chachin, Isao huëcapaipi. Ina notënanguë huë'sahuatona', isonpi. Isonpi quëran no'paquë huarë' monshorahuatona', moshaipi. ⁷ Ina quëran Nia ya'huëre' hua'huinpitarë chachin, inapoantapi. Piquëran Cosiso', a'shinë chachin, huë'sahuatona', Isao notënanguë inahuanta inapoantapi.

⁸ Ina quëran Isaoso', Cacopo natanin:

—¿Ma'marëta ina nápo pë'tahua huëntono'sa a'paransopita, nacapirimarahuë? itérin.

—Noya ninicatë ya'huantacaso marë' a'patëranquënsopita, itérin Cacopori.

⁹ —Ama iya'hua napoquësuhuë'. Canta ya'huëtérinco chachin. Co quëtaancoso ya'huërinhuë', itérin Isaori. ¹⁰ Itopirinhue', Cacoposo' taantarín:

—Ama iya masho napoquësuhuë'. Tëhuëñchachin noya ninicatë ya'huantacaso nohuantohuatan, onpopionta maquë ta'a. Quëmaora chachin noya nontaantaran-coso' nicato, Yosë chachin napotérincoso pochin cancantërahue. ¹¹ Yosë nohuanton ma'huanahuë, co manta pahuantérincohue'. Napoaton, quëshiranquënsopita, onpopionta maquë', itérin. Napotápaton Isao anohuantérin. Ya'ipi a'patërinsopita manin huachi.

¹² Ina quëran Isao taantarín:

—Noyapa'. Huëquë nipachin carinquen ca'tainquen pa'a, itérin. ¹³ Napotohuachina, Cacoporiso itapon:

—Tëhuëñchachin iya masho nosoroatonco napotéranco. Nipirinhue' hui'nuhüepita hua'huaro'saráchin. Ohuicaro'sa', ohuacaro'sa', inapitanta nasha hua'huatopiso ya'huërin. Manon quëpahuatëso', a'na tahuëri maréáchin nanitérin, ohuica'huaro'sa taquicaiso'. ¹⁴ Noya quëmaso' pataquë topirahuë. Quiyaso nípirinhue' oshaquëranchin pacapoi. Hua'huaro'sapitarë'coi, pë'tahuaro'sapitarë'coi oshaquëran pa'sarai. Co hua'quiya quëranhuë', Sëir parti cantoontapatënquen, inaquë niquënaantarihua huachi, itérin.

¹⁵ —Noyapa'. Naporan ni'quëhuare', quëchitota'i nipachin. Nipirinhue' ca'tainquëns marë' caraya piyapinëhuëpita pachi, itérin. Itopirinhue', Cacoposo taantarín:

—Ama iya napoquësuhuë'. Noya quiyaura pa'sarai, itérin. ¹⁶ Napotohuachina, Isaoso piyapinëpitarë chachin Sëir parti paantarin.

¹⁷ Cacoposo nípirinhue', Socoto parti pa'nin. Inaquë pëitacaiso marë' piyapinëpita camairin. Naporahuaton, pë'tahuanëpita na'icaiso marë' tanpora'huaro'sa anitérin. Napoaton, ina no'pa' "Socoto*" itérin. ¹⁸ Inaquë hua'quimiachin ya'huërin. Ina quëran Cacoposo', ya'ipi huëtonenë chachin Siquimo ninano notënanguë pa'nin. Inaquë në'mëtë pëiro'sa otëantarín. Inapoaton Patan-aran quëran huë'ninso', Canaan no'paquë noya canquirin. ¹⁹ Në'mëtë pëiro'sa ótënpiso' no'pa', Cacoposo' pasa coriqui marë' pa'anin. Ina no'paso', a'na quëmapi Amoro itopiso' hui'ninpitari hua'anëntopirinhue', pa'antérin. Inaso', a'nara hui'nin ya'huëtérin, Siquimo itopi. ²⁰ Ina piquëran Cacoposo', Yosë chinotacaso marë' a'nara artaro ninin. Ina nisahuaton aninuhanin: Ir Iroi Israiro†, itérin.

34

Siquimori Tina tapiton po'orinso marë' i'huërétopiso'

¹ Cacopo hui'nin Niaquëya ya'huëtérinso', Tina itopi. Ina nanontohuachina, a'na tahuëri Siquimo ninanoquë nanon capini nini'cai marë' pa'nin. ² Inaquë ni'so', Siquimori ni'sahuaton noyarin. Inaso', sha'huitéranguëmaso chachin Amoro hui'nin. Amoroso', hua'an ya'conin. Ipo piyapi ni'ton, ya'ipi iporo'sa hua'anëntërin. Siquimori Tina co nohuanchachinpirinhue' ichihuë'ërahuaton, po'orin. ³ Napoaponahuë', pa'pi

* **33:17** Socotoso': Tanpora'huaro'sa', tapon naporin. † **33:20** Ir Iroi Israiroso': Yosëso', Israirori chinotérinso', tapon naporin.

nohuantérin. Napoaton Tinari nohuantacaso marë' ma'pitaso ninin. ⁴ Naporo chachin Siquimoso' pa'pin itapon:

—Paaton tata, Tina maca'huaso marë' pa'pin nontoonquë'. Quëmopinënpitanta non-toonquë'. Ina pa'pi nohuantérahuë, itérin.

⁵ Cacoposo' hui'nin po'opiso' nitotaponahuë', co manta téninhue'. Hui'ninpita pë'tahuaros'a a'pairapi ni'ton, co manta téninhue'. Inapita canquiai huarë' sha'huitacaso' yonquirin. ⁶ Siquimo pa'pins'o' Cacopo nontacaso marë' pa'nin. ⁷ Cacopo hui'ninpita huënantahuachinara, napopiso' natantopi. Natantahuatona', pa'pi no'huitopi. Siquimori oshina co mashátéraponahuë', ichihuë'érin ni'ton, napopi: "Inapoaton inaso', israiro'sanpoa panca tēhuëtérinfoa'. ¡Co onporonta inapocaso ya'huérinhue'!" topi.

⁸ Amoroso nípirinhue', inapita nontaton napotérin:

—Hui'nahuë Siquimo itérahuëso', oshiparima pa'pi nohuantérin macacaso marë'. Onpopionta quëtoco'. ⁹ Inapoatëhua', ya'huëa'ahua topirahuë. Napohuatëhua', quiyanta canpita hui'nama macapoi. Canpitanta', quiya hui'nahuëi masarama'. ¹⁰ Iséquë quëparitatoma', quiyapitarë' ya'huëco'. Iso no'paquë ya'huatoma sacatoco'. No-huantérmaso' pa'anco'. No'panta yapa'anpatama', pa'anco', itérin.

¹¹ Siquimonta huanirahuaton, nonsarin huachi:

—Tata napotérinquëmaso', nohuantoco ta'a. Onposo' natanpatamaco quëtaranquëma'.

¹² Sanapi marë' pahuérëtërë quëran na'con na'con apahuérëtohuatamaco noya, co ma'shahuë'. Naporahuaton ma'sona nicana'huanquëmaso' natanpatamaconta', quëtaranquëma'. Onpopionta cari mai, topirahuë, ténin.

¹³ Napopirinhue', inapitariso oshina na'inin ni'ton, i'huërtacaiso marë' yamonapi. Napoaton Siquimoso' pa'pinë chachin noyasha nontatona itapona':

¹⁴ —Noya nípirinhue'. Co quiyas'o' nanitérainhuë' co marcahuán quëmapi oshihuëi quëta'huaiso'. Quëtérain naporini, quiya marëso' pa'pi taparo niitonhuë'. ¹⁵ Ya'ipinquëma quiya pochachin marcahuánama huarë' canpita naporamaso nisarai. Nohuantohuatama', ya'ipi quëmapinquëma marca niacotoco nipachin. ¹⁶ Naporo huarë' tēhuëncinso', canpitanta hui'nahuëi masarama', quiyanta canpita hui'nama masarai. Inapohuatëhua a'na huëntoínchin pochin nisarëhua huachi. ¹⁷ Nípirinhue', co'so' nohuantohuatamahuë', iséquëran pipiarai. Oshihuëinta macatoi, quëpaarai, itopi.

¹⁸ Napotohuachina Siquimoso' nohuantérin. Pa'pionta nohuantérin. ¹⁹⁻²⁰ Cacopo hui'nin pa'pi nohuantaton Siquimoso', a'naroáchin natetérin. Inaso', ya'ipi Amoro hui'ninpita quëran chini chiníquën nanantérin. Napoaton, pa'pinë chachin ninano ya'coanaquë pa'pi. Inaquë ya'huëhuano'sa niyontonpi, ma'sha yonquiatona anoyatacaiso marë'. Ya'huëhuano'sa niyontonpachinara, itapona':

²¹ —Pasopitaso' noyaro'sa'. Pancana no'pa' ya'huëtérinfoa ni'ton, inapitanta yacapaténepoa' pa'anapona'. Canpoanta nanitarihua inahua hui'ninpita macacaso'. Ya'huërë' inapitanta canpoa hui'nanpoa nanitapi macacaiso'. ²² Napoaponahuë' inapoatëhua ya'huëcaso marë', ya'ipi quëmapinfoa marcahuánacaso' nohuantopi. Inahua napopiso chachin canpoanta nicacaso' nohuantopi. ²³ Inapohuatëhua', ya'ipi ya'huëtopiso canpoanquën nisarin. Pë'tahuanëna', ma'shanëna', ya'ipi inapita canpoanquën nisarin. Huëco nohuantoco inapoa'ahua'. Napohuatëhua', inapitaso canpoare' ya'huëcaiso marë' quëparitapi, itopi. ²⁴ Siquimo pa'pinë chachin napopiso natanatona', nohuantopi. Napoaton ya'ipi quëmapi'sa chiníquëno'sa nipiso', marca niacotopi huachi.

²⁵ Niacotopi quëran cara tahuëritapaso', Cacopo hui'ninpita Siquimo ninanoquë pa'pi. Simion, Nihui, inapita itopiso' pa'pi. Inapitaso', Tina yo'inamiáchin nipi. Ya'huëhuano'sa marca niacotopiso', pa'pi iquitopi. Inapoasoi chachin pa'sahuatona', sahuëninënaquë ya'ipi quëmapi'sa tēpaconpi. Co noyachátérasoihuë' ahuëtopi ni'ton, co chinitopihuë'.

²⁶ Amoronta', Siquimorë chachin tēpapi. Inapotahuatona', Siquimo pëinën quëran Tina masahuatona', pa'pi huachi. ²⁷ A'napita iinpitanta canquirahuatona', ya'ipi

quëmapi'sa nani tēpapi ni'ton, ninanoquë ma'sha ya'huérinso mamiatopi. Oshina Siquimori tapirinso marë', i'huérëtatona inapotopí. ²⁸ Ya'ipi ohuicanëna', ohuacanëna', moranëna', inapita matopi. Ya'ipi ninanoquë ya'huérinso', aipiraonta ya'huérinso', mapi. ²⁹ Pëiro'saquë ma'sha ya'huérinsopitanta', ya'ipi ihuatopi. Naporahuaton ya'ipi hua'huar'o'sa', sanapi'sa', inapitanta masahuatona quëpapi. ³⁰ Simion, Nihui, inapita huénantahuachinara, pa'pinari itapon:

—Canpitaso napoatomá', sacai anoyata'huaso nitëramaco. Canano'sa', huirisëro'sa inapitaso', ya'huéhuano'sa'. Naporamaso natantohuachina', no'huiponaco caso huachi. Nihuëntonahuatona ahuëaponaco. Caso co na'ashahuë' piyapinëhuëpita ya'huëtérinco ni'ton, ya'ipinpoa tiquiaponënpoa', itérin. ³¹ Napotopirinhue', inapitariso itaantapi:

—¿Monshihuantë paya pochin oshihuë nitacaso' nohuantopiranhuë' ti? itopi.

35

Yosëri Pitiriquë Cacopo noya ya'huécaso marë' sha'huitérinso'

¹ Naporor' Yosëri Cacopo huë'ënqué ya'notaton, camairin: "Caso Yosëco. Iráca iya masho Isao ta'anapísën ya'notéränquën. Pitiriquë paantaton, inaquë ya'huëconquë'. Inaquë canconpatan, chinotaancoso marë' a'nara artaro niquë', " itérin. ² Napotohuachina Cacoposo', ya'ipi hui'ninpita, sa'inpita, piyapinënpita, inapita camairin:

—Ya'ipi nisha nisha mamanshiro'sa chinotëramaso', a'poco'. A'poatoma quëshico pa'pitahua'. Naporahuaton amarahuatomá', noya nininso i'nanpiraco'. ³ Manóton Pitiriquë pa'ahua'. Inaquë Yosë chinota'huaso marë' artaro nica'huaso ya'huérin. Iráca nanan ya'huëtaponco, Yosëso na'con catahuarinco. Naporahuaton, itohua itohua pa'nuhuëquë, ca'tanatonco catahuarinco, itérin.

⁴ Napotohuachina, nisha nisha mamanshinëna moshapiso quëshipi. Pë'tehuëratëro'santa moshapiso quëshipi. Ya'ipi inapita Cacopori Siquimo ninano ya'cari', pa'pitérin. A'nara insina nara pirayan, pa'pitérin. ⁵ Pa'pachinara, Yosë nohuanton, nisha nisha ninanoro'saquë ya'huëpisopita pa'pi të'huapi. Napoatona co nanitopihuë' Cacopo hui'ninpita, imatona i'huérëtacaiso'.

⁶ Cacoposo' huëntonëne chachin, pa'sápatona', Noso ninanoquë canconpi. (Ina ninanoso', Pitiri itopi anta', Canaan parti ya'huérin.) ⁷ Inaquë canconahuaton, artaro ninin huachi. Inaquë Yosë chinotërin ni'ton, ina ro'të aninihuánin: "Iri Pitiri*" itérin. Iráca iin të'huataton ta'anapihuachina, inaquë chachin Yosëri huë'ënqué ya'notérin ni'ton, nape nohuitérin.

⁸ Nipica piyapinën Tipora itopisonta chiminpachina, inaquë chachin pa'pitopi. Insina nara pirayan pa'pitopi. Pitiri ninano ya'cariya, inapotopí. Cacopori inanta aninihuánin: "Na'nëi' insina," itérin.

⁹ Cacopo Patan-aran quëran huénantahuachina, Yosëri naquëranchin inaquë ya'notaantarín. Ya'notaton noya ya'huécaso marë' sha'huitérin. ¹⁰⁻¹² Iso pochin sha'huitérin:

"Quëmaso' Cacopo itérinën.

Co huachi ina pochin nohuitarinëñquënhue'.

Ipora quëran huarë' Israiro itarinën," itérin.

Ina quëran nininëñ canpiatahuaton itaantapon:

"Caso Yosëco, ya'ipi nanitaparahuë.

Notohuaro' hui'ninpita ya'huëchinquën.

Shiparinpitanta', hua'huayátërahuë ya'huë'ina'.

Quëmá quëran, a'na nacion pipipon.

Naporahuaton, shiparinpitanta na'a huëntono'sa nicapona'.

A'naquëñ shiparinpitanta, copirno ya'conapona'.

* ^{35:7} Iri Pitiriso': Pitiriquë ya'huérinso Yosë, tapon naporin.

Tata masho Apraan, tataparin Isaco,
 inapita iso no'pa' ahua'anëntërahuë.
 Ina chachin quëmanta quëchinquën.
 Shiparinpitanta iso no'pa chachin hua'anëntapona'," itërin Yosëri.

¹³⁻¹⁴ Napotahuaton pa'pachina, Cacoposo' a'nara na'pi masahuaton onë pochin ahuanirin. Yosëri nontërintaquë chachin ahuanirin. Ina quëran toma', huino, inapitaquë opotahuaton, Yosë marë' acorin. ¹⁵ Iráca nohuitérinso chachin ina ninanoso', Pitiri itërin.

Naquira chimininso'

¹⁶⁻¹⁷ Hua'quimiachin inaquë ya'huërapi quëran paantapi. Iporata ni-nanoquë ya'caritopi huachi. Inaquë Naquiraso', pa'pi parisë quëran huaiton, co'chachin ninin. Napoaso ahuaitona'piri itapon: "Ama pa'yanquësuhue', quëmapi chachin huaiyantaran," itërin. ¹⁸ Napotopirinhue', Naquiraso' yachiminin huachi. Nani yachiminahuaso', hua'huin nininën acotërin: Pin-oni† itërin. Itopirinhue', Cacoporiso', Mincamin‡ itërin. ¹⁹ Inapo chimintérin Naquira. Napoaton Iporata ira pirayan pa'pitopi. (Iporataso ipora marë', Pirin itopi.) ²⁰ Naquira pa'pitahuaton, po'oronën aipi Cacoposo' Panca ra'pi ahuanirin. Ina na'pi ahuanirin quëran, Naquira po'oronën nohuitopi.

²¹ Inaporahuaton, Israiroso paantarin. Itiri tori aquëcha, ya'huaantacaiso marë' në'mëtë pëinëna ótëenpi. ²² Inaquë hua'quimiachin ya'huëpi. Inaquë chachin Nopinoso', pa'pin cosonanën Pira itopiso monshitaton, ichihuë'érin. Ina natantahuaton, Israiroso pa'pi no'huitérin.

Cacopo hui'ninpita nininso'

Cacoposo' shonca cato hui'ninpita quëmapi'sa ya'huëtérin. ²³ Niaquëya nipesopitaso' isopita: Paninanso' Nopino, ina quëran, Simion, Nihui, Cota, Isacaro, Saporono, inapita. ²⁴ Naquiraquëya nipesopitanta isopita: Cosi, Mincamin, inapita. ²⁵ Naquira piyapinën Pira itopisoquënta isopita: Tano, Nipitari, inapita. ²⁶ Nia piyapinën Siripa itopiquënta', isopita: Caro, Asiri, inapita. Ina nápo Cacopo hui'ninpita ya'ipiya quëran ya'huëpi. Ya'ipi pochin Patan-aranquë nasitopi.

Isaco chimininso'

²⁷ A'na tahuëri Cacoposo' pa'pin ya'huërinquë pa'nin. Inaso', Mamiriquë ya'huërin. Ina ninanoso' Arapa itopi anta'. Naporahuaton ina chachin Ipron itomantapi. Inaquë Apraan, Isaco, inapita ya'huëpi. ²⁸ Pasa posa shonca pi'ipitaso', Isaco chiminin. ²⁹ Noyá mashoya nicaquë huarë' chiminin. Chiminpachina, hui'ninpita Isao, Cacopo, inapitari nipa'pichantopiso' naninquë po'mopi.

36

Isao quëran pipipisopita

¹ Isao quëran pipipisopita sha'huichinquëma'. Inaso', Itomo itopi anta'. ²⁻⁵ Isaoso' Canaan sanapi'sa manin: A'naso', Ata itopi. Inaso', Iron hui'nin. Ironta', Iti huënton piyapi. Inaquëya Isao hui'nahuanpachina, Iripasi itërin. A'na sa'ionta Aoripama itopi. Inaso', Ano hui'nin, Sipion shiin. Inaquëyanta hui'nahuanpachina, isopita: Quiosi, Caaran, Cori, inapita. Isaoso', Ismairo hui'nionta manin, Pasima itopiso'. Inaso', Nipayo oshia'huain. Inaquënta hui'nahuanpachina, Niohuiro, itërin. Ina nápo hui'ninpita Canaan parti ya'huëapon nasitopi.

⁶ Isaoso' Cacopo patahuaton, a'na parti ya'huapon pa'nin. Sa'inpita, hui'ninpita, yaipi inarë ya'huëpisopita quëparin. Pë'tahanenpita, ma'shanenpita, inapita Canaan parti ya'huapon pochin canarinsonta', ya'ipi quiquirin. ⁷ Cacoponta', napopin chachin ma'huanin ni'ton, co huachi nanitopihuë inaquësáchin ya'huëcaiso'. Pastonta

† **35:18** Pin-oniso': Na'con na'con aparisitërincoso hua'hua, tapon naporin. ‡ **35:18** Mincaminso': Pa'ya pa'yatërahuëso hua'hua, tapon naporin.

pë'tahuanëna capacaiso co huachi nanipihuë ni'ton, nia'popi. ⁸ Inapoaton, Isaoso Sëir motopiro'sa parti pa'nin ya'huapon. Sha'huitéranguëmaso chachin Inaso', Itomo itopi anta'.

⁹ Ina nápo Isao hui'ninpita ya'huëtérin. Inaso', ya'ipi itomoro'sa shimashonën. Inapitaso', Sëir motopiro'sa parti ya'huëpi. ¹⁰ Sha'huitéranguëmaso chachin, Isaoso Ataquëya hui'nahuaninso', Iripasi itérin. Ya'huërë' Pasimaquëya nininso', Niohuiro itérin. ¹¹ Iripasi hui'ninpitaso', isopita: Timan, Oamaro, Sipo, Catan, Quinasi, inapita.

¹² Inapitaso' Ata aminpita. Iripasiso', a'na cosonanën ya'huëtérin Timona itopi. Inaquëya hui'nahuanpachina, Amarico itérin. ¹³ Niohuiro hui'nipitanta', isopita: Naato, Siran, Sama, Misa, inapita. Inapitanta Pasima aminpita. Pasimaso' sha'huitéranguëmaso chachin, Isao sa'in ninin anta'. ¹⁴ Aoripamaquënta', Isao hui'nahuaninsopitaso': Quiosi, Caaran, Cori, inapita. Aoripamaso', Ano hui'nin, naporahuaton Sipion shiin.

¹⁵⁻¹⁹ Isao shinpita huëntono'sa hua'anëntopisopitaso', isopita: Timan, Oamaro, Sipo, Catan, Quinasi, Cori, Amarico, inapita. Sha'huitéranguëmaso chachin Isao paninanënso', Iripasi itopi. Ina hui'ninpitaso', Itomo no'paquë Isao shinpita huëntono'sa', hua'anëna ya'conpi. Ya'ipi inapita Ata aminpita. Niohuironta Isao hui'nin chachin ninin. Ina hui'nipitanta', isopita: Naato, Siran, Sama, Misa, inapita. Inapitanta Itomo no'paquë Isao shinpita huëntono'sa', hua'anëna ya'conpi. Ya'ipi inapitaso', Pasima aminpita. Sha'huitéranguëmaso chachin Ano hui'nin Aoripama itopiso hua'huinpitanta', isopita: Quiosi, Caaran, Cori, inapita. Inapitanta Isao shinpita huëntono'sa hua'anëna ya'conpi. Ya'ipi ina hua'ano'sa', Isao shinpita. Isaoso', Itomo itopi anta'.

²⁰⁻²¹ Co'huara Isao inaquë pa'shätéraponhuë', a'nara Or huënton piyapi Sëir itopiso'ton inaquë ya'huërin. Quëmopinënpitarë chachin ya'huërin. Ina hui'ninpitaso', isopita: Notan, Soparo, Sipion, Ano, Tison, Isëri, Tisan, inapita. Inapita'ton Itomo no'paquë Or huënton hua'ano'sa ya'conpi. Inapitaso' Sëir quëran pipipisopita ya'huëpi. ²² Notan hui'ninpitaso', isopita: Orin, Iman, inapita. Notan oshinso', Timona itopi. ²³ Soparo hui'nipitanta', isopita: Arapan, Manaato, Iparo, Sipo, Onan, inapita. ²⁴ Sipion hui'nipitanta isopita: Aiya, Ano, inapita. Ina Ano chachin, inotéro parti pa'pin moranënpita a'pairin. Inapita a'paiaso', no'pa quëran i'sha pipirinsopita quënanin. ²⁵ Anoso', a'na hui'nin ya'huëtérin, Tison itérinso'. Naporahuaton, a'na hui'nin sanapi, ya'huëtérin. Sha'huitéranguëmaso chachin inaso', Aoripama itérin. ²⁶ Tisonta hui'ninpita isopita: Intan, Ispan, Itëran, Quiran, inapita. ²⁷ Isëri hui'nipitanta isopita: Piran, Saapan, Acano, inapita. ²⁸ Tisan hui'nipitanta isopita: Osi, Aran, inapita. ²⁹⁻³⁰ Or huënton hua'ano'saso', isopita: Notan, Soparo, Sipion, Ano, Tison, Isëri, Tisan, inapita. Ina nápo Or huënton hua'ano'sa ya'huëpi. A'naya a'naya huëntonënaquë, hua'an ya'conpi. Sëir parti napopi.

Itomo no'paquë copirnoro'sa ya'conpiso'

³¹⁻³² Co'huara israiro'sa copirno ya'huëchatérasoihuë', isopita'ton Itomo no'paquë copirno ya'conpi. Pira'ton ya'conin. Inaso', Pioro hui'nin. Tinapa ninanoquë ya'huërin.

³³ Ina chiminpachina, Sira hui'nin Copapo itopisori ya'huërëtérin. Inaso', Posora ninanoquë ya'huërin. ³⁴ Inanta chiminpachina, Osamori ya'huërëtérin. Inaso', Timan parti ya'huërin. ³⁵ Osamonta chiminpachina, Atatori ya'huërëtérin. Inaso', Pitato hui'nin. Apito ninanoquë ya'huërinso'. Inari matiano'sa', Moapo no'paquë ahuëaton canarin. ³⁶ Atato ya'huërë' chiminpachina, Samarari ya'huërëtérin. Inaso', Masarica ninanoquë ya'huërin. ³⁷ Samaranta chiminpachina, Saonori ya'huërëtérin. Niopo ninanoquë ya'huërinso'. Inaso ninano', Iopiratisii' yonsanquë ya'huërin. ³⁸ Ina ya'huërë' chiminpachina, Paaro-ananori ya'huërëtérin. Inaso', Acaporo hui'nin. ³⁹ Paaro-ananonta chiminpachina, Atatori ya'huërëtérin. Inaso', Pao ninanoquë ya'huërin. Atato sa'inso', Miitapiri itopi. Inaso', Matiriti hui'nin, Misaapo shiin.

⁴⁰⁻⁴³ Isonápo Isao quëran pipipisopita huëntono'sa ya'huërin: Ya'huëpiso no'panënanta', inachachin aninihuani: Timon, Arapa, Quitito, Aoripama, Iran, Pinon, Quinasi, Timan, Mipasar, Maquitiri, Iramo, inapita. Ina nápo Itomo huëntono'sa shimashonënpita ya'huërin. Inapitaso' Itomo no'paqué yanquëatona itohua itohua ya'huëpi. Isaoso', Itomo itopi anta'.

37

¹ Cacoposo nípirinhuë', Canaan parti quëparitérin ya'huëcaso marë'. Pa'pinconta' inaquë chachin ya'huëaponahuë', co hua'quiyahuë' ya'huërin.

Cosi, iinpitarë chachin napopiso'

² Cacopo hui'ninpita naporinso sha'huichinquëma nitotoco'. Cosi shonca canchisë pi'ipitapon pochin, iinpitarë chachin pa'pin ohuicanënpita a'pairin. Pa'pin cosonanënpita: Pira, Siripa, inapita hua'huinpitarë' a'pairin. Iinpitaso co noyahuë' nipi ni'ton, Cosiso' pa'pinquë yásha'huirapirin.

³ Cacoposo' a'napita hui'ninpita quëran, Cosi na'con na'con nosororin. Nani másho nicaquë huarë', Cosiso hua'huatérin ni'ton, nosoromiatérin. Napoaton a'mocaso marë' noyápiachin nininso' nitérin. ⁴ Iinpitariso nípirinhuë', pa'pini ina na'con na'con nosororinso' nicatona', co quë'yapihuë'. Co quë'yatónaraihuë', co nanitopihuë' noya nontacaiso'.

⁵⁻⁷ A'na tashi Cosi hua'narin. Tahuëririnquë, iinpita sha'huitérin:

—Natanco iyaro'sa hua'narahuëso sha'huichinquëma': Huë'ëhuëquë, iminquë ya'ipinpoa trico masaréhua'. Manëhusonta tonporaréhua ni'nahuë. A'nanaya ca tonporahuësoso', huanirin. Canpita tonporamasoso nípirinhuë', ca tonporahuëso' mosharapi. Ya'ipi tahuitatona', monshopi quëran mosharapi, itérin. Ina natanahuatona', iinpitariso aquë aquëtë no'huipi. ⁸ Napohuachina, inapitari itapon:

—Hua'an ya'conpato iyahuëpita camaiyápo ¿tocomaranquën ti? ¡Catoro' quëma camaiyáponco! itopi. Hua'narinso marëpita na'con na'con no'huipi. Sha'huihuachina, co yainhuë' natanpi.

⁹ Ina piquëran Cosiso', hua'naantarin. Naporonta iinpita sha'huitaantarin:

—Natanco iyaro'sa a'na hua'naantarahuëso sha'huitaanta'inquëma'. Hua'nato ni'pirahuë', pi'i, yoqui, shonca a'na tayloraro'sa', inapita monshorahuatona mosharanaco ni'nahuë, itérin. ¹⁰ Cosi ina hua'narinso', pa'pin iinpita inapita sha'huitohuachina, pa'pini pënénaton itapon:

—¿Ma'ta tapon inapochinpita hua'na hua'namantaranso'? Napoahuarë' mamaparin, iyaparinpita, ca chachionta' ¿a'na tahuëri moshaponquën ti? itérin. ¹¹ Iinpitariso noyapatona', aquë aquëtë no'huirápi. Pa'pinsó nípirinhuë', hui'nin naporinso na'con yonquirárin.

Cosi pa'anpiso'

¹² A'na tahuëri Cosi iinpitaso', Siquimo ninano ya'cari pa'pi. Pa'pina ohuicanënpita, chiponënpita inapita quëpapi pasto yonitona a'cacaiso marë'. ¹³ Naporo' pa'pini Cosi itapon:

—Ni'quë conpa. Iya mashoro'sa Siquimo ya'cari ya'huëapi. Inaquë ohuicaro'sa', chiporo'sa', inapita a'pairapi. Paaton ni'contaquë topirahuë, itérin.

—Noya tatapa'. Pa'i nipachin, itérin.

¹⁴ —Inta conpa. Pa'sahuaton iyamashoro'sa ni'contaquë'. Ohuicaro'sa', chiporo'sa', inapitanta onpoinsona nisapiso', nahuicontaqué'. Ina quëran huë'sahuaton, onpoapisona sha'huitiico canta nitochi, itérin.

Cacoposo Ipron motopianaro'sa quëran, Cosi a'parin. Inaso pa'sápaton Siquimoquë canconin. ¹⁵ Ina parti chihuëaton pa'sápirinhuë', a'na quëmapiri quënanahuaton itapon:

—¿Ma'ta yonisaran?

¹⁶ —Iyahuëpita yonisárahuë ta'a. ¿Co pora nitotérantuë' inséquësona pë'tahuanëna a'paiyapiso to? itérin. ¹⁷ —Nani iséquëran pa'pi: "Totanqué pa'ahua," niitapi pora, itérin.

Cosiso pa'sápaton, Totan ninano ya'cariya iinpita quénanconin. ¹⁸ Inapitarinta', áquë quëran Cosi quénanpi. Quénanahuatona', co'huara ya'carichátérasohuë', tēpacaiso marë' a'naroáchin yonquipi. ¹⁹ Inahua capini ninontopi:

—¡Ni'co!. Hua'natona'pi huë'sarin! ²⁰ Huëco tēpa'ahua'. Inapotatéhua poso yaninantëquë po'moa'ahua'. Ina quëran "pa'piniri ca'nin," itahua'. Inapotohuatéhua', ¿naniinta'ma hua'narinsopita pa? niitopi. ²¹ Nopinoso natanahuaton, Cosi pa'poyacaso marë' itapon:

—Ama tēpa'ahuasohuë'. ²² Co tēpatacaso ya'huérinhue'. Iso inoteroquë yaninantë poso nininquë tē'yatoco'. Ama canpitario' ma'sha onpotocosohuë', itérin. Iya'huain nanin quëran ocoirahuaton, pa'pinqué'pa' a'paantacaso yonquiaiton, naporin.

²³ Cosiso iinpitataquë canconpachina, no'huitona noyápiachin a'morinso matopi. ²⁴ Matahuatona yaninantë posoquë, tē'yatopi.

²⁵ Inapotahuatona', coshatapi huachi. Coshatasoi ni'pirinahuë', a'na huëntona' Ismairo nicatono'sa', nioshirin huë'sapi. Carata parti quëran huë'sapi. Camiyonënaquë, pimo hua'sairo'sa', parsamo nimirio, pimo yaqui', inapita quésapi. Iquipitoquë pa'anapona', quéparapi. ²⁶ Naporor' Cotaso iinpita itapon:

—¡Iya'hu tēpahuatéhua', co manta canarihuahuë! Naporahuaton inapotohuatéhua', nonpi nonpínantacaso' ya'huapon. ²⁷ Ama tēpa'ahuasohuë'. Ismairo nicatono'sa téhuëñchino' pa'antahua'. No'huípiro mini nípirinhuë', co nishahuë'. Iyanpoa', ténin. Napohuachina, iinpitari: "¡Téhuëñchachinchí paya!" topi. ²⁸ Nicatono'sa inataquëchin na'huërahuachinara, iinpitari Cosi ocoipi. Yaninantë poso quëran ocoirahuatona', nicatono'sa pa'antopi. Cato shoncatë coriqui pahuërëtohuachinara, Iquipitoquë quëpapi huachi.

²⁹ Nopinoso Cosi tē'yatopiquë huënantahuachina, co huachi iin quénanquintarinhue'. Pa'pi pa'yanaton a'morinso osharin*. ³⁰ Ina quëran iinpitataquë huënantarahuaton, itiintarin:

—¡Iya'hu capa huachi! ¡Ma'huantacha caso nisarahuë paya! ténin.

³¹ Naporor' iinpitaso', Cosi a'morinso masahuatona chipo tēpapiso' huënainënquë, asë'cotëtopi. ³² Inapotahuatona pa'pinaquë a'papi. Quëpana'piso' iso pochin pënënpi: "Iso a'mopiso quénanai. Noya ni'quë". ¿Hui'nanquën a'na nímara ti?" itéquë', itahuatona a'papi huachi.

³³ Cacoposo' nohuitahuaton, tapon: "¡Iso mini hui'nahue a'morinso!" tanan ni'niri napotérin ipora, ténin. ³⁴ Napoapon pochin co napión cancantaton a'morinso nioshatérin. Naporahuaton, sa'catën nininso' sëtohuachinara a'mopiso', a'morin. Ina a'morin quëran hui'nin chiminiso marë' hua'qui na'nérarin, ayanárin, naporárin. ³⁵ Ya'ipi hui'ninpitari achinicancanpirinahuë', inaso co nohuanchátérarinhue', sëtérinso inquicaso'. Aquë aquëtë hui'nin marë' na'nëton, naporin: "Chimipiro'sa ya'huérinquë hui'nahue quénanconta' huarë' sëtérahuëso' copi tapo," ténin.

³⁶ Ismairo nicatono'saso', Iquipitoquë camapi. Camahuachinara, Cosiso a'nara quëmapi Potihuaró itopiso', pa'antopi. Inaso', Iquipito copirnori catahuacaso marë' acorin†. Capitan ya'conaton, copirno a'paipisopita sontaro'sa camairin.

38

Cota, Tamararë' naporinso'

¹ Naporor' tahuëri'sa Cotaso iinpita patahuaton, Atoran ninanoa'huauquë pa'nin. Inaquë a'na quëmapi Iro itopiso ya'huérin. Ina ya'huérinquë yacapatonin. ²⁻³ Inaquë yacapatapon pochin, a'nara nanon nohuitérin. Inaso', Soa itopiso' hui'nin. Soaso' Canaan

* ^{37:29} A'morinso osharin: Ina parti ya'huëpisopitaso', co napión ancantohuachinara, inapopi. † ^{37:36} Copirno catahuapisopitaso': Naporor' tahuëri'sa macayora'piapi.

piyapi. Cotari natanpachina, acoantopi. Inaquë hui'nahuanpachina, paninanën nasitérin. Ina nohuitaton, Iri itérin. ⁴ Naquéranchin sa'in cayoantarin. Nasitohuachina, quëmapi chachin niantarin. Inaso', Onan itérin. ⁵ Naquéranchin hua'huaantahuachina, quëmapi chachin niantarin. Inaso', Sira itérin. Quisipo ninanoquë Cota ya'huëaso', inaso nasitérin.

⁶ Iri hui'napitohuachina, pa'pini Tamara acoantérin. ⁷ Acoantopirinhue', Iri co noyahuë' nininso' co Sinioro costarinhue' ni'ton, ina nohuanton chiminin. ⁸ Napohuachina, Cotari Onan ya'huëré' itapon:

—Iya masho ayananpirinso sa'in, quëmari maquë'. Canpoaso inachintéröhua ni'ton, imoya macaton, inaquë hui'nahuanquë'. Hui'nahuanpatan, Iri quëran pipicaiso nippisopita quëmá quëran ya'huëtarin huachi, itérin. ⁹ Onanso' Tamara macaponaahuë': "Hui'nahuanpato, hua'huaro'sa co caquën nisarinhuë". Irico hui'ninpitaráchin pochin nisarin," ténin yonquinënquë. Napoaton, Tamara tēcarihuachina, aipi a'paconin. Ama iinco ya'huërënamënpita, ina quëran ya'huëcaso marëhuë' naporin. ¹⁰ Onan naporinso Sinioroso nitotaton, chiníquën no'huitérin. Napoaton inanta', ina nohuanton chimiatarin. ¹¹ Naporor' Cotaso', Tamara itapon:

—Quëyoroantaran ni'quëhuare', iporaso'tataparin ya'huërinquë paantaquë'. Hui'nahuë Sira itérahuëso hui'napitaquë huarë', inaquë ya'huëtaquë', itérin. Itaponahuë', co tēhuëñchachin napotérinhue'. Nonpintaton naporin: "Sira ya'huëré', iinpita pochachin chimiantahuachin," ta'ton naporin. Napoaton Tamaraso', pa'pin ya'huërinquë pa'nin ya'huapon.

¹² Cara pi'iquëran pochin Cota sa'in ya'huëré' chimiantarin. Inaso' sha'huitéranchuëmaso chachin, Soa hui'nin. Chiminpachina, Cotaso sétaton na'nérárin. Sétérinso' inquihuachina, Tinato ninanoa'huaquë pa'nin. Ohuicanënpita ya'inapiro'sa inaquë ya'huëapi ni'ton, pa'nin nicapon. Amiconen Iro itopisorë' pa'nin. Iroso', Atoran piyapi. ¹³⁻¹⁴ Tamaraso ina nitotaton, quëyoron a'morinso ocoirin. Inaporahuaton, nitaparin. Niimomotötérinso' në'mëtëquë nipa'shinayatérin. Ama nohuitacaiso marëhuë' naporin. Inaporahuaton, Inain ninanoa'hua ya'cari', huënséconin. Inaso' ninano', Tinato iraquë ya'huërin. Sira nani hui'napitopirinhue', co acoantopihuë' ni'ton, shiin yanopintérin. ¹⁵⁻¹⁶ Cotari quënanahuaton, nipa'shinayatérinso marë': "Isoso sanapi, monshihuantë!", ténin. Napoaton pëshonin ya'caricaso marë'. Co shiin nohuitatonhuë', itapon:

—¿Canta quëmaro'co nii topirahuë? itérin.

—¿Ma'ta nipachin pahuëréaponco? ténin sanapinta'.

¹⁷ —Pë'tahuarahuësopita quëran, a'nara chipoa'hua a'patiaranquë, itaantarin Cotari.

—Inta nipachin. Napoaponahuë', ma'sha têranta quëmaquënin nininso' patëquë'. Chipoa'hua a'patianco huarë', cari tapaarahuë, itérin sanapiri.

¹⁸ —¿Ma'ta nipachin pachi? ténin Cota.

—Sicho po'moitéränëp pë'natéransoarë chachin, huaranën, inapita patëquë', itérin. Napotohuachina Cotaso', nataninsopita quëtérin. Inapoaton tēcarihuachina, naporor chachin hua'huantérin. ¹⁹ Ina quëran Tamaraso', pa'pin ya'huërinquë panantarín. Nipa'shinayatérinso' ocoirin. A'morinsonta ocoirahuaton, naquéranchin quëyoron a'morinso a'moantarin.

²⁰ Ina quëran Cotarisso', chipoa'hua a'patërin. Amiconen Irori quëpatërin. Sanapi acoantérinsopita ayantacaso marë' a'patopirinhue', inariso co huachi quënanconinhuë'.

²¹ Napohuachina, ya'huëhuano'sa natanin:

—Monshihuantë sanapi Inain ira pirayan huënséyantérinso': ¿Intohuata pa'nin? itérin.

—Co isëquë monshihuantë sanapi ya'huërinhuë', itopi. ²² Napotohuachina, Cota ya'huërinquë huëntarahuaton, itiintarin:

—Co'chi sanapi quënanconahuë paya. Ya'huëhuano'santa': “Co isëquë monshihuante sanapi ya'huërinhuë”, itérinaco, itérin. ²³ Napotohuachina, Cotari itapon:

—Ma'ta pini. Noyatapon. Quëtérahuësopita yamapachin, main nipachin. Ina marë' nanan ocoihuatéhuaso', piyapi'sa tēhuaponënpoa'. Nanichi chipoa'huaya a'patochinchirahuë', co quëmari quënanconanhue', itérin.

²⁴ Cara yoqui quëran pochin, Cota sha'huitapona huëcapaipi:

—Shiparin Tamara itéréhuaso', monshihuanin. Napoaton iporaso' cayorin huachi, itopi. Natanaahuaton Cotaso', no'huitaton yai ténin:

—¡Ocoirahuatoma', a'pëco chimiin! ténin. ²⁵ Ya'huëhuano'sari Tamara a'pëcaso marë' ocoirapirinahuë', inaso shiin nanan a'patérin: “Iso sicho po'moitéra pë'natérinsorë chachin nininso' hua'anën, napotérinco. Iso huaranta', inanquën chachin ni'ton, noya nicaton nohuitéquë”, itéquë', itérin. ²⁶ Cotaso', shiini a'patérinsopita nohuitahuaton, naporin: “Tëhuëñchachin caso co noyahue' ninahuë'. Co Sira acoantatohue', tëhuërahuë. Inaso niperinhuë', noya noya ninin,” ténin. Naporo quëran huarë' Cotaso', co huachi onporo téranta shiin tēcariantarinhuë'.

²⁷ Tamara huaicaso nanihuachina, catopia'huaya hua'huatopi. ²⁸⁻²⁹ Nasitapona napopi: A'na'ton imiria'huain ocoirin. Napohuachina ahuitona'piri, quëhuan pi'shiqüë, tonpotanpatérin. “Iso'ton hua'huacharin,” ta'ton, napotérin. Napopirinhuë', hua'huashaso tanpara'huain po'moantarin. Shiaraahuaton a'naso', nasitochanin. Napoaton ahuitona'piri nininën acotérin: Parisi* itérin. “Ya'copirinquënsa inquirahuaton, pipiran,” itahuaton, inapochin nohuitérin. ³⁰ Quëhuan pi'shiqüë tonpotanpatérinsoso', ina piquëran hua'huatérin. Inaso' nohuitaton: Saro itérin.

39

Hua'an sa'iní, Cosi apirinso'

¹ Sha'huitéranchiquëmaso chachin Cosiso', Ismairo nicatono'sari Iquipito no'paqué quëpapi. Inaquë a'nara Iquipito quëmapi Potihuaro itopiso' pa'antopi. Inaso', Iquipito copirnori catahuacaso marë' acorin. Capitan ya'conaton, copirno a'paipisopita sontaro'sa camairin. ² Cosiso napotopirinahuë', Siniorori co naniantérinhuë'. Inari catahuarin ni'ton, hua'anën pëinënqué noya yonquiaiton yacapatérin. Noya nicaton, noya ya'huërin. ³ Cosiso', Yosëri catahuarin. Hua'anëni ina nicaton: “Nani ma'sha Cosi nipachina, Yosëri catahuarin ni'ton, noya pipitérin,” ténin. ⁴ Napoaton pa'yatérin. Pa'yataton, acorin catahuacaso marë'. “Ma'pitasona ninahuëqué, quëma catahuaponco,” itérin. Naporahuaton, ya'ipi piyapinënpita camaiatón asacatacaso marë' acorin. Ya'ipi ma'shanënpita a'paicaso marë' acorin. ⁵ Ina acorin quëran huarë', Siniorori Potihuaro catahuamiatérin. Cosi noya nicaton, napotérin. Pëinënquénta ma'sha nipachina catahuarin. Iminënquénta sacatohuachina', sha'topiso' noya noyatérin. ⁶ Cosiri ya'ipi ma'shanënpita noya a'paitérin ni'ton, co huachi ma'marë téranta yonquiárinhuë'. Topinan noya coshatárin huachi.

Cosiso', noyapin noyapin ni'tomantarín ni'ton, ya'ipi quëran pa'yatopi. ⁷ Napoaton co hua'quiya quëranhuë', hua'anën sa'iní ni'sárin quëran noyarín huachi. A'na tahuéri itapon:

—Huëqué pa'a quëmaso' inapoqué', itérin. ⁸ Napotopirinhuë', Cosiso co pi'pisha téranta nohuantérinhuë'. Napoaton itapon:

—Ni'quë siyora, pi'pian sha'huichinquën topirahuë: Hua'anëhuë ya'ipi ya'huëterinsopita a'paia'huaso marë' acorinco. Cari ya'ipi a'paiahuë ni'ton, co ma'marë téranta yonquiárinhuë'. Natérinco ni'ton, sano cancantérin. ⁹ Chini chiniquënan nanan quëtérinco iso pëiquë camaita'huaso marë'. Naporahuaton, hua'anëhuë co ma'sha téranta apiratérincohue'. Quëmasáchin tëhuëñchinsó' sa'inquën ni'ton,

* ^{38:28-29} Parisiso': Pasoarinso' tapon naporin.

apiratérinco. Napoaton, co caso pi'pian täranta nohuantérahuë' pa'pi co noyahuë' nininso' nicaca'huaso'. ¡Naporahuaton quëmarë'co ninahuë naporini, co Yosë natétohuë', pa'pi oshahuaintohuë! itérin. ¹⁰ Napotopirinhuë', sanapiriso Cosi ichiquëhuënacaso marë' nani tahuëri apisárin. Inaso napoaponahuë', co pi'pisha täranta nohuantérinhuë'.

¹¹⁻¹² A'na tahuëriso nipurinhuë', Cosi pëiquë sacatapon ya'conin. Naporor' co a'napita ya'huëasoihuë ni'ton, sanapiso Cosi so'huianarino matérin. Inapotaton:

—Huëquë pa'a quëmaso inapoquë', itérin. Napotopirinhuë', Cosiso niso'huianatérinco pa'coirahuaton, ta'arin.

¹³⁻¹⁵ Ina patérinco ni'sahuaton, sanapiso yanopinin. Yanonpinaton chiníquën huiyo ténin. A'napita piyapinënpita péracaso marë' naporin. Huë'pachinara, itapon:

—¡Ni'cochi iso'! So'yahuë a'nara iprio piyapi quëshiantérinpoa tapiinpoaso marë'. Ya'conahuaton masapirincohuë', canpita huëcacamaso marë' caso chiníquën huiyo ténahuë. Ina natanaton, ta'arë'nachin pipirin. ¡Niso'huianatérinsonta', patérin! itérin.

¹⁶ Piyapinënpita napotahuaton, Cosi niso'huianatérinco' taparin. So'in huëcaquë huarë' taparin. ¹⁷⁻¹⁸ Ina huë'pachina, piyapinënpita sha'huitérinco chachin inanta sha'huitérin:

—Iprio piyapi quënanso', patoananëhuëquë ya'conahuaton masapirincohuë'. Chiníquën huiyo topatora, a'porahuatonco ta'arin. Niso'huianatérinsonta', patérin.

¹⁹ ¡Inapotérinco piyapinën! itérin.

Sa'ini sha'huitérinco' natanahuaton, Cosi hua'anënsa pa'pi no'huitérin. ²⁰ Cosi maca-caiso marë' piyapinënpita camairin. Nani mapachinara, tashinan pëiquë po'mopi. Copirno tëhuëtopisopita ya'huëapiquë po'mopi. ²¹ Tashinan pëiquë po'mopirinahuë', Siniororiso' co Cosi naniantérinhuë'. Nosoroaton catahuaantarin ni'ton, tashinan pëi hua'ani, noya nicaton pa'yatérin: "Cosiso', nóya hui'napi," ta'ton, noya ni'nin.

²² Napoaton catahuacaso marë' acorin: "Quëmari a'napita prisoro'sa', a'paiajan," itérin. Napoaton Cosi camaitérinsoráchin tashinan pëiquëso', prisoro'sa nipi. ²³ Cosi camaito-huachina tashinan pëiquë, noyasáchin sacatopi. Napoaton tashinan pëi hua'anso', co huachi Cosi sacatérinco' ni'sárinhuë': "Siniorori chachin Cosiso catahuarin ni'ton, ma'sona nipachina, noya pipitérin" ta'ton, naporin.

40

Hua'ano'sa hua'napiro', Cosiri no'tëquën sha'huitérinco'

¹ Ina piquérán cato hua'ano'sari Iquipito copirno tëhuëtopi: A'naso', copirno huino o'shitona'piro'sa hua'an. A'nanta', ina marë chachin pan nina'piro'sa hua'an. Cato chachin copirno tëhuëtopi. ²⁻³ Napoaton copirnori inapita no'huirin. No'huiton tashinan pëiquëtacaiso' camaitérin. Napohuachina cato chachin inaquë po'mopi. Ina tashinan pëiso', copirno a'pairinsopita capitán pëinënqué ya'huërin. Cosi ya'huëarinqué chachin po'mopi. ⁴ Copirno a'pairinsopita capitániso', Cosi itapon: "Isopita cato hua'ano'sa quëmari noya a'paiton, catahuaquë'," itérin. Inapotohuachina inapita hua'ano'saso', hua'qui inaquë ya'huëpi.

⁵ A'na tashiso nipirinhuë', cato hua'ano'sa chachin, hua'napi. A'naya a'naya hua'napiro', co inachachin tapon hua'napihuë', nisha nisha tapon hua'napi.

⁶ Tashíramiachin Cosiriso nicapon huë'pachina, sétápi quënanquirin. ⁷ Napoaton, cato chachin natanin:

—¿Onpoatomata iporasо' pa'pi sétérmaso pochin ya'norama? itérin.

⁸ —Catocoi chachin hua'npiraihuë', co insonta ya'huërinhuë' ma'sona tapon hua'naraiso anitotiincoiso', itopi.

—¡Yosë mini nanitérin ma'sona tapon hua'narësopita anitotiinpoaso! Sha'huitoco hua'naramaso', itérin.

⁹⁻¹⁰ Napotohuachina o'shina'piro'sa hua'anso', hua'narino Cosi sha'huitérin:

—Huë'ëhuëquë a'nara opa ya'huë ni'nahuë, cara së'pahuaninso'. Nicasoco chachin, papo së'patarin. Papo së'patahuaton, yancotarin. Yancotérinquéranchin nitérinsopita cayarin. ¹¹ Ina pirayan canta', huaraon o'orinso' minënën së'quëato, huaniárahuë. Opa cayarinso masahuato, huaraon o'orinquë shi'shirahuë. Inapotahuato huaraon ihuëtérahuë. Ihuëtohuatora ma'parinco huachi, itérin. ¹²⁻¹³ Napotohuachina, Cosiri itapon:

—Naporinchi paya. Ma'sona tapon hua'naranso sha'huichinquën: Cara së'pahuaninso', cara tahuëri tapon naporin. Cara tahuëriya quëran, huaraonso' quëma tēhuéranso' yonquiantarin. Nanan anoyatahuaténquën naquéranchin acoantarinqüen ina marë' sacataantacaso'. Iráca naporanso chachin naquéranchin o'shitaantaran huachi. Ina tapon, ina pochin hua'naran. ¹⁴⁻¹⁵ Inapotohuachinquën, canta nosoroatonco yonquico. Ocoincoso marë' huaraon sha'huitëquë'. Iprioro'sa ya'huëpique caso ya'huëpirahuë', topinan quëran no'huitonaco pa'aninaco. Co manta onporahuë ni'ton, co tashinan pëiquë ya'huápa'huaso ya'huërinhuë'. Napoaton nosoroco canta', itérin.

¹⁶⁻¹⁷ Napotohuachina, copirno marë' pan nina'piro'sa hua'anta': "Noyachi sha'huitérin paya," ta'ton, hua'narinsos Cosi sha'huitérin:

—Canta niperinhuë', iso pochin hua'narahuë: Cara ya'huiri pan acoinanquë pitémotorahuato, huirítón pano'sa quëpárahuë. Ya'natontarins acoinanquë, nisha nisha cashi cashin pano'sa copirno marë' ya'huérin. Napoaponahuë', inairaro'sa huë'sahuatona pitémotorahuë quëran capitarinaco, itérin. ¹⁸ Napotohuachina, Cosiri itapon:

—Cara pan acoinanso', cara tahuëri tapon naporin. ¹⁹ Cara tahuëriya quëran, huaraonso' quëmanta tēhuéranso' yonquiantarin. Naporo chachin piyapinënpita cama-iapon: "Noninquë huënquëconorahuatoma', naraquë pë'tëncó chimi'in," itapon. Inapotohuachinë, chanaro ca'téro'sari noshanën capona', itérin.

²⁰ Cara tahuëriya quëran, huaraon hua'huatérino tahuëri nanirin. Naporo' ya'ipi catahuarinsopita hua'ano'sa ichicamacanacaso marë', panca pita ninin. Ya'ipi përarinsopita ni'tonënquë huaraonso' camaitérin: "Cato hua'ano'sa chachin tashinan pëi quëran ocoico'," ténin. ²¹ O'shina'piro'sa hua'anso', naquéranchin asacataantarín. Napoaton naquéranchin iráca pochachin huaraon o'shitaantarín. ²² Pan nina'piro'sa hua'anso niperinhuë', huaraoni piyapinënpita camairin naraquë pë'tëncaciso marë': "Noninquë huënquëconorahuatoma', tēpacó'," itérin. Cosiri sha'huitérino chachin nitopi. ²³ O'shina'piro'sa hua'aniso', Cosiri catahuacaso marë' sha'huitérino', naniantérin. Inapoaton co catahuarinhuë'.

41

Huaraon hua'nhuachina, Cosiri no'tequën sha'huitérino'

¹ O'shina'piro'sa hua'an, tashinan pëi quëran pipirinso' nani cato pi'ipitérin. Naporo' huaraon chachionta hua'narin. Niroi' yonsanquë huaniarin nihua'narin. ² A'nanaya ni'pirinhuë', canchisë ohuaca' Niroi' quëran pipirapi ni'nin. Pa'pi amoshináchin pipirapi. I' quëran pipirahuatona', shi'shinamatéro' huáncana coshatapi. ³ Ina quëran niantapirinhuë', canchisë chachin Niroi' quëran pipirapi ni'nin. Inapitaso' capa nishihuë'n nansëyaráchin niconpi. Pipirahuatona i' yonsanquë a'napita ohuacaro'sa pirayan huanirapi. ⁴ Nicaso chachin, inapitaso', amoshino'sa pashica ta'papi. Inapota-tona', canchisë chachin pë'yaquë huarë' ca'miatopi. Naporo' huaraonso' capayatérin. ⁵ Naquéranchin huë'ëantapirinhuë', hua'naantarin. Canchisë trico moto' noya noyatérino' a'na nanquéáchin nitérin ni'nin. ⁶ Inapita pirayan, canchisë chachin pipiantarin. Inapitaso' pi'iri ahuiquitérin pochin ya'nopi. ⁷ Inapitanta noya noyatérino nipesopita

pashica ta'papi. Inapotatona pë'yaquë huarë' ca'miatopi. Naporo chachin huaraonso' capayataantarín. Capayatahuaton: "Co ipora topinan ina pochin hua'narahue," ténin.

⁸ Tashiramiachin huaraonso' hua'narinso yonquiaton, co napion cancantérin. Napoaton piyapinënpita camairin ya'ipi Iquipito no'paquë ninotona'piro'sa huëcacaiso marë'. Quirica nitotoro'santa amatérin. Inapita huë'pachinara, hua'narinso' sha'huitérin. Sha'huitopirinhue', co incari téranta nanitérinhue' ma'sona tapon hua'narinso sha'huitacaiso'. ⁹ Naporo huarë' o'shitona'piro'sa hua'an Cosi yonquirin. Ina yonquiaton huaraon itapon: "Ipora huarë' yonquirahuë ma'sona i'hua chachin nica'huaso' nininso'. ¹⁰ Quëmaso' chiníquën nanantérán. Caso piyapinëncó nimirahuë' sha'huitaranquën. Pan nina'piro'sa hua'anoco chachin, iráca no'huitoncoi tashinan pëiquë apo'motérancioi. Inaso' tashinan pëi', a'pairinëñquënsopita capitán pëinëñquë ya'huërin. ¹¹ A'na tashiso' catocoi chachin hua'narai. A'naya a'nayacoi nisha nisha tapon hua'narai. ¹²⁻¹³ Inaquë chachin quiyaro'coi a'nara iprio hui'napi ya'huëarin anta'. Inaso' ina capitani chachin, asacatacaso marë' pa'anin. Hua'naraiso sha'huitohuatéira, ma'sona tapon naporinso no'tequënsopita sha'huitérincoi. Sha'huitérincoiso chachin caso naquëranchin asacataantaranco. A'naso nimirahuë', noninquë ahuëñquëconotahuaton atépatérán," itérin.

¹⁴ Inapo sha'huitohuachina, copirnoso Cosi macontacaso marë' piyapinëncó a'parin. A'naroáchin tashinan pëi quëran ocoipi. Cosiso niya'itahuaton, nitaparin. Noya nininso' a'mosahuaton, huaraon nicapon pa'nin. ¹⁵ Canconpachina, huaraoni itapon:

—Caso hua'nimirahuë', co insonta nanitérinhue' ma'sona tapon hua'narahue'so sha'huitiincoso'. Quëma têhuëñchinsó' nitotérán, topi natantérahuë, itérin.

¹⁶ —Co caora nohuanton nitotérahuë'. Quëma piyapinëncó ni'to, Yosë chachin anitoto-huachinco, sha'huitaranquën. Ma'sona noya nicacaso marë', sha'huitaranquën, itérin.

¹⁷ Napotohuachina huaraoni itapon:

—Huë'ëhuëquë Niroi' yonsanquë huaniárahuë hua'narahue. ¹⁸ Naporo chachin, canchisë ohuaca' pa'pi amoshináchin nimirahue. ¹⁹ Ina quëran canchisë chachin pipiantapi niantarahuë. Capa nishinahuënsopita ni'chinahuë! ²⁰ Nicasoco chachin, inapitaco', amoshino'sa pashica ta'papi. Inapotatona canchisë chachin, pë'yaquë huarë' ca'miatopi. ²¹ Pë'yaquë huarë' caponaraihuë', co manta ca'pisohue pochin ya'nopi. Naporo capayatérahuë.

²² Huë'ëantapirahuë', naquëranchin hua'naantarahuë: Huë'ëhuëquë Canchisë trico moto' noya noyatérinco a'na nanquéachin nitérin ni'nahue. ²³ Inapita pirayan, canchisë chachin pipiantarin. Inapitaco' pi'iri ahuiquitérinco pochin ya'nopi. ²⁴ Inapitarinta noya noyatérinco nimirahue'so pashica ta'papi. Inapotatona pë'yaquë huarë' ca'miatopi ni'nahue. Ninotona'piro'sa sha'huitopirahuë', co insonta nanitérinhue' ma'sona tapon naporinco', sha'huitiincoso', itérin.

²⁵ Napotohuachina, Cosiri huaraon itapon:

—Caso quëma piyapinëncó nimirahuë', sha'huitaranquën: Catoro hua'naranco', a'naíchin tapon hua'naran. Ina quëran Yosë chachin anitotérinco' ma'sona ina nicaso' yonquirinco'. ²⁶ Canchisë ohuaca' noyápiachin nimirahue. Canchisë pi'ipi tapon hua'naran. Canchisë trico moto' noyápiachin nimirahue', ina chachin tapon naporin. ²⁷ Canchisë ohuaca' capa nishinahuënsopita nimirahue', hua'naran. Inapitaco', amoshino'sa piquëran pipipi. Inapitarinta canchisë pi'ipi chachin tapon naporin. Ina pochachin noya noyatérinco' trico moto' pirayan, canchisë chachin papoantarin hua'naran. Pi'iri ahuiquitérinco pochin ya'nopisopitanta', ina chachin anitotérinco'. ²⁸ Napotérinco nimirahue', Yosë ma'sona yaninisco nani sha'huitérinco'. ²⁹ Yosë nohuanton canchisë pi'ipi iso Iquipito no'paquë nani ma'sha noya noyatapon. Co manta pahuanaponhuë'. ³⁰⁻³¹ Ina piquërando

nipirinhüë', canchisë pi'ipi chachin panca tanarotapi. Napoaton co huachi inso téranta', Iquipito no'paquë noya ya'huérinso yonquiarinhüë'. Pa'pi pahuantomiatapi ni'ton, co huachi iso no'paquë noya ya'huaponahuë'. ³² Caso piyapinëncö nipirahuë' sha'huitaranquën. Nani Yosë yonquirin inapocaso'. Naporahuaton co hua'quiya quëranhuë' naniarin. Napoaton ina nohuanton, catoro inachachin hua'naran.

³³⁻³⁴ Inapocaso ni'ton, a'nara quëmapi yonquínahuan ni'ton, noyá nitotérinso' yoníquë'. Ya'ipi iso no'panëñquë ya'huëpisopita camaicaso marë' acoquë'. Naporahuaton, chirinchiro'sa acoquë' ya'ipi hua'anëntéränquë pa'ina'. Cosharo yontonacaiso marë' pa'ina'. Noya noyatataiso' pi'ipiro'saquë yontoina'. A'natérapo costaro quëran, a'na costarora ma'pachina'. Ya'ipi Iquipito no'paquë inapo'ina'. ³⁵ Naporo' pi'ipiro'saquë trico yontonpiso', niquë tapaina'. Quëma chachin anitotahuatënén, ninanoro'saquë tapaina'. Tanaro tahuëri'sa canquihuachina, capacaiso marë' inapo'ina'. ³⁶ Inapohuachina', Iquipito no'paquë trico tapapinan ya'huapon. Canchisë pi'i tanarotacaiso canquihuachina, ina ca'sapi huachi. Ina capatona', ya'ipi iso no'paquë ya'huëpisopita co chiminaponahuë', itérin.

Copirno ya'huérënamën camaitacaso marë' Cosi acopiso'

³⁷ Cosi yonquirinso natanahuatona', huaraonso hua'ano'sapitarë chachin: "¡Ma nónyacha yonquirin paya!" topi. ³⁸ Napoaton huaraonso' piyapinënpita itapon:

—Iso quëmapiso', Yosë ispiritonëni chachin ya'coancantérin. Co onporonta a'na quëmapi iso pochin nininso' ina sacato nicacaso marë' quënanarihuahuë', ténin.

³⁹⁻⁴⁰ Piyapinënpita napotahuaton, Cosi itapon:

—Co a'na quëmapi quëmá quëran yonqui yonquínahuan ni'ton, noya noya nitotérinso ya'huérinhüë'. Yosë chachin ya'ipi inapita anitotérinquën. Napoaton carinquën acoaranquën pëinëhuëquë, ya'huérënamëhuë camaitacaso marë'. Ya'ipi piyapinëhuëpitanta natëinëñquënso ya'huérin. Copirnoco ni'to, casáchin quëmá quëran chini chiniquën nanantarahüe. ⁴¹ Ni'quë'. Ipora tahuëri carinquën acoaranquën ya'huérënamëhuë ya'ipi Iquipito no'pa' hua'anëntacaso marë', itérin.

⁴² Napotahuaton huaraonso', imisirinqué sicho po'moitéränén po'morinso' ocoirin. Ina ocoirahuaton Cosi imisirinqué po'motérin. Inapotahuaton, piyapinënpita camairin: "Noya noya rino pi'shi quëran në'mëtë nipo' a'motoco'. Naporahuaton, osëte oro quëran nipo', apë'pëconotoco'. ⁴³ Ina quëran, toronanëhuëquë pa'patora, imaquirinso toronanquë ananpëco'. Inapotahuatoma', quëpacó'. Ina quëpasëma', piyapinëhuëpitari chiniquën sha'huiña': '¡Isonco!' téra'ina', itérin. Ina pochin copirnori Cosi acorin ya'ipi Iquipito no'paquë, camaitacaso marë'. ⁴⁴ Ina piquëran huaraoni Cosi itaantapon:

—Ca mini copirnocosó nipirahuë', co inso téranta iso no'paquë inaora nohuantérinso' nisarinhuë'. Naniyarin quëran huarë' ma'sona nicacaiso', quëma camaitaran, itérin.

⁴⁵ Copirnori, Cosi Iquipito nananquë nisha nininén acotérin: Sahuinato-paniya, itérin. Naporahuaton Potihuirira hui'nin Asina itopiso' acoantérin. Potihuiraso', On ninanoquë corto hua'an ya'conin. Ina pochin Cosi, ya'ipi Iquipito no'pa' hua'anëntacaso marë' acopi.

⁴⁶ Cosi cara shonca pi'ipitohuachina, Iquipito copirno marë' caniaritérin sacatacaso'. Nani acohuachina, huaraon nontahuaton caniaritérin ya'ipi Iquipito no'pa' pa'tacaso'.

⁴⁷ Canchisë pi'ipi noya noyatataiso' pi'ipiro'saquë, hua'huayátérahuë cosharo noyatérin.

⁴⁸ Cosiri ya'ipi trico tapacaiso nininso', ma'patérin. Ma'pataton, ninanoro'saquë taparin. Canchisë pi'ipi naporin. Nani ninanoro'saquë trico taparin. Ina pirayan imino'saquë sha'pisopita mapiso', taparin. ⁴⁹ Pa'pi notohuaro' trico Cosiri ayontonin. Marë yonsanquë inotéra'hua ya'huérinso pochin ayontonin. Pa'pi notohuaro' ni'ton, pichirápirinahuë', co onpo pichichináchinhüë' nipachina, tananpitopi huachi.

⁵⁰ Co'huara tanarotacaiso caniarichátérasohüë', Cosiso cato hui'ninpita ya'huétérin.

⁵¹ Paninanso' Manasisi itérin: "Yosë chachin parisítérahuëso', quëmopinëhuëpita, inapita ananiantérinco," ta'ton, ina pochin hui'nin nohuitérin. ⁵² Ina quëran niantarinsoso',

Iprain itérin. "Yosë nohuanton parisitërahuëso no'paquë chachin noya noya acorinco," ta'ton ina pochin hui'nin nohuitérin.

⁵³ Canchisë pi'ipi Iquipitoquë ma'sha noya noyatacaiso' pi'ipiro'sa', na'huérin huachi. ⁵⁴ Napor' Cosi naporinso chachin, tanarotacaiso caniaritérin. Canchisë pi'ipi chachin naporin. Ya'ipi a'napita no'paro'saquënta', tanarotopi. Iquipitoquéráchin cosharo tapapinan ya'huérin. ⁵⁵ Iquipito ya'huéhuano'santa cosharori pahuantohuachinara, huaraon paapapi. Trico natanacaiso marë' paapapi. Natapachinara, huaraoni ya'ipi iquipitoro'sa itapon: "Paatoma', Cosi nontoonco'. Ma'sona itohuachinquëma', ina nico'," itérin. ⁵⁶ Ya'ipi Iquipito no'paquë piyapi'sa tanarotacaiso caniaritohuachina, Cosiso chirinchiro'sa camairin: "Cosharo taparéhuaso pëiro'sa i'soatatoma', ya'huéhuano'sa pa'antoco'," itérin. Aquë aquëtë tanarotapi ni'ton, pa'antapi huachi. ⁵⁷ Naporahuaton ya'ipi parti quëran huë'sapi. Cosi trico taparinso' pa'antacaiso marë' Iquipitoquë huë'sapi. Co inso no'paquë téranta', cosharo noyatérinhue' ni'ton, naporapi huachi.

42

Cosi iinpitanta Iquipitoquë pa'piso'

¹ Iquipitoquë trico pa'anacaso ya'huérinso', Cacoponta' nataantérin. Ina natantahuatón, hui'ninpita itapon: "¡Co topinan nini'sápamaso ya'huérinhue'!" ² Nani sha'huitérinaco Iquipito no'paquë trico pa'anacaso marë' ya'huérinso'. Napoaton inaqué pa'matoma', pa'amaco'. Ama tana tiquiempoaso maréhuë' inapoco'," itérin

³ Pa'pini napotohuachina, Cosi iinpitaso', shonca ya'pi trico pa'anapona Iquipitoquë pa'pi. ⁴ Mincaminso niperinhuë', pa'pini co nohuitérinhue' a'pacaso'. Inaso', Cosi iin miachin. Ina yo'nanquébranchin pipipiso'. "Pa'ninquë tapona ma'sha yaonpoápirinhuë'", ta'ton, co yaa'parinhuë'. ⁵ Cacopo hui'ninpitaso', a'napita piyapi'sare' pa'pi. Ya'ipi Canaan parti tanarotopi ni'ton, notohuar'o' pa'mapi.

⁶ Nani sha'huitérinquëmaso chachin Cosiso', huaraon ya'huérénamëñ ya'ipi Iquipitoquë camaitarin. Naporahuaton ina camaitohuachina, ya'ipi parti quëran huë'pisopita, trico pa'antapi. Iinpitanta camahuachinara, nontacaiso marë' isonpi quëran no'paquë huaré' monshorahuatona', moshaipi. ⁷ Ipora quënanapon chachin Cosiso', iinpita nohuitérin. Nohuitaponahuë', co nohuitérinhue' pochin ninin. Napoaton no'huitatë pochin co yashinhuë' nontérin:

—¿Canpita po'? ¿Intoparanta huë'nama'? itérin.

—Canaan parti quëran, trico pa'anapoi o'marai, itopi. ⁸ Cosiriso iinpita nohuitérin. Inapitariso napoaponahuë', co ina nohuitopihuë'.

⁹ Napor' Cosiso', iráca hua'naton iinpita sha'huitérinso' yonquirin. Ina yonquiaiton itapon:

—Canpitaso', nëhuëtona'pirosanquëma tënahuë. No'panéhuëi inséquësona co noya a'paipinanhue' ni'camaso marë' huë'nama', itérin.

¹⁰⁻¹¹ —¡Co sinioro inacoihuë! Quiyaso' quëma piyapinënpita pochin ninai. Tricoíchin pa'anapoi o'marai. Ina tataquëbranchin ya'ipicoi ninai. Co onporo téranta nëhuëtochinaihuë', itopi.

¹² —Nonpiánama'. No'panéhuëi inséquësona co noya a'paipinanhue' ni'camaso marë' huë'nama ipora, taantarín Cosiso'. ¹³ Napotopirinhuë', inapitariso itapona':

—Quiyaso' quëma piyapinënpita pochin ninai. Ya'ipiya quëran ina tataquëbranchin, shonca catocoi ninai. Canaan parti ya'huérain. Hua'hua nininsoso', tatarë' quëparitérin. A'naso niperinhuë', ayarin, itaantapi.

¹⁴⁻¹⁵ —¡Nani napotérinquëma! Canpitaso' nëhuëtona'piro'sanquëma tënahuë. Iyaparima hua'hua nininsoso' quëcama huaré', no'téquënonamaso' nitotarahuë. Huaraon ya'huérin ni'ton, no'téquënontaranquëma'. Co ina quëpatamahuë', co onporonta iséquëran pipiaramahuë'. ¹⁶ A'naquëma paaton maconta'in. A'napitanquëmaso niperinhuë',

tashinan pëi ya'contarama'. Ina huë'pachin, naporo huarë' naporamaso natëaranquëma'. Co'so' huë'pachinhü', tëhuëñchachin nëhuëtona'piro'sanquëma'. ¡Huaraon ya'huërin ni'ton, no'tequën nontaranquëma'! itérin.

17-18 Cara tahuëri Cosiri iinpita tashinan pëiquëtérin. Inapotopirinhü', nontaantarin:

—Canta Yosë të'huatérahuë. Iso pochin nipatama', co tēpaaranquëmahü'.
19 Tëhuëñchachin noya nina'piro'sanquëma nipatama', a'naquëma tashinan pëiquë quëparichin. A'napitanquëmaso niperinhuë', quëmopinëma capacaiso mare' trico quëpatoma', panantaco'. **20** Ina quëran, no'tequën nonamaso' nitota'huaso marë', iyaparima hua'hua nininso quëshimaco. Co'so' quëmahuatamahuë' tëhuëñchachin chiminarama', itérin. Napotohuachina: "Noyapa'", topi. **21** Napoaponahuë', inahua capini ninontopi:

—Tëhuëñchachin canpoaso' iráca pa'pi co noyahuë' ninëhua'. Iya'hua ma'sha on-potohuatéhuara, nosorochináchin nontopirinpoahuë', co nosororéhuahuë'. Co napión ancantérinso nicarihuarahuë', co tahuëretéréhuahuë'. Napoaton iporaso' canpoanta', po'sarëhu huachi, nitopi. **22** Napohuachinara, Nopinori itapon:

—Co'ta carima': ¡Ama napotocosohuë! itopiranquëmahü', co natëramacohuë'. Napoaton iporaso' canpoanta', tēpatona'pi i'huëretérótopiso pochin nitarinënpoa', itérin. **23** Inapitaso', Cosiri ya'ipi nataninso' co nitotopihuë'. Iquipito nanan quéráchin nontérin ni'ton, napopi. Nontohuachina, a'nari inahua nonpiquë ohuërérin ni'ton, co nitotopihuë'.

24 Iinpita ninapotapiso natanahuaton, Cosiso amashamiachin pa'sahuaton, na'nërin. Na'nëi' cacotohuachina, huëntarin. Huë'sahuaton iinpita ni'tonënquë piyapinënpita camairin Simion macatona tonpocaiso'. **25** Ina quëran camaitaantarin: "Costaronënaquë trico po'motoco'. Coriqui pahuëretérótopisonta', inaquë chachin po'moantaco'. Naporahuatón, cosharo caracaiso marënta quëtoco'", itérin. Camairinso chachin piyapinënpita nipi.

26 Inapotohuachinara, moranënaquë triconëna a'mitahuatona', ya'huëpi'pa' panantapi huachi. **27** Huë'ecaiso nininquë canconpachinara, a'nsa', moranën a'cacaso marë' costaronën i'shiritérin. Inapotopirinhü', trico marë' coriqui pahuëretérinso' quënanin. Ina quënanaton, pa'yanin. **28** Pa'yanaton, iinpita itapon:

—Ni'cochi. ¡Trico marë' pahuëretérahuëso', ayantaantarinaco! ¡Costaronëhuëquë chachin quënanahuë! itérin. Iinpitaso natanahuatona', pa'pi pa'yanpi. Pa'yanahuatona', inahua capini ninontapi: ¡Yosë ana'intarinpoa ni'ton, co pahuëretéraponahuë' trico quësarín! Nitopi.

29 Ya'huëpiquë cancontahuachinara, ya'ipi napopiso pa'pina sha'huitopi:

30 —Iquipito no'pa' hua'anquë camahuatoira, co yashinyánterahuë' nontérincoi. "Canpitaso', nëhuëtona'piro'sanquëma ipora," itérincoi. **31-32** Napotopirincoihuë': "Co quiyasso' inacoihuë'. Co onporonta nëhuëtochinaihuë'. Ina tataquëranchin shonca catocoi ninai. Hua'hua nininso', Canaan parti tatarë' quëparitérin. A'nsa' niperinhuë', ayarin," itérain. **33-34** Napotohuatoira, itaantaraincoi: "A'naquëma isëquë quëparichin. A'napitanquëmaso niperinhuë', quëmopinëma capacaiso mare' trico quëpatoma', panantaco'. Napoaponahuë', iyaparima hua'hua nininso quëshimaco. Naporo huarë' co nëhuëtonapiro'sanquëmahü' ninamaso' nitotarahuë. Ina nitotohuato, iyaparima quëparitérinso' ocoitaranquëma'. Nisahuaton, noya huachi nanitarama iso no'paquë pa'anamaso'," itérincoi, itopi.

35 Nani pa'pina sha'huitahuatona', trico ohuatopi. Ohuatochuachinara, Cosi iinpitaso', a'naya a'naya costaronënaquë, coriquinëna quënaantapi. Tanpanantëa'huayaquë ya'huëarin quënaantapi. Ina quënanatona', pa'pi pa'yanpi. Pa'pinanta pa'yanin. **36** Naporo' Cacopori itapon:

—Canpitaso hui'nuhüepita tiquitaramaco. Cosi ayarin. Simionta capa. ¡Iporaso Mincanta yaquüpataantaramaco! ¡Ya'ipi inapita casa', ahuanta'huaso ya'huërin! itérin

³⁷ Naporor' Nopinori, pa'pin itapon:

—Iya'hua a'pahuatan, cari tata a'paiarahuë. Co'so' quëshintahuatënquënhuë', cato hui'nuhüepita nininso', nanitëran tëpamaso', itérin. ³⁸ Cacoposo nimirinhuë', tapon:

—Hui'nuhüeso', co onporo pa'sarinhuë'. Iin mashonën nani chiminin. Inaíchin ina yo'nanquëranchin nipo' ya'huëarin. Pa'namaquë ina ya'huëre' ma'sha onpoantahuachin, caso mashoco, sëto tëpaponco huachi, ténin.

43

Mincamin Iquipitoquë quëpapiso'

1-2 Canaan parti co manta capacaso ya'huërinhuë' ni'ton, aquë aquëtë tanarotapi. Napoaton i'hua Iquipitoquë trico pa'anpiso' pë'yapi. Pë'yahuachinara, Cacoposo' naquëranchin hui'ninpita camariantarin:

—Pa'mantatoma trico pa'amantaco', itérin. ³⁻⁵ Napopirinhuë' Cotari itapon:

—Co'ta tata hua'an napotérincoiso', nani sha'huitërainquën: “Co'so' iyaparima hua'hua nininso quëmahuatamahuë', ama o'macosohuë'. Ina quëmama huarë' tahuërtaranquëma'”, itérincoi. Iya'hua a'paantohuatancoi, naporor' huarë' trico pa'antomarainquën. Co'so' a'paantohuatancoihuë', co pa'maaraihuë', itérin.

⁶ —¡Canpitaso pa'pi co noyahue' acoramaco! ¿Ma'marë chachinta ina quëmapi sha'huitërama a'na iya'hua ya'huëtérinquëmaso'? itérin pa'pini.

⁷ —Na'con natanincoi onpo ya'huëtéréhuasona nininso': “¿Nanpiárin tataparima'?” itahuatoncoi: “¿A'na iyaparimanta ya'huërin?” itomantaraincoi. Napo natanpachincoira, topinan a'panitërai. ¡Co quiyaso' nitotëraihuë': “Iyaparima hua'hua nininso quëshimaco!” itiincoiso'! itopi.

⁸ Naporor' Cotari pa'pin itaantarin:

—Téhuëñchachin tata nanopicaso' nohuantohuatëhua', iya'hua a'paquë pa'i. Cari a'paiarahuë. A'paantohuatancoi a'naroáchin pa'sarai. Inapohuatëhua', co chiminarihuahuë'. Hui'napoapitanta', noya nanopiapi. ⁹ Iya'hua pa'pachin, cari ni'sarahuë. Ma'sha onpoahuachinso', ca ana'intoco huachi. Co'so' quëshintahuatënquënhuë', chimi-naquë huarë' na'inarahuë. ¹⁰ I'hua chachin napotasënquën a'pantërancoi naporini, inani catoro pa'sahuatoi, huënanta'itoihuë'! itérin.

¹¹ Napotohuachina, pa'pini itapon:

—Co onpotacasohuë' ni'quëhuarë', isopoco nipachin: Hua'an nicanacamaso marë' iso no'paquë ma'sha noya noyatérinsopita costaronëmaquë quëpacó: Parsamo nimirio, ninoi', pimo hua'sai', pimo yaqui', tanpapi nitérinso', ni'to nitérinso', inapita pi'pian pi'pian po'motahuatoma', quëpacó. ¹² Coriquinta', catoro' pa'anacaso nanirinso', quëpacó. I'hua ayantérinquëmaso', inaora chachin quëtaantaco'. Tapona téhuëatona', ayantérinënquëma'. ¹³ ¡Paco nipachin! Iya'hua quëparahuatoma', hua'an nimaantarico'. ¹⁴ Yosë ya'ipi nanitaparinso' nontarahuë catahuainquëma'. Ina nohuanton hua'an nosoro'inquëma'. Simionta nosoroaton ocoi'in. Naporahuaton, Mincanta a'painta'in. ¡Canta co hui'nuhuan mashoco pochin quëparita'huaso Yosë nohuantohuachin, inapo'i nipachin! itérin.

¹⁵⁻¹⁶ Cacopo hui'ninpitaso', hua'an nicanacaiso nininsopita mapi. Ina masahuatona', coriquinta catoro pa'anacaso' nanirinso' mapi. Naporahuaton, Mincamin quëparahuatona', Iquipitoquë pa'pi huachi. Cosi ya'huërinquë camahuachinara, nontopi. Cosiso', Mincamin quëpiso quënanahuaton, piyapinën camairin:

—Isopita pëinëhuëquë quëpaquë'. Naporahuaton a'nara ohuaca' tëparahuaton, anpiquë'. Ipora camotëchin nisahuaso', inapitaro'co coshatarahuë, itérin.

¹⁷ Napotohuachina, piyapinënso' ina inachachin ninin. Cosi iinpita ina pëinëñquë

quëparin. ¹⁸ Napoaponahuë', inapitaso quëpasoi pa'yanpi. Pa'yanatona inahua capini ninontapi:

—Nonpintahuatënënpoa', pëinënqué quësarinfoa'. I'hua coriqui ayantërinpoaso marë' quësarinfoa'. Masahuatënënpoa piyapinënpita pochin asacatarinënpoa'. Moranënpoapitarë chachin asacatarinënpoa', nitopi.

¹⁹⁻²¹ Napoaton Cosi pëinënqué yaya'compachinara, piyapinën itapona':

—Pi'pian sinioro nonchinquën topiraihuë'. I'hua chachionta o'mapoi, tëhuëñchachin trico pa'anapoi o'marai. Pa'anahuatoi panantápiraihuë', huancopi huë'ëconaiquë, costaronëhuë'i shiritérerai. I'shiritopiraihuë', coriqui pahuërëtéraiso' ya'ipi chachin costaronëhuëiquë quënanai. Napoaton quëtaanta'huanquëmaso marë' quëmantarai. ²² Incariso acomara, co quiyaso nitotéreraihuë'. A'na coriquinta ipora trico pa'antohuatëinquëma', pahuërëta'huaiso marë' quëmarai, itopi. ²³ Napopirinahuë Cosi piyapinëniso':

—Sano cancantoco'. Ama pa'yancosohuë'. Naporor' pahuërëtéramaso', nani manahuë. Yosë chinotëramaso nimara costaronëmaquë acotérinquëma'. Inachachin tataparimanta chinotérin, itérin.

Napotahuaton, Simion tashinan pëi quëran ocoirahuaton quëshirin. ²⁴ Ina quëran, ya'ipi chachin Cosi pëinënqué po'morin. Inaquë i'sha nipa'morantëcaiso marë' quëtérin. Moranënapitanta', a'carin. ²⁵ Camotëchin Cosirë' coshatacaiso', nani nitotopi. Napoaton ninapona pochin, nicanacaiso marë' quëshipiso', taparapi huachi.

²⁶ Cosi canquihuachina, nicanacaiso marë' quëshipiso' quëtopi. Naporahuatona', isonpi quëran no'paquë huarë' monshorahuatona', moshapi. ²⁷ Cosiri iinpita nontahuaton itapon:

—I'hua o'mapoma': ¿Tatahuëi ya'huëarin itéraramaco pora? ¿Noya ya'huëarin? ¿Nanpiarin ipora huanta ti? itérin. ²⁸ Inapitaso' móñsho tahuatona':

—Tatahuëiso', quëma piyapinën pochin ninin. Noya ya'huëarin. Ipora huanta nanopiárin, itopi. ²⁹⁻³⁰ Cosiso yonquitopirinhue', Mincamin quënanin. Inaso iya'huain. Ina yo'nanquëbranchin nipiso'. Ina tasatahuaton, natanin:

—¿Isona: “Iya'hu a'na huëshirai” ténamaso ti? itahuaton, iin itapon: “¡Yosë chachin hua'hu a'catahuainquën!” itérin. Napotaso chachin iin ni'sahuaton, na'nëchináchin cancantérin. Napoaton a'naroáchin patoananënpue ya'conahuaton, na'nérin.

³¹ Na'nérinso' pa'cotohuachina, nipa'morayaton, pipiantarin. Pipirahuaton piyapinënpita camairin: “¡O'huinco huachi!” itérin. ³² Cosiso', a'na misaqué nisha o'huintopi. Cacopo hui'ninpitanta a'na misaqué nisha o'huintopi. Iquipitoro'santa Cosirë' coshatopiso', a'na misaqué nisha o'huintopi anta'. Iquipitoro'saso', iprioro'sare' coshatacaiso', na'in pochin ni'pi. Napoaton nisha coshatopi. ³³ Cosi iinpitaso', misaqué yahuënséhuachinara, Cosiri a'naya a'naya sha'huitérin huënsécaiso marë'. Paninan'ton, ahuënsérahuaton, ina quëran niantarinso' ahuënsérin. Inapotaton, huinshoin nininquë huarë' ahuënsérin. Napoaton: “Pi'ipinënpoa no'téquen tantiarinfoa'”, topi. Napoatona itohuara capini nini'pi. Nini'sahuatona', pa'yanpi. ³⁴ Cosiso inaora ca'ninsa chachin, iinpitanta a'carin. Mincaminso niperinhue' o'huintohuachinara, a'napita iinpita quëran na'con na'con acotopi. Nani coshatohuachinara, napopináchin o'opi. Inapoatona capa cancantopi.

44

Cosi, iinpita ténirinso'

¹ Nani ca'pachinara, o'opachinara, Cosiso piyapinën camairin:

—Isopita quëmapi'sa costaronënaquë, trico amëntatëquë'. Naporahuaton coriquinëna pahuërëtòpisonta', a'naya a'naya costaronënpue chachin acotaantaquë'. ² Minënëhuë prata quëran nininsonta', hua'hu a'na costaronënpue acotëquë'. Coriquinën, trico

marë' pahuérétérinso' pirayan acotëquë', itérin. Napotohuachina, piyapinënso' ina inachachin ninin.

³ Tahuéririnquë pi'i pipirirahuaso Cosiso', iinpita nontahuaton a'parin. Napohuachina moranënapitarë chachin pa'pi huachi. ⁴⁻⁵ Ninano quëran pipitona iinpitaso co aquëyáterasoihuë', Cosiso piyapinën itapon:

—Apira quëmapi'sa pa'piso', imaqué'. Cantonahuaton napotëquë': “¿Onpoatonta canpitaso nosoropirinënquémahue', co noyahue' ninama'? Prata quëran minë nininso', hua'anéhuë o'oton ninorinso chachin ihuatërama'. ¡Pa'pi co noyahuechi ninama paya!” itëquë', itérin.

⁶ Cantonahuaton piyapinënso' Cosiri sha'huitérinso chachin itérin. ⁷ Napotohuachina, inapitariso itaatapi:

—¿Ihuatërama', itérancoi ti? ¡Co'chi quiyaso onporo téranta', inapo'itoihuë! ⁸ ¿Co'ta Canan parti quëran huarë' coriqui costaronéhuëquë quënanpatoira, quëshiantaranquen pora? ¿Onporahuatoita iporaso', pratahuë nípon, orohue' nípon, hua'anën pëinën quëran ihuachitoihuë'? ⁹ Quiyaso' piyapinënpita pochincoi ninai. Incoi téranta minë quënapahuatancoi, chimiin. Quiyanta', piyapinënpita pochin asacatocoi ténai, itopi.

¹⁰ Napotohuachina, Cosi piyapinënso' taantarín:

—Noyapa'. Naporama ni'quëhuarë', inapochinquëma nipachin. Nipirinhue', insosona minë quënaparahuësoíchin, piyapinéhuë nísein. A'napitanquëmaso', co manta onpoaramahuë', itérin. ¹¹ Napotohuachina, a'naya a'naya costaronëna chinohuaratona', i'shiritapi huachi. ¹² I'shiritohuachina yonisarin. Paninan nininso costaronën quëran caniaritahuaton, hua'hua nininso costaronënuë huarë', yonirin. Yonípachina, Mincamin costaronënuë quënanin huachi. ¹³ Ina nicatona iinpitaso', pa'pi sétahuatona a'moanpiso oshapi. Napohuachina, a'naya a'naya pë'pétonëna moranënaquë a'mitahuatona', naquëranchin ninanoquë ayaimantapi:

¹⁴ Cotaso', iinpitarë chachin Cosi pëinënqué canconpachina, inaso ya'huëarin quënamantapi. Quënanahuatona', isonpi quëran no'paquë huarë' monshorahuatona', moshaipi. ¹⁵ Moshasoi', Cosiso iinpita itapon:

—¡Co'chi canpitaso yonquinahuano'sa pochinhue' ninama paya! ¡Caso chiníquen nanantërahuë ni'ton, nito ninorahuë! itérin. ¹⁶ Napotohuachina, Cotari itapon:

—¡Téhuëñchachin co onpo a'pania'huainso nanitëraihuë! ¡Co naporaihuë', co ta'cahuaiso ya'huërinhuë! Oshahuanaiso', nani Yosë nitotërin. Ma'tana ya'huarai. Minënën maninsorë chachin asacatocoi, itopi. ¹⁷ Napotopirinahuë', Cosiriso itapon:

—Co napoarinhue'. Insosona minënëhuë quënapapisoíchin piyapinéhuë nísein. A'napitanquëmaso', tatama ya'huërinquë noya panantaco'. Co insonta ma'sha onpotarinquëmahuë', itérin.

Cota, Mincamin ya'huërenamën yaquëparitërinso'

¹⁸ Cosi napohuachina, Cotari amasha ya'carirahuaton, itapon:

—Pi'piyan sinioro nonchinquen topirahuë. Yonquirahuëso no'tëquen sha'huichinquen. Quëmaso' huaraon pochachin chiníquen nanantëran. Napoaton ama no'huitonco ana'intaancoso marëhuë' napotaranquen. ¹⁹ I'hua huë'naiquë, quëmaso natanancoi tatahuëi ya'huëtincoiso'. A'na iyahuëinta ya'huëtincoiso', natanancoi. ²⁰ Quiyarinta naporo sha'huitérinquen: “Tatahuëi ya'huëtincoi, nani máshoya,” itérainquen. A'na iya'huanta hui'napi ya'huëtincoiso', sha'huitérainquen. Inaso', tatahuëi nani máshoya niso' hua'huatërin. Naporo chachin sha'huitérinquen tatahuëri na'con nosororinso'. Ina yo'nanquëranchin hua'huatopisopita cato ya'huëpirinahuë', a'naso ayarin ni'ton, inaíchin quëparitërin. Napoaton nosoromiatiërin. ²¹ Naporo' sha'huitérancoi nohuitamaso marë' quëca'huaiso'. ²² Napotohuatancoira, sha'huitérainquen: “Iya'huaso', co nanitërinhuë' pa'pin huëshicaso'. Huëshirin naporini,

pa'pinsos' sëtori tëpa'itonhuë', itérainquën. ²³ Napotopiranquënhuë': "Co'so' iya'hua quëpatamahuë', co onporonta tahuérëtaranquëmhahuë', itérancio.

²⁴ Tatahuëitaquë canconpatoira, ya'ipi quëma napotérancoiso' sha'huitërai.

²⁵⁻²⁶ Hua'quimiachin quëran, tataso' camairincoi: "Pa'sahuatoma' trico pa'amantaco', itopirincoihuë', quiyariso': "Co nanitërhaihuë'. Iya'hua a'paantohuatancoi, naporor huarë' pa'sarai. Co'so' ina quëpahuatoihuë', co hua'an tahuérëtarincoihuë', itërai. ²⁷ Napotohuatoira, tatahuëi sha'huitërincoi: "Canpita nitotërama sa'ahuëco' catoíchin hua'huaninso'. ²⁸ A'naso', ayarin. Napoaton naporor quëran huarë' co quënanchinahuë'. Pa'piniri ca'mara ténahuë. ²⁹ Iin ya'huëre' quëparamaquëya ma'sha onpohuachin, campita tëhuëarama'. Canpita tëhuëñëmaquë caso mashoco sëto tëpaponco huachi," itérincoi.

³⁰⁻³¹ Tatahuëso', iya'huarë' a'naíchin pochin nipi. Co'so' quiyarë' pantahuachinhuë', tatahuëso chiminapon. Quiya tëhuëñëhuëiquë tata mashoyaso' sëtori tëpapon. ³² Co'huara huë'shamátërapoihuë' sha'huitërahuë: "Iya'hua a'paantohuatancoi, cari ni'sarahuë. Ma'sha onpohuachinso', ca ana'intoco huachi," itërahuë. Naporahuaton napotomantarahuë: "Co'so' quëshintahuatënquënhuë', chiminaquë huarë' na'inarahuë," itërahuë. ³³ Napoaton nontaranquën natanco topirahuë. Ca iya'hua ya'huërenamëñ quëma piyapinëñ quëparichi ténahuë. Inaso iinpitarë', pananta'in. ³⁴ Co'so' iya'hua pantahuachinso', co caso nanitërahuë tatahuëtaquë, pananta'huaso'. Tatahuë ma'sha onporinso', co yani'nahuë', itërin.

45

Inpitari Cosi nohuitopiso'

¹ Ya'ipi piyapinënpita ni'tonënquë Cotari nontërinso tonitohuachina, Cosiso co huachi ahuantërinhuë'. Co huachi ahuantatonhuë', Iquipito nananquë chiníquëñ nonin: "¡Ya'ipinquëma pipico!" itërin. Napotohuachina, ya'ipi piyapinënpita pipipi. Iinpitaréáchin nicaso', nohuitacaiso marë' sha'huirin. ² Sha'huiton Cosiso', na'nëmiatarin huachi. Chiníquëñ na'nërin ni'ton, ya'ipi iquipitoro'sa nitotopi. Huaraon pëinënquë huarë' a'naquënsa pa'sahuatona', sha'huitonpi. ³ Naporor huarë' Cosiso', inahuara nanamënaquë iinpita nontërin:

—¡Ca mini Cosico! ¿Nanpiárin iporahuanta tata? itërin. Napotopirinhuë', iinpitariso pa'pi të'huatatona', co nanitopihuë' nonacaiso'. ⁴ Të'huatopirinahuë', Cosiriso itapon:

—Ama iyaro'sa të'huatocosohuë', ya'caritoco', itërin. Naporor huarë' iinpitarí ya'caririn. Ya'carihuachinara, itaantarín:

—Ca mini iyaparimaco. ¿Co'ta iráca nicatono'sa Iquipitoquë huëcasoi pa'anamaco?

⁵ Napotéramacoso marë' ama campitaora nino'huicosohuë'. Co campitaso yonquipiramahuë', Yosë chachin aquëchitiirinco. Notohuaro' piyapi'sa ananpicaso marë' aquëchitërinco. ⁶ Ipora huarë' iso no'paquë, cato pi'ipi nisarin tanarotopiso'. A'natérápo pi'i chachin, pahuanarin. Ina nápo pi'i sha'topirinahuënta', co manta nitërinso' macaponahuë'. ⁷ Napotéranganquëmaso chachin nisarin. Yosëso niperinhuë', aquëchitiirinco. Canpitanta shiparima ya'huëtiinquëmaso marë' naporin. Canpita chachinta', huëhuëpiro ninin quëran nicha'ëinquëmaso marë' aquëchitiirinco. ⁸ Inapocaso ni'ton, co campita nohuanton isoporinquë huë'nahuë'. Yosë chachin a'parinco ni'ton, huë'nahuë. Ina nohuanton, huaraon ayonquina'pi nica'huaso marë' ya'conahuë. Ya'ipi ma'shanënpita a'paiato, piyapinënpitanta', camaica'huaso marë' ya'conahuë. Naporahuaton, ya'ipi Iquipitoquë huaraon ya'huërenamëñ hua'anënta'huaso marë' acorinco.

⁹ Manóton paantatoma', tata sha'huitonco': "Cosi ya'huëarin, iso pochin nanan a'patiarinquëñ: 'Ya'ipi Iquipito no'paquë hua'anënta'huaso marë' Yosë acorinco. Manóton o'maton, ni'quimaco. ¹⁰ Ya'ipi hui'nampita, shia'huaro'sa', inapitarë chachin, o'maco'. Pë'tahuanëmapita, ma'shanëmapita, ya'ipi ya'huëtérinquëmaso', quiquiimaco'.

O'mahuatama', Cosin parti acoaranquëma'. Inapohuatama', co aquëya quëranhuë' nini'sáparihua'. ¹¹ Naro'pa huachi carima cosharo quëtaponquëma'. Ya'ipi huë'namaso nápo chachin co manta ichipahuantaranquëmahue'. A'natérápo pi'ipi pahuanarin tanaro tahuëri'sa na'huëcaso ni'ton, napotápënquëma', itoco'. ¹² Iya'huanta', canpitanta', ya'ipi naporahuëso', nani natanamaco. ¹³ Chiníquën nanantato Iquipitoquë hua'anënterahuësonta', nani ni'nama'. Ya'ipi ni'namaso' tata sha'huitonco'. ¡Manóton paantatoma tata macontaco!" itérin.

¹⁴ Napotahuaton, iya'huain iporin. Ina iporin quëran na'nérin. Mincaminta', Cosi iporin quëran na'nérin. ¹⁵ Ina quëran Cosiso', ya'ipi iiinpita noya nontaton së'quérin. Inapitanta iporahuaton na'nérin. Ina piquëran inapitarinta co huachi tê'huatatonahuë', noya nontopi huachi.

¹⁶ Huaraon pëinënquënta', a'naroáchin nanan nincanin: "Cosi iiinpita canquipi," itopi. Ina natanahuaton, huaraonso catahuarinsopita hua'ano'sarë chachin noya cancantopi.

¹⁷ Noya cancantaton huaraoniso', Cosi itapon:

—Iyaro'sa sha'huitéquë', pë'tahuanënaquë trico a'mitahuatona', Canaan parti pananta'ina'. ¹⁸ Paantatona', pa'pina quëma'ina'. Ya'ipi quëmopinënpitarë chachin, o'ma'ina'. O'mahuachina', Iquipitoquë noya noya no'pa' nininso', cari quëtarahuë. Napoaton inapitaso', iso no'paquë ma'sha noya noyatérinsopita, capona'. ¹⁹ Sa'ina', hui'nina', pa'pina', inapita quëmacaiso marë', camaiquë toronano'sa isëran quëpa'ina'. Sha'huitéquë a'naroáchin huë'ina'. ²⁰ Naporahuaton, ama aquëtë ma'shanënapita yonqui'inasohuë'. Iquipitoquë ma'sha noya noya nininsopita, inapitari hua'anëntapona', itëquë', itérin. ²¹ Napotohuachina, Cacopo hui'ninpitaso' ina inachachin nipi. Huaraon camaitérinso chachin, Cosiri toronano'sa quëtérin. Naporahuaton cosharo iraquë caracaisonta', quëtérin. ²² O'nanpiracaisonta', ya'ipi iiinpita ananitëra'piarin. Mincaminso niperinhuë', cara pasa coriqui prata quëran nininso' quëtahuaton, a'natérápo a'mocaso quëtérin. ²³ Pa'pionta', shonca moraquë, noya noya ma'sha Iquipitoquë ya'huérinso', a'patontarin. Naporahuaton shonca moraquë chachin, trico, pan, cosharo', inapita a'patontarin. O'mahuachina carimacaiso mare' a'patontarin. ²⁴ Pacacaiso marë' nontohuachinara, Cosiso iiinpita itapon:

—Osharan paco'. Amana iraquë nino'huíracosohuë', itérin. Napotohuachina pa'pi huachi.

²⁵ Inapitaso', Iquipito quëran pipirahuatona', Canaan parti canconpi. Pa'pina ya'huérinquë chachin canconpi huachi. ²⁶ Pa'pina nontatona sha'huitopi: "¡Cosi nanpiárin tata! ¡Inari ya'ipi Iquipito no'pa' hua'anëntérin!" itopi. Ina natanahuaton, Cacoposo pa'yanënquë tachianantérin. Sha'huitopirinahuë', co natëtérinhuë'. ²⁷ Napoaponahuë', Cosiri nanan a'patérinso natanin. Ina natanahuaton, toronano'sa quëpamacaiso marë' a'patontarisonta', ni'nin. Naporo huarë' capa cancantomiatérin huachi. ²⁸ Capa cancantaton tapon: "¡Tëhuëñchachin Cosi nanpiárin! Co'huara chimiterasocohuë' pa'mato nimai," ténin.

46

Iquipitoquë pa'mapiso'

¹ Cacoposo' ya'ipi huëntonënë chachin pa'sarin. Ya'ipi ma'shanënpitarë' pa'sarin. Piirsipaqué canconpachinara, ma'sha téparin. Téparahuaton, pa'pinco' Yosë chinotérinso chachin chinotérin. ² Naporo tashi Yosëri hua'narëso pochin ya'notérin. Ya'notahuaton, nininën quëran përarin: "Cacopo" itérin. Napotohuachina, inariso itapon:

—Ma'ta Sinioro ya'huarahuë, itérin.

³ —Caso Yosëco. Tataparionta chinotérinco. Iquipitoquë pa'macaso marë' ama tê'huauquësohuë'. Inaquë shiparinpita na'atona', panca nacion ocoiapona'. ⁴ Canta

quëmaro'co Iquipitoquë, pa'marahuë. Naporahuaton ca chachin, ina no'pa quëran shiparinpita ocoiarahuë. Inaquë chiminpatan, Cosi nocoarinquën, itérin.

⁵ Ina quëran Cacoposo', Piirsipa quëran paantarin. Hui'ninpitari toronanquë a'mitopi. Huaraoni quëpamacaiso marë' toronano'sa a'patontarinquë, inapotopi. Sa'ina', hui'nina', inapitanta a'mitopi. ⁶⁻⁷ Cacoposo', hui'ninpitarë chachin pa'sarin. Hui'ninpitanta sa'ina hui'ninpitarë chachin pa'sapi. Ya'ipi inapitarë chachin pa'sápatona', Iquipito no'paquë huarë' camapi. Ya'ipi ma'shanënapitanta Canaan parti ya'huëtopiso', quiquipi. Pë'tahuanënapitanta', Ohuicaro'sa', ohuacaro'sa', chiporo'sa', inapitanta quiquipi.

⁸ Isopita, Cacopo quëran pipipisopita Iquipitoquë pa'mapi. Inapita chachin israiro'sa itopi anta': Paninantérinso', Nopino. ⁹ Ina hui'ninpitaso': Anoco, Huaron, Isron, Caromi, inapita. ¹⁰ Simion hui'ninpitanta', Quimoino, Camin, Ohuato, Caquin, Sohuaro, Saono, inapita. Saonoso', Canaan sanapiquë hui'nahuaninso'. ¹¹ Nihui hui'ninpitanta', Coirison, Quiato, Mirari, inapita. ¹² Cota hui'ninpitanta', Iri, Onan, Sira, Parisi, Saro, inapita. Iri, Onan, inapitaso', Canaan parti chachin chiminpiso', nani nitotéröhua'. Parisi hui'ninpitanta', Isron, Amoro, inapita. ¹³ Isacaro hui'ninpitanta', Toran, Popan, Copo, Simiron, inapita. ¹⁴ Saporono hui'ninpitanta', Siriti, Iron, Cariri, inapita. ¹⁵ Ina nápo Cacopo hui'ninpita quëmapi'sa Niaquëya ya'huëpi. Sanapinta a'nara ya'huëtérin: Tina itérinso'. Inapitaso', Patan-aranquë ya'huapon hui'nahuaninsopita. Nia quëran pipipisopitaso', cara shonca cara ya'pi', sanapirë chachin icanpi.

¹⁶ Caro hui'ninpitanta', Sipion, Aqui, Ispon, Soni, Iri, Aroti, Ariri, inapita. ¹⁷ Asiri hui'ninpitanta', Imina, Isopa, Isopi, Piria, inapita. Oshinanta ya'huërin: Sira itopi. Piria hui'ninpitanta', Ipiri, Mariquiri, inapita. ¹⁸ Caro, Asiri, inapitanta Cacopo hui'ninpita Siripaquéya nipiso'. Ina quëran nipisopitaso', ya'ipiya quëran shonca saota ya'pi', icanpi. Siripaso' Napanori Nia catahuacaso marë' nicanarinso', nani nitotéröhua'.

¹⁹ Naquiranta Cacopo sa'in chachin ninin. Ina hua'huinpitanta', Cosi, Mincamin, inapita. ²⁰ Cosiso', Asinaquë hui'nahuaninsopita: Manasisi, Iprain, inapita. Inapitaso', Iquipitoquë nasitopi. Asinanta', ayonquianta'inquëma'. Inaso', Potihuira hui'nin. Potihuiranta', On ninanoquë corto hua'an ya'conin. ²¹ Mincamin hui'ninpitanta', Pira, Piquiri, Asipiri, Quëra, Namano, Iqui, Nosi, Mopimo, Opimo, Arato, inapita. ²² Ina nápo Naquira quëran nipisopita ya'huëpi. Shonca catapini ya'pi ya'ipiya quëran icanpi.

²³ Tanoso', a'naíchin hui'nahuanin: Osimo itérin. ²⁴ Nipitari hui'ninpitanta': Casiiri, Coni, Quisiri, Sirimo, inapita. ²⁵ Tano, Nipitari inapitanta Cacopo hui'ninpita nipi. Inapitaso', Piraquéya nipiso'. Ina quëran nipisopitaso', ya'ipiya quëran canchisë ya'pi', icanpi. Piranta', Napanori Naquira catahuacaso marë' nicanarinso', nani nitotéröhua'. ²⁶⁻²⁷ Iquipitoquë pa'mapisopita, saota shonca saota ya'pi icanpi. Ya'ipi inapitaso', Cacopo quëran pipipisopita. Hui'ninpita sa'inaso' co pichipihuë'. Cosi hui'ninpitaso' cato. Inapitaso' inaquë chachin nasitopi. Cacopo, Cosi, inapitarë' canchisë shonca ya'pi ya'ipiya quëran icanpi.

²⁸ Co'huara Cosin parti camayáterasoihuë', Cacoposo' Cota camairin: "Cosí sha'huitéquë huë'in, Cosin parti nacapi'inco," itérin. Inaquë Cota paaso', Cacoposo ya'ipi huëntonénë chachin Cosinquë camapi huachi. ²⁹ Iin cantomarahuaton Cotaso', pa'pini nanan a'patérinso sha'huitérin. Sha'huitohuachina Cosiso', a'naroáchin piyapinënpita camairin toronanén tapacaiso marë'. Inaquë huënserahuaon, Cotare chachin pa'nin. Pa'sahuaton pa'pin quënanconpachina, iporin. Iporinquëranchin hua'qui na'nérarin. ³⁰ Naporó' Cacopori, itapon:

—Ayapiranhuë', quënaantaranquën ni'ton: ¡Iporaso' chiminpatonta noyatapon huachi ténahuë! ténin.

³¹ Pa'pin nani nontahuaton Cosiso', ya'ipi iinpita, quëmopinënpita inapita itapon:

—Huaraon nicapo pa'sarahuë. Pa'sahuato itapo: Ya'ipi quëmopinëhuëpita Canaan parti ya'huëpirinahuë', yacapainacoso marë' o'mapi. ³² Ohuacanënapita,

ohuicanënapita, ya'ipi ma'shanënapita quiquiimap. Inapitaso pë'tahuatona'piro'sa', itarahuë. ³³⁻³⁴ Napotohuato, huaraoñ përasarinquëma'. Pératënquëma' maquësona sacatéremaso' natanpachinquëma': "Quiyaso', shimashonëhuëipita pochachin, ohuica pë'tahuana'piro'sacoi," itoco'. Napohuatama', Cosin partiquë ya'huapoma'. Iquipitoro'saso', ohuica pë'tahuana'piro'sarë', napopináchin ya'huëcaiso', na'in. Napohuatama', canpitárañin inaquë ya'huapoma', itérin.

47

¹ Cosiso', pa'pin, iinpita, inapita nontahuaton huaraoñ sha'huitapon pa'nin: "Tatahuë, iyahuëpita, inapita Canaan parti quëran o'mapi. Ya'ipi ohuicanënapita, ohuacanënapita, ma'shanënapita, inapitarë chachin o'mapi. Nani Cosin parti niquipi," itérin. ² Ina piquëran a'natérápo iinpita huayonin. Huayonahuaton, huaraoñi nohuitacaso marë' quëparin. ³ Naporo' inari natanin:

—¿Maquëta canpitaso sacatérama? itérin.

—Quiyaso' quëma piyapinënpita pochincói ninai. Shimashonëhuëipita pochachin ohuica pë'tahuatona'piro'sacoi. ⁴ Canaan parti ya'huëpiraihuë', na'con tanarotërai. Pastonta', ohuicaro'sa capacaiso', yanirin. Napoaton no'panënquë o'marai ya'huapoi. Yosë marë' nohuantëquë', Cosin parti ya'huë'i topiraihuë', itopi. ⁵ Napotohuachinara, huaraoñiso' Cosi itapon:

—Yacapainënquëns marë' tataparin, iyaparinpita, inapita o'mapi. Nani o'mapi ni'quëhuarë', ⁶ ya'ipi Iquipito no'pa' hua'anënterahuequë, noya inapita ya'huëcaiso'. Cosin parti noya noya no'pa' ninin. Inaquë ya'huëcaiso marë' quëtëquë'. A'naquëñ quëmopinënpita pë'tahuatasco' noyá nitotohuachina', caquëñ pë'tahuanëhuëpita, a'paicaiso marë' acoquë', itérin.

⁷ Ina piquëran Cosiso', huaraoñ anohuitacaso marë' pa'pionta quëparin. Cantontahuaton Cacoposo', monsho ténin, nontacaso marë'. ⁸ Huaraoñi ni'sahuaton natanin:

—¿Onpo pi'ita ya'huëtérinquëñ? itérin.

⁹ —Nani pasa cara shonca pi'ipi ya'huëtérinco. Co ya'huëmia ya'huëatohuë', patë patérantarahue. Inapoato na'con parisitérahue. Shimashonëhuëpitaso', na'con na'con tahuëri ni'pi. Co caso inapita icantapohue' nimara ténahuë, itérin. ¹⁰ Cacoposo nani huaraoñ nontahuaton, Cosirë chachin pa'nin huachi.

¹¹ Ina quëran Cosiso', Iquipitoquë noya noya no'pa' nininso' quëmopinënpita quëtërin. Huaraoñ camairinso chachin ninin. Inapoatona Cacoposo' hui'ninpitarë chachin Namisi parti no'pahuanpi. Namisiso', Cosin itopi anta'. ¹² Naporahuaton Cosiso', ya'ipi quëmopinënpita cosharo quëtárin. Panca huënton nininso' na'con na'con, quëtërin. Caraya nininso', pi'piyan quëtërin. Inapotérin.

Iquipitoquë onpo sacatacaiso', Cosi camaitérinso'

¹³ Co insëquë téranta trico ya'huërinhuë'. Napoaton na'con na'con tanarotopi huachi. Canaan partiquënta', Iquipitoquënta', piyapiro'sa tanari tiquirarin. ¹⁴ Inaquëpita ya'huëpisopita, Cositaquë trico pa'anápirinahuë', nii'quianapi huachi. Ya'ipi coriqui trico marë' pahuërëtopiso', Cosiso yontonin. Yontonahuaton huaraoñ pëinënquë taparin.

¹⁵ Canano'sa', iquipitoro'sa', inapita coriquinëna i'quihuachinara, iquipitoro'saso', Cosi nontapona pa'pi:

—¡Yosë marë' cosharo quëtoco! Capa nii'quianarai huachi. Capa coriqui ni'ton, co huachi cosharo quëtohuatancoihuë', tana tëpaponcoi quiyaso'. Ina marë' quëmanta co huachi noya nisaranhuë', itopi.

¹⁶ —¡Naporinchi paya! Capa coriquinëma ni'quëhuarë', pë'tahuanëmapita nipachin quëco'. Ina quëpatama', trico quëtarainquëma', itérin Cosiri. ¹⁷ Napotohuachina iquipitoro'saso', pë'tahuanëna quëshipi: Cahuarionëna', ohuicanëna', ohuacanëna', moranëna', inapita quëshipi. Inapita marë' naporo pi'iquë trico canpiatérin.

¹⁸ Ina pi'i na'huëanatopi. A'na pi'i maantarinquë naquëranchin iquipitoro'saso', Cosi paapantapi nontaantacaiso marë':

—Nani quëma nitotëran capa coriqui ya'huëtérincoisohuë'. Ya'ipi pë'tahuanëhuëipitanta canpitanson narin. Co huachi ma'sha téranta ya'huëtérincoihuë' pahuérëta'huaiso'. No'panëhuëichin ya'huërin. Naporahuaton quiyanta ya'huëarai. ¹⁹ Quiyaora chachin nipachin, no'panëhuëirë'coi pa'ancoi. Ina ya'huërënamën trico quëtocoi. Inapohuatoi huaraoon piyapinënpitaco nisarai. Ina marë' no'panëhuëiquë chachin sacachi. Cosharo quëtohuatancoi, no'panëhuëiquë sacatarai ni'ton, co nitapiarinhuë'. ¡Taquihuatoiso', no'panëhuëinta' pantatarin. Inapohuatoi, quëmanta co manta canaponhuë'! itopi.

²⁰ Napotohuachinara, Cosiso ya'ipi iquipitoro'sa no'panëna huaraoon marë', pa'antéra'piarin. Co manta capacaisohuë ni'ton, no'panëna pa'ana'piapi. Inapopi ni'ton, ya'ipi Iquipito no'pa', huaraoon hua'anëntérin huachi. ²¹ Naporahuaton ya'ipi Iquipito no'paquë iquipitoro'sa ya'huërinso', Cosiri pa'anaton piyapitérin. ²² Corto hua'ano'sa no'panënáchin co Cosiri pa'antérinhue'. Inapitaso' huaraoon topinan trico quëtárin ni'ton, co no'panëna pa'anacaiso ya'huërinhuë'.

²³ Ina quëran Cosiri piyapi'sa itapon:

—Iporaso', huaraoon hua'anëntérinquëma huachi. No'panëmanta hua'anëntérin. Ma'tana ya'pirin ya'huëarin quëpatoma', sha'co'. ²⁴ Napoaponahuë', sha'namaso' nani-tohuachin, a'natérápo costaro quëran a'na costarora huaraoon quëtamaso ya'huërin. Catapini costaroso nimirinhuë', canpitaora marë' nisarin. Hui'namapita, yacaparin-quëmasopita, inapitanta capacaiso marë' nisarin. Naporahuaton ina quëran chachin shacacamaso ya'huërin, itérin. ²⁵ Napotohuachina, inapitaso taantapi:

—Noyapa'. Inapochin nisarai. Quëmaso noya piyapinquëni'ton, tana tëpaincoiso nimirinhuë', nicha'éranci. ¡Huaraoon nimirin piyapichinco! itopi. ²⁶ Inapoaton Cosi camaitérin ya'ipi Iquipito no'paquë piyapinënpita ma'sona nicacaiso'. Sha'topiso nani-tohuachina, a'natérápo costaro quëran, a'nara huaraoon quëtacaiso ya'huërin. Iso quirica ninshitasoco huarënta', ina camaitérinso', ipora huanta Iquipitoquëso ina chachin nis-api. Corto hua'ano'saso nimirinhuë', co huaraoon marë' quëtacaiso ya'huërinhuë'. Inapita no'panënaso', co huaraoon pa'antérinhue' ni'ton, co quëtopihuë'.

Cacopo nohuantérinso'

²⁷ Israiro'saso', Iquipito no'paquë ya'huëapi huachi. Cosin parti no'pa' mapi. Ina quë ya'huëapona pochin na'amiatopi. ²⁸ Cacoposo shonca canchisë pi'ipi, Iquipitoquë ya'huëantarín. Ya'ipi ya'huëapona pochin na'amiatopi. Ina quëran pasa catapini shonca canchisë pi'i icanin.

²⁹ A'na tahuëri Cacoposo', nani chiminacaso ya'caritérin ninatanin. Napoaton Cosi sha'huitacaso marë' a'nara a'parin. Huë'pachina, itapon:

—Téhuëñchachin nosorohuatanco, nohuantérahuës' niquë'. Ina yanipatanso', tonaroana së'huatoco. Së'huatatonco: "Yoscoarë' nohuantéranso' nisarahuë," itoco'. ¡Caso chiminpato, ama Yosë marë' isëquë pa'pitocosohuë'! ³⁰ Shimashonëhuëpita quënancona'huaso tahuëri nanitohuachinco, Iquipito no'pa quëran quëpacó. Quëparahuatonco, inapita po'mopiquë, canta po'moontaco, itérin.

—Noyapa'. Inapochinquën nimirin, itérin Cosiri.

³¹ —Yoscoarë' inapochinquën itoco, itaantarín pa'pini. Napotohuachina, Cosiso': "Yoscoarë' inapotaranquë," itérin. Ina natanaton, Cacoposo, pë'saranënquë huënsérin. Ina quë ya'huëapona po'mopiquë, canta po'moontaco, itérin.

48

Iprain, Manasisi inapita noya ya'huëcaiso marë' sha'huitérinso'

¹ Ina piquëran miachin Cacoposo' caniorin. Napotohuachina Cosi sha'huitopi. Ina natanahuaton, nicapon pa'nin. Hui'ninpitanta cato chachin quëparin. Manasisi, Iprain, inapita. ² Cosiri nicapon huë'ninso sha'huitohuachinara, chiníquën cancantaton

pë'saranënqué huënsérin. ³⁻⁴ Cosiso', hui'ninpitarë chachin ya'coontarahuaton pa'pin nontooin. Ina quëran Cacoposo' Cosi itapon:

—Yosë ya'ipi nanitaparinso', Noso ninanoquë ya'notérinco. Inaso ninano', Canaan parti ya'huérin. Ya'notahuatonco, iso pochin noya ya'huëca'huaso marë' sha'huitérinco: "Ni'qué". Ca nohuanto, notohuar'o hui'nanpita ya'huëtarinquën. Quëmá quëran pipipisopita, na'a naciono'sa ocoyapona'. Naporahuaton, inapita, iso no'pa' quëtarahuë. Inapitari hua'anëntomiatapona', itérinco. ⁵ Hui'nanpita Iprain, Manasisi, inapitaso co'huara yacapaponquën huë'shamátérerasocohuë' ya'huëtarinquën. Inapitaso' caquën nicapona'. Napoatona', Yosë no'pa' hua'anënta'huaso sha'huitérincoso', hua'anëntapona'. Nopino, Simion, inapita pochin ni'tona', hua'anëntapona'. ⁶ Inapita piquëran hui'nahuanpatan, quëmaoranquën nisapi huachi. Inapitaso' Iprain, Manasisi, inapita iya'huainpita nicapona'. Ina ni'tona iin mashonëna no'panëna quëran, inapitanta', no'pa' macapona'. ⁷ Co topinan napotaranquënhuë'. Mamaparin co aquëtë hua'huaninsø marëhuë', napotaranquën. Quëmanta nani nitotérän: Patan-aran quëran huënantasëhua', Canaan parti quëmaquën mama tëparëhua'. Iporata ninano ya'cariya nicasëhua', chiminin. Chiminpachina, inaquë chachin ira pirayan pa'pitérëhua'. (Ina ninanosø, ipora marë' Pirin itopi anta').

⁸ Ina ta'sochachin a'nanaya Cacoposo' tahuërtahuaton ni'pirinhuë', Cosi hui'ninpita quënanin. Inapita quënanaton, hui'nin natanin:

—¿Inpitata isopitaso'? itérin.

⁹ —Isopita mini hui'nuhüepita. Yosë nohuanton naro'pa' ya'huëtarincoso', itérin Cosiri.

—Amashachin aya'carico. Noya ya'huëcaiso marë' sha'huichi, itaantarín Cacopori.

¹⁰ Cacoposo' noyá mashoya ni'ton, co huachi ina inahuë quënantérin. Napoaton Cosiri hui'ninpita aya'caririn. Napohuachinara, Cacoposo shinpita iporahuaton apinorin.

¹¹ Ina quëran Cosi itapon:

—Co huachi onporo téranta quënana'huanquënsø' yonquipirahuë', Yosë nohuanton hui'ninpitanta quënanahuë. ¹² Pa'pin to'topiténqué hui'ninpita huënsëápirinahuë', Cosiri ahuanirin. Ahuanirahuaton, pa'pin notënanquë isonin. Isonin quëran no'paquë huarë' monshorin. Noya nicaton napotérin.

¹³ Ina quëran cato hui'ninpita chachin manin. Iprainso', inchinanën quëran së'quërin. Ya'huërë' Manasisiso' ahuënanën quëran së'quërin. Inapo së'quërin quëran pa'pin aya'caririn. Napoaton Iprainso', shiin ahuënanën quëran acorin. Ya'huërë' Manasisiso', shiin inchinanën quëran acorin. ¹⁴ Cacoposo nípirinhuë', tanpaquënpita chi'huaratahuaton, inchinanën quëran Iprain së'huamotorin. Manasisiso paninan nípirinhuë', ahuënanën quëran së'huamotorin. ¹⁵⁻¹⁶ Inaporahuaton Cosi noya ya'huëcaso marë' iso pochin sha'huitérin:

"Shimashonëhuëpita Apraan, Isaco, inapita Yosë natëpi.

Canta hua'huatérahuë quëran huarë' ina chachin noya a'pairinco.

Ina Anquëninëñ* chachin ya'ipi ma'sha onporahuë quëran, nicha'ërinco.

Inari chachin isopita hui'napi'sa' catalahuain.

Notohuaro' hui'ninpita ya'huëchina'.

Hua'huayátérahuë, isoro'paquë na'aina'.

Inapita nicatona piyapi'sa', yonqui'inaco.

Tata Isaco, tata masho Apraan, inapitanta yonqui'ina', itérin.

¹⁷ Cosiso nípirinhuë', paninantérinso' ahuënan quëran shiini së'huamotorinso' ni'nin. Ina nicatón co noyahue' cancantérin. Napoaton pa'pin inchinan imirin masahuaton, Iprain motën quëran chi'huincatahuaton Manasisi motënquë acotérin.

¹⁸ Inapoapon pochin pa'pin itapon:

* **48:15-16** Yosë Anquëninëñ topachinaso': Yosë chachin ta'tona napopi.

—Co tata. ¡Ama inapoquësohuë! Isocha paninanso'. Inchinan imira quëran, ina së'huamotoquë', itérin. ¹⁹ Pa'pinso nimirinhue', co nohuantérinhue' inapocaso'. Napoaton itapon:

—¡Naporin mini conpa, nani nitotërahuë! Manasisinta shinpita quëran panca nacion nisarin. Iyaa'huainso napoaponahuë', noya noya nicaton shinpita quëran na'con na'con naciono'sa pipiarin. ²⁰ Naporor tahuëri chachin, Cacopori shinpita nôya yonquirapiton iso pochin sha'huitérin:

—Israiro nacionquë ya'huëpisopita noya ya'huëcaiso marë' yasha'huitohuachina', campita nininëma yonquiatona iso pochin sha'huitapona': “Yosë quëmanta catahuainquën. Iprain, Manasisi, inapita catahuarinso pochachin catahuainquën,” niitapona', itérin. Inapoaton, Cacoposo Iprain'ton acorin. Manasisiso nimirinhue', piquëran acorin.

²¹ Ina quëran Cosi tahuëretahuaton itapon:

—Ni'quë'. Caso chiminapo huachi. Yosëso nimirinhue', ya'huëmiataton catahuarinquëma'. Inari chachin shimanonëma no'panënquë quëpanantaponquëma'. ²² Quëmaso' ya'ipi iyaparinpita quëran, panca pancana no'pa' quëtéranguen. Siquimo motopi quëtéranguen. Inaso' no'pa', amororo'sa ahuëato osérëtérahuëso', itérin.

49

Cacopo yachiminaton, hui'ninpita nontérinso'

¹ Nani shinpita noya ya'huëcaiso marë' sha'huitohuachina, Cacoposo' ya'ipi hui'ninpita amatérin. Huë'pachinara itapon:

“Amasha ya'carico comparo'sa”.

Ma'sona a'na tahuëri onpocamaso', carinquëma sha'huichinquëma natanco'.

² Canpitaso hui'nahuëpitänquëma'.

Caso Cacopoco naporahuë', Israiro itérinaco anta'.

Carima sha'huitaranguëma ni'ton, natanco'.

³ Quëmaso' Nopino, paninanquën.

Chiníquen nisoco, ya'nan hui'nahuananquënsö'.

Chini chiníquen nanantaton, noya noya nicamaso' ninan.

⁴ Inapocamaso nimiranhue', co huachi inapoaranhuë'.

I' pa'pi chinii' nipachina, co onpo asanoirëhuë'.

Ina pochachin nicaton cosonanëhuë monshitérän, itérin.

⁵ Simion, Nihui, canpitaso, napopináchin cancantérama'.

A'napita ma'sha onpotamaso marë' nisha nisha ohuararama'.

⁶ Niyontonamaquë, ama onporo téranta ya'noisohue'.

No'huitatoma piyapi téparama'.

Co natantonquëmahuë' nicatoma', tororo'sa nishitetëntëntérama'.

⁷ Tanan ni'niro'sa pochin no'huitérama'.

Napopiramahuë', co onporonta inachachin nisáponahuë'.

Carima ya'ipi Israiro nacionquë, ayanquëmiataranguëma', itérin.

⁸ Quëmaso' Cota, iyaparinpita pa'yataponen.

Inimiconënpita minsëra'pipon.

Iyaparinpita quëran huarë' moshaponen.

⁹ Quëmaso' conpa masho, Cota itéranguen.

Pa'pinia'hua pochin chinimiatérän.

Mapintahuaton pa'pini' pë'inihuachina,

mónsho móñsho térarinquëran quëhuënin huachi.

Panca pa'pini' pochin ninan.

¡Pa'pini' chinotaso', co incari téranta apesarinhue'!

Inapochachin quëmanta inimiconënpita nitaponen.

- ¹⁰ Co inso täranta hua'an quëran, quëmaso' Cota, ocoiarinënhuë'.
 Huara së'quéranso co insonta mataponënhuë'.
 Hua'anën chachin o'maquë huarë' co nanitapaponënhuë'.
 Ina o'mahuachin, ya'ipi naciono'sari natëpona huachi.
- ¹¹ Cotaso notohuar'o' oparohuanaton, mora'huanënta', co apiratarinhuë'.
 Inaquë capacaso marë' a'sonpitérapon.
 Huinoquë chachin a'morinso pë'sapon.
 ¡Opa huayo no'huiquënhuë chachin, inapotapon!
- ¹² Ya'pirinpítanta', huino quëran quëhua quëhuashin ninin.
 Natëquënpítanta', sho'shoi' quëran huiri huiríchin ninin,' itérin.
- ¹³ 'Quëmaso' Saporono, marë yonsan parti ya'huapon.
 Panca nancharo'sa nonshinanëna ya'huérinquë, ya'huëapon.
 No'panënso', Sitonquë huarë' naniarin,' itérin.
- ¹⁴ 'Quëmaso' Isacaro, chiniquën mora pochin nisaran.
 Pë'tahua pëiro'saquë pë'pëtéranchin chinotaran.
- ¹⁵ "¡Noyachi iso no'pa' paya! Yashi yashin chinochachináchin," tēcapon.
 Co pahuérëpirinënhuë', noya cancantaton patron marë' sacataran,' itérin.
- ¹⁶ 'Quëmaso Tano, quëmaora huëntonënhuë ya'huëpisopita catahuanar.
 Nanan ya'huëtohuachina', anoyatacaiso catahuanar.
 A'napita Israiro huëntono'sa pochachin nisaran.
- ¹⁷ Ya'huan yaquëtérinso pochin nisaran.
 Inaso', ira pirayan yamorin quëtétacaso marë'.
 Cahuario tocanën quëtëhuachina, piyapi ya'mitérinso', anotapon.
 Inapochachin quëmanta', inimicoro'sa nitaran,' itérin Cacopori hui'ninpita nontaton.
- ¹⁸ Ina quëran Cacoposo' Yosë nontaton tapon:
 "¡Siniro, quëmaso' nicha'ësaranco ténahuë!" itérin.
- ¹⁹ A'napita hui'ninpítanta yonquiaiton taantarin:
 " 'Quëmaso Caro, matararoro'sa huënton ya'contarinquë.
 Quëmariso napoaponahuë', nita'atahuaton imasaran,' itérin.
- ²⁰ 'Quëmaso' Asiri, noya noya cosharo ya'huëtarinquën capacaso'.
 Copirnoro'sa ca'ninso pochin ca'sápon.
 Napoaton quëmari quëtohuatan inapitanta ca'sapi,' itérin.
- ²¹ 'Quëmaso' Nipitari, co camainënhuë' costaponhuë'.
 Tanan yo, noyanpia'huaráchin hua'huinpitarë' pa'ninso pochin nisaran.
 Inapochachin quëmá quëran pipipisopítanta',
 na'a nisahuatona', noyanpia'huaráchin nicapona', itérin.
- ²² 'Quëmaso Cosi, i'sha yonsanquë huayo huanirinso pochin ninan.
 Inaso' huayo pa'pi notohuar'o' nitérin. Së'paquënpítanta', paira pa'térin.
- ²³ Pë'chinan camayoro'sa', no'huirinquë.
 No'huitënëñ pë'chinan shinërëqué yaohuaninëñ.
 Napotatënëñ, co noya quëran ya'huëchináchinhuë nitarinëñ.
- ²⁴ 'Quëmaso nípirinhuë', chini chiniquën tanpatérán.
 Pë'chinanenquë inimicoro'sa të'yanantohuatan, co pacotaranhuë'.
 Yosë imarahuëso', chini chiniquën nanantérin.
 ¡Ina catahuarinquën inimicoro'sa minsëaran!
 Siniroso' ohuica hua'anën pochin ni'ton, a'pairinco.
 ¡Ina chachin quëmanta a'paiatënquën catahuarinquë!
- ²⁵ Yosënëhuë chachin, catahuapënquë.
 Inaso', ya'ipi nanitapaton catahuapënquë.
 Ina nohuanton, o'nanpachina catahuainquë.

Acoporonta i' ya'huérinso', ina nohuanton pipiton catahuainquën. Pë'tahuanëmapita, sanapinëmapita, inapitanta huaihuachina catahuain. **26** Tata mashocoro'sa iráca, noya ya'huëca'huaso marë' sha'huitérinaco. Carinquënso', ipora noya noya sha'huitaranquën. Motopiro'sa ya'huérarinso ta'huantaquë huarë', Yosë catahuaráponquën. A'napita iyanpita quëran, noya noya nicatënquën huayonanquën. Napoaton së'huamotorahuatënquën quëma marë' Yosë nontërahuë, itérin. **27** 'Quëmaso' Mincamin, pa'pi mapinton tanan ni'nira pochin nicapon. Tashiramiachin inaso mapintahuaton, ca'miatérin. Naporor i'huanahuanquë chachin pë'sotérinsonta', a'napitari ca'papi. Inapochachin quëmanta', yaata'huantëransopita nitaran. Inapotahuaton ma'shanénanta', nipatomatapoma', " itérin.

28 Ina pochin Cacopo shonca cato hui'ninpita noya ya'huëcaiso marë' sha'huitérin. Inapita quëran shonca cato Israiro huëntono'sa pipipi.

Cacopo chimininso'

29 A'na tahuëri Cacoposo', hui'nipita camairin: "Co hua'quiya quëranhuë' chiminarahuë huachi. Chiminpato, shimashonëhuëpita pa'pitopiso pirayan po'moontaco. Iti huënton piyapi, Ipron itopisori, ina no'paso' hua'anëntopirinhue'. **30** Maquipiraquë nanin ya'huérinso yonquiazo napotarahuë. Inaso', Canaan parti ya'huérin. Mamiri notënanquë ya'huérin. Ina no'pa' mini iráca tata mashoco Apraan nipa'pitacaiso marë' pa'anin. Ina pirayan no'pa' ya'huérinsorë chachin naporor Ipron pa'antérin. **31** Inaquë Sara, Apraan, inapita chiminpachinara ya'conpi. Tata Isaco, mama Nipica inapitanta inaquë chachin ya'conpi. Inaquë canta', sa'ahuë Nia itérahuëso ya'conin. **32** Ina no'passo' naninë chachin, Iti huënton piyapi'sa pa'antopi," itérin. **33** Cacoposo' hui'ninpita camairinso tonitohuachina, pë'saranënquë quëhuëntarin. Quëhuënaso chachin, chiminin huachi.

50

1 Pa'pin chiminpachina Cosiso', ina nonën iporin quëran na'nérin, apinorin, napotérin. **2** Ina quëran notoronënpita camairin pa'pinco' nonën tapacaiso'. Camaihuachina, ama chanatacaso marëhuë' taparapi. Pa'pincoso', Cacopo itahuatona', Israiro itopi anta'. **3** Catapini shonca tahuëri quëran nonën tapapi huachi. Ina nápo tahuëri nohuantérin tapacaso marë' ni'ton, ina nápo tahuëri sacatopi.

Iquipitoro'saso', canchisë shonca tahuëri Cacopo marë' sëtopiso' imapi. **4-5** Ina tahuëri'sa na'huëhuachina, Cosiso' huaraon catahuapisopita hua'ano'sa', nontérin:

—Tëhuëñchachin noya ni'patamaco, ca marë' huaraon nontoonco'. Naporin Cosi: "Co'huara tata chiminyátëraponhuë', camairinco Yoscoarë' ta'to natëca'huaso': 'Nipa'pita'huaiso marë' taparahuëquë chachin, po'moontaco. Inaso', Canaan parti ya'huérin,' itérinco. Quëtoco paato tatahuë pa'pitonta'i, topirahuë. Nani pa'pitontahuato, o'mantarahuë ténin," itoco', itérin. **6** Sha'huitohuachinara, huaraoniso hua'ano'sa itapon:

—Cosi sha'huitonco': "Paaton tataco', pa'pitontaquë'. Sha'huitérinquënso chachin nitontaquë'," itoco', itérin.

7-8 Huaraoni napotohuachina, Cosiso', pa'pin pa'pitacaso marë' pa'nin. Ya'ipi copirno catahuapisopita hua'ano'sa pa'pi. Iinpitanta', quëmopinënpitarë chachin pa'pi. Cosin partiso', hua'huaro'saráchin pë'tahuaros'a a'paicaiso marë' patopi. **9** Sontaro'santa', a'naquën toronano'saquë, a'naquënso cahuarioro'saquë, Cosi ca'tanpi. Napoaton hua'huayátërahuë piyapi'sa pa'pi.

10 Pa'sápatona', Corin-a-atatiquë canconpi. Inaquë niyontonatona panca sëtopi. Inaquë Cosi pa'pin marë' canchisë tahuëri sëtérinso', nariantarin. (Corin-a-atatiso', trico to'norapiquë) Ina no'pa quërango', Cortanii' pi'i ya'coninso parti acorin. **11** Canano'sa

inaquë ya'huëpisopitari, napopiso ni'pi. Ina ni'sahuatona', inahua capini ninontopi: "Iquipitoro'sa pa'piapona huëcatona', panca sëtapi," topi. Napoaton ina no'paso', aninihuani: Apiri-misraimo, itopi. Iquipitoro'sa sëtopiquë, tapon naporin. Ina no'pa quëranso', Cortanii' pi'i ya'coninso parti acorin.

¹²⁻¹³ Cacopo hui'ninpitaso', pa'pin nanopipon camaitérinso chachin ya'ipi nipi. Canaan-quëpantarahuatona', Maquipiraquë nanin ya'huërinquë po'moontapi. Iti piyapi, Ipron itopisori, ina no'paso' hua'anëntopirinhue', Apraani iráca nipa'pitacaiso marë' pa'antérin. Ina naninso no'parë chachin, Mamiri ya'huërin quëran, pi'i pipirinso parti quëparitérin. ¹⁴ Nani pa'pin po'oroquë po'mohuachinara, Cosiso' iinpitarë chachin Iquipitoquë pa'mantapi. Ya'ipi ca'taninsopitanta', pa'mantapi.

Cosi iinpita napopiso'

¹⁵ Cacopo chiminpachina Cosi iinpitaso', ina të'huatatona inahua capini ninontopi: "Iráca aparisitérahuaso marë' tapona Cosi no'huitonpoa yai'huërétapirinfoahuë'," ni-itopi. ¹⁶⁻¹⁷ Ina yonquiatona', iso pochin nontacaiso marë' a'napita a'papi: "Co'huara tata chimiyanteraponhuë', camairincoi nonta'huainquëns'o': 'Iyaparinpita aparisi-topirinënquënhue', co noyahuë' nicatona oshahuanpiso', Yosë marë' nariantëquë', itoco', itérincoi. Napoaton, quiyarionta nontarainquëñnanan anoyataancoiso marë'. Quiyanta', tatanpoa chinotérinso Yosë chachin imarai ni'ton, inapotocoi," itopi. Napo nontasoi', Cosiso na'nérarin.

¹⁸ Naporo chachin iinpitanta', canquipi. Canquihuachinara, isonpi quëran no'paquë huarë' monshorahuatona', moshaipi. Mosharahuatona', itopi:

—Ma'tana iya, ya'huarai. Hua'anëntatoncoi yacamaihuatancos, inapotocoi, itopi.

¹⁹ Napotopirinahuë', Cosiriso itapon:

—Ama iyaro'sa pa'yancosohuë'. Caso piyapico ni'to, co nanitérahuë' Yosë ya'huërenamén pochin nica'huaso'. ²⁰ Canpitaso mini, ma'sha onpotamacoso yonquipiramahuë', Yosëso niperinhuë', inaporamaso anoyatérin. Ama notohuaro' piyapi'sa taquicaiso marëhuë', inaporin. ²¹ Napoaton ama pa'yancosohuë'. Cariquëma cosharo quëtäponquëma'. Hui'namapitanta quëtalo. Naponontaton, Cosiso iinpita asanocancanin. Noyasha nontérin.

Cosi chiminiso'

²² Cosiso iinpitarë chachin, Iquipitoquë ya'huëhuantopi huachi. Inaso', pasa shonca pi'i icanin. ²³ Hua'qui ya'huaton, Iprain hui'ninpita ni'nin. Inahuanta hui'nahuapiso shi'ahuainpitaquë huarë', ni'nin. Naporahuaton Manasisi shiin Maquiri itopiso hui'ninpitanta', macaton aso'sorin. Ina marë' to'topitënquë ahuënséra'piarin.

²⁴ A'na tahuëri Cosiso', iinpita itapon: "Co hua'quiya quëranhuë', chiminapo huachi. Napoaponahuë', Yosëso catahuainquëmaso marë' o'mararin. Iso no'pa quëran ocoiar-inquëma'. Apraán, Isaco, Cacopo, inapita quëtacaso marë' sha'huitérinso no'paquë, quëpantarinquëma'," itérin. ²⁵ Ina quëran iinpita camairin: "Yoscoarë' ta'toma', no-huantérahuëso nitoco," itérin. Napotohuachina: "Yoscoarë' nohuantéranso', nisarai," itopi. Naporo' Cosiri itapon: "Tëhuëñchachin Yosë o'mararin catahuainquëmaso marë'. Ina tahuëri nanihuachin, nansënëhuë isëquëran quëpanantamaso ya'huërin," itérin. ²⁶ Pasa shonca pi'ipitaso', Cosi Iquipitoquë chiminin. Chiminpachina, nonën ama chanatacaso marëhuë taparahuatona', a'na atahuarquë po'mopi. Ina pochin Cacopo hui'ninpita nipi.

Matio ninshitërinpoa' Quisocristo naporinso' nitotacaso marë'

*Quisocristo shimashonënpita
(Lucas 3.23-38)*

¹ Quisocristo nanamën sha'huitaranquëma'. Inaso' Yosë hui'nin. Iráca quëran huarë' Yosë yonquirin ina a'paimacaso marë'. Tapico chachin Quisocristo shi-mashonën. Apraanconta' shimashonën chachin. Ya'ipi shimashonënpita iráca ya'huépiso' sha'huichinquëma', nitotoco'.

² Iráca Apraan hui'nahuanpachina, Isaco itopi. Ina quëran Isaconta' hui'nahuanpachina, Cacopo itopi. Cacoposo' na'a hui'ninpita ya'huëtérin. A'nsaso' Cota itopi. ³ Cotanta' hui'nahuanpachina, Parisë, Saro, inapita itopi. Tamara hua'huinpita inahuaso'. Ina quëran Parisë hui'nahuanpachina, Isromo itopi. Inanta' hui'nin ya'huëtohuachina, Aramo itopi. ⁴ Aramonta' hui'nahuanpachina, Aminatapo itopi. Ina hui'nin Nasono itopi. Nasononta' hui'nahuanpachina, Sarëmon itopi. ⁵ Sarëmon yasa'apachina, Nacapa manin. Hui'nin ya'huëtohuachina, Pooso itopi. Poososo' Rota macaton, hui'nahuanin. Opito itopi. Opitonta' hui'nahuanpachina, Quisi itopi. ⁶ Quisinta' hui'nahuanpachina, Tapi itopi. Inaso' copirno ya'conin. Ina quëran Oriasëco' sa'in masahuaton, hui'nahuanin. Saromon itopi.

⁷ Saromon hui'nin Nopoamo itopi. Ina hui'nin Apiasë itopi. Apiasënta' hui'nahuanpachina, Asa itopi. ⁸ Asa hui'nin Cosahuato itopi. Cosahuatonta' hui'nahuanpachina, Coramo itopi. Ina hui'nin Osiasë itopi. ⁹ Osiasënta' hui'nahuanpachina, Cotamo itopi. Ina hui'nin Acaso itopi. Acasonta' hui'nahuanpachina, Isiquiasë itopi. ¹⁰ Ina hui'nin Manasisë itopi. Inanta' hui'nahuanpachina, Amon itopi. Amon hui'nin Cosiasë itopi. ¹¹ Ina hui'nin Quiconiasë itopi. Iinpitanta' ya'huërin. Naporo' cotioro'saso', inimicoro'sari Papironia quëran huëcatona', canaipi. Minsërahuatona', napopinchin ya'huépil'pa' quëpapi asacatacaiso marë'.

¹² Ina piquëran Quiconiasë hui'nahuanpachina, Saratiri itopi. Ina hui'nin Soropapiri itopi. ¹³ Inanta' hui'nahuanpachina, Apioto itopi. Apioto hui'nin Iriaquimo itopi. Ina hui'nin Asoro itopi. ¹⁴ Asoronta' hui'nahuanpachina, Satoco itopi. Satoco hui'nin Aquimo itopi. Ina hui'nin Irioto itopi. ¹⁵ Iriotonta' hui'nahuanpachina, Iri-asaro itopi. Iriasaro hui'nin Matan itopi. Ina hui'nin Cacopo itopi. ¹⁶ Cacoponta' hui'nahuanpachina, Cosi itopi. Cosi yasa'apachina, Maria manin. Ina hua'huinso' Quisoso, Cristo itopiso'.

¹⁷ Nani Quisocristo shimashonënpita sha'huitëranquëma'. Apraan quëran Tapi copirno ya'conaqué huarë' shonca catapini shimashonënpita ya'huëtérin. Ina quëran Papironi-aqué quëpai huarë' shonca catapini shimashonënpita ninshitantaranguëma'. Ina quëran Quisocristo nasitaqué huarë', shonca catapini chachin shimashonënpita ninshitanta-ranguëma huachi.

*Quisocristo nasitërinso'
(Lucas 2.1-7)*

¹⁸ Apira Quisocristo nasitërinso' sha'huichinquëma', nitotoco'. Naporo tahuëri'sa' Co-siso', nani Maria nontërin macacaso marë'. Napoaponahuë' co'huara mashatërasohuë', Ispirito Santo nohuanton inaora cayorin. ¹⁹ Cosi nitotahuaton, pa'yanin. Noya quëmapi ni'ton, yonquierin. "¿Ma'cha onpo'iya? Maria nani hua'hua ma'patërin. Co maca'huaso' ya'huërinhuë'. Co piyapi'sa' sha'huitarahuë', Maria tapanpachin. Coisëichin

sha'huitahuato, co masarahuë!" ta'ton, yonquirárin. ²⁰ Huë'ëso', Yosë anquëninëni ya'notimarin nontacaso marë'.

—Tashita Cosi. Carinquën nohuitëranquën. Quëmaso' Tapico' shinquën. Pi'pian sha'huitaponquën o'marahuë. Maria noya maqué'. Co quëmapiri së'huarinhuë'. Ispirito Santo nohuanton, inaora cayorin. Napoaton noya maqué'. ²¹ Huaicaso' nanihuachin, quëmapia'huaya nasitapon. Nasitohuachin, Quisoso itëquë'. Piyapinënpita oshanëna' inquitaton, nicha'ësarín ni'ton, ina nininëna' acotëquë', itërin anquëniri. Itahuaton, panatarin huachi.

²² Iráca Yosë nohuanton, pënëntona'pi ninorin. Ninoton, Yosë quiricanënquë chachin ninshitérin:

²³ "A'na tahuëri nanon inaora cayoapon.

Co quëmapiri së'huapirinhuë', napoapon.

Quëmapia'huaya huaihuachin, Imanino itapi," ténin.

Yosë chachin o'maton, yacaparinpoa', tapon naporin. Ina pochin nasitimahuachina, iráca ninopiso' nanirin huachi.

²⁴ Cosiso' capayatahuaton, Siniro anquëninëna' natëton, Maria manin huachi.

²⁵ Macapponahuë', co ichihuë'érinhuë'. Hua'huin nasitérin piquëran huarë' ichihuë'érin. Quëmapia'huaya nasitohuachina, Quisoso itopi.

2

Tayora nitotona'piro'sa' quënanpiso'

¹ Quisososo' Pirinquë nasitérin. Cotia parti chachin nasitérin. Naporo' Irotiséri inaquë hua'anentérin. Ina quëran tayora nitotona'piro'sa' canquipi. Pi'i pipirinso parti quëran huë'pi. Canquiuhuachinara, Quirosarinquë, natantiipi:

² —¿Inséquëta' nasha copirno nasitérin? Cotio copirno ya'conacaso' nani nasitérin ipora. Ya'huérai parti ya'huasoco, nasha tayora ya'norinso' quënanai. Ina nicatoi: "Yosëri a'paimarinso' nasitérin huachi," ta'toi, huë'nai ina chinotapoi, itéra'piapi.

³ Ina natantahuaton, copirno Irotisé pa'yanin. Quirosarinquë ya'huëpisopitanta' pa'yanpi. ⁴ Copirno pa'yanaton, cotio maistro'sa', corto hua'ano'sa', inapita amatérin. Amatahuaton, natanin.

—¿Inséquëta' Cristo Yosëri a'paimarinso' nasitapon? itërin.

⁵ —Cotia parti chachin nasitapon. Pirinquë nasitapon, itopi. Iráca pënëntona'pi ninoton, Yosë quiricanënquë ninshitérin.

⁶ "Cotiaquë a'na ninano' ya'huérin, Pirin itopiso'.

Co panca ninanoyahuë' níponahuë', inaquë a'na copirno nasitapon.

Na'a copirnoro'sa' Cotia parti ya'huëpirinahuë', inasso' chini chiniquënanantapon.

Ya'ipi piyapinëhuëpita israiro'sa' itopiso' hua'anentapon," ténin Yosë, itopi.

⁷ Copirnoso' natanahuaton, co a'ninquëchin yanatantérinhuë'. Po'oana quëran tayora nitotona'piro'sa' amatérin. Huë'pachinara, inaora quëparahuaton, nontérin:

—¿Ma yoquiquëta' nasha tayora ya'norin? itërin.

Sha'huitohuachinara, itantarín:

⁸ —Pirin'pa' nasha copirno nasitérin ipora. Inatohua' paatoma', noyá yoníco'. Hua'huasha quënanpatama', huënantatoma', sha'huitiintaco canta' paato chinochi, itërin nonpintaton.

⁹ Ina natanahuatona', pa'pi huachi. Pa'sapirinahuë', a'nanaya tayora quënaantapi. Ya'huëpique' ni'piso chachin inápaquë paaton, quëchitérarin. Hua'huasha yacapatérinque' chachin tayora chiniconin. ¹⁰⁻¹¹ Ina ni'sahuatona', pa'pi pa'yatopi. Capa cancanta-tona', pëiquë ya'conpi. Inaquë hua'huasha quënanconpi. A'shionta' ya'huarin, Maria itopiso'. Hua'huasha quënanahuatona', isonconahuatona', chinotopi. Ina quëran caposoa'huayanënapita i'soatahuatona', ma'sha pa'ton nininso' quëtopi. Oro, yonarin

pochin pimóchin nininso', yaqui' pimóchin nininso' inapita quëtopi. ¹² Ina quëran tashi' huë'ësoi', Yosë nohuanton, hua'napi.

—Ama copirno ya'huérinquë pantatoma', sha'huitocosohuë', itérin anquëniri. Napoaton a'na ira pa'tahuatona', ya'huëpi'pa' canconpi huachi.

Iquipito'pa' ichita'apiso'

¹³ Tayora nitotona'piro'sa' pa'pachinara, Yosë anquënинени huë'ënquë Cosi ya'notahuaton itapon:

—Copirno nani chinotérin hua'huasha tēpacaso marë'. Apira sontaro'sa' a'pararin ina yonicaiso marë'. Napoaton a'naroáchin ichita'aqué'. A'shinë chachin Iquipito'pa' quëpaquë'. Inaquë yacapatéquë'. Noya huënantacaso' nipachin, sha'huitantaranquën, itérin anquëniri.

¹⁴ Natanaahuaton, a'naroáchin Cosi huënsëintarin. Tashi' nimirinhuë', hua'huasha quëparin. A'shinë chachin ichita'arahuaton, Iquipito'pa' pa'pi. ¹⁵ Irotisë chiminaquë huarë' inaquë ya'huëpi. Iráca Yosë nohuanton, pënëntona'pi ninorin: "Hui'nahuë Iquipito'pa' yacapatopirinhuë', ina quëran ocoiarahuë," ténin Yosë. Hui'nin chachin Iquipitoquë yacapatoihuachina, ninorinso' nanirin huachi.

Hua'huasharo'sa' tēpapiso'

¹⁶ Copirno Irotisëso' tayora nitotona'piro'sa' ninarápirinhuë', co ya'nopihuë'. "Non-pintérinaco ipora," ta'ton, chiníquen no'huitérin. No'huitaton, sontaro'sa' Pirin'pa' a'parin quëmapia'huaro'sa' tēpacaiso marë'. "Ihuá chachin tayora ya'norin ni'ton, co canopia'huaro'saráchin tēpacaso' ya'huérinhuë'. Cato' pi'ipitérinquë huarë' tēpaco'," itahuaton, a'parin. Sontaro'saso' pa'sahuatona', ya'ipi quëmapia'huaya Pirinquë ya'huérinsopita tiquipi. Ya'cariyanta'yonitona', cato' pi'ipitérinquë huarë' tēpapi.

¹⁷⁻¹⁸ Iráca ninoton, Yosë quiricanënquë Irimiasë ninshitérin:

"Namaquë na'nérinso' natanpi. Naquira na'nérárin, ayanárin.

Hua'huinpitaco' yonquiaton, na'nérarin.

'Ama sétëquësohuë', itopirinahuë',

nani chiminpi ni'ton, sétárin," ténin.

Iráca naporinso pochachin iporanta' hua'huaro'sa' tēpapi ni'ton, a'shina' na'nérápi.

¹⁹ Naporo' Cosiso' Iquipitoquë yacapatarin. Irotisë chiminpachina, Yosë anquënineni ya'notantarín. Hua'narinso pochin Cosiri quënanin.

²⁰ —Hua'huasha tēpana'pi nani chiminin ni'ton, israiro'sa' ya'huëpique' panantaquë'. Hua'huasha a'shinë chachin quëpantaquë', itérin.

²¹ Ina natanahuaton, natérin. Quisoso a'shinë chachin quëparahuaton, inatohua' panantarín. ²² Canconahuaton, nanan natantérin. "Irotisë hui'nin ya'huérë' hua'anéntantarín. Ariquirao itopisoari pa'pin ya'huérétérin," topi, natantérin. Ina tē'huataton, co nohuantérinhuë' inatohua' ya'huëcaso'. Naporahuaton, hua'nantarín.

—Ama copirno ya'huérinquë chachin panantaquësohuë', itérin anquëniri. Ina natanahuaton, Cariria parti pa'nin ya'huëcaso marë'. ²³ Inatohua' a'na ninano' ya'huérin, Nasarito itopiso'. Inaquë ya'huérarin. Iráca pënëntona'piro'sa' ninopi. "Cristo huë'pachin, Nasarito piyapi itapona'," topi. Napoaton Yosë nohuanton, inaquë ya'huaton, hui'napitérin huachi.

3

Coansha Paotista pënëntérinso'

(Marcos 1.1-8; Lucas 3.1-9, 15-17; Juan 1.19-28)

¹ Naporo' tahuëri'sa' Coansha Paotista pënëntarin. Cotia parti pancana inotero' ya'huérin. Co inaquë piyapi'sa' ya'huëpihuë'. Inaquë ya'huaton, Yosë nanamén sha'huirarin. Na'a piyapi'sa' huë'pi natanapona':

² —Yosë hua'anëntiinpoaso' tahuëri nani ya'cariarinfoa'. Napoaton co noyahuë' yonquiramasopita nariantatoma', Yosë chachin tahuërtantaco huachi, itarin. Nani tahuëri ina pochin pënénárin.

³ Iráca Yosë nohuanton, Isaiasë ninorin. Ninshitaton, naporin:
“Inotéro parti a'na quëmapi pënentápon: ‘Siniro o'macaso tahuëri naniriarin ni'ton, yonquico'. Ni'co'. Hua'an chiníquen nanantona'pi ni'ton, a'na parti yapa'pachina, comisionen a'parin ira tapatacaso marë'.

Ira oteëerin noya pa'tacaiso marë'.

Inapochachin iporasо' cancanëma' anoyatoco' Siniro o'main,' tapon ina quëmapi, pënentohuachin," ténin.

Coansha pënentacaso' ninoton, naporin.

⁴ Coanshaso' co noyápiachin a'morinhuë'. Ponira pochin a'morin, camiyo anporo quëran nipiso'. Sha'huëtë quëran nitonporin. Sëquërë pochin nininso' macaton, ca'nin. Ninoi' quënanpachina, irorin. ⁵⁻⁶ Inaquë na'a piyapi'sa' huë'pi natanacaiso marë'. Quirosarin quëran huë'pi. Ya'ipi Cotia parti quëran huëcatona', natanpi. Cortanii' ya'cariya quëraonta' huë'pi. A'naya a'naya huëcatona':

—Tëhuëñchachin co noyahuë' nicato, oshahuanahuë. Catahuaco Siniro naporahuëso nanianchi, itopi Yosë nontatona'. Ina topachinara, Coanshari Cortaniquë aporintérin.

⁷ Ina quëran na'a parisioro'sa', satosioro'sa', inapitanta huë'pi.

—Quiyanta' aporintocoi, itopirinahuë', Coansha co nohuantérinhuë':

—¡Canpitaso' ya'huan pochin cancantatoma', yanonpinama! “Yosë isoro'pa' ana'intoahuachin, cha'ëpoi,” topiramahuë'. Co topinan cha'ësaramahuë'. ⁸ Co noyahuë' yonquiramasopita nariantatoma', noya nico huachi. ⁹ Ama canpitaora ninonpintocosohuë'. “Apraan shinpitacoi ni'toi, Yosë piyapinënpitacoi,” ama tocosohuë'. Yosë nohuantérin naporini, iso na'piro'santa' Apraan shinpita atarantacaso' nanichitonhuë'. ¹⁰ Nani Yosë yonquirin oshahuanoso' ana'intacaso'. Ni'co'. Nararo'sa' co noya nitohuachinahuë', a'nérë'. Itëquënpitarë chachin ocoirahuatë', pënqué të'yatëre' huiquitacaso marë'. ¹¹ Co noyahuë' yonquiramasopita nariantohuatama', i'quë aporintaranquëma'. Ca piquéranso niperinhuë' a'na quëmapi huë'sarin. Inaso' chini chiníquen nanantérin. Caso' co pi'pian téranta' ina pochin chiníquen nanantérahuë'. Co maquëyancohuë' ni'to, co sapatën quëpacahuaso' téranta' nanitarahuë'. Inaso' huë'pachin, a'naquëma' Ispirito Santo aya'coancantarinquëma'. A'naquëmaso niperinhuë' pënqué chiníquen ana'intarinquëma'. ¹² Cayarinso' manëso pochin nisarin. Arosë mapatéra, to'norarë'. Ina quëran pintiarahuatë', pëiquë acorë'. Sha'huëtnso niperinhuë', pënqué ahuiquitérë'. Inaso' co onporonta' tacopiarinhuë', ténin Coansha.

Quisoso aporihuaninso'

(Marcos 1.9-11; Lucas 3.21-22)

¹³ Ina quëran Quisoso Cariria quëran huë'nin. Cortaniquë canquirahuaton, Coansha nontérin aporintacaso marë'.

¹⁴ Napotopirinhuë', co nohuantérinhuë'.

—¿Ma'marëta' napotiiranco? Co aporinta'huanquënsö' ya'huërinhuë'. Quëma aporintoco tēhuëñchinso', itérin.

¹⁵ Napotopirinhuë', Quisosori itérin:

—Yosë nohuantérin ni'ton, ya'ipi natëca'huaso' ya'huërin. Napoaton noya quëma aporintoco, itérin. Ina natanaahuaton:

—Noyahua', itahuaton, i'quë aporintérin. ¹⁶ Ina quëran nonshiaso chachin a'naroáchin inápaquë pi'iro'të' ni'soatérin, ni'nin. Ispirito Santo nëpë pochin nohuaramahuaton, Quisoso ya'coancantomiatérin. ¹⁷ Naporö' inápa quëran Yosë noninso' natanpi.

—Isoso' ca hui'nahuë chachin, na'con nosororahuëso'. Noya ni'nahuë, ténin.

4

*Sopairi Quisoso tēnirinso'
(Marcos 1.12-13; Lucas 4.1-13)*

¹ Ina quëran Ispirito Santori Quisoso quëparin inotero parti sopairi tēnicaso marë'.

² Catapini shonca tahuëri tashirë chachin inaquë ya'huaponahuë', co manta' ca'ninhuë'. Ina piquëran tanarin huachi. ³ Naporor' sopairi huëcapairin.

—Téhuëñchachin Yosë hui'ninquën nipatan, iso na'piro'sa quëran cosharo' atarantëquë', itopirinhuë',

⁴ —Inca, co nohuantërahuë'. Yosë quiricanënquë pënëninpoo'. "Co cosharoriáchin piyapi ananpirinhuë'. Ya'ipi Yosë noninso' natéhuachin téhuëchinso', nanpiarin," ténin, itérin.

⁵ Ina quëran Quirosarin'pa' sopairi quëparin. Yosë chinotopiso pëi' a'campiso aipi quëpantarahuatón, itérin:

⁶ —Quëmaso' Yosë hui'ninquën nipatan, no'paquë niiquë'. Quiricanën quëran nani sha'huitérinquën.

"Yosë anquëninënpita a'patimarinquën a'paiinquënso marë' ni'ton, co ma'sha onpoaran-huë'.

Imirina quëran masarinënquë

ama na'piquë téranta' ya'quiamaso marëhuë',"

ténin ni'ton, no'paquë niiquë' a'pai'inënquën, itérin sopairi.

⁷ —Inca co nohuantërahuë'. Yosë quiricanënquë pënëninpoo'. "Ama Yosë tēniquësuhuë'. Ama camaiquësuhuë'. Ina nohuantérinsoáchin yonquicaso' ya'huérin," ténin quiricanënquë, itérin Quisosori.

⁸ Ina quëran a'na motopi'pa' sopairi quëpantarín. Inatohua quëran ya'ipi ninanoro'sa', ma'shanënpta, inapita a'notérin. Noyápiachin nininsopita ya'ipiya quënanin.

⁹ —Natéhuatanco, carinquën catahuaranquën, ya'ipi isopita hua'anëntapon. Isonahuatón, chinotoco chiniquën nanan quëchinguën huachi, itérin sopairi.

¹⁰ —Inca co nohuantërahuë'. Quëmaso' sopai hua'anquën. Patoco huachi. Yosë quiricanën quëran sha'huitérinpoo': "Siniñoroi chinotëquë'. Inasáchin natëcaso' ya'huérin," ténin, itérin Quisosori.

¹¹ Napotohuachina, sopairi patérin. Patochuachina, anquëniro'sari huëcapaimarahuatona', nocomaimapi.

*Quisoso pënëntacaso' caniaritërinso'
(Marcos 1.14-15; Lucas 4.14-15)*

¹² Ina piquëran Coansha tashinan pëiquë po'mopi. Pënëntërinso marë' napotopi. Ina natanaahuatón, Quisoso pa'nin Cariria parti. ¹³ Inatohua' pacaponahuë', co huachi Nasaritoquë ya'huérinhuë'. Sono' yonsanquë paaton, Capinaomoquë yacapatonin. Saporonoro'sa', nipitariro'sa', inapita iráca ya'huépique yacapatonin. ¹⁴ Iráca chachin Yosë nohuantón, Isaiasë ninorin. Ninshitaton, naporin:

¹⁵ "Na'a piyapiro'sa' Cariria parti ya'huépiso', imasapi.

Inapitaso', Cortanii' aquëtérán ya'huépi, marë Pancai' ya'cari'.

Inaquë saporonoro'sa', nipitariro'sa', inapita ya'huépi.

Inaquë inpioro'santa' ya'huépi.

¹⁶ Inapitaso' co Yosë nohuitatonaraihuë', tashi pochin cancantopi.

Chiminpachina', parisitomiatacaiso' ya'huépirinhuë',

Yosëri a'pintërinso pochin nanamën anitotarin noya cancantacaiso marë'.

Tahuëri pochin a'pintarin huachi," ténin iráca.

Naporinso chachin Quisoso inatohua' paaton, a'chinarin.

¹⁷ Naporor quëran huarë' Quisosori pënënarin.

—Iso tahuëri'sa' Yosë yahua'anëntarinquëma'. Napoaton ya'ipi co noyahue' yonquira-masopita nariantatoma', Yosë chachin tahuëretaantaco huachi, itëra'piarin pënënaton.

*Sami camayoro'sari imapiso'
(Marcos 1.16-20; Lucas 5.1-11)*

¹⁸ Cariria sono' yonsanquë pa'sahuaton, cato' sami camayoro'sa' quënanconin. A'naso' Simon. Pitro itopi anta'. Iinsö' Antërisë itopi. Ritinënapita të'yatapi sami macacaiso marë'.

¹⁹ —Huëco' iyaro'sa', imaqico a'chinchinquëma'. Sami manamaso pochachin piyapi'sa' masarama' Yosë imacaiso marë', itërin Quisosori.

²⁰ Napotohuachina, ritinënapita patahuatona', Quisoso imasapi huachi. ²¹ Ina quëran amasha pa'sahuaton, catoya'pi quënancoantarin. Santiaco, Coansha inapita itopiso'. Pa'pinarë' potiquë huënsëatona', ritinënapita pasonapi. Pa'pinaso' Sipitio itopi.

—Huëco' imaqico, itohuachina, ²² potinëna', pa'pina' inapita patahuatona', Quisoso imasapi huachi.

*Na'a piyapi'sa' a'chintérindo'
(Lucas 6.17-19)*

²³ Ya'ipi Cariria parti paaton, niyontonpiso pëiro'saquë pënëna'piarin. Noya nanan a'chinaton: “Yosë yahua'anëntérinquëma'”, itëra'piarin. Naporahuaton, na'a cania'piro'sa' a'naroáchin anoyatérin. Nisha nisha caniori maninsopita anoyatéra'piarin.

²⁴ Ya'ipi Siria partinta', nahuinin ni'ton, notohuar'o' cania'piro'sa' quëpi Quisosori anoyatacasó marë'. Nisha nisha canio inquitéra'piarin. A'naquëonta' sopairi ya'coancantérin ni'ton, co huachi inaora yonquirinso' yonquirinhue'. Tocona'piro'sa', apiaro'sa inaptanta' quëpapi Quisosori anoyatacaso marë'. Quëpachinara, ya'ipi anoyatéra'piarin.

²⁵ Hua'huayatérahuë' piyapi'sari Quisoso imasapi huachi. Cariria quëran, Ticaporisë quëran, Quirosarin quëran, Cotia parti quëran, Cortanii' aquëtérän quëran, inaquëranpita huë'pi Quisoso natanacaiso marë'.

5

Panënqué a'chininso'

¹⁻² Ina quëran notohuar'o' piyapi'sa' niyontonpi. Inapita quënanahuaton, Quisoso panënqué pa'sahuaton, huënsëconin. Imarinsopitari tancapitohuachinara, na'con a'chintárin.

*Noya cancantopisopita
(Lucas 6.20-23)*

³ “Natanco iyaro'sa' a'chinchinquëma'. Yosë huëntonënqué yaya'conpatama', iso pochin cancantacaso' ya'huërin. ‘Caora co nanitérahuë' noya nica'huaso'. Catahuaco Sinioro,' topatama', Yosë noya ni'sarinquëma' ni'ton, noya cancantarama'. Hua'anëntérinquë chachin aya'conarinquëma'.

⁴ Sëtohuatama', Yosë achinicancanarinquëma'. Oshanëma' yonquiatoma', cancanëma quëran huarë' sëtohuatama', Yosë noya ni'sarinquëma'. Catahuarinquëma' noya cancancamacaso marë'.

⁵ Sano piyapi nipatama', Yosë noya ni'sarinquëma'. Naporahuaton, a'na tahuëri nasharo'paquë ya'huëmiatarama'.

⁶ Tanarëso pochin, yamororëso pochin cancantatoma', Yosë na'con nohuantoco'. Ina pochin cancantacasoáchin nohuantohuatama', noya ni'sarinquëma'. Catahuarinquëma' ina pochin cancantacamaso marë'. Sano cancantarama'.

⁷ A'napita nosorohuatama', Yosë nosoroarinquëma' canpitanta'. Noya cancantarama'.

⁸ Ya'ipi cancanëma quëran imapatama', Yosë nohuitarama'. Naporahuaton, a'na tahuëri ina quënancontahuatama', noyá nohuitarama'.

⁹ Isoro'paquë na'a piyapi'sa' nino'huipirinahuë', canpitari catahuaco' noya ni-nonchina'. Ina marë' Yosë noya ni'sarinquëma'. Hui'nin pochin cancantiarinquëma'.

¹⁰ Yosë natëramaso marë' aparisitohuachinënquëma', Yosë noya ni'sarinquëma'. Hua'anëntérinquë chachin nani aya'coninquëma'. A'na tahuëri inápaquë ya'huëcontarama'.

¹¹ Imaramacoso marë' a'naquën no'huiarinënquëma', ahuëarinënquëma', pinosarinënquëma', nisha nisha nonpinapiarinënquëma'. Napotopirinënquëmahuë', ama sëtocosohuë'. Ina marë' Yosë noya ni'sarinquëma' ni'ton, noya cancantoco'. ¹² Iracanta' Yosë piyapinënpita pënëntohuachinara, a'naquëni inapochachin no'huipi. Napoaton a'napita no'huihuachinënquëma', noya cancantoco'. Parisitëramaso marë' Yosë'pa' na'con acanaarinquëma'. Ina yonquiatoma', capa cancantoco'," itërin Quisosori.

Yamora pochin nininso'

(Marcos 9.50; Lucas 14.34-35)

¹³ Ina quëran itantarín:

"Capitaso' iyaro'sa', yamora pochin nicatoma' a'napita catahuamaso' ya'huërin. Napoaponahuë', yamora chimipitë pochin nicatoma co a'napita catahuahuatamahuë', co huachi insonta natëarininquëmahuë'.

¹⁴ Isoro'paquë ya'huëpisopita tashinanquë pa'nëso pochin nisapirinahuë', canpitari a'pintatë pochin nitarama'. Ni'co' iyaro'sa'. Ninano' panënquë ya'huëhuachina, ya'ipi piyapi'sari quënanpi. ¹⁵ Nanparionta' i'chinpihuatëra, co caconquë ocohuëtérëhuë'. A'ninquëchin acorë' pëi' acoana a'pinacoso marë'. Piyapi'sa' inaquë ya'huëhuachinara, noya quënantopi. ¹⁶ Inapochachin canpitanta' a'pininso pochin nicatoma', noyasáchin nico'. A'napita nicatënënquëma': 'Ma noya Tata Yosëri catahuarin ni'ton, noya nisapi,' tosapi," ténin.

Iráca pënëntopiso'

¹⁷ Ina quëran itaantarin:

"Iráca Moisësë, pënëntona'piro'sa', inapita na'con pënëntopi. Pënëntatona', ninshítipi. Co ina nariantacaso' ya'huërinhuë', ténahuë. Ya'ipi inapita ninopiso' nanicaso marë' o'marahuë. Ma'sona tapon naporinsopita no'téquën sha'huichinquëma'.

¹⁸ Téhuëñchachin itëranquëma'. Isoro'pa' ta'huantaquë huarë' Yosë quiricanën iráca ninshitopiso' ya'huápon. Co a'na hui'sharinso téranta' topinan quëran ninshitopihuë'. Ya'ipi ninorinso' naniarin huachi. ¹⁹ Napoaton pi'pian téranta' co natëhuatamahuë', co Yosë noya ni'sarinquëmahuë'. Hua'anëntérinquë co acanarinquëmahuë'. Piyapi'sa' a'chintatoma': 'Ama natëquësohuë', itohuatama', co noya a'chinaramahuë'. 'Natëcaso' ya'huërin,' itohuatama', noya a'chinarama'. Natëhuatama', Yosë noya ni'sarinquëma'. Hua'anëntérinquë acanamiatarinquëma'. ²⁰ Cotio maistro'sa', parisioro'sa', inapita Yosë quiricanën noya nitapponaraihuë', co cancanëna quëran imapihuë'. Canpitanta' co ya'ipi cancanëma quëran huarë' imapatamahuë', co onporonta' Yosë hua'anëntérinquë ya'conaramahuë'," ténin.

Co no'heitacaso' ya'huërinhuë'

(Lucas 12.57-59)

²¹ Ina quëran itaantarin:

"Iráca pënëntopiso' nani nitotërama'. Mashocoro'sa' iráca pënënpí. 'Ama piyapi têpacosohuë'. Tépahuatama', hua'ano'sa' ana'intinquëmaso' ya'huërin,' topirinahuë'.

²² Co tépatérëso marëáchin ana'intinfoaso' ya'huërinhuë', ténahuë. A'na piyapi no'huihuatama', ana'intarinquëma'. Pinotohuatamanta', cotio ansiano'sa' ana'inchinquëma'. Cancanëma quëran huarë' no'heitacaso', 'Quëmaso' sopainquën', itohuatama', pënquë chachin parisitacaso' ya'huërin, ténahuë.

²³ Napoaton, iyaro'sa', a'naroáchin nanan anoyatacaso' ya'huérin. Yosë yachinoto-huatama', yonquico'. Pi'pian téranta' nanan ya'huéhuachin, ²⁴ a'naroáchin paatoma', anoyatoco'. Nani nanan anoyatohuatama', naporor huarë' Yosë pëinënqué paantaco'. Yosë chinotatoma' ma'sha yaquétérmaso', quétoco huachi.

²⁵ Ni'co'. Nihuitérmaso marë' yaquépahuachinénquéma', a'naroáchin nanan anoyatoco'. Co anoyatohuatamahuë', coisëqué quéparinénquéma'. Coisëqué quépahuachinénquéma', sontaro'saquë yo'coaninénquéma', tashinan pëiquë po'moarinénquéma'. ²⁶ Inaque po'mohuachinénquémaso', ya'ipiya pahuérétaquë huarë' pipiarama', ténin Quisoso.

Monshihuaninso'

²⁷ Ina quérān itantarín:

"Isonta' iráca pënëntopiso'. 'Sa'ama' ya'huétohuachinénquéma', ama monshihuanicoso-huë', ténin iráca, natantérara'. ²⁸ Nipirihuë', co monshihuanpiso maréáchin ana'intacaso' ya'huérinhue', ténahuë. A'na sanapi cancanénna quérān noyahuachina', ina marénta' oshahuanapi. Nani monshitérinso pochin Yoséri ni'sarin.

²⁹ Napoaton, ya'pirama quérān quénanamaso marë' co noyahuë' yonquihuatama', pa'pi co noyahuë' nisarama'. Ya'pirama' ocoirama' naporini, noya noya niitomahuë'. Somaraya nipomarahuë', co parisitopiquë pa'itomahuë'. Cato' quérān chachin noya ni'tapomarahuë' parisitopiquë tē'yatohuachinénquéma', pa'pi co noyahuë' nisarama'. ³⁰ Imirama quérān pi'pian téranta' co noyahuë' nipatama', oshahuanama'. Ninishitëimiratérara' naporini, noya noya niitomahuë'. Apia nipomarahuë', co parisitopiquë pa'itomahuë'. Imirama' nishitérmaso pochin cancantatoma', ya'ipi aoshahuaninquémasco' a'poco', ténin.

Sa'ahuano'sa' pënëninso'

(Mateo 19.9; Marcos 10.11-12; Lucas 16.18)

³¹ Ina quérān itaantarin:

"Isonta' iráca pënëntopiso'. 'A'na quémapi sa'in yatë'yatohuachin, co topinan tē'yatocaso' ya'huérinhue'. Coisëqué paaton, quirica aninshichin: "Iso sanapi nani tē'yatérahuë huachi," ta'caso aninshichin. Ina quérān sanapi quétacaso' ya'huérin,' topi. ³² Caso nipirihuë' nisha pënënanquéma'. Co sa'ama monshihuanpachinahuë', co onporonta' tē'yatamaso' ya'huérinhue', ténahuë. Topinan tē'yatohuatama', oshahuanarama'. Ina sanapinta' so'yantahuachin, monshihuaninso pochin nisarin. Nasha so'ionta', monshin pochin nisarin. Co onporonta' tē'yatocaso' ya'huérinhue', ténahuë," ténin.

No'téquénáchin nonacaso' ya'huérinso'

³³ Ina quérān itaantarin:

"Isonta' shimashonëmapita iráca pënënpiso'. 'Yoscoarë' no'téquén nontaranquéen, itohuatéra, no'téquén nontacaso' ya'huérin, Yosë ana'intoahuachinpoa'. Ina pochin nonpatéra, sha'huitéranso chachin nicacaso' ya'huérin,' topi. ³⁴ Nipirihuë', carinquémä' sha'huichinquéma'. No'téquénáchin nonpatéra, co Yoscoarë' ta'caso' ya'huérinhue'. Co onporonta' nonpinacaso' ya'huérinhue', ténahuë. A'naquénso' yanopinatona', tapona': 'Pi'iro'të' ya'huérin ni'ton, no'téquén nontéránquéen,' toconpi. 'Ina pochin nontato, nonpintohuatéra, co Yosë ana'intarincohuë', topirinahuë'. Pi'iro'tënta' Yoséri ninin. Inaque ya'huaton, ya'ipiya hua'anéntarin. Napoaton co ina pochin nonacaso' ya'huérinhue'. ³⁵ A'naquéonta' tapona': 'Isoro'pa' ya'huérin ni'ton, no'téquén nontéránquéen,' topi. Yanopinatona', napopirinahuë'. Isoro'panta' Yoséri ninin. Chini chiniquén nanantaton, iséquenta' hua'anéntérinpoa'. 'Quirosarin ya'huérin ni'ton, no'téquén nontéránquéen,' toconpi a'naquéonta'. A'na tahuéri inaque Yoséri a'paimarinso' hua'anéntapon huachi. Napoaton co ina pochin nonacaso' ya'huérinhue'. ³⁶ 'Moto' ya'huétérinco ni'ton,

no'tequén nontéranguén,' topi a'naquéonta' yanonpinatona'. Ama ina pochin noncosohuë'. Acatohuatamara, co nanitéraramahuë' a'na ainëma téranta' ayararintantacaso'. Yoséíchin nanitérin. ³⁷ Ma'sona téranta' iyaro'sa' nonpatama', no'tequénáchin nonco'. 'Pa'sarahuë,' topatama', paco'. 'Co pa'sarahuë',' topatama', ama pacosohuë'. No'tequénáchin nonpatama', co Yoscoarë' ta'caso' ya'huérinhue'. Pi'pisha téranta' piyapi nonpintohuatama', sopai nohuanton napoarama', ténahuë," ténin Quisoso.

Yai'huérëtopiso'

(Lucas 6.29-30)

³⁸ Ina quéran a'chintaantarín:

"Isonta' iráca pénëntopiso'. 'A'na piyapi a'nari ahuéaton, tapirayahuachin, coiséquë quëpaquë'. Inaqué no'tequén i'huérëchin. Inanta' tapirayacaso' ya'huérin. Natéonta' nipantohuachin, coiséquë quëpaquë' i'huérëchin,' topi. ³⁹ Napopirinahuë', carima' sha'huichinquëma'. Co canpita capiniso' nii'huérëtacaso' ya'huérinhue', ténahuë. Ma'sha onpotohuachinénquëma', ama no'huicosohuë'. Panpirayahuachinénquëma', ama manta' i'huérëtocosohuë'. Naquéranchin panpiantahuachinquëma', co naporó téranta' no'huicaso' ya'huérinhue'. ⁴⁰ A'naquén no'huiténquëma', coiséquë quëparinénquëma'. 'Amoranso quétoco,' itohuachinénquëma', quétoco'. Aipi a'moransonta' quëpatopirinénquëmahuë', co no'huicaso' ya'huérinhue'. ⁴¹ Inso téranta' camaiaténquëma': 'Pë'pëtonéhuë macaton, a'na quiromitro pochin quëpatoco,' itohuachinénquëma', ama no'huicosohuë'. 'Noyahua'. Nohuantohuatan, cato' quiromitro quëpachinquén,' itoco'. ⁴² A'naquén: 'Ma'sha quétoco,' itohuachinénquëma', ama apiratomahuë', quétoco'. 'Canta' ma'sha a'nanco, topirahuë', itohuachinénquëmanta', a'nanco'. Onpopionta' nosoroaté' catahuacaso' ya'huérin," ténin.

Inimicoro'santa' nosorocaso' ya'huérinso'

(Lucas 6.27-28, 32-36)

⁴³ Ina quéran a'chintaantarín:

"Isonta' iráca pénëntopiso'. 'Canpita capini ninosoroco'. Inimiconémapitaso nimirinhuë', co nosorocaso' ya'huérinhue', topi. ⁴⁴ Nimirinhuë' carima' sha'huichinquëma'. Inimiconémapitanta' iyaro'sa', nosoroco'. Aparisitopirinénquëmaonta', nosorocaso' ya'huérin. Inapita marénta' noya Yosé nontoco' inahuanta' catahuain. ⁴⁵ Inapotohuatama', Yosé pochin cancantarama'. Inaso' ya'ipi piyapi'sa' nosororin. Ina nohuanton, pi'i, o'nan, inapita ya'huérin noya nanopicaso maré'. Co imarinsopita maréáchin pi'i a'pininhue'. Noya nipesopita, oshahuano'santa', ya'ipiya a'pintérin. Naporahuaton, o'naonta' napopianachin acotérinpoa' ma'sha apapotacaso maré'. ⁴⁶ Nipayaramasopitaráchin nosorohuatama', co ina maré' Yosé acanaarinquëmahuë'. Copirno maré' coriqui ma'patona'piro'santa' nipayapisopita nosoropi. ⁴⁷ Iyamaráchin noya nontohuatama', co noya noya ninamahuë'. Co Yosé nohuitopisopitahuënta' inahua capini noya ninontopi. Napoaton canpitaso' nisha piyapiro'santa' noya nontoco'. ⁴⁸ Tata Yosé pochin cancantacaso' ya'huérin. Inaso noyasáchin ninin ni'ton, canpitanta' ina pochin cancantatoma', noyasáchin nico'," ténin.

6

A'napita catahuacaso' ya'huérinso'

¹ Naquéranchin Quisoso pénëntaantarín:

"A'naquénso' piyapi'sari noya nicacaiso maré' noya Yosé imapisopita pochin ya'nopirinahuë', co tēhuéñchachin cancanéna quéran huaré' Yosé yonquipihuë'. Ina pochin nipatama', co inápaquë Tata Yosé acanaarinquëmahuë'. Ama iyaro'sa' inapita pochin nicosohuë'. ² Ma'sha sa'ahuar'o'sa' quétohuatama', ama a'ninquéchin quétocosohuë'. A'naquén niyontonpiso pëiquë ya'conahuatona', coriqui sa'ahuar'o'sa'

marë' quëtopirinahuë', a'ninquëchin quëtopi. 'Ina marë' noya ni'sarinacoi,' ta'tona', napopi. Cachiquënta' coriqui quëtopi piyapi'sari nicacaiso marë'. Co tëhuëñchachin nosoroaponaraihuë', napopi. Piyapi'sariso' noya ni'pirinahuë', Yosëriso' co noyahue' ni'nin. Co inápaquë acanaarinhuë', tënahuë. ³ Canpitaso nipurinhuë', sa'ahuaro'sa' ma'sha quëtohuatama', ama a'ninquëchin quëtocosohuë'. Ama nipayaramaso téranta' sha'huitocosohuë'. ⁴ Co piyapi'sa' nitotopirinahuë', Tata inápaquë ya'huérinso' ni'sarinquëma'. Ina acanaarinquëma', itérin.

*Yosë nontacaso' a'chininso'
(Lucas 11.2-4)*

⁵ Ina quëran itaantarín:

"Yosë nontohuatama', ama nonpina'piro'sa pochin nicosohuë'. Inapitaso' niyon-tonpiso pëiquë huanirahuatona', na'con Yosë nontopirinahuë', co cancanëna quëran huarë' nontopihuë'. Cachiquënta' a'ninquëchin Yosë nontopirinahuë', piyapi'sari noya nicacaiso marë' napopi. Co tëhuëñchachin Yosë yonquipihuë'. Piyapi'sari noya ni'pirinahuë', Yosëriso' co acanaarinhuë'. ⁶ Canpitaso nipurinhuë' Yosë yanontohuatama', canpitaoráchin onpopiyanquë téranta' Yosë nontacaso' ya'huérin. Quëmaoraíchin Yosë nontéquë'. Co quënanpiranhue', nataninquën. Co piyapi'sa' natanpirinénquënhue', Yosëso' noya natanaténquën, acanaarinquën.

⁷ Yosë nontohuatama', ama inachin inachin nontocosohuë'. Co Yosë imapisopitahuë' ina pochin yonquipi. 'Hua'qui' nontohuato, natanatonco catahuarinco,' topirinahuë'. Co Yosë nohuitatonahuë', napopi. ⁸ Ama inapita pochin cancantocohue'. Co'huara Yosë nonchátérerasenquëmahuë', ya'ipi pahuantérinquëmasopita nitotérin. ⁹ Napoaton Yosë yanontohuatama', iso pochin nontoco':

'Tata Yosë, quëmaso inápaquë ya'huaponahuë', natanancoi.

Quëmasáchin noya noyanquën ni'ton, ya'ipi piyapi'sa' chinochinénquën.

¹⁰ Chini chiníquën nanantéraran ni'ton, ya'ipicoi natëiinquën.

Inápaquë no'téquën natérinénquënso pochachin
catahuacoi quëma nohuantéransoráchin nii.

¹¹ Nani tahuëri catahuacoi cosharo' ya'huéchincoi.

¹² Co noyahue' nicatoi, oshahanai. Nosoroatoncoi, oshanëhuëi inquitocoi.

A'napita ma'sha onpotohuachincoi, nanan anoyatéraiso pochachin
oshanëhuëi inquitatoncoi, anoyacancantocoi.

¹³ Co noyahue' yonquihuatoi, catahuacoi a'naroáchin nanianchii.

Catahuacoi ama sopai minséincoisohuë'. [Quëmasáchin hua'anéntarancoi. Ya'ipi nanitaran. Ipora quëran huarë' ya'ipiya natëinénquën. Amen,] itoco' Yosë nontohuatama'.

¹⁴ A'naquën ma'sha onpotopirinquëmaonta', noya nontacaso' ya'huérin. Nanan anoyatohuatama', Tata Yosënta' canpita oshanëma' inquitarinquëma'. ¹⁵ Co nanan anoyatohuatamahuë', Yosënta' co oshanëma' inquitarinquëmahuë', itérin Quisosori.

Co coshatatonaraihuë', Yosë nontopiso'

¹⁶ Ina quëran itaantarín:

"Ama nonpina'piro'sa pochin nicosohuë'. A'naquën Yosë nontacaso marë' ya'ipi tahuëri co manta' coshatérinhue'. Naporahuaton, co nitapamantarinhue'. Sétérëso pochin ya'norin a'napita nitotacaiso marë'. Co cancanën quëran chinotaponahuë', a'napitari nicacaiso marë' naporin. Ni'pachinara: 'Ma noya Yosë chinotérin,' topi. Piyapi'sari noya ni'pirinahuë', co huachi Yosëri acanaarinhuë'. ¹⁷ Canpitaso nipurinhuë' Yosë nontacaso marë' co coshatohuatamahuë', ama piyapi'sa' sha'huitocosohuë'. Noya ihuiantahuatoma', nitapaco'. ¹⁸ Ama a'napita nitotacaiso marëhuë' inapoco'. Tata Yoséichin nitotarin. Co quënanpiréhuahuë', ya'ipiya ni'sarinpoa'. Ina marë' inápaquë acanaarinquëma', itérin.

Canamiatérëhuaso'
(Lucas 12.33-34)

¹⁹ Ina quëran itaantarin:

“Ama iyaro'sa' ma'sharáchin yonquicosohuë'. Ama na'con coriqui, ma'sha, inapita yontoncosohuë'. Isoro'paqué ya'ipi ma'sha a'naroáchin mocarin, chanatérin. No'soni pë'yarín. Chi'chirotérin. Ihuatéro'sa' ya'conatona', ihuarinénpoa'. Naporin. Napoaton, isoro'paqué ya'huérinsopita co ya'huëmiatérinhuë'. ²⁰ Inápaqué ya'huérinsopitaso nípirinhuë', ya'huëmiatarin. Yosë na'con yonquiatoma', noya nico'. Ina maré' na'con sacatoco' inápaqué acanamiachinquëma'. Inatohua' co manta' mocaponhuë'. Co no'soni pë'yaponhuë'. Co chi'chirotaponhuë'. Co ihuatéro'sa' ya'conatona' ihuaponénpoahuë'. Napoapon. ²¹ Ma'sharáchin nohuantohuatama', co Yosë yonquiaramahuë'. Nípirinhuë' Yosë na'con na'con nohuantohuatama', ina na'con na'con yonquiarama', ténin Quisoso.

Nitapicancaninso'
(Lucas 11.34-36)

²²⁻²³ Ina quëran a'chintaantarin:

“Ya'piranco quëran ma'sha quënanë'. Co pëtorayatohuatérahuë', noya ni'térë'. Nitapirayahuatéra, co manta' quënantérëhuë'. Canpitanta' ya'ipi cancanëma quëran Yosë yonquihuatama', tahuëri pochin cancantarama'. Nípirinhuë', ma'sharáchin yonquihuatama', tashi pochin cancantarama'. Nitapicancanpatama', aquë aquëtë co noyahue' cancantarama huachi,” itérin.

Corquiráchin yonquipisopita
(Lucas 16.13)

²⁴ Ina quëran itaantarin:

“A'na piyapi cato' patron ya'huëtohuachina, nisha nisha camaitopi ni'ton, co nanitérinhuë' cato chachin natëcaso'. A'naso' nohuantaton, noya natëarin. A'naso nípirinhuë' co onpopinchin nohuantatonhuë', co natëarinhuë'. Inapochachin canpitanta' corquiráchin cancantohuatama', co nanitaramahuë' Yosë natëcamaso”, ténin.

Yosë noya a'pairinpoaso'
(Lucas 12.22-31)

²⁵ Ina quëran itaantarin:

“A'naquënso' ma'sharáchin yonquipi. Capacaiso', o'ocaiso', a'mocaiso', inasáchin yonquipi. ‘Nani ma'sha ya'huëtohuachinco, noya ya'huarahuë huachi,’ topirinahuë'. Ama iyaro'sa' ina pochin cancantocosohuë'. Co capacaso maréáchin isoro'paqué acorinpoahuë'. A'mocasonta', co onpopinchin yonquicaso ya'huérinhuë'. Yosë na'con na'con yonquihuatéhu', catahuarinpoa noya ya'huëcaso'. ²⁶ Ni'co'. Inairaro'sa' co manta' sha'pihuë'. Co ma'sha sha'piso' macatona', pëinënaqué acopihuë'. Napoaponahuë', Tata Yosëri catahuarin. Ina nohuanton, cosharo' quënanpi. ¡Canpitaso' inapita quëran noya noya ni'ninquëma! ²⁷ Chiminacaso nanihuachin co napion ancantopiramahuë', co a'na tahuëri térranta' nanitaramahuë' ana'huëcamaso'.

²⁸ Nitapacamasona', co aquëtë yonquicamaso ya'huërihuë'. Ni'co'. Yancoro'sa' topinan noya papotopi. Co sacatopihuë'. Co manta' a'mocaiso nípihuë'. Nípirinhuë', noyápiachin yancotopi. ²⁹ Iráca copirno Saromon nani ma'sha ya'huëtérin. ‘Ma noyápiachincha a'morin paya!’ topi. Yancoro'saso nípirinhuë', ina quëran noya noya ya'nopi. ³⁰ Pacatoro quëran huarë' Yosëri yonquirin. A'na tahuéríchin ya'huëpirinhuë', ahuiipachina, ahuiquitëre huachi. Co hua'qui' ya'huëpirinhuë', Yosëri yonquirin. Ina nohuanton, noya papotérin. Canpitaso' ina quëran na'con na'con yonquirinquëma'. ¿Onpoatomata' nipachin, co natëramahuë'? ‘Yosë catahuarinco mini,’ ta'caso nípirinhuë'. ³¹ Ama ma'sha yonquiatoma', pa'yancosohuë'. ‘¿Ma'cha ca'në'poya? ¿Ma'cha o'orë'poya? ¿Ma'cha a'morë'poya?’ ama tocosohuë'. ³² Co Yosë imapisopitahuë' ina pochin yonquipi.

Ma'sharáchin yonquipi. Canpitaso nípirinhuë' tatanëma' inápaquë ya'huérinso' yonquirinquëma'. Ya'ipi pahuantérinquémasopita nani nitotérin. ³³ Napoaton Yosë na'con na'con yonquico'. A'napitanta' catahuaco' hua'anéntérinqué ya'conacaiso marë'. Yosë nontoco' noyasáchin yonquicamaso marë'. Ina pochin cancantohuatama', catahuarinquëma'. Ina nohuanton, ma'sha pahuantérinquémasopita ya'huëtarinquéma'. ³⁴ Napoaton ama tashiraya ma'sha onpoamaso' yonquiatoma', pa'yancosohuë'. Tashirayanta' ma'sha onpohuatama', pa'yanacaso ya'huapon ni'ton, co ipora quéranchin ina yonquiatoma co napion ancantápamaso ya'huérinhuë', ténin Quisoso.

7

*Nocantoro'sa' pënëninsö'
(Lucas 6.37-38, 41-42)*

¹ Naquéranchin Quisoso pënëntaantarín:

"Ama iyaro'sa' a'napita nocancosohuë'. 'Paso' quëmapi co noyahuë', ama tocosohuë', Yosë ana'intochinquëma'. ² A'napita pinopatama', Yosënta' co noyahuë' ni'sarinquéma'. Piyapi chiníquën nonapihuatama', Yosënta' chiníquën ana'intarinquéma'. Piyapi noya yonquirapihuatama', Yosënta' noya ni'sarinquéma'. ³⁻⁵ Co iyaparin nocanacaso ya'huérinhuë'. Inaso pi'pian co noyahuë' nipachin, mo'shiri ya'conayatérinso pochin ninin ni'ton, nocanan. Quémanta' co noyahuë' ninan ni'ton, narasératë' nani noyá ya'copirayarinquënsö pochin nípiranhue', naporan. Napoaton 'carinquën noya nicaténquën mo'shi ocoichinquënsö, co itamaso ya'huérinhuë'. Napotohuatan, nonpinan. Narasératë' niocoitëquë'. Ina quérana noya quénantaran. Naporo huarë' nanitaran iyaparin mo'shi ocoitacaso', itérin.

⁶ Ina quérana itaantarín:

"Isonta' a'chinchinquëma'. Ni'niro'sa', coshiro'sa', inapita co yonquipihuë'. Hui'rina'pi pa'ton nininso' co quëtacaso' ya'huérinhuë'. Nò'paquë acorama' naporini, i'nachitonahuë'. Ina quérana canpitanta' yaquëtéíténquëmahuë'. A'naquën piyapi'santa' ni'niro'sa pochin cancantopi ni'ton, Yosë nanamën a'chintohuatama', chiníquën no'huiarinénquëma'. Co pi'pisha téranta' nohuantohuachinahuë', tananpitoco', itérin.

*Yosë nontacaso' ya'huérinso'
(Lucas 11.9-13; 6.31)*

⁷ Ina quérana itaantarín:

"Nani tahuëri Yosë nontoco' nata'inquëma'. Pahuantérinquémaso' nipatama', quëtarinquëma'. Ma'sha yonirëso pochin cancantatoma', nontaco' catahuainquéma'. Ya'coana pi'nirëso pochin cancantatoma', nontoco' aya'coinquéma'. ⁸ Téhuëñchachin ma'sha nitohuatama', quëtarinquëma'. Hua'qui' ma'sha yonípatama', quénanarama'. Ya'coana pi'nirëso pochin nipatama', i'soatarinquëma'.

⁹ Hui'nama' tanaton cosharo' natanpachinquëma', co na'pi quëtéraramahuë'. ¹⁰ Sami nayahuachina', co ya'huan quëtaramahuë'. Sami quëtarama'. ¹¹ Canpitaso' co noyahuë' yonquiapomarahuë', hui'nama' nosororama'. Noya ma'sha quëtérarama'. Yosëso' noya noya ni'ton, na'con na'con nosororinquëma'. Inápaquë ya'huaponahuë', hui'ninpita pochin ni'ninquëma'. Nontohuatama', noya nininso' quëtarinquëma'. Catahuarinquëma' noya cancantacamaso marë'.

¹² Noya ninosorocaso' ya'huérin. Canpitaso' nohuantérarama' a'napita nosoroinénquëmaso'. Napoaton campita nohuantéraramaso chachin inapitanta' nosoroco'. Ninosoroatoma', nicatahuaco'. Yosë nohuanton, Moisës, pënëntona'piro'sa', inapita na'con pënënpirinénquëmahuë', ninosorocaso' na'con na'con nohuantérin. Ninosorohuatama', noya imasarama', ténahuë', itérin Quisosori.

*Cato' iraya'huérinso'**(Lucas 13.24)***13-14** Ina quëran itaantarin:

“Ni'co'. Cato' ira ya'huérin. A'naso' pancana. Co sacaihuë' pa'tacaso' ni'ton, na'a piyapi'sa' ina pa'tapi. Ya'coanamënso' pancana nimirinhue', ina pa'tohuatama', parisitopiquë paatoma', parisitomiatápoma'. A'na iraso nimirinhue', sacai pochin pa'tacaso'. Ya'coanamënso' yamianasha'huaya. Caraíchin piyapi'sa' ina quënanpi. Inaquë ya'conpatama', nanopimiatarama'. Ina ira pa'toco'. Sacai' Yosë imacaso' niphonahuë', chiníquën cancantatoma', imaco huachi,” ténin Quisoso.

*Nisha a'china'piro'sa'**(Lucas 6.43-44)***15** Ina quëran itaantarin:

“Ni'cona iyaro'sa' nonpin nanan pënëntona'piro'sa' nonpintochinënquéma'. ‘Quiyanta' imarai,’ itopirinënquémuë', co cancanëna quëran imapihuë'. Tanan ni'ni' yamap-intérinso pochin cancantatona', yatapicananinquëma'. Co no'téquën a'chinapihuë'.

16 Napoaton noya yonquico'. Noya cancantohuachina', noya nisapi. Co noyahuë' cancantohuachina', co noyahuë' nisapi. Co no'téquën a'chintarinënquémuë'. Ni'co'. Sharo'sa' nitérin quëran nohuitéröhua'. So'huanpiso', co miséra nitérinhue'. ¡Shihuarionta' co quëpa nitérinhue'! **17** Nara noya nipachina, noya nitérin. Co noyahuë' nipachina, co noya nitérinhue', napoonin. **18** Nitacaso' nara nipachina, inachachin noya nitérin. A'naso nimirinhue', co nitacaso' narahuë' ni'ton, co onporonta' noya nitérinhue'. **19** Co noya nitohuachinhue', a'nëhuachinara pënqué ahuiquitopi huachi. **20** Nitérin quëran nara nohuitéröhua'. Inapochachin a'china'piro'sa' nohuitaröhua'. Noya cancantohuachina', noya nisapi. Co noyahuë' cancantohuachina', co noyahuë' nisapi. Co no'téquën a'chinapihuë',” itérin.

*Yosë huëntonënqué ya'conpisopita**(Lucas 13.25-27)***21** Ina quëran itaantarin:

“Na'a piyapi'sa': ‘Sinioro, Sinioro,’ itopirinacohue', a'naquën co cancanëna quëran imarinacohue ni'ton, co Yosë hua'anëntérinquë ya'conapihuë'. Yosë natëpisopitaráchin inatohua' ya'huëcontapi huachi. **22** Ayaro' tahuëri nanihuachin, na'a piyapi'sa' non-taponaco: ‘Quëma nanamën Sinioro sha'huirai. Quisoso nanan quëtérincoi, ta'toi sopairo'sa' a'parai. Quëma pochin sacai' nininsopita ninai,’ itaponaco. **23** Cariso nimirinhue' itapo: ‘Yanonpintatomaco, napopiramahuë', co noyahuë' cancantérrama'. Co piyapinëhuëpitanguëmuë'. Co onporonta' imaramacohue'. ¡Paco huachi!’ itapo,” itérin Quisosori.

*Cato' pëirinso'**(Marcos 1.22; Lucas 6.47-49)***24** Ina quëran pënëntaantarin:

“Na'aquëma' natanamacoso marë' huë'nama'. Natëhuatamaco, a'na quëmapi pochin nisarama'. Ina quëmapiso', natéricho quëran yapëirin. Yapëihuachina, noya yonquia-ton, noya pëiaquë yonirin. Na'pitë' quënanahuaton, inaquë noya pëirin. **25** Chiníquën o'nanpachina, panca ihuan pa'nin. Pamatochuachina, opotopirinhuë', co anotérinhue'. Chinii' niphonahuë', co të'yatérinhue'. Panca ihuantaponahuë', na'pitëquë pëirin ni'ton, noya huanirin. Co të'yatérinhue'. **26** A'naquënsa nimirinhue' yapëihuachina, co noya yonquirinhue'. ‘Inotéquë téranta' pë'i,’ ta'ton, inaquë pëipirinhuë'. **27** Ina quëran panca o'nanin huachi. Pamatochuachina, chiniiri të'yatérin. Panca ihuantohuachina, pë'i a'naroáchin të'yatérin. Ya'ipi noyá quirin huachi,” itérin Quisosori.

²⁸ Ya'ipi piyapi'sa' natanahuatona', pa'yanpi. "¡Ma noyacha a'chintérinpoa paya! ²⁹ Co hua'anhuë' níponahuë', chiníquën nanantaton, a'chintérinpoa'. Co cotio maistro'saso' ina pochin a'chinpihuë'", topi.

8

*Chana caniori maninso'
(Marcos 1.40-45; Lucas 5.12-16)*

¹ Ina quëran panën quëran nohuaramahuachinara, na'a piyapi'sari imasapi. ² Pa'sapirinahuë', a'na cania'pi huë'nin, chana caniori maninso'. Nacapirahuaton, Quisoso nantëntaquë isonin quëran, itapon:

—Nohuantohuatan Siniro, quëma nanitëran anoyatancoso'. Anoyatoco topirahuë', itërin. ³ Quisosori së'huarahuaton, itërin:

—Nohuantëruhuë mini, iyasha. ¡Noyatëquë huachi! itërin. Itohuachina, a'naroáchin noyatërin. Canio inquirin huachi.

⁴ —Ama piyapi'sa' sha'huítëquësuhuë'. Corto hua'an ya'huérinquë paaton, noyatéranso' a'notonquë' ni'inquën. Naporahuaton, ma'sona Moisésë sha'huirinso' quëpaquë' noyatéranso' nitotacaiso marë', itërin. Napotohuachina, pa'nin huachi.

*Capitan piyapinën anoyatérinso'
(Lucas 7.1-10)*

⁵ Ina quëran Capinaomoquë paantarin. Canconpachina, a'na Noma capitani huëcapairahuaton:

⁶ —Piyapinëhuë Siniro chiníquën canorin. Pëinëhuëquë quëhuëñárin. Co huachi nanitërinhuë' iratacaso'. Pa'pi parisitarin, itiirin.

⁷ —Noyapa', pa'sarahuë anoyatapo, itërin.

⁸ —Quëmaso' Siniro noya noyanquën. Co caso' quëma pochincuhuë'. Co pëinëhuëquë huarë' huëcamaso' ya'huérinhue'. Topinan camaiquë' noyachin, tënahuë. ⁹ Caso' hua'anéhuë natëruhuë. Capitanco ni'ton, sontaro'sa' natërinaco canta'. "Paqué," itohuatëra, pa'nin. "Huéquë," itohuatëra, huë'nin. Piyapinëhuëpitanta' camairahuë. "Sacatëquë," itohuatëra, sacatarin. Inapochachin quémanta' topinan camaihuatan, a'naroáchin piyapinëhuë noyatarin tënahuë, itërin.

¹⁰ Quisosori natanahuaton, pa'yatërin. Napoaton piyapi'sa' itapon:

—¡Ma noyacha iso quëmapi natërinco paya! Nisha piyapi níponahuë', israiro'sa quëran noya noya natërinco. ¹¹ Iporaso huachi nisha nisha parti quëran huë'sapi. Nisha piyapi'sa' níponaraihuë', imatona', Yosë hua'anéntërinquë ya'conapi. Inápaquë pa'pachina', Apraan, Isaco, Cacopo, inapita nohuitapi. Inapitarë' huënséapi coshatacaiso marë'. Noya ya'huérapi huachi, tënahuë. ¹² A'naquëmaso nípirinhuë', "Quiyanta' Yosë piyapinënpitacoí," topiramahuë', co natëramahuë' ni'ton, co hua'anéntërinquë ya'conaramahuë'. Tashinanquë té'yatarinquëma'. Inaqué na'nëarama', chiníquën parisarama huachi, itërin Quisosori.

¹³ Ina quëran capitán itantarín:

—¡Ya'huérinquë iyasha paantaquë! Natërancó ni'ton, apiramiachin piyapinën noyatarin, itërin.

Naporo chachin piyapinën noyatërin. Paantahuachina, sano quënanconin huachi.

*Pitro a'shatën a'naroáchin anoyatérinso'
(Marcos 1.29-31; Lucas 4.38-39)*

¹⁴ Ina quëran Pitro pëinënquë pa'pi. A'shatën chiníquën sapoton, quëhuëñárin, quënanconpi. ¹⁵ Quisosori maimirarahuaton, a'naroáchin anoyatërin. Co huachi saporinhuë'. Huanirahuaton, inari chachin a'carin, o'shitërin, napotërin.

*Na'a cania'piro'sa' anoyatérinso'
(Marcos 1.32-34; Lucas 4.40-41)*

¹⁶ I'huanahuanquë yatashirahuaso', na'a piyapi'sa' huëcatona', cania'piro'sa' quëpi Quisosori anoyatacaso marë'. A'naquën sopairi ya'coancantérin ni'ton, co inaora yonquirinso' yonquirinhuë'. Quisosori topinan noncharapirinhuë', sopairo'sa' pipipi. Ya'ipi cania'piro'sa' anoyatérin. ¹⁷ Iráca Isaiasë ninoton, ninshitérin. "Caniopiréhuahuë", anoyatarinpoa'. Canio inquitarinpoa', ténin. Cania'piro'sa' anoyatohuachina, nimirinso' nanirin huachi.

*Ya'ipi cancanëna quëran imacaiso'ya'huérinso'
(Lucas 9.57-62)*

¹⁸ Notohuaro' piyapi'sa' niyontonpachinara, ca'tano'sanënpita itérin:
—Poti maconco'. Aquëtéran pa'ahua', itapirinhuë', ¹⁹ a'na cotio maistrori nontiirin.
—Canta' Maistro imainquën. Insëquësona pa'patan, canta' pa'i, topirahuë', itérin.
²⁰ —Sacai' imancoso' iyasha, ténahuë. Anashiro'sa', huë'ëshinantëna ya'huëtopi, inaqué huë'ëpi. Inairaro'santa' pë'pëtëna ya'huëtopi. Caso nimirinhuë' Yosë quëran quëmapico nimirahue', co pëi' ya'huëtérincohuë'. Pa'sápato, co ya'huëmiatérahuë', itérin.

²¹ A'na imarinsoarinta' huëcapairahuaton, itiirin:
—Canta' oshaquëran imamiachinquën, topirahuë', co apira nanitérahuë'. Tatahuë nani noyá mashotérin. Chiminpachin, cari pa'pitahuë. Ina quëran imamiataranquën, itopirinhuë'.

²² Quisosori itérin:
—A'naquën co nohuantopihuë' imainacosó'. Chimipi pochin cancantopi. Inapitari pa'pichina'. Quëmaso nimirinhuë' ca na'con na'con yonquiatonco, imaco, itérin.

*Ihuan a'parinso'
(Marcos 4.35-41; Lucas 8.22-25)*

²³ Ina quëran Quisoso potiquë ya'conin. Ya'compachina, ca'tano'sanënpitanta' ya'conpi anta'. ²⁴ Paaquëya', a'nanaya panca ihuani manin. Panca sono' ni'ton, co'sacairi poti opoto opototahuaton, yamëntaitapirinhuë'. Ya'huëre Quisoso' huë'ërarin.

²⁵ Napohuachina, ca'tano'sanënpitari ochinanpi.

—¡Catahuaco! ¡Chimiitarhua' canpoaso'! itopi.
²⁶ —¿Onpoatomata' tē'huaramaso'? ¿Co noya natéyatéraramacohuë' ti? itérin. Ina quëran huënsëntarahuaton, ihuan a'parin. Sononta' nontérin.

—Sanoquë', itohuachina, a'naroáchin co'sacai' sanoirin. ²⁷ Ina nicatona', ca'tano'sanënpita pa'yanpi.

—¿Ma quëmapicha isoso' ni'ton, ihuan a'parin paya? Sononta' a'naroáchin asanoirin, nitopi.

*Sopairo'sari ya'coancantopiso'
(Marcos 5.1-20; Lucas 8.26-39)*

²⁸ Ina quëran aquëtéran canconpi. Inaso no'pa' Catara parti itopi. Inaqué cato' quëmapi ya'huëpi. Na'a sopairo'sari ya'coancantopi ni'ton, co huachi yonquipihuë'. Pa'pi hua'yantopi. Na'pi naninquë chimipiro'sa' po'mopiquë ya'huërapi. A'naroáchin yaahuëtopi ni'ton, co inataquëchin pa'pihuë'. Quisoso nonshihuachina, sopairo'sari ya'coancantérinsopita na'pi nanin quëran pipirahuatona', huë'sapi nacapirin. ²⁹ Quisoso quënanahuatona', chiníquën nontapi.

—Nohuitérainquën Sinioro. ¿Ma'ta' onpotaponcoi? Quëmaso' Yosë hui'ninquën ni'ton, co'huara ayaro' tahuëri naniyatérerasohuë', ¿aparisitarancoi ti? itopi.

³⁰ Ina ya'cariya na'a coshiro'sa' ya'huërin. Huëntonën coshatapi. ³¹ Inapita quënanahuatona', itaantapi:

—Yaocoihuatancoi, coshiro'saquë téranta' a'pacoi ya'coanta'ii, itantapi.

³² —Inta nipachin, inaquë paatoma' ya'conco', itohuachina, quëmapi'sa quëran pipirahuatona', coshiro'saqué ya'conconpi. Inaquë ya'compachinara, coshiro'santa' hua'yantatona', a'naroáchin tahan pa'topi. Panca sonoqué niitahuatona', inaquë chimiitopi.

³³ Ina ni'sahuatona', a'painapiro'saso' pa'yanpi. Pa'yanatona ninano'pa' ta'api. Inaquë ya'ipiya sha'huiconpi.

—Sopairo'saso' quëmapi'sa quëran pipirahuatona', coshiro'saqué ya'conconpi. Napohuachinara, hua'yantatona', tahan pa'topi. Ya'ipi chimiitopi, itopi. ³⁴ Natanaahuatona', na'a piyapi'sa' huë'pi Quisoso nicacaiso marë'. Nani ni'pachinara, të'huatatona':

—A'na parti paqué', itopi.

9

Apia anoyatérinso'

(Marcos 2.1-12; Lucas 5.17-26)

¹ Napotohuachinara, potiquë ya'coantarahuatona', aquëtéran pëntoantapi. Quisoso ninanonënqué chachin paantapi. ² Inaquë catapini quëmapi'sari huëcatona', apia quëpi. Pë'sara'huaya pochin nininqué quëpi. Hua'qui' co nanitérinhuë' huanicaso', quëhuénarín. "Ma noya isopita natérinaco," ta'ton, Quisosori cania'pi itérin:

—¡Noya cancantéqué', apia'hua! Apiramiáchin quëma oshanën inquitaranquéen, itérin.

³ Ina natanaahuatona', cotio maistro'sa' yonquipi. "¿Ma quëmapita' isoso'? 'Oshanën inquitaranquéen,' ta'ton, Yosë yaya'huérétérin," topi, yonquiatona'. ⁴ Topinan yonquinéna quëran napoápirinahuë', Quisosori nitotaton.

—¿Onpoatomata' co noyahue' yonquirapiramaco? ⁵ Canpitaso naporama': "Piyapinpoa a'napita oshanën inquitacaso', co nanitérinhuë'. Apia camaiate': 'Huanirahuaton, noya paqué huachi,' itacasonta' co nanitaparéhuahuë'," tënama'. ⁶ Caso niperinhuë' Yosë quëran quëmapico ni'to, nanan quëtérinco piyapi'sa' oshanëna' inquita'huaso marë'. Canpitanta' ina nitotacamaso marë' iso apia anoyatarahuë, itérin. Ina quëran apia itantarín:

—Huaniqué' apia'hua. Pë'sara'huaya masahuaton, ya'huéránqué paqué', itérin.

⁷ Itohuachina, a'naroáchin huanirahuaton, ya'huérin'pa' pa'nin huachi. ⁸ Piyapi'sa' ina nicatona', pa'yanpi.

—¡Ma noyacha Yosëri catahuarin paya! Piyapi naponahuë' chiníquéen nanan quëtérin paya, topi.

Matio imarinso'

(Marcos 2.13-17; Lucas 5.27-32)

⁹ Ina quëran Quisoso paantarahuatón, Matio quënanconin. Coriqui Noma copirno marë' ma'patérinqué huënséarin. Quisosori itapon:

—Huéqué' iyasha imaco, itérin. Itohuachina, a'naroáchin huanirahuaton, imarin.

¹⁰ Napor'o tahuéri ina pëinënqué Quisoso ca'tano'sanënpitarë' coshatapatapi. Na'a piyapi'sa' huë'pi Quisosorë' coshatatona' nohuitacaiso marë'. A'naquënso' copirno marë' coriqui ma'patona'piro'sa'. A'naquëonta' oshahuano'sa' itopiso'. ¹¹ Parisioro'saso' ina ni'sahuatona', Quisoso ca'tano'sanënpita itonpi:

—¿Onpoatonta' maistrónëma' oshahuano'sapitarë' coshatarin? Copirno marë' coriqui ma'patona'piro'santa' co noyahue' niperinahuë', inapitarë' coshatarin, itopi.

¹² Natanaahuatón, Quisosori itérin:

—Isopitaso' têhuénchachin nohuantopi imainacoso'. Ni'co'. Cania'piro'saso' notoro nohuantopi. Niperinhuë', "Co caniorahuë'," topatéraso', co notoro nohuantérihuë'.

¹³ Oshahuano'sa' pënëna'huaso marë' o'marahuë. "Co noyahue' yonquiramasopita naniantatoma', Yosë chachin tahuérétantaco'," itérahuë. A'napitaso': "Quiyaso' co oshahuancoihuë'," topiso marë' co na'con a'chintérahuë'. Paatoma', Yosë quiricanén

noya nitotoco' no'tequén yonquicamaquë. Inaqué iráca ninshitopi: "A'naqué topinan quérän chinotatonaco oshanëna marë' ma'sha tēpapirinahuë', co a'napita nosoropihuë'. Nosorotacaso' na'con na'con nohuantërahuë," ténin Yosë, itérin Quisosori.

Nasha nanan a'chinins'
(*Marcos 2.18-22; Lucas 5.33-39*)

¹⁴ Ina quérän Coanshari a'chintérinsopita huécatona', Quisoso nontiipi:

—Quiyaso' a'na tahuëri co coshatatoihuë', Yosë nontarai. Parisioro'santa' inapopi. Quëma imarinënsopitaso nimirinhuë', noya coshatapi, o'osapi, inapopi. ¿Onpoatonta' co quiya pochin imarinënhuë'? itiipi.

¹⁵ —Ca ya'huarahuë ni'ton, co sëtopihuë'. Ni'co'. Quëmapi sa'acaso marë' piyapi'sa' amatohuachina, capa cancantopi. Nipayarinsopita huë'pachinara, inapitarë' coshatatona', capa cancantapi. ¡Co sëtacaiso' ya'huérinhuë! A'na tahuériso nimirinhuë' inimiconënpitari huécatona', sa'anap'i masapi. Quëpatohuachina', co huachi coshatacaiso' yonquiapihuë'. Sëtapi huachi. Inapochachin canta' mapachinaco, imarinacosopita sëtapi. Sëtatona', co huachi coshatacaiso' yonquiatonahuë', Yosë nontápona', itérin Quisosori.

¹⁶ Ina quérän a'chintaantarín.

—Ni'co'. A'morëso noyá mocahuachina, co nasha në'météquë pa'pitérëhuë'. Nasha në'météquë pa'pitérë' naporini, naquébranchin noshataton, aquëtë chachin napointon-huë'. ¹⁷ Sha'moronta' yonquico'. Huino sha'moro' nipachina, co sha'huëtë' morsa mocaro' nininquë ta'panëhuë'. Sa'potohuachina, a'naroáchin nopoitérin. Nopoitohuachina, huino chiniarë'. Morsanta' tapirë'. Sha'moro' huinoso' nasha morsaquë ta'panë'. Huino, morsanta' noya nisarin, ténin Quisoso. (Iráca inachitopiso' naniantatona', nasha nanan imacaso' ya'huérin, tapon naporin.)

Sanapi anoyatahuaton, Cairo hui'nin ananpitaantarín'
(*Marcos 5.21-43; Lucas 8.40-56*)

¹⁸ A'chinaquéya', a'na cotio hua'an huë'nin. Quisoso notënanquë isonquirin.

—Hui'nuhüe apira chiminin. Huécaton, Siniro, së'huauquë' nanopianta'in, topirahuë', itiirin.

¹⁹ —Noyapa', tosahuaton inarë chachin pa'nin. Ca'tano'sanënpitanta' pa'pi.

²⁰⁻²¹ Paaquéya', a'na sanapiri imaquierin. Hua'qui' panca huënai' a'parin. Nani shonca cato' pi'ipi co sanorinhuë'. Parisitárin. "A'morinso téranta' së'huatohuato, anoyataponco," ta'ton pinën quérän imaquierin. Imaquiton, a'morinso' huirötéíchin së'huauquin.

²² Quisosori tahuërëtahuaton, sanapi quënanin.

—Noya cancantëquë', imoya. Natéranco ni'ton, noyataran, itérin. Naporo chachin noyatérin. Huënai' no'narin huachi.

²³ Ina quérän hua'an pëinënquë canconpi. Na'a piyapi'sa' quënanconpi, na'nérápi, ayanápi. Quinatoro'santa' quënanconpi. Huinatacaiso marë' huë'pirinahuë', ²⁴ Quisosori itapon:

—Ya'ipinquëma' pipico'. Co sanapia'hua chiminihuë'. Topinan huë'ésárin, itérin.

—Co huë'érinhuë'. Nani chiminin, itatona' tēhuapi. ²⁵ Ya'ipi piyapi'sa' aipiran a'parahuaton, acoana chimipi ya'huérinquë ya'conin. Maimirarahuaton, ananpitaantarín. A'naroáchin huanirin huachi. ²⁶ Napohuachina, ya'ipi parti nanan nahuinin.

Cato' somaraya anoyatérino'

²⁷ Ina quérän pipirahuaton pa'sapirinhuë', cato' somarayari imaquiapi. Co manta' quënantopihuë'. Quisoso imaratona', chiniquén nontapi.

—¡Nosoroco! Siniro! Quëmaso' Tapico' shinquén. Yosë a'paimarinquén ni'ton, nosoroatoncoi anoyatoco, topiraihuë', itopi.

²⁸ Pëiquë canconahuatona', Quisoso ya'conin. Somarayaro'santa' ya'compachinara, Quisosori itérin:

—Cari nanitato anoyatërahuëso' ¿natërama' ipora ti? itërin.
 —Natërainquën mini Sinioro. Ya'ipiya nanitaparan tënai, itopi.
²⁹ Napotohuachinara, së'huarayarahuaton, itërin:
 —Natëramaco ni'ton, apiramiáchin anoyataranquëma', itërin.
³⁰ Napotohuachina a'naroáchin quënantopi.
 —Anoyatëranquëmaso' iyaro'sa', ama insonta' sha'huitocosohuë', itopirinhue',
³¹ pipirahuatona', na'a piyapi'sa' sha'huitëra'piapi.
 —Quisoso anoyerayatérincoi. Noya huachi quënantërai, itëra'piapi. Ya'ipi parti quëran natantopi.

Në'huëya anoyatérindo'

³² Ina quëran pa'pachina, a'napitanta' canquipi. Në'huëya quëpi. Sopai nohuanton, co nanitërinhuë' nonacaso'. ³³ Quisosori nosoroaton, sopai a'patërin. A'patohuachina, a'naroáchin noyatërin. Noya nonsarin huachi. Piyapi'sari ni'pachinara, pa'yanpi.

—Co onporonta' iso pochin ni'chinëhuahuë'. Iráca quëran huarë' co insonta' isëquë naporinhue', topi.

³⁴ Parisioro'saso nimirinhue', co yanatëpihuë'.

—Sopai hua'ani catahuarin ni'ton, nanitërin sopairo'sa' a'pacaso', toconpi.

Piyapi'sa' nosororindo'

³⁵ Ina quëran Quisoso pa'sápaton, nisha nisha ninanoro'saquë a'chintëra'piarin. Niyontonpiso pëiro'saquë noya nanan sha'huitëra'piarin.

—Yosë yahua'anëntërinquëma', itëra'piarin. Insëquësona pa'pachina, ya'ipi cania'piro'sa' anoyatëra'piarin. Nisha nisha canio inquitërin. ³⁶ Paaton, notohuaro' piyapi'sa' quënanin. Co Yosë yonquiatonahuë', co napion cancantopi. Ohuicaro'sa pochin inahuaso', co incari téranta' a'pairinhue'. “¿Incha catahuaincoi paya?” ta'tona', nisha nisha yonquipi. Napoaton Quisosori nosororin. ³⁷ Nosoroaton, ca'tano'sanënpita itërin:

—Notohuaro' piyapi'sa' ya'huëpirinahuë', co incariso téranta' catahuarinhue' Yosë hua'anëntërinquë ya'conacaiso marë'. Isoro'pa' panca imin pochin ninin. Cayarino'manëso pochachin piyapi'sa' manë' Yosë imacaiso marë'. Notohuaro' piyapi'sa' ya'huaponaraihuë', caraíchin pënëntapi Yosë imacaiso marë'. ³⁸ Napoaton Yosë nontoco' a'napitanta' a'pa'in pënënhina'. Ina sha'huitërinpoa' a'chinacaiso marë', itërin Quisosori.

10

Shonca cato' ca'tano'sanënpita acorindo'

(Marcos 3.13-19; Lucas 6.12-16)

¹ Shonca cato' quëmapi'sa' Quisosori nani huayonin na'con na'con a'chintacaiso marë'. Inapitaso', ca'tano'sanënpita itopi. Ayontonahuaton, chiníquen nanan quëtërin sopairo'sa' a'pacaiso marë'. Ina nohuanton, nisha nisha caniori maninsopitanta' anoyatapi.

² Shonca cato' acorin paatona' nanamën a'chinacaiso marë'. Simon'ton acorin. Pitro itopi anta'. Iionta'acorin, Antërisë itopiso'. Santiano, Coansha, inapitanta'acorin. Sipitio hui'ninpita inahuaso'. ³ Pinipi, Partoromi, Tomasë, Tatio, inapitanta' nohuantaton, acorin. Mationta' coriqui Noma copirno marë' ma'patopirinhue', acorin ca'tanacaiso marë'. Arpio hui'nionta'acorin, Santiano itopiso'. ⁴ A'na Simonta'acorin. Inaso', copirno no'huina'piro'sa' imapirinhue', iporaso' Quisoso imasarín huachi. Cotasë Iscariotinta' acopirinhue', a'na tahuëri inari sha'huirapiarindo'.

A'chinacaiso marë' a'parinso'

(Marcos 6.7-13; Lucas 9.1-6)

⁵ Nani shonca catoya'pi acohuachina, sha'huitérin: "Paatoma' iyaro'sa' noya pénéntoco'. Ama nisha piyapiro'sa' ya'huépique pacosohuë'. Samaria ninanoro'saquënta' ama pacosohuë'. ⁶ Israiro'sa' a'chintonco'. Inapitaso', ohuicaro'sa' chihuépiso pochin ni'tona', co Yosë yonquipihuë'. Napoaton pénénacaso' ya'huérin. ⁷ Paatoma', a'chintoco': 'Iso tahuëri'sa' Yosë hua'anéntarinpoa', itoco'. ⁸ Cania'piro'sa' a'naroáchin anoyatoco'. Chimipiro'santa', ananpitaantaco'. Chana caniori maninsonta' quënanpatama', anoyatoco'. Anapitanta' sopairo'sari ya'coancantopi ni'ton, pa'pi hua'yantopi. Quënanpatama', sopairo'sa' a'patoco' piyapi'sa' noyachina'. Co manta' pahuérëtapomarahuë', Yosëso' inaora nohuanton, catahuarinquëma' ni'ton, ama pahuérë nitocosohuë'.

⁹ A'chinacamaso marë' pa'patama', ama manta' coriqui quëpacosohuë'. ¹⁰ Ama pë'pëto, pitana, sapatë', inapita quëpacosohuë'. Ama a'moramaso téranta' cato' quëpacosohuë'. 'Asacatohuatéra, a'cacaso' ya'huérin,' topi. Napoaton a'chintohuatama', a'caarinënquëma', catahuaarinënquëma' ama ma'sha pahuantinquëmaso marëhuë'.

¹¹ Nisha nisha ninanoquë a'chintoco'. Ninanoquë canconpatama', insosona noya natanpachinquëma', ina pénénquë yacapaco'. Inaquë yacapatoahuatama', inaquësáchin ya'huëco'. ¹² Pénénaquë ya'conpatama', 'Yosë catahuaninquëma', itoco'. ¹³ Noya nohuantohuachinënquëmaso', Yosëri catahuarin. Nipirinhue', co noyahue' nonto-huachinënquëmaso', co Yosëri catahuaninhue'. ¹⁴ Inséquësona pa'patama', 'Ama iséquë huëcosohuë'. Co yanatanainquëmahuë', itohuachinënquëma', patoco'. Yapa'patama', pénenco'. 'Nani sha'huitopiranquëmahuë'. Co nohuantéraramahuë' ni'ton, canpitaora tēhuénëmaquë nina'intarama', itoco'. Ina quëran a'na parti paco huachi. ¹⁵ Tēhuénchachin itérinquëma'. Ayaro' tahuëri nanihuachin, inapitaso' chiníquen parisitapi. Iráca Sotomaro'sa', Comoraro'sa', inapita pa'pi co noyahue' cancantopi ni'ton, Yosëri chiníquen ana'intérin. Co natérincosopitasohuë' nipirinhue', chini chiníquen ana'intarin huachi," itérin Quisosori.

Aparisitaciso' ninorinso'

¹⁶ Ina quëran itaantarin:

"Ni'co' iyaro'sa'. Ohuicaro'sa' co nanitopihuë' nia'paicaiso'. A'naroáchin huéntonën ni'niro'sari mapi. A'chintohuatama', a'naquën piyapi'sa' ni'niro'sa pochin cancantatona', no'huiarinënquëma'. Napoaton noya yonquico'. No'huipirinënquëmaonta', ama no'huicosohuë'. Noya cancantatoma', sanoanan quëran nontoco'. ¹⁷ Ni'cona iyaro'sa', piyapi'sa' a'naroáchin ano'huitotama'. A'naquën no'huiténenquëma', masarinënquëma'. Mapachinënquëma', coiséquë quëpaarinënquëma'. Niyontonpiso pëiro'saquënta' huihuiarinënquëma'. ¹⁸ Imaramacoso marë' hua'ano'sa' ya'huérinquë sha'huirapiarinënquëma'. Copirnoro'saquënta' quëpaarinënquëma'. Ca nohuanto, inaquë quëpaarinënquëma' nanamëhuë sha'huitacamoso marë'. Inaquë nisha piyapiro'santa' a'chintarama'. ¹⁹ Inaquëpita quëpahuachinënquëma', ama pa'yancosohuë'. '¿Ma'cha tono'poya?' ama tocosohuë'. Naporo' Yosë anitotarinquëma' no'téquen a'panitacamoso marë'. ²⁰ Co canpitaora yonquinëma quëran nonsaramahuë'. Ispirito Santo ayonquiarinquëma' noya nonacamoso marë'.

²¹ A'naquën imasarinaco. A'naquënsö nipirinhue' co nohuantarinaracohue' ni'ton, quëmopinënpita capini nino'huiapi. A'naquën iin chachin níponahuë', sha'huirapiarin tēpacaiso marë'. A'naquëonta' hui'nin níponahuë', imapachinco, pa'pini chachin sha'huirapiarin. A'naquëonta' a'shin chachin, pa'pin chachin níponahuë', imapachinaco, hui'ninpitari sha'huirapiapi. ²² Imaramaco ni'ton, na'a piyapi'sa' no'huiarinënquëma'. Nipirinhue', co a'pohuatamacohue', nicha'ësaranquëma huachi. ²³ Aparisitohuachinënquëma', a'na ninanoquë paantaco'. Inaquënta' a'chiantaco'. Na'a ninanoro'sa' Cotia parti ya'huérin. Co ya'ipi ninanoro'saquë pa'shatérasënquëmahuë',

canta' o'mantararahuë. Yosë quëran quëmapico ni'to, a'na tahuëri o'mantararahuë Yosë hua'anëntérinso' acoca'huaso marë'.

²⁴ Ni'co'. Patron ya'huëhuachina, co piyapinënpitaso' chini chiníquën nanantérinhue'. Canta' canpita maistrónëmaco ni'ton, chini chiníquën nanantérahuë. ²⁵ Napoaton no'huihuachinënquëma', co ina marë' sétacaso' ya'huërinhuë'. Nani no'huirinaco canta'. 'Sopainquëñ', itérinaco ni'ton, canpitanta ina pochachin nontarinënquëma', itérin Quisosori.

*Yosë të'huatacaso' ya'huërinso'
(Lucas 12.2-9)*

²⁶ Ina quëran itantarín:

"Piyapi'sa' no'huipirinënquëmahuë', ama iyaro'sa' të'huatocosohuë'. Iporaso' ma'sha noyá po'opinan pochin ni'ton, co insonta' nitotérinhue'. A'na tahuëriso nimirinhue' ya'ipiya nitotapi. ²⁷ Iporaso' co ya'ipi piyapi'sa' a'chintarahuë'. Carayanquëma térranta' canpitaora quëparahuatënquëma', na'con a'chintaranquëma'. A'na tahuëriso nimirinhue' ya'ipi piyapi a'ninquëchin sha'huitoco' nitochina'. ²⁸ Ama piyapi'sa' të'huatocosohuë'. Tëpapirinënquëmaonta', co hua'yanëma' matarinënquëmahuë'. Yosë têhuëñchinso' të'huatacaso' ya'huërin, tênhahuë. Ina nohuanton, chiminë'. Co noyahue' nipaçhina', pënqué chachin a'paarin huachi. Inatohua' hua'yanënarë chachin parisitomiatapi huachi. Napoaton Yosë na'con na'con të'huatacaso' ya'huërin. Co piyapi'sa' të'huatacaso' ya'huërinhuë'.

²⁹ Yosëso' a'pairinquëma'. Ni'co'. Inairaro'sa' co pa'tonhuë'. Cato nimirinhue', a'na soroíchin pa'térin. Napoaponahuë', co a'naya térranta' Yosëri nanantérinhue'. Co ina nohuantomuhuachinhuë', co chimininhue'. ³⁰⁻³¹ Canpoaso nimirinhue' na'con na'con a'pairinpoa'. Ya'ipinpoa' a'naya a'nayanpoa' yonquirinpoa'. Ainënpoa' hua'huayátérahuë nimirinhue', ya'ipiya pichirin. Napoaton ama të'huacosohuë'. Ni'sáripoa'.

³² 'Quisoso imarahuë,' topatama', ayaro' tahuëri carinquëmanta' nohuantaranquëma'. 'Imarinaco mini,' itarahuë Tata Yosë. ³³ Nimirinhue', 'a'porahuë huachi,' topatamaso', carinquëmanta' a'poaranquëma'. 'Co imarinacohuë', itarahuë Tata Yosë," ténin Quisoso.

*Nisha nisha Quisoso yonquirapipiso'
(Lucas 12.51-53; 14.26-27)*

³⁴ Ina quëran pënëantarín:

"Cristo o'mahuachin, ya'ipiya nohuantatona', noya ya'huapi,' topiramahuë', co ya'ipiya nohuantaracohuë' ni'ton, nino'huiapi. ³⁵ Ipora quëran huarë' a'na pëiquë ya'huëpisopita nisha nisha yonquiapi. A'na pëiquë pa'pin nohuantarín. Hui'nins nimirinhue' co nohuantarinhue'. A'na pëiquënta' hui'nin nohuantarín. Pa'pins nimirinhue' co nohuantarinhue'. Sanapi'santa' nisha nisha yonquiapi. A'shin co nohuantarinhue'. Hua'huins nimirinhue' nohuantarín. A'shatën nohuantapirinhue', no-tainso' co nohuantarinhue'. Napoapona'. ³⁶ Imaramacoso marë' quëmopinëma chachin no'huiarinënquëma'. Co nishahuë' níponaraihuë', inimiconëñ pochin ni'sarinënquëma'.

³⁷ Yaimapatamaco, ca na'con na'con nosoroco. Tatama', mamama', hui'nama' inapita co onpopinchin nosorocaso' ya'huërinhuë'. Co na'con na'con nosorohuatamaco-huë', co têhuëñchachin imaramacohuë' tênhahuë. ³⁸ Imapatamaco, a'napita aparisitarinënquëma'. Yatëpapirinënquëmaonta', imamiatoco. Corosëquë chiníquën parisitëre'. Inapochachin canpitanta' imapatamaco, aparisitarinënquëma'. Co ahuantohuatamahuë', co têhuëñchachin imaramacohuë'. ³⁹ Noya nanopcamasoáchin yonquihuatama', topinan quëran nanopciarama'. Chiminpatama', parisitomiatarama'. Nimirinhue', imaramacoso marë' aparisitohuachinënquëma', noya cancantoco'. Tëpapirinënquëmaonta', noya noya nanopimiatontarama', itérin.

*Yosëri acanarinso'
(Marcos 9.41)*

⁴⁰ Ina quëran pënëantarín: “Insosona noya natanpachinquéma’, noya natanarinaco canta’. Yosë a’paimarínco ni’tón, Yosë nanamén chachin imasapi huachi.

⁴¹ A’chinamaso maré’ Yosë noya ni’sarinquéma’. Inápaqué acanaarinquéma’. A’naquén natanpachinénquéma’, ‘Yosë nanamén chachin a’chintarinfoa’, ta’tona’, noya natanarinénquéma’. Ina maré’ inapitanta’ inápaqué canarapi. Téhuéñchachin noya piyapi’sa’ catahuacaso’ ya’huérin. ‘Yosë imarin ni’tón, noya quëmapi inaso’, ta’toma’, catahuacoso’. Ina maré’ Yosë acanaarinquéma’. ⁴² Inso térranta’ imarincoso co chiníquén nanantopirinhué, inanta’ nosorocaso’ ya’huérin. Imarincoso maré’ i’sha térranta’ o’shitohuatama’, inápaqué Yosë acanaarinquéma’. Téhuéñchachin noya i’huérétarinquéma’,” itérin Quisosori.

11

*Coansha Paotistari piyapi a’parinso’
(Lucas 7.18-35)*

¹ Nani ca’tano’sanénpita sha’huitahuaton, a’chinacaso maré’ pa’nin huachi. Nisha nisha ninanoqué pa’sahuaton, a’china’piarin. Pënëna’piarin.

² Coansha Paotistaso nípirinhué, naporo’ tashinan pëiqué ya’huárin. Inaqué ya’ipi Quisoso naporinso’ natantérin. Ina natantaton, cato’ imarinsopita a’parin Quisoso natanacaiso maré’. ³ Canconpachinara, Quisoso natanatona’:

—Coansha Paotista a’parincoi ni’tón, natana’huainquénsa maré’ hué’nai. I’huá chachin inaso’, na’con sha’huitérincoi. “A’na tahuéri Cristo o’mararin, Yosëri a’paimarínso”, itérincoi. ¿Quëmaso’ inanquéen nimara, ti? ¿Pahuanarin o’macaso’ nica? Co nitotatoihué, natanapoinquéen hué’nai. Sha’huitocoí quiyanta’ Coansha sha’huitoanta’ii, itopi.

⁴⁻⁵ Napotohuachinara, Quisosori itérin:

—Nani ma’sha ni’nama’, natanama’. Somaraya nininsopita hué’pachinara, ca no-huanto, ni’topi. Apiaro’santa’ a’naroáchin anoyatérahué. Noya iratopi ni’nama’. A’naquéonta’ chana caniori maninsopita anoyatérahué. Né’huéro’santa’ ca nohuanto, noya natantopi. Chiminpisopitanta’ ananpitaantarahué. Notohuaro’ piyapi’sa’ co Yosë nohuitatonaraihué, nosorotápirinahué, iporaso huachi noya nanan a’chintarahué natanama’. Paatoma’, ya’ipiya Coansha sha’huitonco’ no’téquén nitochin. ⁶ Insosona ya’ipi cancanéna quëran natemiatohuachinaco, noya cancantapi, itérin Quisosori.

⁷ Ina natanahuatona’, Coansha sha’huitapona’ pa’pi. Nani pa’pachinara, Quisosori piyapi’sa’ a’chintantarin.

—Natanco iyaro’sa’ Coansha yonquiato a’chinchinquéma’. I’hua inotéro parti ina nicapoma’ pa’patamara, inaso Yosë maré chiníquén huanirin quénanconama’. Co piquira ihuani onororinso pochin niconinhué’. ⁸ Co inaso ma’huano’sa’ pochin noyápiachin a’morinhué’. Noyápiachin a’mopisopitaso’, copirnoro’sa’ pëinénaqué ya’huépi. Coanshaso nípirinhué’, co nani ma’sha ya’huétérinhué’. ⁹ Pënëntérinso’ natanacamaso maré’ pa’nama’, ténahué. Coansha téhuéñchachin noya pënëntérin. Co topinan quëran pënëntérinhué’. Yosëri chachin a’parin pënëntacaso maré’. ¹⁰ Iráca quiricanéñqué ninoton Yosëri hui’nin sha’huitérin.

“Co’huara pa’shamáteraséñquénhué’, comisionéhué’tón a’pararahué piyapi’sa’ ayon-quicaso maré”, itérin.

Coansha ninoton, naporin.

¹¹ “Iráca quëran huaré’ na’a piyapi’sa’ pënëntopirinahué’, Coansha Paotistaso’ noya noya pënëntérin. Pënëntérinso’ noya, nípirinhué’, inso térranta’ imapachinaco, noya noya nisarin. Yosë hua’anéntérinqué chachin ya’conarin huachi, ténahué.

¹² Coansha pënëntérin quëran huarë' na'a piyapi'sa' huë'sapi natanacaiso marë'. A'naquënso nipurinhuë' co nohuantopihuë' Yosë hua'anëntérinquë ya'conacaiso'. Co nohuantatonaraihuë', nohuantopisopita aparisitopi. Chiníquën cancantopisopitaso nipurinhuë', onpopionta' ya'conapi. ¹³ Iráca quëran huarë' Moisësë, pënëntona'piro'sa', inapita ninopi. 'Yosë yahua'anëntérinpoa'. A'na tahuëri ina marë' acorinso' a'paimararin,' topi. Coanshanta' ninotona', ninshitopi: 'Co'huara Sinioro tahuërinëñ naniyatërasohuë', Iniasë huëntarin pënëntacaso marë', topi. ¹⁴ Napopiso chachin Coansha pënëntarin huachi. Iniasë pochin cancantaton, pënëntarin, ténahuë. Nohuantohuatama', natëco'. ¹⁵ Huëratéhuanpatama', noya natanatomaco, yonquico'.

¹⁶ Iporaso' piyapi'sa' nisha nisha yonquipi. Hua'huaro'sa pochin cancantopi. Hua'huaro'sa' cachique ya'nipihuachinara, a'naquën tapona': 'Huëco' pita pochin ni'tehua', ya'nipiahua', ta'tona', ¹⁷ quinatapirinahuë', co a'napita nohuantopihuë' nansacaiso'. Ina quëran co nohuantohuachinarahuë', tantapona': 'Inta nipachin, huëco' chimipi pa'pitopiso pochin ni'tehua', ya'nipiahua', nitantapi. Na'népirinahuë', co a'napita nohuantopihuë' na'nëcaiso'. Inapochachin canpitanta' ipora nisha nisha yonquirama'. ¹⁸ Coansha Paotistaso' pënëntapon, co aquëtë' cosharo' yonpirinhuë'. Co noya coshatérinhuë'. Co pi'pian téranta' huino o'orinhuë'. Napopirinhuë': 'Inaso' Sopairi ahua'yantérin ni'ton naporin,' ténama'. ¹⁹ Caso nipurinhuë', Yosë quëran quëmapico nipurahuë' coshatérahuë, o'orahuë. Ina marë' pinoramaco canta'. 'Quisoso coshatárin, o'opatárin. Oshahuano'sarë' nipayarín. Copirno marë' coriqui ma'patona'piro'sarënta' nipayarín,' toconama'. Nisha nisha yonquiconama'. A'naquënso nipurinhuë' noya yonquiatona', Yosë natëapi huachi. No'tequën pënënhahuë ni'ton, no'tequën yonquiapi huachi," ténin Quisoso.

Nisha nisha ninanoquë ya'huëpisopita pënëninso'
(Lucas 10.13-15)

²⁰ Nisha nisha ninanoro'saquë nani pënëntérin. Inaqué na'a cania'piro'sa' a'naroáchin anoyatérin. Ya'huéhuano'saso' nicaponaraihuë', inachachin inachachin yonquiantapi. Co oshanëna' yaa'popihuë'. Napoaton chiníquën pënënin. ²¹ Corasinoquë ya'huëpisopita, Pitsaitaquë ya'huëpisopita, inapita yonquiaton, itapon:

"¡Ma'huántacha canpitaso' nisarama paya! Na'con pënënpiranquëmahuë', co natëramacohuë'. Ina marë' parisitarama'. Na'con nitotopiramahuë', co yaimaramacohuë'. Tiroquë, Sitonquë, inaquépitaso nipurinhuë' co pënëntérahuë'. Co inaqué cania'piro'sa' a'naroáchin anoyatérahuë'. Inaqué naporahuë naporini, oshanëna marë' sëchitonahuë'. Sa'catën nininso a'motona', huarianoquë nipashimotochitonahuë'. Co noyahuë' yonquipisopitanta', nanianchitonahuë'. ²² Napoaton ayaro' tahuëri nanihuachin, canpitaso' Yosë chini chiníquën ana'intarinquëma'. Inapitaso' co onpopinchin ana'intarinhuë'. ²³ Capinaomoquë ya'huéramasopitanta' co no'tequën yonquiramahuë'. 'Noyacoi ni'toi, Yosë'pa' pa'sarai,' ¿topiramahuë' ti? Co ina marë' inatohua' pa'saramahuë'. Parisitopiquë pa'miatarama huachi. Hua'qui' a'chintéränquëma'. Na'a cania'piro'sa' a'naroáchin anoyatérahuë. Nani nicapomarahuë', co yaimaramacohuë'. Sotomaquë naporahuë naporini, inapitaso natëitonacohuë'. Co oshanëna marë' Yosëri ata'huanchitonahuë'. Ipora huanta' ya'hu'a'itonahuë'. ²⁴ Ayaro' tahuëri nanihuachin, canpitaso' chini chiníquën ana'intarinquëma'. Sotomaro'saso nipurinhuë', co onpopinchin ana'intarinhuë', ténahuë," itérin Quisosori.

Quisoso asanocancaninpoaso'
(Lucas 10.21-22)

²⁵ Naporo' noya cancantaton, Yosë nontérin:

"¡Ma' noyacha Tata yonquiran paya! Quëmaso' chini chiníquën nanantéran. Inápaquë ya'huérinsopita, isoro'paquë ya'huérinsopita, ya'ipiya hua'anëntéran. A'naquën Tata nani

ma'sha nitotaponaraihuë': 'Quiyaora noya noya nitotarai,' topiso marë', co nanamën anitotérahuë'. Imarinacosopitaso nimirinhue', co onpopinchin nitotaponaraihuë': 'Catahuaco Sinioro co caora nanitérahuë', topachinara, quëma nanamën chachin anitotérano. Ina marë: 'Yosparinquen,' itéranguen. ²⁶ Quëmaora nohuanton Tata naporan," itérin.

²⁷ Ina quëran piyapi'sa' a'chintantarín.

"Tata Yosë nohuanton, pénentaráhuë. Ya'ipi nanamën anitotérinco piyapi'sa' a'chintaca'huaso marë'. Hui'ninco ni'ton, inasáchin noya nohuitérinco. Inapochachin Tata Yosë nohuitérahuë. Casáchin noya nohuitérahuë. A'naquëonta' cari anohuitoahuato, nohuitapi anta'. ²⁸ Huëco' casáchin imaco catahuainquëma'. Isoro'paqué ma'sha onporama' ni'ton, sétarama'. Naporahuaton, nisha nisha yanatépiramahuë', co canpitaora nanitéraramahuë' noya cancantacamaso'. Pë'pëto quëquen quëparamaso pochin ninatanama ni'ton, napión cancantërama'. Napoaton huëco' catahuainquëma' sano cancantacamaso marë'. ²⁹ Co carinquëma' nocananquëmahue'. Sanoanan quëran pénenanquëma'. Casáchin natanco a'chinchinquëma'. Nani tahuëri catahuaranquëma' noya cancantacamaso marë'. Ina pochin imapatamaco, sano cancantarama huachi. ³⁰ Ma'sona nicacaso sha'huitohuaténquëma', catahuaranquëma' noya nicacamaso'. Catahuaranquëma' ni'ton, co sacaihuë' imasaramaco huachi," itérin Quisosori.

12

Chinoto tahuëri naporinso'

(Marcos 2.23-28; Lucas 6.1-5)

¹ A'na chinoto tahuëri nanihuachina, Quisoso ca'tano'sanénpitarë' pa'sapi. Tricoro' pénontapi. Ca'tano'sanénpita tanatona', papona pochin a'naya a'naya trico moto maraapi. I'shorayarahuatona', ca'pi. ² Ina ni'sahuatona parisioro'saso':

—¡Ni'quë! Maistro! Chinoto tahuëri nimirinhue', ca'tano'sanénpita tricoraya i'shorayapi, co ipora tahuëri pi'pisha téranta' sacatacaso ya'huérinhue'. Co Moisésë pénentérinso' natépihuë', itopi.

³ Napotohuachinara, itérin:

—Yosë quiricanën ¿co nontéraramahuë' ti? Iráca Tapi tanahuachina, ⁴ Yosë pénénquë ya'conin. Inaquë ya'conahuaton, pan Yosë marë' acopiso' ca'nin. Ca'taninsopitanta' tanatona', ca'pi. Corto hua'ano'saráchin ina pan capacaiso nimirinhue', Tapi ca'nin. Ca'pirinhue', co ina marë' Yoséri ana'intérinhue'. ⁵ Isonta' yonquico'. Nani chinoto tahuëri corto hua'ano'sa' Yosë pénénquë sacatopi. Piyapi'sa' oshanëna marë' ohuicaro'sa' tēpapi. Sacatopirinahuë', co ina marë' oshahanpihuë'. ¿Co inanta' nontéraramahuë' ti? ⁶ Yosë pénén noya nimirinhue', caso' chini chiniquen nanantato, noya noya a'chintaranquëma'. ⁷ Yosë chachin naporin: "Piyapi'sa' nosorocamaso' na'con na'con nohuantérahuë. Ma'sha oshanëma marë' tēparahuatomá ya'ipi ahuiquitamaso', co onpopinchin nohuantérahuë'," ténin quiricanënquë. Nontopiramahuë', co natantochináchinhue' cancantërama'. No'tequen yonquirama' naporini, co topinan quëran sha'huirapiitomahuë'. ⁸ Yosë quëran quëmapico ni'to, chiniquen nanantérahuë. Chinoto tahuëri ma'sona noya nicacaso' sha'huichinquëma'. Co nicacasonhuë nininsonta' sha'huichinquëma', itérin.

Imirin tachitérinso'

(Marcos 3.1-6; Lucas 6.6-11)

⁹ Ina quëran paantarahuatón, niyontonpiso pëiquë ya'conconin. ¹⁰ Inaquë a'na quëmapi quënanconin. A'na imirin tachitérin ni'ton, co pi'pisha téranta' nanitérinhue' së'quétacaso'. "Ipora tahuëri co cania'piro'sa' anoyatacaso ya'huérinhue'," ta'tona', parisioro'sari ni'sapi. Quisoso yasha'huirapitona', itapona':

—Chinoto tahuëri nimirinhue', ¿noya cania'piro'sa' anoyatacaso' ti? itopi.

11 —Ni'cochi iyaro'sa', ohuicaro'sa' pë'tahuahuatamara, a'naya téranta' panca nancatéquë anotohuachina, ocoirama'. Chinoto tahuëri nipurinhue', masahuatoma', ocoirama'. **12** Piyapi'saso nipurinhue' noya noya ni'ton, na'con na'con nosorocaso' ya'huërin. Napoaton chinoto tahuërinta' piyapi'sa' catahuacaso' ya'huërin, itérin.

13 Napotahuaton, apia nontérin.

—Imiran iyasha ihuëquë', itérin. Natëton ihuëpachina, a'naroáchin noyatérin. A'na imirin pochachin niantarin. **14** Ina nicatona parisioro'saso' pipipi. Pipirahuatona', Quisoso tēpacaiso marë' yonquipi huachi.

Iráca ninorinso'

15 Ina nitotaton, Quisoso a'na parti pa'nin. Na'a piyapi'sari imasarín. Cania'piro'sa' huë'pachinara, ya'ipiya anoyatérin.

16 —Ama a'napita sha'huitocosohue', itérin. **17** Iráca Quisoso ninoton, Isaiasë ninshitérin. Yosë yonquirinso chachin ninshitaton, naporin:

18 “Iso quëmapi nani acorahuë nisha nisha piyapi'sa' nicha'ëcaso marë'. Noya natëarinco. Na'con nosoroato, nónya ni'nahuë.

Ispiritonëhuë chachin aya'coancantarahuë.

Nisha piyapiro'santa' no'tequen a'chintahuaton, anoyacancantarín.

19 Co no'huiarinhue'. Co chiníquen nonsarinhue'.

Co cachiquë paaton, piyapi'sa' ano'huitarinhue'.

20 A'naquen piquira yanopantérinso pochin nicatona', co huachi chiníquen cancantopi-huë'. Inapitaso' achinicancanarin.

Nanparin yatacopirinso pochin cancantatona', pi'pianchin Yosë shia'popi. Co inapitanta' no'huiarinhue'.

No'tequen a'chintahuaton, na'a piyapi'sa' anoyacancantarín. Inapotaton, sopai minsëarin huachi.

21 Nisha nisha piyapi'sari natanahuatona': ‘Inasáchin nicha'ësarinpoo’, tosapi huachi,’ ténin Yosë quiricanënqué.

Iráca Isaiasë ninorinso chachin nanirin ni'ton, Quisosori sanoanan quëran piyapi'sa' pënënarin.

Sopai hua'an minsërinso'

(Marcos 3.20-30; Lucas 11.14-23; 12.10)

22 Ina quëran a'na quëmapi quëpi Quisosori anoyatacaso marë'. Sopairi ya'coancanterin ni'ton, co naniterinhue' nonacaso'. Co quenfantacaso téranta' naniterinhue'. Sopai a'parahuaton, a'naroáchin anoyatérin. Noya ni'térin. Nonacasonta' naniterin huachi. **23** Ina ni'sahuatona', piyapi'sa' pa'yanpi. “¡Ma'pitacha nanitaparin paya! Isoso' Tapico' shiin, ¿Yosëri a'paimarinsò nimara ti?” nitopi.

24 Parisioro'sariso nipurinhue', co natëpihuë': “Sopairo'sa' hua'an Piirsipo* itopisoari catahuarin ni'ton, nanitaparin sopairo'sa' a'pacaso'. Co inari catahuarinhue' naporini, co nanichitonhuë',” topi.

25 Topinan yonquirapirinahuë', inaora yonquinen quëran Quisosori nitotaton, itérin: “Ni'co'. Ninanoquë ya'huëpisopita nino'huipi naporini, yanquë'itonahuë'. Co huachi inaque' ya'huë'itonahuë'. Huëntonënqué ya'huëpisopitanta' nino'huipi naporini, inapitanta' yanquë'itonahuë'. **26** Inapochachin Satanásë sopairo'sare' nino'huipi naporini, co huachi hua'an niitonhuë', co huachi piyapi'sa' hua'anëntacaso' nanichitonhuë'. **27** ‘Piirsipo catahuarinquen,’ itopiramacohue', co no'tequen yonquiramahuë'. Co ina catahuarincohuë'. A'naquen a'chintéramasoarinta' sopairo'sa' yaa'papi. Satanásë catahuarinco ni'quëhuarë', inapitanta' inari catahuarin. Inapita natanco' macariso' catahuarinso' sha'huichinquëma'. **28** Caso nipurinhue', Ispirito Santo catahuarinco

* **12:24** Piirsiposo': Satanásë tapon naporin.

sopairo'sa' a'paca'huaso'. Napoaton Yosë chachin a'paimarinco hua'anënta'huanquëmaso marë', ténahuë.

²⁹ Quëmapi chiníquën nipachina, pëinën noya a'pairin. Co insonta ya'conaton ma'shanën mataponhuë'. A'naso nimirinhue' ina quëran chini chiníquën ni'ton, huëcapairahuaton minsëquirin. Tonporahuaton, ma'shanënpita quiquitérin.

³⁰ Co imapatamacohuë', inimicotaramaco. Co catahuahuatamacohuë', sopai natëarama huachi. Piyapi'sa' anishacancantarama' ama Yosë imacaiso marëhuë'.

³¹ Napoaton itaranquëma': Co noyahuë' nipayata', oshahuanarama'. Pinótohuatamanta oshahuanarama'. Oshanëma marë' sëtohuatama', Yosë oshanëma' inquitarinquëma'. Ya'ipi co noyahuë' ninamasopita inquitarinquëma'. Ispirito Santoíchin pinotoma' oshahuanpatama' têhuëñchinso', co inquitarinquëmahuë'. ³² Caso' Yosë quëran quëmapico nimirihuë pinopatamacos, ina marë' oshahuanpiramahuë', oshanëma marë' sëtohuatama', inquitarinquëma'. Nimirinhue', Ispirito Santo pinopatama', co oshanëma' inquitarinquëmahuë'. Co onporonta' inquitarinquëmahuë' "itérin Quisosori.

Nara pochin nininso'

(Lucas 6.43-45)

³³ Ina quëran itaantarin: " 'Nara noya nipachina, noya nitërin. Co noya nito-huachinahuë', napoonin,' topi. Nitërin quëran nara nohuitëre'. Inapochachin piyap-inpoanta' ninëhua'. Noya yonquihuatëhua', no'tequën nonarihua'. ³⁴ Canpitaso nimirinhue', ya'huan pochin cancantatoma' yanopinama'. Co noyahuë' yonquiatoma', co nanitëramahuë' noya nonacamaso'. Onpopinsona cancantëramaso', nonama quëran piyapi'sa anitotarama'. ³⁵ Noya cancantohuatëhua', noyasáchin nonarihua'. Co noyahuë' cancantohuatëhua', co noyahuë' nonarihua'. ³⁶⁻³⁷ Noya cancantohuatama', noya nonsarama'. Ayaro' tahuëri Yosë noya ni'sarinquëma'. Co noyahuë' cancantohuatama', co noyahuë' nonsarama'. Ina marë' ayaro' tahuëri ana'intarinquëma'. Ayaro' tahuëri nanihuachin, Yosë nontarinquëma'. Ya'ipi nonamasopitanta' aipitarinquëma'. A'naquëma' co noyahuë' nonpatama', 'Co yonquiatohuë', naporahuë', itopiramahuë', ina marënta' ana'intarinquëma', ténahuë. Co noyahuë' cancantohuatama', no'tequën ana'intarinquëma huachi," itérin Quisosori.

Yosë pochin nicacaso' nohuantopiso'

(Marcos 8.12; Lucas 11.29-32)

³⁸ Ina quëran parisioro'sa', cotio maistro'sa', inapita huë'pachinara, Quisoso nontiipi: —Yosë pochin niquë' ni'iinquëen. Ina ni'patoi, natëarainquëen, itiipi.

³⁹ —Canpitaso' co noyahuë' cancantërama'. Co pi'pisha térranta' Yosë yanatëramahuë'. "Yosë pochin niquë' ni'iinquëen," itopiramacohuë', co Yosë nohuantérinhue'. Isoíchin anitotarinquëma'. A'na tahuëri Conasë pochin nisarahuë. ⁴⁰ Iráca Conasë marëquë tê'yaitohuachinara, panca sami pochin nininsoari mi'térin. Cara tahuëri tashirë chachin inaquë ya'huapirinhue'. Ina quëran Yosë nohuanton, cha'erin. Inapochachin canta' Yosë quëran quëmapico ni'to, chiminpato, cara tahuëri tashirë chachin acoporo' ya'huaporahuë', cha'ésarahuë huachi. ⁴¹ Conasë cha'érahuaton, Ninihuiquë pa'nin. Inaquë pënëntohuachina, co noyahuë' yonquipisopita naniantopi. Napoaton ayaro' tahuëri inapita nontarinënquëma'. "¿Onpoatomata' co canpitaso' natëramahuë'?" itaponënquëma'. Caso' chiníquën nanantato, noya noya pënënpiranquëmahuë', co yanatëramacohuë'. Napoaton ayaro' tahuëri Yosë na'con ana'intarinquëma'. ⁴² Inapochachin iráca Saromon hua'anëntapon, copirno sanapi nininso' sor parti quëran huë'nin ina nontacaso marë'. "Ya'ipi nitotérin," ta'ton, huë'nin natanapon. Napoaton ayaro' tahuëri ina atapanarinquëma'. Saromon quëran caso' na'con na'con nitotato, noya noya a'chintopiranquëmahuë', co yanatëramacohuë' ni'ton, Yosë chiníquën ana'intarinquëma', itérin Quisosori.

Sopairi ya'coancantantarino'
(Lucas 11.24-26)

⁴³ Ina quëran Quisosori a'chintaantarin. "A'na quëmapi sopairi ya'coancantopirinhue', ina quëran pipirin. Pipihuachina, inotero' parti pa'sarin. Inséquësona ya'huëcaso marë' yonisapirinhue', co quënaninhue'. ⁴⁴ Napoaton ina quëmapiquë chachin huëantarín. Inaso' co Yosë yonquiatonhuë', topinan ya'huárin quënanquiantarin. Noya ya'huëantachinachin ni'ton, sopairi yaya'coancantantarín. ⁴⁵ Napoaton paantarahuatón, canchisë sopairo'sa' maantarin. Aquë aquëtë' co noyahuë' nippisopita maantarin. Posa sopairo'sari chachin quëmapi ya'coancantantapi. Napoaton aquë aquëtë' co noyahuë' yonquirin huachi. Inapochachin ipora na'a piyapi'sa' sopai natëtona', co noyahuë' cancantopi. Ina quëran: 'Co huachi sopai natëarahue', taponaraihuë', co Yosë yonquiatonahuë', oshaquëran aquë aquëtë' co noyahuë' cancantaantapi huachi," itérin Quisosori.

Quisoso quëmopinënpita pochin nininsopita
(Marcos 3.31-35; Lucas 8.19-21)

⁴⁶ Piyapi'sa' nontaso', a'shin, iinpita, inapita huë'pi. Quisoso yanontopirinahuë', na'a piyapi'sa' yamorapi ni'ton, co nanitopihuë' ya'conacaiso'. Aipiran huaniápirinahuë', ⁴⁷ a'na quëmapiri sha'huitérin:

—Ni'quë' Maistro. Mamaparin, iyaparinpita, inapita huëcatona', aipiran huanirapi. Yanontérinënquën, itérin, ⁴⁸ Napotopirinhuë', Quisosoro' itapon:

—Mamahuë, iyahuëpita, inapita pochin ni'nahuësopita sha'huichinquën nitotëquë', itahuaton, ⁴⁹ imirin quëran tasatérin:

—Isopita imarinaco ni'ton, iyahuëpita pochin nicato, nosororahuë. ⁵⁰ Yosë natëpisopita iyahuëpita pochin ni'nahuë. Sanapi'santa' Yosë nanamën natëhuachina', oshihuëpita pochin ni'nahuë. Payaro'santa' Yosë imapachina', mamahuë pochin ni'nahuë, itérin.

13

Pa'sarayarinso'
(Marcos 4.1-9; Lucas 8.4-8)

¹ Naporó' tahuëri pëi quëran pipirahuaton, sono' yonsanquë huënsëconin. ² Inaquë notohuaró' piyapi'sa' niyontonpi natanacaiso marë'. Huáhuayatérahuë' tancapito-huachinara, potiquë ya'conahuaton, huënsëmarin. Ii' yonsánshaquë huarë' piyapi'sa' yamorapi. ³ Nisha nisha pënënto nanan a'chintérin. Ma pochinsona nininsopita a'chintárin ayonquicaso marë'.

A'chintaton, itapon: "A'na quëmapi sha'tapon pa'sarin. ⁴ Tricoraya iminquë pa'sarayarin papotacaso marë'. Pa'sarayahuachina, a'naquën ya'pirin iraquë huarë' pa'sarayarin. Iraquë huarë' anotérin ni'ton, inairaro'sari huëcapairahuatona', pë'yaquipi huachi. ⁵ A'naquën ya'pirin na'piroquë pa'sarayarin, pi'pian pi'pian no'pa' ya'huérinquë. Shimënsin no'pa' ni'ton, shiarahuaton, papotopirinhuë'. ⁶ Pi'iri chiniquën pi'cahuachina, yaahuirin. Pi'pishara'huaya itëhuanin ni'ton, ahuirin huachi. ⁷ A'naquën ya'pironta' nahuanoquë pa'sarayarin. Inaquë papotopirinhuë', nahuano'sarinta' papotérin. A'shinahuatona', imotérin huachi. Napoaton co nitérinhuë'. ⁸ A'naquënsi nippirinhuë' noyaro'paquë pa'sarayarin. Inaquë noya papotérin. A'shimpachina, sha'nin quëran na'con na'con nitérin. A'naquën cara shonca, cara shonca nitérin. A'naquën saota shonca, saota shonca nitérin. A'naquën pasa, pasa nitérin. ⁹ Huëratëhuanpatama', noya natanatomaco, yonquico'," itérin Quisosori.

Pënënto nananquë a'chininso'
(Marcos 4.10-12; Lucas 8.9-10)

¹⁰ Ina quëran ca'tano'sanënpitari ya'caritahuatona', natanpi. “¿Onpoatonta' Maistro piyapi'sa' a'chintohuatana, pënënto nanan quëran a'chintérana?” itopi.

¹¹ “Yosë hua'anéntérinso' co insonta' inaora yonquinën quëran nitotérinhue'. Canpitaso' ya'ipiya a'chintaranquëma'. A'napitaso nipurinhue' co ya'ipi a'chintarahuë'. Pënënto nanan quëransáchin a'chintarahuë. ¹² Insosona noya natanpachinaco, Yosëri catahuarin noya yonquicaiso marë'. Na'con na'con nitotapi. A'napitaso nipurinhue' co yanatéhuachinacohue', Yosëri tananpitarin ni'ton, ya'ipiya nariantapi huachi. ¹³ Napoaton inapita huë'pachinara, sacai pochin a'chintérahuë. Natanaponaraihuë', co natëapihuë'. Nicaponaraihuë', co yonquiapihuë'. ¹⁴ Iráca Isaiasëri ninoton, naporin: ‘Natanapomarahuë', co natëtaramahuë'.

Nicapomarahuënta' co têhuëñchachin quënanaramahuë'.

¹⁵ Isopitaso' co natantochináchinhue' cancantopi.

Nè'huëya pochin cancantatona', co yanatantopihuë'.

Tanshirinso pochin cancantatona', co yaquénantopihuë'.

Noya ni'pi naporini, quënanchitonahuë'.

Noya natanpi naporini, cancanëna quëran nataintonahuë'.

Co noyahue' yonquipisopita nariantatona' imarinaco naporini, anoyacancanchitohue', ténin Yosë iráca.

Ipora huanta' na'a piyapi'sa' ina pochin cancantopi.

¹⁶ Canpitaso nipurinhue', ma noya Yosë catahuarinquëma' ni'ton noya ni'namaco. Noya natanamaco. Napoaton noya cancantarama'. ¹⁷ Iráca quëran huarë' na'a pënëntona'piro'sa', noya piyapi'sa', inapita campita ni'namasopita yani'pirinahuë', co ni'pihuë'. A'chintérinquëmasopitanta' yanatanpirinahuë', co natanpihuë',” itérin Quisosori.

Tricoraya tapon naporinso'

(Marcos 4:13-20; Lucas 8:11-15)

¹⁸ Ina quëran ca'tano'sanënpita a'chintaantarin. “Natanco iyaro'sa'. Sha'tona'pi sha'ninsa pochin nininsa' a'chintanta'inquëma' no'tequen nitotacamaso marë'.

¹⁹ Tricoraya pa'sarayarëso pochin Yosë nanamëñ ya'ipi parti a'chintérë'. ‘Yosë yahua'anéntarinquëma', topachina, a'naquén piyapi'sa' ira pochin nipi. Nanamëñ natanpirinahuë', co yonquipihuë'. Inairaro'sari huëcapairahuatona', pë'yaquipiso pochin a'naroáchin sopai huë'nin. Huë'sahuaton, Yosë nanamëñ natanpiso' osérëtiirin. Anariantérin huachi. ²⁰ A'naquén piyapi'saso nipurinhue', na'piro pochin niconpi. Yosë nanamëñ natanahuatona', a'naroáchin pa'yatatona', natëpirinahuë', ²¹ co cancanëna quëran huarë' natëpihuë'. Co chiníquén cancantatonaraihuë', co natëmiatopihuë'. Ma'sha onpohuachinara, a'naroáchin yaa'popi. Imapiso marë' aparisisitohuachinara, a'popi huachi. ²² A'naquén piyapi'santa' nahuano' ya'huërinso pochin niconpi. Yosë nanamëñ natanpachinara, yaimapirinahuë', ma'sharáchin yonquiatona', nariantapi. ‘Na'a coriqui, ma'sha, inapita ya'huëtohuachincoi, noya cancantarai', topirinahuë', co ina quëran noya cancantacasohue' nipurinhue'. Napoaton nahuano'sari imotérinso pochin, ma'sharáchin yonquiatona', Yosë nanamëñ nariantapi. Co imamiatopihuë'. ²³ A'naquén piyapi'saso nipurinhue', noyaro'pa pochin nipi. Yosë nanamëñ natanahuatona', cancanëna quëran huarë' natëpi. Cara shonca, cara shonca nitérinso pochin a'naquén noyamiáchin imapi. A'naquëonta' saota shonca, saota shonca nitérinso pochin noya imapi. A'naquëonta' pasa, pasa nitérinso pochin ya'ipi cancanëna quëran imatona', noya noya imapi huachi,” itérin.

Pacatëro' sha'ninsa'

²⁴ Ina quëran a'chintaantarin: “A'nanta' iyaro'sa', a'chintaanta'inquëma' Yosë hua'anéntérinso' nitotacamaso marë'. A'na patron iminpachina, noya trico sha'nin.

²⁵ Ina quëran tashihuachina, huë'ësoi' inimico huë'nin. Huë'sahuaton, inaquë

chachin pacatëro' trico pochin ya'norinso' sha'quirin anta'. Trico sha'ninso' huancanaya ina huancanaya sha'quirin. Nani sha'pachina, pa'nin. Co incari téranta' ni'nihuë'. ²⁶ Inanta' pichopitahuaton, tricorë' napopianachin ya'norin. Cato chachin a'shinaponahuë', pacatëroso' co nitérinhuë'. Naporo huarë' nohuitopi huachi. 'Isoso' co tricohue', pacatëro', topi. ²⁷ Ina ni'sahuatona', piyapinënpitari sha'huitonpi. 'Noyarayasachin asha'topiranhue', ¿onporahuatonta' ina huáncana ina huancánachin pacatëro' papotërin?' itonpi. ²⁸ 'Inimiconëhuë naporin,' itérin patronënarì. Napohuachina, piyapinënpitari itapona': 'Nohuantohuatan, paatoi hua'chi'i, topiraihuë', itopí. ²⁹ 'Ama napotocosohue'. Ipora hua'tohuatama', triconta' ocoarama'. ³⁰ Tananpitoco' cato chachin a'shiina'. Nani macacaso' nanihuachin, sacatoro'sa' sha'huitarahuë. Pacatëro'ton masahuatoma', tonpoco' pënqué ahuiquitacaso marë'. Ina quëran tricosachin masahuatoma', pënëhuëquë acotoco huachi, itarahuë', ténin patron," itérin Quisosori.

Mostasaraya pochin nininso'

(Marcos 4.30-32; Lucas 13.18-19)

³¹ Ina quëran itaantarin: "Yosë hua'anëntérinso' a'chintaanta'inquëma'. Mostasaraya pochin ninin. Inaso ya'pirin pi'pira'huaya niponahuë', ³² iminquë sha'patëra papoto-huachina, panca ta'an ninin. Nani a'shinpachina, inairaro'sa' huëcatona', inaquë pëirin," itérin. (Inapochachin caniaritapon, caraíchin piyapi Yosë imapirinahuë', a'na tahuëri notohuaro' piyapi'sa' Yosë imasapi.)

Pan ahuëpocatërinso pochin nininso'

(Lucas 13.20-21)

³³ "Naquëranchin iyaro'sa' Yosë hua'anëntérinso' a'chintaanta'inquëma'. Pan ahuëpocatërinso pochin ninin anta'. A'na sanapi pan nipachina, cara shonca quiro pochín trico no'mo' manin. Masahuaton, pi'pian térranta' pan ahuëpocatërinso' ayontohuachina, ya'ipiya së'cotaton, ahuëpocatërin huachi," itérin Quisosori.

Ma'pochinsona nininso'

(Marcos 4.33-34)

³⁴ Notohuaro' piyapi'sa' niyontonpachinara, na'a pënënto nanan sha'huitérin. Ma'pochinsona nininsoáchin sha'huitérin. ³⁵ Iráca pënëntona'piri ninoton, ninshitérin. "Piyapi'sa' a'chintahuato, ma'pochinsona nininso' a'chintarahuë. Isoro'pa' ninin quëran huarë' co piyapi'sa' nitotopirinahuë', a'chintarahuë huachi," ténin iráca ninoton. Naporinso chachin ina pochin Quisosori a'chintarin.

Pacatëro' tapon naporinso'

³⁶ Ina quëran piyapi'sa' patahuaton, pëiquë ya'conconin. Inaquë ca'tano'sanënpitari itapona': "Achin sacai' pochin pënënto nanan a'chintopirancoihuë'. Pacatëro' sha'piso' co nitotéraihiue'. ¿Ma'ta' tapon naporan? A'chintantacoitochii," itopí. ³⁷ "Inta nipachin, a'chinchinquëma'. Patron asha'térinso pochin piyapi'sa' a'chintarahuë. Yosë quëran quëmapico ni'to, nanamën a'china'huaso marë' o'marahue. ³⁸ Isoro'pa' panca imin pochin ninin. Yosë hua'anëntérinquë ya'conpisopitaso' noya ya'pirin pochin nipi. Sopai natëpisopitaso nimirinhue', pacatëro' pochin niconpi. Co noyahue' cancantatona', sopai natëpi. ³⁹ Inimico pacatëro' sha'ninso pochin sopai chachin nohuanton, co noyahue' nipi. Nitérinso' manëso pochachin ayaro' tahuëri naniriarin. Nanihuachin, anquëniro'sa' o'maapi piyapi'sa' macacaiso marë'. ⁴⁰ Pacatëro' ahuiquitéreso pochin ayaro' tahuëri pënqué ana'intacaso' ya'huërin. ⁴¹ Anquëniro'sa' a'pahuato, ya'ipi co noyahue' nipesopita ayontonapi huachi. Anishacancantona'piro'santa' masapi. ⁴² Inapita masahuatona', pënqué tē'yatapi. Inaquë chiníquen parisitatona', na'nérápona'. ⁴³ Yosë

natëpisopitaso nimirinhue', noya ni'sarin. Pi'i a'pininso pochin Yosë hua'anëntërinquë ya'noapi. Huëratëhuanpatama', noya natanatomaco, yonquico'," itérin Quisosori.

Oro pochin nininso'

⁴⁴ Ina quëran itaantarin: "Isonta' a'chinchinquëma' Yosë hua'anëntërinso' nitotacamaso marë'. A'na quëmapi ya'huëpirinhue'. A'na no'pa' pa'taton, oro pochin nininsopita quënánconin. Acoporo' ya'huëpirinhue', quënánconin. Pa'yataton, imotantarahuatón, pa'nin huachi. Ya'ipi ma'shanënpita pa'anahuatón, coriqui canarin quëran, ina no'pa' pa'anconin huachi. 'Quënánahuëso' noya noya,' ta'ton, ina na'con na'con nohuantérin," ténin. (Inapochachin Yosë hua'anëntinquëmaso' na'con na'con nohuantoco', tapon naporin.)

Huirina'pi pa'ton nininso'

⁴⁵ Ina quëran itaantarin: "A'nanta' a'chinchinquëma' Yosë hua'anëntërinso' nitotacamaso marë'. A'na quëmapi pa'sárin huiri na'pira'huayaro'sa' pa'ton nininso' yonicaso marë'. ⁴⁶ A'na tahuëri noya noya nininso' quënánin huachi. Na'con pa'térin ni'ton, ya'ipi ma'shanënpita pa'anahuatón coriqui canarin quëran pa'anconin. 'Ina na'con na'con nohuantérahuë,' ta'ton, pa'anin huachi," itérin.

Sami pochin nininso'

⁴⁷ Ina quëran itaantarin: "A'nanta' a'chintaanta'inquëma' Yosë hua'anëntërinso' nitotacamaso marë'. Sami manëso pochin ninin. Panca riti marëqué të'yatohuatéra, notohuaro' sami manë'. Nisha nisha manë'. ⁴⁸ Na'a sami ya'compachina, yonsanqué oshirë'. Ina quëran sami camayoro'sa' huënsérahuatona', sami nisha nisha huayonapi. Noya sami i'mëqué po'morapi. Napoonin nininsopitaso nimirinhue', të'yatopi. ⁴⁹ Ayaro' tahuëri inapochachin nisarin. Anquëniro'sa' o'marahuatona', ya'ipi piyapi'sa' nisha nisha huayonapi. Yosë yonquipisopita noya acoapi. A'naquënsö nimirinhue', co noyahue' cancantopi ni'ton, ⁵⁰ pënqué të'yatapi. Inaquë chiniquen parisitatona', na'nérápona huachi," itérin Quisosori.

⁵¹ Ina quëran ca'tano'sanënpita natanin:

—Nani a'chintéranchuëmaso' ¿nitotërama' ti? itérin.

—Nani nitotérai, itopi.

⁵² —Yosë quiricanën nani nitotarama'. Yosë hua'anëntërinso' a'chintéranchuëma' ni'ton, pëi' hua'anën pochin nisarama'. Pëi' hua'anën noya nipachina, ya'ipi pënqué ya'huëpisopita noya nocamarin. Nani na'con a'chintéranchuëma' Yosë nanamëñ a'chinacamaso marë'. Iráca ninshitopiso' nitotërama'. Naporahuatón, a'nanta' nashamichin a'chintaranquëma'. Ya'ipiya nitotatoma', a'chintéra'piarama', itérin Quisosori.

Nasaritoqué paantarinsono'

(Marcos 6.1-6; Lucas 4.16-30)

⁵³ Nani a'chintohuachina, pa'nin huachi. ⁵⁴ Ya'huërinquë chachin paantarahuatón, niyontonpiso pëiquë a'chintarin. Piyapi'sa' natanahuatona', nisha nisha yonquiatona', ninontopi.

—¡Ma'pítacha nitotérin paya! ¿Macariso' a'chintomara? Piyapi'sa' a'naroáchin anoyatérin. ¿Onporahuatóncha nani ma'sha nanitaparin nicaya? ⁵⁵ Hua'huatapon quëran huarë' nohuitéröhua'. Pa'pinso' nontëcamayo. A'shino' Maria itopi. Iinpitanta' nohuitéröhua'. Santíaco, Cosí, Simón, Cotasé, inapita itopi. ⁵⁶ Oshinpitanta' iséqué ya'huarin. Co Quisoso chiniquen nanantérinhue'. ¿Onporahuatóncha nipachin ina pochin nitotérin? nitopi.

⁵⁷ Co natëtonaraihuë' tēhuapi. Napohuachinara, Quisosori itérin:

—Iráca quëran huarë' napopi. "Ya'ipi piyapi'sari pënentona'pi noya natanpi. Niñanónqué ya'huëpisopitaso nimirinhue', co noyahue' natanpi. Co quëmopinënpitari téranta' yanatépihuë'," topi iráca. No'téquen napopi, ténin Quisoso.

⁵⁸ “Co Yosë quëran o'marinhuë!,” ta'tona', co cancanëna quëran huarë' natëpihuë' ni'ton, co na'a piyapi'sa' a'naroáchin anoyatérinhue'. Caraíchin cania'piro'sa' anoyatérin.

14

Coansha Paotista tëpapiso' (Marcos 6.14-29; Lucas 9.7-9)

¹ Ya'ipi Quisoso naporinso' nahuinin. Cariria hua'an Irotisë itopisonta' natantérin. ² “Ma'pitacha nanitapaton, cania'piro'sa' a'naroáchin anoyatérin paya. Coansha Paotistaco' nanopiantarinso' tënahuë,” itérin piyapinënpita nontaton. I'huamiáchin Coansha atëpataton, naporin.

³⁻⁴ I'hua chachin Coansha nanopiso', Irotisë co noyahuë' ninin. Iin sa'in osérëtaton, manin. Pinipi sa'in chachin osérëtérin, Irotiasa itopiso'. Napoaton Coansha Paotistari chiníquën pënënin. “Yosë co nohuantérinhue' iyaparin sa'in osérëtaton macamaso”, itérin. Napotohuachina, chiníquën no'huitaton, sontaro'sa' camairin macacaiso marë'. Masahuatona', tashinan pëiquë po'mopi.

⁵ Chiníquën no'huiton, yatëpapirinhue', piyapi'sa' të'huatérin. “Yosëri chachin Coansha a'parin pënëinfoaso marë”, ta'tona', noya ni'pi. Inapita të'huataton, co atëpatérinhue'.

⁶ Ina quëran hua'huatérinso' tahuëri nanihuachina, pita ninin. Na'a piyapi'sa' amatérin. Naporö' Irotiasa hua'huin ya'conahuaton, ya'ipi piyapi'sa' ni'térantapaquë nansararin. Nanon nansarinsö' ni'sahuaton, hua'ani pa'yatérin: ⁷ “Ma'sona téranta', apia'hua, nohuantohuatan, nico quëchinquën. Yoscoarë' quëchinquën,” itérin. ⁸ Itohuachina, a'shin paahuarin.

—¿Ma'ta' mama ma'pai? itoonin.

—“Coansha anishitëconotahuaton, motën quëtoco,” itëquë', itérin a'shini. Manorahuaton, hua'an ya'huérinquë paantarin.

—Coansha motën nohuantérahuë. Sënanquë acorahuaton, apiramiáchin quëtoco, itoonin.

⁹ Natanahuaton, hua'an sëtérin. “Coansha noya quëmapi,” ta'ton, co huachi yonquirinhue' tëpacaso'. Co yatëpapirinhue', “Ya'ipi piyapi'sa' nataninaco, Yoscoarë' itérahuë,” ta'ton, sontaro'sa' a'parin tëpacaiso marë'. ¹⁰ Pa'sahuatona', tashinan pëiquë nishitëconotonpi. ¹¹ Motën sënanquë acorahuatona', nanon quëtopi. Nanonta' a'shin quëtoonin.

¹² Napotohuachinara, imarinsopita natantahuatona' huë'pi. Nonën quëparahuatona', pa'pitopi. Ina quëran Quisoso sha'huitonpi.

Cosharo' ana'atérinso' (Marcos 6.30-44; Lucas 9.10-17; Juan 6.1-14)

¹³ Coansha tëpapiso' natantahuaton, Quisoso piyapi'sa' patérin. Potiquë ya'conahuaton, co piyapi ya'huérinquëhuë' pa'nin. Piyapi'sa' natantahuatona', imapi. Ira pa'tatona', inahua'ton canconpi. ¹⁴ Quisososo canconahuaton nonshipirinhue', notohuaro' piyapi'sa' quënanconin. Quënanconahuaton, na'con nosororin. Noya nontaton, ya'ipi cania'piro'sa' anoyatérin. ¹⁵ I'huararahuaso', ca'tano'sanënpitari itiipi:

—Nani i'huarin. Co manta' isëquë ya'huérinhue'. Piyapi'sa' a'paquë' ninanoro'saquë pa'ina'. Inaqué cosharo' pa'anatona' ca'ina', itopirinahuë'.

¹⁶ —Co iyaro'sa' pacacaiso' ya'huérinhue'. Canpitari a'caco', itérin Quisosori.

¹⁷ —Capa isëquë capacaso'. A'natérapoíchin pan, catoíchin sami, inaíchin ya'huétérincoi, itopi.

¹⁸ —Inaya téranta' quëshico, itohuachina, quëshiipi.

¹⁹ Ina quëran piyapi'sa' sha'huitérin pastoquë huënsëcaiso marë'. Nani huënsëhuachinara, Quisosori a'natérapoya pan, catoya sami, inapita manin. Masahuatón,

inápaquë në'pëtahuaton, Yosë nontërin. “Yosparinquën, Tata,” itahuaton, pan, sami, inapita së'panahuaton, ca'tano'sanënpita quëtërin.

—Piyapi'sa' quëtonco' ca'ina', itohuachina, quëtëra'piapi. ²⁰ Ya'ipi piyapi'sa' coshatopi. Natëaquë huarë' coshatopi. Ina quëran pë'sotopiso' mapi. Shonca cato' i'më' mëntatopi. ²¹ A'natérápo huaranca pochin quëmapi'sa' coshatopi. Sanapi'santa' hua'huinarë chachin coshatopi anta'.

I'i aipi i'narinso'

(Marcos 6.45-52; Juan 6.16-21)

²² Ina quëran ca'tano'sanënpita sha'huitërin. “Potiquë ya'conahuatoma', aquëtëran paco'. Nani piyapi'sa' nontohuato, canta' pa'sarahuë,” itohuachina, pa'pi huachi. Ina quëran piyapi'sa' nontërin. ²³ Nani nontohuachina, panënquë inaora pa'nin Yosë nontacaso marë'. Inaquë Yosë nontaso', tashitërin. ²⁴ Ca'tano'sanënpitaso nimirinhuë', sono' huancanai' tashitopi. Ya'ipi tashi' maitopirinahuë', panca ihuan nacapiatona', co nanitopihuë' chiníquën paacaiso'. Poti opoto opototarin. ²⁵ Co tahuëriyatérasohuë', Quisoso huë'sapirinhuë', co nitotopihuë'. I' aipi i'narahuaton, no'pa pochin pa'tarin. Poti ya'cariarin. ²⁶ Ca'tano'sanënpitari quënanpirinahuë'. Ii' aipi i'narinso' ni'sahuatona', pa'yanpi. “Hua'yan” ta'tona', “ëë” topi. Chiníquën pa'yanpirinahuë', ²⁷ a'naroáchin Quisosori nontërin.

—¡Co'ta ca huë'sarahuë. Ama pa'yancosohuë! Chiníquën cancantoco', itërin.

²⁸ Ina natanahuaton, Pitrori itërin:

—Quëma Sinioro ni'quëhuarë', sha'huitoco pa'i. Canta' i' pa'tato nacapi'inquën, itërin.

²⁹ —Noyapa', huëquë', itohuachina, Pitro poti quëran nohuaraitahuaton, ii' aipi huanirin. Quisosoíchin yonquiaton, amasha huancanaimiachin noya pa'sapirinhuë'. ³⁰ Ihuani chiníquën aco'sacaitërinso ni'sahuaton, të'huatërin. Napohuachina acopoi' pa'sapirinhuë':

—¡Catahuaco Sinioro! itërin.

³¹ A'naroáchin Quisosori maimirarin. Oshirahuaton, ahuaniintarin:

—Co ya'ipi cancanëñ quëran natérancohuë' ni'ton, acopoi' pa'sapiranhue'. ¿Onpoatonta' co noya natérancohuë'? itërin.

³² Ina quëran potiquë quësahuaton, ichiya'conin. Ya'compachina, a'naroáchin ihuan sanorin. ³³ Napohuachina, na'con yonquipi.

—Quëmaso' Sinioro tëhuëñchachin Yosë hui'ninquën, ta'tona' chinotopi.

Na'a cania'piro'sa' anoyatërinso'

(Marcos 6.53-56)

³⁴ Ina quëran aquëtëran canconahuatona', Quinisariti parti nonshipi. ³⁵ Ya'huëhuano'sari nohuitahuatona', nanan a'papi. “Quisoso nani canquirin,” topachinara, na'a cania'piro'sa' quëpi anoyatacaso marë'. Nisha nisha parti quëran huë'pi. ³⁶ “Quëma a'moranso' huirotëñ têranta' së'huatona', noyachina'” itopi. “Inta nipachin së'huaina'” topachina, së'huapi. Insoarisona së'huahuachina, a'naroáchin noyatopi.

15

Shimashonënapita napopiso'

(Marcos 7.1-13)

¹ Ina quëran a'naquën parisioro'sa', cotio maistro'sa', inapita Quirosarin quëran huë'pi Quisoso natanacaiso marë'.

² —¿Onpoatonta' ca'tano'sanënpita co quiya pochin nipihiue'? Iráca shimashonënpoa' inachintopiso' a'chintërinënpoa'. “Co'huara coshachatérasëmahuë', i'shaquë pi'pian

niopoimiratoco' ama oshahuanacaso marëhuë!" topi iráca. Quëmaso nipurinhue' co ina pochin nicacaso' a'chintérantu, itopi.

³ Napotohuachinara, Quisosori itérin:

—¿Onpoatonta' campitanta' shimashonénpoa' inachintérinso' natétoma', co Yosé pénentérinso' natéramu, ténin. Naporahuaton, "Inso téranta pa'pina', a'shina' inapita noya nicatoma natéco', ténin. Napoaton tatama' ma'sha pahuantohuachinara, aspiratatomá, co quétéramu, ténin Yosé iráca.

⁵ Canpitaso nipurinhue' nisha a'chinama'. "Ma'sha ya'huétérincoso' nani acorahué Yosé quéta'huaso marë", topatéra, co tatando' quétacaso' ya'huérinhue', toconama'. Napoaton tatama' ma'sha pahuantohuachinara, aspiratatomá, co quétéramu, ténin Yosé iráca. ⁷ "Yosé imarai," topiramahué, co imaramahué. ¡Canpitaso' nonpintenquëma! Iráca Isaiasë ninshitaton, no'tequén ninorinquëma'.

⁸ Yosé naporin: "Isopita piyapi'sa' nanamëna quérana noya nontopirinacohue', co cancanëna quérana imarinacohue'. Co ca pochin cancantopihué".

⁹ Yosé pénentérinso' a'chinara, topiranahué, inahuara yonquinëna quérana a'chinpi. Napoaton topinan quérana chinotérinaco," ténin Yosé.

Iráca Isaiasë ninshitaton naporin, itérin Quisosori.

Onporahuatëhuasona oshahuanëhuaso'

(Marcos 7.14-23)

¹⁰ Ina quérana piyapi'sa' pérasahuaton, a'chintérin.

—Ya'ipinquëma' natanco no'tequén yonquicamaso marë. ¹¹ Coshatéreso marë' co oshahuanëhué. Cancanénpoa quérana yonquirëso marë' oshahuanëhuaso'. Téhuenchachin co noyahue' nonpatéra, oshahuanë', itérin.

¹² Ina quérana ca'tano'sanénpitari sha'huitiirin.

—Achin Maistro pénénancoi ni'ton, parisioro'sa' no'huirinénpue, itopi.

¹³⁻¹⁴ —Ama ina marë' pa'yancosohue'. Oshaquëra Yoséri ana'intarin. Ni'co'. Ma'sha sha'patéra, co pacatéro' pa'araréhué'. Ocoirahuatë' té'yatérë'. Inapochachin co nanamëna imapisopitahué' Yoséri a'poarin. Inapitaso' somaraya pochin cancantopí. Somarayaso' co nanitérinhué' a'na somaraya noya quépacaso'. Quéparin naporini, cato chachin panca naninquë anochitonahué', itérin Quisosori.

¹⁵ —Achin Maistro a'chintérancoiso', a'chintaantaco quiyanta' no'tequén nitochii, itérin Pitrori.

¹⁶ —¿Co campita téranta' yonquiyátérinu? Inta nipachin, a'chinchingue'.

¹⁷ Nani ma'sha ca'néhuaso marë', co ina marë' oshahuanëhuahué'. Co cosharo' cancanénpoaque' ya'coninhué'. Chi'chirinaménpoaque' ya'conin. Ina quérana inquiantaréhué'. ¿Co ina nitotérinhué' ti? ¹⁸ Napoaponahué', cancanëma quérana co noyahue' yonquihuata, co noyahue' nonama'. Ina marë' oshahuanama'. ¹⁹ Co noyahue' yonquihuata, tépatérama', nitéhuananpitérama', monshihuanacasoáchin yonquirama', ihuatérama', nonpintérama', pinotérama'. ²⁰ Ina pochin cancantohuata, oshahuanama'. Co i'shaque niopoimiratarihuarahuénta', coshatohuatéhuara, co ina marë' oshahuanëhuahué'. Cancanénpoa quérana noya yonquicaso' ya'huérin. Ina Yosé no-huantérin, itérin Quisosori.

Nisha sanapi natétérinso'

(Marcos 7.24-30)

²¹ Ina quérana Cotia parti quérana pipirahuaton, Tiro, Siton, inapita parti pa'nin.

²² Naporó a'na Canaan sanapi inaquë ya'huérinsoari huécapairahuaton, chiniquén itapon:

—¡Nosoroco, Sinioro! Quëmaso' Tapico' shinquën ni'ton, Yosë chachin acorin-quën piyapi'sa' catahuamaso marë' tēnahuë. Hua'huahuë parisitárin. Sopairi ya'coancantaton, chiníquën aparisitarin. Inquitoco, topirahuë', itérin.

²³ Quisososo' co a'panitaponahuë' pa'sapirihuë', sanapiriso' imaraton:

—Nosoroco Sinioro, itérarin. Ina ni'sahuatona', ca'tano'sanënpitari pi'pian no'huipi.

—Iso sanapi a'paqué' pa'in. Imaquitonpoa', pinatano' níriarin, itopi.

²⁴ Napotohuachinara, sanapi itérin:

—Quëmaso' imoya nisha piyapinquën. Israiro'sa' catahua'huaso marë' Yosë a'parinco. Inahuaso Yosë piyapinënpita nípirinahuë', ohuica chihuérinso pochin nipi ni'ton, catahuarahuë, itérin.

²⁵ Sanapiso nípirinhuë', isonquirahuaton moshaquirin.

—Nisha sanapico nípirahuë', canta' Sinioro catahuaco, topirahuë', itérin.

²⁶ —Ni'quë' imoya. Hua'huar'o'sa' a'cahuatéra, co cosharonën osérëtahuaté' ni'nira a'caréhuë', itérin Quisosori.

²⁷ —Naporin mini Sinioro. Napoaponahuë', pi'pian téranta' cosharo' atatohuachina, ni'nira'huayari capitérin ni'ton, quiyanta' catahuacoi, topirahuë', ténin.

²⁸ —¡Ma noya imoya natéranco! Ya'ipi cancanën quëran huarë' natéranco ni'ton, hua'huan anoyachinquën, itérin. Napotohuachina, a'naroáchin hua'huin noyatérin huachi.

Nisha nisha cania'piro'sa' anoyatérino'

²⁹ Ina quëran Cariria sono' yonsanquë pa'sahuaton, a'na panënquë pantarin. Inaquë huënséconin. ³⁰ Napohuachina, notohuaro' piyapi'sa' huë'pi. Nisha nisha caniori maninsopita quësapi. A'naquën sonpacha, a'naquën somaraya. Apiaro'sa', né'huëyar'o'sa', inapita quësahuatona', Quisoso pirayan acoipi. Inaquë acoihuachinara, ya'ipimiachin anoyatérin. ³¹ Piyapi'sari ni'sahuatona', pa'yatopi. "Ni'co'. Né'huëyar'o'sa' nonsapi. Apiaro'sa' nani noyatopi. Sonpacharo'sa' noya iratopi. Somarayaro'santa' noya quënantopi. ¡Ma noyacha Yosëso paya! ¡Ma noyacha ni'ton, piyapinënpitanpoa catahuarinpoa paya!" topi.

Cosharo' ana'atantarinson'

(Marcos 8.1-10)

³² Ina quëran ca'tano'sanënpita pérasahuaton, itapon:

—Piyapi'sa' nosororahuë. Nani cara tahuëri pochin natanarinaco ni'ton, co huachi manta' cosharo' ya'huëtopihuë' capacaiso'. Co topinan yaa'parahuë', tanari canahuachina', itérin.

³³ —Pa'pi notohuaro' piyapi'sa' yamorapi. ¿Intohuacha cosharo' macatë' isonapo' piyapi a'carë nicaya? Co pëi' isëquë ya'huërinhuë', itopi.

³⁴ —¿Onpo panta' ya'huëtérinquëma'? itohuachina,—Canchiséíchin pan, caraíchin sami, inaíchin ya'huëtérincoi, itopi.

³⁵ Ina quëran piyapi'sa' sha'huitérin no'paqué huënsécaiso marë'. Sha'huitohuachinara, huënsépi. ³⁶ Nani huënséhuachinara, canchisë pan, sami, inapita masahuaton, Yosë nontérin. "Yosparinquën Tata," itérin. Ina quëran së'panahuaton, ca'tano'sanënpita quëtérin piyapi'sa' quëtacaiso marë'. Ya'ipi quëtéra'piapi.

³⁷ Nani quëtohuachinara, ya'ipiya natëaque' huarë' coshatopi. Ina quëran pë'sotopiso' masahuatona', canshisë i'më' mëntatopi. ³⁸ Catapini huaranca quëmapi'sa pochin coshatopi. Sanapi'santa' hua'huinarë chachin coshatopi. ³⁹ Ina quëran piyapi'sa' nontahuaton, potiquë ya'conin. Aquëtérin pëtonahuaton, Macatan parti canconin.

¹ Ina quëran parisioro'sa', satosioro'sa' inapita Quisoso nontacaiso marë' huë'pi. Nonpintatona', nontopi atëhuëcaiso marë'. "Yosë a'paimahuachinquën, sacai' nicacaso nininso' niquë'. Quiyanta' ina nicatoi, natëiinquën," itëri.

² "¿Onpoatomata' iyaro'sa' co no'tequen yonquiramahuë? Ni'co'. O'nan nitoninorama'. I'huanahuanquë noyapihuayanchin nipachina, 'Tashiraya noyahuantapon,' tënama'.

³ Tashiramiachin chistro yaratohuachinaso', 'Ipora tahuëri o'nanapon nimara,' tënama'. Ina nitotapomarahuë', ¿onpoatomata' ipora chachin naporahuësopita co yonquiramahuë'? ⁴ Ipora ya'huëramasopita co noyahuë' cancantërama'. Nitëhuananpitopisopita pochin cancantatoma', co pi'pisha tëranta' Yosë yanatëramahuë'. 'Sacai' nicacaso nininso' niquë' natëiinquën,' itopiramacohuë', co Yosë nohuantërinhuë' ina pochin nica'huaso'. Isoichin anitotarinquëma'. A'na tahuëri canpita nitotacamaso marë', Conasë pochin nisarahuë" itërin. Ina quëran patërin huachi.

Parisioro'sa' yanonpimpiso'

(Marcos 8.14-21)

⁵ Ca'tano'sanënpita sono aquëtëran pëntonpirinahuë', nariantopi pan quëpacaiso'. ⁶ Ina quëran Quisosori itërin:

—Parisioro'sa', satosioro'sa' inapita, pan ahuëpocatërinso' pochin ya'huëtopi. Ama iyaro'sa' ina nohuantocosohuë', itërin.

⁷ Natanaahuatona', ca'tano'sanënpita capini ninontopi.

—¿Onpoatonta' naporin? tënин a'naso'.

—Ahuëñ. Capa pan. Co quënëhuahuë' ni'ton, napotérinpoa' nimara, tënин a'nanta'.

⁸ Ninontopiso' nitotaton, Quisosori itërin:

—¿Onpoatonta' "capa pan," toconama'? Tëhuëñchachin co noya natëyatëramacohuë'.

⁹ A'chintápiranquëmahuë', ¿ipora huanta' co yonquiramahuë' ti? Yonquico' iyaro'sa'. I'hua chachin a'natérápo painchin niperihuë' a'natérápo huaranca piyapi ananitërahuë. ¿Ina nariantërama' ti? Naporo' pë'sotopiso' shonca cato' i'më' mëntatërama'. ¹⁰ Ina quëran canchisë painchin niperihuë', catapini huaranca quëmapi'sa' ananitërahuë. Naporo' canchisë i'më' pë'sotopiso' manama'. ¹¹ ¿Onpoatomata' co yonquiramahuë'? "Pan ahuëpocatërinso' pochin ya'huëtopiso' ama nohuantocosohuë," itohuatënquëmara, co cosharo' yonquiato naporahuë', itërin.

¹² Naporo huarë' yonquipi huachi: "Co pan chachin yonquiaton, naporinhue'. Parisioro'sa', satosioro'sa' inapita a'chinpiso' yonquiaton, pënëninpoa'. Pi'pisha pan ahuëpocatërinso' së'yonpachinara, a'naroáchin së'cotërin. Inapochachin inapitanta' co no'tequen a'chinatonaraihuë', piyapi'sa' anishacancantopi, tapon napotérinpoa'," topi.

Pitro natëtërinso'

(Marcos 8.27-30; Lucas 9.18-21)

¹³ Ina quëran Sisaria Pinipo parti pa'pi. Inaquë ca'tano'sanënpita itapon:

—Nani ma'sha nanitaparahuëso marë', ¿inpochinta' piyapi'sa' cancantërinaco? itërin.

¹⁴ —Nisha nisha cancantiarinëñ: "Coansha Paotistaco' nanopiantarinso' ni'ton, naporin," topi a'naquëñ. "Co inahuë'. Iniasëco' nanopiantamara," topi a'naquëonta'. "Pënëntona'pi iráca chiminspirihuë', nanopiantarinso' nimara, tomantatona', Irimiasë nimara," topi a'napitanta', itopi.

¹⁵ —¿Canpitapo'? ¿Incota tënama'? itërin. Itohuachina, ¹⁶ Simon Pitrori itërin:

—Quëmaso' Cristo. Yosë hui'nin chachinquëñ. Ina nanopiton, a'paimarinquëñ, itërin.

¹⁷ —Ma noyacha iyasha Yosë catahuarinquëñ ni'ton, naporan. Napoaton noya cancantëran. Co quëmaora yonquinëñ quëran nitotëranhuë'. Tata Yosë chachin anitotërinquëñ. Quëmaso' Conasë hui'ninquëñ. Simon itopirinëñhuë',

¹⁸ nasha nininëñ acochinquëñ. Pitro itaranquëñ. Ca nohuanto, na'pitëquë noya pëipiso pochin na'a piyapi'sa' a'chintaran imainacoso marë'. A'chintohuatan, huëñtonëhuëquë aya'conarahuë. Oshaquëran na'asarama huachi. Co chimirin

téranta' minséarinquëmahue'. ¹⁹ A'na tahuëri chiníquën nanan quëchinquëen a'napita a'chintacamaso marë'. Yosë huëntonënqué ya'conacaiso' a'chintaran. Ya'coana niahuiqué i'soatérëso pochin piyapi'sa' catahuaran ya'conacaiso marë'. Ina quëran ma'sona noya nicacaiso' a'chintaran. Insosona co yanatëhuachinquënhue', sha'huitéquë': "Tëhuëñchachin co Yosë ya'huërin'pa' pa'saranhue'", itëquë'. Yosérinta' inachachin sha'huitarin. A'naquënso nimirinhue', noya natanpi quëran cha'ësapi huachi. Yosérinta' noya ni'sarin. Natérinaco ni'ton, oshanëna' Yoséri inquitarin. Napoaton huëntonënqué ya'conapi huachi, itërin.

²⁰ Ina quëran ya'ipi ca'tano'sanënpita itapon: "Ca mini Cristoco. Yosë chachin acor-inco piyapi'sa' nicha'ëca'huaso marë'. Ina nitotapomarahuë', ama iporaso' a'napita sha'huitocosohue', itërin.

Chiminacaso' ninorinso' (Marcos 8.31-9.1; Lucas 9.22-27)

²¹ Naporo quëran huarë' chiminacaso' ninoton, ca'tano'sanënpita sha'huitérin:

—Quirosarinqüë pa'pato, na'con parisita'huaso' ya'huërin. Cotio ansiano'sa', corto hua'anoso', cotio maistro'sa', inapita co huachi quë'yaarinacohue'. Tëpaarinaco. Chiminaporahuë', cara tahuëri quëran Yosë ananpitaantarinco, itërin. ²² Ina natanahuaton, a'naroáchin Pitrori amasha quëparahuaton, chiníquën pënënin:

—¡Ama Siniro napoquësuhue! Ama Yosë nohuanchinsuhue', itopirinhue',

²³ Quisosori tahuëretahuaton, itërin.

—¡Ta'tëquë' iyasha! Sopai nohuanton, napotéranco. ¿Yaanishacancantéranco ti? Co Yosë pochin yonquiranhue'. Piyapinquën ni'ton, quëmaora nohuantéransoachin yonquiran, itërin Quisosori.

²⁴ Ina quëran ya'ipi ca'tano'sanënpita itërin:

—Yaimapatamaco, canpitaora nohuantéremaso' naniantatoma', Yosë no-huantérinsoráchin imaco'. Corosëqué chiníquën parisitérë'. Canpitanta' parisitapomarahuë', imamiatoco. ²⁵ Noya nanopicamasoáchin yonquihuatama', topinan quëran nanoparama'. A'na tahuëri chiminpatama', parisitomiatarama'. Nipirinhue', casáchin yonquihuatamaco, parisitapomarahuë' co topinan quëran nanoparamahuë'. Yosë'pa' nanopimiatarama'. ²⁶ Ya'ipi ma'sha isoro'paquë ya'huërinsopita canapiramahuë', co hua'yanëma' cha'ëpachinhue' topinan quëran nisarin. ¡Onponta' pahuëretapiramahuë', co huachi hua'yanëma' nanitarinhue' cha'ëcaso'! ²⁷ Yosë quëran quëmapico ni'to, a'na tahuëri o'mantararahuë. Tatahuë huënaratérino pochin canta' huënaratarahuë. Anquëniro'sapitarë'co o'mantararahuë. Naporo' coisé pochin no'tëquën sha'huitarahuë huachi. Noya nipachina', noya acoarahue. Co noyahue' nipachina', ana'intarahuë huachi. ²⁸ Tëhuëñchachin isoro'pa' hua'anëntapo. A'naquëma' co'huara chimiyantérerasënquémahue', hua'anëntarahuë' ni'sarama', itërin.

17

Nisha pochin ya'norinso' (Marcos 9.2-13; Lucas 9.28-36)

¹ Saota tahuëri quëran Quisoso pa'nin motopi'pa'. Pitro, Santiaco, Coansha, inapitaráchin quëparin. ² Inapitari nicasoi', nisha pochin ya'norin. Ya'ipi ya'pirin pi'i pochin a'pinin. A'morinso' huënaráchin huënaráchin ninin. ³ A'nanaya Moisësë, Iniasë, inapita quënanpi. Iráca ayapirinahuë', Yosë nohuanton, ya'noantatona'. Quisosorë' ninontapi.

⁴ Ina ni'sahuaton, Pitrori itërin:

—¡Ma noya Siniro iséquë huë'nëhua! Nohuantohuatan, cara imënamëa'huaya nii, a'nara' quëma marë', a'nanta' Moisësë marë', a'nanta' Iniasë marë', topirahuë', itërin.

⁵ Nonaquëya', chitorori imotërin. Huënaráchin huënaráchin ninin. Chitoro' huáncana quëran Yosëri sha'huitérin: "Isoso' ca hui'nahuë, na'con nosororahuëso'. Noya ni'nahuë. Ina noya natanco'," itérin.

⁶ Ina natanahuatona', chiníquën pa'yanpi. Isonahuatona', nipa'copirayatopi. Monshoápirinahuë', ⁷ Quisosori së'huaquirahuaton:

—Ama huachi iyaro'sa' pa'yancosohuë'. Huaniantaco', itérin.

⁸ Napotohuachina në'pëtintapirinahuë', Quisosoráchin quënanpi.

⁹ Ina quëran motopi quëran noharamapona pochin, Quisosori itérin:

—Achin ni'namaso', ama insonta' sha'huitocosohuë'. Yosë quëran quëmapico ni'to, a'na tahuëri nanopiantarahuë. Naporo huarë' a'napita sha'huitoco', itérin.

¹⁰ —Pi'pian Sinioro yanatanainquën. Maistro'sa' Yosë quiricanën a'chinpachinara, napopi: "Co'huara Cristo o'mayatérasohuë", Iniasë'ton huéantarin," topi. ¿Onpoatonta' napopi? itérin ca'taninsopitari.

¹¹ —No'téquën napopi. "Noya ayonquiantacaso marë' huéantapon," ténin pënëntona'pi ninoton. ¹² Carimaso nipurinhuë' sha'huitaranquëma'. Nani mini huéantapirinhuë', co nohuitopihuë'. Co yanatétonaraihuë', inahuara yonquinëna quëran no'huipi. Canta' Yosë quëran quëmapico nipurahuë', inapochachin aparisitarinaco, itérin Quisosori.

¹³ Napotohuachina, ca'tano'sanënpita yonquipi huachi: "Téhuëñchachin i'hua Coansha Paotista pënëntérin. Iniasë pënëntérinso pochachin pënëntopirinhuë', co yanatépihuë'", topi yonquiatona'.

Hua'huasha hua'yantérinso'

(Marcos 9.14-29; Lucas 9.37-43)

¹⁴ Nani nohuaraimantahuachinara, na'a piyapi'sa' quënanquimarin. A'na quëmapiso' huë'sahuaton, isonquirin.

¹⁵ —Hui'nahuë Sinioro nosorotoco. Chiníquën parisitarin. Sopai nohuanton, no'paquë nitë'yatahuaton, sa'po sa'po niconin. Pacoro pacorotarin. A'na tahuëri pënqué anotérin. A'na tahuëri i'quë nitë'yaitérin. Naporárin. ¹⁶ Ca'tano'sanënpita sha'huitato: "Sopai inquitoco'," itopirahuë', co nanitopihuë', itérin.

¹⁷ —¡Ma'huantacha ninama paya! Canpitaso' co Yosë natëramahuë'. Co natëtochináchinhue' cancantërama'. Nani hua'qui' a'chintopiranquëmahuë', ¿onporo huarëta' yanatëramaco? itahuaton,—Hua'huasha quëshico, itérin Quisosori.

¹⁸ Quëntahuachina, Quisosori sopai nontérin. "Iso hua'huasha tananpitëquë'. Pipimi-atëquë huachi," itohuachina, a'naroáchin sopai pipirin. Hua'huasha noyatérin huachi.

¹⁹ Ina quëran inaora ya'huaso', ca'tano'sanënpitari natanquirin.

—¿Onpoatonta' Sinioro co quiyariso' nanitërnhue' inquita'huaiso'? itopi.

²⁰ —Co ya'ipi cancanëma quëran huarë' natëramacohuë' ni'ton, co nanitëramahuë'. Natëramaco naporini, catahuaitënquëmahuë'. Yosëso' ya'ipiya nanitaparin. Pi'pian téranta' ina natëtoma', nontohuatama', catahuarinquëma'. Nani ma'sha nanitaparama'. "Yosë nohuanton, iso motopi ya'huinca'in," ténama' naporini, ina nohuanton, ya'huincaitonhuë'. Inapochachin ya'ipi cancanëma quëran natëramaco naporini, sacai' nininso' catahuaitënquëmahuë'. [²¹ Isanpi sopaiso nipurinhuë' sacai' inquitacaso'. Ayono nicatë chiníquën Yosë nontaquë huarë', inquitérë', itérin.]

Chiminacaso' ninoantarinson'

(Marcos 9.30-32; Lucas 9.43-45)

²² Cariria parti papona pochin, Quisosori ca'tano'sanënpita sha'huitaantarín:

—Yosë quëran quëmapico nipurahuë', piyapi'sa' masarinaco. Sha'huirapihuachinaco, masarinaco. ²³ Mapachinaco, tëpaarinaco. Chiminaporahuë', cara tahuëri quëran Yosë ananpitaantarínco huachi, itérin. Natanahuatona', pa'pi, sëtopi.

Coriqui Yosë pëinën marë' quëtopiso'

24 Capinaomoquë canconpachinara, a'naquën Yosë pëinën marë' coriqui ma'patona'piro'sa' huë'pi. Huëcatona', Pitro itiipi:

—Yosë chinotopiso pëi' tapacaso marë' ya'ipinpoa' pi'pian coriqui quëtacaso' ya'huërin. ¿Quëma maistronënso' co pahuërëtérinhue' ti? itopi.

25 —Pahuërëtérin mini, itérin Pitrori.

Ina quëran pëiquë ya'compachina, inaqué Quisoso quënanconin. Co'huara sha'huichátérasohue', inari ninoton, itérin:

—Pi'pian iyasha natainquen. Copirnoros'a' coriqui nohuantohuachinara, ¿inpitata' ma'parin? ¿Quëmopinënpita quëran huaré' ma'parin to? itérin.

26 —Co quëmopinënpitaso' ma'parinhue'. Nisharo'saráchin ma'parin, itérin Pitrori.

—No'téquen naporan. Napoaton co hui'ninpitariso' quëtacaso' ya'huërinhuë'. Inapochachin Yosë pëinënqué nicacaso' ya'huërin. Co caso' quëta'huasohue' nimirahuë', **27** ama no'huitacaiso maréhuë' carinta' quëchi. Sono' yonsanqué pa'sahuaton, yo'natéquë'. Ya'nan ohuararanso' sami nanaménqué ni'qué'. Inaqué coriqui quënanaran. Masahuaton, quëtonqué'. Catoënpo marë' naniarin, itérin. Pitro pa'sahuaton, Quisoso ninorinso chachin quënanconin huachi.

18

Chini chiníquen nanantérinso' (Marcos 9.33-37; Lucas 9.46-48)

1 Ina quëran ya'ipi ca'tano'sanënpitari paahuarahuatona', Quisoso natanpi.

—A'na tahuëri Yosë isoro'paquë hua'anëntohuachin, ¿insota' chini chiníquen nanantarín? itopi.

2 Ina natanahuaton, a'na hua'huasha përasahuaton, huancánachin ahuanirin.

3 —Natanco iyaro'sa' pi'pian a'chinchinquëma'. Co no'téquen yonquiyátéraramahuë'. Hua'huasharo'sa' yonquico'. Co chiníquen nanan nohuantopihuë'. Co a'napita nocanpihuë'. Co inapita pochin cancantohuatamahuë', co onporonta' Yosë hua'anëntérinquë ya'conaramahuë'. **4** Hua'an pochin cancantacamaso' nariantatoma', hua'huasha pochin sano cancantoco'. Ina quëran Yosë noya noya ni'sarinquéma huachi. **5** Imaramaco ni'ton, ya'ipiya nicatahuacaso' ya'huërin. Hua'huaro'santa' nosorohuatama', canta' nosoroaramaco. Ya'ipi hua'huaro'sa pochin cancantopisopitanta', noya ni'co'.

Anishacancantérinso' (Marcos 9.42-48; Lucas 17.1-2)

6 “Hua'huasha natérincoso' anishacancantuhatama', Yosë chiníquen ana'intarinquéma'. A'naquëonta' imasapirinacohue', co chiníquen cancanchatérapihuë'. Inapitanta' anishacancantuhatama', ana'intarinquéma'. Co'huara inapita anishacancanchatérrapomahuë', maréquë chimiítërama' naporini, noya noya niitomahuë'. Pancara'piquë a'sonconotahuaténénquéma', të'aitérinénquéma' naporini, co aquëtë' oshahuaintomahuë'. Piyapi anishacancantacaso', pa'pi co noyahuë'. **7** Isoro'paquë sacai' Yosë imacaso'. Nisha nisha ya'huërin piyapi'sa' anishacancantacaiso'. Ina marë' oshahuani. Anishacancantona'piso nimirihuë', na'con na'con oshahuani. Yosëri chiníquen ana'intarin ni'ton, jma'huantacha nisarin paya!

8 Napoaton imirama quëran, nantëma quëranhuë nípon co noyahuë' nípatama', os-hahuana'ma'. Ninishitëimiratërama', ninishitërantëtërama', ninapotërama naporini, noya noya niitomahuë'. Tantoimira, tantorancha nípomarahuë', Yosë'pa' paatoma', co parisitopiquë pa'itomahuë'. Imirama', nantëma', inapita nishitëtëramaso pochin cancantatoma', ya'ipi aoshahuainquémaso' a'poco'. **9** Ya'pirama quëran quënanamaso marë' co noyahuë' yonquihuatama', pa'pi co noyahuë' nisarama'. Ya'pirama' ocoirama' naporini,

noya noya niitomahuë'. Somaraya nipomarahuë', co parisitopiquë pa'itomahuë'. Cato quëran chachin noya ni'tapomarahuë' parisitopiquë të'yatohuachinënquëma', pa'pi co noyahuë' nisarama', itérin.

Ohuica chihuërinso pochin nininso'

(Lucas 15.3-7)

¹⁰ Ina quëran Quisosori itaantarin: "Ama a'na hua'huasha téranta' nocancosohuë'. Inahuanta' Yoséri nosororin. Nani anquëniro'sa' sha'huitérin a'naya a'naya a'paicaiso marë'. Tata Yosë'pa' ya'huatona', Yosë nontapi. [¹¹ Na'a piyapi'sa' co noyahuë' cancantatona', chihuëpiso pochin nipi. Yosë quëran quëmapico ni'to, o'marahuë inapita nicha'ëca'huaso marë'.]

¹² Ni'co'. A'na quëmapi pasa ohuicaro'sa' pë'tahuarin. Ya'ipiya nosororin. Pastoquë coshatacaiso marë' quëparinquë a'naya téranta' chihuëhuachina, yonípon pa'nin. A'napitaso' inaquëranchin patahuaton, hua'qui' yonisarin. ¹³ Quënanahuaton, pa'yatarin. Iscon shonca iscon ohuicanënpita co chihuëpirinahuë', co inapitaráchin yonquirinhuë'. A'naíchin chihuërinso' quënanahuaton, na'con na'con pa'yatérin. ¹⁴ Inapochachin Tata inápaquë ya'huërinso' nosororinquëma'. Hua'huaro'santa' nosororin. Co nohuantérinhue' a'naya téranta' parisitopiquë paacaiso', ténin.

Nanan anoyatacaso' ya'huërinso'

(Lucas 17.3)

¹⁵ Ina quëran Quisosori pënëantarín. "Imapatamaco, iyaparima pochin ninicamaso' ya'huërin. A'naquën ma'sha onpotohuachinquën, quëmaora paaton, naman anoyatéquë'. Ina quëran oshaquëran pënënquë' noya yonquianta'in. Noya natëhuachinquën, oshanën marë' têhuëñchachin sétahuachin, noya cancantaantarin. Iyaparima pochin ninosoroantarama huachi. ¹⁶ Nipirihuë', co yanatëhuachinquënhuë', a'na ya'pihuë nípon, catohuë nípon pënënanso natanacaiso marë' quëparahuaton, nontoantaquë'. Iyaro'sa' quëparansopitanta' noya nataina' ama pi'pian téranta' nonpinacaso marëhuë'. Inapitarinta' pënëina'. ¹⁷ Co inapita téranta' yanatéantahuachinhue', ya'ipi imaramasopita niyontonpachina', ya'ipiya sha'huitéquë' inahuarinta' naman anoyachina'. Inapitarinta' pënëantapirinahuë', co inapita téranta' yanatantahuachinhue', ama huachi iyama pochin ni'cosohuë'. Co imarinso pochinhue' nípon, Noma copirno marë' coriqui ma'patona'pi pochin nípon ni'co huachi.

¹⁸ Oshahuanacaso' co yanariantohuachinhue', sha'huitéquë': "Têhuëñchachin iyasha oshahuanan. Co nariantéranhue' ni'ton, co Yosë inquitarinquënhuë', itéquë'. Yosérinta' inachachin napotapon. Nipirihuë', oshanën marë' sétaton Yosë yonquiantahuachin, noyatapon. 'Oshanën iyasha Yosë inquitarinquë', itéquë'. Yosérinta' oshanën inquitaton, noya ni'sarin huachi.

¹⁹ Catoyanquëma téranta' napopianachin yonquiatoma Yosë nontohuatama', Yosë natanatënquëma', catahuarinquëma'. ²⁰ Chinotamacoso marë' niyontonpatama', canpitaro'co ya'huarahuë. Carayanquëma téranta' niyontonpatama', canta' inaquë ya'huërarahuë," ténin Quisoso.

²¹ Ina quëran Pitrori itérin:

—A'na iyahuë Sinioro ma'sha onpotohuachinco, naman anoyachi, ténahuë. Nipirihuë', naquëranchin naquëranchin ma'sha onpotohuachinco, ¿onpo onporota' naman anoyachi? ¿Canchiséro' pochin nimara ti? itérin.

²² —Co canchiséroichin naman anoyatacaso' ya'huërinhuë'. Canchisë shonca canchiséro'* anoyatoco', itérin Quisosori.

Co naman anoyatona'pihuë'

* ^{18:22} Canchisë shonca canchiséro' topachina: Onponta naman anoyatacaso' ya'huërin, tapon napotérin.

23 Ina quëran itaantarin:

“Yosë hua'anëntërinso' a'chinchinquëma', natanco'. A'na hua'an naporinso pochin ninin. Na'a piyapinënpitari nihuirin ni'ton, a'naya a'naya amatërin natanacaso marë'. **24** Napohuachina, a'nara' quëntapi na'a huaranca nihuirinso'. Co apira pahuërëtochináchinhue' nihuitérin. **25** ‘Hua'huayátërahuë nihuirinco ni'ton, co onporonta' nanitarinhue' pahuërëincoso',’ ta'ton, inpriatonën itapon: ‘Iso quëmapi co nanitërinhue' pahuërëincoso'. Chiminaquë huarënta' sacatopirinhue', co onporonta' pahuërarincohue'. Napoaton ya'ipi ma'shanënpita matonquë'. Ina quëran inaora chachionta' pa'anquë'. Sa'in, hui'ninpitarë chachin pa'anquë' pi'pian téranta' cana'i,’ itérin hua'ani. **26** Ina natanahuaton, nihuitona'pi chiníquën pa'yanin. Isonahuaton, nohuantaso' mosharin. ‘Nosoroco siniro oshaquëran ya'ipiya pahuërëinquëen. Ama pa'ancoisohue',’ itérin. **27** Napotohuachina, hua'ani nosororin. Nosoroaton, ya'ipi nihuirinso' ayataton noya a'parin huachi.

28 Nihuitona'piso nipurinhue' pipirahuaton, a'na iin pi'pian nihuirinso' quënanconin. Pasa tahuëri sacatohuachina canarinsoichin nihuipirinhue', maconorahuaton, chiníquën no'huirin. ‘Ya'ipi nihuirancoso' apiramiáchin pahuërëco huachi,’ itérin. **29** Ina quëmapinta' isonahuaton, na'con mosharin. ‘Nosoroco iyasha oshaquëran ya'ipi pahuërëaranquëen,’ itopirinhue', **30** co pi'pian téranta' nosororinhue'. Tashinan pëiquë apo'motérin. ‘Pahuërëtaquë huarë' pipiin,’ itérin. **31** Hua'an piyapinënpitaso' ina ni'sahuatona', no'huitopi. ‘¡Ma'huantacha ninin paya! Co pi'pian téranta' nosororinhue', ta'tona', hua'anëna ya'ipiya sha'huitonpi. **32** Ina natanahuaton, nihuitona'pi amataantarin. ‘¡Quëmaso' pa'pi co noyahue' cancantëran! “Nosoroco,” itéranco ni'ton, hua'huayátërahuë nihuipirancohue', ya'ipiya topinan ayatéränquëen. **33** Carinquën nosororanquënsö pochachin a'na iyasha nosorocamaso nipurinhue', ¿co pi'pian téranta' nosororanhue' ti?’ itérin. **34** Ina quëran chiníquën no'huiton, sontaro'sa' amatahuaton, tashinan pëiquë apo'motérin anta'. ‘Pahuërëinco huarë' chiníquën aparisitëquë’, itérin,” ténin.

35 Ina quëran itaantapon:

—Inapochachin Tata Yosë na'con nosoroatënquëma', ya'ipi oshanëma' yainquitopirinquëmahuë', co canpita capini nanan anoyatohuatamahuë', co oshanëma' inquitarinquëmahuë'. Chiníquën parisitarama'. Ya'ipi cancanëma quëran huarë' nanan anoyatacaso' ya'huërin, itérin Quisosori.

19

Sa'ahuano'sa' pënëninso'

(Marcos 10.1-12; Lucas 16.18)

1 Nani a'chinahuaton, Cariria quëran pipirin. Cortanii' aquëtëran paaton, Cotia parti cancoantarin huachi. **2** Notohuaro' piyapi'sari imasapi. Inaquë na'a cania'piro'sa' anoyatërin.

3 Ina quëran a'naquëen parisioro'santa' huë'pi. Nonpintatona', atëhuëcaiso marë' nontiipi:

—¿Noya ipora sa'anpo' të'yatacaso' ti? itiipi.

4 —¿Ma'ta' Yosë quiricanën quëran sha'huitérinpoa'? Iráca ya'nan piyapi nípon, catoíchin Yosëri ninin. A'na quëmapi, a'na sanapi, inaíchin ninin. **5** “Napoaton quëmapi sa'apachina, pa'pin, a'shin, inapita patahuaton, sa'iné' nichinpitacaso' ya'huërin. Cato' piyapi nipurinhue', a'naíchin pochin Yosëri ni'nin,” ténin. **6** Catoya'pi nipurinhue', a'naíchin pochin ni'nin. Nani Yosëri asë'quërin ni'quëhuarë', co onporonta' sa'ama' të'yatacaso' ya'huërinhue', ténahuë, itérin Quisosori.

7 —¿Onpoatonta' nipachin, iráca Moisësëso' pënëninpoa' sa'anpo' të'yatacaso'? “Sa'anpo' yatë'yatohuatëra, coisëquë aninshitahuatë', të'yatérëe”, ténin, itopi parisioro'sari.

⁸ —Co tē'yatacaso' pēnēninquëmahue'. Co natantochináchinhue' cancantërama' ni'ton, napotérinquëma'. "Coiséquë ninshitaquë huarë' tē'yatérë'," itopirinquëmahue', ya'nan nípon quëran huarë' co Yosë nohuantérinhue' sa'ama' tē'yatacaso'. ⁹ Napoaton carinquëma' pēnēninquëma'. Co sa'ama' monshihuanpirinhue', tē'yatohuatama', oshahuanama'. Ina quëran a'na sanapi mapatama', co inaso' sa'amahuë'. Monshitëramaso pochin Yosëri ni'nin, itérin.

¹⁰ Ina natanahuatona', ca'tano'sanënpitari itapona':

—Ina pochin ni'quëhuarë', co noyahuë' sa'acaso' nimara, itopi.

¹¹ —A'naquën mini Yosë nohuanton co sa'apihuë'. Na'con na'conso nimirinhue' noya sa'acaso'. ¹² A'naquën hua'huatapona quëran huarë' inachin co nanitopihuë' sa'acaiso'. A'naquëonta' a'napitari ma'sha onpotérin ni'ton, co huachi nanitopihuë'. A'naquëonta' na'con na'con Yosë marë' yasacatatona', co sa'apihuë'. Ina pochin nicacamaso' nohuan-tuhuatama', inapoco', itérin Quisosori.

Hua'huaro'santa' nosororinso'

(Marcos 10.13-16; Lucas 18.15-17)

¹³ Ina quëran hua'huaro'sa' quëpi Quisosori së'huamotocaso marë'. Inapotahuaton, inapita marë' Yosë nontérin. Na'a hua'huaro'sa' quëntapirinahuë', ca'tano'sanënpitari co nohuantopihuë':

—Ama napotocosohue'. Quisoso apinama', itopi. ¹⁴ Quisososo nimirinhue' ténin:

—Tananpitoco' hua'huaro'santa' huë'ina'. Ama a'pacosohue'. Hua'huaro'sa' a'naroáchin yaimarinaco. Inapita pochin cancantohuatama', Yosë hua'anëntérinquë ya'conarama', itahuaton, ¹⁵ hua'huaro'sa' së'huamotorahuaton, Yosë nontérin noya ya'huëcaiso marë'. Nani Yosë nontohuachina, pa'nin huachi.

Ma'huan yaimarinso'

(Marcos 10.17-31; Lucas 18.18-30)

¹⁶ Ina quëran a'na quëmapiri huëcapairin.

—¿Ma'ta' Maistro caso' nii nanopimiata'huaso marë'? Sha'huitoco canta' noya nii, itérin.

¹⁷ —¿Ma'marëta' noya nininso' natananco? Yoséíchin noya noyaso'. Nanpimiatamaso' nohuantohuatan, pēnëntérinso' natëquë', itérin.

¹⁸ —¿Insopitata' natëca'huaso' ya'huérin? itérin ma'huani.

—“Ama piyapi tēpaquësohuë'. Nani sa'an ya'huëtohuachinquë, ama monshihuan-quësohuë'. Ama ihuatëquësohuë'. Ama nonpinapiquësohuë'. ¹⁹ Tata natëquë'. Mamanta' natëquë'. Quëmaora ninosororanso pochachin a'napitanta' nosoroquë',” itérin Quisosori.

²⁰ —Hua'huatapo quëran huarë' inapita natërahuë. ¿Ma'ta' pahuantarincu nica'huaso'? itaantarin ma'huani.

²¹ —Yosë pochachin cancantamaso' nohuantohuatan, ya'ipi ma'shanënpita pa'anconahuaton, coriqui canaranso' sa'ahuaros'a' quëtëquë'. Ina quëran imaco huachi. Co huachi ma'sharáchin yonquihuantanhuë', inápaquë canamiataran, itérin Quisosori.

²² Ina natanahuaton, co huachi noya cancantérinhue'. “Hua'huayáterahuë ma'sha ya'huëterinco,” ta'ton, sëtérin. Sëtaton, pa'nin huachi.

²³ Nani pa'pachina, ca'tano'sanënpita itérin:

—Sacai quëran ma'huano'sa' Yosë hua'anëntérinquë ya'conapi. ²⁴ Ni'co' iyaro'sa'. Nahuan huëratën pi'pira'huaya naninëñ ya'huëterin. Camiyoso panca masho ni'ton, sacai' inaquë ya'conacaso'. Ma'huano'saso' ina quëran saca sacai Yosë hua'anëntérinquë ya'conacaiso', itérin.

²⁵ Ina natanahuatona', pa'yanpi.

—Napoahuarë' ¿cha'ërë'po ta'ma a'naya téranta nica? nitopi.

²⁶ Ya'ipiya notëerahuatón, itapon:

—Co insonta' inaora nanitérinhue' cha'ëcaso'. Yoséíchin nanitérin anoyacancantin-quëmaso'. Ya'ipiya nanitaparin, itérin.

27 —Ni'quë' Maistro. Quiyaso' ya'ipi ma'shanëhuëi patahuatoi, imasarainquën. ¿Ma'ta' ina marë' canapoi? itérin Pitrori.

28 —Téhuëñchachin iyaro'sa' canaarama'. Yosë quëran quëmapico ni'to, a'na tahuëri ya'ipiya anoyatarahuë. Naporo' noya noya ya'noato, hua'anëntacaso' shiraquë huënsëarahuë. Inaquë coisë pochin no'tequën sha'huitarahuë. Canpitanta' acoaran-quëma' ya'ipi israiro'sa' shonca cato' huënton chachin ninins' hua'anëntacamaso marë'. Shonca catonquëma' napoarama'. **29** A'naquëma mini imamacoso marë' ma'shanëma' patarama'. Ina marë' Yosë acanaarinquëma'. A'naquëma' pëinëma', iyaparima', oshiparima', tataparima', mamaparima', sa'ama', hui'nama', no'panëma' inapita patarama' a'chinacaso marë'. Inapohuatama', a'naíchin marë' pasa aquëtë canarëso pochin quëtarinquëma'. Ina quëran a'na tahuëri Yosë'pa' nanopimiatarama'. **30** A'naquëns ipora chiniquëns nanantopirinahuë', a'na tahuëri topinan piyapi pochin nisapi. A'naquëns nimirinhue' ipora topinan piyapi pochin nicaponaraihuë', a'na tahuëri chiniquëns nanantapi, itérin Quisosori.

20

Sacatoro'sa' canapiso'

1 "Natanco iyaro'sa', Yosë hua'anëntérinso' a'chintaanta'inquëma'. A'na quëmapi ya'huërin, pancana no'pa' hua'anëntérinso'. Inaquë opasáchin sha'nin. Panca imin ya'huëtérin ni'ton, piyapi'sa' nohuantérin iminënquë asacatacaso marë'. Tashiramiachin pa'nin sacatoro'sa' yonípon. **2** A'naquëns quënanconahuaton: 'Sacatoco', itohuachina, natanpi. '¿Onpo marëta' asacatarancoi?' itohuachinara: 'A'napita canapiso nápo' pahuërëaranquëma', itérin. 'Noyahua'. Ina nápo marë' ni'quëhuarë', sacatarai, topachinara, iminënquë a'parin sacatacaso marë'. **3** Ina quëran yono pi'iriahuaso', cachiquë paantarin a'na sacatoro'sa' yoniantacaso marë'. A'naquëns quënancoantarín. **4** 'Canpitanta' iminëhuëquë sacatoco' no'tequën pahuërë'inquëma', itohuachina: 'Noyahua'. Sacachii nipachin, ta'tona', inahuanta' paantapi sacatapona'. **5** Ina quëran camotëchin naquëranchin cachiquë paantarahuaton, a'napitanta' iminënquë a'parin sacatacaso marë'. Téhuërénahuaso', inapotaantarín. **6** I'huaraya huarë' naquëranchin cachiquë paantarahuaton, quëmapi'sa' quënancoantarín. '¿Onpoatomata' topinan huanírama'? ¿Ya'ipi tahuëri ipora co sacatéraramahuë' pa'? itoonin. **7** 'Co sacachátéraraihuë'. Co inso térranta' camairincoihuë' ni'toi, ninaarai', itopi. 'Inta nipachin, canpitanta' iminëhuëquë sacatoco', itérin. A'na oraíchin pi'i ya'conacaso' nisapirinhuë', pa'pi sacatapona'.

8 Nani tashihuachina, hua'anëni inpriatonën sha'huitérin: 'Ya'ipi sacatoro'sa' amatahuaton, pahuërëquë'. I'huaraya huarë' sacatérinsopita'ton pahuërëquë', itérin.

9 A'na oraíchin sacatopirinahuë', huë'pachinara, ya'ipi tahuëri nanirinso' pahuërërin.

10 Tashiramiachin sacatopisopita ina ni'sahuatona', yonquiapi: 'Na'con na'con canpoaso' pahuërëarinpoa', ta'tona', huë'pirinahuë'. Ina nápo chachin pahuërërin anta'.

11 Coriqui ma'pataponaraihuë', hua'anën no'huiconpi. **12** 'Pasopitaso', a'na oraíchin sacatopi. Quiyaso nimirinhue', ya'ipi tahuëri sacatérarai. Tashiramiachin quëran huarë' pi'i pi'carincoi. Hua'qui' sacatopiraihuë', napopianachin pahuërërancoi. Co no'tequën pahuërërancoihuë', itérin a'nari. **13** 'Co'chi iyasha nonpintéranchuëmahuë paya. Ina nápo coriqui marë' ya'ipi tahuëri sacatarai, itéraramaco ni'ton, no'tequën pahuërëranquëma'.

14 Canaranso' masahuaton, paqué huachi. Anapitaso' co hua'qui' sacatopirinahuë', caora nohuanto, ya'ipi tahuëri nanirinso' pahuërërahue. **15** Caoranquëns coriqui ni'ton, onposona nohuantohuato, inanapo pahuërëta'huaso' ya'huërin. Inapita nosoroato, pahuërërahue' marë' ¿no'huiramaco ti'? itahuaton, a'parin huachi. **16** Téhuëñchachin a'naquëns ipora co piyapi'sari noya ni'pirinahuë', a'na tahuëri Yosëri noya ni'sarin.

A'naquënso nimirinhue' ipora piyapi'sari noya ni'pirinahuë', a'na tahuëri co Yosëri noya ni'sarinhuë', itérin Quisosori.

*Chiminacaso' sha'huitantarino'
(Marcos 10.32-34; Lucas 18.31-34)*

¹⁷ Ina quëran Quirosarinqué paantapi. Papon pochin ca'tano'sanënpita amashamiachin quëparahuaton, inapitaráchin sha'huitantarín.

¹⁸ —Natanco iyaro'sa'. Quirosarinqué paantaréhua'. Inatohua' Yosë quëran quëmapico nimirihuë', sha'huirapiarinaco. Cotio hua'ano'sa', maistro'sa', inapita masahuatonaco: "Tépacaso' ya'huérin," tosapi. ¹⁹ Ina tosahuatona', nisha piyapiro'sa' sha'huitapi aparisitinacoso marë'. Téhuarahuatonaco, chiníquén huihuiarinaco. Huihuitonaco, pë'shaarinaco. Ina quëran coroséquë apatanantarínaco chimina'huaso marë'. Chimina-porahuë', cara tahuëri quëran nanopiantarahuë huachi, itaantarín.

*Santiaco, Coansha inapita nohuantopiso'
(Marcos 10.35-45)*

²⁰ Ina quëran cato' ca'tano'sanënpita huë'pi Quisoso nontacaiso marë'. Sipitio hui'ninpita inahuaso'. A'shiné chachin huë'pi. A'shinsó' isonahuaton:

Pípian Sinioro nonchinqué, topiraihuë', itérin.

²¹ —¿Ma'ta' imoya nohuantérän? itérin Quisosori. —Hua'an ya'conpatan, hua'huahuépita chiníquén nanan quëtëquë', topirahuë'. Quëma pirayan ahuënséquë', a'nara' inchinan quëran, a'nanta' ahuënan quëran ahuënséquë', itérin.

²² —Canpitaso' co ya'ipi nitochátéraramahuë' ni'ton, co no'téquén yonquiramahuë'. Máiñ o'orëso pochin chiníquén parisitarahuë. Canpitanta' aparisitohuachinënquëma', ¿ahuantapoma' ti? itérin.

—Ahuantarái, topi cato chachin.

²³ —Imaramaco ni'ton, canpitanta' parisitapoma mini. Napoaponahuë', co caso' nanitérahuë' chiníquén nanan quëta'huanquëmaso'. Tata Yoséíchin nanitérinso'. Inari nohuantérinsopita accarin. Nani inapita marë' taparin huachi, itérin.

²⁴ Ina quëran oshaquëran a'napita ca'tano'sanënpitari natanpi. "Chini chiníquén nanantacaiso' ¿nohuantopi ti?" ta'tona', no'huipi. ²⁵ Quisososo nimirinhue', ya'ipi ca'tano'sanënpita përasahuaton, pënénin:

—Nisha piyapiro'sa' chiníquén nanantacaiso' pa'yatopi. Hua'ano'saso' chiníquén nanantatona', piyapinënpita no'huiana quëran camaipi. ²⁶ Canpitaso nimirinhue' ama inapita pochin cancantocosohuë'. Yosë huëntonënquë ya'conpatéra, co chiníquén nanantacaso' nohuantéréhuë'. Noya noya iyaro'sa' yanipatama', ya'ipi piyapiro'sa' catahuaco'.

²⁷ Piyapinënpochin cancantoco'. Catahuacasoáchin yonquihiatama', Yosë noya noya ni'sarinquéma'. ²⁸ Canta' Yosë quëran quëmapico nimirihuë', co a'napita camaica'huaso marë' o'marahuë'. Piyapiro'sa' catahuaca'huaso marë' o'marahuë. Chiminarahuë na'a piyapiro'sa' nicha'ëca'huaso marë', itérin Quisosori.

*Somaraya nininso'
(Marcos 10.46-52; Lucas 18.35-43)*

²⁹ Paantarahuatona', a'na ninanoquë canconpi, Quirico itopiso'. Ina quëran pipihuachina, notohuaro' piyapiro'sari imasapi. ³⁰ Cato' quëmapi'saso nimirinhue', ira yon-sanquë huënséapi. Somaraya ni'tona', inaqué huënsérapí coriqui ma'patacaiso marë'. "Quisoso na'huérarin," topachinara, chiníquén përapí.

—¡Nosorocoi Sinioro! Quémasco' Tapico' shinqué. Yosë a'paimarinqué ni'ton, nosorocoi quiyanta' topiraihuë', itopi. ³¹ A'naquëni natanahuatona', no'huipi: "Ta'toco'," itopirinahuë', aquëtë chachin chiníquén nontopi.

—¡Onpopionta' Sinioro nosorocoi quiyanta' topiraihuë! itantapi.

³² Napotohuachinara, Quisososo chiniconahuaton:

- Sha'huitoco' huë'ina', itérin. Huë'pachinara:
 —¿Ma'ta' iyaro'sa' onpochinquéma'? itérin.
 33 —Anoyerayatocoi Sinioro quiyanta' ni'chii, itopi.
 34 Itohuachinara, nosoroaton, së'huarayarin. A'naroáchin noya ni'topi. Inapoto-huachina, Quisoso imapi huachi.

21

Quirosarinqué canconinso'

(Marcos 11.1-11; Lucas 19.28-40; Juan 12.12-19)

1 Nani Quirosarinqué ya'caritahuatona', Oripose panénqué canconpi. Ina ya'cariya a'na ninano' ya'huérin, Pitipaqui itopiso'. Inaqué canconahuaton, cato' ca'tano'sanénpita sha'huitérin:

2 —Paso' ninanoqué paco'. Pëi' ya'natimarinqué canconpatama', mora hua'huiné chachin a'sonpinan quénanconarama'. Hua'huinso', hui'napishin. Cato chachin i'quiritahuatoma', quëshico. 3 “¿Onpotaomata' i'quiritaramaso?” itohuachinénquéma', “Siniyorori nohuantérin. Apira iséqué acoquiantarai,” itoco'. “Quëpaqué' nipachin,” itohuachinénquéma', quëshico, itérin.

4-5 Iráca Yosë nohuanton pénéntona'piri ninshitaton tapon:
 “Quirosarinqué ya'huëpisopita sha'huitéqué':

‘Ni'co' iyaro'sa'. Hua'anëma' huë'sarin catahuainquémaso marë', Yosë a'patimarinquémaso'.

Chiníquén nanantaponahué', topinan piyapi pochin cancantaton, mora hui'napishin aipi huënsériarin, itëqué',” ténin.

Iráca ninorinso chachin Quisoso mora aipi paacaso yonquirin.

6 Ca'tano'sanénpitaso pa'sahuatona', Quisosori camairinso chachin nipi.

7 I'quiritahuatona', cato chachin quëntapi. Mora aipi a'mopiso' huëtohuachinara, ina aipi Quisoso huënsérahuaton, pa'sarin. 8 Na'a piyapi'sa' quëchitahuatona', a'mopiso' iraqué huëtopi. A'naquéonta' panpë mono pochin nininso' masahuatona', no'paqué huëtopi. Inaqué Quisoso pa'sarin huachi. 9 A'naquén quëchitérapi. A'naquéonta' imasapi. Papona pochin chiníquén nonsapi:

—¡Nichá'ëcoi Tata Yosë! ¡Ma noyacha Quisososo paya! Tapico shiin inaso'. ¡Quëmari chachin chiníquén nanan quëtérän! ¡Quëma nohuanton, israiro'sacoi hua'anéntarinco! itopi.

10 Quirosarinqué canconpachina, ya'huëhuano'sa' pa'yanatona', noncaroapi.
 —¿Ma piyapita' isoso'? topachinara, 11 —Co'ta Quisoso, Cariria parti ya'huérinso'. Nasarito quëran huëcaton, na'con pénéntérin, itopi.

Nipa'antopisopita Yosë chinotopiso pëi quëran a'parinso'

(Marcos 11.15-19; Lucas 19.45-48; Juan 2.13-22)

12 Ina quëran Yosë chinotopiso pëiqué paaton, ya'conconin. Inaqué na'a nipa'antopisopita quénanconahuaton, a'parin. A'naquén coriqui nicanpiarapirinahué', misanénapitanta' pitara'piarin. Nëpë' pa'aninsopitanta' a'paton, huënsépiso' pitarin.

13 —Yosë quiricanën quëran pénéninpoa'. “Ca nohuanto, pëinéhuë ya'huérin piyapi'sa' nontinacoso marë',” ténin Yosë. Canpitaso niperinhué', ihuatéro'sa' ya'huëpqué pochin nitérama', itérin Quisosori.

14 Ina quëran na'a cania'piro'sa' Yosë chinotopiso pëiqué ya'conpi Quisosori anoyerayatocoi marë'. A'naquén somaraya nininso'. A'naquéonta' apiaro'sa'. Inapita huë'pachinara, a'naroáchin anoyeratérin. 15 Cotio maistro'sa', corto hua'ano'sa', inapitaso' ni'sápi. Hua'huaro'saso niperinhué' pa'yatatona', chiníquén nonsapi. “¡Ma noyacha Quisososo paya! Tapico' shiin inaso'. Yosë chachin a'patimarinpoaso',” tosapi. Ina natanahuatona', hua'ano'sari no'huipi. 16 No'huitona', Quisoso itopi:

—Isopita napopiso' ¿co natananhue' ti? itopi.

—Natanahuë mini. No'tequën nonsapi. Yosë quiricanënquë naporin: “Quëma nohuanton, hua'huaro'sa' nóya nonapiarinënquën. Sho'shopia'huaro'sa' niponaraihuë', ‘Ma noyanquëncha quëmaso paya,’ itarinënquën,” ténin, itérin Quisosori.

¹⁷ Ina tosahuaton, Pitaniaquë pa'nin. Inaquë huë'ëpatërin.

Iquia nara ahuirinso'

(Marcos 11.12-14, 20-26)

¹⁸ Tashiramiachin ninanoquë paantapon pochin, Quisoso tanarin. ¹⁹ Aquë quëran iquia nara quënanin, ira yonsanquë huanirinso'. “Inaya téranta' nitérinso' ma'to ca'i,” ta'ton pa'pirinhue'. Na'con monohuanaponahuë', co manta' nitérinhuë'. Ina ni'sahuaton:

—Ama huachi iso nara nichinsohuë', ténin Quisoso. Napohuachina, nara a'naroáchin ahuirin. ²⁰ Ina ni'sahuatona', ca'tano'sanënpita pa'yanpi.

—¿Onporahuatonta' Maistro, iso nara a'naroáchin ahuirin? itopi.

²¹ —Téhuëñchachin Yosë ya'ipi nanitaparin. Ina nontohuatama', ya'ipi cancanëma quëran natëco'. “Co Yosë catahuarincohuë”, ama tocosohue'. Ya'ipi cancanëma quëran ina natëhuatama', sacai' nininso' nanitaparama' canpitanta'. “Yosë nohuanton, iso motopi nichihuincarahuaton marëquë niichin” ténama' naporini, ina nohuanton, inapo'itonhuë'. ²² Yosë nontohuatama', noya natëco'. “Téhuëñchachin Yosë catahuarinco,” topatama', na'con catahuarinquëma'. Ma'sona téranta' nipatama', acotarinquëma', ténin.

Chiníquen nanantérinso'

(Marcos 11.27-33; Lucas 20.1-8)

²³ Ina quëran Yosë chinotopiso pëiquë paantarín piyapi'sa' a'chintantacaso marë'. A'chinaquëya', cotio ansiano'sa', corto hua'ano'sa', inapita huë'pi.

—¿Onporahuatonta' chiníquen nanantaton, nipa'antopisopita a'paran? ¿Inta' nanan quëtérinquë ina pochin nicacaso'? Sha'huitocoí, itopi.

²⁴ —Inta nipachin, carinquëmanta' natainquëma'. Ina sha'huitohuatamaco, nanan quëtérincoso' sha'huitaranquëma'. ²⁵ ¿Incarita' Coansha nanan quëtérin piyapi'sa' aporintacaso marë'? ¿Yosëri nanan quëtérin, piyapi'sari nica? ¿Ma'ta' ténama' campita? Sha'huitoco carinquëmanta' nanan quëtérincoso' sha'huichinquëma', itérin Quisosori.

Natanahuatona', inahua capini ninontapi.

—¿Ma'ta' itahua'? “Yosëri nanan quëtérin aporintacaso'” itohuatëhua', “¿Onpoatomata' nipachin co natëramahuë'?” itarinpoa'. ²⁶ Nipirinhue', “Co Yosëri nanan quëtérinhuë'. Piyapiro quëtérin,” itohuatëhua', na'a piyapi'sa' no'huiarinënpoa'. “Yosëri a'parin pënëntacaso marë'” topi ya'ipiya, nitopi.

²⁷ Nani ninontohuachinara, Quisoso itapona':

—Ahuën. Co quiyaso' nitotérhaihuë'. ¿Incariso' Coansha nanan quëtomara? Co nitotérhaihuë', toconpi.

—I'yan, napoahuarë' co carinquëmanta' insosona nanan quëtérincoso' sha'huitaranquëmahue', itérin Quisosori.

Cato' hui'napi'sa' napopiso'

²⁸ Ina quëran itaantarin:

—Apira iyaro'sa' a'chintaanta'inquëma' yonquico'. A'na quëmapi ya'huërin opa sha'na'pi. Inaso', Cato' hui'nin ya'huëterin. A'nsaso' sha'huitérin: “Ipora tahuëri, conpa, iminquë sacatonquë'” itopirinhue', ²⁹ “Inca tata, co yasacatérahuë”, itérin. Napotaponahuë', oshaquëran yonquiantarin. Noya cancantaton, sacatapon pa'nin.

³⁰ A'na hui'nionta' camairin iminquë sacatacaso'. “Noyahua'. Pa'i nipachin canta'

sacachi," itaponahuë', co pa'ninhue'. ³¹ Cato' hui'nin chachin sha'huitopirinhue', ¿insoarita' natérinso'? itérin Quisosori.

—Ya'nan camairins' pa'pin natéton, sacatérin, itopi.

—No'tequén naporama'. A'naso' "Pa'i nipachin," taponahuë', co pa'ninhue'. Inapochachin copirno marë' coriqui ma'patona'piro'sa', monshihuana'piro'sa', inapita co noyahuë' yonquipirinahuë', iporaso' ina nariantahuatona', Yosë imasapi. Imatona', tēhuenchachin hua'anéntérinqué ya'conapi. Canpitaso nimirinhue' co yaya'conamahuë'. ³² Coansha Paotista pénépirinquémahuë', co yanatéraramahuë'. Noya cancantamaso marë' a'chintopirinquémahuë', co yanatéraramahuë'. Copirno marë' coriqui ma'patona'piro'sa', monshihuana'piro'sa', inapitaso nimirinhue' a'naroáchin natétona', noya cancantopi. Ina nicapomarahuë', co yonquiramahuë'. Co natétochináchinhue' cancantérama', itérin.

Inpriatoro'sa' co noyahuë' yonquipiso'

(Marcos 12.1-12; Lucas 20.9-19)

³³ Ina quérer itaantarin: "A'nanta' pénento nanan, a'chinchingüëma', natanco'. A'na quémapi pancana imianatérin. Inaqué oparachin sha'nin. Nani pairapirahuaton, na'pi quérer nanopi ninin opa to'poitona' huino nicacaiso marë'. Naporahuaton, tori ninin. Inaqué piyapinén ya'huaton nocorarin ama ihuacaiso maréhuë'.

Nani tiquihuachina, inpriatoro'sa' acorin a'paicaiso marë'. 'Sacatéremaso marë' patoma nitérinso' canpitaoranquén marë' maco'. Patomachin canta' acotoco,' itérin. Itahuaton, a'na parti pa'nin huachi. ³⁴ Ina quérer nani nitohuachina, aqué ya'huérin quérer piyapinénpita a'parin patoma nitérinso' ma'pacaiso marë'. ³⁵ A'papirinhue', inpriatónénpitari masahuatona', ahuépi. A'naso' tēpapi. A'nanta' na'pique tē'yaratona', tēpapi. ³⁶ Naquéranchin hua'anéni a'napita a'paantarin. Na'a piyapinénpita a'paantapirinhue', inachachin nitantapi. Ahuéantarahuatona', topinan a'paantapi.

³⁷ Ina quérer hua'anéns' yonquiantarin. '¿Ma'cha onpochiya? Na'aya'pi a'papirahuë', co manta' quétópihuë'. Hui'nahue chachin nipachin a'pa'i. Ina tēhuenchinso' natéapona' nimara,' ta'ton, hui'nin chachin a'papirinhue'. ³⁸ Ya'caritéraso', inpriatoro'sari quénanpi. 'Ni'cochi. Hui'nin chachin hué'sarin huachi. Pa'pin chiminpachin, iso no'pa chachin hua'anéntapon. Huéco' tēpa'ahua' ya'ipi ma'shanénpita matahua', nitopi. ³⁹ Naporahuaton, hua'anén hui'nin mapi. Masahuatona', aipiran tē'yatopi. Ina quérer tēpapi huachi.

⁴⁰ Napotohuachinara, ¿ma'ta' onpotintapon hua'anéni, hui'nin chachin tēpatopi ni'quéhuaré'?" itérin Quisosori.

⁴¹ —Pa'pi co noyahuë' nipi ni'ton, chiníquén no'huiton, a'naroáchin tēpapon. Ina quérer nasha inpriatoro'sa' acoantarin. Inapitaso' opa nitohuachin, no'tequén quétapi huachi, itopi.

⁴² —Iráca Yosë quiricanénpue' ninshitérinso' ¿co nontéraramahuë' ti? Ninshitaton, naporin:

"Na'pi quérer yapéihuachina, a'na na'pi quénanpirinahuë', pëina'piro'sa' co nohuantopi-huë'. 'Napoonin,' ta'tona', tē'yatopirinahuë'.

Hua'anéni maantarahuatona', Iso na'pi na'con na'con nohuantérahuë pëica'huaso marë', ta'ton, noya acoantarin.

Yosëri chachin inapotérin. Napoaton 'ma noya' ténéhua'," ténin quiricanénpue'.

⁴³ Napoaton itaranquëma', Yosë yahua'anéntopirinquémahuë', co nohuantéraramahuë' ni'ton, a'poarinquëma'. Nisha piyapiro'sa' piyapinénpita pochin ni'sarin. Inapitaso' noya natéapi. [⁴⁴ Ina na'pi i'patohuatéra, anotaté' ya'pané'. A'na tahuériso nimirinhue' ina na'piri chachin anoantohuachin, a'naquén ni'shiliarin,] itérin Quisosori.

⁴⁵ Natanahuatona', cotio hua'ano'sa', parisioro'sa', inapita yonquipi. "Canpoa' chinotatonpoa' pénénarinfoa'," ta'tona', no'huipi. ⁴⁶ No'huitona' tashinan pëiqué yapo'mopirinahuë', piyapi'sa' tē'huatatona', co mapihuë'. Notohuaro' piyapi'sa' Quisoso

noya natanpi. "Yosëri chachin acorin pënëinfoaso marë'," topi. Napoaton cotio hua'ano'sa' co nanitopihuë' Quisoso macacaiso'.

22

Coshatacaso marë' amatërinsopita

(Lucas 14.15-24)

¹ Ina quëran a'na pënënto nanan ya'huërë', sha'huitaantarin:

"Yosë hua'anëntérinso' a'chintaanta'inquëma'. ² A'na copirno naporinso pochin ninin. Inaso', hua'huayátérahuë piyapi'sa' hua'anëntérin. Hui'nin yasa'apachina, panca pita nisarin. ³ Napoaton piyapinënpita a'parin piyapi'sa' sha'huitacaiso marë'. Sha'huitopirinahuë', co nohuantopihuë' huëcacaiso'. ⁴ Copirnoso natanahuaton, a'napita piyapinënpita a'paantarin: 'Sha'huitonco' manóton huë'ina'. Nani ohuacaro'sa' amoshin nipesopita atëpatérahuë capacaso marë'. Nani ya'ipi taparahuë. Huëco huachi ca'ahua', itonco', itahuaton a'parin. ⁵ Pa'sahuatona', sha'huitaantapirinahuë'. 'Co'chi nanitérainihuë paya,' toconpi a'naya a'naya. A'naso' iminquë pa'nin. A'nanta' ma'sha pa'anapon pa'nin. ⁶ A'naquënis', piyapinënpita masahuatona ahuëpi. Inapotatona' tēpapi. ⁷ Copirnoso' natantahuaton, chiniquën no'huitérin. Sontaro'sa' a'parin ana'intacaiso marë'. Piyapinënpita tēpatopi ni'ton, inahuanta' sontaro'sari tēparin. Napotahuatona' pënënapita ahuiquitopi. ⁸ Piyapinënpita amatantarahuaton, sha'huitérin. 'Pita marë' nani tapapirahuë'. Amatérahuësopitaso' co inashitopihuë' isëquë nicacaiso ni'ton, co huachi inapita yonquirahuë. ⁹ A'na ira a'na ira pa'tatoma', a'napita piyapi'sa' quënanpatama', sha'huitonco' huë'ina'. Inso téranta' quënanpatama', sha'huitoco' huë'ina'. Hui'nahuë sa'acaso marë' noya pita nisarahuë', itérin. ¹⁰ Piyapinënpita pa'sahuatona', na'a piyapi'sa' sha'huitéra'piapi. Noya nipesopita, co noyahuë' nipesopitanta' sha'huitéra'piapi. Pita pëi' noyá ya'sotopi.

¹¹ Ya'conahuaton copirnoso', a'naya a'naya noya nontérin. A'na quëmapiso niperihuë', co noya nitaparinhue' pita pëiquë ya'conacaso marë'. ¹² Ina ni'sahuatona, copirnori itérin: '¿Onpoatonta' iyasha co noya nitapaponahuë' ya'conan?' itérin. Napotopirinhuë', co manta' tēnihuë'. Tapanaton, ta'tárin. ¹³ Iso quëmapi masahuatoma', tonpoco'. Pa'on, tanpaquën, inapita noyá tonpoco'. Nani tonporahuatoma', tashinanquë tē'yatoco'. Inatohua' piyapi'sa' na'nérapi, chiniquën parisitapi huachi,' itérin piyapinënpita. ¹⁴ Inapochachin notohuaro' piyapi'sa' Yosëri amatérin huëntonénquë ya'conacaiso marë'. Na'a natanpirinahuë', caraíchin huayonin," itérin.

Coriqui ma'patërinso'

(Marcos 12.13-17; Lucas 20.20-26)

¹⁵ Parisioro'sa' natanahuatona', ninontopi. "Huëco' nonpintatéhua', nisha nisha natahuan'. Co no'tequë a'panihuachinpoahuë', sha'huirapiahua'," nitopi. ¹⁶ Napoaton a'naquë a'papi Quisoso natanacaiso marë'. Irotisé pa'yatopisopitanta' caraya pa'pi. Canconahuatona', noyásha nontonpi nonpintacaiso marë'.

—Quëmaso' Maistro, noyanquën. Co onporonta' nonpinanhue'. Yosë pënëinfoaso' no'tequë a'chintéranci. Piyapi'sa' no'huipirinënquëonta', co ina yonquirahuë'. Co hua'an téranta' tē'huatéranhue'. ¹⁷ Napoaton yanatanainquën. Noma copirnoso' nisha piyapi niperihuë', ya'ipinpoa' hua'anëntérinpoa'. Nani pi'ipi coriqui ma'painpoaso marë' comisionënpita a'parin. Huë'pachina, ¿noya ipora quëtacaso', ti? ¿Ma'ta' Yosë nohuantérin nica'huaiso'? Sha'huitocoitochii, itopi.

¹⁸ Yanonpintopiso' nitotaton, Quisosori itérin:

—¡Canpitaso' nonpintenquëma'! ¿Ma'marëta' yaatéhuëramaco? ¹⁹ Noma coriqui a'notoco ni'i, itérin. Napotohuachina, a'notopi.

²⁰ —¿Inta' isoso' nonanpiso'? itohuachina, —Noma copirno, itopi.

—¿Inta' nininéonta' isëquë ninshitopi? itantarín.

²¹—Noma copirno chachin, itopi.

—Copirno coriquinën ni'quëhuarë', quëtantaco'. Naporahuaton, Yosë nininpoa' ni'ton, hua'anëntérinpoa'. Ya'ipi cancanëma quëran ina natëcaso' ya'huërin, itérin.

²² Natanaahuatona', pa'yanpi. “¡Ma noyacha a'panirinpoa paya!” ta'tona', patopi huachi.

Piyapi'sa' nanopiantarapiso'
(*Marcos 12.18-27; Lucas 20.27-40*)

²³ Naporo' tahuëri a'napita cotio hua'ano'sa' huë'pi, satisioro'sa' itopiso'. Inapitaso' nisha a'chinpi. “Piyapinpoa' chiminpatéhua', co onporonta' nanopiantarihuahuë'”, to-conpi. Inapitanta' Quisoso yanopintatona', huëcapaipi.

²⁴ —Iráca Maistro Moisësë pënënинpoa': “Quëmapi sa'aponahuë co hui'nin ya'huëyátérasohuë' sa'in ayananpihuachin, ina iini chachin imoroën maantacaso' ya'huërin. Hui'nahuanpachin, iinco' apoin inari ya'huërtacaso marë'. Ina quëran mashotohuachin, ma'shanën, no'panëن, inapita maantarín,” ténin Moisësë. ²⁵ Canchisë iyaro'sa' iráca ya'huërin. Paninanso' sa'apirihuë'. Co hui'nin ya'huëyátérasohuë', sa'in ayananpirin. ²⁶ Ina iini chachin maantarín. Moisësë téninso chachin manin. Inanta' co hui'nin ya'huëyátérasohuë', chimiantarin. A'na iionta' inapoantarin. Canchisë iinpita chachin inapoantapi. Co a'naya téranta' hui'nina ya'huëchátérasohuë', ya'ipi taquipi. ²⁷ Ina quëran sanapinta' chiminin huachi. ²⁸ Canchisë chachin ina sanapiáchin mapirinahuë', nanopiantacaso tahuëri nanihuachin, ¿inquën chachincha sa'in ninë'poya? itopi.

²⁹ —Canpitaso' co no'téquëн yonquiramahuë'. Yosëso' chini chiníquëн nanantopirin-huë', co nohuitéramahuë'. Quiricanëonta' co nitotéramahuë'. Napoaton co nanitéramahuë' no'téquëн yonquicamaso'. Yosëso' ya'ipiya nanitaparin. ³⁰ Chimipisopita nanopiantahuachina', co huachi sa'asapihuë'. Sanapi'santa' co huachi so'yaapihuë'. An-quëniro'sa' pochin nisapi. ³¹ Chimipisopita têhuëñchachin nanopiantarapi. Moisësë nontohuachina, Yosëri chachin sha'huitérin. ³² “Caso' Yosëco. Apraan chinotarinco. Isaco, Cacopo, inapitanta' chinotarinaco,” itérin. Cara chachin iráca chimipirinahuë', naporin. Nanpipisopitaráchin Yosë chinotapi. Napoaton inapitanta' chimipirinahuë', Yosë marëso nanopirápi, itérin Quisosori.

³³ Piyapi'sa' ina natanaahuatona', pa'yanpi. “¡Ma noyacha a'chintérinpoa paya!” topi.

Yosë na'con na'con nohuantérinso'
(*Marcos 12.28-34*)

³⁴ Natanaahuatona', parisioro'santa' niyontonpi. “Quisoso no'téquëн a'panitaton, satisioro'sa' atapanin ni'ton, co huachi yanatanpihuë'”, ta'tona', niyontonpi ina nontantacaiso marë'. ³⁵ A'na maistro iráca nanan noya nitotérinso' huë'sahuaton, Quisoso nontiirin atéhuëcaso marë'.

³⁶ —Pi'pian Maistro yanatananquëн. Yosë na'con pënënинpoa'. ¿Ma'ta' na'con na'con nohuantérin nicacaso'? itiirin.

³⁷ —Inta nipachin sha'huichinquëн. Yosëso' Sinioro ni'ton, hua'anëntérinpoa'. Ina na'con nosorocaso' ya'huërin. “Ya'ipi cancanëma quëran, ya'ipi hua'yanëma quëran, ya'ipi yonquinëma quëran, ya'ipi inaquëranpita nosoromiatoco'”, ténin. ³⁸ Ina na'con na'con nohuantérin. ³⁹ Isonta' Yosë nohuantérin: “Quëmaora ninosororanso pochachin a'napitanta' nosoroco'”, ténin. ⁴⁰ Moisësë, pënëntona'piro'sa', inapitaso' na'con pënëntopirinahuë', nosorocaso' na'con na'con nohuantopi. Napoaton nosorohuatama', Yosë yonquirinso chachin imasarama', itérin Quisosori.

Yosëri a'paimarinso'
(*Marcos 12.35-37; Lucas 20.41-44*)

⁴¹ Parisioro'sa' nani niyontonpi ni'ton, Quisosorinta' natanarin no'téquëн ayon-quicaso marë'.

⁴² —Iráca Yosë quiricanënquë sha'huitérinpoa'. “A'na tahuëri a'na quëmapi acoarahuë piyapi'sa' nicha'ëcaso marë'. Inaso' Cristo itopiso'” ténin Yosë. ¿Inta' shiin inaso'? itérin Quisosori.

—Tapico' shiin inaso', topi parisioro'sa'.

⁴³⁻⁴⁴ —Naporinchi paya. Inaso nimirinhue', iráca Ispirito Santo nohuanton, Tapiri chachin Cristo ninoton, ninshitérin: “Yosëri Siniñorónëhuë sha'huitérin. ‘Inchinanëhuë quëran huënsëquë' inimiconenpita cari minsëchinquën,’ itérin Yosëri,” ténin Tapi.

⁴⁵ Shia'huain níponahuë', Cristo yonquiaton, “Siniñorónëhuë,” ténin. ¿Onpoatonta' naporin? itérin Quisosori.

⁴⁶ Natanaponaraihuë', co manta' a'panitopihuë'. “Yosë hui'nin chachin ni'ton, Tapiri Cristo chinotérin,” ta'caiso nimirinhue', co yanatépihuë'. Napoaton náporo quëran huarë' tapanatona', co huachi nohuantopihuë' Quisoso natanacaiso'.

23

Parisioro'sa', cotio maistro'sa', inapita chiníquën pënënino'

(Marcos 12.38-40; Lucas 11.37-54; 20.45-47)

¹ Ina quëran piyapi'sa' a'chintantarín. Ca'tano'sanenpitanta' natanapi. ² “Téhuëñchachin iyaro'sa', cotio maistro'sa', parisioro'sa', inapita na'con a'chintaténenquëma': ‘Moisésé pënëninfoaso' no'tequën a'chinchingue'ma', topi. ³ Yosë nanamén a'chintohuachinënquëma', noya natëco'. Nimirinhue', ama inapita nonancosohue'. Inahuaso' pënënpirinënquëmahue', co cancanëna quëran imapihuë'. ⁴ Ni'co'. Panca pë'pëto quëpahuatéra, sacai' iratacaso'. Inapitaso' inapochachin a'chintérinënquëma'. Co Yosë quiricanënáchin a'chinpihuë'. Inahuara yonquinëna quëraonta' nisha nisha pënëntopi. Panca pë'pëto apë'pëtérëso pochin nitérinënquëma'. A'chintopirinënquëmahue', inahuara chachionta' co natépihue'. ⁵ Pi'pian Yosë quiricanën ninshitahuatona', të'yainaqué achinpipi piyapi'sari nicacaiso marë'. Naporahuatona', náporo a'mopi nohuitacaiso marë'. ‘Inapohuatéhua', piyapi'sa' noya ni'sarinënpoa', ta'tona', napo. Napoaponaraihuë', co aquëtë' Yosë yonquipihuë'. ⁶ Pita nipachina, huancánachin yahuënsëconpi. Niyontonpiso pëiquë ya'conpachinara, hua'ano'sapitarë' yahuënsëconpi. ⁷ Cachiquë pa'pachinara, na'a piyapi'sari noya nontopi. ‘Huë'cama maistro,' itohuachinara, pa'yatopi.

⁸ Canpitaso nimirinhue', ama maistro itiinëmaso nohuantocosohue'. Ya'ipinquëma' iyama pochin nisarama'. Casáchin no'tequën a'chintérinquëma'. ⁹ Ama a'na piyapi na'con na'con pa'yatocosohue'. ‘Quëmaso' tata pochin ni'nanquën. Natëaranquëna huachi,’ ama itocosohue'. Yoséichin natëcaso' ya'huérin. Inaso' tatanenpoa' inápaquë ya'huérinso'.

¹⁰ Ama hua'an pochin chiníquën nanan nohuantocosohue'. ‘Ca natëco,’ ama tocosohue'. A'naíchin hua'an ya'huétérinquëma', Cristo itopiso'. ¹¹ Yosë huëntonënquë ya'conpatéra, co chiníquën nanantacaso' ya'huérinhuë'. Noya noya yanipatama', ya'ipi piyapi'sa' catahuaco'. ¹² ‘Caso' noya noyaco,’ topatama', Yosë atapanarinquëma'. Nimirinhue', ‘Caora co nanitérahuë' noya nica'huaso'. Catahuaco Siniñoro,’ topatama', Yosë catahuaar-inquëma'. Noya noya acoarinquëma', itérin.

¹³ Ina quëran Quisosori cotio maistro'sa', parisioro'sa' inapita pënënatón itapon:

“Cotio maistro'sanquëma', parisioro'sanquëma', canpitaso nonpintenquëma ni'ton, jma'huantacha nisarama paya! Co no'tequën a'chinamahuë' ni'ton, Yosë iranén ya'copiate pochin nitérama'. Co no'tequën Yosë imatomahuë', co canpita térranta' Yosë hua'anentérinquë ya'conaramahuë'. A'napitanta' yaya'conpirinahuë', co catahuaramahuë' ya'conacaiso'. Canpita nonaninënquëma' ni'ton, inapitanta' co ya'conpihuë'. [¹⁴ Canpitaso nonpintenquëma ni'ton, jma'huantacha nisarama paya! Quëyorono'sa' nonpintërama'. Noya nontapomarahuë', a'naya a'naya nonpintatoma',

ma'shanënapita matërama'. Ina quëran niyontonpiso pëiquë ya'conpatamara, hua'qui' Yosë nontapomarahuë', co cancanëma quëran imaramahuë'. Ina marë' aquë aquëtë' ana'intarinquëma'.]

¹⁵ Canpitaso' nonpintënquëma ni'ton, ¡ma'huantacha nisarama paya! Nisha piyapi'sa' a'chintacamaso marë' ira iratérantarama'. Aquë paatoma', a'naya a'naya a'chintërama' canpita pochin yonquicaiso marë'. Natëhuachinënquëma', aquë aquëtë' co noyahue' cancantapi. Ya'ipinquëma' parisitopiquë pa'sarama huachi.

¹⁶ ¡Ma'huantacha nisarama paya! A'napita yaa'chintopiramahuë', co no'tequën yonquiatomahuë', somaraya pochin cancantërama'. Somaraya nininso' co pi'pian téranta' nanitérinhue' a'napita quépacaso'. Inapochachin canpitaso' co Yosë nohuitatomahuë', co nanitëramahuë' a'napita a'chintacamaso'. 'Yoscoarë' topatëra, no'tequën nontacaso' ya'huërin,' topi ya'ipi piyapi'sa'. Canpitaso nipurinhue' nisha nisha tënama'. 'Yosë chinotopiso pëi' ya'huërin ni'ton, no'tequën nontaranquën, itopiramahuë', nonpinpatamanta', 'Co ina marë' Yosë ana'intarinpoahuë', toconama'. 'Yosë chinotopiso pëiquë oro ya'huërin ni'ton, no'tequën nontaranquën, topatëra, naporor huarë' no'tequën nontacaso' ya'huërin,' topiramahuë'. ¹⁷ Co no'tequën yonquiramahuë'. Yosë chinotopiso pëi' mini oro quëran noya noya ninin. Oro inaquë ya'huérinso' co aquëtë' yonquicaso' ya'huérinhue'. Co chinotopiso' pëiquë ya'huérinhue' naporini, co Yosëri noya ni'itonhuë'. ¹⁸ Yosë chinotopiso pëiquë artaro ya'huërin. Inaquë ma'sha acopi Yosë chinotacaiso marë'. 'Artaro ya'huërin ni'ton, no'tequën nontaranquën, tapomarahuë', nonpinpatamanta', 'Co ina marë' Yosë ana'intarinpoahuë', toconama'. 'Ma'sha inaquë acopiso' ya'huërin ni'ton, no'tequën nontaranquën, topatëra, naporor huarë' no'tequën nontacaso' ya'huërin,' topiramahuë'. Yanonpinatoma', naporama'. ¹⁹ Somaraya pochin cancantatoma', co no'tequën yonquiramahuë'. Co ma'sha acopiso' aquëtë' yonquicaso' ya'huérinhue'. Artaro mini ma'sha acopi quëran noya noya ninin. Artaroquë acopi ni'ton, Yosëri noya ni'nin. ²⁰ 'Artaro ya'huërin ni'ton, no'tequën nontaranquën, topatama', ya'ipi inaquë acopisopitanta' yonquicaso' ya'huërin. ²¹ 'Yosë chinotopiso pëi' ya'huërin ni'ton, no'tequën nontaranquën, topatama', Yosë inaquë ya'huérinsonta' yonquicamaso' ya'huërin. ²² Inapochachin 'Pi'iro'të' ya'huërin ni'ton, no'tequën nontaranquën, topatamanta', co pi'iro'téachin yonquicaso' ya'huérinhue'. Yosë inaquë ya'huaton, hua'anëntarinpoa'. Inanta' yonquicamaso' ya'huërin.

²³ Canpitaso nonpintënquëma ni'ton, ¡ma'huantacha nisarama paya! 'Nani ma'sha quëran, diesmo Yosë quëtacaso' ya'huërin,' itérinpoa' Moisës. Ina natëpiramahuë', nonpintënquëma' canpitaso'. Napoaton ma'sha sha'patamara, pi'pian quëtërama'. Ya'ipi cosharo apimotacaso marë' sha'nama' quëran huarë' diesmo quëtërama'. Inaso' noya nipurinhue', Yosë na'con na'con nohuantérinsoso' nariantërama'. Co no'tequën nonamahuë'. Co sa'ahuaros'a' nosororamahuë'. Naporahuaton, co cancanëma quëran huarë' Yosë natëramahuë'. Ina marë' ana'intarinquëma'. ²⁴ Somaraya pochin cancantatoma', co no'tequën a'chinamahuë'. Ni'co'. Canpitaso' yao'opatamara, ama o'oso téranta' o'ocamaso marëhuë' noyá panshairama'. Napoapomarahuë', camiyo a'naroáchin mi'térmaso pochin ninama'. Yosë na'con na'con nohuantérinso', co natëramahuë'.

²⁵ Canpitaso' nonpintënquëma ni'ton, ¡ma'huantacha nisarama paya! Tëhuëñchachin yanonpinama'. Ni'co'. A'naquën minë', sënan, inapita pa'mohuachinara, aipiáchin pa'mopi. Acoposo nipurinhue', në'huënantëtérin. Inapochachin canpitaso' piyapi'sa' noya nicainënquëmasoachin yonquipiramahuë', acopo' cancanëma quëranso', co noya yonquiramahuë'. Nonpinatoma', yaihuatërama'. Ma'sharáchin nohuantatoma', co Yosë nohuantérinso' ninamahuë'. Ina marë' Yosë ana'intarinquëma'. ²⁶ Canpitaso parisioro'sanquëma', somaraya pochin cancantërama'. ¿Onporahuatomacha co no'tequën

yonquiramahuë paya? Cancanëma'ton anoyatoco'. Ina quëran noya cancantatoma', noya nisarama huachi.

²⁷ Canpitaso' nonpintënquëma ni'ton, jma'huantacha nisarama paya! Yosë quiricanën a'chinpiramahuë', yanonpinama'. Ni'co'. Chimipi na'pi naninquë po'mohuatéra, aipiran quëran huiríchinquë pashitërë'. Noyápiachin ya'nopirinhuë', acoposo' nansë, nosha chanatérinso', inapita co nishinahuën' nisarin. ²⁸ Inapochachin canpitaso' ninama'. Piyapi'sa' noya nicasenquëma': 'Ma noya maistro'sa' Yosë natëpi,' topirinahuë'. Acopo' cancanëma quëranso nonpinatoma', pa'pi co noyahuë' cancantërama'.

²⁹ Canpitaso' nonpintënquëma ni'ton, jma'huantacha nisarama paya! Iráca Yosë piyapinënpita pënëntohuachinara, shimashonëmapitari no'huitona', tëpapi. Ipora canpitaso', pa'pitopiquë pëirapirama'. Noya quëmapi'santa pa'pitopiso', yancoro'sa' shara-pirama'. Ama nariantacaso marëhuë' napotërama'. ³⁰ Inapotatoma' naporama': 'Iráca chachin ya'huërai naporini, co quiyariso' tēpa'itoihuë', topiramahuë', ³¹ shimashonëma' quëpatoma', canpitanta' tēpatona'piro'sa pochin cancantërama'. ³² Inapita pochin cancantatoma', co noyahuë' nisarama'. Na'con na'con oshahuanarama'.

³³ ¡Ya'huan pochin cancantatoma', pa'pi co noyahuë' nisarama! ¿Onporahuatomacha pën quëran cha'érë'ponquëmaya? Co cha'ësaramahuë'. ³⁴ Napoaton pënëntona'piro'sa' a'pataranquëma'. No'tequën yonquina'piro'sa', a'china'piro'sa' inapita a'pataranquëma' a'chintinënquëmaso marë'. No'tequën pënënaponënquëma' nimirinhuë', no'huiarama'. A'chintopirinënquëmahuë', a'naquën tēpaarama'. A'naquën niyontonpiso pëiquë chiníquën huiuiarama'. Nisha nisha ninanoquë imatoma', aparisitarama'. A'naquëonta' corosëquë patanantatoma', tēpaarama'. ³⁵ Iráca quëran huarë' noya quëmapi'sa' pënëntopirinahuë', na'a tēpapi. Apiri'ton noya quëmapi nimirinhuë', iini tēparin. Ina piquëran a'naya a'naya noya pënëntopirinahuë', tēpara'piapi. Na'a pi'ipi napopi. Napoin quëran Sacariasë tēpapi anta'. Piriuiasë hui'nin inaso'. Yosë chinotopiso pëi i'iratëquë artaro ya'huërinso aquëcha tēpapi. Canpitaso' ina nitotapomarahuë', co natantochináchinhue' cancantërama'. Napoaton Yosë chiníquën ana'intarinquëma'. ³⁶ Iráca quëran huarë' shimashonëmapita co noyahuë' cancantopí. Ipora canpitanta' inapita pochachin cancantërama' ni'ton, Yosë na'con ana'intarinquëma huachi, tñahuë," itérin.

*Quirosarinquë ya'huëpisopita yonquiaton, Quisoso sëtërinso'
(Lucas 13.34-35)*

³⁷ Ina quëran taantarín: "¡Ya'ipi Quirosarinquë ya'huëramasopita yonquiatënquëma', chiníquën sëtërahuë! Na'a pënëntona'piro'sa' Yosë a'patérinquëma' pënëinënquëmaso marë'. A'papirinhuë', tēparama'. A'naquën na'piquë tē'yaratoma', tēparama'. Ya'ipinquëma' nosoroatënquëma', na'aro' yacatahuapiranquëmahuë', co ca téranta' nohuantëramacohuë'. Atari hua'huin to'cohuetérinso pochin yapa'poyapiranquëmahuë', co nohuantëramacohuë'. ³⁸ Napoaton Tata Yosë patarinquëma'. Chinotéremaso pëinta' patarin. Co huachi catahuaarinquëmahuë' ni'ton, noquitarama huachi. ³⁹ Canta', co huachi quënanaramacohuë'. O'manta'huaso' tahuëri huarë' quënaantaramaco. Naporo': '¡Ma noyanquëcha quëmaso paya! Siniro chachin a'paimarinquëen,' itaramaco huachi," itérin Quisosori.

24

*Yosë chinotopiso pëi' ohuatapiso'
(Marcos 13.1-2; Lucas 21.5-6)*

¹ Ina quëran Yosë chinotopiso pëi quëran pipihuachinara, ca'tano'sanënpitari itapona': —Ni'quë' Maistro. Ma noyápiachin Yosë chinotopiso pëi', itopi.

² —Iporaso' ya'ipiya noyápiachin ni'piramahuë', a'na tahuëriso' ya'ipiya ohuatapi. Co a'na na'piya téranta' niya'huiritarinhue', itérin Quisosori.

*Ayaro' tahuëri ya'caritérinso'
(Marcos 13.3-23; Lucas 21.7-24; 17.22-24)*

³ Ina quëran Oriposeö panënqué pa'sahuaton, inaquë huënsëconin. Ca'tano'sanënpitaráchin ya'huëpi. Inapitari huëcapairahuatona', itiipi:

—¿Onporota' Maistro ohuatapi? Ayaro' tahuëri ya'caritohuachin, ¿ma'ta' onporahuachina' nitotapoi? ¿Onporota' o'mantararan? Inapita sha'huitocoí quiyanta' nitochii, itopi.

⁴ —Ni'cona iyaro'sa' nonpintochinënquéma'. ⁵ A'naquëen huëcapona'. “Caso' Cristoco. Yosë chachin a'paimarinco,” tosapi. Nonpintë' niperinhue', na'a piyapi'sari imasapi. ⁶ Nisha nisha parti piyapi'sa' nino'huiapi. Niahüërahuatona', quira nisapi. Ina natapatama', ama pa'yancosohue'. Yosë nohuanton, naporapi. Napoaponahuë', co isoro'pa' ta'huanchátéraponhuë'. ⁷ Nisha nisha nananqué nonpisopita nino'huitona', quira nisapi. Copirnoro'sa capini nino'huitona', piyapinënpita camairapi quira nicacaiso marë'. Nisha nisha parti cosharo' pahuanpachin, tanari piyapi'sa' tiquirarin. Naporahuaton, a'na parti a'na parti ococua pa'sarin. ⁸ Ni'co'. Sanapi yahuaihuachina, iquitárin, co a'naroáchin huairinhue'. Inapochachin ayaro' tahuëri ya'caritohuachin, piyapi'sa' parisitaponaraihuë', co isoro'pa' ta'huanchátéraponhuë'.

⁹ “Naporor' tahuëri'sa' co noya piyapi'sahuë' masarinënquéma'. Imaramacoso marë' aparisitarinënquéma'. Nisha nisha piyapi'sa' no'huiarinënquéma'. A'naquëma' têpararinënquéma'. ¹⁰ Inapohuachina', na'a piyapi'sa' imasapirinacohue', co ahuantatonaraihuë', Yosë nariantapi. Pipirahuatona', imarinacosopita no'huitona', sha'huirapirapi. ¹¹ A'naquëonta' nonpin nanan pënëntapona'. Nonpinapirinahuë', na'a piyapi'sari natëtona', nonpin nanan imasapi huachi. ¹² Piyapi'sa' pa'pi co noyahue' cancantatona', na'con na'con oshahuanapi. Co huachi ninosoroapihuë'. ¹³ Canpitaso niperinhue' noya ahuantoco'. Co a'pohuatamacohue', noya nicha'ësaranquéma huachi. ¹⁴ Yosë hua'anëntérinquë ya'conacaso' a'chintérinquëma'. Ina nanan chachin ya'ipi parti a'chinacaso' ya'huërin. Ya'ipi piyapi'sa' nitochina'. Ya'ipi parti a'chintohuachina', naporor' ayaro' tahuëri naniarin huachi.

¹⁵ Iráca Naniri ninoton, ninshitérin. ‘A'na tahuëri inimicoro'sa' Yosë pëinënqué ya'conahuatona', tapiapona'. Pa'pi co noyahue' nitatona' inapotohuachina', co huachi inaquë Yosë chinotapihuë', ténin. No'tequëen ninorin ni'ton, ina quirica nontohuatama', noya yonquico'. ¹⁶ Naniri ninorinso' nanihuachin, Cotia parti ya'huëramasopita motopi'pa' manóton ta'aco', chiniquëen aparisitochinënquéma'. ¹⁷ Pëinëma aipi ya'huëhuatama', ama ma'shanëmapita quëpacaso marë' ya'concosohue'. A'naroáchin topinan ta'aco'. ¹⁸ Iminëmaquë sacatasënquéma' nipachin, ama a'moramaso téranta' maquintacosohue'. Manóton ta'aco'. ¹⁹ Naporor' tahuëri'sa' cayorono'sa', sho'shopia'hua ya'huëtopiso', inapitaso' sacai quëran ta'arapi ni'ton, parisitapona'. ¡Ma'huantacha nisapi paya! ²⁰ Yosë nontoco' ama o'nápiquë ta'acaso' ya'huë'insohue'. O'napiquëhuë nipon, chinoto tahuërihuë nipon, saca sacai' ta'acaso'. ²¹ Ina quëran piyapi'sa' chini chiniquëen parisitapi. Isoro'pa' ya'huërin quëran huarë' co ina pochin parisichátérapihuë'. Ina piquëraonta' co onporonta' ina pochin parisitantarapihuë'. ²² Yosë nohuanton, co hua'qui' aparisitapihuë'. Hua'qui' aparisitapi naporini, ya'ipi piyapi'sa' taqui'itonahuë'. Niperinhue', piyapinënpita nosoroaton, co nohuantérinquë huachi' hua'qui' aparisitacaiso'. Huayoninsopita nicha'ësarín huachi.

²³ Naporor' tahuëri'sa' nisha nisha sha'huitarinënquéma'. ‘¡Ni'cochi, Cristo nani huë'nin! Paséquë ya'huarin,’ itohuachinënquéma', ama natëcosohue'. ²⁴ Na'a nonpin nanan pënëntona'piro'sa' huëcapona'. ‘Caso' Cristoco’ tosapi a'naquëen. ‘Caso' nintonapico,’ tosapi a'naquëonta'. Sacai' nininsopita nisapi piyapi'sa' nonpintacaiso marë'. Huayoninsopita' nonpintochinaichin nisapi. ²⁵ Nani sha'huitérinquëma' ama naporor' tahuëri nonpintinënquémaso marëhuë'. ²⁶ ‘Huëco’ inotero parti pa'ahua'.

Inatohua' Cristo ya'huarin,' itohuachinënquëma', ama pacosohue'. 'Paso' pëiquë ya'huérarin,' itohuachinënquëmanta', ama natëcosohue'. ²⁷ Yosë quëran quëmapico ni'to, a'na tahuëri o'mantararahuë. O'mantahuato, ya'ipi piyapi'sa' ni'sarinaco. O'cori' huënsha' topachina, ya'ipi parti a'pintërin. Inapochachin a'na tahuëri huënaráchin huënaráchin o'mantararahuë, ni'saramaco. ²⁸ Ma'sharo'sa' chiminpachina, a'naroáchin tamëro'sari huëcapairin," itërin Quisosori. (Cristo o'mantahuachin, ya'ipiya nitotapi, tapon naporin.)

O'mantacaso' tahuëri

(Marcos 13.24-37; Lucas 17.26-30, 34-36; 21.25-33)

²⁹ "Nani parisitohuachina', pi'i tashiarin. Yoquinta' co huachi a'pinarinhue'. Naporahuaton, na'a tayloraro'sa' anotarin. Ya'ipi inápaquë ya'huérinsopitanta' nacon na-contapon. ³⁰ Naporo' o'mantararahuë. Yosë quëran quëmapico ni'to, inápa quëran o'mantararahuë huachi. Nisha nisha nananquë nonpisopita: 'Ana'intarinpaoa', ta'tona' pa'yanapi, na'nëapi, napoapi. Chiníquën nanantato, chitoro' huáncana o'mantararahuë, ni'sarinaco. Huënaráchin huënaráchin ya'noarahuë. ³¹ O'mantarahuato, na'a an-quëniro'sa' a'pararahuë. Panca tronpita pihuitona', ya'ipi parti pa'sapi huayonahuësopita ayontonacaiso marë'.

³² Iquiria nara papotërin quëran nitotoco'. Ta'amën monoantahuachina, 'Nani o'napi naniriarin huachi,' topi. ³³ Inapochachin nani ma'sha onporahuachina', nitotarama'. 'O'mantacaso' tahuëri naniriarin huachi,' tosarama'. ³⁴ No'tequën sha'huitérinquëma'. Co'huara cotioro'sa' huënton ta'huanchatérasoihuë', nani ma'sha onporapi. ³⁵ Isoro'pa' ta'huantararin. Pi'iro'tënta' ta'huantararin. Ca nanamëhuëso nipurinhue' co onporonta' ta'huantarinhue'. No'tequën nonahuë ni'ton, ya'ipi sha'huitérinquëmaso chachin naniarin huachi.

³⁶ Ma tahuërisona o'mantaca'huasoso nipurinhue', co insonta' nitotérinhue'. An-quëniro'santa' co nitotapihuë'. Yosë hui'ninco naporahuë', co ca téranta' nitotérahuë'. Tata Yoséíchin nitotérino'.

³⁷⁻³⁹ Iráca Noi nanopiso', na'a piyapi'sa' co Yosë natëpihuë'. Topinan ya'huëcaisoráchin cancantopi. Coshatápi, o'osápi, sa'asápi, hui'ninapitanta' aso'yarápi. Napoatona', co Yosë yonquipihuë'. Noiso nipurinhue', Yosë natëton, panca nancha ninin. Nani tinihuachina, inaquë ya'conin. A'napitaso' co yonquipirinahuë', a'nanaya panca pama pa'sarin. Naporo' ya'ipiya chimiitopi huachi. Inapochachin canta' Yosë quëran quëmapico ni'to, a'nanaya o'mantararahuë. Na'a piyapi'sa' co yonquipirinacohue', o'mantararahuë. ⁴⁰ Naporo' cato' quëmapi'sa' ina iminquëáchin sacatapirinahuë', a'nara' quëpantaráhuë. A'naso nipurinhue' patarahuë. ⁴¹ Cato' sanapi'sa' inaquéráchin shi'shi' pë'sanapirinahuë', a'nara' quëpantaráhuë. A'naso nipurinhue' patarahuë.

⁴² Ama huë'érëso pochin cancantatoma', naniantocosohue'. Onporosona o'maca'huaso' tahuëri nanihuachin, co nitotaramahuë'. ⁴³ Ni'co'. Ihuatë' a'nanaya huë'pachina, pëiquë ya'conin. Hua'anën co nicasohue', ma'sha ihuarin. Onporosona huëcacaso' nitotérin naporini, hua'anëni ninaitonhuë', co pëinënquë ya'conacaso' nanichitonhuë'. ⁴⁴ Inapochachin canpitanta' ninatomaco, ya'huëco'. Hua'quihiato: 'Co yao'marinhuë', ama tocosohue'. Co nitotasënquëmahuë', a'nanaya o'mantararahuë," itërin.

Inpriato naporin quëran a'chininso'

(Lucas 12.41-48)

⁴⁵ Ina quëran itaantarin: "Ni'co', iyaro'sa'. O'maca'huaso' tahuëri a'na patron pochin nisarahuë. Inaso' aquë yapa'pachina, inpriatonën sha'huitérin. 'Piyapinëhuëpita noya ni'quë'. Cosharo', ma'sha, inapita pahuantohuachina', quëtéra'piaquë', itahu-aton, pa'nin. ⁴⁶ Inpriatoso' noya yonquihuachin, no'tequën natëtarin. Patronëni huëcapaintahuachin, noya ni'sarin. Ina marë' noya cancantarín. ⁴⁷ Noya natërin ni'ton,

acoarin ya'ipi ma'shanënpita a'paicaso marë'. ⁴⁸ Nipirinhue', inpriatonën co noyahue' cancantohuachin, tapon: 'Patron hua'quirarin. Co a'naroáchin huënantaponhuë', ta'ton, ⁴⁹ piyapinënpita ahuëpon. Pita nicacasoáchin cancantapon. No'pirápon. ⁵⁰ Napoaso', patronëni quënanquintapon. Co nitotasohue', a'nanya canquipon. ⁵¹ Co natérinhue' ni'ton, chiníquën ana'intarin. Nonpintero'sa' ana'intopiso pochin nitapon. Inaque co napion ancantaton, na'nérápon," ténin Quisoso.

25

Sanapi nipayarinsopita

¹ Naquéranchin Quisosori pënëantarin:

"Yosë hua'anéntérinso' a'chintanta'inquëma', noya natanco. Hua'an sa'arinso pochin ninin. Inaso aquë quëran huë'sarin. Onporosona canquicaso' co nitotapihuë'. Tahuëri nanihuachina, sanapi nipayarinsopita ninarapi hua'an huëcacaso'. 'Hua'qui quëran canquipon nimara,' ta'tona', shonca nano'sa' nanparinënarë chachin ninarapi. ²⁻⁴ A'natérápo sanapiíchin noya yonquipi. Quirosin pochin orotérinso' ta'pantatona', mëntaiquë huarë' quëpapi. Naporahuatona', a'naya a'naya potiriaquë quëpapi. A'natérápo sanapi'saso niperinhue' co yonquiatonahuë', co aquëtë' quëpapihuë'. ⁵ Hua'an hua'quirin ni'ton, tashitopi. Yahuë'etona', ya'ipimiáchin huë'ëpi. ⁶ Huë'ësoi', yono tashi' a'nanya chiníquënoninso' natanpi. '¡Ma'tana, huë'sarin huachi! ¡Huënsëco' pa'ahua' nacapia'ahua'!' nitopi. ⁷ A'naroáchin shonca nano'sa chachin capayatahuatona', nanparinënapita taparapi noya orotacaso marë'. ⁸ Noya yonquirinsopitaso' ta'pantohuachinara, noya orotérin. A'napitaso niperinhue' i'chinpitopirinahuë', yatacopiconpi. Napohuachinara: 'Ta'pantoco'i quiyanta' i'chinpipi'i. Nani quiyaso' tacopiarin,' topirinahuë'. ⁹ 'Co'chi nanitérnhue' ta'panta'huainquëmaso paya. Inapohuatoi, co huachi quiyanta' orotarinhue'. Ya'ipinpoa' tacopianarihua'. Manóton paatoma', pa'anconco', itopi. ¹⁰ Napotohuachinara, a'natérápo chachin manotona pa'pi quirosin pochin nininso' pa'anapona'. Pa'pirinahuë', co'huara huëntayáterasoihuë', hua'an canquirin. A'natérápo nano'sa' noya yonquirinsopitaso' imatona', pëiquë ya'conpi. Inaque sa'acaso marë' pita nisapi. Nani ya'compachinara, oncotopi. ¹¹ Ina quëran co yonquirinsopitasohue' huënantatona': '¡l'soatoco'i sinioro quiyanta' ya'coin!' itopirinahuë'. ¹² Hua'ani co nohuantérinhue'. 'Co campitaso' piyapinëhuëpitandquëmahuë'. Co nohuitéranchue', ta'ton co aya'coninhuë'.

¹³ Napoaton campitanta' noya yonquiatoma', o'manta'huaso' tahuëri ninaco'. Onporoso' nanipon nimara, co nitotéraramahuë'. Ni'cona patontatënquëma', itérin.

Canacaso marë' coriqui quëtérinso'

(Lucas 19.11-27)

¹⁴ Ina quëran itaantarin: "Isonta' iyaro'sa' a'chinchinquëma' Yosë hua'anéntérinso' nitotamaso marë'. A'na quëmapi aquë yapa'sarinso pochin ninin. Yapa'pachina, inpriatonënpita amatérin camaicaso marë'. Huë'pachinara, itapon: 'Aquë pa'pato, oshaquëran huënantarahuë. Inatohua' ya'huasoco, noya sacatoco'. Apira coriqui quëchinquëma' ina quëran na'con na'con canaca'huaso marë'. Ma'sha pa'anatoma', oshaquëran ana'atoco', itérin. ¹⁵ Itahuaton, a'naya a'naya quëtéra'piarin. Co napopianachin quëtérinhue'. Nanitinpichin tantiaton, nisha nisha quëtérin. A'naso' a'natérápo huaranca coriqui oro quëran nininso' quëtérin. A'naso' cato huaranca quëtérin. A'nanta' huaranca quëtérin. Nani inpriatonënpita quëtahuaton, pa'nin huachi. ¹⁶ A'natérápo huaranca ma'patona'piso' a'naroáchin natérin. Paaton, na'a ma'sha pa'anin. Ina quëran inapita pa'anaton, na'con na'con coriqui canarin. Nani tahuëri inapoaton, oshaquëran a'natérápo huaranca aquëtë' canaantarin. ¹⁷ Cato huaranca quëtérinsonta' noya sacatérin. Inanta' ma'sha

pa'anahuaton, cato huaranca aquëtë' canantarin. ¹⁸ Huaranca ma'parinsoso' nipurinhuë', co yanatérinhue'. No'paquë ihuatahuaton, coriquinën pa'pitérin inaquë tapacaso marë'.

¹⁹ Hua'qui quëran hua'anëna huënantarahuaton, inpriatonënpita amataantarin nontacaso marë'. ²⁰ A'natérápo huaranca ma'patona'piso huë'sahuaton, coriqui a'notiirin. 'Ni'quë' sinioro, a'natérápo huaranca quëtopirancohuë', ina quëran a'natérápo huaranca aquëtë' nani canarahuë', itiirin. ²¹ '¡Ma noyacha sacatéran paya! Natéranco ni'quëhuarë', chiníquën nanan quëchinquën na'con hua'anëntamaso marë'. Pëinéhuëquë huëquë', noya cancantahua', itérin hua'anëni. ²² Ina quëran a'nanta' huë'nin: 'Ni'quë' sinioro, cato huaranca quëtopirancohuë', nani cato huaranca aquëtë' canarahuë', itiirin. ²³ '¡Ma noyacha quëmanta' sacatéran paya! Natéranco ni'quëhuarë', nanan quëchinquën na'con hua'anëntacasos marë'. Pëinéhuëquë huëquë', noya cancantahua', itérin inanta' hua'anëni.

²⁴ Piquëran quëtérinsoso nipurinhuë', huë'sahuaton itiirin: 'Quëmaso' sinioro co nosororancoihuë'. Co quëmaora shacaponahuë', nitérinso' manan. Co sacataponahuë', canaran. ²⁵ Napoaton të'huataténquën, co sacatérahuë'. Coriqui quëtérancoso' acoporoquë po'orahuë. Ma'tana ya'huarin,' itahuaton, coriqui a'notérin. ²⁶ Napotohuachina, co noya ni'ninhuë'. 'Quëmaso' co noyanquënhue'. Chiroton, co natérancohuë'. Co no'tequën yonquiranhue'. "Co sacataponahuë' canaran," ¿itéranco ti? ²⁷ ¿Onpoatonta' nipayachin, co bancoquë acoranhue'? Inaquë acoran naporini, pi'pian téranta' canaitohuë', itérin. ²⁸ Ina quëran a'na piyapinën sha'huitérin. 'Iso quëmapi topinan quëran coriqui quëtérahuë. Osérétahuaton, paso' quëmapi na'con na'con canarins', quëtēquë'. ²⁹ Noya natérinco ni'ton, na'con na'con quëtantarahuë. Co manta' pahuantarinhuë'. A'nasso nipurinhuë' co natérincohuë' ni'ton, pi'pian ya'huëtérinso téranta' osérétarahuë. ³⁰ Naporahuaton co noyahue' ni'ton, aipiran tashinantérinquë të'yatoco'. Inatohua co napion ancantaton na'nérápon,' ténin," itérin Quisosori.

Nisha nisha nananquë nonpisopita ana'intérinso'

³¹ Ina quëran itaantarin: "Yosë quëran quëmapico ni'to, a'na tahuëri o'mantararahuë hua'anënta'huaso marë'. Ya'ipi anquëniro'sapitarë'co chachin o'mantararahuë. Huënaráchin huënaráchin ya'norahuato, hua'anënta'huaso' shiraquë huënsëarahue coisë pochin nica'huaso marë'. ³² Yosë nohuanton, nisha nisha nananquë nonpisopita niyontonapi. Niyontonpachina', pë'tahuatona'pi pochin nisarahuë. Ni'co'. Tahuëri nipayachina, ohuicaro'sa', chiporo'sa' napopianachin pa'sapi coshatacaiso marë'. Inaquéráchin ya'huëpirinahuë', tashihuachina, nisha nisha acorin huachi. ³³ Ohuicaro'sa' inchinanën quëran acorahuaton, chiporo'saso' ahuënanën quëran acorin. Inapochachin canta' ya'ipi piyapi'sa' nisha nisha acoarahuë. Noya cancantopisopita inchinanëhuë quëran acoarahuë. Co noyahue' cancantopisopitaso nipurinhuë', ahuënanëhuë quëran acoarahuë. ³⁴ Ina quëran inchinanëhuë quëran acorahuësopita itarahuë: 'Ya'ipinquëma' huëcatoma', Yosë hua'anëntérinquë ya'conquico'. ¡Ma noyacha Tata Yosë nosororinquëma paya! Isoro'pa' ninin quëran huarë' yonquirinquëma' hua'anëntérinquë aya'coinquëmaso marë'. ³⁵ Canpitaso' noya nosororamaco. Tanahuatéra, a'caramaco. Yamorohuatéra, o'shitéraramaco. Ya'huëramataquëchi na'huëpatéra, noya nontéramaco. Pëinémaquë chachin aya'conamaco. ³⁶ Capa a'moca'huaso' nipayachina, quëtéraramaco. Caniohuatéranta', huëcatoma', nosoroquiramaco. Tashinan pëiquë ya'huasoconta', ni'quiramaco. Napoaton huëco huachi, noya ya'hu'a'huá', itarahuë. ³⁷ Naporo' inapitaso' natanarinaco: '¿Onporota' Sinioro tanaran nicatëinquë, a'carainquë? ¿Onporota' yamororan ni'ton, o'shitérainquë? ³⁸ ¿Onporota' pëinéhuëquë aya'conainquë? ¿Onporota' a'mocamaso' pahuantérinquëni'ton, quëtérainquë? ³⁹ ¿Onporota' canioran ni'ton, nosoroquirainquë? ¿Onporota' tashinan pëiquë parisitéran, ni'conainquë? ¿Onpórochana napotérainquënicaya? Co yonquiraihuë', itarinaco. ⁴⁰ 'Co'ta, imarinacosopita parisitohuachinara, catahuarama'.

Topinan piyapi'sa', sa'ahuaros'a', inapita ma'sha pahuantohuachinara, quëtërama'. Imatomaco, a'napita catahuarama' ni'ton, canta' catahuaramacoso pochin ni'nahuë', itarahuë.

⁴¹ Ahuënánëhuë quëran acorahuësopitaso nimirinhue', sha'huitarahuë: 'Ya'ipinquëma' paco huachi. Tata Yosë co noyahue' ni'ninquëma' ni'ton, ana'intarinquëma huachi. Panca pën nani acorin sopairo'sa' ana'intacaso marë'. Inaquë pën co onporonta' tacopiarinhue'. Inaquë paco' canpitanta'. ⁴² Tanapirahuë', co a'caramacohue'. Yamoropirahuë', co o'shitëramacohue'. ⁴³ Ya'huëramataquëchin na'huëpatëra, co pëinëmaquë aya'conamacohue'. Capa a'moca'huasonta' nimirinhue', co quëtëramacohue'. Caniopirahuë', co huëcatoma' nosororamacohue'. Tashinan pëiquë ya'huëpirahuë', co ni'quiramacohue', itarahuë. ⁴⁴ Ina quëran natanarinaco: '¿Onporota' Sinioro tanapiranhuë' co a'carainquënhue'? ¿Onporota' yamoropiranhuë' co o'shitërainquënhue'? ¿Onporota' co pëinëhuëiquë aya'conainquënhue'? ¿Onporota' a'mocaso' pahuantopiranquënhue', co quëtërainquënhue'? ¿Onporota' caniopiranhuë' co nosororainquënhue'? ¿Onporota' tashinan pëiquë parisitopiranhuë' co catahuaraingue' Co onporonta' ina pochin ni'nainquënhue', itarinaco. ⁴⁵ 'Co'ta imarinacosopita parisitopirinahuë', co catahuaramahuë'. Sa'ahuaros'a' ma'sha pahuantopirinahuë', co quëtëramahuë'. Co inapita nosororamahuë' ni'ton, co canta' nosororamacohue', itarahuë. Itahuato, a'pararahuë huachi. ⁴⁶ Parisitopiquë pa'sahuatona', inaquë ya'huëmiatapi huachi. Noya nipsisopitaso nimirinhue', Yosë pochin nanopimiatiapi huachi," itérin Quisosori.

26

Quisoso macacaiso marë' chinotopiso'

(Marcos 14.1-2; Lucas 22.1-2; Juan 11.45-53)

¹ Nani a'chintohuachina, ca'tano'sanënpita itapon:

—Cato' tahuëri pahuanarin Pascoa nanicaso', nani nitotërama'. Naporo' Yosë quëran quëmapico nimirahuë', masarinaco. Masahuatonaco, corosëquë patanantarinaco, itérin.

³ Ina quëran corto hua'ano'sa', cotio ansiano'sa', inapita Caihuasë pëinënquë niyontonpi. Inaso' corto hua'an, chini chiniquën nanantérin. ⁴⁻⁵ Inaquë niyontonahuatona', ninontapi Quisoso tēpacaiso marë'.

—Ama pita tahuëri chachin maahuasohue', piyapi'sa' no'huihuachinënpoa'. Quisoso pa'yatapi ni'ton, ahuëariniënpoa'. Napoaton po'oana quëran maahua', nitopi.

Hua'saiquë opomototérinso'

(Marcos 14.3-9; Juan 12.1-8)

⁶ Quisoso nimirinhue' Pitaniaquë pa'nin. Simon pëinënquë coshatapatarin. Ina Simon chana caniori mapirinhue', anoyatérinso'. ⁷ Misaquë coshatasoi', a'nara' sanapi huë'nin. Potiria'huaya huirina'pi quëran nipsis' quënin. Inaquë pimo hua'sai' na'con pa'térinso' ya'huërin. Quisoso nosoroaton, opomototérin. ⁸ Ina nicatona ca'tano'sanënpitaso', no'huitoppi. No'huitatona ninontapi.

—¿Onpoatonta' iso hua'sai' pa'ton nimirinhue' chiniarin? ⁹ Pa'anin naporini, na'con coriqui canaton sa'ahuaros'a' quëtacaso' ya'huëchitonhue', nitopi.

¹⁰ Quisosori natanahuaton, itérin:

—¿Ma'marëta' iso sanapi no'huirama'? Tananpitoco'. Na'con nosoroatonco, inapotötérinco. ¹¹ Nani tahuëri sa'ahuaros'saso' ya'huërapo. Caso nimirinhue', co hua'quiyahuë' canpitaro'co ya'huarahuë. ¹² Co'huarda chimiyantërasocohue', nosoroatonco, nonëhuë hua'saiquë opotötérinco pa'pitinacoso marë'. ¹³ No'tequëñ itaranquëma'. Ya'ipi parti noya nanan sha'huihuachina', iso sanapi napotötérincoso' sha'huirapi anta'. Co nariantapihuë', itérin.

Cotasëri sha'huirapirinso'
(Marcos 14.10-11; Lucas 22.3-6)

¹⁴ Ina quëran, Cotasë Iscarioti pa'pi co noyahuë' yonquirin. Quisoso ca'tanaponahuë', yasha'huirapirin. Corto hua'anosa' ya'huérinquë pa'sahuaton, itoonin:

—Po'oana quëran Quisoso a'notohuatënquëma', ¿onpo coriquita' quëtaramaco? itérin.

—Cara shonca coriqui prata quëran niniso' quëchinquën, itopi. Itohuachinara:

—Noyahua'. Quëtoco nipachin a'nochinquëma', topachina, quëtopi. ¹⁶ Naporor quëran huarë' Cotasë yonquirarin po'oana quëran a'nocaso marë'.

Pascoa tahuëri coshatopiso'

(Marcos 14.12-25; Lucas 22.7-23; Juan 13.21-30; 1 Corintios 11.23-26)

¹⁷ Pascoa tahuëri nipachina, nisha pan ca'pi, co ahuëpocatopisohuë'. Ina tahuëri nanihuachina, ca'tano'sanënpitari huëcapaipi.

—¿Intohuata' Maistro paatoi, Pascoa cosharo' nii capacaso marë'? itopi.

¹⁸ —Ninanoquë paco'. Inaquë a'na quëmapi quënanconarama'. Ina quënanconpatama', sha'huitoco'. “Maistro a'parincoi ni'ton, huë'nai. Naporin: ‘Yosë ninorinso' nani naniriarin ni'ton, quëma pëinënquë Pascoa cosharo' ca'tano'sanëhuëpitare'co chachin coshatarai, ténin, itonco’,” itérin Quisosori.

¹⁹ Pa'pachinara, Quisosori sha'huiterinso chachin quënanconpi. Quëmapi quënanconahuatona', nontopi. Nani natanconpachinara, inaquë Pascoa cosharo' nipi capacaiso marë'.

²⁰ Nani tashihuachina, Quisoso ca'tano'sanënpitarë chachin huë'pi. Huë'sahuatona', misaqué huënséquipi. ²¹ Coshatapona pochin itérin:

—No'tequen ipora itaranquëma'. Shonca catonquëma' ca'tanpiramacohuë', a'naquëma' sha'huirapiaramaco, itérin.

²² Natanaahuatona', sëtopi. Sëtatona', a'naya a'nayari Quisoso natanpi.

—¿Incoita' Sinioro, yasha'huirapirainquë? ¿Co cahuë' nimara ti? itopi a'naya a'nayari.

²³ —Téhuëñchachin a'naquëma' yasha'huirapiramaco. Ina sënanquéráchin i'shiaton carë' caponahuë', yasha'huirapirinco. ²⁴ Yosë quiricanën quëran ninorincoso chachin chiminarahuë. Yasha'huirapirincoso niperinhuë', ma'huantacha nicapon paya. Co nasiterinhuë' naporini, noya noya niitonhuë', itérin.

²⁵ Itohuachina, Cotasérinta' itérin:

—¿Incoita' Maistro, yasha'huirapirainquë? ¿Co cahuë' nimara ti? itohuachina, —Quëma chachin mini, itérin.

²⁶ Coshatasoi', pan masahuaton Yosë nontérin. “Yosparinquë, Sinioro” itahuaton, së'panin. Ina quëran ca'tano'sanënpita quëtérin.

—Ca'co' iyaro'sa'. Ca nonëhuë pochin iso', itérin.

²⁷ Minënta' masahuaton, “Yosparinquë Sinioro,” itahuaton, inanta' quëtérin.

—Ya'ipinquëma' o'oco'. ²⁸ Ca huënainëhuë pochin iso'. Huënainëhuë pa'sarin ni'ton, nasha quëran canpitare' Yosë anoyatérinso' sha'huichinquëma' imacamaso marë'. Chiminarahuë na'a piyapi'sa' oshanëna' inquita'huaso marë'. ²⁹ Co huachi opai' o'oantarahuë'. Chiminarahuë huachi. A'na tahuëri Tata Yosë hua'anëntérinso' nanihuachin, canpitaro'co nasha pochin o'oantarahuë. Naporor noya noya cancantarihua huachi, itérin.

Pitrori nonpinapicaso' ninorinso'

(Marcos 14.26-31; Lucas 22.31-34; Juan 13.36-38)

³⁰ Ina quëran Yosë cantanën cantarahuatona', pipipi. Pipirahuatona', Oripose panënquë pa'pi huachi. ³¹ Inaquë Quisosori itérin:

—Iráca quiricanënquë ninoton, Yosë naporin: “Ca nohuanto, a'paitona'pi tëpaapi. Tëpahuachina', ohuicanënpita yanquëërapi,” ténin. Inapochachin yatëpahuachinaco,

ya'ipinquëma' co chiníquën cancantatomahuë', ta'ananipiaramaco. Ipora tashi chachin napoarama'. ³² Chiminaporahuë', Yosë ananpitaantarínco. Ananpitaantahuachinco, ca'ton Cariria'pa' pa'sarahuë. Inatohua' niquënantarihua', itérin.

³³ —A'napita ta'anapipirinënquëonta', co caso' ta'arahuë', ténin Pitro.

³⁴ —No'tequëni iyasha, itéranquëni. Ipora tashi chachin co'huara atari pérashatérásoluë', cararo' nonpinapiaranco. "Co caso' Quisoso nohuitérahuë", toconapon, itérin Quisosori.

³⁵ —Co Siniro napoarahuë'. Quëma imasaranquëni ton, yatépapirinacohuënta' co onporonta' nonpinapiaranquënhuë', itaantarín Pitrori. Inachachin topi ya'ipiya.

Quisoso sétaton, Yosë nontérinso'
(Marcos 14.32-42; Lucas 22.39-46)

³⁶ Ina quëran, Quisimani nararo itopiquë canconpi. Inaqué ca'tano'sanénpita sha'huitérin.

—Iséquë huënsétaco'. Pasëyáquë pa'sarahuë Yosë nontapo, itérin.

³⁷ Caraíchin ca'tano'sanén amashamiachin quëparin. Pitro, Sipitio hui'ninpita inapitaíchin quëparin. Naporó' sétaton, co napión cancantérin.

³⁸ —Pa'pi sétérahuë. Chiminchináchin sétérahuë. Iséquë huënsétaco'. Ama huë'ëtomarahuë', ni'táco', itérin.

³⁹ Amashamiachin pa'sahuaton, isonconin. No'paquë huarë' monshomarahuaton, Yosë nontérin: "Quëma nohuantohuatan Tata, nicha'ëco ama ma'sha onpo'isohuë'. Main o'orëso pochin parisita'huaso' ya'huérin. Co parisita'huaso' nohuantopirahuë', quëma nohuantohuatan, noya, ténahuë. No'tequëni yanatéránquëni," itérin.

⁴⁰ Ina quëran huënantapirihuë', cara chachin huë'ësápi quënanquintarin.

—Iya Pitro, ¿co a'na ora térranta' nanitéramahuë' ni'tamaso' ti? ⁴¹ Ama huë'ëtomahuë', ni'táco'. Yosë nontoco' ama sopai minséinquëmaso maréhuë'. Cancanëma quëranso mini Yosë yanatépiramahuë', co canpitaora chiníquën cancantaramahuë', itérin.

⁴² Ina quëran paantaráhuaton, Yosë nontaantarín.

—Nohuantohuatan Tata, nicha'ëco ama ma'sha onpo'isohuë'. Nipirihuë' co nohuantohuatanhuë', ma'sona yaonpotohuatanconta' noya, ténahuë. No'tequëni yanatéránquëni, itaantarín.

⁴³ Ina quëran huënantapirihuë', naquéranchin huë'ëantapi, quënanquintarin. Huë'ëi' iquitatona', huë'ësápi. ⁴⁴ Tananpitahuaton, paantárin. Paantaráhuaton, inachachin Yosë itantarín. Nani cararo' inachachin Yosë nontérin. ⁴⁵ Ina quëran huënantahuaton, itérin:

—¿Ipora huanta' huë'ësarama' ti? Nani ora nanirin huachi. Yosë quëran quëmapico nípirahuë', sha'huirapirinco oshahuano'sa' macainacoso maré'. ⁴⁶ Huënséco huachi pa'ahua'. Ni'co', sha'huirapirincoso' nani canquiarin, itérin.

Quisoso mapiso'
(Marcos 14.43-50; Lucas 22.47-53; Juan 18.2-11)

⁴⁷ Nontaso chachin, Cotasë canquirin. Inanta' Quisoso ca'tanaponahuë', yasha'huirapirin. Inarë' na'a piyapi'sa' huë'sapi, corto hua'ano'sa', cotio ansiano'sa', inapitari a'papisopita. Sahuëni, shonqui, inapita së'quérahuatona' huë'sapi. ⁴⁸ Co'huara canshatérásihuë', Cotasëri nani sha'huitérin Quisoso nohuitacaiso maré'.

"Insosona apinoahuato, ina Quisososo'. Máco huachi," itérin.

⁴⁹ Ina quëran ya'yoranquirahuaton:

—Tashita Maistro, itiirahuaton, apinorin.

⁵⁰ —Ma'sona yaninanso' iyasha, manóton niquë', itérin Quisosori. Ina quëran piyapi'sari chiníquën masapi huachi.

⁵¹ Ca'tano'sanénpita inaqué huaniapi. A'nara' sahuëniñen ocoirahuaton, corto hua'an impriatónen ahuérin. Ahuëaton, nishitëhuératéterin. ⁵² Quisoso nípirihuë' co nohuantérinhue'.

—Sahuëninën iyasha, po'moantaquë'. Hua'naquë tēpatohuatama', hua'na quëran chachin tēpainëmaso' ya'huérin.⁵³ Tatahuë nontërahuë naporini, shonca cato huaranca anquëniro'sa' a'patimaitoncohuë'. A'naroáchin catahuaitonacohuë'. ¿Co ina nitotërahuë' ti?⁵⁴ Napoaponahuë', co nohuantërahuë' cha'ëca'huaso'. Nicha'érinaco naporini, co huachi ninorinacoso' naniitonhuë'. Yosë nohuanton, chiminarahuë, itérin ca'tano'sanënpita.

⁵⁵ Ina quëran piyapi'sa' itapon:

—Sahuëni, shonqui, inapita së'quërahuatoma', huëcapairamaco. Tēpatona'pi pochin cancellatomaco, ¿yamanamaco ti? Co'tana nani tahuëri Yosë chinotopiso pëiquë huënsëato, a'chinárahuë. Nicapomaracohuë', co manamacohuë'.⁵⁶ Napoaponahuë', Yosë nohuanton, iporaso' masaramaco. Quiricanën quëran ninorinacoso chachin masaramaco, itérin.

Ina quëran ya'ipi ca'tano'sanënpitari ta'anapipi huachi.

Corto hua'ano'saquë quëpapiso'

(Marcos 14.53-65; Lucas 22.54-55, 63-71; Juan 18.12-14, 19-24)

⁵⁷ Nani masahuatona', corto hua'an chini chiníquën nanantërinso' ya'huérinquë quëpapi, Caihuasë itopiso'. Inaqué cotio maistro'sa', ansiano'sa', inapita nani niyontonpi.⁵⁸ Pitroso niperinhue', aquë quëran imaquierin. I'ratëquë huarë' imaquierin. Paireanaquë ya'conahuaton, ponisiaro'sapitarë' huënsëquirin. “¿Ma'ta' onpotapona'? Tépapona' nimara,” ta'ton, ni'sárin.

⁵⁹ Corto hua'ano'sa', cotio hua'ano'sa' inapitari yatëpapi ni'ton, a'naya a'naya yonípi Quisoso sha'huirapicaiso marë'.⁶⁰ Na'a piyapi'sari nonpinapiponaraihuë', nisha nisha nonconpi. Napoyan quëran catoya'piri huë'sahuatona', sha'huirapipi.

⁶¹ —I'hua chachin Quisoso noninso' natanai. “Yosë chinotopiso pëi' ata'huantahuato, caora nanitërahuë anoyatanta'huaso'. Cara tahuëri quëran anoyatantarahuë,” toconin, itopi.

⁶² Corto hua'an chini chiníquën nanantërinsoari huanirahuaton, Quisoso itapon:

—¿Co manta' ténanhue' ti? ¿Ma'ta' tapona' isopita nonapiarinënquë? itérin.

⁶³ Quisososo niperinhue' co manta' téninhue', ta'tárin. Ina quëran corto hua'ani itantarín:

—“Yosë ni'sárinco co nonpinahuë”, ta'ton, no'tëquën sha'huitoco. ¿Quëmaso' Cristo, Yosë hui'ninquë chachin ti? itérin.

⁶⁴ —Ca mini inaco. Yosë quëran quëmapico ni'to, a'na tahuëri niantaramaco. Inápaquë pa'pato, Yosë inchinanën quëran ahuënsëarinco. Ina quëran chitoro' huancana o'mantararahuë niantaramaco, itérin.

⁶⁵ Corto hua'anso natanahuaton, chiníquën no'huitérin. Inapoaton a'morinso osharin.

—“¡Caso' Yosë hui'ninco,” toconin! Nani natanama'. Inaora chachin sha'huitérinpoa' ni'ton, co a'napita sha'huitinpoaso' nohuantarihuahuë'.⁶⁶ ¿Ma'ta' onpotahua' Quisoso? ténin.

—Pa'pi co noya quëmapihuë' ni'ton, tēpacaso' ya'huérin, topi ya'ipiya.

⁶⁷ Ina quëran ipirayatahuatona', ahuëpi. A'naquëninta' tonporayatahuatona', chiníquën panpirayapi.

⁶⁸ —¿Inta' ahuërinquë? Quëmaso' Cristonquën nipatan, ninoton no'tëquën sha'huitoco, itopi.

Pitrori nonpinapirinso'

(Marcos 14.66-72; Lucas 22.56-62; Juan 18.15-18, 25-27)

⁶⁹ Napotasoi, Pitroso' i'ratëquë huënsëarin. A'na cosonari huë'sahuaton, itiirin.

—Quëmanta' Quisoso Cariria quëran huë'ninso' ca'tanan, itopirinhue'.

⁷⁰ —¿Ma quëmapita' napotaranso'? Co caso' ina nohuitërahuë', itérin. Ya'ipiya natanpi.

⁷¹ Ina quëran pa'sahuaton, ya'coanaquë huaniso', a'na cosonarinta' quënanquiantarin. Quënanahuaton, huanipapisopita itapon:

—Iso quëmapi Quisoso Nasaritoquë ya'huérinso' ca'tanin anta', itaantapirinhuë'.

⁷² —¡Co'chi nohuitérahuë' paya! Yosë ni'sárinco, co nohuitérahuë', taantarín Pitro.

⁷³ Ina quëran hua'quimiachin nisahuaso', a'napitarinta' itaantapi:

—Tëhuëñchachin quëmanta' Quisoso ca'tanan. Cariria piyapi pochin nonan quëran nohuitérainquën, itopi.

⁷⁴ —¡Co'chi iyaro'sa' paya! Yosë ni'sárinco, co cariso' nohuitérahuë'. Nonpintohu-atenquëmaso', Yosë ana'inchinco, ténahuë, itérin.

Naporó chachin atari pérarin. ⁷⁵ Ina natanahuaton, Quisosori napotérinso' yonquirin: “Co'huara atari pérashatérasohuë', cararo' nonpinapiaranco,” itérinco, ta'ton, aipiran pipirin. Inaqué chiníquën sétaton, na'nérin.

27

Piratoquë quëpapiso'

(Marcos 15.1; Lucas 23.1-2; Juan 18.28-32)

¹ Tahuërianpitohuachina, ya'ipi corto hua'ano'sa', cotio ansiano'sa', inapita napopianachin yonquipi Quisoso atépatacaiso marë'. ² Ina quëran noyá tonporahuatona', Pirato ya'huérinquë quèpapi. Inaso' hua'an, Noma copirnori acorinso'.

Cotasë nitëparinso'

(Hechos 1.18-19)

³ Cotasëso' nani sha'huirapiponahuë', Quisoso tonpopinan quëpahuachinara, ni'sárin. Ina ni'sahuaton, yonquirin huachi. “Ma'tana tēpacaiso marë' quèparapi. ¿Onpoatocha sha'huirapirahuë paya?” ta'ton, sétérin. Corto hua'ano'sa' ya'huépique paantarahuatón, cara shonca coriqui prata quëran nininso' quëtopiso' yayo'coantapirinhuë'.

⁴ —Co huachi iso coriqui nohuantérahuë'. Pa'pi co noyahue' ninahuë. Quisoso nöya quëmapi niperihuë', sha'huirapirahuë. Ina marë' oshahuanahuë, itoonin.

—¿Ma'marëta' ina sha'huitéranci? Co quiyaso' ina yonquiraihuë'. Quëma naporanso', itopi.

⁵ Napotohuachinara, Yosë chinotopiso pëiquë chachin coriqui té'yatonahuaton, pipirin. Pa'sahuaton, nihuëñquëconorahuaton, nitëparin.

⁶ Ina quëran corto hua'ano'saso' coriqui maantarahuatona':

—Tēpacaiso marë' pahuérëtopiso' ni'ton, co Yosë marë' acocaso' ya'huérinhuë'. Inaqué acohuatehwa', co Yosë pënëntérinso' natëarihuahuë', ta'tona', co inaqué acopihuë'.

⁷ —Iso coriquiqué no'pa' pa'ahuan' nisha piyapi'sa' pa'pitacaso marë', topachinara:

—Noyahua', topi ya'ipiya. Napoaton pa'sahuatona', ina coriquiqué no'pa' pa'anpi. “Tëshitona'pi no'panëñ,” itopiso' pa'anpi. Inaqué nisharo'sa chiminpachinara, pa'pitopi.

⁸ Napoaton ipora huanta' ina po'oroso': “Huénai' No'pa'”, itopi. ⁹ Iráca Irimiasë ninoton, Yosë quiricanenquë ninshitérin. “Cara shonca coriqui prata quëran nininso' quëtapi. Ina nápo' cotioro'sa' nohuantopi ni'ton, quëtapi. Ina coriqui chachin maantarahuatona',

¹⁰ tëshitona'pi no'panëñ pa'anapi. Yosë sha'huitérincoso chachin napoapi,” ténin, ninshitaton. Naporinso chachin ina nápo' coriqui masahuatona', no'pa' pa'anpi.

Pirato naporinso'

(Marcos 15.2-5; Lucas 23.3-5; Juan 18.33-38)

¹¹ Quisososo' Pirato noténanquë huaniárin.

—¿Quëmaso' cotioro'sa' copirnonquën ti? itérin Piratori.

—Ca mini inaco, itérin Quisosori.

¹² Corto hua'ano'sa', cotio ansiano'sa', inapitari na'con nonpinapipirinahuë', co manta' téninhuë'.

¹³—Na'con nonapirinënquën, ¿co natananhue' ti? itopirinhue' Piratori.

¹⁴Co manta' tēninhue'. Co pi'pisha tēranta' a'panitērinhue'. “Ma quëmapita' isoso' ni'ton, co manta' yaa'panitērinhue',” tēnin Pirato yonquiaiton.

Quisoso tēpacaiso' sha'huirinso'

(Marcos 15.6-20; Lucas 23.13-25; Juan 18.38–19.16)

¹⁵Nani Pascoa tahuëri Piratoso', a'nara' apina'pi tashinan pëi quëran ocoirin. Insosona piyapi'sari nohuantopiso' ocoirin. ¹⁶Tashinan pëiquë a'na apina'pi ya'huarin. Inaso' pa'pi co noyahuë'. Ya'ipi parti nahuiantérinso'. Parapasë itopi. ¹⁷Piyapi'sa' huë'pachinara, Piratori itérin:

—Ipora Pascoaquënta' a'nara' apina'pi ocoianta'i, topirahuë'. ¿Insota' nohuantërama' ocoica'huaso'? Cato' ya'huapi. A'naso' Parapasë. A'nanta' Quisoso, Cristo itopiso'. ¿Insochachinta' nohuantërama' ocoica'huaso'? Canpita huayonco', itérin.

¹⁸“Cotio hua'ano'sari co quë'yatonahuë', Quisoso mapi,” ta'ton, Piratori napotérin.

¹⁹Hua'an shiranënquë huënsëaso', sa'ininta' nanan a'patiirin Quisoso ocoicaso marë'. “Achin tashi' a'ninquëchin hua'narahue. Quisoso hua'nato, chiníquën pa'yanahuë. Inaso' noya quëmapi. Co manta' onporinhue' ni'ton, nicha'ëquë'. Co tēpacaso' ya'huérinhue',” itérin sa'ini. Ina marënta' Piratori co yatéparinhuë'.

²⁰Corto hua'ano'sa', cotio ansiano'sa', inapitaso nimirinhue', a'naya a'naya piyapi'sa' sha'huitëra'piapi:

—“Parapasë ocoirahuaton, Quisoso atëpatëquë”, itoco', itëra'piapi. ²¹Ina quëran Piratori natanin huachi.

—¿Insochachinta' oco'i'i? itaantarin. Napotaantahuachina:

—¡Parapasë ocoitocoi! itopi.

²²—¿Ma'ta' onpochi nipachin Quisoso, Cristo itopiso'? itohuachina:

—¡Corosëquë patanantëquë' chimi'in! tosapo ya'ipiya.

²³—¿Ma'marëta' tēpa'i? ¿Ma'ta' onporin? itopirinhue', aquëtë chachin chiníquën itantapi:

—¡Corosëquë patanantëquë' chimi'in! itaantapi.

²⁴Napotohuachinara, nisha yonquirin huachi. “Piyapi'sa' co yanatérinacohue'. Chiníquën no'huitatona', yaahuérinaco,” ta'ton, co huachi yonquirinhue' Quisoso ocoicaso'. Napoaton i'sha masahuaton, piyapi'sa' ni'térantapaquë hui'sérin.

—Iso quëmapiso' noya. Co manta' onporinhue', tēnahuë. Co ca nohuanto, tēpaapihuë'. Co ina marë' ana'intincoso' ya'huérinhue'. Canpita yonquiramaso', itahuaton, hui'sérin.

²⁵—Téhuëñchachin quiya yonquirai tēpaca'huaiso'. Yosë yaana'intoahuachincoi, hui'nuhüepitarë'coi chachin ana'inchincoi, topi.

²⁶Napohuachinara, Pirato camaitérin Parapasë ocoicaso'. Quisososo nimirinhue' chiníquën ahuihuitérin. Chiníquën huihuitona', pë'sha pë'shatopi. Nani huihuihuachinara, sha'huitérin corosëquë patanantacaiso marë'.

²⁷Sha'huitohuachina, Pirato pëinënquë quëpapi. Inaquë notohuaro' sontaro'sa' niyontonpi tēcariatona' tēhuacaiso marë'. ²⁸Ai'nanpiratahuatona', quëhuanën miachin hua'an a'morinso pochin nininso' a'motopi tēhuacaiso marë'. ²⁹Yancotënta' nahuan quëran nicatona', ayancotopi. Ina quëran tēhuacaiso marë napotopi:

—Ma'tana huaranën maquë huachi, itatona', piquiranana asë'quëëpi. Naporahuatona' ina noténanquë isonpi:

—Hua'qui tahuëri nanopiton cotioro'sa' hua'anëntëquë', itopi.

³⁰Ina quëran iraiquë ipitopi. Piquirananta' matantarahuatona', ahuëmotopi.

³¹Inapotatona', téhuapi. Nani téhuahuachinara, a'motopiso' ocoitahuatona', a'morinso chachin a'motantapi. Ina quëran corosëquë patanantacaiso marë' quëpapi huachi.

*Corosëquë patanantopiso'**(Marcos 15.21-32; Lucas 23.26-43; Juan 19.17-27)*

³² Ninano quëran pipirahuatona', a'na quëmapi nacapipi, Siriniquë ya'huérinso'. Simon itopi. Ina masahuatona', corosë Quisoso quëparinso' sontaro'sari apitëntopi. Inari quëpatérin.

³³ Pa'sahuatona', panëa'hua Corocota, itopiquë canconpi. Corocotaso': "Nansë Moto'," tapon naporin. ³⁴ Inaquë canconahuatona', huino ma'sha pinshiinë' ayontahuatona', o'shitopirinahuë', pi'pisha pi'nirahuaton, co o'orinhuë'.

³⁵ Ina quëran sontaro'sari corosëquë patanantoppi. Nani patanantahuatona', ninontopi. "Huëco", nicanatëhua' Quisoso a'morinsopita maahua'", nitatona', ya'nipirapi. Naporahuatona', a'naya a'naya mapi. ³⁶ Nani masahuatona', inaquë huënsëapi nicacaiso marë'. ³⁷ Onporinso marësona tēparapisonta' ninshitopi.

ISOSO' QUISOSO, COTIORO'SA' COPIRNO

ta'caso', ninshitopi. Inapotahuatona', corosëquë chachin motën pëtëcha achinpitopi.

³⁸ Ina pirayan cato' apiro'santa' patanantoppi. Nisha patanantoppi. A'nara' inchinan quëran, a'nanta' ahuënan quëran acopi. ³⁹ Piyapi'sa' na'huëpona pochin, Quisoso tēcariatona', tēhuacoppi.

⁴⁰ —¿Nani ma'sha nanitaparan ti? I'hua naporan: "Yosë chinotopiso pëi' ata'huantohuato, cara tahuëri quëran anoyatantarahuë," ténan. Inta nipachin cha'ëquë'. Yosë hui'ninquëen chachin nipatan, corosë quëran nohuararahuaton cha'ëquë', itoonpi.

⁴¹ Inapochachin corto hua'ano'sa', cotio maistro'sa', cotio ansiano'sa', inapitarinta' tēhuatona', itapona':

⁴² —A'napitaso' yanicha'ëponahuë', inaora chachinso' co nanitërinhuë' cha'ëcaso'. Israiro'sa' copirno nipachin, corosë quëran nohuarain nicatëhua' natëhua'. ⁴³ "Yosë hui'ninco chachin ni'ton, catahuarinco," topirinhuë'. Yacatahuahuachin, apiramiáchin nicha'ëin, nitopi.

⁴⁴ Ina pirayan patanantopisopitanta' Quisoso no'huipi.

*Quisoso chimininso'**(Marcos 15.33-41; Lucas 23.44-49; Juan 19.28-30)*

⁴⁵ Camotëchin nisahuaso', ya'ipi parti tashirarin. I'huaraya huarë' yono tashi pochin nisarin. ⁴⁶ Naporo' Quisoso chiniquëen nonin. *Iri, Iri, ¿nama sapacatani?* ténin. Inaora nananquë nonaton, naporin. "¿Onpoatonta' Tata patéranco?" tapon naporin.

⁴⁷ A'naquëen huanipapisopita natanahuatona':

—Iniasë përasamara, topi.

⁴⁸ A'naso' manorahuaton, pi'shiro pochin nininso' maconin. Ina masahuaton, huino áin nininso' asë'cotëtahuaton, piquirananguë achinpitérin. Achinpitahuaton, ihuëtérin o'ocaso marë'. ⁴⁹ A'napitariso nimirinhuë' itapona':

—Tananpitëquë' nia'ahua'. Iniasëri o'maton nicha'ëpon nimara, nitopi.

⁵⁰ Quisososo nimirinhuë' chiniquëen nonsahuaton, chiminin huachi. ⁵¹ Naporo' Yosë chinotopiso pëiquë tanontën né'mëtë' patonpiso' noshatérin. Inaora noshataton, catotë huarë' ninin. Inapa quëran no'paquë huarë' noshatomarin. Naporahuaton, panca ocohua pa'nin. Na'piro'sa' inaora nopaatérin. ⁵² Nopaatohuachina, a'naya a'naya pa'pitopiso' nii'soatérin. A'naquëen Yosë imarinsopita iráca ayapirinahuë', nanopiantapi huachi. ⁵³ Quisoso nanopiantarinso' piquëran inapitanta' pa'pitopi quëran pipirahuatona', Quirosarinquë pa'sapi. Na'a piyapi'sari quënanpi.

⁵⁴ Quisoso chiminpachina, capitanso sontaronënpitarë chachin ni'sapi. Ocohua pa'ninso', na'piro'sa' nopaatérinso', inapita ni'sahuatona', pa'pi pa'yanpi.

—Téhuëñchachin iso quëmapiso', Yosë hui'nin, topi.

⁵⁵ Sanapi'sa' Cariria quëran huë'pisopitanta', aquë quëran notëérapi. Inapitaso' Quisoso imaquipi nocamacaiso marë'. Iporaso' chimininso' ni'sapi anta'. ⁵⁶ A'naso' Maria

Mactarina itopiso'. A'nanta' Maria. Inaso' Santiaco, Cosi, inapita a'shin. A'nanta' Sipitio hui'ninpita a'shin. Inapitaso' aquë quëran notëérapi.

Na'pi naninqué po'mopiso'

(*Marcos 15.42-47; Lucas 23.50-56; Juan 19.38-42*)

⁵⁷ I'huararapaso', a'na ma'huan Cosi itopiso huë'nin. Inaso', Arimatiaquë ya'huërin. Quisoso imarin anta'. ⁵⁸ Pirato ya'huërinqué pa'nin Quisoso nonën natantacaso marë'. "Quétoco cari quëpa'i," itoonin. Napotohuachina, "Noyahua". Quëpaquë' nipachin," itahuaton, sontaro'sa' a'parin nonën anohuaratacaso marë'. Anohuararahuatona', quëtopi. ⁵⁹ Nonën masahuaton, noya morinqué so'quëétahuaton, ⁶⁰ na'pi nanin nasha nininqué po'morin. Inaora marë' pa'anpirinhue', inaquë po'morin. Ina quëran pancara'pi masho pitarahuatona', pa'copitopi. Pa'copitahuatona', patopi huachi. ⁶¹ Maria Mactarina, a'na Maria, inapitaso nimirinhue' na'pi nanin notënanqué chachin huënsëapi.

Sontaro'sari a'paipiso'

⁶² Tahuërinqué chinoto tahuëri marë' nani tapahuachinara, corto hua'ano'sa', parisiore'sa', inapita niyontonahuatona', pa'pi Pirato nontacaiso marë'.

⁶³ —Sinioro hua'an, Quisosocoso' nonpintë', ténai. Nani yonquirai. Co'huara chimiyanteraponhuë', piyapi'sa' sha'huitérin. "Tépahuachinaco, cara tahuëri quëran nanopiantarahuë," toconin. ⁶⁴ Napoaton sontaro'sa' a'paquë' na'pi naninqué a'paicaiso marë'. Cara tahuëri chachin noya a'pai'ina', ama nonën quëpacaiso marëhuë'. Ca'taninsopitari quëpahuachina': "Nani nanopiantarin huachi," toconapona'. Napohuachina', aquë aquëtë' piyapi'sa' nonpintapi, itopi.

⁶⁵ —Inta nipachin, sontaro'sa' ya'huarin. Canpitari chachin paatoma', inapita quëpacó' noya ni'ina'. Ama piyapi'sari huëcatona' quëpacaiso marëhuë' inapo'ina', itérin Piratori.

⁶⁶ Napohuachina, pa'pi. Pancara'pi to'ni pochin nininqué noyá pa'pirapitopi. Napotahuatona', sontaro'sa' acopi.

—Noya a'paico', itahuatona' patopi huachi.

28

Quisoso nanopiantarinso'

(*Marcos 16.1-8; Lucas 24.1-12; Juan 20.1-10*)

¹ Chinoto tahuëri piquëran Maria Mactarina, a'na Mariarë' naquëranchin paantapi po'mopiquë nicacaiso marë'. Tomio tahuëri tashíramiachin na'pi nanin'pa' pa'sapirinahuë'. ² A'nanaya panca ocohua pa'nin. Sinioro anquëninëni inápa quëran o'marahuaton, pancara'pi pa'copitopiso' chi'huincarin. Chi'huincarahuaton, ina aipi huënsërin. ³ Huënaráchin huënaráchin o'cori pochin ya'norin. Huiríchin a'morin. Pi'shiro quëran huiríchin huiríchin. ⁴ Ina ni'sahuatona', sontaro'sa' pa'yanpi. Pa'pi tē'huatopi. Ropa ropátahuatona', chimipi pochin no'paquë anotopi. ⁵ Ina quëran sanapi'santa' canqui-huachinara, anquëniri itérin:

—Ama pa'yancosohuë'. Quisoso corosëquë patanantopiso' yonisaramaso', nitotërahuë. ⁶ Co huachi isëquë ya'huërinhuë'. Sha'huitérinquëmaso chachin nani nanopiantarin. Huëco' ni'quirico' po'mopiquë. Capa huachi. ⁷ Manóton paatoma', ca'tano'sanënpita sha'huitonco': "Nani nanopiantarin. Ina'ton Caririaquë pa'sarin. Inatohua' quënancoantarama'," itonco'. Nani sha'huitérinquëma', itérin anquëniri.

⁸ Natanahuatona', a'naroáchin na'pi nanin quëran pipipi. Pa'pi pa'yanpirinahuë'. Noya cancantatona' ta'api ca'tano'sanënpita sha'huitacaiso marë'. ⁹ Pa'sapirinahuë', a'nanaya iraquë chachin Quisosori ya'notërin.

—Huë'cama imoyaro'sa', itérin. Ina nohuitatona', ya'carionpi. Monshorahuatona', nantëñ iporantërahuatona', chinotopi.

¹⁰ —Ama huachi pa'yancosohuë'. Paatoma', iyahuëpita sha'huitonco' Cariria'pa' pa'ina'. Inatohua' quënancoantarinaco, itahuaton, pa'nin huachi.

Sontaro'sa' napopiso'

¹¹ Sanapi'sa' paasoi', sontaro'santa' ninanoquë pa'pi corto hua'ano'sa' sha'huitacaiso marë'. "Quisoso pa'pitopiquë noya ni'sapiraihuë', a'nanaya panca ocohua pa'nin. Naporo' anquëni ya'norahuaton, pancara'pi pa'copitopiso' chi'huincarin. Ni'piraihuë', Quisoso nonën capa huachi," itonpi. ¹² Ina quëran corto hua'ano'sa', cotio ansiano'sa' inapita niyontonahuatona', ninontápi. Nani ninontohuachinara, sontaro'sa' amatanta-ruhuatona', na'con coriqui quëtopi.

¹³ —Piyapi'sa' sha'huitoco': "Yono tashi' Quisoso ca'tano'sanënpita huë'pi. Huë'ësoco, nonën quëpapi," itoco'. ¹⁴ Hua'anëma' natantaton ina marë' no'huihuachinquëma', quiyari anoyatarai ama ana'intinquëmaso marëhuë', itopi.

¹⁵ —Noyahua'. Napo'i nipachin, tosahuatona', coriqui ma'patopi. Pa'sahuatona', piyapi'sa' nonpintopi. Cotio hua'ano'sari sha'huitopiso chachin nonpinpi. Ipora huanta' na'a cotioro'sa' ina nonpin nanan natëpi.

Ca'tano'sanënpita a'chinacaiso marë' sha'huitérinso'

(Marcos 16.14-18; Lucas 24.36-49; Juan 20.19-23)

¹⁶ Ina quëran shonca a'na ca'tano'sanënpitaso' pa'pi Cariria'pa'. A'na panënquë pa'pi, Quisosori sha'huitérinquë chachin. ¹⁷ Inaquë Quisoso quënancónahuatona', chinotopi. A'naquënsö nípirihuë' pi'pian co natérinhue'. "Co inahuë' nimara," topirinahuë'.

¹⁸ Quisosori ya'carirahuaton, itapon:

—Tata Yosë nohuanton, chini chiníquënan anterahuë. Inápaquë ya'huérinsopita, isoro'paquë ya'huérinsopita, ya'ipiya hua'anéntarahuë. ¹⁹ Napoaton campita paatoma', ya'ipi piyapi'sa' a'chintoco'. Nisha nisha nananquë nonpisopita a'chintoco' imainaco. Insosona natéhuachinaco, i'quë aporintoco'. "Tata Yosë, Hui'nin, Ispirito Santo inapita nanan quëtérincoi ni'ton, aporintaranquëen," itahuatoma', aporintoco'. ²⁰ Ina quëran ya'ipi sha'huitérinquëmaso' a'chintoco' natéinaco. Inséquësona pa'patama', carinquëma' ca'tanaranquëma'. Nani tahuëri catahuaranquëma'. Ayaro' tahuëri naniquë huarë' ca'tanaranquëma'. Co onporonta' pataranquëmahuë', itérin Quisosori. Nani huachi.

Marco ninshitërinpoa' Quisocristo naporinso' nitotacaso marë'

*Coansha Paotista pënëntërinso'
(Mateo 3.1-12; Lucas 3.1-9, 15-17; Juan 1.19-28)*

¹ Apira iyaro'sa', Quisocristo nanamën ninshitaranquëma'. Inaso' Yosë hui'nin chachin. Iráca isoro'paquë o'marin nicha'ëinpoaso marë'.

² Isaiasë pënëntona'pi ninoton Yosë quiricanënquë ninshitërinso chachin o'marin. Inaquë Yosëri hui'nin itapon:

"Co'huara pa'shamátérerasëñquënhuë', comisionëhuë'ton a'pararahuë piyapi'sa' ayon-quicaso marë'.

³ Inotëro parti ina quëmapi pënëntápon: 'Ni'co' iyaro'sa'.

Hua'an chiníquën nanantona'pi ni'ton, a'na parti yapa'pachina, comisionën a'parin ira tapatacaso marë'. Ira otëérin noya pa'tacaso marë'.

Inapochachin iporaso' cancanëma' anoyatoco' Siniro o'main,' itarin," ténin ninshitan-

⁴ Ninorinso chachin Coansha huë'nin pënëntacaso marë'. Inotëro' parti ya'huaton, piyapi'sa' pënënrín. "Co noyahuë' yonquiramasopita naniantatoma', Yosë chachin tahuërtantaco' oshanëma' inquichinquëma'. Ina quëran aporihuancó'," itarin. Napotahuaton, na'a piyapi'sa' aporintarin. ⁵ Inaquë notohuaro' piyapi'sa' huë'pi natanapona'. Quirosarin quëran huë'pi. Ya'ipi Cotia parti quëran huëcatona', natanapi. "Tëhuëñchachin co noyahuë' nicatoi, oshahanai. Catahuacoi Siniro ina nanianchii," topachinara, Cortaniquë Coanshari aporintërin. ⁶ Co inaso' noyápiachin a'morinhuë'. Ponira pochin camiyo anporo quëran nipiso' a'morin. Sha'huëtë quëran nitonporin. Sëquërë pochin nininso' macaton, inaya téranta' ca'nin. Ninoi' quënanpachina, irorin. Piyapi'sa' pënënpachina, itapon: ⁷ "Ca piquëran a'na quëmapi huë'sarin chini chiníquën nanantërinso'. Caso' co pi'pian téranta' ina pochin chiníquën nanantërahuë'. Co maquëyancohue' ni'ton, co sapatën i'quirita'huaso téranta' nanitarahuë'. ⁸ Caso' i'quë aporintëranquëma'. Inaso niperinhuë' Ispirito Santo aya'coancantarinqüëma'," itërin.

*Quisoso aporihuaninso'
(Mateo 3.13-17; Lucas 3.21-22)*

⁹ Naporo tahuëri'sa' Quisoso Cariria parti quëran huë'nin. Nasaritoquë ya'huëpirinhuë', Coansha pënëntarinquë huë'nin. Huë'pachina, Coanshari Cortaniquë aporintërin.

¹⁰ Ii' quëran nonshihuachina, a'naroáchin inápaquë pi'iro'të' ni'soatërin. Ispirito Santonta', nëpë pochin nohuaramarahuaton, Quisoso ya'coancantomiatërin. ¹¹ Naporo'inápa quëran Yosëri itapon: "Quëmaso' hui'nahuëñquën chachin ninan. Na'con nosoroatëñquën, noya ni'nanquën," itërin.

*Sopairi tënirinso'
(Mateo 4.1-11; Lucas 4.1-13)*

¹² Ina quëran Ispirito Santori inotëro parti co piyapi ya'huërinquëhuë' a'parin.

¹³ Inatohua' catapini shonca tahuëri ya'huërin. Tanan ni'niro'sapitarë' ya'huërin. Sopai hua'aninta' huëcapairahuaton, tënirin. Sha'huitápirinhuë' ama Yosë natëcaso marëhuë'. "Inca, co nohuantërahuë'," ténin. Nani sopai pa'pachina, anquëniro'sari o'marahuatona', Quisoso nocomaimapi.

*Noya nanan sha'huicaso' caniaritërinso'
(Mateo 4.12-17; Lucas 4.14-15)*

¹⁴ Ina quëran Coansha tashinan pëiquë po'mopi. Ina natantahuaton, Quisoso pa'nin Cariria parti pënëntapon. Noya nanan Yosë noninso' sha'huirarin: ¹⁵ "Nani tahuëri nanirin huachi. Iso tahuëri'sa' Yosë yahua'anëntarinquëma'. Napoaton ya'ipi co noyahue' yonquiramasopita nariantatoma', Yosë chachin tahuërtantaco'. Naporahuaton noya nanan natëco' Yosë nicha'ëinquëma', itërarin.

Sami camayoro'sari imapiso'
(Mateo 4.18-22; Lucas 5.1-11)

¹⁶ Ina quëran Cariria sono' yonsanquë pa'sahuaton, cato' sami camayoro'sa' quënanconin. A'nsaso' Simon itopi. Iinë' riti të'yatapi sami macacaiso marë'. Iinso' Antërisë itopi.

¹⁷ —Huëco' iyaro'sa', ca imaco a'chinchinquema'. Sami manamaso pochachin piyapi'sa' masarama' Yosë imacaiso marë', itërin Quisosori.

¹⁸ Napotohuachina, ritinëna' patahuatona' Quisoso imapi huachi.

¹⁹ Amashamiachin Santiano, Coansha, inapitanta' quënancoantarín. Sipitio hui'ninpita inahuaso'. Pa'pinarë' potiquë huënséatona', ritinëna' pasonapi. ²⁰ "Huëco' pa'ahua', ca imaco," itohuachina, pa'pin, inpriatónënpita, inapita potiquë patahuatona', Quisoso imapi.

Sopai a'parinso'
(Lucas 4.31-37)

²¹ Ina quëran Capinaomoquë canconpi. Chinoto tahuëri nanihuachina, cotioro'sa' niyontonpiso pëiquë ya'conin. Inaquë a'chinarin. ²² Chiníquën nanantona'pi pochin a'chinarin. Co cotio maistro'sa pochin a'chininhue'. Napoaton a'chiniso' natanahuatona', piyapi'sa' pa'yanpi: "¡Ma'pitacha Quisoso nitotërin paya!" topi. ²³ Naporo' a'nara' quëmapi inaquë ya'huërin. Sopairi ya'coancantaton, camairin ni'ton, pa'pi co noyahue' yonquirin. Quisoso quënanahuaton, chiníquën nontërin. Sopairi chachin anonin.

²⁴ —¡Tananpitoco! Quëmaso' Quisosonquën, Nasaritoquë ya'huëran. Nohuitërainquën. Yosë quëran o'maton noya ninan. ¿Ma'ta' quëma onpotaponco? ¿Ata'huantaponco ti? itërin.

²⁵ Itohuachina, Quisosori itapon:

—¡Ta'tëquë! ¡Iso quëmapi quëran pipimiatëquë! itërin.

²⁶ Napotohuachina, quëmapi chiníquën apa'tanin. Naporahuaton chiníquën "yai" ta'so chachin, sopai pipirin. ²⁷ Ya'ipi piyapi'sa' pa'yanahuatona', ninontapi:

—¿Ma'pitata' ni'sarëhuaso'? Quisososo' co a'napita pochin a'chininhue'. Chini chiníquën nanantaton, sopairo'sa quëran huarë' camaihuachina, natëpi, topi.

²⁸ Shiarahuaton, Quisoso naporinso' ya'ipi Cariria parti nahuinin.

Simon Pitro a'shatën anoyatërindo'
(Mateo 8.14-15; Lucas 4.38-39)

²⁹ Ina quëran niyontonpiso pëi quëran pipirahuatona', Simon, Antërisë, inapita ya'huëpique pa'pi. Santiano, Coansha, inapitanta' pa'pi. ³⁰ Simon a'shatën chiníquën sapoton, quëhuénárin ni'ton, Quisoso sha'huitopi. "A'shacha saporin ta'a," topi.

³¹ Inaquë paaparahuaton, maimirarahuaton, opatërin. Naporo chachin sapo otanotërin. Otanotahuaton, inari chachin a'carin, o'shitërin, napotërin.

Na'a cania'piro'sa' anoyatërindo'
(Mateo 8.16-17; Lucas 4.40-41)

³² I'huanahuanquë nani pi'i ya'conahuaso', na'a cania'piro'sa' quëpi. Sopairi ya'coancantërinsopitanta' quëpi. ³³ Ya'ipi ya'huëhuano'santa', ninano' ya'coanaquë niyontonpi Quisoso nicacaiso marë'. ³⁴ Naporo' notohuaro' cania'piro'sa' anoyatërin. Nisha nisha caniori maninsopita anoyatërin. Na'aya'pi sopairo'sari ya'coancantërinsopitanta'

inquitérin. Sano yonquipi huachi. Sopairo'sari ina nohuitatona', yasha'huipirinahuë', Quisoso co nohuantérinhue' ni'ton, ta'topi huachi.

Caririaquë a'chintëra'piarinso'

(Lucas 4.42-44)

³⁵ Tahuéririnquë co'huara noya huënihuayantérasohuë', Quisoso huënsërahuaton ninano quëran pipirin. Co piyapi ya'huérinquëhuë' Yosë nontacaso marë' inaoraíchin pa'nin.

³⁶ Simonso' capayatopirinhue', co Quisoso quënanatonhuë', a'napitarë chachin pa'nin yonípon. ³⁷ Quisoso quënanconahuatona':

—Notohuaro' piyapi'sa' yonisarinënquën, itopi. Itopirinahuë', Quisosori itérin:

³⁸ —Huëco' iyaro'sa', a'na partinta' pa'ahua'. Ya'cariya ninanoro'saquë pa'ahua'. Inaquénta' pénënta'huaso' ya'huérin. Ina marë' Yosë a'paimarinco ni'ton, huë'sarahue, itérin.

³⁹ Ina quëran ya'ipi Cariria parti pa'sahuaton, niyontonpiso pëiro'saquë pénëntëra'piarin. Naporahuaton, sopairo'sari ya'coancantérinsopita inquitéra'piarin.

Chana caniori maninso'

(Mateo 8.1-4; Lucas 5.12-16)

⁴⁰ Naporor a'na quëmapi huë'nin, chana caniori maninso'. Quisoso huëcapairahuaton, isonquirin. Isonahuaton, itapon:

—Nohuantohuatan, nanitérän anoyatancoso'. Anoyatoco topirahuë', itérin.

⁴¹ Quisosori nosoroaton, së'huarin.

—Nohuantérahuë mini iyasha. ¡Noyatéquë huachi! itérin.

⁴² Itohuachina, a'naroáchin canio inquirin. ⁴³⁻⁴⁴ Naporor chachin Quisosori chiníquën pénënин.

—¡Ama insonta' sha'huitéquësohuë! Corto hua'ainchin sacatérinquë paaton, noyatéranso' a'notonquë' ni'inquën. Naporahuaton, Moisësë sha'huirinso' quëpaquë' noyatéranso' nitotacaiso marë', itérin. Ina quëran a'parin huachi.

⁴⁵ Napotopirinhue', papon pochin ya'ipi piyapi sha'huitéra'piarin. "Quisoso anoyatérinco," itéra'piarin. Ya'ipi naporinso' nahuinin. Napoaton piyapi'sa' ni'térantapaquë co huachi Quisoso iratérinhue'. Co huachi nanitérinhue' a'ninquëchin ninanoro'saquë pacacaso'. Co piyapi'sa' ya'huérinquëhuë' ya'huérárin. Ina niponahuë', ya'ipi parti quëran huë'pi nicapona'.

2

Apia anoyatérinso'

(Mateo 9.1-8; Lucas 5.17-26)

¹ Cara tahuéri quëran pochin Capinaomoquë huëntarin. "Pëinënquë Quisoso ya'huarin," topi. ² Natantahuatona', notohuaro' piyapi'sa' niyontonpi. Pëi' ya'sotahuatona', ya'coana aquëtérän huarë' yamopi. Yosë nanamën sha'huirarin, natanapi. ³ Naporor chachin catapini quëmapi'sa' huëcatona', apia pë'sara'huayaquë quëshipi. Hua'qui' co nanitérinhue' huanicaso', quëhuénárin. ⁴ Quisosoquë yaquëpapirinahuë', hua'huayátérahuë piyapi'sa' ni'ton, co nanitopihuë' ya'conacaiso'. Ya'shotopi. Napoaton pëi' nanpétahuatona', a'campiso pi'pian o'quirahuatona', pë'sara'huayarë chachin anohuaramapi. Quisoso pirayan acomapi huachi. ⁵ Quisosori ni'sahuaton, "Ma noya isopita natérinaco," ta'ton, apia itapon:

—Oshanën apia'hua inquitaranquën huachi, itérin.

⁶ A'naquën cotio maistro'sa' inaquë huënsëpisopitaso', cancanëna quëran yonquirápi:

⁷ "¿Ma quëmapita' isoso' Yosë yaya'huérétérin? Co ínsonta' nanitérinhue' oshanënpoa' inquitinpoaso'. Yoséíchin nanitérinso'," topi yonquiatona'. ⁸ Topinan yonquirapirinahuë', yonquipiso nitotaton Quisosori itapon:

—¿Onpoatomata' co noyahuë' yonquirapiramaco? ⁹ Canpitaso naporama': “Piyapinpoa a'napita oshanën inquitacaso', co nanitéréhuahuë'. Apia camaiatë': ‘Huaniquë' apia'hua. Pë'sara'huanën masahuaton, noya paquë huachi,' itacasonta' co nanita-paréhuahuë',” ténama'. ¹⁰ Caso nipurinhuë' Yosë quëran quëmapico ni'to, nanan quëtérinco piyapi'sa' oshanëna' inquita'huaso marë'. Canpitanta' ina nitotacamaso marë' iso apia anoyatarahuë, ténin.

¹¹ Ina quëran apia itantarín:

—¡Huaniquë' apia'hua! Pë'sara'huayanën masahuaton, ya'huëranquë paquë huachi, itérin. ¹² Itohuachina, a'naroáchin noyatahuaton, huanirin. Pë'sara'huaya masahuaton, ya'huërinquë paantarin. Ina ni'sahuatona', piyapi'sa' pa'yansi.

—¡Ma noyacha Yosëso ni'ton, a'naroáchin anoyatérin paya! Co onporonta' ina pochin ni'chinéhuahuë', topi.

Nihui Quisoso imarins'
(Mateo 9.9-13; Lucas 5.27-32)

¹³ Naquëranchin panca sono' yonsanquë Quisoso paantarin. Inaqué hua'huayáterahuë piyapi'sa' huë'pachinara, a'chintarin. ¹⁴ Ina quëran na'huëpon pochin, Nihui quënanconin. Arpio hui'nin inaso'. (Matio itopi anta'.) Coriqui Noma copirno marë' ma'patérinquë huënséarin. Quisosori itapon:

—Huéquë' iyasha imaco, itérin. Itohuachina, huanirahuaton Quisoso imasarin huachi.

¹⁵ Ina quëran pëinénquë Quisoso quëparin coshatacaso marë'. Ca'tano'sanénpitarë' coshatapatapi. Na'a piyapi'sa' huë'pi coshatatona' Quisoso nohuitacaiso marë'. A'naquën copirno marë' coriqui ma'patona'piro'sa'. A'napitanta'oshahuano'sa' itopiso'. Inahuanta' Quisoso yaimápi. ¹⁶ A'naquëonta' cotio maistro'sa', parisioro'sa', inapitari ni'sahuatona', ca'tano'sanénpita natanpi:

—¿Onpoatonta' maistronëma' oshahuano'sapitarë' coshatarin? Copirno marë' coriqui ma'patona'piro'santa' co noyahuë' nipurinhuë', inapitarë' coshatarin, itopi.

¹⁷ Natanaahuaton, Quisosori itapon:

—Isopitaso' tēhuëñchachin nohuantérinaco imainacos'. Ni'co'. Cania'piro'saso' notoro nohuantopi. “Co caniorahuë'”, topatéraso', co notoro nohuantéréhuë'. Inapochachin canta' oshahuano'sa' pënëna'huaso marë' o'marahuë. “Co noyahuë' yonquiramasopita naniantatoma', Yosë chachin tahuérétantaco'”, itérahuë. A'napitaso nipurinhuë': “Quiyaso' noyacoi,” topiso marë' co na'con a'chintérahuë', itérin.

Nasha nanan a'chinins'
(Mateo 9.14-17; Lucas 5.33-39)

¹⁸ Naporo' Coansha Paotista imapisopitaso ayonatona', Yosë nontapi. Parisio imapisopitanta' inapoapi. Napohuachinara, a'naquëni paaparahuatona', Quisoso natanpi:

—Coansha imapisopitaso' ayonatona', Yosë nontapi. Inapochachin parisio imapisopitanta' nisapi. ¿Onpoatonta' imarinënsopitaso' co inapopihuë'? itopi.

¹⁹ —Ca ya'huarahuë ni'ton, co sëtopihuë'. Ni'co'. Quëmapi sa'acaso marë' piyapi'sa' amatochuachina, coshatatona', capa cancantopi. Nipayarinsopita huë'pachinara, coshatopi.

²⁰ A'na tahuériso nipurinhuë' inimiconënpitari sa'ana'pi masapi. Quëpatohuachina', sëtapi huachi. Co huachi yonquiapihuë' coshatacaiso', ténin.

²¹ Itahuaton: “Ni'co'. A'morëso noyá mocaahuachina, co nasha në'mëtëquë pa'pitéréhuë'. Nasha në'mëtëquë pa'pitérë' naporini, naquëranchin panca panca noshataanta'itonhuë'. ²² Sha'moronta' yonquico'. Huino sha'moro' nipachina, co sha'huëtë' morsa mocaro' nininquë ta'panéhuë'. Inaqué ta'panë' naporini, a'naroáchin nopoitaton, nichinia'itonhuë'. Naporahuaton morsanta' tapiitonhuë'. Napoaton sha'moro' huinoso' nasha morsaquë ta'panë'. Huino, morsanta' noya nisarin huachi,”

itérin Quisosori. (Iráca inachintopiso' nariantatona', nasha nanan imacaso' ya'huérin, tapon napotérin.)

*Chinoto tahuëri naporinso'
(Mateo 12.1-8; Lucas 6.1-5)*

²³ Ina quëran a'na chinoto tahuëri nanihuachina, tricoro' Quisoso pëntontarin. Ca'tano'sanënpitaso papona pochin, a'naya a'naya trico moto maraapi. ²⁴ Ina nicatona parisioro'saso':

—jNi'quë', Maistro! Chinoto tahuëri niperinhuë', ca'tano'sanënpita tricoraya i'shorayarapi. Co ipora tahuëriso' pi'pisha téranta' sacatacasohuë' niperinhuë'. ¿Onpoatonta' co Moisésé pënëntérinso' natépihuë'? itopi.

²⁵⁻²⁶ —Yosë quiricanën ¿co nontëramahuë' ti? Iráca Tapi tanahuachina, Yosë pëinëñqué ya'conin. Apiatrico corto hua'an ni'so' ya'conahuaton, pan Yosë marë' acopiso' ca'nin. Ca'taninsopitanta' quëtérin, ca'pi anta'. Corto hua'ano'sáchin ina pan capacaso niperinhuë', co ina marë' Yoséri no'huirinhuë', itérin.

Ina quëran itantarín: ²⁷ —Piyapi'sa' nosoroaton, chinoto tahuëri acorin noya ya'huëcaiso marë'. Co tahuëri chinotacaso' na'con na'con yonquirinhuë'. Piyapi'sa' na'con na'con nosororin. ²⁸ Yosë quëran caso quëmapico ni'to, chiníquën nanantérahuë. Ma'sona noya nicacaso' sha'huichinquëma'. Chinoto tahuëri ma'sona co nicacasona' sha'huichinquëma', itérin.

3

*Imirin tachitérinso'
(Mateo 12.9-14; Lucas 6.6-11)*

¹ Naquëranchin niyontonpiso pëiquë Quisoso ya'conconin. Inaquë apia quënanconin. Imirin tachitérin ni'ton, co nanitérinhuë' së'quëtacaso'. ² "Chinoto tahuëri anoyatomara," ta'tona', parisioro'sari ni'sápi sha'huirapicaiso marë'. ³ Naporó apia itapon:

—Huë'sahuaton, huancánachin huaniquë', itérin.

⁴ Inaquë nipachina, piyapi'sa' itapon:

—Chinoto tahuëri noya nicacaso' ya'huérin. Co ahuëtacaso', co tëpatacaso', co inapita nicacaso' ya'huérinhuë'. Cania'pi tananpitohuatoso', co nosoroarahuë'. Niperinhuë', nosoroato anoyata'huaso' ya'huérin, ténahuë caso'. ¿Ma'ta' ténama canpitaso'? itérin.

Natanaponaraihuë', co manta' topihuë'. ⁵ Co a'panitohuachinarahuë', a'naya a'naya ni'sarin. Co natantochináchinhue' cancantopi ni'ton, no'huirë pochin cancantaton, co noyahue' ni'nin. "Co nosoropihuë", ta'ton, pa'pi sëtérin.

—Imiran iyasha ihuëquë', itérin. Ihuëhuachina, a'naroáchin noyatérin. ⁶ Parisioro'saso' no'huitatona', pipipi. Irotisé piyapinënpita quënanconahuatona', ninontopi Quisoso tēpacaiso marë'.

Sono' yonsanquë a'chinino'

⁷ Quisososo' panca sono' yonsanquë paantarin. Ca'tano'sanënpitarë' pa'nin. Na'a piyapi'sari imasapi. A'naquën Cariria parti quëran huë'pi. ⁸ A'naquëonta' Cotia parti quëran huë'pi. Quirosarin quëran, Itomia quëran, Cortanii' aquëtérän quëran, Tiro quëran, Siton quëran, ina quëranpita hua'huayáterahuë' huë'pi. Quisoso naporinso' natantahuatona', nicapona' huë'pi. ⁹⁻¹⁰ Na'a piyapi'sa' nani anoyatérin ni'ton, ya'ipi cania'piro'sa' huë'sapi. Na'a piyapi'sa' ni'ton, ya'sératérarahuatona', huë'sapi Quisoso së'huacaiso marë'. "Sé'huahuato, anoyatarinco," ta'tona', naporapi. Napoaton ca'tano'sanënpita itapon: "Poti amasha quëpaco' inaquë huënsëato a'chinchi. Notohuaro' piyapi ni'ton, ya'quëetohuachinaco," itérin.

¹¹ Sopairo'sari ya'coancantérinsopitanta' huë'pi. Quisoso quënanahuatona', nocotapa-ataquëchin isonquipi.

—¡Quëmaso' Yosë hui'ninquën! itopi chiníquën nontatona'. ¹² Inariso nimirinhue', chiníquën pënénin: “¡Ama piyapi'sa' anohuitocosohue'!” itérin.

Shonca cato' ca'tano'sanënpita acorindo'
(Mateo 10.1-4; Lucas 6.12-16)

¹³ Ina quëran Quisoso a'na motopia'huaquë paantarin. Nohuantérinsopita përapachina, paapapi. ¹⁴ Na'a a'chintérinsopita ya'huëpirinahuë', shonca cato' quëmapi'sa' huayonahuaton, acorin. “Nani tahuëri iyaro'sa' ca'tanco a'chinchinquëma'. Ina quëran a'pararanquëma' piyapi'sa' pënénacamaso marë'. ¹⁵ Chiníquën nanan quëchinquëma' sopairo'sa' a'pacamaso marë'”, itérin. ¹⁶ Shonca cato' ca'tano'sanënpita acorin. A'naso' Simon. Nisha nininën acotérin. Pitro itérin. ¹⁷ Santiaco, Coansha, inapitanta' acorin. Sipitio hui'ninpita inahuaso'. Nisha nininën inapitanta' acotaantarin. Poaniquisé itérin. (“Huira pochin,” tapon napotérin.) ¹⁸ Antérise, Pinipi, Partoromi, Matio, Tomasé, Tatio, inapitanta' acorin. A'nanta' Santiaco itopi. Arpio hui'nin inaso'. A'na Simonta' acorin. Iráca copirno no'huina'piro'sa' imapirinhue', iporaso' Quisoso imasarín huachi. ¹⁹ Cotasé Iscariotinta' acopirinhue', a'na tahuëri inari sha'huirapiarinso'.

Sopai hua'an minsërinso'
(Mateo 12.22-32; Lucas 11.14-23; 12.10)

²⁰ Ina quëran a'na pëiquë pa'pi. Naquéranchin notohuar'o' piyapi'sari huëcapaiantapi ni'ton, co nanitopihuë' capacaiso téranta'. ²¹ Quisoso quëmopinënpitari natantahuatona', “Nani hua'yantérin,” topi. Napoaton Quisoso quëpacaiso marë' huëcapaipirinahuë'.

²² Cotio maistro'santa' Quirosarin quëran o'marahuatona', tapona': “Sopai hua'an Piirsipo itopisori ya'coancantérin ni'ton, nani ma'sha nanitaparin. Inari chiníquën nanan quëtérin sopairo'sa' a'pacaso marë'”, toconpi.

²³ Quisososo nimirinhue' piyapi'sa' përasahuaton, pënento nanan sha'huitérin ayonquicaso marë'. “Sopairo'sa capini co onporonta nia'pacaiso ya'huërinhuë'. ²⁴ Ni'co'. Ninanoquë ya'huëpisopita nino'huipi naporini, yanquë'itonahuë'. Co huachi inaquë ya'huë'itonahuë'. ²⁵ Quëmopinëna capininta' nino'huipi naporini, inapitanta' yanquë'itonahuë'. ²⁶ Inapochachin Satanassé sopairo'saré' nino'huipi naporini, co huachi hua'anëna niitonhuë'. Co huachi chiníquën nanan ya'huëchitonhuë'.

²⁷ Quëmapi chiníquën nipachina, pënën noya a'pairin. Co insonta' nanitérinhue' ya'conaton ma'shanënpita matacaso'. A'nariso nimirinhue' ina quëran chini chiníquën ni'ton, huëcapairahuaton minsërin. Tonporahuaton, ma'shanënpita quiquitérin huachi.

²⁸ Oshanëma marë' sëtohuatama', Yosë ya'ipi oshanëma' inquitarinquëma'. Pinopatama', inanta' inquitarinquëma'. ²⁹ Nimirinhue', Ispirito Santo pinotoma' oshahuanpatama', ina oshanëmaso' co inquitarinquëmahue'. Onpopionta' ana'intinquëmaso' ya'huërin,” itérin.

³⁰ “Sopairi ya'coancantérin,” topiso marë' Quisoso napopënëntérin.

Quëmopinënpita pochin nininsopita
(Mateo 12.46-50; Lucas 8.19-21)

³¹ Ina quëran a'shin, iinpita, oshinpita, inapita canquiponaraihuë', co ya'conpihuë'. Aipiran huanirahuatona', Quisoso amatopi. ³² Quisoso ahuancanapitona', tahuishin miáchin huënsëpisopitari sha'huitopi:

—Ni'quë' Maistro. Mamaparin, iyaparinpita, oshiparinpita, inapita huëcatona', aipiran huanirapi. Yanontérinënquëen, itopirinahuë'.

³³⁻³⁴ —Mamahuë, iyahuëpita, oshihuëpita inapita pochin ni'nahuësopita sha'huichinquëma' nitotoco', itérin.

Piyapi'sa' tahuishin miáchin huënsërantapaiso' ni'sarin quëran itantapon:

—Isopita imarinaco ni'ton, iyahuëpita, oshihuëpita, mamahuë, inapita pochin nicato nosororahuë. ³⁵ Yosë natëpisopita iyahuëpita pochin ni'nahuë. Sanapi'santa' Yosë

nanamën natëhuachina', oshihuëpita pochin ni'nuhüe. Payaro'santa' imapachinaco, mamahuë pochin ni'nuhüe, itérin.

4

Pa'sarayarin quëran a'chininso' (Mateo 13.1-9; Lucas 8.4-8)

¹ Naquëranchin sono' yonsanquë Quisoso a'chiantararin. Inaquë notohuaro' piyapi'sa' niyontonpi natanacaiso mare'. Hua'huayatërahuë' tancapitohuachinara, potique ya'conahuaton, huënsëmarin. Inaquë yanponapirarin. Ya'huëre' piyapi'saso' ii' yonsanquë yamorapi. ² Nisha nisha pënënto nanan a'chintarin. Ma pochinsona Yosë nanamën nininso' ayonquicaso marë' a'chintarin.

³ A'chintaton, itapon: "Natanco a'chinchinquëma'. A'na quëmapi sha'tapon pa'sarin. ⁴ Na'a trico pa'sarayarin papotacaso marë'. Pa'sarayahuachina, a'naquën ya'pirin iraquë huarë' anotérin ni'ton, inairaro'sari huëcapairahuatona', pë'yaquipi. ⁵ A'naquën ya'pirin na'piroquë pa'sarayarin, pi'pian pi'pian no'pa' ya'huërinquë. Inaquë, shiarahuaton, papotopirinhue'. ⁶ Pi'iri chiniquën picahuachina, yaahuirin. Pi'pishara'huaya itëhuanin ni'ton, ahuirin huachi. ⁷ A'naquën ya'pirionta' nahuanoquë pa'sarayarin. Inaquë papotopirinhue', nahuano'santa' papotérin. Shia a'shinahuatona', imotérin. Napoaton co nitérinhue'. ⁸ A'naquënsö nipurinhue' noyaropaqüë pa'sarayarin. Inaquë noya papotérin. A'shinpachina, sha'nin quëran na'con na'con nitérin. A'naquën ya'pirin cara shonca, cara shonca nitérin. A'naquëonta' saota shonca, saota shonca nitérin. A'naquënsö' pasa, pasa nitochanin," itérin.

⁹ Itahuaton: "Huëratëhuanpatama', noya natanatomaco, yonquico'," itaantarin.

Pënënto nananquë a'chininso' (Mateo 13.10-17; Lucas 8.9-10)

¹⁰ Niyontonpisopita pa'pachinara, a'naquën imapisopita co pa'pihuë'. Shonca cato' ca'tano'sanënpitarë chachin co pa'pihuë'. "Apira a'chintërancoiso' co noya nitotëraihuë'. ¿Ma'ta' tapon naporan?" itopi. ¹¹ Itohuachinara, Quisosori itapon: "Onpopinsona Yosë hua'anëntëriño' co a'napita nitotopihuë'. Co imarinacohuë' ni'ton, co nitotopirinahuë', canpitaso' carinquëma' a'chinchinquëma'. Yosë nanamën no'tequëñ nitotacamaso mare' a'chinchinquëma'. A'napitaso' nipurinhue' pënënto nanan quëransáchin a'chintarahuë. ¹² Inapitaso' co yanatërinacohuë' ni'ton, natanaponaraihuë', co natëtapihuë'. Ma'sona ninahuësonta' nicaponaraihuë', co yonquiapihuë'. Imarinaco naporini, oshanëna' inquitahuato anoyacancanchitohuë'," itérin.

Tricoraya tapon naporino' (Mateo 13.18-23; Lucas 8.11-15)

¹³ Naquëranchin Quisosori ca'tano'sanënpita itantapon: "Achin sha'huitëranquëmaso' ¿co nitotëramahuë' ti? Co inaya téranta' nitotohuatamahuë', ¿onporahuatomacha ya'ipiya nitotëre'pënquëmaya? Carinquëma' nipachin anitochinquëma'. ¹⁴ Tricoraya pa'sarayarëso pochin Yosë nanamën ya'ipi parti a'chinë'. ¹⁵ A'naquën piyapi'sa' iraquë huarë' pa'sarayarinso pochin nipi. Yosë nanamën natanpirinahuë', a'naroáchin Satanasë huë'nin. Yosë nanamën natanpiso' osërëtiirin. Ama natëcaiso marëhuë' ananiantërin. ¹⁶ A'naquën piyapi'santa' na'piroquë pa'sarayarinso pochin nipi. Yosë nanamën natanahuatona', a'naroáchin pa'yatatona', natëpirinahuë', ¹⁷ co cancanëna quëran huarë' natëpihuë'. Co chiniquëñ cancantatonahuë', co natëmiatopihuë'. Yosë nanamën yaimapi ni'ton, a'napitari tëhuapi, no'huipi, napotopi. Napohuachinara, Yosë nanamën yaa'popi. Ma'sha onpohuachinara, a'naroáchin nanamën a'popi. ¹⁸ A'naquën piyapi'santa' nahuanoquë pa'sarayarinso pochin nipi. Yosë nanamën natanpirinahuë', ¹⁹ ma'sharáchin yonquipi. 'Na'a coriqui, ma'sha, inapita ya'huëtohuachincoi,

noya cancantarai,' topi. Napoaton nahuano'sari imotérinso pochin, nani ma'sha nohuantatona', Yosë nanamën naniantopi. Co imamiatopihuë'. ²⁰ A'naquënso nimirinhue' noyaro'paquë pa'sarayarinso pochin nipi. Yosë nanamën noya natanpi. Natanahuatona', cancanëna quëran natëpi. Sharo'sa' nisha nisha nitérinso pochin natëtopi. A'naquën ya'pirin cara shonca, cara shonca nitérinso pochin noyamiachin imapi. A'naquëonta' saota shonca, saota shonca nitérinso pochin noya imapi. A'naquënso' pasa, pasa nitérinso pochin ya'ipi cancanëna quëran imatona', noya noya imapi huachi," itérin.

Nanparin pochin nininso'
(Lucas 8.16-18)

²¹ Naquëranchin Quisosori itaantarin: "Ni'co' iyaro'sa'. Nanparin i'chinpihuatëra, ¿co i'mëanaquë po'morëhuë' pa'? Co pë'saraanaquë téranta' acorëhuë'. Nanparin aconanquë acorë' noya a'pinacaso marë'. ²² Iporaso' ma'sha noyá po'opinan pochin ni'ton, co insonta' nitotérinhuë'. A'na tahuëriso nimirinhue' ya'ipiya nitotapi. ²³ Huëratëhuapatama', noya natanatomaco, yonquico'," itérin.

²⁴ Ina quëran napotaantarin: "Natanpatama', noya yonquico'. Onpopinsona a'napita nitohuatama', inapochachin Yosënta' nitarinquëma'. Aquë aquëtë chachinhue nípon quëtarinquëma'. ²⁵ Noya natëhuatama', na'con na'con nitotarama'. A'naquënso nimirinhue', 'Nani nitotérahuë', topirinahuë', co yanatëpihuë'. Napoaton Yosëri tananpitarin. Inapotohuachina, pi'pian téranta' nitotopiso', ya'ipiya naniantapi," itérin.

Ya'pirin papotérin quëran a'chininso'

²⁶ Ina quëran napotaantarin:

"Yosë hua'anentérinso' a'chinchinquëma'. Iminquë sha'térëso pochin ninin.

²⁷ Sha'térinso piquëran tashihuachina, hua'anën huë'érin. Tahuërihuachina, huënséantarin. Nani tahuëri naporárin. Oshaquëran sha'ninso' pichopitahuaton, papotérin. Onporohuatonso' papotérinso' co nitotérinhuë'. ²⁸ Sha'pachina, inaora nohuanton, no'pa quëran papotérin. Nani a'shinpachina, huënsharatérin. Nani huënsharatahuaton, nitérin. ²⁹ Ya'pirin cayahuachina, nani noya macacaso' ni'ton, manin huachi," ténin. (Inapochachin Yosë nanamën sha'huitohuatëhua', ina nohuanton, oshaquëran a'naquën natëtapi.)

Mostasaraya pochin nininso'
(Mateo 13.31-32; Lucas 13.18-19)

³⁰ Ina quëran sha'huitantarin:

"¿Ma'pochinta' Yosë hua'anentérinpoaso' ninin? ¿Ma quërant'a' nanitérë' ina yonquicaso'? ³¹ Mostasaraya no'paquë sha'nëso pochin ninin. Mostasarayaso' hua'huishin. A'napita ya'pirin quëran pi'pi pi'pishara'huaya. ³² Pi'pira'huaya níponahuë', sha'patéra, panca panca papotérin. A'napita sharo'sa quëran panca panca ta'an ninin. Panca së'patochuachina, inairaro'sa' na'iyatona', inaquë pëipi," itérin.

Ma'pochinsona nininso'

(Mateo 13.34-35)

³³ Ina pochin Quisosori piyapi'sa' a'chintarin. Na'a pënënto nanano'sa quëran ayonquiarin. Natantiinpichin a'chintarin. ³⁴ Napoaponahuë', pënënto nanan quëransáchin a'chintérin. Ina quëran ca'tano'sanënpitaráchin ya'huëhuachinara, oshaquëran a'chintantarin no'tequen yonquicaiso marë'.

Ihuan a'parinso'
(Mateo 8.23-27; Lucas 8.22-25)

³⁵ Naporo' tahuëri chachin nani tashirarapaso', ca'tano'sanënpita itapon:
—Sono aquëtérän pa'ahua', itérin.

³⁶ Nani piyapi'sa nontahuaton, Quisoso potiquë ya'comarin. Napohuachina, ca'tano'sanënpitarë chachin pa'pi. Naporo' a'napitanta' nisha potiro'saquë pa'pi.

³⁷ Paaquëya', panca ihuani manin. Co'sacairi poti opoto opototahuaton, nani yamëntairapirinhue'. ³⁸ Ya'huërë Quisososo', huancónenquë motonan motoantahuaton, huë'érarin. Ca'tano'sanënpitari ochinanpi:

—¡Catahuaco! Maistro chimiitarihua! ¿Co ina yonquiranhue' ti? itopi.

³⁹ Huanintarahuaton, ihuan a'parin. Sononta' camaiton:

—¡Sanoquë! ¡Copi tëquë huachi! itérin. Itohuachina, ihuan copitënин. A'naroáchin sanoirin.

⁴⁰ —¿Onpoatomata' të'huataramaso'? ¿Co Yosë natëyatéraramahuë' ti? itérin.

⁴¹ Pa'pi pa'yanahuatona', ninontopi:

—¿Ma quëmapicha isoso' ni'ton, ihuan a'parin nicaya? Sononta' a'naroáchin asanoirin, nitopi.

5

*Sopairo'sari ya'coancantérinso'
(Mateo 8.28-34; Lucas 8.26-39)*

¹ Ina quëran, sono' aquëtérän Quirasa parti itopiquë canconpi. ² Quisoso nani nonshihuachina, a'na quëmapiri na'pi nanin quëran pipirahuaton, nacapirin. Sopairi ya'coancantérin ni'ton, co huachi noya yonquirinhue'. Hua'yantérin. ³ Na'pi nanin-quë chimipiro'sa' po'mopiquë ya'huërin. Pa'pi chiníquën ni'ton, co catinaquë téranta' nanitopihuë' tonpocaiso'. ⁴ Na'aro' catinaquë tanpaquën tonpotahuatona', pa'on tonpotopirinahuë', oshitérachinin. Co incariso téranta' nanitérinhue' minsëcaso'. ⁵ Nani tashi', nani tahuëri iratárin. Na'pi naninquë, motopiquë inaquëpita pa'sápaton, chiníquën yaitárin. Na'pique nipë'sharárin. ⁶ Quisoso aquë quëran quënanahuaton, ta'aquirin. Quisoso nocotapataquë isonquirahuaton, mosharin. ⁷⁻⁸ Napohuachina, Quisosori nosoroaton, a'naroáchin sopai nontérin.

—¡Iso quëmapi quëran pipico huachi! itérin. Ina natanahuaton, sopairi chiníquën a'panirin.

—¿Ma'ta' yaonpotaranco? Quëmaso' Quisosonquën, Yosë hui'ninquëni'ton, chini chiníquën nanantérän. Yosë marë' ama apira aparositocoisohue', itérin.

⁹ —¿Ma'ninquënta' quëmaso'? itérin Quisosori.

—Na'acoi ni'toi, "na'a huaranca," itérinaco. ¹⁰ Ama a'na parti a'pacoisohue', tosapi.

¹¹ Ina ya'cariya notohuaro' coshiro'sa' panenquë coshatapi.

¹² —A'pacoi coshiro'saquë téranta' ya'coanta'ii, tosapi.

¹³ —Inta nipachin, inaquë paatoma' ya'conconco', itérin. Itohuachina, sopairo'sa' pipirahuatona', coshiro'saquë ya'conconpi. Ina quëran ya'ipi coshiro'sa', cato huaranca pochin nimirinahuë', hua'yantatona' ta'api. Tahan pa'tatona', sonoquë niitopi. Inapoatona', taquítipi.

¹⁴ Coshi a'paina'piro'saso' ni'sahuatona', ta'arë'nachin ninanoquë ya'huëpisopita sha'huitonpi. Ninano pirayan ya'huëpisopitanta' a'naya a'naya sha'huitéra'piapi. Natantuhatona', "¿Ma'ta' onpocaiso'?" ta'tona', pa'pi nicapona'. ¹⁵ Quisosoquë canquirahuatona', quëmapi hua'qui' hua'yantérinso' quënanquipi. Nani a'moanaton, noya huënsérarin. Na'a sopairo'sari ya'coancantopirinahuë', noya yonquiantarin. Co huachi hua'yantérinhue'. Napoaton pa'yanpi. ¹⁶ "Quisosori anoyatérin. Sopairo'sa' a'pahuachina, coshiro'saquë ya'conconpi. Inapohuachinara, tahan pa'tahuatona', sonoquë taquítipi huachi," itopi ni'pisopitari. ¹⁷ Natantuhatona', piyapi'sa' të'huatopi: "A'na parti paqué'," itopi Quisoso nontatona'.

¹⁸ Quisoso potiquë ya'conaso', hua'yantérinsoari huëcapirahuaton, itapon: "Canta' imainquëni," itérin. ¹⁹ Quisososo nimirinahuë' co nohuantérinhue'.

—Ya'huéranquë iyasha paantaquë'. Quëmopinënpita sha'huitonquë'. “Sinioro noyá anoyatérinco. Na'con nosororinco,” itéquë', itérin Quisosori.

²⁰ Napotohuachina, pa'nin. Ticaporisë parti sha'huira'piarin. “Quisoso nónya anoyatérinco,” itéra'piarin. Natanahuatona', “¡Ma'pitacha sha'huirin paya! ¡Ma noya catahuarin!” topi ya'ipiya.

Sanapi anoyatahuaton, Cairo hui'nin ananpitaantarinson'

(*Mateo 9.18-26; Lucas 8.40-56*)

²¹ Quisososo' pëntonquiantarahuaton, na'a piyapi'sa' quënanquirin. Sono' yonsanquë huëcapairahuatona', tancapitopi. ²² Naporo' a'na cotio hua'an Cairo itopiso huë'nin. Inaso', niyontonpiso pëi' hua'an ya'conin. Quisoso quënanquirahuaton, nantën pirayan isonquirin:

²³ —¡Hui'nuhüé Sinioro, chiminarin! Huéquë'. Së'huauquiton, anoyatoco, chiminpachin, itárin.

²⁴ —Inta nipachin, tosahuaton, imarin. Na'a piyapi'santa' imasapi ni'ton, Quisoso ya'quëetérapi. ²⁵ Paaquëya', a'na sanapiri imaquierin, hua'qui' panca huënai' a'parinso'. Nani shonca cato' pi'ipi co sanorinhüé'. ²⁶ Na'a notoro'sari nonënpirinahuë', na'con parisitárin. Nani ya'ipi coriquinëi i'quiaponahuë', co manta' noyatérinhüé'. Aquëtë chachin nisarin. ²⁷⁻²⁸ Quisoso nahuininso' natantahuaton, pinëi quëran imaquierin. “A'morinso téranta' së'huauhato, anoyatarinco,” ta'ton, piyapi'sa' ya'sératérarahuaton, a'morinso' së'huatiirin. ²⁹ Naporo' a'naroáchin huënai' no'narin. Canio quëran nani noyatérin ninatanin. ³⁰ Quisososo' co quënanaponahuë', inaora nitotérin. “A'naso' natëtonco, së'huauquirinco. Ca nohuanto noyatérin,” ta'ton, a'naroáchin tahuërtahuaton, natantérin:

—¿Inta' a'morahuëso' së'huatérinco? ténin.

³¹ —Ni'quëchi Maistro, notohuaro' piyapi'sa' ya'quëetapirinënquënhüé', “¿Inta' së'huarinco?” ¿ténan ti? itérin ca'tano'sanënpitari.

³² Itopirinahuë', Quisososo' a'naya a'naya ni'sarin. “¿Inta' së'huarinco?” ta'ton, ni'sárin.

³³ Napohuachina, sanapiso' “Nani anoyatérinco,” ta'ton, ropa ropátérarin quëran Quisoso huëcapairin. Isonquirahuaton, no'téquen sha'huitérin. “Hua'qui' caniorahuë ni'ton, së'huaranquën Sinioro. Së'huaténquën, a'naroáchin noyatérahuë huachi,” ténin.

³⁴ —Natéranco ni'ton, nani imoya, anoyatéranguë. Nani noyatérän ni'ton, noya paqué huachi, itérin.

³⁵ Ina nontaso chachin, Cairo pëinëi quëran huë'sahuatona', sha'huitiipi.

—Hui'nan nani chiminin huachi. ¿Ma'maréta' topinan quëran Maistro quësaran? itiipi.

³⁶ Quisososo niperinhüé' piyapi'sa' noninso' natanaponahuë', co ina yonquirinhüé'.

—Ama iyasha pa'yanquësohuë'. Natëco, itérin.

³⁷ “Ama a'napitaso' huë'inasohuë”, topachina, Pitro, Santiacó, Coansha, inapitaráchin pa'pi. Coanshaso' Santiacó iin. ³⁸ Cairo pëinënquë canconahuatona', na'a piyapi natanconpi. Chiníquen na'nëtona', ayanápi. ³⁹ Ya'contarahuaton, inapita itapon:

—¿Onpoatomata' na'nëtoma', noncaroaramaso'? Co sanapia'huá chiminihuë'. Huë'ësárin, itérin Quisosori.

⁴⁰ Naporinso' natanahuatona', piyapi'sari têhuapirinahuë'. Quisosoriso' inapita ocoirahuaton, pa'pin, a'shin, cara ca'tano'sanëi, inapitaráchin quëparin. Sanapia'huá ya'huérinquë ya'concontarin. ⁴¹ Maimirarahuaton, inaora nananquë:

—Tarita comi, itérin. “Huënsëquë' apia'huá,” tapon napotérin. ⁴² A'naroáchin sanapia'huá huënsërahuaton, huanirin. Nani shonca cato' pi'ipitérin ni'ton, noya iratérin. Ina ni'sahuatona', ya'ipi piyapi'sa' pa'pi pa'yanpi. “¡Ma'pitacha nitotaton, ananpitaantarín paya!” topi. ⁴³ Quisososo niperinhüé', “Ama a'napita sha'huitocosohuë”, itahuatón, “Nanon a'caco”, itérin.

6

*Nasaritoquē paantarinso'**(Mateo 13.53-58; Lucas 4.16-30)*

- ¹ Ina quēran pipirahuaton, ya'huērin'pa' paantarin. Ca'tano'sanēnpitarinta' imapi. ² Chinoto tahuēri nanihuachina, niyontonpiso pēiquē a'chinarin. Na'a piyapi'sari natanahuatona', pa'yanpi. Pa'yanatona', inahua capini ninontapi:

—¡Ma'pítacha Quisoso nitotérin paya! ¿Macariso' a'chintomara? Noya noya yonquirin. Piyapi'sa' a'naroáchin anoyatérin. ¿Onporahuatoncha nani ma'sha nanitaparin nicaya? ³ Hua'huatapon quēran huaré' nohuitérēhua'. ¿Co'na nontēcamayo inaso'? A'shino' Maria itopi. Iinpitanta' nohuitérēhua'. Santiaco, Cosi, Cotasë, Simon, inapita itopi. Oshinpitanta' iséquē canpoaré' ya'huarin. Co Quisoso chiníquēn nanantérinhue'. Canpoa pochachin inanta', ta'tona', “¡Macari natéapon!” topi. ⁴ Napohuachinara, Quisosori itapon:

—Ya'ipi piyapi'sari pēnēntona'pi noya natanpi. Ninanonēnqué ya'huēpisopitariso nimirihué', co noyahue' natanpi. Quēmopinēnpita, huēntonēnqué ya'huēpisopita, inapitanta' co noyahue' ni'pi, topi iráca. No'tequén napopi, tēnin Quisoso. ⁵ Co cancanēna quēran huaré' natépihué' ni'ton, co nanitérinhue' aquétē huaré' Yosë pochin nicacaso'. Caraíchin cania'piro'sa' së'huarahuaton, anoyatérin. ⁶ “¿Onpoatoncha isopita co yanatérinacohue' nicaya?” tēnin, yonquiapon.

*Ca'tano'sanēnpita a'chinacaiso maré' a'parinso'**(Mateo 10.5-15; Lucas 9.1-6)*

- Ina quēran ya'cariya ninanoro'saquē pa'sahuaton, piyapi'sa' a'chintarin. ⁷ Naporahuaton, shonca cato' ca'tano'sanēnpita pērasahuaton, sha'huitérin paatona' a'chinacaiso maré'. Catoya catoya a'parin. Chiníquēn nanan quêtérin sopairo'sa' a'pacaiso maré'.

⁸ —Pa'patama', ama ma'sha quëpacosohue'. Ama cosharo', pē'pēto, coriqui, inapita térranta' quëpacosohue'. Pitanaráchin quëpaco'. ⁹ Sapaté' po'morahuatomá', a'moramasoré'quëmaráchin paco'. ¹⁰ Inso pēiquésona yacapatohuatama', ina pēiquéráchin ya'huéco'. Ina ninano quēran pipiamaque huaré' inaqué ya'huéco'. ¹¹ A'na ninanoquē ya'huēpisopita no'huiténēnquéma': “Ama iséquē huécosohue'. Co yanatanainquëmahué'”, itohuachinénquéma', patoco'. Yapa'patama', pēnēncó': “Nani sha'huitopiranquëmahué'. Co nohuantéraramahué' ni'quëhuare' canpitaora téhuénëmaque nina'intarama'”, itoco'. Téhuénchachin Yoséri chiníquēn ana'intarin huachi, itérin Quisosori.

¹² Ina quēran ca'tano'sanēnpita pa'sahuatona', piyapi'sa' pēnēna'piapi: “Ya'ipi co noyahue' yonquiramasopita naniyatatomá', Yosë chachin tahuérétantaco huachi,” itéra'piapi. ¹³ Naporahuatona', na'a piyapi'sa' sopairo'sari ya'coancantérinsó inquitopi. Na'a cania'piro'santa' tomaque pashitatona', anoyatopi.

*Coansha Paotista tēpapiso'**(Mateo 14.1-12; Lucas 9.7-9)*

- ¹⁴ Ya'ipi Quisoso naporinso' nahuinin. Piyapi'sa' natanahuatona', nisha nisha yonquipi. Cariria hua'aonta' natantérin, Irotisé itopiso'. I'huamiáchin inari sontaronēnpita camaiton, Coansha Paotista atépatérin ni'ton, yonquiárin: “Ina quëmapiso' Coansha. I'huá chiminaponahué', nanopiantarin. Napoaton nani ma'sha nanitaparin,” tēnin.

¹⁵ “Co inahué'. Iniasé pēnēntona'pi ipora,” topi a'naquéonta'.

“Co inahué'. Ninotona'pi iráca ya'huérinso' nimara,” topi a'naquéonta'.

¹⁶ Irotiséso nimirihué', co nisha nisha yonquirinhue'.

—Inaso' téhuénchachin Coansha. Anishitéconotopirahué', nanopiantarin, tēnin.

¹⁷⁻¹⁹ I'huá chachin Coansha nanopiso', Irotisé co noyahue' ninin. Iin sa'in osérétérin. Pinipi sa'in chachin osérétaton, manin, Irotasa itopiso'. Napoaton Coanshari chiníquén

pënënин. "Co Yosë nohuantérinhue' iyaparin sa'in osérétaton macamaso'," itérin. Napotérinso marë' Irotiasaso' co quëyatónhuë', onpopionta yatéparin. Ina nohuanton hua'anso', sontaro'sa a'parin. Coansha macacaiso marë'. Masahuatona tashinan pëiquë po'mopi. Inapotahuatona, catinaquëtopi.

²⁰ Irotisériso' Coansha noya natanin. "Nóya quëmapi inaso'. Co oshahuanhuë," ta'ton, co nohuantérinhue' atépatacaso'. Coanshari pënénpachina, nisha nisha yonquiaponahuë', noya natanin. ²¹ Ina quëran hua'huatérinso' tahuëri nanihuachina, pita ninin. Na'a piyapi'sa' amatérin. Coiséro'sa', capitano'sa', ma'huano'sa' Caririaquë ya'huëpisopita, inapita amatérin. Naporó' tahuëri Irotiasa chinotérin Coansha atépatacaso'. ²² Coshatasoi', hua'huin ya'conahuaton, nansararin. Nanon nansarinso' ni'sahuatona', ya'ipiya quëran pa'yatopi. Hua'an mashorinta' pa'yatérin.

—Ma'sona nohuantéranso' apia'hua, nico quëchinquën. ²³ Yoscoarë' quëchinquën. Ma'sona térranta' nipatanco, quëtaranquën. Pancana no'pa' hua'anentérahuë. Patomaquë huarë' quëtaranquën, itérin hua'ani na'aro nontaton. ²⁴ Napotápachina, a'shin paahuarin.

—¿Ma'ta' mama ma'pai? itoonin.

—“Coansha nishitëconotahuaton, motën quëtoco,” itëquë', itérin.

²⁵ Manorahuaton, hua'an ya'huërinquë paantarin.

—Coansha motën nohuantérahuë. Sënanquë acorahuaton, apiramiáchin quëtoco, itérin.

²⁶ Ina natanahuaton, hua'an pa'pi sëtérin. Napoaponahuë', "Ya'ipi piyapi'sa' nataninaco, Yoscoarë' itérahuë," ta'ton, co yanopintérinhue'. ²⁷ Ina quëran sontaro sha'huitahuaton, a'parin Coansha motën macacaso marë'. Inaso pa'sahuaton, tashinan pëiquë nishitëconotérin. ²⁸ Sënanquë motën acorahuaton, nanon quëtérin. Nanonta' a'shin quëtonin.

²⁹ Imarinsopitaso', natantahuatona huë'pi. Nonën quëparahuatona', pa'pitopi huachi.

Cosharo' ana'atérinso'

(Mateo 14.13-21; Lucas 9.10-17; Juan 6.1-14)

³⁰ Ina quëran ca'tano'sanënpita huëntarahuatona', Quisoso sha'huitiipi. "Nani a'chintéra'piarai. Cania'piro'santa' anoyatérain. Noya natanpi," itiipi. ³¹ Na'a piyapi'sa' huë'sapi Quisoso nicapona'. Ina quëran paantapi. A'napita ya'huëre' huëntapi, ina quëran paantapi. Naporápi ni'ton, Quisoso ca'tano'sanënpitaré chachin co capacaiso térranta' nanitopihuë'.

—Huëco' iyaro'sa'. Co piyapi ya'huërinquëhuë' pa'ahua'. Pi'pian chinotahua', itérin ca'tano'sanënpita. ³² Itohuachina, potiquë ya'conahuatona', pa'pi. Co piyapi ya'huërinquëhuë' pa'sapirinahuë'. ³³ Pa'pachinara, na'a piyapi'sari notëérapi. Quisoso nohuitahuatona', na'a paahuapi. Nisha nisha ninano quëran pa'pi. Ira pa'tatona', ta'arahuatona', inahua'ton canconpi. Co'huara Quisoso canshätérasohuë', canconpi. ³⁴ Na'a piyapi'sa' yamorapi. Nonshirahuaton, Quisosori quënanconin. "Isopitaso' ohuicaro'sa' co macari a'pairinsohuë pochin nisapi," ta'ton, nosororin. Nosoroatón, na'con a'chintaantarín. ³⁵ Nani i'huararahuaso', ca'tano'sanënpitari Quisoso huëcapairahuatona', itopi:

—Nani Maistro i'huarin. Co manta' isëquë ya'huërinhuë' ni'ton, ³⁶ piyapi'sa' a'paqué' pa'ina'. Isosha'huaya péiro'sa' ya'huërin. Ninanoro'santa' co aquëyahue'. Inatohua' cosharo' pa'anatona', ca'ina', itopirinahuë'.

³⁷ —Canpitari a'caco', itérin Quisosori.

—Cato pasa tahuëri sacatatë' coriqui canarëso pochin nininquë pan pa'anahuatoi, ¿a'ca'ii ti? itopi.

³⁸ —¿Onpo panta' ya'huëtinquëma'? Paatoma', ni'conco', itérin. Pa'sahuatona', ni'conpi.

—A'natérapoya pan, catoyachin sami, inaíchin ya'huëtincoi, itiipi.

³⁹ Itohuachinara, piyapi'sa' sha'huitérin pastoquë huënsécaiso'. ⁴⁰ A'naquën a'natérápo shonca, a'natérápo shonca, a'naquën pasa, pasa huënsépi. ⁴¹ Ina quëran a'natérapoya pan, catoya sami, inapita ma'parin. Inápaquë në'pétahuaton, Yosë nontérin. "Yosparinquën, Tata," itahuaton, pan së'panin. Ina quëran ca'tano'sanënpita quëtérin piyapi'sa' quëtacaiso marë'. Sami së'paninsonta' quëtéra'piapi. Inaíchin nipurinhue', ya'ipi piyapi ananitérin. ⁴² Ya'ipi piyapi'sa' natëaquë huaré' coshatopi. ⁴³ Ina quëran pan, sami, inapita pë'sotopiso' maantapi. Shonca cato' i'më' améntatopi. ⁴⁴ A'natérápo huaranca quëmapi'sa' naporo' coshatopi.

I aipi i'narinso'

(Mateo 14.22-27; Juan 6.16-21)

⁴⁵ Ina quëran ca'tano'sanënpita itapon: "Potiquë ya'conahuatoma', aquëtérän pac'o'. Apira canta' pa'sarahuë. Pitsaita'pa' pa'ahua'", itérin. Ca'tano'sanënpita nani pa'pachinara, piyapi'sa' nontarin ya'huépi'pa' paacaiso marë'. ⁴⁶ Nani nontohuachina, inaora pa'nin a'na motopia'huayaquë Yosë nontacaso marë'. ⁴⁷ Tashihuachina, ca'tano'sanënpitaso' potiquë pa'sapirinahuë', sono' huáncoanai' tashitopi. Quisososo' inaoraíchin quëparitérin. ⁴⁸ Ca'tano'sanënpita ya'ipi tashi' maitopirinahuë'. Ihuan nacapiatona', co nanitopihuë' chiníquën pacacaiso'. Canotopi huachi. Ina ni'sahuaton, co tahuëriyátérasohue', Quisoso pa'nin. I aipi i'narahuatón, no'pa pochin pa'tarin. Poti nani icantaponahuë', na'huëtatë pochin nisarin. ⁴⁹ I aipi pa'sarinso' quënanahuatona', pa'yanpi. "Hua'yan" ta'tona', "ëë" topirinahuë'. ⁵⁰ Ya'ipiya quëran ni'sahuatona', të'huatopi. Nipurinhue', a'naroáchin Quisosori itérin:

—Co'ta ca huë'sarahuë. Ama pa'yancosohue'. Chiníquën cancantoco', itérin.

⁵¹ Ina quëran potiquë ya'conapatérin. Ya'compachina, ihuan sanorin huachi. Ca'tano'sanënpita pa'yanpi: "¿Onporahuatóncha nanitaparin nicaya?" topi yonquiatona'. ⁵² Nani pan ana'atérinso' nicaponaraihuë', co ina yonquipihuë'.

Quinisariti parti pa'ninso'

(Mateo 14.34-36)

⁵³ Aquëtérän canconahuatona', Quinisariti parti nonshipi. Yonsanquë poti a'sonpi. ⁵⁴ Nonshiaso chachin, a'naroáchin piyapi'sari Quisoso nohuitopi. ⁵⁵ Manorahuatona', ya'ipi ina parti pa'sahuatona', pëiro'saquë pa'pi. Na'a cania'piro'sa' pë'sara'huayaquë quëpi anoyatacaso marë'. "Paséquë Quisoso ya'huarin," itohuachinara, inaqué quëpi. ⁵⁶ Intohuaso téranta' Quisoso pa'pachina, inatohua' cania'piro'sa' quëparapi. Nisha nisha ninanoquë pa'sarin. A'naquën pancana. A'naquën caraíchin piyapi ya'huépirinhuë', inséquësona pa'pachina, cachiquë cania'piro'sa' acopi. "Quëma a'moranso' huiroten téranta' së'huatona', noyachina'," tosapi. "Inta nipachin, së'huaina'," topachina, së'huapi. Insoarisona së'huahuachina', a'naroáchin noyatopi huachi.

7

Cotio mashocoro'sa' napopiso'

(Mateo 15.1-9)

¹ Ina quëran a'naquën parisioro'sa', cotio maistro'sa', inapita Quirosarin quëran o'mapi Quisoso natanacaiso marë'. ²⁻³ Quisoso ca'tano'sanënpita coshatasoi', quënanquipi. A'naquën co niopoimirataponaraihuë' coshatapi. Parisioro'saso' co'huara coshachatéraponahuë', pi'pian i'shaquë niopoimiratopi. Ya'ipi cotioro'sa' ina pochin yonquipi. "Co inapohuatéhuahuë', oshahuanarihua'," tècatona' napopi. Shimashonëna' inachintopiso' ni'ton, inapopi. ⁴ Mircatoquë pa'pi quëran yacoshatochuachinara, i'quë niopoimiratopi. Na'a nisha nisha inachintopisopita ya'huëtopi. Minéro'sa', i'sha ta'painano'sa', hua'na yonsharo'sa', pë'sararo'sa', inapita pa'mopi. ⁵ Napoaton parisioro'sa', cotio maistro'sa' inapitari Quisoso natanpi.

—¿Onpoatonta' Maistro quëma a'chintéransopitaso', co niopoimirataponaraihuë' coshatapi? Shimashonénpoa' inachintopirinahuë', inahuaso' co napopihuë', itopi.

⁶ —Co no'tequën iyaro'sa' yonquiramahuë'. “Yosë imarai,” topiramahuë', co imaramahuë'. Canpitaso' nonpinténquëma'. Iráca Yosë quiricanénquë Isaiasë no'tequën ninorinquëma':

“Isopita piyapi'saso' nanamëna quëran noya nontopirinacohuë', co cancanëna quëran imarinacohuë'.

⁷ ‘Yosë pënëntérinso' a'chinaraí, topirinahuë', inahuara yonquipiso' nia'chintapi. Napoaton topinan quëran chinotérinaco,’ ténin Yosë. Iráca Isaiasë ninshitaton, naporin. ⁸ Inapochachin canpitanta' Yosë pënëninfoaso' naniantahuatoma', piyapi'sa' a'chinpiso' natërama huachi, itérin.

⁹ Naquéranchin itantarín:

—Tehuénchachin Yosë pënëntérinso' a'porama' shimashonéma' napopiso' natëcamaso marë'. ¹⁰ Ni'co'. Moisésë iráca pënëntaton, naporin: “Tatama', mamama', inapita noya natëtoma', catahuaco'. Inso téranta pa'pina', a'shina' inapita co noyahuë yonquirapitona' no'huihuachina', tēpacó,’ ténin. ¹¹ Canpitaso nipurinhuë' nisha a'chinama'. A'chinatoma', naporama': “A'naquén nanitérin pa'pina', a'shina' apiratacaso'. Ma'sha ya'huëtérincoso' nani acorahuë Yosë quëta'huaso marë', topatéra, co tatama', mamama' inapita quëtacaso' ya'huérinhue', toconama'. Napoaton tatama', mamama' inapita ma'sha pahuantohuachinara, apiratatomá, co quëtéraramahuë'. ¹² “Co quëtacaso' ya'huérinhue', toconatomá, co catahuaramahuë'. ¹³ Ina pochin nia'chintatoma', co Yosë quiricanén natëramahuë'. Hui'namapitanta' a'chintérarama' inapochachin nicacaiso marë'. Inapochachin pochin na'con nisha nisha nia'chintérarama', itérin Quisosori.

Onporahuatéhuasona oshahuanéhuaso'

(Mateo 15.10-20)

¹⁴ Naquéranchin piyapi'sa' përasahuaton, a'chintantarin.

—Ya'ipinquëma' natanco no'tequën yonquicamaso marë'. ¹⁵ Co manta' ma'sha ya'huérinhue' nonënpoaqué ya'conahuaton, aoshahuaninfoaso'. Cancanénpoa quëran pipirinso' tēhuénchinsó' aoshahuaninfoa'. [¹⁶ Huératéhuapanatama', noya natanatomaco, yonquico', itérin.]

¹⁷ Nani a'chintohuachina, piyapi'sa' patahuaton, pëiquë ya'conconin. Ca'tano'sanénpitanta' ya'conpi. Nani ya'conpachinara: “Achin naporanso' co nitotérainhuë'. ¿Ma'ta' tapon naporan?” itopi.

¹⁸⁻¹⁹ —¿Co canpita téranta' nitochátéraramahuë' ti? Inta nipachin, a'chintanta'inquëma'. Nani ma'sha ca'néhuaso marë' co ina marë' oshahuanéhuahuë'. Co cosharo' cancanénpoaqué ya'coninhuë'. Chi'chirinaménpoaquë ya'conin. Ina quëran inquiantaré'. Napoaton ya'ipi cosharo' noya capacaso'. Coshatéréhuaso marë' co oshahuanéhuahuë', itérin. ²⁰ Ina quëran itaantarin:

—Cancanéma quëran co noyahuë' yonquihuatamara, co noyahuë' ninama'. Ina marë' oshahuanama'. ²¹ Acopo' cancanéma quëran co noyahuë' yonquiramasopita pipirin. Co noyahuë' yonquihuatama', monshihuanama', ihuatérama', tēpatérama'. ²² Nitéhuananpitérama'. Pa'yatacasoráchin cancantérama'. A'napita ma'shanën noyaparama'. Co noyahuë' ninama'. Nonpinama'. Nisha nisha co noyahuë' ninamasso' co yaa'poramahuë'. Apirarama'. Pinotérama'. “Caso' co a'napita pochinchohuë'. Noya noyaco,” toconama'. Co yonquinahuanhuë' ninama'. ²³ Co noyahuë' yonquihuatamara, ina pochin ninama'. Ina marë' oshahuanama', itérin Quisosori.

Nisha sanapi natëtérinso'

(Mateo 15.21-28)

²⁴ Ina quëran pipirahuaton, nisha piyapi'sa' ya'huépique pa'nin. Tiro, Siton, inapita ya'cariya paaton, a'na pëiquë ya'conconin. “Ama iséquë huë'nahuëso' a'napita

sha'huitocosohuë'," itopirinhue', a'naroáchin ya'ipi nahuinin. ²⁵⁻²⁶ Inaquë a'na sanapi ya'huérin. Co cotio sanapihuë'. Nisha piyapi. Siropinisia parti hua'huatérin. Hua'huinso' parisitárin. Sopairi ya'coancantérin ni'ton, co inaora yonquirinso' yonquirinhue'. Quisoso huë'nins' natantahuaton, paaparin. Paaparahuaton, Quisoso nantën pirayan isonconin.

—Hua'huahuë Sinioro parisitárin. Sopairi ya'coancantaton, chiníquën aparisitarin. Inquitoco, topirahuë', itiirin.

²⁷ —Ni'quë' imoya. Hua'huaro'sa' a'cahuatéra, co cosharonën osérétahuatë', ni'nira a'caréhuë'. Hua'huaro'sa'ton coshachin noya natëaquë huarë', itérin Quisosori.

²⁸ —Naporin mini Sinioro. Napoaponahuë', hua'huaro'sa' pi'pian téranta' atato-huachinara, ni'niraro'sarinta' capitérin ni'ton, quiyanta' catahuacoi topirahuë', itérin.

²⁹ —¡Naporinchi paya! Ma noya natéranco ni'ton, ya'huéranc'pa' paantaquë'. Nani sopai hua'huan quëran pipirin, itérin.

³⁰ Sanapiso pénénquë canconahuaton, hua'huin noya quëhuéánin quénanconin. Nani sopai pipirin huachi.

Né'huëro'sa' anatantérinso'

³¹ Quisoso Tiro quëran pipirahuaton, Sitontaquëchin na'huérin. Ina quëran Ticapor-isëquë canquirin. Inaso no'pa' Cariria sono yonsanquë ya'huérin. ³² Inaquë a'nara apia quëpi Quisosori anoyatacaso marë'. Noyá né'huérin. Naporahuaton, pa'pi icotë' ninin. "Iso quëmapi së'huaque' noyachin topiraihue'", itopi. ³³ Napotohuachinara, apiaráchin amashamiachin quëparin. Quëparahuaton, imirin quëran icarahuératérin. Ina quëran niipiimiratahuaton, nénérain së'huatérin. ³⁴ Inápaquë né'pétahuaton, sétérin quëran panca nii o'huarin. Ina quëran Yosë nontahuaton: "¡Ipata!" itérin. "¡Né'huéranso' inquiquë!" tapon napotérin.

³⁵ Naporor' né'huérinso' inquirin huachi. Nénérionta' noyatahuaton, noya nonin huachi. ³⁶ Quisosori piyapi'sa' pénénin: "Ama a'napita sha'huitocosohuë'", itérin.

Itopirinhue', piyapi'saso' pa'sahuatona', sha'huira'piapi. Na'con na'con pénénpirinhue', aquë aquëtë huarë' sha'huira'piapi. ³⁷ "¡Ma'pitacha Quisoso nitotérin paya! Né'huëro'sa' anoyatohuachina, noya natantopi huachi. Co nonpirinahuënta', a'naroáchin anoyatérin ni'ton, noya nonsapi. ¡Ya'ipichi noya ninin paya!" topi.

8

Cosharo' ana'atantarinson'

(Mateo 15.32-39)

¹ Naporor'tahuéri'sa' na'a piyapi'sa' niyontoantapi. Capa cosharo' nipachina, Quisosori ca'tano'sanënpita pérarin. Huë'pachinara, itérin:

² —Piyapi'sa' nosororahuë. Nani cara tahuéri natanarinaco ni'ton, co huachi manta' cosharo' ya'huëtopihuë'. ³ A'naquën áquë quëran huë'pi ni'ton, co topinan yaa'parahuë' tanari canahuachina', itérin.

⁴ —Capa pëiro'sa' iséquë. Notohuaro' piyapi'sa' ya'huapi. ¿Onpotahuatécha isonapo' piyapi a'carë paya? itopi ca'tano'sanënpitari.

⁵ Napotohuachinara, Quisosori natanin:

—¿Onpo panta' ya'huëterinquëma'? itohuachina:

—Canchisëyachin ya'huëterincoi, itopi.

⁶ Ina quëran piyapi'sa' sha'huitérin no'paquë huënsëcaiso'. Nani huënsëhuachinara, pan ma'patérin. "Yosparinquë, Tata," itahuaton, pan së'panin huachi. Së'panahuaton, ca'tano'sanënpita quëtérin piyapi'sa' quëtacaiso marë'. Ya'ipi piyapi'sa' quëtéra'piapi.

⁷ Caraíchin saminta' ya'huëtopi. Ina marënta' "Yosparinquë, Tata," itahuaton, ca'tano'sanënpita sha'huitérin piyapi'sa' quëtacaiso'. ⁸ Nani quëtohuachinara, natëaquë huarë' coshatopi. Pë'sotopisonta' masahuatona', canchisë i'më' amëntatopi. ⁹ Catapini

huaranca piyapi'sa' pochin coshatopi. Nani coshatohuachinara, piyapi'sa' nontérin pacacaiso marë'. ¹⁰ Nani nontohuachina, potiquë ya'conin. Ca'tano'sanënpitarë' pa'sahuatona', Tarmanota parti chinpiconpi.

Sacai' nininso' nicacaso' nohuantopiso'

(Mateo 16.1-4; Lucas 12.54-56)

¹¹ Inaquë parisioro'sa' huë'sahuatona', Quisoso nontiipi atëhuëcaiso marë'. "Yosë a'paimahuachinquën, sacai' nininso' niquë' quiyanta' nicatëinquën natëiinquën," itopirinahuë'. ¹² Chiniquën sétaton, itapon:

—¿Ma'marëta' yani'nama'? "Sacai' nininso' niquë' ni'iinquën," itopiramacohuë', co Yosë nohuantérinhuë' a'nota'huanquémaso', itérin.

¹³ Ina quëran potiquë ya'coantarahuaton, aquëtérán paantarin.

Parisioro'sa' yanonpimpiso'

(Mateo 16.5-12)

¹⁴ Pëntonpirinahuë', ca'tano'sanënpita naniantopi cosharo' quëpacaiso'. A'naíchin pan potiquë ya'huëtopi. ¹⁵ Quisosoriso nipurinhuë' pënënarin:

—Ni'cona iyaro'sa'. Pan ahuëpocatérinso pochin parisioro'sa' ya'huëtopi. Irotisé imapisopitanta' ya'huëtopi. Ama iyaro'sa' ina nohuantocosohuë', itérin.

¹⁶ Natanaahuatona', ca'tano'sanënpita capini ninontapi. "Capa pan. Co ya'huëtérinpoahuë'. Napoaton naponontérinpoa'," nitopi.

¹⁷ Ninontopiso' nitotaton, Quisosori itapon:

—¿Onpoatonta "capa pan," toconama'? ¿A'chintápiranquëmahuë', co ipora huanta' yonquiyátëramahuë ti? ¿Co natantochináchinhue' cancantërama' nica? ¹⁸ Noya natanapomarahuë', ¿onpoatomata' co yonquiramahuë'? Nicapomarahuë', ¿onpoatomata co natëtëramahuë'? ¹⁹ I'hua chachin a'natërapoíchin pan nipurinhuë', a'natërapo huaranca piyapi'sa' ananitërahuë. ¿Onpo i'mëta' naporo' pë'sotopiso' amëntatërama'? itérin.

—Shonca cato' i'më', itopi.

²⁰ —Panso' canchisëíchin nipurinhuë', catapini huaranca piyapi ananitahuato, ¿onpo i'mëta' pë'sotopiso'? itaantarin.

—Canchisë i'më', itopi.

²¹ —Napoaton co pan yonquiato, pënënararanquémaso', ¿Co nitochátëramahuë' ti? itérin Quisosori.

Somaraya anoyatërindo'

²² Ina quëran Pitsaitaquë chinpiconpi. Inaquë somaraya nininso' Quisosoquë quëpi. "Së'huauquë' Sinioro noyachin," itopi. ²³ Itohuachinara, maimirarahuaton, ninano aipiran quëparin. Iroiquë pashirayatérin. Nani së'huarayarahuaton:

—¿Ma'ta' iyasha quënanan? itérin.

²⁴ —Piyapi ni'pirahuë', co a'ninquëchin ni'nhahuë'. Pa'sapirinahuë', nararo'sa pochin ni'nhahuë, itérin.

²⁵ Naquëranchin së'huarayantahuachina, noya ni'térin. Nani noyatérin ni'ton, ya'ipi a'ninquëchin quënanin huachi.

²⁶ —Ya'huëran'pa' iyasha no'tëequë'. Ama ninanoquë paquësuhuë', itérin Quisosori.

Pitro natëtërindo'

(Mateo 16.13-20; Lucas 9.18-21)

²⁷ Ina quëran Quisoso paantarahuaton, Sisaria Pinipi parti pa'sarin nisha nisha ninanoquë a'chinacaso marë'. Papon pochin, ca'tano'sanënpita itapon:

—Nani ma'sha nanitaparahuë ni'to, ¿in pochinta piyapi'sa' cancantiarinaco? itérin.

²⁸ —Nisha nisha yonquirapirinënquën. "Coansha Paotistaco' nanopiantarinso' ni'ton, naporin," topi a'naquën. "Co inahuë'. Iniaséco' nanopiantamara," topi a'naquëonta'. "Ninotona'pi iráca chiminpirinhuë', nanopiantarinso' nimara," topi a'napitanta', itopi.

- 29 —Canpitaso nimirinhue', ¿ma'ta' yonquirama? itérin.
 —Quëmaso' Cristo, Yosë chachin a'paimarinquën, itérin Pitrori.
 30 —Ama ina a'napita sha'huitocosohue', itérin Quisosori.

*Chiminacaso' ninorinso'
(Mateo 16.21-28; Lucas 9.22-27)*

- 31 Naporó quëra huaré' chiminacaso' ninoton, ca'tano'sanënpita sha'huitérin.
 —Yosë quëran quëmapico nimirahuë', na'con parisita'huaso' ya'huérin. Cotio an-siano'sa', corto hua'ano'sa', cotio maistro'sa', inapita co huachi nohuantarinaracohue'. Tëpararinaco. Chiminaporahuë', cara tahuëri quëran nanopiantarahuë, itérin Quisosori. 32 No'tequën sha'huitochinarin. Ina natanahuaton, Pitrori amashamiachin quëparahuaton:
 —¡Ama, Sinioro, napoquësuhue'! itérin. 33 Quisososo nimirinhue' tahuérerahuaton, ya'ipi ca'tano'sanënpita ni'sarin.

—¡Ta'tequë' iyasha! Sopai nohuanton, napotérando. Co Yosë pochin yonquiranhue'. Piyapinquën ni'ton, quëmaora nohuantéransoachin yonquiran, itérin.

34 Na'a piyapi'sa' ya'cariya huaniapi.
 —Amashamiachin huëco' iyaro'sa', a'chinchinquëma', itohuachina, huë'pi natanacaiso marë'. Ca'tano'sanënpitanta' natanapi.

—Yaimapatamaco, campitaora nohuantéraramaso' naniantoco'. Yosë no-huantérinsoráchin imaco huachi. Corosèquë chiníquën parisitérë'. Inapochachin canpitanta' parisitapomarahuë', imamiatoco. 35 Noya nanopicamasoráchin yonquihuatama', topinan quëran nanoparama'. A'na tahuëri chiminpatama', parisitomiatarama'. Nimirinhue', casáchin yonquihuatamaco, noya nanan a'chinamaso marë' parisitapomarahuë', co topinan quëran nanoparamahuë'. Yosë'pa' nanopimiatarama huachi. 36 Ya'ipi ma'sha isoro'paqué canapiramahuë', co hua'yanëma' cha'ëpacinhue', topinan quëran napoarama'. 37 ¡Onponta' pahuérëtapiramahuë', co huachi hua'yanëma' nanitarinhue' cha'ëcaso'! 38 Ipora tahuëri'sa' ya'huëpisopita co noyahue' nipi. Nitëhuananpitopisopita pochin cancantopi. Tapayatomaco a'pohuatamaco, a'na tahuëri carimanta' tapayatënquëma', a'poaranquëma'. Nanamëhuë a'pohuatama', carimanta' o'mantahuato, a'poaranquëma'. Yosë quëran quëmapico ni'to, a'na tahuëri o'mantararahuë. Tatahuë pochin huënaratahuato, noya anquëniro'sapitaro'co o'mantararahuë, itérin.

9

1 Ina quëran itaantarín:
 —Tëhuëncachin iyaro'sa' Yosë isoro'pa' hua'anëntapon. Chiníquën nanantaton hua'anëntapon, ni'sarama'. A'naquëma' co'huara chimiyantërasëñquëmahuë', ni'sarama', itérin.

*Quisoso nisha pochin ya'norinso'
(Mateo 17.1-13; Lucas 9.28-36)*

2 Saota tahuëri quëran Quisoso motopiquë pa'nin. Pitro, Santiaco, Coansha, inapitaráchin quëparin. Inapita nicasoi', nisha pochin ya'norin. 3 A'morinso' huënaráchin huënaráchin ninin. Co inso téranta' nanitérinhue' pë'sainaton, ina pochin huiríchin aco-caso'. Huirí huiríchin inaso'. 4 A'nanaya Iniasë, Moisësë, inapita quënanpi. Iráca ayapirinahuë', Yosë nohuanton ya'noantapi. Quisosorë' ninontapi. 5-6 Ina ni'sahuatona', Pitro, Santiaco, Coansha, cara chachin pa'yanpi. Na'con pa'yanaton, Pitrori itapon:

—¡Ma noyacha Maistro iséquë huë'nëhua paya! Cara imënamëa'huaya nii, topirahuë', a'nara' quëma marë', a'nanta' Moisësë marë', a'nanta' Iniasë marë', itérin. Napoaponahuë', co yonquiatonhuë' naporin.

⁷ Naporo' chitorori imotërin. Chitoro' huáncana quëran Yosëri sha'huitérinso' natanpi. "Isoso' ca hui'nahuë, na'con nosororahuëso'. Ina natanco'," itérin. ⁸ Napotoso chachin ca'tano'sanënpitari ni'sapirinahuë', co a'napitaso' quënanpihuë'. Quisosoráchin quënanpi.

⁹ Motopi quëran nohuaramapona pochin, Quisosori itérin: "Achin ni'namaso' ama insonta' sha'huitocosohuë'. Yosë quëran quëmapico ni'to, a'na tahuëri nanopiantarahuë. Naporo huarë' a'napita sha'huitoco'," itérin. ¹⁰ Napoaton co insonta' sha'huitopihuë'. Inahua capini ninontapi. "¿Onporahuatonta' nanopiantaponso?" nitopi. ¹¹ Achin Iniasë quënanpi ni'ton, inanta' yonquiapi.

—Pi'pian Sinioro yanatanainquën. Cotio maistro'sa' Yosë quiricanën a'chinpachinara, napopi: "Co'huara Cristo o'mayatérasohuë', Iniasë'ton huëantarín," topi. ¿Onpoatonta' napopi? itopi.

¹²⁻¹³ —No'tequen napopi. "Yosë nanamëñ ayonquiantacaso marë' huëantapon," ténin pénentona'pi. Naporinso chachin. Nani mini huëantapirinhuë', co nohuitopihuë'. Co yanatanatonahuë', inahuara yonquinëña quëran no'huipi. Yosë quiricanënquë naporinso chachin nitopi. Canta' Yosë quëran quëmapico naporahuë', inapochachin no'huiarinaco. Aparisitarinaco. Yosë quiricanënquë iráca ninorin ni'ton, parisita'huaso' ya'huérin, itérin Quisosori.

Hua'huasha hua'yantérinso' (Mateo 17.14-21; Lucas 9.37-43)

¹⁴ Ina quëran motopi quëran nohuaramarahuatona', a'napita ca'tano'sanënpita quënanquimantapi. Cotio maistro'sarë' chiniquen ninontapi. Na'a piyapi'sa' yamorapi ni'quimapi. ¹⁵ Quisoso quënanahuatona' ya'ipiya quëran ta'arë'nachin nacapipi. Pa'yatatona: "Ihuata Maistro," itoonpi.

¹⁶ Ina quëran Quisosori natanin:

—¿Ma'ta' ninontapiramahuë? itérin. ¹⁷ A'na quëmapiri itapon:

—Hui'nahuë Maistro quënhahuë, anoyatoco topirahuë'. Sopairi ya'coancantërin ni'ton, co huachi nanitérinhuë' nonacaso'. ¹⁸ Inséquësona sopairi mapachina, no'paquë nitë'yatahuaton, sa'po sa'po niconin. Ninaquërarahuaton, pacororárin. Ca'tano'sanënpita natanpirahuë' inquitacaiso marë', co nanitopihuë', itérin.

¹⁹ —¡Ma'huantacha ninama paya! Canpitaso' co Yosë natëramahuë'. Co natan-tochináchinhuë' cancantërama'. Nani hua'qui' a'chintopiranquëmahuë', ¿onporo huarëta' yanatéraramaco? Hua'huasha quëshico, itérin Quisosori.

²⁰ Napohuachina, quëshipi. Quisoso quënanahuatón, sopai no'huitaton, hua'huasha ahua'yantérin. No'paquë atatahuatón, asocoro asocorotarin. Sa'po sa'po niconin.

²¹ —¿Onporo quëran huarëta' hui'nan naporin? itérin.

—Hua'huatapon quëra huarë' naporin. ²² Na'aro' pénquë sopairi të'yatérin. I'quënta' të'yatérin tëpacaso marë'. Nosorocoi, Sinioro. Nanitohuatan, anoyatéquë', itérin.

²³ —"Nanitohuatan," ¿itéranco ti? Yosë natëhuatéra, ya'ipiya nanitapare', itérin Quisosori.

²⁴ —Téhuëñchachin Sinioro natëpiranquënhuë'. ¡Catahuaco noya noya natëinquën! itaan-tarin pa'pini.

²⁵ Na'a piyapi'sa' niyontonquirapi ni'sahuaton, a'naroáchin sopai itapon:

—Quëmaso' sopainquën. Piyapi ya'coancantohuatana, anë'huérán. Napoaton carin-quën napotaranquën. Iso hua'huasha quëran pipirahuatón, ama huachi onporonta' ya'coancantantaquësuhuë', itérin.

²⁶ Napotohuachina, Sopai chiniquen "yai" tahuatón, hua'huasha ahua'yantaantarin. Inapotahuatón, chimipi pochin patérin. Napoaton: "Nani chiminin," topirinahuë',

²⁷ Quisosori maimirarahuatón, opatohuachina, huanirin huachi.

²⁸ Ina quëran Quisososo' ca'tano'sanënpitarëachin pëiquë ya'conconpi.

—¿Onpoatonta' Maistro quiyariso' co nanitérainhuë' inquita'huaiso'? itopi.

²⁹ —Isanpi sopaiso', sacai' inquitacaso'. Chiníquën Yosë nontaquë huarë', inquitérë', itérin Quisosori.

*Chiminacaso' ninoantarinso'
(Mateo 17.22-23; Lucas 9.43-45)*

³⁰ Ina quëran paantarahuatona', Cariria parti pa'sapi. “Ama huë'nahuëso' piyapi'sa sha'huitocosohuë'”, ténin Quisoso. ³¹ Ina quëran ca'tano'sanënpita a'chintaton, napotérin:

—Yosë quëran quëmapico nipayahuë', piyapi'sa' masarinaco. Sha'huirapihuachinco, masarinaco. Mapachinaco, têpararinaco. Chiminaporahuë', cara tahuëri quëran nanopiantarahuë, itérin. ³² Natanaponaraihuë', co natëtacaiso' nanitopihuë'. “¿Onpoatonta' ina pochin nontérinpoa'?” topi yonquinëna quëran. Naporahuaton tê'huataton', co nohuantopihuë' natanacaiso'.

*Chini chiníquën nanantérinso'
(Mateo 18.1-5; Lucas 9.46-48)*

³³ Ina quëran Capinaomoquë canconpi. Pëiquë ya'compachinara, ca'tano'sanënpita itapon:

—¿Ma'ta' iraquë huëcapoma pochin ninontérirama'? itohuachina, ³⁴ co manta' topihuë'. “¿Inquënpoacha ipora chini chiníquën nanantarihua nicaya?” nitopi ni'ton, co yasha'huitopihuë'. ³⁵ Napoaton inaquë huënsërahuaton:

—Huëco' iyaro'sa' shonca catonquëma chachin natanquico pënëinquëma'. Inquëmasona' chini chiníquën nanantamaso' nohuantohuatama', topinan piyapi pochin canticatoma', ya'ipi piyapi'sa' catahuaco', itérin.

³⁶ Ina quëran hua'huasha maimirarahuaton, huancánachin ahuanirin. Ina iporahuatón, ca'tano'sanënpita itapon:

³⁷ —Ca imaramaco ni'ton, hua'huasha téranta' nosorohuatama', nosoroaramaco canta'. Nosorohuatamaco, co casáchin nosoroaramacohuë'. Yosënta' nosoroarama'. Inaso' isoro'paquë a'paimarínco, itérin.

*Yosëri acanarinso'
(Mateo 10.42; Lucas 9.49-50)*

³⁸ A'na tahuëri Coanshari itapon:

—A'na quëmapi, Maistro, ni'nai. “Quisoso nanan quëtérinco,” ta'ton, sopairo'sa' a'pararin. Inaso nipayahuë', co quiya pochin imarinquënhuë' ni'ton, co nohuantérainhuë'. “Ama inapotéquësuhuë'”, itérain, ténin.

³⁹ —Tananpitoco' iyaro'sa'. “Quisoso nanan quëtérinco,” ta'ton piyapi anoyato-huachina, inaso' noya. Co sha'huirapiincoso' nanitaponhuë'. ⁴⁰ Insosona co inimicotohuachinpoahuë', catahuarinpoa'. ⁴¹ Caso Cristoco. Imaramacoso marë' piyapi catahuahuachinquëma', Yosë nitotérin. Isha téranta' o'shitohuachinënquëma', ina marë' a'na tahuëri acanaarin. Téhuëñchachin noya i'huérëtarin, itérin Quisoso.

*Anishacancantérinso'
(Mateo 18.6-9; Lucas 17.1-2)*

⁴² Ina quëran itaantarin: “Hua'huasha natérincoso' anishacancantohuatama', Yosë chiníquën ana'intarinquëma'. A'naquëonta' imasapirinacohuë', co chiníquën cancanchatérapihuë'. Inapitanta' anishacancantohuatama', Yosë ana'intarinquëma'. Co'huara inapita anishacancanchatérapihuë', pancara'piquë a'sonconotahuaténenquëma', marëquë tê'yaitérinënquëma' naporini, noya noya niitomahuë'. Piyapi anishacancantacaso', pa'pi co noyahue' ténahuë. ⁴³⁻⁴⁴ Ma'sona téranta' iyaro'sa' anishacancantohuachinquëma', a'poco'. Iso pochin yonquico'. A'na imirama quëran co noyahue' nipatama', oshahuanama'. Ninishitëimiratérama' naporini, tantoimiraya nipomarahuë', Yosë'pa' pa'itomahuë'. Cato imirarë'quëma

chachin parisitopiquë pa'patamaso', pa'pi co noyahuë' nisarama'. Inaquëso' pën co onporonta' tacopiarinhuë'. ⁴⁵⁻⁴⁶ Nantëma' ya'huëtérinquëma' iratacaso marë'. Nipirinhuë', ma'sona marë téranta' co noyahuë' yonquiatoma', iratohuatama', na'con oshahuanama'. Ninishitérantétërama' naporini, noya noya niitonhuë'. Tantorantë' nipomarahuë', Yosë'pa' pa'itomahuë'. Catorantë're'quëma chachin parisitopiquë pa'patamaso', pa'pi co noyahuë' niitonhuë'. ⁴⁷ Ya'piramanta' ya'huëtérinquëma' noya ni'tacaso marë'. Nipirinhuë', ya'pirama quëran quënanatoma' co noyahuë' yonquihuatama', oshahuanarama'. Ya'pirama' ocoirama' naporini, a'na quëran somaraya nipomarahuë', Yosë hua'anëntérinquë pa'itomahuë'. Cato quëran chachin ni'tapomarahuë', parisitopiquë tē'yatohuachinquëma', pa'pi co noyahuë' nisarama'. Ma'sona téranta' anishacancantuohuachinquëma', a'naroáchin naniantoco' ama parisitopiquë paacamaso marëhuë'. ⁴⁸ Inaquë chiníquën parisítápoma'. Co shonaro'sa téranta' chiminaponhuë'. Pën co onporonta' tacopirarinhuë'.

⁴⁹ Pënquë ahuiquitérëso pochin Yosëri ya'ipi piyapi'sa' téniarin noya noya cancantacaiso marë'. ⁵⁰ Yamora noya acashicaso' niponahuë', chiminpachina co huachi noyatérinhuë'. Canpitaso nipirinhuë', yamora cosharo' noya acashirinso pochin nico'. Noya nini'toma', ya'huëco!', itérin.

10

Sa'ahuano'sa' pënéninso'

(Mateo 19.1-12; Lucas 16.18)

¹ Capinaomo quëran pipirahuaton, Cotia parti paantarin. Naporahuaton, Cor-tanii' aquétérän pa'nin. Inaquë naquéranchin na'a piyapi'sari huëcapaipi. Quisosori a'chintantarín. Nani tahuëri huë'pachinara, noya a'chintarin. ² Parisioro'santa' Quisoso ya'carirahuatona', atëhuëcaiso marë' natanquipi:

—¿Noya ipora sa'anpo' tē'yatacaso' ti? itiipi.

³ —¿Ma'ta' iráca Moisësë pënëntérin? itérin Quisosori.

⁴ —“Sa'anpo' yatë'yatohuatëra, coisëquë aninshitérë': ‘Nani sa'ahuë tē'yatarahuë,’ ta'caso' aninshitérë'. Ina quëran noya tē'yatacaso huachi,” ténin Moisësë, itopi.

⁵ —Co tē'yatacaso' pënéninquëmahuë'. Canpitaso' co natantochináchinhuë' cancantërama' ni'ton, Moisësë napopénéninquëma'. ⁶ Napoaponahuë' ya'nan piyapi nicapon, cato' piyapiíchin Yosëri ninin. A'na quëmapi, a'na sanapi, inaíchin ninin. ⁷ Napoaton quëmapi sa'apachin, pa'pin, a'shin, inapita patahuaton, sa'inë' nichinpitacaso' ya'huërin. ⁸ Cato' piyapi nipirinhuë', a'naíchin pochin nipi. Catoya'pi nipirinhuë', a'naíchin pochin Yosëri ni'nin. ⁹ Nani Yosëri asë'quërin ni'quëhuarë', co onporonta' sa'ama' tē'yatamaso' ya'huërinhuë', itérin Quisosori.

¹⁰ Nani pëiquë ya'compachina, naquéranchin ca'tano'sanënpitari itapona':

—Achin naporanso' a'chintantacoititochii, itopi.

¹¹ —Sa'ama' tē'yatatomá', a'na sanapi mapatama', inaso' co sa'ama chachinhuë' ni'ton, monshitérmaso pochin Yosëri ni'nin. Ina marë' oshahuanarama'. ¹² Inapochachin sanapi'santa', so'in ta'anapirahuaton, a'na quëmapi so'yatohuachin, inaso' co so'inhue'. Monshin pochin Yosëri ni'sarin. Ina marë' oshahuanarin, itérin.

Hua'huaro'sa marë' Yosë nontérinso'

(Mateo 19.13-15; Lucas 18.15-17)

¹³ Ina quëran hua'huaro'sa' quëpi Quisosori së'huamotocaso marë'. Inapotahuaton, inapita marë' Yosë nontérin. Hua'huaro'sa' quëpisopita ca'tano'sanënpitari yaa'papirinahuë'. ¹⁴ Ina ni'sahuaton, Quisosori co noyahuë' ni'nin.

—Tananpitoco' iyaro'sa' hua'huaro'santa' huë'ina'. Ama a'pacosohue'. Hua'huaro'sa pochin cancantopisopita Yosë hua'anëntérinquë ya'conapi. ¹⁵ Téhuëñchachin carinquëma'

itaranquëma', hua'huaro'sa' a'naroáchin yaimarinaco. Co'so' inapita pochin cancanto-huatamahuë', co onporonta' Yosë hua'anëntérinquë ya'conaramahuë', itérin.

¹⁶ Ina quëran hua'huaro'sa' iporin. Së'huamotorahuaton, inapita marë' Yosë nontërin noya ya'huëcaiso marë'.

Ma'huan yaimarinso'

(Mateo 19.16-30; Lucas 18.18-30)

¹⁷ Ina quëran Quisoso yapaantarapirinhue'. A'nara quëmapi ta'aquirahuaton, ison-quirin.

—Quëmaso' Maistro noyanquën. ¿Ma'ta' caso' onpo'i nanopimiata'huaso marë'? Sha'huitoco canta' noya nii, itiirin. ¹⁸ —¿Ma'marëta' "Quëmaso' noyanquën" itéranco? Yoséíchin noyaso'. ¹⁹ Iráca pënëntérinso' nani nitotëran. "Ama piyapi tëpacosohue'. Ama nitëhuananpitocosohue'. Ama ihuatocosohue'. Ama ninonpinapicosohue'. Ama nonpincosohue'. Tatama' natëco'. Mamamanta' natëco'," ténin Yosë pënëntaton, itérin Quisosori.

²⁰ —Co manta' Maistro onporahuë'. Hua'huatapo quëran huarë' ya'ipi inapita natërahuë, itérin.

²¹ Ina natanahuaton, nirayarin. "Tëhuëñchachin noya yonquirin," ta'ton nosororin.

—Isonta' iyasha Yosë nohuantërin ta'a. Paqué'. Ya'ipi ma'shanënpita pa'anahuaton, coriqui canaranso' sa'ahuaros'a' quëtëquë'. Ina quëran huëquë' imaco huachi. Inapohu-atan, a'na tahuëri Yosë'pa' canamiataran, itérin.

²² Ina natanahuaton, co huachi noyahue' cancantërin. "Hua'huayatërahuë' ma'sha ya'huëtérinco," ta'ton sëtérin. Sëtaton, pa'nin huachi.

²³ Ina quëran Quisosori ca'tano'sanënpita ni'sahuaton, itapon:

—Pa'pi sacai ma'huano'sa' Yosë hua'anëntérinquë ya'conacaiso', itérin.

²⁴ Ina natanahuatona': "¡Ma'pitacha naporin paya!" nitopi ca'tano'sanënpita.

—Tëhuëñchachin iyaro'sa' ma'sharáchin yonquihuatëra, sacai' Yosë hua'anëntérinquë ya'conacaso'. ²⁵ Ni'co'. Nahuan huëratën pi'pira'huaya naninëñ ya'huëtérin. Camiyoso panca masho ni'ton, co pi'pisha térranta' nanitërinhue' inaquë ya'conacaso'. Ina quëran saca sacai' ma'huano'saso' Yosë hua'anëntérinquë ya'conacaiso', itaantarín.

²⁶ Ina natanahuatona', pa'yanpi:

—Napoahuarë', ¿incha nica cha'ëre'poya? nitopi. ²⁷ Ya'ipiya notëërahuaton, Quisosori itapon:

—Co insonta' inaora nanitërinhue' cha'ëcaso'. Yoséíchin nanitërin anoyacancantin-quëmaso'. Ya'ipiya nanitaparin, itérin.

²⁸ —Ni'quë' Maistro. Quiyaso' nani ya'ipi ma'shanëhuëi huëshirahuatoi, imarainquëñ, itérin Pitrori.

²⁹ —Tëhuëñchachin iyaro'sa' imamacoso marë' nani ma'sha patohuatama', na'con na'con Yosë catastuarinquëma', ténahuë. A'naquëma' mini nanamëhuë a'chinacamaso marë' co huachi ya'huëmiataramahuë'. A'naquëma' pëinëma', iyaparima', oshiparima', tatama', mamama', hui'nama', no'panëma', inapita patërama'. ³⁰ Ca imamacoso marë' napohuatama', Yosë na'con na'con quëtantarinquëma'. Isoro'paqué chachin pasaro' aquëtë pochin pëiro'sa', iyaro'sa', oshiro'sa', mamaro'sa', hua'huaro'sa', no'paro'sa' inapita quëtarinquëma'. Noya cancantarama'. Napoaponahuë', aparisitarinëñquëma anta'. A'na tahuëriso huachi Yosë'pa' nanopimiatarama'. ³¹ A'naquëñ ipora chiníquëñ nanantopirinahuë', a'na tahuëri topinan piyapi pochin nisapi. A'naquëñso niperinhuë', ipora topinan piyapi pochin nicaponahuë', a'na tahuëri chiníquëñ nanantapi, itérin Quisosori.

Chiminacaso' sha'huiantarinso'

(Mateo 20.17-19; Lucas 18.31-34)

³² Ina quëran ira pa'tahuatona', Quirosarin'pa' paantarapi ni'ton, ca'tano'sanënpita pa'yanpi. Imapisopitanta' tē'huatopi. Quisososo nipurinhue', quëchitérarin. Naquéranchin ca'tano'sanënpita amashamiachin quëparahuaton, ma'sona onpocaso' sha'huitaantarin.

³³ "Noya iyaro'sa' natanco'. Iporaso' Quirosarin'pa' pa'saréhua'. Inatohua' nani ma'sha onpotarinaco. Yosë quëran quëmapico nipurahuë', inaquë sha'huirapiarinaco. Corto hua'anosa', cotio maistro'sa', inapita masahuatonaco, 'Tépacaso' ya'huérin,' tosapi. Ina tosahuatona', nisha piyapi'saquë yo'coaninaco tēpainacoso marë'. ³⁴ Inapita tēhuarahuatonaco, ipitarinaco. Chiníquën huihuiarinaco, pë'shararinaco. Ina quëran tēpararinaco. Chiminaporahuë', cara tahuëri quëran nanopiantarahue," itantarín.

Santiaco, Coansha, inapita nohuantopiso'

(Mateo 20.20-28)

³⁵ Ina quëran Santiaco, Coansha, inapita Quisoso huëcapaipi. Sipitio hui'ninpita inahuaso'.

—Pi'pian Maistro natainquën, topiraihuë', itopi.

³⁶ —¿Ma'ta' iyaro'sa' nohuantërama'? itérin.

³⁷ —A'na tahuëri noya noya hua'anentaran. Hua'an ya'conpatan, chiníquën nanan quëtoco. A'naso' quëma inchinan quëran ahuënsëquë', a'nanta' ahuënan quëran ahuënsëquë', topiraihuë', itopi.

³⁸ —Canpitaso' co no'tequën yonquiáteraramahuë'. Co ya'ipi nitochátéraramahuë'. Chiníquën iyaro'sa' parisitarahuë. Main o'orëso pochin pa'pi parisitarahuë. I'quë ya'coitérëso pochin aparisitarinaco. Canpitanta' aparisitohuachinënquëma', ¿ahuantapoma' ti? itérin.

³⁹ —Ahuantarai, itopi cato chachin.

—¡Naporinchi paya! Ca pochin mini canpitanta' main o'orëso pochin parisitarama'. I'quë ya'coitérëso pochin parisitarama'. ⁴⁰ Napoaponahuë', co caso' nanitërahuë' chiníquën nanan quëta'huanquëmaso'. Tata Yoséichin nanitérinso'. Inari nohuantërinsopita inchinanëhuë quëran ahuënsëarin. Nani inapita marë' taparin huachi, itérin.

⁴¹ Chiníquën nanan nohuantopiso' natanaahuatona', a'napitariso' no'huipi.

⁴² Quisososo nipurinhue', ya'ipi ca'tano'sanënpita përasahuaton, pënénin.

—Co Yosé imapisopitahuë' chiníquën nanantacaiso' pa'yatopi. Hua'an ya'conpachinara, chiníquën nanantatona', yacamaitopi. Piyapinënpitanta' aparisitopi.

⁴³ Canpitaso nipurinhue', ama inapita pochin cancantocosohue'. Yosë hua'anentérinquë ya'conpatéra, co chiníquën nanantacaso' nohuantërehue'. Noya noya yanipatama', ya'ipi piyapi'sa' catahuaco'. ⁴⁴ Topinan piyapi pochin cancantoco'. Catahuacasoáchin yonquiuhuatama', Yosë noya nicaténquëma', chiníquën nanan quëtarinquëma'. ⁴⁵ Canta' Yosë quëran quëmapico nipurahuë', co a'napita camaica'huaso marë' o'marahuë'. Piyapi'sa' catahuaca'huaso marë' o'marahuë. Chiminarahuë na'a piyapi'sa' nicha'ëca'huaso marë', itérin Quisosori.

Somaraya anoyatérinso'

(Mateo 20.29-34; Lucas 18.35-43)

⁴⁶ Ina quëran paantarahuatona', Quiricoquë canconpi. Ca'tano'sanënpitarë chachin pipihuachinara, na'a piyapi'sarinta' imasapi. Naporo' a'na somaraya ira yonsanquë huënsëarin quënanconpi. Timio hui'nin ni'ton, Partimio itopi. Somaraya ni'ton, nani tahuëri coriqui topinan ma'patárin. ⁴⁷ "Quisoso Nasaritoquë ya'huérinso' huë'sarin," topi, natantérin. Ina natantaton:

—¡Nosoroco Sinioro! Quëmaso' Tapico' shinquën ni'ton, nosoroco canta', itérin chiníquën nontaton.

⁴⁸ A'napitari natanaahuatona', no'huipi.

—Ta'tequë', itopirinahuë', aquë aquëtë chachin chiníquën nontatarin.

—¡Nosoroco canta'! Quëmaso' Tapico' shinquën ni'ton, onpopionta' nosoroco, itantarín.
 49 Quisoso'so' natanahuaton, chiniconin:
 —Sha'huitoco' huë'in, itérin. Napotohuachina, sha'huitopi.
 —Noya cancantéquë' iyasha. Nani pérarinquën ni'ton, Quisoso nontiiquë', itopi.
 50 A'morinso' të'yatahuaton, a'naroáchin Quisosoquë pa'nin.
 51 —¿Ma'ta' iyasha, onpochinquën? itérin Quisosori.
 —Anoyerayatoco Maistro canta' noya ni'tanta'i, itérin.
 52 —Inta nipachin, noya paqué'. Natéranco ni'ton, carinquën anoyataranquën, itérin.
 Napotohuachina, noya ni'térin. Noyatahuaton, Quisoso imarin.

11

Quirosarinquë canconinso'

(Mateo 21.1-11; Lucas 19.28-40; Juan 12.12-19)

1 Quirosarinquë ya'caritohuachinara, Pitipaqui'pa' canconipi. Ina ya'cariya Pitania ya'huérin anta'. Oripose panénquë canconahuaton, cato' ca'tano'sanën sha'huitahuaton, a'parin.

2 —Paso' ninanoquë paco'. Canconpatama', a'nara' mora hui'napishin a'sonpinan quénanconarama'. Co incari téranta' huënséchátérarinhue'. I'quiritahuatoma', quéshico.

3 “¿Onpotaomata' i'quiritarama?” itohuachinéñquëma': “Siniorori nohuantérin. Apira iséquë acoquiantarai,” itoco', itérin Quisosori.

4 Pa'sahuatona', mora a'sonpinan ya'coanaquë quénanconipi. Cachi yonsanquë huani-rarin. Quénanahuatona', i'quiritonpi.

5 —¿Onpotaomata' moraso' i'quiritarama? itopi inaquë ni'sapisopitari.

6 “Siniorori nohuantérin,” itohuachina: “Inta nipachin, quépaqué’,” itopi.

7 Napotohuachinara, Quisosoquë quépi. A'mopiso' masahuatona', mora aipi huëtopi. Nani huëtohuachinara, ina aipi Quisoso huënsérahauaton, pa'sarin. 8 Na'a piyapi'sa' quéchitahuatona', cachiquë a'mopiso' huëtapi. A'napitanta', panpë mono pochin nininsopita nishítetahuatona', no'paqué huëtérantapi. Inataquéchin Quisoso pa'sarin huachi.

9-10 Piyapi'sa' quéchitérapi. A'naquéonta' Quisoso imasapi. Ya'ipi piyapiri pa'yatatona', chiníquën nonsapi.

—¡Nichá'ëcoi Tata Yosë! ¡Ma noyacha Quisoso paya! Tapico' shiin inaso'. ¡Quémari chachin chiníquën nanan quétéreran! ¡Quéma nohuanton, israiro'sacoi hua'anéntarincoi! tosapi.

11 Quirosarinquë canconahuaton, Yosë chinotopiso pëiquë no'téérin. Ya'ipi ma'sha inaquë ni'sárin. Nani i'huarin ni'ton, pipiantarin. Shonca cato' ca'tano'sanénpitarë chachin Pitania'pa' pa'pi.

Iquia nara yanicaso marë' sha'huitérinso'

(Mateo 21.18-19)

12 Tahuëririnquë Pitania quéreran huénantarahauaton, Quisoso tanarin. 13 Aquéreran iquia nara quénanin. Na'a monohuanin ni'ton: “Inaya téranta' nitérinso' ca'i,” ta'ton, paahuapirinhue', co manta' nitérinhue'. Monoquénachin quénanconin. Co tahuërinén naniyatérarinhue' ni'ton, co nitérinhue'.

14 —Ama huachi iso nara nichinsohuë'. Co huachi insoari téranta' nitérinso' caponhuë', ténin Quisoso. Ca'tano'sanénpitarinta' natanapi.

Nipa'antopisopita Yosë chinotopiso pëi quéreran a'parinso'

(Mateo 21.12-17; Lucas 19.45-48; Juan 2.13-22)

15 Ina quéreran Quirosarinquë canconipi. Yosë chinotopiso pëiquë ya'conahuatona', na'a nipa'antopisopita quénanconipi. Quisosori quénanconahuaton, co noyahuë' ni'nin.

Napoaton a'parin. A'naquën inaquë coriqui nicanpiarapirinahuë', misanënpita pita-ton, ohuërëtéra'piarin. Nëpë' pa'anpisopitanta' a'parahuaton, huënsëpiquë të'yatérin. Ina quëran ya'ipi piyapi'sa' pënënин. ¹⁶ "Ama nisha nisha ma'sha Yosë pëinënpqué quëntacosohuë", ténin. Ina quëran a'chintaton, itapon:

¹⁷ —Yosë quiricanënpqué ninshitérinpoa'. "Ca nohuanto, pëinëhuë ya'huë'in nontiina-coso marë'. Ya'ipi piyapi'sa' nisha nisha nananquë nonpisopita nontiinacoso marëáchin acotérinquëma", ténin Yosë. Canpitaso nipurinhuë', ihuatéro'sa' ya'huëpiquë pochin atarantérama', itérin Quisosori.

¹⁸ "¡Ma'pitacha nitotérin paya!" topi ya'ipi piyapi'sa'. Napoaton corto hua'ano'sa', cotio maistro'sa', inapitanta natana-huatona', të'huatopi. "Ya'ipi piyapi'sari yaimapi," ta'tona', Quisoso tëpacaiso' chinotopi. ¹⁹ Yatashirahuaso', Quisososo' ca'tano'sanënpitarë chachin ninano quëran pipiantapi.

Iquia nara ahuirinso'
(Mateo 21.20-22)

²⁰ Tahuërinquë tashiramiachin huënantarahuatona', iquia nara ni'quiantapirinahuë', nani ahuirin. Itén quëran huarë' ahuirin. ²¹ Ina ni'sahuaton, Pitro yonquirin.

—Ni'quëchi Maistro. Iquia nara i'huarda sha'huitéranso' nani ahuirin huachi, itérin.

²² —Ya'ipi cancanëma quëran Yosë natëco'. ²³ Inaso', ya'ipi nanitaparin. Ina non-tohuatama', chiniquën natëco': "Co Yosë catahuarincohuë", ama tocosohuë'. Ya'ipi cancanëma quëran ina natëhuatama', catahuarinquëma'. "Yosë nohuanton, iso motopí marëquë nich'i'huincain," ténama' naporini, ina nohuanton nich'i'huincaitonhuë'. ²⁴ Napoaton Yosë nontatoma' ma'sona nipatama', natëco'. "Tëhuëñchachin Yosë catahuarinco," topatama', catahuaarinquëma' ténahuë. ²⁵ Noya cancantatoma', Yosë non-toco'. A'na piyapi ma'sona téranta' onpotohuachinquëma', canpitarinta' pi'pian téranta' no'huihuatama', ina nariantoco'. Ya'ipi cancanëma quëran huarë' nanan anoyatoco' Tata Yosë oshanëma' inquichinquëma'. [²⁶ Co nanan anoyatohuata-mahuë', Tata Yosënta' co oshanëma' inquitarinquëmahuë',] itérin Quisosori.

Chiniquën nanantérinso'
(Mateo 21.23-27; Lucas 20.1-8)

²⁷ Ina quëran Quirosarinquë huëantapi. Yosë chinotopiso pëiquë ya'concoantahuachina, cotio ansiano'sa', corto hua'ano'sa', cotio maistro'sa' inapitari huëcapaipi.

²⁸ —¿Onporahuatonta' chiniquën nanantaton, nipa'antopisopita a'paran? ¿Inta' nanan quëtérinquë ina pochin nicacamaso'? Sha'huitocoi, itopi.

²⁹ —Inta nipachin, carinquëmanta' natainquëma'. Ina sha'huitohuata-maco, insosona nanan quëtérincoso' sha'huitaranquëma'. ³⁰ ¿Incarita' Coansha nanan quëtérin piyapi'sa' aporintacoso marë'? ¿Yosëri nanan quëtëca, piyapi'sari nica? ¿Ma'ta' ténama' canpita? Sha'huitoco carinquëmanta' nanan quëtérincoso' sha'huichinquëma', itérin Quisosori.

³¹ Natana-huatona', inahua capini nisha nisha ninontapi. "¿Ma'ta' itahua'? 'Yosëri nanan quëtérin,' itohuatéhua', a'paniarinpoa'. '¿Onpoatomata' nipachin co ina natëramahuë?' itarinpoa'. ³² Nipurinhuë', 'Co Yosëri nanan quëtérinhuë'. Piyapiri quëtérin,' itohuatéhua', na'a piyapi'sa' no'huiarinënpoa'. 'Yosëri Coansha a'parin pënëntacoso', topi ya'ipi piyapi," nitopi. ³³ Nani ninontohuachinara, Quisoso itapona':

—Ahuën. Co quiyaso' nitotérainhuë'. ¿Incariso' Coansha nanan quëtomara? Co nitotérainhuë' ta'a, toconpi.

—Noyapa'. Napoahuarë', co carinquëmanta' insosona nanan quëtérincoso' sha'huitaranquëmahuë', itérin Quisosori.

12

*Inpriatoro'sa' co noyahuë' yonquipiso'
(Mateo 21.33-46; Lucas 20.9-19)*

¹ Ina quëran Quisosori pënënto nanan sha'huitaantarin:

“A’na quëmapi pancana iminaton, oparotërin. Nani pairapirahuaton, na’pi quëran nanpi ninin opa to’poitona’, huino nicacaiso marë’. Naporahuaton, na’pi quëran chachin tori ninin. Inaquë piyapinën ya’huaton, nocorarin ama ihuacaiso marëhuë’. Nani tiquihuachina, inpriatoro’sa’ acorin a’paicaiso marë’. ‘Sacatëramaso mare’ nitérinso’ patomachin canpitaora marë’ maco’. Patomachin canta’ acotoco,’ itérin. Itahuaton, a’na parti pa’nin. ² Nitérinso’ nani cayahuachina, piyapinën a’parin patoma nitérinso’ ma’pacaiso marë’. ³ A’papirinhuë’, inpriatonënpitari masahuatona’, ahuëpi. Ahuërahuatona’, topinan a’paantapi. ⁴ Naquëranchin hua’anëni a’na piyapinën a’paantapirinhuë’, inanta’ motën pë’shatahuatona’, chiníquën no’huipi. ⁵ Ina quëran a’nanta’ a’paantapirinhuë’, inaso’ huachi tëpapi. Ina quëran na’a a’paantapirinhuë’, a’naquën ahuëpi, a’naquën tëpapi.

⁶ Napotohuachinara, hua’anëni yonquiantarin. ‘¿Ma’cha onpochiya? Na’aya’pi a’papirahuë’, co manta’ quëtopihuë’. Hui’nuhüe na’con nosoropirahuë’, ina huachi a’paarahuë. Ina tëhuëñchinso’ natëpona’ nimara,’ ta’ton, hui’nin chachin a’parin.

⁷ Inpriatonënpitaso nimirinhuë’, hui’nin quënanahuatona’ ninontopi. ‘Paso’ hui’napi a’na tahuëri pa’pin chiminpachin, ya’ipi hua’anëntarin huachi. Huëco’ tëpa’hua’. Ya’ipi ma’shanënpita canpoari matahua’, nitopi. ⁸ Naporahuatona’, hui’nin masahuatona’, tëpapi. Aipiran të’yatopi.

⁹ Pa’pin natantohuachin, ¡ma’ta’ onpotintapon hui’nin chachin tëpatopi ni’quëhuarë’? Chiníquën no’huiton, inpriatonënpita tëpapon. Ina quëran nasha inpriatoro’sa’ acoantapon, tënahüe.

¹⁰ Iráca Yosë nohuanton, ninorin. Quiricanënquë ninshitërinso’ ¿co nontëramahuë’ ti? Ninshitaton, naporin:

‘Na’pi quëran yapëihuachina, a’na na’pi ya’huëpirinhuë’, sacatoro’sari co nohuantopihuë’. “Napoönin,” ta’tona’, të’yatopirinahuë’.

Hua’anëni maantarahuatón: Iso na’pi mini na’con na’con nohuantërahuë pëica’huaso marë’, ta’ton, noya acoantarín.

¹¹ Yosë chachin naporin.

Napoaton ¡Ma noyacha inaso’ ninin paya! tënëhua’, tënín quiricanënquë,” itérin Quisosori.

¹² Natanahuatona’, cotio hua’ano’sari chiníquën no’huipi. “Chinotatonpoa’ pënënarinpoa,” ta’tona’ Quisoso yamapirinahuë’ tashinan pëiquë po’mocaiso marë’. Piyapi’sa’ niyontonpisopita të’huatatona’, co mapihuë’. Patopi huachi.

*Copirno marë’ coriqui ma’patërinso’
(Mateo 22.15-22; Lucas 20.20-26)*

¹³ Ina quëran hua’ano’sari yonquipi Quisoso nonpintacaiso marë’. Napoaton a’naquën parisioro’sa’ a’papi. Caraíchin Irotisé imarinsopitanta’ a’papi. Yapa’pachinara, itapona’: “Paatoma’, nisha nisha natanco’. Co no’tëquën a’panihuachinquéahuë’, sha’uirapihua’,” itatona’, a’papi. ¹⁴ Canconahuatona’, noyásha nontonpi nonpintacaiso marë’.

—No’tëquën Maistro nontërancoi. Co piyapi’sa’ pa’yatiinënquënsø marë’ a’chinahuë’. Co hua’an tëranta’ të’huatëranhuë’. Yosë nohuantërinso’ no’tëquën a’chintërancoi. Napoaton yanatanainquën. Noma copirno nisha piyapi niponahuë’, ya’ipinpoa’ hua’anëntërinpoa’. Coriqui ma’painpoaso marë’ comisionën a’parin. Huë’pachin, ¿noya ipora quëtacaso’ ti? ¿Ma’ta’ Yosë nohuantërin nica’huaiso’? Sha’huitocoititochii, itopi.

¹⁵ Yanonpintopiso’ nitotaton, Quisosori itérin:

—¡Capitaso' nonpintënquëma! ¿Ma'marëta' yaatëhuëramaco? Noma coriqui quëshico ni'i, itérin.

¹⁶ Napotohuachina, quëtopi.

—¿Inta' isoso' nonanpiso'? itohuachina, —Noma copirno, itopi.

—¿Inta' nininëonta' isëquë ninshitopi? itantarín.

—Noma copirno chachin, itantarín.

¹⁷ —Copirno ma'shanën ni'quëhuarë' inachachin quëtantaco'. Naporahuaton, Yosëso nininpoa' ni'ton, hua'anëntërinpoa'. Ya'ipi cancanëma quëran ina natëcaso' ya'huërin, itérin.

Natanahuatona', pa'yanpi. “¡Ma noyacha a'panirinpoa paya!” nitopi.

Piyapi'sa' nanpiantarapiso'

(Mateo 22.23-33; Lucas 20.27-40)

¹⁸ Ina quëran a'napita cotio hua'ano'sa' ya'huërë' huë'pi, satosioro'sa' itopiso'. Inapitaso' nisha a'chinpi. “Piyapinpoa' chiminpatëhua', co onporonta' nanpiantarihuahuë”, toconpi. Inahuanta' Quisoso yanonpintatona', iráca napopiso' sha'huitiipi:

¹⁹ —Iráca, Maistro, Moisësë ninshitérin pënëinpoaso marë'. “Quëmapi sa'aponahuë co hui'nin ya'huëyátërasohuë' sa'in ayananpihuachin, ina iini chachin imoroën maantacaso' ya'huërin. Hui'nhuanpachin, iinco' apoin inari ya'huëretasco marë'. Ina quëran mashotohuachin, ma'shanën, no'panën, inapita masarin,” ténin Moisësë. ²⁰ Canchisë iyaro'sa' ya'huërin. Paninanso' sa'apirinhuë'. Co hui'nin ya'huëyátërasohuë', sa'in ayananpirin. ²¹ Ina iini chachin maantarin. Moisësë téninso chachin manin. Inanta' co hui'nin ya'huëyátërasohuë', chimiantarin. A'na iionta' inapoantarin. ²² Canchisë iinpita chachin inapoantapi. Co a'naya téranta' hui'nin ya'huëyátërasohuë', ya'ipi taquipi. Ina quëran sanapinta' chiminin. ²³ Canchisë iinpita chachin nani mapirinahuë', nanpiantacaso tahuëri nanihuachin, ¿inquën chachinchá sa'in ninë'poya? itopi.

²⁴ —¡Capitaso' co no'téquëñ yonquiramahuë! Yosëso' chini chiníquëñ nanantopirinhuë', co nohuitëramahuë'. Quiricanëonta' nontapomarahuë', co cancanëma quëran natëramahuë'. Napoaton co nanitëramahuë' no'téquëñ yonquicamaso'. Yosë ya'ipi nani-taparin. ²⁵ Chimipisopita nanpiantahuachina', co huachi sa'aponahuë'. Sanapi'santa' co huachi so'yaponahuë'. Anquëniro'sa pochachin nisapi huachi. ²⁶ Chimipisopita têhuëñchachin nanpiantarapi. ¿Co'na ina Moisësë ninshitérinque' nontëramahuë'? Sarsa nara'huaya orotarinso' nicaso', Yosëri nontérin. “Caso' Yosëco. Apraan chinotarinco. Isaco, Cacopo, inapitanta' chinotarinaco,” itérin Yosëri. ²⁷ Nanpirëhuasopitarächin Yosë chinotarëhua'. Napoaton Apraan, Isaco, Cacopo, inapita nani chimipirinahuë', nanpiantarapi. Capitaso' co no'téquëñ yonquiramahuë', itérin Quisosori.

Yosë na'con na'con nohuantérinso'

(Mateo 22.34-40)

²⁸ Satosioro'sare' ninontasoi', a'na cotio maistro huë'nin. Natanahuatón: “Ma noyacha Quisoso' nitotérin paya,” ta'ton, itapon:

—Yosë na'con pënëninpoa'. ¿Ma'ta' na'con na'con nohuantérin natëcaso'? itérin.

²⁹ —Inta nipachin iyasha a'chinchinquëñ. Yosë quiricanëñ quëran chachin sha'huitërinpoa'. “Ya'ipi israiro'sanquëma', natanco'. Yosëíchin hua'anëntërinpoa'. Inasáchin natërehuaso'. ³⁰ Ina na'con na'con nosorocaso' ya'huërin. Ya'ipi cancanëma quëran, ya'ipi hua'yanëma quëran, ya'ipi yonquinëma quëran, ya'ipi chinirama quëran, ya'ipi inaquëranpita nosoromiataco'. ³¹ Isonta' Yosë nohuantérin: Quëmaora ninosororanso pochachin a'napitanta' nosoroco'” ténin. Nosorotacaso' na'con na'con nohuantérin, itérin Quisosori.

³² —Têhuëñchachin Maistro no'téquëñ nonan. A'naíchin Yosë ya'huërin. Co a'na ya'huërinhuë'. ³³ Ya'ipi cancanënpoa quëran, ya'ipi yonquinënpoa quëran, ya'ipi chinirëhu quëran, ya'ipi inaquëranpita nosoromiatacaso' ya'huërin. Naporahuaton,

canpoara ninosororëso pochachin a'napitanta' nosorocaso' ya'huërin. Iráca Moisësë pënënpoa'. "Yosë yachinotohuatama', oshanëma marë' ma'sha tēpatoma', ahuiquítoco'," itérinpooa'. Inapopirëhuahuë', co Yosë nosorohuatëhuahuë', co piyapi'santa' nosorohuatëhuahuë', Yosëso' co onpopinchin noya ni'sarinpoahuë', itérin.

³⁴ —No'tequën iyasha yonquiran ni'ton, pi'pian pahuantarinquën Yosë hua'anéntérinquë ya'conacaso', itérin Quisosori.

Ina quëran ya'ipi piyapi'sa' tapanatona', co huachi nohuantopihuë' nataantacaiso'.

Yosëri a'paimarindo'

(Mateo 22.41-46; Lucas 20.41-44)

³⁵ Ina quëran Yosë chinotopiso pëiquë Quisosori piyapi'sa' a'chintaantarin.

—Iráca quiricanën quëran Yosë tapon: "A'na tahuëri a'na quëmapi acoarahuë piyapi'sa' nicha'ëcaso marë'. Inaso' Cristo," ténin. Cotio maistro'saso' a'chinpachinara, "Cristoso' Tapi shia'huain," topi. ¿Onpoatonta' naporin? Ina iyaro'sa' yonquico'. ³⁶ Iráca Ispirito Santo nohanton, Tapi chachin ninshitérin. Cristo ninoton, naporin: Yosëri Sinioronëhuë sha'huitérin.

"Inchinanëhuë quëran huënsëquë"

inimiconënpita cari minséchinquën," itérin Yosëri, ténin Tapi.

³⁷ Shia'huain niponahuë', Cristo yonquiaton, "Sinioronëhuë," ténin Tapi. Piyapi chachin niperinhuë', Tapiri chinotérin. ¿Onpoatonta' naporin? itérin Quisosori. "Yosë hui'nin chachin ni'ton, naporin," ta'caiso niperinhuë', co manta' topihuë'.

Notohuaro' piyapi'sa' niyontonpisopitaso niperinhuë', noya natanpi.

Maistro'sa' pënëninso'

(Mateo 23.1-36; Lucas 11.37-54; 20.45-47)

³⁸ Ina quëran Quisosori a'chintaantarin. "Ni'cona cotio maistro'sa' nonpin-tochinënquëma'. A'naquën naporopi a'mopi piyapi'sari nohuitacaiso marë'. Ina pochin a'mosahuatona', cachique' pa'pachinara, na'a piyapi'sari noya nontopi. 'Huë'cama maistro,' itohuachinara, pa'yatopi. ³⁹ Cotioro'sa' niyontonpiso pëiquë ya'compachinara, hua'ano'sapitarë' yahuënsëconpi. Pita nipachinara, huancánachin yahuënsëpi. ⁴⁰ Noya nonaponaraihuë', a'naya a'naya quëyorono'sa' nonpintatona', ma'shanënapita matopi. Ama noninacaiso marëhuë' hua'qui' Yosë nontopirinahuë', co cancanëna quëran natëpihuë'. Ina marë' aquë aquëtë' Yosëri ana'intarin," ténin.

Quëyoron Yosë marë' coriqui acorindo'

(Lucas 21.1-4)

⁴¹ Ina quëran coriqui cacon notënanquë Quisoso huënsërin. Piyapi'sa' ni'sárin. Notohuaro' piyapi'sa' huë'sahuatona', coriqui Yosë marë' inaquë po'moquirapi. Na'a ma'huano'saso' na'con coriqui po'morapirinahuë'. ⁴² Ina quëran a'nara quëyoron huë'nin, sa'ahua ninins'. Catotéra'huayaíchin coriqui po'moquirin, pi'pira'huaya pa'térinso'. ⁴³ Ca'tano'sanënpita përasahuaton, Quisosori itapon:

—No'tequën itérinquëma'. Na'a piyapi'sa' na'con coriqui po'morapirinahuë', iso quëyoronso', na'con na'con po'moquirin, ténahuë. ⁴⁴ Ma'huano'saso' na'a coriquihuatona', ya'sotopiso' acopi. Iso sanapiso niperinhuë', pi'pian ya'huëcharinso térranta' tiquirin. Co huachi ya'huëtérinhuë'. Napoaton na'con na'con Yosë quëtérin, ténahuë, itérin.

13

Yosë chinotopiso pëi' ohuatapiso'

(Mateo 24.1-2; Lucas 21.5-6)

¹ Ina quëran Yosë chinotopiso pëi quëran pipihuachinara, a'na ca'tano'sanëni itapon:

—Ni'quë' Maistro. Ma noyápiachin pëipiso'. Pancara'pi quëran nipi, itérin.

² —Iporaso' noyápiachin ni'piramahuë', a'na tahuëri ya'ipi ohuatapi. Co a'na na'piya téranta' niya'huiritarinhue', itérin.

*Ayaro' tahuëri ya'caritërinso'
(Mateo 24.3-28; Lucas 21.7-24; 17.22-24)*

³ Ina quëran Oriposeö panënqué pa'sahuaton, inaquë huënsëconin. Ca'tano'sanënpitaráchin ya'huëapi. Aquë quëran Yosë chinotopiso pëi' notëërapí. Pitro, Santiaco, Coansha, Antërisë, inapitari itapona': ⁴ “¿Onporota' Maistro ohuatapi? Ya'ipi yata'huantohuachina', ¿onporahuachinata' nitotapoi? Sha'huitocoí quiyanta' nitochii,” itopi.

⁵ “Ni'cona iyaro'sa' nonpintochinënquéma'. ⁶ A'naquën huëcapona', ‘Caso' Cristoco. Yosë chachin a'parinco,’ tëcapona'. Nonpintë' nimirinhue', na'a piyapi'sari imapona'.

⁷ Nisha nisha parti piyapi'sa' nino'huiapi. Niahueatona', quiria nisapi. Ina natanto-huatama', ama pa'yancosohue'. Tëhuëñchachin nisha nisha parti naporapi. Napoapon-ahuë', co isoro'pa' ta'huanchátëraponhue'. ⁸ Nisha nisha nananqué nonpisopita nino'huitona' quiria nisapi. Copirnorösa capini nino'huitona', piyapinënþita camairapi quiria nicacaiso marë'. A'na parti a'na parti ococua pa'sarin. Cosharo' pahuanpachin, tanari tiquirarin. Ni'co'. Sanapi yahuaihuachina, iquitárin, co a'naroáchin huairinhue'. Inapochachin ayaro' tahuëri ya'caritohuachina, na'con parisitapirinahuë', co isoro'pa' ta'huanchátëraponhue'.

⁹ Ni'cona canpitanta' naniantotamaco. A'na tahuëri masarinënquéma'. Imaramacoso marë' coisëqué sha'huirapiarinënquéma'. Cotio niyontonpiso pëiro'saqüe huihuiarinënquéma'. Imaramaco ni'ton, chirinchi hua'ano'sa' ya'huérinquënta' sha'huirapiarinënquéma'. Ca nohuanto, inaquë quëpaarinënquéma' nanamëhuë sha'huitacaso marë'. ¹⁰ Co'huara isoro'pa' ta'huanchatérasohue', noya nanan ya'ipi piyapi'sa' sha'huitacaso' ya'huërin. Nisha nisha nananqué nonpisopita nataina'. ¹¹ Mapachinënquéma', ‘¿Ma'cha tono'pocoya?’ ama tocosohue'. Coisë'pa' quëpahuachinënquéma', naporo' Yosë catahuaarininquëma' noya nonacamaso marë'. Co canpitaora nonsaramahuë'. Ispirito Santo ayonquierininquëma' noya nonacamaso marë'. ¹² Naporo' tahuëri'sa' nisha nisha yonquiapi. A'naquën imasarinaco. A'naquën nimirinhue' co nohuantarinarinacohue' ni'ton, quëmopinënþita capini nino'huiapi. A'naquën iin chachin niponahuë', sha'huirapiarin têpacaiso marë'. A'naquën hui'ninpita imapachinaco, pa'pini chachin sha'huirapiarin. A'naquën a'shinhue niper, pa'pinhue niper, imapachinaco, hui'ninpiti chachin sha'huirapiapi têpacaiso marë' ¹³ Imaramaco ni'ton, ya'ipi piyapi'sa' no'huiarinënquéma'. Napoaponahuë', chiminaquë huarë' imamiatohuatamaco, cha'ésarama huachi. ¹⁴ A'na tahuëri inimicoro'sa' Yosë pëinënqué ya'conahuatona', pa'pi co noyahuë' nisapi ni'ton, tapiapona', co huachi inaquë Yosë chinotapihuë'. (Ina quirica nontohuatama', noya yonquico'.) Ina ni'patama', naporo' ta'aco'. Cotia parti ya'huéhuatama', motopi'pa' ta'aco'. ¹⁵ Pëinëma' a'canamaso' aipi ya'huéhuatama', ama ma'shanëmapita quëpacaso marë' ya'concosohue'. A'naroáchin topinan paco'. ¹⁶ Iminëmaquë sacatasënquéma' nipachin, ama a'moramaso téranta' maquintacosohue'. Manóton ta'aco'. ¹⁷ Naporo tahuëri'sa' cayorono'sa', sho'shopia'hua ya'huëtopiso', inapita parisitapona'. ¡Ma'huantacha nicapona paya! ¹⁸ Yosë nontoco' ama o'napi tahuëri inapocamaso' ya'huë'insohue'. ¹⁹ Naporo' tahuëri'sa' piyapi'sa' chini chiniquén parisitapi. Isoro'pa' ninin quëran huarë' co ina pochin parisichátërapihuë'. Ina piquéraonta' co onporonta' ina pochin parisitaantarapihuë'. ²⁰ Yosë nohuanton, co hua'qui' aparjisitapihuë'. Hua'qui' aparjisitapi naporini, ya'ipi piyapi'sa' taqui'itonahuë'. Nimirinhue', piyapinënþita nosoroaton, co nohuantérinhue' hua'qui' aparjisitacaiso'. Huayoninsopita nicha'ésarin huachi.

²¹ Naporo' tahuëri'sa' nisha nisha sha'huitarinënquëma'. '¡Ni'cochi, Cristo nani huë'nin!' tosapi. A'napitanta' tapona': '¡Ni'cochi, paséquë ya'huarin!' tosapi. Napotohuach-inënquëma', ama natëcosohuë'. ²² Na'a nonpin nanan pënentona'piro'sa huëcapona'. 'Caso' Cristoco,' tēcapona' a'naquën. 'Caso' ninotona'pico,' tosapi a'naquëonta'. Sacai' nininso' nisapi piyapi'sa' nonpintacaiso marë'. Ni'sahuatona': 'Ma'pitacha nitotërin paya. ¿Yosë quëran o'mamara, ti?' ta'tona', na'a piyapi'sari imasapi. Yosëri huayoninsopita quëran huarë' nonpintochinaichin nisapi. ²³ Canpitaso nipurinhue' ni'cona nonpintochinënquëma'. Nani sha'huitëranquëma' ama naporo' tahuëri'sa' nonpintinënquëmaso marëhuë', itérin Quisosori.

Quisoso o'macaso tahuëri

(Mateo 24.29-35, 42, 44; Lucas 21.25-36)

²⁴ Ina tosahuaton taantarin: "Ina quëran iyaro'sa' nani chiníquën parisitohuachina', pi'i tashiarin. Yoquinta' co huachi a'pinarinhue'. ²⁵ Naporahuaton, na'a tayloraro'santa' anotarin. Ya'ipi inápaquë ya'huérinsopitanta' nacon nacontapon. ²⁶ Naporo' ya'ipi piyapi'sa' ni'sarinaco. Yosë quëran quëmapico ni'to, chitoro' huancana o'mantararahuë. Chiníquën nanantato, huënaráchin huënaráchin ya'noarahuë. ²⁷ O'mantahuato, anquëniro'sa' a'pararahuë Yosëri huayoninsopita ya'ipi parti quëran ayontonacaiso marë'. Pa'sahuatona', nisha nisha parti quëran huarë' ayontonapi huachi.

²⁸ Iquira nara papotérin quëran, iyaro'sa', nitotoco'. Ta'aménquë monoantahuachina, 'Nani o'napi naniriarin huachi,' topi. ²⁹ Inapochachin nani ma'sha onporahuachina, nitotarama'. 'Omantacaso' tahuëri naniriarin huachi,' tosarama'. ³⁰ No'tëquën sha'huitëranquëma'. Co'huara cotioro'sa' huënton ta'huanchatërasoihuë', nani ma'sha onporapi. ³¹ Isoro'pa' ta'huantararin. Pi'iro'tënta' ta'huantararin. Ca nonahuëso nipurinhue', co onporonta' ta'huantarinhue'. No'tëquën nonahuë ni'ton, ya'ipi sha'huitëranquëmaso chachin naniarin huachi.

³² Onporosona o'mantaca'huaso' tahuëri nanihuachin, co insonta' nitotërinhuë'. Co anquëniro'sa' téranta' nitotapihuë'. Yosë hui'ninco nipurahuë', co ca téranta' nitotërahuë'. Tata Yoséíchin nitotérinso'.

³³ Napoaton ama huë'érëso pochin cancantatomä', naniantocosohuë'. Onporosona o'mantaca'huaso' tahuëri nanihuachin, co nitotaramahuë'. Yosë nontatoma', ninaco. Noya yonquiatoma', ya'huëco'. ³⁴ A'na quëmapi aquë yapa'ninso pochin nisarin. Yapa'pachina, inpriatonënpita camairin. A'naya a'naya sha'huitërin ma'sona nicacaiso marë'. Ya'coana to'shitona'pinta' sha'huitaton: 'Pëi' noya ni'quë', itérin. ³⁵ Onporosona pëi' hua'anën huënantacaso' co nitotapihuë'. I'huaraya huarë' huëcapon nimara. Yonotashi' a'na' huëcapon nimara. Atari përasahuaso', huëcapon nimara. Tashíramiachin huëcapon nimara,' topi. Inapochachin canpitanta' o'manta'huaso tahuëri co nitotatomahuë', nináco. ³⁶ Ni'cona a'nanya o'mato, huë'ésenquëma' quënanquimatëenquëma'. ³⁷ Nani a'chintëranquëma huachi. Ya'ipi piyapi'sa' nitochina'. 'Ama huë'érëso pochin cancantatomarahuë', ninaco,' itarahuë ya'ipi piyapi'sa', itérin Quisosori.

14

Quisoso macacaiso marë' chinotopiso'

(Mateo 26.1-5; Lucas 22.1-2; Juan 11.45-53)

¹ Cato' tahuëri pahuanarin Pascoa nanicaso'. Naporo' Yosëri iráca nicha'érinso' yonquiatona', coshatapi. Pan co huëpocatérinsohuë' ca'sapi. Pascoa naniriahuachina, cotio hua'ano'sa', cotio maistro'sa', inapitari chinotapi onporahuatonsona Quisoso macacaiso marë'. Nonpintatona', yatëpapi.

² —Ama niyontonpiso tahuëri'sa' chachin maahuasohuë', piyapi'sa' no'huihuachinënpoa'. Quisoso pa'yatapi ni'ton, ahuëarinënpoa', topi a'naquën.

*Hua'saiquë opomototérinso'
(Mateo 26.6-13; Juan 12.1-8)*

³ Quisososo' Pitaniaquë pa'nin. Simon pëinënqué coshatapatarin. Inaso' chana caniori mapirinhue', anoyatérinso'. Misaquë coshatasoi', a'nara sanapi huë'nin. Potiria'huaya nishana'pi quëran nipo' quënin. Inaquë pimo hua'sai' na'con pa'térinso' ya'huërin. Potiria'huaya oparahuaton, Quisoso motënqué hua'sai' opomototérin. ⁴ A'naquën no'huitatona', inahua capini ninontapi.

—¿Onpoatonta' iso hua'sai' pa'ton niperinhue' chiniarin? ⁵ Pa'anin naporini, cara pasa tahuëri marë' pahuërëtopiso pochin coriqui canaitonhuë'. Sa'ahuaros'a' quëtacaso' ya'huéchitonhuë', nitopi. Ina pochin yonquiatona', sanapi no'huipi.

⁶ Quisosoriso niperinhue', itapon:

—¿Ma'marëta' iso sanapi no'huirama'? Tananpitoco'. Na'con nosoroatonco, inapotérinco. ⁷ Nani tahuëri sa'ahuaros'a' iséquë ya'huërapo. Nohuantohuatama', nosoroarama'. Napoaponahuë', caso' co hua'qui' campitaro'co ya'huarahuë'.

⁸ Iso sanapiso' cancanën quëran noya yonquiaton, inapotérinco. Co'huara chimiyanterasocohue', nosoroatonco, nonëhuë hua'saiquë opotérinco pa'pitinacoso marë'. ⁹ No'tequen itaranquëma'. Inséquësona noya nanan sha'huihuachina', iso sanapi napotérincoso' sha'huirapi anta'. Co naniantapihuë', ténin.

*Cotasëri sha'huirapirinso'
(Mateo 26.14-16; Lucas 22.3-6)*

¹⁰ Shonca catoya'piri Quisoso ca'tanpirinahuë', a'nara' corto hua'ano'saquë pa'nin sha'huirapicoso marë'. Inaso' Cotasë Iscarioti itopi. ¹¹ Natanaahuatona', pa'yatopi: "Ina marë' coriqui quëchinquën," itopi. Ina quëran Cotasë yonquirarin po'oana quëran Quisoso a'nocaso marë'.

Pascoa tahuëri coshatopiso'

(Mateo 26.17-29; Lucas 22.7-23; Juan 13.21-30; 1 Corintios 11.23-26)

¹² Pascoa nanihuachina, nisha pan ca'pi, co huëpocatérinsuhue'. Naporo' tahuëri chachin carniroa'huá iráca tēpapiso pochin tēpaantapi capatona' yonquicaiso marë'. Nani pi'ipiquë cotioro'sa' naporápi ni'ton, ca'tano'sanënpitari Quisoso itapona':

—¿Intohuata' Maistro paatoi Pascoa cosharo' nii capacaso marë'? itopi.

¹³ Napotohuachinara, cato' ca'tano'sanënpita nontérin:

—Ninanoqué paco'. Inaquë a'na quëmapi nacapiarama'. Yonquë i'sha chi'yatarin. Ina imaco'. ¹⁴ Pëiquë ya'conconpachin, pëi' hua'anën natancoco'. "¿Inséquëta' patoana ya'huërin Pascoa cosharo' capa'huaiso'?" ténin Maistro, itonco'. ¹⁵ Napotohuatama', panca patoana inápaquë nininso' a'notarinquëma'. Inaquë misa, huënsenan, inapita ya'huërarin coshatacaso marë'. Nani taparin huachi. Inaquë cosharo' nico' canpoa' capacaso marë', itérin.

¹⁶ Pa'sahuatona', ninanoqué canconpi. Quisosori sha'huiterinso chachin quënanconpi. Inaquë Pascoa cosharo' nipi capacaiso marë'.

¹⁷ Nani tashiro'porapaso', Quisoso shonca cato' ca'tano'sanënpitarë chachin huë'pi.

¹⁸ Misaquë coshatasoi', Quisosori itapon:

—No'tequen iyaro'sa' itéranquëma'. A'naquëma' care' coshatapomarahuë', sha'huirapiaramaco, itérin.

¹⁹ Natanaahuatona', sëtopi. Sëtatona', a'naya a'nayari Quisoso natanpi.

—¿Incoita' Sinioro yasha'huirapirainquen? ¿Co cahuë' nimara ti? topi a'naya a'naya.

²⁰ —Shonca catonquëma' ca'tanapomaracohue', a'naquëma' yasha'huirapiramaco. Ina sénanquéráchin i'shiaton care' caponahuë', yasha'huirapirinco. ²¹ Yosë quiricanënqué ninorincoso chachin chiminarahuë'. Yosë quëran quëmapico naporahuë',

chiminarahuë. Napoaponahuë', quëmapi yasha'huirapirincoso' ma'huantacha nicapon paya. Co nasitérinhuë' naporini, noya noya niitonhuë', itérin.

²² Coshatasoi', pan masahuaton, Yosë nontérin. "Yosparinquën Tata," itahuaton, së'panin. Ina quëran, ca'tano'sanënpita quëtéra'piarin.

—Ca'co' iyaro'sa'. Ca nonëhuë pochin iso', itérin. ²³ Minëa'huanta' masahuaton, "Yosparinquën Tata," itahuaton, inanta' quëtérin. Quëtohuachina, ya'ipi o'opi.

²⁴—Ca huënainëhuë pochin iso'. Huënainëhuë pa'sarin ni'ton, nasha quëran canpitare' Yosë anoyatérinso' sha'huichinquéma' imacamaso marë'. Chiminarahuë na'a piyapi'sa' oshanëna' inquita'huaso marë'. ²⁵ No'tequën itaranquéma'. Ipora quëran huarë' co huachi opai' o'oantarahuë'. Chiminarahuë huachi. A'na tahuëri Yosë hua'anëntérinso' nanihuachin, nasha pochin nininso' o'oantarahuë. Naporor' noya noya cancantarihua', itérin.

Pitrori nonpinapicaso' ninorinso'

(Mateo 26.30-35; Lucas 22.31-34; Juan 13.36-38)

²⁶ Nani Yosë cantanën cantarahuatona', Oripose' panënqué pa'pi. ²⁷ Inaquë Quisosori itapon:

—Téhuenchachin ya'ipinquëma' ta'anapiparamaco. Iráca quiricanënqué ninoton, Yosë naporin. "Ca nohuanto, pë'tahuatona'pi têpaapi. Têpahuachina', ohuicanënpita yanquéerapi," ténin. Ipora tashi chachin napoarama'. ²⁸ Chiminaporahuë', Yosë ananpitaantarino. Ananpitaantahuachinco, ca'ton Cariria'pa' pa'sarahuë. Inatohua' niquénantarihua', itérin.

²⁹—A'napita ta'ananpipirinënquéonta', co caso' ta'arahuë', itérin Pitrori.

³⁰—No'tequën iyasha itaranquéen. Ipora tashi chachin co'huara atari catoro' pérashatérasohuë', cararo' nonpinapiaranco. "Co caso' Quisoso nohuitérahuë", toconapon, itérin Quisosori.

³¹—Quëma imasaranquéen ni'ton, yatëpapirinacohuënta', co onporonta' nonpinapiaran-quënhuë', itérin Pitrori.

Inachachin topi ya'ipiya.

Quisoso sétaton, Yosé nontérinso'

(Mateo 26.36-46; Lucas 22.39-46)

³² Ina quëran nararoqué canconpi, Quisimani itopiquë.

—Iséquë iyaro'sa' huënsétaco'. Yosë nontéri'i, itérin Quisosori.

³³ Pitro, Santiaco, Coansha, inapitaíchin amashamiachin quëparin. Naporor' sétaton, co napión cancantérin.

³⁴—Pa'pi séterahuë. Chiminchináchin séterahuë. Iséquë huënsétaco'. Ama huë'etomarahuë', ni'táco', itérin. ³⁵⁻³⁶ Amashamiachin pa'sahuaton, isonconahuaton, no'paquë huarë' monshomarin. Inaquë Yosë nontarin. "Quëma nohuantohuatan Tata, nicha'ëco ama ma'sha onpo'isohuë'. Main o'orëso pochin parisita'huaso' ya'huérin. Co parisita'huaso' nohuantaporahuë', quëma nohuantohuatan, ma'sona yaonpotohuatanconta' noya, ténahuë. No'tequën yanatéranchin," itérin.

³⁷ Ina quëran huënantapirinhuë', cara chachin huë'ësápi quënanquintarin.

—¿Onpoatoncha iya Simon, huë'ësaran paya? ¿Co a'na ora téranta' nanitéranhuë' ni'tamaso' ti? ³⁸ Ama huë'etomahuë', ni'táco'. Yosë nontáco' ama sopai minsëinquëmaso marëhuë'. Cancanëma quëran Yosë yanatépiramahuë', co canpitaora chiníquën cancantéraramahuë', itérin.

³⁹ Naquëranchin paantarahuatón, Yosë nontantarin. Inachachin itantarahuatón,

⁴⁰ huënantapirinhuë', naquëranchin huë'ëantapi quënanquintarin. Huë'ëi' iquitatona', huë'ësápi. Tapanatona', co nanitopihuë' ma'sha ta'caiso'. ⁴¹ Naquëranchin paantarahuatón, Yosë nontantarin. Ina quëran huënantarahuatón, ca'tano'sanënpita itapon:

—¿Ipora huanta' huë'ésarama' ti? Nani huachi. Nani ora nanirin. Yosë quëran quëmapico nimirahuë', sha'huirapiarinco oshahuano'sa' macainacoso marë'.
 42 Huënsëco' pa'ahua'. Ni'co'. Sha'huirapiarincoso' nani canquiarin, itérin.

Quisoso mapiso'

(Mateo 26.47-56; Lucas 22.47-53; Juan 18.2-11)

43 Nonaso chachin, Cotasë canquirin. Inanta' Quisoso ca'tanaponahuë', sha'huirapiarin macacaiso marë'. Notohuarero piyapi'sari imaquiapi. Corto hua'ano'sa', cotio maistro'sa', ansiano'sa', inapitari a'papisopita. Sahuëni, shonqui, inapita së'quëerahuatona', huë'sapi. 44 Co'huara canshátérasoihuë', Cotasëri nani sha'huitérin Quisoso nohuitacaiso marë'. “Apinorahuë quëran Quisoso nohuitatoma', maco'. Noyá tonporahuatoma' quëpaco', ta'ahuachin,” itérin. 45 Canquirahuaton, Quisoso ya'yoranquirin. Ina quëran:

—Tashita Maistro itahuaton, apinoirin. 46 Ina quëran Quisoso chiníquën masapi.

47 A'naso nimirihuë' sahuëninëñ ocoirahuaton, corto hua'an inpriatonëñ ahuërin. Inapotaton, nishitëhuëratëtërin. 48 Quisosori piyapi'sa' itapon:

—Sahuëni, shonqui, inapita së'quëerahuatoma', huëcapairamaco. Matararo pochin cancantatomaco, ¿yamanamaco ti? 49 Co'tana nani tahuëriya Yosë pëinënquë ya'huëato, a'chinárahuë. Nicapomaracohuë', co manamacohuë'. Napoaponahuë', Yosë quiricanëñ quëran ninorinacoso chachin masaramaco, itérin.

50 Ina quëran ya'ipi ca'tano'sanënpitari ta'anapipi. 51 A'na hui'napiro' sahuanasaquëáchin niso'quëétahuaton Quisoso imasapirihuë', mapi. Mapirinahuë', 52 sahuanasáchin matohuachinara, i'nanpirapi ta'arin.

Cotio hua'ano'saquë quëpapiso'

(Mateo 26.57-68; Lucas 22.54-55, 63-71; Juan 18.12-14, 19-24)

53 Nani Quisoso masahuatona', corto hua'an chini chiníquën nanantërinso' ya'huërinquë quëpapi. Inaquë ya'ipi corto hua'ano'sa', ansiano'sa', cotio maistro'sa', inapita nani niyontonpi. 54 Pitroso nimirihuë', aquë quëran imaquierin. Corto hua'an i'iratë' pairapirinquë huarë' imaquierin. Inaquë ya'conahuaton, ponisiaro'sapitarë' huënsëaton, napéntarin.

55 Ya'ipi hua'ano'sari yatëpapi ni'ton, a'naya a'naya Quisoso nonpinapicaiso marë' yonípirinahuë', co quënanpihuë'. 56 Na'a nonpinapiaponaraihuë', nisha nisha nonconpi. Co inachachin nonpihuë'. 57 A'naquëñ huanirahuatona', tapona':

58 —I'huachachin Quisoso naporin, natanai. “Yosë pëinën piyapi'sari nipo' ata'huantahuato, cara tahuëri quëran anoyatantarahuë. Co piyapi'sari nipo'huë' acoantarahuë,” toconin, itopi.

59 Napoaponahuë', co inahua téranta' inachachin nonpihuë'. Nisha nisha nonpi.

60 Corto hua'an chini chiníquën nanantërinsoari huanirahuaton, Quisoso itapon:

—¿Ma'ta' ta'tona' isopita nonapirinënquëñ? ¿Co manta' ténanhue' ti? itérin.

61 Quisososo nimirihuë', co manta' téninhue'. Ta'tárin. Napohuachina, naquëranchin nataantarin:

—¿Quëmaso' Cristo, Yosë hui'ninquëñ chachin ti? itaantarin.

62 —Ca mini inaco. A'na tahuëri ni'saramaco. Yosë quëran quëmapico ni'to, Yosë chiníquën nanantaton, inchinan quëran ahuënsëarinco. Ina quëran chitoro' huáncana o'mantararahuë niantaramaco, itérin Quisosori.

63 Ina natanahuaton Corto hua'anso, chiníquën no'huitérin. A'morinso osharahuaton tapon:

—“¡Caso' Yosë hui'ninco,” toconin! Nani natanéhua'. Co huachi a'napitari sha'huirapicaiso' nohuantarihuahuë'. 64 Nani huachi Yosë yaya'huëretérinso' natanéhua'. ¿Ma'ta' onpotahua' Quisoso? ténin.

—Pa'pi co noya quëmapihuë' ni'ton, tëpacaso' ya'huërin, topi ya'ipiya.
 65 Naporahuatona', Quisoso ipitopi. Tonporayatahuatona', chiníquën panpirayapi.
 —Quëmaso' Cristonquën nipatan, ninoton no'tequën sha'huitocoi. ¿Inta' ahuërinquën? itoonpi.

Ponisiaro'sarinta' chiníquën ahuërayapi.

Pitrori nonpinapirinso'

(Mateo 26.69-75; Lucas 22.56-62; Juan 18.15-18, 25-29)

66 Pitroso i'iratéquë ya'huëápirinhuë', a'na sanapi huë'nin. Corto hua'an cosonanën inaso'. 67 Pitro napëntaquëya', inari ni'nin. Noya ni'sahuaton:

—Co'ta quëmanta' Quisoso Nasaritoquë ya'huërinso' ca'tanan, itérin.

68 —¿Ma quëmapita' napotéranso'? Co caso' ina quëmapi nohuitérahuë', itérin. Ina quëran pipirahuaton, paira ya'coanaquë pa'nin. Naporo' atari pérarin. 69 Naquëranchin sanapiri quënaantarin. Quënanahuaton, huanipapisopita itapon:

—Iso quëmapi Quisoso ca'tanin anta', itérin.

70 —¡Co'chi nohuitérahuë paya! itaantarin. Ina quëran a'napitarinta' itaantapona':

—Quëmanta' Cariria piyapi pochin nonan ni'quëhuarë', Quisoso ca'tanan ipora, itopi.

71 —¡Co'chi nohuitérahuë paya! Yosë ni'sárinco, co cariso' nohuitérahuë'. Nonpintohu-atënquëmaso', Yosë ana'intarinco, itérin Pitrori.

72 Naporo chachin atari pérantarín. Atari natanahuaton, Quisosori napotérinso' Pitro yonquirin: "Co'huara atari catoro' pérashatérasohuë', cararo' nonpinapiaranco," itérinco, ta'ton chiníquën sétérin. Sétaton, na'nérin.

15

Piratoquë quëpapiso'

(Mateo 27.1-2, 11-14; Lucas 23.1-5; Juan 18.28-38)

1 Tahuërianpitohuachinara, ya'ipi cotio ansiano'sa', cotio maistro'sa', corto hua'ano'sa', inapita niyontonahuatona', ninontopi. Ina quëran Quisoso tonporahuatona', Pirato ya'huërinquë quëpapi.

2 —¿Quëmaso' cotioro'sa' copirnonquën ti? itérin Piratori.

—Inaco mini, ténin Quisoso.

3 Ina quëran corto hua'ano'sari na'con nonpinapipirinahuë', co manta' téninhue'.

4 —Nani ma'sha sha'huirapipirinënquënhue', ¿co manta' ténanhue' ti? itaantarin Piratori.

5 Quisososo niperinhuë', co manta' téninhue'. Napohuachina: "Ma quëmapita' isoso' ni'ton, co manta' téninhue'", ténin Pirato yonquiaton.

Tëpacaiso marë' sha'huirinso'

(Mateo 27.15-31; Lucas 23.13-25; Juan 18.38-19.16)

6 Nani Pascoa tahuëri a'nara apina'pi tashinan pëi quëran ocoirin noya pipicaso marë'. Pita tahuëri ni'ton, Noma hua'an napotérin. Insosona piyapi'sari nohuantopiso' ocoirin.

7 Tashinan pëiquë copirno no'huipisopita ya'huëpi. Copirno piyapinënpita tëpapi ni'ton, tashinan pëiquë po'mopi. A'nara' Parapasé itopiso'. 8 Piyapi'sa' huë'sahuatona', Pirato nontiipi.

—Ipora Pascoaqueñta' apina'pi ocoitaantacoi, itopi.

9 —¿Inta' ocoichinquëma'? Copirnonëma' ocoichinquëma' topirahuë', itérin Piratori.

10 Corto hua'ano'sari apiratona', Quisoso nani mapi. Ina nitotaton, Piratori naponontérin. 11 Napoaponahuë', corto hua'ano'sari a'naya a'naya piyapi'sa' sha'huitéra'piapi.

—“Co Quisososo' nohuantérahuë'. Parapasé ocoitocoi,” itoco', itéra'piapi. Napoaton:

—Parapasé ocoitocoi, tosapi.

12 —¿Ma'ta' nipachin Quisoso onpochi: “Inaso' copirnonëhuëi,” tënamaso'? itérin Piratori. Napotohuachina:

13 —¡Corosëquë patanantëquë' chimiin! itapi chiníquën nontatona'.

14 —¿Ma'marëta' tēpa'i? ¿Ma'ta' onporinso'? itopirinhuë', aquëtë chachin chiníquën itaantapi:

—¡Corosëquë patanantëquë' chimiin! itaantapi.

15 Ina natanahuaton, ama piyapi'sari no'huicaiso marëhuë' Parapasë ocoitérin. Quisososo nipurinhuë', chiníquën ahuihuitérin. Chiníquën huihuitona', pë'sha pë'shatopi. Ina quëran sha'huitérin corosëquë patanantacaiso marë'.

16 Ina quëran sontaro'sari Pirato pëinënquë quëpapi. Paireanaquë ichiya'conahuatona', ya'ipi sontaro'sa' amatopi. **17** Nani niyontonpachinara, quëhuanën miachin hua'an a'morinso pochin a'motopi tēhuacaiso marë'. Yancotënta' nahuan quëran nicatona', ayancotopi:

18 —¡Hua'qui tahuëri nicaton cotioro'sa' hua'anëntëquë'! itoonpi.

19 Piquirananguë ahuëmotopi. Ahuërahuatona', ipitopi. Isonahuatona', nito mosharapi. **20** Inapotatona', tēhuapi. Ina quëran quëhuanën a'motopiso ocoitahuatona', inaora a'morinso chachin a'motaantapi. Inapotahuatona', corosëquë patanantacaiso marë' quëpapi.

Corosëquë Quisoso patanantopiso'

(Mateo 27.32-44; Lucas 23.26-43; Juan 19.17-27)

21 Pa'sapirinahuë', a'na quëmapi Sirini parti hua'huatérinso' nacapipi. Iminën quëran huëntararin. Simon itopi. Inaso', cato' hui'ninpita ya'huétérin, Aricantro, Nopo, inapita itopiso'. Simon nacapirahuatona', sontaro'sari Quisoso corosënën apitëntopi inari quëpatacaso marë'.

22 Pantarahuatona', panëa'huayaquë canconpi huachi, Corocota itopiquë. Coroco-taso': “Nansë Moto’,” tapon naporin. **23** Huino tanparo nimirio ayontahuatona', yao'shitopirinahuë', co o'orinhuë'. **24** Ina quëran sontaro'sari corosëquë patanantopi.

Nani patanantohuachinara', “Huéco”, nicanatëhua', Quisoso a'morinso' maahua,” nitatona' ya'nipirapi. Nicanatona', a'naya a'naya mapi.

25 Yono pi'irirahuaso', corosëquë patanantapi. **26** Oporinso marësona tëparapiso' nani ninshitopi.

ISOSO' COTIORO'SA' COPIRNO

ta'caso ninshitopi. Motën pëtëcha achinpitopi. **27** Quisoso pirayan cato' apiro'santa' patanantopi. A'nara' inchinan quëran, a'nanta' ahuënan quëran acopi. [**28** Iráca Yosë quiricanënquë ninorin. “Apiro'sapitarë' acorapi,” ténin. Naporinso chachin inapitarë' acopi.]

29 Piyapi'sa' na'huëpona pochin Quisoso tēcariatona', tēhuapi.

—“Yosë pëinën ata'huantohuato, cara tahuëri quëran anoyatantarahuë,” ténan pora.

30 Inta nipachin, corosë quëran nohuararahuaton, cha'ëquë', itoonpi.

31 Inapochachin corto hua'ano'sa', cotio maistro'sa', inapitanta' Quisoso tēhuatona', itapona':

—A'napitaso' nicha'ëponahuë', inaora cha'ëcasoso' co nanitërinhuë'. **32** “Caso' Cristoco, israiro'sa' copirnoco,” toconin. Inta nipachin, corosë quëran nohuarain nicatëhua' natëahua', nitopi.

Ina pirayan patanantopisopitanta' Quisoso no'huipi.

Quisoso chimininso'

(Mateo 27.45-56; Lucas 23.44-49; Juan 19.28-30)

³³ Camotëchin nisahuaso', ya'ipi parti tashirin. I'huaraya huarë' yono tashi pochin ninin. ³⁴ Naporor' Quisoso chiníquën nonin. "Iroi iroi ¿nama sapacatani?" ténin. Inaora nananquë nonaton, naporin. "¿Onpoatonta' Tata patérancos?" tapon naporin.

³⁵ A'naquën huanipapisopitari natanahuatona':

—Natanco'. Iniasë përasamara, topi.

³⁶ A'na quëmapiso' manorahuaton, pi'shiro pochin nininso' maconin. Main huino asë'cotötérin. Nara'huayaquë achinpitahuaton, inápaquë ihuëtérin o'ocaso marë'.

—Tananpitëquë'. Corosë quëran anohuaracaso marë', Iniasë huë'samara, ténin.

³⁷ Ina quëran Quisososo' chiníquën nonsahuaton, chiminin huachi. ³⁸ Naporor' Yosë chinotopiso pëiquë tanontën né'mëté' patonpiso' noshatérin. Inaora noshataton, catotë huarë' ninin. Inapa quëran no'paquë huarë' noshatomarin. ³⁹ Onporahuatonsona Quisoso chimininso' capitani ni'sahuaton:

—Téhuëncachachin iso quëmapi Yosë hui'nin, ténin.

⁴⁰ Sanapi'santa' aquë quëran notéérapi. A'nara' Maria Mactarina, a'naso' Saroma, a'nanta' Maria. Inaso' Cosi, Santiaco, inapita a'shina'. Santiacoso' hua'hua nimarinso'.

⁴¹ Quisoso Caririaquë ni'so', imatona', nocomapiso'. A'napita sanapi'santa' Quisoso notéérapi. I'huamiáchin Quisoso Quirosarinquë huë'pachina, inapitarinta' imaquipi.

Na'pi naninquë po'mopiso'

(Mateo 27.57-61; Lucas 23.50-56; Juan 19.38-42)

⁴² Ina tashiraya chinoto tahuëri ni'ton, cotioro'sa' tapatapi chinotacaiso marë'.

⁴³ I'huararahuaso', Cosi huë'nin. Inaso' Arimatiaquë ya'huérinso'. Cotio hua'an niponahuë', noya Yosë chinotarin. "A'na tahuëri Yosë o'mararin hua'anëntiinfoaso marë'", ténin yonquiaiton. Napoaton co té'huatatonhuë', Piratoquë pa'nin Quisoso nonën ma'patasco marë'. ⁴⁴ "Co chimiyánteramarahuë'", ta'ton, capitán amatahuaton, natantérin. "¿Nani Quisoso chiminin?" itérin. ⁴⁵ "Nani mini chiminin," itérin capitani. Napotohuachina, Cosi itapon: "Nonën quëpaquë' nipachin," itérin. ⁴⁶ Morin nani pa'anin ni'ton, corosë quëran nonën anohuarahuatona', quëpapi. So'pinahuatona', na'pi naninquë po'mopi. Ina quëran pancara'pi masho pi'napiroahuatona', pa'copitopi.

⁴⁷ Maria Mactarina, a'na Maria (Cosí a'shin nininso'), inapitari ni'sapi. Ínséquësona Quisoso acopiso' ni'pi.

16

Quisoso nanopiantarinso'

(Mateo 28.1-10; Lucas 24.1-12; Juan 20.1-10)

¹ Chinoto tahuëri piquëran Maria Mactarina, Saroma, a'na Maria (Santiaco a'shin nininso'), inapita hua'sai' pa'anpi Quisoso nonën pashtonacaiso marë'. ² Tomio tahuëri tashiramiachin pi'i nëhuëcharirahuaso', na'pi nanin'pa' pa'sapi. ³ Inahua capini ninontérapi.

—Pancara'piquë nanin pa'copitopi pora. ¿Incha iporaso' chi'huincatérë'ponpoya? ni-topi.

⁴ Canconahuatona', notéépirinahuë', na'pi panca nimirihuë', nani chi'huincapi ni'pi. ⁵ Na'pi naninquë ya'conahuatona', hui'napi pochin nininso' ni'pi. Huiríchin a'morahuaton, inchinan quëran huënsëarin. Ni'sahuatona', pa'yanpi. ⁶ Pa'yanasoi', inari itérin:

—Ama pa'yancosohuë'. Quisoso Nasaritoquë ya'huérinso' yonisapiramahuë', co huachi iséqué ya'huérinhuë'. Corosëquë chiminaponahuë', nani nanopiantarin. Huëco' po'mopiquë ni'quirico'. Capa huachi. ⁷ Napoaton paatoma', ca'tano'sanënpita sha'huitonco'. Pitronta' sha'huitonco' nitochin. "Quisoso'ton nani pa'sarin Cariria'pa'. I'husha'huitérinquëmaso chachin pa'sarin. Inatohua' quënancoantarama'," itonco', itérin.

⁸ Pipirahuatona', na'pi nanin quëran ta'api. Pa'pi pa'yanahuatona', ropa ropáterapi. Co manta' topihuë'. Pa'yanatona', co piyapi'sa' sha'huitopihuë'.

*Maria Mactarina'ton ya'notérinso'
(Juan 20.11-18)*

[⁹ Tomio tahuëri tashiramiachin Quisoso nanopiantarin. Nanpiantarahuaton, Maria Mactarina'ton ya'notérin. Ina sanapi iráca canchisë sopairo'sari ya'coancantopirinahuë', nani Quisosori inquitérin. ¹⁰ Nani ni'pachina, pa'nin imapisopita sha'huitacaso marë'. Inapitaso' sétatona', na'nëapi.

¹¹ “¡Quisoso nani nanopiantarin! Cari ni'nahuë,” itopirinhuë', co natëpihuë'.

*Catoya'pi ya'notérinso'
(Lucas 24.13-35)*

¹² Ina piquëran cato' imapisopitanta' ninano quëran pipiapi. Paaquëya', Quisosori nisha pochin ya'notérin. ¹³ Nani nohuitahuatona', ca'tano'sanënpita sha'huitoantapirinahuë', co inapita téranta' natëpihuë'.

*Ca'tano'sanënpita ya'notérinso'
(Mateo 28.16-20; Lucas 24.36-49; Juan 20.19-23)*

¹⁴ Ina quëran shonca a'nara ca'tano'sanënpita misaqué coshatasoi', Quisosori ya'notiirin. “¿Onpoatomata', iyaro'sa', co natëtéraramahuë'? Co natantochináchinhue' cancantërama nica. ‘Quisoso nani nanopiantarin. Cari ni'nahuë,’ itopirinënquëmahuë', co natëtéraramahuë'” itérin. ¹⁵ Ina quëran itaantarin: “Ya'ipi parti, iyaro'sa', paco'. Ya'ipi piyapi'sa' noya nanan carinquëma' sha'huitéranguëmaso' sha'huitoco'. ¹⁶ Insosona noya nanan natëhuachina', cha'ësapi. Aporihuanahuatona', imapachinaco, cha'ësapi huachi. Co nanamëhuë natëhuachinahuë', Yosëri ana'intarin. ¹⁷ Natëhuatama', nani ma'sha nisarama' piyapi'sa' nitotacaiso marë'. Chiníquën nanan quéchinquëma' sopairo'sa' a'pacamaso marë'. Nisha nisha nananqué nonsarama'. ¹⁸ Ya'huan mapatama', co manta' onpotarinquëmahuë'. Sonimaonta' nipurinhuë' o'opatama', co chiminaramahuë'. Cania'piro'sa' topinan së'huahuatama', noyatapona',” itérin Quisosori.

*Inápaquë panantarino'
(Lucas 24.50-53)*

¹⁹ Nani ca'tano'sanënpita nontohuachina, inápaquë Sinioro Quisoso panantarín. Yosëri quépantaráhuaton, inchinanën quëran ahuënsérin. ²⁰ Ina quëran ca'tano'sanënpita pa'sahuatona', Quisoso nanamën sha'huirapi. Siniorori chachin catahuarin ni'ton, ya'ipi parti sha'huira'piapi. Yosë nohuantón, piyapi a'naroáchin anoyatopi. Nani ma'sha nanitapapi ayonquicaiso marë'. Ina ni'sahuatona', “No'tëquën nontérinpoa'”, topi ya'ipi piyapi'sa'. Nani huachi.]

Nocasë ninshitërinpoa' Quisocristo naporinso' nitotacaso marë'

Ma'marësona ninshitërinso'

¹ Quisocristo isoro'paquë o'maton, nöya ninin. Na'a piyapi'sari ina naporinso' nani ninshitopi. ² Ca'tano'sanënpitaso' iráca quëran huarë' imatona', naporinso' ni'pi. Nani ya'ipi no'tequën sha'huitérinaco. ³ Canta' ya'ipi nanamën nitotërahuë. Hua'qui' natanato, nani noyá nitotërahuë. Napoaton, iya Tiohuiro ninshichinquën, tñahuë. Quëmaso' pa'pi noya piyapinquën ni'ton, ninshitaranquën. Ya'nan nininso quëran huarë' ya'ipiya ninshitaranquën. ⁴ Na'a piyapi'sa' nani sha'huitopirinëñquënhuë', iporaso' carionta' ninshitaranquën no'tequën nitotamaso marë'.

Coansha Paotista nasitacaso' ninorinso'

⁵ Iráca Irotisé Cotia parti hua'anëntaso', a'na corto hua'an ya'huërin, Sacariasë itopiso'. Ina huëntoa'huanëns', Apiasë huëntoa'hua, itopi. Sa'insö Isapira itopi. Inanta' Aaron shiin, iráca corto hua'an ya'coninso'. ⁶ Cato chachin noya Yosë imapi. Ya'ipi pënëntërinso' no'tequën natëpi. ⁷ Sa'insö nimirinhuë' co hua'huana'pihuë'. Co a'naya tñranta' hua'huin ya'huëtérinhuë'. Nani paiya. So'onta' nani mashoya.

⁸ A'na tahuëri Sacariasë huëntoa'huanëns' Yosë chinotopiso pëiquë pa'pi sirihuitacaiso marë'. Naporö tahuëri sirihuitacaiso' ya'huërin. ⁹ Cotioro'sa' inachintopiso' imatona', Sacariasë huayonpi yonarin pochin nininso' a'pëcaso marë'. Acohuana ya'conahuaton, pimoton nininso' a'périn Yosë yonquicaiso marë'. ¹⁰ A'pëso', na'a piyapi'sa' aipiran huanirahuatona', Yosë nontapi. ¹¹ Naporö acohuana Siniro anquënenëni ya'notimarin. Misa'huaya inchinan quëran huanitimarin. ¹² Anquëni quënanahuaton, pa'yanin. Pa'pi tñ'huarin. ¹³ Anquëniriso nimirinhuë' noya nontërin.

—Ama pa'yanquësohuë'. Quëmaso' Sacariasëñquën, nohuitëranquën. Hua'qui' hui'nahuanacaso' nohuantopiranhuë'. Ina marë' Yosë nontërano' nataninquën. Sa'an hua'huanarin. Huaihuachin, nininëni cari sha'huitaranquëns' acotëquë'. Coansha itëquë'. ¹⁴ Nasitohuachin, noya cancantarán. Na'a piyapi'sari pa'yatapi. ¹⁵ Inaso' nöya quëmapi nípon. Yosëri catahuaarin ni'ton, noya noya nísein. Naporahuaton, co pi'pian tñranta' main o'oponhuë'. Co'huara nasichátëraponhuë', Ispirito Santori ya'coancantarín. Inasáchin natëarin. ¹⁶ Mashotohuachin, pënëntapon. Pënëntohuachin, na'a israiro'sa' Yosë yonquiantapi. ¹⁷ Iráca Iniasë pënëntërinso pochin nöya pënëntarin. Ina pochin chiníquën nanantarin inanta'. Siniro yao'mahuachin, pënëntapon. Pënëntohuachin, quëmapi'sa' hui'ninpitarë' noya ninontantapona'. Iporaso' a'naquëni co Yosë natëpirinahuë'. Ina natanahuatona', no'tequën yonquiapona'. Inari a'chintohuachin, Siniro nohuan-tapona huachi, itërin anquëniri.

¹⁸ —Caso'mashoyaco. Sa'ahuënta' nani paiya. ¿Inaporö' pocoita'manica? ¿Onporahuatota' no'tequën nitochi? tñnin Sacariasë.

¹⁹ —Caso' Capirico. Yosë ya'huërin quëran o'marahuë. Ina a'paimarinco nonta'huanquëns' marë'. Noya nanan sha'huitopiranquënhuë'. ²⁰ Co natërancohuë' ni'quëhuarë', hua'qui' co nonsaranhuë'. Hui'nan nasitaquë huarë' co nonacamaso' nanitaranhue'. Napoaponahuë', no'tequën nontëranquën. Hui'nahuanaran. Tahuërinëni nanihuachin, sa'an huaiarin, itërin anquëniri.

²¹ Piyapi'saso nimirinhuë' Sacariasë ninatona': “¿Onpoatonta' hua'quiarin?” topi.

²² Ina quëran acohuana quëran pipipirihuë', co huachi nanitërinhuë' nonacaso'. Imirin quëran anquitaponahuë', co nanitërinhuë' piyapi'sa' nontacaso'. “Acohuana ya'conin quëran, Yosë nohuanton, hua'narëso pochin quënamara,” topi.

²³ Nani Yosë chinotopiso pëiquë sirihuitohuachina, Sacariasëso' ya'huérin'pa' paan-tarin. ²⁴ Ina quérän co hua'quiya quérantuë' sa'in cayorin huachi. A'natérápo yoqui pochin co intoaso' pa'ninhuë'. Pëinënquë ya'huárin. ²⁵ "Ma noyacha Yosë catahuarinco ni'ton, hua'huanarahuë paya. Ina nohuanton, co huachi tapan ya'huëtarincohuë!", ténin yonquiaton.

Anquëni Maria nontérinso'

²⁶ Nani saota yoquitohuachina, naquéranchin anquëni isoro'paqué o'mantarin, Capiri itopiso'. Nasaritoquë Yoséri a'paimarin, Cariria parti ya'huérinso'. ²⁷ Inaqué a'nara nanon ya'huérin, Maria itopiso'. Cosiri nani nontérin macacaso marë'. Tata masho Tapi shiin inaso'. ²⁸ Anquëni o'marahuaton, Maria itapon:

—I'huata Maria. Siniro noya ni'ninquën. Ina chachin catahuarinquën, itérin.

²⁹ Ina natanahuaton, Maria pa'yanin: "¿Ma'marëta' napotérincoso??" ténin yonquinënquë.

³⁰ —Ama Maria, pa'yanquësohuë'. Yosë noya ni'ninquën. ³¹ Natanco sha'huichinquën. Quëmaso' hua'huanaran. Quëmapia'huaya huaihuatan, Quisoso itéquë'. ³²⁻³³ Mashotohuachin, chiníquën nanantarín. Inaso' Yosë hui'nin. Yosë nohuanton, copirno ya'conarin. Iráca Tata masho Tapi israiro'sa' noya hua'anëntopirinhuë'. Ina quérän chiminin. Iporaso nipurinhuë' hua'huani hua'anëntomiarin. Co onporonta' pipirarinhuë', itérin anquëniri.

³⁴ —¿Onporahuatota' hua'huanapo? Co caso' quëmapi së'huayátérarincohuë', itérin Mari-ari.

³⁵ —Isiprito Santo nohuanton, quëmaora hua'huanaran. Yosë topinan yonquiarapir-inquënhuë', cayoaran. Napoaton hua'huan, Yosë hui'nin chachin nisarin. Co pi'pisha térranta' oshahuanaponhuë'. ³⁶ Ni'quë'. Quëmopinën Isapira itopiso' paiya niponahuë', Yosë nohuanton nani cayorin. Co hua'huana'pihuë' niponahuë', nani saota yoquitarin. Quëmapia'huaya huaipon. ³⁷ Yosë ya'ipi nanitaparin, itérin anquëniri.

³⁸ —Inta nipachin. Yoséechin caso' natéarahuë. Ina nohuanton, hua'huahuë ya'huë'in nipachin, ténin Maria.

Napotohuachina, anquëni pa'nin.

Isapira nicapon pa'ninso'

³⁹ Ina quérän manorahuaton, Mariaso' Cotia motopiro'sa parti pa'nin quëmopinën nicapon. Inaqué canconahuaton, ⁴⁰ Sacariasë pëinënquë ya'conconin. Isapira quénanconahuaton, —I'huata a'shacha, itérin. ⁴¹ Ina natanahuaton, hua'huin yo'namënquë to'mo to'mótarin. Isapiranta' noya cancantérin. Isiprito Santori noyá ya'coancantérin ni'ton, ⁴² pa'yataton, chiníquën itapon:

—I'huata hua'huata'huá. ¡Ma noya Yosë catahuarinquën! A'napita sanapi'sa quérän noya noya ni'ninquën. Hua'huonta' noya noya ni'sarin. ⁴³ Inaso' ya'ipiya hua'anëntarinfoa'. Co caso' chiníquën nanantopirahuë', ¡ma noyacha ina a'shinquën nipuranhue', nicaponco huë'nan paya! ⁴⁴ Quëma nontohuatancora, a'naroáchin hua'huahuënta' yo'namëhuëquë to'mo to'mótarin. Noya cancantaton, naporin. ⁴⁵ "Yosë no'tequëñ nontérinco," ténanso marë' inaso' noya ni'ninquën. Sha'huitérinquëñso chachin acotarinquën, itérin Isapirari.

⁴⁶ Ina quérän Maria tapon:

"Ma noyacha Tata Yosëso paya, ténahuë canta'.

⁴⁷ Anoyacancantérinco ni'ton, noya cancantérahuë.

⁴⁸ Topinan piyapico nipurahuë', yonquirinco.

Ipora quérän huarë' na'a piyapi'sa' nohuitarinaco. 'Ma noyacha Yoséri catahuarin paya,' tosapi.

⁴⁹ Yosëso' ya'ipi nanitaparin. Inaso' noya catahuarinco.

Noya noya ninin.

⁵⁰ Iráca chinotopisopitanta' nosororin.

Ipora huanta' ina chinotohuatéhua', nosoroarinfoa'.

⁵¹ Chiníquën nanantaton, nani ma'sha ninin.

Nocantopisopita atapanin.

⁵² Copirnoro'santa' co noyahue' nipachinara, ocoirin.

Topinan piyapi'sa' ya'huérë' noya acorin.

⁵³ Pahuantérinsopita catahuarin nóya ya'huécaiso marë'.

Ma'huano'saso nimirinhuë', topinan a'parin.

⁵⁴ Israiro'sa' na'con catahuarin.

Piyapinénpita ni'ton, nosororin.

⁵⁵ Iráca Apraan nontaton, 'Nosororanquën. Quëma shiparinpitanta' nosoroato, catahuaarahue', itérin Yosëri.

Ina yonquiaton, ipora catahuarinpoa huachi," ténin Maria.

⁵⁶ Cara yoqui pochin inaquë yacapatérin. Ina quëran ya'huérin'pa' paantarin.

Coansha Paotista nasitérindo'

⁵⁷ Isapira nani tahuérinëñ nanihuachina, huairin. Quëmapia'huaya huairin.

⁵⁸ Quëmopinénpita, ya'cariya ya'huépisopita, inapita natantopi. "¡Ma noya Yosëri catahuarin ni'ton, noya huairin! ta'tona'," nóya cancantopi. ⁵⁹ Hua'huasha posa tahuérithohuachina, marca yaacotopi.

"Niapoqué". Sacariasë itéqué'," itopi a'naquëni. ⁶⁰ A'shinso nimirinhuë', co nohuantérinhuë'.

—Coansha itarai, ténin.

⁶¹ —Ama nisha nininëñ acotéquësuhue'. Quëmopinéñáchin apoqué'. Ina noya, itopi.

⁶² Ina quëran pa'pin ipora huanta' né'huë ni'ton, imirin quëran tasatopi nininëñ nitotacaiso marë'. ⁶³ Pa'pinsö' quirica ma'patahuaton, ninshitérin. "Coansha itarahuë," ténin ninshitaton. Ina nicatona': "¡Ma'pitacha yonquirin paya!" topi. ⁶⁴ Naporo' né'huérindo' inquirahuaton, a'naroáchin noantarin huachi. "¡Ma noyacha Tata Yosëso' ni'ton, catahuarinco paya!" ténin. ⁶⁵ Ina ni'sahuatona', piyapi'sa' pa'yanpi. Ya'ipi Cotia parti nanan nahuinin. ⁶⁶ Ina natanatona', yonquiaipi. "¿Ma'ta' onpoapon iso hua'huasha ni'ton, ipora quëranchin Yosëri na'con na'con catahuararin?" topi.

Sacariasë ninorindo'

⁶⁷ Ina quëran Ispirito Santori noyá ya'coancantohuachina, Sacariasënta' tapon:

⁶⁸ "¡Ma noyacha Tata Yosëso' hua'anéntérinpoa paya!

Piyapinénpitanpoa' yonquiatonpoa', nicha'ësarinfoa'.

⁶⁹ Ina nohuanton, Tata masho Tapi shiin chachin nicha'ësarinfoa'.

Inaso' chini chiníquën nanantapon.

⁷⁰ Iráca quëran huarë' pénéntona'piro'sa' ninopi.

Yosë nohuanton, sha'huitérinénpoa':

⁷¹ 'A'na tahuéri nicha'ësaranquëma'. Co huachi inimicoro'sa' minsëarinéñquëmahuë'.

No'huipirinéñquëmahuë', nicha'ësaranquëma', ténin Yosë, topi.

⁷² Iráca shimashonénpoopita nosoroaton, naporin. Ipora huanta' nosororinfoa'.

Sha'huitérindo' co Yosëri naniantérinhuë'.

⁷³ Tata masho Apraan sha'huitérindo' yonquirárin.

⁷⁴ Napoaton nicha'ësarinfoa'. Co huachi inimiconéñpoopita' minsëarinéñpoahuë'.

Ina quëran co té'huatatéhuahuë', Yosë chinotarihua'.

⁷⁵ Ina pochin cancantatéhua', inasáchin chinotarihua'.

Chiminaquë huarë' nóya nisarihua'.

⁷⁶ Quémanta', conpa, Yosë a'paarinquën piyapinénpita pénénacaso marë'.

Sinioro isoro'paqué yao'marin ni'ton, pénéntaran piyapi'sari natécaiso marë'.

77 Yosë piyapinënpita itapon:
 'Oshanëma' inquitatënquëma',
 Sinioro anoyacancantarinqüëma', itaran.

78 Yosë nosoroatonpoa', inápa quëran a'pintimarinpoa'.
 Pi'i a'pintérinfoaso pochin no'tequen anitotérinfoaso'.

79 Tashinan pochin cancantopirëhuahuë',
 a'pintatë pochin nitarinpoa' noya nanopicaso marë'.
 Anoyacancantuachinpoa', sano cancantarihua', ténin Sacariasë.

80 Ina quëran hui'ninso' so'sorahuaton, hui'napitarin huachi. Yosë yonquiarin ni'ton, chiniquen cancantarín. Inotero parti ya'huéarin. Ina quëran oshaquëran Yosëri sha'huitérin israiro'sa' pënëncasco marë'.

2

Quisoso nasitérinfo' *(Mateo 1.18-25)*

1 Naporo' tahuëri'sa' Noma copirno nanan a'parin, Aocosto itopiso'. Ya'ipi parti a'parin. "Ya'ipinquëma' paco'. Quiricaquë nininëma' niacotoco", ténin. **2** Naporo huarë' ya'ipi piyapi'sa' pichirapi. Sirinioso' Siria parti hua'anëntohuachina, naporin. **3** Natanahuatona', ya'ipi piyapi'sa' pa'pi nininëna' niacotacaiso marë'. Hua'huatopiso' ninanonenäquë pa'pi. Nisha nisha pa'pi.

4 Cosiso' Cariria parti ya'huérin. Nasaritoquë ya'huépirinhuë', ina quëran pipirahuatón, Cotia parti pa'nin. Inaque canconahuaton, Pirin'pa' pa'nin. Iráca Tata masho Tapi inaque hua'huatérin. Ina shiin ni'ton, inaque pa'nin nininëna' niacotacaso marë'. **5** Mariaré chachin pa'nin. Nani ina macacaso marë' nontaponahuë', Yosë nohuantón, inaora cayorin. **6** Nani naniarin huaicaso' ni'ton, inatohua' ni'so', huairin. **7** Paninan huairin, quëmapia'huaya. Në'mëtérinquë so'quëétahuaton, nona'huayaquë acorin, ohuaca coshatérinquë. Huë'ëcaiso' pëi' nani ya'sotopi ni'ton, co inaque huë'ëpatérinhuë'. Napoatón nona'huayaquë hua'huin acorin.

Ohuica pë'tahuana'piro'sa' quënanpiso'

8 Naporo' tashi' ohuica pë'tahuana'piro'sa' pastoquë ya'huérapi. Pirin ya'cariya ya'huérapi. Tashiré chachin ohuicanënapita a'pairapi. **9** Inaque ni'soi', a'nanaya Sinioro anquëninëni ya'notimarin. Huënaráchin huënaráchin a'pintimarin. Yosë pochin a'pinin. Anquëni quënanahuatona', quëmapi'sa' pa'yanpi. **10** Anquëniriso' itapon: "¡Ama pa'yancosohuë!" Noya nanan sha'huichinquëma' ya'ipi piyapi'sa' noya cancantaçaiso marë'. **11** Ipora tashi' a'nara quëmapia'huaya Pirinquë nasitérin. Inaso' Cristo, Yosëri a'paimarinso'. Sinioro ni'ton, chinotacaso' ya'huérin. Nani o'marin piyapi'sa' cancanëna' anoyatacaso marë'. **12** Inaque pa'patama', hua'huishin quënanconarama'. Në'mëtérinquë so'quëétahuatona', ohuaca coshatérinquë acopi. Ina quëran nohuitarama', itérin.

13 Ina quëran a'naroáchin na'a anquëniro'sari ya'notantapi. Yosë chinotatona', itapona':

14 "¡Ma noyacha Yosëo paya! Inápaquë ya'huaponahuë', piyapinquëma' yonquirinquëma'.

Cancantatoma ina yanatéremasopitaso' sano cancantarama', itopi anquëniro'sari.

15 Nani inápaquë panantahuachinara, pë'tahuatona'piro'sa' ninontopi.

—Pirin'pa' pa'ahua' nipachin. Sinioro anitotérinfoaso' nia'ahua', nitopi.

16 Manorahuatona', pa'pi. Canconahuatona', hua'huasha, Maria, Cosi, inapita quënanconpi. Hua'huasha ohuaca coshatérinquë quëhuéánin. **17** Nani ni'sahuatona', na'a piyapi'sa' sha'huitéra'piapi. "Quëmapia'huaya nani nasitérin. Inaso' Cristo, Yosëri a'paimarinso'. Anquëni sha'huitiimarincoi," itera'piapi. **18** Natanahuatona', "Ma'pítacha itérinfoa' paya," topi ya'ipi piyapi. **19** Mariaso nimirinhuë' naporinso' na'con yonquirárin.

²⁰ Ina quëran pë'tahuatona'piro'sa' paantapi. “Ma'pítacha natanëhua paya. Ma'pítacha ni'nëhua paya. Anquëniro'sa' itérinpoaso chachin quënanëhua'. ¡Ma noyacha Tata Yosëo paya!” topi.

Yosë chinotopiso pëiquë quëpapiso'

²¹ Hua'huasha posa tahuëritohuachina, marca acotopi. Naporo' nininën acotopi huachi. Quisoso itopi. Co'huara Maria hua'huayantërasohuë', anquëniri sha'huitérin ina nininën acocaso' ni'ton, napotopi.

²² Moisësë iráca pënëntérin: “Sanapi huaihuachin, a'na yoqui pochin nina'in. Ina quëran Yosë chinotopiso pëiquë ya'coanta'in,” ténin. Cotioro'sa' napopiso chachin a'na yoqui pochin nanihuachina, Maria, Cosi inapitaso Quirosarin'pa' paantapi pënëntérinso' natëcaso marë'. Naporo' hua'huin Yosë chinotopiso pëiquë quëpapi inaquë Yosë nontacaiso marë'. “Iso hua'huasha, Siniro, noya a'paiquë' quëma piyapinën niin,” itopi. ²³ “Paninanso' quëmapi nipachin, Yosë piyapinën ninin,” ténin Moisësë iráca pënëntaton. Napoaton ina pochin nontérin. ²⁴ Naporo' cato' nëpëhuë nípon, cato' pë'tahua nëpëa'huahuë nípon atëpatopi Yosë chinotacaiso marë'. Inanta' Moisësë pënëntérin ni'ton, inapopi.

²⁵ Quirosarinquë chachin a'na quëmapi ya'huérin, Simion itopiso'. Noya quëmapi inaso'. Nani tahuëri Yosë chinotérin. “A'na tahuëri Yosë nicha'ësarinfoa'”, ta'ton, Cristo a'paimacaso' ninarárin. Ispirito Santori noyá ya'coancantérin. ²⁶ Ina nohuanton, Simion nani ninorin. “Sinirori a'paimarinso' nohuitapo. Co'huara chimiyantërapohuë', Cristo o'mararin, ni'sarahuë,” ténin yonquiaton. ²⁷ Naporo' tahuëri Ispirito Santo nohuanton, Yosë chinotopiso pëiquë pa'nin anta'. Cosinta' sa'inë chachin inaquë níspapi. Pënëntopiso' natëtona', inaquë Quisosoa'huaya quëpapi ni'ton, Simioni quënanconin. ²⁸ Hua'huasha quënanahuaton, Simion noya cancantérin. Iporahuaton, Yosë nontérin.

²⁹ “¡Ma noyanquëncha quëmaso', Siniro, ni'ton, a'paimaranso' nani anohuitéranco paya! Napoaton noya ipora caso' chimiin, ténahuë. Sha'huitérancoso chachin nanirin huachi.

³⁰ Iso hua'huasha nani ni'nahuë. Nicha'ëincoiso marë' a'paimaran.

³¹ Ya'ipi piyapi'sa' yonquiaton, a'paimaran.

³² Nisha nisha nananquë nonpisopita a'pintarin no'tëquëñ yonquicaiso marë'.

Israiro'santa' catahuaarin. Piyapinënpita ni'ton, noya noya acorarin,” itérin.

³³ Ina natanahuaton, “¡Ma'pítacha naporin paya!” ténin Cosi. Marianta' inachachin yonquirin.

³⁴ —Yosë noya a'painquëma', itérin Simioni. Ina quëran a'shin itantapon:

—Hua'huan mashotohuachin, ya'ipi israiro'sa' pënënarin. Natanahuatona', a'naquëñ natëtona', noya cancantapi. A'naquëño nípirinhuë' co nohuantapihuë' ni'ton, anotérëso pochin níspapi. Yosë nohuitacaiso marë' no'tëquëñ pënëntapirinhuë', chiníquëñ no'huiapi.

³⁵ Inahuara cancanëna quëran nisha nisha yonquiapirinahuë', inari a'ninquëchin anitotarin. Hua'huan no'huihuachina', quëmaso' chiníquëñ sëtaran. Sahuëníquë ohuaninëñposo pochin sëto ya'coancantarinqüëñ huachi, itérin.

³⁶ A'na sanapinta' inaquë ya'huérin, Ana itopiso'. Inaso' Panino hui'nin, Asirë huëntonquë ya'huérinso'. Yosë nohuanton, nitoninorin. Nani paiya. Nanon nípon, a'na quëmapiri manin. Canchisë pi'ipiachin níquëpasoi', ³⁷ so'ini ayananpirin ni'ton, nani hua'qui' quëyoronin. Nani posa shonca catapini pi'ipitérin. Yosë chinotopiso pëiquë ya'huëmiatérin. Tahuëriré chachin, tashiré chachin Yosë chinotérin. Apira apira Yosë yonquirin. Co cosharo' yonquiatonhuë', Yosë nontárin. ³⁸ Naporo' inanta' huëcaton, Quisosoa'huaya ni'nin. Noya cancantaton, Yosë nontérin.

—Iso hua'huasha nasitérinso marë': “Yosparinqüëñ Siniro,” itérantquëñ, ténin. Ina quëran Yosë imapisopita sha'huitérin.

—Yosë nohuanton, a'paimarinso' nani nasitérin. Inaso' nicha'ësarinfoa', itérin. Na'a Quirosarinquë ya'huëpisopita ina ninarapi ni'ton, napotérin.

Nasaritoquë pantapiso'

³⁹ Ya'ipi iráca pénéntérinso' nani natéhuachinara, Cosiso sa'iné chachin Cariria parti paantarin. Nasaritoquë ya'huantarin. ⁴⁰ Quisoso so'sorahuaton, chinirarin. Nóya yonquirin. Yoséri na'con catahuarin.

Hui'napitahuaton, Yosë chinotopiso pëiquë pa'ninso'

⁴¹ Nani Pascoa tahuëri a'shin, pa'pin, inapita Quirosarinquë pantapi. ⁴² Quisoso shonca cato' pi'ipitohuachina, naquéranchin pantapi cotio niyontonpiso tahuëri na'huëcaiso marë'. ⁴³ Nani na'huëhuachinara, ya'huëpi'pa' pa'mantapirinahuë', Quisososo' co pa'marinhuë'. Hui'napi naponahuë', inaquë inaora quëparitérin. A'shinso' co nitotérinhuë'. Cosinta' co nitotérinhuë'. ⁴⁴ Na'a piyapi'sa' pa'sapi ni'ton, "Nisha huë'sarin," ta'tona', a'na tahuërrira' iratopirinahuë'. I'huanahuanquë Quisoso yonisápirinahuë', co quënanpihuë'. Quëmopinénpita, nohuitopisopita, inapita natanpirinahuë', ⁴⁵ co quënanpachinarahuë', yonicaiso marë' inatohua chachin paantapi.

⁴⁶ Cara tahuëri quëran Yosë chinotopiso pëiquë quënanpi huachi. Maistro'sa' a'chinpique' huënsérahuaton, a'chinpiso' natanarin. Natanahuaton, natantaantarin anta'. ⁴⁷ Na'a piyapi'sa' natanpi. "Ma noyacha yonquirin paya. Nóya a'panitérin," topi.

⁴⁸ Inaquë quënanahuatona', a'shinso' pa'yánin.

—¿Onpoatonta' hua'hua napotérancói? Ni'quë'. Pa'yanatoi, cara tahuëri yonisápirainquënhuë', ipora huarë' quënanainquën huachi, itérin.

⁴⁹ —¿Onpoatonta' yonisápiramacohuë'? Tatahuë pénéñquë ya'huëca'huaso' ¿co nitotéraramahuë' ti? itérin.

⁵⁰ Natanaponahuë', ma'sona tapon naporinso' co nitotopihuë'.

⁵¹ Ina quëran pipihuachina, a'shin, pa'pin inapitarë' Nasaritoquë paantarin. Inaquë paaton, a'shin, pa'pin, inapita noya natérin huachi. Naporinso' a'shini cancanën quëran yonquirárin. ⁵² Naporahuaton, Quisoso hui'napitarin huachi. Noya noya yonquirin. Yoséri noya ni'nin. Piyapi'sarinta' noya ni'pi.

3

Coansha Paotista pénéntérinso'

(Mateo 3:1-12; Marcos 1:1-8; Juan 1:19-28)

¹ Naporo tahuëri'sa' Tipirio itopiso', Noma copirno ya'conin. Nani shonca a'natérápo pi'ipi hua'anéntarin. Ponsio Piratonta' Cotia parti hua'anéntarin. Irotiséso', Cariria parti hua'anéntarin. Iin Pinipi itopisonta', Itoria parti, Traconiti parti, inapita parti hua'anéntarin. Nisaniaséso' nipurinhuë', Apirinia parti hua'anéntarin. ² Anasé, Cai-huasé, inapita corto hua'an chini chiníquën nanantérinso' ya'conpi. Naporo' Coansha pénéntarin. Sacariasé hui'nin inaso'. Inotéro' parti ya'huaso', Yoséri sha'huitérin paaton pénéntacaso marë'. ³ Napoaton ya'ipi Cortanii' parti pa'taton, pénéntárin.

—Co noyahue' yonquiramasopita naniantatoma', Yosë tahuërtantaco' oshanëma' inquichinquëma'. Ina quëran apointaranquëma', itéra'piarin. ⁴ Iráca Isaiasé ninorin. Ninshitaton, naporin:

"Inotéro parti a'na quëmapi pénéntápon.

'Sinioro o'macaso' tahuëri yonquico'. Ni'co'. Hua'an chiníquën nanantona'pi ni'ton, a'na parti yapa'pachina, comisionën a'parin ira tapatacaso marë'.

Ira otëérin noya pa'tacaso marë'.

⁵ Iconantéro'sa' améntarotarin. Panëno'sa' taparoarin. Co'shoninsopita otëarin.

Tomashin acoarin. Ira noya tapahuachina, hua'an pa'nin huachi.

Inapochachin iporaso' co noyahue' yonquiramasopita naniantatoma', cancanëma' anoyatoco' Sinioro o'main.

⁶ Ya'ipi piyapinpoa' nicha'ëinpoaso marë' o'mararin,' tapon ina quëmapi pénéntohuachin," ténin Isaiasé iráca ninoton.

Naporinso chachin Coansha pënëntarin.

⁷ A'naquën aporihuanacaiso marë' huë'pirinahuë', Coanshariso', co yaaporintërinhuë': —Canpitaso' ya'huan pochin cancantatoma', yanonpinama'. “Yosë isoro'pa' ana'intoihuachin, cha'ëpoí quiyanta'”, ¿topiramahuë ti? Topinan aporihuanpatama', co cha'ësaramahuë'. ⁸ Co noyahuë' yonquiramasopita nariantatoma', noya nico'. Ama ninonpintocosohuë'. “Quiyaso' Apraan shinpitacoí ni'toi, Yosë piyapinënpitacoí”, ama tocosohuë'. Yosë nohuantërin naporini, iso na'piro'santa' Apraan shinpitita atarantacaso' nanichitonhuë'. ⁹ Nani Yosë yonquirin oshahuano'sa' ana'intacaso'. Ni'co'. Nararo'sa' co noya nitohuachinahuë', nicosotërë'. Nicosotahuatë', pënqué të'yatërë' huiquitacaso marë'. Inapochachin canpitanta' co noyahuë' nipatama', chiniquën ana'intarinquëma', tënин.

—¿Ma'ta' onpo'ii nipachin? itopi.

¹⁰ —Piyapi'sa ma'shari pahuantohuachina, ama apiratocosohuë'. Cato' a'mocamaso ya'huëtohuachiniquëma', a'nara' quëtoco' a'mo'in. Tanahuachina', a'caco' ca'in, itërin Coanshari. ¹² A'napitanta' aporihuanacaiso marë' huë'pi. Inapitaso' coriqui copirno marë' ma'patona'piro'sa'.

—¿Ma'ta' maistro quiyaso' onpo'ii? itiipi.

¹³ —No'tequën coriqui ma'patoco'. Ama nonpinatoma', na'con na'con ma'patocosohuë', itërin.

¹⁴ Sontaro'santa' huë'pi.

—¿Ma'ta' quiyanta' onpo'ii? itiipi.

—Ama piyapi ahuëatoma', coriqui matocosohuë'. Ama canacaso marë' nonpinapicosohuë'. Nani pahuërehuachiniquëma', ama na'con na'con nohuantocosohuë', itërin.

¹⁵ Piyapi'saso' yonquirapirinahuë'. “¡Ma noyacha Coanshaso' pënëntërin paya! Inaso' Cristo nimara. Nicha'ëinpoaso marë' ¿Yosëri a'paimamara ti?” topi. ¹⁶ Ina natanahuaton, Coanshari itërin:

—Aporintëranquëma mini niperinhuë', co caso' Cristocohuë'. Ca piquëran inaso' huë'sarin. Inaso chini chiniquën nanantërin. Caso' co pi'pisha téranta' ina pochin chiniquën nanantërahuë'. Co maquëyancohue' ni'ton, co sapatëñ i'quirita'huaso téranta' nanitarahuë'. Inaso' huë'pachin, a'naquëma' Ispirito Santo aya'coancantarinquëma'. A'naquëmaso niperinhuë', pënqué chiniquën ana'intarinquëma'. ¹⁷ Cayarinso' manëso pochin nisarin. Arosë mapatëra, to'norarë'. Ina quëran pintiarahuatë', pëiquë acorë'. Sha'huëtënsa niperinhuë' pënqué ahuiquitërë'. Inapochachin ana'intoihuachiniquëma', co onporonta' pën tacopiarinhue', tënín Coansha. ¹⁸ Nani tahuëri ina pochin piyapi'sa' pënénárin. Yosë nanamën a'chintárin.

¹⁹ Irotisënta' hua'an niperinhuë' pënénin. “Quëmaso' pa'pi co noyahuë' ninan. Naporahuaton, iyaparin sa'in osérëtaton, manan. Pinipi sa'in chachin manan. Irotiasi itopiso'. Ina marë' oshahuanan,” itërin. ²⁰ Napotohuachina, Irotisëso' aquë aquëtë' co noyahuë' yonquiaton, Coansha tashinan pëiquë apo'motërin.

Quisoso aporihuaninso'

(Mateo 3.13-17; Marcos 1.9-11)

²¹ Co'huara apo'mochatërasohuë', Coanshari piyapi'sa' aporintahuachina, Quisosonta' huë'nin aporihuanacaso marë'. Nani aporihuanahuaton, Yosë nontërin. Nontaso', pi'iro'të' ni'soatërin. ²² Ispirito Santo nëpë pochin nohuaraimarahuaton, Quisoso ya'coancantomiatërin. Naporo' inápá quëran Yosëri itërin:

—Quëmaso' hui'nahuëñquën chachin ninan. Na'con nosoroatëñquën, nónya ni'nanquën, itërin.

Quisoso shimashonënpita ya'huérinso'

(Mateo 1.1-17)

²³ Ya'nan pënëntapon, Quisoso cara shonca pi'ipitërin. Cosi hui'nin, topirinahuë'. Cosi pa'pinso' Iri itopi. ²⁴ Iri pa'pinta' Matato itopi. Ina pa'pinso' Nihui itopi. Nihui pa'pinta' Miriqui itopi. Ina pa'pinso' Cana itopi. Cana pa'pinta' Cosi itopi. ²⁵ Cosi pa'pinso' Matatiasë itopi. Ina pa'pinta' Amosë itopi. Amosë pa'pinso' Naomo itopi. Ina pa'pinta' Isiri itopi. Isiri pa'pinso' Nacai itopi. ²⁶ Ina pa'pinta' Maato itopi. Maato pa'pinso' Matatiasë itopi. Ina pa'pinta' Simi itopi. Simi pa'pinso' Cosico itopi. Ina pa'pinta' Cota itopi. ²⁷ Cota pa'pinso' Coanan itopi. Ina pa'pinta' Nisa itopi. Nisa pa'pinso' Soropapiro itopi. Ina pa'pinta' Saratiro itopi. Ina pa'pinso' Niri itopi. ²⁸ Niri pa'pinta' Miriqui itopi. Miriqui pa'pinso' Ati itopi. Ina pa'pinta' Cosamo itopi. Cosamo pa'pinso' Irmatamo itopi. Ina pa'pinta' Iri itopi. ²⁹ Iri pa'pinso' Cosoi itopi. Ina pa'pinta' Irisiro itopi. Ina pa'pinso' Corimo itopi. Ina pa'pinta' Matato itopi. Ina pa'pinso' Nihui itopi. ³⁰ Nihui pa'pinta' Simion itopi. Ina pa'pinso' Cota itopi. Ina pa'pinta' Cosi itopi. Cosi pa'pinso' Conamo itopi. Ina pa'pinta' Iriaquimo itopi. ³¹ Ina pa'pinso' Miria itopi. Ina pa'pinta' Mina itopi. Ina pa'pinso' Matata itopi. Ina pa'pinta' Natano itopi. Ina pa'pinso' Tapi itopi. ³² Tapi pa'pinta' Quisi itopi. Ina pa'pinso' Opito itopi. Ina pa'pinta' Pooso itopi. Ina pa'pinso' Sara itopi. Sara pa'pinta' Nasono itopi. ³³ Nasono pa'pinso' Aminatapo itopi. Ina pa'pinta' Atamino itopi. Ina pa'pinso Arni itopi. Arni pa'pinta' Isromo itopi. Isromo pa'pinso' Parisë itopi. Ina pa'pinta' Cota itopi. ³⁴ Ina pa'pinso' Cacopo itopi. Cacopo pa'pinta' Isaco itopi. Isaco pa'pinso' Apraan itopi. Apraan pa'pinta' Tari itopi. Ina pa'pinso' Nacoro itopi. ³⁵ Nacoro pa'pinso' Siroco itopi. Ina pa'pinta' Nacao itopi. Nacao pa'pinso' Parico itopi. Ina pa'pinta' Ipiri itopi. Ipiri pa'pinso' Sara itopi. ³⁶ Ina pa'pinta' Cainano itopi. Cainano pa'pinso' Arapasato itopi. Ina pa'pinta' Simo itopi. Simo pa'pinso' Noi itopi. Noi pa'pinta' Namico itopi. ³⁷ Namico pa'pinso' Matosarino itopi. Ina pa'pinta' Inoco itopi. Inoco pa'pinso' Carito itopi. Ina pa'pinta' Marariro itopi. Ina pa'pinso' Cainano itopi. ³⁸ Ina pa'pinta' Inosë itopi. Inosë pa'pinso' Sito itopi. Ina pa'pinta' Atan itopi. Atanso' Yosëri ninin.

4

Sopairi tënirinso'

(Mateo 4.1-11; Marcos 1.12-13)

¹ Quisoso Cortani quëran pipirahuaton, huëntarin. Ispirito Santori noyá ya'coancantërin. Inasáchin natërin. Naporo' ina nohuanton, inotëro parti pa'nin.

² Inaquë catapini shonca tahuëri ya'huërarin. Naporo' sopairi huëcapairahuaton, sha'huitopirinhue' ama Yosë natëcaso marëhuë'. Catapini shonca tahuëri ya'huaponahuë', co manta' ca'ninhuë'. Ina piquëran tanarin. ³ Tanahuachina, sopairi itérin:

—Tëhuëñchachin Yosë hui'ninquëñ nipatan, iso na'pi cosharo' atarantëquë', itopirin-hue'.

⁴ —Inca co nohuantërahuë'. Yosë quiricanënquë pënëninpoa': "Co cosharoriáchin piyapi ananpirinhuë'. Ya'ipi Yosë nanamëñ natëhuachin tëhuëñchinsø' nanpiarin," ténin, itérin.

⁵ Ina quëran a'na motopi'pa' sopairi quëparin. Ya'ipi ninanoro'sa', ma'shanënpita, inapita a'notërin. A'naroáchin noyápiachin nininsopita, ya'ipi quënanin.

⁶ —Ya'ipi isopita hua'anëntato, carinquëñ quëchinquëñ inapita hua'anëntamaso marë'. Chiníquëñ nanan quëchinquëñ. Insosona nohuantërahuë' nanitërahuë quëta'huaso'.

⁷ Isonahuaton, chinotohuatanco, catahuaaranquëñ ya'ipiya hua'anëntamaso', itérin.

⁸ —Inca co nohuantërahuë'. Yosë quiricanënquë sha'huitërinpoa'. "Siniñoroiáchin chinotëquë'. Inasáchin natëcaso' ya'huërin. Inaso' hua'anëntërinpoa'," ténin, itérin Quisosori.

⁹ Ina quëran Quirosarin'pa' quëpaantarin. Yosë chinotopiso pëi a'canpique' huarë' quëparahuaton:

—Tëihuënchachin Yosë hui'ninquën nipatan, no'paquë niiquë'. ¹⁰ Quiricanënquë nani sha'huitérinquën:

“Yosë, anquëninenpita a'patimarinquën,
co ma'sha onpoaranhuë’.

¹¹ Imirina quëran masarinënquën
ama na'piquë téranta' ya'quiamaso marëhuë'”
ténin ni'ton, no'paquë niiquë' a'painënquën, itérin sopairi.

¹² —Inca co nohuantérahuë'. Yosë quiricanënquë pënëninpao'. “Ama Yosë téniquësuhuë'. Ama camaiquësuhuë'. Ina nohuantérinsoáchin yonquicaso' ya'huérin,” ténin, itérin Quisosori.

¹³ Nani hua'qui' sopairi sha'huitopirinhuë', co yanatérinhuë'. Napoaton patérin. “A'na tahuëri minséapo nimara,” ta'ton, pa'nin huachi.

Quisoso pënëntacaso caniaritérindo'

(Mateo 4.12-17; Marcos 1.14-15)

¹⁴ Ina quëran Cariria parti Quisoso paantarin. Ispirito Santori noyá ya'coancantérin ni'ton, catahuarin nónya nicacaso'. Ya'ipi naporinso' nahuinin. ¹⁵ Nisha nisha niyontonpiso pëiquë a'china'piarin. Achinpachina: “Ma noyacha yonquirin paya,” topi.

Nasaritoquë paantarinso'

(Mateo 13.53-58; Marcos 6.1-6)

¹⁶ Ina quëran Nasaritoquë paantarin. Inaquë so'sorin. Chinoto tahuëri nanihuachina, niyontonpiso pëiquë pa'nin. Nani simana inaquë pa'nin ni'ton, naporo' paantarin. Inaquë ya'conahuaton, Yosë quiricanën nontacaso marë' huanirin. ¹⁷ Isaiasë pënëntérindo' quirica quëtohuachina, manin. Oporinahuaton, nontérin natanacaiso marë'.

¹⁸ “Siniro ispiritonëñ ya'coancantérinco ni'ton, noya catahuarinco.

Na'a piyapi'sa' co Yosë nohuitatonahuë', nosorotopi.

Napoaton Yosë acorinco noya nanan a'chinta'huaso marë'.

Sopairi minsépirinhuë', ocoiarahuë noya yonquicaiso marë'.

Somaraya nininsopita anoyatarahuë.

Parisitapisopita nicha'ësarahuë.

¹⁹ Ipora tahuëri'sa' Yosë nosoroatënquëma', nicha'ësarinquëma huachi, ténahuë. Ina sha'huica'huaso marë' acorinco,” ténin Isaiasë, itérin quirica nontaton.

²⁰ Quirica so'nanaahuaton, niyontonpiso' pëiquë catahuatona'pi quëtaantarin. Ina quëran huënsëhuachina, ya'ipi inaquë ya'huëpisopitaro ni'sápi. ²¹ —Tëihuënchachin iyaro'sa' iráca Isaiasë ninorincoso chachin, Yosë a'paimarinco nicha'ëca'huanquëmaso marë', itérin Quisosori.

²² Ya'ipiya natantapi. “Ma'pitacha nitotaton, naporin paya. Nónya a'chintérinpoa',” ta'tona':

—¿Co'na iso' Cosi hui'nihuë'? topi.

²³ Ina quëran Quisosori itaantarin:

—Iráca quëran huarë' napopi: “Nitanooyatohuatan, quëma'ton nianoyatëquë' ni'ii,” topi. Ina pochin canpitanta' yonquirama' ténahuë. “Capinaomoquë na'a cania'piro'sa' a'naroáchin anoyatérän ni'quëhuarë', iséquënta' anoyatëquë' ni'ii,” itaramaco, ténin. ²⁴ Ina quëran itaantarin:

—Co yanatëtomacohuë', napotëramaco. Ni'co'. Pënëntona'pi pënëntohuachina, nisha nisha parti noya natanpi. Ninanonenquë ya'huëpisopitariso niperinhuë', co noya natanpihuë'. ²⁵ Tëihuënchachin iráca Iniasë pënëntona'pi nanopipon, cara pi'ipi miria co pi'pian téranta' o'naninhuë'. Ya'ipi parti tanarotopi. Naporo' na'a quëyorono'sa' Israiroquë ya'huëpirinahuë', ²⁶ co Yosëri catahuarinhuë'. A'na quëyoronso niperinhuë' Saripitaquë ya'huérin, Siton parti ya'huérinso'. Nisha sanapi níponahuë', Yosëri catahuarin. Inaquë Iniasë a'parin cosharonën ana'atacaso marë'. ²⁷ Irisio pënëntona'pinta' nanopiso',

na'a chana caniori maninsopita Israiro no'paquë ya'huëpirinahuë', co a'naya téranta' anoyatérinhue'. Namanoso' Siria piyapi níponahuë', Yosë nohuanton, anoyatérin. A'naroáchin canio inquirin, ténin Quisoso.

²⁸ Ina natanahuatona', ya'ipi piyapi'sa' chiníquën no'huitopi. ²⁹ Manorahuatona', ninano quëran quëpapi. Ina yonsanquë tahuán ya'huérin. Inatohua' quëpapi të'yatacaiso marë'. ³⁰ Yatë'yatopirinahuë', Quisoso' huancánachin paaton, noya cha'érin.

Sopai a'parinso'

(Marcos 1.21-28)

³¹ Ina quëran Cariria parti paantarin. Capinaomoquë paaton, chinoto tahuëri a'chiantarin. ³² Chiníquën nanantona'pi pochin a'chinarin ni'ton, natanahuatona', pa'yanpi. "Ma noyacha a'chintérinpoa paya," topi.

³³ Niyontonpiso pëiquë chachin a'na quëmapi ya'huérin. Sopairi ya'coancantérin ni'ton, pa'pi co noyahuë' yonquirin. Quisoso quénanahuaton, chiníquën nontérin. Sopairi chachin ichinonin.

³⁴ —¡Tananpitoco! ¿Ma'ta' onpotaponco? ¿Ata'huantaponcoi ti? Nohuitérainquën. Quëmaso' Quisosonquë, Nasaritoquë ya'huéran. Yosë quëran o'maton, noya noya ninan, itérin.

³⁵ Itohuachina, Quisosori itérin:

—¡Ta'téquë! Iso quëmapi quëran pipimiatéquë', itérin.

Sopaiso' quëmapi no'paquë të'yatahuaton, pipirin. Co manta' onpotérinhue'. ³⁶ Ya'ipi piyapi'sa' nicatona', pa'yanpi.

—¡Ma'pítacha Quisoso nitotérin paya! Chiníquën nanantaton, sopairo'sa' ocoirin. Camaihuachina pipipi, nitopi.

³⁷ Quisoso naporinso', ya'ipi parti nahuinin.

Simon Pitro a'shatën a'naroáchin anoyatérinso'

(Mateo 8.14-15; Marcos 1.29-31)

³⁸ Ina quëran niyontonpiso pëi quëran pipirahuaton, Simon pëinënqué pa'nin. Simon a'shatën chiníquën saporin ni'ton, Quisoso sha'huitopi. "A'shacha chiníquën saporin ta'a. Quëmari anoyatéquë' topiraihuë'", itopi. ³⁹ Inaqué paaparahuaton, sapo a'naroáchin inquitérin. Noyatérin huachi. Nani noyatahuaton, inari chachin a'carin, o'shitérin, napotérin.

Na'a cania'piro'sa' anoyatérinso'

(Mateo 8.16-17; Marcos 1.32-34)

⁴⁰ I'huahanuanquë pi'i yaya'conahuaso', na'a cania'piro'sa' nisha nisha caniori maninsopita Quisoso quëshipi. Napohuachinara, a'naya a'naya së'huarahuaton, ya'ipiya anoyatérin. ⁴¹ Sopairi ya'coancantérinsopitanta' quëntapi. Quisosori nontohuachina, sopairo'sa' pipipi. Yapipihuachina', chiníquën nontapi.

—Quëmaso' Yosë hui'ninquë, itopi. Yoséri a'paimarinso' nitotatona', napotopi. Napoaton Quisosori itapon: "Ta'téquë". Ama insonta' sha'huitéquësohuë'", itohuachina, ta'topi huachi.

Nisha nisha parti a'chininso'

(Marcos 1.35-39)

⁴² Tahuëririnquë tashiramiachin Quisoso huënsërahuaton, pa'nin. Ninano quëran pipirahuaton, co piyapi ya'huërinquëhuë' pa'pirinhuë'. Na'a piyapi'sa' ina yonípona' pa'pi. Quénanahuatona', "Ama paquësohuë". Iséquë ya'huaton, a'chintocoi," itopirinahuë', co nohuantérinhue'.

⁴³ —Nisha nisha ninanoro'saquë pacáhuaso' ya'huérin. Inaquénta' Yosë nanamëñ a'chinchí hua'anentérinquë ya'coina'. Ina marë' Yosë a'paimarinco, itérin.

⁴⁴ Ina quëran ya'ipi cotioro'sa' ya'huërin parti pa'sahuaton, niyontonpiso pëiro'saquë a'chinarin.

5

Sami macacaiso marë' Quisosori catahuarinso'

(Mateo 4.18-22; Marcos 1.16-20)

¹ Ina quëran Quisoso Quinisariti sono' yonsanquë a'chinarin. Na'a piyapi'sa' yamorapi. Yosë nanamën natanacaiso marë' huë'pi. Chiníquën ya'quëëtopi.

² Napotohuachinara, cato' poti ni'nin, yonsanquë oshipiso'. Hua'anënpitaso' nonshirahuatona', ritinëna pa'moapi. ³ A'na potiso' Simonquën. Inaqué ya'conahuaton, "Amasha paqué'," itérin. Itohuachina, amasha pa'nin. Inaqué huënsérahuaton, piyapi'sa' a'chintaantarin. ⁴ Nani a'chinpachina, Simon itapon:

—Huéqué' iyasha, amasha anpoqué pa'ahua'. Inaqué ritinëma të'yatoco' sami maca-maquëma', itérin.

⁵ —Capa sami Maistro. Ya'ipi tashi' të'yatopiraihuë', co manta' manaihuë'. Nipirinhuë', quëma sha'huitéranco ni'quëhuarë', naquérenchin të'yatanta'i, itérin Simoni.

⁶ Ina quëran të'yatohuachinara, notohuaro' sami mapi. Hua'huayatérahuë' ni'ton, riti yaoquirin. ⁷ Amiconënpita a'na potiquë ya'huërinso' imirin quëran anquitérin huëcatona' catahuacaiso marë'. Napotohuachinara, huë'pi. Cato' potiquë chachin sami amëntatopi. Napohuachinara, yayanciminapipi. ⁸⁻⁹ Ina nápo' sami ma'ton, Simon Pitro pa'yanin. Quisoso nantën pirayan isonahuaton, itérin:

—¡Ma'pítacha Sinioro nanitaparan paya! Caso' oshahuanco ni'to, co ya'cariancoso' ya'huërinhuë', itérin.

¹⁰ Amiconënpitanta' pa'yanpi, Santiano, Coansha inapita itopiso'. Sipitio hui'ninpita inahuaso'. Ina quëran Simon nontaton, Quisosori itapon:

—Ama iyasha pa'yanquësohuë'. Nani catahuanquen sami macamaso'. Ipora quëran huarëso nipirinhuë', catahuanquen piyapi'sa' macamaso marë'. Inapitanta' imainacoso marë' masaran, itérin.

¹¹ Ina quëran nonshirahuatona', ma'shanënapita patahuatona', Quisoso imapi huachi.

Chana caniori maninso'

(Mateo 8.1-4; Marcos 1.40-45)

¹² Ina quëran a'na ninanoquë paantapi. Inaqué a'na quëmapi ya'huërin, chana caniori maninso'. Noshinën noyá pë'yatérin. Quisoso nantën pirayan isonahuaton, itapon:

—Nohuantohuatan Sinioro, nanitéran anoyatancoso'. Anoyatoco topirahuë', itérin.

¹³ Quisosori së'huarahuaton, itapon:

—Nohuantérahuë mini. Apiramiáchin anoyataranquen, itérin.

Itohuachina, a'naroáchin canio inquirin.

¹⁴ —Ama iyasha piyapi'sa' sha'huitéquësohuë'. Corto hua'ainchin sacatérinquë paaton, noyatéranso' a'notonquë' ni'inquen. Naporahuaton, ofrenda Moisësë camaitérinso' quëpaqué' noyatéranso' nitotacaiso marë', itérin.

¹⁵ Napotopirinhuë', ya'ipi parti nahuinin. Ina quëran hua'huayatérahuë' piyapi'sa' huë'pi Quisoso natanacaiso marë'. Cania'piro'santa' huë'pi anoyatacasó marë'.

¹⁶ Quisososo nipirinhuë', apira apira piyapi'sa' patérin. Co piyapi ya'huërinquëhuë' pa'nin Yosë nontacaso marë'.

Apia anoyatérinsø'

(Mateo 9.1-8; Marcos 2.1-12)

¹⁷ A'na tahuëri Quisoso a'chinaso', parisioro'sa', cotio maistro'sa', inapitanta' inaqué chachin huënséapi. Inapitaso nisha nisha ninano quëran huë'pi. Cariria parti quëran, Cotia parti quëran, Quirosarin quëran, ina quëranpita huë'pi. Nani a'chintohuachina,

cania'piro'sa' anoyatérin. Yosëri catahuarin ni'ton, na'a cania'piro'sa' a'naroáchin anoyatérin. ¹⁸ Ina quëran catapini quëmapi'sa huëcatona', apia pë'sara'huaya pochin ninin-quë quëpi. Hua'qui' co nanitérinhue' huanicaso', quëhuëánin. Quisoso ya'huëarinquë yapo'mopirinahuë'. ¹⁹ Hua'huayatérahuë' piyapi'sa' ya'sopi ni'ton, co nanitopihuë' ya'conacaiso'. Napoaton pëi' nanopétahuatona', a'campiso' pi'pian o'quirahuatona', pë'sara'huayarë chachin anohuaramapi. Huancanachin Quisoso pirayan acomapi. ²⁰ "Ma noya isopita natérinaco," ta'ton, Quisosori apia itapon:

—Oshanën apia'hua inquitaranquën, itérin.

²¹ Ina natanahuatona', cotio maistro'sa', parisioro'sa', inapita yonquipi. "¿Ma quëmapita' isoso'? Yosë yaya'huérétérin. Co insonta' nanitérinhue' oshanënpoa' inquitinpoaso'. Yoséíchin nanitérinso'," topi yonquiatona'.

²² Topinan yonquiarapirinahuë', inaora yonquinën quëran Quisoso nitotérin.

—¿Onpoatomata' co noyahue' yonquirapiramaco? ²³ Canpitaso naporama': "Piyapinpoa a'napita oshanën inquitacaso', co nanitérrehuahuë'. Apia camaiate': 'Huanirahuaton, noya paquë', itacasonta' co nanitaparéhuahuë'," ténama'. ²⁴ Caso nipurinhuë', Yosë quëran quëmapico ni'to, nanan quëtérinco piyapi'sa' oshanëna' inquita'huaso marë'. Canpitanta' ina nitotacamaso marë' iso apia anoyatarahuë, ténin.

Ina quëran apia itantapon:

—Huaniqué', apia'hua. Pë'sara'huaya masahuaton, ya'huëranquë paquë', itérin.

²⁵ Itohuachina, a'naroáchin huanirin. Ya'ipi piyapi'sari ni'pi. "¡Ma noyacha Yosëso' ni'ton, anoyatérinco paya!" ténin. Pë'sara'huayanën masahuaton, ya'huërinquë pa'nin.

²⁶ Ina nicatona' piyapi'saso' pa'yanpi.

—Ma noyacha Yosëri catahuarin ni'ton, a'naroáchin anoyatérin paya. Ma'pítacha ipora ni'nëhua paya, nitopi.

Nihuiri Quisoso imarindo'

(Mateo 9.9-13; Marcos 2.13-17)

²⁷ Ina quëran Quisoso paantarahuatón, a'na quëmapi quënanconin, Nihui itopiso'. (Inachachin Matio itopi anta'.) Coriqui Noma copirno marë' ma'patona'pi inaso'. Coriqui ma'patérinquë huënséarin.

—Huëquë' iyasha imaco, itérin.

²⁸ Napotohuachina, a'naroáchin huanirin. Ma'shanënpita patahuaton, Quisoso imarin.

²⁹ Ina quëran na'a amiconënpita amatérin pëinënquë coshatacaiso marë'. Quisoso nohuitacaiso marë' amatérin. Na'a copirno marë' coriqui ma'patona'piro'santa' huë'pi.

³⁰ Ca'tano'sa' inaquë ni'sahuatona', cotio maistro'sa', parisioro'sa', inapitari no'huipi. No'huitona' itapona':

—¿Onpoatomata' oshahuano'sarë'quëma' coshatarama', o'opatarama', naporama'? Coriqui ma'patona'piro'santa' co noyahue' nipurinahuë', inapitarë'quëma' coshatarama', itopi.

³¹ Natanahuaton, Quisosori itérin:

—Isopitaso' tēhuëñchachin nohuantérinaco imainacoso'. Ni'co'. Cania'piro'sa' notoro nohuantopi. "Co caniorahuë'," topatéra, co notoro nohuantérrehuë'. ³² Oshahuano'sa' pënëna'huaso marë' o'marahuë. "Co noyahue' yonquiramasopita nariantatoma', Yosë tahuérétantaco'," itérahuë. A'napitaso': "Quiyaso' noyacoi," topiso marë' co na'con a'chintérahuë', itérin.

Nasha nanan a'chinindo'

(Mateo 9.14-17; Marcos 2.18-22)

³³ Ina quëran piyapi'sari itaantapi:

—Coansha imarinsopitaso', co coshatatonaraihuë' Yosë nontapi. Parisio imarinsopitanta', inapochachin nipi. Quëma imarinënsopitaso nimirinhue', noya coshatapi, o'osapi, naporapi, itopi.

³⁴ —Ca ya'huarahuë ni'ton, co sëtopihuë'. Ni'co'. Quëmapi sa'acaso marë' piyapi'sa' amatohuachina, capa cancantopi. Nipayarinsopita huë'pachina', noya coshatapi. ³⁵ A'na tahuëriso nimirinhue' inimiconënpitari huëcatona', sa'ana'pi masapi. Quëpatohuachina', co huachi coshatacaiso' yonquiatonahuë' sëtapi. Inapochachin canta' mapachinaco, imarinacosopita sëtapona'. Sëtatona' co huachi coshatacaiso' yonquiatonahuë', Yosë nontápona', tënин.

³⁶ Ina quëran pënënto nanan a'chintaantarin.

—Ni'co'. A'moramaso irácaya nininso' noshatohuachina, co nasha a'morëso yanorëhuë' pa'pitacaso marë'. Nasha a'morëso yanohuatëra, tapirë'. Naporahuaton, nasha në'mëtëqué pa'pitohuatëra, co inashitérinhue'. ³⁷ Huino sha'moronta' yonquico'. Sha'moro' nipachina, co sha'huëtë' morsa mocaro' nininqué ta'panëhuë'. Sa'potohuachina, a'naroáchin nopoitérin. Nopoitohuachina, huino chiniarë'. Morsanta' tapirë'. ³⁸ Sha'moro' huinoso' nasha morsaquë ta'panë'. Huino, morsanta' noya nisarin. ³⁹ Huino hua'qui' acopiso' o'opachinara, co nasha nipiso' nayapihuë'. “Hua'qui' acopiso' noya noya,” topi, itérin Quisosori.

6

Chinoto tahuëri naporinso'

(Mateo 12.1-8; Marcos 2.23-28)

¹ A'na chinoto tahuëri nanihuachina, Quisosori ca'tano'sanënpitarë' pa'sarin. Tricoro' pëntontapona pochin, ca'tano'sanënpita a'naya a'naya trico moto maraapi. I'shorayarahuatona', caraapi. ² Parisioro'sari ni'sahuatona', itopi:

—¿Onpoatomata' chinoto tahuëri nimirinhue' tricoraya i'shorayarama? Co ipora tahuëri sacatacasohue' nimirinhue'. ¿Onpoatomata' Moisësë pënëntérinso' co natëramahuë'? itopi.

³⁻⁴ Itohuachinara, Quisosori itérin:

—Yosë quiricanëñ ¿co nontëramahuë' ti? Iráca Tapi tanahuachina, Yosë pëinënquë ya'conahuaton, pan Yosë marë' acopiso' ca'nin. Ca'taninsopitanta' tanapi ni'ton, quëtérin, ca'pi anta'. Corto hua'ano'saráchin ina pan capacaiso nimirinhue', Tapiso' ca'nin, itérin.

⁵ Ina quëran itantarín:

—Yosë quëran quëmapico ni'to, chiníquëñ nanantërahuë. Ma'sona chinoto tahuëri noya nicacaso' sha'huichinquëma', itérin.

Imirin tachitérinso'

(Mateo 12.9-14; Marcos 3.1-6)

⁶ Ina quëran chinoto tahuëri naniantahuachina, niyontonpiso pëiquë paantahuaton, Yosë nanamëñ a'chiantarin. Inaquë a'na quëmapi ya'huërin. Inchinan imirin tachitérin ni'ton, co nanitérinhue' së'quëtacaso'. ⁷ “Chinoto tahuëri nimirinhue', Quisosori anoyatapon nimara,” ta'tona', cotio maistro'sa', parisioro'sa', inapitari ni'sápi sha'huirapicaiso marë'. ⁸ Topinan yonquiarapirinahuë', Quisosori ninorin. Napoaton apia itérin:

—Huë'sahuaton huancánachin huaniquë', itérin.

Napoatochuachina, huanirahuaton, inaquë pa'nin. ⁹ Inaquë huanihuachina, Quisosori cotio maistro'sa', parisioro'sa', inapita itérin:

—Chinoto tahuëri noya nicacaso' ya'huërin. Ahuëtacaso', tëpatacaso', co inapita nicacaso' ya'huërinhue'. Cania'pi tananpitohuatoso', co nosoroarahuë'. Napoaton anoyatacaso' ya'huërin, tënahuë caso'. ¿Ma'ta' canpitaso' tënama'? itérin Quisosori.

¹⁰ Napotopirinhue', co manta' topihuë'. Co a'panitohuachinarahuë', a'naya a'naya ni'sarin quëran apia itérin:

—Imiran iyasha ihuequë', itérin. Natëton, ihuehuachina, a'naroáchin noyatérin. ¹¹ Ina marë' ni'sapisopitari chiníquën no'huitona', inahuara capini ninontopi onporahuaton-sona Quisoso ma'sha onpotacaiso'.

Shonca cato' ca'tano'sanënpita acorinso'

(*Mateo 10.1-4; Marcos 3.13-19*)

¹² Ina quëran Quisoso a'na motopia'huaque paantarin Yosë nontacaso marë'. Ya'ipi tashi' Yosë nontárin. ¹³ Tahuërihuachina, imarinsopita pérarin. Huë'pachinara, shonca cato' acorin na'con na'con a'chintacaso marë'. "A'chinacaso marë' a'parahuësopita itaranquëma'", itérin. ¹⁴ A'naso' Simon. Nisha nininën acotérin. Pitro itérin. Iionta' acorin, Antërisë itopiso'. Santiago, Coansha, Pinipi, Partoromi, ¹⁵ Matio, Tomasë, inapitanta' acorin. A'na Santiaconta' acorin. Arpio hui'nin inaso'. A'nanta' Simon itopi. Inaso' copirno no'huina'piro'sa' imapirinhue', iporas' Quisoso imasarín huachi. ¹⁶ Ina quëran cato' Cotasë acorin. A'naso' Santiago hui'nin. A'nanta' Cotasë Iscarioti. Inanta' Quisosori acopirinhue', a'na tahuëri sha'huirapiapon. Inapita Quisosori acorin ca'tanacaiso marë'.

Na'a piyapi'sa' a'chintërinso'

(*Mateo 4.23-25*)

¹⁷ Inapitarë' nohuaraimarahuaton, pastoquë huanirin. Na'a imarinsopita inaque ya'huapi. Notohuaro' piyapi'santa' huë'pi Quisoso natanacaiso marë'. Quirosarin quëran huë'pi. Ya'ipi Cotia parti quëran huë'pi. Marë yonsan quëraonta' huë'pi. Tiro, Siton, inapita ya'cariya ya'huëpisopitanta' huëcatona', noya natanpi. Cania'piro'santa' quëpi anoyatacaso marë'. ¹⁸ A'naquëonta' sopairi ya'coancantérin ni'ton, parisítapirinahuë', inapitanta' anoyatérin. ¹⁹ Ya'ipiya Quisoso së'huacaiso' nohuantopi. Së'huahuachinara, ina nohuanton, a'naroáchin noyatopi.

Noya cancantopisopita

(*Mateo 5.1-12*)

²⁰ Ina quëran ca'tano'sanënpita notëerahuaton, a'chintërin:

"Canpitaso' co na'a ma'sha ya'huëtopirinquëmahuë', Yosë noya ni'sarinquëma'. Catahuarinquëma' noya cancantacamaso'. Hua'anëntërinquë chachin aya'conarinquëma'.

²¹ Iporaso' tanapomarahuë', Yosë'pa' co onporonta' tanararamahuë'. Sano cancantarama'.

Isoro'paquë na'nëpiramahuë', inapaquëso' capa cancantarama'.

²² Yosë quëran quëmapico ni'to, imaramaco. Imaramacos marë' a'naquëen no'huiarinënquëma'. Co huachi quë'yarinënquëmahuë'. Pinosarinënquëma'. Nonpinapiarinënquëma'. Napotopirinënquëmahuë', ama sëtocosohuë'. Ina marë' Yosë noya ni'sarinquëma ni'ton, nöya cancantoco'. ²³ Iráca Yosë piyapinënpita pënëntohuachinara, shimashonëmapitari inapochachin no'huipi. Napoaton a'napita no'huihuachinënquëma', noya cancantoco'. Parisítéramaso marë' Yosë'pa' na'con canaarama'. Ina yonquiatoma', capa cancantoco'.

²⁴ A'naquëmaso' nani ma'sha ya'huëtopirinquëmahuë', jma'huantacha nisarama paya! 'Noya cancantarëhua', topiramahuë', Yosëso' co noya ni'sarinquëmahuë'.

²⁵ Iporaso' noya coshatapiramahuë', jma'huantacha nisarama paya! A'na tahuëriso' co manta' ya'huëtarinquëmahuë'.

Iporaso' capa cancantapiramahuë', jma'huantacha nisarama paya! A'na tahuëriso' sëtatomá', na'nëarama'.

²⁶ Noyasáchin nontinënquëmaso' pa'yatohuatama', jma'huantacha nisarama paya! Iráca nonpin nanan pënëntona'piro'sa pënëntohuachinara, shimashonëmapitari pa'yatopi. Inapochachin iporanta' a'naquëma' niantarama'. Yosëso nimirinhue' ana'intarinquëma', itérin.

Inimicoro'santa' nosorocaso' ya'huërin

(Mateo 5.38-48; 7.12)

²⁷ Ina quëran itaantarin:

"Carinquëma' iyaro'sa', pënëinquëma' natanco. Ya'ipi piyapi'sa' nosorocaso' ya'huërin, ténahuë. Inimiconëmapitanta' nosoroco'. No'huipirinënquëmaonta', ama i'huëretocosohue'. Catahuaco'. ²⁸ Pinopirinënquëmaonta', noya nontoco'. Co quë'yapirinënquëmaonta', ama no'huicosohue'. Yosë nontoco' inahuanta' catahuain. ²⁹ Panpirayahuachinquëen, ama manta' i'huëretéquësohuë'. Naquëranchin panpiantahuachinquëen, co naporo téranta' no'huicaso' ya'huërinhuë'. A'moranso' matohuachinquëen, tananpitëquë' quëpa'in. Aipi a'moransonta quëpatohuachinquëen, ama no'huiquësohuë'. ³⁰ 'Ma'sha quëtoco,' itohuachinquëen, ama apiraquësohuë'. Quëpatohuachinquëen, ama ma'pataantaquësohuë'. ³¹ Noya ninosorocaso' ya'huërin. Canpita nohuantërama' a'napita nosoro'inquëmaso'. Napoaton canpita nohuantëramaso chachin a'napitanta' nosoroco'. Ninosoroatoma', nicatahuaco'.

³² Amiconëmapitaráchin nosorohuatama', co noya noya nisaramahuë'. Oshahuano'sa téranta' inahua capini ninosoropi. ³³ Noya nontérinquëmasopitaráchin catahuahuatama', co noya noya nisaramahuë'. Oshahuano'sa téranta' inahua capini nicatahuapi. ³⁴ No'tequëen pahuëretópisopitarachin coriqui a'napatama', co noya noya nisaramahuë'. Oshahuano'sa téranta' inahua capini nia'nampi. 'Oshaquëran niquëtanta'a,' ta'tona', nia'nampi. ³⁵ Canpitaso nimirinhue' inimiconëmanta' nosoroco'. Inapitanta' catahuaco'. Piyapi'sa' pahuantohuachina', coriqui a'nanco'. 'Co i'huëretaponcohuë' nimara,' tapomarahuënta', a'nanco'. Ina pochin napatama', Yosë'pa' na'con canaarama'. Yosë pochachin cancantarama'. Inaso' ya'ipi piyapi'sa' nosoroaton, catahuarin. Oshahuano'santa' nosororin. Co 'Yosparinquëen,' itopirinahuë', catahuarin. ³⁶ Tata Yoséri ya'ipi piyapi'sa' nosororin. Inapochachin canpitanta' a'napita nosoroco', itérin.

Nocantopisopita pënëninso'

(Mateo 7.1-5)

³⁷ Ina quëran itaantarin:

"Ama iyaro'sa' a'napita nocancosohue'. 'Caso' noya piyapico. Paso' piyapi co noyahue' ni'ton, ana'intacaso' ya'huërin,' topi a'naquëen. Ama ina pochin noncosohue', Yosë ana'intocheinquëma'. A'napita pinotoma' sha'huirapihuatama', Yosënta' inapochachin sha'huirapitëquëma', ana'intarinquëma'. A'napita ma'sha onpotohuachinquëma', nanan anoyatoco'. Canpitanta' oshanëma' Yosë inquichinquëma'. ³⁸ Ama a'napita apiratocosohue'. Ma'sha quëtoco'. Ina marë' canpitanta' Yosë acanaaringquëma'. Co manta' nonpintarinquëmahuë'. Piyapi'sa' nosoroatoma' catahuahuatama', Yosënta' na'con na'con catahuarinquëma'. Apirahuatama', canpitanta' co Yosë catahuarinquëmahuë', ténin.

³⁹ Ina quëran pënënto nanan sha'huitërin yonquicaiso marë': "Somaraya nipachina, co nanitérinhue a'na somaraya nininso' quëpacaso'. Quëparin naporini, cato chachin panca naninquë anochitonahuë'. ⁴⁰ Maistroso' noya noya nitotaton, a'napita a'chintërin. Natanpisopitaso' co na'con na'con nitotopihuë'. Nani ya'ipi a'chintohuachina, maistroneña pochin nisapi.

⁴¹⁻⁴² Co iyaparin nocanacaso ya'huërinhuë'. Inaso pi'pian co noyahue' nipachin, mo'shiri ya'conayatérinso pochin ninin ni'ton, nocanan. Quëmanta' co noyahue' ni-nan ni'ton, narasératë' nani noyá ya'copirayarinquëns pochin nimiranhue', naporan. Napoaton 'carinquëen noya nicatënquëen mo'shi ocoichinquëen,' co itamaso ya'huërinhuë'.

Napotohuatan, nonpinan. Narasératë' niocoitëquë'. Ina quëran noya quënantaran. Naporo huarë' nanitaran iyaparin mo'shi ocoitacaso'," itérin.

Nara pochin nininso'
(Mateo 7.17-20; 12.34-35)

⁴³ Ina quëran itantarín:

"Nara co noyahue' nipachina, napoonin nitérin. Noya naraso nípirihuë' noya nitérin.

⁴⁴ Nitérin quëran nara nohuitëre'. So'huanpiso' co miséra nitérinhue'. Shihuarionta' co quëpa nitérinhue'. ⁴⁵ Inapochachin piyapi'sa' nipi. Noya yonquihuachinara, noya nipi. Co noyahue' yonquihuachinara, co noyahue' nipi. Ma'sona yonquihuachinara, ina chachin nonpi," itérin.

Cato' pëirinso'
(Mateo 7.24-27)

⁴⁶ Ina quëran itantarín:

"A'naquëma' 'Siniro, Siniro,' itapomaracohue', ¿onpoatonta' co natëramacohue'?

⁴⁷ Na'aquëma' natanamacoso marë' huë'nama'. Natëhuatamaco, a'na quëmapi pochin nisarama'. ⁴⁸ Inaso', natëricho quëran yapëirin. Yapëihuachina, noya yonquiaton, noya pëiaquë yonirin. Na'pitë' quënanahuaton, na'pitëquë chachin natëricho quëran pëirin. Pamatochuachina, opotopirihuë', co anotérinhue'. Chinii' níponahuë', co yatë'yatérinhue'. ⁴⁹ A'naquënso nípirihuë' yapëihuachina, co noya yonquirihuë'. 'Inotëquë téranta' pë'i', ta'ton, inaquë pëirin. Ina quëran pamatochuachina, chiniiri a'naroáchin të'yatérin. Ya'ipi noyá quiririn. Inapochachin topinan natanpatamaco, co natëhuatamacohue', co cha'ësaramahuë'" itérin.

7

Capitan piyapinëñ anoyatërinso'
(Mateo 8.5-13)

¹ Piyapi'sa' a'chintahuaton, Quisoso Capinaomoquë pa'nin. ² Inaquë a'na Noma capitán ya'huërin. A'na piyapinëñ chiniquëñ canioton, yachiminin. Hua'anëni noya nosororin. ³ Quisoso canquirinso' natantahuaton, cotio ansiano'sa' amatërin. "Paatoma', Quisoso sha'huitonco' huë'in piyapinëhuë anoyachinco," itahuaton, a'parin. ⁴⁻⁵ Inapitaso Quisosoquë canconahuatona', itapona':

—Paso' capitán amatérinquëñ. Inaso' nisha piyapi níponahuë', nónya quëmapi. Nosoror-inpoa'. Inaora coriquinëñ quëran niyontona'huaiso pëi' ninin Yosë yonquica'huaiso marë'. Napoaton huëquë' piyapinëñ anoyatëquë', chiminpachin, itopi.

⁶⁻⁷ Ina natanahuaton, inapitaré' pa'nin. Capitan pëinëñquë ya'caritérahuaso', amiconënpitari nacapipi. Capitani a'parin Quisoso nontacaiso marë'. "Capitan nanan a'patérinquëñso' sha'huichinquëñ. Naporin: 'Caso' Siniro nontaponquëñ yapa'pirahuë'. Tapanato, co pa'nahuë'. Co caso' quëma pochin noyacohue'. Co pëinëhuëquë téranta' ya'conamaso' ya'huërinhuë'. Topinan camaiquë' piyapinëhuë noyachin. ⁸ Canta' hua'anëhuë natërahuë. Capitanco ni'to, sontaro'sa' camaihuatëra, natërinaco. "Paco'," itohuatëra, pa'pi. "Huëco'" itohuatëra, huë'pi. Piyapinëhuëpitanta' camairahuë. "Sacatoco'," itohuatëra, sacatopi. Napoaton natëranquëñ, ténin capitán," itiipi.

⁹ Quisoso natanahuaton, pa'yatérin. Ina quëran tahuërtahuaton, piyapi'sa' itapon:

—¡Ma noya ina quëmapi natërinco paya! Nisha piyapi níponahuë', israiro'sa quëran noya noya natërinco. Napoaton ca nohuanto, apiramiachin piyapinëñ noyatarin, ténin.

¹⁰ Napotohuachina, capitán amiconënpita ayancoantapi. Cania'pi nani noyatërin quënanconpi huachi.

Hui'napi ananpitaantarino'

¹¹ Ina quëran Quisoso Nainquë ca'tano'sanënpitarë' pa'nin. Na'a piyapi'sari imasapi. ¹² Ninano ya'coanaquë ya'caritérahuaso', na'a ya'huéhuano'sa nacapipi. Chimipi pa'pitacaiso marë' quësapi. Hui'napi niponahuë', a'shin ayananpirin. A'shini imasarín. Inaíchin hua'huin nípirinhuë', chiminin. So'onta' iráca ayarin ni'ton, sa'ahua paiya inaso'. ¹³ Ina quënanahuaton, Quisosori nosororin.

—Ama imoya na'nëquësuhuë', itérin.

¹⁴ Napotahuaton, chimipi acopiquë së'huaconin. Së'huarahuachina, quëparapisopita huanipi. Napohuachina, chimipi itapon:

—Huënséquë' apia'hua, itérin.

¹⁵ Napotohuachina, nanopiantarahuaton huënsérin. Ina quëran nonsarin. Quisosori a'shin itapon: "Ya'huéranquë imoya quëpaantaquë," itérin. ¹⁶ Ina nicatona', ya'ipi piyapi'sa' pa'yanpi.

—¡Ma noyacha Tata Yosëso paya! Ma noya quëmapi a'patimarinpoa' pënëinfoaso marë'. Nani ma'sha nanitaparin, topi.

Ina quëran taantapi:

—Yosë co nariantérinfoahuë'. Catahuarinpoa huachi, topi.

¹⁷ Ananpitaantarimso' ya'ipi Cotia parti nahuinin. Ya'ipiya natantopi.

Coansha Paotistari a'parinsopita

(Mateo 11.2-19)

¹⁸⁻¹⁹ Coansha imarinsopitaso', Quisoso naporinso' sha'huitonpi. Inaso' natanahuaton, yonquiárin. "Quisososo' Yosëri a'paimarinso' nimara. ¿Pahuanarin o'macaso' nica?" ta'ton, cato' imarinsopita a'parin Quisoso natanacaiso marë'. ²⁰ Paatona quënanconpachinara, itapona':

—Coansha Paotista a'pairincoi natana'huainquënsa marë'. ¿Quëmaso' Cristonquëns? ¿Pahuanarin inaso' o'macaso' nica? Co nitotérainhuë'. Sha'huitocoi quiyanta' nitochii, itiipi.

²¹ Naporó chachin na'a cania'piro'sa' ya'huapi, nisha nisha caniori maninsopita. Quisosori a'naroáchin anoyatérin. Sopairo'sari ahua'yantérinsopitanta' huë'pachinara, sopairo'sa' a'patérin. Naporahuaton, ina nohuanton, somaraya nininsopitanta' ni'topi.

²² —Ni'co' iyaro'sa'. Ca nohuanto, somaraya nininsopita ni'topi. Apiaro'santa' a'naroáchin anoyatérahuë. Noya iratopi. Chana caniori maninsopitanta' anoyatérahuë. Në'huéro'santa' në'huépiso' inquitérahuë. Chimipisopita ananpitaantarahuë. Notohuaro' piyapi'sa' co Yosë nohuitatonaraihuë' nosorotápirinahuë', noya nanan a'chintarahuë. Ya'ipi nani ni'nama', nani natanama'. Paatoma', Coansha sha'huitonco' no'tequëns nitochin. ²³ Ya'ipi cancanëma quëran natéhuatamaco, noya cancantarama'. Co nisha nisha yonquiamacoso' ya'huérinhuë', itérin Quisosori.

²⁴ Ina natanahuatona', Coansha sha'huitapona' pa'pi. Nani paantahuachinara, Quisoso a'chiantarin. "Coansha yonquiato a'chinchinquëma'. I'hua inotéro parti ina nicapoma' pa'patamara, inaso Yosë marë chiníquën huanirin quënanconama'. Co piquira ihuani onororinso pochin niconinhuë". ²⁵ Co inaso ma'huano'sa pochin noyápiachin a'morinhuë'. Noyápiachin a'mopisopita, capa cancantacaisoráchin cancantopisopita, inapitaso' copirno pëiro'saqué ya'huépi. Coanshaso nípirinhuë' co ina pochin nininhuë'.

²⁶ Pënëntérinso' natanacaso marë' pa'nama'. Coansha têhuëñchachin nôya pënëntérin. Co topinan quëran pënëntérinhuë'. Yosëri chachin a'parin pënëntacaso marë'. ²⁷ Iráca quiricanënquë ninorin:

'Co'huara a'pamayátérerasëñquënhuë', comisionëhuë a'pararahuë.

Paaton, pënëntapon noya natanainënquënsa marë', itérin Yosëri hui'nin nontaton.

Coansha ninoton, naporin. ²⁸ Iráca quëran huarë' na'a piyapi'sa' pënëntopirinahuë', Coanshaso' noya noya pënëntérin. Inaso noya pënëntopirinhuë', inso térranta' imapachinaco, ina quëran noya noya nisarin. Yosë hua'anëntérinquë chachin ya'conarin, ténahuë," itérin.

²⁹ Nani na'a piyapi'sari Coansha noya natanpi. Copirno marë' coriqui ma'patona'piro'santa' "Yosë noninso' no'tequën pënéninpoa'", ta'tona', aporihuani. ³⁰ Parisioro'saso nimirinhue', co nohuantopihuë' Yosë nanamën natëcaiso'. Coansha no'tequën pënëntopirinhue', topinan quëran natanpi. Napoaton co aporihuani. Cotio maistro'sarinta' co yanatëpihuë'.

³¹ Naquëranchin Quisoso taantarín: "Iporaso' piyapi'sa' nisha nisha yonquipi. ¿Ma pochinta' niconipi? ³² Hua'huar'o'sa pochin cancantopi, tñahuë. Hua'huar'o'sa' cachique ya'nipihuachinara', a'naquën tapona': 'Huëco' pita pochin nicatëhua' ya'nipiahua', ta'tona', quinatopirinahuë', co a'napitaso' nohuantopihuë' nansacaiso'. Ina quëran tantapona': 'Inta nipachin, huëco', chimipi pa'pitopiso pochin nicatëhua' ya'nipiahua', nitantapi. A'naquën sëtatona' na'nérápirinahuë', co a'napitaso' nohuantopihuë' na'nëcaiso'. ³³ Inapochachin ipora nisha nisha yonquirama'. Coansha Paotistaso' huëcapon, co aquëtë' cosharo' yonquirinhue'. Co pi'pian têranta' huino o'orinhuë'. Napopirinhuë', 'Sopai nohuanton, naporin,' toconama'. ³⁴ Ina quëran caso' Yosë quëran quëmapico ni'to, coshatërahuë, o'orahuë. Ina marë' pinoramaco. 'Quisoso coshatárin. O'opatárin. Os-hahuano'sarë' nipayarin,' toconama'. Nisha nisha yonquiconama'. ³⁵ A'naquënso nimirinhue', noya yonquiatona', Yosë natëapi. Pënëntërahuë' natanahuatona', no'tequën yonquiapi huachi," tñin Quisoso.

Sanapi co noyahuë' yonquirinsopita nariantërinso'

³⁶ Ina quëran a'na parisio quëmapiri Quisoso amatérin. "Pëinéhuëquë huëquë' coshatahua'", itérin. Itohuachina, pa'nin. Pëinénuë ya'conconahuaton, misaqué huënséconin. ³⁷ A'na sanapi natantahuaton, inaqué huë'nin. Inaso' oshahuana'pi itopiso'. Pimo hua'sai' potiria'huaquë quënin. ³⁸ Quisoso ya'yoranconahuaton, oshanëen marë' sëtaton na'nérin. Na'néhuachina, na'nëinën quëran Quisoso nantëquën shipitérin. Ainëen quëran amirantërahuaton, apinorantërin. Ina quëran pimo hua'saiquë pashirantëterin. ³⁹ Ina ni'sahuaton, pëi' hua'anëni co noyahuë' ni'nin. Inaora yonquinën quëran yonquirarin. "Quisoso pënëntona'pi naporini, iso sanapi nohuachitonhuë". Oshahuan ni'ton, co së'huacaso' nohuachitonhuë", tñin yonquiaton. ⁴⁰ Yonquirins' nitotaton, Quisosori itérin:

—Iya Simon, pi'pian yasha'huitëranquën, itérin.

—Inta Maistro sha'huitoco, itérin inarinta.

⁴¹ —Cato' quëmapi ya'huëpirinhuë'. Cato chachin patron nihuipi. A'naso' a'natérápo pasa tahuëri canarëso' nihuitérin. A'nanta' a'natérápo shonca tahuëri canarësoichin nihuitérin. ⁴² Capa coriqui pahuërtacaso' ni'ton, cato chachin nihuitopiso' ayatérin. Topinan ayatérin. ¿Insoarita' patronën na'con na'con nosoroarin? ¿Ma'ta' quëma yonquiran? itérin Quisosori.

⁴³ —Na'con na'con ayatérinsoari na'con na'con nosoroarin, topirahuë', tñin.

—Ina mini. No'tequën yonquiran, tñin.

⁴⁴ Ina tosahuaton, sanapi tahuërtahuaton, Simon itérin:

—Iso sanapi ni'quë'. Quëma pëinénuë ya'conpirahuë', co inachintërehuaso' ninanhue'. Co i'sha têranta' quëtérancohue' nipa'morantëcaso marë'. Iso sanapiso nimirinhue' na'nëinën quëran pa'morantërinco. Ainëen quëran amirantërinco.

⁴⁵ Canquipirahuë', co apinorancohuë'. Iso sanapiso nimirinhue' apinorantërinco.

⁴⁶ Ni'toro'sa' huë'pachina, noya hua'saiquë pashimototacaso' ya'huëpirinhuë', quëmaso' co pashimototërancohue'. Iso sanapiso nimirinhue' noya nicatonco, pimo hua'saiquë pashirantëterinco. ⁴⁷ Tëhuëñchachin na'con oshahuanpirinhuë', oshanëen inquitarahue. Napoaton na'con na'con nosororinco, tñahuë. A'naquënso nimirinhue', "Co aquëtë' oshahuanahuë", ta'tona', co onpopinchin nosororinacohue', tñin.

⁴⁸ Ina quëran sanapi itapon:

—Oshanëen imoya inquitéranchue', itérin.

- 49** A'napitaso' natanahuatona', ninontopi.
 —¿Ma quëmapita' isoso'? ¿Oshanëna quëran huarë' inquitacaso' nanitërin ti? nitopi.
50 Quisososo nipurinhue' sanapi itantapon:
 —Natéranco ni'ton, Yosë nicha'érinquen. Noya paquë huachi, itërin.

8

Sanapi'sa' Quisoso catahuapiso'

1 Ina quëran nisha nisha ninanoquë Quisoso pa'nin a'chinapon. A'naquën pancana, a'naquën co pancanayahuë' niponahuë', inaquënta' paaton, noya nanan a'chinarin. "Yosë yahua'anëntérinquëma'", itëra'piarin. Shonca cato' ca'tano'sanënpitari imasapi. **2** A'naquën sanapi'santa' imasapi, canio quëran anoyatérinsopita. A'napitanta' sopairo'sari ya'coancantohuachinara hua'yantopirinahuë', nani anoyatérin. A'nasos Maria Mactarina itopi. Canchisë sopairo'sari ya'coancantopirinahuë', Quisosori inquitërin. **3** Coananta' imarin. Cosa sa'in inaso'. So'inso' ya'ipi Irotisë ma'shanënpita a'pairin. Sosananta' imarin. Inapita imatona', inahuara coriquinëna quëran cosharo' pa'anpi Quisoso, ca'tano'sanënpita, inapita coshatacaiso marë'.

Sha'tona'pi pochin nininso'

(Mateo 13.1-9; Marcos 4.1-9)

4 Nisha nisha ninano quëran huë'pi Quisoso natanacaiso marë'. Notohuaro' niyonton-pachinara, pënënto nanan sha'huitërin.

5 —A'na quëmapi sha'tapon pa'nin. Tricoraya iminquë pa'sarayarin papotacaso marë'. Pa'sarayahuachina, a'naquën iraquë huarë' anotërin. Inaquë piyapi'sa' iratatona', i'natopi. Inairaro'santa' huë'sahuatona', pë'yaquipi. **6** A'naquën ya'pirinso' na'piroquë anotërin. Inaquë papotopirinhuë', shimënsin no'pa' ni'ton, ahuirin. **7** A'naquëonta' nahuanoquë anotërin. Inaquë papotopirinhuë', nahuano'santa' papotërin. A'shinahuatona, imotërin. Napoaton co nitërinhuë'. **8** A'naquënsi nipurinhue' noyaro'paquë anotërin. Inaquë noya papotërin. A'shinchachina, sha'nin quëran na'con na'con nitaton, pasa, pasa nitërin, itërin.

Ina quëran taantarín: —Huëratéhuanpatama', noya natanatomaco, yonquico', itërin Quisosori.

Pënënto nananquë a'chininso'

(Mateo 13.10-17; Marcos 4.10-12)

9 Napotohuachina, ca'tano'sanënpitari itapona': "Achin Maistro naporanso', co nitotériahuë'. ¿Ma'ta' tapon naporan?" itopi. **10** "Yosë hua'anëntérinso' co a'napita nitotopihuë'. Canpitaso nipurinhue' ya'ipiya a'chinchingue'ma' Yosë nanamën no'tëquën nitotacamaso marë'. A'napitaso nipurinhue' co ya'ipiya a'chintarahuë'. Pënënto nananquësáchin a'chintarahuë ni'ton, natanaponaraihuë', co nitotapihuë'. Ma'sona ninahuësonta' nicaponaraihuë', co yonquiapihuë'", itërin.

Tricoraya tapon naporinso'

(Mateo 13.18-23; Marcos 4.13-20)

11 Ina quëran itaantarín: "Achin naporahuëso' iyaro'sa', a'chintanta'inquëma' nitotoco'. Yosë nanamën a'chinpatéhua', tricoraya pa'sarayapiso pochin ninéhua'.

12 A'naquën piyapi'sa' ira pochin nipi. Yosë nanamën natanpirinahuë'. Inairaro'sari huëcapairinso pochin a'naroáchin sopai huë'nin. Yosë nanamën natanpiso' osërétiirin. Ama natëcaiso marëhuë' anariantërin. Natëpi naporini, Yosëri cancanëna' anoyachiton-hue'. **13** A'naquëonta' na'piro pochin nipi. Yosë nanamën natanahuatona', a'naroáchin pa'yatatona', natëpirinahuë'. Co chiniquëñ cancantatonahuë', co natëmiatopihuë'. Ma'sha onpohuachinara, Yosë a'popi. **14** A'naquëonta' nahuano'sa' ya'huërinquë pochin nipi.

Yosë nanamën natanpirinahuë'. Isoro'paráchin yonquiatona', co nanamën yonquipihuë'. Coriquiráchin cancantopi. Nipa'yatacasoáchin yonquirapi. Nahuano'sari imotérinso pochin ma'sharáchin yonquiatona', Yosë nanamën naniantopi. Co huachi natépihuë'. ¹⁵ A'naquën piyapi'saso nipurinhuë' noyaro'pa pochin nipi. Yosë nanamën noya natanpi. Natanaahuatona', noya cancantatona', natétopi. No'téquën yonquiatona', natémiatopi. Ma'sha onpoaponaraihuë', co a'popihuë'. Ya'ipi cancanëna quëran imatona' noya noya nisapi," ténin.

Nanparin pochin nininso'

(Marcos 4.21-25)

¹⁶ Ina quëran a'chintaantarin:

"Nanparin i'chinpihuatera, co i'mëanaquë po'moréhuë'. Co pë'saraanaquë acoréhuë'. Nanparin aconanquë acorë' noya a'pinasco marë'. Piyapi'sa' huë'pachinara, noya quënantopi. Inapochachin Yosë nanamën sha'huitahua' a'napitanta' nitochina'. ¹⁷ Iporaso' ma'sha noyá po'opinan pochin ni'ton, co insonta' nitotérinhuë'. A'na tahuëriso nipurinhuë' ya'ipiya nitotapi.

¹⁸ Napoaton noya natanco'. Noya natéhuatama', na'con na'con nitotarama. A'naquënsi nipurinhuë', 'Nani nitotérahuë', topirinahuë', co yanatépihuë' ni'ton, pi'pian térranta' nitotopiso' Yosëri anariantarin," itérin.

Quisoso quëmopinënpita

(Mateo 12.46-50; Marcos 3.31-35)

¹⁹ Ina quëran Quisoso a'shin, iinpita, inapita huë'pi. Quisoso yanontopirinahuë', na'a piyapi'sa' yamopi ni'ton, co nanitopihuë' ya'conacaiso'. ²⁰ Napoaton a'naquëni sha'huitérin.

—Ni'quë' Maistro. Mamaparin, iyaparinpita, inapita huëcatona', aipiran huaniapi. Yanontérinënquën, itopirinahuë', Quisososo' tapon:

²¹ —Yosë natépisopita iyahuëpita pochin ni'nuhüe. Sanapi'santa' Yosë nanamën natéhuachina', mamahuë pochin ni'nuhüe, itérin.

Ihuan a'parinso'

(Mateo 8.23-27; Marcos 4.35-41)

²² Ina quëran a'na tahuëri ca'tano'sanënpita itapon:

—Aquéteran pa'ahua', itérin.

Potiquë ya'conahuatona', pëntonapi. ²³⁻²⁴ Quisososo' nipurinhuë', huancónenquë huë'érarin. Paaquëya', panca ihuani manin. Co'sacairi potinëñ opoto opototahuaton nani yamëntaitapirinhuë', ca'tano'sanënpitari pa'yanatona', ochinanpi.

—¡Maistro, Maistro, chimiitarihua! Catahuacoi, itopi.

Quisososo' huënsërahuaton, ihuan a'parin. Sononta' panca co'sacaitapirinhuë', asanoirin. A'naroáchin copitënin.

²⁵ —¿Onpoatomata' co natéramacohuë? itérin. Inapitaso nipurinhuë' pa'yanatona', ninontapi.

—¿Ma quëmapicha isoso' ni'ton, ihuan a'parin nicaya? Sononta' a'naroáchin asanoirin, nitopi.

Sopairo'sari ya'coancantérinso'

(Mateo 8.28-34; Marcos 5.1-20)

²⁶ Ina quëran Cariria sono' aquëteran canconpi, Quirasa parti itopiquë. ²⁷ Quisoso nonshiconpachina, a'na quëmapiri nacapirin, na'a sopairo'sari ya'coancantérinso'. Ya'coancantopi ni'ton, co huachi yonquirinhuë'. Hua'qui' co manta' a'morinhuë'. Co huachi pëiquë ya'huërinhuë'. Na'pi naninquë chimipiro'sa' po'mopiquë ya'huárin.

²⁸⁻²⁹ Na'pochuachina catinaquë tanpaquën tonporahuatona', pa'onta' tonpotopirinahuë', oshitérachinin. Sopai nohuanton, co piyapi ya'huërinquëhuë' ta'antarín. Quisoso

quënanaahuaton, nantëntaquë isonquirahuaton, monshorarin. Napohuachina, Quisosori nosoroaton, a'naroáchin sopai itérin:

—Iso quëmapi quëran pipico huachi, itérin. Ina natanahuaton, chiníquën nonin.

—¿Ma'ta' yaonpotarancoi? Quëmaso' Quisosonquën. Yosë hui'ninquën. Yosë marë' ama aparisitocoisohue', itérin.

³⁰ —¿Ma'ninquënta' quëmaso'? itérin.

—Na'a huaranca itérinacoi, topi.

Hua'huayatérahuë' sopairo'sari ya'coancantopi ni'ton, ina pochin ninihuanin.

³¹ “Ama parisitopiquë a'pacoisohue',” itantapi. ³² Ina ya'cariya na'a coshiro'sa' ya'huérin. Panënqué coshatapi. “Coshiro'saquë téranta' a'pacoi ya'coanta'ii,” itantapi. “Inta nipachin, inaquë ya'conco’,” itérin. ³³ Itohuachina, quëmapi quëran pipirahuatona', coshiro'saquë ya'conconpi. Inaquë ya'compachinara, coshiro'santa' hua'yantatona', a'naroáchin tahan pa'topi. Panca sonoquë niitatona', inaquë chimiitopi.

³⁴ Ina ni'sahuatona', coshi a'paina'piro'saso' ta'api. Ninanoquë canconahuatona', sha'huiconpi. Ninano pirayan ya'huépisopitanta' a'naya a'naya sha'huitéra'piapi.

³⁵ Natanahuatona', “¿ma'ta' onpocaiso'?” ta'tona', pa'pi nicapona'. Canquirahuatona', quëmapi hua'qui' hua'yantérinso' quënánquipi. Iporaso' Quisoso ya'cariya huënséarin. Nani a'moanahuaton, noya yonquirin huachi. Co huachi hua'yantérinhuë'. Ina nictatona', pa'yanpi. ³⁶ “Quisosori anoyatérin. Sopairo'sa' a'patahuaton, anoyatérin huachi. Co huachi hua'yantérinhuë',” topi ni'pisopitari. ³⁷ Natanahuatona', ya'huéhuano'saso' pa'pi tē'huatopi. Tē'huatatona', Quisoso itopi: “A'na parti paquë,” itopi. Itohuachinara, potiquë ya'coantarín. ³⁸ Yapa'pachina, quëmapi achin hua'yantérinsori itérin: “Canta' imainquëen, topirahuë',” itérin.

—Ama huëquësuhue'. ³⁹ Ya'huéranquë paantaton, piyapi'sa' sha'huitonquë': “Yosë noyá anoyatérinco,” itëquë', itérin Quisosori.

Napotohuachina, pa'nin. Ya'ipi ninanonënqué sha'huitéra'piarin. “Quisoso noyá anoyatérinco,” itëra'piarin.

Sanapi anoyatahuaton, Cairo hui'nin ananpitaantarinson'

(Mateo 9.18-26; Marcos 5.21-43)

⁴⁰ Quisoso aquëtérán pëntoantarahuaton, na'a piyapi'sa' quënánconin. Inaquë ninarapi ni'ton, canconpachina nóya nontopi. ⁴¹ Naporó' a'na cotio hua'an cairo itopiso huë'nin. Inaso' niyontonpiso pëi' hua'an ya'conin. Quisoso quënánquirahuaton, nantén pirayan isonquirin. “A'naroáchin Sinioro pëinéhuëquë huëquë”. ⁴² Hui'nahuë yachiminarin,” itiirin. A'naíchin hui'nin ya'huëterinso' chiníquën caniorin. Shonca cato' pi'ipitérin. Napotohuachina, inaré' pa'nin. Na'a piyapi'sari imasapi ni'ton, Quisoso ya'quëétérapi.

⁴³ Paaquëya', a'na sanapiri imaqiarin. Hua'qui' panca huënai' a'parárin. Nani shonca cato' pi'ipi co sanorinhue'. Na'a notoro'sari nonënpirinahuë'. Ya'ipi coriqui i'quiapónahuë', co manta' noyatérinhuë'. ⁴⁴ Quisoso pinén quëran huécaton, a'morinso' huirötéíñchin së'huquirin. Së'huahuachina, a'naroáchin huënai' no'narin.

⁴⁵ —¿Inta' së'huarinco? ténin Quisoso. “Co carinquënsó' së'huaranquënhue',” topi ya'ipiya.

—Ni'quëchi Maistro, notohuaro' piyapi'sa' ya'quëétapirinënquënhue': “¿Inta' së'huarinco?” ¿ténan ti? itérin Pitrori.

⁴⁶ —A'nasó' natëtonco, së'huarinco. Së'huahuachincora, nitotérahuë. Ca nohuanto, noyatérin, ténin.

⁴⁷ “Nani nitotérin,” ta'ton, sanapi huë'nin. Pa'yanaton, ropa ropátériarin. Isonquirahuaton, Quisoso itapon: “Hua'qui' caniorahuë ni'ton, së'huaranquën Sinioro. Së'huahuatënquëra, a'naroáchin noyatérahuë,” ténin. Ya'ipi piyapi'sa' natanpi.

⁴⁸ —Natéranco ni'ton, nani imoya anoyatéranguë. Noya paquë huachi, itérin.

⁴⁹ Quisoso nonaquëya', a'na quëmapi Cairo pëinén quëran huë'nin.

—Hui'nan nani chiminin. Ama huachi Maistro apiquësohuë', itérin.

⁵⁰ Quisososo' natanaponahuë', itapon:

—Ama iyasha pa'yanquësohuë'. Natëco, hui'nan noyachin, itérin.

⁵¹ Pëinënqué canconahuaton, ya'conconin. Pa'pin, a'shin, Pitro, Coansha, Santiaco, inapitaíchin quëparin. "Ama a'napitaso' huë'inasohuë'", ténin. ⁵² Na'a piyapi'sa' na'nëtona', ayanápi.

—Ama na'nëcosohuë'. Co sanapia'hua chimininhue'. Huë'ësárin, itérin Quisosori.

⁵³ —Co huë'ërinhuë'. Nani chiminin huachi, itatona', tëhuapi. ⁵⁴ Quisososo nimirinhuë' sanapia'hua maimirarahuaton:

—Huënséquë', apia'hua, itérin.

⁵⁵ A'naroáchin nanopiantarahuaton, huanirin. "Nanon a'caco'", ténin Quisoso. ⁵⁶ A'shin, pa'pin, inapita pa'yanpi. "Ma'pitacha nitotaton, ananpitaantaran paya," itopirinahuë', "Ama a'napita sha'huitocosohuë'", itérin Quisosori.

9

A'chinacaso marë' a'parinso'

(Mateo 10.5-15; Marcos 6.7-13)

¹ Shonca cato' quëmapi'sa' Quisosori nani huayonin na'con na'con a'chintacaso marë'. Ca'tano'sanënpita itopi. Ayontonahuaton, chiníquën nanan quëtérin sopairo'sa' a'pacaiso marë'. Ina nohuanton, nisha nisha caniori maninsopitanta' anoyat-api. ² "Paatoma' iyaro'sa', piyapi'sa' a'chintonco'. 'Yosë yahua'anëntarinquëma'. Huëntonënqué ya'conpatama', noya catahuarinquëma', itoco'. Cania'piro'santa' anoyatoco'. Carinquëma catahuaranquëma' anoyatacamaso marë'", itérin. ³ —Pa'patama', ama manta' quëpacosohuë'. Pitana, pë'pëto, pan, coriqui, inapita ama quëpacosohuë'. Ama a'moramaso téranta' cato' quëpacosohuë'. ⁴ Inso pëiquësona yacapatoahuatama', ina pëiquéráchin ya'huëco'. Ina ninano quëran pipiamaqüe huarë' inaquë ya'huëco'. ⁵ A'na ninanoquë pa'patama', "Ama isëquë huëcosohuë". Co yanatanainquëmahuë", itohuachinënquéma', patoco'. Yapa'patama', pënëncö'. "Nani sha'huitopirainquëmahuë". Co nohuantéraramahuë' ni'ton, campitaora tëhuëñëmaquë nina'intarama'", itoco'. Ina quëran a'na parti paco', itérin Quisosori.

⁶ Ina quëran ca'tano'sanënpitari pa'sahuatona', noya nanan a'china'piapi. Nisha nisha ninanoquë pënëna'piapi. Na'a cania'piro'sa' anoyatopi.

Coansha Paotista tëpapiso'

(Mateo 14.1-12; Marcos 6.14-29)

⁷ Napopiso' ya'ipi parti nahuinin. Cariria hua'an Irotisé itopisonta' natantérin. Natantahuaton, nisha nisha yonquirin. "¿Inta' Quisososo'?" itohuachinara, "Coansha Paotista nanopiantarinso' nimara," topi a'naquën. ⁸ "Co inahuë". Iniasë ya'noantarinsono' nimara," topi a'naquëonta". "Co inahuë". A'na pënëntona'pi iráca chiminpirinhuë', nanopiantarinso' ipora," topi a'napitanta'.

⁹ Ina natanaton, hua'ani itérin:

—Cari Coanshaso' atëpatérahuë, nishitëconotopi. Ina quëmapiso nimirinhuë', nani ma'sha nanitaparin, natantérahuë. ¿Inta' inaso' nimara? Canta' nohuichi, ta'ton ya'nipishahuë yani'nin.

Cosharo' ana'atërinso'

(Mateo 14.13-21; Marcos 6.30-44; Juan 6.1-14)

¹⁰ Ca'tano'sanënpita huëntarahuatona', Quisoso sha'huitiipi. "Nani a'chinai. Cania'piro'santa' anoyatérail," itiipi. Napotohuachinara: "Huëco' iyaro'sa' canpoara

pa'ahua'," itérin Quisosori. Itohuachina, Pitsaitaquë pa'pi. ¹¹ Na'a piyapi'sari natanahu- atona', imapi. Canquihuachinara, Quisosori noya nontérin. Yosë hua'anéntérinqué ya'conacaiso' a'chintarin. Nani a'chintahuaton, cania'piro'sa' a'naroáchin anoyatérin.

¹² Nani i'huararahuaso', ca'tano'sanénpitari itiipi:

—Nani i'huarin. Co manta' iséquë ya'huérinhue'. Piyapi'sa' a'paqué' pa'ina'. Isoshara'huaya ninanoro'sa', pëiro'sa', inapita ya'huérin. Inaquë cosharo' pa'anatona', ca'ina'. Naporahuatona', inaquë huë'ëpachina', itopi.

¹³ —Canpitari a'caco', itérin Quisosori.

—Capa iséquë capacaso'. A'natérápoya pan, catoya sami, inaíchin ya'huétérincoi. Notohuaro piyapi'sa' ya'huérin. Quiya pa'anahuatoi, ¿ina nápo' ya'pi a'ca'ii ti? itopi.

¹⁴ A'natérápo huaranca pochin quëmapi'sa' ya'huëpi ni'ton, napopi. Ina quëran ca'tano'sanénpita itérin:

—Piyapi'sa' sha'huitoco' huënsë'ina'. A'natérápo shonca, a'natérápo shonca pochin huënsë'ina', itérin.

¹⁵ Sha'huitohuachinara, ya'ipiya huënsëpi. ¹⁶ Nani huënsëhuachinara, Quisosori a'natérápoya pan, catoya sami, inapita ma'patérin. Inápaqué né'pëtahuaton, Yosë nontérin: "Yosparinquén, Tata," itahuaton, pan, sami, inapita sé'panahuaton, ca'tano'sanénpita quëtérin. "Piyapi'sa' quëtonco' ca'ina'," itérin. ¹⁷ Quëtuhuachinara, ya'ipi piyapi'sa' coshatopi. Natéaquéhuaré' coshatopi. Ina quëran ca'tano'sanénpitari pë'sotopiso' masahu- atona', shonca cato' i'më' améntatopi.

Pitro natétérinso'

(Mateo 16.13-19; Marcos 8.27-29)

¹⁸ A'na tahuëri Quisoso inaora pa'nin Yosë nontacaso marë'. Ca'tano'sanénpitaráchin inaquë ya'huëpi. Nani Yosë nontohuachina, Quisosori itérin:

—Nani ma'sha nanitaparahuë ni'to, ¿in pochinta' piyapi'sa' cancantiarinaco? itérin.

¹⁹ —"Coansha Paotistaco' nanopiantarinso'," topi a'naquën. "Co inahuë'. Tata Iniaséco' nanopiantarinso'," topi a'naquëonta'. "Co inahuë'. A'na pënëntona'pi iráca chiminpirin- huë', nanopiantarinso' nimara," topi a'napitanta', itopi.

²⁰ —Canpitaso nípirinhuë' ¿ma'ta' yonquirama'? itérin Quisosori.

—Quëmaso' Cristo, Yosë a'paimarinquéenso', itérin Pitrori.

Chiminacaso' ninorinso'

(Mateo 16.20-28; Marcos 8.30-9.1)

²¹ Pitrori napotopirinhuë: "Ama inaso' ipora a'napita sha'huitocosohuë," itahuaton, sha'huitérin: ²² —Yosë quëran quëmapico níporahuë', na'con parisita'huaso' ya'huérin. Cotio ansiano'sa', corto hua'ano'sa', cotio maistro'sa', inapita co huachi quë'yaponacohuë'. Tëpararinaco. Napoapónahuë', cara tahuëri quëran Yosë ananpitaantarino, itérin.

²³ Ina quëran piyapi'sa' pënëntarino.

—Yaimapatamaco, campitaora nohuantéramaso' naniantoco'. Yosë no- huantérinsoráchin imaco huachi. Coroséquë chiníquën parisitërë'. Canpitanta' parisitapomarahuë', nani tahuëri imamiatoco. ²⁴ Noya nanopicamasoáchin yonquihuatama', topinan quëran nanoparama'. A'na tahuëri chiminatoma', parisitomiatarama'. Nípirinhuë', casáchin yonquihuatamaco, parisitapomarahuë', co topinan quëran nanoparamahuë'. Yosë'pa' nanopimiatarama'. ²⁵ Ya'ipi ma'sha isoro'paqué canapiramahuë', co hua'yanëma' cha'ëpachinhuë', co canamiataramahuë'. ¡Onponta' pahuérëtapiramahuë', co huachi hua'yanëma' nanitarinhuë' cha'ëcaso'!

²⁶ Imapatamaco, tëhuaponéñquëma'. Tapayatomaco a'pohuatamaco, a'na tahuëri carinquémanta' a'poaranquëma'. Nanamëhuë a'pohuatama', carinquémanta' o'mantahuato, a'poaranquëma'. Yosë quëran quëmapico ni'to, o'mantararahuë. Tata huënaratérinso pochin canta' huënaratarahuë. Noya anquéniro'sapitaro'co

o'mantararahuë. ²⁷ No'tëquën itaranquëma'. Yosë isoro'pa' hua'anëntapon. A'naquëma' co'huara chimiantërasëñquëmahuë', hua'anëntërinso' ni'sarama', itérin.

Nisha pochin ya'norinso'
(Mateo 17.1-8; Marcos 9.2-8)

²⁸ Posa tahuëri quëran Quisoso motopiquë pa'nin. Pitro, Coansha, Santiacos, inapitaráchin quëparahuaton, Yosë nontacaso marë' pa'nin. ²⁹ Yosë nontaso', nisha pochin ya'norin. A'morinsonta' huënaráchin huënaráchin ninin. Huirí huiríchín. ³⁰⁻³¹ A'nanaya Moisésë, Iniasë, inapita ya'nopi. Inahuanta' huënaráchin huënaráchin nipi. Quisosoré' ninontapi. "Quirosarinquë pa'pato, tëpararinaco," itérin Quisosori. ³² Ca'tano'sanënpitaso nimirinhue' huë'el'i iquitatona', yahuë'epirinahuë'. Capayatantahuachinara, Quisoso huënaráchin nininso' quënanpi. Moisésë, Iniasë, inapitanta' quënanpi. ³³ Inapitaso' yapanantahuachinara, Pitrori itapon:

—¡Ma noyacha Maistro isëquë huë'nëhua paya! Cara imënamëa'huaya nii, a'nara' quëma marë', a'nanta' Moisésë marë', a'nanta' Iniasë marë', topirahuë', itérin.

Co yonquiatonhuë', napotérin. ³⁴ Napotaquëya', chitorori imotérin. Ya'ipiya imotérin ni'ton, pa'yanpi. ³⁵ Chitoro' huancana quëran Yosëri nontërinso' natanpi. "Isoso' hui'nuhüe huayonahuëso'. Ina natanco," itérin.

³⁶ Nani nontohuachina, ni'sápirinahuë', co a'napita quënanpihuë'. Quisosoráchin quënanpi. Ina yonquiatona', co manta' topihuë'. Nani ni'pirinahuë', naporó tahuëri'sa' co insonta' sha'huitopihuë'.

Hua'huasha hua'yantërinso'
(Mateo 17.14-21; Marcos 9.14-29)

³⁷ Tahuërinquë motopi quëran nohuardimantaráhuatona', na'a piyapi'sa' quënanquimapi. Quisoso yonípona' huë'pi. ³⁸ A'nariso' nontiirin.

—Huéquë' Maistro, hui'nuhüe nitiico. Inaíchin hui'nuhüe nimirinhue', ³⁹ a'nanaya sopairi ya'coancantohuachina, "yai" tosahuaton no'paquë nitë'yatérin. Sa'po sa'po niconin. Pacororárin. Napoin quëran sopairi patohuachina, pa'pi iquirorin. ⁴⁰ Ca'tano'sanënpita nontato: "Sopai inquitoco'," itopirahuë', co nanitopihuë', itérin.

⁴¹ —¡Ma'huantacha ninama paya! Canpitaso' co Yosë natëramahuë'. Co natantochináchinhue' cancantërama'. Nani hua'qui' a'chintopiranquëmahuë', ¿onporo huarëta' yanatëramaco? ténahuë. Hui'nan quëshico, itérin Quisosori.

⁴² Inaquë quëntapirihuë', no'paquë sopairi ataataantarín. Apacoroantarín. Quisosori ni'sahuaton, sopai itérin: "Hua'huasha tananpitëquë". Pipimiatëquë huachi," itérin. A'naroáchin sopai pipirin. Hua'huasha noyatérin huachi. "Pëinënquë iyasha quëpantaquë'," itérin. ⁴³ Ya'ipi piyapi'sari nicatona', pa'yanpi. "¡Ma noyacha Yosëri catahuarin ni'ton, sopai a'parin paya!" topi.

Chiminacaso' ninoantarino'
(Mateo 17.22-23; Marcos 9.30-32)

Ya'ipi piyapi'sari pa'yanatona', anoyatërinso' yonquirápirinahuë', ca'tano'sanënpita itantarín:

⁴⁴ —Noya natanco iyaro'sa'. Yosë quëran quëmapico nimirahuë', a'na tahuëri sha'huirapihuachinco, piyapi'sa' masarinaco. Ina yonquiráco', itérin.

⁴⁵ Natanaponaraihuë', co nanitopihuë' natëtacaiso'. "¿Onpoatonta' ina pochin nontërinpoa'?" topi yonquinëna quëran. Naporahuaton, të'huatatona' co nohuantopihuë' natanacaiso'.

Chini chiníquën nanantërinso'
(Mateo 18.1-5; Marcos 9.33-37)

⁴⁶ Ina quëran ca'tano'sanënpita capini ninontatona', "¿Inquënpoacha chini chiníquën nanantérë'pëhuaya?" nitopi. ⁴⁷ Co natanaponahuë', inaora yonquinën quëran Quisoso nitotérin. Napoaton hua'huasha maimirarahuaton, ya'cariya ahuanirin.

⁴⁸ —Ama chiníquën nanantacamaso' yonquicosohuë'. Imaramaco ni'ton, hua'huasha nosorohuatama', nosoroaramaco canta'. Nosorohuatamaco, co casáchin nosoroarama-cohuë'. Yosënta' nosoroarama'. Inaso' isoro'paqué a'paimarinco. Hua'huar'o'sa pochin cancantopisopita Yosëri noya noya ni'nin, itérin Quisosori.

*Pi'pian nisha imarinso'
(Marcos 9.38-40)*

⁴⁹ A'na tahuëri Coanshari itapon:

—A'na quëmapi Maistro ni'nai. "Quisoso nanan quëtérinco," ta'ton sopairo'sa' a'pararin. Inaso nipurihuë', co quiya pochin imarinquënhuë' ni'ton, co nohuantérahuë'. "Ama inapoquësuhuë'," itérain, itérin.

⁵⁰ —Tananpitoco' sopai a'pa'in. Insosona co inimicotohuachinpoahuë', catahuarin-poa', itérin Quisosori.

Santiaco, Coansha inapita pënéninso'

⁵¹ Nani ya'caritëriarin Quisoso inápaqué panantacaso'. Napoaton "Onpopionta' Quirosarinquë pa'sarahuë huachi," ténin. ⁵² Yapaaton, catoya'pi a'parin. "Paso' ni-nanoqué pa'i, topirahuë'. Paatoma', natantonco' huë'epataquëhua'", itérin Quisosori. Inaquë Samaria piyapi'sa' ya'huëpi. ⁵³ Natanaahuatona', co Quisoso huëcacaso' nohuantopihuë'. Quirosarinquë pa'sarin ni'ton, co nohuantopihuë'. ⁵⁴ Ina marë' Santiaco, Coansha, inapita no'huitopi.

—¿Ma'ta' Sinioro onpochii? Yosë nonchii inápa quëran pën a'paimaton isopita ahuiquichin topirahuë', itopi.

⁵⁵ Tahuërtahuaton: —Ama iyaro'sa' napocosohuë'. Tananpitoco', itérin. ⁵⁶ Ina quëran a'na ninanoqué paantarin.

*Ya'ipi cancanën quëran imacaso' ya'huërinso'
(Mateo 8.19-22)*

⁵⁷ Papona pochin a'na quëmapiri nontiirin:

—Canta' Sinioro imainquën. Inséquësona pa'patan, canta' pa'i, topirahuë', itérin.

⁵⁸ —Sacai' imancoso', ténahuë. Ma'sha tananquë ya'huërinsopita huë'eshinantëna ya'huëtopi huë'ëcaiso marë'. Inairanta' pë'pëtén ya'huëtérin. Caso nipurihuë' Yosë quëran quëmapico naporahuë', co pëi' ya'huëtérincohuë'. Pa'sápato, co ya'huëmiatérahuë', itérin.

⁵⁹ A'nanta' huë'pachina: —Imaquico, itopirihuë'.

—Oshaquëran Sinioro imainquën. Tatahuë nani noyá mashotérin. Chiminpachin, cari pa'pitahuë. Ina quëran imainquën, topirahuë', itérin.

⁶⁰ —A'naquën co nohuantopihuë' imainacosó'. Chimipi pochin cancantopi. Inapitari pa'pichina', ténahuë. Quëmaso nipurihuë', ca na'con na'con yonquiatonco Yosë yahua'anëntérinpoaso' sha'huiquë', itérin Quisosori.

⁶¹ A'na quëmapinta' huëcaton:

—A'na tahuëri Sinioro imasaranguë, topirahuë'. Ipora quëmopinëhuëpita nontéri'i. Nani nontohuato imainquën, itopirihuë', ⁶² Quisosori itérin:

—Ama iyasha, nisha nisha yonquiquësuhuë'. Ni'quë'. A'nëtohuatëra, noya nicatë' ahuëhuatëra, no'tequëñ ahuëre'. Niquë notëtahuatë' ahuëhuatëraso', co noya ahuëréhuë'. Inapochachin nisha nisha yonquihuatama', co nanitaramahuë' Yosë hua'anëntérinso' no'tequëñ imacamaso', itérin.

10

Canchisë shonca catoya'pi a'parinso'

¹ Ina quëran a'napitanta' sha'huitérin pënëntacaiso'. Canchisë shonca cato' quëmapi'sa' huayonahuaton, catoya catoya a'parin. Nisha nisha ninanoquë a'parin. Oshaquëran ina ninanoro'saquë chachin pa'sarin ni'ton, inapita'ton a'parin pënëntacaiso marë'. Yapa'pachinara itapon:

² "Tëhuëñchachin iyaro'sa', isoro'pa' panca imin pochin ninin. Cayarinso' manëso pochachin piyapi'sa' manë' Yosë imacaiso marë'. Na'a piyapi'sa' ya'huëpirinahuë', caraíchin pënëntarin. Napoaton Yosë nontoco' a'napitanta' a'pa'in pënëñchina'. Inaso' ya'ipiya hua'anëntarin. ³ Iporaso' a'paranquëma'. Ni'co'. Carniroa'huaro'sa' co nanitopi-huë' nia'paicaiso'. A'naroáchin tanan ni'niro'sari manin. A'naquën piyapi'sa' ni'niro'sa pochin cancantatona', no'huiponëñquëma'. ⁴ Pa'patama', ama manta' quëpacosohuë'. Pë'pëto, coriqui, sapatë co inapita téranta' quëpacaso' ya'huërinhuë'. Piyapi'sa' nacapi-huatama', ama hua'qui' nontocosohuë'. Manóton paco'. ⁵ A'na pëiquë canconpatama', hua'anën nontoco': 'Thuata iya. Yosë catahuainquëma', itoco'. ⁶ Noya nonto-huachinëñquëma', Yosëri catahuaarin mini. Co'so' noya nontohuachinëñquëmahuë', co Yosëri catahuaarinhuë'. ⁷ Nohuantohuachinëñquëma', ina pëinëñquë yacahuaco'. A'cahuachinëñquëma', ca'co'. O'shitohuachinëñquëma', o'oco'. A'chintarama' ni'ton, topinan ca'co'. Ama nisha nisha pëiquë yaca yacapatérantacosohuë'. ⁸ A'na ni-nanoquë pa'patama', noya nontohuachinëñquëma', inaqué a'chintoco'. Ma'sona a'cahuachinëñquëma', ca'co'. ⁹ Cania'piro'sa' inaqué ya'huëhuachina', anoyatoco'. 'Iso tahuëri'sa' Yosë yahua'anëntarinquëma', itoco'. ¹⁰ A'naquën piyapi'saso niperinhuë' co nohuantarínëñquëmahuë'. Ina ninanoquë canconpatama', cachiquë paatoma', pënëntoco'. ¹¹ 'Nani sha'huitopirainquëmahuë'. Co nohuantéraramahuë' ni'ton, canpitaora tēhuëñëmaquë nina'intarama'. Co natëpiramahuë', Yosëso' yahua'anëntarinquëma', itoco'. ¹² Ayaro' tahuëri nanihuachin, inapitaso' chiníquen parisitapi, tēnahuë. Iráca Sotomaro'saso' pa'pi co noyahue' nipi ni'ton, Yosëri chiníquen ana'intérin. Co natérinacosopitaso niperinhuë', chini chiníquen ana'intarin huachi," itérin.

Nisha nisha ninanoquë ya'huëpisopita pënëñinsö'

(Mateo 11.20-24)

¹³ Ina quëran Quisoso taantarin: "Corasinoquë, Pitsaitaquë inaquépita ya'huëramaso', jma'huantacha nisarama paya! Na'con pënëñpiranquëmahuë', co natëramacohuë'. Ina marë' parisitarama'. Tiroquë, Sitonquë, inaquépitaso niperinhuë' co pënënterahuë'. Co inaqué cania'piro'sa' a'naroáchin anoyatérahuë'. Inaqué naporahuë naporini, oshanëna marë' sétatona', sa'catën nininso' a'moitonahuë'. Huarianoquënta nipa'samototatona' co noyahue' yonquipisopita naniachitonahuë'. ¹⁴ Napoaton iyaro'sa' ayaro' tahuëri nanihuachin, Yosë chini chiníquen ana'intarinquëma'. Tiroquëso', Sitonquëso', co onpopinchin ana'intarinhuë'. ¹⁵ Capinaomoquë ya'huëramasopitanta' co no'téquën yonquiramahuë'. 'Noyaco' ni'toi, Yosë'pa' pa'sarai, ¿topiramahuë' ti? Co inatohua' pa'saramahuë'. Parisitopiquë tēhuëñchinsö' pa'miatarama huachi,' tēnahuë," itérin.

¹⁶ Ina quëran yaa'parinsopita itaantarin:

"Iporaso' pënëntacamaso marë' a'pararanquëma'. Ca ya'huëñnaméhuë pënëntarama'. Noya natanpachinquëma', natanarinaco canta'. Co'so' nohuantohuachinëñquëmahuë', co canta' nohuantarínacohuë'. Co nohuantohuachinacohuë', co Yosënta' nohuan-tapihuë'," itérin Quisosori. Itohuachina, pa'pi huachi. Nisha nisha ninanoquë pënëntéra'piapi.

A'parinsopita huëñtapiso'

¹⁷ Nani pënëntohuachinara, canchisë shonca catoya'pi chachin nónya cancantatona', Quisosoquë huëñtapiso.

—Sopairo'santa' Sinioro nontërai. “Quisoso nanan quëtérincoi ni'ton, a'parainquën,” itohuatëira, pipipi, itopi.

¹⁸ Napotohuachinara, Quisosori itërin;

—Sopai hua'an chachin iráca inápaquë ya'huëpirinhuë', Yosëri të'yatërin. O'cori pochin a'naroáchin anotérinso' ni'nuhü. ¹⁹ Nani nanan quëtérinquëma' canpitanta' sopai minsëcamaso marë'. Ca yonquiatomaco, sopairo'sa' nontohuatama', patarinquëma'. Ya'huan, yonpinca inapita i'natohuatama', co manta' onpotarinquëmahü. Ya'huan yaquëtérinposo pochin sopainta' yaacorinquëma'. Canpitariso nippirinhuë' minsëarama'. Co manta' nanitarinhü' minsëinquëmaso'. ²⁰ Sopairo'sa' a'papiramahuë', ama ina marëáchin noya cancantocosohü. Imaramaco ni'ton, Yosë'pa' pa'sarama'. Inatohua' nininëma' nani ninshitérinquëma'. Ina marë' tēhuëñchinsö' noya cancantoco', itërin.

Tata Yosë anitotérinpoaso'

(Mateo 11.25-27; 13.16-17)

²¹ Naporö' Ispirito Santo nohuanton, Quisoso noya cancantërin. Noya cancantaton, Yosë nontarin. “Ma noyacha, Tata, yonquiran paya. Quëmaso' chini chiníquënanantëran. Inápaquë, isoro'paquë, ya'ipi parti hua'anëntaran. Quëma nohuanton, a'naquën nani ma'sha nitotaponaraihuë', co nanamëni nitotopihuë'. ‘Quiyaora noya noya nitotarai,’ topiso marë', co nanamëni anitotéranhü. Imarinacosopitaso nippirinhuë' catahuaran. ‘Catahuaco Sinioro co caora nanitérahuë’, itohuatichinë, quëma nanamëni chachin anitotëran. Ina marë' Tata, ‘Yosparinquën,’ itëranquën,” ténin, Yosë nontaton.

²² Ina quëran a'parinsopita itantarín. “Tata Yosë nohuanton, chiníquënanantërahuë. Ya'ipi nanamëni anitotérinco piyapi'sa' a'chinta'huaso marë'. Hui'ninco ni'to, tatahuësáchin noyá nohuitérinco. Inapochachin canta' Tata Yosë nohuitérahuë. Casáchin noyá nohuitérahuë. A'naquëni piyapi'santa' caora nohuento, anohuitérahuë. Inapitanta' Yosë nohuitapi huachi,” itërin.

²³ Nani a'chintohuachina, ca'tano'sanënpita amasha quëparahuaton, sha'huitërin: “Isoro'paquë o'mato, nani ma'sha ninahuë. Ma noya Yosë nosororinquëma' ni'ton, ni'nama'. ²⁴ Iráca quëran huarë' na'a copirnoro'sa', pënëntona'piro'sa', inapita ni'namasopita yani'pirinahuë', co ni'pihuë'. A'chintérinquëmasopitanta' yanatanpirinahuë', co natanpihuë”, itërin.

Nosorotona'pi naporinso'

²⁵ Ina quëran a'na maistro iráca nanan noya nitotérinso' huanirahuaton, Quisoso ténicaso marë' itapon:

—¿Ma'ta' Maistro onpo'i nanopimiata'huaso marë'? itërin.

²⁶ —Iráca Yosë quiricanëni quëran ninshitaton, pënëninpoa'. ¿Ma'ta' ténin? itërin.

²⁷ —“Tata Yosë hua'anëntérinpoa'. Ina nosoroco'. Ya'ipi cancanëma quëran, ya'ipi hua'yanëma quëran, ya'ipi chinirama quëran, ya'ipi yonquinëma quëran, ya'ipi inaquëranpita nosoromiatoco'. Isonta' Yosë nohuantërin: Quëmaora ninosororanso pochachin a'napitanta' nosoroco'”, ténin, itërin.

²⁸ —No'téquëni naporan. Ina pochin nipatan, Yosë pochin cancantaton, nanopimataran huachi, itërin Quisosori.

²⁹ —Ina nitotaporahuë', ¿ma'ta' onpo'i? ¿Inpitaquë huaréta' nosoro'i? itaantarín.

³⁰ —Inta nipachin a'chinchinquëni. A'na cotio quëmapi Quirosarinquë ya'huërin. A'na tahuëri Quiricoquë pa'sapirinhuë'. Paaso', tēpatoro'sari mapi. Ahuëatona', ihuapi. Ai'nanpiratopi. Yachimiánin patopi. ³¹ Ina quëran cotio corto hua'an ina ira chachin pa'tapirinhuë'. Quëmapi quënanconaponahuë', pëshonanpirahuaton na'huëtërin. ³² Ina piquëran a'na quëmapinta' pa'sarin. Inaso' Nihui huënton quëmapi ni'ton, corto hua'an catahuarinso'. Inarinta' quënanconaponahuë', inapotaantarin. ³³ Ina quëran Samaria quëmapirinta' quënancoantarin. Inaso' nisha quëmapi naponahuë', nosororin.

³⁴ Ya'cariconahuaton, catahuarin. Pë'shapiso' tomaquë, huinoquë, inaquëpita pashitérin. Inapotahuaton tonpotérin. Ina quëran inaora moranënqué acorahuaton, huë'ëpatacaso pëiquë quëparin. Inaquë a'pairin. ³⁵ Tahuëririnquë catotë' coriqui prata quëran nininso' pëi' hua'anën quëtérin. "Paso' ninanoquë pa'sarahuë. Quëmari a'paiquë'. Coriqui pahuanpachin, quëmaora coriquinën castaqué'. Huënantahuato, i'huërëchinquën," itérin. ³⁶ Ni'quë' iyasha. Caraya'piri ahuëpiso' quënanconpi. ¿Insoarita' iin pochin nosororin? itérin Quisosori.

³⁷ —Nisha piyapiri nosororinso', ténin.

—Ina mini. Paaton, quëmarinta' inapochachin nosoroquë', itérin.

Marta, Maria, inapita napopiso'

³⁸ Ina quëran paantahuaton, a'na ninanoquë canconin. Inaquë Marta ya'huërin:

—Huëquë' Sinioro ni'quicoi, itohuachina, ya'conapatérin. ³⁹ Martaso' cain ya'huëtérin, Maria itopiso'. Quisoso huë'pachina, ya'cariya huënséquirin. A'chininso' noya natanarin.

⁴⁰ Martaso nimirinhuë' cosharo nicaton sacatárin. Nisha nisha yonquiaton, Quisoso huëcapairin:

—Caihuë Sinioro topinan huënséárin. Caora cosharo' nisarahuë. Sha'huitëquë' catahuainco, itérin.

⁴¹ —Imoya. Nisha nisha ma'sha yonquiaton, co noya cancantëranhuë'. ⁴² Casáchin natancoso' na'con na'con nohuantërahuë. Mariaso' natanatonco, noya noya nisarin. Na'con yonquirinco ni'ton, noya cancantomiatarin ténahuë, itérin Quisosori.

11

Yosë nontacaso' a'chininso'

(Mateo 6.9-15; 7.7-11)

¹ A'na tahuëri Quisoso Yosë nontárin. Nani nontohuachina, ca'tano'sanëni itérin:

—A'chintocoi Sinioro Yosë nonta'huaiso'. Coanshaso' imarinsopita a'chintérin. Quiyanta' a'chintocoi nitochii, itérin.

² —Inta nipachin a'chinchingüëma'. Yosë yanontohuatama', iso pochin nontoco': "Tata Yosë, quëmasáchin noya noyanquën ni'ton, ya'ipi piyapi'sa' chinochinënquéen. Chini chiníquën nanantëran ni'ton, ya'ipicoi natëiinquën."

³ Nani tahuëri catahuacoi cosharo' ya'huëchincoi.

⁴ Co noyahuë' nicatoi, oshahuanaí. Nosoroatoncoi, oshanëhuëi inquitocoi. A'napita ma'sha onpotohuachincoi, nanan anoyatéraiso pochachin oshanëhuëi inquitatocoi anoyacancantocoi.

Co noyahuë' yonquihuatoi, catahuacoi a'naroáchin nanianchii," itoco', Yosë nontohuatama', ténin.

⁵ Ina quëran a'chintantarín.

—Ni'co' iyaro'sa'. Ni'toro'sa' huë'pachinara, capa a'cacaso' nipachina, a'na piyapi pëinënqué pa'në!. Yono tashi' nimirinhuë', ma'sha nitonë!. "Cara pan quëtoco iyasha.

⁶ Nipayaraiso' huë'pirinhuë', co manta' a'ca'huaso' ya'huëtérincohuë', ténë!. ⁷ Yono tashi' ni'ton, co nohuantaponhuë' nimara. "Paquë' iyasha. Nani ya'coana oncotërahuë. Hui'nahuëpitanta' huë'ésápi. Co nanitërahuë' quëta'huanquënso'," tapon nimara.

⁸ Nipayarinso' níponahuë', co nohuantopirionta', naquëranchin naquëranchin nitantahuachina, huënséintarahuaton, quëtapon.

⁹ Napoaton Yosë na'con nontoco'. Pahuantërinquëmaso' nipatama', quëtarinquëma'. Ma'sha yonirëso pochin cancantatoma', nontaco' catahuainquëma'. Ya'coana pi'nirëso pochin cancantatoma', nontoco' aya'coinquëma' ¹⁰ Tëhuëñchachin ma'sha nitohuatama', quëtarinquëma'. Hua'qui' ma'sha yonípatama', quënanarama'. Ya'coana pi'nirëso pochin nipatama', i'soatarinquëma'.

¹¹ "Hui'nama' tanaton, 'Sami' nayarahuë,' itohuachinquëma', co ya'huan quëtaramahuë'. Co insonta' nohuantërinhuë' hui'nin inapotacaso'. ¹² Ataricayonta'

natanpachinquëma', co yonpinca quëtaramahuë'. Noya cosharo' quëtarama'. ¹³ Canpitaso' co noyahuë' yonquiapomarahuë', hui'nama' nosororama'. Noya ma'sha quëtérama'. Yosëso' noya noya ni'ton, na'con na'con nosororinquëma'. Inápaquë ya'huaponahuë', hui'ninpita pochin ni'ninquëma'. Nontohuatama', 'Ispirito Santo aya'coancantoco,' itohuatama', aya'coancantarinqüëma', itérin.

*Sopai hua'an minsérinso'
(Mateo 12.22-30; Marcos 3.19-27)*

¹⁴ Ina quëran a'na quëmapi huë'nin. Sopairi ya'coancantérin ni'ton, co nanitérinhue' nonacaso'. Quisosori quënanahuaton, sopai a'patérin. Nani a'patohuachina, noya nonin huachi. Piyapi'sari nicatona', pa'yanpi. "¡Ma noyacha ni'ton, a'naroáchin sopai a'parin paya!" topi. ¹⁵ A'naquënso nipurinhue' nisha yonquipi. "Sopairo'sa' hua'anën Piirsipo itopisoari catahuarin ni'ton, nanitaparin sopai a'pacaso'," toconpi.

¹⁶ A'napitarinta' Quisoso itapona': "Yosë pochin niquë' ni'iinquën," itonpi. Tënicaiso marë' napotopi. ¹⁷⁻¹⁸ Quisososo nipurinhue' yonquipiso' nitotaton, itérin:

"Co Satanasë catahuarincohue' sopairo'sa' a'paca'huaso'. Inaso' sopairo'sa' hua'anën ni'ton, co sopairo'sa' no'huirinhue'. Nino'huipi naporini, co huachi hua'anëna nicacaso nanichitonhuë'. Ni'co'. Ninanoquë ya'huépisopita nino'huipi naporini, yanquë'itonahuë'. Quëmopinëna capininta' nino'huipi naporini, yanquë'itonahuë'. ¹⁹ A'naquën a'chintérmasoarinta' sopairo'sa' yaa'papi. Piirsipo catahuarinco tënama' ni'quëhuarë', inapitanta' inari catahuarin. Napoaton inapita natanpatama', co no'tequëñ yonquiatomahuë' naporamaso sha'huitarinquëma'. ²⁰ Caso nipurinhue', Yosë catahuarinco sopairo'sa' a'paca'huaso'. Ina nohuanton, a'parahuë. Napoaton Yosë chachin a'paimarinco hua'anënta'huanquëmaso marë', ténahuë.

²¹ Quëmapi chiníquën nipachina, pëinën noya a'pairin. Sahuëni, shonqui, inapita ya'huëtérin ni'ton, co insonta' nanitérinhue' ma'shanënpita ihuacaso'. ²² A'nas o nipurinhue' ina quëran chini chiníquën ni'ton, huëcapairahuaton minsérin. Sahuëni, shonqui, inapita matahuaton, ma'shanënpitanta' quiquitérin.

²³ Insosona co imapachincohue', inimicotarinco. Co catahuahuachincohue', piyapi'sa' anishacancantarín ama Yosë imacaiso marëhuë', itérin.

*Sopairi ya'coancantaantarino'
(Mateo 12.43-45)*

²⁴ Naquëranchin a'chiantaton, itaantapon:

"A'na quëmapi ya'huërin. Sopairi ya'coancantopirinhue', ina quëran pipirin. Pipihuachina, inotéro parti pa'sarin. Inséquësona ya'huëcaso marë' yonisapirinhue', co quënaninhue'. Napoaton ina quëmapiquë chachin huëantarín. ²⁵ Inaso' co Yosë yonquiatonhuë', topinan ya'huärin quënanquiantarin. Noya ya'huéantachinachin ni'ton, yaya'coancantantarín. ²⁶ Napoaton paantarahuaton, canchisë sopairo'sa' aquë aquëtë' co noyahuë' nipesopita maantarin. Posa sopairo'sari chachin quëmapi ya'coancantantapi. Inaquë ya'huápi. Quëmapi aquë aquëtë' co noyahuë' yonquirin huachi," itérin.

Noya cancantopisopita

²⁷ Na'a piyapi'sa' natanapi. A'na sanapiso' natanahuaton, itérin:

—Ma noya a'chintérancói. Mamaparinquën hua'huarinquëni ni'ton, ma noya Yoséri ni'nin. ¡Aso'sorinquëni ni'ton, nónya cancanchin! ténahuë, ténin chiníquën nonaton.

²⁸ Inaso napopirinhue', Quisosori itapon:

—Yosë nanamën natanahuatona natëpisopita têhuëñchinso', noya noya cancantapona' ténahuë, itérin.

*Yosë pochin nicacaso' nohuantopiso'
(Mateo 12.38-42; Marcos 8.12)*

²⁹ Na'con na'con piyapi'sa' huë'pachinara, itantarín: "Iporaso' na'a piyapi'sa' co noyahuë' yonquipi. 'Yosë pochin niqué' ni'iinquén. Ina ni'patoi natéarainquén,' itopirinacohuë', co Yosë nohuantérinhuë' ina pochin nica'huaso'. Isoíchin anitotaranquëma'. A'na tahuëri Conasë naporinso pochin nisarahuë. ³⁰ Ninihuiqué ya'huëpisopita co noyahue' nipachinara, Yosëri a'parin pënénacaso marë'. Canta' Yosë quëran quëmapico ni'to, pënénaranquëma' Yosë ayonquianta'huanquëmaso marë'. ³¹⁻³² Ayaro' tahuëri nanihuachin, Ninihuiqué ya'huëpisopita sha'huirapiarinënquëma'. 'Conasë pënénpachincoi, oshanëhuëi marë' sëtërai. Ina naniantatoi, Yosë yonquirai. Canpitaso niperinhuë' noya noya nininso' natanpiramahuë', co natetéraramahuë'. Napoaton na'con na'con oshahuanama', itarinënquëma'. Inapochachin Saromon hua'anëntohuachina, Sor parti quëran sanapi copirno hue'nin ina natanacaso marë'. Ya'ipi nitotérin,' ta'ton, natanapon huë'nin. Napoaton ayaro' tahuëri inanta' atapanarinquëma'. Saromon quëran caso' na'con na'con nitotopirahuë', co yanatéraramacohuë'. 'Ina marë' na'con na'con oshahuanama', itarinënquëma', itérin.

*A'pininso pochin nininso'
(Mateo 5.15; 6.22-23)*

³³ "Nanparin i'chinpihuatéra, co ma'sha acohuana po'orëhuë'. Co i'mëanaquë po'morëhuë'. Nanparin aconanquë acorë'. Ina quëran piyapi'sa' huë'pachina', noya quënantopi. ³⁴ Ya'pirando' nanparin pochin ninin. Ina quëran ma'sha quënanë'. Noya ya'pirando' nipachina, noya quënantérë'. Ya'pirando' co noyahue' nipachina, co noya quënantérëhuë'. Inapochachin noya yonquihuatéra, noya cancantérë'. Co noyahue' yonquihuatéra, tashi pochin cancantérë'. ³⁵ Napoaton, ni'cona tashi pochin cancantotama'. No'tequén a'chintopiranquëmahuë', co noya natanpatamahuë', tashi pochin cancantarama'. ³⁶ Noyasáchin yonquihuatama', co tashi pochin cancantaramahuë'. Nanparin noya orotérinso pochin nisarama'. Noyápiachin cancantarama', itérin.

*Parisioro'sa', cotio maistro'sa', inapita pënéninso'
(Mateo 23.1-36; Marcos 12.38-40; Lucas 20.45-47)*

³⁷ Nani a'chintohuachina, a'na Parisiori amatérin coshatacaso marë'. Ina pënénquë pa'sahuaton, coshatacaso marë' huënsérin. ³⁸ Parisioro'saso' yacoshatochuachinara, i'shaquë pi'pian niopoimiratopi. "Inapohuatéhua', oshanënpoa' inquieréhua'," topi. Quisososo niperinhuë' yacoshatochuachina, co ina pochin nininhue'. Ina marë' pëi' hua'anën pa'yanin. "¿Onpoatonta' topinan coshatarin?" ta'ton, yonquirarin. ³⁹ Yonquirinso' Quisosori ninoton, itérin:

—Canpitaso' aipi quënanamasoráchin yonquipiramahuë', Yosëso' acopo' cancanëma quëran yonquiramasopita ni'nin. Ni'co'. A'naquén minë', sénan, inapita pa'mohuachinara, pinénáchin pa'mopipi. Acoposo niperinhuë' në'huënanterërin. Inapochachin canpitaso' cancanëma quëran co noyahue' yonquirama'. Piyapi'sa' nonpintatoma', yaihuarama'. Pa'pi co noyahue' cancantérama'. ⁴⁰ Co no'tequén yonquiramahuë'. Co nonënpoáchin Yosë acotérinpoahuë'. Cancanënpoanta' acotérinpoa'. ⁴¹ Cancanëma quëran huarë' sa'ahuaros'a' catahuaco'. Nosorohuatama', noyápiachin cancantarama'.

⁴² "Parisioro'sanquëma', jma'huantacha canpitaso' nisarama paya! 'Nani ma'sha canarëhua quëran, diesmo Yosë quëtacaso' ya'huérin,' itérinpoa' Moisësë. Ina natépiramahuë', co noya ninamahuë'. Nani ma'sha sha'nama quëran, diesmo quëtérama'. Ya'ipi cosharo' apimotacaso marë' sha'namaso manama quëran huarë', diesmo quëtérama'. Napoaponahuë', co Yosë nosororamahuë'. Piyapi'santa' yanopintérama'. Ina marë' Yosë ana'intarinquëma'. Diesmo Yosë quëtacaso' noya niperinhuë', nosorocaso' na'con na'con nohuantérin.

43 Parisioro'sanquëma', *¡ma'huantacha canpitaso' nisarama paya!* Niyontonpiso pëiquënta' piyapi'sa' nocanama'. Hua'ano'sapitarë'quëma' yahuënsëconama'. 'Ma noyacha canpitaso' nitotërama', itohuachinënquëmara, pa'yatërama'. Cachique pa'patamara: 'Huë'cama maistro,' itohuachinënquëmara, pa'yatërama'.

44 *¡Ma'huantacha canpitaso' nisarama paya!* Chimipi pa'pitopiso pochin niconama'. Co corosë acotohuachinarahuë', acopo' co nishinahuën' nisarinso co nitotatonaraihuë', piyapi'sari i'natopi," itérin Quisosori parisioro'sa' nontaton.

45 A'na cotio maistrori natanahuaton, no'huirin.

—Ina pochin pënëntaton Maistro, quiyanta' anatantarancoi, itérin.

46 Napotohuachina, cotio maistro'santa' pënëñaton, itapon:

—*¡Ma'huantacha canpitanta' nisarama paya!* Na'con piyapi'sa' pënëñpiramahuë', nani ma'sha natëcaiso' sha'huitërama' ni'ton, panca pë'pëtérëso pochin ninatanpi. A'chintopiramahuë', co pi'pisha téranta' catahuaramahuë' natëcaiso'.

47 "Iráca pënëñtona'piro'sa' pënëñtopirinahuë', campita shimashonëmapitari co natëtonaraihuë', tëpapi. Canpitanta' pa'pitopiso' pëirapipiramahuë', co natëramahuë'. Ina marë' canpitanta' Yosë ana'intarinquëma' ni'ton, *¡ma'huantacha nisarama paya!*

48 Shimashonëma pochin cancantatoma', inapitari tēpatona pa'pitopiso', canpitari topinan quëran pëirapirama'. Co natëramahuë'.

49 Yosë no'tequën ninorinquëma'. Iráca chachin naporin: 'Na'a quëmapi'sa' a'pararahuë pënëñenquëmaso marë'. A'chintapirinënquëmahuë', no'huitoma', ahuëarama'. A'naquën tēpaarama', itérinquëma'. **50-51** Isoro'pa' ninin quëran huarë' noya quëmapi'sa' pënëñtopirinahuë', na'a tēpapi. Apiri'ton noya quëmapi nimirinhue', iini tēparin. Ina piquëran a'naya a'naya noya pënëñtopirinahuë', tēpara'piapi. Na'a pi'ipi napopi. Napoaton quëran Sacariasë tēpapi anta'. Yosë chinotopiso pëiquë chachin tēpapi. Canpitaso nimirinhue' ina nitotapomarahuë', co natantochinächinhue' cancantërama'. Napoaton Yosë na'con na'con ana'intarinquëma'.

52 *¡Ma'huantacha cotio maistro'sanquëma' nisarama paya!* Niahui osérëtérëso pochin co Yosë nanamën no'tequën a'chintëramahuë' ni'ton, piyapi'sa' co Yosë nohuitopihuë'. Co campita téranta' Yosë huëntonënqué ya'conamahuë'. A'napitanta' yaya'conpirinahuë', co nohuantëramahuë'. Ina marë' Yosë ana'intarinquëma'," itérin Quisosori.

53 Nani tonitohuachina, parisioro'sa', cotio maistro'sa', inapitaso' chiniquën no'huitopi. No'huitatona', nisha nisha Quisoso natanpi atëhuëcaiso marë'. **54** "Co no'tequën nonpachinhue', sha'huirapiahua'," nitopi.

12

Parisioro'sa' yanonpinpiso'

1 Hua'huayatërahuë' piyapi'sa' niyontonpi Quisoso natanacaiso marë'. Na'a huaranca yamorapi ni'ton, niya'quëtapi. Ca'tano'sanënpita a'chintaton, itapon: "Tëhuëñchachin iyaro'sa', parisioro'sa' yanonpinpiso. Napoaton a'chinpiso', pan ahuëpocatërinso pochin niconaton a'naroáchin piyapi'sa' yanonpintopi. Ni'cona nonpintochinënquëma'.

2 A'naquën po'oana quëran ma'sha nipi. Ma'sha po'orëso pochin nimirinhue', a'na tahuëriso' ya'ipi piyapi'sari nitotapi. **3** Tashi' napopiramahuë', naporamaso' tahuëri anitotapi. Pëi' acoana nisacarotopiramahuë', a'na tahuëriso', naporamaso' a'ninquëchin sha'huitapi. Ya'ipi piyapi'sa' nitotapi huachi," ténin.

Yosë tē'huatacas' ya'huërinso'

(Mateo 10.28-31)

4 Ina quëran itaantarin: "Ama iyaro'sa', piyapi'sa' tē'huatocosohuë'. Tëpapirinënquëmaonta', co hua'yanëma' matarinënquëmahuë'. **5** Yosë tēhuëñchinsö' tē'huatacas' ya'huërin, ténahuë. Co noyahuë' nipatama', Yosë hua'yanëma'

matahuatënquëma', parisitopiquë a'pamiatarinquëma'. Napoaton ina na'con na'con tē'huatoco'. Co piyapi'sa' tē'huatacao' ya'huérinhue'.

⁶⁻⁷ Yosëso' a'pairinquëma'. Ni'co'. Inairaro'sa' co pa'tonhuë'. A'natérápo nipurinhue', catotë' coriquia'huaíchin pa'térin. Napoaponaahuë', co a'naya térranta' Yoséri nariantérinhue'. Canpitaso' na'con na'con yonquirinquëma'. Noya noya a'pairinquëma'. Noyá nohuitérinquëma'. Ainëma' hua'huayátérahuë nipurinhue', ya'ipi pichirin. Napoaton ama tē'huacosohue'. Ni'sárinquëma', itérin.

*Quisocristo imarëhuaso' sha'huicaso' ya'huérinso'
(Mateo 10.32-33; 12.32; 10.19-20)*

⁸ Ina quëran taantarin: "Téhuëncachin iyaro'sa', 'Quisoso imarahuë' topatama', ayaro' tahuëri canta' nohuantaranquëma'. 'Imarincó mini,' itarahuë Yosë'pa'. Anquëniro'santa' natanapi. ⁹ Nipurinhue', Yosë quëran quëmapico nipurahuë' a'pohuatamaco, carinquémanta' a'poaranquëma'. 'Co nohuitérinacohue', itarahuë. Anquëniro'santa' natanapi.

¹⁰ A'naquën no'huitonaco, pinorinaco. Ina quëran oshanëna marë' sëtohuachina', Yoséri oshanëna' inquitarin. Nipurinhue' Ispirito Santo pinotona' oshahuanpiso', co onporonta' inquitarinhue'.

¹¹ A'na tahuëri mapachinënquëma', cotio niyontonpiso pëiquë quëpaarinënquëma'. Hua'ano'sa', coisëro'sa', inapitaquë sha'huirapihuachinënquëma', '¿Ma'cha tono'pocoya?' ama tocosohue'. ¹² Naporo' Ispirito Santo catahuaarinquëma' noya a'panitacamaso', itérin Quisosori.

Nani ma'sha nohuantopiso'

¹³ Na'a piyapi'sa' natanasoi', a'nari huëcapairin.

—Maistro, tatahuë nani chiminin. Nani ma'sha ya'huëtopirinhue', patérin. Iyahuëso' nipurinhue' apiratérinco. Co nohuantérinhue' patomatiincoso'. Sha'huitëquë' patomachinco, itérin.

¹⁴ —Co coisë pochin nica'huaso' ya'huérinhue', itérin Quisosori.

¹⁵ Napotahuaton, ya'ipiya pënénin.

—Ama iyaro'sa' ma'sha canacamasoáchin yonquicosohue'. Co nani ma'sha ya'huëtinquëma' huarë' noya nanoparamahuë', itérin.

¹⁶ Itahuaton, a'na pënënto nanan sha'huitérin. "Ni'co'. A'na ma'huan ya'huérin. Iminënquë sha'pachina, hua'huayátérahuë nitérin. ¹⁷ Napoaton ya'ipi pëinënpita ya'sotérin huachi. '¿Inséquëcha ma'sha aco'iya?' ta'ton, yonquiárin. ¹⁸ Yonquihuachina, tapon: 'Pëiro'sa' i'quitahuato, a'na pëiro'sa' niantarahuë. Panca panca nisarahuë. Inaque ya'ipi ma'shanëhuëpita acoarahuë. ¹⁹ Na'a ma'sha ya'huëtérinco. Co apípora nohuantarahuë'. Co huachi sacatarahuë'. Noya coshatápo. Noya o'opo. Capa cancantato, nónya ya'huápo,' ténin yonquinën quëran. ²⁰ Napopirinhue', Yoséri itérin: 'Quëmaso' co manta' yonquiranhue'. Ipora tashi chachin ca nohuanto, chiminaran. Nani ma'sha canapiranhuë', ya'ipiya pataran ni'ton, a'napitari mapon,' itérin. ²¹ Canpitanta' nani ma'sha canapomaramahuë', co Yosë yonquihuaramahuë', ina ma'huan pochin nisarama'. Co manta' ya'huëtomiatarinquëmahuë'. Co Yosë'pa' canamiataramahuë', ténin Quisoso.

Yosë noya a'pairinfoaso'

(Mateo 6.25-34)

²² Ina quëran ca'tano'sanënpita itapon: "A'naquën ma'sharáchin yonquipi. Capacaiso', o'ocaiso', a'mocaiso', inasáchin yonquipi. 'Nani ma'sha ya'huëtohuachinco, nónya ya'huaramahuë', topirinahuë' yonquinëna quëran. Ama iyaro'sa' ina pochin cancantocosohue'. ²³ Yosë chachin ananpirinpoa'. Nonënpoa' quëtérinpoa'. Co capacaso maréáchin isoro'paquë acorinpoahuë'. Noyápiachin a'mocasonta' co onpopinchin yonquicaso' ya'huérinhue'. Yosë na'con na'con yonquihuatéhua', catahuarinpoa' noya ya'huécaso'. ²⁴ Ni'co'. Inairaro'sa' co sha'topihuë'. Co cayarinsos' sénapihuë'. Cosharo' tapacaso

marë' co pëi' ya'huëtopirinahuë', Yosëri catahuarin. Ina nohuanton, cosharo' ya'huëtopi. Canpitaso' inapita quëran na'con na'con nosororinquëma'. ²⁵ Ama nisha nisha yonquiatoma', napion cancantocosohue'. Chiminacaso' nanihuachin, co huachi a'na ora téranta' nanopicaso' ya'huërinhuë'. ²⁶ Canpitaora co manta' nanitapapiramahuë'. Yosë nohuanton, noya ya'huërama'. Napoaton sano yonquiatoma', ya'huëco'.

²⁷ Ni'co'. Yancoro'sa' co sacatopihuë'. Co manta' a'mocaso nipihiuë'. Nipirinhuë', noyápiachin yancotopi. Iráca copirno Saromon nani ma'sha ya'huëtérin. 'Ma noyápiachinch a'morin paya,' topi. Yancoro'saso' napoaponahuë', ina quëran noya noya ya'nopi. ²⁸ Pacatoro quëran huarë' Yosëri yonquirin. A'na tahuëriíchin ya'huëpirinhuë', ahuihuachina, ahuiquitérë'. Co hua'qui' ya'huëpirinhuë', Yosëri yonquirin. Ina nohuanton, noya papotérin. Canpitaso' ina quëran na'con na'con yonquirinquëma'. Ina nohuanton, a'mocamasonta' ya'huëtarinquëma'. ¿Onpoatomata' nipachin co natëramahuë'? 'Yosë catahuarinco mini,' ta'caso nipihiuë'. ²⁹ Ama ma'sha yonquiatoma', pa'yancosohue'. '¿Ma'cha ca'në'poya? ¿Ma'cha o'orë'poya?' ama tocosohue'. ³⁰ Co Yosë imapisopitahuë' ina pochin yonquipi. Ma'sharáchin yonquipi. Canpitaso nipihiuë', tatanëma' inápaquë ya'huërinso' yonquirinquëma'. Ya'ipi pahuantériniquëmasopita nitotérin. ³¹ Napoaton Yosë na'con na'con yonquico'. A'napitanta' catahuaco' hua'anëntériniquë ya'conacaiso marë'. Ina pochin cancantohuatama', Yosë catahuarinquëma'. Ina nohuanton, ma'sha pahuantériniquëmasopita ya'huëtarinquëma', itérin.

Canamiatérëhuaso' (Mateo 6.19-21)

³² Naquëranchin itaantarin:

—Ama iyaro'sa' pa'yancosohue'. Ohuica pë'tahuana'pi pochin nicato a'paiaranquëma'. Caraichinquëma' nipomarahuë', Yosë noya ni'ninquëma'. Hua'anëntériniquë chachin aya'coninquëma'. ³³ Ama na'con ma'sha yontoncosohue'. Ma'sha ya'huëtohuachinquëma', pa'anahuatoma', sa'ahuaros'a' quëtoco'. Inapotohuatama', Yosë acanaarinquëma'. Isoro'paquë ma'sha a'naroáchin mocarin. Ihuarinënpoa'. Ma'shari a'quirin. Inapaquëso nipihiuë' Yosë acanahuachinpoa', ya'huëtomiatarinpoa'. ³⁴ Ma'sharáchin nohuantohuatama', co Yosë yonquaramahuë'. Nipihiuë', Yosë na'con nohuantohuatama', ina na'con na'con yonquarama', itérin.

Noya ninacaso' ya'huërinso'

³⁵⁻³⁶ Ina quëran taantarín: "Noya yonquiatoma', capayatérëso pochin cancantoco'. Ni'co'. A'na patron sa'acaso marë' pa'nin. Onporosona huënantacaso' co piyapinënpita nitotopihuë'. Napoaton noya nitaparahuatona', nanoparin i'chinpirahuatona', ninarapi. Canquiton, onconan pi'nihuachina, a'naroáchin i'soatacaino' ya'huërin. ³⁷ Piyapinënpita ninarapi quënanquintahuachina, hua'anëni nöya ni'sarin. Inari chachin nitaparahuaton, cosharo' acotarin piyapinënpita capacaino' marë'. ³⁸ Yono tashihuë nípon, tahuëri ya'carihuë nípon, huënantarin. Co huë'éponaraihuë' ninarapi quënanquintahuachina, noya ni'sarin. ³⁹ Isonta' yonquico': Ihuaté' a'nanaya huëcaton, pëiquë ya'conin. Hua'anëni co nicasohue', ma'sha ihuarin. Onporosona huëcacaso' nitotérin naporini, hua'anëni ninaitonhuë', co ma'shanënpita ihuitonhuë'. ⁴⁰ Yosë quëran quëmapico ni'to, canpitanta' ninatomaco, ya'huëco'. Hua'quihuato: 'Co a'naroáchin o'mantararihuë', tosapi a'naquën. Co nitotasëñquëmahuë', a'nanaya o'mantararahuë,' itérin Quisosori.

Inpriato pochin nininso' (Mateo 24.45-51)

⁴¹ Napohuachina, Pitrori natanin:

—¿Ya'ipi piyapi'sa' Siniro pënénaran? ¿Quiyasáchin nica? itérin.

⁴² Napotohuachina:

"Ni'co' iyaro'sa'. O'maca'huaso tahuëri a'na patron pochin nisarahuë. Inaso' aquë yapa'pachina, inpriatonën noya natërinso' sha'huitérin. 'Piyapinëhuëpita noya ni'quë'. Cosharo', ma'sha, inapita pahuantohuachina', quëtéra'piraque', itahuaton pa'nin. ⁴³ Inpriatoso' noya yonquihuachin, no'tequën natërin. Patronëni huëcapaintahuachina, noya ni'sarin. ⁴⁴ Noya natërin ni'ton, acoarin ya'ipi ma'shanënpita a'paicaso marë'. ⁴⁵ Nipirinhue', inpriatonën nisha cancantohuachin, tapon: 'Patron hua'quirarin. Co a'naroáchin huëntaponhuë', ta'ton, piyapinënpita ahuëpon. Cosonanënpitanta' ahuëpon. Pita nicacasoáchin cancantapon. No'pirápon. ⁴⁶ Napoaso', a'nanaya patronëni quënanquiantapon. Co nitotasohuë', a'nanaya canquipon. Co natërinhuë' ni'ton, ocoirahuaton, chiníquen ana'intarin. Co natëtono'sahuëpitare chachin ana'intarin.

⁴⁷ A'na piyapinënsö' patronëni sha'huitopirinhue', co yonquirinhue'. Noya nitotaponahuë', co natërinhuë'. Co ma'shanënpita noya tapatérinhue' ni'ton, chini chiníquen ahuihuitarin. ⁴⁸ A'nsaso nipirinhue' co nitotérinhue'. Co noyahue' nipachina, co onpopinchin ahuihuitarinhue'. Inapochachin campitanta' na'con a'chintéranquëma' ni'ton, noya natëco'. Na'con nitotohuatama', noya noya natëcaso' ya'huërin," itérin.

Nisha nisha Quisoso yonquirapipiso'

(Mateo 10.34-36)

⁴⁹⁻⁵⁰ "Tëhuëñchachin, iyaro'sa', pën matohuachina, a'naroáchin huiquitérin. Inapochachin piyapi'sa' a'chintohuato, nisha nisha yonquiapi. Na'a piyapi'sa' no'huiarinaco. Caso' chiníquen parisita'huaso' ya'huërin. Ina yonquiato, sëtérahuë. A'naroáchin nipachin napochinaco. ⁵¹ 'Cristo o'mahuachin, ya'ipiya nohuantatona', noya ya'huapona', ¿topiramahuë' ti? Co ya'ipiya nohuantarinarcohue'. Pënënpato, nisha nisha yonquiapi. A'naquën nohuantarinaraco. A'naquënsö' nipirinhue', co nohuantarinarcohue'. ⁵² Ipora quëran huarë' a'na pëiquë ya'huëpisopita nisha nisha yonquiapi. Catoya'pi nohuantarinaraco, caraya'piso nipirinhue' co nohuantarinarcohue' ni'ton, nino'huiapi. ⁵³ A'na pëiquë pa'pin nohuantarinco. Hui'ninsö nipirinhue' co nohuantarinarcohue'. A'na pëiquënta' hui'nin nohuantarinco. Pa'pinsö nipirinhue' co nohuantarinarcohue'. Sanapi'santa' nisha nisha yonquiapi. A'shin nimara co nohuantarinarcohue'. Huahuinso nipirinhue' nohuantarinco. A'shatën nohuantarinco. Notainso nipirinhue' co nohuantarinarcohue'," ténin.

Ipora ma'sha onporëhuaso' yonquicaso' ya'huërin

(Mateo 16.1-4; Marcos 8.11-13)

⁵⁴ Ina quëran ya'ipi piyapi'sa' a'chintantaton, itapon:

"No'tequën, iyaro'sa', yonquico'. Pi'i ya'coninso parti tashirotohuachina: 'O'nanapon,' ténama'. Ina quëran o'nanin. ⁵⁵ Sor parti quëran chiníquen ihuantohuachina, 'Huënoa ya'huëpon,' ténama'. Naporo' huënocatérin. ⁵⁶ Canpitaso' nonpintenquëma'. O'nan, sëhuëñ, inapita noya ninopiramahuë', ¿onpoatonta' ipora chachin naporahuësopita co yonquiramahuë?" itérin.

Nanan anoyatacasö' ya'huërino'

(Mateo 5.25-26)

⁵⁷ "¿Onpoatomata' campitaora cancanëma quëran co no'tequën yonquiramahuë?"

⁵⁸ Ni'co'. Nihuitéranso marë' yaquëpahuachinënquen, a'naroáchin nanan anoyatéquë'. Co anoyatohuatantuë', coisëquë quëpaarinënquen. Coisëquë quëpahuachinënquen, sontaroquë yo'coaninënquen ni'ton, tashinan pëiquë po'moarinënquen. ⁵⁹ Inaqué po'mohuachinënquen, ya'ipiya pahuërétaquë huarë' pipiaran," ténin Quisoso. (Inapochachin campitanta' co noyahue' nipatama', a'naroáchin nanan anoyatoco', Yosë ana'intochinquëma').

13

Co noyahuë' yonquipisopita nariantacaso' ya'huérinso'

¹ Naporor a'naquën huë'sahuatona', Quisoso sha'huitipi: "Caririaro'sa' Yosë pëinënqué chinotatona', ma'sha tēparapirinahuë', Piratori sontaro'sa' a'parin tēpacaiso marë'. Inaque chachin tēpapi," itiipi.

² "A'napita caririaro'sa quëran na'con na'con oshahuani ni'ton, Yosë nohuanton, ¿tēpapi, topiramahuë' ti? ³ Co inapita na'con na'con oshahuanihuë'. Canpitanta' co noyahuë' yonquirama'. Co ina nariantohuatamahuë', ana'intarinquéma'. Chiminatoma', parisitomiatarama'. ⁴⁻⁵ Siroiquënta' a'na tori anotaton, shonca posa ya'pi tēparin: 'Inapitanta' na'con na'con oshahuani, ¿topiramahuë' ti? Co naporinhuë', tēnahuë caso'. Na'a piyapi'sa' Quirosarinqué inachachin oshahuani. Canpitanta' co noyahuë' yonquirama'. Co ina nariantohuatamahuë', chiminatoma', parisitomiatarama'," itérin Quisosori.

Nara co nitérinsuhue'

⁶ Ina quëran iso pënënto nanan sha'huitérin: "A'na quëmapi iminënqué iquira naranta' sha'nin. Papotahuaton a'shinaponahuë', hua'qui' co nitérinhuë'. ⁷ Ina quëran inpriatonën itérin: 'Iso huayo napoonin. Nani a'shinaponahuë', cara pi'ipi co manta' nitérinhuë'. A'néquë'. ¿Ma'marëta' topinan huanirin?' itopirinhuë', ⁸ 'Ama siniro ipora a'néquësuhue'. A'na pi'ipira' tananpitëquë'. Iso pi'ipi noya pacarapiarahuë. Apono acotarahuë noya nitacaso marë'. ⁹ Iso pi'ipi nitapon nimara. Co nitohuachinhue', sha'huitoco a'néchinquéen,' itérin inpriatonëni," ténin Quisoso.

Chinoto tahuëri apia anoyatérinso'

¹⁰ Chinoto tahuëri nanihuachina, niyontonpiso pëiquë pa'sahuaton, piyapi'sa' a'chintarin. ¹¹ Inaque a'na sanapi quënanconin, apia nininso'. Sopai nohuanton, nani shonca posa pi'ipi monconpirin. Co nanitérinhuë' no'tepicaso'. ¹² Quisosori quënanahuaton, pérarin. Huëcapaihuachina:

—Nani imoya noyatéraran, itérin.

¹³ Së'huapihuachina, a'naroáchin no'tequën huanirin. "¡Ma noyacha Yosëso' ni'ton, anoyatérinco paya!" ténin. ¹⁴ Niyontonpiso pëi' hua'anso nimirinhuë', no'huitérin. Chinoto tahuëri anoyatérin ni'ton, naporin. Napoaton piyapi'sa' itapon:

—Saota tahuëri sacatacaso' ya'huérin. Naporor huëco' anoyatinquémaso marë'. Chinoto tahuëriso' co noyahuë' anoyatacaso', itérin.

¹⁵ Quisosori natanaahuaton, itapon:

—Canpitaso' nonpintënquëma'. Co no'tequën yonquiramahuë'. Ohuaca', mora, inapita pë'tahuahuatama', chinoto tahuërinta' i'quiritërama'. Isha ya'huérinqué quëparahuatoma', o'shitërama'. ¹⁶ Iso sanapiso nimirinhuë' Yosë piyapinën niplahuë', hua'qui' parisitérin. Nani shonca posa pi'ipi Satanasëri aparitisopirinhuë', ipora huarë' nicha'érahuë. Chinoto tahuërinta' anoyatacaso' ya'huérin tēnahuë. ¿Ma'ta' canpitaso' yonquirama'? itérin.

¹⁷ Natanaahuatona', inimiconënpitaso' tapanpi. A'napitariso nimirinhuë', pa'yatopi: "¡Ma noyacha Quisoso nanitaparin paya!" topi.

Mostasaraya pochin nininso'

(Mateo 13.31-32; Marcos 4.30-32)

¹⁸ "¿Ma pochinta' Yosë hua'anentérinso'? topiramahuë'. A'na pënënto nanan sha'huitanta'inquéma' canpitanta' nitotacamoso marë'. ¹⁹ Mostasaraya pochin ninin. Ya'pirin hua'huishin niplahuë', iminquë sha'patéra, panca ta'an ninin. Nani a'shispachina, inairaro'sa' huëcatona', inaque pëirin," ténin. (Inapochachin ya'nan niplahuë, caraíchin piyapi Yosë imapirinhuë', a'na tahuëri hua'huayátérahuë imasapi huachi.)

Pan ahuëpocatérinso pochin nininso'
(Mateo 13.33)

²⁰ Ina quëran itantarín: “¿Ma pochinta' Yosë hua'anéntérinso'? ²¹ Pan ahuëpocatérinso pochin ninin anta'. A'na sanapi pan nipachina, cato shonca quiro pochin trico no'mo' manin. Masahuaton, pi'pian téranta' pan ahuëpocatérinso' ayontohuachina, ya'ipiya së'cotérin, pan huëpocatérin huachi,” ténin Quisoso.

Ya'coana pochin nininso'
(Mateo 7.13-14, 21-23)

²² Ina quëran nisha nisha ninanoquë pa'sahuaton, a'chintéra'piarin. Quirosarinquë huarë' pa'sarin. ²³ A'chintohuachina, a'na quëmapiri itapon:

—¿Onpo piyapita' cha'épona'? ¿Caraíchin nimara ti? itérin.

²⁴ —Yosë huëntonén pëi pochin ninin. Ya'coananénso' yamianasha. Na'a piyapi'sasso' yaya'conpirinahuë', co noyahue' cancantatona', co nanitopihuë' ya'conacaiso'. Campitaso nimirinhuë' ipora chachin ya'conacamaso' nohuantoco'. Ama hua'quicosohuë'.

²⁵ A'na tahuëri hua'anëni ya'coananén oncotarin huachi. Naporor huarë' aipiran huanirahuatoma', yaya'conpiramahuë'. “I'soatocoi Sinioro,” tosapiramahuë', co nohuantarinhue'. “Co nohuitéränquëmahuë'. Co campitaso' piyapinéhuëpitänquëmahuë'” itarinquëma'. ²⁶ “Co'ta nohuitérancioi. Quëmaro'coi coshatérroi, o'orai. Quiyataquë a'chinan,” tosapiramahuë'. ²⁷ “Co' mini nohuitéränquëmahuë'. Co noyahue' ninama' ni'ton, co piyapinéhuëpitänquëmahuë'. Paco huachi,” itahuaténquëma', a'paarinquëma'.

²⁸ Parisitopiquë pa'sahuatoma', na'nëarama', chiníquën parisitarama'. Apraan, Isaco, Cacopo, pënëntona'piro'sa', inapita Yosë hua'anéntérinquë ya'huërapo, ni'sarama'. Campitaso nimirinhuë' co ya'conamahuë' ni'ton, sétarama'. ²⁹ Nisha nisha parti quëran huëcatona', Yosë ya'huërinquë ya'conapi. Inaquë noya coshatérëso pochin noya ya'huërapo. ³⁰ A'naquënso' ipora co piyapi'sari noya ni'pirinahuë', a'na tahuëri Yosëri noya ni'sarin. A'naquënso nimirinhuë' ipora piyapi'sari noya ni'pirinahuë', a'na tahuëri co Yosëri noya ni'sarinhuë', itérin Quisosori.

Quirosarinquë ya'huëpisopita yonquiaton, sëtérinso'
(Mateo 23.37-39)

³¹ Naporor a'naquën parisioro'sa' Quisosoquë huë'pi.

—A'naroáchin ta'aqué'. Irotisé yatëparinquën, itiipi.

³² —Inca. Co yapa'nahue'. Irotiséso' pa'pi nonpintë'. Paaton, sha'huitonquë'. Nani Yosë sha'huitérinco ma'sha nica'huaso'. Iporaso' ina natëto, sopairo'sa' a'parahuë. Na'a cania'piro'sa' anoyatarahuë. Cara tahuéríchin pochin pahuanarin tiquia'huaso'. Ina sha'huitonquë' nitochin. ³³ Inaso napotopirahuë', ipora tahuëri chachin pipito tashira aquëtérän Quirosarinquë nincana'huaso' ya'huërin. Iráca quëran huarë' na'a piyapi'sa' inaquë pënëntopirinahuë', tëpapi. Inaquë canta', tëpainacoso ya'huërin, ténin.

³⁴ Ina quëran itantarín: “¡Ya'ipi Quirosarinquë ya'huëramasopita yonquiaténquëma', chiníquën sëtérahuë! Na'a pënëntona'piro'sa' Yosë a'patérinquëma' pënëinénquëmaso marë'. A'papirinhuë', tëparama'. A'naquën na'piquë të'yaratoma', tëparama'. Ya'ipinquëma' nosoroaténquëma', na'aro' yacatahuapiranquëmahuë', co ca téranta' nohuantéramacohuë'. Atari hua'huin to'cohuetérinso pochin yapa'poyapiranquëmahuë', co nohuantéramacohuë'. ³⁵ Napoaton Tata Yosë patarinquëma'. Co huachi catahuararinquëmahuë'. Co huachi quënanaramacohuë'. O'manta'huaso' tahuëri huarë' quënantaramaco. Naporor: ‘¡Ma noyanquëncha quëmaso paya! Sinioro chachin a'paimarinquën,’ itaramaco,” itérin Quisosori.

¹ A'na hua'ani Quisoso amatérin coshatapacaso marë'. Parisio quëmapi inaso'. Amato-huachina, inaquë pa'nin. Chinoto tahuëri ni'ton, a'napitarinta' ni'sapi sha'huirapicaiso marë'. ² Naporo' a'na cania'pi Quisosoquë huë'nin, panca pomatérinso'. ³ Cotio maistro'sa', parisioro'sa', inapita notéerahuaton, Quisosori itérin:

—¿Noya chinoto tahuëri cania'pi anoyatacaso' ti? ¿Ma'ta' tënama' canpita? itérin.

⁴ Natanaahuatona', ta'tápi. Co manta' topihuë'. Co a'panitohuachinaraihuë', cania'pi së'huarahuaton, a'naroáchin anoyatérin. —Noya paqué huachi, itérin. ⁵ Ina quëran piyapi'sa' pënëantarín.

—¡Hui'nama' posoquë pa'itochuachina, chinoto tahuëri nimirinhue', a'naroáchin ocoirama'! Mora téranta' pa'itochuachina, ocoirama'. ¿Co ocoiramahuë' nica? itérin.

⁶ Parisioro'saso nimirinhue' tapanatona', co nanitopihuë' a'panitacaiso'.

Pita pochin nininso'

⁷ Yacoshatochuachinara, na'a piyapi'sa' hua'an pirayan yahuënsëpi. "Hua'an pirayan huënsëhuato, chiníquen nanantona'pi pochin ni'sarinaco," ta'tona', inaquë huënsëconpi. Ina ni'sahuaton, Quisosori itérin:

⁸ —Natanco iyaro'sa' pi'pian pënëinquëma'. Quëmapi yasa'apachina, nipayarinso-pita amatérin coshatapacaiso marë'. Inaquë amatochuachinquen, ama hua'ano'sa pirayan huënsëquësuhue'. Tapona' a'na quëmapi chini chiníquen nanantérinso' huë'sarin.

⁹ Huë'pachin, hua'an itarinquen: "Po'shaquë', iso quëmapi huënsë'in. Pasëquë téranta' huënsëconquë'," itohuachinquen, tapanaran. ¹⁰ Napoaton amatochuachinquen, co'inquë huënsëquë'. Hua'an huë'pachin, noya nontarinquen. "Huëquë' iyasha, isëquë noya huënsëquë'," itohuachinquen, ya'ipi piyapi'sa' noya ni'sarinquen. ¹¹ Inapochachin "Caso' noya noyaco," topatama', Yosë atapanarinquëma'. Nimirinhue', sano piyapi nipatama', Yosë noya noya acoarinquëma', itérin.

¹² Ina quëran pëi' hua'anen pënënaton, itantarín:

—Ca'painënquen marë' piyapi amatohuatan, ama quëmopinënpita, amiconënpita, inapitaráchin amatéquësuhue'. Ma'huano'sa' amatohuatan, inapitanta' amataantahuach-inënquen, i'huërétarinënquen. ¹³ Sa'ahuaros'a', apiaro'sa', sonpacharo'sa', somaraya nininsopita, inapitanta' nosoroaton, amatéquë'. ¹⁴ Ina quëran noya cancantarán. Inapitaso' co nanitopihuë' amatanta'inënquëns'. Co i'huërëtopirinënquënhue', Yosëso' i'huërétarinquen. Noya ninan ni'ton, ayaro' tahuëri ananpitaantahuachinquen, acanaar-inquen huachi, itérin.

Yosëri amatérinsopita

(Mateo 22.1-10)

¹⁵ Inaquë coshatassoi', a'neso' natanaahuaton, Quisoso itapon:

—Yosë chachin hua'anëntohuachinpoa', nôya coshatarihua'. Noya noya cancantarihu', itérin.

¹⁶ Napotochuachina, pënënto nanan sha'huitérin.

—A'na quëmapiri na'a piyapi'sa' amatérin ca'pacaiso marë'. ¹⁷ Tahuëri nanihuachina, inpriatonen a'parin sha'huitantacaso marë'. "Huëco huachi. Nani cosharo' taparin," itérin. ¹⁸ Nani amatopirinhue', co huachi nohuantopihuë'. "Co'chi nanitérahuë paya," toconpi a'naya a'naya. "No'pa' pa'anahuëso' nicapo pa'sarahuë. Napoaton co nanitérahuë," ténin a'na'. ¹⁹ "Shonca toro pa'anahuë asacata'huaso marë". Inapita ténipo pa'sarahuë. Napoaton co ipora nanitérahuë," ténin a'nanta'. ²⁰ "I'huara sa'arahuë. Napoaton co canta' nanitérahuë," ténin a'nanta'. ²¹ Napotochuachinara, inpriatoso ayanahuaton hua'anen sha'huitiirin. "Co huachi nohuantopihuë," itérin. Natanaahuaton, no'huitérin. "Manóton paantaquë". Cachiquë téranta' paaton, piyapi maconquë'. Sa'ahuaros'a', apiaro'sa', somaraya nininsopita, sonpacharo'sa' inapita maconquë'," itérin. Itohuachina, pa'sahuaton, macontarin. ²² Huënantarahuaton, sha'huitiantarin.

“Nani maconpirahuë'. Ipora huanta' pahuanarin piyapi'sa' nanicaso',” ténin inpri-
atonën. ²³ “Ninano quëran pipirahuaton, macoantaquë'. Nisha nisha ira pa'taton,
sha'huitonquë' huë'ina'. Imino'saquë huarë' paaton, maconquë'. Na'a piyapi'sa' no-
huantërahuë. ²⁴ Ya'nan amatërahuësopitaso', co huachi ca'painacoso' nohuantërahuë'
ni'ton, inapoco',” itérin hua'ani, ténin Quisoso.

Sacai' imacaso'
(Mateo 10.37-38)

²⁵ Ina quëran Quisoso paantarin. Na'a piyapi'sari imasapirinahuë', tahuërëtahuaton,
itapon: ²⁶ “Yaimapatamaco, ca na'con na'con nosoroco. Tatama', mamama', in-
apita co onpopinchin nosorocaso' ya'huërinhuë'. Sa'ama', hui'nama', iyaparima',
oshiparima', inapitanta' co onpopinchin nosorocaso' ya'huërinhuë'. Canpitaora no-
huantëramasonta' nariantatoma', casáchin imaco huachi. Co na'con na'con nosorohu-
atamacohuë', co tēhuëñchachin imaramacohuë'. ²⁷ Imapatamaco, a'napita aparisitar-
inënquéma'. Yatëpapirinënquémaonta', imamiatoco. Coroséquë chiníquen parisítërë'. In-
apochachin canpitanta' imapatamaco, aparisitarinënquéma'. Co ahuantohuatamahuë',
co tēhuëñchachin imaramacohuë'. ²⁸ Ni'co' iyaro'sa'. A'na quëmapi panca tori ya-
nipachin, co a'naroáchin ninihuë'. Ya'ipi pa'térinso'ton yonquirin. ²⁹ Ina quëran
coriquinën nanihuachina, pëiarin huachi. Co coriquinën nanihuachinhue', co pëirinhuë'.
Patomaíchin a'canin naporini, a'napitari tēhuaitonahuë'. ³⁰ Ni'co'. Panca yapëipirinhuë',
co nanitërinhuë' a'canacaso', ichitonahuë'. ³¹ Isonta' yonquico'. A'na copirno ya'huërin,
shonca huaranca sontaro'sa' camairinso'. Inimiconënso nipurinhuë', cato shonca
huaranca sontaro'sa' camairin. Ina napo' huë'pachinara, co a'naroáchin ahuëapon
pa'sarinhuë': ‘Sacai' minsëcaso',’ ta'ton, yonquirárin. ³² Co nanitochináchinhue' ni-
pachina, comisionën a'parin nanan anoyatacaso marë'. ³³ Inapochachin pënënanquéma'.
Sacai' imamancoso', ténahuë. Napoaton noya yonquiatoma', imaco. Casáchin yonquihu-
atamaco, tēhuëñchachin noya imasaramaco,” ténin Quisoso.

Yamora pochin nininso'
(Mateo 5.13; Marcos 9.50)

³⁴⁻³⁵ Ina quëran taantarín: “Yamora noya acashicaso' niponahuë', chiminpachinaso co
huachi cashirinhuë' ni'ton, co huachi ma'marë téranta noyatërinhuë'. Topinan të'yatërë'.
Huëratëhuapanpatama', noya natanatomaco, yonquico'” itérin Quisosori. (Canpitanta' co
noya cancantohuatamahuë', co Yosë nohuantarininquëmahue' tapon naporin.)

15

Ohuica chihuërinso pochin nininso'
(Mateo 18.10-14)

¹ Nisha nisha piyapi'sa' huë'pi Quisoso natanacaiso marë'. Copirno marë' coriqui
ma'patona'piro'sa', oshahuano'sa' itopiso', inapitanta' huë'pi. ² Ina ni'sahuatona', pari-
sioro'sa', cotio maistro'sa', inapitari no'huipi.

—¿Onpoatonta' Quisoso oshahuano'sa' pa'yatërin? Inapitarë' coshatarin, co napocaso-
huë' nipurinhuë', toconpi.

³ Ina natanahuaton, Quisosori iso pënënto nanan sha'huitërin ayonquicaiso
marë': ⁴ “A'na quëmapi pasa ohuicaro'sa' pë'tahuaton, ya'ipiya nosororin. A'naya
térranta' chihuëhuachina, yonípon pa'sarin. A'napitaso' pastoquëranchin patahuaton,
hua'qui' yonisarin. Quënanahuë' huarë' yonisárin. ⁵ Quënanahuaton, pa'yatërin.
Pitënhauaton, quëmantarin. ⁶ Pëinënqué canquiantahuachina, nipayarinsopita, ya'cariya
ya'huëpisopita, inapita sha'huitërin. ‘Ohuicanëhuë chihuëpirinhuë', quënanahuë. Ina
marë' nónya cancantahua',’ itérin. ⁷ Inapochachin Yosë ni'ninpoa'. Noya piyapi
ya'huëhuachin, Yoséri noya ni'sarin. Nipurinhuë', oshahuano'santa' nosororin. A'naya

téranta' co noyahuë' yonquirinso' naniantohuachin, Yosë ya'huërinquënta' capa cancantomiatapi," itérin Quisosori.

Coriqui ayatérinso'

⁸ Ina quëran iso pënënto nanan sha'huitantarín: "A'na sanapi shonca coriqui prata quëran nininso' ya'huëtopirinhüë', a'nara' ayatérin. Nanparin i'chinpitahuaton, noyá huitetérin. Quënanahué huaré' yonisárin. ⁹ Quënanahuaton, nipayarinsopita, ya'cariya ya'huëpisopita, inapita sha'huitérin. 'Coriquinéhuë ayatopirahuë', quënanahué. Ina marë' noya cancantahua', itérin. ¹⁰ Inapochachin a'na piyapi térranta' co noyahuë' yonquirinsopita naniantohuachin, anquëniro'santa' noya cancantapi," itérin.

Oshahuana'pi huëantarínso'

¹¹ Ina quëran Quisosori itaantarin: "A'na quëmapi cato' hui'ninpita ya'huëtopirinhüë', ¹² hua'huá nininsoari pa'pin itérin: 'A'na tahuéri ya'ipi ma'shanënpita iyahuéro'co patomatarancoi. Caso nimirinhüë' apira nohuantérahué. Ipora tata quëtochanco, topirahué', itérin. Itohuachina, patoma ma'shanënpita quëtérin. ¹³ Cara tahuéri quëran pochin hua'huá nininso' yapipirin. Ya'ipi ma'shanënpita pa'anahuaton, coriqui canarinso' masahuaton, aquë pa'nin. Inaquë no'pirárin, nansarárin, monshihuanárin. Na'a coriqui quëparinso' i'quirin. ¹⁴ Nani ya'ipi i'quihuachina, inaquëso' tanarotopi ni'ton, co manta' capacaso' ya'huërinhuë'. Inanta' tanarin. ¹⁵ Napoaton a'na patronquë pa'nin. 'Canta' sacachi, topirahué', itérin. 'Noyahua'. Sacatéquë' nipachin,' itahuaton, pastoquë a'parin coshinënpita a'paicaso marë'. ¹⁶ Inaquë paaton, coshirosa' a'cararin. Tanaton, coshi ca'ninso' térranta' nayapirinhüë', co incari quëtérinhüë'. ¹⁷ Ina quëran yonquirin. '¡Ma'huántacha ninahué paya! Tata piyapinënpitaso' noya coshatapi. Caso nimirinhüë' tana yatéparinco ta'a. ¹⁸ Paato, tatahué nonchi: "Co noyahuë' tata ninahué. Nonpintéranguén. Co Yosë natétohuë', oshahuanahué. ¹⁹ Co noyahuë' ninahuëso marë' co huachi hui'nan pochin cancantancoso' ya'huërinhuë', itérin pa'pin. ²⁰ Napotopirinhüë', pa'piniso' na'con nosororin. Piyapinënpita camairin. 'Manóton paatoma', noyápiachin nininso' maconahuatoma', a'motoco'. Po'moitéranta' noyápiachin nininso' po'motoco'. Sapaténta' matonquë' po'moin. ²¹ Ina quëran toroa'huá amoshin nininso' ma'toma', tēpacó' ca'ahua'. Capa cancantatéhua', pita niahua'. ²² Iso hui'nahué chiminin pochin niphahué', iporaso' ya'noantarin. Ayaté pochin nimirinhüë', iporaso' niantarahué,' itérin. Ina quëran pita nisapi.

²³ Paninanso nimirinhüë', iminguë sacatérin quëran huëntararin. Pëiquë ya'caritériahuaso', mosica pi'nirapiso natanin. Nansatona', capa cancantapi. ²⁴ Natanahuaton, piyapinënpérarin: '¿Onpoatonta' pita nisapi?' itérin. ²⁵ 'Co'ta iya'huá huénantarin. Noya canquintarin ni'ton, tatari pa'yatérin. Toroa'huá amoshin nininso' atépatérin capacaso marë', itérin. ²⁶ Ina natanahuaton, no'huitérin. No'huitaton, co yaya'coninhüë'. Pa'pini pipirahuaton, itérin: 'Huëquë' conpa capa cancantahua', itopirinhüë'. ²⁷ 'Inca tata. Na'a pi'ipi quëma marë' chiníquén sacatérahué. Sha'huitohuatancora, ya'ipiya natéranquén. Napoaponahué', co caso' chipo térranta' quëtérangohuë' amiconéhuépita amatahuato capa cancanta'huaiso marë'. ²⁸ Iso hui'nanso nimirinhüë', aquë paaton no'piárin. Monshihuanárin. Coriquiné quëtopiranhué', ya'ipi i'quirin. Ina quëran huénantahuachina, quëmari nosoroaton, pa'yatérin. Toroa'huá amoshin nininso' atépatérin coshatacaiso marë', itérin.

²⁹ 'Inca tata. Na'a pi'ipi quëma marë' chiníquén sacatérahué. Sha'huitohuatancora, ya'ipiya natéranquén. Napoaponahué', co caso' chipo térranta' quëtérangohuë' amiconéhuépita amatahuato capa cancanta'huaiso marë'. ³⁰ Iso hui'nanso nimirinhüë', aquë paaton no'piárin. Monshihuanárin. Coriquiné quëtopiranhué', ya'ipi i'quirin. Ina quëran huénantahuachina, quëmari nosoroaton, pa'yatérin. Toroa'huá amoshin nininso' atépatérin coshatacaiso marë', itérin.

³¹ Napotohuachina, pa'pini itérin: ‘Nosororanquén mini conpa. Quëmaso' co ya'huincaranhué'. Ya'ipi ma'shanéhuépita quëchinquén. Ya'ipiya quëmaquén nisarin. ³² Iya'huaso nipurinhué', nani huënantarin. Chimininso pochin niponahué', ya'noantarín. Ayatérëso pochin nitopiréhuahué', niantaréhuá'. Ina marë' noya cancantacaso' ya'huérin,’ itérin pa'pini,” ténin Quisoso.

16

Inpriatori nonpintérinso'

¹ Ina quëran ca'tano'sanénpita a'chintantaton, itapon: “A'na ma'huan ya'huérin. Inpriatonén chiníquén nanan quëtérin piyapinénpita camaicaso marë'. Inari asacatérin. Chiníquén nanantaton, nihuipiso' ninshitérin. Inaso nipurinhué', nonpintaton, inaora marë' coriqui masarin ni'ton, sha'huirapipi. ² Ma'huanso' natantahuaton, amatérin. ‘Quëmaso' nonpintaranco natantérahué. Coriqui quëtéranguénso' quëmaora marë' manan ni'quéhuaré', ocoiaranquén. Ya'ipi nihuiringacoso' ninshitoco nitochi,' itérin. ³ Inpriatonénso' pipirahuaton, yonquirarin. ‘¿Ma'cha onpo'i nicaya? Hua'anéhué ocoiarinco. Co nanitérahué' chiníquén sacata'huaso'. Naporahuaton, tapanato, co nohuantérahué' coriqui topinan ma'pata'huaso'. ⁴ Na'a quémapi'sa' hua'anéhué ni-huipi. Iporaso' inapita catastuarahué. Ina quëran hua'anéhué ocoihuachinco, inahuanta' catastuarinaco nanopica'huaso marë', ténin yonquiaton. ⁵ Naporahuaton, co'huara hua'ani ocoiyatérasohué', nihuitopisopita amatérin. A'naya a'naya hué'pi. A'nsaso' hué'pachina, natanin. ‘¿Onpota' hua'an nihuiran?’ itérin. ⁶ ‘Pasa rata toma' ma'parahué ni'ton, ina nápo' nihuirahué,’ itohuachina, ‘Inta nipachin, nihuitéranso quirica masahuaton, a'natérápo shoncaíchin ninshitantaqué’, itérin. ⁷ Ina quëran a'nanta' hué'nin. Hué'pachina, ‘¿Onpota' quémanta' nihuitéranso?’ itérin. ‘Trico ma'parahué ni'ton, pasa costaro marë' nihuirahué,’ ténin. ‘Inta nipachin, Posa shoncaíchin ninshitantaqué’, itérin. Inapotéra'piaton, na'a amiconénpita catastuarin ama na'con pahuérétacaiso maréhué'. ⁸ Hua'ani natantahuaton, amataantarin. ‘Naquéranchin nonpintaranco. Nipurinhué', “ma noyacha yonquiran paya,” ténahué,’ itérin hua'anéni. Ni'co' iyaro'sa'. Na'a piyapi'sa' co noyahué' nipiropita noya yonquipi inaora canacaiso marë'. A'naquëmaso nipurinhué', imapiramacohué', co onpopinchin yonquiramahué' noya nicacamaso marë'.

⁹ Coriqui ya'huétohuachinquéma', ama canpitaoráchin i'quicosohué'. A'napita pahuan-tohuachina', quëtoco'. Inapohuatama', Yosé'pa' noya ni'sarinquéma'. Chiminpatama', Yosé inápaqué quëpantarinquéma'. Coriquinéma' patopiramahué', inatohua' noya noya ya'huécontarama'.

¹⁰ Ni'co' iyaro'sa'. Hua'anéma' sha'huitohuachinquéma', natécamaso' ya'huérin. Pi'pian térranta' sha'huitopirinquémué', natéhuatama', noya ni'sarinquéma'. Chini chiníquén nanan quëtarinquéma'. Co'so' natéhuatamahué', co chiníquén nanan quëtarinquémué'. ‘Nonpintarisco,’ ta'ton, co huachi natéarinquémué'. ¹¹ Ya'ipi coriquinéma' canpitaora marë' i'quihuatama', co insonta' inápaqué acanarinquémué'. ¹² Iporaso' Yosé nohuanton, ma'sha, coriqui, inapita ya'huétarinquéma'. A'naninquémaso pochin quëtérinquéma'. Topinan quëran i'quihuatama', co manta' Yosé'pa' canamiataramahué'.

¹³ Cato' patron camaihuachinquéma', co nanitéraramahué' cato chachin natécamaso'. A'nsaso' nohuantatoma', noya natéarama'. A'nsaso nipurinhué' co onpopinchin nohuantatomahué' co natéaramahué'. Inapochachin canacamasoáchin yonquihuatama', co nanitaramahué' Yosé natécamaso'. Corquiráchin cancantohuatama', co Yosé natéaramahué',” itérin Quisosori.

¹⁴ Parisioro'sa' corquiráchin cancantopi. Napoaton Quisoso a'chininso' natanahua-tona', tēhuapi. ¹⁵ Tēhuapirinahué', Quisosori itérin: “Canpitaso' Yosé imaramaso pochin nippomarahué', co tēhuéñchachin imaramahué'. Nonpinama'. Yonquiramaso chachin

Yosë nitotërin. Piyapi'sa' noya ni'pirinënquëmahue'. Cancanëma quëranso yanopinama' ni'ton, Yosë co pi'pian téranta' noya ni'sarinquëmahue', itérin.

Yosë quiricanën quëran pënëninpoaso'

¹⁶ Ina quëran tantarin: "Iráca Moisësë, pënëntona'piro'sa', inapita pënëntopi nani ma'sha natëcaso'. Ina quëran Coansha Paotista huë'pachina, noya nanan sha'huirin Yosë hua'anëntérinquë ya'conacaiso marë'. Yaya'conpisopitaso' chiníquen cancantatona', ya'conapi. ¹⁷ Quiricanën quëran Yosë no'tequén pënëninpoa'. Isoro'pa', pi'iro'të', inapita ta'huantapirinahuë', ya'ipi Yosë nanamënsö' ya'huëmiatápon. Co a'na hui'sharinso téranta' topinan quëran ninshitopihuë' ni'ton, ya'ipi naniarin," ténin.

Sa'ahuano'sa' pënëninso'

(Mateo 19.1-12; Marcos 10.1-12)

¹⁸ Ina quëran Quisosori pënëntarin: "Co sa'ama' të'yatamaso' ya'huërinhuë'. Noya nichinpitacaso' ya'huërin. Napoaton sa'ama' të'yatatomá', a'na sanapi maantahuatama', oshahuanarama'. Monshihuaninso pochin Yosë ni'sarinquëma'. Insosona ina sanapi so'ini të'yatérinso chachin maantahuachina, inanta' monshihuaninso pochin Yoséri ni'sarin," itérin.

Ma'huan parisitërinso'

¹⁹ Ina quëran itaantapon: "A'na ma'huan ya'huërin. Nani ma'sha ya'huëtërin. Morin pa'ton nininso' a'morin. Noyápiachin a'moton, nani tahuëri pita pochin nicaton, nóna coshatërin. Co manta' pahuantérinhue'. ²⁰⁻²¹ A'na quëmapinta' inaquë ya'huërin, sa'ahua nininso'. Nasaro itopi. Apia ni'ton, co nanitërinhuë' sacatacaso'. Ma'sha topinan ma'pataton, nanopirin. Ma'huan pëinën aipiran acopi. Ya'coanaquë huënséarin. Tanaton, ma'huan pë'sotérinso téranta' nayapirinhuë', co manta' quëtopihuë'. Ta'taráchin niconin ni'ton, ni'niraro'sari huëcatona', irotiipi. ²² Napoin quëran Nasaro chiminin huachi. Chiminpachina, Yosë'pa' anquëniro'sari quëparin. Apraan pantarinquë chachin pantarin. Ina quëran ma'huonta' chimininpachina, pa'pitopi.

²³ Parisitopiquë paaton, parisitárin. Në'pérahuaton, aquë quëran Nasaro quënanin. Tata Apraanë' ya'huëarin. ²⁴ Napoaton chiníquen pérarin: 'Tata Apraan, nosoroco canta! Pënqué parisitárahuë. Nasaro a'patimaco i'sha pi'pian téranta' api'nichinco,' itopirinhuë'. ²⁵ 'Co'chi nanitërahuë paya. Ni'quë'. Quëmaso' nanopipon, nani ma'sha ya'huëtopirinquënhue', inasáchin yonquiran ni'ton, iporaso' parisitáran. Nasaroso niperinhuë' nanopipon, parisitápirinhuë', iporaso' noya ya'huarin huachi. ²⁶ Naporahuaton, Yosë'pa' pa'patéra, co onporonta' pipiréhuë'. Inapochachin parisitopiquënta' pa'patéra, co onporonta' Yosë'pa' pa'nëhuë'. Panca tahanan ya'copitërinso pochin ni'ton, co nanitërehue' pëntonacaso', itérin.

²⁷⁻²⁸ Napotopirinhuë', itantarín: 'A'natérápo iyahuëpita ipora ya'huërapi. Nasaro a'paquë' tatahuë pëinënquë iyahuëpita pënëncasco marë'. Caso' parisitápato, co no-huantërahuë' iséquë huëcacaiso', itérin. ²⁹ Napotohuachina, Apraani itérin: 'Co'ta Yosë quiricanën ya'huëtopi. Inaquë Moisësë, pënëntona'piro'sa', inapita ninshitopi nontatona' nitotacaiso marë'. Inapita natëina', itérin Apraani. ³⁰ 'Nani nontaponaraihuë', co natëpihuë'. Niperinhuë', chimininso' nanopiantahuaton, pënëncopachin, natëpona' nimara. Co noyahue' yonquipisopita naniatatona', Yosë tahuërtantapona' nimara, topirahuë', ténin. ³¹ 'Co Yosë quiricanën natëhuachinahuë', chimininso' nanopiantapirinhuë', co onporonta' natëapihuë', itérin Apraani," ténin Quisoso.

¹ Ina quëran ca'tano'sanënpita pënëantarin. “Nisha nisha ma'sha ya'huërin anishacancantiinpoaso'. Nipirinhue', anishacancantona'piso' pa'pi co noyahue' ni'ton, jma'huantacha nisarin paya! Ina marë' Yosëri chiníquën ana'intarin. ² Co'huara hua'huaro'sa téranta' anishacancancháterasohue', marëqué chimiitérin naporini, noya noya niitonhue'. Pancara'píquë a'sonconotahuatona', tē'yaitopi naporini, co aquëté' oshahuaintonhue'. A'naquënta' imasapirinacohue', co chiníquën cancanchatérapihuë'. Hua'huaro'sa' pochin cancantopi. Inapita anishacancantohuachina', Yosëri ana'intarin.

³ Napoaton, ni'cona a'napita anishacancantotama'.

A'na piyapi ma'sha onpotohuachinquëma', pënëncö'. Naporinso marë' sëtohuachina, nanan anoyatoco'. ⁴ A'na tahuërimarëáchin canchisëro' napotopirinquëmahuë', canchisëro chachin: ‘Co noyahue' ninahuë ni'ton, sëtérahuë,’ itohuachinquëma', nanan anoyataantaco'. Co onporonta' no'huicaso' ya'huërinhue',” ténin.

Ya'ipi cancanënpoa quëran natëcaso' ya'huërin

⁵ Ina quëran ca'tano'sanënpitari itopi:

—Catahuacoi Sinioro, Yosë noya noya natë'i, itopi.

⁶ —Mostasa ya'pirin hua'huishin ninin. Ina pochin pi'pian téranta' Yosë natëtoma', nontohuatama', noya catahuarinquëma'. “Yosë nohuanton, iso nara no'pa quëran pipirahuaton, marëqué pa'in,” ténama' naporini, pa'itonhue'. “Yosë no'tequëñ nontérinco,” topatama', sacai' nininso' nanitaparama', itérin.

Yosë marë' sacatacaso' ya'huërinso'

⁷ Ina quëran itantarín: “Patron ya'huëhuachina, piyapinëñ camairin. Camaihuachina, iminëñquë sacatérin. Pë'tahuanënpitanta' a'pairin. Nani sacatohuachina, imin quëran huënantahuachina, patroni a'naroáchin a'carin, ¿topiramahuë' ti? ⁸ Co naporinhue'. Patron'ton yacoshatérin. Napoaton piyapinëñ sha'huitérin. ‘Coscharo' niquë'. Ina quëran nitaparahuaton, o'huïntoco ca'i. Nani coshatohuato, o'shitoco,' itérin. Nani coshatohuachina, naporor huarë' piyapinëñso' coshatérin. ⁹ Piyapinëñ camairin ni'ton, natérin. ‘Ma noyanquëñ ni'ton, natéranco. Ina marë' “Yosparinquëñ,” co itérinhuë'. ¹⁰ Canpitanta' iyaro'sa', Yosë sha'huitohuachinquëma', natëco'. Nani natëhuatama': ‘Topinan piyapinënpoa' ni'tehua', natérrehua', nitoco'. Ya'ipiya natëcamaso' ya'huërin,’ itérin Quisosori.

Chana caniori maninsopita anoyatérinso'

¹¹ Ina quëran Cariria parti na'huëtahuaton, Quirosarinquë pa'sarin. Samaria yonsan ya'cariya pa'nin. ¹² Inaquë paaton, a'na ninanoquë canconin. Canconpachina, shonca quëmapi'sa' chana caniori maninsopita quënanconin. Inapitaso' aquëmiáchin huanirahuaton, ¹³ chiníquën nontopi:

—¡Quiyanta' Maistro nosoroatoncoi anoyatocoi topiraihuë'! itopi.

¹⁴ Napotohuachinara, ni'sahuaton, itapon:

—Paaatoma' corto hua'an noyatérmaso a'notonco', itérin. Napotohuachina, pa'pi.

Paasoi', a'nanaya canio inquipi. Noyatopi. ¹⁵ A'nara': “Nani noyatérahuë,” ta'ton, ayanquintarin. Iratapon pochin “¡Ma noyacha Yosëo' ni'ton, anoyatérinco paya!” tosarin. ¹⁶ Quisosoquë huënantahuaton, nantëntaquëchin isonquirin. Isonquirahuaton, “Yosparinquëñ, Sinioro,” itérin. Samaria piyapi inaso'.

¹⁷⁻¹⁸ —Shonca ya'pi anoyatopirahuë', a'naíchin huënantahuaton, “Yosparinquëñ,” itérinco. Inaso' nisha piyapi níponahuë', Yosë yonquirin. A'napitaso nípirinhue' co “Yosparinquëñ,” itérinacohue', ténin.

¹⁹ Ina quëran itantarín:

—Huanirahuaton iyasha, noya paqué. Yosë natëran ni'ton, noyatomiatérán huachi, itérin.

*Yosë hua'anëntariso'
(Mateo 24.23-28, 36-41)*

²⁰ Ina quëran Parisioro'sari huëcapairahuatona', itapona':
—¿Onporota' Yosë isoro'paquë hua'anëntarin? itopi.

—Yosë hua'anëntohuachin iyaro'sa', co a'ninquëchin ya'noarinhuë'. ²¹ "Isëquë ya'huarin," co taponahuë'. "Pasëquë ya'huarin," co taponahuë'. Yosë hua'anëntohuachinquéma', ya'coancantarinquéma', itérin.

²² Ina quëran ca'tano'sanënpita itantarín:

—A'na tahuëri iyaro'sa', panantarahuë. Naporo' nohuantaramaco. Yosë quëran quëmapico ni'to, o'mantararahuë. "Manóton o'manta'in," tosapiramahuë', co naporo' quënanaramacohuë'. ²³ A'naquën yanoprintarinënquéma'. "Nani o'mantarín. Paséquë ya'huarin," itarinënquéma' a'naquën. "Patoro'pa' ya'huarin, quiyaso' nitotërai," itarinënquéma' a'naquëonta'. Ina pochin nontohuachinënquéma', ama natëcosohuë'. Ama inapita imacosohuë'. ²⁴ A'nanaya o'mantararahuë. O'cori' huënscha' topachina, ya'ipi parti a'pintërin. Inapochachin a'na tahuëri ya'ipi piyapi'sa' ni'sarinaco. ²⁵ Iporaso nipirinhuë' chiníquën parisita'huaso' ya'huërin. Na'a piyapi'sa' co nohuantarinacohuë'. No'huiarinaco. ²⁶⁻²⁷ Iráca Nói pënëntopirinhuë', co natëpihuë'. Co natëtonahuë', topinan ya'huëcaisoráchin cancantopi. Coshatápi, o'osapi, sa'asapi, hui'ninpitanta' aso'yapi. Napoatona', co manta' Yosë yonquipihuë'. Noiso nipirinhuë', Yosë natëton panca nancha ninin. Nani tinihuachina, inaquë ya'conin. A'napitaso' co yonquipirinahuë', a'nanaya panca pacon pa'sarin huachi. Naporo' ya'ipiya chimiitopi. Inapochachin piyapi'sa' topinan ya'huasoi', a'nanaya o'mantararahuë. ²⁸ Notonta' iráca Sotomaquë ya'huëpirinhuë'. Inaquë a'napitaso' topinan ya'huatona', coshatápi, o'osápi, nipa'antápi, ma'sha sha'sapi, pëiapi. ²⁹ Napoápirinahuë', Noto pipihuachina, naporo tahuëri chachin Yosë nohuantón, inápa quëran pën a'paimarin. A'nanaya ta'huantopi. ³⁰ Inapochachin canta' a'na tahuëri Yosë quëran quëmapico ni'to, ya'noantarahuë.

³¹ "Ina tahuëri nanihuachin, co ma'shanëmapita yonquicaso' ya'huaponhuë'. Pëinëma aipi ya'huëhuatama', ama ma'sha macacaso marë tèranta' ya'concosohuë'. A'naroáchin ta'aco'. Iminquë ya'huëhuatama', ama pënëmaquë paantacosohuë'. Topinan paco'.

³² Iráca Noto sa'in ma'shanënpita yonquiatón, co a'naroáchin ta'arinhuë'. Napoaton co cha'ërinhuë'. Ina yonquico'. ³³ Noya nanopicamasoáchin yonquihuatama', topinan quëran nanoparama'. Chiminpatama', parisitomiatarama'. Nipirinhuë', casáchin yonquihuata-maco, tëpapirinënquémaonta', noya noya nanopimiatontarama'.

³⁴ O'mantahuato, naporo' tashi' cato' piyapi ina pë'saraquëáchin huë'ësapirinahuë', a'nara' imarinco ni'ton, anquëniri inápaquë quëpantatarin. A'naso nipirinhuë' patarin.

³⁵ Cato sanapi shi'shi' pë'sanapirinhuë', a'nara' quëpantatarin. A'naso nipirinhuë' patarin.

[³⁶ Cato quëmapi ina iminquëáchin sacatapirinahuë', a'nara' quëpantatarin, a'nara' patarin,] ténin Quisoso.

³⁷ —¿Insëquëta' Sinioro napoapi? itopi.

—Ma'sharo'sa' chiminpachina, taméro'sari huëcapaipi, itérin. (O'mantahuachin, ya'ipiya nitotapi, tapon naporin.)

18

Coisë naporinso'

¹ "Chiníquën cancantatë', apira apira Yosë nontacaso' ya'huërin," ta'ton, pënënto nanan sha'huitantarín ama amitona' a'pocaiso marëhuë'. A'chintaton, itapon: ² "A'na ninanoquë a'na coisë ya'huërin. Co manta' Yosë të'huatérinhuë'. Piyapi'santa' co nosororinhuë'. ³ Ina ninanoquë chachin a'na quëyoron ya'huëpirinhuë', inimiconëni na'con ihuarin. Napoaton coisëquë pa'nin. 'Paso' quëmapi ihuarinco. Sha'huitëquë' quëtanta'inco. Ana'intëquë', itopirinhuë', co nohuantérinhuë' catahuacaso'. Nani tahuëri

paantahuaton, inachachin inachachin itantarín. ⁴ Hua'qui' coiséri co natépirihuë', napoin quëran ami ami natanin. 'Co' mini Yosë té'huatérahuë'. Piyapi'santa' co nosororahuë. ⁵ Iso quëyoronso niperihuë' apinisco. Apira apira huëcapaihuachincora, pinatanahuë. Co huachi ahuantérahuë'. Napoaton inimiconën ana'intarahuë', ténin.

⁶ Ni'co'. Coisé co noyahuë' niperihuë', napoin quëran quëyoron catahuarin. ⁷ ¡Yosëso niperihuë' nóya ni'ton, huayoninsopita na'con catahuarin! A'napitari aparisito-huachina', Yosëri no'téquën ana'intarín. Tahuériré chachin, tashiré chachin ina non-topi ni'ton, catahuarin. Co naniantarihuë'. ⁸ Tahuëri nanihuachin, a'naroáchin ana'intarín. Napoaponahuë' o'mantahuato, ¿na'a ya'pita'ma' natéarinaco quënaimapo to?" itérin Quisosori.

Cato' piyapi Yosë nontopiso'

⁹ A'naquën piyapi'sa' ya'huépirinahuë'. "Quiyasáchin no'téquën Yosë natérai. A'napitaso' co quiya pochin natépihuë'", toconpi. Napopirinahuë', inapita pénénacoso marë' Quisosori itérin: ¹⁰ "Cato' quëmapi Yosë chinotopiso pëiquë Yosë nontacoso marë' pa'pi. A'naso' parisio. A'nanta' coriqui copirno marë' ma'patérinso'. ¹¹ Parisioso' huanirahuaton, sacaronquë Yosë nontérin: 'Tata Yosë, yanontéranguën. Caso' noyaco. Ina marë' noya ni'nanco ni'ton: "Yosparinquë", itéranguën. Co a'napita pochinchihuë'. Co ihuatérahuë'. Co nonpinahuë'. Co monshihuanahuë'. Paso' quëmapi co noyahuë'. Caso niperihuë' co ina pochinchihuë'. ¹² Nani simana catoro' ayonarahuë. Ya'ipi canarahuë quëran, diesmo quëma marë' acorahuë', itérin Yosë nontaton. ¹³ A'naso niperihuë' co ya'caritérihuë'. Tapanaton, monshoárin. Oshanën marë' sétérin. 'Tata Yosë, caso' oshahuanco. Nosoroatonco, oshanéhuë inquitoco,' itérin. ¹⁴ Ina oshanën inquitaton, Yosëri noya ni'nin. Parisioso niperihuë', co noyahuë' ni'nin. A'napita nocanpatama', a'na tahuëri Yosë atapanarinquëma'. Niperihuë': 'Caora co nanitérahuë' noya nica'huaso'. Catahuaco Siniro,' topatama', noya acoarinquëma'," ténin Quisoso.

Hua'huario'sa' nosororinso'

(Mateo 19.13-15; Marcos 10.13-16)

¹⁵ Ina quëran hua'huario'sa' quëpi Quisosori së'huamotocaso marë'. Së'huamotorahuaton, inapita marë' Yosë nontérin. Hua'huario'sa' quëpisopita ca'tano'sanénpitari yaa'papirinahuë'.

—Ama napotocosohuë'. Quisoso apinama', itopi. ¹⁶ Quisosoriso niperihuë' itérin:

—Tananpitoco' hua'huario'santa' huë'ina'. Ama a'pacosohuë'. Hua'huario'sa' pochin cancantohuatama', Yosë hua'anéntérinquë ya'conarama'. ¹⁷ Téhuéñchachin itéranguëma'. Hua'huario'sa' a'naroáchin yaimarinaco. Co'so' inapita pochin cancantohuatamahuë', co Yosë hua'anéntérinquë ya'conaramahuë', itérin.

Ma'huan yaimarinso'

(Mateo 19.16-26; Marcos 10.17-27)

¹⁸ Ina quëran a'na hua'ani Quisoso huëcapairin.

—Quëmaso' Maistro noyanquë, ténahuë. ¿Ma'ta' caso' nii nanopimiata'huaso marë'? Sha'huitoco canta' noya nii, itiirin.

¹⁹ —¿Ma'marëta' "Quëmaso' noyanquë" itérancó? Yoséíchin noyaso'. ²⁰ Iráca pénéntérinso' nitotérán. "Ama sa'an téhuinanpitéquësuhuë". Ama piyapi tépaquësuhuë'. Ama ihuatéquësuhuë'. Ama nonpinapiquësuhuë'. Tata natéquë'. Mamanta' natéquë'," ténin Yosë iráca pénéntaton, itérin.

²¹ —Hua'huatapo quëran huaré' ya'ipi inapita natérahuë, itérin.

²² Ina natanahuaton, Quisosori itantarín:

—Isonta' Yosë nohuantérin. Paaton, ya'ipi ma'shanénpita pa'anconquë'. Coriqui canaranso' sa'ahuaros'a' quëtonquë'. Ina quëran imaquico. Inapotohuatan, Yosë'pa' na'con canamiataran, itérin.

²³ Ina natanahuaton, co huachi noya cancantérinhuë'. "Hua'huayáterahuë ma'sha ya'huétérinco," ta'ton, sétérin. Sétaton, pa'nin. ²⁴ Napohuachina, Quisosori itérin:

—Sacai quérana ma'huano'sa' Yosë hua'anéntérinquë ya'conapi. ²⁵ Ni'co' iyaro'sa'. Nahuan huératén pi'pira'huaya naninën ya'huétérin. Camiyo panca masho ni'ton, sacai' inaquë ya'conacaso'. Ina quérana saca sacai' ma'huano'sa' Yosë hua'anéntérinquë ya'conacaiso', itérin.

²⁶ Ina natanahuatona', pa'yanpi.

—¿Incha nica cha'érë'poya? itopi.

²⁷ —Co insonta' inaora nanitérinhuë' cha'ëcaso'. Yosëíchin nanitérin anoyacancantinguëmaso'. Ya'ipi nanitaparin, itérin Quisosori.

²⁸ —Ni'quë' Siniro, quiyaso' ya'ipi ma'shanéhuëi patahuatoi, imasarainquën, itérin Pitrori.

²⁹ —Téhuéñchachin iyaro'sa', nani ma'sha patohuatama', na'con na'con Yosë catahuarinquëma', ténahuë. A'naquëma' Yosë hua'anéntérinso' a'chinacamaso marë' pénëma', sa'ama', iyaparima', tatama', mamama', hui'nama', inapita patarama'. ³⁰ Ca marë' patohuatama', ipora chachin Yosë na'con na'con quëtantarinquëma'. Ina quérana a'na tahuëri Yosë'pa' nanopimiatarama huachi, itérin Quisosori.

Chiminacaso' sha'huitantarinho'

(Mateo 20.17-19; Marcos 10.32-34)

³¹ Ina quérana ca'tano'sanénpita amashamiachin quëparahuaton, itantarín: "Iporaso', Quirosarinquë paantarëhua'. Inatohua'ya'huasëhua', Yosë quérana quëmapico nípirahuë', nani ma'sha onpotarinaco. Pénéntona'piro'sa' iráca ninshitopiso chachin napotarinaco. ³² Hua'ano'sa' masahuatonaco, nisha piyapi'saquë yo'coaninaco. Téhuaarinaco, no'huiarinaco, ipitarinaco. ³³ Chiníquen huihirahuatonaco, tēpararinaco. Napoaponahuë', cara tahuëriya quérana nanopiantarahuë," itérin.

³⁴ Natanaponaraihuë', co nitotopihuë'. Ma'sona tapon naporinso' co yonquipihuë'.

Somaraya anoyatérinso'

(Mateo 20.29-34; Marcos 10.46-52)

³⁵ Ina quérana Quiricoquë ya'caritohuachina, a'na quëmapi quënanconin. Ira yon-sanquë huënsëarin. Somaraya ni'ton, nani tahuëri inaquë huënsëaton, coriqui topinan ma'patárin. ³⁶ Na'a piyapi'sa' iratapi, natanaton: "¿Inta' huë'sarin?" topachina, ³⁷ "Quisoso Nasaritoquë ya'huérinso' huë'sarin," itopi. ³⁸ Ina natanahuaton, chiníquen nontérin:

—¡Nosoroco Siniro! Quëmaso' Tapico' shinquën. Yosë a'paimarinquën ni'ton, nosoroco canta', itérin.

³⁹ A'naquën quëchitopisopitari natanahuatona', no'huipi. "Ta'téquë," itopirinahuë', aquëtë chachin chiníquen nontérin.

—Nosoroco Siniro. Quëmaso' Tapico' shinquën. Onpopionta' catahuaco, itantarín.

⁴⁰ Quisososo' chiniconahuaton, camaitérin quëcacaiso'. Quëshihuachinara:

⁴¹ —¿Ma'ta' iyasha onpochinquën? itérin.

—Anoyerayatoco Siniro canta' ni'chi, itérin.

⁴² —Noyapa'. Natéranco ni'ton, anoyerayataranquën, itérin.

⁴³ Itohuachina, a'naroáchin noya ni'térin. "¡Ma noyacha Yosëso' ni'ton, anoyerayatérinco paya!" ta'ton, Quisoso imarin. Piyapi'santa' pa'yatatona', "Ma noyacha Yosëso' ni'ton, anoyerayatérin paya," topi.

Saqio anoyacancantérinso'

¹ Quiricoquë canconahuaton, ninano huáncana pa'sarin. ² Inaquë a'na ma'huan ya'huérin. Saqio itopiso'. Inaso', coriqui copirno marë' ma'patona'piro'sa' hua'anen

ni'ton, chiníquen nanantérin. ³ Quisoso inaquë huë'pachina, na'a piyapi'sari yamotérapi. Saquonta': "Canta' Quisoso nohuichi," ta'ton, huë'pirihuë'. Mo'copiya ni'ton, co nanitérinhue' quënanacaso'. ⁴ Napoaton ta'arë'nachin piyapi'sa' na'huëtérahuaton, naraquë nanopéconin. "Iséquëchin Quisoso huë'sarin," ta'ton, inaquë huënséarin Quisoso nococaso marë'. ⁵ Quisososo' inaquë canconahuaton, né'péconin.

—Iya Saquio, manóton nohuaraquë'. Ipora tahuëri quëma pëinënqué yacahuaran-quën, itérin.

⁶ Napotohuachina, manorahuaton, nohuaraimarin. Pa'yataton, "Noya Maistro. Huëquë' ni'quico," itérin. Ina quëran pëinënqué quëparin. ⁷ Piyapi'sari quënanahuatona', ninontapi. "¿Onpoatonta' oshahuan pëinënqué yacahuatonin?" nitopi. ⁸ Saquioso niperihuë' Quisoso a'chiniso' natanahuaton, noya natérin. Napoaton itapon:

—Nani ma'sha Siniro ya'huëtérinco. Ipora patoma sa'ahuar'o'sa' quëtarahuë. Iráca a'naya a'naya nonpintato, ihuarahuëso' na'con na'con quëtantarahuë. A'na maréichin niperihuë', catapini quëtantarahuë, itérin.

⁹ Itohuachina, Quisosori itérin:

—Ipora tahuëri Yosë nicha'érinquen. Sa'an, hui'nanpita, inapitanta' nicha'érin. Apraan shinquën ni'ton, nicha'érinquen. ¹⁰ Na'a piyapi'sa' co Yosë natëtonahuë', chihuëpi pochin nipi. Inapita yonica'huaso marë' o'marahuë. Cancanëna' anoyacancanta'huaso marë' o'marahuë, ténin Quisoso.

Canacaso marë' coriqui quëtérindo'

¹¹ Na'a piyapi'sa' natanapi. Paatona', Quirosarinqué ya'caritérapi. "Ipora tahuëri'sa' Yosë hua'anéntarinpoa huachi," topi. Napoaton Quisosori a'na pënento nanan sha'huitérin:

¹² "A'na quëmapi aquë pa'sarin hua'an ya'conacaso marë'. Yapa'pachina, piyap-inénpita nontérin: 'Inatohua' pa'pato, copirno chiníquen nanan quëtarinco naro'pa' hua'anénta'huaso marë'. Oshaquëran chiníquen nanan quëtohuachinco, huënantarahuë', tosahuaton, ¹³ shonca inpriatonën amatérin. Huë'pachinara, a'naya a'naya coriqui quëtérin. Napopináchin quëtéra'piarin. 'Iporaso' aquë pa'sarahue. Iso coriqui quëchinquéma' ma'sha pa'anatoma', na'con na'con canacamaso marë', itérin. Itahuatón, pa'nin. ¹⁴ Piyapinénpitaso niperihuë' co nohuantopihuë'. No'huipi. Napoaton comisionénpita a'papi copirno sha'huitacaiso marë'. 'Ina quëmapi co nohuantérainhuë' hua'anéntiincoiso'. Ama acoquësohuë', itoonpi.

¹⁵ Copirnoso niperihuë' co comisionénpita natëtonhuë', chiníquen nanan quëtérin. Napotohuachina, ya'huérinquë huéntarin. Canquirahuaton, inpriatonénpita amataantarín. Huë'pachinara, '¿Onpota' canarama?' itéra'piarin. ¹⁶ A'naso' huë'sahuaton, itérin: 'Ina nápo' coriqui siniro quëtérancó. Ma'sha pa'anato, nani shoncaro' aquëtë canarahuë', itérin. ¹⁷ 'Ma noya sacatérancó. Natérancó ni'quëhuarë', hua'an aco'inquën. Shonca ninanoro'sa' hua'anéntaran,' itérin. ¹⁸ Ina quëran a'na inpriatonën huë'pachina, itérin: 'Ina nápo' coriqui, siniro, quëtérancó canta'. Ma'sha pa'anato, a'natéraporó' aquëtë canarahuë', itérin. ¹⁹ 'Natérancó ni'quëhuarë', quëmanta' hua'an aco'inquën. A'natérápo ninanoro'sa' hua'anéntaran,' itérin.

²⁰⁻²¹ A'nanta' niperihuë' huë'sahuaton, itérin: 'Quëmaso' siniro, co nosororan-coihuë' ni'ton, të'huatéranganquë. Co sacataponahuë', canaran. Co sha'topiranhuë', nitérinso' manan. Canahuato, topinan osérétarinco, ta'to, co sacatérahuë'. Ina nápo' coriqui quëtérancoso' panioquë so'pinahuato, taparahuë. Ma'tana ya'huarin,' toconin. ²² 'Quëmaso' co noyanquënhue', chiroran. Co pi'pisha téranta' natérancohue'. Quëmaora nanamën quëran napotaranquë. Co sacataponahuë', canaran, ¿itéranco ti?

²³ ¿Onpoatonta' nipachin co bancoquë acoranhue'? Inaquë acoran naporini, pi'pian téranta' canaitohue', itérin. ²⁴ Ina quëran piyapinénpita sha'huitérin. 'Iso quëmapi topinan quëran coriqui quëtérahuë. Coriqui osérétahuaton, paso' quëmapi quëtēquë',

na'con na'con canarinso', itérin. ²⁵ 'Co'ta, inaso' nani hua'huayáterahuë coriqui ya'huëtérin. ¿Naquéranchin quétanta'i ti?' itérin piyapinéni. ²⁶ 'Ina mini quétëquë'. Noya natérinco ni'ton, na'con ya'huëtarin. Na'con na'con quétantarahuë. A'naso nipurinhue' co natérincohue' ni'quëhuarë', pi'pian ya'huëtérinso térranta' osérëtarahuë. ²⁷ Co nohuantérinacosopitaso nipurinhue' maconco'. Iséquë chachin tēpaco', ténin," itérin Quisosori.

Quirosarinqué canconinso'

(Mateo 21.1-11; Marcos 11.1-11; Juan 12.12-19)

²⁸ Ina tosahuaton, paantarin. Quirosarinqué ya'caritériarin. ²⁹ Ya'caritahuaton, Oripose panénqué canconin. Ina ya'cariya cato' ninano' ya'huérin. A'naso' Pitipaqui itopi. A'nanta' Pitania itopiso'. Inaqué canconahuaton, cato' ca'tano'sanén sha'huitérin.

³⁰ —Paso' ninanoqué paco'. Pëi' ya'natirinqué canconpatama', mora hui'naphishin a'sonpinan quénanconarama'. Co incari térranta' huënsécháterarihuë'. I'quiritahuatomá, quëshico. ³¹ "¿Onpotaomata' i'quiritarama?" itohuachinquëma', "Sinioro nohuantérin," itoco', itérin.

³² Itohuachina, pa'pi. Pa'sahuatona', mora a'sonpinan quénanconpi. Quisosori sha'huitérinso chachin quénanconpi. ³³ I'quiritaquëya':

—¿Onpotaomata' moraso' i'quiritarama? itérin hua'anéni.

³⁴ —Siniorori nohuantérin, itohuachina:

—Inta nipachin, quëpaqué', itérin.

³⁵ Napotohuachina quépatopi. Mora aipi a'mopiso' huëtohuachinara, ina aipi Quisoso huënsérahuaton, pa'sarin. ³⁶ Na'a piyapi'sa' quéchitahuatona', a'mopiso' iraqué huëtopi. Chiníquén hua'an pochin nicatona', napotapi. Inaqué Quisoso pa'sarin. ³⁷⁻³⁸ Oripose panén quérañ nohuarapona pochin, imarinsopita chiníquén nonsapi.

—¡Ma noyacha Quisososo paya! Nani ma'sha nitotérin. Yosë nohuanton, na'a cania'piro'sa' a'naroáchin anoyatérin, ni'nai. Yosëri a'paimarin hua'anéntipoaso marë'. Siniorori chachin chiníquén nanan quétérin. ¡Ma noyacha Yosëso paya! Nanan anoyatérinpoa' ni'ton, noya yonquirinpoa', topi. Noya cancantatona', napopi. ³⁹ Parisioro'sari natanahuatona', no'huipi.

—Imarinénsopita Maistro, sha'huitéqué' ta'china', itopi.

⁴⁰ —Ta'topi naporini, na'piro'sa térranta' chiníquén nointonahuë', ténin Quisoso.

⁴¹ Ina quérañ Quirosarin noténanqué canconipi. Canconpachina, piyapi'sa' yonquia-ton, Quisoso sétérin. Sétaton, na'nérin. ⁴² "Hua'qui' pënënpiranquémuë", co yanatana-macohue'. Ipora térranta' no'téquén yonquirama' naporini, noya cancanchitomahuë'. Iporaso nipurinhue' co huachi nanitaramahuë'. Co natantochináchinhue' cancantérama'.

⁴³ Napoaton a'na tahuëri parisitarama'. Inimiconémapita huëcapairahuaténénquéma', tancapitarinénquéma'. Ya'ipi parti quérañ ahuëarinénquéma'. Ninano pairapiramaso' inápa nuponahuë', ma'sha a'mitë a'mitëtapi ya'conacaiso marë'. ⁴⁴ Ya'conahuatona', pënëmapita ohuatapi. Co a'na na'pi térranta' niya'huiritarinhue'. Ya'ipinquëma' ta'huantarama'. Nicha'ëca'huanquémaso marë' o'mapirahuë'. Co nohuantéraramacohue' ni'ton, Yosë ana'intarinquéma huachi," ténin Quisoso.

Nipa'antopisopita Yosë chinotopiso pëi quérañ a'parinso'

(Mateo 21.12-17; Marcos 11.15-19; Juan 2.13-22)

⁴⁵ Ina quérañ Yosë chinotopiso pëiqué ya'conahuaton, nipa'antopisopita a'parin.

⁴⁶ —Yosë quiricanén quérañ tapon: "Ca nohuento, pëinéhuë ya'huë'in piyapi'sa' non-tiinacoso marë'," ténin Yosë. Canpitaso nipurinhue', ihuatéro'sa' ya'huépique' pochin nitérama', itérin Quisosori. Itahuaton, a'parin.

⁴⁷ Ina quëran nani tahuëri inaquë a'chinin. Corto hua'ano'sa', cotio maistro'sa, ninano' hua'ano'sa', inapitaso' no'huitona', Quisoso yatëpapirinahuë'. ⁴⁸ Na'a piyapi'sari nöya natanañtona' yamotopi ni'ton, co nanitopihuë' macacaiso'.

20

*Chiníquën nanantérinso'
(Mateo 21.23-27; Marcos 11.27-33)*

¹ Ina quëran Yosë chinotopiso pëiquë paantarahuaton, piyapi'sa' a'chintantarín. Noya nanan pënëntaquéya', cotio ansiano'sa', cotio maistro'sa', corto hua'ano'sa', inapita huë'pi.

² —¿Onporahuatonta' chiníquën nanantaton, nipa'antopisopita a'paran? ¿Inta' nanan quëtérinquë ina pochin nicacaso'? Sha'huitocoi, itopi.

³ —Noyapa', carinquémanta' natainquéma'. Ina sha'huitohuatamaco, canta' insosona nanan quëtérincoso' sha'huitaranquéma'. ⁴ ¿Incarita' Coansha nanan quëtérin piyapi'sa' aporintacaso marë'? ¿Yosëri nanan quëtérin, piyapiri nica? ¿Ma'ta' tënama' canpita yonquiatoma'? Sha'huitoco carinquémanta' nanan quëtérincoso' sha'huichinquéma', itérin Quisosori.

⁵ Natanahuatona', inhua capini ninontopi. “¿Ma'ta' itahua”? ‘Yosëri nanan quëtérin aporintacaso’, itohuatéhua’: ‘¿Onpoatomata’ nipachin co natëramahuë?’ itarinfoa’.

⁶ Nipirinhue': ‘Co Yosëri nanan quëtérinhue'. Piyapiri quëtérin,’ itohuatéhua', na'a piyapi'sa' chiníquën no'huiarinënpoa'. Na'piquë të'yaratënënpoa', tëpamarinënpoa'. ‘Yosëri a'parin pënëinfoaso marë’, topi ya'ipiya,” nitopi. ⁷ Nani ninontohuachinara, Quisoso itapona': “Ahuën. Co quiyaso' nitotérainihuë'. ¿Incariso' Coansha nanan quëtomara? Co nitotérainihuë',” toconpi.

⁸ —Napoahuarë', co carinquémanta' insosona nanan quëtérincoso' sha'huitaranquémuë', itérin Quisosori.

*Inpriatoro'sa' co noyahue' yonquipiso'
(Mateo 21.33-44; Marcos 12.1-11)*

⁹ Ina quëran piyapi'sa' a'chintacaso marë', iso pënënto nanan sha'huitaantarín: “A'na quëmapi pancana iminin. Inaquë opasáchin sha'nin. Nani tiquihuachina, inpriatoro'sa' acorin a'paicaiso marë'. ‘Sacatëramaso marë', nitérinso' patomachin maco'. Patomachin canta' acotoco,’ itérin. Itahuaton, a'na parti pa'nin. Hua'qui' inaquë ya'huërin.

¹⁰ Nitérinso' nani cayahuachina, piyapinëñ ya'huërin'pa' a'parin. Patoma nitérinso' ma'caso marë' pa'pirinhue', inpriatonënpitari masahuatona', ahuëpi. Ahuërahuatona', topinan a'papi. ¹¹ Naquëranchin hua'anëni a'na piyapinëñ a'pantapirinhue'. Inanta' chiníquën no'huitona', ahuëantapi. Ahuëatona', topinan a'paantapi. ¹² A'nanta' a'pantapirinhue'. Pë'sharahuatona', a'papi inanta'.

¹³ Napoin quëran hua'anëni yonquirin. ‘¿Ma'cha onpochiya? Na'aya'pi a'papirahuë'. Ahuërahuatona', topinan a'pairachinpi. Hui'nahuë nosoropirahuë', ina huachi a'paarahuë. Ina natëaponal' nimara,’ ta'ton, hui'nin chachin a'papirinhue'. ¹⁴ Inpriatonënpitaso' hui'nin quënanahuatona', ninontopi. ‘Paso' hui'napi a'na tahuëri pa'pin chiminpachin, iso no'pa chachin hua'anëntapon. Huëco' tëpa'ahua'. Ya'ipi ma'shanënpita canpoari matahua huachi,’ nitopi. ¹⁵ Naporahuatona', hui'nin masahuatona', aipiran të'yatahuatona', tëpapi.

Pa'pin natantuohuachin, ¿ma'ta' onpotintapon, hui'nin chachin tëpatopi ni'quëhuarë'? ¹⁶ A'naroáchin huëntarahuaton, inpriatonënpita tëpapon. Ina quëran nasha inpriatoro'sa' acoantapon, tënahuë,” itérin Quisosori.

Ina natanahuatona':

—¡Ama onporonta' napoinsohuë'! topi.

¹⁷ Napohuachinara, nirayarahuaton, itantarín:

—Napopiramahuë', ¿ma'ta' tapon nipachin pënëntona'pi iráca ninorinso'? Ninshitaton, tapon:

“Na'pi quëran yapëihuachina, a'na na'pi ya'huëpirinhue', pëina'piro'sa' co nohuantopihuë'.

‘Napoonin,’ ta'tona', të'yatopirinahuë',

hua'anéni maantarahuaton, ‘Iso na'pi mini na'con na'con nohuantërahuë pëica'huaso marë', ta'ton, noya acoantarín.

¹⁸ Ina na'pi i'patohuatëra, anotatë' ya'panë'. A'na tahuëriso nimirinhue' ina na'pi chachin insosona anoantohuachin, ni'sharianin,” itérin Quisosori.

¹⁹ Ina natanatona', corto hua'ano'sa', cotio maistro'sa', inapitaso' no'huitopi: “Chinotatonpoa', pënënarinpoo',” ta'tona', yamapirinahuë' tashinan pëiquë po'mocaiso marë'. Piyapi'sa' të'huatatona', co mapihuë'.

*Copirno marë' coriqui ma'patërinso'
(Mateo 22.15-22; Marcos 12.13-17)*

²⁰ Napoaton a'naquën quëmapi'sa' amatahuatona', itapona': “Nonpintatoma', Quisosoquë paco'. Yaimaramaso pochin nicatoma', ina nontoco' atëhuëcaso marë'. Ina quëran sha'huirapihuatama', hua'ani sontaro'sa' a'paarin ina macacaso marë',” itopi.

²¹ Itohuachinara, pa'pi Quisoso nontapona':

—Ma noya Maistro nontërancói. No'tequën a'chinan. Yosë nanamën no'tequën a'chintatoncoi, co hua'an téranta' të'huatëranhuë'. ²² Napoaton yanatanainquën. Noma copirnoso' nisha piyapi níponahuë', ya'ipinpoa' hua'anéntërinpoa'. Coriqui ma'painpoaso marë' comisionën a'parin. Huë'pachina', ¿noya ipora quëtacaso' ti? ¿Ma'ta' Yosë nohuantërin nica'huaiso'? Sha'huítocoi nitochii, itopi.

²³ Quisoso nimirinhue' yonquipisopita nitotërin.

—¿Onpoatomata' yaatëhuëramaco? ²⁴ Noma coriqui quëshico ni'i, itérin. Napohuachina, quëtopi.

—¿Inta' isoso' nonanpiso'? itohuachina, —Noma copirno, itopi.

—¿Inta' nininéonta' isëquë ninshitopi? itaantahuachina, —Noma copirno chachin, itaantapi.

²⁵ —Copirno ma'shanën ni'quëhuarë' inachachin quëtaantaco'. Naporahuaton, Yosëso' nininpoa' ni'ton, hua'anéntërinpoa'. Ya'ipi cancanëma quëran ina natëcaso' ya'huérin, itérin.

²⁶ Na'a piyapi'sari Quisoso yaatëhuëpirinahuë', co nanitopihuë':

—Ma noyacha a'panitërin paya, ta'tona', co huachi natanpihuë'.

*Piyapi'sa' nanopiantarapiso'
(Mateo 22.23-33; Marcos 12.18-27)*

²⁷ Ina quëran a'napita cotio hua'ano'sa' huë'pi. Satosioro'sa' itopiso'. Inapitaso' nisha a'chinpi. “Piyapinpoa' chiminpatëhua', co onporonta' nanopiantarihuahuë',” toconpi. Inapitanta' Quisoso yanopintatona', huëcapaipi.

²⁸ —Iráca Maistro Moisësë pënëninpoa': “Quëmapi sa'aponahuë co hui'nin ya'huëyátërasohue' sa'in ayananpihuachin, ina iini chachin imoroën maantacaso' ya'huérin. Hui'nhuanpachin, iinco' apoin inari ya'huërtacaso marë'. Ina quëran mashotohuachin, ma'shanën, no'panëñ, inapita masarin,” ténin Moisësë ninshitaton.

²⁹ Canchisë iyaro'sa' ya'huérin. Paninanso' sa'apirinhuë'. Co hui'nin ya'huëyátërasohue', sa'in ayananpirin. ³⁰ Ina iini chachin imoroën maantarin. Moisësë téninso chachin manin. Inanta' co hui'nin ya'huëyátërasohue', chimiantarin. ³¹ A'na iionta' inapoantarin. Canchisë iinpita chachin inapoantapi. Co a'naya téranta' hui'nin ya'huëyátërasohue', ya'ipi taquipi. ³² Ina quëran sanapinta' chiminin huachi. ³³ Canchisë iinpitari chachin mapirinahuë', nanopiantacaso' tahuëri nanihuachin, ¿inquën chachinchá sa'in ninë'poya? itopi.

³⁴ —Co no'tequën, iyaro'sa', yonquiramahuë'. Isoro'paquë piyapi'sa' sa'api, so'yapi, inapopi. Ina quëran chiminipi. ³⁵ A'naquën Yosëri noya ni'ninsopita inápaquë pantarapi. Nanpiantahuachina', co huachi sa'aponahuë'. Sanapi'santa' co so'yaponahuë'. ³⁶ Co huachi chiminaponahuë'. Anquëniro'sa pochin nisapi. Nanpiantarapi ni'ton, Yosë hui'ninpita chachin nisapi. ³⁷ Chiminpisopita tëhuëñchachin nanpiantarapi. Ina a'chinchinquëma'. Moisësë chachin ninshitérinso'. Nara'huaya orotarinso' nicaso', Yosëri nontérin: "Caso' Yosëco. Apraan chinotarinco. Isaco, Cacopo, inapitanta' chinotarinaco," ténin Yosë. ³⁸ Nanpirëhusopitaráchin Yosë chinotaréhua'. Napoaton inapitanta' nani chiminpirinahuë', nanopimiataantapi, itérin Quisosori.

³⁹ Cotio maistro'sa' natanahuatona', pa'yanpi.

—¡Ma noyacha, Maistro, yonquiran paya! ténin a'na'.

⁴⁰ Ina quëran të'huatatona', co huachi nohuantopihuë' nataantacaiso'.

Yosëri a'paimarinso'

(Mateo 22.41-46; Marcos 12.35-37)

⁴¹ Ina quëran Quisosori itantapon:

—Iráca Yosë quiricanënqué sha'huitérinpoa'. "A'na tahuëri a'na quëmapi acoarahuë piyapi'sa' nicha'ëcaso marë'. Inaso' Cristo," ténin iráca. Cotio maistro'sasso' a'chinpachinara: "Cristoso' Tapico' shiin," topi. Napopirinahuë', ⁴² iráca Ispirito Santo nohuanton, Tapiri chachin Cristo ninorin. Sarmoqué ninshitaton, naporin: Yosëri Siniordonéhuë sha'huitérin: "Inchinanéhuë quëran huënséquë"

⁴³ inimiconënpita cari minséchinquéen," itérin Yosëri, ténin Tapi.

⁴⁴ Shia'huain níponahuë', Cristo yonquiaton, "Siniordonéhuë," ténin Tapi. Piyapi chachin nípirinhuë', Tapiri chinotérin. ¿Onpoatonta' naporin? itérin Quisosori.

Cotio maistro'sa' yanonpipiso'

(Mateo 23.1-36; Marcos 12.38-40; Lucas 11.37-54)

⁴⁵ Ya'ipi piyapi'sa' natantapaquë, ca'tano'sanënpita pënënatón, itapon: ⁴⁶ "Ni'cona cotio maistro'sa' nonpintochinënquéma'. 'Noya noyacoí,' ta'tona', naporopi a'mopi piyapi'sari nicacaiso marë'. Cachiquë pa'pachinara, na'a piyapi'sari nontopi. 'Huë'cama maistro,' itohuachinara, pa'yatopi. Niyontonpiso pëiquë ya'conahuatona', hua'ano'sapitaré' yahuënséconpi. Pita nípachinara, huancánachin yahuënséconpi. ⁴⁷ Noya nonaponarai-huë', a'naya a'naya quëyorono'sa' nonpintatona', ma'shanënpita matopi. Ama noninacaiso marëhuë' hua'qui' Yosë nontopirinahuë', co cancanëna quëran natëpihuë'. Ina marë' aquë aquëtë' Yosëri ana'intarin," itérin.

21

Quëyoron Yosë marë' coriqui acorinso'

(Marcos 12.41-44)

¹ Yosë chinotopiso pëiquë a'na cacon ya'huërin. Inaquë coriqui Yosë marë' po'mopi. Quisosori notëerahuatón, na'a ma'huano'sa' ni'nin. Na'con coriqui inaquë po'morapirinahuë'. ² Ina quëran a'nara quëyoron huë'nin, sa'ahua nininso'. Catotéra'huayaíchin coriqui po'moquirin. ³ Ina ni'sahuatón, Quisosori itérin:

—No'tequën itéranchuëma', na'a piyapi'sa' na'con coriqui po'morapirinahuë', iso quëyoronso nípirinhuë' na'con na'con po'moquirin. ⁴ Ma'huano'saso' na'a coriquihuatona', ya'sotopisoíchin po'mopi. Iso sanapiso nípirinhuë', pi'pian ya'huëcharinso', ya'ipi po'moton, tiquirin. Napoaton na'con na'con Yosë quëtérin, ténahuë, ténin Quisosori.

Yosë pëinën ohuatapiso'

(Mateo 24.1-2; Marcos 13.1-2)

⁵ Yosë chinotopiso pëi' nicatona', a'naquën nitapona': —Ma noyápiachin na'pi quëran nipi. A'naquën ninshiyaráchin Yosë marë' acopiso', nitopi. ⁶ Napohuachinara, Quisosori itérin:

—Iporaso' ya'ipiya noyápiachin ni'piramahuë', a'na tahuëri ya'ipi ohuatapi. Co a'na na'piya téranta' niya'huiritarinhuë', itérin.

*Ayaro' tahuëri ya'caritérinso'
(Mateo 24.3-28; Marcos 13.3-23)*

⁷ Napohuachina, natanpi:

—¿Onporota' Maistro ohuatapi? Ina tahuëri'sa' naniriahuachin, ¿ma'ta' onporahuachina', nitotapoi? Sha'huitocoí quiyanta' nitochii, itopi.

⁸ Napotohuachinara: “Ni'cona iyaro'sa' nonpintochinënquëma'. A'naquën huëcatona': ‘Caso' Cristoco. Yosë chachin a'pairinco,’ tosapi. A'napitanta' nonpin nanan sha'huirapi. ‘Nani tahuëri naniriarin, nitotërai,’ tosapi. Ama inapita imacosohuë'. ⁹ Nisha nisha parti piyapi'sa' nino'huiapi. Niahuérahuatona', quira nisapi. Ina natanpatama', ama pa'yancosohuë'. Piyapi'sa' co noyahuë' nicatona', na'a quira nisapi. Napoaponahuë', co isoro'pa' ta'huanchátëraponhuë'.

¹⁰ Nisha nisha piyapi'sa capini quira nisapi. Copirnoro'sa capini nino'huitona', piyapinënpita camairapi quira nicacaiso marë'. ¹¹ A'na parti a'na parti panca ocohua pa'sarin. Cosharori pahuantohuachina', piyapi'sa' tanari tiquirarin. Nisha nisha parti chiníquën canio matarin. Na'a taquirapi. Yosë nohuanton, nisha nisha ma'sha inápaquë ya'noarin. Quénanahuatona', piyapi'sa' pa'yanapi. Ya'ipiya tē'huatapi. Ayaro' tahuëri ya'caritohuachin, ayonquicaiso marë' napoarin.

¹² Co'huara ma'sha onpoyatérasohuë', co noya piyapi'sahuë' masarinënquëma'. Imaramacoso marë' aparisitarinënquëma'. Cotio niyontonpiso pëiquë sha'huirapiarinënquëma'. Tashinan pëiquë po'morarinënquëma'. Imaramacoso marë' copirno ya'huérinquënta' quëpararinënquëma'. ¹³ Naporo' inapitanta' Yosë nanamën sha'huitohuatama', natanapi. ¹⁴ Mapachinënquëma', ‘¿Ma'cha tono'pocoya?’ ama tocosohuë'. ¹⁵ Catahuanquëma' noya nonacamaso'. Ca nohuanto, noya yonquiarama'. Inimiconënpita co nanitapihuë' a'paniinquëmaso'. ¹⁶ Tataparima' co imatonahuë', sha'huirapiarinënquëma'. Iyaparima', quëmopinëmapita, amiconëmapita, inapita sha'huirapiarinënquëma'. A'naquëma' tēpararinënquëma'. ¹⁷ Imaramacoso marë' na'a piyapi'sa' no'huiarinënquëma'. ¹⁸ Napoaponahuë', Yosë ni'sarinquëma' Co inquëma téranta' chimimiataramahuë'. ¹⁹ Noya imamiatohuatamaco, cha'ësarama'.

²⁰ Notohuaro' sontaro'sa' nisha parti quëran huëcatona', Quirosarin tancapitapi. Ina ni'patama', nani tahuëri nanirinso' nitotarama'. ‘Quirosarin ata'huantapi,’ tosarama'. ²¹ Naporo' ta'acaso' ya'huérin. Cotia parti ya'huéhuatama', motopi'pa' ta'aco'. Ni-nanoquë ya'huéhuatama', a'naroáchin pipico'. Iminëmaquë ya'huéhuatama', ama ni-nanoquë ayancosohuë'. ²² Ina tahuëri'sa' nanihuachin, na'con parisitapi. Iráca Yosë quiricanënquë ninorinso chachin naporo huarë' Yosëri chiníquën ana'intarin. ²³ Caylorono'sa', hua'huahuano'sa', inapitaso' sacai quëran ta'arapi. ¡Ma'huantacha nisapi paya! Yosëri no'huiton, cotioro'sa' ana'intarin. ²⁴ Inimicoro'sa' huëcatona', na'a piyapi'sa' sahuëníquë tēparapi. Nisha nisha sontaro'sari ya'huépique quëparapi asacatacaso marë'. Nisha piyapi'sa' Quirosarinquë ya'conahuatona', camaitapi. Hua'qui' inaquë ya'huapona'. Tahuërinën nanihuachina, Yosë nohuanton, pipiapi.

*Quisoso o'mantacaso' tahuëri
(Mateo 24.29-35, 42-44; Marcos 13.24-37)*

²⁵ Ina quëran Yosë nohuanton, pi'i tashiarin. Co huachi yoqui a'pianihuë'. Tayoraro'sa' inápa quëran anotarin. Marënta' panca co'sacaitapon ni'ton, ténëntapon. Ya'ipi piyapi'sa' pa'yanapona'. ²⁶ Inápaquë ya'huërinsopitanta' nacon nacontapon.

Piyapi'sa' nisha nisha yonquiatona', tē'huatapona'. ‘¿Ma'cha onporo'poya?’ ta'tona', pa'yani yatépapon. ²⁷ Ina quëran ni'sarinaco. Yosë quëran quëmapico ni'to, chitoro' huancana o'mantararahuë. Chiníquen nanantato, o'mantararahuë. Huënaráchin huënaráchin ya'noarahuë. ²⁸ Napoaton nisha nisha quira nisahuachina', nisha nisha ma'sha onporahuachina', ama pa'yancosohuë'. O'manta'huaso' tahuëri naniriarin ni'ton, noya cancantatoma', ninaco. O'mantahuato, noya nicha'ësaranquëma'. Yosë'pa' quëpantaranquëma', itérin Quisosori.

²⁹ Ina quëran iso pénento nanan sha'huitérin: “Iquia nara papotérin quëran nitotoco'. A'napita nararo'santa' yonquico'. ³⁰ Nara ta'aménquë monoantahuachina: ‘Nani o'napi naniriarin,’ topi. ³¹ Inapochachin nani ma'sha onporahuachina', nitotarama'. ‘O'mantacaso' tahuëri naniriarin. Yosë hua'anëntarinpoa', tosarama'.

³² No'tequën itéraranquëma'. Co'huara cotioro'sa' huënton ta'huanchatérasohuë', nani ma'sha onporapi. ³³ Isoro'pa' ta'huantarín. Pi'iro'tënta' ta'huantarín. Ca nanamëhuëso nimirinhuë' co onporonta' ta'huantarinhuë'. No'tequën nonahuë ni'ton, ya'ipiya sha'huitéraranquëmaso chachin naniarin.

³⁴ Ni'cona nariantotamaco. Ama pita pa'yatacasoachin cancantocosohuë'. Ama no'picosohuë'. Ama ma'sharáchin yonquicosohuë'. Ina pochin cancantohuatama', co aquëtë' yonquiaramacohuë'. Co noya ninahuatamacohuë', ³⁵ huëndon a'naroáchin ma'sha maninso pochin, a'nanaya o'mantararahuë. Ya'ipi piyapi'sa' a'ninquëchin ni'sarinaco. ³⁶ Napoaton noya cancantatoma', Yosë nontoco' achinicancainquëma' cha'ëcamaso marë'. Yosë quëran caso quëmapico ni'to, co imapisopitahuë' ana'intarahuë. Apira apira Yosë nontohuatama', naporo' tahuëri co tapanatomahuë', noya huaniparamaco,” ténin Quisoso.

³⁷ Nani tahuëri Yosë chinotopiso pëiquë a'chinin. Tashi' nipachina, Oripose panënquë huë'ëcaso marë' pa'nin. ³⁸ Tashiramiachin na'a piyapi'sa' chinotopiso pëiquë pa'pi Quisoso natanacaiso marë'.

22

Quisoso macacaiso marë' chinotopiso'

(Mateo 26.1-5, 14-16; Marcos 14.1-2, 10-11; Juan 11.45-53)

¹ Cato' tahuëri pahuanarin Pascoa nanicaso'. Naporo' cotioro'sa' niyontonpi Yosëri iráca nicha'ërinso' yonquicaiso marë'. Ina tahuëri nanihuachina, nisha pan ca'pi, co ahuëpocatopisohuë'. ² Corto hua'ano'sa', cotio maistro'sa', inapitari chinotopi Quisoso têpacaiso'. Piyapi'sa' tē'huatatona', co nanitopihuë' a'ninquëchin macacaiso'.

³ Shonca catoya'piri Quisoso ca'tanpirinahuë', a'nara' sopairi ya'coancantérin, Cotaseë Iscarioti itopiso'. Sopairi ya'coancantohuachina, ⁴ corto hua'ano'saquë pa'nin. Cotio sontaro'santa' nontérin Quisoso sha'uirapicaso marë'. ⁵ Natanaahuatona', pa'yatopi. Ina marë' coriqui quëtacaiso sha'huitopi.

⁶—Noyapa', ta'ton, Cotaseë yonquirarin po'oana quëran a'nocaso marë'.

Pascoa tahuëri coshatopiso'

(Mateo 26.17-29; Marcos 14.12-25; Juan 13.21-30; 1 Corintios 11.23-26)

⁷ Pascoa tahuëri'sa' nipachina, nisha pan ca'pi, co ahuëpocatopisohuë'. Naporo tahuëri chachin carniroa'hua iráca têpapiso pochin têpaantapi yonquicaiso marë'. Nani pi'ipiquë cotioro'sa' naporápi. ⁸ Quisosonta' yonquirin ina pochin capacaso' ni'ton, Pitro, Coan-sha, inapita sha'huitérin:

—Paatoma', Pascoa cosharo' tapaco' capaquëhuaquë, itérin.

⁹—¿Intohuata' paatoi tapaai? itopi.

¹⁰—Ninanoquë pacó'. Inaqué a'na quëmapi nacapiarama'. Yonqué i'sha chi'yatarin. Ina imaco'. Pëiquë ya'conconpachin, canpitanta' ya'conco'. ¹¹ Pëi' hua'anën

quënancopatama', natanconco'. “‘Inséquëta' patoana ya'huérin Pascoa cosharo' capaca'huaiso?’” ténin Maistro,” itonco'. ¹² Napotohuatama', panca patoana a'notarinquëma', inápaquë nininso'. Misa, huënsënán, inapita nani ya'huérarin. Inaquë cosharo' tapaco' capaquéhuaquë, itérin Quisosori.

¹³ Itohuachina, paatona', ninanoquë canconpi. Quisosori sha'huitérinso chachin quënancopí. Inaquë Pascoa cosharo' acopi capacaiso marë'.

¹⁴ Ora nanihuachina, Quisoso ca'tano'sanënpitarë' huë'pi. Huëcatona', misaqué huënséquipi.

¹⁵ —Apira Pascoa cosharo' ca'saréhua'. Pa'pi nohuantérahuë campitaro'co ina capa'huaso'. Ipora téranta' ca'ahua' co'huara chimianahuë. ¹⁶ Yosë natëto, chiminarahuë. Iporáchin Pascoa cosharo' ca'sarahuë. Ina quëran Yosë hua'anëntérinso' naniquë huarë' ca'sarahuë. Naporó' noya noya ya'huarihua', itérin.

¹⁷ Minëa'hu masahuaton, Yosë nontérin. “Yosparinquëen, Tata,” itahuaton, ca'tano'sanënpita quëtérin.

—Canpitanta' pi'pian pi'pian o'oco'. ¹⁸ Ipora quëran huarë' co huachi huino o'osarahuë'. Yosë isoro'pa' hua'anëntaquë huarë' o'oantaráhuë, itérin.

¹⁹ Ina quëran cosharo' masahuaton, “Yosparinquëen, Tata,” itahuaton, së'panin. Inapotahuaton, a'naya a'naya quëtérin.

—Ca nonëhuë pochin iso'. Canpita marë' chiminarahuë. Ca chinotatomaco, ca'co', itérin.

²⁰ Nani coshatohuachinara, ninëa'hu maantarin.

—Huënainéhuë pochin iso'. Huënainéhuë pa'sarin ni'ton, nasha quëran campitarë' Yosë anoyatérinso' sha'huichinquëma' imacamaso marë'. Huënainéhuë quëran nicha'ésaranquëma'. ²¹ Napoaponahuë', a'naquëma' carë'quëma chachin coshatapomarahuë', sha'huirapiaramaco. ²² Yosë quëran quëmapico niporahuë', ina nohuanton, chiminarahuë. Napoaponahuë', sha'huirapirincoso', chiniquëen parositapon. Yoséri ana'intarin, ténin Quisoso.

²³ “¿Inquënpoacha yasha'huirapiréhua' nicaya?” nitopi.

Chini chiniquëen nanantacaso' nohuantopiso'

²⁴ Ina quëran inahua capini ninontapi. “¿Inquënpoata' chini chiniquëen nanantérë'pëhuaya?” nitopi. Ya'ipiya chiniquëen nanan nohuantopi. ²⁵ Napoaton Quisosori itérin: “Nisha piyapi'sa' co Yosë nohuitopihuë'. Hua'anënapita chiniquëen nanantatona', piyapinënpita camaipi. ‘Caso' noyaco ni'ton, “a'paitona'pi,” itoco,’ toconpi a'naya a'naya. ²⁶ Canpitaso nimirinhue' ama ina pochin yonquicosohue'. Insosona chiniquëen nanantacaso nohuantohuachin, a'napita na'con na'con catasthuacaso' ya'huérin. Hua'an yanipatama', piyapimia pochin cancantoco'. ²⁷ Ni'co'. Hua'anso' huënsérahauaton, coshatarin. Piyapinënpitaso nimirinhue' sacatapi. Co hua'anën pochin chiniquëen nanantopihuë'. Caso nimirinhue' piyapimia pochin cancantérahuë. Apira apira a'napita catasthuarahuë.

²⁸ Canpitaso' noya imaramaco. Aparisitopirinacohue', co a'poramacohue'. ²⁹ Ina marë' Yosë'pa' canaarama'. A'na tahuëri Yosë nohuanton, hua'anëntarahuë. Naporó' canpitanta' acoaranquëma' hua'an pochin nicamaso'. ³⁰ Hua'anëntohuato, carë'quëma' noya coshatérëhuaso pochin noya cancantarama'. Inaquë catasthuaramaco ya'ipi israiro'sa' hua'anënta'huaso',” itérin.

Pitrori nonpinapicaso' ninorinso'

(Mateo 26.31-35; Marcos 14.27-31; Juan 13.36-38)

³¹ Ina quëran Simon Pitro pënénin chiniquëen cancantacaso marë'.

—Téhuëñchachin iya Simon sopai yaminsérinquëma'. Inari nani Yosë nontérin: “Arosë pintiapiso pochin tén'i, topirahuë'”, itérin. “Inta nipachin téniriquë”, itérin Yoséri.

Napoaton sopai chiníquén sha'huitarinquëma' nariantamacoso marë'. ³² Caso nimirinhuë' iyasha, nani Yosë nontérahuë ama a'poancoso marëhuë'. Napoaton co nariantomitarancohuë'. Noya imaantahuatanco, iyanpita achinicancanquë', itérin.

³³ —Sinioro, co caso' a'poaranquënhuë'. Tashinan pëiquë po'mohuachinënquén, canta' ya'co'in. Yatëpapirinacohuënta', co të'huatarahuë', ténin Pitro.

³⁴ —No'tequén iyasha itaranquén. Ipora tashi chachin, co'huara atari pérashatérasohuë', cararo' nonpinapiaranco. “Co caso' Quisoso nohuitérahuë!,” toconapon, itérin Quisosori.

Tëniarinso'

³⁵ Ina quëran ya'ipi ca'tano'sanënpita itapon:

—Iráca a'chinacamaso marë' a'paranquëma'. Pa'patamara, coriqui, pë'pëto, sapatë', co inapita téranta' quëparamahuë'. Topinan pa'patamara, ¿co manta' pahuantérinquëmahuë' ti? itérin.

—Co manta' pahuantérincoihuë'. Noya pa'nai, itopi.

³⁶ —Iporaso nimirinhuë' sacai' nípon. Napoaton ama topinan pacosohuë'. Coriqui, pë'pëto, inapita ya'huëtohuachinquëma', quëpacó'. Co sahuëni ya'huëtohuachinquëmahuë', a'moramaso' pa'anatoma', sahuëni pa'anco'. ³⁷ Iráca Yosë quiricanën quëran ninorinaco. “Aripo'sarë' acorapi,” ténin. Napopiso chachin aripo'sa pochin cancantatonaco, masarínaco. Ya'ipi ninorinacoso' nanicaso ya'huërin, ténin.

³⁸ —Ni'quë' Maistro. Cato' sahuëni ya'huëtérincoi, itohuachina:

—Tatoco huachi pa'ahua', itérin Quisosori.

Quisoso sëtaton, Yosë nontérinso'

(Mateo 26.36-46; Marcos 14.32-42)

³⁹ Ina quëran pipirahuaton, Oripose panënquë pa'nin. Nani tashi' inaquë pa'nin. Ca'tano'sanënpitarinta' imapi. ⁴⁰ Inaquë canconpachinara:

—Yosë nontoco' iyaro'sa', ama sopai minsëinquëmaso marëhuë', itérin.

⁴¹ Ina quëran amashamiachin pa'sahuaton, isonin quëran, inaora Yosë nontérin: ⁴² “Quëma nohuantohuatan Tata, nicha'ëco, ama ma'sha onpo'isohuë'. Main o'orëso pochin parisita'huaso' ya'huërin. Co parisita'huaso' nohuantaporahuë', quëma nohuantohuatan, ma'sona yaonpotohuatanconta' noya, ténahuë. No'tequén yanatérinquëna,” itérin.

[⁴³ Nani nontohuachina, anquëni inápa quëran o'marahuaton, achinirin. ⁴⁴ Ina quëran pa'pi sëtaton, chiníquén Yosë nontaantarín. Oncainën huënai pochin no'paqué hui'shirin.]

⁴⁵ Nani Yosë nontohuachina, ca'tano'sanënpita paahuantapirinhuë'. Huë'ésápi quënanconin. Sëtaton'a, huë'ésápirinahuë'.

⁴⁶ —¿Onpoatomata' iyaro'sa' huë'ésárama'? Huënséatoma' Yosë nontoco' ama sopai minsëinquëmaso marëhuë', itérin.

Quisoso mapiso'

(Mateo 26.47-56; Marcos 14.43-50; Juan 18.2-11)

⁴⁷ Nontaso chachin, na'a piyapi'sa' canquipi. Cotasë quëchitëriarin. Inanta' ca'tanaponahuë', a'notiarin. Quisoso ya'yoranquirahuaton, apinorin.

⁴⁸ —Iya Cotasë, Yosë quëran quëmapico nimirinhuë', ¿sha'huirapitonco, apinoranco ti? itérin.

⁴⁹ Ca'tano'sanënpitari quënanahuatona', “Quisoso yamasapi,” ta'tona', yaahuëtopi.

—¿Sahuëníquë Sinioro ahuëchi? itopirinahuë'.

⁵⁰ Co'huara a'panichatérasohuë', a'naso' corto hua'an piyapinën ahuëaton, inchinan huëratén nishítetérin.

⁵¹ —Tananpitéquë' iyasha. Ama ahuëquësohuë', itérin Quisosori.

Ina quëran së'huahuëratërahuaton, a'naroáchin anoyatërin. ⁵² Naporahuaton, corto hua'ano'sa', capitano'sa', ansiano'sa', inapita itapon:

—Sahuëni, shonqui, inapita së'quëerahuatomacó, huëcapairamaco. Tëpatona'pi pochin cancantatomaco, ¿yamanamaco ti? ⁵³ Co'tana nani tahuëri Yosë chinotopiso pëiquë pa'nahuë. Nicapomaracohuë', co manamacohuë'. Napoaponahuë', Yosë nohuanton, iporaso' masaramaco. Tashi pochin cancantërama' ni'ton, sopai camairinquéma' co noyahuë' nicacaso marë', itërin.

Pitrori nonpinapirinso'

(Mateo 26.57-58, 69-75; Marcos 14.53-54, 66-72; Juan 18.12-18, 25-27)

⁵⁴ Quisoso masahuatona', corto hua'an chini chiníquën nanantërinso' pëinëñquë quëpapi. Pitrori aquë quëran imaquiarin. ⁵⁵ I'iratëquë huarë' imaquirahuaton, pairaanaquë ya'conin. Inaquë ponisiaro'sa' nani a'pëtopi napëntacaiso marë'. Pana yonsanquë huënsërahuaton, inanta' napëntarin. ⁵⁶ Napëntaquëya', a'na cosonari quënanin. Noya ni'sahuaton:

—Iso quëmapinta' Quisoso imarin, ténin.

⁵⁷ —¡Co imoya caso' ina nohuitërahuë! itërin Pitrori.

⁵⁸ Co hua'quiya quëranhuë' a'na quëmapiri niantarin.

—Quëmanta' Quisoso imaran topirahuë', itërin.

—Co'chi iyasha imarahuë' paya, itaantarín.

⁵⁹ A'na ora pochin nisahuaso', a'nanta' taantapon:

—Cariria piyapi pochin nonin ni'ton, iso quëmapinta' Quisoso ca'tanin ténahuë, ténin.

⁶⁰ —¡Co'chi iyasha paya! Co cariso' nohuitërahuë', itaantarín.

Nonaso', atari pérarin. ⁶¹ Naporo chachin Quisosori tahuëretahuaton, Pitro notëerin. Ni'sarin ni'ton, ninorinso' Pitrori yonquirin. “Ipora tashi chachin, co'huara atari pérashatërasohuë', cararo' nonpinapiaranco,” ¿itërinco pora? ta'ton, ⁶² aipiran pipirahuaton, na'nërin. Chiníquën sëtaton, na'nërin.

Quisoso tëhuapiso'

(Mateo 26.67-68; Marcos 14.65)

⁶³ Ina quëran ponisiaro'sari Quisoso tëhuapi. Tëhuarahuatona', ahuëpi.

⁶⁴ Tonporayatahuatona', panpirayapi.

—¿Inta' ahuërinqué? Ninoquë', itopi.

⁶⁵ “¿Quëmaso' hua'anquën ti?” itatona', tëhuapi. Nisha nisha itatona', no'huipi.

Cotio hua'ano'saque quëpapiso'

(Mateo 26.59-66; Marcos 14.55-64; Juan 18.19-24)

⁶⁶ Tahuërihuachina, cotio ansiano'sa', corto hua'ano'sa', cotio maistro'sa', inapita niyontonpi. Nani niyontonpachina', inaquë Quisoso quëpapi natanacaiso marë'.

⁶⁷ —Quëmaso' Cristo Yosë a'paimarinquénsö' nipatan, no'tëquën sha'huitocoi nitochii, itopi.

—Sha'huitohuatënnquéma', co natëaramacohuë'. ⁶⁸ Ma'sona téranta' natanpatënnquéma', co a'paniantaramacohuë'. ⁶⁹ Nipirihuë', ipora quëran huarë' caso' Yosë quëran quëmapico ni'to, Yosë inchinanën quëran huënsëapo. Inaquë chiníquën nanantarahuë, itërin.

⁷⁰ —Napoahuarë' ¿quëmaso' Yosë hui'ninquën ti? itopi.

—Ca mini inaco, itërin.

⁷¹ —Co huachi aquëtë' sha'huirapicaiso' nohuantarihuahuë'. “Ca Yosë hui'ninco,” toconin, nani natanéhua', nitopi.

23

Piratoquë quëpapiso'

(*Mateo 27.1-2, 11-14; Marcos 15.1-5; Juan 18.28-38*)

¹ Ina quëran pipirahuatona', Piratoquë Quisoso quëpapi. ² Inaquë sha'huirapipi.

—Iso quëmapi piyapi'sa' nonpintarin. “Noma copirno coriqui yama'pahuachinquéma', ama quëtocosohuë'” tosahuaton: “Caso' Cristoco. Yosë a'paimarinco hua'anénta'huaso marë'” toconin, itopi.

³ —¿Quëmaso' cotioro'sa' copirnonquën ti? itérin Piratori.

—Ca mini inaco, itérin.

⁴ Nonapipiso' natanahuaton, ya'ipi cotio ansiano'sa', corto hua'ano'sa' inapita itapon:

—Iso quëmapiso' noya, ténahuë. Co manta' onporinhuë'. Co ana'intacaso' ya'huérinhuë', itopirinhuë', ⁵ aquë aquëtë' no'huitatona', itaantapi:

—A'chintohuachina, piyapi'sa' nisha nisha yonquipi. Naporahuaton, copirno yano'huipi. Ya'ipi parti a'chinárin. Cariria parti quëran huécaton, ya'ipi Cotia parti pa'térin. Iséquënta' a'chinarin, itopi.

Irotiséquë a'parinso'

⁶ Ina natanahuaton, “¿Cariria parti quëran huë'nin ti?” itérin Piratori. ⁷ “Ina quëran mini,” itopi. I'huamiáchin Cariria hua'an Quirosarinqué huë'nin ni'tapon, Irotisé itopiso'. Inaquë ya'huarin ni'ton, Quisoso yaa'parin Irotisé nontacaso marë'. “Ina piyapinën ni'ton, inari ana'inchin,” ta'ton, a'parin. ⁸ Inaquë canconpachina, Irotiséri pa'yatérin. Hua'qui' Quisoso yani'pirinhuë', co nohuichátérarinhue'. Nani ma'sha naporinso' nani natantérin. “Yosë pochin ninin. Piyapi a'naroáchin anoyatérin,” topi natantérin. “Anoyatohuachin, canta' ni'i,” ténin. ⁹ Napoaton Quisoso canquihuachina, hua'qui' nontopirinhuë', co a'panitérinhuë'. Na'con natanpirinhuë', ta'tárin. ¹⁰ Corto hua'ano'sa', cotio maistro'sa', inapita huécatona', Quisoso sha'huirapiapirinahuë', co manta' téninhue'. ¹¹ Napohuachina, Irotiséri télhuarin. Sontaronénpitarinta' técaripi. Noyápiachin hua'an a'morinso pochin a'motahuaton, Piratoquë a'paantarín. ¹² Nani hua'qui' Pirato Irotisére' nino'huipirinahuë', naporó quëran huarë' co huachi niinimi-cotopihuë', noya ninontantapi.

Tépacaso' sha'huirinso'

(*Mateo 27.15-26; Marcos 15.6-15; Juan 18.39-19.16*)

¹³ Ina quëran Piratori piyapi'sa' amatérin. Corto hua'ano'sa', cotio hua'ano'sa', inapitanta' ayontonahuaton, itérin:

¹⁴ —Canpitaso' na'con Quisoso sha'huirapirama'. “Piyapi'sa' sha'huitarin niahuécaiso marë'” itopiramacohuë'. Nani hua'qui' nontérahuë, canpitanta' natanama'. Iso quëmapiso' noya. Sha'huirapipiramahuë', co manta' onporinhuë', ténahuë. ¹⁵ Irotisénta' inachachin ténin. Napoaton a'patiantarinco. Co tépacaso' ya'huérinhuë'. ¹⁶ Topinan ahuihuitahuato oco'i'i, topirahuë', itérin.

[¹⁷ Nani Pascoa tahuëri a'nara' apina'pi tashinan pëi quëran ocoirin pipicaso marë'. Iso pi'ipinta' a'nara' ocoicaso' ya'huérin.] ¹⁸ Piyapi'sariso niperinhuë' chiníquën nontopi.

—¡Quisososo' tépaquë'! ¡Parapasé ocoitocoi! itopi.

¹⁹ Parapaséso' co noya quëmapihuë'. Tépatona'pi inaso'. Ninanoquë piyapi'sa' sha'huiterin niahuécaiso' ni'ton, tashinan pëiquë nani po'mopi. ²⁰ Pirato co no-huantérinhuë' Quisoso tépacaso'. Napoaton: “Oco'i'i,” tantarin.

²¹ Naquëranchin chiníquën nontaantapi.

—¡Coroséquë patanantéquë' chimi'in! ¡Inaquë patanantéquë' chimi'in! itaantapi.

²² —¿Ma'marëta' atépachi? Nani natampirahuë'. Co manta' onporinhuë'. Co tépacaso' ya'huérinhuë', ténahuë. Topinan ahuihuitahuato, oco'i'i, ténin. Nani cararo' inachachin itaantarin.

²³ “¡Corosëquë patanantëquë' chimi'in!” itaantapi. Chiníquën nontápi ni'ton, “Inta nipachin,” itérin. ²⁴ Napotahuaton, sontaro'sa' sha'huitérin corosëquë patanantacaiso marë'. ²⁵ Parapasëso' tēpatona'pi nimirinhue', tashinan pëi quëran ocoirin. Piyapi'sari huayonpi ni'ton, ocoirin. Quisososo nimirinhue' co ocoirinhue'. Tépacaiso marë' sha'huitérin. Cotioro'sa' nohuantopiso chachin ninin.

Corosëquë patanantopiso'

(Mateo 27.32-44; Marcos 15.21-32; Juan 19.17-27)

²⁶ Ninano quëran quëpasoi', a'na quëmapi Simon itopiso' nacapipi. Imin quëran huëntararin. Inaso' Siriniquë ya'huërin. Sontaro'sari masahuatona', corosë apitëntopi. Quisoso pinën quëran quëpatérin.

²⁷ Na'a quëmapi'sari imasapi. Sanapi'sarinta' imasapi. Quisoso yatëpapiso marë' chiníquën sëtatona', na'nérapi.

²⁸ Tahuërétahuaton, Quisosori itapon:

—Ama imoyaro'sa' ca marë' na'nëcosohue'. A'na tahuëri Quirosarinquë ya'huëramasopita na'con parisitarama'. Hua'huamapitanta' parisitapi. Ina yonquiatoma' tēhuëñchinso', sëtoco'. ²⁹ Naporor tahuëri'sa' hua'huahuaninsopita na'con na'con parisitapi. Hua'huinpita yonquiatona', sëtapi. Co hua'huanpihuë' naporini, noya noya niitonahuë'. ³⁰ Piyapi'sa' chiníquën parisitapi ni'ton, “Motopi quëran na'piro'sa' notarintahuatona' imotërinpoa' naporini, noya niitonhuë'” tosapi. ³¹ Ni'co'. “Nanpimë' co huëyarinhue', yanimëso nimirinhue' a'naroáchin huëyarin,” topi. Caso' nanpimë pochin nimirahuë', aparisitarinaco. Canpitaso' yanimë pochin ninama' ni'ton, chini chiníquën aparisitarinënquëma' ténahuë, itérin Quisosori.

³² Cato' apiro'santa' quëpapi inapitanta' tépacaiso marë'. ³³ Pa'sahuatona', a'na panëa'huayaquë canconpi, “Nansë Moto'” itopiquë. Inaquë canconahuatona', corosëquë patanantopi. Cato' apiro'santa' nisha patanantopi. A'na ahuënan quëran, a'na inchinan quëran. Quisososo' ahuancanapipi. [³⁴ Patanantopirinahuë', Yosë nontérin.

—Téparinacoso marë' Tata, ama ana'intëquësuhue'. Co nohuitatonacohue', napotari-naco, itérin.]

Ina quëran sontaro'sa capini ninontopi. “Huëco' nicanatëhua' Quisoso a'morinso' maahua'”, nitatona', ya'nipirapi. Naporahuatona', a'naya a'naya mapi. ³⁵ Na'a piyapi'sa' inaquë ni'sapi. Cotio hua'ano'sariso' tēhuapi.

—A'napita nicha'ëponahuë', inaora cha'ëcasoso' co nanitërinhuë'. Inaso' Cristo, Yosëri chachin huayoniso' nipachin, inaora cha'ë'in, nitopi tēhuatona'.

³⁶ Sontaro'sarinta' tēhuapi. Ya'cariconahuatona', huino main nininso' ihuëtopi.

—O'quë' Maistro. ³⁷ Quëmaso' cotioro'sa' copirnonquëen nipatan, corosë quëran nohuuarahuaton, cha'ëquë', itoonpi.

³⁸ Onporinso marësona téparapiso' ninshitopi.

ISOSO' COTIORO'SA' COPIRNO

ta'caso ninshitopi. Nani ninshitohuachina, corosëquë chachin motën pëtëcha achin-pitopi.

³⁹ Cato' apiro'santa' corosëquë parisitapi. A'nari Quisoso no'huirin.

—Quëmaso' Cristonquëen nipatan, corosë quëran nohuuarahuaton, cha'ëquë'. Ina quëran quiyanta' nicha'ëcoi, itérin.

⁴⁰ A'nariso nimirinhue' pënënин:

—Ta'téquë'. ¿Co pi'pisha tēranta' Yosë tē'huatéranhue' ti? Tépararinën quëmanta'.

⁴¹ Canposo' co noyahue' ninë'. Napoaton no'téquëen coisë ana'intarinfo'. Iso quëmapiso nimirinhue' nöya. Co manta' onporinhuë', itérin.

⁴² Ina quëran Quisoso itapon:

—Hua'anëntacaso' caniaritohuatan, yonquico Sinioro canta', itérin.

⁴³ —Tëhuëñchachin iyasha ipora tahuëri chachin carë'quën Yosë'pa' ya'huëcontaran, itérin.

Quisoso chimininso'

(*Mateo 27.45-56; Marcos 15.33-41; Juan 19.28-30*)

⁴⁴ Camotëchin nisahuaso', ya'ipi parti tashiarin. I'huaraya huarë' yono tashi pochin ninin. ⁴⁵ Co huachi pi'i a'pinihuë'. Naporo' Yosë chinotopiso pëi' tanontën në'mëtëquë patonpiso' inaora noshatérin. ⁴⁶ Napohuachina, Quisoso chiníquën nonin.

—Apira Tata chiminarahuë. Hua'yanéhuë quëpaquë', itahuaton, chiminin.

⁴⁷ Capitanso' ina ni'sahuaton, Yosë chinotérin:

—Tëhuëñchachin iso quëmapi co manta' onporinhuë', ténin.

⁴⁸ Na'a piyapi'sa' Quisoso chimininso' ni'sapi. Nani chiminpachina, pa'yanpi. Chiníquën sëtatona', yanquëepi. ⁴⁹ Imarinsopitaso' nimirinhuë', aquë quëran notëërapi. Sanapi'santa' Cariria parti quëran imaquitona', inaquë ni'sápi.

Quisoso pa'pitopiso'

(*Mateo 27.57-61; Marcos 15.42-47; Juan 19.38-42*)

⁵⁰⁻⁵¹ A'na cotio hua'an ya'huërin, Arimatiaquë ya'huërinso'. Cosi itopi. Cotio hua'an niponahuë', noya quëmapi. Yosë no'téquën chinotérin. "A'na tahuëri Yosë acoriso' isoro'paquë hua'anëntapon," ta'ton, Yosë chinotérin. A'napitari Quisoso yatëpahuachinara, "Ama tépacosohuë'," itopirinhuë', co yanatëpihuë'. ⁵² Quisoso chiminpachina, Piratoquë pa'nin. "Quisoso nonën quëtoco quëpa'i," itohuachina, "Noyahua', quëpaquë'," itérin. ⁵³ Ina natanahuaton, pa'nin. Corosë quëran nonën anohuararahuatona', morinquë so'quëetopi. So'quëetahuatona', na'pi naninquë po'mopi. Inaquë co insonta' chimipi po'moyatérarinhuë'. Inaquë nonën po'mopi. ⁵⁴ Ina tashiraya chinoto tahuëri ni'ton, cotioro'sa' tapatapi chinotacaiso marë'. Napoaton pi'i yaya'conahuaso', manorahuatona po'mopi.

⁵⁵ Sanapi'santa' Cariria quëran imaquipiso' pa'sahuatona', na'pi nanin quënanconpi. Po'mopiso' ni'pi. ⁵⁶ Nani ni'pachinara, ya'huëpi'pa' paantapi. Inaquë no'morain pimóton niniso' tapapi. Pimo hua'sainta' tapapi Quisoso nonën pashtacaiso marë'. Chinoto tahuëri nanihuachina, chinotopi. Moisésë sha'huirinso chachin chinotopi.

24

Quisoso nanopiantarinso'

(*Mateo 28.1-10; Marcos 16.1-8; Juan 20.1-10*)

¹ Tomio tahuëri nanihuachina, tashíramiachin sanapi'sa' pa'pi. Pimo hua'sai', no'morain pimóton niniso' inapita quëpatona', na'pi naninquë pa'pi.

² Canconpachinara, pancara'pi pa'copitopiso' nani chi'huincapi ni'conpi. ³ Na'pi naninquë ya'conpirinahuë', Sinioro Quisoso nonën co quënanpihuë'. ⁴ "¿Onporincha nicaya?" ta'tona', huaniápirinahuë', a'nanaya catoya'piri ya'notimarin. Piyapi pochin niponahuë', a'mopiso' huënaráchin huënaráchin ya'nopi. ⁵ Sanapi'sa' pa'yanpi. Të'huatatona', monshoapirinahuë', catoya'piri itapona':

—¿Onpoatomata' chimipi po'mopiquë Quisoso yonirama'? Inaso' nanopiantarin. ⁶ Co huachi isëquë ya'huërinhuë'. Nani nanopiantarin. Caririaquë sha'huitérinquëmaso', ¿co yonquiramahuë' ti? ⁷ "Yosë quëran quëmapico nimirahuë', ina nohuanton, os-hahuano'sa' masarinaco. Corosëquë patanantarínaco. Tëpapirinacohuë', cara tahuëri quëran nanopiantarahuë," itérinquëma', itopi.

⁸ Itohuachina, yonquipi. ⁹ Na'pi nanin quëran pipirahuatona', shonca a'na ca'tano'sanënpita, a'napita imapisopita, inapita sha'huitonpi. "Quisoso nonën capa. 'Nanpiantarin,' itérinacoi," itoonpi. ¹⁰ Maria Mactarina, Coana, Maria, Santiacó a'shin

nininso', a'napita sanapi'santa' napopi. Quisoso ca'tano'sanënpita sha'huitonpirinahuë', co natëpihuë'. ¹¹ "Inahuara yonquinëna quëran napoapi," toconpi.

¹² Pitroso nipurinhuë', a'naroáchin na'pi nanin'pa' ta'arin. Monshorahuaton, nëhuëconpirinhuë'. Morin so'pinpisoráchin quënanconin. "Capa mini. ¿Ma'ta' onporinso?" ta'ton, ya'huërin'pa' paantarin.

Catoya'pi iratapona pochin quënanpiso'

(Marcos 16.12-13)

¹³ Naporo tahuëri chachin cato' imarinsopita Quirosarin quëran pipirahuatona', ninanonënquë paantapi. Imaosë itopiquë paantapi. Shonca a'na quiromitro pochin aquérinso'. ¹⁴ Papona pochin ninontapi.

"Quisoso tëpapi mini. Na'pi naninquë nani po'mopi. Napoaponahuë': 'Nani nanopiantarin,' ténin Maria. ¿Ma'ta' onpocaso?'" nitopi. ¹⁵ Ninontasoi', Quisosori chachin ya'cariquirin. Inapitarë' pa'sapirinhuë', ¹⁶ Yosë nohuanton co nohuitopihuë'.

¹⁷ —¿Ma'ta' papoma pochin ninontériarama'? Naporahuaton, ¿onpoatonta sëtëramaso pochin ya'norama'? itérin Quisosori.

¹⁸ —Ya'ipi Quirosarinquë ya'huëpisopita nani nitotopirinahuë', quëmasáchin iso tahuëri'sa' napopiso' ¿co nitotomaranquënhuë' ti? itérin Criopasëri.

¹⁹ —¿Ma'ta' onpopiso'? itaantarin Quisosori.

Napotohuachina:

—Co'ta Quisoso Nasaritoquë ya'huërinso' tëpapi. Noya quëmapi nipurinhuë', tëpapi. Ma noya Yosë nanamën a'chintérincoi. Cania'piro'sa' nosoroaton, a'naroáchin anoyatérin. Yosëri noya ni'nin. Piyapi'sarinta' noya ni'pirinahuë'. ²⁰ Corto hua'ano'sa', ansiano'sa', inapitari mapi. Masahuatona', Piratoquë quëpapi tëpacaiso marë'. Sha'huirapihuachinara, corosëquë apatanantérin. Nani chiminin. ²¹ Ina ta'ma' israiro'sacoi nicha'ësarincoi, topiraihuë'. Nani chiminin. Nani cara tahuëritérin. ²² Napoaponahuë', a'naquën sanapi'sa' quiya pochachin imapiso' nanan sha'huitatonaco, a'payaninaco. Tashíramiachin na'pi naninquë po'mopiquë pa'pirinahuë', ²³ co nonën quënanpihuë'. Huéantarahuatona', sha'huitiirinaco. "Anquëniro'sa' quënanai. 'Quisoso nani nanopiantarin,' itérinaco," topi. ²⁴ A'napitanta' natantahuatona', na'pi naninquë pa'pi. Sanapi'sa' sha'huitérinacoiso chachin quënanconpirinahuë', co Quisoso quënanpihuë', itopi.

²⁵ —Canpitaso' co yonquiramahuë'. Iráca quëran huarë' pënëntona'piro'sa' ninopiri-nahuë', co yanatéraramahuë'. ²⁶ Cristo parositacaso' ya'huërin. Nani parisitohuachina, naporo huarë' Yosë'pa' noya noya acoarin huachi, itérin Quisosori.

²⁷ Ina quëran Yosë quiricanënquë ninotonan ninshitopiso', a'chintarin. Moisës'ton ninoton, Yosë quiricanënquë ninshitérin. Ina piquëran na'a pënëntona'piro'sa' ninoantapi. Ya'ipi Cristo ninopiso' no'tequën a'chintarin.

²⁸ Ninanonënaquë canconpachinara, Quisoso yana'huëpirinhuë':

²⁹ —Nani i'huarin. Huëquë' iyasha quiyataquë huë'equiquë', itopi. "Noyahua," tosahuaton, ya'conconin. ³⁰ Yacoshatohuachina', Quisosori pan manin. "Yosparin-quë," Yosë itahuaton, së'panin. Së'panahuaton, quëtérin. ³¹ Pan së'panaso chachin Yosë nohuanton, Quisoso nohuitopi huachi. Ni'sapirinahuë', ina quëran chachin ayarin. ³² Napohuachina, ninontopi.

—Huëcapon pochin Quisoso chachin nontérinpo'. Ma noya Yosë quiricanën a'chintérinpo'. ¡Ma noyásha natanë paya! nitopi.

³³ A'naroáchin Quirosarinquë paantapi. Ca'tano'sanënpita ya'huërinquë pa'pi. Inaqué a'napita imarinsopitanta' nani huë'pi anta'. Inapitari itapona':

³⁴ —Tëhuëñchachin Sinioro nanopiantarin. Iya Simon nani ya'notérin, itopi.

³⁵ Ina quëran catoya'pi canquipisopitarinta' itapona': "Quiyanta' ni'nai. Paasoco, ya'notérincoi. Hua'qui' a'chintopirincoihuë', co nohuitéraihiuë'. Ina quëran yacoshatohuatoira, pan së'panin. Së'panpachina, a'naroáchin nohuitérai," itopi.

Ca'tano'sanënpita ya'notérinso'

(*Mateo 28.16-20; Marcos 16.14-18; Juan 20.19-23*)

³⁶ Ninontasoi', a'nanaya Quisosori ya'notérin. Huancanachin huanirahuaton: —Tashita iyaro'sa'. Sano cancantoco', itérin.

³⁷ Ina quënanahuatona', pa'yanpi. "Hua'yan," ta'tona', pa'pi të'huatopi.

³⁸ —¿Ma'marëta' pa'yanama'? ¿Onpoatomata' nisha nisha yonquirama'? ³⁹ Ca mini. Imirahuë ni'co'. Nantëhuënta' ni'co'. Ohuaninacoso' nicatoma', nohuitoco huachi. Co hua'yancohuë'. Së'huaco. Hua'yanso' co nonën ya'huëtérinhuë'. Caso' ya'huëtérinco, itérin.

⁴⁰ Ina tosahuaton, imirin, nantën, inapita a'notérin. ⁴¹ Ina ni'sahuatona' pa'pi pa'yataponaraihuë', co ya'ipi cancanëna quëran natëyátérapihuë'. "¿Tëhuëñchachin nanopiantarin ti?" topi yonquiatona'.

—¿Ya'huarin capacaso'? itérin Quisosori.

⁴² "Ya'huarin," tosahuatona', sami chinpi së'panpiso' quëtopi. ⁴³ Masahuaton, inapitari nicasoi', ca'nin.

⁴⁴ —Nani i'huachachin iyaro'sa' sha'huitéranquëma'. Yosë quiricanënquë na'con ninorinaco. Moisésë, pënëntona'piro'sa', inapita ninorinaco. Sarmoquënta' ninshitopi. Ya'ipi iráca ninorinacosopita nanicaso' ya'huërin ni'ton, iso tahuëri'sa' ina pochin ni-nahuë, itérin.

⁴⁵ Yosë quiricaquë naporinsopita a'chintaantarin. A'chintaton, catahuarin no'tëquëñ yonquicaiso marë'.

⁴⁶ —Iráca ya'ipi ninotonaco, ninshitopi: "Cristo parisitaton, chiminapon. Chiminaponahuë', cara tahuëri quëran nanopiantarin," ténin. ⁴⁷ Ina nanan chachin sha'huicaso' ya'huërin. "Co noyahue' yonquiramasopita naniantohuatama', oshanëma' inquitarinquëma'," itoco'. Quirosarinquëton sha'huicaso' ya'huërin. Ina quëran nisha nisha nananquë nonpisopita sha'huitacaso' ya'huërin. ⁴⁸ Canpitaso' ni'namaco. Natanamaco. Ya'ipiya sha'huitonco'. ⁴⁹ Ispirito Santo a'patimaranquëma' ya'coancantiinquëmaso marë'. Quiricanëñ quëran tatahuë sha'huitérinquëmaso chachin a'patimaranquëma'. Napoaton iséquë ninaco'. Ispirito Santo ya'coancantohuachinquëma', naporo huarë' nanitaparama' noya noya nicacamaso'. Nani ya'coancantohuachinquëma', noya nanan sha'huitonco huachi, itérin Quisosori.

Inápaquë panantarino'

(*Marcos 16.19-20*)

⁵⁰ Ina quëran a'na tahuëri ninano quëran quëparin. Pitaniaquë huarë' canconpachinara, anquirahuaton, Yosë nontérin. "Isopita Tata noya a'paiton, catahuaquë'," itérin.

⁵¹ Nonin quëran chachin inápaquë panantarino'. ⁵² Ina ni'sahuatona', Quisoso chinotopi. Noya cancantatona', Quirosarinquë ayamantapi. ⁵³ Nani tahuëri Yosë chinotopiso pëiquë pa'pi. "Ma noyacha Yosëso paya," tosápi. Nani huachi.

Coansha ninshitërinpoa' Quisocristo nohuitatëhua' nanpimiatacaso marë'

Iráca Quisocristo Yosë'pa'ya'huérinso'

¹ Iráca quëran huarë' Yosë noninso' ya'huérin, Quisocristo itërehuaso'. Tata Yosë'ë' ya'huérin. Yosë pochachin ninin anta'. ² Co'huara isoro'pa' ya'huéyáterasohuë', Yosë'pa' ya'huérin. ³ Naporor Yosë yonquirin ya'ipi ma'sha acocaso'. Ina nohuanton, hui'nini acorin. Ya'ipi ma'sha ninin. Co a'naya téranta' inaora ya'huérinhue'. Co acorin-hue' naporini, co manta' ya'hué'itonhuë'. ⁴ Inariáchin ya'ipiya ananpirin. Piyap-inpoanta' a'pintatë pochin a'chintërinpoa' ina nohuitatëhua' nanpimiatacaso marë'. ⁵ Tashinantérinso' a'pintohuatéra, a'naroáchin tahuëri pochin ninin. Co tashiri tacopitërinhuë'. Inapochachin Quisocristo a'pintërinpoa'. Co noyahuë' nininsopitari yaminsépirinahuë', co nanitapapihuë'.

⁶ A'na quëmapi ya'huérin, Coansha itopiso'. Yosëri a'parin ⁷ a'pininso' anohuitiinpoaso marë'. Ya'ipi piyapi'sari natëcaiso marë' sha'huirin. ⁸ Coanshaso' co a'pintërinpoahuë'. Yosëri a'parin a'pininso' anohuitiinpoaso marë'. ⁹ Sha'huitërinpoaso chachin Quisocristo isoro'paqué o'marin. O'marahuaton, ya'ipi piyapinpoa' a'pintimarinpooa'. Inasáchin no'téquën anitotërinpoa'.

¹⁰ Isoro'paqué o'marin. Iráca Tata Yosë nohuanton, ya'ipi ma'sha ninin. Inari acopirinhuë', co piyapi'sari nohuitopihuë'. ¹¹ No'panénqué chachin o'mapirinhuë', co piyapinénpitari nohuantopihuë'. Nipirinhuë', ¹² Quisocristo cancanën mapatëhua', hui'nin pochin Yosë ni'ninpoa'. Natérëhuasopitarachin huëntonénqué aya'coninpoa'. ¹³ Ya'ipinpoa' piyapi quëran nasitérëhuaso nípiréhuahuë', co ina quëran Yosë huëntonénqué ya'conéhuahuë'. Co piyapi nanitérinhuë' aya'co'inpoaso'. Co canpoara nohuanton, ya'conéhuahuë'. Yoséíchin aya'coninpoa'. Ina quëran hui'ninpita pochin ni'ninpoa'.

¹⁴ Quisocristo isoro'paqué nasitimarin. Yosë níponahuë', piyapi chachin nasitérin. Canpoarë chachin ya'huérin. Quiyaso' ni'nai. Inaso' nónya, ténai. Yosë pochachin ninin. Inaíchin hui'nin inaso'. Inaora nohuanton nosororinpoa'. No'téquën nontérinpoa'. ¹⁵ Coansharinta' ni'nin. Ni'pachina, piyapi'sa' sha'huitérin: "Ihua chachin sha'huitérinquëma'. 'Ca píquëran a'na quëmapi hué'sarin. Co'huara ca nasichátërapohuë', inaso' Yosë'pa' ya'huérin. Napoaton ca quëran chini chiníquën nanantérin inaso', itérinquëma'. Nani o'marin huachi," itérin.

¹⁶ Inaso' pa'pi nosororinpoa'. Nónya ni'ton, nosoroatonpoa', na'con catahuarinpoa'. Co canpoara nanitopiréhuahuë', ina imapatëhua', nani tahuëri catahuarinpoa'. ¹⁷ Iráca Yosë nohuanton, Moisésë pénéntérin nani ma'sha natëcaso'. Pénéntopirinhuë', co ya'ipiya anitotërinpoahuë'. Quisocristoso nípirinhuë' nosororinpoa'. No'téquën nonaton, ya'ipi nanamën anitotërinpoa'. ¹⁸ Co inquënpoa téranta' Yosë quënanéhuahuë'. Hui'niniso nípirinhuë' nøyá nohuitérin. Yosë pochachin ni'ton, napopianachin yonquipi. Inasáchin Tata Yosë anohuitérinpoa'.

Coansha Paotista sha'huirinso' (Mateo 3.11-12; Marcos 1.7-8; Lucas 3.15-17)

¹⁹ Coansha pénéntápachina, corto hua'ano'sa', nihuiro'sa', inapita pa'pi Coansha nontacaiso marë'. Cotio hua'ano'sari a'papi ni'ton, Quirosarin quëran pa'sahuatona', Coansha itapona': "¿Inquënta' quëmaso'?" itoonpi.

²⁰ —Caso co Cristocohuë'. A'naquëñ napotopirinacohuë', co caso' inacohuë', itérin Coanshari.

21 —Quëmaso' Iniasënquën, iráca ayaponahuë', ¿ya'noantamaranquën ti? itopi.

—Co caso' inacohuë', ténin.

—¿Quëmaso' pënëntona'pi ninaraiso' nimara ti? itaantapi.

—Co inacohuë', ténin.

22 —¿Inquënta' quëmaso' nipachin? Sha'huitoco i hua'ano'sa' sha'huitonta'ii.

¿Ma'marëta' pënëntaran? itaantapi.

23 —Yosë nohuanton, pënëntarahuë. Iráca Isaiasë ninotonco, naporin: “A'na quëmapi inotéroquë pënëntaton, tapon: ‘Ira co'shon co'shon toconin ni'ton, otëeëquë' Sinioro o'main,’ ténin. Naporinso chachin canta' piyapi'sa' pënënarahuë. ‘Cancanëma' anoyatoco' Sinioro o'main,’ itarahuë,” itérin Coanshari.

24 Ina quëran Parisioro'sari itantapi:

25 —Co quëmaso' Cristonquënhuë'. Co Iniasënquënhuë'. Co pënëntona'pi ninaraison-quënhuë' ni'quëhuarë', ¿onpoatonta' nipachin, piyapi'sa' aporintaran? ¿Inta' nanan quëtérinquë aporintamaso'? itérin.

26 —I'quë mini aporintarahuë. Nipirinhuë', iporaso' a'na quëmapi ya'huërin, co nohuitéramasohuë'. **27** Inaso' chini chiníquën nanantérin. Caso' co ina pochin chiníquën nananterahuë'. Co maquëyancohuë' ni'ton, co sapatë i'quirita'huaso téranta' nantarahuë'. Ca piquëran ina pënëntapon, itérin.

28 Naporo' Cortanii' aquëtérin Coansha piyapi'sa' aporintarin, Pitania itopiquë. Inaquë paaparahuatona natanconpi.

Quisoso anohuitérinso'

29 Tahuëririnquë inaquë Quisoso huë'sarin. Coanshari quënanahuaton, piyapi'sa' itérin: “Paso' quëmapi ni'co'. Yosëri a'paimarinso'. Inaso' carniroa'hua pochin nicaton, os-hanënpoa' inquitipoaso marë' chiminapon. **30** Ihua chachin sha'huitérinquëma'. Ca piquëran a'na quëmapi huë'sarin. Co'huara ca nasichátērapohuë', inaso' Yosë'pa' ya'huërin. Napoaton ca quëran chini chiníquën nanantérin inaso', itérinquëma'. Nani o'marin.

31 Co carinta' nohuitopirahuë', nani nohuiterahuë. Yosë a'parinco ya'ipi piyapinënpita anohuita'huaso marë'. Ina marë' pënënato, i'quë aporintarahuë.

32-33 Co Quisoso nohuichatérapohuë', Yosë sha'huitérinco. ‘A'na tahuëri Ispirito Santo nëpë pochin nohuaimarahuaton, a'na quëmapi motoanshiranënquë chachin huanitimarín, ni'saran. Quëmaso' i'quë aporintérin. Ina quëmapiso nipirinhuë' Ispirito Santo aya'coancantarinqüëma', itérinco Yosë. Ispirito Santo inápa quëran o'mahuachina, ni'nuhüe. Nëpë pochin ya'noton, Quisoso motoanshiranënquë chachin huanitiimarin.

34 Cari ni'nuhüe. Napoaton nani nohuitato, sha'huitaranquëma'. Iso quëmapi Yosë hui'nin, ténahuë,” itérin Coanshari.

Ya'nan Quisoso imaraísopita'

35-36 Tahuëririnquë Quisoso na'huëso', Coanshari quënaantarin. Quënaantarahuaton, catocoi imaraiso' itaponcoi:

—Paso' quëmapi ni'co'. Inaso' carniroa'hua pochin ninin, Yosëri a'paimarinso', itérincoi.

37 Natanaahuatoi, Quisoso imarai. **38** Ina quëran tahuëretahuaton, quënanincoi.

—¿Onpoapomata'? itérincoi.

—Yanohuitérainquë Maistro. ¿Insëquëta' ya'huaran? itérain.

39 —Huëco' ni'quico, itérincoi.

Pa'sahuatoi, ya'huérinquë canconai. I'huaraya ni'ton, inaquë i'huatérain. Hua'qui' ninontérain.

40 Catoya'picoi Coansha natanaahuatoi, Quisoso imarai. A'nsaso', Simon Pitro iin Antérise itopi. **41** Shiarahuaton, iin quënanconin.

—Iya Simon, Cristo nani quënanai, Yosëri a'paimarinso', itérin.

42 Itahuaton, Quisosoquë quëparin. Quisosori notëerahuaton, itérin:

—Carinquen nohuiteranquen. Quemaso' Simonquen. Coansha hui'ninquen. Nasha ninin'en acotaranquen. Pitro ichinquen, iterin. Inaora nananque Sipasë itopi. (Na'pi pochin tapon naporin.)

A'napitanta' imapiso'

⁴³ Tahuéririnquë Quisoso Caririaquë yapa'sarin. Pa'sahuaton, Pinipi quénanconin.

—Huéquë' iyasha imaco', iterin. Itohuachina, imarin.

⁴⁴ Pinipiso' Pitsaitaquë ya'huérin. Ina ninanoquë chachin Antérise, Pitro, inapitanta' ya'huépi. ⁴⁵ Pinipiri Natanino yonisahuaton, quénanconin.

—Nani iyasha Cristo quénanai, Yosë quiricanën quéran ninopiso'. Moisésë, pénentona' piro'sa', inapita ninotona', inaquë ninshitopi. Inaso' Quisoso, Cosi hui'nin. Nasaritoquë ya'huérinso', iterin.

⁴⁶ —Nasaritoro'saso', pa'pi co noya piyapi'sahuë'. ¿A'na térranta' ta'ma' inaquë ya'huérinso' noya nihuan nica? ténin Natanino.

—Huéquë' pa'a nohuitonquë', iterin Pinipiri.

⁴⁷ Natanino ya'carirahuaso', Quisosori quénanin.

—Paso' quémapi ni'co'. Israiro' chachin inaso'. Co pi'pisha térranta' nonpininhuë', iterin Quisosori.

⁴⁸ —¿Onporahuatonta' nohuitérancoso'? iterin.

—Co'huarda Pinipi nonchatéreraséñquenhuë', ninoto quénananquen. Iquia naraanaquë huénsëaséñquen, quénananquen, iterin. Aquë ni'ton, co ya'pirin quéran chachin quénanaponahuë', napotérin ni'ton, Natanino pa'yanin.

⁴⁹ —Quemaso' Maistro, Yosë hui'ninquen. Israiro'sa' copirnonquen, ténahuë, iterin.

⁵⁰ —¿Ninoto quénananquen maréachin natéranco ti? saca sacai nininsopita ni'saran, iterin.

⁵¹ Ina quéran itaantarin:

—No'tequen itérancuema'. Iráca Cacopo nanopiso', pi'iro'të' ni'soarin. Ni'soatoahuachina, anquéniro'sari huécapaimapi. Huécapaimarahuatona', panantarapi. Inapochachin iporaso' Yosë quéran quémapi ni'to, o'marahuë Yosë anohuita'huanquëmaso maré'. Ya'ipi ninahuëso' ni'sarama', iterin Quisosori.

2

Canaqué Yosë pochin nininso'

¹ Cara tahuéri quéran a'na quémapi pita nisarin sa'acaso maré'. Canaquë naporin, Cariria parti ya'huérinso'. Inatohua' Quisoso a'shin ni'tapon pa'nin. ² Quisosonta' amatopi. Pa'nin inanta' ni'tapon. Ca'tano'sanénpitacointa' amatérinacoi. ³ Huino ta'quihiuchinara, a'shini Quisoso itapon:

—Capa huino ta'quipi huachi, iterin.

⁴ —¿Ma'maréta' mama napotéranco? Co tahuéri naniyatérarinhuë' nohuitiinacoso', iterin Quisosori.

⁵ Napotopirinhuë', inpriatoro'sa' quénanconahuaton, a'shini itapon:

—Ma'sona Quisoso sha'huitohuachinquéma', natëco', iterin.

⁶ Inaquë saota panca orinan ya'huérin, na'pi quéran nipiso'. A'na orinanquéachin catapini rata pochin ya'conin. Moisésë pénentérinso' natëtona' oshanëna inquicaiso maré' acopiso'. ⁷ Ina quéran inpriatoro'sa' sha'huitérin:

—I'sha améntaitoco', iterin Quisosori. Natëtona', huirotéñquë huarë' i'sha améntaitopi.

⁸ —Pi'pian macatoma', pita hua'an api'nitonco', itaantarin Quisosori.

Napotohuachina, masahuatona api'nitoonpi. ⁹ Orinan quéran mapirinahuë', pita hua'anso' co nitotérinhuë'. Inpriatoro'saráchin nitotopi. I'sharáchin ta'panpirinahuë', nani huino taranin. Napoaton pi'nirahuaton, sa'ana'pi amatérin. ¹⁰ Hué'pachina, iterin:

—¡Ma'pitacha ninan paya! Iso huinoso' noya noya, yashin yashin o'ocaso'. Ya'ipi piyapi'sa' noya noya huino nininso'ton o'shipi. Ina quëran nani natëhuachinara, co onpopinchin noyahue' nininso' o'shiantarapi. Quëmaso nimirinhue' ipora huarë' noya noya huino o'shitéranci, itérin. Quisoso naporinso' co nitotatonhuë', naporin.

¹¹ Naporor' Quisoso caniaritérin Yosë pochin nicacaso'. Piyapi'sari nicatona': "Tëihuëñchachin Yosëri catahuarin ni'ton, nanitaparin," topi. Ca'tano'sanënpitacointa ni'sahuatoi: "Quisososo', Yosëri a'paimarinso', ténai. Canaquë naporin. Inaso ninano', Cariria parti ya'huërin

¹² Ina quëran Capinaomoquë pa'marin. A'shin, iinpita inapitarë chachin pa'marin. Ca'tano'sanënpitacointa' imarai. A'na simana pochin inaquë ya'huërai.

Nipa'antopisopita Yosë chinotopiso pëi quëran a'parinso'
(Mateo 21.12-13; Marcos 11.15-18; Lucas 19.45-46)

¹³ Pascoa tahuëri cotioro'sa' niyontonpi Yosëri Iquipito quëran nicha'ërinso' yonquiantacaiso marë'. Ina naniriahuchina, Quirosarinquë paantarái. ¹⁴ Yosë chinotopiso pëiquë pa'sahuatoi, i'iratéquë nipa'antopisopita quënanconai. Ohuaca', ohuica, nëpë', inapita nipa'antapi. Yosë chinotatona' têpacaiso marë' pa'anapi. A'naquëonta' misanënpitaquë huënséatona', coriqui nicanpiarapi. ¹⁵ Inapita quënanconahuaton, Quisosori co noyahue' ni'nin. Nonin masahuaton, sihirintahuaton, ohuica, ohuaca', inapita huënintaton, a'parin huachi. Pa'anpisopitanta' Yosë pëinën quëran a'parin. Coriqui nicanpiapisonta' misanënapita quëran ta'sarin. Coriqui ta'sarahuaton, misanënapitanta' të'yatérin. ¹⁶ Nëpë' pa'anpisopita itapon:

—Isopitanta' quëpacó'. ¡Ama Tatahuë pëinën mircato pochin nitocosohue'! itérin Quisosori.

¹⁷ Yosë quiricanënquë ninshitopiso' yonquirai. "Ya'ipi piyapi'sa' Tata, chinochinënquen, ténahuë. Ina na'con yonquiato, quëma pëinën a'pitérahuë. Ina marë' no'huiarinaco," ténin quiricaquë.

¹⁸ Ina quëran cotioro'sari huëcapaipi.

—¿Onpoaponta' hua'an pochin nisaran? Chiníquen nanantohuatan, Yosë pochin niquë' quiyanta' nicatoi natëiinquen, itopi.

¹⁹ —Iso pëi' ata'huantohuatama', cara tahuëri quëran anoyataantarahuë, itérin Quisosori.

²⁰ —Yosë chinotopiso pëi' catapini shonca saota pi'ipi quëran tinipi. Cara tahuëri quëran naquëranchin ¿anoyataantarán ti? itopi cotioro'sari.

²¹ Quisososo nimirinhue' co ina pëi chachin yonquirinhue'. Inaora nonën pëi pochin tapon naporin. ²² Quisoso nanopiantahuachina, naporinso' yonquirai. Cara tahuëriya quëran nanopiantarin ni'ton, "Yosë quiricanën quëran no'tequen ninorin," ténai. Quisoso noninsonta' natërai.

Yonquipisonta' nitotérinso'

²³ Pascoa tahuëri inaquë ya'huasoco, Quisoso Yosë pochachin ninin. Piyapi'sa' a'naroáchin anoyatérin. "Yosëri catahuarin," ta'tona', a'naquen natëpi. ²⁴⁻²⁵ Quisososo nimirinhue' ya'ipiya noyá nohuitérin. Co piyapiri sha'huitopirinhue', yonquipiso chachin nitotérin. Napoaton "Co natëmiatérinacohue'," ta'ton, co inapita natërinhuë'.

3

Nicotimo a'chintérinso'

¹⁻² Tashi'nisahuaso', a'na quëmapi huë'nin Quisoso nontacaso marë', Nicotimo itopiso'. Cotio hua'an inaso'. Parisio niponahuë', Quisoso nontiirin.

—Maistro, Yosë a'pairinquen a'chintanciso marë'. Sacai' nininsopita nicaton, Yosë pochin ninan. Napoaton ina a'pairinquen, ténai. Co Yosë catahuarinquenhuë' naporini, co quëma nanitapaitonhuë', itiirin.

³ —No'tequën iyasha sha'huitaranquën. Co nasitaantahuatanhuë', co onporonta' Yosë hua'anentérinqué ya'conaranhuë', itérin Quisosori.

⁴ —Nani mashotohuatéra, co huachi mamanpo yo'namenqué ya'conéhuë'. ¿Onporahuatéta' nasitaantarë'? itaantarin Nicotimorinta'.

⁵ Napotohuachina, Quisosori itaantapon:

—No'tequën sha'huitaranquën. I'quë amarëso pochin cancanëma' anoyatacaso' ya'huérin. Ya'ipi co noyahue' yonquiramasopita nariantoco'. Ina nariantohuatama', Ispirito Santo anoyacancantuohuachinquëma', nasitaantarëso pochin nisarama'. Naporo huarë' Yosë hua'anentérinqué ya'conarama'. ⁶ Piyapi quérana nasitohuatamara, piyapi pochin cancantërama'. Ispirito Santo quéranso' nasitaantahuatama', Yosë pochin cancellarama'. ⁷ Napoaton nasitantacaso' ya'huérin. Ama ina natanaton, pa'yanquésohuë'.

⁸ Ni'quë'. Ihuan inaora nohuanton, pa'nin. Natanarihuarahuë', intohua quéranso' huécaton intohuasona pa'ninsö', co nitotéréhuahuë'. Co quénanpiréhuahuë', natanéhua'. Inapochachin Ispirito Santo ya'coancantuohuachinquëma', nasitaantarëso pochin nasha cancan quétarinquéma', itérin.

⁹ —¿Onporahuatéta' nasitaantarë'? itaantarin.

¹⁰ —Quémaso' Israiro maistronguën niponahuë', ¿co nitotéranhue' ti? ¹¹ No'tequën itaranquën. Nitotatoi, a'chintarainquéma'. Ni'naiso' sha'huitarainquéma'. Canpitaso nimirinhue' co natéraramacoihuë'. ¹² Isoro'paquë ya'huérinsopita quérana'chintopiranquémahue', co natéraramacohue'. Inápaquë ya'huérinsopita quérana'chintohuaténquéma', aquëtë huarë' co natétaramahuë'.

¹³ Co inso piyapi téranta' inápaquë pantarinhuë'. Casáchin ina quérana'omarahuë. Yosë quérana'quémapiro ni'to, inápa quérana'omarahuë. Napoaton casáchin inápaquë ya'huérinsö' a'chintaranquéma'. ¹⁴ Iráca shimanémapita inotéro parti paasoi', na'a piyapi'sa' ya'huanapi. Co noyahue' cancantopi ni'ton, Yoséri ana'intérin. Na'a ya'huano'sa' huécatona', quétéra'piapi. Ina quérana Moisésë ya'huan nonanpiso' ninin. Hua'na quérana'nisahuaton, naraqué achinpirin. Achinpirahuaton, inápaquë ahuanirin. Inapochachin Yosë quérana'quémapiro nimirinhue', a'na tahuëri inápaquë achinpiarinaco. ¹⁵ Natéhuatamaco, Yosë nohuitatoma', nanopimiatarama'. Ina marë' achinpiarinaco, itérin Quisosori.

Yosë nosororinpoaso'

¹⁶ Yosëso' ya'ipi piyapi'sa' pa'pi nosoromiata'rin. Napoaton a'naíchin hui'nin nimirinhue', isoro'paquë a'paimarin chiminacaso marë'. Ina natéhu'a': "Ca marë' chiminin," topatéhu'a', co parisitopiquë pa'saréhuahuë'. Yosë nohuitatéhu'a', nanopimiataréhu'a'. ¹⁷ Co ana'intinpoaso marë' hui'nin a'paimarinhuë'. Nicha'ëinpoaso marë' a'paimarin. Hui'nin quérana'cha'érihu'a'.

¹⁸ Hui'nin natéhuatéhu'a', co Yosë ana'intarinpoahuë'. Co natépisopitahuë' nani Yoséri yonquirin ana'intacaso'. Inaíchin hui'nin nimirinhue', co natépihuë'. Napoaton ana'intarin. ¹⁹ Quisoso isoro'paquë o'maton, a'pintérinpoaso pochin oshanénpoa' anitotérinpoa'. A'naquéniso nimirinhue', co nohuantopihuë' Quisoso nohuitacaiso'. Co noyahue' nicacaisoáchin pa'yatatona', tashi pochin cancantopi. Co yanatépihuë' ni'ton, Yoséri ana'intarin. ²⁰ Co noyahue' napisopita co tahuëri pochin nininsö' nohuantopihuë'. A'pininquë a'ninquéchin huanicaiso' co nohuantopihuë'. Tahuëri nipachina, ma'sha co noya napisohue' quénané'. ²¹ Nimirinhue', no'tequën yonquihuachina', noya nisapi. Ina quérana'a'napitanta'nicatona': "Ma noya Yoséri catahuarin ni'ton, noya natépi," tosapi.

Naquéranchin Coansha sha'huirinso'

²² Ina quérana Quisoso Cotia parti pa'nin. Ca'tano'sanénpitacoimara. Inaqué hua'quimiáchin ya'huéconahuatoi, piyapi'sa' aporintérain. ²³ Coanshanta'Inoiiquë aporintarin. Sarimo ya'cariya inaso'. Inaqué na'a ii' ya'huérin ni'ton, inaqué aporintarin. Na'a

piyapi'sa' huë'pachinara, aporintarin. ²⁴ Naporo' Coanshaso' noya pa'sarin. Co tashinan pëiquë po'moyáterapihuë'.

²⁵ Quiyarinta' aporintérain. Coanshanta' aporintarin. Napoaton a'na cotio quëmapi huëcaton, Coansha ca'taninsopita itérin:

—¿Insota' noya noya aporintérinso'? itérin. Nisha nisha ninontopi. ²⁶ Ina quëran Coansha sha'huitonpi.

—Ni'quë' Maistro. Cortanii' aquëtérän nicasëhua', inaquë Quisosonta' nisarin ni'ton, anohuitérancoi. Iporaso' inanta' aporintarin. Na'a piyapi'sari imasapi. Co ina nápo quëmaso' imasarínénquënhuë', itopi.

²⁷ —Co Yosë nohuantérinhuë' naporini, co napo'itonahuë'. Ya'ipinpoa' Yosë acorinpoa' ma'sona nicacaso'. ²⁸ Nani sha'huitérinquëma'. “Co caso' Cristocohuë'”, itérinquëma'. Co'huara ina huë'shatérasohuë', Yosë a'parinco piyapi'sa' pënëna'huaso marë'. Ina imacaiso marë' pënënarahuë. ²⁹ Ni'co'. Quëmapi sa'apachina, amiconëonta' noya cancantérin. Noya nipayapi ni'ton, naporinso' natantaton, nóya cancantérin. Inapochachin canta' ninahuë. Na'con piyapi'sa' Quisoso imasapi ni'ton, nóya cancantérahuë. ³⁰ Co caso' nohuantérahuë' piyapi'sa' yonquiinacoso'. Quisoso na'con na'con yonquiinacoso', ténin.

Inápa quëran o'marinfo'

³¹ Cristo inápa quëran o'maton, chini chiníquen nanantérin. Noya noya ninin. Piyapinpoaso niperinhuë' isoro'paráchin nohuitéröhua'. Inasáchin nohuitatéhua', nisha'huitéröhua'. Cristoso niperinhuë' inápa quëran o'maton, chini chiníquen nanantérin. ³² Yosë'pa' ya'huérinsopita nohuitérin. Nani ni'nin. Yosëri nontérinsonta' natanin. Ina nohuitaton, sha'huitarinpoa'. Sha'huitopirinpoahuë', na'con na'con piyapi'saso', co yanatétopihuë'. ³³ A'naquënpoaso niperinhuë' natetéröhua'. “Yosë no'tequen nonin. Inari a'paimarin,” ta'tehua', natetéröhua'. ³⁴ Quisoso' Yosë nanamén chachin nonin. Ispirito Santori noyá ya'coancantérin ni'ton, no'tequenáchin nonin. ³⁵ Tata Yosëri hui'nin pa'pi nosororin. Chini chiníquen nanan quëtérin ya'ipiya hua'anentacaso marë'. ³⁶ Hui'nin natëpisopitaso', Yosë nohuitatona' nanopimiatapi. Co natëpisopitasohuë', co ina pochin nanopimiatapihuë'. Nani Yosëri yonquirin ana'intacaso marë'. A'na tahuëri ana'intomiatarin, parisitopiquë a'pararin huachi.

4

Samaria sanapi sha'huitérinso'

¹⁻² I'huaso' na'a piyapi'sa' Coansha imapi. Na'a aporintérin. Iporaso' na'con na'con Quisoso imasapi. Co Quisoso chachin aporintérinhuë'. Ina sha'huitohuachincoi, ca'tano'sanënpitaco aporintarai. Na'con na'con aporintarai. Parisioro'sarinta' natantopi. ³ Ina nitotaton, Quisoso pa'nin. Cotia parti quëran pipirahuaton, Cariria parti paantarin.

⁴ Inatohua pa'pachina, Samaria parti na'huëcaso' ya'huérin. ⁵ Inatohua' a'na ninano' ya'huérin, Sicarë itopiso'. Ina ya'cariya Cosi no'panen ya'huérin. Iráca pa'pin Cacopo itopisori quëtérinso'. ⁶ Inaquë a'na poso ya'huérin. Cacopo posonen itopi. Camotëchin inaquë canconai. Quisoso canotaton, posoquë huënsëconin.

⁷⁻⁸ Ca'tano'sanënpitacoiso', ninanoquë pa'nai cosharo' pa'ana'huaiso marë'. Pa'naiso', Samaria sanapi i'sha macapon huë'nin. Nani mapachina, Quisosori itapon:

—Imoya, i'sha mananso canta' o'oi topirahuë, itérin.

⁹ —Caso' Samaria sanapico niperahuë': “Isha mananso canta' o'oi,” ¿itéranco ti? itérin inarinta'. Cotioro'saso' Samariaro'sarë' co noya ninontopihuë' ni'ton, napotérin.

¹⁰ —Yosë yanicanapirinquénhuë', co quëmaso' nitotéranhue'. “Isha mananso canta' o'oi,” itérinquën niperinhuë', co nohuitérancohuë'. Nohuitéranco naporini, quëma nataintoncohuë'. Carinquéen nanopirin i'sha quëchiténquénhuë', itérin Quisosori.

¹¹ —Quëmaso' co manta' ya'huëtérinquënhuë' i'sha macamaso'. I'shaso' acopo' ya'huërin. ¿Onporahuatoncha nanopirin i'sha manë'ponquënya? ¹² Iráca Tata Cacopo iso poso ninin. Iséquëran i'sha macaton, o'orin. Hui'ninpita, pë'tahuanënpita inapitanta' iséquë o'opi. Inaso' chiníquën nanantérin, topi. ¿Ina quëran na'con na'con quëmaso' nanitaparan ti? itérin sanapiri.

¹³ —I'shamia imoya o'opatéra, naquëranchin yamoroantarë'. ¹⁴ Nisha i'sha carinquëñ quëtaranquëñ. Ina ya'huëtohuachinquëñ, co huachi yamororëso pochin cancantaranhue'. Ni'quë'. Pancai' no'pa quëran pipihuachina, noyápiachin pipirárin. Co onporonta' yanimarinhuë'. Inapochachin nanopirin i'sha quëtohuatëñquëñ, cancanëñquë chachin ya'huëtarinquëñ. Inaquë ya'huápon huachi. Yosë nohuitaton, nanopimiataran, itérin.

¹⁵ —Ina i'sha siniro quëtoco ama yamoroto, i'sha masa'isohue', itérin.

¹⁶ —Paaton imoya so'yan maconquë' huë'in, itérin.

¹⁷ —Co caso' so'yahuancohue', itérin.

—No'tequëñ naporan. Co so'yahuancohue'. ¹⁸ Nani a'natérápo quëmapi so'yataponahuë', iporaso' quëmapi yacaparanso' co so'yanhuë'. No'tequëñ nonan, itérin.

¹⁹ —Quëmaso' siniro ninotona'pinquëñ, ténahuë. ²⁰ Shimashonéhuëipita paso motopiquë Yosë chinotopi. Ya'huëre cotioro'sanquëmaso': “Quirosarinquëráchin Yosë chinotacaso' ya'huërin,” ténama', itérin.

²¹ —Natanco imoya. Nani tahuëri naniarin. Yosë yachinotohuatama', co paso motopiquë pa'saramahuë'. Co Quirosarinquë téranta' pacacaso ya'huërinhuë'. ²² Canpitaso' Yosë chinotopiramahuë', co nohuitéraramahuë'. Cotioro'sacoiso', Yosë nohuitërai. Cotio quëmapi nicha'ésarinquëma' canpitanta'. ²³ Ipora quëran huarë' Yosë yachinotohuatama', ya'ipi cancanëma quëran huarë' chinotoco'. Ispirito Santo catahuaringuëma' ni'ton, no'tequëñ yonquiatoma', Yosë chinotoco'. Ina pochin nohuantérin chinotacaso'. ²⁴ Yosë co nonën ya'huëterinhue'. Co quënanarihuahuë', ya'huërárin. Ispirito Santo chachin catahuaringuëma' no'tequëñ yonquiatoma', ina chinotacaso', itérin Quisosori.

²⁵ —A'na tahuëri Cristo huë'sarin, Yosëri a'paimarinso'. Ina huë'pachin, ya'ipiya a'chintarinfoa', ténin Samaria sanapi.

²⁶ —Ca mini inaco, nontaranquëñso', itérin.

²⁷ Naporoo chachin ca'tano'sanënpitaco o'mantarai. Sanapi nontarin, quënanquimara. “¿Ma'marëta' iso sanapi nontarin? ¿Ma'ta' nohuantérin?” ta'toi, yonquinéhuëi quëran pa'yanpiraihuë', co natanaihuë'. ²⁸ Sanapiso nimirinhue' yonshanën patahuaton, ni-nanoquë pantarahuaton, piyapi'sa' sha'huitérin.

²⁹ —Huëco' pa'ahua'. Pasëquë quëmapi nohuitoco'. Co nohuitaponcorahuë', “Nani a'natérápo so'yahuancohue”, itérinco. Ya'ipiya ninorin. ¿Inaso' Cristo nimara ti? itérin.

³⁰ Natanaahuatona', na'a ya'huëhuano'sa' o'mapi Quisoso nicapona'. ³¹ Co'huara canquiyatérasoihuë', Quisoso yaa'capiraihuë'.

—Ca'quë' Maistro, itopiraihuë', co nohuantérinhue'.

³² —Cosharo pochin nininso' ya'huëterinco, co nohuitéraramasohue', itérinco.

³³ —¿A'napitari cosharo' quëtiimara? nitopiraihuë', co coshachatérarinhuë'.

³⁴ —Yosë a'paimarinco nohuantérins'o' nica'huaso'. Ya'ipiya yanatérahuë. Ina yonquiat, co huachi cosharo' yonquirahuë'. Cosharo pochin achinirinco. ³⁵ “Catapini yoqui pahuanarin cayarinso' macacaso'” topiramahuë'. Ipora chachin cayarinso pochin nininso' macacaso' ya'huërin, ténahuë caso'. ¡Ni'cochi! Isoro'pa' panca imin pochin ninin. Cayarinso' manëso pochachin piyapi'sa' manë' Yosë imacaiso marë'. Ipora tahuëri'sa chachin na'a piyapi'sa' ya'huërin Yosë imacaiso marë'. Inapita a'chintacaso' ya'huërin. ³⁶⁻³⁷ Piyapi'sa' a'chintohuatama', Yosë'pa' canaarama'. Noya noya nanopimiatarama'. Cato' piyapi sacatérins'o pochin nisarama'. “A'naso' ya'pirin sha'nin. Cayahuachina, a'narinta' manin,” topi. Napohuachina, cato'

a'china'piro'sa chachin nóya cancantapi. ³⁸ Na'a piyapi'sa' ya'huérin, co Yosë no-huitopisohue'. A'naquëni nani a'chintopirinahuë', co yanatépihuë'. Iporaso nimirin-hue' a'paranquëma' a'chintantacamaso marë'. Yosë huëntonënqué ya'conacaiso marë' a'chintoco'. A'chintohuatama', imasapi huachi, itérincoi.

³⁹ Na'a ya'huëhuano'sa' Quisoso natëpi. Sanapiri: "Ya'ipi ninorinco," itérinco marë' natëpi. ⁴⁰ Quisoso ni'quiuhachinara, "Huëqué' iséqué yacapatoncoi, a'chintocoi," itopi. Itohuachinara, cato' tahuëri a'chintacaso marë' inaquë i'huatërai. ⁴¹ A'chintohuachina, na'con na'con piyapi'sa' natëpi. ⁴² Sanapi itapona':

—Quëma sha'huitérancio ni'toi, pi'pian Quisoso natërai. Iporaso nimirinhue' quiyaora chachin natanai. Nani nohuitatooi, cancanéhuëi quëran huarë' natërai huachi: "Tëhuëñchachin isoso' nicha'érinpoo'. Insosona imapachina', oshanëin inquitaton, anoy-acancantarín, ténai," itopi.

Capitan hui'nin anoyatérinso'

⁴³ Cato' tahuëri quëran paantarahuatoi, Cariria parti canconai. ⁴⁴⁻⁴⁵ Caririaro'sari nohuitatona', noya natanpi. I'huá chachin Pascoa tahuëri na'huëhuachina, inahuanta' Quirosarinqué pa'pi. Naporó' Quisoso nohuitopi. Nani ma'sha Yosë pochin nininso' ni'pi ni'ton, iporaso' a'chintohuachina, noya natanpi. Ninanonënqué chachinso nimirinhue' co a'chininhue'. "Ya'huërinquéso' pénéntona'pi co yanatépihuë'," ta'ton, co inaquë a'chininhue'.

⁴⁶ Ina quëran Canaquë cancoantarai. Inaquë i'huá i'sha huino atarantërin. Inaquë canconpatoira, a'na capitan copirno piyapinëñ nininsoari huëcapairin. Hui'nin quëmapia'hua nininso', Capinaomoqué chiníquén caniorin. ⁴⁷ "Quisoso Cotia parti quëran pipirahuaton, Cariria parti canquirin," topi, natantërin. Natantahuaton, paahuarin:

—Huëqué' Maistro hui'nahuë anoyatiimaco. Nani yachiminin, itérin.

⁴⁸ —Canpitaso' co a'naroáchin natëramacohue'. Co'so' Yosë pochin nipayahuë', co natëaramacohue', itérin inarinta'.

⁴⁹ —Manóton Sinioro huëqué'. Hui'nahuë chiminpachin, itaantarin.

⁵⁰ Napotaantahuachina:

—Ya'huëran'pa' pa'mantaqué'. Hui'nán co chiminaponhue'. Noyatarin, itérin. Napotohuachina: "No'tequén nontérinco," ta'ton, ya'huërin'pa' pa'mantarín.

⁵¹ Yacanconahuaso', inpriatonënpitari nacapiatona':

—Hui'nán nani noyatérin, itiipi.

⁵² —¿Inséchinta' pi'i nisahuaso' noyatérin? itérin.

—I'huara pi'i yatéhuërenahuaso' sapo otanotérin, itopi.

⁵³ "Naporó chachin Quisoso nontérinco. 'Hui'nán noyatarin,' itérinco," ta'ton, Quisoso natérin. Ya'ipi pénéñqué ya'huëpisopitana' natëpi.

⁵⁴ I'huá chachin i'sha huino atarantërin. Iporaso' Cotia parti quëran huëntarahuaton, capitan hui'nin ya'huëré' a'naroáchin anoyatérin. Inapoaton catoro' huachi Caririaquë Yosë pochin nisarin piyapi'sari nohuitacaiso marë'.

5

Apia anoyatérinso'

¹ Ina quëran cotio niyontonpiso tahuëri naniriarin. Naporó' Quisoso Quirosarinqué paantarin. ² Inaquë i'sha ya'huérin, anpomiachin. Cotio nananqué Pitista itopi. Ninano ya'coana pirayan ya'huérin, ohuicaro'sa' ya'coananëñ itopiqué. I'sha pirayan a'natérápo iménamé pochin nininso' ya'huérin. ³⁻⁴ Inaquë na'a cania'piro'sa' quëhuënapí. A'naquëni somaraya. A'naquëni sonpacha. A'naquëni nantén tachitérin ni'ton, co nanitérinhuë' huanicaso'. Inaquë ninarapi. ["Hua'qui quëran hua'qui quëran Sinioro anquëniñ o'maton, i'sha aco'sacaitérin," topi. "Napohuachina, insóton i'qué ya'compachina, a'naroáchin noyatérin," ta'tona', ninarapi.] ⁵ Inaquë a'na quëmapi ya'huérin. Nani cara

shonca posa pi'ipi caniorin. Co nanitérinhue' huanicaso'. ⁶ Inaquë quëhuénápirinhue', Quisosori quénanquirin. "Nani hua'qui' caniorin," itohuachina, apia itapon:

—¿Nohuantéran noyatamaso ti? itérin.

⁷ —Nohuantopirahuë' Sinioro. Sa'ahuaco. Co insonta' ya'huérinhue' i'quë po'moincoso'. I'sha co'sacaitohuachina, yaya'conpirahuë'. A'na'ton ya'conin, itérin.

⁸ —Huaniquë' iyasha. Pë'sara'huaya masahuaton, iratéquë', itérin.

⁹ Napotohuachina, a'naroáchin apia noyatérin. Pë'sara'huaya masahuaton, iratérin. Chinoto tahuëri chachin naporin. ¹⁰ Cotio hua'ano'sari quénanahuatona', apia huëcapaipi.

—Ipora tahuériso', chinoto tahuëri ni'ton, co ma'sha quëpacaso' ya'huérinhue', itopi.

¹¹ —Quëmapi anoyatérincoso' nani sha'huitérinco. "Pë'sara'huaya masahuaton, iratéquë'," itérinco, ténin.

¹² —¿Ma quëmapita' napotérinquë? itopi. ¹³ "Ahuën. Co nohuitérahuë'," ténin. Hua'huayatérahuë' piyapi inaquë ya'huérin ni'ton, nani Quisoso pa'nin. ¹⁴ Ina quëran chinotopiso pëiquë pa'sahuaton, apia anoyatérinso' quénancoantarin.

—Ni'quë' iyasha. Nani quëmaso' noyatéran. Ama huachi oshahuaantaquësuhue', na'con na'con ma'sha onpotan, itérin.

¹⁵ Ina natanahuaton, Yosë chinotopiso pëi quëran pipirahuaton, cotioro'sa' sha'huitonin. "Quisoso anoyatérinco," itoonin. ¹⁶ Napoaton Quisoso no'huipi. Chinoto tahuëri anoyatérinso marë' co quë'yapihuë'. ¹⁷ Quisosoriso niperihuë' itérin:

—Tatahuëso' co ipora huanta' chinotérinhue'. Sacatárin piyapi'sa' catahuacaso marë'. Canta' co chinotérahuë'. Nani tahuëri piyapi'sa' catahuarahuë, ténin.

¹⁸ Chinoto tahuëri piyapi anoyatérin ni'ton, cotioro'sari yatëpapi. "Yosëso' tatahuë chachin,' topachina, Yosë pochachin niconin," ta'tona', aquë aquëtë' yatëpapi.

Yosë hui'nin ni'ton chiniquëñ nanantérinso'

¹⁹ Ina quëran Quisosori itantarín: "No'tequen itaranquëma'. Caora yonquinéhuë quëran co manta' ninahuë'. Tatahuéráchin nonanahuë. Hui'ninco ni'to, inapochachin canta' ninahuë. ²⁰ Tatahuë na'con nosororinco. Nosoroatonco, yonquirinso chachin anitotérinco. A'na tahuëri catahuaarinco saca sacai' nininso' nica'huaso'. Canpitaso' ni'patama', pa'yanarama'. ²¹ Tatahuë chimipi ananpitaantarin. Inapochachin canta' insosona nohuantérahuëso' ananpitaantarahue. ²² A'na tahuëri coisë pochin nicato, ya'ipi piyapi'sa' no'tequen sha'huitarahuë. Noya nipesopita noya acoarahuë. Oshahuano'saso niperihuë' no'tequen ana'intarahue. Co tatahuëri ana'intarahue'. Nani nanan quëtérinco ana'inta'huaso marë'. ²³ Ina quëran ya'ipi piyapi'sa' noya ni'sarinaco. Tatahuë noya ni'piso pochachin ni'sarinaco. Ina marë' nanan quëtérinco. Co noya ni'patamacohue', Tatahuënta' co noya ni'namahuë'. Ina a'paimarinco.

²⁴ No'tequen itaranquëma'. Yosë chachin a'paimarinco. Noya natanpatamaco, cancanëma quëran huarë' ina imapatama', nanopimiatarama'. Co onporonta' ana'intaranquëmahuë'. Chimipatama', co parisitomiataramahuë'. Nani Yosë nohuitarama' ni'ton, nanopimiatarama'. ²⁵ Caso' Yosë hui'ninco. Iporaso huachi a'naquen chimipi pochin nipesopita natanarinaco. Inapita noya natanpachinaco, Yosë anohuitarahuë. Ina nohuitoahuachina', nanopimiatiapi. ²⁶ Tata Yosë inaora nohuanton, nanopirin. Inari piyapi'sa' nanopicaso' quëtérin. Inapochachin canta' ina nohuanton, nanopirahuë. Naporahuaton, a'napitanta' ananpita'huaso' nanitaparahuë. ²⁷ Yosë quëran quëmapico ni'to, nanan quëtérinco piyapi'sa' ana'inta'huaso marë'. ²⁸ Ama ina yonquiatoma', pa'yancosohue'. A'na tahuëri ya'ipi chimipisopita natanarinaco. ²⁹ Natanpachinaco, po'oro quëran pipiapi. Noya nipesopita noya noya nanopiantarapi. Co noyahue' nipesopitaso niperihuë', ana'intarahue'," ténin Quisoso.

Yosëri a'paimarinso'

³⁰ Ina quëran Quisosori itantarín: “Co caora nohuanto manta' ninahuë'. Tata Yosë sha'huitohuachincora, inachachin sha'huirahuë. Co caso' nisha yonquirahuë'. Tata yonquirinsoráchin nohuantérahuë. Napoaton no'téquën ana'intarahuë. ³¹ Caso' Cristoco. Yosë quëran o'marahuë, ténahuë. Casáchin naporahuë naporini, co natéinacoso' ya'huëitonhuë'. ³² Nipirinhuë', Tata Yosënta' inachachin sha'huitarinquëma'. No'téquën nonin, ténahuë. ³³ I'hua piyapi'sa' a'parama' Coansha natanacaiso marë'. ‘Co caso' Cristocohuë'. Inaso' Cristo, Yosëri a'paimarinso', itérin. No'téquën naporin. ³⁴ Caso' co piyapi noninsoachin yonquirahuë'. Nipirinhuë', iso' sha'huitarinquëma' canpita natétoma' cha'ëcamaso marë'. ³⁵ Coanshaso' noya quëmapi. Huaroro noya orotérinso pochin ni'ton, noya anitotérinquëma'. Ya'nan natanpatamara, hua'quimiachin pa'yatérama'. ³⁶ Inaso' no'téquën sha'huitérinquëma'. Yosëri chachin Quisoso a'paimarin, itérinquëma'. Nipirinhuë', co inasáchin anitotérinquëmahuë'. Yosëso' chini chiníquën nananton, catahuarinco ni'ton, sacai' nininso' ninahuë. Cania'piro'sa' a'naroáchin anoyatérahuë. Yosë nohuanton, ina pochin ninahuë. Ina marë' na'con na'con natéamacoso' ya'huërin. ³⁷ Tatahuë a'paimarincosonta' nani sha'huitérinquëma'. Co onporonta' noninso' natanchinamahuë'. Co ni'chinamahuë'. ³⁸ Nanamënta' co natéraramahuë'. A'paimapirincohuë' co natéraramacohuë' ni'ton, naporama'. ³⁹ Yosë quiricanëñ na'con nontérama'. ‘Ina nontohuatéhua', nanopimiatacaiso marë' anitotarinpoa', ténama'. Napopiramahuë', co téhuëñchachin natéraramahuë'. Ina quiricaquë chachin ninorinaco. ⁴⁰ No'téquën ninopirinacohuë', co yaimaramacohuë'. Ananpimiata'huanquëmaso' ya'huëpirinhuë', co nohuantéraramacohuë'.

⁴¹ Co canpita noya nicamacoso marë' napotéraranquëmahuë'. ⁴² Nani nohuitéraranquëma'. Co cancanëma quëran Yosë nosororamahuë', ténahuë. ⁴³ Yosë chachin a'paimarinco ni'ton, o'mapirahuë', co nohuantéraramacohuë'. A'naquënso nipirinhuë' inaora yonquinëñ quëran a'chintohuachinquëma', nohuantarama'. ⁴⁴ Canpita capini nipa'yatacasoráchin yonquiatoma', co Yosë noya nicainquëmaso' yonquiramahuë'. Napoaton co natéraramacohuë'. ⁴⁵ Co carinquëma' Yoséquë sha'huirapiaranquëmahuë'. Moisësé téhuëñchinsø' sha'huirapiarinquëma'. ‘Ina catahuarinpoa', ta'toma', imapiramahuë', co natéraramahuë' ni'ton, sha'huirapiarinquëma'. ⁴⁶ Inaso', iráca ninotonco ninshitérin. Ina natérama' naporini, canta' natéitomacohuë'. ⁴⁷ Ninshitopirinhuë', co natéraramahuë' ni'ton, carinquëmanta' a'chintopiranquëmahuë', ‘Co no'téquën nonanhüe', itéraramaco,’ itérin Quisosori, cotio hua'ano'sa' nontaton.

6

Cosharo' ana'atérinso'

(Mateo 14.13-21; Marcos 6.30-44; Lucas 9.10-17)

¹ Ina quëran Cariria sono' aquëtérán pëntonai. Ina sonoso', Tipiriasë itopi anta'. ² Notohuaro' piyapi'sa' imasarinacoi. Na'a cania'piro'sa' Quisosori a'naroáchin anoyatérin. Ina nicatona', imasapi. ³ Nonshirahuatoi, a'na motopia'huaquë pomosocontarai. Inaqué huënsëconai. ⁴ Pascoa tahuëri naniriarin. Naporo' cotioro'sa' niyontonpi Yosë yonquicaiso marë'. ⁵ Quisoso natanacaiso marë' notohuaro' piyapi'sa' canquirapi. Inapita quënanahuaton, Quisosori Pinipi itapon:

—¿Intohuacha cosharo' pa'ané isopita capacaiso marë' nicaya? itérin.

⁶ Nani yonquirin cosharo' ana'atacasó' niponahuë', Pinipi natanin ténicaso marë'.

⁷ —Cato pasa tahuëri sacatatë' canarësoquë pa'anpirëhuahuë', co iso nápo piyapi'sa' naniitonahuë', itérin Pinipiri.

⁸ Antérisënta' ya'huarin. Simon Pitro iin inaso'. Natanaahuaton, itapon:

⁹ —Iséquë a'na quëmapia'hu ya'huërin. A'natérapoíchin pan nisahuaton, catoyachin sami ya'huëtérin. Inaíchin nipirinhuë', ¿iso nápo' piyapi ta'ma' nanitérë'poya? itérin.

¹⁰ —Piyapi'sa' sha'huitoco' huënsë'ina', itérincoi Quisoso.

Inaquë noya pastoa'huaya ya'huérin. Sha'huitohuatëira, inaquë huënsëpi. A'natérápo huaranca quëmapi'sa pochin ya'huëpi. ¹¹ Quisosori a'natérárapoya pan masahuaton, Yosë nontérin. "Yosparinquën, Tata," itahuaton, piyapi'sa' quëtérin capacaiso marë'. Samirë chachin quëtéra'piarai. Ya'ipi piyapi'sa' natëaque' huarë' coshatopi. ¹² Nani natëhuachinara, ca'tano'sanënpitacoitaponcoi:

—Pan, sami, inapita pë'sotopiso' maconco', chiniahuachina', itérincoi.

¹³ Napoaton pë'sotopiso' masahuatoi, shonca cato' i'më' mëntatërai. ¹⁴ Ina nápo piyapi'sa' capacaiso marë' cosharo' ana'atérinso' ni'sahuatona', piyapi'sa' ninontopi:

—Tëhuëñchachin iso quëmapi Yosëri a'paimarin. Pënëinfoaso marë' a'paimacaso sha'uirinso chachin, nani o'marin, nitopi.

¹⁵ "Huëco' maahua', copirno acoa'ahua'," topi a'naquën. Co Quisosori natanapon-ahuë', inaora yonquinën quëran nitotérin. Nitotaton, inaora panëñquë pantarin.

Ii' aipi iratérinso'

(Mateo 14.22-27; Marcos 6.45-52)

¹⁶ I'huanahuanquë ca'tano'sanënpitacoiso', sono' yonsanquë pa'mantarai.

¹⁷⁻¹⁸ Potiquë ya'conahuatoi, Capinaomoquë paca'huaiso marë' pëntonapiraihuë', huancoanai' tashitërai. Co Quisoso huë'shaterasohuë', panca ihuan manincoi ni'ton, panca co'sacaitërin. ¹⁹ Saota quiromitro pochin nani maitopiraihuë', Quisoso huë'sarin nicaporaihuë', co a'naroáchin nohuitëraihuë'. Ii' aipi i'narahuaton, no'pa pochin huë'shiarin. Poti ya'caririarinso' ni'sahuatoi, pa'yanaí.

²⁰ Napopiraihuë':

—¡Co'ta ca huë'sarahuë! ¡Ama pa'yancosohuë! itérincoi. ²¹ Ina quëran noya cancantatoi: "Ya'conquique'," itohuatoira, ya'conin. Ya'compachina, a'naroáchin Capinaomo yonsan-quë canconai.

Quisoso yonípiso'

²² Piyapi'saso niperinhuë' ina quëranchin quëparitopi. Tahuëririnquë Quisoso yonisápirinahuë'. Co quënanatonahuë', ninontopi. "¿Intohuaso' pa'mara? I'huara a'naíchin poti ya'huëpirinhuë'. Inaquë ca'tano'sanënpita ya'conahuatona', pa'pi. Quisososo niperinhuë' co pa'ninhuë'" nitopi. ²³ Napoasoi, potiro'santa Tipiriasë quëran huë'piso' canquirapi quënanpi. Quisoso cosharo' ana'ataton piyapi'sa' a'carinso' ya'cari nonshiipi. ²⁴ Co ca'tano'sanënpitacoitéranta' ya'huëraihuë' ni'ton, "Huëco' pa'ahua', Quisoso yoníhua'," nitatona', potiro'saqüe' ya'conpi. Ya'conahuatona', Capinaomoquë pa'pi Quisoso yonípona'.

Cosharo pochin nininso'

²⁵ Inaquë nonshirahuatona', Quisoso quënanconpi huachi.

—¿Onporota' Maistro isëqué huënan? itopirinahuë'.

²⁶ —No'tequën sha'huitaranquëma'. I'huara cosharo' ana'atérahuë nohuitamacoso marë' niperinhuë', co yanohuitëramacohuë'. Natëaque' huarë' coshatërama' ni'ton, yoniramaco. ²⁷ Cosharomia a'naroáchin chanatërin. Ama inasáchin nohuantocosohuë'. Cosharo pochin nininso' ya'huérin. Cancanëma marë' quëtaranquëma'. Ina co onporonta' chanatarinhuë'. Ya'huëtohuachinquëma', Yosë nohuitatoma' nanpimiatarama. Ina na'con na'con yonquico'. Yosë quëran quëmapico ni'to, quëtaranquëma'. Ina marë' Tata Yosë acorinco. Ina nohuanton, nani ma'sha nanitaparahuë nohuitamacoso marë', itérin.

²⁸ —¿Ma'ta' Yosë nohuantërin nica'huaiso'? itopi.

²⁹ —Tëhuëñchachin Yosë yanatëhuatama', ca imaco. Ina a'paimarinco ni'ton, cancanëma quëran huarë' imaco. Ina Yosë nohuantërin, itérin Quisosori.

³⁰ —Inta nipachin, Yosë pochin niqué'. Ina nicatoi, natë'inquën. Co topinan natëa'huainquënsa' ya'huërinhuë'. ³¹ Iráca shimashonënpoapita Moisësëri Iquipito quëran

quëcapon, noya cosharo' mana itopiso' quëtérin. "Cosharo' inápa quëran o'marinso' quëtérin capacaiso marë'," ténin Yosë quiricanënqué. Inotéro parti napopi, itopi.

³² —No'téquën itérinquëma'. Cosharo' inápa quëran o'marinso' co Moiséséri quëtérinhue'. Tata Yoséri quëtérinso'. Iporaso' noya noya nininso' quëtarinquëma'.

³³ Inápa quëran a'patimarinquëma' piyapi'sa' ina pochin nanopicaiso marë', itérin.

³⁴ —Inanpi cosharo', Sinioro, quëtocoi nani tahuëri capatoi, noya nanopii, itopi.

³⁵ —Ca inaco. Caso' cosharo pochinco ni'to, piyapi'sa' ananpitomiatarahuë. Imapatamaco, co huachi tanarëso pochin cancantaramahuë'. Natéhuatamaco, co huachi yamororëso pochin cancantaramahuë'. Yosë nohuitohuatama', sano cancantarama'.

³⁶ Nipirinhuë', nani sha'huitérinquëma'. Ninahuëso' nicapomarahuë', co natéramacohuë'.

³⁷ A'naquën Tata Yosë nohuanton, imasarinaco. Insosona imapachinaco, co onporonta' a'pararahuë'. ³⁸ Co caora nohuento, ma'sha ninahuë'. Inápa quëran o'marahuë Tata Yosë natëca'huaso marë'. Ina a'paimarinc. ³⁹ A'naquën Yosë nohuanton, imasarinaco. Inapitaso' noya a'paiarahuë, co a'poarinacohuë'. Ayaro' tahuëri ananpitaantararahuë. Ina Yosë nohuantérin. ⁴⁰ "Quëmaso' têhuenchachin Yosë hui'ninquën," itatomaco imapatamaco, Yosë nohuitatoma' nanopimiatarama huachi. Ayaro' tahuëri ananpitaantararanguëma'. Ina Yosë nohuantérin, itérin Quisosori.

⁴¹ Ina natanahuatona', cotioro'sari no'huipi. "Caso' cosharo pochin ninahuë. Inápa quëran o'marahuë," téninso marë' no'huipi. No'huitona', ninontapi.

⁴² —Co'ta inaso' Quisoso. Cosi hui'nin. A'shionta' nohuitéröhua'. ¿Onpoatonta' "Inápa quëran o'marahuë," toconin? nitopi.

⁴³ —Ama huachi no'huitomaco, sacaro quëran ninontocosohuë'. ⁴⁴ Co insonta' nanitérinhue' inaora nohuanton imaincoso'. Tata Yoséri huayoninsopitaráchin imasarinaco. Ayaro' tahuëri inapitaso' ananpitaantararahuë. ⁴⁵ Pénéntona'piro'sa' iráca ninshitopi. "Ya'ipi piyapi'sa' Yoséri a'chintarin," topi, ninshitatona'. Tatahuë natanatoma' natéhuatama', imasaramaco.

⁴⁶ Co insonta' Tata Yosë quënaninhue'. Casáchin quënanahuë. Ina ya'huërin quëran o'marahuë. ⁴⁷ No'téquën sha'huitérinquëma'. Imapatamaco, Yosë nohuitatoma' nanopimiatarama'. ⁴⁸ Ca cosharo pochinco ni'to piyapi'sa' ananpimiatarahuë. ⁴⁹ Shimashonëmapita inotéro parti ya'huasoi', cosharo' Yoséri quëtérinso' ca'pi. Mana itopiso' ca'pirinahuë', nani iráca chiminpi. ⁵⁰ Insosona natéhuachinco inápa quëran cosharo' o'marino capatë pochin nisarin. Napohuachin, Yosérë' ya'huëmiatapon. ⁵¹ Ca nanopirin cosharo pochinco. Inápa quëran o'mato, noya noya ananpiaranquëma'. Ca nonéhuë chachin quëtarahuë ya'ipi piyapi'sa marë'. Coshatérmaso pochin nitohuata-maco, ya'coancantaranguëma', nanopimiatarama huachi, itérin.

⁵² Ina natanahuatona', cotioro'sa' nisha nisha ninontopi.

—¿Onporahuatonta' nonëñ chachin ca'nëso pochin quëtérë'ponpoa nicaya? nitopi.

⁵³ —No'téquën itérinquëma'. Caso' Yosë quëran quëmapico ni'to, ya'ipi cancanëma quëran yonquico. Co'so' nonéhuë ca'nëso pochin nitohuatamahuë', huénainéhuënta' co o'orëso pochin nitohuatamahuë', co onporonta' nanopimiataramahuë'. ⁵⁴ Insosona nonéhuë ca'nëso pochin nipachina', huénainéhuënta' o'orëso pochin nipachina', nanopimiatarin. Ayaro' tahuëri ananpitaantararahuë. ⁵⁵ Nonéhuë cosharo pochin ni'ton, achinicancanaranquëma'. Huénainéhuë pa'sarin ni'ton, imapatamaco, anoyacancantaranguëma'. ⁵⁶ Têhuenchachin nonéhuë ca'nëso pochin nanopatama', huénainéhuënta' o'orëso pochin nanopatama', ya'coancantaranguëma' ni'ton, imamiataramaco. ⁵⁷ Tatahuëso' nanopimiatarin. Ina a'paimarinc. Catahuarinco noya nanopica'huaso marë'. Inapochachin imamiatohuatamaco, cosharo pochin achinicancanaranquëma' ni'ton, catahuaranquëma' Yosë nohuitatoma' nanopimiatacaso marë'. ⁵⁸ Ca cosharo pochinco. Inápa quëran o'marahuë. Shimashonëmapita cosharo'

Yosëri a'patimarinso' ca'pirinahuë', iráca chiminpi. Nipirinhü', imamiatohuatamaco, nanopimiatarama', itérin.

⁵⁹ Capinaomo niyontonpiso pëiquë a'chintaton naporin.

Quisoso natëhuatëhua', nanopimiataracaso ya'huërindo'

⁶⁰ Na'a piyapi'sa' Quisoso imasapirinahuë', ina nanan natanahuatona' a'naquën nisha yonquipi.

—A'chinisco' sacai' imacaso'. ¿Incaricha nitotaton, natërë'poya? nitopi.

⁶¹ Napohuachinara, Quisoso inaora nitotaton, itérin:

—A'chintopiranquëmahuë', ¿yaa'poramaco ti? ⁶² Yosë quëran quëmapico ni'to, a'na tahuëri Yosë ya'huërin'pa' panantararahuë. Ina ni'patama' ¿ma'ta' yonquiarama?

⁶³ Ispirito Santoráchin ananpimiatarinquëma'. Piyapi'sa' inahuara co nanitapihuë'. Yosë yonquirinso chachin sha'huitëranquëma'. Ina natëhuatama', Yosë nohuitatoma' nanopimiatarama'. ⁶⁴ Nipirinhü', a'naquëma' co natëramacohuë', itérin. Iráca quëran huarë' ya'ipi piyapi'sa' yonquirinsopita nitotérin. A'naquën co yanatëtopihuë'. A'nanta' yasha'uirapirin. Inapita nitotaton, napotérin. ⁶⁵ Ina quëran itantarín:

—Napoaton itaranquëma'. Co Yosëri anitotohuachinhü', co insonta' nanitarinhü' imaincoso', itérin.

⁶⁶ Naporo quëran huarë' na'amiáchin co huachi imapihuë'. A'popi huachi.

⁶⁷ Napohuachinara, ca'tano'sanënpitacoi itaponcoi:

—¿Co canpitaso' a'poapomacohuë' to? itérincoi.

⁶⁸ —Co Sinioro a'poarainquënhü'. Co a'na ya'huërinhuë' imaca'huaiso'. Quëma nóya a'chintarancoi Yosë nohuitatoi nanopimiata'huaiso marë'. ⁶⁹ Nani natërainquën. Quëmaso' noyasáchin ninan. Yosë a'paimarinquën, ténai, itérin Simon Pitrori.

⁷⁰ —Shonca catonquëma' acoranquëma' imacamacoso marë'. A'naëmaso nipirinhü', sopai pochin cancantérin, itérincoi. ⁷¹ Simon hui'nin Cotasë Iscarioti itopiso yonquiaton, naporin. Inarinta' ca'tanpirinhü', yasha'uirapirin.

7

Quisoso iinpita napopiso'

¹ Ina quëran hua'quimiáchin Quisoso Cariria parti ya'huërarin. Cotioro'sari yatëpapi ni'ton, co Cotia parti yapa'ninhü'. ² Ina quëran a'na cotio niyontonpiso tahuëri naniriarin, imënamëro'sa' pita itopiso'. ³ Napoaton iinpitari itapona':

—Quëmanta' Cotia parti paaton, Yosë pochin niquë' imarinënquënsopita ni'ina'.

⁴ Po'oana quëran ma'sha nipatan, piyapi'sa' co nohuitarinënquënhü'. Yosë pochin yanipatan, a'ninquëchin niquë' ya'ipi piyapi ni'inënquën, itopi.

⁵ Co iinpitari téranta' natëyátërapihuë' ni'ton, napotopi. Inapita nontaton, itapon:

⁶ —Pahuanarin caso' pacahuaso'. Canpitaso nipirinhü' onporosona yapa'patama', noya paco'. ⁷ Canpitaso' piyapi'sa' co no'huirinënquëmahuë'. Caso nipirinhü' no'huirinaco. “Co noyahüe' ninama'” itérahuëso marë' no'huirinaco. ⁸ Napoaton paatoma', niyontonpiso tahuëri na'huëco'. Co ipora pa'sarahuë'. Pahuanarin pacahuaso', itérin.

⁹ Ina tosahuaton, ina quëranchin ya'huërarin.

Quisosonta' Cotia parti pa'ninso'

¹⁰ Iinpita nani pa'pachinara, Quisosonta' pa'nin niyontonpiso tahuëri na'huëcaso marë'. Pa'pirinhü', co piyapi'sa' ni'térantapaquë pa'ninhü'. Po'oana quëran pochin pa'nin. ¹¹ Inaqué cotioro'sari yonisápirinahuë'.

—¿Intohuata' Quisoso ipora? tosapi.

¹² Nisha nisha yonquiatona', ninontopi. “Inaso' noya quëmapi,” topi a'naquën. A'napitaso nipirinhü' tapona': “Co noyahüe'. Yanonpintërinpoa'” topi.

¹³ Napopirinahuë', hua'ano'sa' tē'huatatona', po'oana quëran ninontopi.

¹⁴ Simana huancana Quisoso Yosë chinotopiso pëiquë pa'nin. Inaquë a'chinarin.

¹⁵ Cotioro'sa' natanahuatona', pa'yanpi.

—¿Onporahuatonta' iso quëmapi co na'con quirica nitotaponahuë', noyá nitotérin? topi.

¹⁶ Napohuachinara, Quisosori itapon:

—Co caora yonquinéhuë quëran a'chinahuë'. Tata Yosë a'paimarincoso' sha'huitohuachincora, canta' a'chinarahuë. ¹⁷ Cancanëma quëran huarë' Yosë yanatéhuatama', no'tequén anitotaringuëma': "Co inaora yonquinén quëran a'chinihuë". Yosë nanamën chachin a'chinarin," tosarama'. ¹⁸ A'naquénso' inahuara yonquinëna quëran a'chinpi. Piyapi'sari pa'yatacaiso marë' napopi. Caso' nimirinhuë' Yoséíchin yonquiatu, no'tequén a'chinahuë. Inaíchin pa'yatacaiso' ya'huërin, ténahuë. Co nonpintéreranquëmahuë'. ¹⁹ Moisésë iráca pénentopirinhuë', co a'nayanquëma térranta' natéraramahuë'. ¿Onpoatonta' yatéparamaco? itérin.

²⁰ —¡Quëmaso' sopai ya'coancantérinquen ni'ton, hua'yantérän! ¿Inta' yatéparinquen? itopi.

²¹ —Chinoto tahuëri a'na quëmapi anoyatérahuë. "Chinoto tahuëri nimirinhuë', co chinotérinhuë', ta'toma', canpitaso' pa'yanama'. ²² Ni'cochi. Co canpita térranta' ya'ipi chinoto tahuëri chinotéraramahuë'. Iráca shimashonëma' sha'huitérinéñquëma' marca accasco'. "Hui'nampita posa tahuëritohuachina', marca acotoco'", itérinpoa' Moisésënta'. Posa tahuëri nanihuachina, marca acotérama'. Chinoto tahuëri nisapirinhuë', acotérama'. ²³ Chinoto tahuëri níponahuë', marca niacotérama'. Moisésë pénentérinso' natécaso marë' naporama'. Inapoapomarahuë', ¿onpoatomata' nípachin chinoto tahuëri piyapi anoyatérahuëso marë' no'huiramaco? ²⁴ Ama quënanamasoráchin yonquiatoma', sha'huirapicosohuë'. Yonquinéñpoa quëran huarë' Yosë ni'sarinpoa'. Ina nitotatoma', no'tequén yonquico', itérin Quisosori.

Cristo inápa quëran o'marins'

²⁵ Ina quëran ya'huéhuano'sari Quisoso quënanahuatona', ninontopi.

—¿Isona quëmapi yatépapiro' ti? ²⁶ Ni'cochi. A'ninquéchin a'chinapirinhuë', co incari térranta' no'huirinhuë'. Hua'ano'sarinta' natétona': "Inaso' Cristo, Yoséri a'paimarins'", ¿tomarai huachi ti? nitopi.

²⁷ —Napochináchin, nimirinhuë' Quisoso intohua quëransona huë'nins' nitotéréhua'. Cristoso huë'pachin intohua quëransona huë'nins', co insonta nitotarinhuë', nitopi.

²⁸ Quisososo nimirinhuë', Yosë chinotopiso pëiquë chiniquen itaantarin:

—¿Nohuitéramacó ti? Intohua quëranso' huë'nahuëso' nitotapomarahuë', co tēhuéñchachin nohuitéramacohuë'. Co caora nohuanto, o'marahuë'. Yosë nohuanton, o'marahuë. Inaso' no'tequén nonin. Nimirinhuë', inanta' co nohuitéraramahuë'. ²⁹ Caso nimirinhuë' ina nohuitérahuë. Inatohua' ya'huépirahuë', isoro'paquë a'paimarincó, itérin.

³⁰ Ina topachina, hua'ano'sari tashinan pëiquë po'mocaiso marë' yamápirinahuë', Yosë nohuanton, co chiminacaso' naniyáterarinhue' ni'ton, co mápihuë'. ³¹ Hua'ano'sariso' no'huipirinahuë', na'a piyapi'sari Quisoso yanatépi.

—Cristo o'mahuachin, iso quëmapi quëran na'con na'con ta'ma' ¿Yosë pochin niquimare'po ti? topi.

Tashinan pëiquë yapo'mopiso'

³² Ina pochin ninontopiso', parisioro'sa' natantopi. Natantahuatona', corto hua'ano'saré chachin ponisiaro'sa' a'papi Quisoso macacaiso marë'. ³³ Huë'pirinahuë', Quisosori itérin:

—Co hua'qui' canpitaro'co ya'huapohuë'. Pa'miatarahuë. Yosë nohuanton, o'marahuë. Inaquë chachin panantarahuë. ³⁴ Naporo' yonípiramacohuënta', co

quënanaramacohuë'. Insëquësona pa'pato canpitaso' co nanitaramahuë' pacacamaso', itérin.

³⁵ Hua'ano'sa capini ninontopi.

—¿Intohuata' yapaaton naporinso'? “Co quënanaramacohuë”, ténin. Nisha piyapi'sa' ya'huëpi parti a'naquën cotioro'sa' yacapatonpi. Inaquë paaton, nisha piyapi'sa' a'chintapon nimara. ³⁶ ¿Ma'ta' tapon naporin? “Yonípiramacohuënta', co quënanaramacohuë'. Insëquësona pa'nahuëqué co canpitaso' nanitaramahuë' pacacamaso'”, toconin, nitopi.

Nanpirin i'sha

³⁷ Pita ta'huantérinso' tahuëri na'con na'con yonquipiso' ni'ton, notohuaro' piyapi'sa' niyontonpi. Naporo' Quisosori huanirahuaton, chiníquën itapon:

—Yamororëso pochin cancantohuatama', huëco' imaco sano cancantamaso marë'.

³⁸ Natëhuatamaco, cancanëmaquë nanpirin ii' ya'huëtarinquëma'. Pancai' no'pa quëran pipirinso pochin cancanëmaquë ya'huërápon. Yosë quiricanënqué naporin, itérin.

³⁹ Quisoso imapatéhua', Ispirito Santo ya'coancantarinpoo'. Ina yonquiaton, napotérin. Naporo' Quisoso co inápaquë pantayátérarinhuë'. Napoaton co Ispirito Santori piyapi'sa' noyá ya'coancanchátérarinhuë'. (Ina ya'coancantohuachinpoo', na'con catahuarinpoo' noya cancantacaso marë'. Ina quëran a'napitanta' Yosë anohuitarhua', tapon naporin.)

Nisha nisha yonquipiso'

⁴⁰ Quisoso naporinso' natanahuatona', nisha nisha yonquipi.

—Téhuëñchachin isoso' pënëntona'pi ninarëhuaso', topi.

⁴¹ —Cristo mini ténahuë, ténin a'naquën.

—Co inahuë' nimara. Cristo naporini co Cariria parti quëran huë'itonhuë'. ⁴² ¿Co'ta “Tapico' shiin ni'ton, ina ninanonënqué chachin nasitapon? Pirinquë nasitapon,” ténin Yosë quiricanënqué, topi a'naquëonta'.

⁴³ Ina pochin ninontatona', nisha nisha yonquipi. ⁴⁴ A'naquëninta' tashinan pëiquë po'mocaiso marë' yamápirinahuë', co mápihuë'.

Hua'ano'sa' co natëpisohuë'

⁴⁵ Ina marë' ponisiaro'sa' nani a'papi. Hua'ano'sari chachin a'papirinahuë', topinan huënantapi.

—¿Onpoatomata' co manamahuë? itopi.

⁴⁶ —¡Co insonta' ina pochin a'chinchinihuë! itopi.

⁴⁷ Ina quëran parisioro'sari itapona':

—Nani nonpintérinquëma' ni'ton, ¿canpitanta' natërama' pa'? ⁴⁸ Ni'cochi. Co inso hua'ano'sari téranta' ina natërinhuë'. Parisioro'sacointa' co natëraihuë'. ⁴⁹ Topinan piyapi'sariachin natëpirinahuë', inapitaso' co Moisësë pënëntérinso' nitotopihuë' ni'ton, Yosëri ana'intarin, ténai, itopi.

⁵⁰ Nicotimonta' inaquë ya'huërin, i'huapo' tashi' Quisoso nicapon pa'ninso'. Inanta' cotio hua'an ni'ton, itapon:

⁵¹ —Moisësë pënëntérinso' natëréhua'. Nani pënëninpoa'. “Ama topinan quëran ana'intocosohuë'. No'tequën nitotaquë huarë' ana'intacaso' ya'huërin,” ténin. Napoaton canpoanta' Quisoso a'chininso' natahuan'. Naporinsonta' nitotahua'. Co topinan quëran ana'intacaso' ya'huërinhuë', ténahuë, itérin.

⁵² —¿Quëmanta' Cariria parti quëran huë'nan? Yosë quiricanën nontëquë'. Pënëntona'pi co onporonta' Cariria quëran huëcaponhuë', itopi.

Oshahuana'pi sha'huirapipiso'

[⁵³ Ina quëran piyapi'sa' yanquëërahuatona', ya'huëpi'pa' paantapi.

8

¹ Quisososo nimirinhuë' Oripose' panënqué pa'nin. ² Tahuërinquë tashiramiachin Yosë chinotopiso pëiquë paantarin. Na'a piyapi'sa' huë'pi ina natanacaiso marë'. Inaquë huënsërahuaton, a'chinapirinhuë', ³ Cotio maistro'sa', parisioro'sa', inapita huëcatona', a'na sanapi quëpi. So'yahuan nimirinhuë', nisha quëmapiri ichihuë'érin. Nani quënanpi ni'ton, masahuatona', Quisosoquë quëpi. Sanapi huancánachin ahuanirahuatona', Quisoso itapona':

⁴ —Maistro, iso sanapi so'yahuan nimirinhuë', nisha quëmapiri ichihuë'érin, quënanai.

⁵ Iráca Moisésë pënëninpoo'. "Monshihuanpisopita na'pique tē'yaratoma', tēpaco'", tēnin. ¿Ma'ta' tēnan quëma ipora? ¿Tēpa'ii ti? itopi.

⁶ Quisoso atëhuërahuatona' sha'huirapicaiso marë' natanapi. Quisososo nimirinhuë' i'chorahuaton, imirin quëran no'paquë ninshitarin.

⁷ —¿Ma'ta' onpochii? Sha'huitoco, itantahuachinara, huaniantarin.

—Noyahua'. Insonquëma tēranta' co pi'pian tēranta' oshahuanpatamahuë', inari'ton na'pique tē'yarain, itérin.

⁸ Ina quëran i'choantarahuatón, no'paquë ninshitaantarin. ⁹ Ina natanahuatona', a'naya a'naya pa'pi. Mashoro'sa'ton pa'pi. Ina quëran a'naya a'naya pa'pi. Ya'ipiya pa'pachinara, sanapiíchin huaniárin. ¹⁰ Quisoso huaniantarahuatón, itapon:

—¿Inso huachi, imoya, quëmapi'sa' yaana'intérinënquëns'? ¿Co huachi yaana'intérinënquënhuë'? itérin.

¹¹ —Nani pa'pi Siniro, itérin.

—Co carinquëonta' yaana'intérinquënhuë'. Paaton, ama huachi aquëtë' oshahuaantaquësohuë'. Noya niquë huachi, itérin. Napotohuachina, pa'nin.]

Quisoso a'pintérinpoaso'

¹² Ina quëran piyapi'sa' a'chintantarín.

—Caso' a'pintaté pochin nicato, ya'ipi piyapi'sa' no'téquën anitotarahuë. Imapata-maco, co huachi tashinan pochin cancantaramahuë'. Tahuëri pochin cancantarama'. Ina pochin cancantohuatama', Yosë nohuitatoma' nanpimiatarama'. ¹³ Parisioro'sari natanahuatona', itapona':

—Quëmaora yonquinén quëran naporan. Co natëca'huainquëns' ya'huërinhuë', itopi.

¹⁴ —Caora yonquinéhuë quëran napopirahuë', tēhuëñchachin no'téquën nonahuë. Intohua quëransona o'marahuëso' nitotérahuë. A'na tahuëri inatohua chachin panan-tarahuë. Casáchin ina nitotérahuë. Capítaso nimirinhuë' co nitotéraramahuë'. Napoaton natëcamacoso' ya'huërin. ¹⁵ Capítaso' piyapi'sa' inahuara yonquipiso pochin napoonin yonquirapitomaco sha'huirama'. Caso nimirinhuë', co insonta ina pochin yon-quirapito sha'huirahuë'. ¹⁶ Sha'huihuatéraso napoaponahuë', no'téquën sha'huirahuë. Co casáchin sha'huirahuë'. Tatahuënta' ina pochachin yonquiaton sha'huitarinquëma'. Ina a'paimarincó. ¹⁷ Moisésë pënëntérinso' ya'huëterinquëma'. Inaquë iráca ninshiterin. "A'na piyapiáchin sha'huihuachina, nonpiámara. Nimirinhuë', cato' piyapi inachachin sha'huihuachina', napororuaré' natëtacaso' ya'huërin," tēnin. ¹⁸ Carinquëma' nani sha'huitarinquëma'. Tatahuënta' inachachin anitotarinquëma'. Ina a'paimarincó, itérin Quisosori.

¹⁹ —¿Inséquëta' tataparin? itopi.

—Capítaso' co ina nohuitéraramahuë'. Canta' co tēhuëñchachin nohuitéraramacohuë'. Nohuitéraramaco naporini, tatahuënta' nohuichitomahuë', itérin.

²⁰ Yosë chinotopiso pëiquë a'chintaton, napotérin. Coriqui cacon notënanquë a'chintarin. Yosë nohuanton, co chiminacaso' naniyatérarinhuë'. Napoaton co insoari tēranta' maninhuë'.

Quisoso pa'miatarinso'

21 Ina quëran itantarín:

—A'na tahuëri pa'miatarahuë. Naporó' yonípiramacohuënta', co quënanaramacohuë'. Oshanëmaré'quëma chachin chiminarama'. Inséquësona pa'pato, co canpitaso' nani-taramahuë' pacacamaso', itérin. **22** Ina natanahuatona', cotioro'sa' ninontopi.

—¿Ma'ta' tapon naporin? “Inséquësona pa'pato, co nanitaramahuë' pacacamaso'”, itérinpoa'. ¿Yanitëpamara ti? nitopi.

23 —Canpitaso' isoro'paquë ya'huatoma', a'napita piyapi'sa pochin yonquirama'. Caso nípirinhue' inápa quëran o'marahuë ni'to, Yosë pochin yonquirahuë. **24** Napoaton napotëranquëma'. Caso iráca quëran huarë' ya'huato, ya'huëmiatarahuë. Co natëhuatamacohuë', oshanëmaré'quëma chachin chiminarama', itérin.

25 Napohuachina:

—¿Inquënta' quëmaso'? itopi.

—Nani iráca quëran huarë' sha'huitëranquëma'. Ca inaco tënahuë. **26** Canpitaso co noyahue' ninama ni'ton, na'con sha'huita'huanquëmaso ya'huërin. A'paimarincoso' no'tequénáchin nonin. Ina sha'huitohuachincora natanato, ina chachin sha'huitaranquëma', tënин.

27 Tata Yosë tapon naporinso' co nitotopihuë'.

28 —Yosë quëran quëmapico níporahuë', coroséquë achinpiarinaco. Naporó huarë' ca ya'huëmiatarahuëso' nohuitaramaco. Naporahuaton: “Tëhuëñchachin co inaora yonquinëñ quëran a'chinihuë'. Pa'pini a'chintérinso chachin a'chinin,” tosarama'.

29 Tatahuë a'paimarincoso ni'ton, ca'taninco. Ina nohuantërinsoráchin no'tequén natërahuë ni'ton, co patarincohuë', itérin.

30 Itohuachina, na'a piyapi'sari “No'tequén nontërinpoa'”, ta'tona', natëpi.

Sopairi camairinso'

31 Ina quëran nasha imarinsopita itantarín:

—Carinquëma' a'chintéranquëmaso' noya natëhuatama', noya imasaramaco.

32 Imamiatohuatamacó, no'tequén yonquiarama'. Co insonta' camaiarinquëmahuë', itérin.

33 —Quiyaso' Apraan shinpítacoi. Co onporonta' a'napita camairinacoihuë'. ¿Onpoatonta': “Co insonta' camaiarinquëmahuë'”, itérancói? itopi.

34 —No'tequén itéranquëma'. Co noyahue' nípatama', sopai hua'an camaiarinquëma'. Piyapinënpita pochin níarama'. Co canpitaora nanitaramahuë' oshanëma' naniantamaso'. Sopai camaihuachinquëma', co noyahue' níarama'. **35** Ni'co'. Patron ya'huérinquë piyapinëñ co ya'huëmiaterinhue'. Patronëni nohuantohuachina, ocoiantarin. Hui'ninsó nípirinhue' ya'huëmiatarin. **36** Yosë hui'ninco ni'to, catahuahuatënquëma', cha'ésarama'. Co huachi insonta' camaiantarinquëmahuë'. **37** Canpitaso' Apraan shinpitanquëma' nípomarahuë', yatéparamaco. A'chintopiranquëmahuë', nonahuëso' co yanatëramahuë'. **38** Tatahuë anitotërincoso' natëto sha'huitaranquëma'. Canpitaso nípirinhue', ma'sona tatanëma pochin nininsó' camaihuachinquëmara, natërama', itérin Quisosori.

39 —Apraan mini quiyaso tatanëhuëi, itopi.

—Apraan pochin cancantërama' naporini, ina pochin noya niitomahuë'. **40** Yosë anitotërincoso chachin no'tequén sha'huitopiranquëmahuë', yatéparamaco. Apraanso' co ina pochin yonquirihuë'. Yosë nanamëñ noya natërin. **41** Canpitaso nípirinhue' tatanëma pochin nininsó' nonanama', itérin.

—Co quiyaso' ma'papia'huaro'sacoihuë'. Yosë chachin tatanëhuëi. Inasáchin natërai, itaantapi.

42 Napotohuachinara:

—Yosëso' tatanëma' naporini, nosoro'itomacohuë'. Yosë quëran o'marahuë. Co caora nohuanto, o'marahuë'. Yosë a'paimarincoso. **43** A'chintopiranquëmahuë', ¿onpoatomata'

co natanamacohuë? Co natëtochináchinhue' cancantërama' ni'ton, co nanitëramahuë' natanamacoso' ténahuë. ⁴⁴ Sopai hua'an mini tataparinquëmaso'. Ina pochin cancantatoma', inasáchin natëarama'. Iráca quëran huarë' piyapi'sa' tëpana'pi inaso'. Co no'tequën nitononinhuë' ni'ton, co pi'pisha téranta' natëcaso' ya'huérinhue'. Pa'pi non-pintë' inaso'. Inachin, nonpinacasoráchin cancantérin. Ina nohuanton, nonpiné'. ⁴⁵ No'tequën pënénanquëma' ni'ton, co yanatëramacohuë'. ⁴⁶ ¿Inquëmata' nanitërama' no'tequën sha'huirapiamacoso'? "Co noyahue' nicaton, oshahuanan," itohuata-maco, nonpinarama'. Caso' no'tequën nontaranquëma', nipurinhue', ¿onpoatomata' co natëramacohuë? ténahuë. ⁴⁷ Yosë piyapinënpita ina nanamën noya natanpi. Canpitaso nipurinhue' co Yosë piyapinënquëmahuë' ni'ton, co yanatanamahuë', itaantarín Quisosori.

Co'huara Apraan nasichatërasohue', Quisoso ya'huérinso'

⁴⁸ Ina natanahuatona' hua'ano'sari itantapi:

—¿Co'ta quëmaso' Samaria piyapinquë? ténai. "Sopai ya'coancantérinquëni'ton, hua'yantëran," topatëira, no'tequën napotérainquëni, itopi.

⁴⁹ —Co sopai ya'coancantérincohuë'. Tatahuë noya nicato natërahuë. Canpitaso nipurinhue' nocanatomaco, pinoramaco. ⁵⁰ Co noya ni'piramacohuë', co ina yon-quirahuë'. Yosëso' noya ni'ninco. Inaso' coisë pochin nicaton, no'tequënáchin yonquirin. ⁵¹ No'tequën itaranquëma'. Natëhuatamaco, co chiminaramahuë', itérin Quisosori.

⁵² —Sopai mini nani ya'coancantérinquëni. Co huachi yonquiranhue'. Apraan nani chiminin. Pënëntona'piro'santa' chiminpi anta'. Quëmaso nipurinhue': "Natëhuatamaco, co chiminaramahuë'," itérancio. ⁵³ Tata Apraan, pënëntona'piro'sa', inapita chiminpi. ¿Inapita quëran quëmaso' chini chiniquëni nanantëran ti? ¿In pochinta' cancantaton, naporan? itaantapi cotioro'sari.

⁵⁴ —Casáchin "Noyaco," ténahuë naporini, topinan quëran napo'itohuë'. Nipurinhue', Tata Yosë noya ni'ninco. Canpitanta': "Ina chinotërai," ténamaso'. ⁵⁵ Co inaso' nohuitopiramahuë', caso' nohuitërahuë. Ya'ipi noninso' natërahuë. "Co nohuitërahuë," ténahuë naporini, canpita pochachin canta' nonpiintohuë'. ⁵⁶ Tata Apraan yonquirinco. "A'na tahuëri Yosëri a'paimarinso' o'mararin," ta'ton, noya cancantérin. Nani ni'ninco ni'ton, noya cancantérin, itérin Quisosori.

⁵⁷ —Co quëmaso' a'natérápo shonca pi'ipichátëraponahuë', ¿Apraan ni'nán ti? itopi.

⁵⁸ —No'tequën sha'huitëranquëma'. Co'huara Apraan nasichatërasohue', caso' ya'huárahue', itérin.

⁵⁹ Ina quëran na'piro'sa' masahuatona', yatë'yarapi. Quisoso nipurinhue' na'pirahuaton, Yosë chinotopiso pëi quëran pipirin.

9

Somaraya anoyatërinso'

¹ Quisoso pa'sahuaton, a'na quëmapi quënanconin, somaraya nininso'. Hua'huatérin quëran huarë' co manta' ni'térinhue'. ² Ca'tano'sanënpitacoi imarai ni'ton, quiyanta' ni'nai.

—¿Onpoatonta' Maistro iso quëmapi somaraya nasitërin? ¿Inaora oshanëñ marë' nica? ¿A'shin, pa'pin, inapita oshanëña marë' nica? Sha'huitocoi nitochii, itérain.

³ —Co inso oshanëñ marë' ina pochin nasitërhue'. Yosë nohuanton, ina pochin hua'huatérin. Anoyatacaso marë' naporin. Piyapi'sa' ni'pachina', na'con na'con Yosë yonquiapi. "Ma noyacha Yosëso' nanitaparin paya," tosapi. ⁴ Ipora chachin catahuarahuë. Yosë natëto, ina marë' sacatarahuë. Co hua'qui' isoro'paqué ya'huaréhuahuë'. A'na tahuëriáchin pochin ya'huéréhua'. Shiarahuaton tashihuachin, co huachi nanitarihuahuë' ma'sha nicacaso'. ⁵ Isoro'paqué ya'huasoco, a'pintërinso pochin ya'ipi piyapi'sa' no'tequën anitotërahuë, itérincoi.

⁶ Ina quëran no'paquë ipirahuaton, ashipirotérin. Ina quëran ina masahuaton, somaraya pashirayatérin.

⁷ —Paaton Siroiquë nipa'morayaquë', itérin. Siroiso': "A'parinso'," tapon naporin.

Itohuachina, pa'nin. Inaquë nipa'morayahuachina, noya ni'térin. Noya ni'tahuaton, ya'huërin'pa' pa'nin huachi. ⁸ Ya'cariya ya'huëpisopitari quënanahuatona', pa'yanpi. Nani hua'qui' huënséaton, coriqui ma'patérin. Somaraya ni'ton, topinan quëtopi. Napoaton na'a piyapi'sari nohuitopi. Inapitari quënanahuatona', ninontopi.

—¿Isona quëmapi i'hua coriqui ma'patérinso' ti? nitopi.

⁹ —Ina mini, ténin a'naquën.

—Ina pochin ya'nopirihuë' co inahuë' topiraihuë', topi a'naquëonta'.

—Ca mini, co nishacohuë', ténin quëmapiso'.

¹⁰ —¿Onporahuatonta' iporaso' noya ni'térin? itopi.

¹¹ —A'na quëmapi Quisoso itopiso' no'pa ipitahuaton, shipiro' ninin quëran, pashirayatérinco. Ina quëran sha'huitérinco: "Paaton Siroiquë nipa'morayaquë'," itérinco. Inaquë pa'sahuato, nipa'morayahuatéra, ni'térahuë, itérin.

¹² —¿Intohuata' ipora inaso'? itopi.

—Ahuën. Co caso' nitotérahuë', ténin.

Hua'ano'sari natanpiso'

¹³ Napohuachina, Parisioro'sataquë quëpapi. ¹⁴ Chinoto tahuëri nipurihuë' Quisosori no'pa ipitahuaton, shipiro nininquë pashirayatahuaton, anoyerayatérin ni'ton, inaquë quëpapi. ¹⁵ Parisioro'sari quënanahuatona', itopi:

—¿Onpotahuaténquënta' anoyerayatérinquë? itopi.

—Shipiroquë pashirayatérinco. Nipa'morayahuatéra, noya ni'térahuë, itérin.

¹⁶ —Ni'quëchi. Chinoto tahuëri nipurihuë', co Quisoso chinotérinhuë'. Napoaton co Yosë quëran o'marinhuë', topi a'naquën.

—¿Onporahuatonta' nipachin nanitérin somaraya a'naroáchin anoyatacaso'? Oshahuan naporini, co nanitapaitonhuë', topi a'naquëonta'. Nisha nisha yonquipi. ¹⁷ Napoaton quëmapi itantapona':

—Nani anoyerayatérinquëni'quëhuarë', ¿ma'ta' quëma yonquiran? itopi.

—Yosëri acorin pénëntacaso marë' ténahuë, itérin.

¹⁸ Hua'ano'saso nipurihuë' co natépihuë'. "Iso quëmapi co somaraya hua'huataponahuë', nonpiámara," topi. Napoaton a'shin, pa'pin, inapita amatopi natanacaiso marë'. ¹⁹⁻²⁰ Huë'pachinara, natanpi:

—¿Iso' hui'nan, somaraya hua'huatérinso'? itopi. Itohuachinara:

—Ina mini hui'nuhüe. Somaraya hua'huatérin, itérin.

—¿Onporahuatonta' iporaso' noya ni'térin? itopi.

²¹ —Co quiyaso' nitotérahuë'. ¿Incariso' anoyerayatomara? Nani mashotérin. Ina natanco' sha'huichinquëma', ténin pa'pin.

²² Cotio hua'ano'sa' tē'huataton, napotérin. I'hua chachin hua'ano'sa capini ninontopi Quisoso imarinsopita ana'intacaiso marë'. "Quisososo' Cristo chachin," topachina', ocoia'ahua'. Ocoihuatéhua', co huachi nanitapihuë' niyontonpiso pëiquë huëcacaiso', nitopi. ²³ Napoaton: "Nani mashotérin. Ina natanco'," itérin pa'pin.

²⁴ Ina quëran hui'nin amatantapi.

—Yosë ni'sarinquëni'quëhuarë', no'tequëni'quëhuarë', no'tequëni'quëhuarë'. Quisososo' co noyahuë' ni'ton, oshahuanin, ténai, itopi.

²⁵ —Ahuën. Oshahuanama. Co ina nitotérahuë'. Nipurihuë', anoyerayatérinco. I'hua co manta' quënantopirahuë', nani noya ni'térahuë. Inaíchin nitotérahuë, itérin.

²⁶ —¿Ma'ta' onpotahuaténquëni'quëhuarë', anoyerayatérinquëni'quëhuarë? itaantapi.

²⁷ —Nani sha'huitopiranquëmahuë', co yanatéraramacohuë'. ¿Onpoatomata' naquëranchin yanatantaramaco? ¿Canpitanta' Quisoso yaimarama' ti? itérin.

28 Napohuachina, chiníquën no'huipi.

—Quëmari imasaran. Co quiyaso' nohuantëraihuë'. Moisësë imarai. **29** Yosëri iráca Moisësë nontérin. Quisososo nipurinhue' intohua quéranso' huë'mara. Co nitotëraihuë', itopi.

30 —¡Ma'pitacha tënama paya! Intohuaransona huë'ninso canpitaso co nitotopiramahuë', caso' anoyerayatérinco. **31** Oshahuano'sari Yosë nontohuachina, co natantanhuë', co catahuaninhue'. Nipurinhue', Yosë chinotohuatëhua', noya natëhuatëhua', natanaarinpoa'. Ina nitotérëhua'. **32** Somaraya hua'huatochuachina, co onporonta' anoyerayatochinpihuë'. **33** Co Yosë quëran o'marinhuë' naporini, co anoyerayachitocahuë', tënahuë, itérin.

34 —Quëmaso' hua'huatapon quëran huarë' oshahuanaponahuë', ¿yaa'chintërancoi ti? itopi. Ina quëran ocoirahuatona', a'papi huachi.

Somaraya pochin nipo'

35 Hua'ano'sari ocoirinso' natantahuaton, Quisososo pa'nin yonípon. Quënanconahuaton, itérin:

—Quëmapi Yosë quëran o'marinso' ¿natëran ti? itérin.

36 —¿Inta' Sinioro inaso'? Yanatëpirahuë', itérin.

37 —Nani ni'nanco. Ca mini, nontaranquënso', itérin.

38 —Natëranquën Sinioro, itahuaton, isonin quëran Quisososo chinotérin.

39 Napotohuachina, Quisosori itérin:

—Isoro'paqué o'marahue' piyapi'sa' no'tëquën sha'huita'huaso marë'. Somarayaro'sa nipesopita anoyerayatarahuë. Napoapponahuë': "Quiyaso noya ni'tërai topisopitaso', asomarayatë pochin nitarahuë," itérin.

40 A'naquën parisioro'sa' inaquë huanirahuatona', Quisososo natanapi.

—¿Napoahuarë quiyanta somarayacoi? itopi.

41 —Somarayanquëma naporini, co oshahuantomahuë'. Nipurinhue', "co quiyaso somarayacoihuë", tënamaso marë' oshahuanama'. Ina marë' Yosë ana'intarinquëma', itérin.

10

Ohuicaro'sa pochin nininso'

1 Ina quëran Quisosori a'chintaantarin.

—Ohuicaro'sa naporin quëran a'chinchinquëma' natanco'. Ohuicaro'sa' a'paicaiso marë' pairapipi. A'naíchin ya'coana ya'huërin. A'naquën huëcaton, co ya'coana quëran ya'conihuë'. Nanpërahuate, ya'conin. Inaso' co hua'anënhue'. Ihuatë', matararo, inapita ina pochin ya'conpi ohuica ihuataciso marë'. **2** Hua'anënsa nipurinhue' ya'coana quëran ya'conahuaton, ohuicanënpita a'pairin. **3** Ina huë'pachina, ya'coana a'painapiri nohuitaton, i'soatérin. Ohuicanënpitarinta' natanahuatona', nohuianantopi. A'naya a'naya nininën pérappachina, co té'huatatonahuë', a'naroáchin huë'pi. Huë'pachinara, quëparin panpatëro' capacaiso marë'. **4** Ohuicanënpita quëpahuachina, quëchitërarin. Noninso' nohuianantatona', imapi huachi. **5** Nisha piyapiri yaquëpahuachina, co yaimapihuë'. Co noninso' nohuianantatonahuë', ta'anapipi, itérin Quisosori.

6 Iso pënënto nanan sha'huitopirihuë', co nitotopihuë'.

—¿Ma'ta' tapon naporin? itopi.

Quisososo' ohuica hua'anën pochin ninin

7 Napoaton itaantarin:

—Téhuëñchachin caso' ya'coana pochin ninahuë. Ohuica pairapipiquë yaya'conpatëra, ya'coana quëran ya'conë'. **8** Co'huara huë'shatërasocohuë', na'a piyapi'sa' a'chinpirlahuë', inapitaso' ihuatëro'sa pochin nipi. Anishacancantacaiso marë'

a'chimpi. Imarinacosopitaso nimirinhuë', co inapita natépihuë'. ⁹ Casáchin ya'coana pochin ninahuë. Ca quérán ya'conpatama', cha'ésarama'. Ohuicaro'sa' pipirahuatona', noya coshatopi. Ina quérán ya'coantapi. Inapochachin imarinacosopita noya pa'sapi.

¹⁰ Ihuatéro'sa' co noyahue' yonquipi. Ihuatacaiso', tēpatacaiso', ata'huantacaiso inapita nicacaisoráchin yonquipi. Caso nimirinhuë' o'marahuë imarinacosopita Yosë nohuitacaiso marë'. Noya noya nanopicaso marë' o'marahuë. ¹¹ Caso' ohuica hua'anën pochin ninahuë. Imarinacosopita noya a'pairahuë. Hua'anën noya nipauchina, ohuicanénpita a'paíton, co chiminacaso' tē'huatérinhuë'. Inapochachin canta' imarinacosopita marë' chiminarahue. ¹² Inpriatoso nimirinhuë', pa'pini' huë'pachina, ohuicaro'sa' ta'ananpirin. Pa'piniri a'nara' macaso', ya'ipi ohuicaro'sa' yanquéëpi. Inpriatoso' co hua'anénhue' ni'ton, co ohuicaro'sa' pa'poyatérinhuë'. ¹³ Canacaso maréáchin sacatérin ni'ton, co inapita yonquiatonhuë', ta'ananpirin.

¹⁴ Caso nimirinhuë' noya hua'anën pochin ninahuë. Imarinacosopita nohuitérahuë. Canta' nohuitérinaco. ¹⁵ Tatahuére'co ninohuitéraiso pochin nohuitérahuë. Nosoroato, inapita marë' chiminarahue. ¹⁶ A'napita piyapi'santa' oshaquérán imasarinaco. Nisha piyapiro'sa' niponaraihuë', yaimarinaco. Inapitanta' nohuantérahuë imainacosó marë'. Achintacaso' ya'huérin. Nanaméhuë natanpachina', natéarinaco. Ya'ipi imarinacosopita a'na huéntoínchin nisapi. Carisachin hua'anéntarahuë.

¹⁷ Imarinacosopita yonquiato, caso' chiminarahue' noya noya nanopianta'huaso marë'. Napoaton Tatahué nosororinco. ¹⁸ Caora nohuanto, imarinacosopita marë' chiminarahue. Co nohuantérahuë' naporini, co tēpainacosó' nanichitonahuë'. Tatahué sha'huitérinco ni'ton, chima'huaso' nohuantérahuë. Ina nohuanton, nanopiantararahuë huachi, itérin.

¹⁹ Ina natanahuatona', cotioro'sa' nisha nisha yonquipi.

²⁰ —Sopairi nani ya'coancantérin ni'ton, hua'yantérin. ¿Ma'marëta natanama'? topi a'naquén.

²¹ A'naquéniso nimirinhuë' noya natanpi.

—Co sopairi ya'coancantérinhuë'. Noya a'chintérinpoa'. Hua'yantona'piso' co ina pochin noninhuë'. ¿Sopainta' ta'ma' somaraya anoyerayatacaso' nanichitonhuë' ti? topi.

Cotioro'sa' co Quisoso nohuantopisohue'

²² Ina quérán a'na cotio niyontonpiso tahuéri naniantarin. Naporo' Yosë chinotopiso' pëi' iráca anoyerataantapiso' yonquiatona', "Yosparinquén Siniro," itopi. Ina marë' na'a piyapi'sa' Quirosarinqué pa'sapi. Quisosonta' Yosë chinotopiso' pëiqué pa'nin. O'napi tahuéri ni'ton, ²³ ishpanamén pochin nininqué pa'sarin, inaso "ishpana, Saromon ishpananén," itopi nohuitatona'. ²⁴ Na'a cotioro'sa' canquirahuatona', Quisoso ahuan-canapipi.

—Na'aro' natanpirainquénhue', ¿onporo huarëta' sha'huitaponco? Quëmaso' Criston-quén nipatan, no'téquén sha'huitocoititochii, itopi.

²⁵ —Nani sha'huitopiranquémahuë', co yanatéraramacohue'. "Tata Yosë chachin catahuarinco," ta'to, sacai' nininso' ninahuë canpita nohuitamacoso marë'.

²⁶ Nimirinhuë', canpitaso' co ohuicanéhuë pochin ninamahuë' ni'ton, co natéramacohue'.

²⁷ Caso' ohuica pë'tahuana'pi pochin ninahuë. Imarinacosopita ohuicanéhuëpita pochin ni'nahuë. Nohuitérahuë. Noya nataninaco. Nontohuatéra, natétonaco, imarinaco. ²⁸ Ca nohuanto, nanopimiatapi. Co parisitopiqué pa'sapihuë'. Noya a'pairahuë. Co insonta' osérëtarinacohue'. ²⁹ Tata Yosë nohuanton, imarinaco. Inaso' chini chiniquén nanantérin. Co insonta' nanitérinhuë' Yosë quérán osérëcaiso'. ³⁰ Caso Tatahuére'co napopináchin cancantérahuë, itérin Quisosori.

³¹ Ina natanahuatona', naquéranchin na'piro'sa' maantapi. Tēpacaiso marë' maantapirinhuë', ³² Quisosori itaantarin:

—Tata Yosë sha'huitérinco ni'ton, na'a piyapi'sa' anoyatérahuë: ¿Insota anoyatérahuëso marë' na'piquë yatéparamaco? itérin.

³³—Co ina marë' na'piquë yatéparainquënhuë'. Yosë pinoranso marë' napotarainquën. Quëmaso' piyapinquën naponahuë', "Caso' Yosëco," toconan. Ina pochin nonan ni'ton, Yosë yaya'huérétérän, itopi.

³⁴ Napotohuachinara, itantarín:

—Yosë pénentérinso' quiricaqué nani ninshitopi: "Canpitaso' a'naya a'nayanquëma' Yosë pochin ninama'," ténins'o' nontérama'. ³⁵ Yoséri chachin hua'ano'sa' acorinso' yonquiaton, napotérin. Ya'ipi Yosë quiricanënso' no'téquën. Co pi'pisha téranta' non-pininhuë'. ³⁶ Tata Yosë chachin acorinco nanamën a'china'huaso marë'. Ina marë' isoro'paqué a'paimarinco. "Caso' Yosë hui'ninco," topatéra, ¿onpoatonta' ina marë' pinoramaco? ténahuë. ³⁷ Co tatahuë pochin nipatochuë', ama natëcosohuë' ³⁸ Co yanatépiramacohuë', nani ma'sha Yosë pochin ninahuë ni'ton, natëco. Ina quëran nitotarama Tata Yosë pochachin ninahuëso'. Tata Yosënta' ca pochachin ninin, itérin.

³⁹ Ina natanahuatona', naquëranchin tashinan pëiquë po'mocaiso marë' yamaantapirinahuë', cha'érin.

⁴⁰ Ina quëran Cortanii' aquétérän paantarin. I'hua Coansha piyapi'sa' apointérinquë ya'huérarin. ⁴¹ Na'a piyapi'sa' ina nicapona' pa'pi. Ina ni'sahuatona', ninontopi.

—Coanshaso' co piyapi'sa' a'naroáchin anoyatopirinhuë', no'téquën sha'huitérinpoa'. "Quisoso' Yoséri a'paimarinso'," itohuachinpoara, no'téquën nonin, nitopi. ⁴² Na'a piyapi'sa' inaquë paatona', Quisoso natërapí.

11

Nasaro chimininso'

¹⁻² Pitaniaqué a'na cania'pi ya'huérin, Nasaro itopiso'. Cato' oshinpita ya'huétérin, Maria, Marta inapita itopiso'. Ina Maria a'na tahuëri Quisoso pa'morantérarin. Hua'sai' pa'ton nininsoqué pa'morantérahuaton, ainëñ quëran amirantérarin. Co'huara inapoyáterasohuë', yo'in chiníquën caniorin. ³ Caniohuachina, oshinpitari piyapi a'papi Quisoso sha'huitacaso marë':

—Nosororanso' Siniro, chiníquën caniorin. Huëcaton ni'quiquë', itérin.

⁴ Ina natanahuaton, ca'tano'sanënpita itapon:

—Téhuëñchachin yo'in chiníquën canioponahuë', co chiminacaso marë' caniorinhuë'. Noyatohuachin, na'a piyapi'sari nicatona', na'con na'con Yosë yonquiapi. "Ma noyacha Yosëso' ni'ton, anoyatérin paya," tosapi. Canta' ina hui'ninco ni'ton, noya ni'sarinaco. Ina marë' caniorin, itérin.

⁵ Nasaro, Marta, Maria, inapita pa'pi nosororin. ⁶ Napoaponahuë', Nasaro caniorinso' natantaponahuë', cato' tahuëri inaquë chachin i'huataantarin. ⁷ Ina quëran ca'tano'sanënpitacoitaponcoi:

—Huëco' iyaro'sa' Cotia parti paanta'ahua', itérincoi.

⁸ —I'huamiáchin Maistro, inaquë ya'huëpisopita tëpainenquëns'o marë' na'piquë yaté'yarapirinëñquënhuë', ¿inatohua chachin yapaantaran ti? itërai.

⁹ Napotohuatoira, Quisoso itaponcoi:

—Shonca cato' ora quëran i'huarin. Tahuëri iratohuatéra, co i'paréhuë'. Noya quënantatë', noya pa'në'. ¹⁰ Tashiso niperinhuë' iratohuatéra, i'parë'. Capa a'pininso' ni'ton, i'parë', itérincoi.

¹¹ Ina quëran itaantarincoi:

—Iya Nasaro huë'érin. Niperinhuë', paato ochinanconapo, itérincoi.

¹² —Huë'érin ni'quëhuarë' Siniro, noyatapon, itërai.

¹³ Topinan huë'érin, topiraihuë'. Nani chimininso' nitotaton, naporin. ¹⁴ Napoaton no'téquën sha'huitérincoi:

—Nasaro nani chiminin. ¹⁵ I'huara aquëtëran co paatorahuë', co anoyatërahuë'. Canpita na'con na'con natëamacoso marë' isëquë ninarahuë. Inaso' noya tënahuë. Iporaso nipurinhuë', huëco' inatohua' pa'ahua', itérincoi.

¹⁶ —Huëco' iyaro'sa' pa'ahua' campoanta' inarë'quënpoa' chiminacaso marë', itérincoi Tomasë, catopia'hua nininso'.

Quisosori ananpitaantacaso' yonquirinso'

¹⁷ Napotohuachincoira, Pitaniaquë pa'nai. Inaquë canconpiraihuë', nani Nasaro chiminin quënanconai. Nani catapini tahuëri na'pi naninquë ya'huërin. ¹⁸ Pitaniaso' Quirosarin ya'cariya ya'huërin. Cara quiromitro pochin aquërin. ¹⁹ Na'a cotioro'sa' nani huë'pi Marta, Maria, inapita achinicancanapona'. Yo'ina' chimininso marë' nontapi ama aquëtë' sëtacaiso marëhuë'. ²⁰ "Quisoso nani huë'sarin," topachinara, Marta pa'nin nacapiapon. Mariaso nipurinhuë' pëinënquë ya'huarin. ²¹ Quisoso nacapirahuaton, Martari itapon:

—I'huara Sinioro isëquë ya'huëran naporini, co yo'yohuë chimiintonhuë'. ²² Chiminpirinhuë', natëranquën Sinioro. Ma'sona Yosë nipatan, acotarinquën, tënahuë, itérin.

²³ —Yo'yoparin nanopiantararin, itérin Quisosori.

²⁴ —Nanpiantacaso tahuëri nanihuachin, nanopiantararin, nitotërahuë, tënin Marta.

²⁵ —Cari ananpitaantarahuë. Casáchin nanopicaso' quëtërahuë. Insopitasona natëhuachinaco, chiminaponaraihuë', nanopiantarapi. ²⁶ Natërinacosopita chimpachina', co parisitomiatapihuë'. Co onporonta' ta'huantapihuë'. No'tëquëñ nontaranquën. ¿Natëranco ti? itérin Quisosori.

²⁷ —Natëranquën mini Sinioro. Tëhuëñchachin quëmaso' Cristo. Yosë hui'ninquëñ. Isoro'paquë a'paimarinquëñso', itérin.

Quisoso na'nérinso'

²⁸ Ina tosahuaton, Marta pa'nin cain sha'huitapon. Canconahuaton, sacaro quëran sha'huitérin.

—Nani Maistro huë'nin. Yanontërinquëñ, itérin.

²⁹ Ina natanahuaton, Maria a'naroáchin huanirahuaton, nontapon pa'nin.

³⁰ Quisososo' co ninanoquë canshatërarinhuë'. Martari nacapirinquë quëparitérin.

³¹ Maria manorahuachina, cotioro'sa' huë'pisopitari ni'sapi. "Na'pi naninquë na'nëapon pa'samara," ta'tona' imapi.

³² Mariaso' Quisosoquë canconahuaton, nantëñ pirayan isonconin.

—I'huara Sinioro isëquë ya'huëran naporini, yo'yohuë co chimiintonhuë', itérin.

³³ Ina tosahuaton, na'nérárin. Cotioro'santa' na'nérápi. Ina ni'sahuaton, Quisoso chiníquëñ sëtaton, co napion cancantérin. ³⁴ —¿Insëquëta' po'mopi? itérin.

—Huëquë' Sinioro ni'quiquë', itopi.

³⁵ Quisosonta' na'nérin. ³⁶ Ina ni'sahuatona', cotioro'sa' nitapona':

—Ni'co'. Na'nérin anta'. Pa'pi nosororin inarinta', itopi.

³⁷ —Somaraya a'naroáchin anoyarayatérin ni'quëhuare', ¿ina nohuanton Nasaronta co chimiintonhuë' nimara ti? topi a'naquëñ.

Nasaro ananpitaantarino'

³⁸ Quisoso sëtaton, na'pi naninquë Nasaro po'mopiquë pa'nin. Pancara'pique' nani pa'copitopi.

³⁹ —Na'pi chi'huincaco', itérin Quisosori.

—Co', Sinioro. Nani anarotarin. Nani catapini tahuëritérin, itérin oshini, Marta itopiso'.

⁴⁰—Ama imoya ina pochin yonquiquësohuë'. Yosë ya'ipiya nanitaparin. Natëhuatanco, Yosë noya nininso' ni'saran, itérin. ⁴¹ Ina quëran na'pi chi'huincatopi. Quisoso inápaquë në'pétahuaton, Yosë nontérin:

—Nani Tata nontéranquën catahuancoso marë'. Natanatonco, catahuaranco mini. Ina marë' "Yosparinquën," itéranquën. ⁴² Nani tahuëri natanatonco, catahuaranco noya nica'huaso marë'. Quëma chachin isoro'paquë a'paimaranco. Caso' nitotopirahuë', isopitaso' co nitotopihuë'. Inapita natëinacoso marë' a'ninquëchin nontaranquën, ténin.

⁴³ Ina tosahuaton, chimipi chiníquën itapon:

—¡Iya Nasaro, pipirahuaton huëquë! itérin.

⁴⁴ Napotohuachina, chimipi nanopiantarahuatón, pipirin. Pa'on, imirin, inapita në'métérinquë ya'ipi so'pinpinan pipirin. Ya'pirionta' panioquë tonporayatopinan. Cotioro'sa' inachintopiso' ni'ton, ina pochin po'mopi.

—I'quiritoco' pa'in, itérin Quisosori. Napotohuachina, i'quiritopi.

Quisoso macacaiso marë' chinotopiso'

(*Mateo 26.1-5; Marcos 14.1-2; Lucas 22.1-2*)

⁴⁵ Cotioro'sa' huë'pisopitanta' ni'pi. Ananpitaantarinso' ni'sahuatona', na'a natëpi. "Tëhuëñchachin Yosëri catahuarin ni'ton, naporin," topi. ⁴⁶ A'naquënsö nimirinhuë' paa-tona', parisioro'sa' sha'huitonpi. ⁴⁷ Ina natanaahuatona', parisioro'sa', corto hua'ano'sa', inapita napopianáchin yonquiatona', ya'ipi cotio hua'ano'sa' ayontonpi ninontacaiso marë'.

—¿Ma'ta' onpotahua'? Ina quëmapi na'a piyapi'sa' a'naroáchin anoyatarin. Iporanta' a'na piyapi chiminpirinhuë', ananpitaantarin. "Yosëri chachin catahuarin," topi. ⁴⁸ Tananpitohuatéhua', ya'ipi piyapi'sari natérapi. Napohuachina', Noma copirno no'huitaton, sontaro'sa' a'paiarin. Huë'pachina', Yosë chinotéréhuaso pëi' ohuatahuitona', ya'ipi cotioro'sanpoa' ata'huantarínënpoa' nimara, nitopi.

⁴⁹ Ina quëran a'na corto hua'an Caihuasë itopisoari nontérin. Naporo pi'iquë inaso', chini chiníquën nanantérin. Inaso huanirahuaton, tapon:

—Canpitaso' co manta' nitotérámahuë'. ⁵⁰ Chiminacaso' ya'huërin, ténahuë. Ama ya'ipinpoa' chiminacaso marëhuë' ina chimi'in. Ina noya noya canpoa marë', itérin.

⁵¹ Napoaponahuë', co inaora yonquinëñ quëran naporinhuë'. Corto hua'an ni'ton, Yosë nohuanton, ninorin. Tëhuëñchachin Quisoso cotioro'sa marë' chiminarin.

⁵² Nimirinhuë', co cotioro'sa marëáchin chiminarinhuë'. Ya'ipi piyapi'sa' ya'huërenamëñ chiminarin. Natëhuachina', Yosëri hui'ninpita pochin ni'sarin. A'naquënsö aquë ya'huëpirinahuë', imapachina', a'na huëntoíchin pochin nisapi. ⁵³ Naporo tahuëri quëran huarë' cotio hua'ano'sa' yonquipi Quisoso tëpacaiso marë'.

⁵⁴ Napoaton Quisoso co huachi nohuantérinhuë' a'ninquëchin cotio ninanoro'saque paacaso'. Inotëro parti pirayan paaton, Iprainquë yacapatarin. Inaquë ca'tano'sanënpitacointa' yacapatonai.

⁵⁵ Pascoa tahuëri naniriahuchina, na'a piyapi'sa' Quirosarinquë pa'pi. Co'huara Pascoa naniyátérasohuë', Yosë chinotopiso pëiquë pa'pi. "Moisësë camaitérinsö' nipayéhuë', Yosë noya ni'sarinpoa'", ta'tona', pa'pi. ⁵⁶ Inatohua' pa'sahuatona', Quisoso yonisápi. Chinotopiso pëiquë ya'conahuatona', ninontápi.

—Pascoa na'huëcaso marë' ¿Quisoso huëcapon to? topi a'naquënsö.

⁵⁷ Corto hua'ano'sa', parisioro'sa', inapitaso' nani piyapi'sa' sha'huitopi: "Quisoso quënanpatama', sha'huitocoi maii," itopi. Tashinan pëiquë po'mocaiso marë' napotopi.

¹ Saota tahuëri pahuanarin Pascoa nanicaso'. Naporor' Quisoso Pitaniaquë paantarin. Inaquë Nasaro ya'huërin, ananpitaantarins'. ² Inaquë canconpatëira, ya'huëhuano'sa' amatérinacoi ca'pata'huaiso marë'. Quisoso nosoroatona', napopi. Martaso' cosharo' o'huinarin. Nasaronta' inaquë coshatarin. ³ Naporor' Mariaso' a'na potiria pa'ton hua'sai' ya'huërinquë manin. Inaquë Quisoso nantëquën pashirantëterin. Ina quëran ainëñ quëran amirantërin. Ya'ipi pëi' pimoanahuanin. ⁴ Cotasë Iscariotiso nimirinhue', co noyahuë' ni'nin. Inaso' Quisoso ca'tanaponahuë', yasha'uirapirin.

⁵ —¿Onpoatonta' iso hua'sai' chiniarin? Pa'anin naporini, cara pasa tahuëri sacatëreso marë' canarëso pochin coriqui canaitonhuë'. Sa'ahuaros'anta' quëchitonhuë', ténin Cotasë.

⁶ Nimirinhue', co sa'ahuaros'sa' yonquiaton nimirinhue'. Yaihuataton, naporin. Inari chachin coriqui tanpanantë' a'pairin ni'ton, pi'pian pi'pian ihuatarin. ⁷ Napopirinhue', Quisosori itërin:

—Iso sanapi tananpitëquë'. Noya napotarinc. Chimina'huaso' yonquiaton, pashirantëterinco pa'pitinacosu marë'. ⁸ Nani tahuëri sa'ahuaros'asa' ya'huërarin. Caso nimirinhue', co isëquë ya'huëmiatarahuë', itërin.

Nasaronta'yatëpapiso'

⁹ Quisoso Pitaniaquë ya'huëaso', na'a cotioro'sa' natantopi. Ina natantahuatona', huë'pi Quisoso nicapona'. Nasaronta' yani'pi. Quisosori ananpitaantarins' ni'ton, yani'pi. ¹⁰⁻¹¹ Ananpitaantarins' marë' na'aya'pi co huachi cotio hua'ano'sa' yanatëpihuë'. Inapita a'porahuatona', Quisoso imasapi. Napoaton hua'ano'sari yonquipi Nasaronta' tēpacaiso marë'.

Quirosarinquë canconinso'

(Mateo 21.1-11; Marcos 11.1-11; Lucas 19.28-40)

¹² Hua'huayátérahuë piyapi'sa' Quirosarinquë pa'sapi. Pascoa na'huëcaiso marë' inatohua' pa'sapi. Tahuëririnquë Quisosonta' inatohua chachin pa'sarin. Ina natantahuatona', ¹³ mérëmë pochin nininso' mapi. Ina quëran nacapiapona' pa'sapi. Pa'yatatona', chiníquen itapona':

—¡Nichá'ëcoi Tata Yosë! ¡Ma noyacha Quisososo paya! ¡Quëmari chachin chiníquen nanan quëtérän! ¡Quëma nohuanton, israiro'sacoi hua'anëntarinco! tosapi.

¹⁴ Mora quënanconahuaton, ina aipi Quisoso huënsérin. Iráca Yosë quiricanënquë, pënëntona'pi ninshitërin Quirosarinquë ya'huëpisopita nitotacaiso marë'.

¹⁵ “Quirosarinquë ya'huëramasopita, ama pa'yancosohue'.

Ni'co'. Hua'anëma' huë'sarin. Mora hui'napishin aipi huënsëriarin.

Inaquë ya'mitahuatón huë'sarin,” ténin ninshitaton.

¹⁶ Yosë quiricanën quëran ninorin. Ca'tano'sanënpitacoiso nimirinhue', co ina yonquiraihuë'. Quisoso nanopiantahuachina, naporor' huarë' yonquirai. “Mora aipi chachin huënsërahuaton, Quirosarinquë huë'nin,” ténai.

¹⁷ Nasaro ananpitaantarins' ni'pisopita sha'uirápi. “Téhuëñchachin chiminpirinhuë', catapini tahuëri quëran Quisosori ananpitaantarins'. Po'mopi quëran përarin quiyari ni'nai,” tosapi. ¹⁸ Ina marë' notohuaros' piyapi'sa' Quisoso nacapiapona' pa'pi.

¹⁹ Natanahuatona', parisioro'sa' ninontopi.

—Topinan quëran pënënpiréhuahuë', co piyapi'sa' pi'pisha téranta' natérinënpoahuë'. ¡Ni'cochi! ¡Na'con na'con piyapi'sa' Quisoso imasapi! nitopi ninontatona'.

Cricoro'sari Quisoso yanontopiso'

²⁰ A'naquën Crico piyapi'santa' Quirosarinquë huë'pi. Nisha piyapi nimonahuë', Yosë yonquiapi anta'. Niyontonpiso tahuëri ni'ton, Yosë chinotacaiso marë' huë'pi.

²¹ Quisoso yanohuitatona', Pinipi nontiipi. Pinipiso' Pitsaitaquë ya'huërin, Cariria parti ya'huërinso'.

—Quiyanta' iyasha Quisoso yanohuitopiraihuë', itopi.

²² Ina natanahuaton, Antërisë sha'huitonin. Naporahuaton, cato chachin paatona', Quisoso sha'huitonpi. ²³ Natanahuaton, itérin:

—Noya iyaro'sapa'. Nani tahuëri nanirin huachi. Yosë quëran quëmapico ni'to, chiminapo. Ina quëran na'a piyapi'sa' noya ni'sarinaco. ²⁴ No'tequën sha'huitéranquëma'. Tricoraya pochin ninin. Co sha'patérahuë', co na'arinhue'. A'naíchin nisárin. Napoaponahuë', sha'patéra, chiminin pochin niponahuë', papotohuachina, na'a nitérin. ²⁵ Canpitanta' isoro'paquë ya'huërinsopitaráchin yonquihuatama', topinan quëran nanoparama'. Nipirinhue', Yosë na'con na'con yonquihuatama', ina nohuitatoma' noya nisarama'. Canpitaora nohuantéraramasoáchin naniantohuatama', a'na tahuëri inápaquë nanopimiatontarama'. ²⁶ Nohuantérahuëso' yanipatama', ca pochin cancantatoma' imaco. Inséquësona pa'pato, piyapinëhuëpita imasarinaco. Inquëma téranta' ca marë' sacatohuatama', Yosë noya ni'sarinquëma', itérin Quisosori.

Chiminacaso' ninorinso'

²⁷ Ina quëran itaantarín: "Iporaso' sëtochinachin cancantérahuë. ¿Ma'ta' Yosë ichi? ténahuë, yonquiato. Co parisita'huaso' nohuantopirahuë', 'Catahuaco Tata ama parisichisohue', co itarahuë'. Chimina'huaso marë' o'marahue," itahuaton, Yosë itapon: ²⁸ "Catahuaco Tata nohuantéranso nii. Ina quëran piyapi'sa' nöya ni'sarinënquën," itérin, Yosë nontaton. Itohuachina, inápa quëran Yoséri itérin: "Nani catahuaranquën. Nohuantérahuëso ninan ni'ton, piyapi'sa' nöya ni'ninaco. Iporaso' catahuaantaranquën nohuantérahuëso nicacaso marë'. Napoaton noya noya ni'sarinaco," itérin Yoséri.

²⁹ Piyapi'sa' natanahuatona', ninontopi. "Huirátarin," topi a'naquën.

—Co huirahuë'. Anquëniri nontérin nimara, topi a'naquëonta'.

³⁰ Napohuachinara, Quisosori itérin:

—Co ca marë' inápa quëran nontérincohuë'. Canpita natëamacoso marë' nontérinco, natanama'. ³¹ Iporaso' co natëpisopitahuë' no'huarinaco ni'ton, ana'intacaso' ya'huërin huachi. Hua'qui' sopairi piyapi'sa' camaipirinhue', cari minsërahuato, ocoiarahuë. ³² Co hua'quiya quëranhuë' inápaquë achinpiarinaco. Ina quëran nisha nisha piyapi'sa' imasarinaco, itérin.

³³ "Coroséquë chachin chiminapo," tapon naporin. ³⁴ Ina quëran nataninsopitari itapona':

—Cristo nanopimiatarin. Co onporonta' chimianinhue', ténai. Yosë quiricanënquë naporin, nontérain. Quëmaso nimirinhue' nisha nonan. "Yosë quëran quëmapico naporahuë', inápaquë achinpiarinaco," ténan. ¿Onpoatonta' naporan? ¿Ma quëmapinquënta' quëmaso'? itopi.

³⁵ —Iporáchin tahuëri pochin a'pintaranquëma'. Co huachi hua'qui' ya'huapohue'. A'piniso pochin no'tequën anitotéranchue'. Anitotohuaténquëma', noya nico'. Ni'cona tashinan pochin cancantotama'. Tashinanquë iratohuatéra, chihuëre'. ³⁶ Carinquëma' a'pintaranquëma'. Co'huara pa'shantatérasocohue', natëco. Natëhuatamaco, canpitanta' tahuëri pochin cancantarama', itérin.

Ina tosahuaton, pa'nin. Co huachi a'ninquëchin iratérinhue'.

Tanshirëso pochin cancantopisopita

³⁷ Nani na'a piyapi'sa' a'naroáchin anoyatérin. Cosharo' ana'atérin. Yosë pochin nininso' nicaponaraihuë', co yanatëpihuë'. ³⁸ Iráca Isaiasë pënëntaton, tapon: "Nani a'chintopiraihuë', Siniro. Quëma nohuanton, sacai' nininso' nani a'notopiraihuë'.

Na'con na'con piyapi'sa' co natërapihuë', ténin.

³⁹ No'tequën ninorin. Napoaton co nanitopihuë' natëtacaiso'. Isaiasë chachin itantarín:

⁴⁰ "Yoséri tananpitérin ni'ton, tanshirëso pochin cancantatona',

co natëtochináchinhüë' cancantopi.
 Hua'qui' co yanatëpihuë' ni'ton, napotérin.
 Noya ni'pi naporini, quënanchitonahuë'.
 Noya natanpi naporini, natëchitonahuë'.
 Imarinaco naporini, anoyacancanchitohuë', ténin.

⁴¹ Iráca co'huara Quisoso isoro'paquë huë'shamátérasohuë', Isaiasëri hua'narëso pochin quëninan. Quisososo' Yosë pochachin nóya ni'ton, ina yonquiaiton, naporin.

⁴² Napoaponahuë', na'amiachin cotioro'sa' hua'ano'sanënpitarë chachin natëpi. Napopirinahuë', parisioro'sa' të'huatatona', co a'ninquëchin sha'huipihuë'. "Niyonton-piso pëiro'sa quëran ocoihuachinënpoa'", ta'tona', ta'tápi. ⁴³ Yosëáchin pa'yatacaiso nipurinhuë', piyapi'sari pa'yatacaiso' na'con na'con nohuantatona napopi.

Co Quisoso a'chininso' natëhuachinahuë', ana'intacaso' ya'huërinso'

⁴⁴ Ina quëran Quisosori chiníquën nonaton, a'chintantarín ya'ipiya natanacaiso marë'. "No'tequën a'chintéranguëma'. Natëhuatamaco, co casáchin natëaramacohuë'. Tata Yosënta' natëarama anta'. Ina a'paimarincó. ⁴⁵ Ca nohuitohuatamaco, Yosënta' nohuitarama'. ⁴⁶ Carinquëma' a'pintéranguëma'. Imapatamaco, co tashinan pochin cancantaramahuë'. Tahuëri pochin cancantarama'. Ina marë' isoro'paquë o'marahuë.

⁴⁷ A'naquëma' natanpiramacohuë', co natëramacohuë'. Co natëhuatamacohuë', co carima' ana'intaranquémahuë'. Co ina marë' o'marahuë'. Piyapi'sa' nicha'ëca'huaso marë' o'marahuë. ⁴⁸ Co nohuantohuatamacohuë', a'chintéranguëmasonta' co natëhuatamahuë', canpitaora tëhuëñémaquë nina'intarama'. Nonahuëso chachin co natëramahuë' ni'ton, ayaro' tahuëri na'intarinquëma'. ⁴⁹ Co caora yonquinëhuë quëran a'chinahuë'. Tata Yosë sha'huitérinco nani ma'sha a'china'huaso'. ⁵⁰ Yosë a'chininso' imapatama', ina nohuitatoma' nanopimiatarama huachi, ténahuë. Sha'huitohuachincora, inachachin carinquëmanta' sha'huitaranquëma', itérin.

13

Quisosori ca'tano'sanënpita pa'morantérinso'

¹ A'na tahuëríchin pahuanarin Pascoa nanicaso'. Naporó' naniarin Quisoso chiminton, Tata Yosë'pa' panantacaso'. Ina nitotérin. Ca'tano'sanënpitacoí na'con nosororincoí. Chiminaquë huarë' nosoromiatérincoí.

² Inaro'coí coshatarai. Sopai hua'ani nani Cotasë ayonquirin Quisoso sha'huirapicaso marë'. Simon Iscarioti hui'nin inaso'. ³ Quisososo nipurinhuë' ya'ipi nitotérin. Yosë ya'huërin quëran nani o'marin. Co hua'quiya quëranhuë' naquëranchin inatohua' panatararin. Tata Yosëri chini chiníquën nanan quëtérin ya'ipiya hua'anëntacaso marë'. Inanta' nitotaton, coshatasocoí, ⁴ Quisoso misa quëran huanirin. Aipi a'morinso' ocoirahuaton, paniocara masahuaton, niso'nantérin. ⁵ Ina quëran i'sha panticaquë oporahuaton, nantëhuëi pa'morantéra'piarincoí. A'naya a'naya pa'morantéatoncoí, paniocaraquë amirantérincoí.

⁶ Simon Pitronta' yapa'morantëpirinhuë', co nohuantérinhuë'.

—Quëma Sinioro, ¿yapa'morantéranco ti? itérin.

⁷ —Ma'marësona napotaranquënsó', co ipora nitochátéraranhuë'. Oshaquëran nitotaran, itérin.

⁸ —Co onporonta' caso' pa'morantëarancohuë', itérin Pitrori.

—Co napotohuatënquënhuë', co ca pochin cancantaton imamiatarancohuë', itérin Quisosori.

⁹ —Napoahuarë', ama Sinioro nantëhuërachin pa'motocosohuë'. Imirahuë, motohuë, inapitanta' ya'ipi pa'motoco, itérin.

¹⁰ —Co ina nohuantéréhuë'. Nani amahuatéra, co huachi në'huëtéréhuë'. Nantëichin pa'morë'. Inapochachin nani anoyacancantéraranquëma'. Ina piquëran co noyahuë'

nipatama', inanta' inquitaantaranquëma'. Ina quëran noya cancantaantarama'. Canpitaso' noyápiachin cancantërama'. A'naichinquëma' co noyápiachin cancantérinhue', itérin.

¹¹ Cotasëri yasha'huirapirinso' ninoton, naporin. Napoaton "A'naichinquëma' co noyápiachin cancantérinhue'," ténin.

¹² Nani ya'ipicoi pa'morantëra'piatoncoi, a'moantarahuatón, huënsëantarín. Huënsëantarahuatón, a'chintérincoi.

—Ma'ta' tapo napotéranchue' iyaro'sa', ¿nitotërama' to? Ina a'chinchingue'.

¹³ Canpitaso' nontohuatamacora, "Maistro" itéraramaco. "Siniro" itéraramaco anta'. No'tequën yonquiatoma', napotéraramaco. Campita maistrónëmaco mini. Siniroco ni'to, natëramaco. ¹⁴ Campita maistrónëmaco naporahuë', pa'morantéranchue'. Napoaton campita capininta' ina pochachin cancantoco'. ¹⁵ Nani pa'morantéranchue' nonanamacoso marë'. Campitanta' ca pochin cancantatoma', ninosoroatoma' nicatahuaco'. ¹⁶ Téhuëñchachin iyaro'sa' patronso' chiniquën nanantérin. Piyapinënpitaso nimirinhue' co ina pochin chiniquën nanantopihuë'. Comisionëonta' co hua'anën pochin chiniquën nanantérinhue'. ¹⁷ Nani nitotërama' ipora. Ca pochin nipatama', noya cancantaarama'.

¹⁸ "Co ya'ipinguëma' noya cancantéraramahuë'. Shonca catoya'pingue' huayonanquëma' ca'tanamacoso marë'. Ya'ipinguëma' noyá nohuitéranchue'. Yosë quiricanenquë iráca naporin: 'A'nara' carë' coshataponahuë', inimicotarinco,' ténin. Ipora huarë' ina pochin nisarin. ¹⁹ Apira nitotato, sha'huitéranchue'. Ma'sha onpoto-huachinaco, yonquarama'. 'Inaso' téhuëñchachin Cristo ni'ton, ninorin,' tosarama'. ²⁰ No'tequën sha'huitéranchue'. Caringuëma' a'paranquëma' piyapi'sa' a'chintacamaso marë'. Natëhuachinënquëma', natëarinaco canta'. A'paranquëma' ni'ton, natëinënquëma'. Insosona natëhuachinco, Yosënta' natëarin. Ina a'paimarinco," itérincoi.

Cotasëri sha'huirapicaso' ninorinso'

(Mateo 26.20-25; Marcos 14.17-21; Lucas 22.21-23)

²¹ Naporó' Quisoso sétérin. Chiniquën sétaton, co napion cancantérin.

—No'tequën sha'huitéranchue'. Shonca catonquëma' ca'tanpiramacohue', a'nayanquëma' sha'huirapiarinco, itérincoi.

²² Ina natanahuatoi, a'naya a'nayacoi nini'nai. "¿Inquenpoacha yasha'huirapiréhu' nicaya?" ténai, yonquatoi. ²³ Caso' Quisoso inchinanën quëran coshatérahuë. Na'con nosororinco ni'ton, inaporahuë. ²⁴ Simon Pitro imirin quëran tasatahuatonco, "nataniquë": ¿Incarita' sha'huirapiarin?" itérinco. ²⁵ Napotohuachincora, amasha ya'carirahuato, natanahuë.

—¿Inta' Siniro yasha'huirapirinque' itérahuë.

²⁶ —Iso pan, nocaroquë i'shirahuato quëtarahuë. Insosona quëtohuato, ina sha'huirapiarinco, itérinco. Ina quëran i'shirahuaton, Cotasë quëtérin. Simon Iscarioti hui'nin inaso'. ²⁷ Ina ma'pahuachina, sopairi ya'coancantérin huachi. Naporó' Quisosori itapon:

—Ma'sona yaninanso' manóton niquë', itérin.

²⁸ Napotérinso' natanpiraihuë', ma'marësona napotérinso' co nitotëraihiue'. ²⁹ Cotasëri coriqui tanpanantë' a'pairin ni'ton, ma'sha pita tahuëri marë' pa'anapon a'pamara, topirinahuë' a'naquën. Sa'ahuaros'a' coriqui quëtacaso marë' a'pamara, topirinahuë' a'naquëonta'. ³⁰ Cotasëso nimirinhue', cosharo' quëtérinso' ma'parahuaton, pipirin. Naporó' nani tashirin.

Nasha pochin ninosorocaso' pënëninso'

³¹ Cotasë nani pipihuachina, Quisoso itantarincoi:

—Yosë quëran quëmapico ni'to, apira no'tequën Yosë natëarahuë. Napoaton noya ni'sarinco. Piyapi'sa' ni'pachinaco: "Ma noyacha Yosëso' ni'ton, na'con catahuarin

paya," tosapi. ³² Ina hui'ninco chachin ni'ton, piyapi'sa' nitotatona', na'con na'con Yosë yonquiapi. Ina quëran Yosë noya noya acoantarinco. Co hua'quiya quëranhuë' inapotar-inco. ³³ Hui'nahuepita pochin ni'piranquëmahuë', co huachi hua'qui' ya'huapohue'. Yonípiramacohue', intohuaso' pa'nahuequë', co nanitaramahuë' pacacamaso'. I'hua in-achachin cotioro'santa' sha'huiterahue. ³⁴ Iporaso' nasha pochin pënénaranquëma' noya ninosorocamaso marë'. Carinquëma nosororanquëmaso pochachin, imaramacosopita capininta' ninosoroco'. ³⁵ Ninosorohuatama', têhuëncachin imaramacoso' nitotapi. "Quisoso imatona', noya noya ninosoroapi," tosapi, itérin.

Pitrori nonpinapicaso' ninorinso'

(Mateo 26.31-35; Marcos 14.27-31; Lucas 22.31-34)

³⁶ Ina quëran Simon Pitrori itapon:

—¿Intohuata' Siniro pa'saran? itérin.

—Intohuaso' pa'pato, co ipora nanitëranhuë' imaancoso'. A'na tahuëri imasaranco, itérin. ³⁷ —¿Onpoatonta' Siniro co apira nanitërahuë' ima'huanquënso'? ¡Imaranquën ni'ton, yatëpapirinacohue', imamiataranquën! itérin.

³⁸ —Yatëpapirinënquënhue', ¿imamiataranco ti? No'tequën sha'huitaranquën. Ipora tashi chachin co'huara atari pérashatërasohue', cararo' nonpinapiaranco. "Co Quisoso nohuiterahue," tosaran, itérin Quisosori.

14

Quisoso ira pochin nininso'

¹ Ina quëran a'chintaantarín: "Ama pa'yancosohue'. Ama sëtocosohue'. Yosë natëco'. Canta' natëco. 'Co naniantarincoihue', ta'toma', nani tahuëri natëco.

² Tatahuë ya'huérinquë na'a pëi' ya'huérin. Co ya'huérinhue' naporini, nani sha'huichitënquëmahuë'. Inatohua' panantarahue canpita ya'huécamaso marë' tapachinquëma'. ³ Inatohua' pa'pato, tapatontahuatënquëma', o'mantararahuë. O'mantahuato, maquimaranquëma'. Carë'quëma' ya'huapoma'. Ina marë' o'mantararahuë. ⁴ Intohuasona pa'sarahue'so' nitotërama'. Iranta' nani nohuitërama', itérin.

⁵ —¿Intohuata' Siniro pa'saranso? Co nitotëraihuë'. ¿Onporahuatoita' ira nohuichii? itérin Tomasëri.

⁶ —Ca ira pochinco. Ya'ipiya no'tequën a'chintëranquëma'. Casáchin nanopicaso' quëteranquëma'. Imaramacosopitarachin Yosë'pa' cancontarama'. ⁷ Nohuitohuatamaco, Tatahuënta' nohuitarama'. Ipora quëran huarë' ina nohuitarama'. Nani ni'nama', itérincoi.

⁸ —Tata a'notocoi ni'ii. Ina ni'patoi, nónya cancantarai huachi, itopirinhue' Pinipiri.

⁹ —Isonápo' pi'ipi iyasha, capitano'co ya'huëpirahuë', ¿co nohuichatërarancuhue' ti? Ni'patamaco, tatahuënta' ni'nama'. ¿Onpoatonta' nipachin, "Tata a'notocoi ni'ii," itérando?

¹⁰ Caso Tata Yosë pochachin ninahuë. Tata Yosënta' ca pochachin ninin. ¿Co ina iyasha, natëyatëraranhue' ti? A'chintohuatënquëmara, co caora yonquinëhuë quëran a'chinahuë'. Yosë yonquirinso chachin yonquiato, a'chintaranquëma'. Ina nohuanton, nani ma'sha nanitaparahuë. ¹¹ Caso Tatahuë pochinco. Inanta' ca pochachin ninin. Napoaton ya'ipinquëma' natëco. Naporahuaton, nani ma'sha nanitaparahuë'so' yonquiatoma', natëco, itérincoi.

¹² —Natanco' iyaro'sa' no'tequën sha'huitaranquëma'. Têhuëncachin imapatamaco, ca pochin nisarama'. Tata Yosë ya'huérin'pa' panantarahue ni'ton, saca sacai' nininsonta' nanitapaarama'. ¹³ Ca pochin yonquihuatama', nanan quëchinquëma' Tatahuë nontacamaso marë'. "Hui'nan chachin nanan quëterinco," ta'toma', ina nontoco'. Ca pochin cancantatoma', ma'sona nipatamaco acotaranquëma'. A'napitanta' Tata Yosë noya noya

nicacaiso marë' inapoarahuë. Ina na'con nohuantërahuë. ¹⁴ Ca pochin yonquiatoma', ma'sona nipatamaco acotaranquëma'.

Ispirito Santo a'patimarinpoaso'

¹⁵ Ina quëran taantarín: "Nani pënénanquëma'. Nosorohuatamaco, natëaramaco. ¹⁶ Inápaquë panantahuato, Tata nontarahuë Ispirito Santo a'patimarinquëma'. Inaso ca pochachin catahuarinquëma', achinicancanarinquëma'. Co onporonta' patarin-quëmahuë". ¹⁷ Ispirito Santoso' no'tequenáchin nonin ni'ton, Yosë nanamën no'tequen anitotarinquëma'. Co imarinacosopitasohuë' nimirinhuë' co ina natépihuë'. Napoaton co nohuitapihuë'. Canpitaso nimirinhuë' nohuitarama'. Nani tahuëri catahuarinquëma'. Ya'coancantarinquëma'.

¹⁸ Co sa'ahuaros'a' pochin nitaranquëmahuë'. Co patomiataranquëmahuë'. Ca nohuanto, Ispirito Santo ya'coancantarinquëma'. Ca pochachin catahuarinquëma'.

¹⁹ Co hua'qui' isëqué ya'huapohuë'. Pa'pato, co imarinacosopitahuë' co huachi quënanarinarcohüe'. Canpitaso nimirinhuë' quënaantaramaco. Nanpiantarahuë ni'ton, Yosë nohuitatoma' nanopimiatarama'. ²⁰ Nani nanopiantahuato, noya noya nohuitaramaco. Tëhuëñchachin Tata Yosë pochin ninahuëso' nitotarama'. Imamiataramaco ni'ton, canpitare'co a'naíchin pochin nisarahuë. Ya'coancantaranquëma' ni'ton, nöya ninohuitarihuë'. ²¹ Nani pënénanquëmaso' nitotatoma' natëhuatamaco, tëhuëñchachin nosoroaramaco, tñahuë. Nosorohuatamaco, Tata Yosënta' nosoroarinquëma'. Cariñquëmanta' nosoroaranquëma'. Inápaquë panantaporahuë', cancanëma quëran nontaranquëma'. Noya noya nohuitaramaco," itérin Quisosori.

²² —¿Onpoatonta' Sinioro, quiyariachin noyá nohuitarainquë? ¿Co ya'ipi piyapi'sa' nohuitarinëñquënhuë' ti? itérin Cotasëri. A'na Cotasë inaso'. Co Cotasë Iscariotihuë'.

²³ Napotohuachina, Quisosori itérin:

—Co ya'ipi piyapi'sa' nanitopihuë' nohuitinacosó'. Insosona nosorohuachinaco, natëarinaco. Natëhuachinaco, Tata Yosëri nosoroarin. Inaro'co ya'coancantatoi, inaquë ya'huéarai. ²⁴ Co'so' nosorohuachinacohüe', co natëarinacohüe'. Co caora yonquinéhuë quëran sha'huitéranquëmahuë'. Tata Yosë sha'huitohuachincora, inachachin sha'huitéranquëma'. Ina a'paimarino.

²⁵ Co'huara pantayatérerasocohüe', sha'huitéranquëma'. ²⁶ Inápaquë pantahuato, tatahuë nontarahuë, Ispirito Santo a'patimarinquëma'. Ca ya'huérënamëhuë o'mararin. Inaso' achinicancanarinquëma'. Ya'ipi Yosë nanamën a'chintarinquëma'. Catahuaarinquëma' a'chintéranquëmaso' ama nariantacamaso marëhuë'. Catahuaarinquëma', nöya yonquiantarama'.

²⁷ Pantaporahuë', asanocancanaranquëma'. Tata Yosë natëto, co manta' të'huatërahuë'. Catahuaaranquëma' ca pochachin cancantacamaso marë'. Piyapi'sa' inahuara co sano cancantopihuë'. A'naroáchin pa'yapi. Cariñquëmaso nimirinhuë' catahuaaranquëma' sano cancantacamaso marë'. Ama pa'yancosohuë'. Ama të'huacosohuë'.

²⁸ Nani sha'huitéranquëma'. Inápaquë pantaporahuë', ya'coancantimaranquëma'. Tëhuëñchachin nosororamaco naporini, Tatahuëtaquë panantarahuëso marë' noya canchitomahuë'. Inaso' chini chiniquënanantérin. ²⁹ Co'huara pantayatérerapohuë', sha'huitaranquëma'. Inápaquë pantahuato, yonquiarama'. "Tëhuëñchachin ninoton, sha'huitérinpoa'," ta'toma', noya noya natëaramaco. Ina marë' sha'huitaranquëma'.

³⁰ Co huachi hua'qui' nontaranquëmahuë'. Sopai hua'an nohuanton, masarinaco. Inari camairin ni'ton, nani huë'sapi macainacosó marë'. Co caso' pi'pian téranta' ina camaincosohuë' nimirinhuë', ³¹ co ta'arahuë'. Tata Yosë nosoroato, ina no'tequen natëarahuë. Ina nohuanton, ma'sha onpoarahuë. Piyapi'sa' nicatonaco, "Tëhuëñchachin Yosë nosoroaton, natérin," tosapi.

"Huëco' pa'ahua huachi," itérincoi Quisoso.

15

Opa nara'huaya nitérinso pochin nininso'

¹ Ina quëran itantarincoi: “Casáchin no'téquën a'chintatënquëma', opa nara'huaya pochin ninahuë. Tata Yosëo' hua'anën pochin ninin. ² A'na së'paquën co nitohuachinahuë', nishitëterin. A'naquënso nipurinhuë' pi'pian nitérin. Ina së'para'huainpita pi'pian ni'quitërin na'con na'con nitacaso marë'. Co ni'quitohuatërahuë', co noya nitérinhuë'. ³ Carinquëma' nani anoyacancantëranquëma'. A'chintëranquëmaso' natërama' ni'ton, anoyacancantëranquëma'. ⁴ Imamiatatomaco, nani tahuëri yonquiráco catahuainquëma'. Noya nichinpítérinso pochin nico'. Nara së'pa' nohuishatohuachina, co nitérinhuë'. Inapochachin co imamiatohuatamacohuë', co nanitaparamahuë' noya nicacamaso'.

⁵ Ca opa ya'huë pochinch. Canpitaso' së'paquën pochinquëma'. Ya'coancantaranquëma'. Nani tahuëri yonquihuatamaco, catahuaaranquëma'. Opa noya nitérinso pochin noya nisarama'. Canpitaora co nanitaramahuë' Yosë pochin cancantacamaso'. ⁶ Nara së'pa' nohuishatohuachina, ahuirin. Masahuatona', pënqué të'yatopi ahuiquitacaiso marë'. Inapochachin co imamiatohuatamacohuë', Yosë ana'intarinquëma'.

⁷ Casáchin yonquihuatamaco, na'con catahuaaranquëma'. A'chintëranquëmasonta' ama nariantocosohuë'. Ina yonquiatoma', Yosë nontoco'. Tëhuëñchachin imamiato-huatamaco, ma'sona nohuantohuatama', sha'huitoco acochinquëma'. ⁸ Opa na'con nitérinso pochin canpitanta' noya noya nico'. Ina quëran a'napitanta' nicatënënquëma', Yosë yonquiapona'. Naporahuatoma', noya noya imasaramaco. ⁹ Tata Yosë nosororincoso pochachin nosororanquëma'. Casáchin yonquico na'con nosoro'inquëma'. ¹⁰ Tata Yosë no'téquën natërahuë ni'ton, pa'pi nosororinco. Inapochachin natëhuatamaco, carinquëmanta' pa'pi nosoroaranquëma'.

¹¹ Ya'ipi cancanëhuë quëran Tatahuë natërahuë ni'ton, nöya cancantërahuë. Natëhuatamaco, ca pochachin noya cancantarama'. Co sëtaramahuë'. Ina marë' a'chintëranquëma'. ¹² Nani pënénanquëma' noya ninosorocamaso marë'. Carinquëma' nosororanquëmaso pochachin canpitanta' ninosoroco'. Ina pa'pi nohuantërahuë nicacamaso'. ¹³ Ni'co' iyaro'sa'. Nipayarëso' na'con nosorohuatéra, ina nicha'ëcaso marë' chiminë'. Inapochachin canta' na'con nosoroatënanquëma', canpita nicha'ëca'huanquëmaso marë' chiminarahuë. Co insonta' ina pochin nosororinquëmahuë'. ¹⁴ Natëhuatamaco, tëhuëñchachin nipayarahuëso pochin ni'saranquëma'. ¹⁵ Co caso' patron pochin cancantërahuë'. Patronso' piyapinënpita camairin. Camaipirinhuë', yonquirinso chachin co sha'huitënhuë'. Nipayarinso nipurinhuë' ya'ipiya sha'huitërin. Inapochachin carinquëmanta' ya'ipiya sha'huitënanquëma'. Co piyapinëhuë pochin ni'nanquëmahuë'. Nipayarahuëso pochachin ni'nanquëma'. Ya'ipi Tatahuë sha'huitëncosopita anitotëranquëma'. ¹⁶ Co canpitaora nohuanton imaramacohuë'. Ca nohuanto, imaramaco. Carinquëma' huayonanquëma'. Nani acoranquëma opa së'paquën na'con nitérinso pochin nisápamaso marë'. Inapohuatama': ‘Quisoso nanan quëtérinco,’ ta'toma', Yosë nontoco' catahuainquëma'. Ca pochin yonquiatoma', ma'sona nipatama', acochinquëma'. ¹⁷ Nani pënénanquëma'. ‘Imaramacosopita capini ninosoroco’, itëranquëma',” tënин.

Piyapi'sa' no'huirinënpoaso'

¹⁸ Ina quëran itantarincoi: “Co imarinacosohuë' no'huihuachinënanquëma', ama pa'yancosohuë'. Ca'ton no'huirinacoso, nitotërama'. ¹⁹ Inapita pochin cancantëramo' naporini, noya ni'itënënanquëmahuë'. Inahua capinirächin nipa'yatopi. Nipurinhuë', nani huayonanquëma'. Ca nohuanto, co inapita pochin cancantëramahuë'. Imaramaco ni'ton, no'huiarinënanquëma'. ²⁰ No'huirinaco ni'ton, canpitanta' no'huiarinënanquëma'. Nani

sha'huitéranquëma': 'Hua'anëmaco ni'ton, co canpitaso' noya noya ni'sarinënquëmahuë', itéranchuëma'. Aparisitérinaco ni'ton, canpitanta' aparisitarinënquëma'. A'chinahuëso' natëhuachina', canpitanta' natëarinënquëma'. ²¹ Napoaponahuë', imaramaco ni'ton, na'con na'con piyapi'sa' aparisitarinënquëma'. Tata Yosë a'paimarincoso' co nohuitopihuë' ni'ton, no'huiarinënquëma'.

²² Co o'mato, a'chintérahuë' naporini, co a'porinacoso marë' oshahuaintonahuë'. Nani a'chintopirahuë'. Co natëtonacohuë', oshahuani pi ni'ton, Yosëri ana'intarin. ²³ Insopitaso' no'huihuachinaco, Tata Yosënta' no'huiapi. ²⁴ Na'a piyapi'sa' a'naroáchin anoyatérahuë. Nani ma'sha Yosë pochin ninahuë. A'napita piyapi'saso' co nanitapapihuë'. Yosë anohuita'huaso marë' sacai' nininso' a'notérahuë. Co a'notérahuë' naporini, co ina marë' oshahuaintonahuë'. Nani nicaponaracohuë', no'huirinaco. Tata Yosënta' no'huiapi. ²⁵ Iráca Yosë quiricanënquë ninshitopi. 'Topinan quëran no'huirinaco,' ténin ninshitaton. Iporaso' naporinso chachin topinan quëran no'huiarinaco.

²⁶ Yosë'pa' pantahuato, Ispirito Santo a'patimaranquëma'. Inaso' achinicancanarinquëma'. No'tequénáchin nonin. Yosë quëran o'marahuatón, piyapi'sa' ayonquiari. Nonahuëso chachin no'tequén ayonquiariquëma'. ²⁷ Canpitanta' a'chinarama' a'napitanta' nohuitinacoso marë'. Ya'nan a'chinahuë quëran huarë' nohuitéramaco ni'ton, naporahuëso' sha'huitarama'.

16

¹ Co'huara ma'sha onpochátérerasënquëmahuë', sha'huitaranquëma' ama pa'yanatoma' a'poamacoso marëhuë'. ² Niyontonpiso pëiro'sa quëran ocoiarinënquëma'. A'na tahuëri yatéparinënquëma'. 'Co noyahue' nipi ni'ton, têpahuatoi, Yosë noya ni'sarincoi,' ta'tona', a'naquëma' têpaarinënquëma'. ³ Co Tata Yosë nohuitopihuë'. Canta' hui'ninco nipi-rahuë', co nohuitérinacohuë' ni'tona', aparisitarinënquëma'. ⁴ Napoaton iyaro'sa', ama pa'yancosohuë'. Nani sha'huitéranquëma'. A'na tahuëri aparisitohuachinënquëma', ina yonquiarama'. 'Téhuënchachin no'tequén ninoton, sha'huitérinpoa', tosarama'.

Ispirito Santo catahuarinpoaso'

Ya'nan imapoma', co ina pochin sha'huitéranquëmahuë'. Canpitaro'co ya'huato, catahuanquëma'. ⁵ Iporaso' 'Yosë'pa' paantarahuë,' itopiranquëmahuë': '¿Intohuata' pa'saran?' co itéraramacohuë'. ⁶ Napotéranchuëmaso marë' chiníquen sétapiramahuë'. ⁷ No'tequén itéranchuëma'. Canpita marë' paanta'huaso' noya, ténahuë. Co paantahuato-huë', Ispirito Santo co o'marinhue' catahuainquëmaso marë'. Nipirinhuë', paantahuato, ina a'patimaranquëma'. ⁸⁻¹¹ Ispirito Santo isoro'paqué o'mahuachin, oshahuano'sa' pa'pi co noyahue' nipo', Yosë noya coisé pochin nininso', no'tequén ana'intacaso ya'huérinso', inapita ayonquiari: 'Co Quisoso natëramahuë' ni'ton, pa'pi oshahuanama'. Inaso' no'tequénáchin Yosë natëton co téhuérinhuë ni'ton, chiminpachina Tata Yosë ya'huérinquë pantarin. Napoaton co huachi quënanaramahuë'. Sopai hua'ani hua'qui' piyapi'sa' hua'anëntopirinhuë', Yosëri minsérahuate, ana'intarin, itarin piyapi'sa', ayonquiato.

¹² Na'con yaa'chintopiranquëmahuë', co ipora nanitaramahuë' ya'ipiya yonquicamaso'. ¹³ Nipirinhuë', Ispirito Santo o'mahuachin, ya'ipi nanaméhuë a'chintarinquëma'. No'tequén anitotarinquëma'. Co inaora yonquirinso' a'chintarinquëmahuë'. Yosë yonquirinso chachin a'chintarinquëma'. A'na tahuëri ma'sha onpocaisonta' anitotarinquëma'. ¹⁴ Ca nonahuëso chachin a'chintarinquëma' ni'ton, noya noya ni'saramaco. ¹⁵ Ya'ipi tatahuë yonquirinso' nitotérahuë. Ina pochin yonquirahuë canta'. Napoaton Ispirito Santo o'mahuachin, ca nonahuëso chachin a'chintarinquëma'.

¹⁶ Pi'pian pahuanarin pacáhuaso'. Pa'pato, co quënanaramacohuë'. Ina quëran co hua'quiya quëranhuë' quënaantaramaco," itérincoi.

Sëto inquitarinso'

17 Ca'tano'sanënpitacoi ninontërai.

—¿Ma'ta' tapon naporin? “Pi'pian pahuanarin paca'huaso'. Pa'pato, co quënanaramacohuë'. Ina quëran quënaantaramaco,” tënин. “Tatahuë ya'huërin'pa' paantarahuë,” tënин anta'. **18** “Co hua'quiya quëranhuë' quënaantaramaco,” topachina, co nitotërëhuahuë'. ¿Ma'ta' tapon naporin? tënai ninontatoi.

19 Yanatanpiraihuë', co natanaihuë'. Quisoso nimirinhue' nitotërin. Napoaton itërincoi:

“¿Ma'ta' tapon naporin?” ta'toma', yanatanpiramacohuë', co natanamacohuë'. Tëhuëñchachin pi'pian pahuanarin paca'huaso'. Pa'pato co quënanaramacohuë'. Ina quëran co hua'quiya quëranhuë' quënaantaramaco. **20** No'tequëñ itëranquëma'. Sëtatomá', na'nëarama'. Co natërinacosopitasohuë' nimirinhue': “Nani chiminin huachi,” ta'tona', capa cancantapi. Canpitaso nimirinhue' sëtapiramahuë', co hua'qui' sëtaramahuë'. A'naroáchin noya cancantarama'. **21** Ni'co iyaro'sa'. Sanapi yahuaihuachina, iq-uitaton co noyahuë' cancantërin. Nani huaihuachina, a'naroáchin nöya cancantërin. Co huachi iquitérinso' yonquirinhue'. “Hua'huahuë nani hua'huacharin,” ta'ton nöya cancantërin. **22** Inapochachin canpitanta' ipora sëtapiramahuë', naquëranchin quënaantaranquëma'. Naporo' nöya cancantarama'. Co huachi insonta' nanitarinhue' asëtainëmaso'. Nöya cancantomiatarama'.

23 “Naporo' co huachi natanaramacohuë'. No'tequëñ sha'huitëranquëma'. Ca pochin yonquiatoma', Tata Yosë nontoco'. ‘Quisoso nanan quëtérincoi,’ ta'toma', ma'sona nipayatama', acotarinquëma'. **24** Ipora huanta' co ina pochin Yosë nonchätëramahuë'. Iporaso nimirinhue' ca pochin yonquiatoma', ma'sha nico quëchinquëma'. ‘Quisoso nanan quëtérincoi,’ ta'toma', nani tahuëri nontáco' nöya cancantacamaso marë’,” itërincoi.

Co noyahuë' nimiropita Quisoso minsërinso'

25 “Ma pochinsona nininso' nani a'chintëranquëma'. A'na tahuëriso nimirinhue' co huachi ina pochin a'chintaranquëmahuë'. A'ninquëchin tatahuë naporinso' sha'huitaranquëma'. **26** Naporo' ca pochin yonquiatoma', tatahuë nontarama'. Ca pochin nontarama' ni'ton, noya natanarinquëma'. Co huachi campita marë' nonta'huaso' ya'huërinhuë'. **27** Tatahuë chachin nosororinquëma'. Nosororamaco ni'ton, nosororinquëma'. Ina a'paimarincoso' natërama' ni'ton, nosororinquëma' canpitanta'. **28** Tatahuë quëran o'mato, isoro'paquë ya'huëpirahuë'. Co hua'qui quëranhuë' tatahuë ya'huërin'pa' panantarahuë,” itërincoi.

29 —Iporaso' co huachi ma pochinsona nininso' sha'huitarancoihuë'. A'ninquëchin nontarancioi ni'ton, a'naroáchin natanai. **30** Quëmaso' ya'ipi nitotëran. Yosë quëran o'maran, tënai. Co huachi natana'huainquënsi täranta' ya'huërinhuë', itërai.

31 —¿Nani natëramaco ti? Napoaponahuë', carinquëma' itaranquëma'. **32** Ipora tashi chachin ya'ipinquëma' ta'anapiraramaco. Yanquëérahuatoma', pëinëmaquë pa'sarama'. Patopiramacohuë', co caora ya'huapohuë'. Tatahuë ca'tanarinco. **33** Nani na'con sha'huitëranquëma' sano cancantacamaso marë'. Casáchin yonquihuatamaco, sano cancantarama'. Co pa'yanaramahuë'. Piyapi'sa' aparisisitopirinëñquëmahuë', catahuaranquëma' ni'ton, chiníquën cancantoco'. Ya'ipi isoro'paquë co noyahuë' nimiropita nani minsëarahuë, itërincoi Quisoso.

17

Quisoso, imarinsopita marë' Yosë nontërinso'

1 Ina tosahuaton, inápaquë në'pëtërin Yosë nontacaso marë': “Nani Tata ora naniarin chimina'huaso'. Aparisisitohuachinaco, catahuaco quëma pochachin cancantato, noya natëinquënsi. Ina quëran a'napita nicatonaco, noya noya yonquiarinëñquënsi. Quëma hui'nanco ni'to, napotaranquënsi. **2** Nani chiníquënsi nanan quëtéranco ya'ipi piyapi'sa'

hua'anënta'huaso marë'. Quëma nohuanton, a'naquën imasarinaco. Inapitaso' anoya-cancantërahuë quëma nohuitatënëñ nanopimiatacaiso marë'. ³ Quëmasáchin Yosëñquën. Isoro'paquë a'paimaranco. Piyapi'sa' nohuitahuatënëñquën, canta' nohuito huachinaco, nanopimiatapi.

⁴ Piyapi'sa' nicha'ëca'huaso marë' a'paimaranco. Ya'ipi sha'huitërancoso' natëarahuë. Ya'ipi tiquirahuë. Quëmasáchin natëranquën ni'ton, piyapi'sa' noya ni'sarinëñquën. ⁵ Iráca co'huara isoro'pa' ya'huëyátërasohuë', quëmaro'co noya noya ya'huëpirahuë', a'paimaranco. Iporaso', Tata, quëmataquë naquëranchin acoantaco quëmaro'co chachin ya'huanta'i.

⁶ Quëma nohuanton, a'naya a'naya imasarinaco. Isoro'paquë ya'huëpirinahuë', huay-onan imainacoso marë'. Napoaton, imasarinaco. Nani a'chintërahuë. Onpopinsona quëma cancantëranso' nani anitotërahuë ni'ton, nohuitërinëñquën. Inapitaso' quëma piyapinëñpita. Iráca quëran huarë' yonquiran imainacoso'. Quëma nanamëñ natëpi. ⁷ Caora yonquinëhuë quëran co manta' ninahuë'. Quëma sha'huitohuatancora, natëranquën. Ina nitotopi. ⁸ Sha'huitohuatancora, inachachin a'chintërahuë, natëtopi. Quëmá quëran o'marahuë. Quëma chachin a'paimarancosonta' natëpi.

⁹ Imarinacosopita marë' chiníquën nontaranquën. Hui'nanpita pochin ni'nan. Iráca quëran huarë' yonquiran imainacoso'. A'napitaso' co imarinacohuë'. Co inapita marë' nontaranquënhuë'. ¹⁰ Ya'ipi imarinacosopita imarinëñquën quëmanta'. Quëmari hui'nanpita pochin cancantëran. Napopianachin imarinëñpo'. Noya natërinaco ni'ton, piyapi'sa' noya ni'sarinaco.

¹¹ Co hua'quiya quëranhuë' quëmataquë paantarahuë. Isoro'paso' patarahuë. Imarinacosopitaso niperinhuë', iséquë ya'huapona'. Quëma nohuanton, imasarinaco. Quëmaso' Tata nóyanquën ni'ton, noya a'paiquë' imamiachinaco. Ya'ipiya nanitaparan ni'ton, catahuaquë' napopianachin yonqui'ina'. Canpo' ninosororëso pochin ninosoro'ina'. ¹² Inapitaro'co ya'huasoco, quëma nanamëñ a'chintërahuë, pënënahuë, na'con catahuarahuë imamiatinacoso marë'. Noya a'pairahuë. Co a'naya téranta' a'poarinacohuë'. A'naíchin pipirin, parisitopiquë pacacaso' ya'huërinso'. Quëma quiricanëñquë ninoranso chachin nanirin.

¹³ Iporaso niperinhuë' ya'huëranquë paantarahuë. Co'huara pantayatërapohuë', isoro'pa quëran chachin, nontaranquën imarinacosopita noya cancantacaiso marë'. Ya'ipi cancanëhuë quëran natëranquën ni'ton, noya cancantërahuë. Catahuaquë inapitanta' ca pochachin noya cancanchina'. ¹⁴ Quëma nanamëñ chachin nani a'chintërahuë. Co imarinacosopitarihuë' no'huipi. Co inapita pochin cancantopihuë' ni'ton, no'huipi. Canta' co inapita pochin cancantërahuë'. ¹⁵ Co nohuantërahuë' isoro'pa quëran ocoicamaso'. Iséquë ya'huëpirinahuë', catahuaquë' ama sopairi minsëinsuhuë'. ¹⁶ Na'a piyapi'sa' co noyahue' niperinahuë', co caso' inapita pochin cancantërahuë'. Imarinacosopitanta' co inapita pochin cancantopihuë'. ¹⁷ Catahuaquë' quëmasáchin cancanchinëñ. No'téquën ayonquiquë' noya nicacaiso marë'. Quëma nanamëñ quëran no'téquën anitotëran. ¹⁸ Isoro'paquë a'paimaranco. Inapochachin inapitanta' a'parahuë piyapi'sa' a'chintacaiso marë'. ¹⁹ Imarinacosopita nosoroato, ya'ipi cancanëhuë quëran quëmasáchin natëaranquën. Inapitanta' no'téquën yonquiatona', noya natëinëñquën.

²⁰ Co isopita marëáchin nontaranquënhuë'. A'na tahuëri inapitanta a'napita a'chintohuachina', imasarinaco. ²¹ Inapitanta' catahuaquë' napopianachin yonqui'ina'. Canpo' ninosororëso pochin ninosoro'ina'. Quëma hui'nanco ni'to, yonquiranso chachin yonquirahuë. Inapitanta' catahuaquë' canpo pochachin yonqui'ina'. Ina quëran a'napitanta' natëarinaco. 'Yosëri chachin a'paimarin,' tosapi. ²² Quëma nohuanton, noyápiachin cancantërahuë. Imarinacosopitanta' catahuarahuë noyápiachin cancantacaiso marë'. Ina quëran a'na huënton pochin napopianachin yonquiapi. Canpo pochachin cancantapi. ²³ Quëma pochachin yonquiatato, inapita ya'coancantërahuë

canpo pochachin yonquicaiso marë'. Ina quëran co imapisopitahuënta' nicatona': 'Tëhuëñchachin Yosëri hui'nin a'paimarin. Hui'nin nosororinso pochin imarinsopitanta' nosororin,' tosapi.

²⁴ Quëma nohuanton Tata, isopitaso' imasarinaco. Inapita nohuantërahuë care' ya'huëcaiso'. Iráca quëran huarë' quëma nosororanco. Co'huara isoro'pa' ya'huëyátërasohuë', nosoroatonco, noya acoranco. Inatohua' inapitanta' pantahuachina', noya noya ni'sarinaco. Ina na'con nohuantërahuë. ²⁵ Quëmaso' Tata no'tëquëñáchin yonquiaton, noyasáchin ninan. Co imarinacosopitahuë' co nohuitérinëñquëñhuë'. Caso niperinhuë' nohuitéranchuë. Quëma isoro'paquë a'paimaranco. Imarinacosopita nitotopi. ²⁶ Quëma nanamën nani a'chintërahuë nohuitinëñquëñso marë'. Ipora huanta' a'chintarahuë ni'ton, noya noya nohuitarinëñquëñ. Quëma nosororancoso pochachin ninosorocaiso marë'. Inapohuachina', inapita ya'coancantato, ya'huëmiatarahuë," itérin.

18

Quisoso mapiso'

(Mateo 26.47-56; Marcos 14.43-50; Lucas 22.47-53)

¹ Nani Yosë nontohuachina, Sitron itopiso' i'shanantë' aquëtëran pa'nai. Inaquë nararoa'hu ya'huërin. ² Inatohua' na'aro' niyontonai ni'ton, Cotasërinta' nohuitérin. Inaso' yasha'huirapirinso'. ³ Corto hua'ano'sa', parisioro'sa', inapita nani sha'huitonin. Natanaahuatona', sontaro'sa', ponisiaro'sa', inapita a'papi Quisoso macacaiso marë'. Nansa, sahuëni, inapita quëpapi. Tashi' ni'ton, nanoparin, yonarin, inapitanta' quëpapi. Cotasëri quëchitërahuaton, a'notérin. ⁴ Quisososo' ya'ipiya ninoponahuë', co ta'arinhue'. Nacapiapon pa'nin.

—¿Inta' yonisarama'? itérin.

⁵ —Quisoso Nasaritoquë ya'huërinso', itopi.

—Ca mini inaco, itérin. Cotasënta' inaquë huaniarin anta'.

⁶ —Ca mini inaco, itohuachina, pa'yanpi. A'na achira' pinëñ parti pa'sahuatona', pinëña quëran anotopi.

⁷ Ina quëran naquëranchin itantarín:

—¿Inta' yonisarama'? itantarín.

—Quisoso Nasaritoquë ya'huërinso', itantapi.

⁸ —Nani sha'huitéranchuëma'. Ca mini. Ca nohuantohuatamaco, isopitaso' tananpitoco' pa'ina', itérin. ⁹ Achin Yosë nontaton, itérin: "Quëma nohuanton, isopita imasarinaco. Noya a'paiarahuë. Co a'naya térranta' a'poarinacohuë'," itérin. Ina nanicaso marë': "Tananpitoco' pa'ina'," itérin. ¹⁰ Napopirinhuë', Simon Pitroso' sahuëñinëñ ocoirahuatón, corto hua'an inpriatónen Marco itopiso' ahuërin. Inapotaton, inchinan huëratén nishitëhuëratétérin. ¹¹ Quisososo niperinhuë' co nohuantërinhuë'.

—Sahuëni iyasha po'moantaquë'. Tananpitëquë' mainaco. Tatahuë nohuanton, masarinaco. Main o'orëso pochin chiníquëñ parisitarahuë. ¿Co ina nitotéranchuë' ti? itérin.

Corto hua'an pëinëñquë quëpapiso'

(Mateo 26.57-58; Marcos 14.53-54; Lucas 22.54)

¹² Ina quëran sontaro'sa', capitán, cotio ponisiaro'sa', inapita huë'sahuatona', Quisoso mapi. Masahuatona', tanpaquëñ noyá tonporahuatona', ¹³ Anasëtaquë quëpapi. Inaso' Caihuasë mi'sën. Naporo' pi'ipi Caihuasë corto hua'an chini chiníquëñ nanantérinso' ya'conin. ¹⁴ I'huá inaso' cotioro'sa' sha'huitérin: "Ama ya'ipinpoa' chiminacaso marëhuë' ina chimi'in, ténahuë," itérin. Inaquë quëpapi natanacaiso marë'.

*Pitrori nonpinapirinso'**(Mateo 26.69-70; Marcos 14.66-68; Lucas 22.55-57)*

¹⁵ Ca'tano'sanénpitaso' pa'pi. Simon Pitroso nimirinhue', Quisoso imquirin. Canta' imquirahuë. Caso' corto hua'an nohuitérinco ni'ton, Quisoso acoana quépahuachinara, pairanaquë chachin ya'conahuë. ¹⁶ Pitroso' ya'coana aipiran huaniárin. Napohuachina, ya'coana a'pairinso' sanapi nontérahue Pitronta' ya'conacaso marë'. Nontohuatëra, ya'conin anta'. ¹⁷ Pitro ya'compachina, sanapiri itérin:

—Quémanta' mini Quisoso imaran, itérin.

—Co'chi caso' imarahuë paya, itérin Pitrori.

¹⁸ Naporo' tashi' sëhuën ni'ton, ponisiaro'sa', inpriatoro'sa', inapita pëyara quëran nani a'pëtopi. Inaquë huanirahuatona', napéntapi. Pitronta' inaquë napéntapatarin.

*Corto hua'ani nataninso'**(Mateo 26.59-66; Marcos 14.55-64; Lucas 22.66-71)*

¹⁹ Ina quëran Quisososo' natanapi:

—¿Ma'ta' a'chinan? ¿Inpitata' imarinénquen? itérin corto hua'ani.

²⁰ —Caso' a'ninquéchin piyapi'sa' a'chintérahue. Niyontopiso pëiquë, Yosë chinotopiso pëiquë, inaquépita cotioro'sa' niyontonpachinara, a'chintérahue. Co po'oana quëran a'chinahuë'. ²¹ ¿Onpoatonta' natananco? Na'a piyapi'sa' nataninaco, nani nitotopi. Inapita natanquë' sha'huichinën, itérin.

²² Itohuachina, ponisiari panpirayarin.

—Corto hua'an chini chiníquen nanantérinso nimirinhue', ¿ina pochin a'paniran ti? itérin ponisiari.

²³ —Co noyahue' nonahuë nipachin, sha'huitoco maquëta tēhuérahue. Nimirinhue', no'tequen nonahuë nipachinso', ¿onpoatonta' ahuéranc? itérin.

²⁴ Ina natanahuaton, hua'ani a'parin Caihuasë nontacaso marë'. Tonpopinan quëpapi.

*Naquéranchin Pitrori nonpinapiantarinso'**(Mateo 26.71-75; Marcos 14.69-72; Lucas 22.58-62)*

²⁵ Simon Pitroso nimirinhue' huaniton, napéntarin.

—¿Quémanta' iso quémapi imamaranquen ti? itérin ponisiari.

—Co'chi imarahuë paya, itantarín.

²⁶ Ina quëran cotio hua'an piyapinëni quënanin. Ina quémopinëni chachin Pitrori nishitëhuératetérinso' ni'ton, pi'pian nohuitérin. Pitro quënanahuaton, itérin:

—¿Co'ta Quisoso mapiquë quënananquen pora? itérin.

²⁷ —Co'chi cahuë paya, itaantarín Pitrori. Naporo' atari pérarin, natanin.

*Pirato quëtonpiso'**(Mateo 27.1-2, 11-14; Marcos 15.1-5; Lucas 23.1-5)*

²⁸ Tashíramiachin nisahuaso', Caihuasë pénën quëran quéparahuatona', Noma hua'an pénénquë quëpapi. Cotioro'saso nimirinhue' co inaquë ya'conpihuë'. "Nisha piyapi'sa' pénénquë ya'compatéhua', oshahuanarihua'. Ina quëran co nanitarihuahuë' Pascoa cosharo' capacaso', topi. ²⁹ Napoaton Pirato pipirahuaton, inapita nontérin.

—¿Ma'ta' onporin iso quémapi? itérin.

³⁰ —Pa'pi co noyahue'. Noya ninin naporini, co quëshiiiténquenhuë', itopi.

³¹ —Canpitari quëpaco'. Iráca quëran huarë' nipénénamaso' co natëhuachinhuë', ana'intoco', itérin.

—Co quiyasó' nanitérihuë'. Co nanan ya'huétérincoihuë' piyapi'sa' tépaca'huaiso', itopi.

³² I'huá Quisoso ninoton nani sha'huirin: "A'na tahuéri inápaquë achinpiarinaco," ténin. Yosë nohuantón, onpotatonasona tépacaiso' naniarín. ³³ Ina quëran Piratori pëiquë ya'coantaráhuaton, Quisoso itapon:

—¿Quémaso' cotio copirnonquen ti? itérin.

³⁴—¿Quëmaora yonquinën quëran napoaran? ¿A'napita sha'huitérinquën nica? itérin.

³⁵—“Cotio piyapi inanta,” ¿topiranhuë' ti? Caso' nishaco. Cotioro'sa' sha'huirapirinënquën. Corto hua'ano'sa chachin yo'quirinën ana'inta'huanquënso marë'. ¿Ma'ta' onporan ni'ton, yatéparinënquën? itérin.

³⁶—Co caso' isoro'paquë hua'anëntarahuë'. Ina nohuantérahuë naporini, imarinacosopita sontaro'sa pochin niitonahuë'. Ama cotioro'sa' macainacoso marëhuë' chiníquën ahuëchitonahuë'. Caso nipurinhuë' nisha pochin hua'anëntarahuë, itérin.

³⁷—Napoahuarë' ¿quëmaso' copirnonquën? itérin Piratori.

—Inaco mini. Ina marë' nasitimarahue. O'marahuë no'tën nanan pënënta'huaso marë'. No'tequën yonquipisopita natëarinaco, itérin.

³⁸—¿Ma no'tën nanancha napotëran nicaya? itérin Piratori.

Quisoso tēpacaso' sha'huirinso'

(*Mateo 27.15-31; Marcos 15.6-20; Lucas 23.13-25*)

Ina tosahuaton, pipiantarahuaton, cotioro'sa' itantarín:

—Iso quëmapi noya, ténahuë. Co manta' onporinhuë'. Co ana'intacaso' ya'huërinhuë'.

³⁹ Napoaton sha'huichingquëma'. Nani Pascoa tahuëri a'nara' apina'pi tashinan pëi quëran ocoirahuë pipicaso marë'. ¿Nohuantérama' cotio copirno ocoica'huaso'? itérin.

⁴⁰ Natanaahuatona', chiníquën a'panitopi:

—¡Ama ina ocoiquësahuë! ¡Parapasë ocoiquë! itopi. Inaso' matararo nipurinhuë' napotopi.

19

¹ Ina natanaahuaton, sontaro'sa' camairin Quisoso huihuaiso marë'. Napohuachina, chiníquën huihuitona' pë'sha pë'shatopi. ² Nahuan quëran yancotë' nicatona', ayancotopi. Nahuan ni'ton, ohuanin. Naporahuaton, quëhuanën miáchin hua'an a'morinso pochin a'motopi tēhuacaiso marë'.

³ —¡Nanpimiataton israiro'sa hua'anëntëquë! itopi. Napotahuatona', panpirayarápi.

⁴ Ina quëran Pirato pipiantarahuaton, piyapi'sa' nontantarín:

—Iso quëmapi a'notantanquëma', ni'co'. Co manta' onporinhuë', ténahuë, itérin.

⁵ Naporo' Quisosonta' pëi quëran pipirin. Yancotë' nahuan quëran nipiso ayancotopi, quëhuanën miáchin a'motopiso'. Inapitarë chachin pipirin.

—Ni'co' iso quëmapi, sa'ahua, itérin piyapi'sa'.

⁶ Corto hua'ano'sa', ponisiaro'sa', inapitari quënanahuatona', chiníquën noncarotopi.

—¡Corosëquë patanantëquë' chimiin! itopi. Inachin inachin itápi.

—Canpitari corosëquë patanantatoma', tēpaco'. Co caso' nohuantérahuë' tēpa'huaso'. Co manta' onporinhuë', ténahuë caso', itérin Piratori.

⁷ —Iráca pënëntérinso' co natérinhue' ni'ton, chimi'in. Topinan piyapi niponahuë', “Yosë hui'ninco,” toconin, itopi.

⁸ Ina natanaahuaton, Pirato chiníquën pa'yanin. ⁹ Ya'coantaráhuaton, Quisoso itapon:

—¿Intohua quëranta' huë'nan? No'tequën sha'huitoco, itérin. Inariso nipurinhuë', co manta' itérinhue'.

¹⁰ —¿Onpoatonta' co yanontérancohue'? Ca nohuantohuato, ocoiaranquën. Nohuanto-huato, atépataranquën. ¿Co ina nitotéranhue' ti? itérin.

¹¹ —Co Yosë nanan quëtérinquënhue' naporini, co manta' quëma nanitapaitoncohuë'. Tépahuatanco, ina marë' oshahuanaran. Nipurinhuë', yo'coninacosopita na'con na'con oshahuanapi, itérin. ¹² Naporo' quëran huarë' Piratori yaocoipirinhuë', cotioro'sari itaantapi:

—Iso quëmapi ocoihuatan, Noma copirno no'huiarinquën. “Caso' copirnoco,” téninso marë' copirnori inimicotarin, itopi.

¹³ Ina natanahuaton, “Co’chi nanitérahuë’ Quisoso ocoica’huaso paya,” ta’ton, aipiran quëpantarin. Quëpantarahuaton, ana’intacaso’ shiranënqué huënsérin. “Shancori i’iratë’,” itopiquë ya’huërin. Cotio nananquëso’, Capata, itopi. ¹⁴ A’na tahuéríchin pahuanarin Pascoa nanicaso’. Yacamotahuaso’, cotioro’sa’ itérin:

—Copirnonëma’ ni’co’, itérin.

¹⁵ —Co quiyariso’ nohuantérahuë’. ¡A’naroáchin atëpatéquë’! ¡Corosëquë apatanantëquë’ chimiin! itaantapi hua’ano’sari.

—Copirnonëma’ nimirinhue’, ¿atëpachi ti? itérin.

—¡Noma copirnoíchin natërai quiyanta! Co a’na copirno ya’huëtérincoihuë’, itopi.

¹⁶ Napotohuachinara, Piratori itérin: “Inta nipachin, Quisoso quëparahuatoma’, corosëquë patanantoco’,” itérin sontaro’sa’. Napotohuachina, masahuatona’ quëpapi.

Corosëquë patanantopiso’

(Mateo 27.32-44; Marcos 15.21-32; Lucas 23.26-43)

¹⁷ Corosë apitëntohuachinara, inaora quëparin. Pa’sahuatona’, “Nansë Moto’,” panëñ itopiquë canconpi. Cotio nananquëso’, Corocota itopi. ¹⁸ Inaquë corosëquë patanantopi. Cato’apiro’santa’ tëparapi anta’ ni’ton, nisha patanantopi. A’na’ ahuënan quëran, a’nanta’ inchinan quëran patanantopi. Quisoso ahuancanapipi. ¹⁹ Ina quëran Pirato ninshitërin onporinso marësona tëparapiso nitotacaiso marë’. Nani ninshitohuachina, corosëquë chachin motëñ pëtëcha achinpitopi.

ISOSO’ QUISOSO NASARITOQUË YA’HUËRINSO’. COTIORO’S A’ COPIRNO tënín, ninshitaton. ²⁰ Ninano ya’cariya ni’ton, na’a cotioro’sa’ ina nontopi. Cotio nananquë, Noma nananquë, Crico nananquë, cara nananquë chachin aninshitërin. ²¹ Corto hua’ano’saso nimirinhue’, co noyahuë’ ni’pi.

—“Cotioro’sa’ copirno,” ta’ton ninshitëranso’, co noyahuë’. “Cotioro’sa’ copirnoco toconinso”, ta’caso’ ninshitaantaquë’, itoonpi Pirato.

²² —Inca, co nohuantérahuë’. Nani ninshitérahuë huachi. Co huachi a’na ninshitanta’huaso’ ya’huëtérinhue’, itérin Piratori.

²³ Ina quëran sontaro’saso’, nani Quisoso patanantahuatona’, aipi a’morinso’ nipayatamatopi. Catapinitë yasératona’, a’naya a’naya mapi. Acopotérinsoso’ nimirinhue’, co pipinamén ya’huëtérinhue’. Ya’ipitë’ a’nampiso’.

²⁴ —Ama oshahuasohuë’. Huëco’ ya’nipitëhua’ nicanahua’, ta’tona’ ya’nipirapi. Inaporahuatona’, a’nari manin.

Iráca Yosë quiricanënqué ninoton, tapon: “A’morahuëso’ nipayatamatapi. Acopotérahuëso macacaiso marënta’ nicanarapi,” tënín ninshitaton. Naporinso chachin mapi.

²⁵ Corosë ya’cari catapini sanapi’sa’ huaniapi. A’naso’ Quisoso a’shin. A’nanta’ a’shatëñ. Criopasë sa’in Maria itopisonta’ inaquë huaniarin. A’nanta’ Maria Mactarina. Inapitari ni’sapi. ²⁶ Canta’ inaquë huaniarahuë. Quënanahuatonco, a’shin itapon:

—Iso quëmapi mama, hua’huan pochin ni’quë’. Ina ni’sarinquën huachi, itérin. Na’con nosoroatonco napotërin. ²⁷ Ina quëran nontërinco.

—Quëmanta’ iyasha, mamahuë mamaparinquën pochin ni’quë’, itérinco.

Napotohuachincora, napororochachin pochin ni’quë’ quëparahuë yacapaincoso marë’.

Quisoso chimininso’

(Mateo 27.45-56; Marcos 15.33-41; Lucas 23.44-49)

²⁸ Quisoso nontahuatoncoi: “Nani ya’ipi Yosë sha’huitërincoso’ natërahuë,” tënín yonquinënqué. Ina quëran, Yosë quiricanënqué ninorinso nanicaso marë’:

—Yamororohuë, tënín.

²⁹ Huino áin nininso’ tasonquë ya’huërin. Napoaton pi’shiro pochin nininquë asë’cotërahuatona’, nara’huayaquë achinpipi. Ihuëtahuaton, Quisoso nanamënqué paquëanantërin. ³⁰ Pi’pian o’osahuaton: —Nani ya’ipi nanirin, tënín.

Ina tosahuaton, monshorahuaton, chiminin.

Sontarori ohuaninso'

³¹ Ina tashiraya chinoto tahuëri ni'ton, cotioro'sa' co nohuantopihuë' inaquëranchin patanantopisopita patacaiso'. Pascoa tahuëri chachin inaso' ni'ton, noya noya ni'pi. Napoaton Pirato paahuantapi. "Sontaro'sa' sha'huitéquë' tonaina' nipanchina' a'naroáchin chiminacaiso marë'. Chiminpachina', quëparahuatona', pa'pichina'," itopi hua'ano'sari. ³² Napotohuachinara: "Noyahua'", itahuaton, sontaro'sa' a'parin tonaina' nipantacaiso marë'. Pa'sahuatona', cato'apiro'sa chachin nipantonatonpi. ³³ Ina quëran Quisoso huëcapaipirinahuë', nani chiminin quënanquipi. Napoaton co nipantonatopihuë'.

³⁴ A'na sontaroso nimirinhuë', nansaqué nininpítën ohuantérin. Huënai' i'shapitarë chachin pipirin. ³⁵ Cari chachin ni'nahuë. No'tequén sha'huitaranquëma' canpitanta' nitotatoma' natëcamaso marë'. ³⁶ Iráca Yosë quiricanënquë ninshitérin: "Co a'na nansëquën téranta' nipantapihuë'", ténin. Naporinso chachin co inaso' nipantopihuë'. ³⁷ Ananta' ninshitérin: "A'na tahuëri ohuanpiso' ni'sapi," ténin Yosë quiricanënquë.

Quisoso na'pi naninquë po'mopiso'

(Mateo 27.57-61; Marcos 15.42-47; Lucas 23.50-56)

³⁸ Ina quëran Cosi Arimatiáquë ya'huérinso' pa'nin Pirato nontapon. Inanta' Quisoso imaponahuë', cotioro'sa' të'huataton, co a'ninquëchin sha'huirinhuë'. Inaso nimirinhuë', chiníquen cancantaton, pa'nin Pirato nontapon.

—Quisoso nonën nohuantérahuë. Quëtoco cari quëpa'i, itérin. Itohuachina, "Noyahua'. Quëpaquë", itérin. Napotohuachina, pa'nin nonën corosë quëran anohuaracaso marë'. Anohuararahuatona', quëpapi. ³⁹ Nicotimonta' huë'nin. Inaso' iráca Quisosoquë paaton, tashi' nontérin. Inanta huëcaton, pimo yaqui' shinpanantë ayontopinan, quënin nonën pashitacaso marë'. Cara shonca quiro pochín quë'ninso' quënin. ⁴⁰ Quisoso nonën masahuatona', pimóchin nininsoquë morin asë'cotëtopi. Inapotatona, noyá so'pinpi. Ina pochín cotioro'sa' nipa'pitochuachinara, chimipi tapapi na'pi naninquë po'mocaiso marë'. ⁴¹ Ina ya'cariya imia'huaya ya'huérin. Inaquë nasha na'pi nanin ya'huérin chimipi po'mocaiso marë'. Inaquëso', co chimipi po'moyáterapihuë'. ⁴² Nani i'huararin. Tahuéririnquë Pascoa tahuëri chachin ni'ton, manorapi. Tëpapiso' ya'cariya ni'ton, inaquë po'mopi. Pancara'pi pitaraahuatona', nanin pa'copitopi.

20

Quisoso nanopiantarinso'

(Mateo 28.1-10; Marcos 16.1-8; Lucas 24.1-12)

¹ Tomio tahuëri nipayachina, tashiyachin Maria Mactarina pa'nin Quisoso po'mopiquë nicapon. Co noya tahuëriyátérasohuë', canconin. Canconahuaton ni'pirinhuë', na'pi pa'copitopiso' chi'huincapinan quënanconin. ² "Quisoso nonën nani quëpapi," ta'ton, ta'aquirin. Canquirahuaton, Simon Pitroro'coi sha'huitiirincoi.

—¡Siniro nonën po'mopi quëran, nani quëpapi! Intohuaso' quëpapiso' co nitotérahuë', itiirincoi.

³ Napotohuachincoira, na'pi nanin'pa' pa'nai. ⁴ Napopianachin ta'apiraihuë', Pitro na'huëtérarahuato, ca'ton canconahuë. ⁵ Monshorahuato, nëhuéconahuë. Morinquë so'pinpisoachin quënanconahuë. Nimirinhuë', co ya'conahuë'. ⁶ Ca piquëran Simon Pitro canconahuaton, ya'conin. Morin Quisoso so'pinpiso' ni'conin anta'. ⁷ Në'métë' so'pinayapisonta' quënanin. Inaso' nisha quëhuéánin. Inanta' so'pinpinan. ⁸ Ina quëran canta' ya'conahuë. Në'métë' so'pinpiso' ni'sahuato, natérahuë. "Tëhuénchachin Quisoso nanopiantarin," ténahuë. ⁹ Yosë quiricanënquë iráca ninshitatona': "Nanpiantararin," topirinahuë', co yonquiyátéraraihuë'. ¹⁰ Nani ni'patéira, ya'huërai'pa' paantarai.

*Maria Mactarina ya'notérinso'
(Marcos 16.9-11)*

¹¹ Mariaso nimirinhue' huéantarahuaton, Quisoso po'mopiso' aipiran huaniquiantarin. Chiníquén na'nérárin. Na'néárin quérán monshorin na'pi naninqué néhuécaso marë'.
¹² Néhuépirinhue', cato' anquéniro'sa' quénanin, huiríchin a'mopiso'. Quisoso nonën acopiqué huénsëapi. A'na' motën quérán huénsëarin. A'nanta' nantën parti quérán huénsëarin.

—¿Onpoatonta' na'néaran? itérin anquéniri.

—Sinioronéhué nonën nani quépapi. Intohuaso' quépapiso' co nitotérahué', itérin.

¹⁴ Tahuérétahuaton, Quisoso chachin quénanaponahué', co nohuitérinhue'.

¹⁵ —¿Onpoatonta' imoya na'néaran? ¿Inta' yonisaran? itérin Quisosori. Mariaso napoaponahué': "Sacatona'pi ta'ma'," tēcaton:

—Quémari imoya Quisoso nonën quépahuatan, sha'huitoco maconta'i, itérin.

¹⁶ —¡Maria! itérin Quisosori. Tahuérétahuaton, nohuitérin huachi. Inaora nananqué nontaton;

—¡Raponil! itérin. Maistro tapon naporin.

¹⁷ —A'poco imoya. Co tatahué ya'huérin'pa' pantayátérarahué'. Apira paaton, iyahuépita pochin ni'nahuésopita sha'huitonqué: "Yosé ya'huérin'pa' panantarahué. Inaso': 'Tata,' itato chinotérahué. Canpitanta' imaramaco ni'ton, 'Tata,' itatoma' chinotérama', ténin Quisoso, itonqué'," itérin.

¹⁸ Ina natanahuaton, Maria paaton, itaponcoi: "¡Sinioro chachin nani ni'nahué!" itiirincoi. Ya'ipi sha'huitérinso chachin sha'huitérincoi.

*Ca'tano'sanénpitacoi ya'notaantarincoiso'
(Mateo 28.16-20; Marcos 16.14-18; Lucas 24.36-39)*

¹⁹ Naporor tahuéri Tomio tahuéri. Tashihuachina, pëiqué ya'huarai. Cotioro'sa' tē'huatatoi, ya'coana noyá oncotorpiraihué', Quisoso a'nanaya huancánachin ya'notatoncoi:

—Tashita iyaro'sa'. Sano cancantoco', itiirincoi.

²⁰ Itahuatoncoi, imirin a'notérincoi. Nininpitéonta' a'notérincoi. Ohuanpiso' ni'nai. Sinioro chachin ni'sahuatoi, "Ina mini," ta'toi, nóya cancantérai.

²¹ —Sano cancantoco' iyaro'sa'. Tatahué a'parincoso pochachin canpitanta' a'paaranquéma' piyapi'sa' a'chintacamaso marë', itiirincoi.

²² Ina quérán pihuirahuaton,

—Ispirito Santo ya'coancanchinquéma huachi. Ina catahuarinquéma' no'téquén pénéntacamaso'. ²³ Insosona natéhuachinquéma', "Oshanén iyasha Yosé inquitarinquén," itoco'. Inquitarin mini. Nimirinhue', co yanatéhuachinquémahué', "Co oshanén iyasha inquitarinquénhue!", itoco'. Téhuéñchachin co inquitarinhue', itiirincoi. Itahuatoncoi, pa'nin.

Tomaséri quénanaton, natérinso'

²⁴ Naporor shoncayáchincoi ya'huérai. Tomaséso' co ya'huérinhue'. Inaso': "Catopia'hua," itopi. ²⁵ Quisoso quénanahuatoi, Tomasé sha'huitonai:

—Sinioro ni'nai, itopiraihué', co yanatérincoihué'.

—Imirin ohuantopiso' nicato së'huata huarë', nininpitéonta' ohuantopiso' së'huata huarë', natéarahué', itiirincoi Tomasé.

²⁶ Posa tahuéri quérán niyontoantahuatoira, Tomasénta' inaqué nisarin. Naquéranchin ya'coana noya oncotaantapiraihué'. Quisoso a'naroáchin huancánachin ya'noantarahuaton:

—Tashita iyaro'sa'. Sano cancantoco', itiirincoi.

²⁷ Ina quérán anquirahuaton, Tomasé itérin:

—Imirahuë iyasha nicaton, së'huaque'. Nininpítéhuënta' së'huatoco. Ama huachi nisha nisha yonquique'sohuë'. Natëco huachi, itérin.

²⁸ —¡Quëma mini Sinioronëhuënquën! Natëranquën. Yosënëhuënquën ni'ton, chino-taranquën, itérin Tomasëri.

²⁹ —Ni'nanco ni'ton iyasha, natéranco. A'napitaso' co nicaponaracohuë', natëarinaco. Inapitaso' noya noya cancantapi, itérin Quisosori.

Ma'marësona iso quirica ninshitëruhüë'

³⁰ Quisoso nani ma'sha Yosë pochin ninin piyapi'sari natëcaiso marë'. Ca'tano'sanënpitaco ni'piraihuë', co ya'ipiya isëqué ninshitëranquëmahuë'. ³¹ Iso quiricaquë ninshitëruhüësopitaso', Quisoso natëcamaso marë' ninshitëruhüë: "Inaso' tëhuëñchachin Cristo, Yosë hui'nin. Inari a'paimarinso', ta'toma', ina imaco huachi. Imapatama', Yosë nohuitatoma' nanopimiatarama'.

21

Yonsanquë ya'notantarinciso'

¹ Ina quëran Tipiriasë sono' yonsanquë Quisoso ya'notantarincioi. Ni'naiso' sha'huichinquëma'. ² Inaquë canchisë ya'picoi nisarai. A'naso' Simon Pitro. A'nanta' Tomasë, catopia'hua itopiso'. A'nanta' Natanino, Canaquë ya'huërinso'. Sipitio hui'ninpitacointa' ya'huërai. A'napitanta' Quisoso ca'tanpisopita, catoya'pi, inapitaro'coi canchisëcoi ya'huërai.

³ —Riti të'yatapo pa'sarahuë, itérincoi Simon Pitro.

—Pa'sarai quiyanta', itérhai. Potiquë ya'conconahuatoi, pa'nai. Pa'piraihuë', ya'ipi tashi' riti të'yatopiraihuë', co manta' manaihuë'. ⁴ Pi'i yapipirirahuaso', Quisoso yonsanquë huaniarin, ni'piraihuë', co nohuitërnhuë'.

⁵ —¿Co iyaro'sa', manta' manamahuë' ti? itérincoi.

—Co'chi manta' manaihuë' paya, itérhai.

⁶ —Inchinan quëran të'yatoco'. Inaquë tëhuëñchins' masarama', itérincoi. Ina quëran inchinan quëran të'yatohuatëira, notohuaro' sami manai. Na'a ni'ton, co nanitaparaihuë' oshica'huaiso'. ⁷ Naporö' Sinioro nohuitërnhuë' huachi.

—Pasoso' Sinioro chachin, itérnhuë' Pitro.

Itohuatëra, i'nanpirapi sacatarin ni'ton, aipi a'morinso' a'naroáchin masahuaton, a'morin. Manorahuaton, i'quë niitërin. ⁸ Quiyasö' potiquë pa'nai. Riti ohuararahuatoi, yonsai'pa' quëparai. Co aquëyahuë'. Pasa mitro pochin aquërinso'. ⁹ Nonshiconahuatoi, pën quénanconai. Inaquë sami chinsarin, ni'conai. Paonta' ya'huërin.

¹⁰ —Sami manamaso' caraya mamaco', itérincoi Quisoso.

¹¹ Simon Pitro potiquë ya'conahuaton, riti yonsanquë oshirin. Pasa a'natérápo shonca cara sami ya'huërin, panca samisachin. Ina nápo' niponahuë', co riti oquirinhuë'.

¹² —Huëco' iyaro'sa' coshatahua', itérincoi Quisoso. “¿Inquënta' quëmaso'?” co itapoirahuë', Sinioro nohuitërai. ¹³ Pan masahuaton, quëtërincoi. Saminta' quëtërincoi ca'nai.

¹⁴ Nanpiantarin piquëran nani cararo' ca'tano'sanënpitaco quénanai.

Simon Pitro nontërinso'

¹⁵ Nani coshatohuatoira, Quisosori itérin:

—Iya Simon, ¿isopita quëran na'con na'con nosoromiatéranco ti? itérin.

—Nosororanquën Sinioro ina nitotëran, itérin.

—Imarinacosopita carniroa'huar'o'sa pochin ni'nahuë. Patontahuato, co incariso' a'pairarinhuë'. Quëmari noya a'paiton, a'chintëquë', itérin. ¹⁶ Ina quëran itaantarin:

—¿Nosoromiatéranco ti? itérin.

—Nosororanquën mini, Sinioro, ina nitotëran, itantarin.

—Imarinacosopitaso', ohuicaro'sa pochin nipi ni'ton, a'paiquë' noya imamiachinaco, itérin. ¹⁷ Ina quëran naquëranchin itantarín:

—Iya Simon, ¿tëhuënchachin nosororanco ti? itantarín. Cararo' natanin ni'ton, Pitro sëtérin.

—Ya'ipi Sinioro nitotérán. Nosororanquén mini, ina nitotérán, itérin.

—Imarinacosopitaso', ohuicaro'sa pochin nipi ni'ton, noya a'paiquë'. ¹⁸ No'tëquén, iyasha, itaranquén. Quëmaso' hui'napitapon, quëmaora nohuanton, ma'sha ninan. Intohuaso' yapa'patana, nitaparahuaton, pa'nan. Nipirinhuë', a'na tahuëri mashotohuan, ma'sha onpotarinënquén. Cato quëran chachin anquiran'so' tonpoarinënquén. Co nohuantopiranhuë', quëpararinënquén, itérin Pitro.

¹⁹ A'na tahuëri Yosë imarin ni'ton, inapotatona', tëparapi. Ina ni'pachina', na'a piyapi'sari Yosë nónya ni'sapi huachi. Ina ninoton, Quisoso naporin. Ina quëran:

—Imamiatoco iyasha, itérin.

Tiquinamènqué ninshitérahuéso'

²⁰ I'hua coshatapoi, Quisoso pirayan coshatérahuë. Naporo' “¿Inta' Sinioro sha'huirapiarinquénso'?” itérahuë Pitro nitotacaso marë'. Iporaso' sono' yonsanquë Pitro tahuérerahuaton, quënaninco. ²¹ Quënanahuatonco, Quisoso itapon:

—Iso quëmapiso' Sinioro, ¿ma'ta' onpoapon? itérin Pitrori.

²² —¿Onpoatonta' iyasha, ina yonquiran? Nohuantohuato, o'maca'huaso tahuëri huarë' nanopihuachin, co ina quëmaso' yonquicamaso' ya'huérinhuë'. Quëma imaco, itérin.

²³ Naporo quëran huarë' imapisopita ninontopi. “Inaso' co onporonta' chiminarinhuë'”, nitopi. Quisososo niperinhuë' co naporinhuë'. “Nohuantohuato, o'maca'huaso tahuëri huarë' nanopihuachin,” topachina, “co chiminaponhuë'”, co tapon naporinhuë'.

²⁴ Nani carinquëmaso' sha'huitéranguëma'. No'tëquén ninshitéranguëma'. Ya'ipiya nicatoi, nitotérain.

²⁵ Na'con Quisoso a'chinin. Nani ma'sha ninin. Co insonta' nanitaparinhuë' ya'ipiya ninshitacaso'. Ina nápo' quirica ninshitérain naporini, co isoro'paquë téranta' naniitonhuë', topirahuë'. Nani huachi.

Quisoso ca'tano'sanënpita napopiso'

Quisoso nanopiantarahuaton, imapisopita ya'notérinso'

¹ Iya Tiohuiro. Ca Nocasëco ninshitaantaranquën. ¿Noya quëmanta' ya'huanan? Noya canta' ya'huarahuë. A'na quiricaqué nani ninshitérانquën. Ya'ipi Quisoso naporinso' sha'huitérانquën. A'chininsonta' anitotérانquën. ² Ya'ipi inápaqué panantaqué huarë' naporinso' ninshitérانquën no'tequën nitotamaso marë'. Iporaso' naquëranchin ninshitantaranquën. Co'huara Quisoso inápaqué pantayátéraponhuë', ca'tano'sanënpita huayoninso' sha'huitérin paatona' a'chinacaiso marë'. Ispirito Santo nohuanton, sha'huitérin. Inapita napopisonta' nitochin, ta'to, ninshitantaranquën. ³ Quisososo' têhuëñchachin chiminpirihuë', nanopiantarin. Ina piquéran catapini shonca tahuëri isoro'paqué ya'huéantarín. Ca'tano'sanënpita ya'notéra'piarin nanopiantarinso' natëcaiso marë'. Yosë hua'anëntérinso' a'chintaantarín.

⁴ A'na tahuëri inapitarë' ni'so', sha'huitérin:

—Ama a'naroáchin Quirosarin quëran pipicosohuë'. Iséqué ninaco' Ispirito Santo o'main. “Ispirito Santo a'patimaranquëma'”, ténin Tata Yosë. I'hua chachin sha'huitérانquëmaso'. ⁵ Coanshaso' i'quë aporintérinquëma'. Iporaso nipurinhuë' Ispirito Santo aya'coancantaránquëma' catahuainquëmaso marë'. Co hua'qui quëranhuë' ya'coancantaránquëma', itérin ca'tano'sanënpita.

Quisoso inápaqué pantarinso'

⁶ Ina quëran niyontoantarahuatona', Quisoso natanpi:

—Iráca Sinioro israiro'sa' pancana hua'anëntopirinahuë'. ¿Ipora chachin chiníquën nanantaton, ina pochin acoantaran ti? itopi.

⁷ —Tata Yoséíchin chini chiníquën nanantérin. Inaora nohuanton, ma'sha acorin. Ma tahuëriso' acoamara. Onporosona napoarinso', co Yosë nohuantérinhuë' canpita nitotacamaso'. ⁸ Iporaso nipurinhuë' Ispirito Santo na'con catahuainquëma'. Ya'coancantohuachingquëma', nöya pënëntarama'. Ina nohuanton, nani ma'sha nanitaparama'. Ya'ipi naporahuëso' ni'nama', nani nitotërama'. A'napitanta' sha'huitoco'. Quirosarinquë chachin sha'huitoco'. Ina quëran ya'ipi Cotia parti paatoma', sha'huitonco'. Samaria partinta' sha'huitonco'. Ya'ipi parti paatoma', sha'huitéra'piaco', itérin Quisosori.

⁹ Ina topachina, Yosëri inápaqué quëpantarin. Ca'tano'sanënpitari nicasoi', inápaqué pantarin. Në'pérápirinahuë', chitorori imotérin. Co huachi quënanpihuë'. ¹⁰ Inápaqué pantaquéya', në'pérápirinahuë', a'nanaya catoya'piri ya'notiimarin, huirítón a'mopiso'.

¹¹ —¿Ma'marëta' caririaro'sanquëma' inápaqué në'pëtërama'? Quisoso nani pantarin. Yosëri inápaqué quëpantapirinhuë', ina chachin o'mantatarin. Inápaqué pa'ninsø pochachin a'na tahuëri o'mantatarin, itérin.

Cotasë ya'huërenamën Matiasë acopiso'

¹² Ina natanahuatona', Oripose' panëñ quëran nohuaramarahuatona', Quirosarinquë paantapi. Co aquëyahuë'. A'na quiromitro pochin aquérinso'. ¹³ Canconahuatona', a'na pëiquë pa'pi. Inapa pë'satë' pëi' ni'ton, nanpëpi. Inaquë naporoyacapatapi. Pitro, Coansha, Santiaco, Antërisë, Pinipi, Tomasë, Partoromi, Matio, inapita ya'huërapí. A'nanta' Santiaco. Arpio hui'nin inaso'. A'na Simonta' ya'huërin. Inaso' copirno no'huina'piro'sa' imapurinhuë', inanta' Quisoso imarin. A'na Cotasënta' ya'huërin. Santiaco hui'nin inaso'.

¹⁴ Inapitaso' nani tahuëri niyontonatona', Yosë nontápi. Quisoso iinpitanta' huë'pi Yosë nontacaiso marë'. Sanapi'santa' inaquë huë'pi. A'nsaso' Maria. Quisoso a'shin inaso'. Napopianachin yonquiatona', inaquë na'con Yosë nontápi.

¹⁵ Ina quëran na'a Quisoso imapisopita niyontonpi. Pasa cato shonca piyapi'sa pochin ya'huëpi. Pitrori huancánachin huanirahuaton, itérin:

¹⁶⁻¹⁷ "Shonca catoya'picoi iyaro'sa' Quisoso nani acorincoi a'napita a'chinta'huaiso marë'. Cotasënta' acorin ni'ton, quiyapitarë' Quisoso ca'tanpirinhüë', inimiconënpitari yamapachina, sha'huirapirin. A'notonpachina, mapi. Iráca Ispirito Santo nohuanton, Cotasë napocaso' ninorin. Tapiri ninoton, Yosë quiricanënquë ninshitérin. Iráca ni-norinso chachin naporin. ¹⁸ Sha'huirapirinso marë' coriqui quëtopi. Ina coriquinënquë no'pa' pa'anpi. Cotasëso' nitëparahuaton, no'paquë anotaton, ya'poirin. Chi'chirinamën pipirin. ¹⁹ Ya'ipi Quirosarinquë ya'huëpisopita natantopi. Natantahuatona', ina no'pa' apoyatopi. Inahuara nananquë *Aquirama* itopi. Aquiramaso', 'Huënai' No'pa', tapon naporin. ²⁰ Yosë quiricanënquë ninoton, ninshitérin:

'Ama insonta' pëinënquë ya'huë'insohuë'.

No'panéonta', tanahuantérarin quëran pantachin,' ténin.

Ina quëran tantarin:

'Ina ya'huérënamën a'na acoantaquë', ténin anta' Sarmo quiricaquë.

²¹⁻²² Napoaton iyaro'sa' a'na quëmapi acoanta'ahua' Cotasë ya'huérëtacaso marë'. Iráca Coansha aporintaso', Sinioro Quisoso caniaririn a'chinacaso'. Naporö' na'a miachincoi Quisoso imarai. Nani tahuëri ca'tanai. Inápaquë panantaquë huarë' ca'tanai. A'nara' Quisoso ca'taniso chachin acoanta'ahua'. 'Quisoso nanopiantarin. Canta' ni'nahuë,' ta'caso marë' acoa'ahua', " ténin.

²³ Ina marë' catoya'pi huayonpi. A'naso' Matiasë. A'nanta' Cosi Parsapa. Costo itopi anta'. ²⁴ Ina quëran Yosë nontopi. "Quëmasáchin Sinioro, ya'ipi cancanëhuë quëran yonquiraiso' nitotéraran. ¿Insota' nohuantéraran acoa'huaiso', ²⁵ inanta' paaton, a'napita a'chintacaso marë'? Cotasë co huachi nanitérinhüë'. Nani a'porinquen ni'ton, parisitopiquë pa'nin," itopi.

²⁶ Ina quëran cato' ya'pi nininënpita cato' na'pitëa'huayaquë ninshitopi. Yontëra'huayaquë po'morahuatona', pa'tan pa'tantohuachinara, Matiasë nininënpipirin. Shonca a'nara' ca'tano'sanënpita ya'huëpirinahuë', iporaso huachi shonca cato' ca'tano'sanënpita ya'huantapi.

2

Ispirito Santo o'marinso'

¹ Ina quëran Pinticosti tahuëri nanihuachina, Quisoso imapisopita inaquéráchin niyontonpi. ² A'nanya chiníquen irininso' natanpi. Panca ihuan pochin ténentérimarín. Inápa quëran o'marin. Ya'ipi pëianaquë ténéanahuanin. ³ Ina quëran pën nénérinso pochin nininsopita ya'noimarin. Ya'ipiya a'naya a'naya motoanshirainënaquë chiniimarin. ⁴ Napohuachina, Ispirito Santori ya'ipiya ya'coancantérin. Ina quëran inari catahuarin nisha nisha nananquë nonacaiso marë'. Co nitotaponaraihuë', a'naroáchin nonpi huachi.

⁵ Ina ninanoquë chachin na'a cotioro'sa' ya'huëapi. Nisha nisha parti quëran huë'pi Yosë chinotacaiso marë'. Napoaton nisha nisha nananquë nonpi. ⁶ Quisoso imapisopita nisha nisha nananquë nonsapiso' natanpi. Natanaahuatona', notohuaro' piyapi niyontonpi. A'naya a'naya inahuara nananquë nonpiso' natanahuatona', pa'yani.

⁷ Chiníquen pa'yanatona', ninontopi.

—Ma'pitata' natanëhuaso'. Isopitaso Cariria parti ya'huëpisopitaráchin niponaraihuë', ⁸ ¿onporahuatonata' canpoa' nisha nisha nananquë nonëhuaso pochachin inahuanta' a'naroáchin nonpi? topi. ⁹ Nisha nisha parti ya'huëpisopita nani huë'pi. Partiaro'sa', miriaro'sa', irano'sa', Misapotamiaquë ya'huëpisopita, Cotia parti ya'huëpisopita, capatosiaro'sa', pontoro'sa', asiaro'sa', inapita natanapi. ¹⁰ Piriquiaro'sa', panpiriaro'sa', iquipitoro'sa', nipiario'sa', Sirini pirayan ya'huëpisopita, inapitanta' nani huë'pi.

Ni'toro'sa' Noma quëran huë'pisopitanta' natanapi. ¹¹ A'naquën cotioro'sa', a'naquën nisha piyapi'sa' níponaraihuë', Yosë chinotopi. Critaro'sa', arapiro'sa', inapitanta' huëcatona', natanapi. "Nisha nishanpoa' nicarihuarahuë', canpoa' nanamënpoaquë chachin nontarinënpoa'. Yosë pa'yápiro nininso' sha'huitarinënpoa', natanëhua'.

¹² Ma'pitata' napopi," ta'tona', pa'yanpi.

—¿Onporahuatonata' naponontérinënpoa'? topi. ¹³ A'naquënso nípirinhuë' tēhuarahuatona':

—No'pitona', napoapi, toconpi.

Pitro pënëntérinso'

¹⁴ Shonca cato' ca'tano'saso nípirinhuë', co tē'huatonaraihuë' huanipi. Pitroso' a'ninquëchin huanirahuaton, chiniquën nontérin ya'ipi piyapi'sa' natanacaiso marë'. "Noya natanco iyaro'sa'. Ya'ipima Quirosarinquë ya'huëramasopitanta' natanco onporaison a no'téquën sha'huichinquëma'. ¹⁵ Isopita no'pipi,' topiramahuë', co no'piraihuë'. Co yono pi'iyátérarinhuë'. Co tashiramiachin no'piréhuë'. Ispirito Santo ya'coancantérinco ni'ton, naporai. ¹⁶ Iráca pënëntona'pi Coiro itopiso', ninoton ninshitérin ipora ni'saramaso'. Yosë noninso chachin ninshitaton, tapon:

¹⁷ A'na tahuëri ispiritónéhuë a'pamarahuë

nisha nisha piyapi'sa' ya'coancantacaso marë'.

Ya'coancantohuachin, hui'namapita nanamëhuë sha'huirapi.

Hui'napi'santa' co huë'éponaraihuë', hua'narëso pochin quënanapi.

Mashoro'santa' hua'narapi.

¹⁸ Naporó' ya'ipi natérinacosopita

ispiritónéhuëri ya'coancantarín.

Ina nohuanton, nanamëhuë sha'huirapi.

¹⁹ Inápaquë nani ma'sha acoarahuë. Piyapi'sa' quënanpachina', pa'yanapi.

Isoro'paquënta', ma'sha acoarahuë piyapi'sa' yonquicaiso marë'. Huënai', pën, conai' tomontarinso', inapita ni'sapi, ténin Yosë.

²⁰ Sinioro o'macaso' tahuëri na'con yonquicaso' ya'huërin.

Co'huara naniyatérasohuë', nani ma'sha onporapi. Pi'i tashiarin.

Yoqui quëhuashin huënai pochin nisarin. Yosë yonquicaiso marë' inapoarin.

²¹ "Nichá'ëco Sinioro," topachina', nichá'ësarín.

Anoyacancantahuaton, nichá'ësarín huachi,' ténin Coiro iráca ninshitaton.

²² Natanco iyaro'sa'. Canpitanta' israiro'sanquëma' ni'ton, Yosë nanamëñ anitatarinquëma'. Quisoso naporinso' sha'huichinquëma', nitotoco'. Inaso' Nasaritoquë ya'huërin. Nani ma'sha nanitaparin. Piyapi a'naroáchin anoyatérin. Co ina pochin ni'chinéhuahue'. Yosëri catahuarin ni'ton, naporin. Napoaton: 'Tëhuëñchachin Yosë quëran o'marin,' topi. Canpitanta' nicatoma', nitotérama'. ²³ Napoaponahuë', canpitari atëpatérama'. Masahuatomá', nisha piyapi'sa' quëtonama' corosëqué têpacaiso marë'. Co Yosë natëpihuë' ni'ton, têpapi. Iráca chachin Yosëri yonquirin hui'nin chiminacaso'. Ina nohuanton, oshanënpoa marë' chiminin. Co nohuantérinhuë' naporini, co macacamaso' nanichitomahuë'. Canpitari atëpatopiramahuë', ²⁴ Yosëri ananpitaantarín. Chimirin quëran nichá'ërin. Co chimirini minsérinhuë'. ²⁵ Ina yonquiaiton, Tapi iráca tapon:

'Nani tahuëri Sinioro ca'tanarinco. Inchinanëhuë quëran ya'huërarin achinicancaincoso marë'. Catahuarinco ni'ton, co pa'yanahuë'.

²⁶ Napoaton noya cancantérahuë. Ma noyacha Tata Yosëso paya, ténahuë.

Co naniantarincuhuë', ta'to, co chimina'huaso' tê'huatérahuë'.

²⁷ Yosë yonquiaito, nontarahuë. Hua'yanëhuë, Sinioro, co chimipiro'sa ya'huërinquë tê'yataranhue'.

Quëmasáchin natérinquëñ ni'ton,

co nohuantaranhuë' nonëhuë chanatacaso'.

28 Quëma iranën a'notérando. A'chintérando quëma nohuitaténquën nóya nanopica'huaso'. Nani tahuëri ca'tananco ni'ton, nóya cancantarahuë', ténin Tapi, iráca ninshitaton.

29 Ni'cochi iyaro'sa'. Tata masho Tapi nani chiminin. Iráca nani pa'pitopi. Pa'pitopiso' ipora huanta' ya'huérarin. 30 Co'huara chimiyantérasohuë', Yosëri itérin: 'A'na tahuëri quëma shiparinqüën acoarahuë hua'anëntacaso marë'. Quëma ya'huérénomë hua'anëntarin. Caso' Yosëco ni'to, co nonpintaranquënhuë', itérin. Napoaton shia'huain ninoton, ninshitérin. 31 Cristo nanopiantacaso' ninorin. 'Co chimipiro'sa ya'huérinquë patarancohuë'. Co nonéhuë chanatarinhuë', ténin iráca ninoton. 32 Iporaso' Quisoso chachin Yosëri ananpitaantarin. Quiyari ni'nai. 33 Ina quëran Yosëri inápaquë quëpantarin. Chiníquën nanantérin ni'ton, inchinanën quëran ahuënsérin. Inapotahuaton, sha'huitérin: 'Ispirito Santo a'pamaquë' piyapi'sa' ya'coancanchin. Ihua sha'huitéranchuë', itérin. Ina quëran Quisosori Ispirito Santo a'paimarin, ya'coancantérincoi, ni'nama'. Napoaton nisha nisha nananquë nonai, natanama'. 34 Tapi co nanopiantaton, inápaquë pantarinhuë', nitotéréhuan. Napoaponahuë', ninshitaton, tapon:

'Yosëri Siniñorónahuë sha'huitérin:
"Inchinanéhuë quëran huënsqué'

35 inimiconénpita cari minséchinquën," itérin Yosëri, ténin.

36 Yosë hui'nin chachin iyaro'sa', coroséquë apatanantérama'. Inapotopiramahuë', Yosëri noya noya ni'nin. 'Inaso' Cristo, a'paimarahuë'. Siniñoro ni'ton, natécaso' ya'huérin, ténin. No'tequen iyaro'sa' nani sha'huitéranchuë', itérin.

37 Piyapi'sa' natanahuatona', na'con sëtopi.

—Co noyahuë' ninai. ¿Ma'ta' iyaro'sa', onpo'iiso'? itopi ca'tano'sa'.

38 Napotohuachinara, Pitrori itaantarin:

—Ya'ipi co noyahuë' yonquiramasopita nariantatoma', Yosë chachin tahuërétantaco'. "Quisocristo imarahuë," ta'toma', aporihuanc'. Ina imapatama', Yosë oshanëma' inquitarinquëma'. Ina quëran Ispirito Santo aya'coancantarinquëma' canpitanta'.

39 Yosë nohuanton, Ispirito Santo a'patimarinpoa'. Canpitanta' ya'coancantarinquëma'. Hui'namapitanta' ya'coancantarín. A'naquëonta' aquë ya'huépirinahuë', Yosë nohuanton, imasapi. Imapachina', Ispirito Santori ya'coancantarín inahuanta', itérin.

40 Itahuaton, na'con pënënin.

—Ipora ya'huépisopita co manta' Yosë yanatépihuë'. Ina marë no'tequen ana'intarin. Canpitaso niperinhuë' ama inapita pochin cancantocosohuë'. Yosë nontoco' anoyacancanchinquëma'. Ina quëran cha'ésarama', itérin.

41 Napotohuachina, na'a natétopi. Naporahuatona', i'quë aporihuani. Naporo' tahuëri cara huaranca pochin piyapi'sa' ya'conpi. Quisoso imasapi. 42 Ca'tano'sa a'chinpachinara, pa'yatopi natanacaiso'. Noya natanatona', natépi. Noya nini'tona', ya'huérapi. Quisoso chiminiso' yonquiatona', coshatapatapi. Naporahuatona', apira apira Yosë nontapi.

Quisoso imatona', noya ya'huépiso'

43 Siniñorori catahuahuachina, ca'tano'sa' nani ma'sha nanitapapi. Na'a piyapi'sa' a'naroáchin anoyatopi. Ya'ipi piyapi'sari nicatona', pa'yanpi. "Téhuëñchachin Yosëri catahuarin," topi. 44 Ya'ipi Quisoso imapisopita noya nini'tona' ya'huérapi. A'na huëntoíchin pochin nipi. A'naya a'naya ma'sha pahuantohuachinara, nicatahuapi. Co niapiratopihuë'. 45 A'naquenyo' ma'shanënapita pa'anahuatona', coriqui ma'patopi. Ina quëran a'napita pahuantohuachinara, quëtopi. 46 Nani tahuëri Yosë chinotopiso pëiquë niyontonpi. Quisoso chiminiso' yonquiatona', a'na pëiquë a'na pëiquë coshatapatapi. Co apiratonaraihuë', noya cancantapi. Noya cancantatona', coshatapatapi. 47 "Ma noyacha Yosëso paya," tosapi. Ya'ipi piyapi'sari noya ni'pi. Nani tahuëriya a'napitanta' imasapi ni'ton, Yosëri anoyacancantérin. Ina nohuanton, inapitanta' ya'conpi.

3

Apia anoyatérinso'

¹ A'na tahuëri pi'i tēhuërenahuaso', Pitro pa'sarin Yosë chinotopiso pëiquë. Naporo' ora niyontonatona', Yosë nontopi. Coanshare' pa'sapirinhue'. ² Inaquë a'na quëmapi quënanconpi. Nasitérin quëran huarë' co nanitérinhue' iratacaso'. Nani tahuëri Yosë chinotopiso pëiquë quëpapi. A'na ya'coanaquë acopi, "Noyápiachin," itopiquë. Inaquë acopi coriqui ma'patacaso marë'. Piyapi'sa' Yosë chinotopiso pëiquë ya'compachinara, coriqui ma'patérin. ³ Pitro, Coansha, inapita ya'conasoi', apiari quënanin. Quënanahuaton, coriqui quëtacaiso' nohuantopirinhue'. ⁴ Pitro, Coansha inapitari ni'sahuatona':

—Ni'coi iyasha, itérin Pitrori.

⁵ "Coriqui quëtarinco," ta'ton, né'pëtarin. ⁶ Pitroriso nimirinhue':

—Co coriqui ya'huëtopirincohue', nanitato, anoyataranquën. Quisocristo Nasaritoquë ya'huërinso' nanan quëtérinco ni'ton, anoyataranquën. Ina nohuanton, noyataran. Huanirahuaton, noya iratéquë', itérin.

⁷ Inchinan imira quëran masahuaton, ahuanirin. A'naroáchin ca'yopirain nantëre chachin chinirin. ⁸ Ina quëran pashitiquintarahuaton, huanirin. Iratarin. Pitro, Coansha, inapita Yosë chinotopiso pëiquë ya'compachinara, inapitarë chachin apianta' ya'conin. Noya irataton, niirárin. "Ma noyacha Yosëso paya," tosárin. ⁹ Inapohuachina, ya'ipi piyapi'sari ni'pi. "Ma noyacha Tata Yosë catahuarinco paya," ta'ton, iratárin. ¹⁰ Ni'sahuatona', piyapi'sari nohuitopi ni'ton, pa'yanpi. "Isoso' quëmapi, Yosë chinotopiso pëi' ya'coananëñquë huënsërahuaton, coriqui ma'pachantérinso'. ¿Onporahuatoncha noya iratérin nicaya?" nitopi.

Yosë chinotopiso pëiquë Pitro pënëntérinso'

¹¹ Apia anoyatérinsoso': "Ama patocosohue', ta'ton, Pitro, Coansha inapita co a'porinhuë'. Cara chachin "Saromon ishpananën," itopiquë pa'pachinara, notohuaro' piyapi'sa' manorahuatona', inaquë niyontonpi. "Ma noyacha ni'ton, apia a'naroáchin anoyatérin paya," ta'tona', pa'yanpi. ¹² Inapita ni'sahuatón, Pitrori itapon: "¿Onpoatonta' iyaro'sa' iso quëmapi nicatoma', pa'yanama'? ¿Onpoatonta' quiyanta' ni'saramacoi? Co quiyora nanitaparaihue' anoyata'huaiso'. Co quiyaso' noya noyacoihuë'. Yosë nohuanton noyataton, iratarin. ¹³ Iráca shimashonënpoapita Apraan, Isaco, Cacopo, inapita Yosë chinotopi. Ina Yosëri chachin Quisoso noya noya acorin. Nicha'ëinpoaso marë' a'paimapirinhue', canpitari masahuatoma', hua'ano'saquë yo'conama'. Piratori yaocoipirinhue', co canpita nohuantéraramahuë'. ¹⁴ Quisoso noyasáchin ninin. Co pi'pisha térranta' oshahuanpirinhue', co nohuantéraramahuë'. 'Inta' ocoichinquëma'? itohuachinquëmara, tépatona'pi huayonama'. ¹⁵ Quisoso mini ananpirinpoaso nimirinhue', atëpatérama'. Tépapirinahuë', Yosëri ananpitaantarin. Quiyaso' ni'nai. ¹⁶ 'Quisoso catahuarincoi,' ta'toi, iso apia nohuitéramaso' anoyatérain. Inanta': 'Inaso', catahuarinco mini,' ta'ton, noya pa'sarin ni'nama' canpitanta'.

¹⁷ Quisoso Yosë quëran o'mapirinhue', co nitotéraramahuë'. Napoaton, iyaro'sa', atëpatérama'. Hua'ano'sanémanta' co nitotopihuë'. ¹⁸ Iráca pënëntona'piro'sa' ninotona', ninshitopi. 'A'na tahuëri Cristo parisitapon,' topi. Yosë nohuanton, ninopi. Ninopiso pochachin parisitérin. ¹⁹ Napoaton iyaro'sa' ya'ipi co noyahuë' yonquiramasopita nariantatoma', Yosë chachin tahuëretantaco' oshanëma'inquichinquëma'. ²⁰ Quisocristo imapatama', anoyacancantarinquëma' ni'ton, sano cancantararama'. A'na tahuërinta' ina chachin a'patimantarinquëma'. Canpita marë' nani Yosëri acorin. ²¹ Iráca quëran huarë' Yosë nohuanton, noya pënëntona'piro'sa' ninopi. 'A'na tahuëri Yosëri ya'ipiya anoyatarin,' topi. Anoyataquë huarë' inápaquë Quisoso ya'huantarin. ²² Iráca Moisésëri ninoton, shimashonënpoapita sha'huitérin: 'A'na tahuëri Yosë nohuanton, a'na pënëntona'pi

ya'huapon, ca pochin nininso'. Inaso' Israiro quëmapi. Pënënpachinquëma', ya'ipi natëco'.
 23 Insosona co natëhuachinhüe', ya'huërama quëran ocoimiatamaso ya'huërin,' ténin.

24 Ya'ipi pënëntona'piro'sa' iso tahuëri'sa' ninopi. Samoiro quëran huarë' napopi. 25 Yosë nohuanton, ninshitérinënquëma', nitotërama'. Yosë chachin naporinso' natanama'. Shimashonënpita nontohuachina, yonquirinquëma' canpitanta'. Iráca Apraan itérin: 'Caora nohuanto, catahuaranquën. Quëma shiparinpita quëran ya'ipi piyapi'sa' noya cancantapi,' itérin Yosëri. 26 Canpita'ton yonquiatënquëma', hui'nin ananpitaantarahuatón, a'parin catahuainquëmaso marë'. Ina catahuahuachinquëma', co noyahüe' ninamasopita nariantarama'. Ina quëran noya cancantarama'. Ina marë' Quisoso a'paimarin," itérin.

4

Pitro, Coansha, inapita mapiso'

1 Pitrori a'chintohuachina, na'a piyapi'sa' natanapi. Coansharinta' pënënin. Pënëntasoi', corto hua'ano'sa' canquipi. Ponisiaro'sa' hua'anën, satosioro'sa', inapitanta' canquipi. 2 Piyapi'sa' a'chintopiso marë' no'huipi. "Quisoso nanopiantarin ni'ton, nanopiantacaso' ya'huërin," topiso marë' no'huipi. 3 Napoaton cato chachin mapi. I'huaraya ni'ton, tashinan pëiquë po'mopi. "Tashiraya natahuan," ta'tona', napotopi. Naporo' tashi' inaquë tahuërianpitopi. 4 Na'a piyapi'saso niperinhuë' nanamëñ natanahuatona', natëpi. Nani a'natérápo huaranca pochin quëmapi'sa' Quisoso imasapi.

5 Tahuërinquë ya'ipi cotio hua'ano'sa' niyontonpi. Corto hua'ano'sa', ansiano'sa', maistro'sa', inapita huë'pi. Quirosarinquë chachin niyontonpi. 6 Nisha nisha corto hua'ano'sa' huë'pi. Anasë chini chiníquën nanantérinso', Caihuasë, Coansha, Aricantro, inapita huë'pi. Corto hua'ano'sa' quëmopinënpitarë chachin niyontonpi. 7 Pitro, Coansha, inapita maconahuatona', ahuancanapipi natanacaiso marë'.

—¿Onporahuatomata' chiníquën nanantatoma', apia anoyatërama'? ¿Inta' nanan quëtérinquëma' anoyatacamaso'? itopi.

8 Ispirito Santori noyá ya'coancantërin ni'ton, Pitrori itapon:

—Natanco hua'ano'sanquëma' ninamaso'. 9 Téhuëncachin co quiyaora nanitëraihiue' apia anoyata'huaiso'. "¿Onporahuatomata' anoyatërama'?" itéraramaco ni'ton, 10 no'tequëñ sha'huitaranquëma', nitotoco'. Ya'ipi israiro'sa' nitochina'. Quisocristo Nasaritoquë ya'huërinso' nanan quëtérincoi anoyata'huaiso'. Ina catahuarincoi ni'ton, anoyatërai. Yosëri a'paimapirinhuë', canpitariso' corosëquë apatanantërama'. Tëpapiramahuë', Yosëri ananpitaantarin. Ina nohuanton iso quëmapi nani noyataton, isëquë huanirarin. 11 Ni'cochi. Yosë quiricanënquë naporin: "Pëi' nina'piro'sa' pëihuachina', a'na na'pira' quënanpirinahuë', co nohuantopihuë'. 'Napoonin,' ta'tona', të'yatopirinahuë'. Hua'anëni maantarahuatón, 'Iso na'pi na'con na'con nohuantérahuë pëica'huaso marë', ta'ton, noya acoantarin," ténin. Quisocristoso' ina na'pi pochin. Canpita co nohuantopiramahuë', Yosëri noya noya ni'nin. 12 Quisocristoíchin anoyacancantërinpoa'. Co a'na nanitërinhuë' nicha'ëinpoaso'. Inaíchin nanitërin nicha'ëinpoaso', itérin Pitrori.

13 Ina natanahuatona', cotio hua'ano'sa' ninontopi. "Isopitaso' topinan piyapi'sa'. Co maistro'sahuë'. Co na'con quirica nitotaponaraihiue', co të'huatërinënpoahuë'. Ma'pitacha nitotopi paya. Quisoso ca'tanpi ni'ton, ina pochin cancantopi," nitopi. 14 Quëmapi nani noyatérinso' inaquë huanirarin ni'ton, co nanitopihuë' "Nonpinápi," ta'caiso'. 15 Pitro, Coansha, inapita aipiran a'parahuatona', inahua capini ninontapi.

16 —¿Ma'ta' isopita onpotahua'? Apia nani anoyatopi. Ya'ipi Quirosarinquë ya'huëpisopita nitotopi. Nani ni'pi. Co nanitërehuahuë' "Nonpinápi," ta'caso'. 17 Niperinhuë', ama aquëtë' piyapi'sari natëcaiso marëhuë' pënëanhuan'. "Ama huachi Quisoso nanamëñ sha'huicosohuë'," itahua', nitopi.

¹⁸ Ina quëran amatantarahuatona', pënënpí. "Ama aquëtë' a'chintantacosohuë'. Ama Quisoso nanamën sha'huitantacosohuë'," itopi. ¹⁹⁻²⁰ Napotopirinahuë', Pitro Coansharë chachin co yanatëtopihuë'.

—Yosë natëtoi, co nanitëraihuë' canpita natëca'huainquëmaso'. Co quiyaso' nanitëraihuë' ta'tahuaiso'. Ni'naiso' sha'huirápoi. Natanaisonta' sha'huirápoi. "Co Yosë natëcaso' ya'huérinhuë'," ¿tënama' ti? itopi.

²¹⁻²² "Co natëhuatamacoihuë', ana'intarainquëma'," itahuatona', a'papi. Apia anoy-atërinso' nani catapini shonca na'con pi'ipitérin ni'ton, ya'ipi piyapi'sari pa'yatopi. "Yoséichin nanitërin anoyatacaso'. Ma noyacha Yosëso paya," topi ya'ipi piyapi'sa'. Napoaton hua'ano'sari co nanitopihuë' ana'intacaiso'.

Yosë nontopiso'

²³ Nani Pitro, Coansha, inapita a'pahuachinara, imapisopitataquë paantarahuatona', sha'huiconpi. "Corto hua'ano'sa', ansiano'sa', inapita chiníquën pënëninacoí ama a'china'huaiso marëhuë'," itopi. ²⁴ Napotohuachinara, napopianachin yonquiatona', Yosë nontopi: "Quëmasáchin Sinioro chini chiníquën nanantëran. Isoro'pa', inápaquë ya'huérinsopita, iiro'sa', ya'ipi ma'sharo'sa', inapita acoran. ²⁵ Quëma nohuanton, iráca Tata masho Tapi ninshitérin. Inaso' noya natërinquënsó'. Ispirito Santori ayonquirin ni'ton, no'tequëns ninshitaton, itapon:

'Inpio naciono'saquë ya'huëpisopita, co no'tequëns yonquipihuë'.

Sinioro co quë'yatonaraihuë' pinosapi:

"Huëco canpoari minséhua","

ta'tona', ma'sha onpotacaiso' yonquirapi.

²⁶ Copirnoro'sa', hua'ano'sa', inapita niyontonpi.

Sinioro ahuëcaiso marë' nisha'huitapi.

Copirno huayoninso chachin Cristoso nipirinhuë', co nohuantopihuë', ténin Tapi iráca ninshitaton.

²⁷ Iso ninanoquë chachin Sinioro, piyapi'sa' yonquipi hui'nan tēpacaiso marë'. Inaso' noya nipirinhuë', tēpapi. Quëmari acoranso nipirinhuë', co quë'yapihuë'. Irotisé, Ponsio Pirato, nisha piyapiro'sa', israiro'sa', inapitari Quisoso no'huipi. ²⁸ Quëmaso nipirinhuë' chini chiníquën nanantëran. Co nohuantëranhuë' naporini, co nanitapaitonahuë'. Iráca quëran huarë' yonquiran ina chiminacaso' ni'ton, aparisitopi. ²⁹ Iporaso' Sinioro, quiyanta' no'huirinacoiso', nitotëran. Quëmasáchin yanatërainquënsó' ni'ton, catahuacoi chiníquën cancantatoi, quëma nanamën sha'huii. ³⁰ Cania'piro'santa' quëmari anoyatëquë'. 'Yosë hui'nin chachin nanan quëtérincoi,' topatoi, catahuacoi piyapi'sa' noyachina'. Ina ni'pachina', yonquiapi huachi," itopi Yosë nontatona'.

³¹ Nani Yosë nontohuachinara, ina nohuanton, pëi' nacon nacontarin. Ispirito Santori ya'ipiya noyá ya'coancantérin. Chiníquën cancantatona', Yosë nanamën sha'huirapi.

Imapisopita capini ninosoropiso'

³² Ya'ipi Quisoso natëpisopita noya nini'tona', ya'huëpi. Napopianachin yonquipi. A'naya a'naya pahuantohuachinara, niquëtopi. Co manta' niapiratopihuë'. ³³ Ca'tano'sa' na'con sha'huirapi. "Sinioro Quisoso nanopiantarin. Nani ni'nai," topachinara, na'a piyapi'sa' noya natanpi. Yosëri ya'ipiya catahuarin. ³⁴ Napohuachina, co a'naya téranta' ma'sha pahuantërinhuë'. A'naya a'naya no'panëñ, pëinëñ, ma'shanëñ, inapita ya'huëtohuachinara, pa'anpi. ³⁵ Pa'anahuatona', coriqui canapiso' ca'tano'sa' quëtopi piyapi'sa' quëtacaiso marë'. A'naya a'naya pahuantohuachinara, quëtopi. ³⁶ Naporo' a'na quëmapi ya'huërin. Cosi itopiso'. Ca'tano'sari nisha nininëñ acotopi. Pirnapi itopi. Pirnapiso': "Achinicancantona'pi," tapon naporin. Inaso' Nihui huënton quëmapi, Chipriquë hua'huatérinso'. ³⁷ Inanta' no'panëñ pa'anin. Pa'anahuaton, ya'ipi coriqui canarinso' ca'tano'sa' quëtérin pahuantërinopita quëtacaiso marë'.

5

Ananiasë sa'inë chachin nonpininso'

¹ A'na quëmapi Ananiasë itopisoso' nimirinhue' yanopinin. Sa'inso' Sahuira itopi. Inahuaso' no'panëna pa'anpirinahuë', co nohuantopihuë' ya'ipi canapiso' yocacaiso'. ² Napoaton ninontopi. "Coriqui yo'conpatë', onposona canarëso' ama sha'huitasohue'. Ya'ipimiáchin quëtérëso pochin quëta noya ni'inënpo', itérin sa'in. "Inta nipachin inapota," topachina, patoma coriqui canarinso' po'orahuaton, taparin. Napopinchin ca'tano'sa' quëtontarin. ³ Co Pitroso' sha'huitopirinhue', Yosë nohuanton, nitotérin. Nitotaton, Ananiasë itérin:

—¿Onpoatonta iyasha Sopai natérän? Ispirito Santo yanopintaton patoma coriqui canaranso' quëmaora marë' taparan. ⁴ Co'huarda pa'ayantéraponhuë', no'paso' quëmaquën. Quëmaora nohuanton pa'an. Ina quëran nani pa'anpatana coriqui canaransonta', quëmaquën. Co nohuantohuatanhue', co ya'ipi quëtacaso' ya'huë'itonhue'. "Ya'ipimiáchin coriqui Yosë quëtarahuë," tēcaton nonpinan. Co iyasha, napo'itonhue'. Co piyapiáchin nonpintéranhue'. Yosënta' yanopintopiranhuë', co inaso' nanitéranhue' nonpintamaso', itérin.

⁵ Ananiasë natanahuaton, a'naroáchin no'paquë anotaton, chiminin. Piyapi'sari ni'pachinara, pa'yanpi. A'napitanta' natantahuatona', pa'pi tē'huatopi. ⁶ Ina quëran hui'napi'sari nonënso' so'pinahuatona', quëpapi pa'pitacaiso' marë'.

⁷ Cara ora quëran pochin, sa'ionta' huë'nin. So'in chiminiso' co nitochátérarinhuë'. ⁸ Huë'pachina, Pitrori itapon:

—Pi'pian imoya yanatananquën. Achin so'yan isonapo' coriqui quëtérincoi. ¿Isonápo marë' no'panëma' pa'anama' ti? itérin.

—Inanapo marë' mini pa'anai, ténin sanapi.

⁹ —¿Onpoatonta' imoya campita capini ninontatoma', Ispirito Santo yanopintopiramahuë'? "Co ina ana'intarinpohue', ta'toma', napopiramahue'. Ni'quë'. Quëmapi'sa' so'yan pa'pitopisopita nani huënantarapi. Quëma' ya'huëre' quëpantarinënquën pa'pitinënquënso marë', itérin Pitrori.

¹⁰ Itohuachina, a'naroáchin chiminaton, inaquë chachin anotérin anta'. Hui'napi'sa' huëntarahuatona', chimipi quënanquinantapi. Inanta' quëpantarahuatona', so'in pirayan pa'pitopi. ¹¹ Ya'ipi Quisoso huëntonënquë ya'conpisopita tē'huatopi. A'napitanta' natantahuatona', "Ana'intojuachinpoa' canpoanta'," ta'tona' pa'pi tē'huatopi.

Cania'piro'sa' a'naroáchin anoyatopiso'

¹² Naporor' tahuëri'sa' Yosë nohuanton, ca'tano'sa' nani ma'sha nanitapapi. Na'a cania'piro'sa' së'huarahuatona', a'naroáchin anoyatopi. Piyapi'sari ni'pachinara, "Téhuëñchachin Yosëri catahuarin," topi. Ya'ipi imapisopita "Saromon ishpananën," itopiquë niyontonapi. ¹³ Imapisopitaráchin inaquë niyontonpi. A'napitaso': "Ana'intojuachinpoa'," ta'tona', co inaquë niyontonpihuë'. Napoaponahuë', "Inapitaso' nöya piyapi'sa'," topi ya'ipi. ¹⁴ Naporahuaton, na'con na'con piyapi'sari Quisoso natëtona', imasapi anta'. Na'a quëmapi'sa' sanapi'sarë chachin ya'conachinpi.

¹⁵ "Quisosori catahuarin ni'ton, ca'tano'sa' nani ma'sha nanitapapi," ta'tona', na'a cania'piro'sa' quëntarahuatona', cachique' acooni anoyatacaiso marë'. A'naquënen nantëtëre chachin acooni. A'naquëonta' sahuanasaquë têranta' aquëhuënp. "Pitro pa'pachin, hua'yanëñ têranta' tashinantohuachin, noyatapon nimara," ta'tona', quëntapi. ¹⁶ Ya'cariya ninanoro'sa' quëraonta' huë'pi. Quirosarinquë huë'sahuatona', cania'piro'sa' quëpi. Sopairi ahua'yantérinsopitanta' quësapi. Yosë nohuanton, ya'ipiya anoyatopi.

Cotio hua'ano'sari aparisitopiso'

¹⁷ Napohuachina, corto hua'an chini chiníquën nanantérinso' no'huitérin huachi. "Na'con na'con piyapi'sa' Quisoso imasapi," ta'ton, apiratérin. Satosioro'santa' no'huitopi. ¹⁸ Napoaton ca'tano'sa' masahuatona', tashinan pëiquë po'mopirinahuë'. ¹⁹ Yono tashi' Sinioro anquënин huë'sahuaton, ya'coana i'soatiirin. Ca'tano'sa' aipiran quëparahuaton, sha'huitérin: ²⁰ "Yosë chinotopiso peiquë paco'. Inaquë pa'sahuatoma', piyapi'sa' a'chintoco' nasha pochin nanopicaiso marë'," itérin anquëniri. ²¹ Ina natanahuatona', tashiramiachin Yosë chinotopiso pëiquë pa'pi. Piyapi'sa' huë'pachinara, a'chintapi.

Corto hua'an chini chiníquën nanantérinso', satosioro'sa', inapitaso' co nitotatonahuë', niyontonahuatona', ya'ipi hua'ano'sa', Israiro ansiano'sa', inapita amatopi. Huë'pachinara, ponisia a'papi inapita maconacaiso marë'. ²² Ponisiaro'saso' tashinan pëiquë pa'pirinahuë', co insonta' quënanpihuë'. Huëantarahuatona', sha'huitiipi.

²³ —Tashinan pëi' noya niahuitopinan quënanconai. Ya'coanaquë ponisiaro'sa' a'pairápirinahuë'. I'soapiraihuë', capa piyapi huachi, itiipi.

²⁴ Natanahuatona', ponisiaro'sa' hua'anen, corto hua'ano'sa' chini chiníquën nanantopisopita, inapita pa'yanpi. Pa'yanahuatona', ninontopi. "¿Intoacha pacaiya? ¿Ma'ta' onpoapona napoapi?" nitopi. ²⁵ Naporo' a'na quëmapiri huë'sahuaton, sha'huitiirin.

—Quëmapi'sa' tashinan pëiquë po'moramaso', Yosë chinotopiso pëiquë piyapi'sa' a'chintapi, itérin.

²⁶ Ina quëran ponisiaro'saso' hua'anenarë chachin pa'sahuatona', macoantapi. Piyapi'sa' të'huatatona', co ahuëpihuë'. "Na'pique të'yarahuachinénpoa'," ta'tona', os-haquëran mapi. ²⁷ Hua'ano'sa' niyontopique quëpapi. Inaquë quëpahuachinara, hua'an chini chiníquën nanantérinsori itapon:

²⁸ —Nani pënénaténquëma': "Ama huachi Quisoso nanamën a'chincosohuë", itopiran-quëmahuë', aquë aquëtë' a'chinarama'. Ya'ipi Quirosarinquë ya'huëpisopita natanapi. Inapoatoma', Quisoso chimininso marë' na'intaramacoi, itérin.

²⁹ —Pënénpiramacoihuë', Yosë na'con na'con natëcaso' ya'huérin. Napoaton co nanitérainhuë' natëca'huainquëmaso'. ³⁰ Tëhuëñchachin coroséquë patanantatoma', Quisoso têpapiramahuë', shimashonénpoaapita chinotérinso Yosëri chachin ananpitaantarin. ³¹ Inapotahuaton, inchinanën quëran acorin. Inaso' hua'anenpoa' ni'ton, natëcaso ya'huérin. Noya nicaton ya'ipi israiro'sanpoa' nicha'ëinpoaso marë' acorin. Co noyahue' yonquiréhuasopita nariantohuatéhua', oshanenpoa' inquitarinpoa'. ³² Ina nitotatoi sha'huirárai. Ispirito Santorinta' inachachin anitotarin. Yosë natëhuatéhua', Ispirito Santo aya'coancantarinpoa', itérin Pitrori.

³³ Cotio hua'ano'sari natanahuatona', chiníquën no'huiantaráhuatona', yatëpapirinahuë'. ³⁴ A'na hua'an ya'huérin. Inaso' cotio maistro. Camariro itopi. Parisio quëmapi níponahuë': "Noya quëmapi inaso'," topi ya'ipi piyapi'sa'. Inaso' huanirahuaton, itérin:

—Isopita aipiran ocoico' pi'pian nonchinquëma'. Apira huénanta'ina', itérin. ³⁵ Nani ocoihuachinara, pënénin.

—Ni'cona iyaro'sa' têhuëtama'. Co isopita têpacaso' ya'huérinhue', tênuahuë. ³⁶ Ni'cochi. Iráca Tiotasë ya'huérin. "Ca hua'an ya'coanahuë," topachina, catapini pasa pochin quëmapi'sari imapi. Imasapirinahuë', têpahuachinara, ya'ipi imapisopita yanquëepi huachi. ³⁷ Ina piquëran copirno sha'huitérinpoa' nininénpoa' niacotacaso'. Naporo' a'nanta' ya'huérin, Cotasë Caririaquë ya'huérinso'. Na'con miáchin piyapi'sari imasapirinahuë', inanta' têpahuachinara, imapisopita yanquëepi. ³⁸ Napoaton ama isopita têpacosohuë'. Tananpitoco', tênuahuë. Inahuara yonquinëna quëran a'chinahuachinaso', oshaquëran imapisopita pipimiataipi. ³⁹ Nipirinhuë', Yosëri catahuahuachin, co canpitari acopitaramahuë'. Ni'cona Yosë chachin inimicototama', itérin.

Itohuachina, hua'ano'sari natëtona', co t  papihu  '. ⁴⁰ Ca'tano'sa' naqu  ranchin amatantarahuatona', chin  qu  n huihuipi. "Ama huachi insonta' Quisoso nanam  n sha'huitocosohu  ", itahuatona', a'papi huachi. ⁴¹ A'pahuachinara, pipipi. "Yos   noya ni'nincoi ni'toi, Quisoso mar  ' parisit  rai," ta'tona', capa cancantopi. Co manta' s  topihu  '. ⁴² Nani tahu  riya Yos   chinotopiso p  iqu   a'chinapi. Co ta'topihu  '. P  iro'saqu  nta' Quisoso nanam  n sha'huirapicaiso mar  '." Inaso' Cristo, Yos  ri a'paimarinso', tos  pi.

6

Canchis   qu  mapi'sa' catahuacaiso mar  ' acopiso'

¹ Naporo' tahu  ri'sa' Quisoso imapisopita na'asapi. Notohuaro' ya'hu  pi huachi. A'naqu  n cotio nananqu   nonpi. A'naqu  nso nipurinhue' cotioro'sa' niponaraihu  ', Crico nananqu   nonpi. Inapitaso' co noyahu  ' cancantatona', tapona': "Nani tahu  riya qu  yorono'sa' hu  'pachinara, a'naya a'naya cosharo' ma'patopirinahu  ', co napopianachin qu  topihu  ', apirat  rinaco. Crico qu  yorono'sa' pahuantopi," topi. ² Ina natanahuatona', ca'tano'sari ya'ipi Quisoso imapisopita ayontonpi. Niyontonpachinara, itopi:

—Natancoi iyaro'sa' pi'pian sha'huichinqu  ma'. Yos   nanam  n a'china'huaiso mar  ' Quisocristo acorincoi. Inaso nipurinhue', nani tahu  ri cosharo' yo's  patoi, co nanit  rnhue' Yos   nanam  n a'china'huaiso'. Co a'chinpatoihu  ', co noyahu  ' nisarai, t  nai. ³ Napoaton iyaro'sa', canchis   ya'pi huayonco' catahua'inacoiso mar  '. Ispirito Santori noy   ya'coancant  rinso' huayonco', noya yonquipiso'. Noya qu  mapis  chin acoa'ahua' cosharo' yocacaiso mar  '. ⁴ Quiyaso nipurinhue' Yos   nonta'huaiso', nanam  n a'china'huaiso', inas  chin yonquiarai, itopi ca'tano'sari.

⁵ Natanahuatona':

—Noyapa'. Pa'ahua acoa'ahua', topi ya'ipi. Ina qu  ran Istipan huayonpi. Inaso' Yos   n  ya nat  rin. Ispirito Santori noy   ya'coancant  rin. Pinipi, Porocoro, Nicanoro, Timon, Parminas  , Niconas  , inapitanta' huayonpi. Niconas  so' Antioquiaque hua'huat  rin. Co cotio qu  mapihu  ' niponahu  ', cotioro'sa' pochin Yos   chinot  rin. Iporaso' Quisoso imasarim anta'. Inanapo huayonpi. ⁶ Inapita huayonahuatona', ca'tano'saque' qu  pi. Yos   nontahuatona', s  'huamotopi acoacaiso mar  '. Inapotatona', acopi huachi.

⁷ Ina qu  ran ca'tano'sa' nani tahu  ri p  n  ntapi. Yos   nanam  n a'chinapi. Aqu   aqu  t  ' nahuinin. Quirosarinque' na'con na'con piyapi'sa' imasapi. Na'a corto hua'ano'santa' Quisoso nanam  n nat  pi.

Istipan mapiso'

⁸ "Istipanso' n  ya p  n  nt  rin," topi ya'ipi. Ispirito Santori catahuarin ni'ton, sacai' nininso' nanitaparin. Cania'pi mar  ' Yos   nontohuachina, a'naro  chin noyatopi. Napoaton: "T  hu  nchachin Yos  ri catahuarin," topi. ⁹ A'naqu  n cotioro'saso nipurinhue', nisha niyontonpiso p  i qu  ran hu  catona', Istipan no'huipi. "Patron qu  ran pipipisopita," itopiso qu  ran hu  'pi. Inapitaso' Sirini qu  ran, Aricant  ria qu  ran, Sirisia parti qu  ran, Asia parti, inaqu  ranpita hu  catona', Quirosarinque' ya'hu  pi. Inapitaso' Istipan no'huipi. Hua'qui' chin  qu  n ninontopi. ¹⁰ Istipanso nipurinhue', Ispirito Santori catahuarin ni'ton, no't   no't  qu  n nonin. Co nanitopihu  ' a'panicaiso'. ¹¹ Napoaton po'oana qu  ran qu  mapi'sa' pahu  r  pi sha'huirapicaiso mar  '. Inapotohuachinara, sha'huirapipi:

—Iso qu  mapiso', co noyahu  '. Mois  se pinorin. Yos  nta' pinorin natanai, tos  pi. ¹² Ina pochin nonatona', na'a piyapi'sa' ano'huitopi. Cotio ansiano'sa', cotio maistro'sa', inapitanta' ano'huitopi. Co huachi Istipan noya ni'pihu  '. Napoaton maconpi. Maconahuatona', qu  papi cotio hua'ano'sari natanacaiso mar  '. ¹³ Nani niyontonpachinara, naqu  ranchin sha'huirapiantapi. Nonpinatona', co no't  qu  n sha'huirapipihu  '.

—Yosë chinotopiso pëi' noya nimirinhuë', nonapirarin. “Moisësë iráca pënëntérinsonta' co natëcaso' ya'huérinhuë',” toconin. ¹⁴ Quisoso Nasaritoquë ya'huérinso' imaton, naporinso' a'chinarin. “A'na tahuëri Quisosori Yosë chinotopiso pëi' ata'huantarín. Moisësë pënënpoasonta' anariantatonpoa', nisha a'chintarinpoa',” toconin Istipan natanai, topi sha'huirapitona'.

¹⁵ Ina quëran hua'ano'sari Istipan ni'sapi. Ni'sapirinahuë', ya'pirin anquëni pochin huénaráchin ni'térin.

7

Istipan sha'huirinso'

¹ Ina quëran Corto hua'an chini chiníquën nanantérinsoari natanin.

—¿Téhuénchachin naporan nonapon? itérin.

² —Co onporonta' api Yosë pinorahuë'. Natanco, apiro'sa'. Iyaro'sa' canpitanta' natanco no'tequën sha'huichinquëma'. Iráca quëran huarë' shimashonënpoapita Yosë imapi. Canta' ina imarahuë. Tata Yosëso' noya noya. Iráca Tata Apraan nisha no'paquë ya'huaso', ya'notimarin. Co Aranquë pa'shátéraponhuë', nontérin. Misopotamia parti ya'huépirinhuë', inaquë Yosëri itapon: ³ “Ya'huéran quëran pipimiatéquë'. Quëmopinënpitanta' patomiatéquë'. A'na parti paaton, inaquë ya'huéquë'. Carinquëna a'notaranquën, inaquë ya'huémiatéquë',” itérin Yosëri. ⁴ Natanahuaton, Apraan pipirin. Cartia parti quëran pipirahuaton, Aranquë pa'nin. Inaquë ya'huéantapirinhuë'. Ina quëran pa'pin chiminpachina, Yosë nohuanton, Canaan parti hué'nin. Ya'huéréhuaquë chachin hué'nin. ⁵ Hué'pirinhuë', Yosë nohuanton, co no'pa' ya'huétérinhuë'. Co pi'pisha térranta' hua'anéntérinhuë'. “A'na tahuëri Canaan parti ya'huémiatarama'. Quëma shiparinpita na'asahuatona', ina no'pa' hua'anéntapi,” itérin Yosëri. Co hui'nuhuyantérerasohuë', napotérin. ⁶ Ina quëran Yosëri itantarin: “A'na tahuëri quëma shiparinpita nisha parti yacapatapona'. Inaquë nisha piyapi'sari chiníquën asacatapi. Co pahuéréaponaraihuë', asacatapi. Catapini pasa pi'ipi aparisitapi. ⁷ Nipirinhuë', nisha piyapi'sa' shiparinpita aparisitopiso' ana'intarahuë. Ina quëran shiparinpita pipirapi. Iséquë chachin huénantahuachina', chinotarinaco,” itérin Yosëri. ⁸ Ina quëran itantapon: “Caora nohuanto, catahuaranquën. Hui'nampita, ya'ipi shiparinpita, inapitanta' catahuaranahuë. Napoaton marca niacotoco' imaramacosó' anitotacamaso marë',” itérin. Ina quëran Apraan hui'nin ya'huétérin. Isaco itérin. Posa tahuérítahuachina, marca acotérin. Isaco mashotohuachina, hui'nin ya'huétérin. Cacopo itopi. Ina quëran inanta' hui'ninpita ya'huétantarín. Shonca cato' ya'huétérin. Ya'ipi marca niacotéra'piapi. Inapita quëran shonca cato' huénton cotioro'sa' ya'huéréhua'. Inapitaso' shimashonënpoa', ténéhua'.

⁹ A'nara' Cosi itopi. Iiinpitari apiratatona', no'huipi. Iina chachin nimirinhuë', co quë'yapihuë'. Napoaton nisharo'sa' ya'nohuachinara, pa'anpi asacatacaiso marë'. Nisha piyapi'sari Iquipito'pa' quëpapi. Yosëriso nimirinhuë' catahuarin. ¹⁰ Parisitopirinhuë', nicha'érin. Ina nohuanton, Iquipito copirnori noya ni'nin. “Cosí noya quëmapi. Noya yonquirin,” ta'ton, chiníquën nanan quëtérin. Ya'ipi copirno ma'shanénpita a'pairin. Ya'ipi Iquipito piyapi'sa' camairin.

¹¹ Naporö' Iquipito parti cosharo' co noya papotérinhuë'. Hua'qui' co manta' papotérinhuë' ni'ton, tanarotopi. Canaan partinta' capa cosharo'. Shimashonënpoa' co manta' ya'huétophiuë' capacaiso'. Parisitápi. ¹² “Iquipito parti trico ya'huérin,” topiso marë' Cacoposo' hui'ninpita a'parin cosharo' pa'anacaiso marë'. Iina chachin ma'ponaraihuë', nani mashotérin ni'ton, co nohuitopihuë'. Ina pa'anatona', ya'huépi'pa' cosharo' quëpaantapi capacaiso marë'. Ina capatona', nanopipi. ¹³ Ina quëran pë'yahuachinara, pa'pini a'paantarin. Naporö' Cosiri sha'huitérin. “Caso' co nishacohuë'. Cosico. Iyaya, itoco,” itérin. Copirnonta' iinpita anohuitérin. ¹⁴ Ina

quëran Cosiri pa'pin amatérin. Ya'ipi quëmopinënpitanta' amatérin. Ya'ipi quëran canchisë shonca a'natérápo piyapi ya'huérin. ¹⁵ "Huéquë", tata, isëquë ya'huëa'ahua', itohuachina, Cacoponta' Iquipito'pa' pa'marin. Ya'ipiya pa'mapi. Inatohua' Cacopo chiminin. Ya'ipi shimashonënpoanta' inaquë ya'huérapi quëran chiminpi. ¹⁶ Cacopo chiminpachina, nonën isëquë chachin quënanantapi pa'pitacaiso marë'. Siquimoquë pa'pitopi. Ina no'pa chachin iráca Apraani, amororo'sa' pa'antérin.

¹⁷ Yoséri chachin nani iráca Apraan sha'huitérin Canaan parti hua'anëntacaso'. Nipirinhuë', shinpita co a'naroáchin panantapihuë'. Hua'qui' Iquipitoquë ya'huëpi. Inaquë na'api. Panantacaiso' tahuëri ya'caritohuachina, notohuaro' israros'a' ya'huëpi. ¹⁸ Napoin quëran Iquipito parti nisha copirno ya'conin. Cosiso' iráca chiminin ni'ton, co nohuitérinhuë'. ¹⁹ Cosi naporinso' co nitotérinhuë' ni'ton, nonpintaton, israiro'sa' aparisisiterin. Ahuihuitahuaton, chiníquën asacatérin. Naporahuaton: "Quëmapia'hua nasitohuachin, aipiran të'yatoco' chimiin," itérin. ²⁰ Naporo', iyaro'sa', Moisésë nasitérin. Yoséri noya ni'nin. Pa'pin a'shinë chachin nosoropi ni'ton, cara yoqui po'orahuatona', pëinënquë acanopitopi. ²¹ Ina quëran aipiran acohuachina', Yosë nohuanton copirno hui'nini chachin manin aso'socaso marë'. Hua'huin pochin ni'nin. ²² Iquipito maistro'sari noya a'chintopi. Ya'ipi nitotopiso' a'chintopi. Napoaton noya noya nonin. Nani ma'sha nicacaso' nitotérin.

²³ Catapini shonca pi'ipito huachina, a'napita israiro'sa' yonquiaton, pa'nin ni'tapon. ²⁴ Inaquë a'na Israiro quëmapi quënanconin. Co manta' onpopirinhuë', Iquipito quëmapiri ahuëaton, yatépararin quënanconin. Quëmopinë nosoroaton, "cari i'huérachi," ténin. Ina quëran Iquipito quëmapi ahuëaton, teparin. ²⁵ "Israiro'saso' iyahuëpita. Yosë catahuaarincó inapita nicha'ëca'huaso'", ténin Moisésë yonquinënquë. Inapitaso nipirinhuë' inari nicha'ëcaso' co yonquipihuë'. ²⁶ Tahuëririnquë cato' israiro'sa capini niahueärapí, Moisésëri quënanconin. "¿Onpoatomata' campita capini niahuearama'? Nanan anoyatoco'," itérin. ²⁷ Ahuëtona'piso nipirinhuë' co nohuantérinhuë' natëcaso'. "¿Inta' hua'an acorinquë? Co coisé pochin sha'huitancoiso' ya'huérinhuë'. ²⁸ Ihuara Iquipito quëmapi teparan. ¿Inapochachin canta' yatéparanco ti?" itérin. ²⁹ Ina natanahuaton, të'huatérin. "Copirno natantohuachin, no'huiarinco," ta'ton, pipimiatérin huachi. Matian parti yacapatérin. Inaquë sa'aton, cato' hui'nin ya'huétérin.

³⁰ Catapini shonca pi'ipí Moisésë inaquë ya'huérin. Ina quëran a'na tahuëri inotéro' parti pa'nin. Sinai motopi ya'cariya ni'so', sarsa nara orotarinso' quënanin. Inaquë chachin anquëniri ya'notimarin. ³¹ Ina ni'sahuaton, pa'yanin. "¿Ma'ta' inaso' nimara?" ta'ton, ya'cariconin. Naporo' Yoséri itapon: ³² "Caso' Yosëco. Quëma shimashonënpita chinotérinaco. Apraan, Isaco, Cacopo, inapita chinotérinaco," itérin. Moisésë të'huataton, ropa ropátarin. Monshorahuaton, co yani'ninhuë'. ³³ Ina quëran Yoséri itantarín: "Sapatén ocoiquë". Iséquë nontaranquën ni'ton, iséquë chachin chinotancoso' ya'huérin, ténahuë. ³⁴ Piyapinéhuëpita Iquipitoquë ya'huépirinahuë', parisítapi ni'nahuë. Chiníquën aparisisitori ni'ton, tarétápi, natanahuë. Napoaton nicha'ësarahuë huachi. Huéquë' inatohua' a'pa'inquë nicha'ëcamaso marë', itantarín.

³⁵ Napoaton Moisésë inatohua chachin paantarin. Iráca israiro'sa' yacatahuapirinhuë', co yanatépihuë'. "¿Inta' hua'an acorinquë? Co coisé pochin sha'huitancoiso' ya'huérinhuë'," itopi. Yosëso nipirinhuë' Moisésë chachin hua'an acorin. Nara'huaya quëran anquëniri ya'notaso', Yoséri sha'huitérin inapita nicha'ëcaso marë'. ³⁶ Ina quëran Iquipitoquë paantarahuaton, nani ma'sha Yosë pochin ninin, sacai' nininsopita. Inapoaton, Iquipito quëran ocoirahuaton, nicha'ërin. Inapochachin Quéhuai maréquë, inotéro parti inaquëpita Yosë pochin ninin. Catapini shonca pi'ipí inaporin. ³⁷ Moisésëri chachin inapita itérin: "A'na tahuëri Yosë nohuanton, a'na pëñentona'pi ya'huapon, ca pochin nininso'. Inanta' Israiro quëmapi nisarin," ténin. ³⁸ Iráca inotéro parti shimashonënpoa' niyontonpachinara, Moisésëri Yosë nanamén anitötérin. Sinai motopiquë

pa'pachina, anquëniri nontérin. Yosë nanamën sha'huitérin noya nanopicaiso marë'. Canpoa marënta' sha'huitérin.

³⁹ Shimashonënpoaso nípirinhuë' co nohuantopihuë' Moisësë natëcaiso'. Yaa'popi. Iquipito parti na'huanatona', inatohua' yapa'mantapi. ⁴⁰ Napoaton Moisësë motopiquë ya'huaso', iin, Aaron itopiso', nontopi. "Mamanshiro'sa' nitocoi, ina imahua'. Moisësë Iquipito quëran ocoipirinpoahuë', ¿intohuaso' pa'mara?" ta'tona', mamanshi nipi. ⁴¹ Ohuaca'huaya pochin nininso nipi. Ma'sha tēparahuatona', mamanshi moshapi. Inahuara nípiso' níponahuë', pa'yatatona' pita nipi. ⁴² Napoaton Yosëri tananpitérin. Tananpitohuachina, ma'sha inápaquë ya'huërinso pita moshapi. Pi'i, yoqui, tayora, inapita moshapi. Pénëntona'pi iráca Yosë quiricanënquë ninshitaton, tapon:

"Israiro'sa' nontaton, Yosëri itérin:

'Catapini shonca pi'ipi inotéro parti paasëma' ma'sha tēpahuatamara, co chinotatomaco naporamahuë'.

⁴³ Nisha piyapiro'sa' moshapiso' yonquirama'.

Moroco artaronëñ quëparahuatoma', ina chinotërama'.

A'na tayloranta' mosharama', Nipan itopiso'.

Napoaton ana'intaranquëma'.

Ca nohuanton, inimicoro'sa' huë'sahuatona', minsëarinënquëma'.

Papironia aquëtë' quëpararinënquëma', itérin Yosëri," ténin.

⁴⁴ Shimashonënpoapita iráca inotéro parti pacapona', Yosë chinotacaso në'mëtë' pëi quëparápi. Yosëri chachin Moisësë sha'huitérin ina pochin nicatona', chinotacaiso marë'. A'notérinso pochachin nipi. Inaquë Yosë pénëntérinso nanan ninshitérinso' ya'huërin. ⁴⁵ Ina quëran hui'ninpitanta' inachachin pëi' ya'huëtopi. Nisha piyapi'sa' isëquë ya'huëpirinahuë', Yosë nohuanton, a'papi. Cosoiri minsëhuachina, a'papi isëquë ya'huëcaiso marë'. Ina pëi chachin isëquë quëpi Yosë chinotacaiso marë'. Tapi hua'an ya'conaqué huarë' ina pëiquë Yosë chinotopi. ⁴⁶ Yosëri noya catahuarin ni'ton, Tapi noya hua'anéntérin. Inari pancana yapéitopirinhuë', co Yosë nohantérinhuë'. ⁴⁷ Ina quëran hui'nin Saromon itopiso', panca pëi' na'pi quëran ninin inaquë chinotacaiso marë'. ⁴⁸ Nípirinhuë', Yosëso' chini chiníquëñ nanantérin. Co nípiso' pëiquéráchin ya'huërinhuë'. Pénëntona'pi inachachin sha'huitérinpoa':

⁴⁹ "Yosëri itapon: Inápaquë huënsérahuë hua'anënta'huaso marë'.

Isoro'panta' nantëhuë aya'nanahuëquë pochin nitërahuë.

¿Onpopinta' yapéirapipiramaco huë'?

¿Insëquë chachinta' acotapomaco ya'huëca'huaso marë'? Co pëiquéráchin ya'huarahuë'.

⁵⁰ Cari ya'ipi ma'sha ninahuë, itérin Yosëri," ténin.

⁵¹ Canpitaso nípirinhuë' co pi'pisha téranta' yanatëtëramahuë'. Co natan-tochináchinhuë' cancantërama'. Co onporonta' Ispirito Santo yanatëramahuë'. Iráca shimashonëmapita co noyahue' cancantopí. Inapita quëpatoma', inapochachin cancantërama'. ⁵² Iráca quëran huarë' na'a pénëntona'piro'sa' pénëntopirinahuë', ¿insota' shimashonëmapitari noya ni'pi? Ya'ipiya aparisisopí. "A'na tahuëri noya noya nininso' o'mararin," topachinara, no'tequëñ ninopirinahuë', tēpapi. Ina quëran Cristo chachin o'mahuachina, sha'huirapitoma', atëpatërama'. ⁵³ Yosë iráca pénëntérinso' anquëniri chachin sha'huitopirinquëmahuë', canpitaso' co natëramahuë', itérin Istipani.

Istipan tēpapiso'

⁵⁴ Natanahuatona', chiníquëñ no'huitona', yatëpapi. ⁵⁵ Istipano nípirinhuë' Ispirito Santori noyá ya'coancantérin ni'ton, inápaquë në'pëtérin. Yosë ya'huërinso chachin ni'nin. Huënaráchin huënaráchin ya'norin. Quisoso Yosë inchinanëñ quëran huaniárin, ni'nin.

⁵⁶—Ni'cochi iyaro'sa'. Pi'iro'të nii'soatérin ni'nahuë. Quisoso chachin Yosë inchinanëñ quëran huaniarin, quënanahuë, itérin Istipani.

⁵⁷ Ina natantahuatona', nicipopihuëratëtopi. Chiníquën no'huitona', a'naroáchin maconpi. ⁵⁸ Ninano quëran quëparahuatona', na'piquë té'yayarapi. Sha'huirapipisopitaso', aipi a'mopiso' ocoirahuatona', a'na hui'napi Saono itopiso' quëtopi a'paicaso marë'. ⁵⁹ Té'yarasoi', Istipanso' chiníquën parisitaponahuë', Quisoso nontérin: "Hua'yanëhuë Sinioro matahuatonco, quëpaquë'," itérin. ⁶⁰ Ina quëran isonahuaton, chiníquën itantarin: "Tëparinacoso marë', ama Sinioro isopita ana'intëquësohuë," itérin. Ina tosahuaton, chiminin.

8

¹ Istipan tēpasoi', Saononta: "Tēpaco'," ténin.

Saonori aparisitérinso'

Naporó quëran huarë' cotio hua'ano'sa' no'huitatona', Quisoso imapisopita chiníquën aparisitopi. Quirosarinqué napopi. Aparisitatona', ayanquëëpi. Ya'ipi Cotia parti, Samaria parti, inaquëpita yanquëëpi. Ca'tano'saráchin co pa'pihuë'. ² Nani Istipan tēpahuachinara, Yosë chinotopisopitari pa'pitopi. Sëtatona', na'nérápi. ³ Saonoso nipurinhuë' Quisoso imapisopita aparisitaton, pëinënaquë huarë' ya'cona'piarin. Quëmapi'sa' masahuaton, ohuararahuaton, tashinan pëiquë po'morin. Sanapi'santa' inaquë po'morin.

Samaria parti noya nanan sha'huirinso'

⁴ A'naquënso nipurinhuë' yanquëerahuatona', pa'sapi. Yosë nanamën sha'huirapip. ⁵ Pinipiso' Samariaquë pa'nin. Inaquë Quisocristo naporinso' sha'huirarin: "Yosëri a'paimarinso' imaco' canpitanta'," itarin. ⁶ Na'a piyapi'sa' niyontonahuatona', natanapi. Noya natanpi. A'chintohuachina, cania'piro'santa' quëpi. Yosë nohuan-ton, Pinipiri anoyatérin. Ni'sahuatona', aquë aquëtë' yaimapi. "Yosëri catahuarin ni'ton, a'naroáchin anoyatérin," topi. ⁷ A'naquënso' sopairi ya'coancantérin ni'ton hua'yantopirinahuë', Pinipiri sha'huitohuachina, sopairo'sa' chiníquën nonsahua-tona', pipira'piapi. A'naquëonta' caniopi quëran co huachi nanitopihuë' iratacaiso', quëhuëñápi. A'napitaso' apia ni'tona', sonpapi. Inapitanta' huë'pachinara, anoyatérin. ⁸ Napoaton inaquë ya'huëpisopitaso', capa cancantopi.

⁹ Inaquë a'na quëmapi Simon itopiso' ya'huërin. Co'huara Pinipi huë'shatérasohuë', na'con pënotérin. Nani hua'qui' piyapi'sa' nonpintérin. "Caso' chiníquën nanantérahuë," téninso marë' pa'yatopi. ¹⁰ Ya'ipi Samariaquë ya'huëpisopitari natëpi. Ya'ipi piyapi'sa', hua'ano'sa quëran huarë' natëpi. "Iso quëmapi Yosë pochin ninin. Nani ma'sha nanitaparin," topi.

¹¹ Hua'qui' pënotaton, piyapi'sa' nonpintérin. Napoaton natëpi. ¹² Nipurinhuë', Pinipiri noya nanan sha'huitohuachina, noya natanpi. "Yosë yahua'anëntérinpoa". Quisocristo inápa quëran a'paimarin nicha'ëinpoaso marë'. Ina imaco' canpitanta'," itohuachina, natëpi. Ina quëran quëmapi'sa' sanapi'sarë chachin aporihuani. ¹³ Simonta' natëpirinhuë'. Aporihuahanahuaton, Pinipi ca'tanin. Pinipiri cania'piro'sa' a'naroáchin anoyatérin. Nani ma'sha nanitaparin. "Tëhuëñchachin Yosëri catahuarin," topi. Ina ni'sahuaton, Simon pa'yanin. "Ma'pitacha nanitaparin paya," ténin, yonquiaton.

¹⁴ Naporo' ca'tano'sa' Quirosarinqué ya'huëpi. "Samariaquë ya'huëpisopitanta' Yosë nanamën natëpi huachi," topi. Natantahuatona', Pitro, Coansha cato chachin a'papi nicapona'. ¹⁵⁻¹⁶ Na'a ya'huëhuano'sa' nani aporihuani. "Sinioro Quisoso imarai," ta'tona', aporihuapanaraihuë', Ispirito Santori co ya'coancanchátérarinhuë'. Napoaton Pitro, Coansha inapita o'marahuatona', Yosë nontopi Ispirito Santori ya'coancantacaso marë'. ¹⁷ Ina quëran së'huamotohuachinara, Ispirito Santori ya'coancantérin. ¹⁸⁻¹⁹ Simonta' nicaton: "Ca'tano'sari së'huamotorahuatona', Ispirito Santo aya'coancantopi," ta'ton: —A'chintoco canta' campita pochin nii. Ina marë'

pahuérë'inquëma'. Ispirito Santo aya'coancanchi canta', topirahuë', itérin. ²⁰ Pitroriso' itapon:

—Ma'pitacha yonquiran paya. Coriqui marë' Ispirito Santo ¿yama'paranco ti? Co ina marë' Yosë quëtérinpoahuë'. Co inaso' pa'anëhuë'. Ina pochin yonquihuatan, parisitopiquë pa'saran. ¡Corquiré'quën chachin inaquë pa'saran! ²¹ Co ya'ipi cancanën quëran imaranhuë' ni'ton, co Yosë noya ni'ninquënhuë'. ²²⁻²³ Pa'pi co noyahuë' yonquiran. Catinaqué tonporëso pochin ninan ni'ton, co pi'pian téranta' Yosë yanatéranhue'. Napoaton co noyahuë' yonquiransopita nariantaton, Yosë nontëquë' tapona oshanën yainquitápirinquënhuë', itérin.

²⁴ —Canpitari Yosë nontoco' ama ina pochin ana'inchincosohuë', itérin. Chiníquën pa'yanaton, naporin.

²⁵ Ina quëran Pitro Coansharë chachin piyapi'sa' a'chintantapi. Quisocristo naporinso' anitotapi. Ya'ipi Yosë nanamën sha'huitantapi. Nani sha'huitohuachinara, ya'huëpi'pa' yapaantapi. Samaria parti paatona', a'naya a'naya ninanoro'saqué noya nanan sha'huitéra*piapi. Inaporatona', Quirosarinquë cancoantapi.

Itiopia quëmapi natérinso'

²⁶ Ina quëran Sinioro anquéninëni ya'notimarahuaton, Pinipi sha'huitérin: "Huani-ruhauaton, Quirosarin quëran Casa'pa' ira pa'ninso pa'téquë", itérin. Inatohua' intérachin ya'huérin. ²⁷ Sha'huitohuachina, pa'nin. Pa'sapirinhue', a'na quëmapi quénanconin, Itiopiaquë ya'huérinso'. Inaso' hua'an. Itiopia copirno paya Cantasi itopisoari nani acorin ya'ipi coriquinën a'paicaso marë'. Hua'anso' ihua Quirosarinquë pantarin Yosë chinotacaso marë'. ²⁸ Nani o'mantaton, ya'huérin'pa' paantararin. Torona'hua cahuariori quëparinquë huënséaton, pa'sarin. Papon pochin, Yosë quiricanën iráca Isaiasë ninshítérinso' nontérarin.

²⁹ Naporo' Ispirito Santori Pinipi sha'huitérin: "Manóton ya'yoranconahuaton, imaraaquë", itérin.

³⁰ Pinipiso' ta'arahuaton, ya'yoranconin. Isaiasë ninshítérinso' nontaquëya', natanin:
—Nontéranso' iyasha, ¿nitotérana ti? itérin.

³¹ —¡Co'chi iyasha, nitotérahuë paya! Co insonta' a'chintérincohuë' ni'ton, co nanitérahuë'. Huéquë' huënséique'. Sha'huitoco nitochi, itérin. Napotohuachina, inaquë huënsérin. Papona pochin ninontérapi.

³² —Iso' iyasha nontápirahuë', ma'ta' tápon naporinso' co nitotérahuë', itahuaton, Yosë quiricanënquë nontérinso' a'notérin nontacaso marë'.

"Téhuëñchachin ohuica tēpacaiso marë' quëpahuachinara, co manta' ténihuë'.

Carniroa'huanta ya'ihuachinara, co na'nérinhue'.

Inapochachin ina quëmapi yatépahuachina', co manta' taponhuë'.

³³ Nonpinapipi ni'ton, coisë co no'téquën sha'huirinhue'.

Tépapi ni'ton, co a'na hui'nin téranta' ya'huérerinhue', ténin quiricanënquë.

³⁴ —¿Ma quëmapita' yatépapiso'? Isaiasë nica. A'na quëmapi nica. Co caso' nitotérahuë'. Sha'huitoco canta' nitochi, itérin hua'ani.

³⁵ "Quisoso ninoton, Isaiasë ninshítérin," itahuaton, ina quirica chachin nontaton, ya'ipi Quisoso nanamën a'chintérin. ³⁶ Nani a'chintohuachina, ira pa'tapona pochin ii' quénanconpi.

—Ni'quë' iyasha. Ii' ya'huérin. Canta' aporintoco, topirahuë', itérin hua'ani.

[³⁷ —Ya'ipi cancanën quëran huarë' natéhuatan, aporintaranquën, itérin.

—Quisocristoso' Yosë hui'nin chachin, ténahuë, ténin hua'ani.]

³⁸ "Noyahua'," itohuachina, torona'hua asanorin. Nohuararahuatona', cato chachin i'quë pa'mapi. Inaquë aporintérin. ³⁹ Nonshipirinahuë', a'nanaya Pinipi ayarin. Ispirito Santori quëparin ni'ton, hua'ani co huachi quénaninhue'. Co quénanaponahuë', noya cancantaton, pa'nin. ⁴⁰ Pinipiso nimirinhue', Asotoquë'pa ya'nochanin. Ina

quëran pa'sahuaton, ninanoro'saquë noya nanan sha'huitëra'piarin. Sisariaquë huarë' sha'huira'piarin.

9

Saono imarindo'

¹ Saonoso nimirinhue' no'huitárin. Quisoso imapisopita no'huiton, yatëparin. Napoaton corto hua'an chini chiniquen nanantérinso' nontonin. ² "Quirica ninshitoco piyapi maca'huaso marë'. Tamascoquë quëparahuato, niyontonpiso pëi' hua'ano'sa' quëtarahuë. Inaquë nasha nanan imapisopita quënanpato, masarahuë. Quëmapi'sa' tonporahuato, isëquë chachin quësarahuë. Sanapi'saquë huarë' masarahuë," ténin Saono. Napohuachina, quirica ninshitahuaton, quëtérin. ³ Ina quëran Tamascoquë pa'nin. Ya'caritëruhuaso', a'naroáchin inápa quëran huënaráchin huënaráchin a'pintérin. ⁴ No'paquë anotahuaton, inápa quëran nontérinso' natanin.

"Saono, Saono, ¿onpoatonta' aparisitaranco?" itérin.

⁵ "¿Inquënta' quëmaso', Sinioro?" itérin Saonori. "Ca Quisosoco, aparisitarancoso".

⁶ Iporaso' huanirahuaton, ninanoquë paquë'. Inaquë sha'huitarinéinquen ma'sona nicamaso'," itérin.

⁷ Ca'taninsopitaso' pa'yanatona', co manta' topihuë'. Nontérinso' natanaponaraihuë', co insonta' quënanpihuë'. ⁸ Saono huaniintarahuaton, ni'topirinhue', co huachi quënantérinhuë'. Napoaton a'napitari së'quërahuatona', Tamascoquë quëpapi. ⁹ Cara tahuëri co quënantérinhuë'. Co manta' ca'nihuë'. Co manta' o'orinhuë'.

¹⁰ Ina ninanoquë chachin a'na quëmapi ya'huërin, Quisoso imarindo'. Ananiasë itopi. Yosë nohuanton, co huë'éponahuë', hua'narëso pochin ni'nin. Nontérinsonta' natanin. "Ananiasë, ¿ya'huanan?" itérin Quisosori. "Ya'huarahuë Sinioro," itérin inarinta'.

¹¹ "Huanirahuaton, no'tequën cachi itopiquë paquë'. Inatohua' Cotaseë pëinën ya'huërin. Inaquë a'na quëmapi Tarsoquë ya'huërinso' yacapatarin. Inaso' Saono itopi. Apira inaso' nontarinco. ¹² Inanta' hua'narëso pochin nani quënaninquéen. Quëmari së'huarayaconpatan, quënantaantapon," itérin Quisosori.

¹³ Ananiasëso nimirinhue' co yapa'nihuë'. "Ina quëmapiso' Sinioro, pa'pi co noyahue', topi natantérahuë. Quirosarinqué quëma imarinéinquënsopita chiniquen aparisitérin.

¹⁴ Corto hua'ano'sa' chiniquen nanantopisopitari nanan quëtérin isëquënta' piyapi'sa' macacaso marë'. Nontérinquënsopita tonporahuaton, tashinan pëiquë yapo'morin," itérin Ananiasëri.

¹⁵ "Ihua mini co noyahue' yonquipirinhue', nani huayonahuë ca nanamëhuë a'chinacaso marë'. Nisha nisha piyapi'sa' a'chintarin imainacosu marë'. Hua'ano'sanënpitanta' sha'huitarin. Israiro'santa' a'chintarin imainacosu marë'. ¹⁶ Nanamëhuë a'chininso marë' na'con parisitapon. Inanta' cari anitotarahuë," itérin Quisosori.

¹⁷ Ina natanahuaton, Ananiasë pa'nin. Cotaseë pëinënqué ya'conconahuaton, Saono së'huaconin:

—Iya Saono. Sinioro Quisoso iraquë ya'notérinquënsopita sha'huitérinco ni'ton, huë'nahuë. Ina nohuanton, apira noya ni'taantar. Naporahuaton, Ispirito Santo noyá ya'coancantarinquéen, itérin.

¹⁸ Naporo chachin sami sha'huëtë pochin nininso', ya'pirin quëran anotérin. A'naroáchin noya ni'taantar. Ina quëran huaniintarahuaton, aporihuanin. ¹⁹ Nani coshatahuaton, chiniquen cancantaantar. Hua'quimiachin inaquë Quisoso imapisopitataquë yacapaterin.

Saono ya'nan pënenéntérinso'

²⁰ Shiarahuaton, cotio niyontonpiso pëiquë pa'sahuaton, pënëntarin. “Quisososo' Yosë hui'nin,” itahuaton, na'con a'chinarin. ²¹ Ya'ipi piyapi'sa' natanahuatona', ina nohuitatona', pa'yanpi.

—¿Co'na isohuë' Quirosarinquë ya'huapon Quisoso imapisopita chiníquën aparisitérin? Iséquenta' huë'nin imapisopita macacaso marë'. Tonporahuaton, corto hua'ano'saquë quëpararin, topiraihuë'. Ni'quëchi. Nani a'chinarin inanta', topi.

²² Saonoso' chiníquën cancantaton, nôya a'chinarin. “Tëhuëñchachin Yosëri Cristo a'paimarin. Inaso' Quisoso chachin. Yosë quiricanën quëran no'tëquën anitotérinpoa'”, ta'ton, na'con a'chintérin. Cotioro'sa' inaquë ya'huëpisopita nisha nisha yonquiatona', co nanitopihuë' a'panitacaiso'.

Saono cha'érinso'

²³ Napoaton hua'qui quëran cotioro'sari tëpacaiso' yonquipi. ²⁴ Yatëpapiso' natana-ton, Saono co huachi a'ninquëchin paacaso' nohuantérinhuë'. Nani tahuëri ninano' ya'coanaquë cotioro'sari ninarapi tëpacaiso' marë'. Tashirë chachin ninarápi. ²⁵ A'na tashiso nimirinhuë', imapisopitari huëcatona' Saono quëpapi. Ninano pairapipi quëran anohuaramapi. Nantipi pochin nininquë anohuaramahuachinara, pa'nin huachi.

Saono Quirosarinquë paantarinso'

²⁶ Quirosarinquë canconahuaton, Quisoso imapisopita ya'huëpikuë pa'pirinhuë'. “Co têhuëñchachin Quisoso imamarahuë', sha'huirapihuachinpoa'”, ta'tona', tê'huatopi.

²⁷ Pirnapiso nimirinhuë' natérin. Natéton, Saono quëparin ca'tano'sa' nontacaso marë'. “Saono ira pa'taso', Quisoso quënanin. Nontérinsonta' natanin. Tamascoquë chiníquën cancantaton, Quisoso nanamën sha'huirin,” itérin. ²⁸ Ina quëran ca'tano'sataquë Saono yacapatarin. Imapisopitarë' nipayatona', pa'sapi. Inaquë co tê'huatonhuë', Siniro nanamën sha'huirárin. ²⁹ A'naquëen cotioro'saso' Crico nananquë nonpi. Saonori chiníquën pënënpachina, no'huitona', yatëpapi. ³⁰ Yatëpapirinahuë', imapisopita natanahuatona', Sisariaquë quëpapi. Inaquë quëparahuatona', Tarsoquë a'papi.

³¹ Ina quëran Quisoso imapisopita noya ya'huapi. Co huachi insoari téranta' aparisitérinhuë'. Cotia parti, Cariria parti, Samaria parti, inaquëpita sano ya'huatona', noya noya imasapi. “Siniro chiníquën nanantérin,” ta'tona', nôya natëpi. Ispirito Santori catahuarin ni'ton, a'napitanta imasapi.

Yosë nohuanton Pitrroi Iniasë anoyatérinso'

³² Pitroso nimirinhuë' nisha nisha parti pa'sarin imapisopita nicacaso marë'. Nitaquë canconpachina, imapisopita ni'conin. ³³ Inaquë a'na quëmapi quënanconin, Iniasë itopiso'. Posa pi'ipi canionton, quëhuëñárin. Apia ni'ton, co nanitérinhuë' huanicaso'.

³⁴ —Iya Iniasë, Quisocristo anoyatarinquëen. Huanirahuaton, pë'sara'huaya tapaquë huachi, itérin Pitrroi.

Napotohuachina, a'naroáchin huanirin. ³⁵ Inaquë ya'huëpisopitari ni'pi. Saronaquë ya'huëpisopitarinta' ni'pi. Napoaton na'a piyapi'sa' iráca yonquipisopita nariantatona', Quisocristo imapi.

Yosë nohuanton Tapita ananpitaantarino'

³⁶ Copëquë a'na sanapi Tapita itopiso' ya'huërin. Crico nananquë Torëcasa itopi. Inanta' Quisoso imarin. Noya sanapi ni'ton, sa'ahuar'o'sa' nosoroaton, nani tahuëri catahuarin. Pahuantohuachinara, ma'sha topinan nicanarin. ³⁷ Naporo' ina sanapi caniorahuaton, chiminin. Nonën pa'morahuatona', inapa pa'cotë' nininquë acopi. ³⁸ Pitroso' Nitaquë ya'huarin, natantopi. Co aquëyahuë' ni'ton, cato' quëmapi a'papi. Canconahuatona', “Manóton huëquë!”, itopi.

³⁹ Napoaton Pitro inapitarë' pa'nin. Canconpachinara, inapa pa'cotëquë quëpantapi. Inaquë na'a quëyorono'sari tahuirapitahuatona', na'nëtopi. A'mopisopita Tapitaco' i'huá pipitérinso' sa'ahuar'o'sa' quëtacaso marë' a'notopi. ⁴⁰ “Ya'ipinquëma' pipico' Yosë

nontëri'i," itohuachina, pa'pi. Nani pa'pachinara, isonahuaton, Yosë nontërin. Ina quëran nonën tahuërtahuaton, itapon:

—Imoya Tapita, huënsëqué', itërin.

A'naroáchin ni'tiintarin. Pitro quënanahuaton, huënsërin. ⁴¹ Pitrori maimirarahuaton, ahuanirin. Ina quëran imapisopita, quëyorono'sa' inapita pérarin. Huë'sahuatona', nanpirin quënanquipi. ⁴² Ya'ipi ninanoqué nahuinin. Na'a piyapi'sa' Quisoso natépi. ⁴³ Inaquë hua'qui' Pitro yacapatërin. Simon itopiso' pëinënqué yacapatërin. Simonso', sha'huëtë' tapana'pi.

10

Cornirio nicacaso marë' Pitro pa'ninso'

¹ Sisariaquë a'na quëmapi ya'huërin. Cornirio itopiso'. Inaso' capitán. "Itari-aro'sa'" itopiso sontaro huënton camairin. ² Inaso nisha piyapi niponahuë', Yosë chinotërin. Ya'ipi pëinënqué ya'huëpisopitanta' Yosë chinotopi. Cotioro'sa' ma'sha pahuantohuachinara, nosoroaton, topinan quëtërin. Nani tahuëri Yosë nontërin. ³ Pi'i têhuërenahuaso', co huë'éponahuë', hua'narëso pochin a'ninquëchin quënanin. Yosë anquëninëni huëcapaimarahuaton: "¡Cornirio!" itërin.

⁴ Anquëni ni'sahuaton, pa'pi té'huateñin.

—¿Ma'ta' sinioro nohuantëran? itërin.

—Quëmaso' na'con Yosë nontëran, nataninquëen. Sa'ahuar'o'sa' nosoroaton, ma'sha topinan quëtëran. Ina marë' noya yonquirinquëen. ⁵ Napoaton Copéqué piyapi'sa' a'paqué' Simon Pitro maconta'ina'. ⁶ Inaso', sha'huëtë' tapana'pi Simon itopiso' pëinënqué yacapatarin. Marë yonsanqué ya'huërin, itërin.

⁷ Anquëni pa'pachina, cato' piyapinëñ amatërin. A'na sotaronta' amatërin, nani tahuëri camairinso'. Inanta' Yosë chinotërin. ⁸ Anquëniri nontërinso' sha'huitahuaton, Copéqué a'parin.

⁹ Tahuërininquë yacamotëriahuaso', ninanoqué ya'caritopi huachi. Naporo' Pitro inapa pa'cotéqué pa'nin Yosë nontacaso marë'. ¹⁰ Tanaton, yacoshatopirinhuë'. A'na piyapiri cosharo' nitaso', Pitro hua'narëso pochin quënanin. ¹¹ Pi'iro'të' ni'soatarin, ni'nin. Panca ta'na pochin nininso' o'marin. Catapini cachinën quëran huëntënimararin. ¹² Inaquë nani ma'sha ya'huërin. Tananqué ya'huërisopita, pëhuara pochin nininsopita, anpiantëhuano'sa', inapita ya'huërin ni'nin. ¹³ Ina quëran noninso' natanin. "Huanirahuaton Pitro, tépaton ca'qué'," itërin.

¹⁴ —Inca Sinioro. Sopai inapitaso'. Co onporonta' ina pochin ca'chinahuë'. Iráca Moisésë pënenincoi ama ina pochin capaca'huaiso marëhuë', itërin Pitrori.

¹⁵ —Noya capacaso', itëranquëñ ni'ton, ama quëmari "sopai" itëquësuhuë'. Co huachi tananpitacaso' ya'huërinhuë', itërin.

¹⁶ Cararo' inachachin sha'huitantarín. Ina quëran ta'na pochin nininso' inápaqué quëpantarín. ¹⁷ Pitroso' yonquirárin. "Yosë nohuanton hua'narëso pochin quënanahuë. ¿Ma'ta' tapon ina pochin a'notérinco nica?" ténin yonquiaton. Naporo' Corniriori a'parinsopita canquirapi. Natantiirahuatona', Simon pëinën ya'coananënqué canquipi. ¹⁸ Canquirahuatona', natanpi: "¿Simon Pitro isëqué ya'huarin ti?" topi.

¹⁹ Pitroso niperinhuë' co nataninhuë'. Hua'narëso pochin ni'ninso' yonquirárin. Yonquiaso', Ispirito Santori itërin: "Apira cara quëmapi yonisarinquëñ.

²⁰ Nohuaramarahuaton, paqué'. Ama nisha nisha yonquiatonhuë', imaqué'. Ca nohuanton, huë'pi ni'ton, noya imaqué'," itërin.

²¹ Pitro nohuaramarahuaton, comisiono'sa' nontërin.

—Ca Simon Pitroco. ¿Onpoapomata' huë'namaso'? itërin.

²² —Capitan Cornirio a'parincoi. Inaso' nöya quëmapi. Nisha piyapi niponahuë', Yosë chinotërin. Ya'ipi cotioro'sari noya ni'pi. I'huara ya'huaso', a'nanaya anquëniri

ya'notimarahuatón, sha'huitimarin. “Piyapi'sa' a'paquë' Pitro maconta'ina'. Ina a'chintarinquén, noya natanquë'”, itérin ni'ton, a'parincoi huë'nai, itérin. ²³ Napotohuachina, “Ya'cointaco' iyaro'sa'”, itérin Pitrori. Napotohuachina, ya'coontapi. A'cahuachinara, huë'ëpatopi. Tahuëririnquë paantahuachinara, Pitronta' pa'nin. A'napitanta' Quisoso imapisopita Pitro imapi.

²⁴ Ina tashiraya Sisariaquë canconpi. Inaquë Corniriori ninararin quënanconpi. Quëmopinënpita, nipayarinsopita, inapita amatohuachina, nani niyontonpi natanacaiso marë'. ²⁵ Pitro canconpachina, Corniriori isonapairahuaton, moshapirinhüë'.

²⁶ A'naroáchin Pitrori ahuaniantarin.

—Huaniquë' iyasha. Co caso' moshancoso ya'huërinhuë'. Piyapico canta', itérin.

²⁷ Ninontahuatona', pëiquë ya'conpi. Inaquë na'a piyapi'sa' niyontonpi quënanconpi.

²⁸ Nani ninontohuachinara, Pitrori itérin:

—Cotioro'sacoi inachintéraiso', nani iyaro'sa' nitotërama'. Co onporonta' nisha piyapiro'sataquë ni'tapoi pa'naihuë'. Co inapitaro'coi niyontonaihuë'. “Co Yosë no-huantérinhüë”, topiraihuë'. Iporaso nippirinhüë' Yosë nani anitotérinco. Insosona Yosëri noya ni'pachina, canta' noya ni'i. Ya'ipi piyapi napopianachin noya nica'huaso' ya'huërin, tënahuë. ²⁹ Napoaton amatohuatancora, noya huë'nahuë. ¿Ma'marëta' amatéranco? itérin.

³⁰ Napotohuachina, Corniriori itérin:

—Nani catapini tahuëritarin, ipora pochin Yosë nontasoco, a'nanaya a'na quëmapi ya'notérinco. A'morinso' huënaráchin huënaráchin ni'nahuë. ³¹ Ya'notirahuatonco, itérinco: “Cornirio, quëmaso' na'con Yosë nontéran, nataninquén. Sa'ahuar'o'sa' nosoroaton, ma'sha quëtéran. Ina marë' Yosë noya yonquirinquëen. ³² Napoaton Copéquë piyapi'sa' a'paquë' Simon Pitro maconta'ina'. Inaso', Simon itopiso' sha'huëtë' tapana'pi pëinënqué yacapatarin. Marë yonsanquë ya'huërin,” itérinco. ³³ Ina natanahuato, a'naroáchin amatéranchuén. Ma noyanquén ni'ton, huë'nan. Iporaso' ya'ipicoi niyontonai. Yosënta' ni'sarincoi. ¿Ma'ta' ina sha'huitérinquén natëca'huaiso marë'? Yanatanai, itérin.

Cornirio a'chintérinso'

³⁴ Itohuachina, Pitrori itérin:

—Téhuëñchachin Yosëri ya'ipi piyapi'sa' nosororin. Co quiyasáchin nosororincoihuë'. Cancanënpoaquë yonquirëhusopita nitotaton, no'tëquén yonquirinpoa', tënahuë. ³⁵ Nisha piyapi'sanquëma' nipomarahuë', cancanëma' quëran huarë' ina chinotohuatama', no-huantarinquëma'. Noya cancantohuatama', noya ni'sarinquëma'. ³⁶ Iráca israiro'sacoi noya nanan sha'huitérincoi. Piyapinënpita pochin nicatoncoi, Yosë anitotérincoi. Os-hahuanëhua' ni'ton, Yosë inimicotopirëhuahuë', Quisocristo a'paimarin nanan anoyatinpoaso marë'. Inaso' ya'ipi piyapinpoa' yahua'anëntérinpoa'. ³⁷ Caririaquë nanan nahuinin. Ina quëran ya'ipi Cotia parti nahuinin ni'ton, canpitanta' natantërama'. Yosë nohuanton, Coansha pënëntérin co noyahue' yonquipisopita naniantacaiso marë'. Piyapi'sari natëhuachinara, aporintérin. ³⁸ Ina piquëran Yosëri chachin Quisocristo acorin, Nasaritoquë ya'huërinso'. Yosë nohuanton, Ispirito Santori noyá ya'coancantérin. Napoaton nani ma'sha nanitaparin nicacaso'. Nisha nisha parti paaton, nöya ninin. Na'a cania'piro'sa' a'naroáchin anoyatérin. A'naquén sopairi ya'coancantérin ni'ton, chiníquén parisitopirinahuë', inari anoyatérin. Yosëri catahuarin ni'ton, a'naroáchin anoyatérin. ³⁹ Quirosarinquë naporin. Ya'ipi cotioro'sa' ya'huëpiqueñta' inaporin. Ina quëran corosëquë patantanahuatona', tēpapi. Ya'ipiya quiyari ni'nai. ⁴⁰ Chiminpirinhüë', cara tahuëri quëran Yosëri ananpitaantarin. Nanpiantahuachina, Yosë nohuanton, ya'notérincoi. ⁴¹ Co ya'ipi piyapi'sari ni'pihuë'. Yosë nohuanton, quiyariso' ni'nai a'napita sha'huita'huaiso marë'. Nani nanpiantahuachina, quiyare' coshatérin, o'orin. Quisocristo téhuëñchachin nanpiantarín, tënai. ⁴² Naporó' sha'huitérincoi paatoi pënënta'huaiso marë'. “Paatoma', ca nanamëhuë sha'huico'

imatonaco noya cancanchina'. Yosë chachin acorinco ni'ton, a'na tahuëri coisë pochin nisarahuë. Nanpisopita, chiminpisopitanta', ya'ipiya co noyahüe' nipachina', ana'intarahuë. Inanta' sha'huitoco' nitochina'," itérinco ni'ton, sha'huirárai. ⁴³ Iráca quëran huarë' pënëntona'piro'sa' Quisoso ninotona', sha'huitérinënpoa' ina natëcaso marë'. Cancanënpoa quëran huarë' ina natëcaso' ya'huérin. Oshanënpoa marë' chiminin ni'ton, imapatëhua', ya'ipi oshanënpoa' inquitarinpoa'. "Ca oshanëhuë marë' mini Quisocristo chiminin," topatëhua', inquitarinpoa', itérin Pitrori.

Ispirito Santori ya'coancantérino'

⁴⁴ Noninso' natanahuatona', ya'ipiya natëpi. Nontaso chachin, Ispirito Santori ya'coancantérin. ⁴⁵⁻⁴⁶ Ina nohuanton, nisha nisha nananquë nonsapi. Co nitotaponarai-hüe', Ispirito Santo nohuanton, napoapi. "Ma noyacha Yosëso paya," tosapi. Natanahuatona', cotioro'sa' Pitro ca'tanpisopita pa'yanpi: "Nisha piyapi'sa' niponaraihuë', Yosë nohuanton, Ispirito Santori ya'coancantérin," topi.

⁴⁷ —Isopitanta' canpoa pochin Ispirito Santori ya'coancantérin ni'quëhuarë' aporihuaina', ténahuë. ⁴⁸ "Quisocristo imarai huachi," topachinara, aporintëquë', itérin Pitrori. Napotohuachina, aporintopi.

—Iséquë iyaya yacapatoncoi, hua'quimiáchin a'chintocoi, itopi. Napotohuachinara, inaquë hua'quimiáchin yacapatérin.

11

Pitro Quirosarinquë natanpiso'

¹ Nisha piyapi'santa' Yosë nanamën natëpi ni'ton, Cotia parti a'naroáchin nahuinin. Ca'tano'santa' natantopi. Ya'ipi imapisopita inaquë ya'huëpiso' nitotopi. ² Napoaton Pitro Quirosarinquë huënantahuachina, a'naquën cotioro'sa' iráca nanan natëpisoari no'huipi. Quisoso imaponaraihuë', iráca nanaonta' nohuantopi.

³ —Nisha piyapi'sa' pënënqué yacapataton, inapitarë'quën coshatéran. Co inapitaso' marca niacotopihuë'. ¿Onpoatonta' naporan? itérin.

⁴ Pitroso nimirihuë' ya'ipiya sha'huitérin.

⁵ —Natanco iyaro'sa', no'tequen sha'huitinqüëma'. Copëquë ya'huëasoco, a'na tahuëri Yosë nontárahuë. Naporo' co huë'ëporahuë', hua'narëso pochin quënanahuë. Panca ta'na pochin nininso' inápa quëran o'mararin. Catapini cachinën quëran huëntënimararin. Ca ya'cariya o'marin. ⁶ Inaanaquë ni'pirahuë', nani ma'sha quënanahuë. Tananquë ya'huërinsopita, tanan ni'ni pochin nininso', pëhuara pochin nininso', nisha nisha anpiantëhuano'sa', inapita quënanahuë. ⁷ Nontérincosonta' natanahuë. "Huanirahuaton isopita tépaton ca'quë!", itérinco. ⁸ "Inca Siniro. Sopai inapitaso'. Co onporonta' ina pochin ca'chinahuë'. Iráca Moissës pënënincoi ama ina pochin capa'huaiso marëhuë!", itohuatéra, ⁹ inápa quëran itantarino: "Noya capacaso', itérinquen ni'ton, ama quëmari 'sopai' itëquësuhuë'. Co huachi tananpitacaso ya'huërinhuë!", itérinco. ¹⁰ Cararo' inachachin sha'huitantarino. Ina quëran inápaquë quëpanantarín. ¹¹ Naporo' cara quëmapi'sa' Simon pënënqué canquipi. Sisaria quëran huë'pi. Capitan Corniriori a'parinso'. ¹² Ispirito Santo sha'huitérinco: "Inapita imaqué". Ama nisha nisha yonquiatonhuë', noya paqué", itérinco. Napoaton pa'nahuë. Isopita iyaro'sa' ca'taninaco, saotaya'pi chachin ca'taninaco. Pëinënqué canconahuatoi, ya'conai. ¹³ Ya'conpatoira, Cornirio itérinco: "Pëinëhuëquë Yosë nontasoco, anquëni ya'notirinco, ni'nahuë. 'Copëquë piyapi'sa' a'paqué' Simon Pitro maconta'ina'. ¹⁴ Inaso' nanan sha'huitarinquen cha'écamaso marë'. Ina natëhuatan, Yosë anoyacancantarinqüen. Quëmopinënpitanta' anoyacancantarín, ténin anquëni," itérinco. ¹⁵ Quisoso nanamën sha'huitasoco chachin, inapitanta' Ispirito Santori ya'coancantérin. Ya'nan canpoa' ya'coancantérinpoaso pochachin inapitanta' ya'coancantérin. ¹⁶ Naporo' Siniro sha'huitérincoiso' yonquirahuë. "Coanshaso'

i'quë aporintérinquëma'. Yosëso nimirinhue' Ispirito Santo aya'coancantarinquëma' catahuainquëmaso marë', itérincoi Quisoso. ¹⁷ Sinioro Quisocristo imapatéhua', Yosë no-huanton, Ispirito Santo ya'coancantérinpoa'. Inapitaso' nisha piyapi'sa' níponaraihuë', imapachinara, inapochachin Ispirito Santori ya'coancantérin. Yosëri noya ni'pachina, inapochachin canta' noya ni'i, ténahuë. ¡Co caso' nanitérahuë' nisha yonquia'huaso'! itérin Pitrori.

¹⁸ Natanaahuatona', co huachi no'huipihuë'.

—Téhuénchachin Yosë nohanton, nisha piyapi'santa' co noyahuë' yonquipisopita nariantatona', imasapi. Inari catahuarin ni'ton, nanopimiatapi. Ma noyacha Yosëso paya, itopi.

Antioquiaquë imapiso'

¹⁹ I'hua chachin Istipan tēpahuachinara, Quisoso imapisopita aparisitopi ni'ton, aquë yanquëepi. A'naquën Pinisia parti pa'pi. A'naquëonta' Chipriquë pa'pi. A'napitanta' Antioquiaquë'pa' pa'pi. Nisha nisha parti paatona', Quisoso nanamën sha'huipi. Sha'huiponaraihuë', cotioro'saráchin sha'huitopi. ²⁰ A'naquënso nimirinhue' Antioquiaquë canconahuatona', nisha piyapi'santa' sha'huitopi. Sinioro Quisoso naporins'o a'chintopi. "Oshanëma' inquitaténquëma', anoyacancantarinquëma'", itopi. Chipri quëran huë'pisopita, Sirini quëran huë'pisopita, inapita napopi. ²¹ Yosëri catahuarin ni'ton, na'a piyapi'sa' natëtona', imapi. Iráca yonquipiso' nariantatona', Quisoso imasapi.

²² Quirosarinquë nahuinin. Quisoso imapisopita natantahuatona', Pirnapi a'papi Antioquiaquë ya'huëpisopita nicacaso marë'. ²³⁻²⁴ Inaquë canconahuaton, "Téhuénchachin nisha piyapi'santa' imasapi. Yosëri na'con catahuarin," ta'ton, noya cancantérin. Pirnapiso' noya quëmapi. Yosë noya natërin. Ispirito Santori noyá ya'coancantérin ni'ton, piyapi'sa' pënënin: "Ama Sinioro a'pocosohuë'. Ya'ipi cancanëma quëran huarë' imamiatoco'," itérin. Pënënpachina, a'napitanta' Quisoso imapi.

²⁵ Ina quëran Pirnapi Tarsoquë pa'nin Saono yonípon. Inaquë yoniton, quënanin.

²⁶ "Huëquë' pa'a Antioquiaquë ya'huëpisopita a'chinta," itohuachina, "Inta nipachin pa'a," ta'ton, imarin. A'na pi'isa' inaquë ya'huëpi. Imapisopita catahuacaiso marë' yacapatopi. Na'a piyapi'sa' a'chintopi. Inaquë chachin Quisoso imapisopita nisha nininën acoantapi. "Cristo imaro'sa'," itopi.

²⁷ Naporo' tahuëri'sa' pënëntona'piro'sa' Quirosarin quëran Antioquiaquë huë'pi.

²⁸ A'naso' Acapo itopi. Inaso' Ispirito Santo nohanton, ninorin. "Co hua'qui quëranhuë' ya'ipi parti tanarotapi," itérin ninoton. Ina quëran Craotio itopiso' Noma copirno ya'conaso', téhuénchachin tanarotopi. ²⁹ Napohuachina, imapisopita yonquipi Cotia parti ya'huëpisopita catahuacaiso marë'. Imapisopita parisitapi ni'ton, coriqui yaa'papi. Coriquihuano'saso' na'con quëtopi. Co coriquihuano'sahuë' nípisopitaso', pi'pian quëtopi. ³⁰ Nani coriqui yontonpachinara, Pirnapi, Saono, inapita quëtopi quëpacaiso marë'. Quirosarinquë quëparahuatona', ansiano'sa' quëtonpi pahuantérinsopita quëtacaiso marë'.

12

Irotisëri aparisitérinso'

¹ Naporo' tahuëri'sa' a'na hua'an ya'huërin, Irotisë itopiso'. Quisoso imapisopita no'huiton, sontaro'sa' a'parin aparisitacaiso marë'. ² Santiaco maconpi. Inaso' Coansha iin. Mapachinara, sahuéniquë atëpatérin. ³ Tépapi ni'ton, cotio hua'ano'sari pa'yatopi. Ina natantahuaton, Pitronta' macacaiso marë' camaitérin. Naporo' cotioro'sa' niyon-tonapi pan co ahuëpocatopisohuë' capacaiso marë'. ⁴ Mapachinara, tashinan pëiquë apo'motérin. Shonca saota sontaro'sa' acorin a'paicaiso marë'. Catapini, catapini ya'piri ni'sapi. Niya'huërétatona', tashirë chachin a'pairapi. "Pascoa na'huëhuachin, piyapi'sa'

ni'térantapaiquë Pitro ana'intarahuë," ténin hua'an yonquiaton. ⁵ Pitro tashinan pëiquë ya'huapirihuë', Quisoso imapisopita Yosë nontapi. Pitro marë' chiníquën Yosë nontapi.

Pitro tashinan pëi quëran cha'érinso'

⁶ Tashiraya pochin hua'ani ana'intacaso' nisahuaso', Pitro huë'ésárin. Cato' sontaro'sari ahuancoanapipi. Cato' catinaquë tonpopi. Ahuënán quëran a'na sontarori nitonpotanpatérin. Inchinan quëran a'narinta' nitonpotanpatérin. Inapotahuatona', ya'ipi huë'ésapi. Ya'coanaquë cato' sontaro'sa chachin tashinan pëi' a'pairápirinahuë'.

⁷ A'nanaya Sinioro anquëninën inaquë ya'notimarin. Huënaráchin a'pinin. Pitro pichianahuaton, ochinanin. "Manóton huënséquë' pa'a," itérin. Napotohuachina, tanpain quëran catina inaora nii'quiritérin. Cato quëran chachin nii'quiritérin.

⁸ "A'moanahuaton, sapatë' po'moquë'," itérin. Itohuachina, inaporin. "Aipi a'moransonta' a'mosahuaton, imaquico," itantarín.

⁹ Ina quëran pipihuachina, Pitrori imarin. "Co'ta'ma' anquëni ocoiarincohuë". Topinan hua'nareso pochin ni'samarahuë," topirinhuë'. ¹⁰ Sontaro ya'natontarinso' na'huétirin. Ina quëran a'nanta' na'cotiantarin. Pëianshinanquë huarë' canquirin. Inaquë panca ya'coana hua'na quëran nininso' ya'huëpirihuë', inaora ni'soatérin. Pipirahuaton, a'na cachique pa'nin. Inaquë a'naroáchin anquëniri patérin.

¹¹ Naporor' Pitro no'téquëñ yonquirin: "Co hua'nareso pochin ni'nahuë". Sinioro chachin anquëninën a'patimarinco nicha'ëincoso marë'. Irotisé, cotio hua'ano'sa', inapita yatépapirinacohuë', nicha'érinco," ténin.

¹² Ina yonquiaton, Maria pëinénquë pa'nin. Coansha Marco a'shin inaso'. Inaquë na'a imapisopita niyontonahuatona', Yosë nontapi. ¹³ Paire tahuirinquë canconahuaton, ya'coananénquë pi'nitonin. Pi'nitohuachina, a'na nanon huë'nin, Rota itopiso'. ¹⁴ Pitro noninso' nohuianantahuaton, pa'yanin. Pa'yanaton, co ya'coana i'soataponahuë', ta'acontarahuaton, pëiquë ya'coantarin. Pitro aipiran huaniarinso' sha'huiconin.

¹⁵ —Quëmaso' hua'yantëran, itopirinahuë'.

—Co hua'yantërahuë'. Téhuëñchachin Pitro inaquë huaniarin, itohuachina:

—Co inahuë'. Anquëninën nimara, itopi.

¹⁶ Napoasoi', Pitroso' ya'coana pi'niantarin. Naporor' huarë' i'soatopi. Pitro quënanahuatona', pa'yanpi. ¹⁷ Inaso nimirin quëran anquitérin ama noncarocaiso marëhuë'.

—Sinioro chachin anquëninën a'patimarinco. Tashinan pëi quëran ocoirinco. Iya Santiago sha'huitonco' nitochin. Ya'ipi imapisopitanta' sha'huitoco', itérin.

Ina quëran a'na parti pa'nin.

¹⁸ Tahuërihuachina, sontaro'sa' pa'pi pa'yanpi. "¿Intoacha Pitro pacaya?" nitopi.

¹⁹ Irotiséso nimirinhuë': "Pitro maconqué'," itopirinhuë'.

"Capa huachi," itohuachina, a'na a'na sontaro natánin. Co nitotohuachinarahuë', tēpacaiso marë' camaitérin. Napoaton sontaro'sa' Pitro a'paipisopita tēpapi. Ina quëran Irotisé Cotia quëran pipirahuaton, Sisariaquë pa'nin ya'huapon.

Irotisé chimininso'

²⁰ Irotisi hua'an ya'huérinquë nisha nisha piyapi'sa' huëcatona', cosharo' pa'anquipi. A'naquënsi' cosharo' yapa'anpirinahuë', chiníquën no'huiton, co nohuantërinhuë' quëtacaso'. Tiroquë ya'huëpisopita, Sitonquë ya'huëpisopita, inapita no'uirárin. Napoaton niyontonahuatona', inaquë huë'pi. Po'oana quëran inpriatónen Pirasito itopiso' nontiipi.

—Quëmari hua'an nontéquë' ama huachi no'huincoisohuë'. Ina marë' coriqui quëchinquëñ, itopi.

—Noyahua', tosahuaton, pa'nin hua'anen nontacaso marë'.

²¹ —Sha'huitéquë' huënta'ina' nonchi, itérin. Niyontonpachinara, noyápiachin nitaparin. Hua'anentacaso' shiranénquë huënsérahuate, piyapi'sa' nontarin.

²² Natanahuatona', pa'yatapi: "Ma noyanquëncha quëmaso paya. Co piyapi pochin nontérancioihuë". Yosë chachin pochin nontarancor," itopi chiníquën nontatona'.

²³ Topinan piyapi niponahuë' natanahuaton hua'an nipa'yatérin. Yoséíchin chinotacaso nipurinhuë' naporinso marë', a'naroáchin Siniro anquëninëni acaniorin. Chiníquën canionton, shonari pë'yarin. Parisitérarin quëran chiminin.

²⁴ Yosë nanamënso nipurinhuë' nahuinarin. Nisha nisha parti sha'huirápi ni'ton, na'a piyapi'sa' natëtona' imasapi.

²⁵ Pirnapi, Saono, inapitaso' nani yonquipi Antioquiaquë paantacaiso'. Imapisopita coriqui a'papiso' nani quëtonpi ni'ton, Quirosarin quëran pipirahuatona', paantapi. Coansha Marconta' quëpapi.

13

Pirnapi, Saono inapita a'chinacaso marë' a'papiso'

¹ Antioquiaquë na'a Quisoso imapisopita ya'huëpi. Na'a niyontonahuatona', Yosë chinotopi. A'natérápo quëmapi'sa' ansiano ya'conpi. A'naquënsö' Quisoso nanamën sha'huitona', pënëntopi. A'naquëonta' imapisopita a'chintopi noya imacaiso marë'. Inapitaso': Pirnapi, Simon, Nosio, Manain, Saono, inanapo ya'huëpi. Simonso' yara piyapi. Nosioso' Sirini quëran huë'nin. Manainso', Cariria hua'an Irotisé pëinëñquë so'sorinso'. ² A'na tahuëri co coshatatonaraihuë', Siniro chinotopi. Napohuachinara, Ispirito Santori sha'huitérin: "Pirnapi, Saono inapita nohuantérahuë paatona', piyapi'sa' a'chintacaiso marë'. Ina marë' inapita acorahuatomá, a'paco' pa'ina'", itérin.

³ Napoaton co coshatatonaraihuë', inapita marë' chiníquën Yosë nontopi. Nani Yosë nontohuachinara, së'huamotorahuatona', acopi paatona' a'chinacaiso marë'. Ina quëran a'papi.

Chipri parti a'chinpiso'

⁴ Ispirito Santo nohuanton, Siriosiaquë pa'pi marë pa'tacaiso marë'. Ina quëran panca nanchaquë pa'sahuatona', Chipri parti canconpi. Panca so'ton inaso'. Inaquë na'a ninano' ya'huërin. ⁵ Saraminaquë nonshirahuatona', cotio niyontonpiso pëiquë pantarahuatona', Yosë nanamën sha'huitopi. Nisha nisha niyontonpiso pëiquë sha'huitéra'piapi. Coansha Marconta' pa'nin catahuacaso marë'.

⁶ Inaquë sha'huirahuatona', ya'ipi Chipri parti pa'topi. A'chintéra'piapi. Inapoatona', Paposéquë huarë' canconpi. Inaquë a'na pënoton quënanconpi. Inaso' cotio quëmapi, Parquisoso itopiso'. Inaso', nonpin nanan pënëntona'pi ni'ton, piyapi'sa' nonpintarin. ⁷ Inaso' hua'an amiconën. Hua'anso' Siriquio Paono itopi. Inaso' noya yonquirin. "Canta' Yosë nanamën nata'in," ta'ton, Pirnapi, Saono, inapita amatérin. ⁸ Pënotonso nipurinhuë' co nohuantérinhuë'. Inaso' Crico nananquë Irimasé itopi. "Ama natëquësohuë'," toconin. ⁹ Saonoso' Noma nananquë Paono itopi. Ispirito Santori noyá ya'coancantérin ni'ton, pënoton ni'sárin quëran itapon:

¹⁰ —Quëmaso' sopai pochin cancantérän. Yosëso' noya noya nipurinhuë', yain-imicotérän. Tëhuëñchachin nonpintëñquën, pa'pi co noya quëmapinqüënhuë'. Siniro no'tëquën sha'huitopirinpoahuë', ¿onpoatonta' quëmari nonpintaton, a'napita anishacancantarän? ¹¹ Apiramiachin Yosë nohuanton, co manta' quënantaranhuë'. Hua'quimiachin co pi'i quënanaranhuë', itérin.

Napotohuachina, a'naroáchin chitoro pochin ni'térin. Somaraya pochin nicaton, co manta' quënantérinhuë'. Si'pinantápirinhuë', a'na piyapi nohuantérin matanparahuaton, quëpacaso marë'. ¹² Hua'ani ni'sahuaton, "Yoséri mini napotérin," ta'ton, natérin. Siniro nanamën natanahuaton, pa'yanin. "Inaso' chiníquën nanan," ténin.

Pisitia parti pënëntérinso'

¹³ Ina quëran Paonoso', ca'taninsopitarë chachin a'na parti pa'nin. Nanchaquë ya'conahuatona', marë pa'tantapi. Panpiria parti nonshirahuatona', a'na ninano Piriqui itopiquë pa'pi. Coansha Marcoso nimirinhue', co huachi imáterinhue'. Quirosarinquë ayamantarín. ¹⁴ Paonoso' Pirnapirë chachin paantapi. Piriqui na'huétahuatona', aquë iratopi. Pa'sápatona', a'na Antioquiaque' canconpi, Pisitía parti ya'huérinso'. Chinoto tahuëri nipachina, cotio niyontonpiso pëiquë pa'pi. Inaquë ya'conahuatona', huënsëpi. ¹⁵ Cotio ansiano'sa' quirica nontapi. Moisésë iráca pënentérinso', pënentona'piro'sa' ninshitopiso', inapita nani nontohuachinara, itapona':

—Achinicanamacoiso marë' yapënënpatamacoi iyaro'sa', sha'huitoco nata'in, itérin.

¹⁶ Napotohuachina:

—Noyapa', carinquémanta' pënëinquëma', ta'ton Paono huanirin. Huanirahuaton, imirin quëran tasatérin piyapi'sari ta'tatona' natanacaiso marë'.

—Natanco iyaro'sa'. A'naquémanta' nisha piyapinquëma' nipomarahuë', Yosë chinotérama'. Canpitanta' natanco. ¹⁷ Iráca quëran huarë' israiro'sanpoa' Yosë chinotéréhua'. Iráca chachin shimashonënpoapita acorin piyapinënpita nicacaiso marë'. Iquipitoquë ya'huéapona', Yosë nohuanton, na'api. Ina quëran Yosëri chachin chiníquen nanantaton, catahuarin inatohua quëran cha'ëcaiso marë'. ¹⁸ Catapini shonca pi'ipi inotero parti pa'pachinara, Yosëri nosoroaton, co ata'huantérinhue'. Co yanatépirinahuë', na'con catahuarin. ¹⁹ Ina nohuanton, Canaan parti pa'pi. Inatohua' nisha nisha piyapiro'sa' ya'huëpi, nisha nisha nananquë nonpisopita. Canchisë huënton ya'huépirinahuë', co Yosë natépihuë' ni'ton, ina nohuanton minsëpi. Inaquë chachin shimashonënpoapita ya'huëpi. Yosëri catahuarin ni'ton, ina no'pa' hua'anëntopi. ²⁰ Ya'ipi quëran catapini pasa a'natérápo shonca pi'ipi ninin.

Ina piquëran Yosë nohuanton, hua'ano'sa' ya'cona'piapi catahuacaiso marë'. Samoiro ya'conaguë huarë' inapopi. ²¹ Inaso' noya pënëntopirinhuë': "Copirno nohuantérai huachi," topachinara, Yosëri Saono acorin. Inaso' Mincamin huënton quëmapi, Quisi hui'nin. Catapini shonca pi'ipi Saono hua'anëntopirinhuë', ²² Yosëri ocoirahuaton, Tapi acorin. Quisi hui'nin inaso'. Noya quëmapi ni'ton, Yosëri noya ni'nin. "Tapiso' ca pochín cancantérin. Noya ni'nahuë. No'tequen natéarinco," ténin Yosë. ²³ Iráca chachin Yosëri sha'huitérin: "A'na tahuëri Tapi shiin nicha'ësarinquëma'", itérin shimashonëmapita. Iporaso' iyaro'sa', nani Quisoso a'paimarin nicha'ëinpoaso marë'. Sha'huitérinso chachin a'paimarin. ²⁴ Co'huara Quisoso huë'shaterasohuë', Coansha pënëntarin. Na'a israiro'sa' pënënarin. "Co noyahue' yonquiramasopita nariantatoma', Yosë chachin tahuérétantaco'. Ina quëran i'quë aporintaranquëma'", itérin. ²⁵ Coansha pënëntérinso' yatiquihuachina, no'tequen sha'huirin. "Quëmaso' Cristonquën,' itopiramacohuë', co caso' inacohuë'. Nipirinhuë', ca piquëran huë'sarin. Inaso' noya noya. Co caso' maquëyancohuë' ni'to, co sapatén i'quirita'huaso téranta' nanitarahuë", itérin.

²⁶ "Canpoaso' iyaro'sa', Apraan shinpitapoa' ni'tehua', Yosë nanan a'patirinpoa' nicha'ëinpoaso marë'. Nisha piyapinquémanta' Yosë chinotohuatama', nicha'ësarinquëma' canpitanta'. Napoaton ya'ipinquëma' sha'huitaranquëma'. ²⁷ Quirosarinquë ya'huépisopitaso', co Quisoso nohuitopihuë': 'Yosëri a'paimarin,' co topihuë'. Co hua'ano'sa téranta' napopihuë'. Pënëntona'piro'sa' ninshitopiso' nani chinoto tahuëri natanpirinahuë', co yonquipihuë'. 'Quisoso tépaquë', itopi. Iráca ninorinso chachin yatepapi. ²⁸ Co ma'marë téranta' tépacasohuë' niperinhuë', Pirato sha'huitopi: 'Tépaquë', itopi. ²⁹ Ina quëran ya'ipi Yosë quiricanënqué ninorinso' nanihuachina, corosë quëran anohuararahuatona', na'pi naninqué po'mopi. ³⁰ Inaquë po'mopirinahuë', Yosëri ananpitaantarin. ³¹ Nanpiantarahuaton, a'na yoqui miria pochin ya'huantarahuaton, ca'tano'sanënpita ya'notëra'piarin. Co'huara chimiyanterasohuë', na'a Caririaque' ya'huépisopitari ca'tanpi. Quirosarinquë huarë' imapi. Quisoso nanopiantahuachina,

inapitarinta' quënanpi. Quënanahuatona', ya'ipi piyapi sha'huitapi: 'Nanpiantarin mini. Quiyari ni'nai,' tosapi.

³² Quiyanta', iyaro'sa', noya nanan sha'huitarainquëma'. Iráca Yosëri shimashonënpoapita nontaton, sha'huitérin. ³³ Iporaso' nani Quisoso a'patimarinpoa'. Shimpitanpoa' ni'téhua', yonquirinpoa'. Quisoso ananpitaantarahuatón, catahuuarinpoa' canpoanta'. Yosë quiricanënqué iráca ninshitérin. 'Quëmaso' hui'nahuënquéen. Ipora chachin acoaranquén hua'anëntamaso marë', ténin Tapi. Sarmo catoquë naporin. ³⁴ Yosëri ananpitaantacaso' ninorin. Co nonën chanatarinhue'. Iráca quiricanën quëran itérin: 'Tapi no'tequén nontérahuë. Nosoroato, na'con catahuuarahuë. Canpitanta' inapochachin catahuaranquëma', ténin Yosë. ³⁵ Napoaton Tapiri ninshitantarín. 'Quëmasáchin natëranquén ni'ton, co nohuantaranhuë' nonéhuë chanatacaso', itérin, Yosë nontaton. Sarmo quiricaquë chachin naporin. ³⁶ Napoaponahuë', Tapiso' Yosë natëton, piyapi'sa' catahuarin. Ina quëran chiminin. Shimashonënpita pirayan pa'pitopi. Nonën chanatérin. ³⁷ Quisososo nípirinhuë' Yosëri ananpitaantarín. Co nonën chanatérinhuë'. Quisoso nonën chachin ninoton, Tapi iráca ninshitérin. ³⁸⁻³⁹ Napoaton iyaro'sa' sha'huichinquëma'. Quisosoíchin nanitaparin oshanëma' inquitiniquëmaso'. Iráca pënëntérinso' Moisésëri ninshitopirinhuë'. Ina imapatama', co oshanëma' inquitarinquëmahuë'. Nípirinhuë', Quisoso natëhuatéhua', oshanënpoa' inquitarinpoa'. Oshanënpoa marë' chiminin ni'ton, inquitarinpoa'. Ina quëran Yosë noya ni'sarinpoa'. ⁴⁰ Nani natanamaco ni'ton, a'naroáchin, iyaro'sa', natëco'. Ni'cona ana'intocheinquëma'. Iráca Yosë quiricanën quëran pënëntona'piro'sa' itapona':

⁴¹ Yosëri itérin: "Canpitaso' na'con tēhuaconama".

Iso tahuëri'sa' ca nohuanto, na'con ma'sha onpoarama'. Yonquirahuëso' sha'huitarinënquéma'.

Natanapomarahuë', co natëtaramahuë'. Napoaton pa'yanatoma', yonquico'.

Chiníquén ana'intaranquëma' ni'ton, ta'huantarama', ténin Yosë, itopi.

Canpitanta' ni'cona inapochachin ana'intocheinquëma', ténin Paono, pënëntaton.

⁴² Ina quëran niyontonpiso pëi quëran pipihuachinara, 'a'na chinoto tahuërinta' inapochachin a'chintaantacoi', itopi. ⁴³ Piyapi'sa' noquitopirinahuë', na'a cotioro'sari Paono imasapi. Nisha piyapi'santa' cotioro'sa pochin Yosë chinotopisopita imasapi. Imapachinara, Paono, Pirnapi catoari chachin a'chintantapi.

'Yosë inaora nohuanton, nosororinpoa', ta'toma', imamiatoco', itopi.

⁴⁴ A'na chinoto tahuëri nanihuachina, ya'ipi ninanoqué ya'huëpisopita niyontonpi Yosë nanamén natanacaiso marë'. Caraíchin piyapi co pa'pihuë'. ⁴⁵ Cotioro'saso nípirinhuë' notohuaro' piyapi ni'sahuatona', no'huitona', apiratopi. "Isopitaso' nisha piyapi'sa' ni'ton, co canpoa pochin iráca pënëntérinso' natëpihuë", ta'tona', no'huitopi.

"Paono co no'tequén a'chininhuë'. Inaso' nonpintë", itopi. ⁴⁶ Paonoso nípirinhuë' chiníquén cancantaton, co tē'huarinhuë'. Pirnapinta' chiníquén cancantérin.

—Canpita'ton Yosë nanamén sha'huita'huanquëmaso' ya'huëpirinhuë', a'porama' ni'ton, campitaora tēhuënëma quëran co nanopimiataramahuë'. Napoaton nisha piyapi'sa' a'chintarai. ⁴⁷ Siniro sha'huitérincoi:

"Quëmaso' acoranquén nisha piyapi'sa' a'chintaton anohuitancoso marë'.

A'pintérëso pochin nanaméhuë anitotaran.

Ya'ipi parti paaton, piyapi'sa' a'chintéra'piapon cha'ëcaiso marë', itérincoi, ténin Paono.

⁴⁸ Nisha piyapi'sa' natanahuatona', pa'yatopi. "Ma noyacha Yosë sha'huitérinpoa paya," topi. A'naquén Yosëri huayonin ni'ton, natëtona', Quisoso imasapi ina nohuitatona', nanopimiatacaiso marë'. ⁴⁹ Ya'ipi ina parti Siniro nanamén nahuinin.

⁵⁰ Cotioro'saso nípirinhuë' ninano' hua'ano'sa' nontopi. Sanapi'santa' chiníquén nanopimiatopita nontopi, Yosë chinotopisopita nininso'. "Paono co noya quëmapihuë'. Pirnapinta' co noyahuë'. Co iséquë nohuantérhaihuë", toconpi. Napotatona', aparisitahuatona',

a'papi. ⁵¹ "Nani sha'huitopiranquëmahue', co nohuantaramahuë' ni'ton, canpitaora tēhuënëmaquë nina'intarama', itahuatona', Iconioquë pa'pi. ⁵² Patopirinahuë', nani a'chintopi ni'ton, Quisoso imapisopitaso' noya cancantopi. Ispirito Santori noyá ya'coancantérin.

14

Iconioquë a'chinpiso'

¹ Paono, Pirnapi, inapita Iconioquë canconpachinara, inachachin niantapi. Inaquënta' chinoto tahuëri nanihuachina, cotio niyontonpiso pëiquë ya'conpi. Noya a'chinpi ni'ton, na'a cotioro'sari natëpi. Na'a nisha piyapi'santa' Quisoso imápi. ² A'naquën cotioro'saso nimirinhue', co yanatépihuë'. Napoaton, nisha piyapi'sa' non-tatona', anishacancantopi. "Quisoso imapisopita co noya piyapisahuë'", itopi. Napoaton a'naquën co yaimatonahuë', imapisopita no'huipi. ³ Hua'qui' inaquë Paono yacapatérin. Pirnapirë chachin inaquë ya'huëpi. Chiníquën cancantatona', Siniorori nosororinso' sha'huirápi. No'tequën sha'huipi ni'ton, Siniorori catahuarin cania'piro'sa' a'naroáchin anoyatacaiso'. Ina ni'sahuatona', "Tēhuënchachin Yosë catahuarinquëma'", itopi. ⁴ Ya'huëhuano'saso' nisha nisha yonquipi. A'naquën cotioro'sa pochin cancantopi. A'naquënsa nimirinhue' Paono, Pirnapi, inapita natëpi. ⁵ Cato chachin noya nimirinahuë', cotioro'saso' nisha piyapi'saré' napopianachin yonquiatona', chinotopi ahuëcaiso'. Hua'ano'sarinta' no'huipi. Na'piquë yatépapirinahuë', ⁶ natantahuatona', ta'api. Niconia parti pa'pi. Inaquë cato' panca ninanoro'sa ya'huërin. A'naso Nistra, a'nanta' Tirpi itopi. ⁷ Inatohua' paatona', noya nanan sha'huiantarapi. Ya'cariyanta' a'chinapi.

Paono na'piquë tē'yarapiso'

⁸ Nistraquë apia ya'huërin. Co nanitérinhue' iratacaso'. Nasitérin quëran huarë' co onporonta' huanirinhue'. ⁹ Paonori a'chintohuachina, nöya natanarin. Napohuachina, Paonori notëérin. "Iso quëmapi noya natëtérin. 'Quisocristo nanitérin anoyatiincoso', ténins marë' anoyatarahuë," ténin yonquinënqué. ¹⁰ Napoaton chiníquën itapon:

—No'tequën huaniquë' iyasha, itérin.

A'naroáchin huanirahuaton, noya pa'sarin. ¹¹ Piyapi'sari ni'sahuatona', Niconia nananquë ninontopi:

—Yosëro'sa' isëquë o'matona', piyapi taraimapi, topi.

¹² "Pirnapiso' Sioso chinotérëhuaso'," nitopi. Paono na'con na'con a'chinin ni'ton, "Inaso' Irimisë chinotérëhuaso'," nitopi. (Inahuara nananquë ninontopi ni'ton, Paono, Pirnapi inapitaso' co natanpihuë'.) ¹³ Ninano intonquë Sioso moshapiso pël' ya'huërin. Ina hua'anënso', ohuaca' masahuaton, yancoro'sa' sihirin, apë'pëconotacaso marë'. Notohuaro' piyapi'sari imasapi. Ninano ya'coanaquë quëparahuaton, inaquë yatéparin moshacaiso marë'. ¹⁴ Naporu huarë' Pirnapi, Paono, inapita nitotopi. Natanaahuatona': "Tata Yoséichin chinotacaso' ya'huërin," ta'tona', a'mopiso oshapi. Huancanachin ta'arahuatona', chiníquën nontopi.

¹⁵ —¿Onpoaramata' iyaro'sa'? Ama moshacoisohue'. Tēhuënchachin co quiyaso' moshamacoiso ya'huërinhue'. Quiyanta' piyapicoi, campita pochachin ninai. Noya nanan sha'huita'huanquëmaso marë' huë'hai. Quisoso nanamën, iyaro'sa', a'chinchingue'ma', natanco. Mamansi topinan quëran mosharama'. Yosëso nimirinhue' nanpirárin. Ama huachi mamansi moshacosohue'. Inapita naniantatoma', Yosë imaco huachi. Isoro'pa', inápaquë ya'huërinsopita, marëro'sa', ya'ipi ma'sharo'sa', inapita inari ninin. ¹⁶ Iráca piyapi'sa' co Yosë nohuitopihuë' ni'ton, Yosëri tananpitérin inahuara yonquipiso' imacaiso marë'. ¹⁷ Nimirinhue', nosoroatonpoa', nani ma'sha acotérinpoa' ina nohuitacaso marë'. Ina nohuanton, o'nanin. Ina nohuanton, ma'sha papotérin. Ina

nohuanton, cosharo' ya'huëtérinpoa' ca'patéhua' noya cancantacaso marë'. Inapoaton, noya yonquirinpoaso' anitotérinpoa', itopi.

¹⁸ Napotopirinahuë', co a'naroáchin natëtopihuë'. Parisi quëran pochin natëtona', co huachi ohuaca' tēpatona inapita moshapihuë'.

¹⁹ Napoaponahuë', cotioro'sari huëcapairahuatona', anishacancantopi. A'naquën Antioquia quëran huë'pi. A'napitanta' Iconio quëran huë'pi. Huë'sahuatona', Paono, Pirnapi, inapita sha'huirapipi ni'ton, no'huipi.

No'huirahuatona', Paono mapi. Masahuatona', na'piquë tē'yarahuachinara, chiminpirinhuë'. Ohuararahuatona', ninano intonquë tē'yatoni. "Nani chiminin," ta'tona' inaquë patopi. ²⁰ Quisoso imapisopitari tancapitahuatona', nocoasoi', a'nanaya ni'tiintarahuaton, huaniantarin. Ninanoquë paantarin. Tahuëririnquë Tirpique pa'nin. Pirnapinta' pa'nin.

²¹ Inaquë noya nanan sha'huitohuachina', na'a piyapi'sa' Quisoso imasapi. Nani a'chintohuachinara, Nistraquë ayamantapi. Ina quëran Iconioquënta' paantarahuatona', Antioquiaquë cancoantapi. ²² Cara ninanoquë chachin Quisoso imapisopita pënëna'piapi. "Ama iyaro'sa' Quisoso a'pocosohuë'. Imamiatoco'. A'napita aparisitarinénpoa'. Parisitacaso' ya'huërin. Parisitatéhua', Yosë hua'anëntérinque' ya'conarëhua'. Napoaton noya ahuantoco'," itopi. Pënënpachinara, achinicancanpi. ²³ Yapa'pachinara, a'naya a'naya Quisoso imapisopitaquë ansiano'sa' acora'piapi. Noya nipesopitaráchin acora'piapi. Co coshatatonaraihuë', inapita marë' Yosë nontopi: "Ya'ipi isopita, Siniro, noya natërinénquëen. Noya a'paiquë'," itopi. Cara ninanoquë chachin napopi.

Hua'qui quëran ya'huëpique' paantapiso'

²⁴ Ina quëran paantapi. Pisitia parti na'huëtaantarahuatona', Panpiria parti cancoantapi. ²⁵ Piriquiquë Yosë nanamën sha'huiantarahuatona', Atariaquë pa'pi huachi.

²⁶⁻²⁷ Ina quëran nanchaquë huë'sahuatona', Antioquiaquë canquipi. A'papi quëran chachin canquiantapi. Canquirahuatona', Quisoso imapisopita ayontonahuatona', ya'ipi sha'huitopi. "Thua chachin a'paramacoi. 'A'na parti ya'huëpisopita noya nanan sha'huitonco'. Inséquësona pa'patama', Yosë noya catasthuainquëma', itohuatamacoira, pa'nai. Nani sha'huirai. Yosë nöya catasthuarincoi. Ina nohuanton, nisha piyapi'santa' Quisoso natëtona', Yosë huëntonénquë ya'conpi," itopi. ²⁸ Inaquë hua'qui' ya'huëantapi. Imapisopitarë' ninontatona', noya ya'huëpi.

15

Quirosarinque' anoyatopiso'

¹ Ina quëran a'naquën quëmapi'sa' Cotia parti quëran canquipi. Quisoso imaponaraihuë', Moisésë pënëntérinsonta' imasapi. Napoaton Antioquiaquë canquihuachinara, imapisopita nisha a'chintopi. "Iráca Moisésë pënëninpoa' marca niacotacaso'. Co ina natëhuatamahuë', co Yosë anoyacancantarinqüemahuë'," itopi. ² Paonoso', co ina pochin yonquirinhuë'. "Co niacotacaso' ya'huërinhuë'," ténin. Pirnapinta' inachachin yonquirin. Napoaton canquipisopitarë' ninontopi. "Co no'tequën a'chinamahuë," nitatona', chiníquëñ ninontopi. Napoaton imapisopitari itapona': "Quirosarinque' paco'. Ca'tano'sa', ansiano'sa', inapita natanco'. ¿Ma'tama' sha'huichinénquëmapa'?" ta'tona', Paono, Pirnapi, inapita a'papi. A'napitanta' inapitarë' a'papi.

³ Apahuachinara, pa'pi. Pinisia parti, Samaria parti, inaquëpita pa'sahuatona', sha'huirapipi. "Nisha piyapi'santa' iráca yonquipiso' nariantatona', Quisoso imasapi huachi," itéra'piapi. Quisoso imapisopita natanahuatona', nöya cancantopi.

⁴ Quirosarinque' canconpachinara, ya'ipi Quisoso huëntonénquë ya'conpisopita noya nontopi. Ca'tano'sa', ansiano'sa', inapitanta' noya nontopi. Ina quëran Paonori ya'ipi sha'huitérin: "Aquë iyaro'sa' pa'nai Quisoso nanamën sha'huita'huaiso marë'. Yosë noya

catahuarincoi. Nisha piyapi'santa' Quisoso imasapi. Nisha nisha ninanoquë niyonton-api," itérin. ⁵ Ina natanaahuatona', a'naquën parisioro'sa' Quisoso imaponaraihuë', co noyahue' natanpi. Napoaton huanirahuatona', tapona':

—Nisha piyapi'sa' yaimapachina', marca acotacaso' ya'huërin. Ya'ipi Moisésë iráca pénentérinso' imacaiso' ya'huërin. Inapita a'chintoco' imaina', itopi.

⁶ Napoaton ca'tano'sa', ansiano'sa', inapita niyontonpi nisha nisha yonquipiso' natanaacao marë'. ⁷ Hua'qui' ninontohuachinara, Pitro huanirahuaton, itérin:

—Canta' iyaro'sa' pi'pian sha'huichinquëma'. Nani iráca Yosë acorinco nisha piyapi'sa' sha'huita'huaso marë'. Ina nohuanton, Quisoso nanamën sha'huitërahuë. Inapitanta' natanaahuatona', natëpi. Natëtona', imasapi. Ina nitotërama' canpitanta'. ⁸ Ya'ipi yonquirëhuasopita Yosë nitotërin. "Inapitanta' cancanëna quëran noya natërinaco," ta'ton, Ispirito Santo aya'coancantërin. Canpoa' ya'coancantërinfoaso pochachin inapitanta' ya'coancantërin. ⁹ Ya'ipinpoa' napopianachin ni'ninpoa'. Nisha piyapi'santa' nosororin. "Quisocristoíchin imasarahuë," topachinara, cancanëna' anoyatërin. ¹⁰ Iráca Moisésë nisha nisha pénentopirinhue', shimashonënpoa' co nanitopihuë' ya'ipiya no'tëquënatëcaiso'. Canpoanta' co nanitaparëhuahuë'. ¿Ma'marëta' nipachin nisha piyapi'sa' imapachina', iráca pénentopiso' a'chinacaso' nohuantërama'? tñahuë. Yosëri noya ni'pachina, co canpoari nisha sha'huicaso' ya'huërinhuë'. Quisoso imapisopita tananpitahua', Yosë ana'intohuachinpoa'. ¹¹ Siniro Quisoso natëhuatëhua', inaora nohuanton, nicha'ësarinfoa'. Nosoroatonpoa', oshanënpoa marë' chiminin ni'ton, anoyacancantërinfoa'. Inapochachin nisha piyapi'santa' anoyacancantërin, tñin Pitro.

¹² Ina natanaahuatona', "No'tëquënonin," ta'tona', ta'tápi. Ina quëran Pirnapi, Paono, inapitanta' sha'huitantapi: "Thua pa'patoira, Yosë na'con catahuarincoi. Quisoso nanamën sha'huitohuatoira, na'a nisha piyapi'sari natëpi. Inapitanta' caniohuachinara, Yosë nohuanton, anoyatërapiarai. Ni'sahuatona', 'Tëhuëñchachin Yosëri catahuarin,' topi," tñin Paono.

¹³ Nani nontohuachina, Santiaconta' tapon:

—Natanco iyaro'sa'. ¹⁴ Iya Simon nani sha'huitërinfoa'. Yosë nohuanton, ina'ton nisha piyapi'sa' a'chintërin. A'chintohuachina, a'naquën imasapi, Yosëri huëntonënquë aya'conin. Inapitanta' piyapinënpita pochachin ni'sarin. ¹⁵ Inachachin pénentona'piro'sa' ninshitërin. Iráca Yosë quiricanënquë ninshitaton, tapon:

¹⁶ "Yosë chachin naporin:

'A'na tahuëri huëntarahuë.

Tapi shinpita catahuaantarahuë. Inapitaso' naniantërinaco ni'tona', pëi' mocarinsopochin nisapi.

Co noya cancantopirinahuë', cari anoyacancantaantarahuato, noya acoantarahuë.

¹⁷ A'napita piyapi'santa' nohuitiinacoso marë' napoarahuë.

Nisha piyapi'santa' nohuitohuachinaco, chinotarinaco.

Ca nohuanto, a'naquën imasarinaço,

¹⁸ tñin Yosë. Iráca quëran huarë' yonquirin nisha nisha piyapi'sa' nicha'ëcaso'.

Ina yonquiaiton, anitotërinfoa'," tñin pénentona'pi.

¹⁹ "Napoaton nisha piyapi'sa' Yosë imapachina', noya nia'ahua', tñahuë. Co ya'ipi Moisésë pénentérinso' a'chintacaso ya'huërinhuë'. ²⁰ Nipirinhue', pi'pian pénenacaso marë' ninshitahua'. Nisha piyapi'sa' ma'sha tñepapi mamanshi moshacaiso marë'. Ina nosha Quisoso imapisopita tananpichina'. Naporahuatona', a'naquën maconorahuatona', ma'sha tñepapi. Co huënainën noya inquitopihuë'. Ina noshanta' ama ca'inasohue'. Naporahuatona', ama monshihuainasohue', Inaíchin pénéanhuan'. ²¹ Iráca quëran huarë' Moisésë pénentérinso' ya'huërin. Na'a ninanoquë a'chintapi. Nani chinoto tahuëri niyontoniso pëiquë nontopi. Napoaton ama inapita pinoinënpaso marëhuë' ina pochin quirica a'patahua' Quisoso imapisopita pénénacaso marë'," itérin.

Pënënaçiso marë' ninshitopiso'

²² "Noyahua'. Ina pochin ninshitahua'," topi ya'ipiya. Ina quëran ca'tano'sa', ansiano'sa', inapita yonquipi catoya'pi a'patacaiso marë'. "Paono, Pirnapi, inapita panan-tahuachina', inahuanta' ca'taina'," topachinara, "Inanta' noya," topi ya'ipi imapisopita. Napoaton cato' quëmapi'sa' nöya nipesopita huayonpi paatona' sha'huitacaiso marë'. A'naso' Sirasë. A'nanta' Cotasë. Parsapasë itopi anta'. ²³ Ina quëran quirica ninshitopi Antioquiaquë ya'huëpisopita quëtontacaiso marë'.

"Iyaro'sa'. ¿Noya canpitanta' ya'huarama'? Noya quiyanta' ya'huarai. Quiyaso' ca'tano'saniënpitacoi ninshitarainquëma'. Ansiano'saro'coi chachin quirica a'patarainquëma', ni'co'. Co cotioro'sanquëmahue' nipomarahuë', canpitanta' Quisoso imarama' ni'ton, iyahuëipita pochin ni'nainquëma'. Ya'ipi imaramasopita Antioquiaquë, Siria parti, Sirisia parti, inatohua' ya'huëramasopita iso nanan chachin a'patarainquëma' nitotacamaso marë'. ²⁴ Ihua a'naquën isëquëran pa'pachinara, nisha a'chintérinënquëma'. 'Co Moisësë pënëntérinso' natéhuatamahuë', co Yosë huëntonënquë ya'conaramahuë', itérinënquëma'. Co quiyari a'papiraihuë', pa'pi. Natanauhuatomá', nisha nisha yonquirama'. Pirnapi Paonorë chachin huëcaton, nani sha'huitirincoi. Ipora huarë' nitotatoi, ninshitarainquëma'. ²⁵ Napoaton niyontonpatëira, catoya'pi sha'huitatoi, a'patarainquëma'. Pirnapi, Paonorë chachin ya'huëramaquë pa'pachina', inapitanta' pa'sapi. Pirnapi, Paono cato chachin nöya quëmapi'sa', tñai, noya nosororai. ²⁶ Sinioro Quisocristo nanamën sha'huipiso marë' na'con aparisitopi. A'naquëni no'huitona', pi'pishachin shitëpapi. ²⁷ Napoaton Cotasë, Sirasë inapita a'patarainquëma' yonquiraiso' sha'huitinquëmaso marë'. ²⁸ Nani iyaro'sa' ninontërai. Ispirito Santonta' no'tëquën anitotérincoi. Napopianachin yonquiatoi, ninshitarainquëma'. Co ya'ipi Moisësë pënëntérinso' natëcaso' ya'huërinhuë', tñai. Pi'pisha sha'huichinquëma' natëcamaso marë'. ²⁹ A'naquëni ma'sha tëpapi mamanshi moshacaiso marë'. Ina nosha tananpitoco', tñai. Naporahuaton, a'naquëni maconorahuatona', ma'sha tëpapi. Co huënainen noya inquipirinhue', ca'pi. Ina noshanta' ama ca'cosohue'. Naporahuaton, ama monshihuancosohue'. Moisësë na'con pënëntopirinhue', inaíchin natëcaso' ya'huërin, tñai. Cotasë, Sirasë, inapitanta' inachachin pënënarinënquëma'. Natéhuatama' iyaro'sa', noya nisarama'. Nani huachi," topi quiricatatona'.

³⁰ Nani a'pahuachinara, pa'sahuatona', Antioquiaquë canconpi. Imapisopita niyontonpachinara, quirica quëtopi. ³¹ Nani nontohuachinara: "Ma noyacha pënëninpoa paya," ta'tona', nöya cancantopi. ³² Cotasë, Sirasë, inapitaso' pënëntona'piro'sa' ni'ton, hua'qui' Quisoso imapisopita pënënpí. Noya pënënpí ni'ton, noya noya imasapi. ³³ Hua'quimiáchin inaquë yacapatopi. Ina quëran ya'huëpi'pa' yapanantahuachinara: "Osharan paco'. Yosë noya catahuainquëma'", itopi. [³⁴ Sirasëso niperinhue': "Co caso' pa'shatérabohue'", ta'ton, co pa'nihuë'".]

Naquërachin a'chinacaso marë' paantapiso'

³⁵ Paonoso' Pirnapirë chachin hua'qui' Antioquiaquë ya'huëpi. Sinioro nanamën sha'uirápi. A'napitarë chachin a'chinápi.

³⁶ Nani hua'quimiachin ya'huëhuachinara, Paonori itérin:

—Huëquë' pa'a iyasha. Ihua na'a ninanoquë Sinioro nanamën sha'uirë'. Paatë' Quisoso imapisopita nianta'a. ¿Onpoapita'mapa'? itérin.

³⁷ "Noyapa'. Pa'a nipachin. Coansha Marconta' quëpanta'a," itérin Pirnapiri.

³⁸ "Ama iya quëpa'asohue'. Ihua pi'iquë Panpiriaquë canconpatëhuara, ya'huërin'pa' pa'mantarín. Co yacatahuarinpohue'. Napoaton co nohuantérahuë' ", itérin Paonori.

³⁹ Hua'qui' ninontopirinhue', co napopianachin yonquiatonahuë', nisha nisha pa'pi. Pirnapiso' Coansharë chachin nanchaquë pa'sahuaton, Chipriquë canconpi. ⁴⁰ Paonoso

nipirinhüë' Sirasë nontërin ca'tanacaso marë'. Yapa'pachinara, Quisoso imapisopitari Yosë nontöpi: "Isopita pa'pachina' Sinioro, a'paiquë' noya pa'ina'. Nosoroaton, catahuaquë' noya a'chiina'", itahuatona', a'papi. ⁴¹ Ya'ipi Siria parti pa'tatona', nisha nisha ninanoquë pa'pi. Quisoso imapisopita pënëna'piapi chiníquën cancanta-caiso marë'. Sirisia partinta' paantatona', inachachin pënëantapi. Quisoso nanamëñ sha'huitatona', imapisopita achinicancanpi.

16

Timotionta' imatërinso'

¹ Ina quëran Tirpiquë pa'pi. Inaquë a'chinahuatona', paantapi. Paantarahuatona', Nistraquë canconpi. Inaquë a'na hui'napi quënanconpi, Timotio itopiso'. Inanta' Quisoso imarin. A'shino' cotio sanapi. Quisoso imarin anta'. Pa'pinso nipirinhüë' Crico piyapi.

² "Timotio nónya quëmapi," topi ya'ipi Quisoso imapisopita. Nistraquë ya'huëpisopita, Iconioquë ya'huëpisopitanta' napopi. ³ "Huëquë' api imaquico," itërin Paonori.

"Noyahua', pa'i canta'," ténin anta'. Inaquë na'a cotioro'sa' ya'huëpi ni'ton, Paonori sha'huitohuachina, marca acotopi. Pa'pinso' Crico quëmapi ni'ton, napopi.

⁴ A'na ninanoquë, a'na ninanoquë pa'sahuatona', pënëna'piapi. Ca'tano'sa', ansiano'sa', inapita Quirosarinquë ya'huëpisopita ninshitopiso' sha'uirapi imacaiso marë'. ⁵ Napohuachina, Quisoso huëntönëquë ya'conpisopita natëtona', noya noya imasapi. Naporahuaton aquë aquëtë na'asapi.

Ispirito Santo nohuanton, hua'narinso'

⁶ Asia parti Yosë nanamëñ yasha'huipirinahuë', Ispirito Santo co nohuantërinhuë' inaquë a'chinacaiso'. Napoaton Piriquia parti, Carasia parti inapita na'huëtopi. ⁷ Misia parti ya'caritonahuatona', Pitinia parti yapa'sapirinahuë'. Naquëranchin Ispirito Santori ya'copirin. "Co Quisoso nohuantërinhuë' inaquë a'china'huaiso'," ta'tona', co inatohua' pa'pihuë'. ⁸ Napoaton Misia parti na'huërahuatona', Toroasëquë canconpi. ⁹ Inaquë Yosë nohuanton, tashi' Paono hua'narëso pochin quënanin. Masitonnia piyapi huaniarin, quënanin. "Huëquë' isëquë. Nosoroatoncoi, catahuaco," itërin. ¹⁰ Ina natanahuaton, "Yosë nohuantërincoi inatohua' noya nanan sha'huica'huaiso'," ta'toi, manorai inatohua' paca'huaiso'.

Piriposëquë a'chinpiso'

¹¹ Marë yonsanquë ya'huërai ni'ton, nanchaquë ya'conai pacáhuaiso marë'. Ya'conahuatoi, pipirai. Panca so'ton huancoanai' nininquë canconai, Samotrasia itopiso'. Inaquë huë'epatërai. Tahuëririnquë pantarahuatoi, Niaporisëquë canconai. Inaquë nonshirai. ¹² Nani Masitonnia parti canconpatoira, ira pa'tatoi, Piriposëquë canconai. Inaso' panca ninano'. Copirnori acorinso' ni'ton, inaquë na'a Nomaro'sa' ya'huëpi. Hua'quimiáchin inaquë ya'huërai. ¹³ Chinoto tahuëri nanihuachina, ninano quëran pipirahuatoi, ii' yonsanquë pa'nai. "Inaquë Yosë chinotapi," ta'toi, inaquë pa'nai. Sanapi'sa' nani niyontonpi, quënanconai. Inaquë huënsërahuatoi, a'chintërai. ¹⁴ A'na sanapi inaquë Yosë chinotërin, Niria itopiso'. Tiatira quëran huë'nin. Inaso' tintahuan. Ma'maro' në'mëtë' pa'ton nininso' pa'anin. Inaso' nisha piyapi níponahuë', Yosë chinotërin ni'ton, Paonori a'chintohuachina, nónya natanin. Yosë nohuanton, a'naroáchin cancanëñ quëran huarë' yamarin. ¹⁵ Quisocristo imarin ni'ton, aporintërin. Pëinënquë ya'huëpisopitarë chachin aporihuani.

—Canta' Sinioro imarahuë ni'ton, huëco' pëinëhuëquë yacapacoi, itërincoi. Na'con sha'huitohuachincoira, inaquë huachi yacaparai.

¹⁶ A'na tahuëri yonsanquë paantarai Yosë chinota'huaiso marë'. Paasocoi, a'na nanon quënanconai. Sopairi ya'coancantërin ni'ton, ninotërin. Ina sanapiso' a'napitari pa'anpi asacatacaiso marë'. Ninorinso marë' hua'anënpitaso', na'con canapi. ¹⁷ Nanonso'

quënanaahuatoncoi, imaquierincoi. Imaritoncoi, chiníquën nonsarin ya'ipi piyapi'sa' natanacaiso marë'.

—Isopita quëmapi'saso' Yosë piyapinënpita. Yosë chini chiníquën nanantérinso' no-huitatona', natëpi. A'chintarinënquëma' canpitanta' nitotatoma' cha'ëcamaso marë', itériarin.

¹⁸ Na'a tahuëri imatoncoi, naporárin. Pinatanaton, Paonoso' no'huitëriporin. Tahuérétahuaton, sopai itapon:

—Quisocristo nanan quêtérinco ni'ton, a'paaranquën. ¡Iso sanapi quëran pipimi-atëqué! itérin. Naporo chachin pipimiatérin.

¹⁹ Hua'anenpitaso nimirinhue' no'huitopi. “Co huachi ninorinhue' ni'ton, co huachi canaréhuahuë'”, ta'tona', Paono, Sirasëre chachin masahuatona', cachiquë quëpapi ninano hua'ano'sa' nontacaiso marë'. ²⁰ Inaquë quëparahuatona', coisëro'sa' itapona':

—Isopita quëmapi'saso' cotioro'sa' ni'ton, a'chinatona', ninano' tapiapi. Nisha a'chintohuachinara, ya'ipi piyapi'sa' nisha nisha yonquipi. ²¹ Canpoaso nimirinhue' Noma piyapinpoa' ni'ton, co inachintopiso' natëcaso' ya'huérinhue', itopi.

²² Huanipapisopitanta' no'huitatona', Paono, Sirasë inapita ahuëpi. Coisëro'sarinta' camaipi. “Ai'nampiratahuatoma', naraqué ahuëpico'”, itopi. Napohuachina inapotopi. ²³ Chiníquën ahuëpitona', tashinan pëiquë po'mopi. Po'mohuachinara, tashinan pëi' hua'an itapona': “Noya a'paiquë', ta'ahuachina'”, itopi. ²⁴ Ina natanahuaton, huancánachin po'morin. Nantëna' nontëqué acatëntahuaton, catinaqué niahuitérin.

²⁵ Yono tashi' nisahuaso', parositaponaraihue', co sëtopihuë'. Cato chachin Yosë nontápi. Yosë chinotatona', cantarapi. Apiro'sa' natantapi. ²⁶ A'nanaya panca oco-hua pa'nin. Tashinan pëi' achinicaso marë acotopiquë huarë', nacon nacontarin. Naporo' Yosë nohuanton, ya'coanaro'sa' nii'soatéra'piapi. Ya'ipi apiro'sa' catinanëna' nii'quiritopi. ²⁷ Tashinan pëi' hua'an capayatohuachina. Ya'coanaro'sa' nii'soatopinan ni'nin. “Ya'ipi apiro'sa' capa, nani ta'api,” ta'ton, sahuëninëñ ocoirahuaton, yanitéparin.

²⁸ Paonoriso nimirinhue' a'naroáchin nontérin:

—¡Ama iyasha nitëpaquësuhue'! ¡Co ta'araihuë! itérin chiníquën nontaton.

²⁹ Ina natanahuaton: “¿Naporin ti?” tosahuaton, pa'yanin. “Nanparin quëshico ni'i,” itohuachina, piyapinënpitari quëpatopi. Manorahuaton, ya'conin. Pa'yanaton, ropa ropátarin. Paono pirayan isonahuaton, mosharin. ³⁰ Ina quëran cato chachin ocoirahuaton:

—¿Ma'ta' iyaro'sa' onpo'i cha'ëca'huaso marë? itérin.

³¹ —Quisocristoíchin nicha'ërinpoa'. Ina natëhuatan, cha'ësaran. Sa'an, hui'nampita inapitarë'quën chachin cha'ësaran. ³² Ina tosahuaton, Quisocristo nanamëñ a'chintérin. Ya'ipi pëinënqué ya'huëpisopita natanpi. ³³ Tashinan pëi' hua'anso' noya natanahuaton, natérin. Tashi' nimirinhue', quëparahuatona', nicarotopiso' pa'mopirin. Napohuachina, Quisoso imapi huachi ni'ton, ya'ipiya aporintérin. ³⁴ Nani aporihuuanpachinara, pëinënqué quëparin. Inaquë a'carin. Yosë natëtona', ya'ipiya noya cancantopi.

³⁵ Coisëro'saso' nimirinhue' co nitotopihuë'. Tahuérihuachina, sontaro'sa' amatahuatona', itopi: “Tashinan pëi' hua'an sha'huitonco' catoya'pi i'huara po'moraiso' ocoi'in pa'ina'”, itohuachinara, pa'pi sha'huitapona'. ³⁶ Ina natanahuaton, Paono itapon:

—Coisëro'sa' nanan a'patérinaco ocoia'huainquëmaso marë'. Napoaton noya pipico', itérin hua'ani.

³⁷ Paonoso nimirinhue' sontaro'sa' itérin:

—Co po'oana quëran pa'saraihuë'. Quiyaso' Noma piyapicoi nimiraihuë', naraqué hui'tonpirinacoi. Co coisëqué sha'huirapiponaracoihue', cachiquë chachin napotérinacoi. Ina quëran tashinan pëiquë po'morinacoi. Noma piyapicoi ni'toi, co topinan ana'intinacoisohue' nimirinhue'. ¿Iporaso' po'oana quëran yaocoiantarinacoi ti? ¡Co'chi nohuantëraihuë paya! Sha'huitëqué' inahuara chachin huë'ina'. A'ninquëchin ocoi'inacoi, itérin.

³⁸ Sontaro'sa' paantarahuatona', coisëro'sa' sha'huitonpi: "Inapitaso' Noma piyapi'sa'," topachinara, pa'yanpi. Co topinan quëran Noma piyapi ahuëcasohü'e nimirinhü'e, ahuëpi. ³⁹ Napoaton tashinan pëiquë pa'sahuatona', noya nontopi. "¿Canpitanta' Noma piyapinquëma' ti?" itohuachina, "Inacoi mini," tënín Paono. "Co'chi nitotëraihuë paya. Co nitotatoihuë ahuërainquëma', co ahuëca'huainquëmasohü'e nimirinhü'e," itérin. Ina quëran noya ocoirahuatona', "A'na parti paco'," itopi. ⁴⁰ Napotohuachinara, tashinan pëi quëran pipipi. Pipirahuatona', Niria pëinënqué paantapi. Quisoso imapisopita niyontonpachinara, pi'pian pënëantapi: "Chiníquën cancantatoma', imamiatoco'," itopi. Ina quëran pa'pi huachi.

17

Tisaronicaquë a'chininso marë' no'huipiso'

¹ Ina quëran Anpiporisë na'huëtahuatona', Aporonianta' na'huëtaantapi. Ina quëran Tisaronicaquë canconpi. Inaquë cotioro'sa' niyontonpiso pëi' ya'huérin. ² Inachintërin nichinapon chachin cara chinoto tahuëri inaquë Paono Yosë quiricanën a'chinin.

³ —Quisocristo imaco' canpitanta'. Inaso' inápa quëran o'marin, Yosëri a'paimarinso'. Ina nohuanton, oshanënpoa marë' chiminin. Chiminpirinhü'e, Yosë nohuanton, nanopiantarin. Iráca quiricanën quëran ninorinso chachin naporin. Inaso' Cristo, Yosëri acorinso', tënín.

⁴ A'naquën natanahuatona', natëpi. Natëtona', imasapi. Na'a Crico piyapi'santa' imasapi. Nisha piyapi'sa' niponaraihuë', Yosë chinotopi. Paono a'chininso' natanahuatona', Quisoso imasapi. Na'amiachin sanapi'santa' chiníquën nanantopisopita imasapi. ⁵ A'naquën cotioro'saso nimirinhü'e, co yanatépihuë'. "Na'a piyapi'sa' Quisoso imasapi," ta'tona', apiratopi. Apiratatona', no'huipi. Cachiquë pa'sahuatona', no'huítérayaro'sa', chirotëro'sa', inapita itapona': "Huëco' Paono, Sirasërë chachin macatëhua' ana'intahua'," ta'tona', piyapi'sa' ayontonpi. No'huítératona', Casono pëinënqué pa'pi. Inaquë Paono yacapatërin ni'ton, macacaiso marë' pa'pi. Ya'coana papaatahuatona', ya'conpirinhü'e, ⁶ co Paono ya'huérinhuë'. Co ina quënanatonahuë', Casono mapi. A'napita Quisoso imapisopitanta' masahuatona', ninano hua'ano'saquë quëpapi.

—Paono ya'ipi parti pa'sárin. A'chintaton, notohuaro' piyapi'sa' anishacancantarín. Sirasënta' inachachin nisarin. Iséquënta' huë'pachinara, ⁷ Casonori pëinënqué aya'conin ni'ton, inaquë yacapapi. Isopitanta' imatona', co huachi Noma copirno natëtonahuë', nisha imasapi. "A'na copirno ya'huarin. Inaso' Quisoso," toconpi, itopi.

⁸ Piyapi'sa' natanahuatona', aquë aquëtë' no'huítipi. Hua'ano'santa' no'huítatona', Casono, a'napita imapisopita inapita chiníquën pënënpí. ⁹ Ina quëran coriqui ma'papi ama tashinan pëiquë po'mocaiso marëhuë'. Nani pahuërétohuachinara, a'papi.

Piriaquë Yosë quiricanën na'con nontopiso'

¹⁰ Quisoso imapisopita pipirahuatona', ya'huëpi'pa' paantapi. Naporo' tashi' Paono, Sirasë, inapita Piriaquë a'papi. Inaquë canconahuatona', cotioro'sa' niyontonpiso pëiquë pa'pi a'chinacaiso marë'. ¹¹ Inaquë ya'huëpisopitasa' nimirinhü'e nóya yonquipi. Co Tisaronicaquë ya'huëpisopita pochinhü'e. Paonori a'chintohuachina, nóya natanpi. "Paonoso' no'tëquën a'chinamara," ta'tona', nani tahuëri Yosë quiricanën noyásha nontapi no'tëquën nitotacaiso marë'. ¹² Naporahuatona', na'a cotioro'sa' natëpi. Na'amiachin Crico sanapi'santa' chiníquën nanantopisopita natëpi. A'naquën Crico quëmapi'santa' imasapi. ¹³ Napopiso', Tisaronicaquë nahuinin. Cotioro'saso' natanahuatona', "Piriaquënta' Paono Yosë nanamën a'chinarin," ta'tona', inatohua' pa'pi. Canconahuatona', Paono sha'huirapitona', piyapi'sa' ano'huítipi. ¹⁴ Napohuachinara, Quisoso imapisopitari a'naroáchin Paono a'papi. A'naquëni ca'tanatona', marë yonsanquë'pa' quëpapi. Sirasë, Timotio, inapitasa' nimirinhü'e co pa'pihuë'. ¹⁵ Atinasë'pa' Paono

ca'tanpi. Yapanantahuachinara,—Sirasë, Timotio, cato chachin sha'huitonco' manóton huë'ina', itérin Paonori. Napotohuachina, ya'huëpi'pa' panantapi.

Atinasëquë nisha nisha moshapiso'

¹⁶ Paonoso nimirinhue' Atinasëquë Sirasë, Timotio, inapita ninararin. Ninano' conitaton, notohuaros' mamanshi quënanin. Inapita quënanahuaton, sëtérin. Inapoaton, napion cancantérin. ¹⁷ Napoaton na'con pënentérin. Niyontonpiso pëiquë pa'sahuaton, cotioro'sa' a'chintérin. Cotioro'sa' pochin chinotopisopitanta' natanapi. Quisoso nanamëñ a'chintohuachina, ninontápi. Naporahuaton, nani tahuëriya cachiquë pa'nin. Inaqué a'naya a'naya huë'pachinara, nontarin. Nisha piyapi'santa' natanapi. ¹⁸ Inaqué nisha nisha yonquipiso' a'china'piro'santa' huë'pi. A'naquën ipicorioro'sa' itopi. A'naquëonta' istoicoro'sa' itopi. Paono quënanahuatona', ninontopi.

—Iso quëmapi pa'pi nona'pi. ¿Ma'ta' tēcapon naporin? itopi a'naquën.

—Ahuën. Nisha yosëro'sa' imacaiso marë' a'chinamara, topi a'naquën. “Quisoso chiminin. Ina quëran nanopiantarin,” téninsø marë' napotopi. ¹⁹ A'naquënsø natanahuatona', Ariopaco itopiquë quëpapi. Inaso' hua'ano'sa niyontoyantopiquë. Paono inaqué quëparahuatona', itopi:

—¿Ma nisha nanan chachinta' a'chinan? Yanitotërai quiyanta'. ²⁰ Co onporonta' natanchinaihuë'. A'chintocoi quiyanta' nitochii, itopi.

²¹ Inaqué ya'huëpisopita nasha nanano'sa' pa'yatopi. Nisha nisha a'chinpiso' yanatanpi. Nisha piyapi'sa' huë'pisopitanta' yanatanpi.

²² Paono inaqué huanirahuaton, Atinasëquë ya'huëpisopita itérin:

“Natanco iyaro'sa' pi'pian sha'huichinquëma'. Canpitaso' ya'ipinquëma' na'con moshatërama', ténahuë. ²³ Cachiquë pa'patora, ya'ipi moshatëramaso' ni'nuhüe. A'na artaro quënanahuë. Inaqué ninshitërama'. ‘ISOSO YOSË CO NOHUITOPIRËhuahuë', MOSAHUA', ténama' ninshitatoma'. Co nohuitapomarahuë', mosharama'. Apira carinquëma' a'chinchinginquëma', nohuitoco'.

²⁴ Ina Yosëso' chini chiniquëñ nanantérin. Iráca isoro'pa', ya'ipi ma'sha isëquë ya'huërinsonta' acorin. Inaso' hua'anënpoa'. Isoro'paquë ya'huërinsopita, inápaquë ya'huërinsopita, ya'ipimiáchin hua'anëntarin. Moshatopiso pëi' piyapi'sari nipi que' co Yosë ya'huërinhuë'. ²⁵ Co piyapi ma'shanënpita nohuantérinhuë'. Co manta' pahuantérinhuë'. Inariáchin ya'ipi ma'shanënpoa' quëterinpoa'. Ina nohuanton, nanopirëhua'. Ina nohuanton, cosharo', ma'sha, inapita ya'huëterinpoa'.

²⁶ Iráca a'na quëmapira' ninin. Inaya quëranchin ya'ipi piyapi'sa' na'api. Nisha nisha nipesopita na'api ya'ipiro'paquë ya'huëcaiso marë'. Co'huara ya'huëyatërasëhuahuë', yonquirinpoa'. Nisha nisha parti ya'huëcaso marë' acorinpoa'. Onporosona nanopicahuasonta' yonquirin. Ina nohuanton, nanopirëhua'. ²⁷ Ya'ipinpoa' acorinpoa' ina nohuitacaso marë'. Co quënanarihuarahuë', ina na'con yonquicaso' ya'huërin. Co inaso' aquë patërinpoahuë'. Co naniantérinpoahuë'. ²⁸ Ina nohuanton nanopiarëhua', pa'nëhua', ya'huërëhua'. A'nara' cancan yonquina'pi ninshitaton, no'tequen naporin: ‘Canpoaso' Yosë hui'ninpita pochin ninëhua', ténin.

²⁹ Napoaton Yosënta' canpoa pochin nanopirárin anta'. Co inaso' mamanshi pochin-huë'. Mamanshisø nimirinhue' piyapi'sari inahuara yonquinëna quëran nipi. Oro quëran, prata quëran, na'pi quëran, ina quëranpita nipi. Ama Yosëso' mamanshi pochin cancancosohue'. ³⁰ Iráca co Yosë nohuitopihuë' ni'ton, co ana'intérinhuë'. Iporaso nimirinhue', ya'ipi piyapinpoa' pënéninpoa': ‘Co noyahuë' yonquiramaso' naniantatoma', casáchin chinotoco,' itérinpoa' Yosë. ³¹ A'na tahuëri co noyahuë' nipesopita no'tequen ana'intarin. Nani Quisoso acorin coisë pochin nicaton, ya'ipi piyapi'sa' no'tequen sha'huitacaso marë'. Inaso' piyapi chachin ni'ton, chimimpirinhue', Yosëri ananpitaantarin. Napoaton inaso', Yosëri acorinso', ténëhua',” ténin Paono.

³² “Ananpitaantarín,” téninso maré, “Téhuénchachin ta'ma' ananpitëca,” ta'tona', téhuapi a'naquén. A'naquénso nípirinhué' co téhuapihué'.

—A'na tahuéri a'chintaantacoi, itopi.

³³ Ina quérán Paono pa'nin. ³⁴ A'naquénso nípirinhué' natétona', imapi. Quisoso natépi. A'nasó' Tionisio, Ariopaco hua'an nininso'. A'nanta' sanapi, Tamarisa itopiso'. A'napitanta' imasapi.

18

Corintoqué Paono a'chininso'

¹ Ina quérán Paono pipirahuaton, Corintoqué pa'nin. ² Inaqué a'na cotio quémapi Aquiro itopiso' quénanconin. Inaso' Pontoqué nasítérin. Sa'insó' Pirisira itopi. I'huamiáchin Itaria parti ya'huépi. Nomaqué chachin ya'huépirinahué', copirno Craotiori camaitohuachina, ya'ipi cotioro'sa' pipipi. Aquiroso' ina quérán pipirahuaton, Corintoqué hué'nin. Ina pénénqué Paono pa'nin ni'tapon. ³ Paonoso' néméte' p'éiro'sa' nina'pi. Aquironta' inaqué chachin sacatérin ni'ton, inaqué yacapatérin nicatahuacaiso maré. ⁴ Nani chinoto tahuéri cotioro'sa' niyontonpiso p'éiqué pa'sahuaton, cotioro'sa' a'chintérin. Cricoro'santa' a'chintaton: “Quisoso natéco' canpitanta”, itérin.

⁵ Ina quérán Sirasé Timotioré chachin Masitonía parti quérán canquipi. Canqui-huachinara, Paono na'con na'con a'chinarin quénaimapi. Nani tahuéri cotioro'sa Quisoso nanamén a'chintárin. “Inaso Cristo, Yoséri a'paimarinso”, itaton na'con pénénin. ⁶ Inapitaso nípirinhué' no'huitona', Paono pinopi. Napoaton tananpitérin.

—Téhuénchachin Yosé ana'intarinquéma'. Nani ya'ipi a'chintopiranquémahué', co yanatéraramahué' ni'ton, canpitaora téhuénémaqué nina'intarama'. Iporaso nisha piyapi'sa' a'chintarahué huachi, ténin Paono.

⁷ Ina quérán co huachi cotioro'sa' niyontonpiso p'éiqué a'chintérinhué'. Pipirahuaton, Tisio Costo pénénqué pa'nin. Inaso' nisha piyapi niponahué', Yosé chinotérin. Niyontonpiso p'éi' pirayan ya'huérin. Ina pénénqué pa'nin a'chinacaso maré. ⁸ Cotio niyontonpiso p'éi' hua'aonta' natanahuaton, natérin, Crispo itopiso'. Ina pénénqué ya'huépisopitanta' Quisoso imasapi. Na'a ya'huéhuano'sa' Quisoso nanamén natanahuatona', natépi. Natéhuachinara, aporihuanpi. ⁹ A'na tashi' Yosé nohuanton, Paono hua'narëso pochin niantarin. Siniorori chachin itapon: “Ama té'huaton, copitéquésohué'. A'chináqué'. ¹⁰ Carinquén catahuaranquén. A'naqué no'huipirinéñquéonta', noya a'paiaranquén. Co insonta' nanitapaponhué' ma'sha onpotinquéñso'. Na'a piyapi'sa' iséqué yaimarinaco. Napoaton a'chintáqué”, itérin. ¹¹ Napotohuachina, inaqué a'na pi'ipi miria ya'huaton, Yosé nanamén a'chinárin.

¹² Ina quérán Cariono Acaya parti hua'anéntohuachina, cotioro'sari Paono no'huitona', niyontonpi. Ina masahuatona', hua'ano'sataqué quépapi ana'intacaiso maré'.

¹³—Moisés iráca pénénincoiso pochin Yosé chinotérain. Iso quémapi nípirinhué' nisha a'chinarin. Piyapi'sa' anishacancantarín, itopi.

¹⁴ Paonori yanontapirinhué', hua'ani itapon:

—Canpita cotioro'sanquéma' co yanatananquémahué'. Paso' quémapi co noyahue' ninin naporini, nata'intoahué'. Ihuatérin, ahuétérin, inaporin naporini téhuénchinsó', natanacaso' ya'hué'itonhué'. ¹⁵ Nípirinhué', nisha nisha nanan cotioro'sanquéma' ya'huétérinquéma'. Nipénénamaso' quiricanta' ya'huétérinquéma'. Co caso' nohuantérahué' ina yonquica'huaso'. Canpita capini anoyatoco', itérin.

¹⁶ Itahuaton, a'parin. ¹⁷ Na'a piyapi'sari ni'sapi. Ni'sahuatona', cotio niyontonpiso p'éi' hua'an mapi, Sostinisé itopiso'. Masahuatona', inaqué chachin ahuépi. Carionori nicaponahué', co manta' téninhué'. Co ina yonquirinhué'.

Antioquiaqué paantapiso'

¹⁸ Hua'qui' Paono inaquë ya'huantarín. Ina quëran Quisoso imapisopita nontahuaton, pa'nin huachi. Aquiro sa'inë chachin pa'pi anta'. Nanchaquë Siria parti yapantapirinahuë'. Sincriaquë canconahuaton, Paono noyá niya'itérin. Yosë sha'huitérinso' nanirin ni'ton, naporin. Ina quëran nanchaquë ya'conpi. ¹⁹ Ipoquë canconpachinara, nonshipi. Aquiroso' sa'inë chachin inaquë quëparitérin. Paonoso' yapaantahuachina, cotio niyontonpiso pëiquë ya'conahuaton, a'chintérin. Cotioro'sarë' ninontopi. ²⁰ "Hua'qui' ya'huaton, a'chintaantacoi," itopirinahuë', co nanitérinhuë'. ²¹ "A'na tahuëri Yosë nohuantohuachin, huéantarahuë," ténin.

Ina quëran nanchaquë ya'coantarahuaton, paantarin. ²² Sisariaquë nonshiconahuaton, Quirosarinquë pa'nin. Ya'ipi Quisoso imapisopita inaquë ya'huëpiso' nontérin. Ina quëran Antioquiaquë paantarin. ²³ Hua'quimiáchin inaquë ya'huërin. Ina quëran naquëranchin yonquirin paaton nasha imapisopita nicacaso marë'. Carasia parti pa'sahuaton, pënëna'piarin. Naporahuaton, Piriquia partinta' pa'sahuaton, pënëna'piarin. A'naya a'naya ninanoro'saquë Quisoso imapisopita achinicancana'piarin. Achinicancanpachina, noya noya imasapi.

Aporosë Ipoquë pënëntérinso'

²⁴ Naporor' tahuëri'sa' a'na cotio quëmapi Ipoquë pa'nin, Aporosë itopiso'. Aricantriaquë nasitérin. Noyá nitotérin a'chinacaso'. Yosë quiricanën iráca ninshitopisonta' noya nitotérin. ²⁵ Siniro iranën anitotopi ni'ton, a'ninquëchin nanamën a'chintarin. Ya'ipi cancanën quëran a'chinin. Quisoso naporinso' no'tequë a'chinaponahuë', Coansha apointérinsoráchin nitotérin. ²⁶ Cotioro'sa' niyontonpiso pëiquë ya'conahuaton, chiniquën cancantaton, a'chinpirinhuë'. Pirisira, Aquiro, inapitari natanahuatona': "Co ya'ipi Quisoso nanamën nitochátérinhuë", ta'tona', pënëñquë quëpapi. Inaquë ya'ipi Quisoso nanamën a'chintopi no'tequë nitotaton, Yosë iranën pa'tacaso marë'. Ina natanahuaton, natérin. ²⁷ Ina quëran Acaya parti yapa'sarin a'chinacaso marë'. "Acaya parti a'chinchi, topirahuë", topachina: "Noya iyasha. Noya paquë", itopi Quisoso imapisopitari. Naporahuatona', quirica ninshitopi quëtontacaiso marë'. "Ihuata, iyaro'sa'. Aporosë huë'pachin, noya nontoco'. Inanta' Quisoso imarin ni'ton, noya natanco", itopi ninshitatona'. Quirica ma'patahuaton, Acaya parti pa'nin. Inaquë Quisoso imapisopita quënanconin. Yosëri catahuarin ni'ton, Quisoso imapi. Inapita quënanconahuaton, noya a'chintaton, achinicancanarin. ²⁸ Piyapi'sa' niyontonpachinara, Yosë quiricanën a'chinárin. "Iráca quëran huarë' Cristo o'macaso' ninopi. Iporaso' nani o'marin. Inaso' Quisoso," ténin. Quiricanën quëran anitotérin. Noya noya a'chinin ni'ton, cotioro'sa' co nanitopihuë: "Nonpiánin" ta'caiso'.

19

Ipoquë Paono a'chininso'

¹ Aporosë Corintoquë ya'huaso', Paono huancoro ira pa'tahuaton, Ipoquë canconin. Inaquë na'amiáchin imapisopita quënanconin.

² —Quisoso natëhuatamara, ¿Ispirito Santo ya'coancantérinquëma' ti? itérin.

—Co Ispirito Santo nohuitéreraihuë'. Co ina a'chintérinacoihuë', itopi.

³ —¿Ma'ta' natëhuatamara aporihuana'ma? itérin.

—Coansha pënëntérinso' natëtoi, aporihuanaí, itopi.

⁴ —Coanshaso pënëntérin co noyahue' yonquipisopita naniantacaiso marë'. Ina quëran apointérin. Nipirinhuë', co inasáchin sha'huirinhuë'. "Ca piquëran a'na quëmapi huë'sarin, Yosëri a'paimarinso'. Ina imaco", itérin anta'. Napoaton Quisoso imaco', itérin Paonori.

⁵ Ina natanahuatona': "Siniro Quisoso imasarai. Ina natëarai huachi," ta'tona', aporihuani. ⁶ Ina quëran Paonori së'huamotohuachina, Ispirito Santori ya'coancantimarin. Ina nohuanton, nisha nisha nananquë nonpi. Co nitopirinahuë', a'naroáchin nonpi

anta'. Naporahuaton, Ispirito Santori catahuarin Yosëri anitotérinso sha'huicaiso marë'.
 7 Shonca catoya'pi pochin napopi.

8 Hua'qui' inaquë Paono ya'huërin. Cara yoqui pochin cotioro'sa' a'chintárin. Nani simana niyontonpiso pëiquë pa'nin. Co të'huatonhuë', a'chintárin. "Yosë yahua'anëntérinquëma'. Ina marë' Quisoso a'paimarin. Ina imaco'," itarin. 9 A'naquënsö nípirinhuë' co natantochináchinhue' cancantatona', co yanatépihuë'. Piyapi'sa' niyontonpachinara, no'huitopi. No'huitatona', —Co Quisoso nanamën imacaso' ya'huërinhuë', toconpi. Napoaton Paonori patérin. Quisoso imapisopita quëparahuaton, iscoira pëiquë pa'nin. Tirano a'chininquë paaton, nani tahuëri a'chintárin. 10 Cato' pi'ipi inaquë ya'huaton, a'chinin. Siniro nanamën ya'ipi Asia parti nahuinin. Cotioro'sa' natantopi. Na'a nisha piyapi'santa' natantopi. 11 Yosë nohuanton, Paono nani ma'sha nanitaparin. Cania'piro'sa' së'huahuachina, a'naroáchin noyatopi. 12 Panionën, a'morinso', inapita téranta' quëparahuatona', cania'piro'sa' quëtonpachinara, a'naroáchin noyatopi. Sopairo'santa' pipipi.

13-14 A'naquënsö cotioro'santa', sopairo'sa' yaa'papi. Paono nicatona', yanonganpi. A'naquënsö Isipo corto hua'an hui'ninpita napopi. Canchisë hui'ninpita chachin napopi. Co Quisoso imaponaraihuë', sopairi ya'coancantérinso' itapona': "Quisoso nanan quëtérincoi ni'ton, a'paarainquëñ. Ina nanamën Paononta' a'chinarin. Napoaton pipiquë huachi," itopirinahuë', 15 sopairi a'panirin: "Quisoso nohuitérahuë. Paononta' nohuitérahuë'. Canpitaso napoaponahuë', co nohuitéranguëmahuë'," itérin.

16 Ina tosahuaton, quëmapi hua'yantérinsoari pashita'parin Inapotaton, canchisëya'pi chachin manin. Chiníquën ahuëaton, pë'shara'piarin. A'naya'piáchin níponahuë', canchisëya'pi minsërin. A'mopisonta' oshato oshatotérin. I'nanpirapi ta'api. 17 Ya'ipi ninanoquë nahuinin. Cotioro'sa', nisha piyapi'sa', inapita natanahuatona', pa'yanpi. "Siniro Quisoso chini chiníquën nanantérin," topi.

18 Ina quëran na'amiáchin Quisoso imapisopita huë'pi. "Quiyanta' pënotopiraihuë'. Co noyahuë' ninaiso' a'poarai," itopi. 19 A'naquënsö pënoton quirica ya'huëtopi. Inapita a'porahuatona', quëntapi ahuiquitacaiso marë'. Na'a piyapi'sa' nicasoi', ahuiquitopi. Pa'térinso pichihuachinara: "A'natérápo shonca huaranca coriqui prata quëran nininso pa'térin," topi. 20 Pënotono'santa' pënotopiso' a'porahuatona', cancanëna quëran huarë' imasapi ni'ton, Siniro nanamën ya'ipi parti nahuinin. Na'con na'con imasapi.

21 Ina quëran Paono yonquirin a'napita imapisopita ni'coantacaso marë': "Masitonía parti ni'coantarahuë. Acaya partinta' nisha nisha ninanoquë imapisopita ni'antaráhuë. Nani pëntahuanato, Quirosarinquë paantaráhuë. Ina quëran Nomaquë'pa' paca'huaso' ya'huërin," ténin. 22 Timotio, Irasito, inapitari inaquë catahuapirinahuë', Paonori a'parin Masitonía parti imapisopita a'chintacaiso marë'. Inaso nípirinhuë', hua'quimiachin Asia parti quëparitantarin.

Artimisa moshapiso'

23 Naporo' na'a piyapi'sa' Siniro imasapi ni'ton, mamansi moshana'piro'sa' no'huitopi. 24 Inaquë moshapiso' Artimisa itopi. Na'a mamansi nina'piro'sa' ya'huëpi. Mamansi pëia'huaro'sa' prata quëran nonanpi. Ina pa'anatona', na'con canapi. A'nara' Timitirio itopi. 25 Inari ya'ipi piyapinënpita ayontonin. A'napita ma'sha nina'piro'santa' amatérin. Ya'ipi niyontonpachinara, itapon: "Ni'co', iyaro'sa'. Mamansi ninéhua quëran na'con canaréhua". 26 Paonoso nípirinhuë' isëquë huëcaton, pënëntarin. 'A'naíchin Yosë ya'huërin. Piyapi'sari nípiso' co inaso' Yosëhuë', tosarín, natanama' canpitanta'. Ya'ipi Asia partinta' nahuinin. Na'a piyapi'sa' natanahuatona', natëpi. Natëtona', mamansi a'popi. 27 Napohuachina', co huachi noya ni'sarinënpoahuë'. Co onpopinchin canarihuahuë'. Artimisaonta' nariantapi. Inaso' chini chiníquën nanantérin. Ya'ipi asiaro'sa' moshapiso'. Ya'ipi parti quëran nohuitopi. Aquëtë chachin Paono

natëhuachina', co huachi moshato pëiquë huë'sapihuë'. Artimisa nôya nimirinhue', co huachi moshaapihuë', itérin.

²⁸ Natanahuatona', Paono chiniquën no'huipi. "¡Ma noyacha Artimisaso paya! Ina chinotérëhuaso!", tosapi chiniquën nonatona'.

²⁹ Ina quëran ya'ipi piyapi'sa' noncaropi. No'huitatona', Paono ca'taninsopita mapi, Acayo, Aristarico inapita itopiso'. Inapitaso' masitoniaro'sa'. Chiniquën masahuatona', huëntënterahuatona', niyontonpiso i'iratéquë quëpapi. ³⁰ Paononta' piyapi'sa' nontapon yapa'pirinhue', Quisoso imapisopitari to'shitéatona', ya'copipi. "Ama paquësohue", itopi. ³¹ A'naquën Asia parti hua'ano'santa' Paono amiconënpita ni'ton, nanan a'patopi. "Ama niyontonpiso i'iratéquë pa'insohue", itopi. ³² Piyapi'saso' noncaroápi. Nisha nisha nonsápi. Na'con na'con piyapi'sa' co nitotatonaraihuë', "¿ma'marecha niyontonéhua' nicaya?" topi. ³³ Ina quëran cotio hua'ano'saso', Aricantro itopiso camaipi piyapi'sa' nontacaso marë'. Napoaton huancánachin huanirahuaton, anquirarin piyapi'sa' ta'tacaiso marë': "Co quiya têhuéraihuë", ta'caso' yonquipirinhue', ³⁴ "inaso' cotio quëmapi," ta'tona', co yanatanpihuë'.

"¡Ma noyacha Artimisaso paya! Ina chinotérëhuaso!", tosapi chiniquën nonatona'. Cato' ora pochin naporápi.

³⁵ Parisi quëran ninshitona'pi hua'ani atonirin. Atonirahuaton, itapon: "Têhuëncachin iyaro'sa', Artimisaso' chini chiniquën nanantérin. Inaso ya'ipiya quëran nitotopi. Iráca inápa quëran anotimarin. Iso ninanonënpoaquë chachin anotimarin ni'ton, canpoari a'pairéhua'. ³⁶ Ya'ipiya nitotopi ni'ton, ama huachi no'huitocosohue'. Ama topinan quëran ahuëtocosohue'. ³⁷ Isopita quëmapi'sa' quëpiramahuë'. Co Artimisa sha'huirapipihuë'. Co moshato pëiquë ihuatopipihuë'. ³⁸ Timitirio, mamansi nina'piro'sa', inapitari yasha'huirapihuachina', coisëquë pa'ina'. Hua'ano'santa' ya'huërapí. Inaquë quëparahuatona', sha'huirapiina'. ³⁹ Aquëtë huarë' nanan ya'huëhuachin, hua'ano'sa' niyontopiquë natanco'. ⁴⁰ Ipora tahuëri topinan quëran noncaroarama'. Co manta' onpocasohue' nimirinhue', naporama'. Ni'cona, copirno no'huihuachinpoa'. ⁴¹ Ya'huëramaquë pacó", topachina, yanquëepi.

20

Masitonia parti, Crisia parti, inaquëpita a'chiantarinso'

¹ Piyapi'sa' nani yanquëehuachinara, co huachi no'huitantapihuë'. Ina quëran Paono yapaantarin. Ya'ipi imapisopita amatahuaton, achinicancanin. Ina quëran "Pa'sarahue huachi," topachina, "Osharan paquë", itohuachinara, Masitoniquë pa'nin. ² Masitonia parti pa'taton, pënëna'piarin achinicancanacaso marë'. Inapata-ton, Crisia parti canconin. ³ Inaquë cara yoqui yacapatérin. Ina quëran Siria parti yapa'pirinhue'. Nanchaquë yaya'conaso', cotioro'sari yatépapiso' natantérin. Napoaton co inaquë pa'ninhue'. "Masitonia parti paantarahue", ta'ton, ira pa'térin. ⁴ Na'a piyapi'sari ca'tanpi. Sopatiro (Pirro hui'nin, Piriaquë ya'huërinso'), Aristarco, Siconto, (Tisaronicaquë ya'huëpiso'), Acayo (Tirpique ya'huërinso'), Timotio, Tiquico, Tropimo (Asia parti ya'huëpiso') inapita Paono ca'tanpi. ⁵ Inapitaso' quëchitérahuatona', Troasëquë ninarinaco. ⁶ Pita tahuëri nanihuachina, Piriposë quëran pipirai. Naporo' nisha pan ca'sapi, co ahuëpocatopisohue'. Nanchaquë ya'conahuatoi, marë pa'térain. A'natérápo tahuëri quëran Troasëquë canconahuatoi, inapita quënanconai. Inaquë a'na simana ya'huërai.

Hui'napi inapa quëran anotérinso'

⁷ Tomio tahuëri nanihuachina, niyontonai Quisoso chiminiso' yonquiatoi coshata'huaiso marë'. Naporo' Paonori a'chintarin: "Tashiraya pa'sarai," ta'ton, yono tashiquë huarë' a'chinin. ⁸ Inapa pë'saté' pëiquë niyontonai. Inaquë na'a nanparin

orotarin. ⁹ A'na hui'napi Iotico itopiso', huintanaquë huënsëápirinhuë', Paono hua'qui' a'chinpachina, inaso huë'ëi' iquitaton, iquéterarin quëran anotérin. Cara pa'cotë quëran anotohuachina nohuararahuatona' nimapirinahuë', chiminin quënamapi. ¹⁰ Paononta nohuararahuaton, ipomarin.

—Ama pa'yancosohuë', nanopiarin, itérin piyapi'sa'.

¹¹ Ina quëran pëiquë nanopéonantarin. Quisoso chimininso' yonquiatona', coshatopi. Nani coshatohuachinara, ninontatona', tahuërianpitopi. Ina quëran pa'nin. ¹² Hui'napi nanopiantarinso' ya'huërinquë quëpantapi. Napoaton co sëtopihuë'. Noya cancantopi.

Miritoquë pa'naiso'

¹³ Nani Paono sha'huitérincoi: "Canpita'ton potiquë paco'. Asoquë ninataco," itohuachincoira, pa'nai. Inaso nimirinhuë' ira pa'térin. ¹⁴ Asoquë canconahuatoi, ninarai. Paononta' canconpachina, nanchaquë ya'conahuarincoi. Ina quëran Mitiriniquë canconai. ¹⁵ Tahuëririnquë Quio notënanguë na'huërai. Ina tashiraya Samosëquë canconai. Ina huënhuaninquë Miritoquë nonshirai. ¹⁶ "Nanitohuato, Quirosarinquë Pinticostisë tahuëri yana'huërahuë," ta'ton, co Paono nohuantérinhuë' Asia parti hua'quicaso'. Napoaton manorahuatoi, co Ipisoquë nonshiraihuë'.

Ansiano'sa' Ipisoquë ya'huëpisopita pënënhahuaton, patérinso'

¹⁷ Miritoquë nonshirahuaton, Ipisoquë nanan a'parin. "Ya'ipi ansiano'sa' sha'huitéquë' huë'ina'," itérin. Sha'huitonpachinara, a'naroáchin huë'pi Paono nicacaiso marë'. ¹⁸ Huë'pachinara, Paonori itapon: "Iporaso' iyaro'sa' pi'pian nonchingüëma', noya natanco. Ya'nan Asia parti canquirahuë quëran huarë' nohuitéraramaco. Ya'ipi ninahuëso' ni'nama'. Ya'ipiya nitotérama'. Co caso' chirorahuë'. Nani tahuëri pënënanquëma'. ¹⁹ Quisocristoíchin natëto, Yosë marë' sacatërahuë. Co a'napita nocanahuë'. 'Caso' noya noyaco,' co ténahuë'. A'na tahuëri sétato, na'nérahuë. Cotioro'sa' na'con chinotérinaco tēpainacoso marë'. Chiníquen aparisitérinaco. ²⁰ Napotopirinacohuë', ahuantato pënënanquëma'. Co të'huato, ta'térahuë'. Quisoso nanamën no'tequén sha'huitéranguëma' noya imacamaso marë'. Niyontonpatamara, a'chintéranguëma'. Naporahuaton, a'naya a'naya pëinëmaquënta' paato, a'chintantaranguëma'. ²¹ Co cotioro'saráchin pënënhahuë'. Cricoro'santa' pënënhahuë. 'Co noyahue' yonquiramasopita nariantatoma', Yosë chachin tahuërtantaco'. Siniro Quisoso natëco huachi. Inasáchin anoyacancantérinpoaso', itéranguëma'. Ya'ipinguëma' a'chintéranguëma'. ²² Iporaso nimirinhuë' Ispirito Santo natëto, Quirosarinquë pa'sarahuë. Ma'sona onpotaponaco nimara, co caso' nitotérahuë'. ²³ Nisha nisha ninanoro'saquë pa'patora, Ispirito Santo nohuanton, sha'huitéra'piarinaco: 'Quirosarinquë pa'patan, tashinan pëiquë po'moarinënquén, chiníquen aparisitarinënquén,' itérinaco. ²⁴ Yatépapirinacohuënta', co caso' të'huatërahuë'. Co ina yonquirahuë'. Siniro Quisoso natëa'huasoáchin cancantërahuë. Iráca ina sha'huitérinco a'china'huaso marë'. 'Yosëri ya'ipi piyapi nosoroaton, anoyacancantacaso' nohuantérin. Ina noya nanan chachin a'chintonquë', itérinco. Napoaton paato, a'chintárahuë. Co chimina'huaso' të'huatërahuë'.

²⁵ Hua'qui' ya'huëramaquë pa'sápato, Yosë hua'anëntérinpoaso' a'chintopiranquëmahuë', apira pa'sarahuë huachi. Co huachi quënanaramacohuë'. ²⁶⁻²⁷ Ya'ipi Yosë yonquirinpoaso' nani sha'huitéranguëma'. Napoaton no'tequén itéranguëma'. Insosona co natëhuachinahuë', ina marë' co Yosë ana'intarincohuë'. Inahuara tëhuëñenaquë nina'intapi. ²⁸ Canpitanta' ni'cona pi'pian téranta' Yosë nariantatama'. Quisoso imapisopitanta' noya ni'co'. Ispirito Santo nani acorinquëma' hua'anëñ pochin nicacamaso marë'. Inapitanta' Yosë huëntonënquë ya'conpi. Quisoso chiminaton, aya'coninpoa'. ²⁹ Nani pa'pato, co noyahue' quëmapi'sa' huë'sapi. Canoniri ma'sha maninso pochachin yaocoiarinënquëma'. Pa'sápatona', anishacancantapi. Co nosoroarinënquëmahuë'. Ina nani nitotérahuë. ³⁰ A'naquëonta' Quisoso imaponaraihuë',

a'porahuatona', nisha a'chinapona'. Yanonpintarinënquëma'. Inahua' imacamaso marë' napotarinënquëma'. ³¹ Napoaton iyaro'sa', ni'cona nonpintochinënquëma'. Cara pi'ipi catahuaranquëma'. Tahuërirë chachin, tashirë chachin pënënanquëma'. Na'con nosororanquëma' ni'ton, na'nëto, a'naya a'nayanquëma' pënënanquëma'. Ina yonquiatoma', nipënëncö', nicatahuaco'.

³² Pa'pato, Yosë noya a'painquëma'. Quiricanën quëran nontarinquëma'. Ina quëran nosororinpoaso' anitotarinpoa'. Ina natëhuatama', achinicancanarinquëma'. Oshaquëran noya noya cancantarama'. Quisocristo imarëhua' ni'ton, anoyacancantérinpoa'. Ina nohuanton, a'na tahuëri ya'ipi sha'huitérinpoaso' noya acotarinpoa'.

³³ A'chintohuatënquëmara, co aquëtë' coriqui yonquirahuë'. A'na piyapi coriquinën co nohuantaparahuë'. Co a'mopiso téranta' noyapatérahuë'. ³⁴ Caora sacatonëhuë quëran coshatérahuë, ma'sha pahuantérincoso' pa'anahuë. Ca'tanincosopitanta' quëtérahuë. Ina nitotérama'. ³⁵ Canpitanta' nonanco. Sacatatoma', pahuantérinsopita ma'sha quëtoco'. Siniro Quisoso noninso' yonquico'. 'A'napita ma'sha topinan quëtohuachinquëma', noya cancantérama'. Nipirinhue', canpitartinta' nosoroatoma', topinan quëtohuatama', noya noya cancantarama', ténin Quisoso," itérin Paonori.

³⁶ Ina tosahuaton, inapitarë chachin isonin. Napohuachinara, Yosë nontérin inapita catahuacaso marë'. ³⁷ Naporo' ya'ipiya sëtatona', na'nëpi. Paono iporahuatona', apinopi. ³⁸ "Co huachi quënanaramacohuë", téninso marë' na'con sëtopi. Ina quëran nanchaquë huarë' imapi.

21

Co të'huatonahuë', Quirosarinquë paantarins'

¹ Imapisopita nani nontahuatoi, panca nanchaquë pipirai. Cosëquë no'tëërai. Tahuëririnquë Notasëquë canconai. Ina quëran Pataraquë canconahuatoi, nonshirai.

² Inaquë a'na nancha quënancoantara, Pinisia parti yapa'sarinso'. Inaquë ya'conahuatoi, paantarai. ³ Chipri so'ton notérahuatoi, ahuënan quëran na'huëtërai. Pa'sahuatoi, Siria parti canconai. Tiroquë ma'sha oshicaso' ni'ton, inaquë nonshirai. ⁴ Quisoso imapisopita quënanconahuatoi, inaquë a'na simana pochin yacapatonai. Ispirito Santo nohuanton, Paono pënënpí: "Ama Quirosarinquë paquësuhuë", aparisitochinën," itopirinahuë'. ⁵ Simana nanihuachina, paantarai. Yapa'patëira, ninano yonsanquë huarë' imarinacoi. Sa'inarë chachin, hui'ninpitarë chachin ca'taninacoi. Nonshinanquë isonconahuatoi, Yosë nontérai. ⁶ Ina quëran imapisopita nontahuatoi, nanchaquë ya'coantarai. Ya'huëhuano'saso nipirinhue' ya'huëpi'pa' paantapi.

⁷ Tiro quëran pipirahuatoi, Torimaitaquë canconai. Imapisopita nontahuatoi, a'na tahuërrira' i'huatonai. ⁸ Tahuëririnquë pipiantarahuatoi, Sisariaquë canconai. Inaquë nonshirahuatoi, Pinipi pënëñquë yacapatonai. Inasso' iráca Quirosarinquë acopi ca'tano'sa' catahuacaso marë'. Canchisëya'pi acihuachinara, inanta' acopi. Iporaso huachi noya nanan sha'huirárin. ⁹ Catapini hui'ninpita ya'huëtërin. Nano'sa' niponarai-huë', co so'yapihuë'. Ispirito Santori catastuarin Yosëri anitötérinso sha'huicaiso'. ¹⁰ Inaquë hua'quimiáchin ya'huasocoi, a'na pënëntona'pi Cotia parti quëran o'marin, Acapo itopiso'. ¹¹ Huë'sahuaton, Paono sintoronën ocoirahuaton, inaora tanpaquën nantëñé chachin nitonporin.

—Ispirito Santo nohuanton iyasha, ninorahuë. Quirosarinquë pa'patan, sintoronënquë nitonporahuëso pochachin cotioro'sa' tonpoarinënquën. Nisha piyapi'saqué yo'coaninënquën ana'intinënquënso marë', itérin. ¹² Natanahuatoi: "Ama Quirosarinquë paquësuhuë", itopiraihuë'. Inaquë ya'huëpisopitarinta' inachachin napotopirinahuë', co yanatërincoihuë'.

¹³ —¿Onpoatonta' na'nëtoma' asëtaramaco? Ama huachi na'nëcosuhuë'. Inatohua' pa'pato, yatonpoarinaco. Nipirinhue', yapa'sarahuë. Siniro Quisoso imarahuëso

marë' yatëpapirinacohuënta', pa'sarahuë, itérincoi. ¹⁴ Hua'qui' nontopiraihuë', inachachin yonquirin ni'ton:

—Noyahua'. Sinioro nohuantohuachin, paqué nipachin, itérai.

¹⁵ Ina quëran ma'shanëhuëipita taparahuatoi, Quirosarinquë paantarai. ¹⁶ Pa'patoira, a'naquën imapisopita ca'taninacoi. Mason pëinënquë quëparinacoi yacapata'huaiso marë'. Inaso' Chipri quëran huë'nin, iráca imarinso'.

Santiaco nontérinso'

¹⁷ Quirosarinquë canconpatoira, imapisopita nóya nontérinacoi. Huë'naiso marë' noya cancantopi. ¹⁸ Tahuëririnquë Paono pa'nin Santiaco nicapon. Quiyanta' pa'nai. Ya'ipi ansiano'sa' inaquë nani niyontonpi. ¹⁹ "Huë'cama, iyaro'sa," itahuaton, Paonori itantapon: "Nani hua'qui' Quisocristo nanamën a'chinahuë. Nisha piyapi'sa' a'chintëra'piarahuë. Yosë catahuarincoi ni'ton, noya natanatona', na'a imasapi huachi," itérin. Ya'ipi a'chininso' sha'huitérin.

²⁰ Natanahuatona', "Ma noyacha Yosëso' ni'ton, nisha piyapi'santa'imasapi paya," topi a'naya a'naya. Ina quëran itantapi:

—Noya iyasha niperinhuë', iséquë na'a huaranca cotioro'sa' Quisoso imaponarai-huë', Moisësë iráca pënëntérinso' yanatëpi anta'. "Inanta' natëcaso' ya'huërin," topi. ²¹ Inapitaso' nonpin nanan natantopi. "Paono nisha piyapi'sa' ya'huërinquë paaton, cotioro'sa' inaquë ya'huëpisopita nisha a'chintérin. 'Moisësë pënëntérinso' a'poco'. Ama huachi hui'namapita marca acotocosohuë', ténin Paono pënëntaton. Co nohuantérinhuë' iráca napopiso' natëcaiso'," topi, natantopi. ²² ¿Ma'ta' iporaso' onpoa'ahua' nonpin-topiso' ama natëcaiso marëhuë'? Huë'nanso' onpopionta' piyapi'sa' nitotapona'. ²³ Nani yonquirai ni'ton, natancoi sha'huichinquën ma'sona nicamaso'. Catapini quëmapi'sa' iséquë ya'huëpi. Nani Yosë nontopi ma'sha nicacaiso'. ²⁴ Inapita quëparahuaton, catahuaquë' iráca pënëntérinso' natëcaiso marë'. Yosë chinotopiso pëiquë quëparahuaton, pahuërapitëquë' ma'sha Yosë marë' tēpacaiso'. Ina quëran niya'irapi. Inapotohuan, ya'ipi piyapi'sa' ni'sarinënquën. "Paononta' Moisësë pënëntérinso' natërin. Nonpin nanan natantéröhua'," tosapi. ²⁵ Nisha piyapi'saso niperinhuë' nani ninshitërai. "Quisocristo imapatama', co ya'ipi iráca pënëntérinso' natëcamaso' ya'huërinhuë'. Isoíchin sha'huichinquëma' ama nicacamaso marëhuë'. A'naquën ma'sha tēpapi mamanshi moshacaiso marë'. Ina nosha tananpitoco'. Naporahuaton, a'naquën maconorahuatona', ma'sha tēpapi. Co huënainënoya inquipirinahuë', ca'pi. Ina noshanta' ama ca'cosohuë'. Naporahuaton, ama monshihuancosohuë'. Cotioro'sacoi pënëntëraiso' na'con ya'huëpirinhuë', inaíchin natëcamaso' ya'huërin," ténai, nisha piyapi'sa' ninshitatoi, itérin Santiacori.

Paono mapiso'

²⁶ Itohuachina, "Noyahua'. Napo'i nipachin," itérin Paonori. Tahuëririnquë catapiniya'pi quëparin. Iráca pënëntérinso' natërahuatona', Yosë chinotopiso pëiquë ya'conpi. Ya'conahuatona', corto hua'an sha'huitopi: "Canchisë tahuëri huë'sápoi Yosë camaítérinso' natëtoi oshanëhuëi inquica'huaiso marë'. Tahuëri nanihuachin, ma'sha quësarai canpitari tēpatoma' ahuiquitamaso marë'," itopi.

²⁷ Canchisë tahuëri naniriahuachina, Yosë chinotopiso pëiquë paantapi. Inaquë a'naquën cotioro'sa Asia parti quëran huë'pisopitari quënanpi. Paono quënanahuatona', mapi. Ya'ipi piyapi'sa' ano'huitopi. ²⁸ "¡Huëco' iyaro'sa' catahuacoi! Iso quëmapi ya'ipi parti paaton, nisha a'chinarin. 'Cotioro'saso' co no'tëquën a'chinpihuë'. Moisësë pënëntérinso' a'poco', ténin. Naporahuaton, Yosë chinotopiso pëi' co huachi noya ni'nihuë'. Ni'cochi. Crico piyapi'sa' iséquë chachin ichiya'conin ni'ton, Yosë pëinën tapiarin. Co inapitaso' ya'conacasohuë' niperinhuë'," toconpi.

²⁹ I'huia Paonori Toropimo quëparahuaton, ninano' pa'térin, cotioro'sari quënanpi. Ipisoqué ya'huérin ni'ton, Crico piyapi inaso'. "Nisha piyapi nimirinhue", Yosé chinotopiso pëiqué ichiya'conin," tēcatona napopi.

³⁰ Natanahuatona', notohuaro' piyapi'sa' no'huitopi. Yosé chinotopiso pëiqué ta'arahuatona', Paono mapi. Masahuatona', ocoicaiso marë' ohuararachinpi. Nani ocoihuachinara, ya'coana oncotopi. ³¹ Paono yatëparapiso', capitán hua'anso' natantérin. Ya'ipi Quirosarinqué ya'huëpisopita yaniahuérapi, natantérin. ³² Natantahuaton, sontaro'sa', capitano'sa', inapita amatahuaton, quëparin. Ta'arahuatona', piyapi'sa' niyontonpique pa'sapi. Sontaro'sa' ya'caritérahuachinara, cotioro'sari quënanahuatona', co huachi Paono ahuëpihuë'. ³³ Capitan hua'ani canconahuaton, Paono maconin. "Cato' catinaqué tonpotanpatéquë", itohuachina, a'na sontarori nitonpotanpatérin. A'na tanpain quéraonta' a'na sontarori inapotérin. Inapotohuachinara, capitanso' piyapi'sa' natanin: "¿Ma'ninta' iso quëmapi? ¿Ma'ta' onporinso?" ténin. ³⁴ Napoaponaahuë, chiníquen nonatona', nisha nisha sha'huitopi. Noncaroapi ni'ton, co nanitérinhue' no'tequen natanacaso'. Napoaton: "Sontaro'sa' ya'huëpique quëpacó," itérin. ³⁵⁻³⁶ Quëpahuachinara, ya'ipi piyapi'sari imasapi. "Tépachinaco", itérapi. Pëi' nanopenanqué canconahuatona', na'con na'con no'huitona', yaahuépi. Napoaton sontaro'sari Paono inápaqué pitetérahuatona', quëpapi.

No'huitona'piro'sa' nontérinso'

³⁷ Pëiqué yaya'compachinara, Paonori capitán itapon:

—Siniro capitán, pi'pian nonchinquéen topirahuë', itérin.

—¿Crico nananqué nonan ti? itérin.

—Ina nananqué mini nonahuë, itérin.

³⁸ —Iquipito piyapinquen ta'ma topirahuë'. Inaso' i'huamiáchin copirno no'huiton, catapini huaranca tirocoro'sa', inotero parti quëparin, itérin.

³⁹ —Co inacohue'. Caso' cotio quëmapico. Tarsoqué nasitérahuë. Inaso' panca ninano', Sirisia parti ya'huérinso'. Ya'ipi piyapi'sa' nohuitopi. Isopita piyapi'sa' nonchi, topirahuë', itérin.

⁴⁰ "Inta nipachin, nontequé'," itérin. Paono nanopenanqué huanirahuaton, anqui anquita'parin. Piyapi'sari ni'sahuatona', copica topi huachi. Napohuachinara, Paonori cotio nananqué itapon:

22

¹ "Natanco iyaro'sa', apiro'sa', pi'pian yanontéranguëma'. Caso co manta' onporahuë", ténin. ² Cotio nananqué nonsarins natanahuatona', aqué aquétë ta'topi. Napohuachinara, itaantarín:

³ "Canta' iyaro'sa' cotio piyapico. Tarsoqué nasitérahuë. Sirisia parti nasitopirahuë', iséqué huécato, hui'napitérahuë. Maistro Camariro a'chintérinco. Shimashonénpoa' pénéntérinso chachin ya'ipi a'chintérinco. Hua'huatapo quérañ huaré' chiníquen Yosé yonquirahuë. A'naya téranta' nisha yonquihuachinara, campita pochachin no'huirahuë. ⁴ Iráca na'a Quisoso imapisopita aparisitérahuë. Yatëparahuë. Quëmapi'sa' tonporahuato, tashinan pëiqué po'morahuë. Sanapi'sa quérañ huaré' inaqué po'morahuë. ⁵ Yanitotohuatama', corto hua'an chini chiníquen nanantérinsonta' inachachin sha'huitarinquéma'. Cotio ansiano'santa' nitotopi. Inapitaso' quirica ninshitérinaco iyaro'sa' Tamascoqué ya'huëpisopita quétañ huaso marë'. Inatohua' pa'nuhuë Quisoso imapisopita maca'huaso marë'. 'Tonporahuato, Quirosarinqué quëmaaráhuë ana'intacaiso marë', ta'to, pa'nuhuë.

*Quisosori ya'notérinso' sha'huiantarino'
(Hechos 9.1-19; 26.12-18)*

6 Pa'sápatoi Tamascoquë ya'caritérara. Camotëchin nisahuaso', a'naroáchin inápa quëran huënaráchin huënaráchin a'pintérinco. **7** No'paquë anotahuato, inápa quëran nontérincoso' natanahuë. ‘Saono, Saono, ¿onpoatonta' aparisitaranco?’ itérinco. **8** ‘¿Inquënta' quëmaso' Siniro?’ itérahuë. ‘Ca Quisosoco, Nasaritoquë ya'huërahuëso'. Aparisitaranco,’ itérinco. **9** Ca'taninacosopitanta' a'pininso' ni'pi. Nipirinhue', nontérincoso' co natanpihuë’. **10** ‘¿Ma'ta' Siniro onpo'iso?’ itérahuë. ‘Huanirahuaton, ninanoquë paquë’. Inaquë a'na quëmapi sha'huitarinquën ma'sona nicamaso’, itérinco. **11** Huënaráchin huënaráchin a'pintérinco ni'ton, co manta' quënantérahuë'. Napoaton ca'tanincosopita matanparahuatonaco, Tamascoquë quëparinaco.

12 Ina ninanoquë chachin a'na quëmapi ya'huérin, Yosë noya chinotérinso'. Ananiasé itopi. Moisésé iráca pénentérinso' no'tequen natérin. ‘Inaso' noya quëmapi,’ topi ya'ipi cotioro'sa'. **13** Huëcapairahuatonco, nontiirinco. Iya Saono. ¡Siniro nohuanton, noya ni'tantaquë!’ itérinco. Naporo chachin noya ni'taantarahuato, ina quënanahuë. **14** Ina quëran itaantarainco: ‘Yosë chinotérahuaso' nani huayoninquën nohuantérinso chachin nitotamaso marë’. Ina nohuanton, Quisoso ya'notérinquën. Noya noya inaso'. Nontérinquënso' natanan. **15** Yosë acorinquën ya'ipi piyapi'sa' sha'huitamaso marë'. Ni'nanso', natananso', inapita sha'huiaran. Ina marë' ya'notérinquën. **16** Napoaton ama hua'quiquësuhuë'. Apiramiáchin huaniquë'. “Quisoso imasarahuë huachi,” ta'ton, aporihuanquë'. Ina nontohuatan, oshanën inquitarinquën,’ itérinco.

Nisha piyapi'sa' a'chintacaso marë' a'parinso'

17 Ina quëran Quirosarinquë paantahuatéra, Yosë chinotopiso pëiquë pa'nuhüe. Inaquë Yosë nontasoco, hua'narëso pochin ni'nuhüe. **18** Quisoso nontaantarainco. ‘Manorahuaton, Quirosarin quëran pipiquë’. Ca nanamëhuë sha'huihuatan, co natëarinënquënhue’, itérinco. **19** ‘Inapita Siniro nohuitérinaco. A'na parti a'na parti paato, ya'ipi niyontonpiso pëiro'saquë ya'conahuë. Inaquë imarinënquënsopita ahuërahuë. Tashinan pëiquë po'morahuë. **20** Istipan quëma nanamën a'chininso marë' tëpahuachinara, canta' ni'nuhüe. “Tëpacó,” itérahuë carinta'. Tëpatona'piro'sa' a'mopiso' ocoirahuatona', quëtérinaco, a'pairahuë. Ya'ipiya nohuitérinaco,’ itérahuë. **21** ‘Ina nipirinhue', paquë'. Aquë yaa'paranquën nisha piyapi'sa' a'chintamaso marë’, itérinco. Napoaton nisha piyapi'sa' a'chintarahuë,” ténin Paono.

Capitan hua'ani maninso'

22 Piyapi'sa' noya natanapirinahuë. “Nisha piyapi'sa' a'chintarahuë,” topachina, no'huitaantapi.

“Tëpachinaco'. ¡Pa'pi co noya quëmapihuë! ¡Chiminchina'in!” itopi. **23** Chiníquën nonsapi. No'huitatona', a'mopiso' pa'tan pa'tantahuatona', inápaquë mo'shiqüepita pa'satapi. Chiníquën no'huitohuachinara, cotioro'sa' inachintopiso'. **24** Capitan hua'ani ni'sahuaton, sontaro'sa itapon: “Sontaro'sanpoa ya'huërhuaquë quëparahuatoma', huihuico'. Ma'marësona no'huipiso', sha'huichinpoa”, itérin. **25** Inaquë quëparahuatona', tonpopi huihuicaiso marë'. Tonpopirinahuë', capitan inaquë huaniarin ni'ton, Paonori itapon:

—Caso' Noma piyapico nipirahuë', yahuihuiramaco. Co napotamacoso ya'huërinhuë'. Co coisë nitotopirinhuë', ¿yahuihuiramaco ti? itérin Paonori.

26 Ina natanahuaton, capitan hua'an sha'huitapon pa'nin.

—¿Ma'ta' ipora onpoapon? Paso' quëmapi Noma piyapi nipirinhue', yahuihuitéran. Ni'quëna copirno no'huihuachinquën, itérin.

27 Napotohuachina, capitan hua'ani huëcapairahuaton:

—¿Quëmaso' Noma piyapinquën ti? itiirin.

—Inaco mini, itérin Paonori.

28 —Na'con pahuërëtato, Noma piyapi ya'conahuë, itérin capitan hua'ani.

—Caso nimirinhuë' nasitérahuë quëran huarë' Noma piyapico. Tatahuë Noma piyapi ni'ton, canta' inapochachin ninahuë, ténin Paono.

²⁹ Ina natanahuatona', co huachi huihipihuë'. Capitan hua'aonta' pa'yanaton, tē'huarin. Noma piyapi nimirinhuë', catinaquë tonporinso marë' copirno tē'huatérin.

Cotio hua'ano'sa' Paonori sha'huitérinso'

³⁰ Tahuéririnquë capitan hua'ani yanatantérin. “¿Ma'marëta' cotioro'sari sha'huirapipi?” ta'ton, sontaro'sa' sha'huitérin Paono ocoicaiso marë'. Naporahuatón, ya'ipi cotio hua'ano'sa' amatérin. Corto hua'ano'sa' chini chiníquën nanantopisonta' amatérin. Nani niyontonpachinara, inaquë Paono quëparin natanacaiso marë'.

23

¹ Paono ya'conahuaton, hua'ano'sa' notëerahuatón, itapon:

—Ipora iyaro'sa' pi'pian nonchinquëma' natanco. Hua'huatapo quëran huarë' noya ninahuë. Yosë ni'sárinco, co manta' onporahuë', itérin.

² Naporó tahuéri'sa' Ananiasé itopiso', corto hua'an chini chiníquën nanantérinso' nisarin. Inari huanipapisopita itapon:

—Ahuëananco', itérin. Napohuachina, huaniparinsoari ahuëananin. Napotohuachina, Paonori itapon:

³ —Quëmaso' nonpinténquën. ¡Yosë ahuëarinquën quëmanta! “Moisésë pënëntérinso' natëto, ana'intarahuë,” taponahuë', ¿onpoatonta' sha'huitérin ahuëincoso'? Moisésë chachin pënëninpoa' ama topinan quëran piyapi ahuëcaso marëhuë', itérin.

⁴ —Corto hua'an chini chiníquën nanantérinso nimirinhuë', ¿no'huiton, nonapiran ti? itopi.

⁵ —Co'chi iyaro'sa' nohuitarahuë', naporahuë paya. Téhuëñchachin Yosë quiricanën quëran pënëninpoa'. “Co hua'anenpoa' nonapicaso' ya'huërinhuë”, ténin, itérin Paonori.

⁶ Cotio hua'ano'sa' huë'pisopita co napopianachin yonquipihuë'. Patoma satosioro'sa', patomaso', parisioro'sa'. Ina yonquiatón, Paonori itantarín:

—Caso' iyaro'sa', Parisioco. Shimashonéhuépitanta' parisioro'sa chachin. “Yosë ananpitaantarínpoa'” ténahuëso marë' isopita sha'huirapirinaco, itérin.

⁷ Ina natanahuatón, parisioro'sa', satosioro'sa', inahua capini nino'huipi. Nisha nisha yonquipi. ⁸ Satosioro'saso' co natëtona'piro'sahuë'. “Co Yosë ananpitaantarínpoahuë'. Co hua'yanenpoa' ya'huëtérinpoahuë'. Co anquëniro'sa téranta' ya'huëpihuë',” toconpi. Parisioro'saso nimirinhuë' natëpi. “Hua'yanenpoa' ya'huëtérinpoa' ni'ton, Yosë ananpitaantarínpoa'. Anquëniro'santa' ya'huërin,” topi. ⁹ Napoaton ninontatón, noncaroapi. Parisio maistro'sa' huanirahuatón, chiníquën nonpi.

—Iso quëmapiso' noya, ténai. Co manta' onporinhuë'. Anquëni noninso' natamara. Hua'yani a'na nontomara, ténin a'naquën. Napohuachinara, satosioro'sa' no'huitopí.

¹⁰ Chiníquën nino'huítóna', niahuërapí. Napoaton capitan hua'ani sontaro'sa' camairin.

—Maconco' tēpahuachina', itérin. Napotohuachina, sontaro'sa' pa'pi. Paono oséréconahuatón, sontaro'sa' ya'huëpique' quëpaantapi.

¹¹ Naporó' tashi' Siniororí ya'notimarahuatón, Paono itapon: “¡Ama tē'huatonhuë', chiníquën cancantéquë! Quirosarinquë nanaméhuë nani sha'huiran. Inapochachin Nomaquënta' paaton, sha'huiantamaso' ya'huërin,” itérin.

Paono yatépapiso'

¹² Tahuéririnquë a'naquën cotioro'sa' chinotopi Paono tēpacaiso'. “Ama huachi ca'ahuasohuë'. Ama o'oahuasohuë'. Paono tēpaqué huarë' ca'ahua'. Co tēparihuarahuë' ca'patéhua', Yosë ana'inchinpoa'” nitopi. ¹³ Catapini shoncaya'pi pochin napopi.

¹⁴ Naporahuatón, paatóna', cotio hua'ano'sa', ansiano'sa', inapita nontopi.

—Nani huachi anoyat  ri. Co huachi coshataraihu  . Paono t  paqu   huar  ' coshataantarai. Yoscoar  ' t  paarai, t  nai. ¹⁵ Napoaton capitan hua'an sha'huitoco' Paono qu  nta'in. "Tashiraya yanontantarai no't  qu  n nitota'huaiso mar  ', " itoco'. Quiyaso nimirinhue' na'pitatoi, ninaarai. Ya'caritohuachin, a'naro  chin masahuatoi, t  paarai, itopi.

¹⁶ Paono apia'huainso nimirinhue', yat  papiso' natant  rin. Inaso', oshin hua'huin. Natantahuaton, sontaro'sa' ya'hu  pique' paaton, Paono sha'huit  rin. ¹⁷ Sha'huitohuachina, a'na capitan amat  rin.

—Iso hui'napi hua'an  nque' qu  paqu  ' nanan sha'huichin, it  rin.

¹⁸ Napohuachina, hua'an  nque' qu  parahuaton, itonin:

—Sontaro'sa' ya'hu  pique' Paono amat  rinco. "Iso hui'napi hua'an  nque' qu  paqu  ' nanan sha'huichin," it  rinco ni'ton, qu  nhahu  , it  rin.

¹⁹ Capitan hua'ani matanparahuaton, amashamiachin qu  parin ama piyapi'sari natanaacaiso mar  hu  '.

—¿Ma'ta' yasha'huit  rancoso'? it  rin.

²⁰ —Cotio hua'ano'sa' nani chinotopi Paono amatacaiso mar  '. "Tashiraya Paono qu  nantaque' nontanta'ii. Naporinso', aqu  t   huar  ' yanit  terai," itarin  nque'.

²¹ Nimirinhue', ama nat  qu  suhue'. Catapini shonca na'con piyapi'sari chinotopi t  pacaiso mar  '. Po'oana qu  ran ninarapi t  pacaiso mar  '. Co huachi coshatapihu  '. Co o'osapihu  '. Paono t  pai huar  ' coshatacaiso' yonquipi. Iporaso' qu  ma ninarin  n nohuantopiso chachin nitamaso', it  rin.

²² —Sha'huit  rancoso' api, ama insonta' sha'huit  qu  suhue', itahuaton hui'napi a'parin.

Paono a'na parti qu  papiso'

²³ Ina qu  ran cato' capitano'sa' amat  rin.

—Apira ma'sha tapaco' Sisariaque' pacacamaso mar  '. Cato pasa sontaro'sa' sha'huitonque' pa'ina'. Cahuarioque' pa'na'piro'santa' canchise shonca qu  paqu  '. Nansahuano'sa' cato pasa qu  paqu  '. Ya'ipi tapat  que' yayonotashirahuaso' pacaca-maque'ma'. ²⁴ Cato' cahuario qu  paco' Paono paacaso mar  '. Noya a'pairahuatoma', hua'an Huirise qu  tonco', it  rin. ²⁵ Ina qu  ran quirica ninshit  rin hua'an qu  tacaiso mar  '.

²⁶ "Sinioro hua'an Huirise. ¿Noyanque' qu  manta'? Ca Craotio Nisias  co ninshitaranque', ni'que'. Qu  maso' chiniqu  n nanant  ran ni'ton, pi'pian sha'huichinqu  n.

²⁷ Iso qu  mapi a'pataranque', cotioro'sari mapiso'. Yat  papirinahu  ', qu  nanahuato, sontaro'sa' a'parahu   os  r  tacaiso mar  '. Inaso' Noma piyapi ni'ton, os  r  t  rahu  '.

²⁸ ¿Ma'mar  ta' sha'huirapipiso'? ta'to, cotio hua'ano'saq   qu  parahu   nitota'huaso mar  '. ²⁹ Cotio p  n  nt  rinco' co nat  rinhue', toconpi. Ina  chin sha'huirapipi. Co manta' onporinhu  '.

Co chiminacaso' ya'hu  rinhue'. Coni tashinan p  iqu   t  ranta' po'mocaso' ya'hu  rinhue'. ³⁰ Ina qu  ran cotioro'sa' chinotopi t  pacaiso', natant  rahu  '. Napoaton a'naro  chin a'pat  ranque'. Cotioro'santa' nani sha'huit  rahu   ya'hu  ranque' paatona' sha'huirapicaiso mar  '. Nani huachi," it  rin, ninshitaton.

³¹ Ina qu  ran sontaro'saso' nat  rahuatona', Paono qu  papi. Tashi' nimirinhue', Antipat  ris  'pa' qu  papi. ³² Tahu  ririnque' sontaro'saso' ya'hu  pique' panantapi. Cahuarioque' pa'na'piro'saichin Paono qu  papi. ³³ Sisariaque' canconahuatona', quirica hua'an qu  tonpi. Paononta' yo'conpi. ³⁴ Hua'anso' quirica nontahuaton, itapon: "¿Inso partita' hua'huat  rango'?" it  rin. "Sirisia parti hua'huat  rahu  ," it  rin Paonori.

³⁵ —Sha'huirapirin  nsopita canquihuachina', ya'ipiya natanarahu  , it  rin. Ina tosahuaton, sontaro'sa' camairin Paono qu  pacaiso mar  '.

—Hua'an Irotise p  in  nque' qu  parahuatoma', a'paico' ta'ahuachin, it  rin.

¹ A'natérápo tahuëri nanihuachina, corto hua'an chini chiníquën nanantérinso' canquirin, Ananiasë itopiso'. A'naquën cotio ansiano'sari ca'tanpi. Nonapina'pi hua'aonta' huë'nin, Tirotoro itopiso'. Huirisë ya'huérinquë huë'sahuatona', Paono sha'huirapipi.

² Paono quëntahuachinara, Tirotorori itérin:

—Ipora sinioro hua'an, pi'pian nonchinquën natanco. Ma noya quëmaso' hua'anéntérancio. Noya yonquiaton, na'con catahuarancoi ni'ton, sano ya'huërai.

³ Ina marë' ya'ipicoi noya ni'nainquën. "Yosparinquë," itérainquën. Quëmaso' tēhuëñchachin chiníquën nanantérän. ⁴ Apira pi'pisha yanontaranquën, noya natanco. Co hua'qui' nontaranquënhuë'. ⁵ Iso quëmapi Paono itopiso' pa'pi co noyahuë', ténai. Ya'ipi parti paaton, piyapi'sa' nisha nisha ayonquirin. A'chinpachina, cotioro'sa' nino'huipi. Ya'ipi parti naparin. Nisha imarin. Nasarinoro'sa' itopiso' imaton, na'a piyapi'sa' a'chintarin imacaiso marë'. ⁶ Yosë chinotopiso pëinta' yatapirin. Nisha piyapi'sa' inaquë ichiya'conin, co inapitaso' ya'conacasohuë' nipurinhuë'. Naporo' quiyari manai. [Quiya coisëquë yaquëpapiraihuë' ana'intacaso marë'. ⁷ Capitan hua'an Nisiasëso nipurinhuë', notohuar'o' sontaro'sa' quësahuaton manin. Osérétérincoi. ⁸ "Noma hua'an ya'huërin'pa' paatoma', sha'huirapico'," itérincoi. Napoaton isëquë huë'nai.] No'téquën sha'huirapiarai. Quëmari Paono natanquë' inachachin sha'huichinquën, itérin Tirotorori.

⁹ Cotioro'sa' huë'pisopitanta' inachachin napotopi. "No'téquën sha'huitérinquën," itopi. ¹⁰ Ina quëran hua'ani imirin quëran tasatérin Paono nontacaso marë'. Napotohuachina, Paonori itérin:

—Na'a pi'ipi sinioro hua'an quëma hua'anéntérancio. Napoaton noya cancantato, nontaranquën. ¹¹ I'huamiáchin Quirosarinquë paantarahuë Yosë chinota'huaso marë'. Shonca cato' tahuéríchin nisarin pa'nuhëso'. A'napita natanpatan, inachachin sha'huitarinéñquën. Co hua'quiyatérarahuë'. ¹² Yosë chinotopiso pëiquë pa'patora, co insonta' no'huirahuë'. Niyontonpiso pëiquënta' noya pa'nuhë. Co cachiquë téranta' chiníquën a'chinahuë'. Piyapi'sa' niyontonpachinara, co sha'huitérahuë' nino'huicaiso'. ¹³ Topinan quëran nonpinapirinaco. Na'con sha'huirapipirinacohuë', ni'nincoso chachinso co ya'huërinhuë'. ¹⁴ "Nisha imarin," topi. Inaíchin no'téquën nonpi. Téhuëñchachin Quisoso nanamëñ imarahuë. Nipurinhuë', Yosë no'téquën chinotérahuë. Shimashonéhuëpita chinotopiso chachin chinotérahuë canta'. Ya'ipi Yosë quiricanëñ natérahuë. Iráca pënëntérinso', pënëntona'piro'sa' ninshitopiso', inapita yonquirahuë. ¹⁵ "Yosë no'téquën nontérinpoa'," ta'to natérahuë. "A'na tahuëri ya'ipi piyapi'sa' ananpitaantarahuë. Noya piyapi'sa', co noya piyapi'sahuë', ya'ipi ananpitaantarahuë," ténin Yosë. Ina tahuëri caso' ninarahuë. Isopitanta' ina ninarapi. ¹⁶ Napoaton nani tahuëriya Yosë no'téquën yanatérahuë. Piyapi'santa' co yanopintérahuë'.

¹⁷ Iráca Quirosarinquë ya'huëpirahuë'. Na'a pi'ipi a'na parti pa'nuhë quëran i'huamiáchin inaquë paantarahuë. Sa'ahuar'o'sa' nosoroato, coriqui quëta'huaso marë' pa'nuhë. Ma'sha Yosë quëta'huaso marënta' pa'nuhë. ¹⁸ Iráca pënëntérinso' natëto, Yosë chinotopiso pëiquë ya'conpirahuë', co manta' onporahuë'. Co piyapi'sa' ayontonahuë'. Co ca nohuanto nino'huipihuë'. Inaquë cotioro'sa' Asia parti ya'huëpisopita quënaninaco. ¹⁹ Inapita mini isëquë huë'sahuatona', sha'huirapiitonacohuë', co huë'pihuë'. ²⁰ I'huacotio hua'ano'sa' niyontonpachinara, amatérinaco. Isopita nataninaco. Ma'sona onporahuëso' sha'huichinën. ²¹ Naporo' isoíchin napotérahuë. "Yosë ananpitaantarinpooa' ténahuëso marë' ipora sha'huirapirinaco," itérahuë, ténin Paono.

²² Ina natanahuaton:

—Noyahua'. Nani natananquën. Capitan hua'an Nisiasë o'mahuachin, iso nanan yonquiantarahuato, sha'huichinquëma', ténin hua'an. Quisoso nanamëñ a'chinpiso' noya nitotaton, co aquëtë' yanataninhuë'.

²³ Ina quëran capitan sha'huitérin: “Paono noya a'paiquë' ama ta'ainsohuë'. Nipirinhüë', ama tonpoquësohuë'. Nipayarinsopita huë'pachina', noya ya'coina'. Ma'sha pahuantohuachin, quëchina!',” itérin.

²⁴ Hua'quimiáchin quëran Huirisë sa'inë chachin huëntarahuatón, Paono amataantarín. Sa'insó' cotio sanapi, Torosira itopi. Paono huë'pachina, itapon:

“Quisocristo imaranso' sha'huitocoí noya nitochii,” itohuachina, “Tëhuëñchachin Quisocristo imarahuë. ²⁵ Yosë sha'huitérinpoa' noya cancantacaso marë'. Ina catahuarinpoa' co noyahuë' yonquirëhuasopita naniantacaso'. A'na tahuëri coisë pochin nicaton, ya'ipi piyapi'sa' natanarin. Co noyahuë' nipisopita ana'intarin,” ténin Paono. Napotohuachina, hua'an pa'pi pa'yanin.

—Nani huachi. Iporaso' paquë'. A'na tahuëri yanontaantahuatënquéen, amataantaranquén, itérin.

²⁶ “Paono pahuërëaponco pipicaso marë' nimara,” ta'ton, hua'qui quëran hua'qui quëran amataantarín nontacaso marë'. Na'aro' Paono nontopirinhüë'. ²⁷ Cato' pi'ipi nanihuachina, nisha hua'an ya'coantarín, Porsio Pisto itopiso'. Huirisëso' pipirin huachi. Pipiponahuë', co Paono ocoirinhüë'. “Cotioro'sa' no'huihuachinaco,” ta'ton, co ocoirinhüë'.

25

Hua'an Pistoquë sha'huirapiantapiso'

¹ Nasha hua'an canquirin huachi, Pisto itopiso'. Sisariaquë huëcaton, cara tahuëri i'huatérin. Ina quëran Quirosarinqué pa'nin. ² Inaquë pa'pachina, cotio hua'ano'sa', corto hua'ano'sa', inapitari Paono sha'huirapipi.

³ “Quirosarinqué quënantaquë', natanta'ii, topiraihuë',” itopi. Nani chinotopi na'pirahuatona', iraquë tēpacaiso marë'. ⁴ Napotopirinahuë', co hua'an nohuantérinhuë'.

“Inca. Co yaquëntarahuë'. Sisariaquë a'pairapi. Co hua'qui quëranhuë' inaquë canta' paantarahuë,” ténin. ⁵ —Napoaton pa'pato, caraíchin hua'anquëma' huëco' pa'ahua', ténahuë. Paono co noyahuë' nipachin, inaquë sha'huirapico', itérin.

⁶ Inaquë shonca tahuëri pochin i'huatantarahuatón, Sisariaquë paantarin. Tahuërinqué coisë shiranënqué huënsërahuatón, Paono amatérin. ⁷ Cotioro'sa' Quirosarin quëran nani o'mapi ni'ton, Paono huë'pachina, ahuancanapirahuatona', na'con sha'huirapiapi. Nisha nisha sha'huirapipirinahuë', co ni'ninso chachin ya'huërinhuë'. ⁸ Ina quëran Paonori itérin:

—Iráca quëran huarë', sinioro hua'an, noya ninahuë. Co manta' onporahuë'. Moisësé pënentérinso' cotioro'sari natëhuachinara, co ina marë' no'huirahuë'. Yosë chinotopiso pëinta' co tapirahuë'. Co nisha piyapi ichiya'conahuë'. Noma copironta' natërahuë. Co onporonta' piyapi'sa' sha'huitérahuë' ina no'huicaiso'. Topinan quëran sha'huirapirinaco, itérin.

⁹ Noya natanpirinhüë', hua'an co nohuantérinhuë' cotioro'sari no'huicaiso' ni'ton, Paono itérin:

—¿Nohuantérán Quirosarinqué paacaso'? Inaquë sha'huirapihuachinén, cari natanpato, sha'huitaranquén, itérin.

¹⁰ —Co nohuantérahuë'. Quëmaso' Noma copirno acorinquén ni'ton, nontaranquén. Sha'huirapirinacosó' isëquë anoyatacaso' ya'huërin. Co manta' cotioro'sa' onpoterahuë'sohuë', nitotérán. ¹¹ Tëpatona'pi, copirno no'huina'pi, inapita tēpacaso' ya'huërin. Ina pochinco canta' naporini, tēpainacosó' nohuanchitohuë'. Nipirinhüë', nonpinapihuachinaco, co cotioro'saqué yocancoso' ya'huërinhuë', ténahuë. Noma copirno chachin yanontarahuë. Ina nataincoso' ya'huërin, itérin Paonori.

¹² “Noma copirnoso' chini chiníquén nanantérin ni'ton, co topinan a'paréhuë',” ta'ton, coisënënpita nontérin. Nani nontohuachina, Paono itantarín:

—Noma copirno chachin yanontëran ni'quëhuarë', ina ya'huérin'pa' a'paaranquën, nontonquë', itérin.

Acripa hua'an canquirinso'

¹³ Hua'quimiáchin quëran a'na hua'an chiníquén nanantérinso' canquirin, Acripa itopiso'. Sisariaqué huë'nin Pisto nicapon. A'na sanapinta' huë'nin, Pirinisa itopiso'.

¹⁴ Hua'qui' inaquë yacapatarin ni'ton, Pistori itérin:

—Tashinan pëiquë a'na quëmapi ya'huëarin, Paono itopiso'. Iráca Huirisëri po'morinso'. ¹⁵ I'huá Quirosarinquë ya'huasoco, cotio hua'ano'sa', ansiano'sa', inapitari na'con sha'huirapipi. "Chiníquén ana'intëquë'", itérinaco. ¹⁶ Ina itohuachinacora, cari itapo: "Noma piyapicoi co topinan quëran ana'intérahuë". Cato ya'pi ma'sha nionpotohuachinara, cato chachin coisëquë pa'sapi. Sha'huirapihuachina, a'nanta' a'panitacaso' ya'huérin. Ina quëran coisëri noya nitotaton, tëhuëna'pi no'tëquën ana'intarin. Ina pochin Noma piyapicoiso' ninai," itérahuë. ¹⁷ Napoaton isëquë huë'pachinara, co hua'quirahuë'. Tahuéririnquë coisë shiranënquë huënsërahuato, Paono amatérahuë. ¹⁸ Ina quëran cotioro'sari sha'huirapipi. Panca tëhuëmara ni'ton, sha'huirapiapi, topirahuë', co ina pochin sha'huirapipihuë'. ¹⁹ "Paono co quiya pochin Yosë chinotérinhuë". Nisha imarin. A'na quëmapi Quisoso itopiso' chiminaponahuë', nani nanopiantarin," toconin, topi. Inaíchin sha'huirapipi. ²⁰ Cotioro'sa' moshapiso' co pi'pisha téranta' nitotérahuë'. Napoaton Quirosarinquë yaquëpapirahuë' aquëte' natanta'huaso marë'. "Inaquë sha'huirapiinën," itopirahuë', co nohuantérinhuë' ²¹ "Noma copirno chachin yanontarahuë. Ina nataincoso' ya'huérin," ténin. Napoaton tashinan pëiquë po'moantarahuë. Nanitohuato, Noma copirno nontacaso marë' a'paarahuë, ténin Pisto.

²² —Carinta' nata'in, ténin Acripa.

—Noyahua'. Tashiraya chachin natanaran, itérin Pistori.

²³ Tahuéririnquë Acripaso' Pirinisarë chachin huë'pi. Noyasha nitaparahuatona', natanacaiso pëiquë ya'conpi. Capitano'sa', ninano' hua'ano'sa', inapitanta' ya'conpi. Naporahuatona', Paononta' amatopi. ²⁴ Huë'pachina, Pistori itapon:

—Noya sinioro hua'an huë'nan. Canpitanta' iyaro'sa', noya huë'nama'. Ya'ipinquëma' yanontaranquëma', natanco. Iso quëmapi ni'co'. Ma'sona onpomara. Ya'ipi cotioro'sari no'huipi. Quirosarinquë sha'huirapipi, isëquënta huëcatona', sha'huirapipi, chiníquén nonapitona'. "Co noya quëmapihuë". Atépatëquë!", itérinaco. ²⁵ Natanpirahuë', co manta' onporinhuë'. Co tēpacaso' ya'huérinhuë', ténahuë. "Noma copirno chachin yanontarahuë," itérincoso marë' inaquë yaa'papirahuë', co nanitérahuë' topinan a'paca'huaso'. ²⁶ Quiricanta' yaa'papirahuë'. Co nitotérahuë' ma'sona onporinso' ninshita'huaso'. "¿Ma'ta' Noma copirno ichi?" ta'to, Paono amatérahuë' natanamasso marë'. Quëmarinta', sinioro hua'an, noya natantariquë'. Nani natanpatan, catahuaco ninshichi, topirahuë'. ²⁷ Co topinan a'pacaso' ya'huérinhuë'. Ma'sona onporinso' ninshitahuato sha'huirapicaso' ya'huérin, ténahuë, itérin.

26

Hua'an Acriparinta' Paono nataninso'

¹ Ina quëran hua'an Acripari Paono itapon:

—Inta noniquë nipachin. Ma'sona onporanso' sha'huitoco pa'poyainquën, itérin.

Itohuachina, Paonori anquitahuaton, itapon: ² "Noya sinioro hua'anpa', noya cantatato, nonchinquënatanco. Cotioro'sa' nani na'con sha'huirapirinaco ni'ton, cari no'tëquën sha'huitaranquë'. ³ Quëmaso' cotioro'sa' a'chininso' noyá nitotëran. Nisha nisha inachintopiso' ya'ipiya nitotëran. Ama no'huitatonhuë', noya natanco.

Co'huara imashatëraponhuë', Paono naporinso'

⁴ Hua'huatapo quëran huarë' ya'huërahuës', Quirosarinquënta' ya'huërahuës', inapita ya'ipi cotioro'sa' nitotopi. ⁵ Caso' Parisioco. Quiyaso' cotioro'sa' imapiso', no'të no'tequën natërai. Ya'ipi cotioro'sa' nitotopi. Nohuantopi naporini, inachachin sha'huichitënënquënhuë'. ⁶⁻⁷ Iráca shiماشونënpoapita nontaton, Yosëri itërin: 'A'na tahuëri nicha'ësaranquëma', nanopimiatarama', itërin. Ya'ipi cotioro'sa' ina ninapi, shonca cato' huënton chachin ninarapi. Nani tahuëri tashirë chachin ina chinotatona', naporapi. Canta' ina ninarahuë. Ina marë' sinioro hua'an, cotio hua'ano'sa' sha'huirapirinaco. ⁸ A'na tahuëri Yosë ananpitaantarinfoa', tënai. ¿Onpoatomata' canpitaso' co ina yanatëramahuë? tënahuë.

Paonori Quisoso imapisopita aparisitërindo'

⁹ Canta' iráca co Quisoso Nasaritoquë ya'huërinso' imarahuë. Ina imapisopitanta' no'huirahuë. Aparisita'huaso' ya'huërin, topirahuë'. ¹⁰ Quirosarinquë ya'huasoco, Quisoso imapisopita tashinan pëiquë po'morahuë. Cotio hua'ano'sa' nanan quëtérinaco po'moa'huaso marë'. Yatëpahuachinara, carinta': 'Tëpaco', itërahuë. ¹¹ Niyontonpiso pëiro'saquë ya'conahuato, na'aro' aparisitërahuë. Quisoso a'pocaiso marë' naporahuë. Chiníquën no'huito, nisha piyapi'sa' ya'huëpique' huarë' paato, aparisitërahuë.

Paono ya'nan imarinso' (Hechos 9.1-19; 22.6-16)

¹² A'na tahuëri cotio hua'ano'sa' nanan quëtérinaco Tamascoquë pac'a'huaso marë'. Quisoso imapisopita maca'huaso marë' pa'sapirahuë', ¹³ camotëchin iratërasoco, inápa quëran chiníquën a'pintimarincos. Pi'i quëran chini chiníquën a'pintérinco. Huënaráchin huënaráchin ni'nahuë. Ca'tanicosopitanta' ni'pi. ¹⁴ Ya'ipicoi no'paquë anotasocoi, Quisoso nontérinco. Cotio nananquë nontérinco, natanahuë. 'Saono, Saono, ¿onpoatonta' aparisitaranco? Ni'quë'. Cahuario yaa'pahuatëra, nara'huaya inëshin nininquë ohuanë'. Cahuariori no'huitaton to'tahuachina, aquë aquëtë' iquitërin. Inapochachin quëmanta' no'huiranco ni'ton, aquë aquëtë' co noyahue' cancantarán, itërinco. ¹⁵ '¿Inquënta' quëmaso' Sinioro?' itërahuë. 'Ca Quisosoco, aparisitarancoso'. ¹⁶ Iporaso niperinhuë' huaniquë'. Nani acoranquën piyapi'sa' sha'huitamaso marë'. Nani ni'nanco. A'na tahuëri nohuantërahuës' a'notaranquë. Ya'ipi sha'huiráquë'. ¹⁷ Cotioro'sa' yatëpahuachinënquë, nicha'ësaranquë. Nisha piyapi'sa' ya'huëpique' a'paaranquë. Inapitanta' yatëpahuachinënquë, nicha'ësaranquë. ¹⁸ Nisha piyapi'santa' a'chintëquë' nanamëhuë nitochina'. Somaraya pochin cancantatona', co nohuitérinacohue'. Nanamëhuë a'chintohuatan, nohuitarinaco. Iporaso' tashi pochin cancantopi. Nohuitohuachinaco, tahuëri pochin cancantapi. Iporaso' sopai hua'ani camaihuachina, natëpi. A'na tahuëriso' Yosë natërapi. Natëtonaco, imapachinaco, oshanëna' Yosëri inquitarin. Ya'ipi natërinacosopita nasha cancan quëtarahuë. Yosë piyapinënpita chachin nisapi,' itërinco.

Paonori natërindo'

¹⁹ Napoaton, sinioro hua'an, Quisoso inápa quëran ya'notimarinco ni'ton, a'naroáchin imarahuë. Ya'ipi sha'huitohuachincora, no'tequën natërahuë. ²⁰ Tamascoquë ya'huëpiso' ton sha'huitërahuë. Ina quëran Quirosarinquënta' sha'huiantaráhuë. Ya'ipi Cotia partinta' inachachin sha'huiantaráhuë. Nisha piyapi'santa' a'chintërahuë. 'Co noyahue' yonquiramasopita naniantatoma', Yosë chachin tahuërétaantaco'. Téhuëñchachin imapatama', noya nisarama', itërahuë. ²¹ Ina marë' cotioro'sa' no'huirinaco. Yosë chinotopiso pëiquë masahuatonaco, yatëpapirinacohue', ²² Yosëso' catastuarinco, cha'ërahuë. Napoaton ipora huanta' natërahuë. Ya'ipi piyapi'sa' hua'ano'sa quëran huarë' sha'huitarahuë. Moisës, pënëntona'piro'sa', inapita ninopiso chachin a'chinarahue: ²³ Yosë nohuanton, Cristo chiminapon. Chiminaponahuë', Yosëri ananpitaantarín. Ina'ton nanopiantarin. Ina quëran a'chintapon tahuëri

pochin cancantacaiso marë'. Co cotioro'saráchin nicha'ësarinhüë'. Nisha piyapi'santa' nicha'ësarín, topi ninshitatona'," ténin.

Hua'aonta' imacaso' Paono nohuantérindo'

²⁴ Ina pochin nontahuachina, Pistori chiníquën itérin:

—¡Paono, quëmaso' hua'yantérän! Na'con quirica nontaton hua'yantérän, itérin.

²⁵ —Co'chi sinioro hua'an hua'yantérahuë' paya. No'téquën nonahuë. Sano yonquiato, nontaranquëma'. ²⁶ Ya'ipi sha'huitéranguëmaso' hua'an Acripa nani nitotérin. Co po'oana quëran napopihuë'. Ya'ipi piyapi nitotopi. Inanta' nani natantérin. Napoaton co të'huatohuë', ina nontarahuë. ²⁷ ¿Quëmanta' sinioro hua'an, pënëntona'piro'sa' ninshítapiroso' natérän pa'? Natérän ténahuë caso', itérin Paonori.

²⁸ —Pi'pian nontopirancohuë' a'naromaréächin quëma pochin canta' Cristo ima'i, ¿topiranhuë' ti? itérin Acripari.

²⁹ —Pa'pi nohuantérahuë ca pochachin nicamaso'. Ya'ipinquëma' natanamacosopita ca pochachin nicacamaso' nohuantopirahuë'. Catinaquëachin tonpoinëmaso' co nohuantérahuë'. A'naroáchin imarama naporini, noya niitonhuë'. Hua'qui quëran imapatamanta', noya chachin niitonhuë', itérin Paonori.

³⁰ Ina natanahuaton, hua'an huanirin. Pisto, Pirinisa, ya'ipi inaquë huënsëpisopitarë chachin huanipi. ³¹ Pipirahuatona', inahuara capini ninontopi.

—Iso quëmapi co manta' onporinhuë'. Co tëpacaso' ya'huérinhüë'. Co tashinan pëiquë téranta' po'mocaso' ya'huérinhüë', nitopi.

³² Ina quëran Acripari Pisto nontaton itapon:

Co Noma copirno chachin nontapon yapa'ninhüë' naporini, ocoicaso' ya'huë'itonhuë', itérin.

27

Nomaquë Paono a'papiso'

¹ Ina quëran Pisto yaa'parincoi. A'napita apiro'santa' yaa'parin. Noma copirno Itaria parti ya'huérin ni'ton, Noma sontaro'sa' capitan Orio itopiso' nontérin inatohua' quëpacaiso marë'. "Paono, apiro'sa', inapita quëpaco'," itohuachina, "Noyahua'. Quëpa'i nipachin," ténin. ² Inaquë panca nancha ya'huérin, Atramitio quëran huë'ninso'. Asia parti yapa'sarin. A'naya a'naya ninanoquë yachinpirinso'. Inaquë ya'conahuatoi, pipirai. Aristarconta' ca'tanincoi. Inaso' Tisaronicaquë ya'huérin, Masitonía parti nininso'. ³ Tahuéririnquë Sitonquë nonshirai. Inaquë Paono nosoroaton, capitani itérin: "Nipayaransopita ya'huérinquë yapa'patan, noya paquë'," itérin. Pa'patoira, pahuantérincoisopita quëtérinacoi. ⁴ Ina quëran pipirahuatoi, Chipriquë canconai. Ihuan niquëran pitarincoi ni'ton, coninan pa'térai. ⁵ Ina quëran Sirisia parti, Panpiria parti, inapita pirayan na'huérain. Inapoatoi, Nisia parti canconai. Miraquë nonshiconai.

⁶ Inaquë capitan a'na nancha quënanin, Aricantria quëran huë'ninso'. Itaria parti yapa'sarin ni'ton, inaquë ichiya'conincoi. Panca nancha inaso'. ⁷ Pipirahuatoi, sacai' pa'nai. Oshaquëran paatoi, na'a tahuëri quëran Quinitoquë canconai. Ihuan nacapiatoi, panca so'ton Crita itopiso' tahuitonai. Sarmona ya'cariya pa'nai. ⁸ Inaquë yonsai' pa'térai. Sacai' pa'sahuatoi, Noya Nonshinano'sa' itopiquë canconai. Ya'cariya a'na ninano' ya'huérin. Nasia itopiso'.

⁹ Hua'quirai ni'toi, o'napi tahuëri'sa' naniriari. Naporo quëran huarë' huëhuëpiro' marë pa'tacaso'. Napoaton Paonori itapon:

¹⁰ —Ama siniororo'sa' pa'ahuasohuë', ma'sha onpohuatéhua', ténahuë. Pa'patéhua', nancha tapiaréhua'. Ma'sharo'santa' a'paitarihua'. Piyapinfoanta' chimiitochináchin, itérin.

¹¹ Capitanso niperinhuë' co natétérinhuë'. Nancha hua'anén, nancha quëpana'pi, inapita manorapi: "Pa'ahua'," itohuachinara, "Noyahua', pa'ahua' nipachin," ténin

capitan. ¹² "Iso nonshinanquë co noyahue' o'napi na'huëanatacaso'. Pinisiquë téranta' canconamarëhua'. Inaquë o'napi na'huëanatahua', topi. Napoaton manorapi. Pinisiso' Crita parti ya'huërin. Nonshinanën quëran pi'i pipirinso parti notëërin.

Panca ihuani maninso'

¹³ Ihuan ahuënan quëran huisohuantahuachina, "Iporaso' noya pacacaso'," topachinara, pipirai. Crita yonsai' pa'tërai. Noya pa'sapiraihue', ¹⁴ shiarahuaton, panca ihuan manincoi. Pi'i pipirinso parti quëran huëcaponahuë', norti parti amasha yon-sanin. ¹⁵ Chiníquën mapachincoira, co nanitëraihuë' no'tëca'huaiso'. Ihuansa' topinan quëpaconincoi. ¹⁶ Marë huancoanai' so'ton ya'huërin, Caota itopiso'. Co pan-canayahuë'. Inataquëchin co ihuan chiníquën pa'ninhue' ni'ton, ina yonsan yoranai. Ina pa'tasocoi, sacai' niponahuë', poti quëparaiso' a'sonai ama ihuani oshitëcaso marëhuë'. ¹⁷ Ohuararahuatona', nanchaquë po'mopi. Ina quëran caporinquë nancha so'quëtopi ama ya'quirapicaso marëhuë'. Ina ya'cariya panca sa'mairo' ya'huërin. Inotérachin ninin, Sirti itopiso'. Nohuitatona', ama inaquë pacacaso marëhuë' panca në'mëtë' ótënpiso', a'pamapi. Inapotohuachinara, ihuansa' topinan quëpaconincoi. ¹⁸ Tahuëririnquë co'sacairi chiníquën ayanpon yanpontárin. Chiníquën ihuai' ni'ton, pë'pëtoro'sa' quëpapiso' inquiitopi. ¹⁹ Ina tashiraya nancha ma'shanënpitanta' inquiitopi. ²⁰ Ina quëran na'a tahuëri co pi'i quënanaihue'. Tayloranta' co ya'norinhuë'. Intohuaso' quëparincoi nimara. Co nitotëraihuë'. Chiníquën ihuantarin ni'ton: "Tëhuëñchachin chimiitarihua'; co cha'ësarihuahuë'", topiraihue'.

²¹ Nani hua'qui' co coshatëraihuë'. Chiníquën ihuan manincoi ni'ton, co nanitëraihuë'. Co huachi chiniraihue'. Paonoso' huancánachin huanirahuaton, itapon:

—Natanco iyaro'sa' no'tëquën sha'huichinquëma'. Ni'co'. Critaquë quëparitacasoo marë' sha'huitopiranquëmahuë', co natëramacohue' ni'ton, huë'nëhua'. Co huë'nëhuahuë' naporini, co ma'sha onpo'itërihuahuë'. Co ma'sha aya'itonhuë'. ²² Iporaso nimirin-huë' chiníquën cancantoco'. Co inquënpoa téranta' chimiitarihuaahuë'. Nanchasáchin ayatarihua'. ²³ Caso' Yosë natërahuë. Inasáchin imarahuë. Ina nohuanton, achin tashi' anquëninën ya'notimarincó. ²⁴ Ya'notimarahuatonco, itérinco: "Ama Paono të'huaquësuhue'. Co chimiitaranhue'. Yosë nohuanton, a'na tahuëri Noma copirno ya'huërin'pa' cansaran copirno chachin nontamaso marë'. Yosë nontéran ni'ton, ya'ipi nanchaquë nisaramasopita nanoparama'. Co a'nayanquëma téranta' chiminapomahuë'", itérinco anquëni. ²⁵ Napoaton iyaro'sa' chiníquën cancantoco'. Tëhuëñchachin Yosë natërahuë. Co inaso' nonpintërinfoahuë'. Sha'huitérincoso chachin co a'nayanpoa téranta' chimiitarihuaahuë'. ²⁶ Nimirinhuë', a'na so'tonquë ihuai' të'yatarinpoa', itérincoi Paono.

²⁷ Nani cato' simana naniriahuauso', Atriatico marëquë yanponarai. Ipora huanta' ihuai' quëparárincoi. Yono tashi pochin nisahuaso': "No'pa' ya'cariarëhua'", topi nancha quëpana'piro'sa'. ²⁸ Napoaton caporin quëran tantiarin. "Cara shonca saota mitro anpotërinso'", ténin. Amashamiachin pa'sahuatoi, inapochachin tantiantarin. "Cato shonca canchisë mitroíchin anpotërinso'", ténin. ²⁹ "Na'pique ya'parapihuatëhua'", ta'tona', huanconën quëran catapini hua'na moto' të'yaitopi ama pacacaso marëhuë'. "¿Onporohuarëcha tahuërirë'poya?" ta'tona', moshatopi. ³⁰ Nancha quëpana'piro'saso nimirinhuë' yata'anapitonaco: "Hui'nimotën quëran a'na hua'na moto' të'yatähua'", niitaton, ta'acaiso marë' poti i'quë yatë'yatantapi. ³¹ Napohuachinara, Paonori nicaton, capitán, sontaro'sa', inapita itapon:

—Isopita ta'ahuachina', co canpitanta' cha'ëpomahuë', itérin.

³² Napotohuachina, sontaro'saso' manorahuatona', caporin nishitëtopi. Inapotohuachinara, poti i'quë anotérin huachi.

³³ Tahuëri ya'caritohuachina, Paono itantaríncoi:

—Iporaso', iyaro'sa', nani cato' simana pa'yanatoma', co coshatëramahuë'. ³⁴ Napoaton coshatoco huachi chiniamaquëma'. Co chimiitarihuahuë'. Co manta' onpoarihuahuë', itërincoi.

³⁵ Itahuatoncoi, pan manin. Ya'ipiya ni'térantapaiquë, Yosë nontërin. "Yosparinquën Tata Yosë," itahuaton, së'panin. Ina quëran coshatarin. ³⁶ Napohuachina, ya'ipicoi chiníquën cancantatoi, coshatërai. ³⁷ Cato pasa canchisë shonca saotaya'picoi nanchaquë ya'huërai. ³⁸ Nani ya'ipiya natëhuachinara, trico quëparaiso' inquiitopi. Inapoto-huachinara, nancha niotëintarin.

Nancha quëran cha'ëpiso'

³⁹ Tahuërihuachina, no'pa' quënanpirinahuë', co nohuitopihuë'. Coninanquë inotë' quënanpi. "Nanitohuatëhua", paso' inotëquë chinpia'ahua', nitopi. ⁴⁰ Napoaton hua'na moto' nishitetatona', i'quë a'paitopi huachi. Naporo chachin no'soratëni'shiritopi. Ina quëran hui'nin quëran panca në'mëtë' inapaquë pë'tëmpi. Ihuan quëpahuachincoira, inotëquë pa'sarai. ⁴¹ Pa'sapiroihuë', sa'mairo' ni'ton, hui'nin quëran ya'tararin. Co huachi yapa'ninhue'. Huancónen quëran co'sacairi chiníquën opotaton, nipaatërin huachi.

⁴² "Huëco' apiro'sa' tēpa'ahua', yonatona' ta'ahuachina'," topi sontaro'sa'. ⁴³ Capitanso nimirinhue' nohuantërin Paono cha'ëcaso'. Napoaton "Ama tēpacosohuë". Ya'ipinpoa' pa'ahua'. Nitoyonpatama', canpita'ton niitatoma', yonsaiquë paco'. ⁴⁴ Ina quëran a'naquëmanta' nontë' së'quërahuatoma', yonsaiquë paco'. Capa nontë' nipachin, nancha ma'shanënpitaquë têranta' së'quërahuatoma', paco huachi," itërin capitani. Naporahuatoi, cha'ërai. Ya'ipicoi yonsaiquë canconai.

28

Paono Martaqué naporinso'

¹ Ya'ipicoi cha'ërahuatoi, no'paquë nonshiconai. Ya'huëhuano'sa natanatoi: "¿Ma'ninta' iso parti?" itohuatëira, "Marta," itopi, itërinacoi. ² Ya'huëhuano'sa' noya nosororinacoi. O'natatoi, sëhuëni ni'ton, a'pëtopi. "Huëco' napëntiico'," itërinacoi. ³ Paono ihuë masahuaton pënquë acoapirinhue', ya'huan pipirahuaton quëtëimirarin. ⁴ Naquëimirarinso', ya'huëhuano'sari ni'pi. "Iso quëmapi tēpatona'pi ipora. Napoaton yosëro'sa' nohuanton, ma'sha onpoarin i'huëretacaso marë'. Marë quëran cha'ëponahuë', chimianin," nitopi.

⁵ Paonoso nimirinhue' imirin pa'tanahuaton, ya'huan pënquë të'yatërin. Co manta' onporinhue'.

⁶ "Apira pomatarin. A'naroáchin anotahuaton, chiminapon," tēcatona' hua'qui' ni'sapirinahuë', co manta' onporinhue'. Napoaton "Co ipora tēpatona'pihuë". Yosë pochin nimonahuë', piyapi taramara," nitopi.

⁷ Ina ya'cariya a'na hua'an ya'huërin, Popirio itopiso'. Noya quëmapi ni'ton, pëinënquë ahuë'ëtërincoi. Noya nontërincoi. Cara tahuëri cosharo' quëtërincoi. ⁸ Pa'pinso nimirinhue' chiníquën caniorin. Apira apira saporin. Nani hua'qui' chi'chiráin. Paonori nicapon pa'nin. Së'huamotorahuaton Yosë nontohuachina, a'naroáchin noyatërin. ⁹ Napohuachina, na'a cania'piro'sa' huë'pi. Inapitanta' anoyatërin. ¹⁰ Ina marë' noya ni'ninacoi. Naporahuaton, ma'sha nicanarinacoi. Hua'qui inaquë ya'huërai. Yapa'patëira, pahuantërincoiso' quëtërinacoi.

Nomaqué canconinso'

¹¹ Nani cara yoqui nisahuaso', yapa'nai huachi. Inaquë nisha nancha ya'huërin. Aricantria quëran huë'pirinhue', inatohua' o'napi na'huëanatërin. Ina hui'nin motënquë catopia'hua mamanshiro'sa' ya'huërin. Castoro, Porosi inapita itopiso'. ¹² Inaquë ya'conahuatoi, paantarai. Siracosaque' nonshirahuatoi, cara tahuëri inaquë i'huatërai. ¹³ Ina quëran yonsai' pa'tahuatoi, Niquioquë canconai. Tahuëririnquë pinëhuëi parti

quëran ihuan huë'sahuaton, quëparincoi. Cato' tahuëri quëran Potioriquë canconpatëira, nonshirai. ¹⁴ Inaquë imapisopita quënánconai. "Huëco' ni'quicoi," itohuachina-coira, inaquë a'na simana yacaparai. Naporahuatoi, Nomaquë ya'caritérai huachi. ¹⁵ Ya'caritohuatëira, Quisoso imapisopita inaquë ya'huëpiso' natantahuatona', huë'pi. "Apio niyontonpiso," itopiquë a'naquën nacapirai. Naporahuaton, Tres Tapinasëquë canconpatëira, a'napitanta' quënancoantarai. Imasapi anta' ni'ton, nacapiaponacoi huë'pi. Inapita Paono quënánahuaton, Yosë nontérin: "Yosparinquën," itérin. Naporahuaton, chiniquën cancantérin. ¹⁶ Ina quëran Nomaquë chachin canconai. Capitanso' pa'sahuaton, prisoro'sa' quëparin tashinan pëiquë po'mocaiso marë'. Paonoso nimirin-huë' co inaquë po'mopihuë'. "Nohuantohuatan, quëmaora ya'huëquë'," itopi. Napoaton a'na pëiquë ya'huérin. Nimirinhuë', a'na sotarori a'pairarin ama ta'acaso marëhuë'.

Nomaquë Paono pënentérinso'

¹⁷ Cara tahuëri quëran cotio hua'ano'sa' amatérin. Inaquë huë'pachinara, Paonori itérin: —Nani iyaro'sa' isëquë huë'nahuë. Pi'pian nonchinquëma', ta'to, amatéranganquëma' huë'nama'. Topinan quëran iyaro'sa' sha'huirapirinaco. Canta' cotio quëmapico ni'to, co a'napita cotioro'sa' no'huirahuë'. Shimashonënpoopita napopiso' yonquiato, co pinorahuë'. Nimirinhuë', Quirosarinquë pa'patora, maninaco. Masahuatonaco, Noma hua'ano'saquë yo'coninaco ana'intinacoso marë'. ¹⁸ Hua'ano'sa' natanahuatonaco, "Co manta' onporinhuë' ni'ton, co tèpacaso' ya'huérinhuë'. Oco'i'i," topi. ¹⁹ Cotioro'saso nimirinhuë' co nohuantopihuë'. Napoaton "Noma copirno chachin yanontérahuë," itérahuë. Co yaocoirinacohuë' ni'ton, isëquë huarë' huëca'huaso' ya'huérin. Co cotioro'sa' sha'huirapica'huaso marë' huë'nahuë. Co no'huirahuë'. ²⁰ Napoaton amatéranganquëma'. Yanohuitéranganquëma'. Huëco' ninontahua'. Ya'ipi israiro'sanpoa' ninaréhuaso marë' catinaquë tonpoimiratérinaco, itérin.

²¹ —Co'chi iyasha manta' nitotérainhuë' quiyaso paya. Cotia parti ya'huëpisopita co quirica a'patiirinacohuë'. Huë'pachinara, co a'naya téranta' nonapirinënquënhuë'. ²² Nimirinhuë', yanatanainquën. "Quisoso imapisopita co noyahue'," topi natantérai. Ya'ipi parti napopi. Napoaton sha'huitocoi. ¿Ma'ta' quëma a'chinan? ²³ A'na tahuëri huënantahuatoi, sha'huitocoi nitochii, itopi.

—Noya iyaro'sapa'. Naporo' tahuëri huënantaco' ya'ipinquëma' sha'huichinquëma', itohuachina, pa'pi. Ina quëran tahuëri nanihuachina, na'aya'pi huë'pi. Paono ya'huërinquë niyontonpi natanacaiso marë'. Tashiramiachin huë'pi. Huë'pachinara, Paonori a'chintárin.

—Yosë yahua'anentérinpoa'. Na'con nohuantérin huëntonënquë chachin aya'coinpoaso'. Ina marë' hui'nin a'paimarin. Inaso' Quisoso itopi. Quiricanën quëran ina na'con ninopi. Moisésë pënentérinso' ninshitaton, ninorin. Pënentona'piro'santa' ninopi, itérin. Quiricanën quëran na'con a'chintérin. A'chintatón, chiniquën pënénin Quisoso natëcaiso marë'. A'chintochináchin i'huatérin. ²⁴ Natanahuatona', a'naquën natëpi. A'naquënso nimirinhuë' co natëpihuë'. ²⁵ Nisha nisha yonquiatona', yapipipi. Yapipihuachinara, Paonori itaantarin:

—Ma no'tequën iyaro'sa' Ispirito Santori nontérin shimashonënpoa' pënénacaso marë'. Ina nohuanton, Isaiasë ninshitaton, naporin:

²⁶ "Paaton, piyapi'sa' sha'huitonquë":

'Natanapomarahuë', co natëtaramahuë'.

Nicapomarahuënta', co tèhuëñchachin quënanaramahuë', itequë'.

²⁷ Isopita piyapi'sa' co natantochináchinhuë' cancantopi.

Në'huëya pochin cancantatona', co yanatantopihuë'.

Tanshirinso pochin cancantatona', co yaquënanpihuë'.

Noya ni'pi naporini, quënaintonahuë'.

Noya natanpi naporini, cancanëna quëran natëchitonahuë'.

Co noyahuë' yonquipisopita nariantatona' imarinaco naporini,
anoyacancanchitohuë', itérin Yoséri," ténin.

²⁸ Napoaton sha'huichinquëma' nitotoco'. Yoséri nisha piyapi'sa' nani sha'huitérin cancanëna' anoyatacaso marë'. Inapitaso' natérapi, ténin Paono. [²⁹ Ina itohuachina, nisha nisha ninontahuatona', pipipi.]

³⁰ Ina quëran cato' pi'ipi Paono inaquë ya'huërin. A'nantérinso' pëiquë ya'huëhuachina, na'a piyapi'sari nicapona' huë'pi. Huë'pachinara, noya nontérin.

³¹ "Yosë hua'anëntérinquë ya'conco' canpitanta'," itérin. Sinioro Quisocristo naporiso' a'chintárin. Co të'huatonhuë', na'con a'chinin. A'chinpirinhuë', co insoari téranta' atonirinhuë' ni'ton, Quisoso nanamën nahuinin. Nani ninshítérinquë huachi.

Paonori Nomaquë ya'huëpisopita ninshitérinso'

Paonori imapisopita yonquiaton, ninshitérinso'

¹ Ca Paonoco ninshitaranquëma', ni'co'. ¿Noyanquëma' canpitanta'? Noya canta' ya'huarahuë. Quisocristoíchin natérahue. Ina acorinco paato nanamën a'china'huaso marë'. Yosë nohuanton, noya nanan a'chinárahue.

² Co'huara Quisocristo o'mayatérasohue', ina nanan chachin Yosë sha'huitérinpoa'. Quiricanën quëran anitotérinpoa', iráca ninshitopiso'. Ina nohuanton, na'a pénentona'piro'sa' ninopi. ³ "Hui'nahuë a'paimarahuë," ténin Yosë. Napoaton Quisocristo isoro'paquë o'marahuaton, piyapi chachin nasitimarin. Tapi shiin inaso'. ⁴ Yosë pochachin ni'ton, noyasáchin ninin. Chiminpirinhue', Yoséri ananpitaantarin. "Inaso' téhuenchachin Yosë hui'nin. Chini chiniquen nanantarin," ténéhua'. Ananpitaantarin ni'ton, nitotéréhua'. Quisocristo chachin hua'anéntérinpoa' ni'ton, "Sinioro" itéréhua'.

⁵ Ina nosoroatonco, acorinco nisha nisha piyapi'sa' a'chinta'huaso marë'. Inapitanta' nanamën natécaiso marë' pénénarahuë. Natéhuachina', "Quisocristoso' noya noya," tosapi. ⁶ Canpitanta' nisha piyapinquëma' nipomarahuë', Quisocristo imarama'. Yosë nohuanton, imarama'. ⁷ Napoaton Nomaquë ya'huëramasopita ninshitaranquëma'. Yosë pa'pi nosororinquëma'. Nani acorinquëma' piyapinénpita nicacamaso'. Ni'ton, inasáchin yonquicaso' ya'huérin. Tata Yosë inaora nohuanton, catahuainquëma'. Asanocancainquëma'. Quisocristonta' inapochachin catahuainquëma'. Inaso' hua'anéntérinpoa'.

Inapita marë' Yosë nontérinso'

⁸ Canpitaso' noya Yosë natérama', natantérahuë. Ya'ipi piyapi napopi. Ina natantato, "Yosparinquen Siniro," itérahuë Yosë. Ina'ton napotérahuë. Quisocristo catahuarinco ina pochin Yosë nonta'huaso marë'. ⁹ Yosë ni'sárinco, no'tequen nontaranquëma'. Ya'ipi cancanéhuë quëran huarë' Yosë imarahuë. Hui'nin nanamën a'chinárahue. Nani tahuériya canpita yonquiatenquëma', ¹⁰ Yosë nontarahuë. "Noya catahuaquë'," itérahuë. Iráca quëran huarë' nicapénquëma' yapa'pirahuë', co nanitérahuë'. Ipora huanta' paca'huaso' yonquiarahuë. "Quëma nohuantohutan, Siniro, catahuaco onpopionta' pa'i," ténahuë, Yosë nontato. ¹¹ Yani'nanquëma'. Yacatahuaranquëma' chiniquen cancantamaso marë'. Ina quëran noya noya imasarama'. ¹² Canpitanta' noya imapatama', achinicancanaramaco canta'. Noya ninontatéhua', noya noya cancantarihua'.

¹³ Téhuenchachin iyaro'sa', iráca quëran huarë' nicapénquëma' yapa'pirahuë'. Ipora huanta' co nanitérahuë' paca'huaso'. Nisha nisha parti a'chinpatéra, piyapi'sa' natétona', Quisocristo imasapi. Canpitanta' yaa'chintéranquëma' noya noya imacamaso marë'. ¹⁴ Ya'ipi piyapi'sa' pénena'huaso' ya'huérin. Quisocristo sha'huitérinco. "Hua'ano'sa', topinan piyapi'sa', ya'ipi nananquë nonpisopita a'chintequë'. Quirica nitotoro'sa', co nitotoro'sahue', ya'ipiya pénénquë'," itérinco. ¹⁵ Napoaton canpitanta' yaa'chintéranquëma'. Nomaquë ya'huëramasopita' Quisocristo nanamën a'chinchingue' ténahuë.

Quisocristo nanamën

¹⁶ Co caso' tapanahuë' Quisocristo nanamën a'china'huaso marë'. Piyapi'sa' natéhuachina', Yoséri anoyacancantarín. Inaíchin nanitaparin nicha'ëinpoaso'. Cottioro'sari'ton natéhuachina', anoyacancantarín. Iporaso' nisha nisha piyapi'santa' anoyacancantarín. Napoaton pa'yatérahuë nanamën sha'huica'huaso'. ¹⁷ "Yoséíchin anoyacancantérinpoa'," topatéhua', Yosë noya ni'sarinpoa'. Oshanénpoa' inquitatonpoa', co huachi inapita yonquiarinhue'. Quiricanën quëran ina anitotérinpoa'. "Cancanénpoa quëran huarë' Yosë natéhuatéhua', noya ni'sarinpoa' ni'ton, noya nanopmiatarihua'," ténin Yosë quiricanenquë. Co campoara nanitéréhuahuë' noya cancantacaso'.

Iráca quëran huarë' oshahuanpiso'

¹⁸ Yosë inápaquë ya'huaponahuë', cancanënpoa quëran anitotérinpoa'. "Piyapi'sa' co noyahuë' nipi. Co ca pochin cancantopihuë'. Ina marë' no'huito, ana'intarahuë huachi," ténin Yosë. No'tën nanan nitotaponaraihuë', co nohuantopihuë' natëcaiso'. ¹⁹ Cancanëna quëran Yosë nohuitochinachin acopirinhue', co yanohuitopihuë'. ²⁰ Isoro'pa' ninin quëran huarë' piyapi'sa' nitotopi. Yosëso' co quënanpirëhuahuë', nani ma'sha ninin. Ina nícatona', "Téhuëñchachin Yosë ya'huérin. Ya'ipiya nanitaparin ni'ton, ina chinotahua'," ta'caso nípirinhue', co nohuantopihuë'. Napoaton na'inpi. ²¹ Yosë ya'huérinso' nitotaponaraihuë', co ina chinotopihuë'. Ina nohuanton, nani ma'sha ya'huëtopirinahuë', co ina marë' "Yosparinquën Siniro," co itopihuë'. Nisha nisha yonquiatona', chihuërinso pochin nipi. Tashi pochin cancantopi. ²² "Ya'ipiya nitotërai," topirinahuë', co noya yonquipihuë'. ²³ Yosëso' noyasáchin ninin. Co onporonta' chiminaponhuë'. Inaso nípirinhue', co ina yonquipihuë'. Ina nariantatona', mamanshi nipi moshacaiso marë'. Mamanshi piyapi nonanpiso' moshapi. Co piyapi ya'huëmiatopirinhue', ina yamoshapi. Nisha nisha ma'sharo'santa' moshapi. A'naquëñ anpiantëhuano'sa', a'naquëñ no'paquë niohuaratérinsopita, inapita moshapi.

²⁴ Napoaton Yosëri tananpitérin co noyahuë' yonquipisopita nicacaiso marë'. A'porin. A'pohuachina, pa'pi co noyahuë' nipi. Taparosáchin yonquiatona', nisë'huapi. Co ina pochin nisë'huacasohuë' nípirinhue'. ²⁵ Yosëri no'tëquëñ anitotopirinhue', ina a'porahuatona', nonpin nanan natëpi. Ma'sha isoro'paquë ya'huërinso' moshatona', chinotopi. Yosëriáchin ya'ipiya ninin nípirinhue', co inaso' chinotopihuë'. Téhuëñchachin inasáchin chinotacaso' ya'huérin, ténahuë. Amen.

²⁶ Napoaton Yosëri tananpitérin pa'pi co noyahuë' cancantacaiso marë'. Sanapi'sa' co huachi so'ina' nohuantopihuë'. Sanapi capini nisë'huacaiso' nohuantopi. Co ina pochin nicacasohuë' nípirinhue'. ²⁷ Quëmapi'santa' co huachi sa'ina' nohuantopihuë'. Quëmapi capini nisë'huapi. Ina marë' na'inpi ni'ton, Yosëri ana'intarin. Co no'tëquëñ yonquiatonaraihuë', nitapicancanpi. Nonénanta' tapipi.

²⁸ Co Yosë yanatëpihuë' ni'ton, inari a'porin co noyahuë' nicacaiso marë'. Nitapicancamiatopi. ²⁹ Pa'pi co noyahuë' nipi. Nimonshitacaisoráchin yonquipi. Na'con oshahuanpi. A'na piyapi ma'shanënpita nohuantapapi. Piyapi chinotopi. Niapiratopi. A'naquëñ tēpatopi. Nino'huipi. Nonpinápi. No'huitápi. A'napita nonpinapipi. ³⁰ Nipinopi. Yosë inimicotopi. Ma'tona ma'tona nonpi. "Caso' noya noyaco," ta'tona', a'napita nocanpi. Yonquirápi co noyahuë' nicacaiso marë'. Pa'pina', a'shina', co inapita téranta' natëpihuë'. ³¹ Co huachi noya yonquipihuë'. Nonpinápi. Co quëmopinënpita téranta' nosoropihuë'. No'huitochinachin cancantopi. ³² "Co noyahuë' nipisopita chiminpachinara, ana'intacaso' ya'huérin," ténin Yosë. Ina nitotaponaraihuë', inachachin niantapi. Naporahuatona', a'napitanta' co noyahuë' nipachinara, pa'yatopi.

2

Yosëri no'tëquëñ ana'intérinso'

¹ A'naquëma' iyaro'sa' piyapi'sa' yonquirapiratoma': "Paso' quëmapi co noyahuë' ninin," ténama'. Napoapomarahuë', ina pochachin canpitanta' co noyahuë' ni-nama'. Napoatoma', nina'intarama'. ² "Co noyahuë' nipatama', ana'intaranquëma," ténin Yosë. No'tëquëñ inaso' ana'intarin, nitotéréhua'. ³ "Pasopita oshahuanpi," ténama'. Nípirinhue', canpitanta' co noyahuë' nipatama', Yosë ana'intarinquëma co cha'ësaramahuë'. ⁴ Yosë nosororinpoaso' co no'tëquëñ yonquiramahuë'. "Co a'naroáchin no'huirinfoahuë'," ta'toma', co noyahuë' ninama'. Téhuëñchachin co a'naroáchin ana'intérinquëmahuë'. "Oshaquëran co noyahuë' yonquipisopita nariantapona' ni-mara," ta'ton, ninarárin. ⁵ Canpitaso nípirinhue', co natantochináchinhuë' cancantërama'. Co oshanëma' yaa'poramahuë'. Napoaton ayaro' tahuëri chini chiniquëñ

ana'intarinquëma'. Naporo' ya'ipi piyapi'sa' no'tequën ana'intarin. ⁶ Ya'ipi ninëhuasopita Yosë nitotérin. Ayaro' tahuëri ina yonquiaton, no'tequën sha'huitarinpoa'. Noya nipaytähua', noya acoarinpoa'. Co'so' noya nipaytähuhuë', ana'intarinpoa'. ⁷ Noyasáchin nipaytähua', noya ni'sarinpoa'. Yosë yonquiatéhua', noya acoinpoaso marë' na'con nohuantohuatéhua', ananpitaantarinpoa'. Inarë'quënpoa' ya'huëmiatarihua'. ⁸ Nipirinhue', canpoara nohuantérëhuasoráchin nipaytähua', no'huiarinpoa'. No'tequën anitotopirinpoahuë' co natéhuatéhuahuë', ana'intarinpoa'. Co noyahue' nipaytähua', chiniquen ana'intarinpoa'. ⁹ Ya'ipi co noyahue' nipesopita no'tequën ana'intarin. Naporo' chiniquen parisitapi. Cotioro'sa' no'tequën chachin ana'intarin. Nisha piyapi'santa' co noyahue' nipachina, inapochachin ana'intarin. ¹⁰ Noya nipesopitaso nipirinhue', noya ni'sarin. Noya noya acorarin. Asanocancanarin. Cotioro'sa' no'tequën chachin napotarin. Nisha piyapi'santa' inapochachin nitarin. Ya'ipinpoa' noya nipaytähua', nicha'ësarinpoa'.

¹¹ Yosëso' ya'ipinpoa' napopianachin ni'ninpoa'. ¹² Iráca Moisëséri cotioro'sa' pénénin nani ma'sha natécaiso'. Cotioro'saráchin pénénin. Co ina natéhuachinahuë', oshahuanpi. Ina marë' Yosëri ana'intarin. A'napitaso nipirinhue' co pénéntérinso' nitotopihuë'. Co nitotatonahuë', co ina natécaiso' ya'huëpirinhue'. Co noyahue' nipachina', ana'intarin chachin inahuanta'. ¹³ Cotioro'saso' Moisësé pénéntérinso' natanaponaraihuë', co natétopihuë'. Napoaton co Yosëri noya ni'ninhuë'. No'tequën natépi naporini, Yosëri noya ni'itonhuë'. ¹⁴ Nisha piyapi'saso' co Moisësé pénéntérinso' nitotopihuë'. Co nitotaponaraihuë', a'naquën noya nipi. Inahuara cancanëna quëran nitotopi ni'ton, napopi. ¹⁵ Cancanëna quëran Yosëri anitotérin noya nicacaiso'. Co noyahue' nipachinara, inahuara nitotopi. "Co inapocaso nipirinhue', inaporéhua'", topi yonquiatona'. Inapochachin noya nipachinara, inanta' cancanëna quëran nitotopi. ¹⁶ Ayaro' tahuëri ya'ipi co noyahue' yonquiréhuasopita aipitarinpoa'. Po'oana quëran ma'sona téranta' onporéhuasopita a'ninquéchin anitotarinpoa'. Naporo' tahuëri Tata Yosë nohuanton, Quisocristo no'tequën sha'huitarinpoa'. Co noyahue' nipaytähua', ana'intarinpoa'. Ina nanan ya'ipi parti sha'huirarahuë'.

Co cotioro'sa' téranta Yosë pénéntérinso' natépisohue'

¹⁷ A'naquëma' cotioro'sanquëma' ni'ton, a'napita nocanama': "Moisësé pénéntérinso' natéhuatoi, cha'ësarai," tënama'. "Yosë na'con na'con nosororincoi," tomantatoma', a'napita nocanama'. ¹⁸ Yosë nohuantérinso' nani nitotërama'. Yosë quiricanën a'chintérinënquëma' ni'ton, nitotërama' noya nicacamaso'. ¹⁹ Nisha piyapi'santa' yaa'chintërama'. Inapitaso' co Yosë nohuitatonaraihuë', somaraya pochin niconpi. Tashi pochin cancantopi. ²⁰ Co Yosë nanamën nitotopihuë' ni'ton, yaa'chintërama'. "Yosë no'tequën pénénincoi ni'ton, noya noya nitotërai. A'napitaso' co quiya pochin nitochátérapihuë'," tënama'. ²¹ A'napita a'chintopiramahuë', ¿onpoatomata' canpita chachinso' co yonquiramahuë? "Ama ihuatocosohuë," tapomarahuë', ¿onpoatomata' ihuatërama'? ²² "Ama a'na quëmapi sa'in monshitocosohuë," tapomarahuë', ¿onpoatomata' canpitanta' monshihuanama'? Piyapi'sa' mamansi moshahuachinara, no'huirama'. "Yoséichin chinotacaso nipirinhue'," tënama'. Napoapomarahuë', ¿onpoatomata' co cancanëma quëran huarë' chinotëramahuë? Co mamansi moshapiramahuë', moshatopiso pëiquë ihuatërama'. ²³ "Quiyásáchin Moisësé pénéntérinso' nitotërai," tënama'. Napoapomarahuë', co natëramahuë'. Ina marë' a'napitari Yosë pinopi. ²⁴ Co noyahue' cancantërama' ni'ton, nisha piyapi'santa' co Yosë noya ni'sapihuë'. Quiricanënquë chachin naporin:

²⁵ "Quiyaso' Yosë piyapinënpitacoí," ta'toma', marca niacotërama'. Moisësé pénéntérinso' noya natéhuatama', no'tequën niacotërama'. Nipirinhue', co natéhuatamahuë', topinan quëran marca niacotërama'. ²⁶ Nisha piyapi'santa' nipoñaraihuë', Yosë natéhuachina', piyapinënpita pochin ni'sarin. ²⁷ Co marca niacotaponaraihuë', Yosë natéhuachina', sha'huirapiaponënquëma'. Canpitaso'

pënëntérinso' nitotapomarahuë', co natëhuatamahuë', Yosë ana'intarinquëma'.

²⁸ Cotioro'sanquëma' nipayamahuë', co ina marë' piyapinënpita pochin ni'ninquëmahuë'.

Inapochachin Yosë marcanënta' co topinan nonënpoaquë niacotacaso' ya'huérinhue'.

²⁹ Ya'ipi cancanënpoa quëran Yosë imapatéhüa', têhuëñchachin piyapinënpita pochin

ni'sarinpoa'. Marcanën cancanënpoaquë acotërinpoa'. Co nonënpoaquë acotërinpoahuë'.

Ispirito Santo anoyacancantérinpoa'. Ina quëran noya ni'ninpoa'. Co piyapi'sa' pa'yatopirinënpoahuë', Yosëso' noya ni'sarinpoa'.

3

¹ Cotioro'sa' ni'tona', marca niacotopi. ¿Ma'ta' ina marë' canapi? ² Na'con canapi ténahuë. Yosëri na'con catahuarin. Inahua'ton iráca nontérin. Nanamën chachin aninshítérin ya'huémiajcaso marë'. ³ A'naquënso' co huachi ina natépihuë'. Ina nipoñahuë', co nanitéréhuë': "Yosëso' co no'téquën sha'huitérinhue'", ta'caso'. ⁴ Yosëriso' co onporonta nonpintarinhue'. Ya'ipi piyapi'sa' nonpinpirinahuë', Yosëso' no'téquënáchin nonin. Quiricanën quëran naporin:

"No'téquënáchin nontérancoi ni'ton, a'naquën nonpinapipirinënquënhue', co onporonta' minséarinënquënhue'", ténin.

⁵ A'naquën po'pin yonquipi: "Canpoa co noyahue ninëhua ni'ton, Yosë noyasáchin nininso' a'ninquëchin anitötérinpoa'. Napoaton ana'intojhachinpoa', co no'téquën ana'intérinpoahuë'", toconpi. ⁶ ¡Co ina pochin yonquicaso ya'huérinhue! Yosëso' noya ni'ton, no'téquën ana'intiinpoaso' ya'huérin. Co ana'intiinpoaso' ya'huérinhue' naporini, co ayaro' tahuëri no'téquën sha'huichitonpoahuë'.

⁷ A'naquëonta' tapona: "Caso' nonpinpirahuë', Yosëso' no'téquënáchin nonin. Nonpinahuë ni'ton, Yosë no'téquënáchin noninso a'ninquëchin anitötérinpoa'. Napoaton co oshahuan pochin Yosë ana'intincoso' ya'huérinhue'", toconpi. Co no'téquën yonquipihuë'. ⁸ A'naquënta napopi: "Huëco' manta téranta' niahua' Yosë na'con na'con catahuainpoaso marë'. Paono chachionta' ina pochin a'chintérinpoa'", topi pinotonaco. Co no'téquën yonquipihuë' ni'ton, napopisopita no'téquën ana'intacaso' ya'huérin.

Ya'ipinpoa' oshahuanëhuaso'

⁹ ¿Onpopinta' iporaso' yonquiarihua'? Cotioro'sanpoa noya noya ninëhua', ¿tëcarihua ti? ¡Co naporinhuë! Nani sha'huitéranchuëma'. Cotioro'sanpoa', nisha piyapi'sa', ya'ipinpoa' oshahuanëhuë'. ¹⁰ Yosë quiricanënquë tapon:

"Ya'ipi piyapi'sa' co noyahue' nipi.

Co a'naya téranta' noya nininhuë'.

¹¹ Co no'téquën yonquipihuë'.

Co inahuara nohuantopihuë Yosë chinotacaiso'.

¹² Co Yosë iranën pa'topihuë', pëshonpi.

Co a'naya téranta' noya nininhuë'.

¹³ Chimipi pa'pitopiso' i'soatopinan pochin

napoonin nonpi.

Nonpintatona', ya'huan tomain yanquëetérinso pochin na'a piyapi'sa' aparisitopi.

¹⁴ No'huitatona', piyapi'sa' pinosápi.

¹⁵ A'naroáchin yaahuëtopi, yatëpatopi.

¹⁶ Insëquësona pa'pachinara, piyapi'sa' aparisitopi, asëtopi.

¹⁷ Piyapi'sa' ano'huitopi ni'ton, co noya nini'tona' ya'huëpihuë'. Co sano cancantopihuë'.

¹⁸ Yosë të'huatacaso' ya'huëpirinhuë', co ina yonquipihuë', ténin iráca Yosë quiricanënquë ninshitatona'.

¹⁹ Têhuëñchachin co noyahue' nicatéhüa', ya'ipinpoa' oshahuanëhuë'. Yosë pënëntérinso' nitotopiréhuahuë', co natéréhuahuë' ni'ton, ana'intinpoaso' ya'huérin. ²⁰ "Pënëntérinso' natëhuatéhüa', Yosë noya ni'sarinpoa'", topirinahuë' a'naquën. Co ina marë' noya

ni'ninpoahuë'. Pënëntërin quëran oshahuanëhuaso' anitotérinpoa'. Ina natanpatëhuara, "Tëhuêñchachin oshahuanëhua'. Co noyahuë' ninëhua', tënëhua'.

Quisocristo imapatëhua', anoyacancantérinpoaso'

²¹ Iporaso nípirihuë' Yosë anitotérinpoa' onporahuatësona cha'ëcaso'. Co iráca pënëntërinso' natérëhua quëran noya cancantarihuahuë'. Moisësë, pënëntona'piro'sa', inapita inachachin sha'huitérinënpoa'. ²² Quisocristo imapatëhua', Yosë noya ni'sarinpoa'. Insosona natëhuachin, anoyacancantarín. Co nisha nisha nontérinpoahuë'. ²³ Ya'ipinpoa' oshahuanëhua'. Co a'nayanpoa téranta' Yosë pochin cancantérëhuahuë'. ²⁴ Nípirihuë', inaora nohuanton, Yosë nosororinpoa'. Nosoroatonpoa', Quisocristo a'paimarin nicha'ëinpoaso marë'. Ina imapatëhua', Yosë noya ni'sarinpoa'. ²⁵ Yosë nohuanton, Quisocristo chiminin. Oshanënpoa' inquitinpoaso marë' chiminin. "Ca marë' chiminin," topatëhua', oshanënpoa' inquitarinpoa'. Huëñainëñ quëran anoyacancantarínpoa'. Iráca piyapi'sa' oshahuanpirinahuë', Yosëri co a'naroáchin ana'intérinhue'. "A'na tahuëri Quisocristo chiminpachin, oshanëna' inquitarahuë," ta'ton, co ana'intérinhue'. ²⁶ Iporaso huachi Quisocristo chachin a'paimarin ya'huëñamënpoa' chiminacaso marë'. "Quisocristo oshanënpoa marë' chiminin," topatëhua', oshanënpoa' inquitarinpoa'. Noyápiachin cancan quëtarinpoa'. Ina imapatëhua', Yosë noya ni'sarinpoa'. Co canpoanta' ana'intarinfoahuë'.

²⁷ Napoaton co inso téranta nocanacaso' ya'huërinhuë', tënahuë. Co pënëntërinso' natérëhuaso marë' Yosë noya ni'ninpoahuë'. Quisocristo naporinso' natérëhuaso marë' nicha'ërinpoa' ni'ton, co a'napita nocanacaso' ya'huërinhuë'. ²⁸ Nani sha'huitérinquëma'. Quisocristo imarëhuaso marë' anoyacancantérinpoa'. Co ya'ipi pënëntërinso' natépirëhuahuë', noya ni'ninpoa'.

²⁹ Yosë ya'ipi piyapinpoa' nohuantérinpoa'. Co cotioro'saráchin nosororinhuë'. Nisha piyapi'santa' nosororin. Ya'ipinpoa' nosororinpoa'. ³⁰ A'naíchin Yosë ya'huërin. Ya'ipinpoa' napopianachin nosororinpoa'. Cotioro'santa', nisha piyapi'santa', Quisocristo imapachina', anoyacancantarín. ³¹ Quisocristoíchin anoyacancantérinpoa' ni'ton, iráca pënëntërinso' ¿co huachi pa'térinhue pochin nitérëhua ti? ¡Co naporinhuë! Ina quëran oshahuanëhuaso' nitotarihua'. Quisocristo imapatëhua', catahuarinpoa' noya natëcaso'.

4

Apraan natëtérinso'

¹ Apraan naporinso' sha'huichinquëma'. Inaso' shimashonënpoa'. ¿Onporahuatonta' Yosëri noya ni'nin? ² Apraan inaora co nanitérinhue' no'tequén Yosë natëcaso'. Inaora nanitérin naporini, "Caso' noyaco. No'tequén natérahuë," chitonhuë'. Napoaponahuë', co ina pochin Yosëri ni'ninhuë'. ³ Yosë quiricanëñquë naporin: "Yosë no'tequén nontérinco. Inasáchin catahuarinco, topachina, Yosëri noya ni'nin. Oshanëñ inquitaton, noya ni'nin," ténin quiricanëñquë. ⁴ Ni'co'. Piyapi'sa' sacatohuachinara, pahuërcaso' ya'huërin. Inapochachin no'tequén natérëhua' naporini, Yosë noya nicainpoaso' ya'huë'itonhuë'. ⁵ Yosëso nípirihuë', inaora nohuanton nosororinpoa'. "Co caora noya nípirahuë', Yosë chachin anoyacancantarínco," topatëhua', oshanënpoa' inquitatonpoa' noya ni'ninpoa'. ⁶ Co noyahuë' nípirëhuahuë', inaora nohuanton, Yosë anoyacancantérinpoa' ni'ton, noya ni'ninpoa'. Ina marë' nýoya cancantérëhua'. Iráca Tapi inachachin naporin. ⁷ Quiricanëñquë ninshitérin:

"Oshanënpoa' Yosë inquitoahuachinpoa', noya cancantarihua'. Ya'ipi oshanënpoa' ayatarinpoa'.

⁸ ¡Co huachi oshanënpoa marë' ana'intarinfoahuë'!
Napoaton noya cancantarihua', ténin.

⁹ ¿Inpitata' ina pochin noya cancantapi? Co cotioro'saráchin ina pochin noya cancantacaso' ya'huëtopihuë'. Co marca niacotopirinahuënta' noya cancantapi. Apraan yonquico'. "Yosë no'tequën nontérinco. Inasáchin catahuarinco," topachina, Yosëri noya ni'nin. Nani sha'huitéranguëma'. ¹⁰ ¿Onporota' noya ni'nin? ¿Marca niacotérin piquëran noya ni'nin? Co naporo' naporinhuë'. Co'huara marca niacochatérerasohuë', noya ni'nin. ¹¹ Yosë natérin ni'ton, inari noya ni'nin. Co'huara marca niacochatérerasohuë', piyapinëñ pochachin ni'nin. Ina piquëran marca niacotérin imarinso' anitotacaso marë'. "No'tequën nontérinco," topachina, noya ni'nin. Nisha piyapi'santa' ina pochachin natétohuachinara, Apraan pochin cancantopi. Co marca niacotopirinahuë', Apraan hui'ninpita pochin nipi. ¹² Cotioro'santa' Apraan pochin natétohuachinara, hui'ninpita pochin nipi anta'. Co marca niacotopiso marë' noya cancantopihuë'. Co'huara marca niacochatérerasohuë', Apraanso' natétérin. A'napitanta' ina pochin cancantohuachinara, Yosëri noya ni'sarin.

Yosëri Apraan sha'huitérinso'

¹³ Iráca Yosëri Apraan itapon: "Nosoroaténquën, páncaro'pa' quëchinquën. Piyapinéhuë pochin ni'saranquën. Quëma shinparinpitanta' noya catahuaarahuë. A'na tahuëri ya'ipiro'pa' hua'anëntapona'", itérin. "Yosë co onporonta' nonpintarincuhuë", téninsø marë' Yosëri noya ni'nin. Co naporo' Moisësë pënënhátérarinhuë'. Napoaton co ina natérinso marë' Apraan noya ni'nihuë'. ¹⁴ Pënëntérinso' natëpisopitaráchin noya ni'nin naporini, topinan cancanënpoa quëran natérëhuasopitaso' co noya nicainpoaso' ya'huë'itonhuë'. Topinan quëran Yosëri Apraan sha'huichitonhuë'. ¹⁵ Moisësë pënëntérinso' co natéhuachinarahuë', ana'intacaso' ya'huërin. Co pënëntérinso' ya'huërinhuë' naporini, co natécaso' ya'huë'itonhuë'. Co ina marë' oshahuaintérihuahuë'.

¹⁶ Napoaton Apraaniso natéton: "Yosë no'tequën nontérinco," topachina, Yosëri itérin: "Oshahanpiranhue', caora nohuanto, nosoroaténquën catahuanquën. Hui'nanpitanta' catahuarahuë," itérin Yosëri. Co cotioro'saráchin nosororinhuë'. Ya'ipi Apraan pochin cancantopisopitanta' nosororin. Ina hui'ninpita pochin ninéhua'. ¹⁷ Iráca Yosëri Apraan itérin: "Ca nohuanto, notohuaro' shiparinpita ya'huëtarinquë. Na'a nisha nisha piyapi'santa' quëma pochachin cancantapi," ténin Yosë. Quiricanënquë naporin. "Yosë no'tequën nontérinco. Ya'ipiya nanitaparin. Chiminpisopitanta' nanitérin ananpitacaso'. Co ma'sha ya'huëpirinhuë', nani ya'huërinso pochin sha'huichanin," ta'ton, Apraan natétérin.

¹⁸ "Quëma shiparinpita notohuaro' na'asapi," itérin Yosëri. Hua'qui' co a'na hui'nin térranta' ya'huëterinhuë'. Sacai' natétacaso niperinhuë', Apraan natétérin. "Yosë nohuanton, oshaquëran hui'nahuë ya'huëtarinco. Shihuëpitanta' na'asapi," ténin Apraan. ¹⁹ Pasa pi'ipitaponahuë', co hui'nin ya'huëchatérarinhuë'. Co huachi chinirinhuë'. Sa'ionta' co hua'huana'pihuë'. Nani paiya. Napoaponahuë', Yosë natérin. ²⁰ "Yosë nonpintérinco," co téninhuë'. Co nisha nisha yonquirinhuë'. "No'tequën nontérinco," ta'ton, chiníquëñ cancantérin. "Ma noyacha Yosëso' ni'ton, co naniantarincuhuë'. ²¹ Yosë ya'ipiya nanitaparin. Sacai' niperinhuë', nani sha'huitérinco ni'ton, catahuarinco. Sha'huitérincoso chachin ya'huapon," ténin. ²² Ina pochin yonquirinso marë' Yosëri nónya ni'nin.

²³ Apraan naporinsopita Yosë quiricanënquë ninshitopi. Canpoanta' nitotacaso marë' ninshitopi. ²⁴ Ina pochin cancantohuatéhua', Yosë noya ni'sarinpoa'. Quisocristo chiminpirinhuë', Yosëri ananpitaantarín. Ina hua'anëntérinpoa', ténéhua'. Ina marë' Yosë noya ni'sarinpoa' canpoanta'. ²⁵ Yosë nohuanton, oshanënpoa marë' chiminin. Inari chachin ananpitaantarín oshanënpoa' inquitatonpoa', noya nicainpoaso marë'.

¹ “Sinioro Quisocristoíchin nicha'ësarinfoa'” ta'tehua', imarëhua'. Oshanënpoa' inquitérinfoa' ni'ton, Yosë noya ni'ninpoa'. Co inimiconënpita pochin ni'ninpoahuë'. ² Quisocristo cancanënpoa quëran natëhuatëhua', nicha'ësarinfoa'. Nosoroatonpoa', ipora huanta' catahuarinfoa' noya imacaso marë'. A'na tahuëri Yosë'pa' pa'patëhua', Yosë pochin nisarëhua'. Ina yonquiatëhua', noya cancantarihua'. ³ Iporaso' parisitari-huarahuë', noya cancantarihua'. “Parisitohuatëhua', Yosë catahuarinfoa' imamiat-acaso marë'” ta'tehua', co sëtarihuahuë'. Chiniquën cancantatëhua', noya ahuantar-ihua'. ⁴ Noya ahuantohuatëhua', chini chiniquën cancantarihua' ni'ton, Yosë noya ni'ninpoa'. “Co naniantarinpoahuë'” ta'tehua', inasáchin ninarihua'. ⁵ Inasáchin ninahuatëhua', tëhuëncachin co naniantarinpoahuë' ni'ton, co tapanarihuahuë'. Ispirito Santo a'patimarinpoa'. Ya'coancantohuachinpoa': “Ma noyacha Yosë nosororinfoa paya,” tarihua'. Ispirito Santo chachin Yosë nosororinfoaso' anitotérinfoa'.

⁶ Canpoara co nanitérëhuahuë' cha'ëcaso'. Nipirinhue', iráca o'macaso' nanihuachina, Quisocristo isoro'paqué o'marin. O'marahuaton, oshahuano'sa marë' chiminin. ⁷ Ni'co'. Piyapi noya niponahuë', co insonta' ya'huërenamën chiminacaso' nohuantérinhue'. Noya noya nipachin, nicha'ëcaso marë' a'nara' ya'huërtapon nimara. ⁸ Quisocristoso niperinhue' oshahuano'sa marë' chiminin. Oshahuanpirëhuahuë', ya'huërtérinfoa'. Yosë nohuanton, canpoa marë' chiminin. Napoaton: “Ma noyacha Yosë nosororinfoa paya,” tënëhua'. ⁹ “Corosëquë huënainen pa'nin. Oshanënpoa marë' chiminin,” topatëhua', Yosë noya ni'sarinpoa'. Napoaton ayaro' tahuërinta' catahuarinfoa'. Naporö' tahuëri co noyahue' nipesopita chiniquën ana'intarin. Imarëhuasopitaso niperinhue', co ana'intarinfoahuë'. Quisocristo chachin nicha'ësarinfoa'. ¹⁰ Iráca oshahuanatëhua', Yosë inimicotopirëhuahuë', hui'nin chiminin ni'ton, nanan anoyatérinfoa'. Iporaso' noya nipayarëhuaso pochin ninëhua' ni'ton, noya noya catahuarinfoa'. Nanpiantarín ni'ton, catahuarinfoa' noya cha'ëcahuaso marë'. ¹¹ Naporahuaton, “Yosë nosororinfoa'” ta'tehua', ina pa'yatérëhua'. Hui'nin chachin nanan anoyatérinfoa' ni'ton, noya cancantérëhua'.

Atan, Cristo inapita napopiso'

¹² Atan'ton co noyahue' nicaton, oshahuanin. Ina marë' chiminacaso' ya'huërin. Ina quëran ya'ipinpoa' co noyahue' nicatëhua', chiminëhua'. ¹³ Co'huara Moisësë pënëncatérerasohue', piyapi'sa' oshahuanpi. Oshahuanpirinahuë', co pënëntérins'o' ya'huëyatérarinhue' ni'ton, co ina marë' ana'intacaso' ya'huë'itonhue'. ¹⁴ Nipirinhue', Atan quëran huarë' ya'ipi piyapi'sa' chiminpi. Moisësë ya'huëaquë huarënta' chimina'piapi. Ya'nan isoro'pa' nípon, Yosëri pënënpirinhue', Atan co natëtonhue', oshahuanin. Ina quëran ya'ipi piyapi'santa' co noyahue' nicatona', oshahuanpi. Co Yosëri chachin pënënpirinhue', inahuanta' oshahuanpi. Atan pochin cancantatona'ya'ipi piyapi'sa' oshahuanpi. Quisocristoso niperinhue' nanan anoyatinpoaso marë' o'marin.

¹⁵ Inaso' ya'ipinpoa' nosororinfoa'. Atanso niperinhue' co ina pochin nininhue'. Co natérins'o marëhuë' oshanën ya'huëtérin. Imapochachin ya'ipi piyapi'sa' oshahuanatona', chiminpi. Ina quëran ana'intacaso' ya'huërin. Yosëso niperinhue' inaora nohuanton, na'con nosororinfoa'. Nosoroatonpoa', hui'nin a'paimarin na'aquënpoa' anoyacancantinpoaso marë'. ¹⁶ Atan co natérinhue' ni'ton, osha ya'huërin. A'naíchin pënëninso' co natérinhue' ni'ton, ana'intacaso' ya'huërin. Nipirinhue', Yosë nosororinfoaso' co ina pochin nininhue'. Na'con oshahuanpirëhuahuë', Quisocristo chiminin ni'ton, oshanënpoa' inquitatonpoa', noya ni'ninpoa'. ¹⁷ A'na ya'piíchin tëhuërin ni'ton, ya'ipi piyapinpoa' chiminacaso' ya'huërin. Aquëtë huarë' Yosëso', inaora nohuanton nosoroatonpoa Quisocristo quëran nicha'ërinpoa' ni'ton, inarë'quënpoa' nanpimiatastähua' hua'anëntarihua'.

¹⁸ Atan co noyahue' ninin ni'ton, ya'ipinpoa' ana'intinpoaso' ya'huëpirinhue'. Quisocristo chiminin ni'ton, ya'ipinpoa' nanitérëhua' nanpimiatacaso'. Imapatëhua',

co ana'intarinfoahuë'. ¹⁹ A'naíchin co Yosë natérinhue' ni'ton, ya'ipinpoa' oshahuanéhua'. A'naso nimirinhue' Yosë natéton, chiminin. Ina marë' na'aquénpoa' anoyacancantérinpoa'.

²⁰ Iráca Moisésë pénéntérin oshahuanéhuaso' anitotinfoaso marë'. Ina quëran na'con oshahuanéhuaso' nitotéréhua'. Na'con oshahuanpiréhuahuë', inaora nohuanton, Yosë na'con na'con nosororinfoa'. ²¹ Oshahuanéhua' ni'ton, chiminpatéhua', parisitomi-atacaso' ya'huépirinhue'. Yosëso' inaora nohuanton, nosoroatonpoa', catahuarinfoa'. Siniro Quisocristo anoyacancantuachinpoa', nanopimiatarihuá.

6

Quisocristo imapatéhua', co huachi oshahuanacaso' pa'yatarihuahuë'

¹ Yosë inaora nohuanton nosororinfoa ni'ton, manta téranta' niahua' inaora nohuanton, oshanénpoa' inquitinfoaso marë' ¿técarihua ti? ² ¡Co naporinhue'! Quisocristo imapatéhua', chiminéhuaso pochin cancantatéhua', co huachi oshahuanacaso' pa'yatarihuahuë'. ³ "Quisocristo imarahué huachi," ta'téhua', aporihuanéhua'. Ina noya chinpitacaso marë' aporihuanéhua'. Aporihuanpatéhua', Quisocristoré'quénpoa' chiminéhuaso pochin ninéhua'. Ina chiminiso pochachin co noyahué' yonquiréhuasopita a'poréhua'. Nani ina nitotérama'. ⁴ Quisocristo chiminpachina, pa'pitopi. Aporintohuachinénpoara, canpoanta' pa'pitérinénpoaso pochin co noyahué' yonquiréhuasopita naniantéréhua'. Tata Yosë chiníquén nanantaton, Quisocristo ananpitaantarin. Canpoanta' nasha cancan quétérinpoa' nasha pochin nanopicaso marë'. Ina yonquiatéhua', aporihuanéhua'.

⁵ Quisocristo chiminaponahué', nanopiantarin. Inapochachin canpoanta' co noyahué' yonquiréhuasopita naniantohuatéhua', nanopiantarëso pochin noya noya cancantarihua'. ⁶ Cato' cancan pochin ya'huéterinpoa'. A'na cancanso' sopai yanatérin. Quisocristo imaréhu' ni'ton, co noyahué' cancantéréhuaso' coroséquë patanantérëso pochin nitérehua'. Ama huachi sopai natécaso maréhué' napotéréhua'. Co noyahué' cancantéréhuaso' chiminiso pochin nitahua'. ⁷ Chimipiso' co huachi yonquirinhue' oshahuanacaso'. Inapochachin canpoanta' Quisocristo imapatéhua', co huachi oshanénpoa hua'anéntérinpoahué'. ⁸ Co noyahué' cancanso' naniantohuatéhua', Quisocristo pochachin noyápiachin cancantarihua'. Ina nohuitatéhua', noya noya nanopiaréhua'. ⁹ Inaso' nanopiantahuachina, co huachi chimianihué'. Chimirin nani minséaton, nanopimiataantarin. ¹⁰ Chiminpachina, oshanénpoa marë' chimin. Naporo' oshanénpoa' minsérin. Iporaso' Yoséíchin natécaso marë' nanopimiataantarín. ¹¹ Inapochachin canpitanta' ama huachi oshahuanacamaso' yonquicosohué'. Quisocristo imarama' ni'ton, Yoséíchin natéco'.

¹² Ama oshanéma hua'anéntaté pochin nitaténquëma' camayápainquëmaso nohuantocosohué'. Ya'ipi co noyahué' yonquiramasopita naniantatoma', noyasáchin yonquico'. ¹³ Ni'co'. Imirama', nantéma', ya'pirama', huératéma', nanaméma', inapita ya'huéterinquëma'. Inapita quëran co noyahué nicacaso ya'huépirinhue'. Ama nohuantocosohué'. Yosë natécamasoáchin yonquico'. Chiminama quëran nanopiantéremaso pochin cancantatoma', ya'ipi nonéma quëran huaré' noyasáchin nico'. ¹⁴ Inapohuatama', co huachi oshanéma hua'anéntaté pochin nitarinquëmahué'. Co ya'ipi pénéntérinso' natépiramahué', inaora nohuanton, Yosë anoyacancantérinquëma'. Nosoroaténquëma', catahuarinquëma' noya nicacamaso marë'.

Hua'anénpoa pochin nininso'

¹⁵ Téhuéñchachin co huachi iráca pénéntérinso' natécaso' ya'huéterinhué'. Yosë nosoroatonpoa', nicha'érinpoa'. A'naquénso nimirinhue' ina natanatona', co manta' yanatépihué'. "Noya oshahuanacaso'," toconpi. ¡Co ina pochin yonquicoso

ya'huërinhuë! ¹⁶ Insosona natëhuatëhua', inaso' hua'anëntarinfoa'. ¡Nani nitotërama' ipora! Oshanënpoa natëhuatëhua', ina hua'anëntarinfoa'. Camaihuachinpoara, co noyahuë' ninëhua'. Oshanënpoa' co a'poasëhuahue' chiminpatëhua', parisitopiquë pa'sarëhua'. Nipirinhue', Yosë natëhuatëhua', noya nicarihua'. ¹⁷ Iráca oshanëma natëtoma', co noyahuë' nimiramahuë'. Quisocristo nanamën a'chintohuachinëñquëmara, noya natanama'. Ya'ipi cancanëma quëran noya natërama'. Ina yonquiatëhua', "Yosparinquën" itérëhua' Yosë. ¹⁸ Iporaso', co huachi oshanëma camaiarinquëmahuë'. Nasha hua'anëma' ya'huëtinquëma'. Quisocristo natëtoma', noya nisarama'. ¹⁹ Iso pochin a'chintaranquëma' noya noya nitotacamaso marë'. Canpitaora co nitotëramahuë'. Iracaso' ya'ipi nonëma quëran huarë' oshahuanacasoáchin pa'yatërama'. Inapohuatamara, pa'pi nishinahuë' cancantërama'. Iporaso' noyasáchin nico'. Inapohuatama', noyápiachin cancantarama'.

²⁰ Iráca oshanëma natëhuatamara, co noyahuë' ninama'. Co yonquiramahuë' noya nicacamaso'. ²¹ Inapohuatamara, ¿ma'ta' ina marë' canarama'? Co ina marë' canamiataramahuë'. Topinan quëran ya'huërama'. Ina pochin cancantohuatama', chiminpatama', parisitopiquë pa'sarama'. Iráca ina pochin nimiramahuë', iporaso ina marë' tapanama'. ²² Iporaso nimirinhuë' co huachi oshanëma hua'anënterinquëmahuë'. Yosë nicha'érinquëma' ama huachi oshahuanacamaso marëhuë'. Ina chachin hua'anënterinquëma'. Napoaton noyápiachin cancantarama'. A'na tahuéri Yosë'pa' nanopimiatarama'. ²³ Piyapi asacatohuatëra, pahuërërë'. Inapochachin co noyahuë' nipayehua', chiminpatëhua' parisitomiatarihua'. Yosëso nimirinhuë', inaora nohuanton nosororinfoa'. Quisocristo imapatëhua', ina nohuitatëhua', nanopimiatarihua. Inaso' hua'anënpoa'. Inasáchin natërhua'.

7

Sa'arinso pochin nininso'

¹ Canpitaso' iyaro'sa', pënëntopiso' nitotërama'. Nanpipisopitaráchin camaitérinso' natërapi. ²⁻³ Ni'co'. Sanapi so'yahuachina, so'in chinpitacaso' ya'huërin. So'in ya'huëtopirinhuë', a'na quëmapiri së'huahuachin, monshihuanin. Ina marë' oshahuanarin. Nipirinhue', so'in chiminpachin, so'yaantahuachin, co ina marë' oshahuaninhuë'.

⁴ Inapochachin iyaro'sa', canpoanta' Quisocristorë'quënpoa' chiminëhuaso pochin ninëhua' ni'ton, co huachi iráca pënënterinso' hua'anëntiinfoaso' ya'huërinhuë'. Quisocristo chinpitacaso' ya'huërin. Inaso chiminaponahuë', nani nanopiantarin. Ina imamiatohuatëhua', noya nicarihua' a'napitanta' Yosë noya yonquicaiso marë'.

⁵ Iráca, canpoara nipa'yatacasoáchin yonquirëhua'. Co noyahuë' cancantërhua'. Pënënpachinënpoara, aquë aquëtë' co noyahuë' yonquiatëhua', co noyahuë' ninëhua'. Ina marë' chiminpatëhua', parisitomiatacaso' ya'huërin. ⁶ Iráca nisha nisha pënënterinso' ya'huërin natëcaso', Moiséséri ninshitërinso'. "Co ya'ipiya natëhuatëhuahuë', co onporonta' cha'ësarëhuahuë'", topi. Apina'pi tashinan pëiquë ya'huërinso pochin nimirëhuahuë'. Iporaso' co huachi Moisésë pënënterinso' yonquiarëhuahuë'. Quisocristorë'quënpoa' chiminëhuaso pochin ninëhua' ni'ton, co huachi hua'anëntiinfoaso' ya'huërinhuë'. Ispirito Santo catahuarinpoa' cancanënpoa quëran huarë' Yosë natëcaso'. Nasha cancan quëterinfoa'. Napoaton noya nisarëhua'.

Co noyahuë' yonquirëhuasopita yaminsërinpoaso'

⁷ Napoahuarë', "Moisésë pënënterinso' aoshahuaninfoa' ni'ton, co noyahuë'," ¿tëcarihua' ti? ¡Co naporinhuë! Napoaponahuë', pënënterin quëran oshahuanëhuaso' nitotërhua'. Iso pochin yonquia'ahua'. "Ama a'na piyapi ma'shanëna' noyapatocosohue'," ténin iráca pënëntaton. Caso' ina natanato, "Tëhuëñchachin a'napita ma'shanën noyapatato, co noyahuë' yonquirahuë. Ina marë' oshahuanahuë,"

tēnahuë. ⁸ “Ama ma'sha noyapatocosohuë!” itérinco. Ina natanato, aquë aquëtë' a'napita ma'shanëna' noyapatérahuë. Co noyahuë' cancantérahuë' canarinco. Iráca oshahuanpirahuë'. Co'huara pënëntérinso' nitochatérerasocohuë', oshahuanahuë' co nitotérahuë'. ⁹ Co'huara pënëntérinso' natayantérerasocohuë', “Caso' noya piyapico,” topirahuë'. Pënëntérinso' natanpatéra, “Téhuenchachin oshahuanco. Chiminpato, Yosë ana'intarinco,” tēnahuë. ¹⁰ Noya ya'huëca'huaso marë' pënënpirincohuë'. Co ina natëtorahuë', oshahuanahuë. Oshahuanato, parisitopique' pacáhuaso' ya'huérin. ¹¹ Pënëntérinso' natëhuato, noya cancantarahuë, topirahuë'. Co ina natërahuë' ni'ton, oshahuanahuë. Chiminpato, ana'intincoso' ya'huérin.

¹² Yosë chachin pënëninfoa'. Sha'huitérinfoaso' noya. No'tequén nonin. ¹³ Napoahuarë' pënëntérinso' noya niperinhuë', ina marë' ana'intarinco, ¿topiramahuë' ti? ¡Co pënëntérinso marë' ana'intincoso' ya'huérinhuë! Oshahuanahuë ni'ton, ana'intincoso' ya'huérin. Pënëntérinso' noya niperinhuë' natanahuë quëran aquë aquëtë' co noyahuë' yonquiat, co noyahuë' ninahuë. Pënëninfoa quëran oshahuanahuë' nitotérahuë. Pa'pi co noyahuë' ninahuë, tēnahuë.

¹⁴ Noya yonquicaso marë' pënënpirinpoahuë'. Caso' co noya yonquiatohuë', oshahuanahuë. Oshahuanahuë' hua'anëntatë pochin nitérinco. Co nanitérahuë' noya nica'huaso'. ¹⁵ Noya nisarahuë, topirahuë', a'naroáchin co noyahuë' yaninahuë. Co yaoshahuanpirahuë', oshahuanahuë. Onpoatoso' napomaraco, co nitotérahuë'. ¹⁶ Co nohuantopirahuë', co noyahuë' ninahuë. Ina marë' co noya cancantérahuë'. Yonquinéhuë quëran nitotérahuë. Téhuenchachin pënëntérinso' noya, tēnahuë. ¹⁷ Co nohuantopirahuë', caora co noyahuë' cancantato, co noyahuë' ninahuë. Co noyahuë' cancantérahuë' canarinco. ¹⁸ Caora co noyahuë' cancantérahuë. Co nanitérahuë' noya nica'huaso'. Inachinco. Yosë yanatépirahuë', caora co nanitérahuë' natëca'huaso'. ¹⁹ Noya nica'huaso' nohuantopirahuë', co noyahuë' ninahuë. Co yaoshahuanpirahuë', oshahuanahuë. ²⁰ Co nohuantopirahuë', co noyahuë' ninahuë. Co noyahuë' cancantérahuë' canarinco.

²¹ Noya nica'huaso' nohuantopirahuë', co noyahuë' cancantato, co noyahuë' nica'huasoráchin yonquiconahuë. ²² Cancanéhuë quëran Yosë pënëninfoaso' pa'yatato, yanatépirahuë'. ²³ A'na cancan nohuantérin. A'na cancanso niperinhuë', co nohuantérinhuë'. Co noyahuë' nicacasoáchin yonquirin. Ina canarinco ni'ton, co noyahuë' ninahuë.

²⁴ ¡Ma'huantacha caso' ninahuë paya! ¿Incha ipora nicha'ëinco co noyahuë' yonquirahuë' nanianta'huaso marë'? tēnahuë. ²⁵ ¡Yoséíchin nanitaparin! Sinioro Quisocristo imarahuë ni'ton, ina catahuarinco. Ina marë': “Yosparinquén Tata Yosë,” itérahuë. Téhuenchachin cancelléhuë quëran Yosë yanatépirahuë', co noyahuë' cancantato, co noyahuë' ninahuë.

8

Ispirito Santo catahuarinpoaso'

- ¹ Napoaton iporaso' Quisocristo imapatéhua', co huachi ana'intinfoaso' ya'huérinhuë'.
- ² Oshanënpoa natëhuatéhua', co noyahuë ninéhua'. Inapohuatéhua', chiminpatéhua', ana'intarinpoa'. Niperinhuë', Quisocristo imapatéhua', Ispirito Santo catahuarinpoa' nanopimiatacaso marë'. Naporahuaton, co huachi oshanënpoa natëcaso' ya'huérinhuë'.
- ³ Iráca Yosë pënënpirinpoahuë'. Co noyahuë' cancantatéhua', co nanitéréhuahuë' no'tequén natëcaso'. Ina quëran hui'nin chachin isoro'paquë a'paimarin. Piyapi chachin nasitimarin. Co oshahuanaponahuë', oshanënpoa' inquitinfoaso marë' chiminin. Inapoaton, nicha'ërinpoa' ama huachi ana'intinfoaso marëhuë'. ⁴ Co noyahuë' yonquiréhuasopita naniantatéhua', Ispirito Santo natëhuatéhua', catahuarinpoa' noya nicacaso'. Ina pochin cancantohuatéhua', Yosë noya ni'sarinfoa'. Ina marë' hui'nin a'paimarin.

⁵ Co noyahuë' yonquihuatëhuara, co noyahuë' nicacasoáchin pa'yatërehua'. Nipirinhuë', Ispirito Santo natëhuatëhua', Yosë nohuantérinsoáchin pa'yatarëhua'. ⁶ Co noyahuë' nicacasoráchin pa'yatoihuatëhuara, chimipi pochin niconëhua'. Co Yosë nohuitérrehuahuë'. Nipirinhuë', Ispirito Santo pa'yatatëhua' natëhuatëhua', Yosë nohuitatëhua', nanopimiatarihua'. Noya yonquiatëhua', sano cancantarihua'. ⁷ Co noyahuë' nicacasoráchin pa'yatoihuatëhua', Yosë inimicotarëhua'. Co Yosë pënëntérinso' natëcaso' nohuantarëhuahuë'. Co nanitarëhuahuë' ina natëcaso'. ⁸ Ina pochin cancantohuatëhua', co Yosë noya ni'sarinfoahuë'.

⁹ Canpitaso niperinhuë' co noyahuë' yonquiramasopita nariantërama'. Ispirito Santo ya'coancantohuachinquëma', ina nohuantérinso' nisarama'. Co Ispirito Santo ya'coancantohuachinquëmahuë', co tēhuëñchachin Quisocristo imaramahuë'. ¹⁰ Oshahuanama' ni'ton, nonëmaso chiminacaso' ya'huërin. Napoaponahuë Quisocristo ya'coancantatënquëma', anoyacancantérinquëma'. Napoaton Yosë noya nicatënquëma ispiritonëma ananpitarin ni'ton, nanopimiatarama'. ¹¹ Ispirito Santo ya'coancantérinpoa'. Yosë hua'yanëñ chachin ni'ton, achinicancaninpoa' Yosë pochin cancantacaso marë'. A'na tahuërinta' Yosë ananpitaantarinpoa'. Quisocristo ananpitaantarins' pochachin ananpitaantarinpoa' campoanta'. Nonënpoa' chiminacaso ya'huëpirinhuë', Ispirito Santo ya'coancantérinpoa' ni'ton, nanopiantarihua'.

¹² Napoaton iyaro'sa', Ispirito Santo natëcaso' ya'huërin. Co noyahuë' yonquirëhusopitaso' nariantahua'. ¹³ Co noyahuë' ninëhusopita co a'poasëhuahuë', chiminpatëhua' parisitomiatacaso' ya'huërin. Nipirinhuë', co noyahuë' ninëhusopita tēpatë pochin nitohuatëhua', nanopimiatarihua'. Ispirito Santo catastuarinpoa' co noyahuë' ninëhusopita tēpatë pochin nitacaso marë'.

¹⁴ Ispirito Santo nohuantérinso' natëhuatëhua', Yosë hui'ninpoa chachin nisarehua'. ¹⁵ Iráca Yosë tē'huatërama'. Iporaso niperinhuë' Ispirito Santo ya'coancantérinpoa' ni'ton, co huachi manta' tē'huatacaso' ya'huërinhuë'. Hui'ninpita pochachin Yosë ni'ninpoa'. Ina nontohuatëhuara, "Tata," itérëhua'. ¹⁶ Ispirito Santo chachin cancanënpoa quëran anitotérinpoa'. "Hui'ninpita pochachin Yosë ni'ninquëma'", itérinpoa'. ¹⁷ Hui'ninpoa' ni'ton, na'con na'con catastuarinpoa'. A'na tahuëri ya'huërin'pa' noya acoarinpoa'. Quisocristo noya acorinso pochin acoarinpoa' campoanta'. Ina imarëhuso marë' aparisitopirinënpohuë', inapochachin inarë'quënpoa' noya noya ya'huëcontarihua'.

A'na tahuëri ya'ipiya anoyatarinso'

¹⁸ Isoro'paqué pi'pian parisitaruhuarahuë', ama ina yonquia'ahuasohuë'. Ama ina marë' sétahuasohuë'. A'na tahuëri Yosë'pa' noya noya ya'huëcontarihua'. Ina yonquiatëhua', nöya cancantahua' tēnahuë. ¹⁹ Naporo' Quisocristo imarëhusopita noya noya ya'noarihua'. Ya'ipi ma'sha isoro'paqué ya'huërinsopitanta' ina tahuëri ninarapi. ²⁰ Iporaso niperinhuë' sharo'sa' co noyatopihuë'. Ma'sharo'santa' chiminpi. Nipirinhuë', co inahuara nohuanton, napopihuë'. Yosë nohuanton, napopi. A'na tahuëri ya'ipiya anoyatarin. ²¹ Naporo'co huachi ma'sha chanatarinhuë'. Yosë hui'ninpitanpoa ninëhusopita noya noya acohuachinpoa', ma'sharo'santa' noya noya niantapi. Co huachi chiminaponahuë'. ²² Iráca quëran huarë' ma'sharo'sa' parisitopi. Sharo'santa' papotopirinhuë', co noyatérinhuë', chiminin. Ipora huanta' sanapi hua'hua iquito-huachina, iquitérinso pochin chiníquen parisitapi. ²³ Canpoanta' Ispirito Santo nani ya'coancantopirinpoahuë', parisitérëhua'. Parisitatëhua', manorëhua' nasha nonënpoa' ya'huëtinpoaso marë'. Ina ninarëhua'. Nasha nonënpoa' quëtohuachinpoa', co huachi caniorihuahuë'. Co huachi chiminarihuahuë'. Naporo' Yosë hui'ninpita chachin nisarehua'. ²⁴ Tata Yosë noya nicha'érinpoa'. Napoaponahuë', co ya'ipi naniyatérarinhuë': "A'na tahuëri noya noya acoarinpoa'", ta'téhua', ina ninarëhua'. Pahuanarin ya'ipi nanicaso'. Napoaton ninarëhua'. Nani nanirin naporini, co ninacaso' ya'huë'itonhuë'.

25 “Tëhuënchachin noyá nicha'ësarinfoa',” ta'tëhua', co sëtérëhuahuë'. Noya cancantatëhua', ninarihua'.

26 Iporaso' co chiníquën cancantopirëhuahuë', Ispirito Santo catahuarinfoa'. Yosë nontohuatëhuara, co nitotérëhuahuë' ma'sona itacaso nimirinhue', catahuarinfoa'. Cancanënpoa quëran inari Yosë nontérin. Tarëtarinso pochin ninin. Canpoaso' co natanpirëhuahuë', Yosëriso' natanin. **27** Ya'ipi yonquirëhuasopita Yosë nitotérin. Ispirito Santori nontohuachina, natanin. Yosë nohuantérinso chachin nitotaton, canpoa marë' noya nontérin.

Yosë nosororinpoaso'

28 Yosë nosorohuatëhua', noyasáchin yonquirinfoa'. Ma'sha onpohuatëhuara, na'con catahuarinfoa'. Pi'pian parisitapirëhuahuë', ina nohuanton, parisitérëhua quëran noya noya pipiarëhua'. Achinicancaninfoa' ni'ton, noya noya imarihua'. Nani huayoninfoa' ina nohuantérinso' nicacaso marë'. **29** Iráca quëran huarë' Yosë nohuitérinpoa'. Nohuitatónpoa', huayoninfoa' Quisocristo pochachin cancantacaso marë'. Quisocristoso' noya noya ninin. Ina quëran na'aquënpoa' imapatëhua', ina pochin cancantarihua'. Yosë hui'ninpita pochin ni'sarinpoa' canpoanta'. **30** Nohuantérinpoa' ni'ton, huëntonënqué chachin aya'coninfoa'. Oshanënpoa' inquitatonpoa', noya ni'ninpoa'. Ina nohuanton, a'na tahuëri inápaquë noya noya acoarinfoa'.

31 Ina pochin Yosë yonquirinfoa' ni'quëhuarë', co insonta nanitérinhue minsëinpoaso'.

32 Yosë chachin nosoroatonpoa' co hui'nin téranta' apiratérinpoahuë'. Isoro'paquë a'paimarin chiminacaso marë'. Canpoa marë' chiminin. Ipora chachinta' nosoroatonpoa', catahuarinfoa'. ¡Quisocristo imarëhua' ni'ton, co manta' pahuantarinfoahuë' Yosë pochin cancantacaso marë'! Noya nicha'ësarinfoa'. **33** Yosë huayoninfoa' ni'quëhuarë', co insonta nanitérinhue sha'huirapinpoaso'. Yosë chachin noya ni'ninpoa'. **34** Yosë noya ni'ninpoa ni'ton, co insonta nanitérinhue ana'intinpoaso'. Quisocristo oshanënpoa' inquitinpoaso marë' chiminin. Ina quëran nanopiantarin. Yosë inchinanën quëran ya'huaton, canpoa marë' Yosë nontárin. **35** Tëhuënchachin Quisocristo nosororinpoa'. Co insonta' nanitérinhue ina quëran osérëinpoaso'. A'na tahuëri parisitérëhua'. Parisitatëhua', co napion cancantérëhua'. Piyapi'sa' aparisitérinënpoa'. Cosharo', ma'sha inapita pahuantérinpoa'. Ma'sha onpochináchin nisarëhua'. Yatéparinënpoa'. Inapopirëhuahuë', ¡co inapita nanitapihuë' Quisocristo quëran osérëinpoaso'! **36** Yosë quiricanënqué naporin:

“Imarainquënsa marë' Siniro, ya'ipi tahuëri yatéparinacoai.

Co manta' onpopiraihuë', ohuicaro'sa' yatépapiro pochin yatéparinacoai,” ténin.

37 Ina nimirinhue', Quisocristo nosororinpoa'. Parisitapirëhuahuë', nani tahuëri catahuarinfoa' sopai minsëcaso marë'. Noya cancantarëhua'. **38** Yosë nosoromiatérinpoa'. Nanpihuatëhuara, nosororinpoa'. Chiminpatëhuanta', co patarinpoahuë'. Anquëniro'sa', sopairo'sa', tanan hua'yano'sa', inapita co nanitapihuë' Yosë quëran osérëinpoaso'. Ipora tahuëri'sa' ma'sha onpotopirinënpoahuë', co patarinpoahuë'. A'na tahuérinta' ma'sha onpotohuachinënpoa', co Yosë naniantarinfoahuë'. **39** Ma'sha inápaquë ya'huërinopita, aco-poroqué ya'huërinopita inapita co nanitapihuë' Yosë quëran osérëinpoaso'. ¡Co insonta' nanitérinhue' Yosë ananiantinpoaso'! Quisocristo hua'anëntérinpoa'. Ina imarëhua' ni'ton, Yosë nosoromiatérinpoa'.

9

Yosëri israiro'sa' huayoninfo'

1 Quisocristo imato, no'tequënonahuë. Co nonpinahuë'. Ispirito Santo ya'coancantérinco ni'ton, no'tequënontaranquëma', ténahuë. **2** Tëhuënchachin israiro'sa' yonquiato, sétérahuë. Cancanëhuë quëran huarë' sétaráhuë. **3** Inapitaso' quëmopinëhuëpita. Co Quisocristo imapihuë' ni'ton, ana'intacaso' ya'huërin. Nanitérahuë

naporini, inapita ya'huérënamën parisitopiquë pa'itohue'. Cha'ëcaiso marë' inaquë parisichitohue'. ⁴ Piyapinënpita nicacaiso marë' Yosëri acorin. Israiro shinpita nipi. Iráca quëran huarë' Yosëri nohuantérin ni'ton, hui'ninpita pochin nicacaiso marë' acorin. Huënaráchin huënaráchin a'pintohuachina, shimashonënpitari quënanpi. Iráca chachin piyapinënpita nicacaiso marë' inapitarë' anoyatérin. Naporahuaton, pënentérinso nanan sha'huitérin. Noya chinotacaiso marënta' a'chintérin. Na'con sha'huitérin nicha'ëcaso marë'. ⁵ Shimashonënpitaso' Yosëri chachin huayonin. Ina quëran Cristo isoro'paquë o'mahuachina, Israiro sanapi quëran nasitérin. Inaso' Yosë chachin. Ya'ipiya hua'anëntérinpoa'. ¡Ma noyacha inaso paya! ténëhua'. Amen.

⁶ Na'con nitotaponaraihuë', notohuaro' israiro'sa' co Yosë natépihuë'. Napoaponahuë', Yosëri co topinan quëran sha'huitérinhuë' nicha'ëcaso marë'. Co ya'ipi israiro'sa' piyapinënpita pochin ni'ninhue'. ⁷ Apraan cato' hui'ninpita ya'huëtopirinhuë', a'naíchin Yosëri acorin Apraan ya'huérëtacaso marë'. "Isaco huayonahuë. Shimpitanta' piyapinëhuëpita pochin ni'sarahue," ténin Yosë. ⁸ Napoaton co ya'ipi Apraan hui'ninpita Yosë piyapinënpita nipihiue'. Yosëri sha'huitérinso chachin nasitohuachina, piyapinën pochin ni'nin. ⁹ Iráca Yosëri Apraan itapon: "A'na pi'ipi quëran nicaponquën huëantarahuë. Naporö' ca nohuanto, sa'an hua'huanarin," itérin. Naporinso chachin tahuëri nanihuachina, Isaco nasitérin, Yosëri acorinso'.

¹⁰ Naporahuaton, Tata Isaconta' cato' hui'nahuanin. Sa'in Nipica itopiso' yahuaihuachina, Yosëri itapon: ¹¹⁻¹³ "Hua'hua nininso' chini chiníquënanantarin. Paninanso' co onpopinchin chiníquënanantaponhuë," itérin. Ina quëran itantarín: "Cacopo nosoroato, huayonahuë. Isaoso nipurinhuë' co onpopinchin nohuantérahuë," ténin Yosë quiricanënquë. Co'huara nasicháterasoihuë', naporin. Co ya'huëyáterasoihuë', yonquiaton, huayonin. "Noya nininso marë' Yosëri huayonin," topiramahuë', co ina marë' huayoninhuë'. Inaora nohuanton, huayonin.

¹⁴ Naporin ni'quëhuarë' ¿ma'ta' tēcarihua? "Yosëso' co napopináchin ni'ninpoahuë," ¿tēcarihua ti? ¡Co naporinhuë! ¹⁵ Iráca Yosëri Moisésé itérin: "Caora nohuanto, nosororahuë. Insosona nohuantohuato, huayonahuë," itérin. ¹⁶ Napoaton co canpoara nohuanton, Yosë huëntonënquë ya'conéhuahuë'. Noya nipuréhuahuënta', co canpoara nanitéréhuahuë' ya'conacaso'. Inaora nohuanton, Yosë aya'coninpoa'. Nosoroatonpoa', aya'coninpoa'. ¹⁷ Iráca Iquipito copirnoso' co noyahue' cancantopirinhuë', Yosëri huayonin hua'anëntacaso marë'. "Piyapinëhuëpita hua'anëntopiranhuë', nicha'ësarahuë noya pipicaiso marë'. Ina quëran na'a piyapi'sa' nicatona', 'Ma noyacha Yosëso' nanitaparin paya. Copirno co nohuantopirinhuë', piyapinënpita nicha'ërin,' tosapi," ténin. Quiricanën quëran sha'huitérinpoa'. ¹⁸ Inaora nohuanton, a'naquën nosororin. A'naquënso nipurinhuë' tananpitérin. Tananpitohuachina, co natantochináchinhue' cancantopi.

¹⁹ Ina natanatoma', a'naquëma' co noyahue' yonquirama': "Yosë nohuanton, a'naquënatépi. Co ya'ipiya natépihuë'. Ma'sona Yosë nohuantérinsoichin nipuréhuahuë'. ¿Onpoatonta' nipachin ana'intarinfoa'? ¡Co insonta' nanitérinhuë' Yosë nohuantérinso' canpiacaso'!" toconama'. ²⁰ ¿Maquëma cháchinta' ni'toma', nanitërama' Yosë chachin pinocamaso? Ni'co'. Piyapi teshitohuachina, minë', huë'ëta, inapita ninin. Nipachina, co teshiri hua'anën no'uirinhuë'. "¿Onpoatonta' naponin ninanco?" co itérinhuë'. ²¹ ¡Co'ta teshitona'pi no'pa' mapachina, ma'sona nohuantohuachina, ninin! Nohuantohuachina, a'naquën ninshirayarin. A'naquënso' topinanaya. Inapochachin Yosëso' yonquirinfoa'.

²² A'naquën co natépihuë' ni'ton, Yosëri no'uirin. No'huapiro' nipurinhuë', co a'naroáchin ana'intérinhuë', ninararin. Co a'naroáchin ana'intohuachinahuë', co ina marë' Yosë no'huicaso' ya'huérinhuë'. Oshaquëran ana'intarin. Ina ni'pachina', "Téhuëñchachin Yosë no'tequëñ yonquirin. Hua'qui' tananpitopirinhuë', iporaso' no'tequëñ ana'intérin. Chini chiníquënanantérin inaso'," tosapi. ²³ A'naquënpoaso nipurinhuë', nosoroatonpoa' nicha'ësarinfoa'. Inaora nohuanton, nosororinfoa'. Iráca

chachin yonquirinpoa' nicha'ëinpoaso marë'. Anoyacancantuohuachinpoa', piyapi'sa' na'con Yosë yonquiapi. "Ma noyacha catahuarin paya," tosapi. ²⁴ A'naquën cotio piyapi'sacoi huayonincoi. A'naquëma' nisha piyapi'sanquëmanta' Yosë nohuanton, imarama' canpitanta'. ²⁵ Inapochachin iráca Osiasë ninshitérin.

"A'naquën iráca co piyapinëhuëpitahuë' nimirinahuë', iporaso' piyapinëhuëpita pochin ni'nahuë.

Iráca co nosoropirahuë', iporaso' nosororahuë huachi," ténin Yosë, itérin.

²⁶ Ina quëran itantarín: "Canpitaso' co piyapinëhuëpitahuë' nimirinahuë", itopirinhuë', iporaso' inaquë itapona': "Inapitaso' Yosë hui'ninpita chachin nisapi. Inaso' nanopimi- atarin," tosapi.

²⁷ Isaiasënta' ninoton, ninshitérin. "Hua'huayatérahuë' israiro'sa' ya'huëpirinahuë', co ya'ipiya cha'ësapihuë'. Marë yonsanquë inotéra'huaya ya'huërinso nápo' ya'huëpirinahuë', caraíchin Yosëri nicha'ësarín. ²⁸ Co hua'quiya quëranahuë' na'a piyapi'sa' no'téquën ana'intarin," ténin. ²⁹ Co'huara ina ninshichatérasohuë', Isaiasë ninoton, tapon:

"Siniro ya'ipinpoa' hua'anëntérinpoa'. Iráca ina nohuanton, ya'ipi Sotomaquë ya'huëpisopita ta'huantopi huachi. Comoraquë ya'huëpisopitanta' ta'huantopi.

Canpoanta' caraíchin nimiréhuahuë' nosoroatonpoa', nicha'ërinpoa'. Co nosororin- poahuë' naporini, canpoanta' ya'ipinpoa' ta'huanchitërihuahuë'," ténin.

Israiro'santa' noya nanan natëcaso' ya'huërinso'

³⁰ Napoahuarë' ¿ma'ta' tēcarihua'? ténahuë yonquiato. Nisha piyapi'sa' hua'qui' co Yosë yonquipirinahuë', inari anoyacancantérin. "Yosë no'téquën nonin," ta'tona' natëpi. Napoaton noya ni'nin. ³¹ Israiro'saso nimirinhuë' tapona': "Moisësë pënëntérinso' natëhuatëhua', Yosë noya ni'sarinpoa'", topirinahuë'. Co nanitopihuë' no'téquën natëcaiso' ni'ton, co Yosëri noya ni'ninhue'. ³² ¿Onpoatonta' co noya ni'ninhue'? "Pënëntérinso' nanan no'téquën natëhuatëhua', nónya cancantarëhua'", topirinahuë', co nanitopihuë'. "Yosëíchin nanitérin anoyacancantinpoaso'", ta'caiso nimirinhuë', co Quisocristo nohuantopihuë'. Inapoatona', pancara'pi i'patérëso pochin ni'pi. Ina marë' Yosëri co noyahuë' ni'nin. ³³ Yosë quiricanën quëran naporin:

"Sionquë Cristo a'papirahuë', co nohuantopihuë'.

Inapoatona' pancara'piquë i'parëso pochin ni'pi. Co nohuantopihuë' ni'ton, anotérëso pochin nipi.

Nimirinhuë', insosona Cristo nohuantuohuachin, co onporonta' atapanarahuë'. Noya ni'sarahue huachi," ténin Yosë.

10

¹ Pa'pi nohuantérahuë israiro'sa' cha'ëcaiso'. Ina marë' iyaro'sa', chiníquën Yosë nontárahua. ² Téhuëñchachin Yosë yachinotopirinahuë', co nanamën no'téquën yonquipihuë'. ³ Yosëíchin anoyacancantérinpoa'. Nimirinhuë', co nohuantopihuë' ina nanan imacaiso'. "Pënëntérinso' natëhuatëhua', Yosë noya ni'sarinpoa'", toconpi. "Quëma Siniro anoyacancantocoi," co itopihuë'. ⁴ Iráca Moisësë pënëntérin. Iporaso nimirinhuë' co ina natërehuaso marë' Yosë noya ni'nipoahuë'. Quisocristo nani o'marin oshanënpoa' inquitinpoaso marë'. "Quisocristoíchin anoyacancantarainpoa'", topatëhua', Yosë noya ni'sarinpoa'.

⁵ Moisëséri ninshitérin pënëntérinso nanan imacaiso marë'. "No'téquën natëhuatama', Yosë noya ni'sarinquëma'. Ya'ipiya natëcaso' ya'huërin," ténin ninshitaton. ⁶ Canpoaso nimirinhuë' Quisocristo imapatëhua', Yosë noya ni'sarinpoa'. Quisocristo nanamënso' co sacaiyahue' nitotacaso'. "¿Inta inápaquë pantapon Quisocristo quëmacaso marë??" co ta'caso' ya'huërinhuë'. Nani o'marin. ⁷ "¿Inta' chimipiro'sa' ya'huëpiquë papon ina quëran Cristo quënantacaso marë??" co ta'caso' ya'huërinhuë'. Nani nanopiantarin.

⁸ ¿Ma'ta' quiricanën quëran anitotérinpoa'? “Ina nananso', co sacaihuë' nitotacaso'. Nanamënpoa quëran sha'huicaso ya'huérin. Cancanënpoa quéranta', natëcaso ya'huérin,” itérinpoa'. Inasáchin natëco', itéranguëma' canta'. ⁹ Tata Yosë nohuanton, Quisocristo tëhuëñchachin nanopiantarin. Ina cancanënpoa quëran natëhuatëhua', “Quisocristoíchin imarahuë,” topatëhua', Yosë anoyacancantarinpoa'. ¹⁰ “Yosë co onporonta' nonpin tarinpoahuë'”, ta'tëhua', cancanënpoa quëran natëhuatëhua', noya ni'sarinfoa'. “Caso' Quisocristo imarahuë,” topatëhua', naporoo chachin anoyacancantarinpoa'.

¹¹ “Insosona Quisocristo natëhuachin, co sëtarinhue'. Co a'poarahue',” ténin Yosë quiricanënqué. ¹² A'naíchin Yosë ya'huérin. Ya'ipinpoa' hua'anëntérinpoa'. Co cotioro'saráchin na'con nosororinhue'. Nisha piyapi'santa' nosororin. Ina nontohuatëhua', noya catahuarinfoa'. ¹³ “Oshanëhuë Siniro inquitoco,” topatëhua', anoyacancantatonpoa' nicha'ësarinfoa'. ¹⁴ Napoaponahuë', co a'chintohuatëhuahuë', co nitotapihuë'. Co nitotohuachinahuë', co nanitapihuë' natëtacaiso'. Co natëtohuachinahuë', co nanitapihuë' Yosë nontacaiso'. Napoaton a'chintacaso' ya'huérin. ¹⁵ Co Yoséri a'china'piro'sa' a'pahuachinhue', ¿onpo nitotaponata'? Yosë quiricanën quëran naporin: “Ma noyacha ni'ton, noya nanan sha'huitaonpoa' huë'sarin paya,” ténin.

¹⁶ A'naquënso niperinhue', noya nanan natampirinahuë', co nanitapihuë' natëtacaiso'. “Nanamëni Siniro, sha'huitopirahuë' co insonta natëtérinhuë'”, ténin Isaiasë iráca. ¹⁷ Quisocristo nanamëni natanacaso' ya'huérin. Natanpatëhua': “No'tequën nonin,” topatëhua', natëtarihu'.

¹⁸ ¿Co natanpihuë' ti? ¡Nani mini natanpi! ténahuë. Yosë quiricanënqué naporin: “Nisha nisha parti nanamëni sha'huitopi.

Ya'ipi parti nahuinin,” ténin Yosë quiricanënqué.

¹⁹ Naquëranchin natainquéma'. Israiro'saso' natanaponaraihuë', ma'sona tapon naporinso' ¿co nitotapihuë' ti? Nitotaponaraihuë', co natëpihuë'. Moisësë ninshitaton, naporin:

“Nisha piyapi'sa' co yonquipirinacohue' catahuararahuë ni'ton, canpitariso' a'pitarama'.

Ina marë' no'huitarama', ténin Yosë,” itérin.

²⁰ Isaiasënta' co të'huatonhuë', Yosë noninso' sha'huirin.

“Nisha piyapi'sa' co yanohuitopirinacohue', iporaso' imasarinaco.

Co iráca nohuantopirinacohue', iporaso' nohuitarinaco, ténin Yosë,” itérin.

²¹ Israiro'saso niperinhue' co yanatëpihuë'. Inapita yonquiaton, Isaiasë quëran taantarín: “Iráca quëran huarë' yacatahuarahuë. Imirahuë ihuëtatë pochin nitato: ‘Huëco' catahuainquéma',’ itopirahuë', co yanatérinacohue'. Co natantochináchinhue' cancantarípi, ténin Yosë,” itérin.

11

Israiro'sa' huayoninso'

¹ Napoaton natananquéma': ¿Israiro'sa' co natëtopiso marëhuë' Yoséri a'pomiatérin ti? Co a'porinhue'. Ipora huanta' piyapinënpita ni'ton, nosororin. Canta' Israiro piyapico. Tata Apraanso' shimashonëhuë. Mincamin huëntonqué nasitërahuë.

² Inapitaso', iráca Yoséri huayonahuaton acorin piyapinënpita nicacaiso marë'. Co a'porinhue'. Iráca Iniasë naporinso' Yosë quiricanënqué ninshitopiso' nitotërama'. Inariso pënënpirinhuë', israiro'sari no'huipi. Napoaton Yosë nontohuachina, inapita sha'huirapirin. ³ “Na'amiachincoi Siniro pënëntopirahuë'. Co nohuantatonaraihuë', a'naquëncoi têparinaco. Artaroro'sa' chinota'huainquénsi marë' a'mitëraisonta' tê'yatopi.

Casáchin pënëntapirahuë', yatëparinaco canta',” itérin. ⁴ Napotopirinhuë', ¿ma'ta' Yoséri itantarín? “A'naquën mini mamansi moshapi, Paaro itopiso'. Niperinhue', ca nohuanto, canchisë huaranca quëmapi'sa' chinotarinaco. Co mamansi moshapihuë'”

itérin. Nani ina nitotërama'. ⁵ Inapochachin iporanta' caraya pochin Yosë huëntonënqué ya'conpi. Inaora nohuanton, nosoroaton, Yosëri aya'conin. ⁶ Inaora nohuanton, catahuarin. Co noya nipo marë' catahuarinhüe'. Noya nipo marë' huayonin naporini, co huachi inaora nohuanton, catahuacaso' ya'huë'itonhuë'.

⁷ Napoahuarë', ¿ma'ta' nipa chin tēcarihua'? Na'a israiro'sa' Yosë huëntonënqué yaya'conpirinahuë', co inahuara nanitopihuë' noya cancantacaiso'. A'naquén huayoninsopitaso' Yosë nohuanton, ya'conpi. A'napitaso niperinhuë' co natantochináchinhüe' cancantopi. ⁸ "Yosëri tananpitërin ni'ton, huë'érëso pochin cancantopi. Ya'pirahuanaponaraihuë', co quënantérëso pochin nipi huë'. Huëratëhuanaponaraihuë', co natantérëso pochin nipi huë'. Ipora huanta' ina pochin nisapi," ténin Yosë quiricanënqué.

⁹ Iráca Tapinta' tapon:

"Yosë no'huipi ni'quëhuarë', ana'inchin. Nani ma'sha ya'huëtopirinahuë', co Yosë yon-quipihuë'.

Coshatatona', capa cancantapirinahuë', ina quëran chachin nitapicanaina'. Yosëri ana'inchin.

¹⁰ Somaraya pochin cancantopi ni'quëhuarë', ama quënantérëso pochin cancanchinaso-hüe'.

Yosë nohuanton, chiníquén parisitomiachina'," ténin iráca.

Inapochachin ipora huanta' nisapi.

Nisha piyapi'sa'ya'conpiso'

¹¹ Napoaton natanaranquëma'. ¿Israiro'sa' co yanatëpihuë' ni'quëhuarë' Yosëri a'pomiatërin ti? Co Yosëri a'pomiatërinhuë'. Niperinhuë', co imapihuë' ni'ton, nisha piyapi'santa' Yosëri anoyacancantarín. Ina quëran israiro'saso', apiratona' yon-quiaipi: "Canpoanta' inapita pochin cancantohuatëhua', Yosë noya ni'sarinpoa'," tosapi.

¹² Inapita co imatonahuë' têhuëpiso marë', iporaso' ya'ipi piyapi'sa' nanitopi Yosë huëntonënqué ya'conacaiso'. Nisha nisha piyapi'sa' niponaraihuë', Yosëri noya ni'sarin. A'na tahuëri na'a cotioro'sa' imaantahuachina', noya noya nisarin.

¹³ A'naquëmaso' nisha piyapi'sanquëma'. Yosë a'parinco a'chinta'huanquëmaso marë'. Ina marë' noya cancantérahuë. Pa'sápato, a'chintaranquëma'. ¹⁴ Na'aquëma' imapatama', a'naquén israiro'santa' nohuantapi imacaiso' nimara. Inapitanta' Yosëri anoyacancantarín. ¹⁵ Iporaso Yosëri tananpitërin ni'ton, nisha nisha piyapi'sa' ina nohuitapi. A'na tahuëriso niperinhuë' israiro'santa' imaantahuachina', noya noya nisapi. ¿Ma pochinta' nisapi? Chimipi nanopiantarinso pochin nisapi, ténahuë. ¹⁶ Ni'co'. Pan nipa chinara, ya'nan nipo Yosë marë' acihuachina, ya'ipi chachin noya ninin. Nara itënta' noya nipa chinara, së'paquëonta' noya nisarin.

¹⁷ Nara quëran a'chinchinquëma'. Oripo nara së'pa' co noya nitohuachinahuë', nishitëtahuatë', të'yatërë'. Ina quëran apinapinso' oripo së'paquén têranta' achinpitëre' papotacaso marë'. A'naquén israiro'saso' oripo nara së'pa pochin nipi. Co natëpihuë' ni'ton, Yosëri tananpitërin. Canpitaso' nisha piyapinquëma' niperamahuë', huëntonënqué aya'coninquëma'. Piyapinënpita pochachin ni'ninquëma'. ¹⁸ Niperinhuë', ama israiro'sa' nocancosohuë'. Ama: "Quiyaso' noya noyacoi," tocosohuë'. Së'paquëni co nara achinir-inhuë'. Itëni achinirinso'.

¹⁹ "Quiyanta' imaca'huaiso marë' israiro'sa' tananpitërin," ténama' nimara. ²⁰ Yosëri tananpitërin mini. Niperinhuë', co ina marë' tananpitërinhuë'. Co Quisocristo nohuantopihuë' ni'ton, tananpitërin. Canpitanta' imarama' ni'ton, noya ni'ninquëma'. Napoaton ama inapita nocancosohuë'. Ni'cona canpitanta' Quisocristo nariantotama'.

²¹ Israiro'sa'ton piyapinënpita pochin ni'pirinhuë', ana'intërin. Quisocristo nariantohuatama', ana'intarinquëma' canpitanta'.

²² Ma noyacha Yosëo' nosororinpoa paya. Co natëpisopitasohuë' nimirinhue', chiníquën ana'intarin. Inasáchin imapatama', nosoromiatarinquëma'. Nimirinhue' naniantohuatama', ana'intarinquëma' canpitanta'. ²³ Naporahuaton israiro'santa' imaantahuachina', Yosëri piyapinënpita pochin niantarin. Nara së'para'huain achinpitantarëso pochin acoantarin. Yosë ni'ton, nanitaparin. ²⁴ Nani a'chintéranquëma'. Canpitaso' apinapin nara pochin ninama'. Apinapins' nara së'para'huain nishitetahuatë', oripo nara së'para'huain achinpihuatëra, papotërin. Aquëtë huarë' së'para'huain chachinso' achinpitaantahuatëra, a'naroáchin papotaantarin. Inapochachin israiro'sa' noya imapachina', Yosëri noya niantarin.

Na'a israiro'sa' imaantapiso'

²⁵ Yosë yonquirinso' iyaro'sa' sha'huichinquëma', no'tequën nitotacamaso marë'. A'napita co nitotopirinahuë', ama nocantamaso marëhuë' sha'huitaranquëma'. "Quiyasáchin no'tequën yonquirai," ama tocosohuë'. Iporaso' na'a nisha piyapinquëma' Yosë huëntonënqué ya'conarama'. Ya'ipi Yosë nohuantérinquëmasopita ya'conamaqué huarë' na'a israiro'sa' co natantochináchinhue' cancantapi. ²⁶ A'na tahuëriso nimirinhue' ya'ipi israiro'santa' cha'ësapi huachi. Yosë quiricanënqué ninorinso pochachin imaantapi. Iráca ninshitaton, naporin:

"A'na tahuëri a'nara' Israiro quëmapi Quirosarin quëran o'mararin piyapi nicha'ëcaso marë".

Cacopo shinpita co noyahuë' yonquipiso' anariantarin.

²⁷ Oshanëna' inquitahuato, piyapinëhuëpita pochin ni'sarahuë.

Apraan sha'huitérahuëso chachin napotarahuë," ténin Yosë.

²⁸ Iporaso' israiro'sa' co Quisocristo nanamën natëpihuë'. Yosë inimicotopirinahuë', canpitaso' imarama'. Napoaponahuë', israiro'sa'ton acorin piyapinënpita nicacaiso marë'. Iráca Apraan, Isaco, Cacopo, inapita sha'huitérin ni'ton, ipora huanta' shin-pita nosoroarin. ²⁹ Nani Yosëri sha'huitohuachin, inachachin nisarin. Co onporonta' nisha nontarinhue'. Huëntonënqué aya'compachin, co onporonta' naniantarinhue'. ³⁰ Iráca co canpitaso' natëpiramahuë', co israiro'sa' nohuantopihuë' ni'ton, Yosë nosoroatënquéma', catahuarinquëma'. ³¹ Iporaso' israiro'sa' co natëpihuë'. Co natëhuachinarahuë', Yosë catahuarinquëma'. Ina ni'pachina', yonquiantapona' ni'ton, a'na tahuëri inahuanta' nosoroaton, catahuaantarin. ³² Yosëri ya'ipi piyapi'sa' tananpitérin ni'ton, co natëtochináchinhue' cancantopi. Ya'ipinpoa' nosoroinpoaso marë' naporin.

³³ ¡Ma noyacha Yosëo' catahuarinpoa paya! ¡Ma noyacha yonquirin paya! Ya'ipiya nitotérin. Yonquirinsopita co nitotochináchinhue' ninin. Naporahuaton, ina pochin cancantacaso' co onporonta' nanitarihuahuë'. ³⁴ "Co insonta inaora Yosë yonquirinso' nitotérinhuë'. ¡Co incari téranta' nanitérinhuë' noya noya ayonquicaso!" ³⁵ ¿Incarita' ma'sha Yosë quëtérin ni'ton, i'huërtacaso' ya'huérin? Co incari téranta', ténin quiricanënqué. ³⁶ Ya'ipi ma'sha Yosëri ninin. Ina nohuanton, co ta'huantaréhuahuë'. Yoséichin pa'yatacaso marë' ya'huérhua'. Inaora nohuanton, anoyacancantérinpoa'. Ma noyacha Yosëo paya, itahua'. ¡Inasáchin chinotahua! Amen.

12

Yosë marë' sacatéréhuaso'

¹ Yosë na'con nosororinpoa' ni'ton, ya'ipi cancanëma quëran, iyaro'sa', ina imaco'. Iráca Yosë chinotohuachinara, ma'sha tēpapi. Canpitaso nimirinhue' Yosë marë' nanopitoma', nohuantérinsoráchin nico'. Ina yonquiatoma', nani tahuëri noyasáchin nico'. Ina Yosë nohuantérin. Inapohuatama', Yosë noya chinotarama'. ² Iporaso' notohuaro' piyapi'sa' co Yosë natëpihuë'. Ma'sharáchin yonquiatona', co Yosë yonquipihuë'. Ama inapita nonancosohuë'. Nani tahuëri Yosë nontoco' yonquirinso chachin quëchinquëma'.

Ina yonquihuatama', nohuantérinso chachin anitotarinquëma'. Ina quëran noya noya cancantohuatama', noya ni'sarinquëma'.

³ Yosë nosoroatonco, acorinco piyapi'sa' a'chinta'huaso'. Nani tahuëri catahuanco. Napoaton pënénaranquëma'. Ya'ipinquëma' sano yonquico'. Ama a'napita nocancosohuë'. Yosë nisha nisha acorinpoa'. Nisha nisha catahuarinpoa' ma'sona nohuantérinso' nicacaso'. Napoaton, co a'napita nocanacaso' ya'huërinhuë'. No'téquën yonquiatoma', ma'marësona acorinquëmaso' nitotoco'. A'naya a'nayanquëma' anitotarinquëma'. ⁴ Ni'co'. Imira, nantë', ya'pira, inapita ya'huëtinpoa'. Imira ya'huëtinpoa' së'quëtacaso marë'. Nantë' ya'huëtinpoa' iratacaso marë'. Nisha nisha ya'huëtinpoa' nisha nisha nicacaso marë'. Co ya'ipiya inachachin nipihiue'. ⁵ Inapochachin ya'ipi Quisocristo imarëhuasopita a'naichin nonënpoa pochin ninëhua'. Ya'ipinpoa' ina imarëhua' ni'ton, ina pochin ninëhua'. Nisha nisha nitotérëhuaso' niriuhuarahuë', nicatahuarëhua'. A'na huëntonaca ninëhua'.

⁶ Yosë nosoroatonpoa', acorinpoa' nisha nisha nicacaso'. Ma'marësona acohuanchoipa', noya niahua'. A'naquën, yonquirinso chachin anitotérin sha'huicaiso marë'. Anitotohuachiniquëma', ya'ipiya no'téquën sha'huico'. ⁷ Ina nohuanton, a'naquën nitotérin catahuatacas'. Nitocatahuatohuatama', noya catahuatoco'. A'naquën nitotérin a'chinacaso'. Nitoa'chinpatama', noya a'chinco'. ⁸ A'naquëonta' nitotopi achinicancanacaso'. Nitotohuatama', noya cancantatoma' achinicancanco' imamiachina'. A'naquëonta' ina nohuanton, coriqui, ma'sha, inapita ya'huëtopi. A'napita quëtohuatama', ama piyapi'sa' noya nicainënquëmaso marë' quëtocosohuë'. Yosë yonquiatoma', quëtoco'. "Ina nosororinco ni'ton, carinta' nosoro'i," ta'toma', quëtoco'. A'naquëonta' ina nohuanton chachin, chiníquën nanan ya'huëtopi. Ansianohuë nípon, hua'anhuë nípon ya'conpatama', ama chirotomarahuë', noya pënëntoco'. Noya nonco'. A'naquëonta' ina nohuanton, cania'piro'sa', sa'ahuaros'a', inapita catahuapi. Inapita nicapoma' pa'patama', noya cancantatoma', catahuaco'.

Ma'pitasona nicacaso' ya'huërinso'

⁹ Ya'ipi piyapi'sa' nosoroco'. Cancanëma quëran huarë' nosoroco'. Co noyahue' ninamasopita a'poco'. Noyasáchin nico'. ¹⁰ Imaramasopita capini noya ninosoroco'. Iyaparima pochin nini'co'. Ama "Caso' noya noyaco," tocosohuë'. A'napita noya noya ni'co'. ¹¹ Ama chirotomarahuë', noya sacatoco'. Ya'ipi cancanëma quëran noya yonquiatoma', Yosë marë' sacatoco'. ¹² "Yosë ananpitaantarinpoa'," ta'toma', noya cancantoco'. Ma'sha onpohuatama', ama no'huitocosohuë'. Chiníquën cancantatoma', ahuantoco'. Apira apira Yosë nontoco'. ¹³ Imapisopita pahuantohuachina', ma'sha quëtoco'. Ni'toro'sa' ya'notohuachinënquëma', noya nontatoma', a'caco'.

¹⁴ Piyapi aparisitohuachinënquëma', ama no'huitomarahuë', noya nontoco'. Yosë nontoco' inahuanta' catahuacaso marë'. Ama Yoséri ana'intacaso' yonquirapicosohuë'.

¹⁵ A'napita na'con yonquico'. Campitaora ninatanamaso pochin cancantoco'. Noya cancantohuachina', ina marë' campitanta' noya cancantoco'. Sëtohuachina', sëtoco'.

¹⁶ Noya ninicatoma' ya'huëco'. Ama a'na piyapi téranta' nocancosohuë'. Topinan piyapi pochin cancantatoma', ya'ipiya catahuaco'. Ama: "Caso' na'con na'con nitotérahuë," tocosohuë'. Ama ina pochin yonquicosohuë'.

¹⁷ A'na piyapi ma'sha onpotohuachinënquëma', ama i'huërëtocosohuë'. Noya nico' a'napitanta' catahuacaso marë'. ¹⁸ Ama piyapi'sa' no'huicosohuë'. No'huihuachinënquëma', ama campitariso' no'huicosohuë'. Onpopionta' nanan anoyatoco'.

¹⁹ Nosoroatënquëma' iyaro'sa', oshaquëran pënénanquëma'. Ama i'huërëtocosohuë'. Tananpitoco' Yoséri ana'inchin. Quiricanën quëran naporin: "Co noyahue' nipesopita cari ana'intarahuë. No'téquën ana'intarahuë," ténin Yosë.

²⁰ Napoaton "Inimiconëma' tanahuachin, a'caco'. Yamorohuachin, o'shitoco'. Inapotohuatama', inimiconëma' atapanarama'," ténin anta'. ²¹ Ama sopai natëcosohuë'.

Nani ma'sha ayonquirinquëmaso' a'pomiatoco'. Yosë yonquiatoma', noyasáchin nico'. Inapohuatama', sopai minsëarama'.

13

¹ Copirno acorinsopita natëco'. Yosë nohuanton, copirno, chirinchi, coisë, hua'an, inapita ya'huërin. Co Yosë nohuantérinhue' naporini, co inapita ya'cointonahuë'. Napoaton natëco'. ² Co copirno acorinsopita natëhuatamahuë', Yosënta' co natëaramahuë'. Ina marë' ana'intarinquëma'. ³ Noya nipatama', co hua'ano'sa' no'huiarinënquëmahuë'. Co natëhuatamahuë', no'huiarinënquëma' ni'ton, të'huatacaso' ya'huërin. ¿Nohuantërama' hua'ano'sa' noya nicainënquëmaso'? Noya nico' nipachin noya ni'inënquëma'. ⁴ Yosëri acorin a'painënpoaso marë'. Nipirinhue', co noyahue' nipatama', tē'huatoco'. Co topinan quëran chiniquën nanan quëtérinhue'. Yosëri acorin co noyahue' nipisopita ana'intacaso marë'. ⁵ Napoaton hua'ano'sa' natëco' ana'intochinënquëma'. Isonta' yonquicaso' ya'huërin: "Yosëri acorin natëcaso marë', ta'toma', natëco'. ⁶ Ina nohuanton, hua'ano'sa' ya'huërin noya nicacaiso marë'. Ina marë' nani tahuëri sacatapi. Napoaton pahuërëtacaso' camaitérins'o' pahuërëtarama'.

⁷ Ya'ipiya no'tequen pahuërëtoco'. Hua'ano'sa' catahuacaso marë' pahuërëtacaso' ya'huëhuachina', quëtoco'. Chiniquën nanantopi ni'ton, noya nicatoma', natëco'.

⁸ Nihuitohuatama', a'naroáchin pahuërëtoco'. Ya'ipi piyapi nosoroco'. Inaso' na'con na'con Yosë nohuantérin. Nosorohuatama', iráca pënëntérins'o' noya natëarama'. ⁹ Iráca pënëntohuachina, itérin: "Sa'ahuanpatama', ama a'na sanapi së'huacosohue'. Ama tēpatocosohue'. Ama manta' ihuatocosohue'. Ama nonpinapicosohue'. Ama a'na piyapi ma'shanënpita nohuantapatocosohue', ténin. Ninosorohuatéhua', ya'ipi Yosë pënënipoaso' natëaréhua'. "Quëmaora ninosororanso pochachin a'napitanta' nosoroquë", ténin Yosë. ¹⁰ A'napita nosorohuatama', co no'huiaramahuë'. Co pinosaramahuë'. Noya catahuarama'. Napoaton nosorohuatama', Yosë noya natëarama huachi.

¹¹ Ya'nan imarihua': "Pahuánarin Quisocristo o'mantacaso'", ténéhua'. Iporaso nimirinhue' nani o'mantacaso' tahuëri ya'caritëriarin. Naporo' nicha'ësarinfoa'. Napoaton ama huë'erëso pochin yonquicosohue'. Yosë no'tequen natëco'. ¹² Hua'qui' piyapi'sa' co noyahue' nicatona', tashi pochin cancantopirinahuë'. Iporaso' Sinioro tahuërinën ya'caritëriarin. Napoaton ama tashi pochin cancantahuasohue'. Sontaro'sa' hua'na quëran a'mopiso pochin tahuëri pochin cancantatéhua', noyasáchin niahua'. ¹³ Tahuëri nipachina, a'ninquëchin ni'ton, noyasáchin ninë'. A'naquëns'o nimirinhue' pitasachin pa'yatopi. Na'a tahuëri nansarápi, o'osápi, coshatápi, no'piápi. Ama pitaso' pa'yatocosohue'. Ama no'picosohue'. Ama pi'pisha térranta' nimonshtacamaso' yonquicosohue'. Ama nino'huicosohue'. Ama a'na piyapi noyapatoma', no'huicosohue'. ¹⁴ Sontaro'sa' hua'na a'mopiso pochin Quisocristo ya'copirinfoa' ama sopai minsëinpoaso marëhuë'. Napoaton Quisocristo na'con yonquiatoma', ina pochachin cancantoco'. Ina natëtoma', ama pi'pian térranta' yonquicosohue' co noyahue' nicacamaso marë'.

14

Co ninocanacaso' ya'huërinsuhue'

¹ A'naquëns'o' Quisocristo imasapirinahuë', co ya'ipi cancanëna quëran natëyáterapihuë'. "Pënëntérinsonta' natëcaso' ya'huërin," topi. Inapitanta' huë'pachina', noya nontoco'. "Huëco' iyaro'sa' Yosë chinotahua', itatoma', cortoquë ichiya'conco'. Ama ninocanacamaso marë' ninontocosohue'. ² A'naquëns'o' "Quisocristoíchin nicha'ërinpoa' ni'ton, ya'ipi cosharo' noya capacaso', ta'tona' ya'ipi ca'pi. A'napitaso nimirinhue', "Nosha ca'patéhua', oshahuanëhua", ta'tona' ya'ipi nosha a'popi. ³ Nosha ca'patama', ama nosha a'poro'sa' nocancosohue'. Nosha a'pohuatamanta' "Nosha

ca'nama' ni'ton, co noyahue' ninama'," ama itocosohue'. Cato chachinquëma' Yosë noya ni'ninquëma' ni'ton, ama ninapotocosohue'. ⁴ Co a'napita piyapinën nocanacaso ya'huérinhue'. Piyapinën noya nipachina, co noyahue' nipachinanta' hua'anëni nitotarinso'. Yoséichin ya'ipinpoa' hua'anëntérinpoa' ni'ton, no'tequën sha'huitarinpoa'. Inasáchin nanitérin achinicancainpoaso'. Co canpoa capiniso' ninocanacaso' ya'huérinhue'.

⁵ Inapochachin a'naquën: "Cotio chinoto tahuëri noya noya," topi. Naporo' tahuëri chinotatona', Yosë chinotopi. A'napitaso nimirinhue' "Nani tahuëri noya Yosë chinotacaso," topi. Co tahuëri imarëhuahuë'. Quisocristo imarëhuaso'. Napoaton ama nisha nisha yonquicosohue'. A'naya a'nayanquëma' cancanëma quëran na'con yonquico' noya nicacamasso marë'. ⁶ Ma tahuérisona chinotohuatama', Yosë yonquiatoma', ina chinotarama'. Inapochachin nosha ca'patama', Yosë yonquiatoma', coshatërama'. "Yosparinquëen, Siniro," itërama'. Co nosha ca'na'pinquémahuënta' Yosë yonquiatoma', coshatërama'. "Yosparinquëen, Siniro," itërama' canpitanta'. ⁷ Co canpoara nipa'yatacaso marë' ya'huérëhuahuë'. Chiminpatëhuanta' co canpoara marë' chiminarihuahuë'. ⁸ Siniro piyapinënpoa' ninëhua'. Ina natëcaso marë' nanopitëhua', ya'huérëhua'. Ina yonquiinpita chiminarihua'. Nanpihuatëhuanta', inasáchin hua'anëntarinpoa'. Ina quëran chiminacaso' nipachin, ina yonquiatëhua', chiminarihua'. Inasáchin imarëhua'. ⁹ Ya'ipinpoa' hua'anëntinpoaso marë' Quisocristo chiminin. Nani chimirin minsërahuaton, chini chiniquëen nanantaton, nanopiantarin. Napoaton nanopirëhuasopita, chiminpisopitanta', ya'ipinpoa' hua'anëntarinpoa'.

¹⁰ Ayaro' tahuëri ya'ipinpoa' natanarinpoa' co noyahue' nipesopita ana'intacaso marë'. ¿Onpoatonta' nipachin iyaparin nocanan? Co ina pochin nicacaso' ya'huérinhue'. Yoséichin no'tequën anitotarinpoa'. ¹¹ Iráca quiricanënqué naporin: "Caso' Yoséco ni'to, co nonpinahuë".

A'na tahuëri ya'ipi piyapi'sa' isonahuatona', chinotarinaco.
'Quëmasáchin Yosënquëen,' itarinaco," ténin Yosë.

¹² Ayaro' tahuëri nanihuachin, ya'ipinpoa' Yosë natanarinpoa'. Ma'marësona ma'sha ninëhuaso' natanarinpoa'. A'naya a'nayanpoa' no'tequën sha'huitacaso' ya'huapon.

Noya noya imacaso marë' nicatahuahua'

¹³ Napoaton ama huachi ninocancosohue'. A'napita imapisopita catahuaco' noya cancanchina'. Ni'cona anishacancantotama'. ¹⁴ Ya'ipi cosharo' noya capacaso'. Co manta' a'pocaso' ya'huérinhue'. Siniro Quisoso imato, naporahuë. Napoaton nitotërahuë. A'naquënso nimirinhue': "Co Yosë nohuantërinhuë' nosha capacaso'," taponaraihuë', ca'pachina', tëhuëñchachin oshahuapi. ¹⁵ Isonta' yonquico'. A'naquëma' ya'ipi cosharo' noya ca'nama'. A'naquënso nimirinhue' co nosha ca'pihuë'. "Huëco' ina ca'ahua'," itohuatama', co noyahue' cancantapona' nimara. "Co noyahue' capacaso," taponaraihuë', ca'pachina', co huachi noyahue' cancantapi. Napoaton inapita nosoroatoma', ama napotocosohue'. Ama cosharoachin yonquiatoma', a'napita anishacancantocosohue'. Inapita marënta' Quisocristo chiminin. ¹⁶ Ma'sona térranta' noya nicacaso' ya'huëpirinhue', a'napita co noyahue' ni'pachinënquéma', ama napocosohue'. Ni'cona co noyahue' nicatënënquéma' nonapichinënquéma'. ¹⁷ Yosë noya hua'anëntérinpoa'. Ina imapatëhua', noya nissarëhua'. Asanocancanarainpoa' ni'ton, co nino'huicaso' ya'huérinhue'. Yosëso', ca'nëhuaso', o'orëhuaso', inapita co onpopinchin yonquirinhue'. Ispirito Santo catahuuarinpoa' noya cancantahuaso'. Catahuahuachinpoa', capa cancantarihua'. ¹⁸ Ina pochin Quisocristo imapatëhua', Yosë noya ni'sarinpoa'. Piyapi'santa' noya ni'sarinpoa'.

¹⁹ Napoaton noya ninicatëhua', ya'hua'ahua'. Nicatahuahua' noya noya imacaso marë'. ²⁰ Ama ca'namaso marë' a'napita anishacancantocosohue'. Ya'ipi cosharo' noya capacaso'. Co manta' a'pocaso ya'huérinhue'. Nimirinhue', a'naquën co ina

natëtonahuë', ca'pachina', co noyahuë' cancantapi. Napoaton co yaca'pachinahuë', naporor' canpitanta' tananpitoco' nisha cancantohuachina'. ²¹ Ama manta' a'napita anishacancantacamaso' yonquicosohuë'. Ca'namaso marë', o'oramaso marë', ama inapita marë' a'napita anishacancantocosohuë'. Iyaparin pochin nosoroatoma', catahuaco' noya noya imacaiso marë'. ²² Ma'sona täranta' nipatama', "Yosë nohuantérinso' nisarahuë," ta'toma', noya nico'. Cancanënpoa quëran huarë': "Noya nisarahuë," topatëhua', noya cancantarihua'. ²³ Napoaponahuë': "Co Yosë nohuantérinhuë' iso cosharo capacahuaso'," tarihuarahuë', ca'patëhua', oshahuanarihua'. Ina pochin yonquiarihuarahuë' ma'sona täranta' nipatëhua', oshahuanarihua'. Nipirinhuë', "iso cosharo noya capacaso'," tēcaton ca'patan, co oshahuanaranhuë'.

15

Nicatahuacaso' ya'huërinso'

¹ Canpoaso' ya'ipi cancanënpoa quëran imarëhua'. "Quisocristoíchin nicha'érinpoa'," ta'tëhua', co nisha nisha yonquirëhuahuë'. A'naquënso niperinhuë' co ya'ipi cancanëna quëran natëyátérapihuë'. Inapitanta' oshaquëran pënénatëhua', catahuahua' noya imaina'. Ama canpoara nohuantéréhuasoráchin yonquia'huasohuë'. ² A'napita yonquiatëhua', catahuahua' noya cancanchina'. Catahuahuatëhua', noya noya imasapi. ³ Quisocristoso' co inaora nohuantérinso' yonquirinhuë'. Yoséíchin natërin. Ina nontaton, itërin: "Quëma inimiconënpita Tata, no'huirinënquën. Natëranquën ni'ton, no'huirinaco canta'," itërin. Quiricanënquë naporinso chachin ninin. ⁴ Iráca Yosë quiricanënquë na'con ninshitopi. Canpoanta' yonquicaso marë' napoppi. "Iráca imapisopitanta' ma'sha onpoaponaraihuë', Yosë yonquiatona', ahuantopi. Yoséri noya catahuahuachina, imamiatopi. Inapochachin Yosë noya catahuarinpoa' canpoanta'," ta'caso marë' ninshitopi. ⁵ Yosëso' catahuarinpoa' ya'ipiya ahuantacaso'. Ina achinicancaninpoa', ina pochin cancantacaso marë'. Ina catahuainquëma' noya ninicatoma' ya'huëcamaso marë'. Quisocristo naporinso pochachin nico'. ⁶ Ina quëran co nisha nisha yonquiaramahuë'. Napopináchin cancantatoma', nöya Yosë chinotarama'. Hui'nin chachin hua'anëntérinpoa', Quisocristo imarëhuaso'. "Ma noyacha Yosëso' catahuarinpoa paya," tosarama'.

Nisha piyapi'santa' Yosë imacaiso ya'huërinso'

⁷ Quisocristo co nocaninpoahuë'. Ina pochin canpitanta' ninosoroatoma', ama ninocancosohuë'. Nisha nisha piyapinpoa' ni'tëhua', pi'pisha nisha inachintérëhua'. Nisha nisha nirihuaharuë', noya ninontahua'. Ina quëran "Ma noyacha Yoséri catahuarin ni'ton, ninosoropi paya," tosapi. ⁸ Iráca cotioro'sa' shimashonëna' nontaton, Yoséri itërin: "A'na tahuëri Cristo a'paimarahuë," itërin. Napoaton Quisocristo a'paimarin cotioro'sa' catahuacaso marë'. Sha'huitërin ni'ton, a'paimarin. Co onporonta' nonpininhuë'. ⁹ Nisha piyapi'sarinta' imacaiso marë' o'marin. A'chintohuachinara, inahuanta' Yosë chinotapi. "Ma noyacha nosororinpoa paya," tosapi. Quiricanënquë ninshitopi.

"Nisha nisha piyapi'sa' ya'huërinquë, Siniro, chinotaranquën.

Yonquiatënenquë, cantararahuë," tēnin.

¹⁰ Ina quëran taantarín:

"Cotioro'sa' Yosë chinotatona', noya cancantopi. Canpitanta' nisha piyapi'sanquëma' nipomarahuë', jina chinotatoma', noya cancantoco!" tēnin.

¹¹ Naquëranchin taantarín:

"Tata Yosë chinotatoma': 'Ma noyanquëncha quëmaso paya,' itoco'.

Nisha nisha piyapi'saquëmanta' ina chinotoco'," tēnin.

¹² Isaiasënta' Quisocristo ninoton, ninshitërin.

"A'na tahuëri Quisi shiin nasitimapon.

Cotio piyapi níponahuë', mashotohuachin, ya'ipi piyapi'sa' hua'anëntarin.
Nisha nisha piyapi'sarinta' ina natëtona', ninarapi," tënин.

¹³ Yosëíchin têhuëñchachin catahuarinpoa' chiníquën cancantacaso'. Canpitanta' catahuainquëma' nôya cancantacamaso marë'. Asanocancainquëma'. Inasáchin yonquihuatama', catahuarinquëma'. Ispirito Santo ya'ipi nanitaparin. Catahuahuachin-quëma', chini chiníquën cancantatoma', noya ninarama'.

¹⁴ Canpitaso' iyaro'sa', nôya piyapinquëma'. Yosë nanamëن noya nitotërama'. Napoaton nipënënamaso' nanitarama', tênuahuë. ¹⁵ Napoaponahuë', chiníquën miachin pënënatënquëma', ninshitaranquëma' na'con na'con ayonquica'huanquëmaso marë'. Yosë nosoroatonco, acorinco nanamëن a'china'huaso marë'. ¹⁶ Quisocristo chachin a'parinco nisha nisha piyapi'sa' a'chinta'huaso marë'. Nanamëن a'chintarahuë inapitanta' imacaiso marë'. A'chinato, Yosë marë' sacatarahuë. Nisha piyapi'santa' imapachina', Ispirito Santori ya'coancantarín. Noyápiachin cancan quëtarin. Ina marë' Yosëri noya ni'sarin.

¹⁷ Quisocristo catahuarinco ni'ton, nôya a'chinahuë. Napoaton noya cancantërahuë.

¹⁸ Quisocristo noya catahuahuachincora, nisha nisha piyapi'sa' a'chintërahuë. Ina nohuanton, noya ninahuë ni'ton, natëpi. Co catahuarincohuë' naporini, co imaitonahuë'. Napoaton inasáchin sha'huitaranquëma'. ¹⁹ Têhuëñchachin Ispirito Santo ananitërinco ni'ton, na'a cania'piro'sa' a'naroáchin anoyatërahuë Yosë natëcaiso marë'. Ina ni'sahuatona', natëpi. Ispirito Santori ya'coancantërin ni'ton, imapi. Quirosarinquë a'chintërahuë. Ina quëran pa'sápato, Iriricoquë huarë' Quisocristo nanamëن a'chintëra'piarahuë. Ya'ipi parti pënëntërahuë. ²⁰ Insëquësona a'na piyapiri a'chintohuachina, co inaquëso' a'chinahuë'. Co Quisocristo nohuitopiquëhuë' pa'nahuë. Ina marë' acorinco ni'ton, inaporinquëráchin a'china'huaso' nohuantërahuë. ²¹ Yosë quiricanëñquë ninorin:

“Nisha nisha parti co Yosë nanamëن natanaponaraihuë', natanapi.

Co nitotopirinahuë', a'na tahuëri nitotapi," tënин.

Ipora huarë' nisha nisha parti a'chintërahuë.

Nomaquë yapa'ninso'

²² Napoaton hua'qui' nicapënquëma' yapa'pirahuë', pa'sápato, co nanitërahuë'. ²³ Isëquë nani ya'ipi a'chintërahuë. Naporahuaton, ya'nipishahuë' yani'nanquëma ni'ton, iporaso' nicapënquëma' pa'sarahuë. ²⁴ Nani yonquirahuë Ispania'pa' a'china'huaso marë'. Inatohua' pa'pato, nirapënquëma'. Naporo huarë' ninohuitarihua'. Hua'quimiáchin yacapatëñquëma', pi'pian têranta' a'chintaranquëma'. Ina quëran yapa'pato, catahuaco noya pa'i, topirahuë'. ²⁵⁻²⁶ Iporaso nípirinhuë' Quirosarinquë'ton pa'sarahuë. Inatohua' na'a imapisopita ya'huëpirinahuë'. Ma'sha pahuantopi ni'ton, parisitapi. Ina natan-tahuatona', Masitoniacuë imapisopitari inahuara nohuanton yacatahuapi. Acayaquë imapisopitarinta' yacatahuapi. Pahuantërinsopita nosoroatona', coriqui yontonpiso' quëterinaco. Ina quëonta'huaso marë' pa'sarahuë. ²⁷ Inahuanta' Quisocristo imapi ni'ton, catahuatacaino' pa'yatopi. “Cotioro'sa' imapisopita Yosë nanamëن nitotatona', a'chintërinëñpoa' ni'quëhuarë', canpoarinta' ma'sha quëtacaso' ya'huërin. Nisha piyapinpoa' nípiréhuahuë', Yosë nohuitacaso marë' catahuarinëñpoa' ni'ton, canpoarinta' catahuahua' ama ma'sha pahuanchinasohuë'” nitopi. ²⁸ Napoaton cari coriqui quëtalo pa'sarahuë. Huënantahuato, nicapënquëma' pa'sarahuë. Ina quëran Ispaniaquë pa'sarahuë. ²⁹ Canpitataquë pa'pato, Quisocristo noya catahuarinco nanamëن a'chinta'huanquëmaso marë', tênuahuë.

³⁰ Canpitanta' iyaro'sa' Quisocristo imarama'. Ispirito Santo catahuarinpoa' ni'ton, ninosoroarëhua'. Napoaton chiníquën Yosë nontoco' catahuainco. ³¹ Cotia parti na'a piyapi'sa' co Yosë natëpihuë'. Inatohua' pa'pato, Yosë nontoco' ama macainacoso marëhuë'. Naporahuaton, coriqui quëtontahuato, Yosë nontoco' cotioro'sa' imapisopita

Quirosarinquë ya'huëpiso' noya nicainacoiso marë'. ³² Ina quëran Yosë nohuanton, canpitataquë pa'sarahuë. Noya cancantato, nontaranquëma'. Noya ninontohuatéhua', chiníquën cancantarahuë. ³³ Yoséíchin asanocancaninpoa'. Canpitanta' noya catahuainquëma', ténahuë. Amen.

16

Nipayarinsopita yonquirinso'

¹ Imoya Huipi noya sanapi, ténahuë. Inanta' noya imarin. Sincriaquë ya'huaton, tiacona ya'conin. Inaquë imapisopita na'con catahuarin ni'ton, noya ni'co'. ² Canpitataquë canconpachin, Quisocristo imarama' ni'ton, noya nontoco'. Ma'sha pahuantohuachin, quëtoco'. Ina sanapi na'a piyapi'sa' catahuarin. Canta' catahuarinco.

³ Pirisira, Aquiro, inapita yonquiato, saludos a'patarahuë. Na'con catahuarinaco Quisocristo nanamën a'chinaca'huaso marë'. ⁴ Iráca a'napita yatépapirinacohuë', inapita co chimirin tē'huatatonaraihuë', catahuarinaco. Ina marë' pi'pishachin shichiminaponaraihuë', catahuarinaco ni'ton, cha'érahuë. Ina marë' "Yosparinquëen," itérahuë. Nisha piyapi'sa' imapisopitarinta' "Yosparinquëen," itopi inahuarinta'. ⁵ Aquiro pëinënqué chachin a'naquëniyontonpi Yosë chinotacaiso marë'. Inapitanta' yonquiato, saludos a'patarahuë. Ipinitonta' saludos a'patarahuë. Asia parti pa'patéra, ina'ton Quisocristo imarin. Inaro'co noya nipayarai. ⁶ Marianta' saludos a'patarahuë. Na'con catahuarinquëma'. ⁷ Antronico, Coniasë inapitanta' saludos a'patarahuë. Inapitaso' ca pochin cotio piyapi nipi. Quisocristo imapi anta'. Imaraiso marë' napopináchin tashinan pëiquë po'morinacoi. Yosë nohuanton, iráca inahuanta' acopi a'chinacaiso marë'. Noya a'chinpi. Co'huara ca imayatérasocohuë', imapi.

⁸ Anpriásenta' saludos a'patarahuë. Inanta' Quisocristo imarin. Inaro'co noya nipayarai. ⁹ Orpanonta' saludos a'patarahuë. Inanta' noya catahuarincoi Quisocristo nanamën a'china'huaiso marë'. Istaquisénta' noya nipayarai ni'ton, saludos a'patarahuë. ¹⁰ Apirisénta' saludos a'patarahuë. Ya'ipi cancanën quëran Quisocristo natérin. A'napitari aparisitopirinahuë', co a'porinhuë'. Aristoporo pëinënqué ya'huëpisopitanta' saludos a'patarahuë. ¹¹ Irotiononta' saludos a'patarahuë. Inanta' cotio piyapi. Narsiso pëinënqué ya'huëpisopitanta' Quisocristo imapisopita saludos a'patarahuë. ¹² Imoya Tripina, Imoya Triposa, inapitanta' saludos a'patarahuë. Nani tahuëri piyapi'sa' catahuapi Yosë imacaiso marë'. Imoya Pirisitanta' noya ni'nahuë. Inanta' na'con piyapi'sa' catahuarin ni'ton, saludos a'patarahuë. ¹³ Noponta' saludos a'patarahuë. Noya Quisocristo marë' sacatérin. A'shionta' yonquirahuë. Mamahuë pochin ni'nahuë carinta'. ¹⁴ Asincrito, Priconti, Irimasë, Patropasë, Irimisë, ya'ipi imapisopita inaquë ya'huëpiso', inapitanta' saludos a'patarahuë. ¹⁵ Piroroconta' Coniarë chachin saludos a'patarahuë. Nirionta' oshinë chachin yonquiato, saludos a'patarahuë. Orinpasénta' yonquierahuë. Ya'ipi imapisopita inapitarë' niyontonpiso' saludos a'patarahuë.

¹⁶ Imaramasopita capini noya ninosoroatoma', nisë'quëco'. A'napita Quisocristo imarinsopitanta' nisha nisha parti ya'huëpisopita saludos a'patarinënquéma'.

¹⁷ Quisocristo nanamën nónya a'chintérinënquéma'. A'naquënsi nimirinhuë' co no'tequëni a'chinpihuë'. Yaanishacancantopi. Ni'cona, iyaro'sa', nonpintochinënquéma'. Inséquësona a'chintohuachinara, nisha nisha yonquiapi. Ama inapita natancoso-huë'. Tananpitoco' pa'ina'. ¹⁸ Quisocristoso' hua'anënpoa' nimirinhuë', co inapitariso' natépihuë'. Inahuara nohuantopisoráchin yonquipi. Noyasha nonaponaraihuë', co no'tequëni nonpihuë'. Co noya nitotopiquëhuë' a'chintohuachinara, a'naroáchin nonpintopi. ¹⁹ Canpitaso nimirinhuë' noya natérama' ni'ton, ya'ipi piyapi'sa' natantopi. Ina marë' noya cancantérahuë. Na'con yonquico' noya nicacamaso marë'. Ama

oshahuanamaso marë' yonquicosohuë'. ²⁰ Yoséíchin catahuarinpoa' sano cancanta-caso'. Sopai yanontopirinquéma'huë', Yosë catahuarinquëma' ni'ton, a'naroáchin sopai minsëarama'. Canpita marë' Yosë nontarahuë. Inaora nohuanton, Sinioro Quisocristo noya catahuainquéma', tënahuë. ²¹ Timotionta' saludos a'patarinquéma'. Inaso' catahuarinco a'china'huaso'. Nosio, Cason, Sosipatro, inapitanta' saludos a'patarinénquéma'. Inapitaso' cotio piyapi'sa'. ²² Ca Tirsioco iso quirica ninshitaranquéma'. Paono sha'huitérincoso' ninshitaranquéma'. Canpitanta' Yosë imarama' ni'ton, saludos a'pataranquéma'. ²³ Acayonta' yonquiatenquéma', saludos a'patarinquéma'. Ina pëinénqué yacapatérahuë. Inaque chachin imaraisopita niyontonai Yosë chinota'huaiso marë'. Irasitonta' saludos a'patarinquéma'. Iso ninanoqué coriqui tapana'pi inaso'. Iya Coartonta' saludos a'patarinquéma'. [²⁴ Inaora nohuanton, Sinioro Quisocristo na'con catahuainquéma'. Amen, tënahuë.]

Ma noyacha Yosëso paya, itahua'

²⁵ Nani tahuëriya Yosë chinotahua'. Ya'ipi nanitaparin. Ina achinicancaninquëma' imamia tacamaso marë'. Nanamën tënins pochachin catahuarinquëma'. Ina nanan chachin a'chintérinquëma'. Quisocristo nanamën inaso'. Iráca quëran huarë' co nanamën nitotopirinahuë', iporaso' Yosë anitotérinpoa'. ²⁶ Quiricanën quëran anitotérinpoa'. Iráca a'naya a'naya ninotona', Yosë nohuanton, ninshitopi. Iráca quëran huarë' Yosë ya'huërin. Co onporonta' chiminaponhuë'. Nanpimiatarin. Ina nohuanton, nanamën ya'ipi parti sha'huiarëhua'. Nisha nisha piyapi'sa' anitotarëhua' natëcaiso marë'. ²⁷ Yoséíchin chinotacaso' ya'huërin. Inaíchin ya'ipi nitotérin. Quisocristo catahuarinpoa' noya noya ina chinotacaso marë'. Ipora quëran huarë' inasáchin chintahua'. Ama onporonta' nariantahuasohuë'. Amen. Nani ninshiteranquéma huachi.

Paono

Paonori Corintoquë ya'huëpisopita ninshitërinso'

Imapisopita yonquiaton, quirica a'patërinso'

¹ Ca Paonoco ninshitaranquëma'. ¿Noya canpitanta' ya'huarama'? Canta' isëquë noya ya'huarahuë. Yosë nohuanton, Quisocristo acorinco nanamën a'china'huaso marë'. Iya Sostiniséro'co nanan a'patarainquëma'. ² Corintoquë ya'huëramasopita ninshitaranquëma'. Canpitanta' Yosë huëntönénquë ya'conama'. Quisocristo imapatama', anoyacancantérinquëma' ni'ton, noyápiachin cancantërama'. Yosë acorinquëma' piyapinënpita nicacamaso marë'. Nisha nisha parti a'napitanta' Quisocristo imapi. Ya'ipinpoa' ina hua'anëntérinpoa'. A'na huënton pochin ninëhua'. ³ Inaora nohuanton, Tata Yosë catahuainquëma'. Asanocancainquëma'. Siniro Quisocristonta' inachachin catahuainquëma'.

Yosë catahuarinpoaso'

⁴ Quisocristo imapatama', Yosë nosoroatënquëma', catahuarinquëma'. Ina marë', "Yosparinquën," itérahuë Yosë. ⁵ Quisocristo imarama' ni'ton, na'con catahuamitérinquëma'. Ina catahuahuachinquëma', noya yonquiatoma' noya nia'chintarama'. Yonquirinso chachin anitötérinquëma'. ⁶ Quisocristo nanamën a'chintohuatënquëma', Yosë catahuarinquëma' natëcamaso marë'. "No'tequen sha'huitérinpoa'", ta'toma', natërama'. ⁷ Campitaora co nanitëramahuë' Yosë pochin cancantacamaso'. Nipirinhuë', Yosë ananitarinquëma'. Co manta' pahuantarinquëmahuë' noya nicacamaso marë'. Catahuarinquëma' ni'ton, noya cancantatoma', Siniro Quisocristo o'mantacaso' tahuëri ninarama'. ⁸ O'mantaquë huarë' inaso' achinicancanarinquëma'. Oshanëma' inquitatënquëma', noyápiachin cancan quëtérinquëma'. Imamiatarama' ni'ton, o'mantahuachin, co insonta' ana'intarinquëmahuë'. ⁹ Yosë co naniantarinquëmahuë'. Sha'huitérinquëmaso chachin catahuarinquëma'. Nani acorinquëma' hui'nin nohuitacamaso marë'. Quisocristo chachin hua'anëntérinpoa huachi.

Nisha nisha imapiso'

¹⁰ Apira iyaro'sa' Siniro Quisocristo nanan quëtérinco ni'ton, pënënaranguëma'. Ina imarama' ni'quëhuarë', noya ninontoco'. Ama nisha nisha yonquiatoma', a'na' a'na' imacosohue'. Napopináchin yonquiatoma', noya nini'toma' ya'huëco'. ¹¹ A'naquëma', iyaro'sa', campita capini nino'huirama', natantërahuë. Croi quëmopinënpita sha'huitiirinco. ¹² Nisha nisha nonama': "Paono imarai," tënama' a'naquëma'. "Quiyaso' Aporosë imarai," tënama' a'naquëma'. A'naquëmanta': "Pitro imarai," tënama'. A'naquëmaso nipirinhuë': "Cristo imarai quiyaso'," tënama'. ¹³ A'naíchin Cristo ya'huërin imacaso'. ¿Onpoatomata' nipachin nisha nisha imarama'? ¡Caso' co campita oshanëma marë' corosëquë patanantërinacohue! Aporintohuachinënquëmara, ¡ma'ta' tënama'? "Paono imarahuë," co tënemahuë pora. ¹⁴ Co na'aquëma' aporintëranquëmahuë'. Crispo, Acayo, inaíchinquëma' aporintëranquëma'. Ina marë' noya cancantërahuë. ¹⁵ Na'aquëma' aporintëranquëma' naporini, "Paono aporintërincoi ina imaca'huaiso marë'," ichitomacohue'. Co napotamacoso' nohuantërahuë'. ¹⁶ I'yan, Istipanasënta', sa'in, hui'ninpita, inapitarë chachin aporintërahuë. Inaíchin aporintërahuëso', topirahuë'. Co huachi a'na yonquirahuë'. ¹⁷ Nanamën a'china'huaso marë' Quisocristo acorinco. Co aporinta'huaso marë' acorincohuë'. A'chintohuatënquëmara, co na'con nitotoro'sa pochin nontëranquëmahuë'. Quisocristo corosëquë chiminin oshanënpoa' inquitinpoaso marë', tënahuë. Inaíchin nanitaparin nicha'ëinpoaso'. Napoaton inasáchin a'chinahuë. Nisha nisha a'chinahuë naporini, Quisocristo nanianchitomahuë'. Inaíchin yonquihuatëhua', tëhuëñchachin anoyacancantërinpoa'.

Quisocristo chiníquën nanantaton, nicha'ërinpoaso'

¹⁸ A'chinpata, "Quisocristo corosëquë chiminin nicha'ëinpoaso marë'," itérahuë. A'naquën natanpachinara, tēhuapi. Naporinsopita chiminpachina', parisitomiatapi. Canpoaso nimirinhue' noya natanéhua'. Nani Yosë anoyacancantérinpoa'. Yoséichin nanitaparin nicha'ëinpoaso'. ¹⁹ Quiricanën quëran itapon: "A'naquënso' nani ma'sha nitotaponaraihuë', co noya yonquipihuë'. Inahuara cha'ëcaiso' yonquipirinahuë', co nanitapihuë'.

Nani ma'sha yonquiaponaraihuë', napoonin yonquipi," ténin Yosë.

²⁰ A'naquën inahuara yonquinëna quëran nani ma'sha nitotopi. A'naquënta' nitoa'chinapi. A'naquëonta' míso nonpi. Inapopirinahuë', ¿ma'ta' ina marë' canapi? Co manta' canapihuë'. "Co nanaméhuë imatomahuë", napoonin yonquirama'," itérin Yosëri. ²¹ Ina nohuanton, piyapi inahuara yonquinëna quëran co nanitapihuë' Yosë nohuitacaiso'. Quisocristo chiminiso' a'chinárai. A'naquënso' ina natanpachinara, tēhuapi. Canpoaso nimirinhue' natéhuatéhua', anoyacancantérinpoa'. Ina Yosë nohuantérin.

²² Cotioro'saso' co yanatëtopihuë'. "Yosë pochin niquë". Ina ni'patoi, natéarainquën," toconpi. Nisha piyapi'santa' co yanatëtopihuë'. Na'con na'con nitotacasoráchin yonquipi. "Quiyora yonquinéhuëi quëran nitotarai," topi. ²³ Quiyaso nimirinhue' Quisocristo nanaménáchin a'chinai: "Corosëquë canpoa marë' chiminin," ténai. Cotioro'saso' co natëtopihuë': "Inaso' Yosë hui'nin naporini, co chimiintonihuë," toconpi. Nisha piyapiro'sarinta' co nohuantonaraihuë', tēhuapi. ²⁴ Canpoaso nimirinhue' Yosë huayoninpoa' ni'ton, Quisocristo imaréhua'. Inaso' no'téquën yonquirin. Ya'ipiya nitotaton, no'téquën anitotérinpoa'. Inasáchin nanitaparin anoyacancantipoaso', ténéhua'. Quiyanta' cotio piyapicoi nimirihuë', canpitanta' nisha piyapinquëma' nimirahue', Yosë nohuanton, imaréhua'. ²⁵ A'naquën Quisocristo nanamén tēhuapi. "Quiyaso' na'con na'con nitotérai," topirinahuë', Yosëso' noya noya yonquiaiton, no'téquën anitotérinpoa'. A'naquëonta' "Co inaso' chiníquën nanantérinhuë", ta'tona', co natëtopirinahuë'. Yosëso' ya'ipi nanitapaton, anoyacancantérinpoa'. ²⁶ Ni'co' iyaro'sa'. Na'aquëma' co na'con nitotopiramahuë', Yosë huayoninquëma'. Co chiníquën nanantona'piro'sa pochin nimiramahuë', nohuantérinquëma'. Caraíchin ma'huano'saso' imasapi. ²⁷ Yosë nohuanton, na'a topinan piyapi'sa' imasapi. A'naquënso nimirinhue' na'con nitotaponaraihuë' co imapihuë'. Chiníquën nanantopirinahuë', co Yosëri nicha'ërinhuë'. Inapita atapanacaso marë' Yosë nohuanton, na'a topinan piyapi'sa' imasapi. ²⁸ Iporaso' a'naquën nocaninénpoa'. "Canpitaso' topinan piyapi'sanquëma'. Co manta' nitotérahamahuë'. Napoonama'," itopirinénpohuë', Yosëso' nohuantérinpoa'. Inapitaso' chiníquën nanantaponaraihuë', co imapihuë' ni'ton, ya'ipi Yosëri ayatarin. ²⁹ Co insonta' inaora cha'ëponhuë'. Yosë'pa' huanihuatéhua', co inquënpoa térranta' nanitarihuahuë': "Caso' noyaco," ta'caso'. ³⁰ Yosë nohuanton, Quisocristo imaréhua'. Imapatéhua', ya'coancantérinpoa' ni'ton, yonquínahuan pochin Yosë ni'ninpoa'. Naporahuaton, catahuarinpoa' no'téquën yonquicaso'. Oshanénpoa' inquitohuachinpoa', noya huachi ni'ninpoa'. Nasha cancan quëtérinpoa' noya nicacaso marë'. Quisocristo chachin nicha'ërinpoa'. ³¹ " 'Ma noyacha Yosëso' ni'ton, anoyacancantérinpoa paya,' nitahua'. 'Quiyaso' noya noyacoi,' ama tocosohuë'," ténin Yosë quiricanënqué.

2

Quisocristo nanamén sha'huirinso'

¹ Canpitataquë pa'patéra, Yosë nanamén a'chintérinquëma'. Co iyaro'sa' míso nona'pi pochin nontérinquëmahue'. Co na'con na'con nitotérinso pochin a'chintérinquëmahue'.

² Co'huara pa'shatérapohuë', yonquirahuë. "Quisocristo naporinsoáchin a'chinarahuë. Corosëquë oshanénpoa marë' chiminiso' a'chinchi," ta'to, inaíchin sha'huitérinquëma'.

Inasáchin imacamaso marë'. ³ Canpitataquë ya'huasoco, co chiníquën cancantérahuë'. "Co caora nanitérahuë' noya a'china'huaso'," ta'to, naporahuë'. ⁴ Co na'con nitotona'pi pochin nontéranguëmahuë'. Ispirito Santo chachin catahuarinco nanamën noya a'china'huaso marë'. Inaso' ya'ipi nanitaparin. Natanpatama', "Yosë nanamën chachin a'chintérinpoa'," ta'toma', natërama'. ⁵ Napoaton co piyapi yonquirinso' imaramahuë'. "Yoséíchin ya'ipi nanitaparin," ta'toma', natërama'.

Yosë anitotérinpoaso'

⁶ Napoaponahuë', chinoton pochin cancantopisopita a'chintohuatoi, ya'ipi Yosë yonquirinpoaso' a'chintérai. Co piyapi'sa' yonquipiso' a'chinaihuë'. Co hua'ano'sa' yonquipiso téranta a'chinaihuë'. Inapitaso' inahuara yonquipisoáchin yonquiatona', co Yosë pochin yonquipihuë' ni'ton, ta'huantapi. ⁷ Co inapita pochin a'chinaihuë'. Yosë yonquirinso chachin a'chinai. Iráca co'huara isoro'pa' ya'huéyátérasohuë', Yosë ninotonpoa', yonquirinpoa' anoyacancantinpoaso marë'. Anoyacancantuohuachinpoa', inarë'quënpoa' ya'huémiatarihua'. Iráca co insonta' nitotopirinahuë', iporaso huachi Yosë anitotérinpoa' ni'ton, a'chintérainquëma'. ⁸ Hua'ano'saso' co nitotopihuë'. Nitotopi naporini, co Quisocristo tēpa'itonahuë'. Inaso' Yosë chachin. Noya noya nimirinhue', tēpapi. ⁹ Napoaponahuë', Yosë quiricanënquë naporin: "Yosë nosorohuatéhua', noya noya catahuarinpoa'. Noya nininsopita nani tapatérinpoa'. Co inso téranta' ina pochin ni'chininhue'. Co incari téranta' nataninhue'.

Yosë noya yonquirinpoaso', co insonta' inaora nitotérinhuë', ténin quiricanënquë.

¹⁰ Imaréhuasopitaso nimirinhue', nitotéréhua'. Yosë nohuanton, Ispirito Santo anitotérinpoa'. Ya'ipi Yosë yonquirinopita Ispirito Santo nitotérin.

¹¹ Co insonta' piyapi yonquirinso' nitotérinhuë'. Ispiritonën tēhuéñchinso nitotérin. Inapochachin Ispirito Santonta', Yosë ispiritonën ni'ton, yonquirinso chachin nitotérin. ¹² Imaréhuasopitaso' co piyapi yonquipiso' imaréhuahue'. Yosë nohuanton, Ispirito Santo ya'coancantérinpoa'. A'chintinpoaso marë' a'patimarinpoa'. Ya'coancantuohuachinpoara, Yosë yonquirinpoaso' anitotérinpoa'. ¹³ Quiyanta' ina nitotatoi, a'napita a'chintarai. Co quiyaora yonquinéhuë'i quëran a'chinaihuë'. Ispirito Santo ayonquirincoi noya a'china'huaiso marë'. Chinoton pochin cancantopisopita a'chintohuatoira, ma'sona tapon naporinsopita a'chintarai.

¹⁴ A'naquënso nimirinhue' piyapi yonquirinsoáchin nitotatona', co nohuantopihuë' Yosë nanamën natanacaiso' ni'ton, tēhuaconpi. Ispirito Santoráchin catahuarinpoa' natëtacaso'. Napoaton co imarinsopitasohuë' natanaponaraihuë', co nanitopihuë' no'tequëñ yonquicaiso'. ¹⁵ Ispirito Santo catahuahuachinpoa', no'tequëñ yonquiarihua'. A'napitaso' co canpoa pochin yonquipihuë'. Co nitotatonaraihuë': "¿Onpoatomata' ina pochin yonquirama??" itérinënpoa'. ¹⁶ Quiricanënquë naporin: "¡Co insonta' Yosë yonquirinso' nitotérinhuë! ¡Co incari téranta' nanitérinhuë' ina a'chintacaso!" ténin. Canpoaso nimirinhue' Quisocristo imapatéhua', yonquirinso chachin ayonquiarinpoa huachi.

3

Inpriatoro'sa pochin nipiso'

¹ Ya'ipi Yosë nanamën iyaro'sa' yaa'chintopiranquëmahuë', co ipora nanitérahuë'. Ispirito Santo cancanëma quëran huarë' natërama' naporini, na'con a'chinchitëñquëmahuë'. Co noyahue' yonquiramasopita co naniancháteraramahuë'. Quisocristo imapiramahuë', hua'huishin pochin cancantérama'. ² Ni'co'. Hua'huishin sho'shoíchin nanopitérin. Co coshachatërarinhuë'. Inapochachin canpitaso' ninama'. Ya'nan a'chintaponquëma', pi'plan a'chintéranguëma'. Aquëte' yaa'chintopiranquëmahuë', co nanicháteraramahuë' no'tequëñ yonquicamaso'.

Iporahuanta' co nanitëramahuë'. ³ Co noyahue' yonquiramasopita co nanianchátéraramahuë'. Canpita capini ninoyapatoma', nino'huirama'. ¿Onpoatonta' canpitaora nohuantëramasoachin yonquiconama'? Nisha nisha yonquiatoma', co imapisopitahuë pochin cancantërama'. ⁴ "Paono imarai quiyaso", tënama' a'naquëma'. "Quiyaso' Aporosë imarai," tënama' a'naquëmanta'. Ina pochin nonatoma', co imapisopitahuë pochin yonquirama'.

⁵ Co ca imamacoso' ya'huërinhuë'. Aporosënta' co imacaiso' ya'huërinhuë'. Quiyanta' topinan piyapicoi niperihuë', Yosë sha'huitërincoi ni'ton, a'chintërainquëma'. Natanpatama', Yosë imasarama'. ⁶ Ni'co'. Iminpatëra, a'naso' sha'terin. Ina quëran a'nanta' pacarapiton, i'shaquë oporapitërin noya papotacaso marë'. Niperihuë', Yosériichin apapotërin. Inapochachin carinquëma'ton a'chintëranquëma'. Ina quëran Aporosënta' a'chintantarinqüëma'. A'chintopirainquëmahuë', Yosëso' anoyacancantërinquëma'. ⁷ Napoaton co ca imamacoso' ya'huërinhuë'. Aporosënta' co imacaiso' ya'huërinhuë'. Yosë anoyacancantërinquëma' ni'ton, inasáchin yonquicamaso' ya'huërin. ⁸ Sha'terëso pochin carinquëma'ton a'chintëranquëma'. A'nari i'shaquë oporapitërino pochin Aporosënta' a'chintantarinqüëma'. Catocoi chachin Yosë inpriatónen pochin ninai. Inpriatoro'sa' sacatohuachinara, hua'anëni pahuërërin. Onpopinsona sacatohuachinara, no'tequén pahuërërin. Inapochachin quiyaso' Yosë marë' sacatarai ni'ton, ina acanarincoi. ⁹ Quiyaso' Yosë a'parincoi ina marë' sacata'huaiso'. Canpitaso niperihuë' Yosë sha'terins pochin ninama'. Naporahuaton, Quisocristo imarama' ni'ton, Yosë pëinën pochin ninama'.

¹⁰ Natéricho quëran yapéihuatëra, acopo' ihuatahuatë', siminto acorë'. Ina'ton acorëso pochin carinquëma'ton a'chintëranquëma'. Yosë catahuarinco no'tequén a'china'huaso'. Ina quëran a'napitanta' a'chintantarinqüëma'. Napoaponahuë', a'naya a'naya noya yonquiaton pëirinso pochin a'napita noya a'chintacaso' ya'huërin. ¹¹ Quisocristoso' ina siminto pochin ninin. Yosë nohuanton, ya'huërin. Co a'na ya'huërinhuë'. Co ina imapatéhuahuë', co onporonta' Yosë nohuitarihuahuë'. ¹² Siminto nani acohuachina, nisha nisha quëran pëipi. A'naquén oro, prata, inapita quëran pëipi. Nisha nisha na'piro'sa' pa'ton nininsopita quëran pëipi. A'naquénso niperihuë' nara, panpë, piquira, inapita quëran pëipi. ¹³ Tachiton nininso quëran pëipatëra, noya ninin, co huiquitërinhuë'. Niperihuë', nara, panpë, piquira inapita quëran pëipatëra, a'naroáchin huiquitërin. Inapochachin ayaro' tahuëri Yosë ya'ipinpoa' ninéhuasopita pën quëran téniarin. Naporo' ya'ipi piyapi'sa' nitotapi. ¹⁴ Noya niperihuë', tachiton quëran pëirinso pochin nisaréhuë'. Inaso' co huiquitërinhuë' ni'ton, Yosë noya ni'sarinpoa'. A'napita catahuaréhu' noya imacaiso marë'. Napoaton inápaquë acanaarinpoa'. ¹⁵ A'naquénso niperihuë' Yosë imaponaraihuë', co ya'ipi cancanëna quëran imapihuë'. Co a'napita catahuapihuë' noya imacaiso marë'. Napoaton pëi' huiquitërino pochin nisapi. Yosë'pa' paponaraihuë', co ina marë' sacatopihuë' ni'ton, inápaquë co manta' canaapihuë'.

¹⁶ Yosë imapatéhuë', ina pëinën pochin ninéhuë'. Ispirito Santo ya'coancantohuachinpoa', cancanénpoaquë ya'huërarin. ¿Co ina nitotëramahuë' ti? ¹⁷ Canpitaso' Yosë pëinën pochin ninama' ni'ton, a'na piyapi atapicancanpachinquëma', Yoséri chiníquén ana'intarin. Yosë pëinënquëso' noyasáchin nicacasso' ya'huërin.

¹⁸ Ama inquëma téranta' isoro'paráchin yonquiatoma', ninonpintocosohuë'. "Caora noya noya nitotërahue," co ta'caso' ya'huërinhuë'. Ama ina pochin yonquicosohuë'. "Caora co no'tequén yonquirahuë". Catahuaco Sinioro noya yonqui'i," topatama', Yosë catahuarinquëma' noya noya yonquicaso'. ¹⁹ Co imapisopitasohuë' nani ma'sha nitotaponaraihuë': "Co no'tequén yonquipihuë," ténin Yosë. Quiricanén quëran anitötérinpoa'. "Na'con nitotatona', piyapi'sa' nonpintopirinahuë', co nanitopihuë' Yosëso' nonpintacaiso'. Inari na'con na'con nitotaton, minsëarin," ténin. ²⁰ Yosëso' ya'ipi

nitotérin. "Piyapi'sa' na'con yonquipirinahuë', napoonin yonquipi," ténin anta'. Quiricanën quëran naporin. ²¹ Napoaton ama piyapi'sa' pa'yatocosohuë'. "Paso' quëmapi noya noya a'chintérincoi," ama tocosohuë'. Yoséíchin pa'yatacaso' ya'huérin. Inari ya'ipi acorin canpita marë'. ²² Ina nohuanton, carinquëma' a'chintéraranquëma'. Aporosë, Pitro, inapitanta' Yosëri a'parin a'chintinquëmaso marë'. Nani ma'sha isoro'paqué quëtérinpoa' noya ya'huëcaso marë'. Anoyacancantérinpoa' Yosë nohuitatéhua' noya noya nanopicaso marë'. Chiminpatéhua', ya'huérin'pa' noya noya ya'huëcontarihua'. Ipora tahuëri'sa' noya catahuarinpoa'. O'mantacaso' tahuërinta' co naniantarinpoahuë'. Noyasáchin yonquirinpoa'. ²³ Quisocristo anoyacancantérinpoa' ni'ton, inasáchin imacaso' ya'huérin. Inaso' hua'anéntérinpoa'. Tata Yosëri chachin a'paimarin.

4

Yosë marë' sacatëraiso'

¹ Hua'qui' piyapi'sa' co Yosë nanamën nitotopihuë' ni'ton, Yosë a'parincoi nanamën a'china'huaiso marë'. Quisocristo inpriatonën pochin ninai. Ina yonquico'. ² Inpriatonpo' nipatëra, hua'anénp'o' no'téquën natëcaso' ya'huérin. Inapochachin Yosë hua'anéntérincoi ni'ton, inasáchin natëcaso' ya'huérin. ³ Napoaton sha'huirapihuatamaco, co ina yonquirahuë'. Piyapi yonquirincoso' co yonquirahuë'. Co caora téranta' nisha'huirapica'huaso' yonquirahuë'. ⁴ Noya mini natérahue, topirahuë', co caso' Yosë pochin nitotérahue'. "Noyaco," ténahuëso marë' co Yosë noya ni'sarincohuë'. Inaíchin ya'ipi nitotaton, no'téquën sha'huitarinpoa'. ⁵ Napoaton iporaso' ama nisha'huirapiahuasohuë'. A'na tahuëri Sinioro o'mantahuachin, ya'ipi piyapinpoa' téniarinpoa'. Ya'ipi ninéhuasopita anitotarinpoa'. Po'oana quëran ninéhuasopitanta' a'ninquëchin sha'huitarinpoa'. Yonquiréhuasopitanta' nitotérin. Ma'marësona téranta' naporéhuaso' anitotarinpoa'. Naporo' ya'ipinpoa' no'téquën nontarinpoa'. Noya nipatéhua', noya ni'sarinpoa'.

⁶ A'chintohuatéinquëmara iyaro'sa', Yoséíchin yonquirai. Aporosérë'coi a'chintérainquëmaso' ninshitéranquëma' canpitanta' quiya pochin yonquicamaso marë'. Yosë quiricanënáchin natëcaso' ya'huérin. A'na quëmapi noya noya a'chintohuachinquëma', ama inasáchin pa'yatocosohuë'. ⁷ Yosë nohuanton, nisha nisha nitotéréhua'. Co canpoara nohuanton, nitotéréhuahuë'. Yoséíchin catahuarinpoa' noya noya nicacaso'. Co catahuarinpoahuë' naporini, co manta' nitochitérihuahuë'. Napoaton co nocantacaso' ya'huérinhue'.

⁸ Canpitaso' naporama': "Nani ya'ipi nitotérai. Co manta' pahuantérincoihuë' noya cancanta'huaiso marë'. Quiyaora noya nitotatoi, hua'an pochin chiníquën nanantéräi," topiramahuë'. ¡Téhuéñchachin chiníquën nanantéräma' naporini, quiyanta' isoro'paqué chachin chiníquën nananchitoihuë'! ⁹ Co ina tahuëri naniyatérarinhue'. Yosë nohuanton, co piyapi'sa' noya ni'ninacoihiuë'. Nanamën a'china'huaiso marë' a'papirincoihuë', na'a piyapi'sa' co nohuantopihuë'. Apilo'sa pochin ni'ninacoi. Chimirin quihuitérinacoi. A'ninquëchin aparisitérinacoi ni'ton, anquëniro'santa' nicatona', pa'yanpi. ¹⁰ Quisocristo natëtoi, nanamën a'chinarai. Ina marë' quiyaso' téhuarinacoi. Canpitaso niperinhuë' noya nitotona'piro'sa pochin nicaténéñquëma', co téhuarinéñquëmahuë'. Quiyaso' co chiníquën nanantéräihuë'. Canpitaso niperinhuë' chiníquën nanantéräma'. Piyapi'sa' noya ni'pirinéñquëmahuë', quiyaso' co noyahue' ni'ninacoi. ¹¹ Iporahuanta' parisitarai. A'na tahuëri tana natanai. Yamororai. A'moca'huaisonta' pahuantérincoi. Ahuérinacoi. Pa'sápatoi, co huachi ya'huëmatéräihuë'. ¹² Chiníquën sacatatoi, canotërai. No'huipirinacoihiuënta', noya nontéräi. Aparisitohuachinacoiranta', co no'hiraihuë'. Ahuantéräi. ¹³ Pinopachinacoiranta', sanoanan quëran nontéräi. "Nanan anoyachi," ta'toi, noya nontéräi. No'huitonacoi, iporahuanta' co quë'yarinacoihiuë'. Amoro pochin ni'ninacoi.

¹⁴ Co no'huiranquëmahue'. Nosororanquëma'. Co nohuantërahuë' atapanahuanquëmaso'. Pénëna'huanquëmaso marë' ninshitaranquëma'. Hui'nahuëpita pochin nicatënquëma', napotaranquëma' noya yonquicamaso marë'. ¹⁵ Notohuaro' piyapi'sa' Quisocristo nanamën a'chintopirinënquëmahue', carima'ton pénenanquëma' ni'ton, imarama'. Quisocristo nanamën sha'huitohuatënquëmara, natërama'. Napoaton tataparima pochin ni'co. ¹⁶ Ina pochin cancantatomaco, nonanco, ténahuë.

¹⁷ Ina marë' Timotio a'patëranquëma'. Inaso' noya ni'nahuë. A'chintohuatëra, Quisocristo imarin ni'ton, hui'nahuë pochin ni'nahuë. Noya Sinioro imarin. Ya'ipi naporahuëso' ayonquiarinquëma' noya noya imacamaso marë'. Inséquësona pa'patëra, Quisocristo nanamënsáchin a'chinahuë. Imapisopita niyontonpachinara, a'chintërahuë. ¹⁸ A'naquëmaso niperihuë' nocanatomaco, "Quiyaso' Paono quëran na'con na'con nitotërai. Napoaton co huachi yahuë'ninhue', topiramahuë'. ¹⁹ Téhuëñchachin nicaponquëma' yapa'sarahuë. Yosë nohuanton, co hua'quiya quëranhuë' pa'sarahuë. Napor'o nocaninacosopita ni'sarahuë. Na'con nonpirinahuë', co nimara nanitapapihuë' Yosë marë' noya sacatacaso'. ²⁰ Co topinan quëran nonacaso' ya'huérinhue'. Yosë hua'anëntohuachinpoa', piyapi'sa' catahuarëhua' noya noya imacaso'. ²¹ Nosororanquëma' ni'ton, sanoanan quëran yapénenpiranquëmahue'. Co Yosë natëhuatamahuë', pa'pato ana'inta'huanquëmaso' ya'huérin. Canconpato, ¿ma'cha onpochinquëma nicaya? ténahuë.

5

Quisocristo imaponahuë', oshahuaninso'

¹ A'naquëns'o' co noyahue' nicaton, monshihuanin, topi natantërahuë. Inaso' pa'pin sa'in monshitërin. Inapoaton, pa'pi co noyahue' ninin. Co imapisopitahuë téranta' co onporonta' ina pochin niperihuë'. ² Canpitanta' nitotapomarahuë', co ina marë' tapanamahuë'. Ina oshanëñ yonquiatoma' sétacamaso niperihuë', iporahuanta' "Quiyaso' noya imarai," toconama'. Nani ocoicaso niperihuë', co ocoiramahuë'. ³ Co canpitataquë ya'huaporahuë', canpitataquë ya'huéarahuëso pochin cancantato, yonquiranquëma'. Ina quëmapi no'téquëñ ana'intacaso' ya'huérin, ténahuë. ⁴⁻⁵ Quisocristo imarama' ni'ton, niyontonco'. Niyontonpatama', ca pochin cancantatoma', ina quëmapi chiníquëñ pénënc'o'. "Sinioro Quisoso nanan quëtérinco ni'ton, ama huachi Tata Yosë a'painquëñsohuë', ténai. Sopai natëran ni'ton, parisitamaso' ya'huérin," itoco'. Inapotohuatama', a'na tahuëri yonquiapon nimara. "Co noyahue' yonquirahuëso' naniantato, Yosë imanta'i," tapon nimara. Napohuachin, Sinioro Quisoso o'mantahuachin, nicha'ésarin huachi.

⁶ Iporaso niperihuë' "Noya imarai," topiramahuë', co ya'ipinquëma' noya ninamahuë'. Co no'téquëñ yonquiramahuë'. Ni'co'. "Pan nipatëra, pi'pian ahuëpocatérins'o' acohuchina, ya'ipi së'cotërin," topi. Nani ina nitotërama'. Inapochachin a'nayanquëma téranta' co noyahue' yonquihuatama', ya'ipinquëma' nitapicananarama'. ⁷ Iráca Pascoa cosharo' ca'pachinara, co pi'pian téranta' ahuëpocatérins'o' nohuantopihuë'. Ya'ipi ya'yatopi. Pascoaque' carniroa'huá tēpapiro pochin Quisocristo nani chiminin canpoa marë'. Ina imarama' ni'ton, nasha cancan quëtérinquëma'. ⁸ Pascoa pita na'huasoi', ya'ipi ahuëpocatérins'o' tē'yatopi. Inapochachin canpoanta' ya'ipi co noyahue' yonquiréhuasopita a'poatëhua', noyasáchin niahua'. Ama huachi co noyahue' niahuasohue'. Noyápiachin cancantatëhua', no'téquëñáchin yonquia'ahua'.

⁹ I'huanta' nani ninshitaranquëma'. "Ama monshihuaninsopitarë'quëma' nipayacosohue'. Ama inapita noya ni'cosohue', itérinquëma'. ¹⁰ Na'a piyapi'sa' co Yosë imatonahuë', monshihuanpi, apirapi, ihuatopi, mamanshi moshapi, inapopi. Hua'huayatërahuë' piyapi ina pochin nipi ni'ton, inapitaso' nontacaso' ya'huérin. Co nontërehuahuë' naporini, co nanichitërihuahuë' isoro'paqué ya'huëcaso'. ¹¹ A'naquëns'o'

nipirinhue'. "Canta' imarahuë," taponahuë', monshihuanárin. A'nanta' aspirarin. A'naquéonta' ipora huanta' mamanshi moshararin. A'napitanta' pinotapi, no'pirapi, ihuatapi, naporapi. Napoaponaraihuë: "Quiyanta' imarai," topi. Ama inapitarë'quëma' nipayacosohue'. Yosë nonpintapi ni'ton, ama inapitarë'quëma' coshatocosohue'. ¹²⁻¹³ Co Yosë imapisopitasohue' co canpoari ana'intacaso' ya'huérinhue'. Tananpitahua' Yoséri ana'inchin. Imarëhua capiniso nipirinhue' nipëneahuan' noya yonquicaso marë'. Co noyahuë' nina'pi, niyontonama quëran ocoico', ténahuë.

6

Imarëhuasopita capini nanan anoyatacaso' ya'huérinso'

¹ Campita capini nanan ya'huéhuachin, ama nino'huicosohue'. Ma'sha nionpotohuata-mara, ¿onpoatomata' coisëqué niquëparama'? Co inaso' imarinhue'. Quisocristo imarama' ni'ton, niyontonpatama', no'téquën pënëncö' nanan anoyachina'. ² A'na tahuëri Quisocristo o'mahuachin, imarëhuasopita acoarinfoa' inarë'quënpoa' hua'anëntacaso marë'. Coisë pochin nicatëhua', ya'ipi piyapi'sa' no'téquën sha'huitarihu'. Nani ina nitotërama'. Ina nitotatoma', ipora nanan ya'huéhuachin, anoyatacaso ya'huérin. ³ Ayaro' tahuëri anquéniro'santa' hua'anëntatëhua', coisë pochin no'téquën sha'huitarihu'. Nani inanta' nitotërama'. ¡Nanan isëqué co onpopinchin sacaihuë' anoyatacaso'! ⁴ Napoaton nanan ya'huéhuachina, co coisëqué nisha'huirapicamaso ya'huérinhue'. Co inaso' Yosë imana'pihuë' ni'ton, co canpoa pochin no'téquën yonquirinhue'. ⁵ Tapanacamaso marë' pënënaranguëma'. ¿Co a'naya téranta' niyontonamaquë noya yonquina'pi ya'huérinhue' ti? ¡Ya'huérin mini, ténahuë! Nanan ya'huéhuachin, inari anoyachin. ⁶ Canpitaso nipirinhue' imaramaso capini nippinotoma', nisha'huirapirama'. Naporahuaton, coisëso' co Yosë natëpirinhue', inaquë niquëpahuatamara, co noyahuë' ninama'.

⁷ Nisha'huirapihuatamara, co imapisopitahuë pochin niconama'. Ma'sha on-potohuachinénquëma', ¿onpoatonta' co ahuantëramahuë'? Ma'shanëma' matohuach-inénquëma', tananpitërama' naporini, noya noya niitomahuë'. ⁸ Canpitaso nipirinhue' co noyahuë' cancantatoma', imaramasopita capini niihuarama'. Naporahuaton, ninon-pinapitoma', nii'huérëtërama'.

⁹ Co noyahuë' nippisopita co Yosë hua'anënterinquë ya'coanpihuë'. ¡Nani ina nitotërama' ipora! Ama ninonpintocosohue'. A'naquën co Yosë natëtonahuë', monshihuanapi. Mamanshi moshapi. Sa'ina' ya'huëtopirinahuë', a'na sanapi së'huapi. Quëmapi capini nisë'huapi. Taparosachin yonquipi. Inapita pochin nippisopitasa', co Yosë'pa' pa'sapihuë'. ¹⁰ A'naquéonta' ma'sha ihuatopi, aspirapi, no'pipi, pinotopi. A'naquën a'napita ahuëatona', ma'shanëma' matopi. Ya'ipi co noyahuë' nippisopita co Yosë hua'anënterinquë ya'coanpihuë'. ¹¹ Iráca a'naquëma' ina pochin nippiramahuë'. Siniro Quisocristo imapatamara, oshanëma' inquitërinquëma'. Nani anoyacancantërinquëma' ni'ton, Yosë noya ni'ninquëma'. Ispirito Santo chachin catahuarinquëma' noya cancantacaso'.

Ma'marësona nonënpoa' Yosë acotërinpoaso'

¹² "Ma'sona téranta' yanipatëhua', noya nicacaso'," topi a'naquën. Napoaponahuë', co ya'ipi ninéhuasopita catahuarinfoahuë' noya cancantacaso marë'. Napoaton ma'sona téranta' anishacancantohuachinco, co nisarahuë'. Ano'quiuhachinco. ¹³ A'naquën napopi: "Cosharo' ya'huérin anpopitë marë'. Anpopitënta' ya'huérin cosharo marë'," topi. Inaso nippirinhue', a'na tahuëri Yosë nohuanton, cosharo', anpopitë', inapita ta'huantarín. Ni'ton, co coshatérëhuaso marë' oshahuanéhuahuë'. Napoaponahuë', monshihuanacaso' pa'pi co noyahuë'. Co Yosë nohuantërinhuë' monshihuanacaso'. Co ina marë' nonënpoa' acotërinpoahuë'. Siniro natëcaso marë' acotërinpoa'. Nonënpoanta' nicha'ërin. ¹⁴ Yosë nohuanton, Siniro Quisoso nanopiantarin. Inari chachin chiníquën nanantaton, nonënpoa' ananpitaantarinfoa'.

¹⁵ Quisocristo imapatéhua', ina nonën pochin ninéhu'. Nani ina nitotërama'. Ina nitotapomarahuë', ¿noya ipora monshihuana'pi monshitacaso' to? ¡Co onporonta'!

¹⁶ Yosë quiricanënqué naporin: "Quëmapiri sanapi mapachina, cato' piyapi niponahuë', a'naíchin pochin Yosëri ni'nin," ténin. Canpitaso' monshihuana'pi ichihuë'ëpatama', ina pochin cancantararama'. Inapohuatama', co Quisocristo imamiataramahuë'.

¹⁷ Quisocristoíchin imapatéhua', ina pochin cancantaréhua'.

¹⁸ Napoaton ama pi'pisha térranta' monshihuancosohuë'. Ihuatacaso', no'picaso', inapita nicacaso' co noyahuë', nimirinhuë', co atapicancaninpoahuë'. Monshihuancatama', nitapicancanarama'. Nonémanta' tapiarama'. ¹⁹ Quisocristo imapatéhua', Ispirito Santo ya'coancantérinpoa'. Nani ina nitotërama'. Yosë a'patimarinpoa' ni'ton, cancanënpoaquë chachin ya'huérarin. Napoaton co huachi canpoara nohuantéréhuasopita nicacaso' ya'huérinhuë'. Yosë chachin hua'anéntérinpoa'. ²⁰ Quisocristo chiníquen parisitaton, chiminin nicha'ëinpoaso marë'. Nicha'ërinpoa' ni'ton, ya'ipi nonënpoa quëran huarë' hua'anéntinpoaso' ya'huérin. Napoaton noyasáchin nico' a'napitanta' niciaténënquéma' Yosë chinochina'.

7

Yasa'arinsopita pënënins'

¹ I'hua chachin ninshitatomaco, nisha nisha natanamaco ni'ton, sha'huichinquëma'. Quëmapi co yasa'apachinhuë', noya inaora ya'huëcaso', ténahuë. ² Napoaponahuë', na'a piyapi'sa' monshuanapi ni'ton, na'con na'con quëmapi'sa' sa'aina'. Ama monshuanacaiso marëhuë' sa'aina'. Quëmapi'sa' sa'inaráchin yonqui'ina'. Inapochachin sanapi'santa' so'ináchin yonqui'ina'. ³ Quëmapi'sa' sa'ina' noya nosoroatona', ichihuë'ëina'. Inapochachin sanapi'santa' so'ina' nosoroatona', huë'ëpaina'.

⁴ Sanapi nani so'yahuachina, co inaora nohuantérins' yonquicaso' ya'huérinhuë'. So'in nohuantérins' yonquicaso' ya'huérin. Quëmapinta' co inaora nohuantérins' yonquicaso' ya'huérinhuë'. Sa'in nohuantérins' yonquicaso' ya'huérin. ⁵ Ama nia'po'inasohuë', niichihuë'ëina'. A'na tahuériso nimirinhuë' quëmapi sa'iné chachin inahuara yonquinëna quëran nohuantohuachina', na'con na'con Yosë nontacaiso marë' nisha huë'ëina'. Ina quëran naquëranchin nihuë'ëpanta'ina' ama nisha yonquicaiso marëhuë'. Ama hua'qui' nisha huë'ëcosohuë', Satanásë minséchinquëma'.

⁶ Napoaton yasa'apatama', sa'aco', ténahuë. Co yasa'apatamahuë', noyatapon. Co Yosë ina pochin camaipirinpoahuë', ayonquirinco ni'ton, sha'huitaranquëma'. ⁷ Caso nimirinhuë' co sa'ahuancohue'. Co manta' sanapi së'huarahuë'. Yosë catastuarinco ahuanta'huaso'. Pa'sápato, a'chinárahuë. Na'a quëmapi'sa' ca pochin nipi naporini, noya niitonahuë', topirahuë'. Co ya'ipi nanitopihuë' ca pochin nicacaiso'. Yosë catastuarinpoa' nisha nisha nicacaso'. A'naquën ina nohuanton, sa'arin. A'naquëns' nimirinhuë' ina nohuanton, noya inaora ya'huérin.

⁸ Co yasa'apatamahuë', noya nisarama'. Inapochachin quëyorono'sa' co yaso'yantahuachinahuë', noya nisapi. Canta' caora ya'huarahuë. ⁹ Napoaponahuë', sanapi nohuantohuatama', maco'. Noya sa'acaso'. A'naquën co sa'apachinahuë', nisha nisha yonquipi. Sanapi së'huacaisoachin nohuantopi. Ina pochin cancantoahuachina', sa'aina'. Ina noya, ténahuë.

¹⁰ Nani sanapi mapatama', inarë'quëmáchin ya'huëco', ténahuë. Co casáchin naporahuë'. Quisocristo sha'huiterinpoa' ni'ton, natëcaso' ya'huérin. Sanapi'santa' so'yahuachina', so'ina' chinpitomiatacaso' ya'huérin. ¹¹ Nimirinhuë', co chinpitohuachinhuë', ama huachi a'na quëmapi so'yachinsohuë'. So'in chachin chinpitantahuachin, noya nisarin. Quëmapi'santa' sa'apachina', ama sa'ina' të'yachinasohuë'.

¹² Isonta' pënëantaránquëma'. Quisocristo isoro'paquë nípon, co napopirinhuë', noya pënënaránquëma', ténahuë. A'naquëma' co'huara Quisocristo imashatérápomahuë',

sa'arama'. Iporaso' imapiramahuë', sa'amaso' co yaimarinhuë'. Noya yacapahuachin-quëma', ama tē'yatocosohuë'. ¹³ Canpitanta', imoyaro'sa', a'naquëma' imapomarahuë', co so'yamaso' yaimarinhuë'. Co yatë'yatohuachinquëmahuë', ama ta'anapicosohuë'. Noya yacahuatomá', chinpitoco'. ¹⁴ A'naíchin imaponahuë', noya ichiya'huë'in. Sa'in imapachina, so'ionta' Yosëri noya yonquiarin. Oshaquëran imapon nimara. Inapochachin quëmapi imana'pi nipachina, sa'ionta' Yosëri noya yonquiarin. Hui'ninpita co onporonta' Yosë imaponahuë' nimara. ¹⁵ Nichinpitacaso' noya noya nimirinhuë', quëmapihuë' niper, co imatonhuë' yapa'pachin, noya pa'in. Sanapinta' co imatonhuë' yapa'pachin, noya inanta' pa'in. "Noya nini'toma', ya'huëco'", itérinpoa' Yosë. ¹⁶ Sanapi noya imaponahuë', so'inso' co onporonta' imaponahuë' nimara. Quëmapinta' noya imaponahuë', sa'inso' co imaponahuë' nimara. Co nitotéréhuahuë'.

¹⁷ Yosë nohuanton, nisha nisha ninëhua'. Co napopináchin ninëhuahuë'. Onpopinsona nicasëhua' Yosë imapatéhua', inachachin niahua'. Ya'huéréhuaquë chachin sano yonquiatéhua', imahua'. Paato, ya'ipi imapisopita inachachin pënënarahuë. ¹⁸ A'naquëma' co'huara imashatérerapomahuë', marca acotérinënquëma'. Quisocristo imapatama', ama ina marë' tapancosohuë'. Naporahuaton, co marca ya'huétohuachinquëmahuë', ama niacotocosohuë'. ¹⁹ Co marca yonquicaso' ya'huérinhuë'. Yosë natëcasorachin yonquico'. ²⁰ Ya'nan Quisoso imapatama', onpopinsona nicasëma' imapatama', inachachin nisáco'. Ama a'na' a'na' pochin yonquicosohuë'. ²¹ A'naquëma' patron marérachin sacatohuatama', ama ina marë' sétocosohuë'. Nimirinhuë' nanitohuatama', pipimiatatoma', campitaora marë' sacatoco'. ²² Patron marë' sacatapomarahuë', Yosë huayonpachinquëma', oshanëma' inquitaténquëma', nicha'érinquëma'. Ina yonquiatoma', co huachi sétacasos' ya'huérinhuë'. Inapochachin a'naquëma' co patron asacatopirinquëmahuë'. Yosë nicha'érinquëma' ni'ton, ina na'con na'con natëcamaso' ya'huérin. Yosë piyapinénpita ninama'. ²³ Quisocristo chiminaton, nicha'érinquëma'. Inasáchin natëtoma', yonquico'. Ama piyapi'sa maréáchin sacatatoma', Yosë naniantocosohuë'. ²⁴ Napoaton iyaro'sa' ya'nan imapatama', onpopinsona nicasëma' imaramaso chachin nisáco'. Yosë ni'sarinquëma'.

²⁵ Iporaso' co sa'arinsopitahuë', co so'yarinsopitahuë', inapita ma'sona onpocasso' sha'huichinquëma'. Quisocristo isoro'paqué niper, co ina a'chinsopitahuë', catahuarinco no'tequen pënëna'huaso'. Nosoroatonco, acorinco nanamén a'china'huaso marë'. Napoaton nanitérama' natëamaco', ténahuë. ²⁶ Ipora tahuëri'sa' sacai' imacaso', na'con aparisitarinënpoa'. Napoaton onporamasona ya'huapoma', inachachin ya'huëco'. ²⁷ Sa'ahuapanpatama', ama tē'yatocosohuë'. Co sa'ahuapanpatamahuë', noya campitaora ya'huëco'. ²⁸ Napoaponahuë', sanapi nohuantohuatama', maco'. Noya sa'acaso'. Inapochachin nano'santa' yaso'yahuachina', noya nisapi. Co ina marë' oshahuanapihuë'. Nimirinhuë', sa'ahuano'sa', so'yahuano'sa' inapitaso' saca sacai' ya'huapona'. Co nohuantérahuë' campitaso' ina pochin nicacamaso'.

²⁹ Ni'co', iyaro'sa'. Yosë nohuanton, co hua'qui' isoro'paqué ya'huarihuahuë'. Napoaton sa'ahuapanpatama', ama sa'amachin yonquicosohuë'. Yosë na'con na'con yonquico'. ³⁰ A'na tahuëri sétapomarahuë', ama sétacamasorachin yonquicosohuë'. Yosë yonquiatoma', noya cancantoco'. A'na tahuërinta' capa cancantapomarahuë', ama inasáchin yonquicosohuë'. Ma'sha pa'anacasonta' ya'huétopirinquëmahuë', ama inasáchin yonquicosohuë'. ³¹ Ya'ipi ma'sha isoro'paqué ya'huérinsopita a'na tahuëri ta'huantarin. Napoaton ma'sha ya'huétopirinquëmahuë', ama inapita na'con na'con yonquicosohuë'.

³² Nani ma'sha yonquihuatéra, sacai' Yosë marë' sacatacaso'. Co nohuantérahuë' campitaso' nisha nisha yonquiatoma', napión cancantamaso'. Quëmapi co sa'in ya'huétohuachinhuë', co nani ma'sha yonquicaso' ya'huérinhuë'. Nanitérin Sínioroáchin yonquicaso'. ³³ Sa'ahuano'saso nimirinhuë' nani ma'sha yonquicaiso' ya'huérin.

Sa'ina' noya ya'huëcaiso marë' na'con yonquiapi. ³⁴ Co nanitopihuë' Yosëáchin yonquicaiso'. Inapochachin sanapi'santa' co so'yahuachinahuë', nanitopi ya'ipi cancanëna quëran Yoséíchin yonquicaiso'. Inasáchin yonquihuachina', na'con Yosë marë' sacatapi. So'yahuano'saso nipurinhue', na'con ma'sha yonquicaiso' ya'huërin. So'ina', hua'huinpita, inapita noya nocomacaiso' ya'huërin.

³⁵ Ina pochin a'chintéraranquëma' yonquicamaso marë'. Co caso' camairanquëmahuë'. Noya yonquico' Yosë nohuantérinso' ayonqui'inquëma'. Noyasáchin nicacaso' ya'huërin. Yosë na'con na'con yonquiatoma', ina marë' sacatoco'.

³⁶ Hui'nama' nani nanontohuachin, quëmapiri nohuantohuachin, ama apirato-cosohue'. Noya macacaso' nipurinhue', "Maqué!", itoco'. Noya so'yain. Co ina marë' oshahuaninhue'. ³⁷ Nipurinhue', co quétacaso' nohuantohuatamahuë', noya inanta'. Hui'naonta' co yaso'yahuachinhuë', quëma pëinënqué chachin ya'huë'in. Yaso'yahuachin, acoantoco'. ³⁸ Nanon aso'yacaso' noya. Co'so' nohuantohuachinahuë', inanta' noya. Co so'yahuachinhuë', noya noya, topirahuë'.

³⁹ Sanapi so'yahuachin, so'in chinpitacaso' ya'huërin. Napoaponahuë', so'ini ayanan-pihuachin, yaso'yantahuachin, noya so'yanta'in. Yosë imana'pi so'yachin. ⁴⁰ Co huachi so'yantahuachinhuë', noya inanta'. Noya noya cancantarín, topirahuë'. Ispirito Santo catahuarinco no'tequen pënënta'huaso' tñahuë'.

8

Cosharo' mamansi marë' acopiso'

¹ A'naquën ma'sha tēparahuatona', nosha acopi mamansi chinotacaiso marë'. "¿Noya ipora ina nosha pa'anatë' capacaso' ti?" itéraramaco ni'ton, sha'huichinquëma'. Téhuëñchachin iyaro'sa' co mamanshi' nanopirinhue', nitotéröhua'. Nani na'con nitotarihuarahuë', co a'napita nosorohuatéhuahuë', topinan quëran nitotatéhua', ninocanarihua'. Nipurinhue', piyapi nosorohuatéhua', catahuaréhua' noya noya Yosë imacaiso marë'. ² A'naquënso': "Ya'ipi nitotérhai" topirinahuë', na'con pahuantarin no'tequen yonquicaiso'. ³ Napoaponahuë', Yosë nosorohuatéhua', ina pochin cancantarihua'. Ina quëran Yosë nohuitatonpoa', noya ni'sarinfoa'.

⁴ Nosha mamansi chinotacaiso marë' acopiso' a'chinchingue'ma' nitotoco'. Co mamansi nanopirinhue'. Co ina chinotacaso' ya'huënhue'. Tata Yoséíchin chinotacaso' ya'huërin, tñéhua'. ⁵ A'naquënso nipurinhue' nisha nisha ma'sha isoro'paqué ya'huëinsopita moshapi. Inápaqué ya'huëinsopita moshapi. Nisha nisha ya'huërin, "yosë" ta'tona', moshapi. "Inapita natëcaso' ya'huërin," topi. ⁶ Canpoaso nipurinhue' Tata Yoséíchin chinotéröhua'. Ya'ipi ma'sha ninin. Ina marë' acorinpoa'. Quisocristoíchin hua'anéntérinpoa'. Ina nininfoa'. Nani nicha'érinpoa' ina nohuitatéhua' nanopicaso marë'.

⁷ Napoaponahuë', a'naquënso' co ina nitochátérapihuë'. Iráca mamansi chinotopirinahuë', Quisocristo imapachinara, mamansi a'popi. A'popirinahuë', ipora huanta' co cancanëna quëran natëyátérapihuë'. "Nosha mamansi marë' tēpapiso' ca'patéhua', mamansi chachin chinotaréhua'", taponaraihuë' ca'pachina': "Oshahuanéhua'", ta'tona', co huachi noyápiachin cancantopihuë'. ⁸ Téhuëñchachin ca'patéhua', co ina marë' os-hahuanéhuahuë'. A'pohuatéhua', co ina marë' Yosë noya noya ni'ninpoahuë'. Co inaso' cosharo' yonquirinhue'. Cancanënpoa quëran noya yonquicaiso' na'con na'con nohuantérin. ⁹ Nipurinhue', ya'ipi nosha ca'patama', ni'cona a'napita anishacancantama'. A'naquën imasapirinahuë', co Quisocristoíchin natëyátérapihuë'. Nisha nisha tñ'huatapi. ¹⁰ "Ya'ipi nosha noya capacaso'", ta'toma', noya ca'nama'. A'na tahuériso nipurinhue' mamansi moshapiso' pëiqué pa'patama', inaquë coshatarama'. Inaquë coshatasëma', tñ'huatona'pi nicaténquëma': "Mamansi marë' acopiso' noya capacaso'", tapon nimara. Ina quëran: "Canta' nipurinchin ca'i," ta'ton, ina nosha capon. Ina ca'pachin,

“Oshahuanahuë caso huachi,” ta’ton, co noyahuë’ cancantarín. ¹¹ Canpitaso’ nitotatoma’, noya capomarahuë’, tē’huatona’pi atapicancanarama’. Ina marënta’ Quisocristo chiminin. ¹² Tē’huatona’pinta’ imaponahuë’, co ya’ipi cancanën quëran imarinhuë’ ni’ton, nisha nisha tē’huatarin. Nonanatëñquëma’, ca’pachin, co noyahuë’ cancantapon. “Ma’cha onpo’iya. Co noyahuë’ ninahuë,” tapon. Ina aoshahuanpatama’, Quisocristonta’ co noyahuë’ ni’sarinquëma’. Ina marë’ canpitanta’ oshahuanarama’. ¹³ Ya’ipi cosharo’ noya capacaso nimirinhuë’, a’na tahuëri nosha capasoco iyahuë nicatonco nishacancantuohuachin, co huachi ina nosha ca’sarahuë’. Iyahuë nosoroato, co pi’pian tēranta’ nohuantërahuë’ anishacancanta’huaso’.

9

Quisocristori acorinsopita

¹ Co inso piyapi tēranta’ camairincohuhuë’. Quisocristo chachin acorinco nanamën a’china’huaso marë’. Inápaquë panantarinson’ piquëran cari ni’nahuë. Ina catastuarinco a’china’huaso’. A’chintohuatëñquëmara, canpitanta’ imarama’. ² “Co Quisocristo chachin acorinquënhuë’,” itérinaco a’naquën. Canpitaso nimirinhuë’ co napotaramaco-huë’. A’chintohuatëñquëmara, Quisocristo imarama’ ni’ton, acorincoso’ nitotërama’.

³ Nocanpachinacora, no’tëquën iso pochin sha’huitërahuë: ⁴ A’chintohuatëñquëmara, a’camacoiso’ ya’huërin. Yamorohuatoi, o’shitamacoisonta’ ya’huërin. Nohuantërai naporini, noya ma’paitëñquëmahuë’. ⁵ A’napita Quisocristori acorinsopitaso’, sa’atona’ sa’inarë’ iratopi. Nanamën a’chinacaiso marë’ pa’pachinara, sa’inë chachin pa’pi. Quisocristo iinpita, Pitro, inapitanta’ inapopi. Nohuantërai naporini, quiyanta’ Quisocristo imarinso’ macatoi, inaro’coi chachin irachitoihuë’. ⁶ Pirnapirë’co a’chintarainquëma’ ni’ton, a’camacoiso’ ya’huëpirinhuë’. Quiyaura sacatatoi, coshatërai. Ma’shanta’ pahuantohuachincoira, quiyaura pa’anai. A’napitaso’ topinan ma’parinëñquëma’. ⁷ Ni’co’, iyaro’sa’. Sontaro ya’compachinara, co cosharonën pa’anacaso’ ya’huërinhuë’. Capacaso’, a’mocaso’, inapita topinan quëtopi. Inapochachin opa sha’pachina, hua’anëni inaora macaton, irorin. Co ina marë’ pahuërtacaso’ ya’huërinhuë’. Ohuica pë’tahuana’pinta’ nohuantohuachina, ohuica sho’shoi’ shi’shiaton, o’orin. ⁸ Co piyapi’saráchin ina pochin yonquipihuë’. Yosë quiricanëñquënta’ Moisësë naporin: ⁹ “Toro asacatohuatama’, a’caco’. I’nataton to’norayahuachin, ama tonpoanantocosohuë’. Tananpitoco’ pi’pian pi’pian coshachin,” ténin iráca ninshitaton. Co toroáchin yonquiaton, Yosë naporinhuë’. ¹⁰ Canpoanta’ yonquiatonpoa’, quiricanëñquë aninshitërin. Quëmapi iminpachina, co topinan sha’ninhuë’. “Nitohuachin, masarahuë,” ta’ton, sha’nin. Ina quëran sha’ninso’ cayahuachina, manin. ¹¹ Inapochachin quiyanta’ Yosë nanamën a’chintérainquëma’ noya noya cancantacamaso marë’. Ina marë’ ma’sha pahuantohuachincoi, topinan quëtëramaco naporini, noya niitonhuë’. ¹² A’napitaso’ a’chintohuachinquëmara, ma’sha topinan quëtërama’. Quiyaso’ na’con na’con a’chintérainquëma’ ni’ton, na’con na’con quëtamacoiso’ ya’huëpirinhuë’.

Napoaponahuë’, co manta’ topinan ma’parainquëmahuë’. Ma’sha pahuantopirincoihuënta’, ahuantërai. Piyapi’sa’ noya noya Quisocristo nanamën natanacaiso marë’ co manta’ ma’patëraihuë’. A’chinahuë quëran canarahuë naporini, co onpopinchin noya ni’itonacoihuë’ nimara, ténahuë. ¹³ Iráca a’naquën Yosë chinotopiso pëiquë sacatohuachinara, inaquë chachin coshatopi. Ma’sha Yosë chinotacaiso marë’ têpahuachinara, patoma ca’pi. Topinan quëtohuachinara, noya ca’pi. Nani ina nitotërama’. ¹⁴ Inapochachin Quisocristonta’ sha’huitërinpoa’. “Nani tahuëri nani tahuëri Yosë nanamën a’chinpachina’, natanpisopitari ma’sha quëchina’ nanopicaso marë’,” ténin. ¹⁵ Ina nimirinhuë’, co manta’ ma’paranquëmahuë’. Co ina marë’ ninshitëranquëmahuë’. Co manta’ nohuantërahuë’. Caora sacatato, a’chinarahuë. Ina marë’ noya cancantërahuë’.

A'chintëranquëmaso marë' pahuërëamacoso' ya'huërin naporini, chimina'huaso' noya noya niitonhuë'. Topinan nohuantato, a'chintaranquëma', ténahuë.

¹⁶ A'naquën: "Yosë nanamën a'chinahuëso marë' caso' noya noyaco," topi. Caso nipurinhuë' co caora nohuanto a'chinahuë'. Co ina marë' noya noyacohuë'. Quisocristo acorinco nanamën a'china'huaso marë'. Co'so' a'chinpatohuë', jma'huantacha nisarahuë paya! ¹⁷ Caora nohuanto, a'chinahuë naporini, ina marë' canaitohuë'. Nipurinhuë', ina sha'huitérinco ni'ton, a'china'huaso' ya'huërin. ¹⁸ Napoaton nanamën a'chinpatëra, co manta' ina marë' ma'patërahuë'. Cosharo', ma'sha, inapita quëtinacoso' ya'huëpirinhuë', co manta' ma'patërahuë'. Topinan a'chinahuë. Ina marë' noya cancantërahuë.

¹⁹ Co insonta' pahuërërincohüe' ni'ton, co insonta' camaincoso' ya'huërinhuë'. Nipurinhuë', caora nohuanto, ya'ipi piyapi'sa' catahuarahuë. Na'con na'con piyapi'sari Quisocristo imacaiso marë' a'chinarahuë. ²⁰ Cotioro'sa' a'chintohuatëra, inapita pochin ninahuë inapitanta' imacaiso marë'. Co Moisësë pënëntërinso' natëca'huaso' ya'huëtopirincohüe', cotioro'sa' pochin ninahuë natainacoso marë'. Inapitanta' Quisocristo natëcaiso' nohuantërahuë. ²¹ Nisha piyapi'saso' co Moisësë pënëntërinso' natëpihuë'. Napoaton inapita a'chintohuatëra, co ya'ipi Moisësë pënëntërinso' natërahuë'. Co ina natëpirahuë', Quisocristo natëto, noya ninahuë. Nisha piyapi'sarinta' imacaiso marë' Quisocristo nanamënáchin a'chintërahuë. ²² A'naquëonta' imaponahuë', co ya'ipi cancanëna quëran natëyáterapihuë'. Inapitanta' co nocanahuë'. "Caso' noya noya imarahuë," co itërahuë'. Inapita pochin ninahuë natanatonaco, noya noya Quisocristo imacaiso marë'. Ya'ipi piyapi'sa' nosoroato, sanoanan quëran a'chintarahuë caraya téranta' cha'ëcaiso marë'. ²³ Ina pochin Yosë nanamën a'chinpato, na'con na'con piyapi'sari ina nohuitapi anta'. Ina marë' canta' noya cancantërahuë.

²⁴ Quëmapi'sa' nicanacaiso marë' ta'ahuachinara, a'naíchin canatërin. Nani ina nitotërama'. A'napitaso' co chiníquën ta'atonahuë', co canatopihuë'. Canpitanta' chiníquën ta'apiso pochin cancantatoma', na'con yonquico' noya noya cancantamaso marë'. ²⁵ Quëmapi'sa' yanicanahuachinara, nani tahuëri ta'arápi noya noya no'quicaiso marë'. Ta'acaisoráchin yonquipi. Canatohuachinara, yancotë' huëron quëran nipiso' quëtopirinahuë', inaso' a'naroáchin ahuirin. Canpoaso nipurinhuë' noya nipatëhua', Yosë'pa' acanarinfoa'. Inatohua' co manta' mocasarinhuë'. ²⁶ Caso' co nisha nisha yonquirahuë'. Noya ni'tatë' ta'arëso pochin Yosë natëca'huasoráchin yonquirahuë. Co topinan ya'huërahuë'. Co papinanquë ahuëtërëso pochin ninahuë'. Yosë nohuantërinsoráchin ninahuë. ²⁷ Co noyahuë' yonquihuatëra, a'naroáchin nariantërahuë. Co nohuantërahuë' pi'pian téranta' oshahuanaca'huaso'. Nohuantaso' Yosë marë' sacatarahuë. A'napita na'con pënënpirahuë', co caso' noya nipatohuë', co Yosë noya ni'sarincohuë', co acanaarincuhuë', ténahuë.

10

Ama mamansi moshacaiso marëhuë' pënëninso'

¹ Iráca napopisopita iyaro'sa', yonquico'. Iráca cotio mashocoro'sa' Iquipito quëran pipirahuatona', Moisësë imapi. Yosë nohuanton, chitoro' ya'norin imacaiso marë'. Naporahuatona', Quëhuai' marë pëntonahuatona', ya'ipiya cha'ëpi. ² Marë quëran cha'ërahuatona', Moisësë imapi. Chitoronta' quëchitërarin. (Inapochachin iporaso' Quisocristo natërehua' ni'ton, aporihuanatëhua', imarëhua'.) ³ Iráca inotëro parti pa'pachinara, Yosë nohuanton, nani tahuëri no'paqué cosharo' ya'nohuachina, ya'ipiya coshatopi. ⁴ Inaquëso' co i'sha ya'huëpirinhuë', Yosë nohuanton, na'pi quëran pipirin, ya'ipiya o'opi. Quisocristoso' ina na'pi pochin ninin. Pa'pachinara, co quënanpirinahuë', inari na'con catastuarin cha'ëcaiso marë'. ⁵ Inapotopirinhuë', cotioro'saso' co noyahuë' cancantopi. Na'con na'con co natëpihuë' ni'ton, Yosëri co noyahuë' nicaton, ana'intërin. Ina nohuanton, inaquë chachin chiminpi.

⁶ Pénëinfoaso marë' iráca ina ninshitérin. Inapitaso' co noyahuë' yonquipi. Nani ma'sha noyapatopi. Ama inapita nonahuansohuë'. ⁷ Inapitaso' mamanshi moshapi. "Moshataciso marë' pita nipi. Huënsérahuatona', coshatopi, o'opi. Ina quëran nansarahuatona', capa cancantopi," ténin Yosë quiricanënqué. Canpitaso nimirinhue' ama inapita pochin nicosohuë'. ⁸ Ina quëran a'napita monshihuanpi. Ina marë' Yosëri ana'intérin. Ina nohuanton, cato shonca cara huaranca piyapi'sa' chiminpi. A'na tahuëriíchin nimirinhue', inanapo chiminpi. Ina yonquiatoma', ama manta' monshihuanacamaso' yonquicosohuë'. ⁹ Naporahuatona' Sinioronta ténipi: "Co nimara ana'intarinfoahuë'," ta'tona', co noyahuë' nipi. Ina marë' ya'huanatona', na'a chiminpi. ¹⁰ Ama Yosë no'huitéhua' tarétahuasohuë'. "Co Yosë noya catahuarinfoahuë'," topi a'naquën. Napoaton Yosëri anquëni a'paimarin inapita tēpacaso marë'.

¹¹ Yosë nohuanton, iráca napopisopita quiricanënqué ninshitopi pénëinfoaso marë'. Inapita pochin nipatéhua', ana'intarinfoa' canpoanta'. Nani ana'intacaso' tahuëri naniriarin. ¹² A'naya a'nayanquëma' ni'cona oshahuantama'. "Caso' noya piyapico. Co onporonta' Yosë a'poarahuë'," ama tocosohuë'. ¹³ Sopai ya'ipi piyapinpoa' sha'huitérinfoa' co noyahuë' nicacaso marë'. Yosëso nimirinhue' catahuarinfoa'. A'naya a'nayanpoa' co nanitéréhuasohuë' nitotaton, ni'sarinfoa'. "Tananpitëqué'," itohuachina, co sopai nanitérihuë' aquëtë' ténipiinfoaso'. Cancanënpoa quëran huarë' Yosë natéhuatéhua', co sopai minsëarinfoahuë'. Ma'sha onpopiréhuahuënta', Yosë ananitarinfoa' ahuantacaso'. Yosë chachin catahuarinfoa' sopai minsëcaso marë'.

¹⁴ Napoaton iyaro'sa' ama pi'pisha térranta' mamanshi moshacosohuë'. Nosororanquëma' ni'ton, pénénaranquëma'. ¹⁵ Canpitaso' nitoyonquirama'. Sha'huitérinquemaso' yonquico' no'téquen nitotacamaso marë'. ¹⁶ Niyontonpatéhuara, Quisocristo chiminiso' yonquiréhua'. "Quiya marë' Sinioro huënainen pa'nin ni'ton, 'Yosparinquen' ténai," itatéhua', huënainen pochin nininso' o'oréhua'. Cancanënpoa quëran huarë' yonquiatéhua', o'opatéhua', huënainen napopináchin yonquiréhua'. Ina quëran cosharo' ina nonën pochin nininso' së'panahuatéhua', ca'néhua'. "Téhuëenchachin canpoa marë' Quisocristo nonën ohuanpi," ta'téhua', napopináchin yonquiréhua'. ¹⁷ Quisocristo yonquiatéhua', ina cosharo' ca'néhua'. Na'aquënpoa' niriuhuarahuë', Quisocristo imaréhua' ni'ton, a'na huëntona pochin ninéhua'. Napopináchin yonquiréhua'.

¹⁸ Israiro'sa' napopisonta' yonquico'. Ma'sha Yosë chinotacaso marë' tēparahuatona', ahuiquitopi. Pi'pian nosha acopiso' ca'pi. Yosë yonquiatona', coshatopi. Inapoaton', Yosë chinotopi. ¹⁹ Mamanshisco' co nanopirinhue'. Co chinotacaso marë' tēpahuachinara, topinan quëran nanopirinahuë', co mamanshiri ni'ninhuë', co nataninhuë'. ²⁰ Nisha piyapi'saso nimirinhue' mamanshi moshaciso marë' ma'sha tēpahuachinara, co Yosë yonquipihuë'. Sopairo'sa' yonquipi. Co caso' nohuantérahuë' canpitanta' sopairo'sa' yonquicamaso'. ²¹ A'naquëni mamanshi moshaciso marë' pita nipi. Sopairo'sa' yonquiatona', napopi. Sinioro yonquihuatama', co sopairo'sa' yonquicamaso' ya'huërinhuë'. Napoaton amatohuachinënquéma', ama pacosohuë'. Quisocristo chiminiso' yonquiatoma', coshatérama', o'orama'. Napoaton ama sopairo'sa' yonquiatoma', coshatocosohuë', o'ocosohuë'.

²² Sopairo'sa' yonquihuatama', Yosë a'pitaténquéma', no'huiarinquëma'. ¿Ina nohuantérama' ti? ¡Inaso' chini chiniquen nanantérin! Canpoaso' co ina pochin chiniquen nanantéréhuahuë'.

A'napita nosorocaso' ya'huërinso'

²³ "Ma'sona térranta' yanipatéhua', noya nicacaso'," topi. Napoaponahuë', co ya'ipi ninéhuasopita catahuarinfoahuë' noya cancantacaso'. Téhuëenchachin ya'ipi noya nicacaso nimirinhue', co ya'ipi catahuarinfoahuë' a'napita achinicancanacaso". ²⁴ Napoaton

a'napitanta' noya noya imacaiso marë' catahuaco'. Canpitaora costaramaso' ama aquëtë' yonquicosohuë'. A'napita na'con na'con yonquico'.

²⁵ Noshia mircatoquë ya'huëhuachin, pa'anatoma', ca'co'. Ama manta' natantapo-marahuë', ca'co'. “¿Mamanshi chinotopiso pëiquë ma'patëran?” ama itocosohuë'. Ama nisha nisha yonquiapomarahuë', ca'co'. ²⁶ Tata Yosëri ya'ipiro'pa' ninin. Ya'ipi ma'sharo'santa' noya ninin.

²⁷ A'na tahuëri coshatapatarama'. Co imarinsohuë' amatohuachinquëma', nohuan-tohuatama' paco'. Noshia acotohuachinënquëma', “Mamanshi marë' acopiso' nimara,” ama tapomarahuë', ca'co'. ²⁸ Nipirinhue', a'na piyapi sha'huitohuachinquëma', “Iso nosha mamanshi chinotacaso marë' acopiso'” itohuachinquëma', ama ca'cosohuë'. Sha'huitérinquëmaso' nosoroatoma', ama ca'cosohuë'. ²⁹ Ca'patama', co ina marë' os-hahuanaramahuë'. A'naquënso nipirinhue' ni'pachinënquëma', nisha nisha yonquia-mara. Ina nosoroatoma', ama ca'cosohuë'.

A'naquëmaso nipirinhue', itaramaco: “¿Ma'marëta' a'napita yonquiato cosharo' a'poca'huaso' ya'huërin? ³⁰ Yosparinquen Siniro,' itahuato, noya caso' ca'nahuë. ¿On-poatonta' ina marë' co noyahue' ni'ninaco?” topiramahuë'. ³¹ Ma'sona téranta' nipatama', Yosë yonquiatoma', noya nico' a'napitanta' Yosë noya yonquicaiso marë'. Napoaton coshatohuatama', o'opatama', ma'sona téranta' nipatama', ina yonquico'. ³² Ama insonta' anishacancantocosohuë'. Cotioro'sa', nisha piyapi'sa', Quisocristo imapisopita, ya'ipiya nosorocaso' ya'huërin. ³³ Caso' ya'ipi piyapi'sa' yonquirahuë. Catahuarahuë noya Yosë imacaiso marë'. Co caora costarahuë' yonquirahuë'. A'napitanta' ya-catahuarahuë inahuanta' Quisocristori anoyacancantacaso marë'.

11

¹ Caso' Quisocristo noya nonanahuë. Canpitanta' nonanatomaco, noya nico'.

Sanapi'sa' Yosë imapisopita

² Ma noyanquëma' iyaro'sa' ni'ton, na'con yonquiramaco. Yosë nanamën a'chintohuaténquëmara, noya natéraramaco. ³ Isonta' iyaro'sa' a'chinchinguëma' nitotoco'. Co insonta' inaora nohuanton ya'huërinhuë'. Téhuëñchachin natëcaso' ya'huërin, ténahuë. Sanapi'saso' so'ina' natëina'. Quëmapi'santa' Quisocristo natëina'. Quisocristoso' Tata Yosë natërin. ⁴ Quëmapinpoa' niyontonéhuaquë Yosë nontohuatéhua', ama motënpoa' niimomototahuasohuë'. Niimomotohuatéhua', co Quisocristo natërehuahuë'. Inapochachin pënëntohuatéhua', ama niimomototahuasohuë'.

⁵ Canpitanta', imoyaro'sa', niyontonéhuaquë Yosë nontohuatama', so'yama' natëtoma', niimomototoco'. Yosë anitotérinquëmaso' sha'huihuatamanta', niimomototoco'. Co niimomototohuatamahuë', noyá niya'itopiso pochin ya'noarama'. Ina pochin nipatama', so'yama' atapanarama'. ⁶ Ni'co'. Sanapi'sa' co quëmapi'sa pochin niya'itopihuë'. Ya'ipi noyá niya'itopi naporini, tapaintonahuë'. Napoaton imoyaro'sa' niimomototoco'. ⁷ Quëmapinpoaso nipirinhue' Yosë nontohuatéhua', ama motënpoa' niimomototahuasohuë'. Yosë nininpoa' ina pochin hua'anëntacaso marë'. Inasáchin, iyaro'sa', natëhuatéhua', nónya cancantarihua'. Ina marë' acorinpoa'. Inapochachin sanapi'santa' so'ina' noya natëhuachina', nónya cancantapi. ⁸ Quëmapi'ton Yosëri ninin. Ina quëran ahuë'etahuaton, a'na nininpítéraca' ocoitërin. Ina ocoitahuaton, ina quëran chachin sanapi ninin. ⁹ Quëmapi'ton ninin. Ina piquëran sanapi ninin so'in catahuacaso marë'. ¹⁰ Napoaton quëmapi'sa' chini chiníquen nanantopi. Sanapi'saso' so'ina' natëina'. Natëtona', motëna' niimomotochina'. Napohuachina', so'ina' natëpi ni'ton, anquëniro'sarinta' noya ni'sapi. ¹¹ Napoaponahuë', Yosë napopináchin nosororinpoa'. Co quëmapi'saráchin nohuantérinhue'. Sanapi'santa' nohuantérin. Quisocristo imapatéhua', napopináchin ni'ninpoa'. ¹² Ya'ipinpoa' Yosë nininpoa'. Quëmapi'ton nisahuaton,

quëmapi nininpítën quëran sanapi ninin. Naporo quëran huarë' quëmapinpoanta' sanapi'sa quëran nasitéröhua'. Yosé nohuanton naporin.

¹³ Iporaso' iyaro'sa', imoyaro'sa', cancanëma quëran yonquico' noya nicacamaso marë'. Niyontonpatama', ¿noya ipora sanapi'sa' co niimomototaponaraihuë' Yosé nontacaiso' to? ¹⁴ Ni'co'. Quëmapinpoa' niya'itéröhua'. Co ain a'pamacaso' nohuantéröhahuë'. ¹⁵ Sanapi'saso nipurinhüe' ainén a'pamapi. A'pamahuachinara, noya ya'nopi. Yoséri naporopi ain quëtérin noyá niimomototacaiso marë'. ¹⁶ A'naquëma' nisha yonquiuhatama', isoíchin sha'huitaranquëma': Quiyaso' co nisha nisha a'chinaihuë'. Ya'ipi parti imapisopitanta' inachintopi.

Niyontonpachinara, a'naquën co noyahue' nipo

¹⁷ Niyontonpatama' iyaro'sa', noya nicacaso' ya'huëpirinhüe', a'naquëma' co noyahue' ninama'. Co ina marë' noya ni'nanquëmahuë'. Napoaton pënënararanquëma'. ¹⁸ Yosé chino-tacaso marë' niyontonpatamara, a'na huënton a'na huënton nicatoma', nino'huirama', natantérahuë. No'tequën sha'huitérinaco, topirahuë'. ¹⁹ Co ya'ipi cancanëma quëran imapatamahuë', nisha nisha yonquiarama'. Co napopináchin yonquiaramahuë'. Ina quëran Yosé cancanën manëhuasopita nohuitérinënpoa'. Co ya'ipinpoa' nisha nisha yonquiröhahuë'. A'napitaso nipurinhüe' co noya yonquiatonahuë', co no'tequën imapihuë'. ²⁰ Quisocristo yonquicaso marë' niyontonatomata', coshatapomarahuë', co tëhuëñchachin chimininso' yonquiramahuë'. ²¹ A'naquëma' co ninosoroatomahuë', niapiratërama'. A'naroáchin canpitaora cosharonëma' ca'nama'. Co nipatomatëramahuë'. Inapotohuata-mara, a'naquën tanapi. A'naquënso nipurinhüe' na'con o'otona', no'pipi. Napoatomata', co nanitéraramahuë' Quisocristo chimininso' yonquiatomata' coshatacamaso'. ²² ¿Co'na pëinëma' ya'huëtérinquëmahuë' inaquë coshatamaso', o'ocamaso'? ¿Onpoatonta' corto pëiquë chachin pahuantérinsopita atapanarama'? ¿Ma'ta' ina marë' ichinquëma'? Co ina marë' noya ni'nanquëmahuë'.

Quisocristo chimininso' yonquiatëhua', ca'nëhuaso' (Mateo 26.26-29; Marcos 14.22-25; Lucas 22.14-20)

²³ Siniro sha'huitérincoso chachin nani sha'huitérinquëma'. Iráca Cotasëri Quisocristo sha'huirapirin. Sontaro'sari yamapachinara, naporo' tashi' ca'tano'sanënpitarë' coshatopi. Cosharo' masahuaton, ²⁴ "Yosparinquëna Tata Yosé," itahuaton, së'panin. Së'panahuaton, a'naya a'naya quëtérin. "Ca nonëhuë pochin iso'. Ca'co'. Canpita marë' chiminarahuë. Niyontonpatama', chiminahuëso' yonquiatomaco, pi'pian cosharo' ca'co'," itérin. ²⁵ Nani coshatohuachinara, minëa'hua manin. "Huënainëhuë pochin iso'. Huënainëhuë pa'sarin ni'ton, nasha quëran canpitare' Yosé anoyatérinso' sha'huichinquëma' imacamaso marë'. Chiminarahüe ni'ton, anoyacancantaranquëma'. Ca yonquiatomaco, o'oco'. Ipora quëran huarë' inapoatomata', yonquico," itérin Quisosori. ²⁶ Onporosona cosharo' ina nonën pochin nininsa' ca'patama', huënainën pochin nininsonta' o'opatama', Quisoso chimininso' a'napita anitotarama'. Siniro o'mantaquë huarë' inapoarama'.

Onpopinsona Quisoso chimininso' yonquicaso' ya'huërin

²⁷ Ina marë' niyontonpatama', ama topinan quëran ca'cosohue'. Ama nisha nisha yonquiatoma', o'ocosohue'. Co Siniro nonën, huënainën inapita noya yonquiuhatamahuë', oshahuanarama'. ²⁸ Napoaton canpitaora yonquinëma quëran no'tequën yonquico'. Pi'pisha térranta' co noyahue' yonquiuhatama', naniantoco'. Noyapiachinsáchin cancantatoma', ca'co', o'oco'. ²⁹ Quisoso chimininso' no'tequën yonquicaso' ya'huërin. Topinan quëran ca'patama', topinan quëran o'opatama', na'con oshahuanarama'. Ina marë' Yosé ana'intarinquëma'. ³⁰ Napoaton na'anquëma' caniorama'. A'naquëmanta' co chiniramahuë'. A'naquënso' ina marë' chiminin. ³¹ Ya'ipi cancanënpoa quëran huarë'

nitantiacaso' ya'huérin ni'ton, yonquia'ahua'. Co noyahuë' yonquirëhusopita nantianto-huatëhua', co Yosë ana'intarinpoahuë'. ³² A'na tahuëri oshahuano'sa' ana'intomiatarin. Imarëhusopitaso nipurinhuë', ipora chachin pi'pian ana'intarinpoa' noya noya yonquicaso marë'. Ina quëran ayaro' tahuëri co ana'intomiatarinpoahuë'.

³³ Napoaton iyaro'sa' noyápiachin cancantatoma', Quisocristo chiminins' yonquicaso marë' niyontonco'. Ina marë' niyontonpatama', ama a'naroáchin ca'cosohuë'. Nininaco'. Ya'ipi nanihuatama', napopináchin ca'co'. ³⁴ A'naquën tanahuachina', inahuara pëinënaquë coshachina'. Ina quëran noya niyontonpatama', co Yosë ana'intarinquëmahuë'. A'na tahuëri pa'sarahuë nicaponquëma'. Napor' na'con na'con a'chinchinquëma'.

12

Ispirito Santo nisha nisha catahuarinpoaso'

¹ Apira Ispirito Santo naporinso' iyaro'sa', a'chinchinquëma' no'tëquën nitotacamaso marë'. Ina têhuëñchachin catahuarinpoa' nohuantérinso' nicacaso'. A'naya a'nayanpoa' catahuarinpoa'.

² Iráca co Yosë natëyatérerapomahuë', nisha nisha yonquiatoma', mamanshi mosharama'. Co nanpiton natanpirinquëmahuë', sopai nohuanton, inapita chinotërama'.

³ Iporahuanta' a'naquëni co noyahuë' yonquirapitona' Quisocristo no'huipi. Inapitaso' co Ispirito Santo natëpihuë'. Ispirito Santo ya'coancantohuachinpoa', catahuarinpoa' Quisocristo natëcaso'. "Quisocristoíchin natërahuë. Inaso' hua'anëntérinco," tënëhua'. Ispirito Santo nohuanton, naporëhua'.

⁴ Yosë acorinpoa' nisha nisha nitotacaso marë'. Ispirito Santo chachin catahuarinpoa' noya nicacaso'. ⁵ Sinioro nohuanton, nisha nisha ninëhua' a'napita catahuanpoa' marë'. Nisha nisha nirihiuarahuë', ya'ipinpoa' Sinioro natërhua'.

⁶ A'naya a'nayanpoa' ananitérinpoa' nisha nisha nicacaso marë'. Ya'ipinpoa' Yosë chachin catahuarinpoa'. ⁷ Co canpoara nanitopirëhuahuë', Ispirito Santo ananitérinpoa' ma'sona ina nohuantérinso' nicacaso'. Catahuarinpoa' ni'ton, a'napitanta' catahuarihua' noya noya imacaiso marë'. ⁸ Ispirito Santo nohuanton, a'naquën noyá nitotérin pënenëntacaso'. No'tëquën yonquiaton, pënenëntarin. A'naquëonta' noya noya nitotaton, a'chinarin.

⁹ A'naquëonta' catahuarin chiniquën Yosë natëcaso marë'. "Yosë ya'ipiya nanitaparin," ta'ton ina nontérin. Nontohuachina, Yoséri na'con catahuarin. A'nanta' Ispirito Santori catahuarin cania'piro'sa' anoyatacaso marë'. ¹⁰ Ispirito Santo nohuanton, a'naquëonta' nanitérin sacai nininso' nicacaso'. A'naquën Yosë yonquirinso chachin cancanën quëran anitotérin a'napita sha'huitacaso marë'. A'naquëonta' Ispirito Santo nohuanton, macarisona catahuarinso' nitoninorin. Co Ispirito Santoachin yacatahuarinpoahuë'. Sopairinta' piyapi'sa' catahuarin nonpintinpoaso marë'. Napoaton a'napita pënenpachinpoa', ninocaso' ya'huérin. Nonpin nanan nipachina, sha'huitérinpoa' ama natëcaso marëhuë'. A'naquëonta' Ispirito Santo nohuanton, nisha nananquë nonpiso pochin nonpi. A'napitanta' catahuarin ma'sona nisha nananquë topiso' sha'huicaiso'.

¹¹ Ya'ipi imarëhusopita catahuarinpoa'. A'naíchin Ispirito Santo nuponahuë', catahuarinpoa' nisha nisha nitotacaso'. Inaora nohuantérinso' ananitérinpoa'.

A'na huëntona pochin ninëhuaso'

¹² Nonënpoa' a'naíchin nipurinhuë', nisha nisha ya'huëtérin. Ya'piranpoa', nantënpoa', imiranpoa', inapita ya'huëtérinpoa'. Inapochachin Quisocristo imarëhusopita nisha nisha nirihiuarahuë', a'na huëntoíñchin ninëhua'. Nonën pochin Quisocristo ni'ninpoa'.

¹³ Ispirito Santo chachin Quisocristo huëtonëquë aya'coninpoa'. Cotioro'sahuë nupon, nisha piyapi'sahuë nupon, napopináchin Yosë ni'ninpoa'. A'naquëma' campitaora marë'

sacatërama'. A'naquëma' nani tahuëri patronëma' asacatërinënquëma'. Nisha nishanpoa' nipurihuahuë', Ispirito Santo catastuarinpoa'. Quisocristo imarëhua' ni'ton, huëntönënquë aya'coninpoa'. Aporinto huachinënpoara, a'na huëntoínchin ninëhua'. Ya'ipi imarëhuasopita Ispirito Santo ya'coancantërinpoa'.

¹⁴ Nonënpoa' a'naíchin nipurinhue', nisha nisha ya'huëtérin. Nantënpoa', imiranpoa', ya'piranpoa', inapita pochin nininsopita ya'huëtérinpoa'. ¹⁵ Nantëhuë nontérinco naporini, "Caso' co imirancohuë". Napoaton co nohuantancoso' ya'huërinhue'" itérinco naporini, co no'tequen nonchitoncohuë'. Nantëhuënta' nohuantërahuë. ¹⁶ Huëratëhuënta' nontérinco naporini, "Caso' quëma huëratëncio. Co ya'pirancohuë'. Napoaton co nohuantancoso' ya'huërinhue'" itérinco naporini, co no'tequen nonchitoncohuë'. Huëratëhuënta' nohuantërahuë. ¹⁷ Ya'piranpoáchin ya'huërin naporini, ¿ma quéranta' natanchitërihuahuë'? Huëratënpoáchin ya'huërin naporini, ¿ma quéranta' imëchitërihuahuë'? ténahuë. ¹⁸ Yosëso nipurinhue' nisha nisha acotërinpoa'. Ina nohuanton, imiranpoa', nantënpoa', ya'piranpoa', inapita ya'huëtérinpoa'. A'naya a'naya nohuantërinquë chachin acotërinpoa'. ¹⁹ A'naíchin ya'huëtérinpoa' naporini, co nonënpoa' inaichitonhuë'. Napoaton nisha nisha acotërinpoa'. ²⁰ Nisha nisha ya'huëtopirinpoahuë', a'naíchin nonënpoa' ya'huërin.

²¹ Isonta' yonquico'. Ya'pirari imira nocanin naporini, "Quëmaso' napoonan. Co nohuantëranquënhue'", itérin naporini, co no'tequen nonchitonhuë'. Motënpoanta' co nantënpoa' nocanacaso' ya'huërinhue'. Ya'piranpoa', imiranpoa', motënpoa', nantënpoa', ya'ipi nohuantërehua'. ²² Ni'co'. Ninopinënpoa', sa'poronënpoa', inapita pochin nininsopita co a'ninquëchin ya'noponahuë', na'con na'con nohuantërehua' nanpicaso marë'. Inapitaso' noya noya ananpirinpoa'. Co inapita ya'huëtérinpoahuë' naporini, chimi-intërihuahuë'. ²³ A'naquen nonënpoaque' ya'huërinso' co onpopinchin pa'yatërehua'. Nipurinhue', inaso' noya noya a'motërehua'. Taparonënpoapitanta' noya imotërehua'. ²⁴ Ímiranpoa', ya'piranpoa', inapita co imotërehua'. Nisha nisha ya'huëtopirinpoahuë', ya'ipi nohuantërehua'. Yosë nohuanton, co a'ninquëchin nininsopitahuë' na'con na'con yonquirëhua'. ²⁵ Nonënpoa' a'naíchin nipurinhue', nisha nisha ya'huëtérin. Co nino'huitonahuë', nicatahuapi. ²⁶ Maquënpoa têranta' iquin nipachina, ya'ipi ninatanë'. Inapochachin maquënpoa têranta' pa'yatohuachinënpoa', ya'ipi nonënpoa' capa cantërin.

²⁷ Canpoanta' imarëhua' ni'ton, a'na huëntoínchin ninëhua'. Nonën pochin Quisocristo ni'ninpoa'. A'naya a'nayanpoa' nohuantërinpoa'. ²⁸ Yosë nisha nisha acorinpoa' imarëhuasopita capini nicatahuacaso marë'. Quisocristo isoro'paquë nipo, a'naquen acorin paatona' nanamën a'chinacaiso marë'. Inapita'ton Yosëri acorin. Ina quérant a'napitanta' acorin pënëntacaiso marë'. Naporahuaton, a'naquéonta' acorin Quisocristo nanamën a'chinacaiso marë'. Yosë nohuanton, a'naquen sacai' nininso' nanitaparin. A'naquen acorin cania'piro'sa' anoyatacaso marë'. A'naquen acorin a'napita catastuacaso marë'. A'naquen acorin hua'an pochin nicacaso marë'. A'naquen Yosë nohuanton, nisha nananquë nonpiso pochin nonin. ²⁹ Co ya'ipinpoa' acorinpoahuë' paatëhua' a'chinacaiso marë'. Co ya'ipinpoa' nitopënëntërehua'. Co ya'ipinpoa' Quisocristo nanamën a'chinacaiso' ananitërinpoahuë'. Co ya'ipinpoa' sacai' nininsopita nanitaparëhuahuë'. ³⁰ Co ya'ipinpoa' ananitërinpoahuë' cania'piro'sa' anoyatacaso'. Co ya'ipinpoa' nisha nananquë nonëhuahuë'. Nisha nanan natapatëhuara, co ya'ipinpoa' nanitërehua'. ma'sona téninso' sha'huicaso'. Co ya'ipinpoa' inachachin nicacaso' acorinpoahuë'. Ispirito Santo nohuanton, nisha nisha ninëhua'. ³¹ Yosë nontoco' Ispirito Santo catastuainquëma' noya noya nininsopita nitotatom'a a'napita catastuacaso marë'.

Ninosorocaso' ya'huërindo'

Napoaponahuë', piyapi nosorocaso' noya nöya ténahuë. Ina a'chinchinquëma'.

13

¹ Nisha nananquë nonpiso pochin nitononarihuahuë', co piyapi'sa' nosorohuatéhuahuë', topinan quëran nonarihua'. Anquëni pochachin nonarihuahuënta', co nosorohuatéhuahuë', hua'na, canpana inapita irininso pochin Yosë nataniñpoa'.

² A'naquënpoa' Yosë yonquirinso chachin nitotatéhua', sha'huitarëhua'. Ya'ipi nitotarihuahuë', co piyapi'sa' nosorohuatéhuahuë', topinan quëran nitotarihua', co Yosë noya ni'sarinpoahuë'. Yosë chiníquën natetéhua', nontohuatéhua', motopi chi'huincacaso pochin nanitapapiréhuahuë', co piyapi'sa' nosorohuatéhuahuë', topinan quëran natérëhua', co Yosë noya ni'sarinpoahuë'. ³ Ya'ipi ma'shanënpoa' sa'ahuaros'a' quëtopiréhuahuë', co tëhuëñchachin nosorohuatéhuahuë', topinan quëran quëtarihua'. "Pëñ quëran yatépapirinacohuënta', imamiatarahuë," tarihuahuahuë', co piyapi'sa' nosorohuatéhuahuë', co manta' Yosë'pa' canarihuahuë'.

⁴ Piyapi'sa' nosorohuatéhua', co yano'huirihuahuë'. Noya nontatéhua', catahuarihua'. Piyapi'sa' nosorohuatéhua', co noyapatéhua', no'huiarihuahuë'. Co nocantarihuahuë'. "Caso' noya noyaco," co tarihuahuë'. ⁵ Piyapi'sa' nosorohuatéhua', co pi'pisha téranta' atapanarihuahuë'. Co canpoara nohuantérëhuasoachin yonquiarihuahuë'. Tëhuëñchachin nosorohuatéhua', no'huipirinënpoahuënta' co no'huirihuahuë'. Pinopirinënpoahuënta', co ina yonquiarihuahuë', nariantarihua'. ⁶ Piyapi'sa' co noyahuë' nipachina', tëhuëñchachin sétarihua'. No'téquën yonquiuhachina', canpoanta' noya cancantarihua'. ⁷ Co noyahuë' nanan natantohuatéhua', co a'naroáchin natetarihuahuë'. Noya yonquiatéhua', natéarihua'. "Yosë nohuanton, oshaquëran noya cancantapon," ta'tehua', ninaréhua'. Ma'sha onpotopirinënpoahuënta', ya'ipi ahuantarihua'.

⁸ Ipora quëran huarë' ninosoromiatacaso' ya'huérin. A'naquën ipora Yosë yonquirinso chachin piyapi'sa' sha'huitapirinahuë', a'na tahuëriso' co huachi ina sha'huitacaso' ya'huaponhuë'. A'naquëonta' nisha nananquë nonpiso pochin nonpi. A'na tahuëriso nipurinhuë' co huachi ina pochin nonacaso' ya'huaponhuë'. Iporaso' a'naquën nitotérin a'chinacaso'. A'na tahuëri co huachi ma'sha anitotacaso' ya'huaponhuë'. Inapitaso' co ya'huëmiatarinhuë'. Nipurinhuë', ninosorocasoso' ya'huëmiatarin. ⁹ Iporaso' co ya'ipi nitotérëhuahuë'. Co inquënpoa téranta' no'téquëñáchin nitopénëntérëhuahuë'. ¹⁰ A'na tahuëriso nipurinhuë' Yosë'pa' ya'ipi nitotarihua'. Naporo' co a'chinacaso' ya'huaponhuë'. Co huachi nipurinhuë' ya'huaponhuë'. Ya'ipi noya nisapi.

¹¹ Iráca hua'huatarihua', hua'huasha pochin nonéhua', hua'huasha pochin yonquiréhua'. Iporaso nipurinhuë' nani mashotérëhua'. Co huachi hua'huasha pochin nonéhuahuë'. Co huachi hua'huasha pochin ninéhuahuë'. ¹² Hua'na huënarateérinquë sacóshin hua'yanënpo' quënanë'. Inapochachin iporaso' pi'pisha Yosë nohuitérëhua'. Yosë'paso nipurinhuë' a'ninquëchin Yosë nohuitarihua'. Iporaso' co Yosë pochin ya'ipi nitotarihuahuë'. Inatohuaso nipurinhuë' ya'ipiya nitotarihua'. Yosë noyá nohuitérënpoa'. A'na tahuëri canpoanta' inapochachin ina noya nohuitontarihua'. ¹³ Cancanënpoa quëran huarë' Yosë natécaso' ya'huérin. "Co onporonta' nonpintarinfoahuë'," ta'tehua', inasáchin ninacaso' ya'huérin. Ninosorocasonta' ya'huérin. Yosëso' na'con na'con nohuantérin ninosorocaso'.

14

Nisha nisha nananquë nonpiso'

¹ Napoaton iyaro'sa', noya ninosoroco'. Ina quëran Yosë nontoco' Ispirito Santo catahuainquëma' ma'sona nohuantérinso' nicacamaso'. Yosë nanamën sha'huicaso' na'con na'con nohuantoco'. ² A'naquën Ispirito Santo nohuanton, nisha nananquë nonpiso pochin nonpi. Co natanchináchinhuë' nonpi ni'ton, co piyapi'sa' natanpihuë'. Yoséíchin natanin. Yosëri ayonquirinso' nonsapirinahuë', co a'napitari natanpihuë'.

³ Napoaponahuë', Yosë nanamën sha'huitohuatëhuaso', noya nataninënpoa'. Ina yonqui-huachina', noya noya imasapi. Sha'huitohuatëhua', achinicancanarihua'. Sëtopirinahuë', natanatënënpoa', chiníquën cancantapi. ⁴ Nisha nananquë nonpiso pochin nonpachina', inahuara Yosë yonquiatona', chiníquën cancantapi. Nipirinhüë', Yosë nanamën sha'huitohuachinënpoa', ya'ipi imarëhusopita natanpatëhua', chini chiníquën cancantarihuë'.

⁵ Nisha nananquë pochin nonacaso' noya nipirinhüë', Yosë nanamën sha'huicaso' noya noya, tënahuë. Ina na'con na'con Yosë nohuantërin. Nisha nananquë non-pachina, ina piquëran ma'sona tapon naporinso' sha'huichinënquëma'. Imaramasopita natanatoma', noya yonquicamaso marë' sha'huichinënquëma'. ⁶ Yosë a'chintohuachincora, inachachin iyaro'sa' sha'huitëranquëma'. Inapotato, catahuaranquëma' noya noya imacamaso marë'. Nisha nananquë nonpiso pochin nontëranquëma' naporini, co nataintomacohuë'. Co ina quëran noya noya imaitomahuë'. Campita nananquë chachin no'tën nanan pënënpatënquëma', têhuëñchachin catahuaranquëma'.

⁷ Ni'co'. Quina co noya pihihuachinahuë', napoonin natanpi. Quitaranta' co noya pi'nihiuachinahuë', napoonin natanpi. ⁸ Tronpitanta' nisha nisha pihiipi sontaro'sa' nitotacaiso marë'. A'na tahuëri inimicoro'sa' huë'pachinara, tronpita pihiipi sontaro'sa' péracaiso marë'. Co no'tëquën pihihuachinahuë', co sontaro'sa' niyontoanpihuë' inimicoro'sa' ahuëcaiso marë'. ⁹ Inapochachin campitanta' nisha nananquë nonpiso pochin nonpatama', co natanarinënquëmahuë'. Topinan quëran nonsarama'. ¹⁰ Têhuëñchachin iyaro'sa' nisha nisha nanan ya'huërin. Nisha nisha piyapi'sa' ninontacaiso marë' ya'huëpirinhüë', ¹¹ co nitotohuatëhuahuë', co natanarihuahuë'. "Nisha piyapi ni'ton, nisha nananquë nonin," tënëhua'. Co ninontacaso' nanitarihuahuë'. ¹² Na'con nohuantërama' Ispirito Santo catahuainquëmaso'. Nisha nisha nicacamaso' nohuantërama' ni'quëhuarë' ma'sona téranta' nipatama', a'napita imapisopita catahuaco' noya noya cancantacaiso marë'.

¹³ Napoaton nisha nananquë nonpiso pochin yanopatama', Yosë nontoco' ma'sona tapon nonamaso' nitotamaquë. Ina quëran nitotatoma', campita nananquë chachin piyapi'sa' sha'huitoco'. ¹⁴ Nisha nananquë Yosë nontohuato, ispiritònëhuë quëran nontopirahuë', ma'sona tapo naporahuë'so' co nitotërahüë'. ¹⁵ Napoahuarë', ¿onpocasota ya'huërin? Ispiritònëhuë quëran Yosë nontarahüë', cantarahüë, napoarahuë. Napoaporahuë', ma'sona tapo naporahuë'sonta' yonquiat, Yosë nontarahüë, cantarahüë napoarahuë, tënahuë. ¹⁶ Niyontonpatama', a'naquëma' Yosë chinotatoma', "Yosparinquëñ," itohuachina, napopináchin yonquiatoma', "Amen," tënama'. Napoaponahuë', nisha nananquë nonpiso pochin nontërama' naporini, a'napitaso' co nitotatonahuë', co "Amen" ta'caiso' nanichitonahuë'. ¹⁷ Noya Yosë nontopiramahuë', a'napitaso' topinan quëran natanpi ni'ton, co catahuaramahuë'. ¹⁸ Canta' nisha nananquë nonpiso pochin nitononahuë. Campita quëran na'con na'con nitotërahüë. Ina marë' "Yosparinquëñ" itërahüë Yosë. ¹⁹ Napoaponahuë', Yosë chinotacaso marë' niyontonpatëhua', a'chinacaso' noya noya tënahuë. Nisha nananquë pochin nonato, shonca huaranca nanan nonahuë naporini, topinan quëran nointohuë'. Campoa' nananquë cara nanaínchin téranta' nonpato, natanama' ni'ton, noya noya ninin, tënahuë.

²⁰ Canpitaso' iyaro'sa' chinotonosa pochin yonquico'. Ama hua'huaros'a pochin yonquicosohuë'. Napoaponahuë', hua'huaros'a pochin noyápiachin cancantatoma', noyasáchin nico'. Inapitaso' co yonquiyatërapihuë' oshahuanacaiso'. ²¹ Yosë quiricanënquë iráca ninshitërin: "Cotioro'sa' hua'qui' pënënpirahuë', co yanatërinacohuë'. Napoaton nisha piyapi'sa' inaquë a'parahuë. Nisha nananquë nontapirinahuënta', co natëarinacohuë'," tënín Yosë. ²² A'naquëñ nisha nananquë nonpiso pochin nonpi. Co imapisopitasohuë' ayonquicaiso marë' napopi. "Yosë nohuanton, naporin," ta'tona',

yonquiapona' nimara. Imaréhuasopitaso nípirinhuë', canpoara nanamënpoaquë chachin Yosë nanamën sha'huitohuachinënpoa', noya cancantarihua': "Ma noyacha catahuarinpoa paya," tarihua'. ²³ Yosë chinotacaso marë' niyontonëhuaquë, a'naquën co Yosë imana'piro'sahuënta' ya'conpi. Nisha nananquérachin nonpatama', co natanatonaraihuë': "Hua'yantomarai'," tapona'. ²⁴ Nípirinhuë', Yosë nanamën a'chintohuatama', co imarinsopitahuënta' noya natanapi. Pénëntérinso' natanahuatona', yonquiapi: "Téhuëñchachin canta' co noyahue' nicato, oshahuahahuë," tosapi. ²⁵ Cancanëna quëran yonquipisopita a'ninquëchin sha'huitapi ni'ton, ina yonquiatona', oshanëna marë' sëtapi. Isonahuatona', Yosë chinotapi: "Téhuëñchachin Yosë catahuarinquëma'," itarinëñquëma'.

Niyontonpachinara Yosë chinotopiso'

²⁶ Napoaton iyaro'sa' niyontonpatama', noyasáchin yonquico'. A'naquëma' cantarama'. A'naquëma' Yosë nanamën a'chinarama'. A'naquëma' Yosë anitotériniquëmaso' sha'huitarama'. A'naquëmanta' nisha nananquë nonpiso pochin nonsarama'. Ina piquëran a'naquëmaso' ma'sona tapon nonamaso' canpita nananquë sha'huitarama'. Ma'sona téranta' nipatama', nicatahuaco' ya'ipinquëma' noya noya imacamaso marë'.

²⁷ Nisha nananquë pochin yanonpachina', a'naya a'naya noina'. Catoya'pihuë nípon, caraya'pihuë nípon, inaíchin noina'. Naporahuaton, a'nanta' ma'sona tapon noninso' sha'huiin. ²⁸ Co insoari téranta' sha'huitacaso' nanitohuachinhuë', niyontonpiquë ama ina pochin noinasohuë'. Ina pochin yanonpachin, inaora paaton, noin Yoséíchin natanacaso marë'. ²⁹ Niyontonpatama', catoya, caraya nimara Yoséri anitotérinso' sha'huiina'. A'napitaso' nataina'. No'tén nanan nipachin, noya natanatoma' yonquico' no'tequën natëcamaso marë'. Yosë nanamëñáchin imacaso' ya'huërin. ³⁰ A'nanta' inaquë huënsérinso' Yoséri nanan anitotohuachin, inanta' sha'huiin. Yasha'huihuachin, ya'nan nona'pi ta'taton, nata'in. ³¹ Inapoatoma', a'naya a'nayanquëma' pénëntoco'. Ya'ipinquëma' noya noya yonquicamaso marë' nipénëncó'. Napohuatama', canpita capini niachinicancanarama'. ³² Nipénënpatéhwa', a'naya a'nayanpoa' pénëntacaso' ya'huërin. A'na'ton tonihuachin, a'nanta' pénëntanta'in. Ina toniantahuachin, a'nanta' pénëntanta'in. ³³ Yosëso' co nisha nisha ayonquirinpoahuë'. Catahuarinpoa' sano cancantacaso'. Niyontonëhuaquënta' catahuarinpoa' a'naya a'nayanpoa' pénëntatéhwa' noya Yosë chinotacaso marë'.

Ya'ipi Yosë imaréhuasopita nisha nisha niyontonëhuaquë, ³⁴ sanapi'saso' ta'tatona', nataina'. Ama pénëñchinasohuë'. "Quëmapi'sa' natëina'", ténin Yosë pénëntérinquë.

³⁵ Ma'sona yanitotohuachina', pénënaquë so'ina' nataina'. Yosë chinotacaso marë' niyontonpatama', sanapi'saso' co nonacaiso' ya'huërinhuë'.

³⁶ Isonta' yonquico'. Co canpita'ton Yosë nanamën nitotéramahuë'. Naporahuaton, co canpitáráchin a'chintérainquëmahuë'. ³⁷ Yosë nanamën chachin no'tequën a'chintéränquëma'. No'tequën ninshitéränquëma'. Insosona yapénëntohuachin, natëinco. Ispirito Santo téhuëñchachin catahuahuachinquëma', ina nanan chachin natëarama'.

³⁸ Nisha a'chintohuachinëñquëma', ama natëtocosohuë', ténahuë.

³⁹ Napoaton iyaro'sa', Yosë anitotériniquëmaso' sha'huicamaso' na'con na'con nohuan-toco'. A'naquën nisha nananquë nonpiso pochin yanonpachina, tananpitoco' noin.

⁴⁰ Nípirinhuë', ama noncarocosohuë'. A'naya a'nayanquëma' nonco'. Noyápiachin cancantatoma', Yosë yonquico'.

15

Quisocristo nanopiantarinso'

¹ Yosë nanamën iyaro'sa', nani a'chintéränquëma'. "No'tequën nontérincoi," ta'toma' natërama'. Natëtoma', imamiatarama'. Ina nanan chachin sha'huitaantaranquëma'

yonquicamaso marë'. ² Ina natëmiatohuatama', Yosë nicha'ësarinquëma'. A'naquënsi nimirinhue': "Imarahue," taponaraihue', topinan quëran napopi. Co cancanëna quëran natëpihue'. Inapitaso' co nicha'ësarinhue'.

³ Ya'nan a'chintaponquëma', Yosë anitotérincoso chachin sha'huitéranguëma': "Oshanënpoa' inquitinfoaso marë' Quisocristo chiminin," itéranguëma'. Iráca Yosë quiricanën quëran ninorinso chachin chiminin. ⁴ "Chiminpachina, pa'pitopi huachi. Pa'pitopirinahuë', cara tahuëri quëran nanopiantarin," itéranguëma'. Quiricanënqué ninorinso chachin nanopiantarin: ⁵ Nanpiantarahuaton, Pitro ya'notérin. Ca'tano'sanënpitanta' ya'notérin. ⁶ Ina quëran na'a imapisopita niyontonasoi', ya'notaantarin. A'natérápo pasa na'con ni'pi. Ipora huanta' nanopirapi. Caraíchin nani chiminpi. ⁷ Santiaconta' ya'notérin. Naporahuaton, ya'ipi a'chinacaso marë' acorinsopita ya'notaantarin. Ina quëran inápaquë panantarín.

⁸ Piquëran huarë' canta' ni'nahuë. Ana'huaya pochin nimirinhue', inápa quëran ya'notimarinco. Naporu huarë' imarahue. ⁹ Imapisopita aparisiterahuë ni'ton, co acoincoso' ya'huérinhue', topirahuë'. Pa'pi co noyahue' cancantopirahuë', anoyacancantatonco, acorinco paato a'china'huaso marë'. ¹⁰ Inaora nohuanton, Yosë catahuarinco. Co catahuarincohue' naporini, co manta' nanichitohue'. Catahuahuachincora, pa'nahuë nanamën a'chinapo. Co topinan quëran catahuarincohue'. Caso' na'con na'con Yosë marë' sacatérahuë. Co cariso' piyapi'sa' anoyacancantérahuë'. Yosë achinicancaninco a'china'huaso marë'. Ina catahuarinco ni'ton, a'chinpatéra na'a piyapi'sa' imasapi. ¹¹ Yosë nanamën a'chintéranguëma'. Quisocristo ca'tano'sanënpitanta' a'chinpi. Ina nanansáchin a'chintérainquëma', natërama'.

Quisocristo imaréhuasopita nanopiantacaso' ya'huérinso'

¹² "Quisocristo nanopiantarin huachi," itérainquëma' ni'ton, ¿onpoatomata' a'naquëmaso' co no'tequén yonquiramahuë'? "Co Yosë ananpitaantarinfoahuë'," toconama'. ¹³ Co nanopiantacaso' ya'huérinhue' naporini, co Quisocristo téranta' nanopiantaitonhuë'. ¹⁴ Co nanopiantarinhuë' naporini, topinan quëran a'chinchiténquémahue'. Canpitanta' topinan quëran natëitomahuë'. ¹⁵ Co nanopiantarinhuë' naporini, nani nonpinchiténquémahue'. Nimirinhue', co iyaro'sa' nonpin nanan a'chintérainquëmhahuë'. "Yoséri chachin ananpitaantarín," itohuatéinquémara, no'tequén nontérainquëma'. ¹⁶ Co ananpitaantaininfoaso' ya'huérinhue' naporini, co Quisocristo téranta' nanopiantaitonhuë'. ¹⁷ Co nanopiantarinhuë' naporini, topinan quëran imaitérihuahuë', co oshanënpoa' inquichitonpoahuë'. ¹⁸ Co nanopiantarinhuë' naporini, a'naquén imapisopita nani chiminpi ni'ton, parisitopique pa'itonahuë'. ¹⁹ Isoro'pa maréáchin Quisocristo imaréhua' naporini, pa'pi nosorochitérihuahuë'.

²⁰ Nimirinhue', Quisocristo tēhuéñchachin nani nanopiantarin. Ya'nan cayarinso' sénarëso pochin ina'ton nanopiantaton, nanopimiatarin. Ina quëran campoanta' chiminarihuahuë', nanopiantarihua'. ²¹ Atan'ton co Yosë natétonhuë', chiminin ni'ton, campoanta' chiminéhua'. Inapochachin Quisocristoso' chiminaponahuë', nanopiantarin ni'ton, campoanta' nanopiantarihua'. ²² Atan pochin cancantatéhua', ya'ipinpoa' chiminéhua'. Napoaponahuë', Quisocristo imapatéhua', ya'ipinpoa' ananpitaantarinfoa'. ²³ Co napopináchin nanopiantarihuahuë'. Quisocristo'ton nanopiantarin. A'na tahuëri o'mantahuachin, imaréhuasopitanta' ananpitaantarinfoa'. ²⁴ Ina quëran ya'ipiyananiarin. Iporaso' nisha nisha hua'ano'sa', copirnoro'sa', inapita chiníquén nanantatona', camairinénpoa'. Sopairo'santa' yacamairinénpoa'. Quisocristo o'mantahuachin, ya'ipiyananiarin. Nani minséhuachin, Tata Yoséíchin ya'ipiyananiarin. ²⁵ Ina nohuanton, Quisocristo chiníquén nanantarin. Ya'ipi hua'anéntarin. A'na tahuëri ya'ipi inimicoro'sa' minséarín. ²⁶ Ina quëran huachi chimirionta' ayatarin. Ananpitaantahuachinpoa', chimirin minséarín huachi. Co huachi chiminacaso' ya'huaponhuë'.

²⁷ “Yosë nohuanton, ya'ipiya minsëarin huachi,” ténin Yosë quiricanënquë. Napoaton Quisocristo ya'ipiya hua'anëntarin. Tata Yoséichin co hua'anëntarinhuë'. Inari Quisocristo chiníquen nanan quëtérin. ²⁸ Ina nohuanton, Quisocristo ya'ipiya minsëarin. Nani minséhuachina, inanta' Yosë hui'nin ni'ton, pa'pin natëmiatarin. Naporo quëran huarë' Yoséáchin ya'ipiya hua'anëntomiatarin.

²⁹ ¿Onpoatomata' ipora huanta' a'naquëma' co natëyátéraramahuë'? “Co Yosë anan-pitaantarinpoahuë”, toconama'. Co no'tequën yonquiramahuë'. A'naquën chim-inpisopita yonquiatona', inapita ya'huérénom aporihuanpi. Co nanopiantacaso' ya'huérinhue' naporini, ¿ma'marëta' inapitanta' napo'itonahuë'? ³⁰ ¿Ma'marëta' quiyanta' parisitaporaihuë', a'chinárai? Nani tahuëri yaahuérinaco. Co nanopiantahuatëhuahuë', topinan quëran parisitérai. ³¹ A'naquën yatéparinaco. Nani tahuëri “Chiminapo nimara,” ténahuë. Tëhuëñchachin no'tequën nontëranquëma'. Quisocristo catahuarinco ni'ton, a'chintohuatënquémaria, noya imarama'. Ina marë' noya cancantërahuë. ³² Ipoquë a'chinahuëso marë' chiníquen no'huirinaco. Ni'ni pochin cancantatona', yatéparinaco. Ahuantaporahuë', ¿ma'ta' ina marë' canarahue? Isoro'paquéráchin ya'huéröhua' naporini, co manta' canaiterihuahuë'. Co nanopiantacaso' ya'huérinhue' naporini, co Yosë yonquicaso' ya'huë'itonhuë'. “¡Huëco' coshatahua'. Huëco' o'oahua'. Co hua'quiya quëranhuë' chiminarihua' ni'ton, capa cancantahua!” topiso pochin nichitërihuahuë'.

³³ Ama ina pochin yonquicosohue'. Ni'cona a'napita anishacancantochinënquëma'. “Co noyahue' nipesopitarë'quëma' nipayahuatama', canpitanta' nitapicancanarama'. Inapita nonanpatama', co huachi noyápiachin cancantaramahuë”, topi iráca. No'tequën napopi. ³⁴ No'tequën yonquiatoma', noyasáchin nico'. Ama huachi tëhuëcosohue'. A'naquëma' co Yosë nohuichátéraramahuë'. Ina yonquiatoma', tapanacamaso' ya'huérin, ténahuë.

Nasha nonënpoa' quëtarinpoaso'

³⁵ A'naquëma' yanitotërama'. “Chiminpatëhua', ¿onporahuatëhuata' nanopiantarihua'? ¿Onpopinta' nonënpoa' ya'huëtaponpoaso'?” ténama'. ³⁶ ¡Co canpitaso' nitoyon-quiramahuë! Ni'cochi. Ya'pirin sha'patëra, ya'pirin chachinso' chiminins pochin ninin. Acopo' ya'pira'huainso niperihuë', noya papotérin. ³⁷ Tricoraya yonquia'ahua'. Ina sha'patamara, aipi noshinënso' co papotérinhue'. Ya'pira'huain papotohuachina, nisha ya'norin huachi. ³⁸ Yosë nohuanton, ma'sha papotérin. Nisha nisha ya'pirin sha'patëra, nisha nisha papotérin. Co napopináchin papotérinhue'. Yosë nohuanton, naporin. ³⁹ Ma'sharo'santa' nisha nisha noshatopi. Piyapinpoanta' nonënpoa' nisha. Ohuacaro'sa', inairaro'sa', samiro'sa', inapitanta' nisha nisha noshatopi. Co napopináchin noshatëruahuë'. Nisha nisha acorinpoa'. ⁴⁰ Nisha nisha ma'sha isoro'paquë ya'huérin. Inápaquë ya'huëpisopitanta' nisha nisha ya'nopi. Co napopináchin noyápiachin ya'nopihuë'. ⁴¹ Pi'iso' huënaráchin huënaráchin a'pinin. Yoquinta' nisha a'pinin. Tayoraro'santa' nisha nisha a'pinpi. Co napopináchin a'pinpihuë'.

⁴² Inapochachin canpoanta' nanopiantahuatëhua', nisha ya'noarihua'. Chiminpatëhuara, nonënpoa' chanatopirihuë', nanopiantahuatëhua', nasha nonënpoa' ya'huëtarinpoa'. Co onporonta' chanatarinhue'. ⁴³ Iporaso' nonënpoa' co onpopinchin noyahue'. Chiminpatëhua', pa'pitarinënpoa'. A'na tahuëriso' niperihuë', noyápiachin nonënpoa' ya'huëtarinpoa'. Iporaso' co chinipirëhuahuë'. Nanpiantahuatëhua', chiniarihua'. ⁴⁴ Isoro'pa marëáchin nonënpoa' ya'huëterinpoa' ni'ton, chiminëhua'. Pa'pitopirinënpoahuë', ananpitaantahuachinpoa', nisha nonënpoa' quëtarinpoa' Yosë'pa' ya'huëcaso marë'. Iporaso' nonënpoa' Yosë acotërinpoa' isoro'paquë ya'huëcaso marë'. A'na tahuëriso niperihuë' noya noya nonënpoa' quëtarinpoa' inápaquë ya'huëcontacaso marë'.

⁴⁵ Yosë quiricanënquë tapon: “Iráca Yoséri ya'nan quëmapi nininso' Atan itérin. Inaso' nonën quëtérin isoro'paquë nanopicaso marë'”, ténin. Iporaso' Quisocristonta' Atan

pochin nicaponahuë', Yosë chachin ni'ton, catahuarinpoa' canpoanta' Yosë pochin nanopicaso marë'. ⁴⁶ Napoaponahuë', ya'nan niper, nonënpoa' quêtérinpoa' isoro'paquë nanopicaso marë'. Ina piqueran nasha nonënpoanta' quêtérinpoa' inápaquë nanopimiata-caso marë'. ⁴⁷ Atanso' no'pa quéreran ninin isoro'paquë nanopicaso marë'. Quisocristoso niperinhuë' Yosë ya'huérin quéreran o'marin ni'ton, noya noya ninin. ⁴⁸ Ya'ipi piyapinpoa' Atan pochin nicatéhua', ina nonën pochin ya'huétérinpoa'. Napoaponahuë', Quisocristo imapatéhua', a'na tahuéri ina nonën pochachin ya'huétérinpoa'. ⁴⁹ Iporaso' Atan pochin ya'noréhua'. A'na tahuériso niperinhuë' Quisocristo pochin ya'noarihua'.

⁵⁰ Nonënpoa' ipora ya'huétérinpoaso' co nanitérinhuë' Yosë hua'anentérinquë paacaso'. Chiminpatéhua', nonënpoa' chanatarin, co ya'huémiatarinhuë'. ⁵¹ Noya natanco iyaro'sa'. Na'a piyapi'sa' co nitotopirinahuë', sha'huitaranquëma'. Co ya'ipi imaréhuasopita chiminarihuahuë'. Napoaponahuë', Yosë nohuanton, ya'ipi imaréhuasopita nisha ya'noarihua'. ⁵² A'nanaya nisha nonënpoa' ya'huétérinpoa'. O'mantacaso' tahuéri nanihuachin, tronpita pihuirarin. Pihuihuachin, chiminpisopita nanopiantarapi. Quisocristo imapi ni'ton, ananpitaantarin huachi. Naporor ya'ipi imaréhuasopita nisha nonënpoa' ya'huétérinpoa'. Co huachi chiminarihuahuë'. ⁵³ Nonënpoa' ipora ya'huétérinpoaso' chanatarin. A'na tahuériso niperinhuë' nisha nonënpoa' ya'huétohuachinpoa', co chanatarinhuë'. Nasha a'morëso pochin nisarihua'. Co huachi chiminarihuahuë'. ⁵⁴ Nisha nonënpoa' quêtétohuachinpoa', nanopiantarihua'. Yosë quiricanen quéreran ninoton, naporin: "A'na tahuéri Yoséri chimirin minséarin. Co huachi chiminacaso' ya'huaponhuë". ⁵⁵ ¿Onporahuatonta' chimirin minséarinpoa'? Co huachi nanitarinhuë'. Ya'huan quêtéhuachinpora chiminëso pochin chiminacaso' ya'huépirinhuë', co huachi chiminacaso' tê'huatarihuahuë'", ténin. ⁵⁶ Yosë iráca pénentérinso' co natetátehuahuë', oshahuanéhua'. Oshahuanéhua' ni'ton, chiminacaso' ya'huérin. ⁵⁷ Ya'huépirinhuë', jma noyacha Tata Yosëso' ni'ton, nicha'érinpoa paya! Ina nohuanton, Quisocristo ya'huérétérinpoa'. Coroséquë chiminaton, sopai minsérin. Nanpiantarahuaton, chimirionta' minsérin. Ina marë': "Yosparinquen," itahua'.

⁵⁸ Napoaton iyaro'sa' chiniquen cancantoco'. Nosororanquëma' ni'ton, pénénaranquëma': Ama nisha nisha yonquicosohue'. Naporahuaton, paatoma' a'napita a'chintéra'piaco'. Siniro catahuahuachinquëma', co onporonta' topinan quéreran a'chinaramahuë'. A'chinpatama', Yoséri nohuantérinsopita imasapi huachi.

16

Pahuantérinsopita catahuacaso' ya'huérinso'

¹ A'nanta' sha'huichinquëma', yonquico'. A'naquen imapisopita ma'sha pahuantarin ni'ton, parisitapi. Inapita catahuacaso marë' coriqui yaa'parama'. Carasiaquë imapisopitanta' coriqui a'parapi. Inapita nani sha'huiterahue' coriqui yontonacaiso marë'. Inapochachin canpitanta' sha'huitaranquëma'. ² Nani Tomio tahuéri niyontonpatama', coriqui acoco'. Nanitéremaso' acoco'. Na'con canahuatama', na'con quêtoco'. Pi'pian canahuatama', pi'pian quêtoco'. Nani simana inapohuatama', nicaponquëma' pa'pato, coriqui yontonamaso' quenánconarahuë. ³ A'naquëma' noya ni'namasopita huayonco' coriqui quépacaiso marë'. Canconpato, quiricatahuë huayonamasopita nohuitacaiso marë'. Nani quiricatahuato, inaré chachin huayonamasopita a'paarahuë. Quirosarin-quë quéparapi pahuantérinsopita quêtacaiso marë'. ⁴ Nanitohuato, canta' pa'samaraco. Pa'patoso', napopináchin pa'sarai.

Nicapon yapa'ninso'

⁵ Nicaponquëma' yapa'pirahuë', iporaso' co nanitérahuë'. Masitonía parti pacahuaso' ya'huérin. Nani ni'tontahuato, ya'huéramaquë pa'sarahuë. ⁶ Canpitataquë hua'quimiáchin yacaparanquëma'. O'napi tahuéri inaquë na'huéanatapo nimara.

Ina quëran catahuaramaco a'na parti pacahuaso', topirahuë'. ⁷ Co topinan niraponquëmahuë'. A'na tahuëri Yosë nohuantohuachin, hua'qui' yacaparanquëma'. ⁸ Iporaso nimirinhue' Ipiisoquë ya'huato, a'chinárahuë. Pinticostisë tahuëri huare' isëquë ya'huapo. ⁹ Yosë nohuanton, na'a piyapi'sa' isëquë yaimapi ni'ton, a'chintárahuë. A'naquënso' no'huipirinacohuë', pënëntárahuë. Na'amiachin imasapi.

¹⁰ Iya Timotio cantonpachinquëma', noya nontoco' noya cancanchin. Ca pochachin inanta' Yosë nanamën a'chinarin. ¹¹ Hui'napi nimirinhue', ama nocancosohuë', noya natanco'. Noya nontatoma', catahuaco' isëquë huënanta'in. Ina ninarahuë. A'napita iyaro'sarë' canquimapon, tñahuë.

¹² Iya Aporosënta' sha'huitopirahuë'. "Iyaro'sa' pa'pachina', quëmanta' paquë'," itopirahuë', co ipora nohuantérinhue'. Nanitohuachin, nicaponquëma' pa'sarin.

Tiquiapon pochin pënëninso'

¹³ Ama huë'érëso pochin cancantatomarahuë', noya yonquico'. Ya'ipi cancanëma quëran natëmiatoco'. Ma'sha onpoapomarahuënta', chiníquën cancantoco'. Niachinicancanco'. ¹⁴ Ma'sona térranta' nipatama', noya ninosoroatoma', nico'.

¹⁵ Istipano sa'inë chachin nohuitérama'. Iráca Acaya parti a'chinpatëra, inapita'ton Quisocristo imapi. Pëinënquë ya'huëpisopitanta' imasapi. Imatona', na'con catahuarinënquëma'. Ya'ipi imapisopita catahuapi. ¹⁶ Inapitaso' noya natëco', tñahuë. A'napitanta' chiníquën catahuarinquëma' noya imacamaso marë'. Insosona ina pochin a'chintohuachinquëma', noya ni'co'.

¹⁷ Istipanasë, Portonato, Acaico, inapita isëquë cantihuachinacora, nöya cancantérahuë. Canpitaso' aquë ya'huatoma', co ni'namacohuë'. Inapitaso' ya'huërama quëran huëcatona', catahuarinaco. ¹⁸ Noya nontatonaco, achinicancaninaco. Canpitanta' achinicancaninënquëma', tñahuë. Cancoantahuachina', noya nicatoma', natanco'.

¹⁹ Ya'ipi imapisopita Asia parti ya'huëpiso' yonquiaténquëma', saludos a'patarinënquëma'. Aquira sa'inë chachin na'con yonquiaténquëma', saludos a'patarinquëma'. Pëinënquë niyontonpisopitanta' yonquirinënquëma'. Canpitanta' Siniro imarama' ni'ton, na'con yonquirinënquëma'. ²⁰ Ya'ipicoi saludos a'patarainquëma'. Noya iyaro'sa' ya'huëco', tñai. Noya ninosoroatoma', nisë'quëco'.

²¹ Ca Paonoco na'con yonquiranquëma'. Caora imirahuë quëran isoíchin ninshitaranquëma'.

²² Insosona co Siniro Quisocristo nosorohuachinhue', Yosëri ana'inchin. ;A'naroáchin Siniro o'mantaquë! tñahuë.

²³ Inaora nohuanton, Siniro Quisoso catahuainquëma'. ²⁴ Ya'ipinquëma' Quisocristo imarama' ni'ton, nosororanquëma'. Nani ninshitéraranquëma huachi.

Paono

Paonori Corintoquë ya'huëpisopita ninshitaantarino'

Imapisopita yonquiaton, nanan a'patérinso'

¹ Ca Paonoco ninshitantaranguëma'. ¿Noya canpitanta' ya'huarama'? Noya canta' ya'huarahuë. Yosë nohuanton, Quisocristo acorinco nanamën a'china'huaso marë'. Iya Timotioro'co nanan a'pataranquëma'. Corintoquë ya'huëramasopita ninshitaranguëma'. Yosë nohuanton, canpitanta' huëntonënqué ya'conama'. Acaya parti nisha nisha ninanoro'saquë imaramasopita yonquiatenquëma', ninshitaranguëma'. ² Inaora nohuanton, Tata Yosë catahuainquëma'. Asanocancainquëma'. Sinioro Quisocristonta' inachachin catahuainquëma'.

Paono parisitaponahuë', Yosëri achinicancaninso'

³ —Ma noyacha Tata Yosëso paya. Sinioro Quisocristo pa'pin inaso'. Na'con nosororinpoa' ni'ton, catahuarinpoa' chiniquën cancantahuaso'. Nani tahuëri inasáchin achinicancaninpoa'. ⁴ Ma'sona téranta' onpohuatéhua', ina catahuarinpoa' noya cantacaso marë'. Achinicancaninpoa' ni'ton, campoanta' nanitarihua' a'napita catahucaso'. Inapitanta' ma'sha onpohuachina', achinicancanarihua'. Yosë catahuarinpoaso pochachin inapitanta' catahuarihua'. ⁵ Quisocristo imaréhuaso marë' a'napita aparisiéterinënpoa'. Aparisitohuachinënpoara, Quisocristo chachin achinicancaninpoa'. Na'con na'con aparisitohuachinënpo', na'con na'con catahuarinpoa' noya cancantacaso marë'. ⁶ Canpitanta' Yosë nohuitacamaso marë' a'chintérainquëma'. Ina marë' aparisiéterinaco. Parisitapiraihuë', Yosë achinicancanincoi ahuanta'huaiso marë'. Yosë catahuarinquëma' canpitanta', ténai. Parisitopiramahuë' achinicancanarinquëma' quiya pochachin ahuantamaso marë'. ⁷ Canpitanta' aparisitohuachinënpo', Yosë catahuarinquëma' chiniquën cancantacamaso marë'. Napoaton co Yosë a'poaramahuë'. Chiniquën cancantatoma', imamiatarama', ténai. Ina marë' noya cancantërai.

⁸ Parisitéraiso' sha'huichinquëma', canpitanta' nitotoco'. Asiaquë ya'huasoco, na'con ma'sha onpotérinaco. Co ahuantochináchinhue' cancantërai: ⁹ "Chiminapoi nimara," topiraihuë', co chiminaihuë'. Yosë nohuanton, ma'sha onporai ina na'con na'con yonquica'huaiso marë'. Napoaton "Quiyaura nanitërai," co ténaihuë'. "Catahuacoi Sinioro, co quiyaso' nanitëraihiue'," itërai. Yosééchin ya'ipi nanitaparin. Chiminpisopitanta' ananpitaantarin, ténai. ¹⁰ Pi'pishachin shichiminpiraihuë', Yosë na'con catahuarincoi ni'ton, cha'ërai. Nani tahuëri ni'sárincoi. "Co onporonta' naniantarincoihuë'. A'na tahuëri parisitaantapiraihuë', nicha'ësarincó," ta'toi noya cancantërai. ¹¹ Canpitanta' quiya marë' chiniquën Yosë nontoco' catahuaincoi. Na'anquëma' quiya marë' Yosë nontohuatama', Yosë catahuarincoi. Ina quëran canpitanta' noya cancantarama'. "Ma noyacha Yosëri catahuarin paya," ta'toma', "Yosparinquë Sinioro," tosarama'.

Paono Corintoquë yapa'ninso'

¹² Yosë ni'sárincoi ni'ton, no'tequëna sha'huitarainquëma'. Co pi'pian téranta' non-pintérainquëmahuë'. Noyápiachin cancantatoi, ya'ipi parti a'chinai. Co quiyaura yonquinéhuë'i quëran a'chintérainquëmahuë'. Yosë inaora nohuanton, catahuarincoi ni'ton, noya ninai. Ina marë' noya cancantërai. ¹³ No'tequënáchin ninshiterainquëma'. Co nisha nisha yonquiraihuë'. Co yanopintérainquëmahuë'. Iso quirica nontohuatama', yonquiraiso chachin nitotarama'. Oshaquëran ya'ipi nitotarama huachi, ténahuë. ¹⁴ Ipora noyamiachin nitotërama'. Sinioro Quisoso o'mantacaso' tahuëri nanihuachin, noya cancantatoi, noya ni'sarainquëma'. Naporo tahuëri canpitanta' noya ni'saramacoi, ténai. "Paono noya a'chintérincoi ni'ton, imarai," tosarama'. Ina yonquicamaso' nohuantërai.

15-16 “Noya ni'sarinaco,” ta'to, i'hua nicaponquëma' yapa'pirahuë'. Masitonía parti pa'pato, nira'inquëma'. Ina quëran o'mantahuato, nirimanta'inquëma', topirahuë'. Inaporahuë naporini, campita catahuaitomacohuë' Cotia parti pacáhuaso'. Catoro' ni'nanquëma' naporini, noya noya cancanchitomahuë', ténahuë yonquiato. Napopirahuë', co pa'nahuë'. ¹⁷ Napoaton: “Paono nisha nisha yonquirin,” ¿topiramahuë' ti? Co nisha nisha yonquirahuë'. A'naquënso' ma'sona téranta' sha'huipirinhue', co tēhuëñchachin naporinhue'. Co caso' ina pochin cancantérahuë'. ¹⁸ Yosé ni'sárinco no'tequen nontéranguëma'. Yosé no'tequenáchin nonin ni'ton, canta' co nonpintéranguëmahuë'. Co nisha nisha nonahuë'. ¹⁹ Iráca Siripano, Timotio, ca, caracoi a'chintérainquëma'. Quisocristo nanamén a'chintérainquëma'. Inaso' Yosé hui'nin chachin. Co onporonta' nonpintérinfoahuë'. No'tequen nontérinfoa'. ²⁰ Ya'ipi Yosé sha'huitérinfoaso' Quisocristo acotarinfoa'. Napoaton “Quisocristoso' no'tequen nonaton, catahuarinfoa'. Ma noyacha Yoséso paya,” ténéhua'. ²¹ Yosé chachin huéntonénquë aya'coninfoa' Quisocristo imacaso marë'. Huayonatonpoa', acorinfoa' piyapinénpita nicacaso marë'. ²² Hui'nin pochin nicatonpoa', sichoquë marca acorëso pochin Ispirito Santo aya'coancantérinfoa'. Hua'yanén chachin aya'coancantérinfoa' ni'ton, anitötérinfoa'. “Ya'ipi sha'huitérinfoaso' chachin quétarinfoa'” ténéhua'.

²³ Ya'ipi yonquirahuëso' Yosé nitotérin. Ina ni'sárinco ni'ton, no'tequen nontaranquëma'. Co nohuantérahuë' canpitataquë chiníquen pénëna'huanquëmaso'. Napoaton co i'hua ni'conanquëmahuë'. Naporó' pa'nahuë naporini, co noyahuë' ninamaso marë' chiníquen pénëna'huanquëmaso' ya'huë'itonhuë'. ²⁴ Co quiyaso' hua'an pochin chiníquen pénentérahuë'. Sanoanan quëran pénénainquëma'. Yosé nanamén noya natërama'. Yacatahuarainquëma' noya cancantacamaso marë'.

2

¹ I'hua nicaponquëma' yapantapirahuë', co pa'nahuë'. Pa'nahuë naporini, aséchiténquëmahuë'. ² Chiníquen pénénpaténquëma', sétarama'. Co nohuantérahuë' aséta'huanquëmaso'. Campita sétahuatama', co huachi nanitaramahuë' acapacancana-macoso', ténahuë yonquiato. ³ Napoaton i'hua ninshitéranguëma' pénëna'huanquëmaso marë'. Ina quëran canpitataquë pa'pato, co sétarahuë'. Noya imaantahuatama', noya cancantarahuë. Noya cancantohuato, canpitanta' noya cancantarama', ténahuë. ⁴ Chiníquen sétato, i'hua ninshitéranguëma'. “Co yanatérinacohuë”, ta'to, sétérahuë. Na'néchináchin cancantérahuë. Co nohuantérahuë' chiníquen aséta'huanquëmaso'. Co no'huiranquëmahuë'. Na'con nosororanquëma'. Ina nitotacamaso marë' ninshitéranguëma'.

Nanan anoyatacao' ya'huérino'

⁵ I'hua a'nara' co noyahuë' nininso marë' sétérahuë. Co casáchin sétérahuë'. Canpitanta' pancamiachin sétërama'. Nipirinhue', co nohuantérahuë' nanan apancatacaso' ni'ton, napotéranguëma'. ⁶ Téhuëna'pi nani ana'intërama'. Na'anquëma' ana'intërama' ni'ton, co noyahuë' nininso marë' inanta' sétarin. Co huachi aquëtë' ana'intacaso' ya'huérinhue'. ⁷ Iporaso' nanan anoyatoco'. Noya nontaantaco' chiníquen cancanchin. Iporahuanta' sétarin. Napoaton catahuaco' ama aquëtë' sëchinsohuë', sétori ya'coancantohuachin. ⁸ Niyontonahuatoma', noya nontoco'. “Nosoroaténquen iyasha nanan anoyatarainquen,” itoco'. Ina quëran téhuëñchachin nosoroatoma', noya nontaantaco'. ⁹ Napoaton i'hua ninshitéranguëma'. “Ya'ipi natéarinaco,” ta'to, pénénanquëma'. Ténia'huanquëmaso marë' ninshitéranguëma'. ¹⁰ Nanan anoyatohuatama', canta' nanan anoyatérahuë pochin cancantarahuë. Campita yonquiaténquëma', nanan anoyatérahuë. “Quisocristo nani tahuëri ni'sarinpoa”, ta'to, cancanéhuë quëran huarë' nanan anoyatérahuë. ¹¹ Co nanan anoyatohuatéhuahuë', Satanasë minséarinfoa'. Inaso' nisha nisha yanopintérinfoaso' nitotéréhua'.

Troasëquë Paono na'con yonquirinso'

¹² I'hua Troasëquë pa'nuhüe Quisocristo nanamën a'china'huaso marë'. Yosë nohuan-ton, na'a piyapi'sa' nohuantopi ni'ton, a'chintërahuë. ¹³ Napoaponahuë', i'hua chachin iya Tito canpitataquë a'papirahuë'. Co huëñantarinhüe ni'ton, co sano cancantërahuë'. “¿Onpoatoncha co iyasha huëñtarinhüe nicaya?” ta'to, piyapi'sa' noyasha nontahuato, Masitoniaquë pa'nuhüe.

Quisocristo catahuarinpoa' minsëtacaso'

¹⁴ Ma noyacha Tata Yosëso paya, tënëhua'. Quisocristo imarëhua' ni'ton, nani tahuëri ina catahuarinpoa' inimiconënpoapita minsëcaso'. Inapitaso' co nohuantopihuë' Quisocristo nanamën a'china'huaiso'. Co nohuantopiranahuë', nisha nisha parti paatoi, nanamën a'chinárai. Pimóton hua'sai' pimoanahuaninso pochin Quisocristo nanamën nahuinarin. A'chintatloi, na'a piyapi'sa' anitotërai. ¹⁵ Quisocristoso' pimóchin nininso' a'përahuaton, Yosë chinotërin. Ina pimoanahuaninso pochin ya'ipi parti nanamën a'chinai. A'chinpatëira, Yosëri nohuantérinsopita noya natanpi ni'ton, nicha'ësarín. Co nohuantérinsopitahuënta' natanpirinahuë', topinan quëran natanpi ni'ton, parisitopiquë pa'sapi. ¹⁶ Inapitaso' chimipi anarinso pochin nicatonaco, co natëtopihuë' ni'ton, chimimpachina', parisitomiatapi. Natëpisopitaso nimirinhuë' pimóchin imërëso pochin nica-tonaco, cha'ësahuatona', nanopimiatiapi. ¿Incarita' nanitërin ina pochin noya a'chinacaso'? Co insonta' nanitërinhuë' inaora a'chinacaso', tënahuë. ¹⁷ A'naquën nonpinatona', inahuara canacaiso marë' a'chinapi. “Yosë nanamën a'chintërainquëma'”, topirinahuë', co no'tëquën a'chinpihuë'. Quiyaso nimirinhuë' no'tëquën sha'huitërainquëma'. Yosë a'parincoi ni'ton, ina nanansáchin a'chinarai. Yosë ni'sarincoi ni'ton, Quisocristoíchin natëarai.

3

Nasha quëran anoyatërinso'

¹ “Ina pochin nonpatama', naquëranchin a'napita nocanarama'”, ¿itëramaco ti? Co insonta' nocanaihuë'. A'naquënso' carta a'napitari ninshitërinso' a'notërinquëma' no-huitacaso marë'. “Iso quëmapiso' noya. A'chintohuachingquëma', noya natanco'”, tënín quiricaquë. Inanpi quirica co ma'parainquëmahuë'. Co ina pochin no-huitëraihuë'. Nani noyá nohuitëramaco. ² Canpitaso' cartanëhuëi pochin ninama', cancanëhuëiquë Quisocristori ninshitërinso'. Nanamën chachin a'chintohuatëinquëmara, noya imarama'. Ya'ipi piyapi'sa' ni'ninënquëma'. “Paono ca'taninsopitarë chachin a'chintërin ni'ton, noya cancantopi,” ta'tona', noya ni'ninacoi. ³ A'chintohuatëinquëmara, noya natanatoma' Quisocristo imarama' ni'ton, noya carta pochin ninama'. Quisocristo chachin ninshitërinso'. Ina cartaso' co napisëquë ninshitërinhuë'. Co na'piquë téranta' ninshitërinhuë'. Yosëso' nanopimiatarin ni'ton, Ispirito Santo anoyacancantërinquëma' nöya nicacamaso marë'.

⁴ Quisocristo catahuarincoi ni'ton, noya a'chintërainquëma'. Ina marë' Yosë noya ni'sarincoi, ténai. ⁵ Quiyaora co pi'pisha téranta' nanitëraihuë' noya a'chinta'huainquëmaso'. Yosëíchin ananitërincoi. Co catahuarincoihuë' naporini, co canpitanta' cancanëma quëran imaitomahuë'. ⁶ Ina nani acorincoi a'china'huaiso marë'. Acohua chincoira, catahuarincoi nasha quëran anoyatërinso a'chinta'huainquëmaso marë'. Ina imapatëhua', Ispirito Santo catahuarinpoa' Yosë nohuitatëhua' nanopimiatarin ni'ton, Iráca anoyatërinso Moisëséri ninshitopirinhuë'. Ina imapatëhua, co onporonta' noya cancantërehuahuë'. “Co natëhuatamahuë', chiminpatama', ana'intacaso' ya'huérin,” ténin. Co ina a'chintërainquëmahuë'.

⁷ Iráca Yosë pënëntërinso' sha'huihuachina, na'piquë ninshitërin. Yosëso' noya noya ni'ton, huëñaráchin ya'norin. Moisësé ya'pirionta' huëñaratarin ni'ton, co israiro'sa' nanopihuë' hua'qui' nirayacaiso'. Huëñarataponahuë', oshaquëran sacorayarin.

Pënëntérinsonta' noya níponahuë', co ya'huëmiatérinhue'. Co ya'ipi natëhuachinahuë', chiminpachina', ana'intacaso' ya'huërin. ⁸ Iporaso nípirinhue', nasha quëran anoyatérinso a'chinarai. ¡Ispirito Santo chachin catahuarinpoa' ni'ton, inaso' noya noya! ⁹ Iráca pënëntérinso' nanan noya nípirinhue', co natëhuachinahuë', ana'intacaso' ya'huërin. Quisocristo nanamënso nípirinhue', noya noya. Ina imapatéhuela', oshanënpoa' inquitatonpoa', Yosë noya ni'sarinpoa'. Napoaton noya noya, ténahuë. ¹⁰ Iráca Moisésë noya pënëntopirinhue', iporaso' noya noya ya'huëtérinpoa'. ¹¹ Iráca pënëntérinso sha'huitohuachina, huënaráchin pochin ya'nópirinhue', sacorin huachi, co ya'huëmiatarinhue'. Iporaso' nasha quëran anoyatérinsoso', ya'huëmiatarin. Co onporonta' nishatarinhue' ni'ton, noya noya, ténéhua'.

¹² Inaso co ta'huantarinhue', ta'toi, inasáchin a'chinarai. Co té'huatoihuë', ya'ipi parti a'chinarai. ¹³ Iráca Moisésë pënëntohuachina, ya'pirin huënaratopirinhue', oshaquëran sacorayarin. Napoaton nipa'copirayatérin ama sacorayarinso' quënanacaiso marëhuë'. Quiyaso' co ina pochin a'chintérainquëmahuë'. ¹⁴ Israiro'saso nípirinhue' co natantochináchinhue' cancantopi. Ipora huanta' Yosë quiricanëñ iráca ninshitopiso' non-topirinahuë', co no'téquëñ yonquipihuë'. Nipa'copirayatérinso pochin cancantatona', co nanitopihuë' Yosë quiricanëñ no'téquëñ nitotacaiso'. Quisocristoíchin catahuarinpoa' no'téquëñ nitotacaso'. ¹⁵ Ipora huanta' Moisésë ninshitérinso' non-topirinahuë', co no'téquëñ yonquipihuë'. ¹⁶ Quisocristo imapatéhuela', co huachi nipa'copirayatérëso pochin cancantarihuahuë'. Siniro noya nohuitarihu'a'. ¹⁷ "Siniro" topatéhuela', Ispirito Santo tapon naporëhua'. Ina catahuahuachinpoa', co huachi iráca pënëntérinso' imacaso' ya'huërinhuë'. Ispirito Santo nicha'érinpoa' no'téquëñ yonquicaso marë'. ¹⁸ Siniro imapatéhuela', co huachi nipa'copirayatérëso pochin cancantarihuahuë'. Isihuicoquëma'sha a'notérëso pochin ninéhua'. Yosë nónya nininso' piyapi'sa' anitotérëhua'. Apira apira ina yonquihuatéhuela', oshaquëran Yosë pochachin cancantarihu'a'. Ina nohuanton, Ispirito Santo catahuarinpoa' noya noya cancantacaso marë'.

4

¹ Yosë nosoroatoncoi, acorincoi ina nanamën a'china'huaiso marë'. Ina yonquiatoi, co yaa'poraihuë'. ² A'naquënsco' co noyahuë' yonquiatona', a'chinapi. Noyasha nonpirinahuë', nonpinacaiso marë' napopi. Quiyaso nípirinhue' co manta' po'oana quëran nínhue' ni'ton, co tapana'huaiso' ya'huërinhuë'. Co nisha nisha a'chinaihuë'. Ya'ipi Yosë nanamën no'téquëñ a'chintarainquëma'. Yosë ni'sárincoi ni'ton, inasáchin a'chinarai. A'ninquëchin a'chinai ya'ipi piyapi'sa' yonquicaso marë'. ³ Quisocristo nanamën noya a'chintopiraihuë', a'naquëñ co yanatétöpihuë'. Parisitopiquë pacacaiso nipsopita co nohuantopihuë' natëtacaiso'. ⁴ Sopai nohuanton, co nanitopihuë' no'téquëñ yonquicaso'. Ma'sha a'pintérëso pochin nanamën quëran Yosë anitotérinpoa' Quisocristo nohuitacaso marë'. Inaso' Yosë chachin ninin. Inapitaso nípirinhue' somaraya pochin cancantatona', co nanitopihuë' natëtacaiso'. ⁵ Co quiya imancoiso marë' a'chintérainquëmahuë'. Quisocristo nanamënáchin sha'huitérainquëma'. "Siniro ni'ton, inasáchin yonquicaso' ya'huërin," ténai. Quiyanta' ina natëtoi, nani tahuëri yacatahuarainquëma'. ⁶ Ya'nan isoro'pa' acoapon ya'ipi parti tashipirinhue': "Nii'sohuanchin huachi," ténin Yosë. Napohuachina, tahuëri ya'huërin. Inapochachin iporaso' cancanënpoaquë a'pintérinpoa' ina nohuitacaso marë'. Inaso' noya noya. Quisocristo ya'pirin quëran a'pintérinpoaso pochin ninin. Ina yonquihuatéhuela', Yosë chachin anohuitarinpoa huachi.

Yosë natëtona', chiniquëñ cancantopiso'

⁷ Co quiyaso' chiniquëñ nanantopiraihuë', Yosë nohuitatoi, a'napitanta' catahuarai ina nohuitacaiso marë'. Ni'co'. Yonsha, huë'ëta, inapita no'pa quëran nipi ni'ton, co ya'huëmiatérinhue'. A'naroáchin ya'quiuhachina, co noyatérinhue'. Napoonin. Inapochachin quiyanta' co chiniquëñ cancantopiraihuë', Yosë catahuarincoi nanamën

a'china'huaiso'. A'napitanta' natanatonacoi, yonquiapi. "Ma noyacha Yosëri catahuarin paya. Co catahuarinhü' naporini, co ina pochin nanichitonahuë," tosapi. ⁸ Nani ma'sha onpopiraihuë', Yosë catahuarincoi ahuanta'huaiso marë'. "Oshaquëran nicha'ësarincói," ta'toi, imarai. "¿Onpoatoicha ma'sha onporai paya?" tapoiraihuë', co pa'yanaihuë'. ⁹ A'chinaiso marë' chiníquën no'huipirinacoihuë', co Yosë nani-antérincoihuë'. Aparisitopirinacoihuë', co ata'huantérinacoihuë'. ¹⁰ Iráca Quisocristo chiníquën aparisitahuatona', tēpapi. Quiyanta' Quisocristo marë' parisitarai. A'naquën yatéparinacoi. Napoaponahuë' Quisocristo nanopiantarin ni'ton, catahuarincoi ina pochin nica'huaiso marë'. ¹¹ Quisocristo nanamën a'chinaiso marë' yatéparinacoi. Quiyaora co nanitopiraihuë', nani tahuëri ina achinicancanincoi ina pochachin yonquica'huaiso marë'. Ipora huanta' nanpitoi, Quisocristo pochin cancantarai. ¹² A'chintérainquëmaso marë' aparisitatonacoi, yatépapirinacoihuë', canpitaso' imarama'. Quisocristo anoyacancantérinquëma' ni'ton, nanopimiatarama', tēnahuë.

¹³ Yosë quiricanënquë ninshitopi. "Yosë natérahuë ni'ton, sha'huirahuë," tēnin. Quiyanta' inapochachin cancantërai. "Yosë catahuarincoi," ta'toi, nanamën a'chinaraí. ¹⁴ Tēpapirinacoihuënta', Quisocristo imarai ni'toi, Yosë ananpitaantaríncoi, tēnai. Iráca Quisocristo ananpitaantarínso' pochin quiyanta' ananpitaantaríncoi. Yosë'pa' quëpantaríncoi. Canpitaro'coi chachin ya'huëcontarihua huachi. ¹⁵ Canpitanta' imacamaso marë' parisitërai. Inaora nohuanton, Yosë na'con nosororincoi. Na'con na'con piyapi'sa' ina nohuitohuachina', noya cancantatona', Yosë nontapi. "Ma noyanquëncha, Sinioro, paya. Nosoroatoncoi, nicha'ësarancoi ni'ton, 'Yosparinquëen,' Sinioro," itapi.

¹⁶ Napoaton co a'pochináchinhü' cancantërai. Parisitatoi, co huachi chinipiraihuë', nani tahuëri achinicancanincoi noya noya cancanta'huaiso marë'. ¹⁷ Tēhuëñchachin iporasó' pi'pian parisitapiréhuahuë', co hua'qui' isoro'paquë ya'huarihuahuë'. Yosë'pa' pa'patéhua', co onporonta' pipiaréhuahuë'. Imaréhuaso marë' parisitapiréhuahuë', inapaquëso' noya noya cancantarihua'. Yosë pochachin cancantarihua'. ¹⁸ Isoro'paquë ya'huërinsopita co na'con na'con yonquiréhuahuë'. Iporaso' parisitarihuarahuë', co ina marë' sétarihuahuë'. Yosë na'con na'con yonquiaréhua'. Ina nohuitacasoáchin cancantarihua'. Isoro'paquë ya'huërinsopita quënanpiréhuahuë', co ya'huëmiatarinhü'. Ta'huantarín. Yosë noya yonquirinpoasoso' co quënanpiréhuahuë', ya'huëmiatarin.

5

¹ Ni'co'. Pëi' në'mëtë quëran nipachinara, co hua'quirinhuë'. Inapochachin nonënponta' co ya'huëmiatarinhü'. Chiminpatéhua', Yosë'pa' pa'patéhua', nasha nonënpoa' Yosë quëtarinpoa'. Noya noya nininso' quëtarinpoa'. Inaso' co onporonta' chanatarinhü'. ² Iporaso' parisitapiréhuahuë', a'na tahuëri nasha a'moréhuaso pochin nasha nonënpoa' ya'huëtarinpoa'. Ina na'con nohuantéréhua'. ³ Chiminpatéhua', co hua'yanënpoorachin inápaquë ya'huëmiatarinhü'. Nasha nonënpoa' quëtarinpoa'. ⁴ Iporaso' isoro'paquë ya'huatéhua', co chiniréhuahuë', sétéréhua', naporéhua'. Napopiréhuahuë', co chiminacaso' nohuantéréhuahuë'. Nasha nonënpoa' tēhuëñchinso' na'con nohuantéréhua'. Isoro'paquë ta'huantopiréhuahuë', Yosë'pa' noya noya nanopimiatarihua'. ⁵ Yosë acorinpoa' nasha nonënpoa' ya'huëtinpoaso marë'. Tēhuëñchachin inápaquë noya ananpitaantarínpoa', tēnëhua'. Sichoquë marca acorëso pochin nani Ispirito Santo aya'coancantérinpoa' ni'ton, nitotéréhua'.

⁶ Napoaton chiníquën cancantéréhua'. "A'na tahuëri Yosë'pa' pa'saréhua'," ta'téhua', noya cancantaréhua'. Tēhuëñchachin isoro'paquë nanopiuatéhua', co Quisocristo nírayarihuahuë'. ⁷ Co ipora quënanpiréhuahuë', "Yosë no'téquën nontérinpoa'," ta'téhua', natéréhua'. "Co onporonta' nonpintarinpoahue!," tēnëhua'. ⁸ Napoaton chiníquën cancantéréhua'. "Chiminpatéhua', Quisocristorë'quënpoa' ya'huëcontarihua'. Inaso' noya

noya," tēnēhua'. ⁹ Ma'sona tēranta' nipatēhua', Yoséíchin natérēhua' noya nicainpoaso marë'. Nanpihuatēhua', chiminpatēhuanta', Sinioro nohuantérinsoáchin nohuantérēhua'. ¹⁰ A'na tahuëri Quisocristo o'mantahuachin, ya'ipinpoa' coisë pochin sha'huitarinpoa'. Ya'ipi ninéhuasopita yonquiaton, a'naya a'nayanpoa' no'téquën nontarinpoa'. Co noya nipatēhuahuë', co Yosé'pa' acanaarinfoahuë'. Noya nipatēhua', acanaarinfoa huachi.

Nanan anoyatérinpoaso'

¹¹ Napoaton Yosé tē'huatacaso' ya'huérin. Ina yonquiatoi, ya'ipi piyapi'sa' pēnénárai. Co pi'pian tēranta' nonpintérainquëmahuë'. Yosé ni'sárincoi ni'toi, no'téquën nontérainquëma'. Noya ninaiso' canpitanta' nitotërama', topiraihuë'. ¹² "Quiyaso' noya noyacoi," co tēnaihuë'. Co a'napita nocanaihuë'. Nisha nanan a'china'piro'sa' noya pochin ya'noponaraihuë', co cancanëna quëran huarë' imapihuë'. Pinopachincoi, sha'huitoco': "Paono tēhuëñchachin no'téquën nontérincoi. Ya'ipi cancanën quëran huarë' Quisocristo imarin," itoco'. Ina pochin a'panicamaso marë' sha'huitaranquëma'. ¹³ A'naquën na'con pēnénpatëira, "Hua'yantopi," itérinaco. Napopirinahuë', Yosé yonquiatoi, naporai. A'na tahuërinta' sanoanan quëran pēnénainquëma'. Yosé yonquicamaso marë' ina pochin nontérainquëma'. ¹⁴ "Quisocristo na'con nosororinpoa," ta'toi, nanamën a'chinárai. Canpoa marë' inaso' chiminin. Ina imapatēhua', canpoanta' chiminéhuaso pochin ni'ninpoa'. ¹⁵ Tēhuëñchachin canpoa marë' chiminin noya noya cancantacaso marë'. Co huachi canpoara costaréhuaso' pa'yatacaso' ya'huérinhue'. Inasáchin yonquicaso marë' chiminin. Chiminaponahuë', nanopiantarin ni'ton, inasáchin yonquiréhua'. ¹⁶ Iráca quiyaura yonquinéhuëi quëran yonquiatoi, aipi ya'norinsoráchin yonquirai. Quisocristonta' iráca co no'téquën yonquirapiraihuë'. "Co inaso' Yosé hui'ninhuë'," topiraihuë', iporaso' no'téquën yonquirai. ¹⁷ Quisocristo imapatēhua', Yosé anoyacancantarinpoa'. Nasha cancan ya'huétarinpoa huachi. Iráca yonquiréhuasopita naniantérēhua'. Nashamiachin pochin cancantatéhua', noya noya yonquiarihua huachi.

¹⁸ Co canpoara noya cancantérēhuahuë'. Yoséíchin anoyacancantérinpoa'. Iráca oshahuanatéhua', Yosé inimicotopiréhuahuë', inaora nohuanton, hui'nin isoro'paqué a'paimarin chiminaton nanan anoyatérinpoaso marë'. Ina quëran quiyanta' acorincoi nanamën a'china'huaiso marë'. Insosona natéhuachin, nanan anoyatarin. ¹⁹ Yosé nohuanton, hui'nin chiminin anoyacancantérinpoaso marë'. Anoyacancantohuachinpoa', co huachi oshanënpoa' yonquirinhuë', inquitérinpoa huachi. Nani nanan anoyatohuachinpoara, quiyanta' acorincoi paatoi a'napita sha'huita'huaiso marë'. ²⁰ Quisocristo chachin acorincoi a'napita anitota'huaiso marë'. Ina ya'huérénamën pochin sha'huitarainquëma'. "Yosé nontoco' nanan anoyachinquëma'," itérainquëma'. ²¹ Iráca Quisocristo co manta' oshahuanaponahuë', Yosé nohuanton, ya'huérëtérinpoa'. Oshahuan pochin nicaton, Yoséri chiníquën ana'intérin. Canpoa marë' chiminin ni'ton, co huachi oshahuan pochin ni'ninpoahuë'. Quisocristo imapatēhua', Yosé noya ni'sarinfoahuë'.

6

¹ Yosé acorincoi nanamën a'china'huaiso marë'. Acoatoncoi, catahuarincoi a'chinta'huainquëmaso marë'. "Yosé nosoroatonpoa', yanicha'érinpoa'," itérainquëma'. Ama topinan quëran natancosohuë'. Imaco huachi. ² Iráca quiricanën quëran Yosé naporin:

"Ipora chachin yacatahuanquëma'. Nontohuatamaco, natanaranquëma'.

Yanicha'érinquëma' ni'ton, catahuanquëma' cha'ëcamaso marë'," ténin.

Ipora tahuëri chachin yacatahuaninfoa'. Nontohuatéhua', anoyacancantarinpoa', tēnahuë.

³ Napoaton noyasáchin ninai ama a'na piyapi tēranta' nisha cancantacaso marëhuë'. Co noyahuë' ninai naporini, a'napitanta' nicatonaco, co Yosé imaitonahuë'.

⁴ Ma'sona täranta' nipatoira, Yosëíchin natärai piyapi'sa' nicatonacoi ina yonquicaiso marë'. Aparisitopirinacoihuë', co i'huérëtérainihuë'. Ma'sha, cosharo', inapita pahuantopirincoihuë', ahuantatoi, chiníquën cancantërai. Ma'sha onpoapoiraihuë', co pa'yanaihuë'. ⁵ A'chinaiso marë' tëhuëñchachin huihirinacoi, tashinan pëiquë po'morinacoi. Chiníquën no'huitatona', ahuérinacoi. A'chinapoi pa'sápatoi, co huachi chiniraihuë'. Na'a tashi' Yosë marë' sacatápatoi, huë'ëi' natanai. A'na tahuërinta' co coshatatoihuë', tana natanai. ⁶ "Quisocristo imarai," ta'toi, noyasáchin ninai. Yosë nanamën noya nitotërai. Ma'sha onpotopirinacoihuë', co no'huiraihuë', ahuantërai. Ya'ipi piyapi'sa' nöya nontatoi, catahuarai. Ispirito Santo ya'coancantërincoi ni'ton, catahuarincoi noya nica'huaiso'. Tëhuëñchachin cancanëhuëi quëran huarë' piyapi'sa' nosororai. ⁷ No'tequën a'chinai. Yosë na'con catahuarincoi ni'ton, a'chinpatoira, na'a piyapi'sa' natanatona', imasapi. Ni'co'. Inimicoro'sa' huë'pachinara, sontaro'sa' hua'na quëran a'morin ama inimicori paquitacaso marëhuë'. Inapochachin Yosë achinirincoi ama sopai minséincoiso marëhuë'. Yosë nohuanton, noyasáchin ninai. Noya catahuarincoi ni'ton, sopai minséearai. ⁸ A'naquën noya ni'ninacoi. A'naquënso nimirinhuë' no'huirinacoi. A'na tahuëri: "Paono nöya a'chinin," topi. A'na tahuëriso nimirinhuë' pinorinacoi. No'tequën a'chintopiraihuë': "Nonpiánpi," topi a'naquënta'. ⁹ Na'a piyapi'sa' nohuitopirinacoihuë', a'naquënso' nisha pochin nicatonacoi, co yanataninacoihuë'. Pi'pianchin shichiminpiraihuë', nanpiárai. Chiníquën aparisitopirinacoihuë', co tëparinacoihuë'. ¹⁰ Sëtopiraihuë', Yosë yonquiatoi, noya cancantërai. Co na'con ma'sha ya'huëtopirincoihuë', Yosë nanamën a'chintërai ni'ton, na'a piyapi'sa' natëtonacoi, noya noya cancantapi. Co manta' ya'huëtopirincoihuë', Yosë nohuitatoi, sano cancantërai. Co manta' noya ninins'o pahuantërincoihuë'.

¹¹ Corintoquë ya'huëramasopita, na'con ninshitarainquëma'. Nani ya'ipi yonquiraiso', iyaro'sa', sha'huitërainquëma'. Na'con nosororainquëma'. ¹² Quiyaso' ya'ipi cancanëhuëi quëran nosoromiatërainquëma'. Noyasáchin yonquipirainquëmahuë', canpitaso' co a'na nosororamacoihuë' nimara, tënai. ¹³ Hui'nahuëpita pochin ni'nanquëma' ni'ton, inapochachin nosorocoi quiyanta', topiraihuë'. Ina na'con nohantërai.

Nipayarëhuasopita

¹⁴ Co Yosë imapisopitasohuë' nimirinhuë', ama inapitarë'quëma' na'con na'con nipayacosohuë'. Co canpita pochin cancantopihuë'. Noya cancantohuatama', co nohuantaramahuë' oshahuanacamaso'. Ni'co'. Tahuëri, tashi' co inachachinhue'. Nisha nisha ya'nopi. ¹⁵ Quisocristo sopairë' co napopináchin yonquipihuë'. Naporahuaton, canpoaso' Quisocristo imarëhua' ni'ton, co oshahuano'sa pochin cancantërhahuë'. ¹⁶ Yosë chinotërëhuaquë noyasáchin nicacaso' ya'huërin. Co inaquëso' mamansi moshacaso' ya'huërinhuë'. Inapochachin canpoanta' Yosë imapatëhua', ya'coancantarinpao' ni'ton, ina pëinën pochin ninëhua'. Yosëso' nanpiárin. Quiricanën quëran naporin:

"Imapatamaco, ya'coancantaranguëma'. Canpitaro'co ya'huarahuë".

Chinotohuatamaco, noya a'paiaranquëma'.

Piyapinëhuëpita pochin ni'saranquëma'," tënин.

¹⁷ Ina quëran Siniyorori itantarín:

"A'naquën co noyahue' cancantohuachina', ama inapitarë'quëma' nipayacosohuë'.

Co noyahue' yonquipiso' tananpitoco'.

Inapotohuatama', noya ni'saranquëma'.

¹⁸ Tataparinquëma pochachin noya nosoroaranquëma'.

Hui'nahuëpita pochin cancantëranquëma',

itërinpoa' Tata Yosë. Chini chiníquën nanantaton, ya'ipiya hua'anëntërin," tënин quiricanënquë.

7

¹ Iyaro'sa na'con nosororanquëma'. Ina pochin Yosë yonquirinpoa ni'ton, ya'ipi co noyahuë' yonquirëhuasopita nariantahua'. Ya'ipi co noyahuë' ninëhuasopitanta' a'poa'ahua'. Yosë tē'huatatëhua', noyasáchin niahua'.

Noya cancantantapiso'

² Cancanëma quëran huarë' nosorocoi. Co a'nayanquëma téranta' ma'sha onpoteràiniquëmahuë'. Co anishacancantërainquëmahuë'. Co nonpintërainquëmahuë'. ³ Co nocanatënquëma' pënënanquëmahuë'. Na'con nosororainquëmaso' nani sha'huitërainquëma'. Chimina'huaiquë huarë' nosoromiatarainquëma'. ⁴ Tëhuëñchachin nôya ni'nanquëma'. "Corintoquë ya'huëpisopita noya imapi," itérahuë ya'ipi piyapi'sa'. Parisitaporahuë', canpita yonquiatënquëma', nôya cancantërahuë.

⁵ Masitoniaquë canconpatoira, na'con ma'sha onpoatoi napion cancantërai. Na'a piyapi'sa' no'huirinacoi ni'ton, parisitërai. Naporahuaton, cancanëhuëi quëran na'con yonquirápatëinquëma', sëtërai. ⁶ Sëtohuatëhua', Yosë achinicancaninpoa' ni'ton, quiyanta' achinicancanincoi. Ina nohuanton, Tito huë'nin. ⁷ Napoaton noya cancantërai. Noya nanan sha'huitiirincoi. Noya yonquiantarama' ni'ton, inanta' noya cancantërin. I'huá ni'compachinquëmara, napotërama': "Hua'qui' co Paono ni'nincoihuë'. Sha'huitëquë' manóton huë'in. Co noyahuë' ninalo marë' sëtërai. Paono pënënpachincoi, noya natanai," tēnama', itérincoi. Ina natanato, nôya cancantërahuë.

⁸⁻⁹ I'huá quirica ninshitatënquëma', chiníquën pënënanquëma'. Ina quirica nontohuata-mara, pa'pi sëtërama'. Ina natanato, canta' sëtopirahuë'. Co nohuantërahuë' chiníquën asëta'huanquëmaso'. Iporaso niperinhue' noya cancantërahuë. Co hua'qui' sëtëramahuë'. Oshanëma marë' sëtatoma', na'con na'con Yosë yonquirama'. Co noyahuë' ninamasopita a'porama'. Pënënanquëma' ni'ton, co ana'intinquëmaso' ya'huërinhuë'. ¹⁰ Oshanënpoa marë' sëtatëhua', Yosë nontohuatëhua', catahuarinpoa' co noyahuë' yonquirëhuasopita nariantacaso marë'. Ina pochin sëtacaso' noya, tēnhahuë. Ina quëran anoyacancantarinpoa'. Co imapisopitasohue' niperinhue' topinan quëran sëtopi. Co oshanëna' nariantohuachinahuë', chiminpachina', Yosëri ana'intarin. ¹¹ Canpitaso' sëtatoma', na'con na'con Yosë yonquirama'. Ina quëran "Tëhuëñchachin co noyahuë' nicatëhua', oshahuanëhua'. Co noyahuë' ninëhuasopita nariantahua', Yosë ana'intoahuachinpoa'," tēnama'. Canta' noya yonquiramaco. "Manóton Paono huë'in catahuainpoaso marë'. Chiníquën cancantatëhua', no'tëquën natëahua'," tēnama'. Oshahuana'pi co noyahuë' nininso marë' ana'intërama' noya nicacaso marë'. Ya'ipi co noyahuë' yonquiramasopita nariantatoma', noya cancantaantarama'. ¹² I'huá ninshitapon-quëma', co têhuëna'pi yonquiano, ninshitëranquëmahuë'. Co inari aparisitërinso téranta' yonquirahuë'. Ya'ipinquëma' noya yonquiantamacoiso' nohuantërahuë. "Paonoso catahuarinsopitarë chachin, no'tëquën pënënpoinpoa'. Yosë ni'sarinpoa' ni'quëhuarë', natëahua'," ta'camaso marë' ninshitëranquëma'. ¹³ Naporama' ni'ton, co huachi sëtëraihuë'.

Tito cantonpachinquëmara, co pi'pian téranta' no'huiramahuë'. Noya nontërama' ni'ton, noya cancantërin. Quiyanta' ina natanatoi, nôya cancantërai. ¹⁴ Co'huara Tito pa'shätérasohue', sha'huitërahuë: "Corintoquë ya'huëpisopita noya imatona', natëarinënquëen," itérahuë. Canpita no'tëquën nontërainquëmaso pochachin Titonta' no'tëquën nontërahuë. Pa'pachina, têhuëñchachin noya natërama' ni'ton, co tapanahuë'. ¹⁵ Pënënpachinquëmara, itërama': "No'tëquën pënënancoi. Tëhuëñchachin co noyahuë' ninai. Yosë tē'huata'huaiso' ya'huërin," ta'toma', natërama'. Ina natanahuaton, Titonta' na'con nosororinquëma'. ¹⁶ Carinquëmanta' yonquiatënquëma', nôya cancantërahuë. Noya noya imasarama huachi, tēnhahuë'.

8

Pahuantérinsopita catahuacaso' ya'huérinso'

¹ Isonta' iyaro'sa' yasha'huitérinquëma'. Masitonia parti na'a piyapi'sa' Quisocristo imasapi. Nisha nisha ninanoquë niyontonatona', Yosë chinotapi. "Yosë na'con nosororinpoa'", ta'tona', a'napita noya nosoroapi. Yoséri chachin catahuarin ina pochin cancantacaiso marë'. ² Ma'sha onpotohuachinara, chiníquen parisitaponarai-hü', noya cancantopi. Naporahuaton, pi'pisha ya'huétopirinahuë', a'napita imapisopita pahuantohuachinara, na'con coriqui quëtopi. ³ Co apiratonahuë', na'con quëtopi. Pahuantaiquëhuarë' quëtopi, cari ni'nahuë. Co sha'huitopiraihuë', inahuara nohuantatona', quëterinacoi pahuantérinsopita quëtaca'huaiso marë'. ⁴ "Quiyarinta' a'napita imapisopita catahua'ii, topiraihuë'. Cotia parti na'con pahuantopi ni'ton, iso coriqui quëtonquë', itérinacoi. Na'con ina pochin nontérinacoi. ⁵ Co coriqui quëtacasoachin yonquipihuë'. Ya'ipi cancanëna quëran Yosë imapi. Ina'ton yonquipi. Ina pochin cancantacaso' noya noya, ténahuë. Ina quëran coriqui, ma'sha, inapita quëtopi. Quiyanta' yanatérinacoi. "Ma'sona Yosë nohuantohuachin, sha'huitoco i natë'i," itérinacoi. ⁶ I'hua chachin Tito sha'huitérinquëma' ni'ton, canpitanta' yonquirama' coriqui yontonacamaso'. "Imapisopita pahuantopi ni'ton, a'patahua', ténama'. Napoaton i'huamiachin Tito itérai: "Naquéranchin paantaton, pënëantaquë' ya'ipi coriqui yaa'papiso' ananina', itérai. ⁷ Canpitaso' nónya imarama' ni'ton, Quisocristo natërama'. Na'con nitotatoma', a'chinama'. A'napita yacatahuardama'. A'chintérinquëmaso pochachin a'napita nosoroarama'. Napoaton iporaso' pahuantopisopita nosoroatoma', catahuaco', ténahuë.

⁸ Co camairanquëmahue'. A'napita na'con Yosë marë' acopiso' sha'huitérinquëma' yonquicamaso marë'. Téhuëñchachin a'napita nosorohuatama', ama topinan quëran nontocosohuë'. Catahuaco' ama pahuanchinasohuë'. ⁹ Siniro Quisocristo nosoroatopoa', catahuarinpoaso' nani nitotërama'. Iráca noya noya inápaquë ya'huépirinhuë', isoro'paquë o'marin nicha'ëinquëmaso marë'. Co manta' iséquë ya'huétérinhuë'. Parisitérin quëran nicha'ërinquema' noya noya cancantacaso marë'. Parisitaton, na'con catahuarinquëma'.

¹⁰ I'hua pi'iquë yonquirama' a'napita catahuacamaso'. Naporo' caniaritërama' coriqui yontonacaso'. Iporaso' naquéranchin yontoantaco', ténahuë. Inapohuatama', noya nisarama'. ¹¹ Naporo' pa'pi nohuantopiramahuë', iporaso' coriqui ya'huétohuachinquëma', noya cancantatoma', yontonco' ananicaso marë'. ¹² Ya'ipi cancanëma quëran quëtohuatama', Yosë noya ni'sarinquëma'. Co na'a coriquihuanpatamahuë', Yosë nitotérin. Co nanitéramahuë' na'a quëtacaso'. Co apiratomahuë', pi'pian téranta' quëtohuatama', noya ni'sarinquëma'.

¹³ Nanitinpichin acocaso' ya'huérin. Co nohuantérahuë' pahuantinquëmaso'. ¹⁴ Noya nicatahuacaso' nohuantahua'. Iporaso' ya'huétarinquëma' ni'ton, pahuantérinsopita quëtoco'. A'na tahuériso' campita ya'huérë' ma'sha pahuantohuachinquëma', inahuanta' i'huérëtarinéñquëma'. Ninapotohuatéhua', ya'ipi imaréhuasopita noya ya'huarihua'. Co pahuantarinfoahuë'. ¹⁵ Iráca Yosë quiricanéñquë naporin: "Mana mapachinara, a'naquénso' na'a maponaraihuë', co ya'sotopihuë'. A'naquénso niperinhuë' pi'pian maponaraihuë', co pahuantopihuë' ténin.

Tito Corintoquë a'parinso'

¹⁶ Titonta' na'con yonquirinquëma'. Ina marë' noya cancantato, "Yosparinquëen, Siniro," itérahuë. ¹⁷ "Naquéranchin paantaquë'," itohuatéra, "Noyahua". Nani canta' yonquirahuë paanta'huaso'. Na'con nohuantérahuë," itérinco.

¹⁸ A'na iyayanta' a'paarai. Titorë' pa'sarin. "Inanta' nónya imaton, Quisocristo nanamén noya a'chinin," topi ya'ipi imapisopita. ¹⁹ Nisha nisha ninano quëran imapisopita niyontonahuatona', ina quëmapi chachin huayonahuatona', acopi ca'tanaincoiso

marë'. Coriqui yoca'huaiso marë' pa'patoi, inanta' pa'sarin. Coriqui quëtonpatoi, noya cancantapona huachi. "Ma noyacha Tata Yosë nosororinpoa paya. Ina nohuanton, iyaro'sa' noya cancantatona', catahuarinënpoa'", tapona'. ²⁰ Na'a coriqui quëparai ni'ton, co nohuantëraihuë' a'napita pinoinacoiso'. Napoaton ina napoco'i pa'sarai. ²¹ Noyasáchin nisarai Yosë noya nicaincoiso marë'. Piyapi'santa' noya nicainacoiso' nohuantërai.

²² A'na iyayanta' a'parai nicainquëmaso marë'. Inanta' na'con catahuarincoi a'china'huaiso marë'. Piyapi'sa' nosoroaton, catahuarin, a'chintërin, naporin. Noya quëmapi, tënaí. Ipora canpitataquë pa'sarin. "Corintoquë imapisopita na'con nohuantöpi pahuantërinsopita catahuacaiso'", ta'ton, pa'sarin catahuainquëmaso marë'.

²³ "¿Inta' Titoso?" itohuachinënquëma', sha'huitoco'. "Co'ta Paonorë' a'chininso'. Inanta' piyapi'sa' catahuarin noya imacaiso marë', itoco'. "¿Ma'marëta' a'napitanta' huë'pi?" itohuachinënquëma', "Nisha nisha ninano quëran a'paipiso'. Quisocristo noya imapi inapitanta'", itoco'. ²⁴ Inapita cantonpachinquëma', noya nontoco'. Ina quëran coriqui pahuantërinsopita marë' yontonamaso' quëtohuatama', noya ni'sarinënquëma'. "Paono no'tëquën nontërinsopita". Corintoquë imapisopitaso' pahuantopisopita nosoropi mini," tosapi. Ina quëran ya'huëpique chachin paantahuachina', sha'huirapi anta'. Ya'ipi imapisopita nitotapi huachi.

9

Imapisopita catahuacaso marë' coriqui yontonpiso'

¹ Tëhuëñchachin a'napita imapisopita pahuantohuachina', ma'sha quëtacaso' ya'huërin. Nani nitotërama' ni'ton, co na'con ninshitaranquëmahuë'. ² Piyapi'sa' yacatahuaramaso' nitotërahuë. Ya'ipi Masitonía parti pa'pato, sha'huitëra'piarahuë. "Ihua pi'iquë chachin Acaya parti imapisopita na'con yonquipi pahuantërinsopita catahuacaiso'", itërahuë. Masitoniaro'sa' natantahuatona', inahuanta' nohuantöpi. "Inapita pochin quiyanta' catahuachi, topirahuë'", itërinaco na'aya'pi. ³ Nipirinhue', "Co ya'ipi coriqui yontonchätërapihuë'", ta'to, isopita iyaro'sa' a'pataranquëma' nontinquëmaso marë'. "Nani yontonapi huëshirahuë", itopirahuë', ipora huanta' pahuanamara. Co topinan quëran napota'huaso' ya'huërinhuë', tënahuë. ⁴ Co hua'quiya quëranhuë' canpitataquë pa'sarahuë. A'naquëñ Masitoníaquë ya'huëpisopita imasarinaco nimara. Canpitataquë canconpatoi, nani coriqui yontontopinan quënanconarai, topirahuë'. Co ya'huëhuachinhuë', tapanarahuë. "Corintoquë imapisopitaso' noyaro'sa'", itërahuëso marë', co coriqui ya'huëhuachinhuë', tapanarama' canpitanta'. ⁵ Napoaton iyaro'sa' aquëchitërahuë. Ihua yonquirama' a'napita catahuacaso'. Inapitaso' catahuarinënquëma' coriqui yontonacamaso marë'. Nani yontonpatama', noya quënanconarai. Canpitaora nohuanton, quëtoco'. Co quiyaora nohuanton, yama'parainquëmahuë'.

⁶ Isonta' yonquico': "Pi'pian sha'tohuatëra, pi'pian manë'. Pancana sha'tohuatëra, na'con manë'", topi. ⁷ Ya'ipinpoa' canpoara nohuanton, quëtahua'. Onposona yaquëtohuachin, quëchin. Ama nisha nisha yonquia'huasohuë'. Co apiquëran quëtacaso' ya'huërinhuë'. Noya cancantatëhua', quëtahua'. Ina pochin quëtohuatëhua', Yosë noya ni'sarinpoa'. ⁸ Yosë ya'ipi nanitaparin. Nosoroatënquëma', na'con catahuarinquëma' noya nicacamaso'. Nani tahuëri catahuarinquëma'. Ina catahuahuachinquëma', noya cancantarama'. Ina nohuanton, ya'huëtarinquëma' a'napitanta' quëtacaso marë'. ⁹ Iráca Yosë quiricanënquë naporin:

"Noya cancantopisopita co apirapihuë'. Sa'ahuaro'sa' pahuantohuachina', quëtapi. Noya nipiso', ya'huëmiatarin," tënin.

¹⁰ Ni'co'. Yosë nohuanton, ya'pirin ya'huërin shacacaso marë'. Sha'patëra, ina nohuanton, na'a papotërin capacaso marë'. Inapochachin ina nohuanton, ma'sha ya'huëtarinquëma'. A'napita topinan quëtohuatama', Yosë catahuarinquëma' noya noya cancantacamaso marë'. ¹¹ Noya catahuahuachinquëma', a'napitanta' catahuarama'. Co

apiratatomahuë', quëtarama'. Pahuantërinsopita quëtonpatoi, "Yosparinquën, Sinioro," tosapi. ¹² Imapisopita catahuahuatama', co huachi pahuantapihuë'. Naporahuaton, na'con na'con Yosë yonquiapi. "Yosparinquën, Sinioro," itapi. ¹³ Catahuarama' ni'ton, noya cancantapi. "Ma noya Quisocristo nanamën natëtona', catahuarinënpoa'. Ma noyacha Yosëso' ni'ton, ina nohuanton, na'a piyapi'sa' catahuapi paya," tosapi. ¹⁴ Yosë nohuanton, na'con nosororama' ni'ton, inapitanta' nosoroatënquëma', canpita marë' Yosë nontapi huachi. ¹⁵ Yosëso nipurinhuë' na'con na'con quëtérinpoa'. Hui'nin chachin a'paimarin nicha'ëinpoaso marë'. Inaso' noya nóya ni'ton, "Yosparinquën, Sinioro," itahua'.

10

Yosëri nanan quëtérinso'

¹ Ca Paonoco sanoanan quëran pënënanquëma'. A'naquën napopi: "Paono aquë quëran ninshitohuachinpoara, chiníquën nanan a'patirinpoa'. Iséquë chachin ya'huapon, të'huatatonpoa', co chiníquën pënëninpoahuë", topi natantérahuë. Quisocristoso' chiníquën nanantaponahuë', co no'huirinpoahuë'. Sanoanan quëran pënëninpoa'. Ina pochin cancantato, canta' sanoanan quëran pënënanquëma'. ² A'naquënso' pinorinaco. "Paonoso' co Yosë pochin yonquirinhuë'. Inaora nohuantérinsoáchin yonquirin," topirinahuë'. Pa'pato, inapita chiníquën pënënarahuë. Canpitaso nipurinhuë', noya yonquihuatama', co chiníquën pënëna'huanquëmaso' ya'huaponhuë', ténahuë. ³ Piyapicoi quiyanta' nipuraihuë', co a'napita pochin yonquiraihuë'. Co natëpisopitahuëso' inimicotopiranacoihuë', co quiyaora yonquinéhuëi quëran yaminsérailhuë'. ⁴ A'naquënso' inimiconënpita minsëcaiso marë' nisha nisha quihuípi. Quiyaso nipurinhuë' co quiyaora yonquinéhuëi quëran minsëtaraihuë'. Sacai' nipurinhuë', Yosë ananitérincoi nonpin nanano'sa' minsëca'huaiso'. ⁵ A'naquën nisha nanan imasapi. "Quiyaora noya nitotërai," toconpi ni'ton, co nanitopihuë' Yosë nohuitacaiso'. Nipurinhuë', Yosë catahuarincoi inapitanta' minsëca'huaiso'. No'huipiranacoihuë', no'tën nanan a'chintarai Quisocristoíchin natëcaiso marë'. Ya'ipinpoa' co noyahuë' yonquipiréhuahuë', Yosë nanitérin anariantinpoaso' Quisocristoíchin natëcaso marë'. ⁶ Canpita noya natëhuatama', noya cancantarai. Ina quëran canconpatoi, co natëpisopitahuë' no'tequën ana'intarai.

⁷ Canpitaso' ya'pirama quëran quënanamasoráchin yonquirama'. Co cancanëma quëran huarë' yonquiramahuë'. A'naquën "Quisocristo chachin imarai," topachinara, isonta' yonqui'ina'. Quiyanta' Quisocristo imarai mini. ⁸ Yosë chachin chiníquën nanan quëtérincoi nanamën a'chinta'huainquëmaso marë', itohuatënquëmara, co ina marë' tapanahuë'. Noya noya imacamaso marë' a'chintérainquëma'. Co nisha cancantamaso marë' a'chintérainquëmahuë'. ⁹ Chiníquën nanantopirahuë', co apa'yana'huanquëmaso marë' ninshitaranquëmahuë'. ¹⁰ A'naquën itérinënquëma': "Paono na'con ninshitatonpoa', chiníquën pënënpirinpoahuë'. Huë'pachinaso', co chiníquën nanantona'pi pochin nontérinpoahuë'. Sanoanayan quëran a'chintérinpoa' ni'ton, co chiníquën nanantérinhuë', toconpi. ¹¹ Napopirinahuë', co nisha nisha nontaraihuë'. Inapitanta' sha'huitoco' nitochina'. Ninshitohuatënquëmara, chiníquën pënënanquëma mini. Canpitataquë canconpatoi, inachachin nontarainquëma'. Ínsosona co yanatëhuachinhuë', chiníquën pënënatoi, ana'intarai huachi.

¹² Inapitaso' co no'tequën yonquipihuë'. "Quiyaso' noya noyacoi. A'napita quëran noya noya nitotërai," toconpi. Co ina pochin nonacasohuë' nipurinhuë', napopi. Inahua capini ninocanatona', ninapotopi. Co quiyaso' inapita pochin cancantérailhuë'. ¹³ Co quiyaora nohuanton, chiníquën nanantérailhuë'. Yosë chachin acorincoi na'a piyapi'sa' a'chinta'huaiso marë'. Inséquësona a'china'huaisonta' sha'huitérincoi. Ina nohuanton, Corintoquë ya'huëramasopitanta' a'chintérainquëma'. ¹⁴ Yosë sha'huitérincoisoráchin

natërai. Ina nohuanton, canpitataquë pa'nai. Quiyarima'ton Quisocristo nanamën a'chintërainquëma'. ¹⁵ Co a'na piyapi a'chininquë paatoi, a'chinaihuë'. Yosë a'parincoi noya a'chinta'huainquëmaso marë'. Na'con nohuantërai noya noya imacamaso'. Noya noya natëhuatama', aquëtë huarë' a'chintarainquëma'. ¹⁶ Ina quëran a'napita ya'huërinquënta' yaa'chinai. Inapitanta' Yosë imacaiso marë' a'chintarai. A'na piyapi a'chininquë co nohuantëraihuë' a'china'huaiso'.

¹⁷ Yosë quiricanënquë naporin: " 'Noya noya ninahuë,' co ta'caso' ya'huërinhuë'. 'Ma noyacha Yosë catastuarinco paya,' ta'caso' ya'huërin," ténin. ¹⁸ "Caso' noyaco," topatëhua', co ina marë' Yosë noya ni'sarinpoahuë'. Noya cancantohuatëhua', Yosë noya ni'sarinpoa'. Ina na'con na'con yonquia'ahua'.

11

Nisha a'china'piro'sa'yanonpinpiso'

¹ Noya nipatëhua', co ina marë' a'napita nocanacaso' ya'huërinhuë'. Nipirinhue', pi'pian hua'yantérindo pochin nonchinquëma' natanco. No'tequën yonquicamaso marë' sha'huitaranquëma'. ² Yosë nohuanton, na'con nosororanquëma'. Nosoroatënenquëma', a'pitëranquëma'. Co nohuantërahuë' nisha cancantacamaso'. Nanon so'yarinso pochin ninin. Ni'co'. Quëmapiri mapachina, so'ináchin yonquicaso' ya'huërin. Inapochachin carinquëmanta' a'chintëranquëma' Quisocristoíchin yonquicamaso marë'. ³ A'naquënso nipirinhue' yaanishacancantérinënquëma'. Iráca ya'huani Ipa nonpintérindo pochin yanonpintérinënquëma' ama Quisocristoíchin yonquicamaso marëhuë'. ⁴ Quisocristo imacaso' a'chintëranquëma'. Natëhuatama', Ispirito Santo ya'coancantérinquëma'. Inapitaso nipirinhue' nisha a'chintërinënquëma'. "Quisocristo nanamën chachin a'chintarainquëma'," itopirinënquëmahuë', nisha nanan a'chintërinënquëma'. Nisha ispiritonta' ya'huërin, itérinënquëma'. Nisha nisha natëcaso' a'chintohuachinquëmara, a'naroáchin yaimarama'. ⁵ "Quiyaso' noya noyacoi," itopirinënquëmahuë', inapitaso' co ca quëran noya noyahue', ténahuë. ⁶ Co míso nona'picohue' naporahuë', noya noya nitotërahuë. Ya'ipi no'tequën a'chintëranquëmaso' nani nitotërama'. Nani ma'sha ninahuësonta' nani ni'nama'.

⁷ Yosë nanamën a'chintohuatënenquëmara, co pi'pisha téranta' coriqui ma'paranquëmahuë'. Sacatato, ma'sha pahuantérincoso' pa'anahuë. Topinan a'chintëranquëma' campita noya noya imacamaso marë'. ¿Ina marë' co noyahue' ni'namaco ti? ⁸ A'chintëranquëmaso marë' co manta' ma'paranquëmahuë'. A'napita imapisopita coriqui a'patërinaco catasthua'huanquëmaso marë'. Naporo' co inapita a'chintopirahuë', a'patërinaco. ⁹ Canpitataquë ya'huasoco, ma'sha pahuantopirincohuë', co pi'pisha téranta' ma'paranquëmahuë'. Masitonía parti quëran huécatona', quétirinaco. Quisocristo imapi ni'ton, topinan ma'sha quétirinaco nanopica'huaso marë'. Campita ma'shanëma' co ma'paranquëmahuë'. Co onporonta' nohuantaparanquëmahuë'. ¹⁰ Quisocristo catastuarinco ni'ton, no'tequën nontaranquëma'. Co a'chinato canarahue'. Ya'ipi Acaya parti topinan a'chinarahue. Napoaton noya cancantërahuë. Co insonta' nanitarinhue' nisha ayonquiincoso'. ¹¹ "Co nosororinquëmahuë' ni'ton, ma'shanëma' co ma'parinquëmahuë'," itopirinënquëmahuë', co no'tequën nonpihuë'. Yosë ni'sárinco, na'con nosororanquëma', ténahuë.

¹² Nisha a'china'piro'sa' a'chintohuachinënquëmara, coriqui ma'parinënquëma'. Caso niperinhue' a'chinahuëso marë' co coriqui ma'patërahuë'. Ipora huanta' topinan a'chinárahuë ama pinoinacoso marëhuë'. Inapita pochin canta' ma'paranquëma' naporini, "Paono pochachin a'chintërainquëma'. Yosë a'parincoi quiyanta'," ichitenënquëmahuë'. ¹³ Inapitaso niperinhue' na'con nonpintérinënquëma'. "Quisocristo a'parincoi," itopirinënquëmahuë', co tēhuëñchachin a'parinhuë'. Nonpintatënenquëma', a'chintarinënquëma'. ¹⁴ Co ina marë' pa'yanacaso' ya'huërinhuë'. Ni'co'. Satanasënta'

nohuantohuachin, Yosë anquënинён pochin ya'norarin piyapi'sa' nonpintacaso marë'. ¹⁵ Napoaton Satanasë natëpisopitanta' ina pochachin nisapi. "Yosë a'parincoi. No'tequén natëcamaso marë' a'chintarainquëma'," topirinahuë'. Nonpinapi ni'ton, a'na tahuëri Yosëri no'tequén ana'intarin.

Paono parisitérinso'

¹⁶ Naquëranchin sha'huitanta'inquëma'. "Paonoso' hua'yantérin," toconpi a'naquën. Ama inapita natëcosohuë'. Nipirinhuë', pi'pian ina pochin nontohuatënquëma', ahuantatoma', natanco, topirahuë'. Caso' noya noya ninahuëso' sha'huitaranquëma' yonquicamaso marë'. ¹⁷ Co Siniro nohuantérinhuë' a'napita nocanacaso'. Nocantohuatéra, hua'yantérinso pochin nonëhua'. ¹⁸ Nipirinhuë', nisha a'china'piro'sa' ina pochin nonpi ni'ton, canta' pi'pian ina pochin sha'huichinquëma'. ¹⁹ Inapitaso' nocanpirinënquëmahuë', noya natanama' ni'quëhuarë', canta' pi'pian téranta' natanco, topirahuë'. ²⁰ Inapitaso' chiníquén camairinënquëma'. Ma'shanëma' topinan mapi. Nocaninënquëma', yaahuërinënquëma'. Inapotopirinënquëmahuë', ¿ma'marëcha noya natanama nicaya? ténahuë, yonquiat. ²¹ Quiyaso nippirinhuë' co ina pochin ninahuë'. Co chiníquén nontérainquëmahuë'. Ina marë' tapanai.

Nipirinhuë', inapitaso' nocaninaco ni'quëhuarë', canta' hua'yantérinso pochin nonato, pi'pian nonantapatarahuë. ²² "Quiyaso' Iprio piyapicoi," topachinara, canta' mini Iprioco. "Israiro piyapicoi," topachinara, canta' inachachin ninahuë. "Apraanso' shimashonéhuëi chachin," topachinara, inaso' shimashonéhuë canta'. ²³ "Quisocristo sha'huitérincoi ni'toi, natërai," itopirinënquëmahuë'. ¡Caso' na'con na'con natërahuë! Inapitaso' nocaninaco ni'ton, hua'yantérinso pochin nonato, pi'pian inapita pochin nonchinquëma' no'tequén yonquicamaso marë'. Yosë marë' caso' chini chiníquén sacatérahuë. Pa'sápato, Yosë nanamén a'chinahuë. Ina marë' na'con na'con parisitaporahuë', ahuantérahuë. Inanta' sha'huichinquëma'. A'chinahuëso marë' na'aro' tashinan pëiquë po'morinaco. Na'aro' ahuérinaco. Shitëparinaco. ²⁴ Cotio hua'ano'sa' ana'intatonaco, chiníquén huihuirinaco. Cara shonca iscono' huihuirinaco. Nisha nisha ninanoquë a'natëraporo' inapotéra'piarinaco. ²⁵ Copirno sontaro'sanënpita naraquë chiníquén ahuérinaco. Cararo' inapotatonaco, ana'intérinaco. A'na tahuëri na'pique tē'yararinaco tē'painacoso marë'. Naporahuaton, cararo' pi'píshachin shichimiitérahuë. Nanchaquë marë pa'taporahuë', nancha yancominahuaton, acopoi' pa'nin. Cararo' inaporahuë. A'na tashi' nara yanponinquë matato, marëquë chachin tahuërianpitérahuë. I'huaraya huarë' cha'érahuë. ²⁶ A'chinaca'huaso marë' pa'sárahuë. Iiro'sa' panca pamatoihuachina, shichimiitérahuë. Ihuatéro'santa' yatëparinaco. Canta' cotio piyapico nippirahuë', cotioro'sa' no'huitonaco, yaahuërinaco. Nisharo'santa' no'huirinaco. Panca ninanoro'saqué a'naquén yaahuërinaco. Co piyapi ya'huérinquëonta' ma'sha onporahuë. Marë pa'tohuatéra, parisitérahuë. A'naquén: "Quiyanta' imarai," taponaraihuë', chiníquén no'huirinaco. ²⁷ Chiníquén sacatápato, parisitérahuë. Tashinta' co huë'ëtorahuë', ni'tárahuë. Na'a tahuëri capa cosharo' ni'ton, tanarahuë, yamororahuë. Co coshataporahuë', a'chinárahuë. A'moca'huaso' pahuantérinco ni'ton, sëhuén natanahuë.

²⁸ Yosë nohuanton, ina pochin parisitárahuë. Naporahuaton, ya'ipi imaramasopita nosoroatënquëma', yonquiáranquëma'. Noya noya imacamaso' na'con nohuantérahuë. Nani tahuëri yonquiatënquëma' napion cancantérahuë. ²⁹ A'naquén co chiníquén cancantohuachinahuë', canta' ina pochin ninatanahuë. A'na piyapi anishacancantohuachinquëmara, nosororanquëma' ni'ton, ina no'huirë pochin cancantérahuë. ³⁰ A'naquénso' na'con nonsapi. "Quiyaso' noya noyacoi," topi. Caso nippirinhuë' co ina pochin nonahuë'. Co caora nanitérahuëso' sha'huichinquëma'. Na'con ma'sha onpotopirinacohuë', Yoséíchin achinicancaninco ahuanta'huaso marë'. ³¹ Yosë ni'sárinco, co nonpintaranquëmahuë'. Inaso' Quisocristo pa'pin chachin, ya'ipiyari chinochina'. Ina ni'sárinco

ni'ton, no'tequën nontaranquëma'. ³² Iráca Tamascoquë ya'huasoco, ninano hua'an yamaninco, copirno Aritaséri acorinso'. Tashinan pëiquë yapo'morinco ni'ton, sontaro'sa' a'parin. Nani tahuëri ninano ya'coana ni'sapi macainacoso marë'. ³³ Yamapirinacohue', imapisopita catahuarinaco cha'ëca'huaso marë'. Inapa pairatopiquë huintana ya'huérin. Ina quëran nantipiqueste anohuaraimarinaco. Napotohuachinacora, cha'ërahuë. Co caora nanitopirahuë', Yosë catahuarinco, cha'ërahuë.

12

Paono inápaquë quënaninso'

¹ Co nohuantërahuë' a'napita nocana'huaso'. "Caso' noya noya piyapico," co taporahuë', pi'pian ina pochin sha'huichinquëma'. Iráca Yosë nohuanton, hua'narëso pochin ma'sha ni'nahuë. Quisocristo chachin anitotérincoso'. ² Naporo' inápaquë Yosë ya'huérinquë chachin quëparinco. Nani shonca catapini pi'ipitarin quëparinco'. Hua'yanëhuëichin a'na' pa'mara. Nonëhuëro'co chachin a'na' pa'maraco. Co caso' nitotërahuë'. Yosëíchin nitotérin. ³ Téhuëñchachin pantarahuë. Hua'yanëhuëichin a'na' pa'mara. Nonëhuëro'co chachin a'na' pa'maraco. Co caso' nitotërahuë'. Yosëíchin nitotérin. ⁴ Yosë'pa' ya'huasoco, na'con natanpirahuë', co nanitërahuë' sha'huica'huaso'. Co Yosë nohuantérinhue'. ⁵ Noya noya nininso' anitotérinco ni'ton, nocantochináchin cancantopirahuë', tananpitërahuë. Co caora nohuanto, chiníquën nanantërahuë'. Co caora nanitërahuë' noya nica'huaso', ténahuë. ⁶ "Na'con na'con nitotërahuë," itéranchuë' naporini, no'tequën nonchitëñquëmahuë', co nonpinchitëñquëmahuë'. Nipirinhuë', co ina pochin nontéranchuë'. Nani nohuitëramaco. A'chintohuatëñquëmara, natanamaco. Naporahuësopita ni'nama'. Inaíchin yonquiatoma', noya ni'co topirahuë'. Napoaton co aquëtë' sha'huitaranquëmahuë'.

⁷ Yosë na'con na'con anitotérinco. Ina quëran ama a'napita nocana'huaso marëhuë' ina nohuanton, ma'sha onporahuë. Nahuan acoposha ohuanincoso pochin natanahuë. Co oshahuanaporahuë', Satanasë na'con aparisitërinco. ⁸ Ina marë' chiníquën Siniro nontërahuë. "Catahuaco ama parisichisohue'," itérahuë. Cararo' ina pochin nontopirahuë'. ⁹ Siniro sha'huitërinco: "Ca nohuanto, ipora huanta' parisitapiranhuë', nosoroatëñquën, na'con catahuanquën. Carinquën achinicancanaranquën noya ahuantamaso marë'. Co quëmaora nanitohuatantuë', na'con na'con catahuanquën. Ma'sona térranta' onpohuatan, co onporonta' pataranquënhue'," itérinco. Napoaton co huachi sétërahuë'. "Co caora nanitohuatërahuë', Quisocristo na'con na'con catahuaninco," ta'to, noya cancantërahuë. ¹⁰ Napoaton co chiníquën cancantopirahuë', co pa'yanahuë'. Pinopachinacora, co no'huitërahuë'. Ma'sha pahuantopirinco', co ina yonquirahuë'. Quisocristo imarahue'so marë' aparisitohuachinacora, ahuantërahuë. Sacai' nipirinhuë', nónya cancantërahuë. "Co caora nanitohuatërahuë', na'con na'con catahuaninco," ta'to, chini chiníquën cancantërahuë.

Imapisopita yonquirinso'

¹¹ Nisha a'china'piro'sa' pa'yatërama' ni'ton, hua'yantërinso pochin nontéranchuëma'. "Paono nónya a'chintërinco," itérama' naporini, co ina pochin canta' nonaca'huaso' ya'huë'itonhuë'. "Quiyaso' noya noyacoi," itopirinëñquëmahuë', co ca quëran noya noyahuë' inahuaso'. Co caora nanitoporahuë', Quisocristo catahuarinco ni'ton, noya ninahuë. ¹² Iráca isoro'paquë nípon, a'naya a'naya huayonaton, acorin nanamëñ a'chinacaiso marë'. Inapitaso' na'con catahuanin. Ina nohuanton, cania'piro'sa' a'naroáchin anoyatopi. Nani ma'sha nanitapapi. Inapopi quëran acorinsopita nohuitërhua'. Canta' acorinco ni'ton, inapochachin catahuarinco. Canpitataquë ya'huapo, cania'piro'sa' a'naroáchin anoyatërahuë. Aparisitopirinacohue', ahuantato, a'chintëranquëma'. "Ma noyacha Yosëri catahuarin paya," ta'toma', imarama'.

13 A'naquënso nimirinhue' sha'huitérinënquéma'. "A'napita imapisopita noya noya ni'nin," itopirinënquémuë', ya'ipinquëma' napopináchin ni'nanquéma'. A'na parti a'chinpato, cosharo', coriqui, inapita ma'patérahuë capato, nanopica'huaso marë'. Canpitaíchin co ma'pachinanquémuë'. ¿Ina marë' no'huiramaco ti? No'huihuatamaco, jnaniantoco'!

14 Nani catoro' ni'conanquéma'. Iporaso' naquéranchin nicaponquéma' yapa'sarahue. Cantonpaténquéma', co manta' ma'paaranquémuë'. Co ma'shanëma' nohuantérahuë'. Canpita noya noya imacamaso' nohuantérahuë. Hui'nahuëpita pochin ni'nanquéma'. Hui'nanpoa' co nocumarinfoahuë'. Canpoari catahuacaso' ya'huërin. **15** Napoaton co manta' ma'paranquémuë'. Noya cancantato, sacatarahuë cosharo' pa'ana'huaso marë'. Ina quëran parisitaporahuë', a'chintaranquéma' noya imacamaso marë'. Cari-maso' na'con na'con nosoropiranquémuë', canpitaso' co onpopinchin nosororamaco-hue' topirahuë'.

16 A'naquëonta' nonpinapirinaco. "Paono co ma'sha ma'papirinquëmuë', nonpin-taténquéma', canarin," itérinënquéma'. Co napopirahuë', napotérinënquéma'. **17** I'hua mini a'naquën a'papirahuë', co manta' ina quëran canarahuë'. **18** "Inta, quëmari ni'coniquë' iyaro'sa'", itahuato, Tito a'parahuë. Inarë' a'na iyayanta' a'parahuë. Cantonpachin-quëma', co Tito nonpintérinquémuë'. Canta' ina pochachin cancantérahuë. Co pi'pisha térranta' canaraihuë'.

19 Co noya nicamacoiso marë' ninshitarainquémuë'. A'naquëma' nimara ina pochin yonquipiramahuë', co quiyaso naporaihuë'. Nosororainquéma' iyaro'sa'. Noya noya imacamaso marë' ninshitarainquéma'. Quisocristo imarai ni'ton, Yoséíchin yon-quirai. Ina ni'sárincoi ni'ton, no'tequën ninshitarainquéma'. **20** Canconpato, co noya ni'saranquémuë' nimara. Canpitanta' co noya ni'saramacohue' nimara. Napoaton sétato, yonquiáranquéma'. Ipora huanta' a'naquëma' nimara nino'huiarama', nia'pitarama', iquianan quëran ninontarama', nipinosarama', ninocanarama', nisha nisha yonquirarama' nimara, ténahuë yonquiat. **21** Iráca a'naquëma' co noyahue' yonquirarama'. Monshihuanaama', sanapirachin yonquirarama'. Ipora huanta' a'naquëma' inapoarama' nimara. Co ina nariantohuatamahuë', canconpato, pa'pi sétarahuë. Carinquëma' a'chintéranquémaso' ni'ton, Yosé atapanarinco. Co oshanëma' a'pohuatamahuë', chiníquën asétaramaco.

13

Piquérän pënentérinso'

1 Nani catoro' ni'conanquéma'. Iporaso' naquéranchin nicaponquéma' pa'sarahue. Yosé quiricanën quëran sha'huitérinpoa'. "Ama topinan quëran ana'intocosohue". Natantacaso' ya'huërin. Cato' piyapihuë nípon, cara piyapihuë nípon, inachachin sha'huitohuachinpoa', náporo huare' ana'intacaso' ya'huërin," topi. Napoaton pa'pato, ina pochin natantarahuë no'tequën nitota'huaso marë'. **2** I'hua ni'conpaténquémaro, pënénanquéma'. "Co oshanëma' nariantohuatamahuë', a'na huë'pato, no'tequën ana'intaranquéma huachi," itéranquéma'. Iporaso' co inatohua' ya'huëpirahuë', inachachin pënëantaranquéma'. Co i'hua oshahuaninsoachin yonquirahuë'. Ya'ipinquëma' pënénaranquéma'. **3** "Chiníquën nanantéranso' a'notocoit nitochii," itopiramacohue'. Pa'pato, no'tequën ana'intohtuatenquéma', nitotarama'. "Quisocristori a'parin ni'ton, chiníquën nanantérin," tosarama'. Quisocristo co topinan quëran nontérinpoahuë'. Chiníquën nanantaton, ya'ipi nanitaparin. **4** Isoro'paqué nípon, co aquëtë' chinirinhue'. Coroséque patanantopi. Chiminaponahuë', Tata Yoséri chiníquën nanantaton, ananpitaantarin. Quiyanta' Quisocristo pochin cancantatoi, co quiyaura chiniraihuë'. Ina acorincoi ni'ton, Yosé achinicancanincoi no'tequën pënëna'huainquémaso marë'.

⁵ Canpitaso nimirinhue' nitantiaco'. Canpitaora yonquinëma quëran yonquico'. A'naquëma' co cancanëma quëran huarë' imashatéraramahuë' nimara. Ya'ipi cancanëma quëran imapatama', Quisocristo ya'coancantérinquëma'. ¿Co ina nitotéraramahuë' ti? A'naquëmaso nimirinhue' co tēhuëñchachin imamaranquëmahue'. ⁶ Tēhuëñchachin imapatama', co topinan quëran a'chintérainquëmahue', tēnahuë. Ina quëran canpitanta' inachachin yonquiarama'. "Tēhuëñchachin Quisocristori acorin pënénainpoaso marë'," tosarama'. ⁷ Canpita marë' Yosë nontarai. "Catahuaquë' noyasáchin niina'," itërai. Co a'napita noya nicainacoiso marë naporaihuë'. Canpita noya noya imacamaso marë' naporai. A'napita co noyahuë' yonquiarapipirinacoihuë', co ina yonquiraihuë'. ⁸ No'tën nanan natëcamaso marë' catahuarinquëma'. Co nohuantérhaihuë' nisha a'chinta'huainquëmaso'. ⁹ Co chiníquën nanantonapochin nimiraihuë', co ina marë' sétérhaihuë'. Noya imapatama', nónya cancantarai. Ipora huanta' Yosë nontarai. "Catahuaquë", Sinioro, noya noya cancanchina," itërai. ¹⁰ Napoaton co inaquë ya'huaporahuë', ninshitaranquëma' pënëna'huanquëmaso marë'. Ya'ipi co noyahuë' yonquiramasopita naniantohuatama', canconpato, co ana'inta'huanquëmaso' ya'huaponhuë'. Sinioro chachin chiníquën nanan quëtérinco catahua'huanquëmaso marë'. Co anishacancanta'huanquëmaso marë' napotaranquëmahue'. Noya noya imacamaso marë' napotaranquëma'.

¹¹ Nani iyaro'sa' ninshitéraranquëma'. Noya cancantoco', tēnahuë. Ya'ipi cancanëma quëran Yosë imaco'. Pënénanquëmaso' noya natëtoma', niachinicancanco'. Napopináchin yonquico'. Noya nini'toma', ya'huéco'. Inapohuatama', Yosë catahuarinquëma'. Inasáchin nosoroatonpoa', catahuarinpoa' sano cancantacaso marë'. ¹² Noya ninosoroatoma', imaramasopita capini nisë'quëco'. ¹³ Ya'ipi imapisopita isëquë ya'huëpiso', saludos a'patarinënquëma'.

¹⁴ Inaora nohuanton, Sinioro Quisocristo catahuainquëma'. Tata Yosë nosoro'inquëma'. Ispirito Santo chachin nani tahuëri noya ayonquiinquëma'. Nani huachi.

Paono

Paonori Carasiaquë ya'huëpisopita ninshitërinso'

Carasiaquë imapisopita quirica a'patërinso'

¹ Ca Paonoco ninshitaranquëma', ni'co'. ¿Noyanquëma' canpitanta'? Noya canta' ya'huarahuë. Quisocristo acorinco nanamën a'china'huaso marë'. Co piyapi'sa' inahuara nohuanton a'parinacohuë' a'china'huaso marë'. Co inapita acorinacohuë'. Tata Yosë chachin acorinco. Ina nohuanton, Quisocristo nanopiantarin huachi. Nani nanopiantohuachina, ina chachin nanan quëtérinco a'china'huaso marë'. ² Ya'ipicoi iséquë imaraisopitaro'coi chachin nanan a'patarainquëma'. Canpitanta' Carasia parti ya'huëramasopita imarama' ni'ton, ninshitaranquëma'. ³ Inaora nohuanton, Tata Yosë catahuainquëma'. Asanocancainquëma'. Sinioro Quisocristonta' inachachin catahuainquëma'. ⁴ Oshanënpoa' inquitinpoaso marë' Quisocristo chiminin. Inaora nohuanton, ya'huërétérinpoa'. Notohuarro' piyapi'sa' co noyahue' yonquipi. Ama inapita pochin cancantacaso marëhuë' chiminaton, anoyacancantérinpoa'. Tata Yosë nohuanton, nicha'érinpoa'. ⁵ "¡Ma noyacha Tata Yosëso paya!" itahua'. Ama onporonta' ina naniantahuasohuë'. Amen.

Quisocristoíchin imacaso' ya'huërinso'

⁶ Yosë ayonquirinquëma' imacamaso marë'. Quisocristo inaora nohuanton nosoroaténquëma', catahuarinquëma' ni'ton, imarama'. Imapiramahuë', a'naroáchin ina naniyatoma', nisha nanan yaimarama'. Ina yonquiato, pa'yanahuë. ⁷ Co a'na nanan, iyaro'sa', ya'huërinhuë' cha'écaso marë'. Quisocristoíchin anoyacancantérinpoa'. Ina imapatéhua', oshanënpoa' inquitarinpoa'. Inasáchin yonquipiramahuë', a'napita huécatona', nisha nanan a'chintarinénquëma'. Napoaton nisha nisha yonquarama'. Yanonpintérinénquëma'. "Co Quisocristoráchin yonquicaso' ya'huërinhuë'", itérinénquëma'. ⁸ Quiyanta' nisha nanan a'chinai naporini, Yosë ana'inchitoncoihuë'. Anquëni téranta' nisha nanan a'chinin naporini, Yosëri ana'inchitonhuë'. "Quisocristoíchin nicha'érinpoa'", itérinquëma'. ⁹ Iráca inachachin sha'huitérainquëma'. Iporaso' naquérenchin sha'huitantaranquëma'. "Quisocristoíchin anoyacancantérinpoa'", ta'toma', imarama'. Inso téranta' nisha nanan a'chintohuachinquëma', Yosëri chiníquen ana'inchin, ténahuë.

¹⁰ Co piyapi'sa' noya nicainacoso marë' a'chinahuë'. Yosë noya nicaincoso marë' a'chinahuë. Piyapi'sa' pa'yatinacoso marë' na'con na'con yonquirahuë naporini, co Quisocristo natéitohuë'.

Paono ya'nan imarinso'

¹¹ No'téquën iyaro'sa' sha'huitaranquëma'. Iráca quëran huarë' co piyapi yonquirinso' a'chintérinquëmahuë'. ¹² Quisocristo chachin nanamën anitotérinco. Co a'na piyapi sha'huitérincoihuë'. Co insonta' ina nanamën a'chintérincoihuë'. Inaora chachin anitotérinco.

¹³ Iráca naporahuëso' nani natantërama'. Co'huara Quisocristo imashatérapohuë', cotio nanan imarahuë. Ina imato, Quisocristo imapisopita no'uirahuë. Chiníquen aparisitërahuë. Ata'huanta'huaso' yonquipirahuë'. ¹⁴ Cotioro'sa' napopiso' chiníquen imato, inasáchin yonquirahuë. Carë' napopináchin pi'ipitopiso' noya natépirinahuë', caso' na'con na'con natërahuë. Nani ma'sha shimashonéhuëpita a'chinpiso' yanatépirahuë'. ¹⁵⁻¹⁶ Yosë nosoroatonco, nohuantérinco hui'nin imaca'huaso marë'. Co'huara nasichátérapohuë', yonquirinco nanamën a'china'huaso marë'. Inaora nohuanton, nosororinco ni'ton, hui'nin anohuitérinco nisha piyapi'sa' pënëna'huaso marë'. Ina marë' acohuachincora, co piyapi'sa' paaparahuë' a'chintinacoso marë'.

¹⁷ Ca'tano'sa' Quirosarinquë ya'huëpirinahuë', co inatohua' pa'nahuë' nonta'huaso marë'. Inapita'ton acopirinhue', Yosë nani sha'huitérinco ni'ton, co inapita téranta' natanconahuë'. Co hua'qui quëranahuë' Arapia parti paato, Quisocristo nanamën yonquiarahuë. Ina quëran Tamascoquë paantarahue.

¹⁸ Cara pi'ipi quëran Quirosarinquë pa'nahuë Pitro nohuita'huaso marë'. Cato simana pochin pénénquë yacaparahuë. ¹⁹ Naporor' Santiaconta' nohuitérahuë. Quisocristo iin inaso'. Inapitasáchin nontérahue. A'napita ca'tano'saso' co ni'nahuë'. ²⁰ Yosë ni'sárinco, no'téquën ninshitaranquëma'. Co nonpintaranquëmahuë'.

²¹ Ina quëran Siria parti pa'nahuë a'chinapo. Sirisia partinta' pa'nahuë. ²² Cotia parti ya'huëpisopitaco nípirinhue' co nohuichatérarinacohue'. Inatohua' na'a Quisocristo imapisopita ya'huëpirinahuë', co nohuitérinacohue'. ²³ Topinan natantérinaco. "Iráca Paono aparisitérinpoa". Yatépapirinfoahuë', iporaso' inanta' imarin. Quisocristo nanamën a'chinarin huachi," topi, natantopi. ²⁴Ina natantahuatona', "¡Ma noyacha Tata Yosëo' ni'ton, Paononta' imarin paya!" topi.

2

Quisoso ca'tano'sanénpitare' ninontopiso'

¹ Shonca catapini pi'ipi quëran naquëranchin Quirosarinquë paantarahue. Pirnapi ca'taninco. Titonta' quëparai. ² Yosë ayonquirinco pacahuaso' ni'ton, pa'nahuë imapisopita nonta'huaso marë'. Ansiano'sarachin niyontonpachinara, sha'huitérahuë. "Caso' nisha piyapi'sa' a'chintohuato, Quisocristoíchin imacaiso' ya'huërin, ténahuë. Iráca pénentérinso' imacaiso' co a'chintérahue", itérahuë. "Co no'téquën a'chinanhue", itérinaco naporini, topinan quëran a'chinchiténquëmahuë', ténahuë yonquiatu. Ansiano'saso nípirinhue' "Noya a'chinan," itérinaco. ³ Titonta' nisha piyapi nípirinhue', inatohua' quëparahuë. Co marca ya'huëtopirinhue', ansiano'sari noya ni'pi. "Marca niacotéquë", co itopihuë'. ⁴ A'naquën cotioro'saso nípirinhue', "Quiyanta' imarai," taponaraihuë', co Quisocristoráchin imapihuë'. Iráca pénentérinsonta' imapi. Yasha'huirapitonacoi, niyontonpiso pëiquë ya'conpi Quisocristo imatoi naporaiso-pita nicacaiso marë'. "Iráca pénentérinsonta' natëcaso' ya'huërin," ta'tona', yaanisha-cancantérinacoi nisha nisha natëca'huaiso marë'. ⁵ Napotopirinacoihuë', co pi'pian téranta' nohuantérainhuë'. "Quisocristoíchin anoyacancantérinpoa", itérail. Canpitanta' no'téquën yonquicamaso' nohuantérail. Napoaton nisha a'chintohuachinacoira, co manta' natéraihuë'.

⁶ Ansiano hua'ano'saso' nípirinhue', co nisha sha'huitérinacohue'. Chiníquën nanantopirinahuë', co tē'huatérahuë'. Napopináchin Yosë ni'ninpoa'. ⁷⁻⁸"No'téquën a'chinan," itérinaco. Pitrori a'chintohuachina, Yosë nohuanton, na'a cotioro'sa' Quisocristo imasapi. Carinta' a'chintohuato, Yosë nohuanton, na'a piyapi'sa', nisha nisha níponarai-hue', imasapi inahuanta'. Napoaton ansiano'santa' noya nontérinaco. "Yosëri Pitro acorin cotioro'sa' a'chintacaso marë'. Quëmaso nípirinhue' acorinquë nisha piyapi'sa' a'chintacaso marë", itérinaco.

⁹ Santiaco, Pitro, Coansha, inapitaco' chini chiníquën nanantopi ni'ton, sha'huitérinacoi. "Yosë na'con catahuarinquë. Ina acorinquë nisha piyapi'sa' a'chintacaso marë", ta'tona', së'quërinaco. Pirnapinta' së'quëpi. "Canpitaco' nisha piyapi'sa' a'chintoco". Quiyaso nípirinhue' cotioro'sa' a'chintarai," itohuachinacoira, "Noyahua", itérail. ¹⁰"Ama sa'ahuaros'a' naniantocosohue'. Imapisopita a'chintoco' ma'sha quëtacaso", itérinacoi. "Co'chi naniantaraihuë paya. Nosororai quiyarinta", itérahuë.

Paonori Pitro pénéninso'

¹¹ Ina quëran Pitro Antioquiaquë pa'pachina, Quisocristoíchin anoyacancantérinpoaso' nitotaponahuë', tēhuërin. Napoaton niyontonpiquë chachin pénénahuë. Ina

sha'huichinquéma' nitotoco'. ¹² Inaqué nisha piyapi'sa' ya'huëpi. A'naquén Quisocristo imapi. Inapitaso' co cotio piyapihuë' ni'ton, ya'ipi cosharo' ca'pi. Cotioro'santa' inaqué ya'huëpisopita Quisoso imapachinara, co huachi cosharo' a'popihuë'. Napopináchin coshatopi. Pitronta' inapitarë' coshataton, co ma'sha a'porinhuë'. Ina quëran a'napita cotioro'sa' Quirosarin quëran canquipi. Santiaco imarinsopita inahuaso'. "Quiyanta' Quisocristo imarai," taponaraihuë', iráca pënëntopiso' yonquiatona', ma'sha a'popi. Inapita huë'pachinara, Pitro co huachi nisha piyapi'sarë' coshatérinhue'. Marca pa'yatopisopita té'huataton, nisha coshatérin. ¹³ Ya'huëhuano'santa' cotioro'sa' nipesopita Pitro nicatona', nisha coshatopi. Pirnapinta' Pitrorë chachin nisha coshatérin. Quisocristo nanamën nitotaponaraihuë', co no'tequén imapihuë'. ¹⁴ Ina ni'sahuato, ya'ipi piyapi ni'térantapaiquë Pitro chiníquén pënënhahuë. "Cotio piyapinquén níponahuë", Quisocristo imaton, iráca pënëntérinso' nariantérin. Nisha piyapi'sarë'quén coshataponahuë', iporaso' naquéranchin ma'sha a'poantaran. Ina pochin nicaton, piyapi'sa' anishayonquiaran. 'Co Quisocristoíchin nicha'érinpoahuë' nimara. Iráca pënëntérinsonta' natëcaso' ya'huërin,' ta'tona', nonanarinënquéen. ¿Nisha piyapi'santa' cotioro'sa pochin yaatarantérin ti?

Quisocristo natëhuatëhua', Yosë nicha'érinpoaso'

¹⁵ Canpoaso' hua'huatérëhua quëran huarë' cotioro'sanpoa' ninëhua'. Co nisha piyapinpoahuë'. 'Co oshahuano'sanpoahuë', nitérëhua'. ¹⁶ Napopirëhuahuë', Moisésë pënëntérinso' natëhuatëhua', co ina marë' Yosë noya ni'sarinpoahuë'. Quisocristoíchin imapatëhua', noya ni'sarinpoa'. Napoaton canpoanta' Quisocristo natërhua' os-hanënpoa' inquitinpoaso marë'. Co inso téranta' pënëntérinso' natérinso marë' Yosë'pa' pa'sarinhuë'. Quisocristoráchin nicha'érinpoa'.

¹⁷ 'Quisocristo nicha'ésarinpoa', ta'tehua', imarihuarahuë', iráca pënëntérinso' imaantahuatëhua', ¿Quisocristo napoahuarë' aoshahuaninpoa' ti? Co onporonta' ina pochin yonquicaso' ya'huërinhuë'. ¹⁸ Iráca pënëntérinso' nani nariantérëhua'. Naquéranchin ina yonquiantahuatëhua', co Yosë natëarihuahuë'. Quisocristoíchin yonquicaso' ya'huërin. ¹⁹ Iráca canta' pënëntérinso' imapirahüe', co nanitérahuë' no'tequén natëca'huaso'. Co ina imato noya cancantérahuë'. Oshahuanato, chimipi pochin cancantérahuë. Napoaton iráca pënëntérinso' nariantérahuë Yoséíchin yonquica'huaso marë'. ²⁰ Quisocristo corosëquë chiminin. Ina imato, canta' corosëquë chiminahuëso pochin ninahuë. Iráca yonquirahuëso' nariantérahuë. Napoaton co huachi oshahuanaca'huaso' ya'huërinhuë'. Iporaso' Quisocristoíchin yonquirahuë. Co huachi caora nohuanto ma'sha ninahuë'. Quisocristo ya'coancantérinco ni'ton, catastuarinco noya nica'huaso'. 'Nani tahuéri Yosë hui'nin chachin catastuarinco,' ta'to, noya cancantérahuë. Inaso' pa'pi nosororinco. Nosoroatonco, ya'huërenamëhuë chiminin. ²¹ Inaora nohuanton, Yosë nosoroatonpoa', hui'nin a'paimarin chiminacaso marë'. Co ina nariantérahuë'. Inasáchin imarahuë ni'ton, Yosë noya ni'sarinco huachi. Iráca pënëntérinso' natërhua' marë' noya ni'ninpoa' naporini, topinan quëran Quisocristo chimiintonhuë', itérahuë.

3

Iráca nanan nariantatëhua', nasha nananáchin imahua'

¹ Co no'tequén iyaro'sa' yonquiramahuë'. ¿Inta' ahua'yantatënquëma', anishacancantérinquëma'? ténahuë yonquiato. "Quisocristo corosëquë patanantopi. Canpoa marë' chiminin," itérainquëma'. A'ninquéchin quënanëso pochachin sha'huitohuatënquëmara, natanama'. "Ina pochin chiminaton, oshanënpoa' inquitérinpoa!," ta'toma', Quisocristo imarama'. ² Isoíchin yanitotérahuë. ¿Ma'ta' imarama' ni'ton Ispirito Santo ya'coancantérinquëma'? Iráca pënëntérinso' natëhuatama', ¿Ispirito Santo ya'coancantérinquëma' ti? ¡Co'ta, Quisocristo nanamën natanatoma' natëhuatama', ya'coancantérinquëma'! "No'tequén nontérinpoa!," ta'toma', natërama'. Ina imapatama',

Ispirito Santo ya'coancantatënquëma', na'con catahuarinquëma'. ³ ¿Onpoatomata' iporaso' co huachi no'tequën yonquiramahuë? Naquëranchin iráca pënëntopiso' yanatëantarama'. Ya'nan imapoma', co canpitaora nanitëramahuë' Yosë huëntonënquë ya'conacamaso'. Ispirito Santo aya'coninquëma'. Ipora huanta' co canpitaora nanitaramahuë' noya noya imacamaso'. ⁴ Imaramaso marë' Ispirito Santo na'con catahuapiriniquëmahuë'. Quisocristo nariantohuatama', topinan quëran catahuarinquëma'. Napoaponahuë', co Quisocristo nariantaramahuë', topirahuë'. ⁵ "Quisocristoíchin anoyacancantérinco," topatama', Ispirito Santo ya'coancantériniquëma'. Inapotohuachinquëma', achinicancaninquëma'. Catahuarinquëma' ni'ton, nani ma'sha nanitaparama'. Co iráca pënëntérinso' natëramaso marë' catahuarinquëmahuë'.

⁶ Isonta' yonquico': iráca Apraan Yosë natërin. "No'tequën nontérinco. Sacai' nininsonta' nanitaparin," topachina, Yosëri noya ni'nin. ⁷ Iporaso' canpoanta': "Yosë no'tequën nontérinpoa' ni'ton, imasarahuë," topatëhua', Apraan pochin cancantarihu'. Ina pochin cancantohuatëhua', Yosë noya ni'sarinpoa'. Inanta' iyaro'sa' nitotoco'. ⁸ Co cotioro'saráchin Yosëri nohuantérinhuë'. Nisha piyapi'santa' imapachina', noya ni'sarin. Noya nicaton, co oshanëna marë' ana'intarinhuë'. Iráca iso noya nanan ninoton, Apraan itapon: "Nisha nisha piyapi'santa' quëma pochin cancantohuachina', na'con catahuaarahuë," itérin Yosëri. Quiricanën quëran naporin. ⁹ Apraan Yosëri sha'huitérinso' topinan natëcharinso marë' Yosëri na'con catahuarin. Inapochachin canpoanta' Quisocristo nanamën topinan natëcharéhuaso marë' catahuarinpoa'.

¹⁰ Moisésë iráca pënëntérinso' yaimapatama', ana'intinquëmaso' ya'huërin. Co ya'ipi natëramahuë' ni'ton, Yosë ana'intarinquëma'. Iráca quiricanën quëran naporin: "Co ya'ipimiáchin natëhuatamacohuë', chiníquën ana'intaranquëma'. Parisitopiquë a'paranquëma'," ténin. ¹¹ "Pënëntérinso' natëto cha'ësarahuë," co ta'caso' ya'huërinhuë'. Ina pochin cancantohuatëhua', co Yosë noya ni'sarinfoahuë'. Quiricanën quëran no'tequën sha'huitérinpoa': "Cancanënpoa quëran huarë' natëtohuatëhua', Yosë noya ni'sarinfoa ni'ton, noya nanopimiatarihuë'," ténin quiricanënquë. ¹² Cato' nanan ya'huërin. Co cato chachin imacaso' ya'huërinhuë'. Iráca pënëntérinso' natëhuachina', inasáchin natëcaso' ya'huërin. Moisésë sha'huitérinpoa': "No'tequën natëcaso' ya'huërin. No'tequën natëhuatëhua', noya nanopimiatarihuë'," ténin. Ina nanan imapatama', co Quisocristo nanamën imaramahuë'.

¹³ Co nanitërehuahuë' no'tequën natëcaso' ni'ton, ana'intinfoaso' ya'huërin. Quisocristoso niperihuë' nicha'érinpoa'. Canpoa' ya'huërenamënpoa' chiminin. Ina, Yosëri ana'intérin. Quiricanën quëran naporin: "Piyapi pa'pi co noyahue' niperihuë, naraquë achinpirahuatë', chiníquën ana'intérë". Nani Yosëri a'porin," ténin quiricanënquë. Canpoaso' ana'intinfoaso' ya'huëpirihuë', naraquë chachin Quisocristo apatanantohuachinara, oshanënpoa marë' parisitérin. Inaquë parisitaton, nicha'érinpoa'. ¹⁴ "Yosë no'tequën nontérinco," ténin Apraan. Ina téninso marë' Yosëri noya ni'nin. Nisha piyapiro'sarinta' imacaiso marë' Quisocristo chiminin. Ina natëhuachinara, Yosëri noya ni'nin. Ya'ipinfoa' Quisocristo imapatëhua', Ispirito Santo ya'coancantarinfoa'. Iráca Yosë sha'huirinso pochachin ya'coancantarinfoa'.

Yosë sha'huirinso'

¹⁵ Ni'cochi iyaro'sa'. Iso pochin sha'huichinquëma' yonquicamaso marë'. Ma'sha mapatëra, quirica quëtérinëpo'. Quëtohuachinënpura, hua'ani nininëñ acorahuaton, hui'sharin. Ina quëran co insonta' nanitërinhuë' canpiacaso'. Co aquëtë' ninshitacaso' ya'huërinhuë'. Naporahuaton, co tapicaso' ya'huërinhuë'. Ya'nan ninshitérinsoráchin ya'huëmiatarin. ¹⁶ Inapochachin iráca Yosëri nontaton, Apraan sha'huitérin: "Caora nohuanto, nónya catahuaranquëñ. Quëma shiparionta' catahuarahuë ya'ipi piyapi'sa' anoyacancantacaso marë'," itérin. A'naíchin shiin yonquiaton, naporin. Quisocristo ninoton, napotérin. ¹⁷ Iráca Apraanë' anoyataton, itapon: "A'na tahuëri quëma shiparin

ya'huéhuachin, ya'ipi piyapi'sa' anoyacancantarín. Caora nohuanto, nicha'ësarahuë. No'tequén nontaranquén. Co onporonta' naniantarahuë', itérin Yoséri. Ina quérán catapini pasa cara shonca pi'ipi na'huéhuachina, cotioro'sa' pénénin nani ma'sha natécaiso maré'. Pénénpirihuë', Apraanë' iráca anoyatérinso' co naniantérinhuë'. Yoséri nani sha'huitohuachina, co onporonta' nonpininhuë'. ¹⁸ Iráca Yoséri sha'huitérin. "Caora nohuanto, piyapi'sa' nicha'ësarahuë," itérin. Iráca pénéntérinso' natéte' cha'ëcaso' ya'huérin naporini, co inaora nohuanton Yosé nicha'ëitonpoahuë'.

¹⁹ ¿Ma'maréta' nipachin pénéntérinso nanan ya'huérin? Co topinan quérán cotioro'sa' pénénpinhuë'. Oshahuanéhuaso' anitotinpoaso maré' pénénin. Quisocristo nasitaqué huaré' pénéntérinsoachin ya'huérin imacaiso'. Quisocristo nasitohuachina, iráca Apraan sha'huitérinso chachin o'marin. Yosé pénéntohuachina, anquéniro'sa' a'paimarin Moisésë sha'huitacaso maré'. Ina quérán Moisésëri piyapi'sa' sha'huitérin. ²⁰ Nipirihuë', Apraan nontohuachina, co anquení a'paimarinhuë'. Co piyapi térranta' a'parinhuë' sha'huitacaso maré'. Inaora chachin no'tequén sha'huitérin.

Maistro pochin nininso'

²¹ Ina pochin ni'quéhuaré' Moisésë pénéntérin ni'ton, ¿Yoséri Apraan sha'huitérinso' tapirin ti? Co naporinhuë'. Pénéntérinso' noya noya nicaton, anoyacancantérinpoa' naporini, ina natéréhuaso maré' Yosé noya ni'itonpoahuë'. ²² Nipirihuë', co insonta' nanitérinhuë' no'tequén natécaso'. Ya'ipinpoa' oshahuanéhua'. Ina maré' ana'intinpoaso' ya'huérin, ténin Yosé quiricanén quérán. Napoaton Quisocristoráchin nanitaparin anoyacancantinpoaso'. Inasáchin imapatéhua', Yosé noya ni'sarinpoa'.

²³ Co'huara Quisocristo imacaso' tahuéri naniyatérasohuë' Moisésë pénéntérinso' hua'anéntaté pochin nitérinpoa' ama aquétë' oshahuanacaso maréhuë'. Oncorapirinpoaso pochin nitérinpoa'. Quisocristo nasitaqué huaré' pénéntérinsoachin ya'huérin ama Yosé naniantacaso maréhuë'. ²⁴ Ni'cochi. Hua'huaro'sa' co yonquipihuë' ni'ton, na'con pénénacaso' ya'huérin. Inapochachin iráca Moisésë na'con pénéninpoa'. Maistro pochin pénéninpoa' oshahuanéhuaso' ayonquiinpoaso maré'. Co pénéntérinso' natécaso' nanitéréhuahuë' ni'ton, Quisocristo huachi yonquiaréhua'. Ina imapatéhua', anoyacancantarínpoa'. ²⁵ Iporaso' nani Quisocristo o'marin ni'ton, co huachi maistro pochin nininso' nohuantarihuahuë'.

²⁶ Iporaso' Quisocristo imapatéhua', hui'ninpita pochin Yosé ni'ninpoa'. ²⁷ Ya'ipinpoa' Quisocristo natéhuatéhua', huéntonénqué chachin aya'coninpoa'. Ya'conpatéhuara, "Quisocristoíchin imasarahuë huachi," ta'téhua', aporihuanéhua'. Nasha a'morëso pochin ninéhua' ni'ton, Quisocristo pochin yonquiarihua'. ²⁸ Yoséo' co nisha nisha yonquirinpoahuë'. A'naquénpoa' cotio piyapinpoa', a'naquéonta' nisha piyapi'sa'. A'naquéonta' patrono'sa', a'naquénso' piyapinénpita. A'naquén sanapi'sa', a'naquénpoa' quémapinpoa' niperéhuahuë', ya'ipinpoa' Quisocristo imapatéhua', a'na huéntoíñchin pochin ninéhua'. ²⁹ Quisocristo imapatéhua', Apraan shinpitänpoa' ninéhua' canpoanta'. Apraan sha'huitérinso pochachin na'con catahuarinpoa'.

4

¹ Ni'cochi. Ma'huan chiminpachina, ya'ipi ma'shanénpita, coriqui, inapita ayananpirin. Hui'nin mashotohuachina, inari ya'huérétérin. Hua'huataponso niperéhuahuë', co a'naroáchin maninhuë'. Inaora ma'shanénpita niperéhuahuë', piyapinén pochín nicaton, co a'naroáchin hua'anéntérinhuë'. ² Hui'napitaqué huaré' a'napitari a'pairin. Hua'huasha ni'ton, natécaso' ya'huérin. Ina quérán hui'napitoahuachina, ya'ipi hua'anéntarin. Pa'pin sha'huirinso tahuéri chachin nanihuachin, hua'anéntarin. ³ Inapochachin canpoanta' co'huara Quisocristo nanamén nitochatérarihuahuë', hua'huaro'sa pochin yonquiréhua'. Nani ma'sha natétcaso' yonquiconéhua'. Ma'sha a'pocaso', ma'sha nicacaso', inapita sha'huitérinénpoa'. Inasáchin yonquipiréhuahuë'. ⁴ Ina quérán tahuérinén nanihuachina,

Yosëri hui'nin a'paimarin. Sanapi quëran nasitaton, piyapi chachin ninin. Cotio quëmapi ni'ton, iráca pënëntérinso' natëcaso' ya'huërin. ⁵ Iráca pënëntérinso' natëtoi, piyapinën pochin nipayahuë', Quisocristo nicha'ëinpoaso marë' o'marin. Ina imarëhua' ni'ton, iporaso' hui'ninpita pochin Yosë ni'ninpoa'. ⁶ Hui'nin pochachin nicatonpoa', Ispirito Santo aya'coancantérinpoa'. Ina quëran Yosë nontohuatëhua', Ispirito Santo nohuanton, "Tata" itérëhua'. ⁷ Napoaton co huachi pënëntérinso' hua'anëntérinpoahuë'. Hui'ninpita pochin Yosë ni'ninpoa' ni'ton, na'con catahuarinpoa'. Inaora nohuanton, ya'ipi sha'huitérinpoaso' acotarinpoa'.

Iráca pënëntopiso' co natëcaso' ya'huërinhuë'

⁸ Iráca co Yosë nohuitéraramahuë'. Nisha nisha ma'sha, mamanshi, inapita tē'huatatomá', mosharama', co inapita yonquicasohuë' nipayahuë'. ⁹ Iporaso' Yosë nohuitérama'. Inanta' hui'ninpita pochin nicatënquéma', noya nohuitérinquëma'. Nani nicha'ëpirinquëmahuë', ¿ma'marecha naquéranchin iráca pënëntérinso', a'napita piyapi'sa' natëtopiso', inapita natëtoma', tē'huachinachin cancantantarama? ténahuë. Inapita natëapomarahuë', co ina marë' noyápiachin cancantéraramahuë'. ¹⁰ Cotioro'sa pochin sahuato tahuëri chinotérama', yoquia'huarai tahuëri'santa', chinotantarama'. Nani pi'ipi nisha nisha niyontonpiso tahuëri'sa' na'huërama'. "Ina marë' Yosë noya ni'ninpoa'," topiramahuë', co ina marë' noya ni'ninquëmahuë'. ¹¹ No'tequën iyaro'sa' a'chintopiranquëmahuë', nariantérama' nimara, ténahuë. "Topinan quëran a'chintérahuë nimara," ta'to sétérahuë.

¹² Canta' iráca ya'ipi pënëntérinso' natëpirahuë', Quisocristo imaca'huaso marë' co huachi ina yonquirahuë'. Ca pochin cancantatoma', canpitanta', iyaro'sa', "Co iráca pënëntérinso' nicha'ësarinfoahuë'", ta'toma', Quisocristoíchin imaco huachi. Iráca nicapënquéma' pa'patéra, co no'huiramacohuë', noya nontëramaco. ¹³ Ya'nan a'chintapënquéma', caniorahuë. Canioto, hua'qui' yacapatënquéma', a'chintérinquëma'. Ina nitotérama'. ¹⁴ Chiniquën caniopirahuë', co nocanamacohuë'. Noya natanamaco. "Anquëni pochin Yosë nanamën a'chintéranci," itéraramaco. Quisocristo noninso pochachin natanamaco. ¹⁵ A'chintohuaténquémaro, pa'yatérama'. Na'con nosororamaco. Nanitérama' naporini, ya'pirama chachin quëchitomacohuë'. ¿Onpoatomata' iporaso nisha yonquirama'? ¹⁶ No'tequën pënënanquéma' ni'ton, ¿no'huiramaco ti?

¹⁷ Nisha a'china'piro'saso canpitataquë paatona' noyásha nontopirinënquémahuë', co tēhuëñchachin yacatahuarinënquémahuë'. Yaocoiarinënquéma' inapita pa'yatamaso marë'. "Ama Paono natëcosohuë'", itérinënquéma'. ¹⁸ Noyasha yonquiatona', a'chinpachina', a'china'pi pa'yatacaso' ya'huërin. Nipayahuë', co noyahuë' yonquiatona', a'chinpachina', co pa'yatacaso' ya'huërinhuë'. Canpitataquë ya'huasoco, noya nontëramaco. Iporanta' co ya'huëpirahuë', noya yonquirapico, topirahuë'. ¹⁹ Na'con iyaro'sa' nosororanquëma'. Hui'nahuëpita pochachin ni'nanquéma'. Ni'co'. Sanapi yahuaihuachina, chiniquën parisitérin. Inapochachin canta' na'con yonquiatënquéma', chiniquën parisitarëso pochin cancantérahuë. Canpitanta' Quisocristo pochachin cancantacamaso' na'con nohuantérahuë. Quisocristoráchin imapatama', oshaquëran ina pochachin cancantarama'. Ina marë' na'con yonquíranquéma'. ²⁰ Ma'cha inatohua' aco'incoya, topitérarahuë. ¡Inaque' ya'huërahuë naporini, ninontérühua' noya noya niitonhuë! Aquë ya'huërama' ni'ton, "¿Ma'ta' onpochi anoyata'huaso' marë' nicaya?" ténahuë yonquiató.

Acara, Sara inapita pochin nipiso'

²¹ Natanco iyaro'sa' Moisésë pënëntérinso' yanatéramasopita. ¿Co ya'ipi Moisésë ninshitérinso' natanamahuë' ti? ²² Apraan cato' hui'nin ya'huëtérin. A'nas'o' cosonanën hua'huin. A'nas'o' nipayahuë' sa'in chachin hua'huin, ténin. ²³ Cosonanënso' a'napita sanapi'sa' pochin hua'huanin. Sa'in chachinso nipayahuë' Yosë nohuanton,

hua'huanin. Co'huara hua'huayantëraponhuë', Yosëri itérin: "Ca nohuantonëhuëquë hua'huanaran," itérin. Yosëri catahuarin ni'ton, hua'huanin. ²⁴⁻²⁵ Iso cato' sanapi'sa' yonquiatoma', nitotoco'. Cato' sanapi'sa' ya'huërin. Inapochachin cato' anoyatérinso ya'huërin. A'naso' iráca pënëntérinso', itopi. A'naso' nimirinhue', Quisocristo quëran anoyatérinpoaso'. Iráca pënëntérinsoso' cosona pochin ninin, Acara itopiso'. Iráca cotioro'sa' Arapia parti pa'topi. Ina parti pa'tasoi', Moisés pënëntérin. Sinai motopiquë canconpachinara, pënëntérin nani ma'sha natëcaiso'. "Co no'téquën natëhuatëhuahuë', Yosë ana'intarinfoa', ta'tona', të'huatopi. Ipora huanta' cotioro'saso' Quirosarinquë ya'huatona', pënëntérinso' nanan imasapi. "Ana'intoihuachinfoa', ta'tona', të'huare'na' ya'huapi. ²⁶ Apraan sa'inso nimirinhue' co ina pochinhue'. So'ini noya noya ni'nin. Co hua'anën pochin camairinhue'. Inapochachin inápaquë nasha Quirosarin ya'huërin. Inatohua' co nisha nisha natëcaso' ya'huërinhuë'. Quisocristo imapatëhua', Sara hua'huin pochin ninëhua'. ²⁷ Iráca Yosë quiricanënquë ninshitaton, naporin:

"Co hua'huana'pinquënhue' níponahuë', noya cancantëquë'.

Co hua'huanaton iquitaponahuë', capa cancantëquë'.

A'na'ton so'yaton, hua'huanin.

Quëmaso nimirinhue', na'con na'con amiparinpita ya'huëtarinquëen. Ina marë' capa cancantëquë!", itérin.

²⁸ Apraan hui'nin chachin Isaco itopiso'. Yosë nohuanton, ya'huëtérin. "No'téquën Yosë nontérinco," topachina, ina nohuanton, Isaco nasitérin. Canpoanta' Quisocristo imapatëhua', Yosë nohuanton, huëntonënquë ya'conarihua'. Hui'ninpita pochin ni'ninfoa'. ²⁹ Apraan hui'ninpitaso' co noyahue' nini'tona', ya'huëpi. Ispirito Santo nohuanton, Isaco nasitérin. Cosona' hua'huinso nimirinhue', apiraton Isaco aparisitérin. Inapochachin ipora huanta' iráca pënëntérinso' nanan imapisopita aparisitérinënpoa'. ³⁰ Cosona' hua'huinso nimirinhue', co ya'huëmatérinhuë'. Ina'ton nasitaponahuë', Yosë co nohuantérinhuë' pa'pin ma'shanënpita hua'anëntacaso'. Apraan nontaton, itapon: "Isaco ya'ipi hua'anëntapon. Napoaton cosonaso', hua'huinë chachin a'paquë' pa'ina'," ténin. ³¹ Napoaton iyaro'sa' Quisocristo nanamën imapatëhua', co pënëntérinso' nanan imacaso' ya'huërinhuë'. Yosëso' co patron pochin piyapitérinpoahuë'. Huëntonënquë chachin aya'coninfoa' ni'ton, hui'nin pochachin ni'ninfoa'.

5

Quisocristo ocoirinfoaso'

¹ Quisocristo nicha'ërinpoa' inasáchin yonquiatëhua' noya cancantacaso marë'. Ina imapatëhua', catahuarinfoa' noya nicacaso'. Napoaton ama naquëranchin iráca pënëntérinso' imahuasohue'. Quisocristoráchin yonquia'ahua'.

² Ca Paonoco no'téquën sha'huitéranquëma'. Marca niacotohuatama', co Quisocristoíchin yonquiaramahuë'. Ina quëran co anoyacancantarinqüëmahuë'.

³ Naquëranchin sha'huitantaranquëma'. Marca niacotohuatama', ya'ipi cotio pënëntérinso' natëcaso' ya'huërin. ⁴ "No'téquën natëhuatëhua', Yosë noya ni'sarinpoa'," topatama', co Quisocristo imaramahuë'. Yosë inaora nohuanton, nosoropirinqüëmahuë', Quisocristo naniantohuatama', co huachi catahuarinquëmahuë'.

⁵ Nimirinhue', ina imapatëhua', Ispirito Santo catahuarinfoa'. "Quisocristoíchin anoyacancantérinpoa'," topatëhua', Yosë noya ni'sarinpoa', ténëhua'. Oshanënpoa' inquitatonpoa', tëhuëñchachin noyápiachin cancan quëtarinfoa'. Ina ninarëhua'.

⁶ Quisocristo imapatëhua', co marca yonquiarihuahuë'. A'naquënso' nani niacotopi. A'naquënso nimirinhue' co niacotopihuë'. Co ina yonquicaso' ya'huërinhuë'. Cancanënpoa quëran huarë' imacaso' ya'huërin. "Quisocristo catahuarinfoa'. Co nonpintarinfoahuë'," ta'tehua', ya'ipi cancanënpoa quëran natëahua'. Ina natëhuatëhua',

catahuarinpoa' noya ninosorocaso'. Ina pochin cancantohuatëhua', Yosë noya ni'sarinpoa'.

⁷ Canpitaso noya imasapiramahuë', ¿inta nonpintatënquëma', nisha ayonquirinquëma'? tēnahuë. ⁸ Co ina pochin Yosë a'chintérinpoahuë'. Huëntonënquë aya'coninpoa' ni'ton, cancanënpoaquë nontarinpoa'. No'tequën yonquicaso' nohuantérin. ⁹ Ni'co' iyaro'sa'. Pan nipatéra, pi'pian ahuëpocatérinso' acotohuachinara, ya'ipi së'cotérin. Inapochachin pi'pian téranta' nonpin nanan yonquihiatama', co hua'quiya quëranhuë' ya'ipinquëma' nitapicancanarama'. ¹⁰ Caso nipurinhuë' natëranquëma'. No'tequën yonquiarama', tēnahuë. Siniro catahuarinquëma' ama nisha nisha yonquicamaso marëhuë'. Nipurinhuë', inso téranta' nisha a'chintohuachinquëma', Yoséri ana'intarin. Chiníquën nanantopirionta', nonpintohuachinquëma', Yoséri ana'intarin.

¹¹ A'naquën nonpinapirinaco. —Paononta' quiya pochin a'chinin. "Marca niacotoco". Co iráca pënëntérinso' natëhuatamahuë', co Yosë noya ni'sarinquëmahuë', tēnin Paononta', toconpi. Co napopirahuë', nonpinapirinaco. Ina pochin a'chinahuë naporini, co cotioro'sa' no'huiitonacohuë'. "Quisocristo corosëquë chiminin. Inasáchin imapatëhua', anoyacancantarinpoa'", itérahuëso marë' ipora huanta' aparisitarinaco. ¹² Marca niacotacaiso' na'con na'con yonquipi ni'quëhuare', ya'ipi niyashitëtochinapi naporini, noya noya niitonahuë'.

¹³ Ina pochin, iyaro'sa', nontaranquëma'. Canpitaso' Quisocristo nohuantérinquëma'. Nicha'érinquëma' ama huachi tē'huarë'quëma' ya'huëcamaso marëhuë'. Co huachi ya'ipi iráca pënëntérinso' imacaso' ya'huëpirinhuë', co Yosë nohuantérinhuë' oshahuanacamaso'. Quisocristo imapatama', co noyahuë' yonquiramaso' naniantacaso' ya'huërin. Ninosoroatoma', nicatahuaco' noya cancantacamaso marë'. A'napita na'con na'con yonquico'. ¹⁴ Iráca Yosë pënëntohuachina, ninosorocaso' na'con na'con nohuantérin. "Quëmaora ninosororanso pochachin a'napitanta' nosoroco'", tēnin. ¹⁵ Nino'huihuatama', pa'pi co noyahuë' nisarama'. Tanan ni'niro'sa' niquëtëpiso pochin cancantarama'. Nipinocasonta' co noyahuë'. Ina pochin nipatama', ni'cona ya'ipinquëma' nitapicancantama'.

Ispirito Santo catahuarinpoaso'

¹⁶ Ispirito Santo natëco' catahuainquëma', tēnahuë. Ina catahuahuachinquëma', co noyahuë' yonquiramaso' naniantarama'. Inapita naniantatoma', noya nisarama'.

¹⁷ Ispirito Santo noyasáchin ayonquiinpoaso' nohuantopirinhuë', ipora huanta' co noyahuë' yonquirëhua'. Ispirito Santoso nipurinhuë' pënënipoa' ama ina pochin cancantacaso marëhuë'. Co noyahuë' yonquihiatëhua', co nanitérëhuahuë' Ispirito Santo natëcaso'. Cato' cancan pochin ya'huëtérinpoa'. Itohuara capini nipatëtatë pochin nipi. Noya cancantacaso' nohuantopirëhuahuë', canpoara co nanitérëhuahuë' noya nicacaso'. ¹⁸ Cancanënpoaquë Ispirito Santo nontérinpoa' ma'sona noya nicacaso'. Ina natëhuatëhua', co huachi iráca pënëntérinso' camairinpoahuë'. Ispirito Santo nohuantérinso chachin yonquiarihua'.

¹⁹ Piyapi'sa' inahuara co nanitopihuë' Yosëíchin yonquicaiso'. Co noyahuë' yonquipisopita nitotérëhua'. Co noyahuë' yonquihiachinara, co noyahuë' nipi. Yamonsihuanpi, taparo' nonpi, sanapi së'huachinachin cancantopi. ²⁰ Co noyahuë' yonquihiachinara, mamansi moshapi, pënnotopi, co nanan anoyatopihuë', co napopianachin yonquipihuë'. A'pitatona', a'naroáchin no'huitopi, nipaynopi. A'na huënton a'na huënton co noyahuë' ninicatona' ya'huëpi. Nisha nisha yonquiatona', ya'huëpi. ²¹ Co noyahuë' yonquihiachinara, a'napita ma'shanënpita noyapatona', no'huipi. No'pipi, pitaro'saquë ca'miatopi, o'omiatopi, a'naratipita nipi. Iráca pënënanquëma'. Iporanta' pënëntaranquëma'. Inapohuatama', co Yosë hua'anëntérinquë ya'conaramahuë'. Ina pochin nipaynopita co Yosë'pa' pantarapihuë'.

²² Nipirinhü', Ispirito Santo natéhuatéhua', catahuarinpoa' ninosorocaso'. Catahuahuachinpoa', Yosë nohuitatéhua', capa cancantarihua'. "Yosë noya ni'sarinco," ta'téhua', sano cancantarihua' ni'ton, noya ninicatéhua' ya'huarihua'.

Piyapi'sa' no'huipirinpoahuënta', co yano'huirihuahuë'. Ma'sha onpohuatéhuanta', ahuantarihua'. Nosoroatéhua', noya nontarihua'. Ispirito Santo catahuahuachinpoa', noya nicarihua'. No'téquën nontarihua'; co pi'pisha téranta' nonpintarihuahuë'.

²³ Ispirito Santo natéhuatéhua': "Caso' noya noyaco," co tēcarihuahuë'. Sano piyapi nicarihua'. Co noyahue' nicacaso' yonquipiréhuahuë', ina catahuarinpoa' naniantacaso'. Inapohuatéhua', Yosë noya ni'sarinfoa'. Co pénénepoaso' ya'huaponhuë'.

²⁴ Quisocristo coroséquë chiminaton, oshanénpoa' inquitérinpoa'. Napoaton canpoanta' ina imapatéhua', co noyahue' yonquiréhuasopita coroséquë patanantaté pochin nitatéhua', naniantacaso' ya'huérin. Co huachi nohuantarihuahuë' sopai pochin cancantacaso'. ²⁵ Ispirito Santo ya'coancantatonpoa', catahuarinpoa' noya nicacaso' ni'quéhuarë', ma'sona téranta' sha'huitohuachinpoa', noya natéahua'.

²⁶ Ama noya ninéhuaso marë' a'napita nocahuansohuë'. Ninocanpatéhua', a'naroáchin nino'huiarihua'. Itohuara capini ninoyapatéhua', nino'huiarihua'. Ama ina pochin cancantahuasohuë'.

6

Nicatahuacaso' ya'huérinso'

¹ Ispirito Santo natéтома' noya cancantohuatama', a'napitanta' catahuaco' ina pochin cançanchina'. A'naso' co noyahue' nipachin, ama no'huicosohuë'. Sanoanan quéran pénénatoma', catahuaco' co noyahue' yonquirinsopita nanianchin. Ni'cona canpitanta' sopai minséchinquëma'. ² Ya'ipinpoa' a'na tahuëri ma'sha onporéhua'. A'na tahuérinta' sopai yanopintérinpoa' co noyahue' nicacaso marë'. Napoaton nicatahuahua' noya yonquicaso marë'. Panca pë'pëto nicatahuarëso pochin catahuahua'. Inapohuatéhua', Quisocristo natéarihua'. "Ninosoroco," itérinpoa'.

³ "Caso' noya piyapico," topatan, quëmaora ninonpintaran, co no'téquën yonquiranhü'. Co insonta' Yosë pochachin cancantérinhuë'. Co Yosë catahuarinpoahuë' naporini, co manta' noya niitérinhuahü'. ⁴ Ama a'napita napopiso' nicatoma', nitantiacosohuë'. Quëmaora naporanso yonquiaton, nitantiaquë'. Noya cancantohuatan, Yosë noya ni'sarinquën. Ina quéran "Yosë noya ni'sarinco," ta'ton, capa cancantarán. ⁵ A'naya a'nayanpoa' Yosë acorinpoa' ma'sona nicacaso'. Canpoara pë'pëtonénpoa' quëparëso pochin niahua'. A'na tahuëri sacai' niperinhuë' ahuantatéhua', imamiatahua'.

⁶ A'naquën paatona', nani tahuëri Yosë nanamën a'chinápi. A'chintohuachinquëma', ma'sha quëtoco' ama pahuanchinasohuë'.

⁷ Ni'cona sopai nonpintochinquëma'. Co Yosë téhuacaso' ya'huérinhuë'. Co insoari téranta' nanitérinhuë' Yosë nonpintacaso'. No'téquën yonquico'. Ma'sha sha'patéra, inachachin nitérin. Co nisha nitérinhuë'. ⁸ Inapochachin co noyahue' yonquirápatéhua', co noyahue' nisaréhua'. Ina marë' ana'intinfoaso' ya'huérin. Nipirinhü', Ispirito Santo natéhuatéhua', nani tahuëri catahuarinpoa' noya cancantacaso marë'. Ina quéran Yosë'pa' noya nanopicontarihua'. ⁹ Ama Yosë naniantatéhuahuë', noya niahua'. Noya nicacaso' ama amiahuasohuë'. Chiníquën cancantohuatéhua', Yosë noya ni'sarinpoa'. Ina marë' tahuëri nanihuachin, acanaarinpoa'. ¹⁰ Napoaton ya'ipi piyapi'sa' nosoroa'hua'. Nanitohuatéhua', catahuahua'. Quisocristo imaréhuasopita capini na'con na'con nicatahuahua'.

Piquérän huarë' pénéntérinso'

¹¹ Ca Paonoco apira pi'pian téranta' caora imirahuë quéran ninshitaranquëma'. Panca ninshiquë ninshitaranquëma'. ¹² A'naquën ipora huanta' marca yaacotarinénpa'.

A'napita cotioro'sari noya nicacaiso marë' inapopi. "Quisocristo corosëquë chiminaton, anoyacancantérinpoa'. Inasáchin nicha'érinpoa', topatëhua', cotio hua'ano'sa' aparisitarinënpoa'", topi. Ama inapitari no'huicaiso marëhuë' napopi. ¹³ Co inapita téranta' ya'ipi pënëntérinso' natëpirinahuë', marca yaacotarinënquëma'. Niacotohuatama', pa'yatapi. "Ni'co'. Nisha piyapi'santa' natëténënpoa', marca niacotopi," tosapi. ¹⁴ Caso nipurinhuë' piyapi'sa' pa'yata'huaso' co yonquirahuë'. Quisocristo chimininsoáchin yonquirahuë. Corosëquë chiminaton, anoyacancantérinpoa'. Ni'ton, inaro'co chiminahuëso pochin co ma'sha isoro'paquë ya'huérinso' yonquirahuë'. Naporahuaton, isoro'paráchin pa'yatopisopita co huachi noya ni'ninacohuë'. ¹⁵ Marcaso' co onpopinchin yonquicaso' ya'huérinhuë'. Co ina marë' Yosë noya ni'ninpoahuë'. Quisocristo imapatëhua', nasha cancan quëtérinpoa'. Ina marë' têhuëñchinso' noya ni'ninpoa'. ¹⁶ Nani no'téquën a'chintérinquëma'. Ina imapatama', Yosë piyapinën chachin nisarama'. Yosë nosoroatënquëma', noya catahuainquëma'. Asanocancainquëma', ténahuë.

¹⁷ Quisocristo no'téquën natérahuë ni'ton, ahuérinaco. Ipora huanta pë'sharinaco ni'ton, cariro'sa' ya'huëarin. Napoaton ama insonta' aquëtë huarë' asëchincosohuë' ténahuë.

¹⁸ Ya'ipinquëma', iyaro'sa', yonquiáranquëma'. Inaora nohuanton, Sinioro Quisocristo catahuainquëma'. Amen. Nani huachi.

Paono

Paonori Ipisoquë ya'huëpisopita ninshitérinso'

Imapisopita yonquiaton, ninshitérinso'

¹ Ca Paonoco ninshitaranquëma', ni'co'. ¿Noyanquëma' canpitanta'? Noya canta' ya'huarahuë. Yosë nohuanton, Quisocristo acorinco nanamën a'china'huaso marë'. Canpitanta' Quisocristo noya imarama' ni'ton, Yosë noya ni'ninquëma'. Ipisoquë ya'huëramasopita ninshitaranquëma'. ² Inaora nohuanton, Tata Yosë catahuainquëma'. Asanocancainquëma'. Siniro Quisocristonta' inapochachin catahuainquëma'.

Iráca quëran huarë' Tata Yosë yonquirinpoaso'

³ Ma noyacha Tata Yosëso paya. Siniro Quisocristo pa'pin inaso'. Inápa quëran noya noya yonquirinpoa'. Quisocristo imarëhua' ni'ton, na'con catahuarinpoa' noya noya cancantacaso marë'. Oshanënpoa' inquitatonpoa', anoyacancantérinpoa'. Ina quëran nani tahuëri catahuarinpoa' nohuantérinso chachin nica-caso'. Co inápaquë ya'huëyatérarihuarahuë', inatohua' ya'huëarëhuaso pochin Yosë nohuitérëhua'. Ina yonquiatéhua', "Yosparinquën Siniro," itahua'. ⁴ Co'huara isoro'pa' ya'huëyatérerasohuë', yonquiatonpoa', huayoninpoa' nóya cancantacaso marë'. Quisocristo imapatéhua', oshanënpoa' inquitatonpoa', Yosë nóya ni'ninpoa'. ⁵ Iráca quëran huarë' nosoroatonpoa', acorinpoa' huëntonënqué ya'conacaso'. Quisocristo anoyacancantérinpoa' ni'ton, hui'nin pochachin ni'ninpoa'. Inaora nohuanton, noya yonquirinpoa'. ⁶ Hui'nin na'con nosororin. Ina imapatéhua', canpoanta' na'con nosoroarinpoa'. Ina yonquiatéhua', "Ma noyacha Tata Yosëso' ni'ton, inaora nohuanton, nosororinpoa paya," tosarëhua'. ⁷ Quisocristo corosëqué chiminaton, nicha'ërinpoa'. Huënainën pa'nin ni'ton, oshanënpoa' inquitérinpoa'. Inaora nohuanton, Yosë na'con nosororinpoa'. ⁸ Nosoroatonpoa', na'con catahuarinpoa' no'téquén yonquicaso marë'. Yonquinën chachin anitotérinpoa'. ⁹ Inaora nohuanton, nóya yonquirinpoa'. Co canpoara nitotopiréhuahuë', yonquirinpoaso' anitotérinpoa'. Iráca quëran huarë' yonquirin Quisocristo a'paimacaso'. ¹⁰ Ina tahuërinën nanihuachin, Quisocristo ya'ipiya hua'anëntarin. Isoro'paquë ya'huërinsopita, inápaquë ya'huërinsopita inapita hua'anëntarin. A'na huëntoínchin pochin acoarin. Ina Yosë na'con nohuantérin.

¹¹ Inaora nohuanton, acorinpoa' piyapinënpita nicacaso marë'. Quisocristo imapatéhua', hui'nin pochin ni'sarinpoa'. Napoaton a'na tahuëri Yosë'pa' noya noya acoarinpoa'. Iráca chachin yonquirinpoa' ni'ton, huëntonënqué aya'coninpoa'. ¹² Quiya'ton imarai. "Quisocristo nicha'ësarinpoa'", ta'toi imarai. Noya imapatoi, a'napitanta' nicatonaco, Yosë yonquiapi inahuanta': "Ma noyacha Tata Yosëso paya," tosapí. Ina ta'caiso marë' acorincoi. ¹³ Canpitanta' Yosë nanamën natanama'. "Quisocristo anoyacancantuachiniquëma', nicha'ësarinquëma'", itérainquëma'. Natanpatamara: "No'tén nanan inaso'", ta'toma', natërama'. Quisocristo imapatama', hui'nin pochin Yosë ni'ninquëma'. Napoaton Ispirito Santo aya'coancantériniquëma'. Sichoqué marca acopiso pochin aya'coancantériniquëma' huëntonënqué aya'coninquëmaso' nitotacaso marë'. Iráca sha'huirinso chachin napotériniquëma'. ¹⁴ Quisocristo imapatéhua', Ispirito Santo ya'coancantomiatérinpoa'. Ina'ton quëterinpoa' ni'ton: "Téhuëñchachin a'na tahuëri Yosë'pa' quëpantarinpoa'", ténëhua'. Nani Yosë nicha'ërinpoa' ni'ton, o'mantacaso' tahuëri nanihuachin, ya'huërin'pa' quëpantarinpoa'. Inaquë noya noya ya'huëcontarihua'. Ina yonquiatéhua': "Ma noyacha Tata Yosëso yonquirinpoa paya," ténëhua'.

Inapita marë' Paonori Yosë nontérinso'

¹⁵ "Quisocristo anoyacancantérinpoa'", ta'toma', inasáchin imarama'. Ina imatoma', ya'ipi imaramasopita capini noya ninosoroarama', natantérahuë. Ina natantato,

nóya cancantërahuë. ¹⁶ Na'con campita marë' Yosë nontërahuë. "Noya imarinënquën ni'ton, 'Yosparinquën, Siniro,' " itërahuë, Yosë nontato. ¹⁷ Tata Yosëso' noya noya ninin. Inasáchin chinotacaso' ya'huérin. Quisocristo isoro'paquë o'maton, Yosë anohuitërinpoa'. Ina yonquiato, campita marë' Yosë nontërahuë: "Catahuaquë' Siniro no'tequën yonqui'ina'. Noya noya nohuichinënquën. Noya nohuito huachinënquën, quëma yonquiranso chachin nitotapi. ¹⁸ Ya'ipi nanamën Siniro noyá anitotëquë'. Quëma huëntonënquë chachin aya'conancoi noya cancanta'huaiso marë'. Catahuaquë' ina yonquiatona', noya cancanchina'. A'na tahuëri ya'huëranquë chachin noya noya ya'huëcontarai. Ina na'con yonqui'ina'. ¹⁹ Quëmaso' ya'ipi nanitaparan. Natërainquën ni'ton, nani tahuëri catahuarancoi. Chini chiníquën nanantaton, nicha'érancói. Catahuancoi ina yonquiatoi, chiníquën cancanchii. ²⁰ Iráca chiníquën nanantaton, Quisocristo ananpita antaran. Inápaquë quëpantarahuatón, inchinan quëran ahuënséran ni'ton, chini chiníquën nanantarin," itërahuë, Yosë nontato. ²¹ Isoro'paquë nisha nisha hua'ano'sa', chirinchiro'sa', copirnoro'sa', inapita chiníquën nanantopí. Inápaquënta' chiníquën nanantopisopita ya'huëpi. Quisocristoso niperinhüë', inapita quëran chini chiníquën nanantérin. Co incari téranta' nanitërinhuë' ina minsëcaso'. Co onporonta' a'napitari ina minsëapihuë'. ²² Yosëri chachin Quisocristo nanan quëtérin ya'ipi ya'huërisopita hua'anëntacaso marë'. Naporahuatón, ya'ipi imarëhuasopita catahauainpoaso marë' acorin. Na'aquënpoa' niperihüahüë', a'na huëntoíncchin pochin ninëhua'. Inaso' motënpoa pochin nicatón, ya'ipiya hua'anëntarinpoa'. ²³ Inaora nonën pochin ni'ninpoa'. Napoaton na'con yonquirinpoa'. Nani ya'coancantërinpoa' noya noya imacaso marë'. Noyá ya'coancantohuachinpoa', ya'ipi cancanënpoa quëran ina yonquiarihua'. Ina marë' nininpoa'. Inaso' ya'ipiya hua'anëntarin.

2

Inaora nohuanton nicha'érinpoaso'

¹ Iráca campitaso' co noyahüë' nicatoma', oshahuanama'. Co Yosë nohuitatomahuë', chimipi pochin cancantërama'. ² Co'huara Quisocristo imashatërapomahuë', sopai hua'an natëtoma', co noyahüë' ninama'. Inaso' ihuan ya'huërinquë ya'huaton, ya'ipi sopairo'sa' hua'anëntarin. Co quënanpirihüahüë', isoro'paquë sacatárin minsëinpoaso marë'. Yonquinëmaquë camairinquëma' ni'ton, co Yosë natëramahuë'. ³ Iráca ya'ipinpoa' co Yosë natërehüahüë'. Co noyahüë' yonquiatëhua', co noyahüë' ninëhua'. Canpoara nohuantërehuasoráchin ninëhua'. Yano'huitohuatëhuara, no'huitërehua'. Yano'pihuatëhuara, no'piröhua'. Yaahuëtohuatëhuara, ahuëtërehua'. Ina marë' ya'ipinpoa' ana'intinpoaso' ya'huërin. ⁴ Yosëso niperinhüë' na'con nosororinpoa'. Nosoroatonpoa', yanicha'érinpoa'. ⁵ Oshahuanëhua' ni'ton, chimipi pochin ni'pirinpoahuë', oshanënpoa' inquitërinpoa'. Iporaso huachi Quisocristo imarëhua' ni'ton, nanopiantarinso pochin Yosë ni'ninpoa'. Anoyacancantërinpoa' noya noya cancantacaso marë'. Nosoroatonpoa', inaora nohuanton, nicha'érinpoa'. ⁶ Iráca Quisocristo pa'pitopirinahuë', Yosëri ananpita antarahuatón, inápaquë quëpantarín. Canpoanta' imarëhua' ni'ton, inarë'quënpoa' nanopiantarëhuaso pochin anoyacancantërinpoa'. Quisocristo ya'coancantërinpoa' ni'ton, ipora chachin inápaquë ya'huarëhuaso pochin Yosë ni'ninpoa'. ⁷ Yosë inaora nohuanton, na'con nosororinpoa'. Quisocristo imapatëhua', noya catahuarinpoa'. A'na tahuëri a'napitanta' nicatënepoa', Yosë chinotapi: "Ma noyacha Yosëri nosororin paya," tosapi. ⁸ Nosoroatonpoa', inaora nohuanton nicha'érinpoa'. "Quisocristoíchin anoya-cancantërinpoa'," topatëhua', oshanënpoa' inquitatonpoa', nicha'érinpoa'. Co canpoara nanitërehuahüë' Yosë imacaso'. Ina catahuarinpoa' cancanënpoa quëran natëcaso'. ⁹ Co canpoara nanitërehuahüë' cha'ëcaso'. Napoaton co nocantacaso' ya'huërinhuë'. "Caso' noyaco ni'to, Yosë'pa' pa'sarahüë," co ta'caso' ya'huërinhuë'. ¹⁰ Yosë anoyacancantërinpoa'. Anoyacancantahuatónpoa', acorinpoa' nýya nicacaso marë'. Quisocristo

catahuahuachinpoa', noya nisarëhua'. Iráca quëran huarë' yonquirinpoa' ina pochin nicacaso'. Ina marë' nicha'érinpoa'.

Quisocristo nanan anoyatérinpoaso'

11 Isonta' iyaro'sa' yonquico'. Iráca co pi'pian téranta' Yosë nohuitéramahuë'. Canpitaso' nisha piyapi'sanquëma' ni'ton, cotioro'sa' nocaninënquëma'. "Quiyaso' Yosë piyapinënpitaco. Canpitaso' co marca téranta' nonëmaquë niacotéramahuë", itérinënquëma'. **12** Téhuëñchachin co'huara imashatérapomahuë', co Quisocristo nohuitéramahuë'. Iráca Yosëri israiro'sa' huayonin piyapinënpita nicacaso' ni'ton, "Nicha'ésaranquëma", itérin. Co inapita pochin ni'ninquëmahuë'. Shimashonënapitarë' anoyatérinso' sha'huitopirinhuë', co nitotéramahuë'. Topinan quëran ya'huërama'. Co Yosë'pa' pacamaso' ninaramahuë'. Co pi'pian téranta' Yosë nohuitéramahuë'. **13** Co Yosë nohuitatomarahuë', áquë pochin nisapiramahuë'. Iporaso' Quisocristo imatoma', nohuitérama huachi. Oshanëma marë' huënainëñ pa'nin ni'ton, Yosë anohuitérinquëma'. Ya'caritéramaso pochin ninama'. **14** Quisocristo chiminin ni'ton, nanan anoyatérinpoa'. Iráca cotioro'sacoi co noyahue' ni'nainquëma'. Nisha piyapinquëma' ni'ton, inimicoro'sa pochin ni'pirainquëmahuë'. Inaso' chiminaton, paira pochin ya'copirinpoaso' nani chi'huincarin. Iporaso' ya'ipinpoa' Quisocristo imarëhuasopita a'na huëntoíncin ninëhua'. **15** Quisocristo nasha nanan quëtérinpoa'. Co huachi iráca pënentérinso' yonquicaso' ya'huërinhuë'. Ya'ipinpoa' Quisocristo imapatéhua', nasha huëntonquë aya'coninpoa'. Quisocristo huëntonënquë ya'conatéhua', co huachi nisha chinotéréhuahuë'. Nisha nisha piyapinpoa' niriuarahuë', noya nini'tëhua' ya'huërëhua'. **16** Naporahuaton, co huachi Yosë inimicotéréhuahuë'. Quisocristo corosëquë chiminaton, nanan anoyatérinpoa'. Cato' huënton pochin niperéhuahuë', Quisocristo imapatéhua', noya ninicatéhua' ya'huërëhua'. A'na huëntoíchin ninëhua'.

17 Quisocristo isoro'paquë o'maton, noya nanan sha'huitérinpoa'. "Ya'ipiniquëma' nicha'ésaranquëma", itérinpoa'. Canpitaso' co pi'pisha téranta' Yosë nohuitatomarahuë', áquë pochin niperamahuë', nanan anoyatérinquëma'. Cotioro'sacointa'ya'carisha pochin ninaiso' nanan anoyatérincoi. **18** Quisocristo chiminin ni'ton, ya'ipinpoa' nanitéréhua' Tata Yosë nontacaso'. Ispirito Santo catahuarinpoa' ni'ton, ina nontohuatéhuara, noya nataninpoa'. **19** Napoaton iporaso' iyaro'sa', Yosë nohuitérama'. Co Yosë'pa' pa'shatérapomarahuë', nani huëntonënquë aya'coninquëma'. Ya'huëhuano'sa pochin nisarama'. Co huachi nisharo'sa pochin ni'ninquëmahuë'. Ya'ipinpoa' Quisocristo imarëhuasopita hui'ninpita pochachin nöya ni'ninpoa'. **20** Ya'ipi imarëhuasopita ina naponpoa chachin a'na pëi pochin ninëhua', na'pi quëran nipo'. Na'pi quëran yapéihuatéra, acopo' ihuatahuaté', siminto'ton acorë'. Inapochachin canpoanta' Yosë pëinën pochin ninëhua'. Siminto acopiso pochin, ca'tano'sa'ton nanamën a'chintérinënpoa'. Ina quëran pënentona'piro'santa' no'tëquën a'china'piapi. Na'pi quëran yapéihuatéra, pëi' taconorinquë na'pi noya noya nininso' acorë' tantiacaso marë'. Ina acohuatéra, a'napita na'piro'sa' no'tëquën apanshinë'. Na'pi noya noya nininso pochachin Quisocristoso' achinirinpoa'. **21** Quisocristo imapatéhua', Yosë acoarinpoa' ina pëinën pochin nicacaso marë'. Catahuahuachinpoa', noya nini'tëhua' ya'huërëhua'. A'napitanta' a'naya a'naya Quisocristo imapachina', ya'conapi anta'. Noya pëi' Yosë chinotacaso marë' acorëso pochin nisarëhua'. **22** Canpitanta' Quisocristo imatoma', ya'conama'. A'naya a'nayanpoa' na'pi pochin ninëhua' pëi' nanicaso marë'. Ya'ipi imarëhuasopita Yosë pëinën pochin ninëhua'. Ispirito Santo ya'coancantohuachinpoa', Yosë chachin canpoarë' ya'huërarin huachi.

¹ Napoaton isonahuato, campita marë' Yosë nontarahuë. Nisha piyapi'sanquëma' nipomarahuë', Quisocristo nanamën a'chintëranquëma' ni'ton, tashinan pëiquë po'morinaco. ² Inaora nohuanton, Yosë chachin acorinco a'chinta'huanquëmaso marë'. Na'con catahuarinco ni'ton, nanamën sha'huiárahuë, natantërama'. ³ Iráca quëran huarë' Yosë yonquirin nicha'ëinquëmaso'. Napoaponahuë', co piyapi'sa' anitotérinhuë'. Iporaso nimirinhuë' inaora nohuanton, anitotérinco ni'ton, nani pi'pian ninshitëranquëma'. ⁴ Ina nontohuatama', Quisocristo nanamën anitotérincoso' campitanta' nitotarama'. ⁵ Iráca co iso nanan nitotopihuë'. Iporaso' Quisocristo acorincoisopita nitotërai. Pënëntona'piro'santa' nitotopi. Ispírito Santo anitotérincoi a'china'huaiso marë'. ⁶ Na'a pi'ipi cotioro'saráchin Yosë chinotopi. "Nicha'ësaranquëma'", itaton, Yosëri na'con catahuarin. Iporaso nimirinhuë' nisha piyapi'sanquëmanta' catahuarinquëma'. Noya nanan natanatoma', Quisocristo imarama' ni'ton, campitanta' nicha'ësarinquëma'. Napoaton a'na huëntoínchin pochin ninëhua'.

⁷ Yosë nosoroatonco, acorinco ina nanan a'china'huaso marë'. Co acoincosohuë' nimirinhuë', acorinco. Na'con catahuarinco ni'ton, noya a'chinárahuë. ⁸ Caso' a'napita imapisopita quëran na'con na'con co noyahue' nimirinhuë', anoyacancantërinco. Ina quëran nosoroatonco, acorinco nisha piyapi'sa' sha'huita'huaso marë'. Quisocristo nanamënso' noyápiachin. Ma inacha ni'ton, nosoromiatërinpoa paya, tënahuë yonquiato. ⁹ Iráca Yosëri ya'ipi ma'sha ninin. Naporo chachin yonquirinpoa' anoyacancantinpoaso marë'. Napoaponahuë', co ya'ipi piyapi'sa' sha'huitërinhuë'. Ipora huarë' anitotérinco ni'ton, sha'huitëranquëma'. ¹⁰ Na'con Yosë yonquirinpoa'. Ina nohuanton, oshaquëran a'naya a'nayanpoa' imarëhua'. Iporaso' na'aquënpoa' imapatëhua', Quisocristo huëntonënquë ya'conëhua'. Inápaquë chiníquën nanantopisopitanta' nicatënënpoa': "Ma noya Yosë yonquirin ni'ton, anoyacancantaton, huëntonënquë chachin aya'conin paya," tosapi. ¹¹ Iráca quëran huarë' Yosë yonquirinpoa' imacaso marë'. Quisocristo o'maton, huëntonënquë aya'coninpoa'. Inasáchin hua'anëntërinpoa'. ¹² Ina imarëhua ni'ton, natëtëhua', Yosë nontarihua'. "Anoyacancantërinpoa' ni'ton, noya natanarinpoa'," ta'tëhua', co të'huatarihuahue'. Noya cancantatëhua', ina nontarëhua'. ¹³ A'chintëranquëma' ni'ton, tashinan pëiquë po'morinaco. Parisitapirahuë', chiníquën cancantoco'. Campitanta' Quisocristo imacamaso marë' parisitërahuë. Ina marë' noya cancantacaso' ya'huërin.

Quisocristo nosororinpoaso'

¹⁴ "Ma noyacha Yosë yonquirinpoa paya," ta'to, isonahuato, Tata Yosë nontërahuë. ¹⁵ Inaso' ya'ipinpoa' hua'anëntërinpoa'. A'naquën inápaquë ya'huërapí. A'naquënpanta' isoro'paquë chachin ya'huëarëhua'. ¹⁶ Napoaton campita yonquiatënenquëma', Yosë nontërahuë. "Quëmaso' Siniro chini chiníquën nanantëran. Noya noyanquëni'ton, imarinënsopita nosoroaton, catahuaquë' chiníquën cancanchina'. Ispírito Santori achinicancain noya noya imainënquë. ¹⁷ Ya'ipi cancanëna quëran natëtatona', Quisocristoíchin yonqui'ina'. 'Cancanëhuëquë ya'huërarin,' ta'tona', noya noya nohuichinë. Catahuaquë' noya nosoro'inë. Ya'ipi piyapi'santa' nosoro'ina', Nara itëquëñ acopo' pa'pachina, co inpaninhuë'. Inapochachin inapitanta' Quisocristo na'con nosororincoi', ta'tona', a'napitanta' nosoro'ina'. Noya ninosorohuachina', Ispírito Santori catahuararin chiníquën cancantacaiso'. ¹⁸⁻¹⁹ Inapohuachina', Quisocristo nosoromiatërincoiso' nitotapi. Pi'iro'të' pancantërinso', naporopitërinso', inaparinso', acoporinso' inapita co naninahuanhuë' yonquirai. Inapochachin Quisocristo nosoromiatërincoisonta' co nitotochináchinhue' nimirinhuë', nitotapi. Ina nitotohuachina', ya'ipi quihiúterancoisopita ya'huëtapi. Ya'ipi imapisopita ina yonqui'ina'," itërahuë.

²⁰ Tata Yosëo' chini chiníquën nanantaton, ya'ipi nanitaparin. Hua'yanëñ chachin nani ya'coancantërinpoa' ni'ton, noya catahuarinpoa'. Nani tahuëri achinicancainpoa' ni'ton, cancanënpoa quëran huarë' Yosë yonquia'ahua'. Ina nontohuatëhua',

“Catahuaco,” itohuatëhua', na'con catahuarinpoa'. Na'con nohuantopirëhuahuë', na'con na'con inaso' nanitaparin nicacaso'. Co nitotërëhuasohuënta' nanitaparin. ²¹ “Ma noyacha Tata Yosëso paya,” itahua'. Quisocristo noya imapatëhua', a'napitanta' nicateñënpoa', Yosë yonquiapi. Ya'ipi piyapi'sari ina chinochina'. Ama onporonta' ina nariantahuasohuë'. Ipora quëran huarë' inasáchin yonquia'ahua'. Amen.

4

A'na huënton pochin ninëhuaso'

¹ Quisocristo nanamën a'chinahuëso marë' tashinan pëiquë po'mopirinacohuë', iporahuanta' pënénáranquëma'. Yosë nicha'ëtënquëma', huëntonënquë aya'coninquëma'. Napoaton noyasáchin nico'. ² “Yoséíchin catahuarinpoa' noya nicacaso'” ta'toma', ama a'napita nocancosohuë'. Sanoanan quëran nontatoma', ama no'huicosohuë'. A'napita ma'sha onpotohuachinënquëma', ama yai'huërëtocosohuë'. Co noyahuë' nipiřinahuë', nosoroatoma' noya nontoco'. ³ Na'con yonquico' iyaparima pochachin ninosorocamaso'. Ispirito Santo catahuarinquëma' napopináchin yonquicamaso marë'. Ina catahuahuachinquëma', co pi'pian téranta' nino'huiaramahuë'. Noya nini'toma', ya'huarama'. ⁴ Quisocristo imapatëhua', ya'ipinpoa' a'na huëntoíchin pochin ninëhu'. A'naíchin Ispirito Santo ya'huërinso' ya'coancantërinpoa'. Imarëhuasopita nicha'ësarinpoo' ya'huërinquë chachin quëpanta'impaso marë'. Inasáchin ninarëhuë'. ⁵ Quisocristoíchin hua'anëntërinpoa'. Ina nanamënáchin natërehua'. “Quisocristo imarahuë,” ta'tehua', aporihuanëhu'. Co nisha nisha imacaso marë' aporintërinënpoahuë'. ⁶ Tata Yoséíchin chinotërëhu'. Ya'ipi imarëhuasopita hui'ninpita pochin ni'ninpoa'. Inaso' chini chiníquënan antatón, hua'anëntërinpoa'. Ya'ipinpoa' catahuarinpoa' ina marë' sacatacaso'. Imapatëhua', ya'coancantomiatërinpoa'.

⁷ Quisocristo catahuarinpoa' ma'sona téranta' noya nicacaso marë'. Ya'ipinpoa' a'naya a'nayanpoa' catahuarinpoa' nisha nisha nicacaso'. Inaora nohuanton, catahuarinpoa' ma'sona nohuantërinso' noya nitotacaso marë'. ⁸⁻⁹ Iráca inápaquë nöya ya'huëpirinhuë', isoro'paquë chachin o'marin. Na'con parisitaton, chiminin. Pa'pitopirinahuë', nanopiantaton, inápaquë panantarín. Iráca quiricanënquë naporin:

“Ya'ipi minsërahuaton, inápaquë panantarín huachi.

Naporahuaton, ma'sha topinan nicanarëso pochin piyapinënpita catahuarin nöya nicaso'.

Nisha nisha nicacaso' catahuarin,” ténin.

¹⁰ Quisocristo chachin isoro'paquë o'marahuaton, inápaquë panantarín. Yosë ya'huërinquë chachin panantaráhuaton, hua'yanën chachin a'patimarinpoa' ya'coancantinpoaso marë'. Ya'ipi parti ya'huaton, ya'ipi hua'anëtarin.

¹¹ Naporahuaton, nisha nisha acorinpoa' nicatahuacaso marë'. A'naquëen Quisocristori chachin a'parin a'chinacaso marë'. A'naquëonta' Ispirito Santo nohuanton, Yosë yonquirinso chachin sha'huirin. A'naquëonta' nisha nisha parti paaton, Yosë nanamën a'china'piarin. A'naquëonta' ina nohuanton, ya'huëpique' ya'huëhuano'sa' nani tahuëri catahuapi noya imacaiso marë'. A'naquëonta' ya'ipi Yosë nanamën a'chintapi.

¹² Nisha nisha acorinpoa' noya nicatahuacaso marë'. Inaora nonën pochin ni'ninpoa' ni'ton, ya'ipi imarëhuasopita catahuarinpoa' noya ina marë' sacatacaso'.

¹³ Inapohuatëhua', ya'ipinpoa' imarëhuasopita napopináchin yonquiarihua'. Yosë hui'nin chachin nöya nohuitarihua'. Ina quëran noya noya cancantaríhua'. So'sorëso pochin oshaquëran Quisocristo pochachin cancantacaso' ya'huërin.

¹⁴ Ina quëran no'tequëen yonquiarihua'.

Co huachi hua'huaro'sa pochin cancantaríhuahuë'. Hua'huaro'saso' co yonquiyatërapihuë' ni'ton, nisha nisha natëtopi. Canpoaso nipiřinhuë' chinotënpoa pochin no'tequëen yonquia'ahua'. Ni'co'. Panca ihuan huë'pachina, poti niquëran niquëran ohuërërin. Co no'tequëen yanponinhuë'. Inapochachin a'naquëen nisha

nisha nanan natanpachinara, nisha nisha yonquipi. Co Quisocristo nanaménáchin yonquipihuë'. A'naquën nisha nisha a'chinapi. Noyá nitotopi nonpinacaiso'. Nonpin nanan imatona', yanonpintopirinéñquémahuë', ama pi'pian téranta' natëcosohuë'. ¹⁵ Quisocristo nanaménso nimirinhuë' no'ten nanan. Noya ninosoroatéhua', inasáchin nia'chintahua'. Inapohuatéhua', oshaquëran Quisocristo pochin cancantarihua'. Inaso' na'con nosoroatonpoa', hua'anéntarinpoa'. Inaora nonën pochachin ni'ninpoa'. Inaso' motënpoa pochin ni'ton, natëcaso' ya'huérin. ¹⁶ Ina natëhuatéhua', noya nini'tehua', ya'huarihua'. Ya'ipinpoa' nicatahuacaso' ya'huérin. Nisha nisha nicatahuarihua' noya noya imacaso marë'. Quisocristo chachin catahuahuachinpoa', noya nicatahuarihua'. Ina quëran ninosoroatéhua', ya'ipinpoa' noya noya cancantarihua'.

Nasha cancan quëtérinpoaso'

¹⁷⁻¹⁸ Quisocristo nanan quëtérinco ni'ton, pënénaranquëma'. Na'a piyapi'sa' co imatonaraihuë', topinan quëran ya'huérapi. Somaraya pochin cancantatona', nisha nisha yonquipi. Co natantochináchinhue' cancantopi ni'ton, co Yosë nanamén nitotopihuë'. Co Yosë yonquiatonaraihuë', co manta' Yosë nohuitopihuë'. Ama inapita pochin nicosohuë'. ¹⁹ Inapitaso' nitotaponaraihuë', co nohuantopihuë' noya nicacaiso'. Co noyahuë' nisáponaraihuë', co nitotapanpihuë'. Monshihuanacaisoáchin yonquipi. Co noyahuë' yonquiatona', a'naratipita nipi. ²⁰ Co ina pochin Quisocristo a'chintérinpoahuë'. ²¹ Inaso' no'tequën anitotérinpoa'. Nanamén nani natanama'. ²² Iráca pa'pi co noyahuë' ninama'. No'pirama', monshihuanama', nisha nisha yonquirama'. Inapohuatamara, "noya cancantaréhua'", topiramahuë', ninonpintérama'. Co têhuëñchachin noya cancantéraramahuë'. Iráca naporamaso' chanatérinso pochin Yosë ni'ninquëma'. Iporaso' ya'ipi co noyahuë' yonquiramasopita naniantoco huachi. ²³ Ina naniantatoma', nónya cancantoco' noya noya yonquiamaso marë'. ²⁴ Nasha cancan Yosë quëtérinpoa' ina pochin cancantacaso marë'. Napoaton nasha a'morëso pochin nasha cancantoco'. No'tequën yonquiatoma', noyasáchin nico'.

²⁵ Ya'ipi imaréhuasopita Yosë huëntonéñquë chachin ya'conéhua'. Iyanpoa pochin ninéhua'. Napoaton ama ninonpintahuasohuë'. No'tequënáchin ninontahua'.

²⁶ A'na piyapi no'huihuatama', ni'cona oshahuantama'. Co'huara pi'i ya'coyantérasohuë', nanan anoyatoco'. ²⁷ Hua'qui' no'huihuatama', a'naroáchin sopai minséarinquëma'.

²⁸ A'naquëma' iráca ihuatérama'. Ama huachi ihuatocosohuë'. Ama chirotomarahuë', noya sacatoco'. Ina quëran nanitérama' pahuantérinsopita quëtacamaso'.

²⁹ Ama taparo' noncosohuë'. Ama ma'toma ma'toma noncosohuë'. Sano yonquiatoma', noya nonco' a'napita natanatéñquëma', Yosë yonqui'ina'. Noya noya imacaso marë' catahuaco'. ³⁰ Co noyahuë' nipatama', Ispirito Santo sëtarin. Quisocristo imapatamarra, sichoqué marca acotérëso pochin Ispirito Santo aya'coancantérinquëma'. Ayaro' tahuériquë huarë' a'paíarinquëma'. Naporo' noyá nicha'ésarinquëma'. Napoaton ama Ispirito Santo asëtocosohuë'.

³¹ Ama a'napita no'huitoma', yonquirácosohuë'. A'naroáchin nanan anoyatoco'. Ama no'huitacamaso' nohuantocosohuë'. Ama no'huito canainquëmasohuë'. Ama iquianan quëran ninontocosohuë'. Nipinocasonta' co noyahuë'. Ama pi'pian téranta' co noyahuë' nicosohuë'. ³² Ya'ipi piyapi noya nontoco'. Nosoroatoma', catahuaco'. Ma'sha onpotohuachinéñquëma', ama ina yonquicosohuë'. Quisocristo imarama' ni'ton, Yosë os-hanëma' inquitérinquëma'. Canpita marë' chiminin ni'ton, nanan anoyatérinquëma'. Inapochachin canpitanta' a'napita ma'sha onpotohuachinéñquëma', nanan anoyatatoma', noya nontoco'.

5

Yosë imatëhua', noyasáchin niahua'

¹ Yosë nosoroatonpoa', hui'ninpita pochin ni'ninpoa'. Tatapoa' ni'ton, ina non-ahuan'. ² Quisocristo nosoroatonpoa', canpoa marë' chiminin. Oshanënpoa marë' chiminpachina, Yosëri noya ni'nin. Napoaton canpoanta' nani tahuëriya inapochachin ninosoroa'ahua' Yosë noya ni'inpoa'.

³ Yosë anoyacancantérinquëma' ni'ton, ama iyaro'sa' monshihuancosohuë'. Ama a'na quëmapi sa'in noyapacosohuë'. Ama ma'sharáchin cancantatoma', apiracosohuë'. Ama a'napita téranta ina pochin nipiso sha'huitocosohuë'. ⁴ Ama taparo' ninontacosohuë'. Ama narinacasoachin yonquicosohuë'. Co topinan quëran ninontacaso' ya'huérinhue'. Yosë catastuarinfoaso' na'con na'con nisha'huitatëhua': "Yosparinquën Siniro," itahua'. ⁵ Monshihuancopatama', co Quisocristo huëntonënqué ya'conamahuë'. Taparo' nininso' nipatama', co imaramahuë'. Ma'sharáchin yonquiuhuatama', co tēhuëñchachin Yosë yonquiaramahuë'. Nani ma'sha nohuantohuatama', mamanshi moshapiso pochin niconama'. Ina nitotatoma' iyaro'sa' yonquico'. ⁶ A'naquën yanopintaténénquéma', napopi: "Quisocristo imapomarahuë', ma'sona nohuantëramaso' nico', co ana'intarinquémuéhüe'," itopirinënquémuéhüe', ama pi'pian téranta' natëcosohuë'. Co Yosë natëpisopitahuë' chiníquen ana'intarin. ⁷ Napoaton ama inapitarë'quëma' nipayacosohuë'.

⁸ Iráca tashi pochin cancantopiramahuë', iporaso' Yosë imarama' ni'ton, anoya-cantérinquëma' tahuëri pochin nicacamaso marë'. Napoaton tahuëri pochin nico'.

⁹ Tahuëri pochin cancantohuatama', nóya nisarama'. No'téquénáchin yonquiatoma', noyápiachin cancantarama'. ¹⁰ Noya yonquiatoma', Yosë nohuantérins' nitotoco'. Ina nitotohuatama', ya'ipiya natëco'. ¹¹ A'naquën tashi pochin cancantatona', co noyahuë' nipi. Topinan quëran ya'huérapi ni'ton, ama inapita pochin cancantocosohuë'. No'téquén sha'huitoco' co noyahuë' nipisopita nariantacaiso marë'. ¹² Pa'pi co noyahuë' nipi. Po'oana quëran a'naratipita nipi. Napopiso a'ninquëchin sha'huirahuë' naporini, pa'pi tapaintérihuahuë'. ¹³ Noyasáchin nipatëhua', oshahuano'sa' oshaquëran yonquiaipi. "Téhuëñchachin co noyahuë' ninéhua'," tosapi. ¹⁴ Tahuëri nipachina, ya'ipi quënanë'. Ninshitatona napopiso chachin ninin.

"Co noyahuë' nipatama', huë'érëso pochin cancantarama'.

Ama ina pochin cancantatomarahuë', Yosë yonquico'.

Chimipi pochin cancantohuatama', Yosë nontoco' nasha cancan quëchinquéma'. Ina quëran nanopiantarëso pochin cancantarama'.

Quisocristo chachin a'pintarinquéma' noya nicacamaso marë', topi.

¹⁵ Napoaton iyaro'sa' noya yonquiatoma' ya'huëco'. A'naquën co manta' yonquipihuë'. Ama inapita pochin cancantocosohuë'. No'téquén yonquico'. ¹⁶ Ama tahuëri chiniacosohuë'. Iporaso' na'a piyapi'sa' co noyahuë' cancantopi. Napoaton apira apira a'napita catastuaco' Yosë yonquicaiso marë'. Onpopionta' nanamën anitotoco'. ¹⁷ Ama topinan quëran ya'huëcosohuë'. Yosë nohuantérins' nitotatoma', natëco'. ¹⁸ A'naquën no'picasoáchin cancantopi. "Huëco' no'piahua'. Capa cancantahua'," nitopirinahuë'. Ama campitaso' no'picosohuë', nishacancantotama'. Yosë nontoco' Ispirito Santo noyá ya'coancanchinquëma'. Nani tahuëri ya'coancantomiacinchinquëma'. Ina quëran co no'pipomarahuë', téhuëñchachin capa cancantomiatarama'. ¹⁹ Yosë quiricanënqué cantapiso' yonquiatoma', nisha'huitoco'. Yosë cantanën cantaco'. Nisha nisha cantanën cantatoma', ya'ipi cancanëma quëran Yosë chinotoco'. ²⁰ Nani tahuëri Tata Yosë nontatoma': "Yosparinquën," itoco'. Ma'sha onpoapomarahuënta', noya cancantoco'. "Siniro Quisocristo nanan quëtérinco ni'ton, nontaranquën," ta'toma' Yosë nontoco'.

Quëmapi'sa' sa'inarë chachin pënënins'

²¹ Quisocristoso' hua'anëma' ni'ton, ina yonquiatoma', imaramasopita capini nicatahuaco'. Ya'ipinquëma' nipënënatoma', ninatanco'. ²² Sanapi'sa' Sinioro natëtona', so'inanta' natëina'. ²³ Imarëhuasopitaso' Quisocristo nonën pochin ninëhua'. Inaso' hua'anënpoa' ni'ton, camairinpoa'. Ya'ipi imarëhuasopita nicha'ësarinpoa'. Napoaton inasáchin natëcaso' ya'huérin. Inapochachin quëmapi'sa' sa'ina quëran chini chiníquen nanantérin. Napoaton sanapi'sa' so'ina' natëina'. ²⁴ Imarëhuasopita Quisocristo natërehuaso pochachin sanapi'santa' so'ina' natëina'.

²⁵ Quëmapi'santa' sa'ina' nosoro'ina'. Quisocristoso' imarëhuasopita na'con nosororinpoa'. Nosoroatonpoa', ya'huérënamënpoa' chiminin. Ina nosororinpoaso pochachin quëmapi'sa' sa'ina' nosoro'ina'. ²⁶ Quisocristo chiminin anoyacancantinpoaso marë'. Nanamën natëhuatëhuara, noyápiachin cancan quëtérinpoa'. I'quë amarëso pochin os-hanënpoa' inquitérinpoa'. ²⁷ Ya'ipi imarëhuasopita noya noya acoinpoaso marë' naporin. Co pi'pian téranta' né'huëtérinso pochin cancantacaso' nohuantérinhuë'. Napoaton ya'ipi co noyahue' yonquirëhuasopita inquitérinpoa'. Noyápiachin cancan quëtérinpoa ni'ton, noya ni'sarinpoa'. ²⁸ Inapochachin quëmapi'sa' sa'ina' nosoro'ina'. Inahuara nonëna pochin nicatona', nosoro'ina'. Insosona sa'in nosorohuachin, inaora ninosoroarin. ²⁹ Co insonta' inaora nino'huirinhue'. Tanahuachina, coshatérin. Canotohuachina, chinotérin. Noya ina pochin ninosororin. Quisocristo imarëhuasopita nosororinpoaso pochin ninin. ³⁰ Imarëhuasopitaso' inaora nonën pochin ni'ninpoa' ni'ton, a'naya a'nayanpoa' nosororinpoa'. ³¹ "Napoaton quëmapi sa'apachina, co huachi pa'pin, a'shin, inapita na'con na'con yonquicaso' ya'huérinhue'. Sa'in na'con na'con yonquiaton, chinpitacaso' ya'huérin. Cato' piyapi nipurinhuë', a'naíchin pochin Yosëri ni'nin," ténin quiricanëñquë. ³² Inaso' sacai' nitotacaso'. Caso nipurinhuë' Quisocristo noya yonquirinpoaso' sha'huitaranquëma'. Ya'ipi imarëhuasopita inarë'quënpoa' nichinpítérhua' ni'ton, a'naíchin pochin Yosë ni'ninpoa'. ³³ Canpitanta' iyaro'sa', sa'ama' na'con nosoroco'. Canpitaora ninosororamaso pochachin sa'ama' nosoroco'. Sanapi'sanquëmanta' so'yama' noya ni'co'. Noya nicatoma', natëco'.

6

Hua'huaro'santa' pënëninso'

¹ Canpitanta' apia'huaro'sa', pënënanquëma'. Tatama' natëco'. Mamamanta' natëco'. Quisocristo imarama' ni'ton, inapita natëcamaso' ya'huérin. ²⁻³ Yosë quiricanëñ quëran pënëninpoa'. "Tatama' noya nicatoma', natëco'. Mamamanta' natëco'. Natëhuatama', Yosë na'con catahuarinquëma'. Hua'qui' noya ya'huarama'," ténin quiricanëñquë. Ina pochin nicacaso' Yosë na'con na'con nohuantérin.

⁴ Canpitanta' iyaro'sa', hui'nama' noya pënëncö'. Ama apira apira no'huicosohuë'. Apira apira no'huihuatama', co natantochináchinhue' cancantapona'. Co noyahue' nipayachina', sanoanan quëran pënëncö' noya nicacaiso marë'. Yosë nanamën noya a'chintoco' Quisocristo imaina'.

Sacatoro'sa' pënëninso'

⁵ Patron marë' sacatohuatama', noya nicatoma', natëco'. Ama nonpintocosohuë'. Quisocristo marë' sacatarëso pochin cancantatoma', noya sacatoco'.

⁶ A'naquënso' patroni ni'pachina', chiníquen sacatérin. Co ni'pachinahuë', chiroton co sacatérinhuë'. Canpitaso nipurinhuë' patron co ni'pirinquëmaonta', noya sacatoco' Quisocristo noya ni'inquëma'. Yosë natëtoma', ya'ipi cancanëma quëran noya nico'. ⁷ Co piyapi maréáchin sacataramahuë'. Sinioro imarama' ni'ton, ina marë' sacatarama'. Napoaton ya'ipi cancanëma quëran sacatoco'. ⁸ Noya nipa'tehua', Yosë'pa' acanaarinpoa'. Ma'huano'sahuë nípon, piyapinënpitahuë nípon, ya'ipinpoa' no'tequëñ sha'huitarinpoa'. Insosona noya nipayachin, acanararin. Ina yonquiatoma', noya nico'.

⁹ Patrono'saquëmanta', piyapinëmapita noya nontoco'. Ama no'huiana quëran camaitocosohue'. Yosë ni'sarinquëma' canpitanta'. Inaso' inápaquë ya'huaton, hua'anëntërinpoa'. Napopianächin ni'ninpoa'. Co ma'huano'sa' noya noya ni'ninhuë'.

Yosë catahuarinpoa' sopai minsëcaso marë'

¹⁰ Nani iyaro'sa' pënënanquëma'. Yosë imatoma', nani tahuëri ina nontoco' achinicancainquëma'. Inaso' chini chiníquën nanantaton, ya'ipi nanitaparin ni'ton, catahuarinquëma'. ¹¹ Sopai hua'an noyá nitotérin nonpinacaso'. Nani tahuëri yanopintërinpoa'. Yosëso nipurinhue' chini chiníquën nanantaton, yacatahuarinpoa'. Ina nontohuatéhua', catahuarinpoa' sopai minsëcaso'. Sontaro'sa' a'mopiso pochin nininso' Yosë quëtërinpoa' ama sopai minsëinfoaso marëhuë'. ¹² Inimiconënpoa' co piyapi pochin quënanéhuahuë'. Sopai hua'anso' yaminsërinpoa'. Na'a sopairo'santa' inápaquë ya'huatona', yacamairinënpoa'. Co quënanpirëhuahuë', yonquinënpoa quëran yacamairinënpoa' co noyahue' nicacaso marë'. Iporaso' notohuaro' piyapi'sa' tashi pochin cancantatona', sopai natëpi. Inari camairin ni'ton, pa'pi co noyahue' yonquipi. ¹³ Sopai chiníquën sacatarin minsëinfoaso marë'. Napoaton Yosë nontoco' catahuanquëma'. Sontaro'sa' a'mopiso pochin nininso' Yosë quëtërinquëma'. Ina masahuatoma', a'moco' sopai minsëcaso marë'. Noya nitaparëso pochin nico'. Inapoatomma', chinitoco'.

¹⁴ Napoaton chiníquën cancantatoma', panca sintononquë nitonpotopiso pochin no'tën nanan na'con nohuantoco'. Ina imatoma', no'tëquën nonco'. Co pi'pisha téranta' nonpinacaso' ya'huérinhue'. Hua'na coton a'mopiso pochin noyasáchin nico' Yosë catahuanquëmaso marë'. ¹⁵ Sho'shorahuan sapatë' pochin nininso' po'mohuachinara, co to'coitopihuë', noya noya iratopi. Inapochachin canpitanta' Yosë nanamën sha'huitoco' a'napitanta' nitochina'. Noya nanan yonquihuatéhua', sano cancantarihua'. ¹⁶ Sontaro'sa' iscoto quëpapi nipa'shintaçaiso marë'. Inimicoro'sa' panca shinërë masahuatona', yaqui' noya orotérinso' nininquë pashitahuatona', i'chinpitopi. I'chinpitahuatona', pë'chinanquë aquë të'yatopi. Napoaton sontaro'sa' iscoto quëpapi nipa'shintaçaiso marë'. Ina quëran inimicori të'yanantohuachina, shinërë inaquë tacopiquirin. Panca shinërë orotérarinso pochachin sopai apira apira yanopintërinpoa' Yosë nariantacaso marë'. Napoaton na'con Yosë yonquico'. "Yosë ni'sárinco. Co onporonta' nariantarincohuë", topatama', achinicancanarinquëma'. Co pi'pian téranta' sopai natëaramahuë'. Iscoto quëpapiso pochin Yosëso' noya ya'copiarinpoa'. ¹⁷ Sontaro'sa' co casco hua'na quëran nininso' yancopihuë' naporini, a'naroáchin inimiconëpitari motën acochitonahuë'. Inapochachin canpoanta' co Yosë anoyacancantërinpoahuë' naporini, co cha'ëitërihuahuë'. Yosë quiricanënta' ya'huëtërinpoa'. Ispirito Santo nohuanton, ninshitërinënpoa' sopai minsëcaso marë'. Napoaton nani tahuëri ina nontatoma', yonquico'. Sontaro'sari sahuëñinëna quëran inimico minsëpi. Inapochachin canpoanta' Yosë quiricanëñ quëran sopai minsëarihua'.

¹⁸ Apira apira Yosë nontoco'. Ma'sha onphuhatamanta', ina nontoco' catahuanquëma'. Noya yonquiatoma', chiníquën nontoco'. Ispirito Santo catahuarinpoa' cancanënpoa quëran huarë' noya nontacaso'. Ama amiatomahuë', ni'sáco' ama a'nanya sopai minsëinquëmaso marëhuë'. Ya'ipi imarëhuasopita marë' Yosë nontoco'. ¹⁹ Ca marënta' Yosë nontoco' catahuanco nanamën noya a'chinch. Chiníquën cancantato, a'chinch. Yosëso' yanicha'ëpirinpoahuë', na'a piyapi'saso' co nitochátërapihuë'. ²⁰ Quisocristo chachin a'parinco a'chinta'huaso marë'. Ina marë' tashinan pëiquë po'morinaco. Po'mopirinacohue', Yosë nontoco' ama të'huaisohue'. Chiníquën cancantato, a'ninquëchin a'chinta'huaso' ya'huérin.

Piquëran huarë' sha'huirinso'

²¹ Iya Tiquico ya'ipi naporahuëso' sha'huitarinquëma' nitotamaso marë'. Inaso' na'con nosoroato, iyahuë pochin ni'nahuë. Siniro nanamën noya a'chinarin.

²² Canpitataquë a'paarahuë onpohuinsona ya'huëraiso' sha'huitinquëmaso marë'. Ina natanpatama', chiníquën cancantarama'.

²³ Quisocristo imarama' ni'ton, iyaro'sa', Tata Yosë asanocancainquëma'. Nosoro'inquëma'. Catahuainquëma' sha'huitérinpoaso' noya natëcamaso marë'. Sinioro Quisocristonta' inapochachin catahuainquëma'. ²⁴ Quisocristo hua'anëntarinpoa'. Ina nosoromiatohuatama', inaora nohuanton, Yosë noya catahuainquëma', tñahuë. Amen. Nani ninshitéraranquëma huachi.

Paono

Paonori Piriposëquë ya'huëpisopita ninshitérinso'

Imapisopita yonquiaton, ninshitérinso'

¹ Ca Paonoco ninshitaranquëma', ni'co'. ¿Noyanquëma' canpitanta'? Noya canta' ya'huarahuë. Iya Timotioro'co nanan a'patarainquëma'. Quisocristo hua'anëntérincoi. Inasáchin natërai. Ya'ipi Quisocristo imaramasopita Piriposëquë ya'huëramaso', ninshitaranquëma'. Ansiano'sanquëma' na'con yonquiranquëma'. Tiacono'sanquëmanta' yonquiranquëma'. ² Tata Yosë inaora nohuanton, catahuainquëma'. Asanocancainquëma'. Sinioro Quisocristonta' inapochachin catahuainquëma'.

Inapita marë' Yosë nontérinso'

³ Co nariantéranquëmahuë'. Canpita yonquiatënquëma', Yosë nontárahuë. "Piriposëquë ya'huëpisopita noya imarinënquën ni'ton, 'Yosparinquën, Sinioro,' " itérahuë, Yosë nontato. ⁴ Noya cancantato, campita marë' Yosë nontérahuë. ⁵ Iráca Yosë nanamën a'chintohuatënquëmara, a'naroáchin imarama'. Naporo quëran huarë' catahuaramaco a'napitanta' a'chinta'huaso marë'. Iporahuanta' a'napita a'chintarama' Yosë imacaiso marë'. Ina yonquiaton, noya cancantérahuë. ⁶ "Quisocristo imasarahuë huachi," topatama', naporo tahuëri chachin Yosë anoyacancantérinquëma'. Co nariantarinquëmahuë', ténahuë. Ipora huanta' catahuarinquëma' noya noya nicacamaso marë'. Quisocristo o'mantaquë huarë' catahuarinquëma'. Naporo' Quisocristo pochachin cancantarama'. ⁷ Na'con nosororanquëma' ni'ton, ina pochin noya yonquiranquëma'. Iráca Quisocristo nanamën a'chinpatëra, catahuaramaco. Tashinan pëiquë po'mohuachinacoranta', co nariantéraramacohuë'. Inaquënta' catahuaramaco. Imarahuëso marë' sha'huirapirinaco. Coisëquë quëpapirinacohuë', co tapanatohuë', Yosë nanamën no'téquën sha'huitérahuë. Canpitanta' "Yosë catahuarinpoa'," ta'toma', co tapanaramahuë'. Napoaton campita yonquiatënquëma', noya cancantérahuë. Iyahuëpita pochachin ni'ninquëma'. ⁸ Quisocristo nosororinpoaso pochachin carinquëmanta' nosororanquëma'. Pa'pi yani'ninquëma'. Yosë ni'sarinco no'téquën nontaranquëma'. ⁹ Canpita marë' ina nontérahuë. "Catahuaquë", Sinioro, noya noya ninosoro'ina'. Quëma nohuanton, nanamën nónya nitochina'. Catahuaquë', Sinioro, no'téquën yonqui'ina', "itérahuë Yosë nontato. ¹⁰ Yosë nanamën na'con yonquihuatama', noya noya nitotatoma', noya nisarama'. No'téquën yonquihuatama', noyápiachin cancantarama'. Noyasáchin nípatama', Quisocristo o'mantahuachina, nónya ni'sarinquëma'. Co ana'intarinquëmahuë'. ¹¹ Quisocristo catahuahuachinquëma', noyasáchin nisarama'. Ina quëran a'napitanta' nícatënquëma', Yosë yonquiapi. "Ma noya Yoséri catahuarin ni'ton, noya nipi. Ma noyacha Yosëso paya," tosapi.

Parisitérin quëran Yosë nanamën nahuinonso'

¹² Ma'sha onpotopirinacohuë', inanta' noya, ténahuë. Ina sha'huichinquëma'. Tashinan pëiquë po'mopirinacohuë', ina marë' na'con na'con piyapi'sa' Yosë nanamën natanapi. ¹³ Ya'ipi sontaro'sa' isëquë ya'huëpisopita natanapi. "Paono co manta' onpopirinhuë', Quisocristo imarin ni'ton, tashinan pëiquë po'mopi," topi. Ya'ipi piyapi'sa' ina nitotopi. ¹⁴ Tashinan pëiquë po'mopirinacohuë', chiníquën cancantérahuë. Ina natanatona', na'a imapisopita co huachi aquëtë' të'huapihuë'. "Quisocristo catahuarincoi quiyanta'", ta'tona', chiníquën cancantapi. Chiníquën cancantatona', Yosë nanamën na'con na'con a'chinapi.

¹⁵⁻¹⁷ A'naquën noya nosororinaco ni'ton, noya cancantatona', a'chinapi. "Paono tashinan pëiquë ya'huëpirinhuë', Yosë nohuanton, inaqué po'mopi Quisocristo nanamën no'téquën sha'huicaso marë', " ta'tona', noya a'chinapi. A'naquënsa nípirinhuë', co

nosororinacohue'. Apiratatë pochin nitérinaco. "Quiyaso' noya noya a'chinarai," toconatona', co noyahuë' ni'ninaco. "Paono tashinan pëiquë ya'huaso', quiyaso' a'chinpatëira, na'con na'con piyapi'sa' pa'yatatona', nataninacoi. Ina quëran Paonori apiratë pochin nicaton, aquë aquëtë' sëtarin," topi natantërahuë. ¹⁸ Ina níponahuë', co no'huirahuë'. Co apiratatë pochin ninahuë'. A'naquën noya cancantatona', Quisocristo nanamën a'chinapi. A'naquënso' co noya cancantaponaraihuë', a'chinapi anta'. Na'con na'con piyapi'sari natanapi ni'ton, noya cancantërahuë.

¹⁹ Nani tahuëri ca marë' Yosë nontërama'. Naporahuaton, Ispirito Santo nani tahuëri catahuarinco. Napoaton co pa'yanahuë'. Ocoiarinaco nimara. Co caso' nitotërahuë'. Yoséichin nitotërinso'. Ma'sona téranta' onpotohuachinaco, inanta' noya, ténahuë. Noyasáchin Yosë yonquirinpoa'. Ina marë' noya cancantarahuë. ²⁰ Co nohuantërahuë' pi'pian téranta' Yosë nanianta'huaso'. Inaso' noyasáchin yonquirinpoa' ni'ton, co atapanarincohuë', ténahuë. Coisë ocoiaponco nimara. Tépaponco nimara. Co ina nitotërahuë'. Co ina yonquirahuë'. Ocoihuachinco, chiníquen cancantato, a'chiantarahuë a'napitanta' imacaiso marë'. Tépahuachinaco, piyapi'sa' nicatonaco, na'con na'con Quisocristo yonquiapona', ténahuë. Quisocristo natëca'huasoráchin yonquirahuë. ²¹ Co tépahuachinacohue', Quisocristo natëto noya cancantarahuë. Tépahuachinacoso' nípirinhuë', canamiatarahuë. ²² Co chiminpatohuë', Yosë nanamën a'chiantarahuë. Ina quëran na'con na'con piyapi'sa' Quisoso imasapi. Napoaton co nitotërahuë'. ²³ ¿Ma'cha noya noya noya nicaya? ténahuë yonquiato. Co caso' nitotërahuë'. A'na cancan nohuantërin chimina'huaso'. Chiminpato, Quisocristoro'co ya'huëcontarahuë. Inaso' noya noya. ²⁴ Nípirinhuë', chiminpato, ¿incha a'chintëre'ponquémayá? ténahuë yonquiato. Canpita a'chinta'huanquémaso' nohuantërahuë. ²⁵ Napoaton co téparinacohue', ténahuë. Yosë nohuanton nanopihuatoso', a'chiantarahuë. Noya noya Quisocristo imacaso marë' a'chinchinquéma'. Noya natëtohuatama', noya noya cancantararama'. ²⁶ Ocoihuachinaco, nicaponquéma' pa'sarahuë. Pa'pato, capa cancantararama huachi. "Ma noyacha Quisocristoso' ni'ton, Paono a'pairin paya," tosarama'.

²⁷ Iporaso' iyaro'sa' noya nico'. Quisocristo nanamën yonquiatoma', ina pochachin cancantoco'. Yosë huëntonënqué ya'conama' ni'ton, ina pochin cancantacaso' ya'huërin. Nicaponquéma' pa'samarahuë. Co a'na' nanitapohuë' nimara. Ina níponahuë', nani tahuëri noya nico' noya nanan natanchi. Ya'ipinquëma', iyaro'sa', imamiatoco'. Ama a'nayanquéma' téranta' nisha yonquicosohuë'. Napopináchin yonquiatoma', Quisocristo nanamën a'chináco'. Inapohuatama', natantohuato, noya cancantarahuë huachi. ²⁸ A'naquën co Quisocristo imatonahuë', no'huiarinënquéma', aparisitarinënquéma'. No'huipirinënquémaonta', ama tē'huatocosohuë'. Chiníquen cancantohuatama', yonquiapi. "Ma inacha Yosë imapisopitaso paya. Yosëri catahuarin ni'ton, cha'ësapi. Co imarëhuasopitasohuë' nípirinhuë', co nicha'ësarinfoahuë'," tosapi. Yoséichin catahuarinpoa' chiníquen cancantacaso'. ²⁹ Yosë nosoroatonpoa', noyasáchin yonquirinpoa'. Ina nohuanton, Quisocristo imarëhua'. Ina quëran imarëhuaso marë' parisitarëhua'. "Ca marë' chiníquen parisitërin ni'ton, canta' imarahuëso marë' parisichi," ta'tëhua', noya cancantahua'. Inanta' Yosë nohuantërin. ³⁰ Iráca canpitataquë ya'huapo, imarahuëso marë' aparisitërinaco, ni'nama'. Ipora huanta' ina marë' parisitarahuë. Canpitanta' imaramaso marë' aparisitarinënquéma'. Níponahuë', chiníquen cancantatoma', imamiatoco'.

2

Quisocristo nonanacaso' ya'huërino'

¹ Quisocristo achinicancaninquëma'. Na'con nosororinquëma' ni'ton, noya cancantararama'. Ispirito Santo ya'coancantohuachinquéma', catahuarinquëma'. Catahuahuachinquéma', noya ninosoroarama'. ² Napoaton ya'ipinquëma' noya

nini'toma', ya'huëco'. Noya noya ninosoroco'. Ama, iyaro'sa', nisha nisha yonquicosohuë'. Napopináchin cancantoco'. Ina pochin cancantohuatama', noya noya cancantarahuë. ³ A'naquën chiníquën nanan nohuantopi. Inasáchin yonquiatona', a'napita nocanpi. "Caso' noya noyaco," topi yonquinëna quëran. Canpitaso nipurinhue' ama ina pochin cancantocosohuë'. A'napita noya noya ni'co'. ⁴ Ama canpitaora nohuantéramasoráchin yonquicosohuë'. A'napita nohuantérinsonta' yonquiatoma', catahuaco'.

⁵ Noya ninicatoma', Quisocristo pochachin cancantoco'.

⁶ Inaso', iráca quëran huarë' Yosë'pa' ya'huérin. Yosë chachin nuponahuë', co inaora nipa'yatacaso' yonquirinhue'. Nosoroatonpoa', yonquirinpoa'. Inápaquë chini chiníquën nanantaponahuë', co ina na'con na'con nohuantérinhue'.

⁷ Noya noya ya'huérinso' huëshimarahuatón, isoro'paquë o'marin.

Piyapi chachin nasitimarín. Nani mashotohuachina, co hua'an pochin chiníquën nanantacaso' nohuantérinhue'.

Topinan piyapi pochin cancantaton, a'napita catahuacasoráchin yonquirin.

Canpoa pochachin ninin.

⁸ Isoro'paquë ya'huëhuachina, Yoséíchin natérin.

Ina nohuantón, canpoa marë' chiminin.

Yosë hui'nin nuponahuë', corosëquë patanantohuachinara, chiminin.

⁹ Yoséíchin natérin ni'ton, inari ananpitaantaráhuatón, inápaquë quëpantarin.

Inaquë chini chiníquën nanan quëtérin. Yosë nohuantón, ya'ipiya hua'anéntarin. "Sino'oro" itaréhua'.

¹⁰ Napoaton Quisocristo yonquiatona',

ya'ipi piyapi'sari isonahuatona' chinochina'.

Inápaquë ya'huérinsopita, isoro'paquë ya'huérinsopita,

no'paanaquë ya'huëpisopita, inapitarinta' chinochina'.

¹¹ "Quisocristoso' Yosë hui'nin ni'ton, ya'ipiya hua'anéntarin," tēcapona'.

Ina quëran Tata Yosë na'con na'con yonquiaréhua huachi.

Tashi' a'pininso pochin ninëhuaso'

¹² Iráca canpitataquë ya'huapo, noya natanamaco. Noya natanatomaco, Yosë natérama'. Iporanta' iyaro'sa' nosororanquëma' ni'ton, co inatohua' ya'huaporahuë', noya noya natëco'. Ya'nan imapoma', Yosë anoyacancantérinquëma'. Napoaton noya cancantatoma', imamiatoco'. "Catahuaco Siniro noya imainquën. Co caora nanitérahuë", ta'toma' imamiatoco'. Ni'cona Yosë naniantotama'. ¹³ Co noyahuë' cancantatoma', co canpitaora nanitéraramahuë' Yosë natécamaso'. Nipurinhue', Yosë non-tohuatama', catahuarinquëma' nohuantacaso'. Ina quëran Yosë yanatéhuatama', inari chachin catahuarinquëma' no'tequëna' natécamaso'. Inaso' noya noya ayonquiarinquëma'.

¹⁴ Noya ninicatoma' iyaro'sa' ya'huëco'. Ama nino'huicosohuë'. Ma'sona téranta' nipatama', noya cancantatoma', nico'. ¹⁵ Noyasáchin nico' a'napita nicaténquëma', Yosë yonqui'ina'. Ina hui'ninpita pochin nicatoma', noyápiachin cancantoco'. Co imapisopitasohuë' nipurinhue' co Yosë nohuitatonahuë', co noyahuë' cancantopi. Nino'huipi, monshihuanacaisoráchin yonquipi, nonpinápi. Co noyahuë' yonquiatona', tashi pochin cancantopi. Canpitaso nipurinhue', tayloraro'sa' tashi' a'pintérinso pochin piyapi'sa' catahuaco' no'tequëna' yonquicaiso marë'. ¹⁶ Quisocristo nanamén chachin a'chintoco'. Ina imapatéhua', Yosë nohuitatéhua', nanopimiatarihua'. Ina quëran Quisocristo o'mantahuachin, co atapanaramacohuë'. "Parisitaporahuë', co topinan quëran Yosë nanamén a'chintérahuë', noya imamiatopi," ta'to, nóya cancantaráhuë huachi. ¹⁷ Iráca ma'sha Yosë marë' tēpahuachina', huinonta' opotopi. Inapochachin canta' canpita noya noya imacamaso marë' tēpahuachinaconta', noya nisarin, co

sëtarahuë'. A'chintëranquëma' ni'ton, noya imarama'. Napoaton noya cancantërahuë.
 18 Tëpahuachinaco, ama sëtocosohuë'. Ca pochachin noya cancantoco'.

Timotio, Ipapirotito inapita yaa'parinso'

19 Hua'qui' iyaro'sa' canpitata quëran co nanan natantërahuë' ni'ton, yonquiáranquëma'. Napoaton Timotio yaa'parahuë natantacaso marë'. Quisocristo nohuantohuachin, co hua'qui quëranhuë' a'paarahuë. Ina quëran sha'huitintahuachinco, noya cancantarahuë. 20 Inaso' na'con nosororinquëma'. Cancanën quëran huarë' yacatahuarinquëma'. Ca pochachin nosororinquëma'. Inasáchin ina pochin cancantérin.
 21 A'napitaso' inahuara nohuantopisoráchin yonquipi. Co Quisocristo na'con yonquipihuë'. 22 Timotioso nimirinhue' nohuitërama'. "Inaso' noya quëmapi," topi ya'ipi piyapi'sa'. Hui'nahuë pochin ni'ton, catahuarinco Yosë nanamën a'china'huaso marë'. Inanta' nitotërama'. 23 Ma'sona coisé onpotaponco nimara, co caso' nitotërahuë'. Nitotohuato, Timotio a'parahuë sha'huitinquëmaso marë'. 24 Yosë nohuanton, tashinan pëi quëran ocoiarinaco, topirahuë'. Ocoihuachinco, canta' nicaponquëma' pa'sarahuë. Co hua'qui quëranhuë' pa'sarahuë, ténahuë.

25 Iporaso nimirinhue' Iya Ipapirotito a'patantaranguëma'. I'hua chachin a'patiramaco catahuaincoso marë'. Canquihuachina, nónya catahuarinco. Achinicancaninco. Naporahuaton, inanta' Quisocristo nanamën a'chinin. Ina marë' parisitaponahuë', noya ahuantérin. Iporaso nimirinhue' canpitataquë pananta'in, ténahuë. 26 I'huamiáchin chiníquën caniorin, natantërama'. Nani noyatahuaton, ya'huérin'pa' yapanantarin. Yani'ninquëma'. "Caniorahuës' natantatona', pa'yamarai'," ta'ton, manorarin. Napoaton "Noyahua". Panantaquë' nipachin," itérahuë. 27 Téhuenchachin chiníquën caniorin. Pi'pishachin shichiminin. Nimirinhue', Yoséri nosoroaton, anoyatérin. Canta' nosoroatonco, iyahuë anoyatérinco. Ama aquëtë' sétaca'huaso marëhuë' Yosë nohuanton, co chiminihuë'. 28 Napoaton manoton a'parahuë. Ina quënanpatama', nónya cancantarama huachi. Noya cancantohuatama', canta' noya cancantarahuë. Co huachi aquëtë' sëtarahuë'. 29-30 Canconpachin, noya cancantatoma', nontoco'. "Ma noyacha Sinioro catahuarinquëni ni'ton, noya huénantaran paya," itatoma', noya nontoco'. Co canpitaso' nanitëramahuë' iséquë huécacamaso'. Napoaton ina a'patiramaco. Iséquë huécaton, shichiminin. Chiníquën parisitérin catahuaincoso marë'. Ina pochin cancantopisopita nónya ni'co'.

3

Yosëri noya ni'ninsopita

1 Iporaso' iyaro'sa' Quisocristo yonquiatoma', nónya cancantoco'. Iráca quëran huarë' inachachin inachachin pënénápiranquëmahue', co amirahuë'. Naquéranchachin natantahuatama', yonquiantarama'. Ina quëran noya noya imasarama', ténahuë. 2 A'naquënso' nonpin nanan a'chinapi. "Co marca niacotohuatamahuë', co Yosë piyapinënquëma' nisaramahuë," topi nonpinatona'. Ni'nira pochin pa'pi co noyahue' cancantatona', napopi. Ni'cona, nonpintochinënquëma'. Inapitaso' co noyahue' nisapi. 3 Yosë marcanën co nonënpoaque' niacotërehuahuë'. Cancanënpoa' Yosë anoyacancantérinpoa'. Cancanënpoa quëran ina chinotaréhua'. Ispirito Santo chachin catahuarinpoa' noya chinotacaso marë'. Co canpoara nanitërehuahuë' noya cancantacaso'. Quisocristoíchin anoyacancantohuachinpoa', nicha'ésarinpoa', ténéhua'. Napoaton canpoaso' Yosë piyapinënpita ninéhua'. 4 "Moisésë pënentérinso' no'tequen natërahuë ni'ton, Yosë noya ni'sarinco," topi a'naquën. Caso nimirinhue' na'con na'con natërahuë. Ina marë' Yosë nicha'érinpoa' naporini, ca noya noya cha'ítahuë'. 5 Caso' Israiro piyapico. Mincamin huénton quëmapico. Posa tahuérítahuaso', marca acotërinaco. Tatahuë, mamahuë Israiro piyapiráchin. Co nishahuë'. Israiro hua'an ya'conahuë, parisioro'sa' itopiso'. Ya'conato,

ya'ipi Moisésë pënëntérinso' imarahuë. ⁶ Inasáchin imato, Quisocristo imapisopita chiníquën aparisitérahuë. "Iráca pënëntérinso' no'tequën natérahuë," ta'to, noya piyapico, topirahuë'. ⁷ Ina marë' Yosë noya ni'sarinco, ténahuë iráca. Iporaso nípirinhuë' iráca yonquirahuëso' a'porahuë Quisocristo imaca'huaso marë'. ⁸ Ina na'con na'con nohuantato, inasáchin yonquirahuë. Iráca cotioro'sa' noya ni'ninaco. Hua'ano'saque huarë' noya ni'pirinacohuë', Quisocristo imapatéra, a'porinaco. No'huipirinacohuë', co ina yonquirahuë'. Iráca yonquirahuëso' amoro pochin nicato, co pi'pisha térranta' nohuantérahuë'. Quisocristo nohuita'huasoráchin nohuantérahuë. Ina nohuitacoso' noya noya, ténahuë. Inasáchin hua'anéntérinco. ⁹ Quisocristoíchin imasarahuë huachi. Co caora noya nicato cha'ërahuë'. Co pënëntérinso' natëto, cha'ërahuë'. Quisocristoíchin anoyacancantérinco, ta'to, ina imarahuë. Imapatora, oshanëhuë inquitatonco, anoya-cancantérinco. Ina quëran Yosë catahuarinco noya nica'huaso'. Ina marë' noya ni'ninco. ¹⁰ Aquë aquëtë' Quisocristo yanohuitérahuë. Iráca nanopiantarahuaton, chini chiníquën nanantérin. Ya'ipi nanitaparin ni'ton, catahuaincoso' nohuantérahuë. Noya noya nica'huaso marë' catahuainco, ténahuë. Iráca Yosë natëton, parisitérin. Canpoa marë' chiminin. Iporaso' canta' aparisitopirinacohuë', Quisocristo pochin Yosë natëi. Chiminiso pochin ya'ipi co noyahue' yonquirahuëso' nariantato, noyápiachin cancanchi, ténahuë. ¹¹ Ina pochin cancantato, imamiachi a'na tahuërinta' ananpitaantaincoso marë'.

Chini chiníquën imacaiso' ya'huërinso'

¹² Co ya'ipi cancanëhuë quëran noya noya cancanchatérarahuë'. Ipora huanta' pi'pian pi'pian co noyahue' yonquirahuë. Co Yosë pochachin cancantopirahuë', Quisocristo nani acorinco ina pochin cancanta'huaso marë'. Napoaton nani tahuëri yonquiárahue' noya noya nica'huaso marë'. ¹³ Co iyaro'sa' Yosë pochachin cancanchatérarahuë'. Nípirinhuë', inasáchin nohuantérahuë. I'hua naporahuësopita nariantérahuë. Iporaso' chiníquën Yosë imasarahuë noya noya cancanta'huaso marë'. ¹⁴ Co nisha nisha yonquirahuë'. Quëmapi'sa' nicanatona' ta'apiso pochin cancantato, Quisocristoíchin yonquiárahue' ina pochin cancanta'huaso marë'. Nani tahuëri nani tahuëri napoarahue'. Ina quëran a'na tahuëri Yosë'pa' cancontahuato, noya ni'sarinco. Quisocristo anoyacancantérinco ni'ton, inápaquë quëpantarino.

¹⁵ Ya'ipi Yosë imarëhusopita chinoton pochin cancantohuatéhua', ina pochin yonquiaréhua'. Nisha yonquihuatéhua', Yosë anitotarinfoa'. "Catahuaco no'tequën yonqui'i," itohuatéhua', anitotarinfoa'. ¹⁶ Anitotohuachinfoa', ama topinan quëran natahuansohuë'. Na'con yonquia'ahua' natëcaso marë'. Ya'ipi cancanënpoa quëran huarë' imahua'.

¹⁷ Ya'ipinquëma' iyaro'sa' nonanco. Nicatahuaco' ca pochachin imacamaso marë'. A'naquën nani quiya pochin cancantapi. Inapitanta'nicatoma', nonanco'. ¹⁸ A'naquënso nípirinhuë' "Yosë imarahuë," taponaraihuë', co noyahue' cancantopi. Quisocristo oshanënpoa' inquitinfoaso marë' corosëquë chiminin. Nípirinhuë', co inapitaso' ina yonquipihuë'. Ina nanan a'chinpatora, no'huitopi. Iporanta' inapita yonquiato, chiníquën sëtato, na'nërahuë. Co inapita nonanacaso' ya'huërinhuë'. ¹⁹ Inapitaso' co Quisocristo nanamën imapihuë'. Ma'sona térranta' yanipachinara, nipi. Ina marë' tapanacaso' ya'huëpirinhuë', co tapanpihuë'. "Nohuantato, napoarahue," toconpi. Isoro'paquë ya'huërinsoitaráchin yonquipi. A'na tahuëri pënqué parisitomiatapi. ²⁰ Canpoaso nípirinhuë', inápaquë ya'huërinso' na'con na'con yonquia'ahua'. Inatohua' ya'huëmiatarihuaso'. Sinioro Quisocristo nicha'ërinpoa' ni'ton, ina ninaréhua'. A'na tahuëri inápa quëran o'mantararin. ²¹ Iporaso' nonënpoa' co chinirinhuë'. Yacanioréhua'. Chiminacaso' ya'huërin. Nípirinhuë', Quisocristo o'mantahuachin, nonënpoa' anishatarin. Ina pochachin ya'noarihua'. Nanitaparin ni'ton, ya'ipi minsérahuaton, ananpitomiatarinfoa', noya noya acoarinfoa'.

4

Quisocristo yonquiatëhua', noya cancantërehuaso'

¹ Napoaton iyaro'sa' Quisocristo imamiatoco'. Na'con nosororanguëma'. Ya'nipishahuë' yani'nanquëma'. Canpita yonquiatënquëma', noya cancantërahuë. Noya imarama' ni'ton, co topinan quëran a'chintëranquëmahuë', tënahuë.

² Imo Ipotia, imo Sintiquia, inapitaso' co noya ninontopihuë', natantërahuë. Ama huachi imoyaro'sa' nino'huicosohuë'. Catonquëma chachin Quisocristo imarama' ni'ton, noya nini'toma', ya'huëco'. ³ Quëmanta' iyasha na'con catastuaranco ni'ton, inapita catastuaquë' noya ninonchina'. Cato chachin noya sanapi'sa'. Na'con catastuarinaco Quisoso nanamën a'china'huaso marë'. Iya Crimintinta' noya catastuarinaco. A'napitanta' catastuarinaco a'china'huaso marë'. Co nininënpita isëquë ninshitopi-rahuë', Yosëri nohuitërin. Nanpirin quiricaquë nininënpita nani ninshitërin. Inaqué ninshitohuachinpoa', nanopimiatarihua'.

⁴ Nani tahuëri Quisocristo yonquiatoma', noya cancantoco'. Naquëranchin inachachin sha'huichinquëma'. Ma'sha onpoapomarahuë', noya cancantoco', tënahuë. ⁵ Ya'ipi piyapi'sa' nosoroatoma', noyasha nontoco'. Quisocristo ni'sáripoa'. Co hua'quiya quëranhuë' o'mantararin. Ina yonquiatoma', ya'ipi piyapi'sa' noya nontoco'.

⁶ Ma'sha onpohuatama', ama pa'yancosohuë'. Ama nisha nisha yonquicosohuë'. Yosë nontoco' catastuainquëma'. Ma'sha pahuantohuachinquëma', nitoco'. "Ma noya catastuarancoi ni'ton, 'Yosparinquën, Siniro,' " itoco'. ⁷ Apira apira Yosë nontohu-atama', asanocancanarinquëma'. Co imapisopitasohuë' nimirinhuë' co sano cancantopihuë'. Ma'sha onpohuachinara, a'naroáchin pa'yanpi. Canpoaso nimirinhuë' Quisocristo imarëhu'a ni'ton, ina yonquiatëhua', sano cancantarihua'.

Yonquirëhuasopita

⁸ Isoíchin iyaro'sa' pënénaranquëma'. No'tën nanansáchin yonquico'. Noya imatona', noya nipesopita yonquico'. Ama nonpin nanano'sa' natëtocosohuë'. Noyápiachin cancantoco'. A'napita noyasáchin yonquirapico'. Noya nahuininsoráchin yonquico'. A'napita noya nipo' yonquiatoma': "Ma noyacha Yosëri catastuarin paya," itoco'. Ina pochin yonquihuatama', Yosë noya ni'sarinquëma'.

⁹ Na'con Yosë nanamën sha'huitëranquëma', natanama'. Ya'ipi a'chintëranquëmaso' noya natëco'. Canpitataquë ya'huapo, noya ninahuë, ni'namaco. Ca pochachin noya nico'. Noya nipatama', Yosë noya catastuarinquëma'. Ina nohuanton, noya nini'toma', ya'huarama'. Inasáchin asanocancaninpoa'.

Paono catahuapiso'

¹⁰ Canpitaso' yonquiramaco ni'ton, noya cancantërahuë. I'huamiáchin ma'sha a'patiramaco ama pahuantincoso marëhuë'. Ina marë' "Yosparinquën," itërahuë Yosë. Iráca ma'sha a'patéramaco. Ina quëran yacatahuantapiramaco huë', co insonta' huë'ninhuë' ni'ton, co nanitëramahuë'. Iporaso nimirinhuë' catastuararamaco. ¹¹ Co ma'sha pahuantërincoso marë' napotëranquëmahuë'. Yosë nohuanton, nani nitotërahuë ya'ipi ahuanta'huaso'. Ma'sha pahuantopirincohuënta', noya cancantërahuë. ¹² Ma'sha ya'huëtohuachinco, noya ya'huërahuë. Capanta' nipachina, co ina marë' sëtërahuë'. Sacai' ahuantacaso nimirinhuë', Quisocristo catastuarinco ni'ton, noya ahuantërahuë. A'na tahuëri cosharo' ya'huërin, noya ca'nahuë. A'na tahuëriso nimirinhuë' capa ni'ton, tana natanahuë. Ma'sha ya'huëhuachina, noya cancantërahuë. Capanta' nipachina, ahuantato, noya cancantërahuë. ¹³ Co caora nanitapirahuë', Quisocristo achinicancaninco ni'ton, ya'ipiya nanitaparahuë. Ma'sha onpoaporahuënta', noya ahuantërahuë. ¹⁴ Inaso nimirinhuë', ma noyanquëma' canpitaso' ni'ton, catastuararamaco. Isëquë ya'huato parisitopirahuë', noya catastuararamaco.

¹⁵ Iráca Masitonia parti pacapo, Yosë nanamën a'chintérinquëma'. Ina marë' a'na parti yapa'patëra, canpita catahuaramaco. "Ma noya quëmaso' catahuarancoi Quisocristo ima'huaiso'", itatomaco, coriqui a'patëramaco. Canpitásachin inapotëramaco. ¹⁶ Ina quëran Tisaronicaquë ya'huasoco, ma'sha pahuantohuachincora, naquëranchin coriqui a'patantaramaco. Catoro' a'patëramaco. ¹⁷ Ina marë' noya cancantérahuë. Co coriqui quëtéramacoso marëáchin noya cancantérahuë'. Catahuaramacoso marë' Yosë'pa' canaarama' ni'ton, noya noya cancantérahuë. ¹⁸ Iporaso' nóya i'huëretéraramaco huachi. Napoaton noya ya'huarahuë. Co manta' pahuantérincohuë'. I'hua Ipapërotito huë'pachina, coriqui a'patëramaco ni'ton, ma'sha ya'huëtérinco. Ina marë' "Yosparinquëma'", itëranquëma'. Yosë nosoroatoma', a'patiramaco. Yosë chinotacaiso marë' pimóchin nininso' a'pëhuachinara, Yosëri noya ni'nin. Inapochachin canpitanta' coriqui a'patëramaco ni'ton, Yosë noya ni'ninquëma'. ¹⁹ Canpitanta' ma'sona pahuantohuachinquëma', Yosë chachin quëtarinquëma'. Ya'ipi hua'anëntaton, nanitaparin. Quisocristo imarama' ni'ton, catahuarinquëma'. Co huachi pahuantarinquëmahuë'. ²⁰ Ma noyacha Tata Yosë chinotéréhuasoso paya. Ipora quëran huarë' ya'ipi piyapi'sari chinochina'. Amen.

Amiconënpita yonquirinso'

²¹ Ya'ipi Quisocristo imaramasopita noya yonquiaténquëma', saludos a'pataranquëma'. Ca'taninacosopitanta' yonquiaténenquëma', saludos a'patarinénquëma'. ²² Ya'ipi Yosë imapisopita iséquë ya'huëpiso' saludos a'patarinénquëma'. Copirno inpriatonënpitanta' na'con yonquiaténenquëma', saludos a'patarinénquëma'.

²³ Inaora nohuanton, Sinioro Quisocristo noya catahuainquëma'. Nani nинshitérinquëma huachi.

Paono

Paonori Corosasëquë ya'huëpisopita ninshitërinso'

Imapisopita yonquiaton, nanan a'patërinso'

¹ Ca Paonoco ninshitaranquëma', ni'co'. ¿Noyanquëma' canpitanta'? Noya canta' ya'huarahuë. Yosë nohuanton, Quisocristo acorinco nanamën a'china'huaso marë'. Iya Timotioro'co nanan a'patarainquëma'. ² Ya'ipi imaramasopita Corosasëquë ya'huaramaso', ninshitaranquëma'. Canpitanta' Quisocristo imamiatarama' ni'ton, Yosë noya ni'ninquëma'. Ina imarama' ni'ton, iyahuëi pochin ni'nainquëma'. Inaora nohuanton, Tata Yosë na'con catahuainquëma'. Asanocancainquëma'.

Imapisopita marë' Yosë nontërinso'

³⁻⁴ Campita yonquihuatëiniquëmara, na'con Yosë nontarai. Inaso' Sinioro Quisocristo pa'pin. Cancanëma quëran huarë' ina natërama'. Ya'ipi Yosë piyapinënpitanta' nosoro-rama', natantërai. Ina natantatoi, noya cancantërai. "Noya imarinënquën ni'ton, 'Yospar-inquën Sinioro,' " itërai. ⁵ Iráca noya nanan natanama'. "Oshanënpoa' inquitatonpoa', Quisocristo anoyacancantërinpoa', itohuachinënquëma', no'tequën a'chintërinënquëma'. A'chintohuachinënquëma', natërama'. "A'na tahuëri Yosë'pa' noya ananpitaantarinpaoa', ta'toma', Quisocristo imarama'. Ina imatoma', ina tahuëri ninarama'. ⁶ Noya nanan chachin ya'ipi parti a'chinapi. A'na parti a'na parti piyapi'sa' natëtatona', noya imasapi. Canpitanta' noya imasarama'. Ya'nan natantapoma', natërama'. "Yosë nosoroatonpoa', inaora nohuanton, nicha'ësarinpaoa', itërinënquëma'. Napotohuachinënquëmara, "No'tequën sha'huitërinpoa', ta'toma', natërama'. ⁷ Ipagérasë a'chintërinquëma', inaro'coi nónya ninosororaiso'. Quiya pochachin natëton, Quisocristo nanamën a'chinarin. Co quiyaso' nanitëraihuë' canpitataquë pacahuaiso' ni'ton, ina a'parahuë a'chintinquëmaso marë'. Co chirorinhuë' a'chinacaso'. ⁸ Ina sha'huitiirincoi. "Ispirito Santori catahuarin ni'ton, noya ninosoroapi," itiirincoi.

⁹ Naporó quëran huarë' campita yonquiatëiniquëma', Yosë nontërai. Nani tahuëriya non-tatoi, itërai: "Quëmaso' Sinioro têhuëñchachin anitötérancioi no'tequën natëca'huainquënso marë'. Corosasëquë imarinënsopita na'con catahuaquë'. Ya'ipi nohuantëranso' anitötéquë'. Ispirito Santori catahuain no'tequën yonqui'ina'. ¹⁰ Catahuaquë' Sinioro quëma nohuantëranso chachin niina'. Inapohuachina', noya noya ni'saran. Catahuaquë' noyasáchin niina'. Na'con na'con nohuichinënquën. ¹¹ Quëmaso', Sinioro, chini chiníquën nanantëran ni'ton, catahuaquë' chiníquën cancanchina'. Ma'sha onpohuachina', catahuaquë' noya cancantatona', ahuanchina'. A'napitari aparisito-huachina', catahuaquë' ama no'huiinasohuë', itërai, Yosë nontatoi. ¹² Nani anoy-acancantuohuachinpoara, huëntonënquë chachin aya'coninpoa'. Hui'ninpita pochin ni'sarinpoa'. Iporaso' ina catahuahuachinpoa', tahuëri pochin cancantarihua'. Naporahuatëhuë', ya'huërinquë chachin ya'huëcontarihua'. Ina marë' noya cancantatëhuë' "Yosparinquë Sinioro," itarihua'. ¹³ Iráca sopai camairinpoa'. Ina natëtëhuë', tashi pochin cancantopirëhuahuë', nani Yosë nicha'ërinpoa'. Co huachi sopai natëcaso' ya'huërinhuë'. Yosë nohuanton, hui'nin hua'anëntërinpoa'. Hui'nin na'con nosoropir-inhuë', isoro'paquë a'paimarin. ¹⁴ Ina chiminin ni'ton, nicha'ërinpoa'. Oshanënpoa' inquitërinpoa huachi.

Quisocristo chiminaton, nanan anoyatërinpoaso'

¹⁵ Tata Yosëso' co quënanëhuë'. Nipirinhuë', hui'nin isoro'paquë o'maton, pa'pin anohuitërinpoa'. Inanta' Yosë chachin ni'ton, nónya anohuitërinpoa'. Co'huara isoro'pa' ya'huëyátërasohuë', hui'nonta' inápaquë ya'huërin. ¹⁶ Yosë nohuanton, inarë chachin ya'ipi ma'sha ninin. Inápaquë ya'huërinopita, isoro'paquë ya'huërinopita, inapita

acorin. A'naquën quënanë'. A'naquënso co quënanëhuë'. Anquëniro'sa', inápaquë chiníquën nanantérinsopita, nisha nisha nininsopita, inapitanta' ninin. Quisocristoíchin chinotacaiso marë' ya'ipiya ya'huérin. Ina marë' acorin. ¹⁷ Co'huara ma'sha ya'huéyátérasohuë', Quisocristo ya'huérin. Ina nohuanton, piyapi'sa', ma'sharo'sa', ya'ipiya ya'huérapi. Ipora huanta' co yonquirinfoahuë' naporini, ya'ipinpoa' ta'huanchitërihuahuë'. Ya'ipi ma'sharë'quënpoa chachin ta'huanchitërihuahuë'. ¹⁸ Ya'ipi imarëhusopita a'na huënton pochin ninëhua'. Inaora nonën pochachin Quisocristo ni'ninpoa'. Inaso' motënpoa pochin nicaton, hua'anëntérinpoa'. Ina'ton chiminaponahuë', nanopiantarin. Napoaton ya'ipinpoa' inasáchin natëcaso' ya'huérin huachi. ¹⁹ Quisocristoso' Yosë hui'nin ni'ton, Yosë chachin anta'. Co pi'pisha téranta' pahuantérinhuë' pa'pin pochin nicacaso'. Tata Yosë nohuanton, naporin. ²⁰ Iráca oshahuanëhua' ni'ton, ya'ipinpoa' Yosë inimicotipirëhuahuë'. Yosë nohuanton, Quisocristo chiminin nanan anoyatinpoaso marë'. Isoro'paquë ya'huérinsopita, inápaquë ya'huérinsopita, ya'ipiya nohuantérin anoyatacasó'. Canpoa marë' huënainën pa'nin. Coroséquë chiminin ni'ton, co huachi Yosë inimicotacaso' ya'huérinhuë'.

²¹ Iráca canpitaso' co Yosë yonquiramahuë'. Co noyahue' cancantatoma', Yosë inimicotérama'. Co noyahue' ninama'. ²² Iporaso niperihuë' nanan anoyatérinquëma'. Quisocristo isoro'paquë o'maton, piyapi chachin nasitimar. Coroséquë chiminin nanan anoyatinpoaso marë'. Nanan anoyatatonpoa', anoyacancantérinpoa'. Noyápiachin cancan quëterinpoa'. O'mantahuachin, co ana'intarinfoahuë'. Noya cancantacaso marë' nanan anoyatérinpoa'. ²³ Imamiatohuatama', Yosë noya ni'sarinquëma huachi. Noya nanan natanama'. "Nicha'ësarinfoa'", ta'toma', natërama huachi. Natëmiatoco'. Ama, iyaro'sa', nisha nisha yonquicosohuë'. Ama pi'pian téranta' a'pocosohuë'. Ya'ipi parti noya nanan chachin a'chinapi. Inachachin canta' a'chinarahuë.

Imapisopita catahuacaso marë' Yoséri acorinso'

²⁴ Imarëhusopita marë' Quisocristo chiníquën parisitérin. Parisitaton, huëntonënquë aya'coninpoa'. Ina quëran imarëhusopitanta' parisitacaso' ya'huérin a'napitanta' imacaiso marë'. Napoaton ipora canta' parisitarahuë canpitanta' imacamaso marë'. Parisitaporahuë', noya cancantérahuë. ²⁵ Yosë acorinco imapisopita catahua'huaso marë'. Canpitanta' a'chintaranquëma'. Ya'ipi nanamën a'china'huaso marë' acorinco. ²⁶ Iráca iso nanan co nitotopihuë'. Iporaso niperihuë' imarëhusopita anitotérinpoa'. Yonquirinso chachin anitotérinpoa'. ²⁷ "Quisocristo chachin aya'coancantaranquëma'", itérinpoa'. Canpitanta' nisha piyapinquëma' niperamahuë', ya'coancantérinquëma'. Ya'ipinpoa' ya'coancantérinpoa' ni'ton, a'na tahuëri Yosë'pa' noya noya ya'huécontarihua'. Iráca co manta' ina nitotopirinahuë', nani anitotérinpoa huachi. Quisocristo nohuitatëhua', ina ninarëhua'. Ma noyacha Tata Yosëso' yonquirinpoa paya, ténëhua'.

²⁸ Napoaton Quisocristo nanamën a'chinárai. Ya'ipi piyapi pënénárai. Noya yonquia-toi, a'chintarai Quisocristo imacaiso marë'. Ina imapatama', noya noya cancantarama'.

²⁹ Ina marë' pa'sápato, a'chinárahüe. Quisocristo chachin catahuarinco. Achinicancan-inco ni'ton, chiníquën cancantato a'chinárahüe.

2

¹ Na'con iyaro'sa' yonquiranquëma'. Naotisiaquë ya'huépisopitanta' yonquirahuë. Na'aquëma' inatohua' ya'huéramasopita co nohuitaponquëmarahuë', na'con yonquiranquëma'. Co pi'pisha téranta' nohuantérahuë' nisha cancantacamaso'. Napoaton ninshitaranquëma'. ² Ya'ipinquëma' yonquiatenquëma', Yosë nontárahüe. "Catahuaquë' Sinioro chiníquën cancanchina'. Noya ninosoro'ina'. Ina quëran a'na huëntoínchin pochin nisapi. Ma noyacha quëmaso' yonquirancoi paya. Catahuaquë' quëma nanamën noya yonqui'ina'. Quisocristo chachin nohuichina'. Iracaso' co piyapi'sari nohuitopirinahuë'.

Iporaso nimirinhue' anohuitérancio. Ina nohuitatoi, tēhuëñchachin noya cancantarai," itérahuë, Yosë nontato. ³ Quisocristo ya'ipi nitotérin. No'téquën yonquirin. Inasáchin catahuarinpoa' no'téquën yonquicase'. Ina na'con yonquiuhuatéhua', noya noya nitotarihua'. Na'a piyapi'sa' co nitotopirinahuë', Yosë anitotérinpoa' Quisocristo pochin yonquicase marë'. ⁴ A'naquënso nimirinhue' nisha a'chinpi. Ama Quisocristoíchin yonquicamaso marëhuë' noyásha nontarinénquëma'. Ni'cona nonpintochinénquëma'. ⁵ Co canpitataquë ya'huaporahuë', nosoroaténquëma', nani tahuëri yonquiranquëma'. Noya nini'toma', ya'huarama'. Co nisha nisha yonquiramahuë'. Ya'ipi cancanëma quëran Quisocristo natërama'. Ina marë' nóya cancantérahuë.

Quisocristo nicha'érinpoaso'

⁶ Ya'nan imapoma', Quisocristo anoyacancantérinquëma'. Inasáchin hua'anéntérinquëma'. Iporahuanta' inasáchin natëtoma', imamiatoco'. ⁷ Ni'co'. Ma'sha sha'patéra, itën acopo' no'paqué pa'pachina, noya huanirin. Inapochachin canpitanta' Quisocristo noya chinpitoco'. Inasáchin yonquico' achinicancainquëma'. Nani iyasha no'téquën a'chintérinquëma' ni'ton, ya'ipi cancanëma quëran Quisocristo natëco'. "Yosë na'con nosororinpoa'," ta'toma', nani tahuëri "Yosparinquën Siniór," itoco'.

⁸ A'naquënso nimirinhue' nisha a'chinpi. Ni'cona oshaquëran anishacancantochin-quëma'. Nonpin nanan inahuara yonquipiso' a'chinapi. Piyapi'sa' yonquipisoráchin imasapi. Quisocristo a'chinins'o' co imapihuë'. Nisha nisha isoro'paqué chiníquen nanantopisopita yonquiatona', nisha pënëntapi. Yaocoirinénquëma'. Canpitaso nimirinhue' ama inapita natëcosohue'.

⁹ Quisocristoíchin natëcaso' ya'huérin. Piyapi chachin niponahuë', Yosë chachin ninin anta'. Co manta' pahuantérinhue' Yosë pochin nicacaso'. ¹⁰ Canpoanta' ina imapatéhua', co manta' pahuantarinpoahuë' noya noya cancantacaso marë'. Yosë chachin nohuitaréhua'. Hua'ano'sa', anquëniro'sa', sopairo'sa', inapita chiníquen nanantopirinahuë', Quisocristoso' chini chiníquen nanantérin. Co ina nohuantohuachin-hue', co manta' nanitapihuë' nicacaiso'. ¹¹ Iráca Yosë chinotopisopita marca niacotopi. Iporaso nimirinhue' Quisocristo imapatéhua', nisha acotérinpoa'. Co nonënpoaquë acotérinpoahuë'. Cancanënpoa' anoyatérinpoa'. Co noyahue' yonquiréhuasopita inquitatonpoa', anoyacancantérinpoa' ni'ton, nóya cancantarihua'. ¹² Aporihuanpatéhua', Quisocristo pochin ninéhua'. Chiminpachina, pa'pitopirinahuë'. Yosë nohuanton, nanopiantarin. Inapochachin canpoanta' co noyahue' yonquiréhuasopita nanopiantarihua'. Ina quëran Quisocristo nanopiantarinso pochin ninéhua'. "Yosë ya'ipiya nanitaparin," topatéhua', catahuarinpoa' ina pochin nicacaso'. ¹³ Iráca canpitaso' oshahuanatoma', chimipi pochin ninama'. Co noyahue' nicacasoráchin yonquirama'. Co Yosë piyapinënpita ninamahuë'. Iporaso nimirinhue' Quisocristo imarama' ni'ton, anoyacancantérinquëma'. Oshanëma' inquitaténquëma', nanopiantarinso pochin ni'ninquëma'. ¹⁴ Iráca Moisës pënëntérin nani ma'sha natëcaso marë'. Co inquënpoa térranta' nanoparéhuahuë' ya'ipi natëcaso' ni'ton, oshahuanéhua'. Ina marë' ana'intinpoaso nimirinhue', Quisocristo corosëquë chiminaton, nicha'érinpoa' ni'ton, Yosë noya ni'ninpoa'. ¹⁵ Quisocristoso' chini chiníquen nanantérin. Corosëquë chiminaton, ya'ipi sopai hua'ano'sa', sopairo'sa', inapita a'ninquëchin minsérahuate, atapanin. Co huachi inapita nanopatihiuë' sha'huirapiinpoaso'.

Inápaquë ya'huérinsopita yonquicase' ya'huérin

¹⁶ Napoaton nisha pënënpachinénquëma', ama natëcosohue'. "Nani ma'sha ca'patéhua', o'patéhua', oshahuanaréhua'," topi a'naquën. Nani sahuato tahuëri chinotopi. Nani yoquia'huaraiquë chinotopi. Nisha nisha niyontopiso tahuëri'sa' na'huëpi. "Co quiya pochin nipatamahuë', co no'téquën imaramahuë'." itarinénquëma'. Nimirinhue', ama inapitaso' natëcosohue'. ¹⁷ Iráca Yosë ina pochin pënënin. Quisocristo

o'maquë huarë' napopirinhuë'. Iporaso' nani o'marin ni'ton, co huachi inapita no-huantérēhuahuë'. Quisocristoíchin natëcaso' ya'huërin. ¹⁸ Nisha a'china'piro'saso nipi-rinhuë' tapona': "Quiyaso' anquëniro'sa' chinotërai. Hua'narëso pochin quënanai. Co can-pitaso' quiya pochin nipatamahuë', co noya cancantaramahuë'", itohuachinënquëma', ama pi'pisha téranta' natëtocosohuë'. Inapitaso' nonpinatona', "Nani ma'sha Yosë an-itotërincoi ni'ton, noya noyacoi," topirinahuë', inahuara yonquinëna quëran napopi. ¹⁹ Inapitaso' co tēhuëñchachin Quisocristo imapihuë'. Inasáchin motënpoa' pochin nica-ton, hua'anëntarinpoa'. Ni'co'. Nonënpoa' nisha nisha ya'huëtërin. Motënpoari ya'ipi ca-mairin noya sacatacaiso marë'. Inapochachin imarëhuasopitanta' Quisocristoíchin noya camairinpoa'. Achinirinpoa' so'sorëso pochin nicacaso marë'. Ina pochin nicacaso' Yosë nohuantérin.

²⁰⁻²¹ Iráca Quisocristo chiminin. Canpitanta' ina imapatama', inarë'quëma' chimina-maso pochin ninama' ni'ton, co huachi a'napita pochin nisha nisha chiníquën nanan-topisopita imaramahuë'. Inapitaso' inahuara yonquinëna quëran nisha a'chinpi. "Nani ma'sha natëhuatoi, cha'ësarai," ta'tona', "Ama ina ca'cosohuë. Ama pi'nicosohuë'. Ama së'huayátéracosohuë", itarinënquëma'. ¿Ma'marëta' ipora huanta' ina natëcamaso' yon-quirama'? tēnahuë yonquiato. ²² Co ina pochin Yosë pënënpoinpauhuë'. Cosharo', ma'sha, inapitaso' co ya'huëmiatérinhuë'. A'na tahuëri ta'huantarin ni'ton, co inapitaso' aquëtë' Yosë yonquirinhuë'. Piyapi'sa' inahuara yonquinëna quëran ina pochin nipënënpipi. ²³ Ina pochin nipënënpachina', yonquínahuan pochin ya'nopirinahuë'. "Ma'sha a'porahuatoi, parisitérai. Parisitopiraihuë', ahuantërai. Ina marë' Yosë noya noya ni'nincoi," top-irinahuë', co no'téquën yonquipihuë'. Ina pochin nipi-rinahuënta', co pi'pian téranta' nanitopihuë' co noyahuë' yonquipisopita nariantacaiso'.

3

¹ Quisocristo chiminpachina, Yosëri ananpitaantarin. Canpitanta' imarama' ni'ton, anoyacancantérinquëma' noya noya yonquicamaso marë'. Napoaton Quisocristo yon-quirinso chachin nohuantoco'. Nani tahuëri yonquiráco' ina pochin cancantaca-maso marë'. Inaso' inápaquë ya'huërarin. Yosë inchinan quëran huënséaton, ina pochachin chini chiníquën nanantarín. ² Ama ma'sharáchin yonquicosohuë'. Yosë'pa' ya'huërinsopita yonquiráco'. ³ Ni'co'. Chimipiso' co huachi isoro'pa' yonquirinhuë'. Inapochachin canpitanta' Quisocristorë'quëma' chiminamaso pochin cancantatoma', co ma'sharáchin yonquaramahuë'. A'na tahuëri huachi Quisocristorë'quënpoa' Yosë'pa' noya noya ya'huëcontarihua'. ⁴ Quisocristo chachin ya'coancantérinpoa' Yosë yonquicaso marë'. A'na tahuëri o'mantahuachin, noya noya ya'noarin. Naporo' inarë'quënpoa' ya'huërarihua' ni'ton, canpoanta' noya noya acoarinfoa'.

Co noyahuë'yonquiréhuasopita nariantatëhua', noyápiachin cancantahua'

⁵ Napoaton pi'pian téranta' co noyahuë' yonquihuatama', a'naroáchin nariantoco'. Ama monshihuancosohuë'. Ama taparo' yonquicosohuë'. Ama a'na sanapi së'huacamaso' yonquicosohuë'. Ama a'na quëmapi sa'in noyapacosohuë'. Ama nani ma'sha nohuantapatosohuë'. A'naquënso' ma'sha na'con nohuantatona', mamanshi moshapiso pochin niconpi. ⁶ Ina pochin nipi-sopita co natëpihuë'. Ina marë' Yosëri chiníquën ana'intarin. ⁷ Iráca canpitanta' co noyahuë' cancantatoma', co noyahuë' ninama'. ⁸ Iporaso nipi-rinhuë' isopitanta' co noyahuë' cancantatoma' naporamasopita a'poco'. Ama no'huitocosohuë'. Ama no'huito canainquëmasohuë'. Ama piyapi naponin yonquirapicosohuë'. Ama yanpitocosohuë'. Ama taparo' noncosohuë'. ⁹ Ama ninonpintocosohuë'. Co noyahuë' yonquiramasopita nani a'porama' ni'ton, co ina yonquicaso' ya'huërinhuë'. Mocarinso' tē'yatëresso pochin iráca naporamasopita a'poatoma', nariantomiatoco'. ¹⁰ Nasha a'morëso pochin nasha cancan manama'. Yosë nininpoa' ni'ton, nani tahuëriya catahuarinquëma' ina pochin

cancantacamaso marë'. Ina quëran noya noya ina nohuitarama'. Ina marë' nasha cancan quëtérinquëma'. ¹¹ Quisocristo imapatëhua', napopináchin Yosë ni'ninpoa'. A'naquën cotioro'sa', a'naquënso nimirinhue' cricoro'sa'. A'naquën marca niacotopiso', a'naquënso nimirinhue' co niacotopihuë'. A'naquën nisha piyapi'sa', a'naquënta' quëmaro'sa'. A'naquën patron piyapinënpita, a'naquënso nimirinhue' inahuara mare' sacatopi. Nisha nisha nicarihuahue', napopináchin Yosë ni'ninpoa'. Quisocristoíchin yonquicaso' ya'huërin. Ina imapatëhua', ya'ipinpoa' ya'coancantérinpoa'. Co manta' pahuantarinpoahuë' noya cancantacaso marë'.

¹² Yosë nosoroatonpoa', huayoninpoa' noya nicacaso marë'. Napoaton ya'ipi piyapi'sa' nosoroatoma', noya nontoco'. Nasha a'morëso pochin noyápiachin cancantoco'. Ama nocantocosohue'. Nani tahuëriya yonquico' a'napita catahuacaso marë'. Sano nicatoma', noya nontoco'. Ma'sha onpoapomarahuë', ahuantoco'. ¹³ Ama yai'huëretocosohue'. A'napita no'huihuachinquëma', nanan anoyatoco'. Ma'sha onpotopirinquëmaonta', nariantoco'. Siniro oshanëma' nani inquitérinquëma'. Ina nonanatoma', canpitanta' nanan anoyatoco'. ¹⁴ Noya ninosoroco'. Ina na'con na'con Yosë nohuantérin. Noya ninosorohuatëhua', noya noya nisarëhua'. Inapohuatëhua', têhuëñchachin nöya cancantarihua'. ¹⁵ Quisocristoíchin asanocancaninpoa'. Ina yonquihuatëhua', noya ninicatëhua', ya'huarëhua'. Ina marë' a'na huënton pochin Yosë acorinpoa'. Ina catahuahuachinpoa', co huachi pa'yanarihuahuë'. Napoaton inasáchin yonquico' asanocancainiquëma'. Nani tahuëri: "Yosparinquën Siniro," itoco'.

¹⁶ Ya'ipi Quisocristo nanamën yonquiráco'. Na'con ina yonquico'. Noya nitotatoma', nia'chintoco', nipënëncö'. Yosë cantanën nisha nisha nininsopita cantaco'. Sarmo quirica nontatoma', inanta' cantaco'. Canpitaora yonquinëma quëraonta' ocoirahuatoma', cantaco': "Ma noyanquëncha Tata ni'ton, catahuarancoi paya," itatoma', cancanëma quëran huarë' cantaco'. ¹⁷ Ma'sona téranta' yanipatama', Siniro Quisoso yonquiatoma', nico'. Ina yonquiatoma', noya nonco'. Quisoso catahuarinquëma' ni'ton, "Yosparinquën," Tata Yosë itoco'.

Sa'ahuano'sa', so'yahuano'sa', inapita pënëninso'

¹⁸ Canpitaso' imoyaro'sa', so'yama' natëco'. Siniro Quisocristo imarama' ni'ton, natëcaso' ya'huërin. ¹⁹ Canpitanta' iyaro'sa', sa'ama' nosoroco'. Ama no'huiicosohue'. Sanoanan quëran nontoco'. ²⁰ Hua'huaro'santa' pa'pina' natëina'. A'shinanta' natëina'. Ya'ipi pënënpiso' natëina'. Inapohuachina, Sinirorori noya ni'sarin. ²¹ Canpitanta' iyaro'sa', hui'nama' sanoanan quëran pënëncö'. Apira apira no'huihuatama', co huachi nohuantapihuë' natëcaiso'. "Natëpirahuë', no'huiárinco," ta'tona', co huachi natërapihuë'.

²² Patron marë' sacatohuatama', noya natëco'. Ama nonpintocosohue'. Co ni'pirinquëmaonta', noya sacatoco'. Co patronachin yonquicaso' ya'huërinhuë'. Siniroronta' ni'sarinquëma'. Ina yonquiatoma', ya'ipi cancanëma quëran natëco'. ²³ Ma'sona téranta' nipatama', noya nico'. Co piyapi maréáchin sacatéraramahuë'. Yosë imarama' ni'ton, ina marë' sacataramaso pochin cancantatoma', nöya sacatoco'. ²⁴ Inaso' no'tëquën acanaarinpoa'. Inápaquë noya noya acoarinpoa'. Quisocristo têhuëñchinsö' hua'anëntérinpoa'. Napoaton noya natëco'. ²⁵ Yosëso' ya'ipinpoa' napopináchin ni'ninpoa'. Noya nipatëhua', acanaarinpoa'. Co'so' noya nipatëhuahuë', ana'intarinpoa'.

4

¹ A'naquëma' patronquëma' ninamaso'. Piyapinëmapita nosoroatoma', no'tëquën pahuërëco'. Ama topinan quëran ana'intocosohue'. Canpitanta' hua'anëma' ya'huëterinquëma'. Yosë inápaquë ya'huaponahuë', ya'ipinpoa' hua'anëntérinpoa'.

Piquëran huarë' pënëntérinso'

² Nani tahuëri Yosë nontoco'. Ama amiatomahuë', nontáco'. Ama topinan nontocosohuë'. Ya'ipi cancanëma quëran huarë' noya yonquiatoma', nontoco'. "Yosparinquën Sinioro," itoco'. ³ Quiya marënta' Yosë nontoco'. Pa'sápato, Quisocristo nanamën a'chinpirahuë'. Ina marë' tashinan pëiquë po'morinaco. Na'a piyapi'sa' co nanamën nitochátërapihuë'. Inahuanta' nitochina'. Napoaton Yosë nontohuatama', quiya marënta' nontoco' catahuaincoi a'chintohuatoira, Yosë nanamën nohuanchina'. ⁴ Yosë nontoco' noya a'chinchi no'téquën nitotacaiso marë'. Ina pochin a'china'huaso' ya'huërin.

⁵ Co imarinsopitasohuë' huë'pachina', noya nontoco'. Ama tapanatomahuë', noya a'chintoco'. Onpopionta' noya nanan sha'huitoco'. ⁶ Noya yonquiatoma', sanoanan quëran pënëntoco' noya natainënquëma'. Yashin yashin nontoco'. A'naya a'naya natan-pachinquëma', noyasha a'panico'. Ina pochin nontacaso marë' na'con yonquico'.

Nipayarinsopita napopiso'

⁷ Iya Tiquico a'pataranquëma'. Inaso' nóya ni'nuahuë. Iyahuë pochachin nosororahuë. Noya catahuarinco. Inanta' Sinioro natëton, noya nanan a'chinarin. Onpopinsona ya'huëruhuëso' sha'huitarinquëma'. ⁸ Canpitanta' onporaisonona nitotacamaso marë' a'pataranquëma'. Achinicancainquëmaso marënta' a'pataranquëma'. ⁹ Iya Onisimonta' pa'sarin, canpitataquë ya'huërinso'. Inanta' iyahuë pochin nosororahuë. Yosë natëton, noya imarin. Inapita canconpachina', ya'ipi isëquë ya'huëraisopita ma'sona onporaiso' sha'huitarinënquëma'.

¹⁰ Aristarconta' isëquë ya'huërin. Quisocristo imarinso marë' tashinan pëiquë po'mopi anta'. Inanta' yonquiarinquëma', saludos a'patarinquëma'. Marconta' saludos a'patarinquëma'. Inaso' Pirnapi quëmopinën. Canpitataquë pa'pachin, noya non-tatoma', catahuaco' ténahuë. Nani ina sha'huitéränquëma'. ¹¹ Quisoso Costo itopisonta' yonquiaténquëma', saludos a'patarinquëma'. Inapitaso' cotio piyapi'sa' niponarai-huë', Quisocristo imasapi. Ca pochin a'chinapi a'napitanta' Yosë hua'anëntérinquë ya'conacaiso marë'. Ina marë' nóya cancantérahuë. Inapitaso' achinicancaninaco. A'napita cotioro'saso niperinhuë' co catahuarinacohuë'. ¹² Ipapérasënta' canpitataquë ya'huërinso' saludos a'patarinquëma'. Inanta' Quisocristo natëton, noya nanan a'chinarin. Nani tahuëri canpita marë' Yosë nontárin. "Catahuaquë' Sinioro ya'ipi nohuantéranso' nitochina'. Noya nitotatona' imamiachinën," itárin. ¹³ Na'con yonquirinquëma'. Co chirorinhuë' Yosë nontacaso'. Naotisiaquë, Iraporisëquë inaquëpita ya'huëpisopitanta' yonquiaton, Yosë nontárin. Noya Yosë marë' sacatarin. Cari ni'nuahuë. ¹⁴ Nocasënta' saludos a'patarinquëma'. Inaso' notoro. Inanta' iyahuë pochin nosororahuë. Timasënta' inapochachin yonquirinquëma'.

¹⁵ Imapisopita Naotisiaquë ya'huëpisopitanta' saludos a'patarahuë. Ninpanta' yonquirahuë. Ina pëinënquë Quisocristo imapisopita niyontonpi. Inapitanta' saludos a'patarahuë. ¹⁶ Iso quirica nontoco' ya'ipi imapisopita nataina'. Nani nontohuatama', Naotisiaquë a'patoco' imapisopita nonchina'. Inapitanta' nisha ninshitato, a'patérahuë. Ina quiricanta' canpitari nontoco'. ¹⁷ Arquipo sha'huitoco': "Ama chirotonhuë', ya'ipi Sinioro camairinquënsó' natëquë'," itoco'.

¹⁸ Ca Paonoco na'con yonquiaténquëma', saludos a'pataranquëma'. Caora imirahuë quëran isoíchin ninshitaranquëma'. Tashinan pëiquë ya'huarahuë. Ama naniantocosohuë'. Yosë inaora nohuanton, noya catahuainquëma'. Nani ninshitéränquëma huachi.

Paono

Paonori Tisaronicaquë ya'huëpisopita ninshitërinso'

Imapisopita yonquiaton, nanan a'patërinso'

¹ Ca Paonoco ninshitaranquëma', ni'co'. Noyanquëma' canpitanta'. Noya quiyanta' ya'huarai. Ya'ipi Yosë imaramasopita Tisaronicaquë ya'huëramaso' ninshitaranquëma'. Siripano, Timotio, inapitanta' isëquë ya'huapi. Inapitaro'coi nanan a'patarainquëma'. Canpitanta' Tata Yosë chinotatoma', Sinioro Quisocristo imarama'. Inaora nohuan-ton, Yosë noya catahuainquëma'. Asanocancainquëma'. Quisocristonta' inapochachin catahuainquëma', tënahuë.

Cancanëna quëran huarë' imapiso'

²⁻³ Nani tahuëri campita marë' Yosë nontërai. Tata Yosë natëtoma', noya ninama'. Ninosoroatoma', na'con nicatahuarama'. "Sinioro Quisocristo co onporonta' naniantarinpoahuë'. Inasáchin ninaréhua!', "ta'toma', chiníquën cancantërama'. Napoaton yonquiatëinquëma', Tata Yosë nontërai: "Ma noya Tata catahuaran ni'ton, cancanëna quëran huarë' imasarinenquëen. Ina marë' 'Yosparinquëen,' itërainquëen," itërai Yosë nontatoi.

⁴ Tata Yosë na'con nosororinquëma', iyaro'sa'. Nani huayoninquëma' huëntonënquë ya'conacaso marë'. Nani ina nitotërai. ⁵ Quisocristo nanamën a'chintohuatëinquëmara, co topinan quëran a'chintërainquëmahuë'. Ispirito Santo chachin catahuarincoi a'china'huaiso'. Canpitanta' catahuarinquëma' noya natanacamaso marë'. "No'tëquëen nontërinpoa", "ta'toma', ya'ipi cancanëma quëran natërama'. Ina nicatoi: "Tëhuëñchachin Yosëri huëntonënquë aya'conin," tënai. Canpitataquë ya'huapoi, noya imarai canpitanta' noya imacamaso marë'.

⁶ Ina marë' aparisitopirinacoihuë', noya cancantërai. Canpitanta' Yosë nanamën noya natanama'. Imaramaso marë' aparisitopirinënquëmahuë', Ispirito Santo catahuarinquëma' ni'ton, nöya cancantërama'. Quiya pochin cancantatoma', chiníquën cancantërama'. Nonanpatamacoi, Quisocristo chachin nonanarama'. ⁷ Parisitapomarahuë', co a'poramahuë'. Nöya imarama' ni'ton, a'napita imapisopitanta' natantopi. "¡Ma noyacha inapitaso' imapi paya! Ina pochin Quisocristo imacaso' ya'huërin," topi. Ya'ipi Masitonía parti, Acaya parti, inaquëpita napopi. ⁸ Noya imarama' ni'ton, ya'ipi inaquë ya'huëpisopita nicateñenquëma', yonquipi. Naporahuaton, ya'ipi ina parti nahuinin. Co quiyari sha'huitopiraihuë', ya'ipiya nitotopi. ⁹ Inapita chachin campita naporamaso' sha'huiantapi: "Paono ni'quihiuchinchincoira, noya a'chintërincoi. Noya natanatoi, a'naroáchin natërai. Mamansi a'porahuatoi, Tata Yoséichin chinotërai. Ina imarai huachi. Yosëso' nanopirárin. Inasáchin chinotacaso' ya'huërin. ¹⁰ Ina chinotatoi, hui'nin chachin ninarai. Canpoa marë' Quisocristo chiminin. Ina quëran Yosëri ananpitaantarín. A'na tahuëri inápa quëran o'mantahuachin, nicha'ësarinfoa'. Co imapisopitasohuë' nimirihuë', Tata Yosëri no'huiton ana'intarin huachi, tënama', "topi, natantërai.

2

Paonori noya a'chintërinso'

¹ Canpitataquë ya'huapoi iyaro'sa', co topinan quëran a'chintërainquëmahuë', nitotërama'. ² Piriposëquë a'chinapiraihuë', no'huitonaco, chiníquën aparisitérinaco. Inapotopirinacoihuë', canpitataquë canconpatëira, co të'huaraihuë'. "Yosë catahuarincoi," ta'toi, Quisocristo nanamën a'chintërainquëma'. A'napita no'huipirinacoihuë', chiníquën cancantatoi, pënënainquëma'. ³ Co nonpin nanan a'chintërainquëmahuë'. Co nisha nisha nicacaso marë' a'chintërainquëmahuë'. Co pi'pian têranta' nonpintërainquëmahuë'. ⁴ Yosë chachin acorincoi nanamën a'china'huaiso marë'. "No'tëquëen a'chinapona",

ta'ton, a'parincoi. Napoaton co piyapi'sa' noya nicainacoiso marë' a'chinaihuë'. Yosë noya nicaincoiso marë' a'chinárai. Ya'ipi yonquiréhuasopita nitotérin. Ma'marësona sacatéréhuasonta' nitotérin. ⁵ Co noyasha nonatoi, yanopintérainquëmahuë'. Co canaca'huaiso marë' napotérainquëmahuë'. Yosë ni'sárincoi, no'tequén nontérainquëma'. ⁶ Co piyapi'sa' noya nicainacoiso' yonquiatoi a'chinaihuë'. ⁷ Quisocristo a'parincoi ni'ton, chiníquén nanan quëtérincoi. Napoaponahuë', co chiníquén nontérainquëmahuë'. Co inso térranta' hua'an pochin camairaihuë' natëinacoiso marë'. Sanoanan quëran nontérainquëma'. Sanapi hua'huinpita nosoroaton, noya nocamarinso pochin quiyarimanta' ni'nainquëma'. ⁸ Na'con nosoroatéinquëma', Yosë nanamën a'chintérainquëma'. Ina marë' parisitopiraihuë', co ina yonquiraihuë'. Ya'ipi cancanéhuëi quëran nosorainquëma' ni'ton, na'con catahuuarainquëma'. ⁹ Canpitataquë ya'huasocoi, chiníquén sacatatoi, a'chintérainquëma'. Tahuérirë chachin tashirë chachin sacatérailama topinan ma'sha ma'paca'huainquëmaso marëhuë'. Quiyaora sacatonéhuëi quëran coshatérailama. Naporahuatoi, Yosë nanamën a'chintérainquëma'. Co ina nariantéraramahuë', ténahuë.

¹⁰ No'tequén Yosë natëtoi, noyasáchin ninai. Co manta' onpotérainquëmahuë'. Ya'ipi imaramasopita ni'namaco. Yosënta' ni'nincoi. ¹¹ Ya'ipiniquëma' pënénainquëma', nitotérarama'. A'naya a'nayanquëma' nontérainquëma' noya imacamaso marë'. Quëmapi hui'ninpita a'chintérinso pochin a'chintérainquëma'. ¹² Achinicancanainquëma'. "Yosë imarama' ni'ton, noyasáchin nico' Yosë noya ni'inquëma'", itérainquëma'. Ina acorinquëma' hua'anéntérinquë ya'conacamaso'. A'na tahuéri ya'huérin'pa' quëpantahuachinquëma', noya noya ya'huëcontarama'.

¹³ Yosë nanamën a'chintohuatéinquëmara, noya natanama'. "Co piyapi yonquirinso' a'chintérinfoahuë'. Yosë nanamën chachin a'chintérinfoa!", ténama'. Téhuéñchachin Yosë nanamën ni'ton, ina natéhuatama', nanamën quëran anoyacancantarainquëma'. Ina marë' nani tahuéri "Yosparinquëen," itérail Yosë. ¹⁴ Iráca Cotia parti na'a piyapi'sa' Quisocristo imatona', natépi. A'napita cotioro'sariso nípirinhuë', no'huitona' chiníquén aparisisitopi. Iporaso' iyaro'sa' canpitanta' parisitérama'. Ya'huéhuano'sa' inapochachin aparisitarinéinquëma'. ¹⁵ Iráca cotioro'sari pënéntona'piro'sa' no'huitona', tēpapi. Ina quëran Siniro Quisocristo chachin o'mahuachina, inanta' tēpaantapi. Quiyanta' aparisisitatonacoi, a'parinacoi. Napopiso marë' Yoséri co noyahue' ni'nin. Téhuéñchachin co ya'ipi piyapi'sa' nosoropihuë'. ¹⁶ Nisha piyapi'sa' cha'ëcaiso marë' yaa'chintopiraihuë', cotioro'saso' co nohuantopihuë'. "Ama a'chintocosohuë!", ta'tona', no'huirinacoi. Ina marë' aquë aquëtë' oshahuanpi. Napoaton Yoséri chiníquén no'huirin. No'tequén ana'intarin huachi.

Paonori nicapon yapaantarinso'

¹⁷ Hua'quimiáchin iyaro'sa' co ni'pirainquëmahuë', co nariantérainquëmahuë'. Yonquiatéinquëma', na'con nohuantérail nica'huainquëmaso'. ¹⁸ Canpitataquë yapa'piraihuë', ipora huanta' co nanitérailhuë'. Ca Paonoco cararo' yapa'piraihuë', Satanásë ya'copirinco ni'ton, co nanitérahuë' paca'huaso'. ¹⁹ Na'con yonquiatéinquëma', noya cancantérail. ¿Ma'marë chachinta' ina pochin cancantérail? Imarama' ni'ton, Yosë ya'huérin'pa' canpitanta' pa'sarama', ténai. A'na tahuéri Siniro Quisocristo o'mantararin. Naporo': "Quiyari a'chintérail ni'ton, imapi," ta'toi, noya cancantarái. ²⁰ Téhuéñchachin noya imarama': "¡Ma noyacha Yosë catahuuarainquëma paya!" ta'toi, capa cancantérail.

3

¹ Hua'qui' co ni'nainquëmahuë'. Co nanan térranta' natantérailhuë'. Napoaton co huachi ahuantatoihuë', "Quiyaora Atinasëquë quëparichii," ta'toi, ² Timotio a'patérainquëma' nitotacaso marë'. Inanta' noya imarin. Yoséri acorin Quisocristo nanamën a'chinacaso

marë'. Achinicancainquëmaso marë' a'patérainquëma'. ³ Canpitanta' parisitapi-ramahuë', co nohuantérainhuë' nisha nisha yonquicamaso'. Co ina marë' a'pocaso' ya'huérinhue'. Quisocristo imapatéhuara, aparisitérinënpoa'. Yosë nohuanton, ina marë' parisitarëhu', nani nitotërama'. ⁴ Canpitataquë ya'huasoco, sha'huitérainquëma'. "Imarëhuaso marë' aparisitarinënpoa", itérainquëma'. Napotérainquëmaso pochachin iporaso' aparisitarinënpue'. ⁵ Napoaton caso' co huachi ahuantatohuë', Timotio a'patéränquëma' onpopinsona imaramaso' nitota'huaso marë'. Sopai yanopintérinpoa' Yosë a'pocaso marë'. Minsérinquëma' naporini, topinan quëran a'chinchiténquëmahuë'. "Co huachi noya imamaraihuë", ta'toi, Timotio a'patérainquëma'.

⁶ Iporaso' nani huënantaton, nanan sha'huitiirincoi. "Ipora huanta' noya imasapi. Inahua capini noya ninosoroapi," itiirincoi. Na'con yonquiramaco. Quiya pochin cancantatoma', canpitanta' yani'namaco. ⁷ Inanta' sha'huitiirincoi. Ina natantatoi, noya cancantërai. Ipora huanta' ma'sha onpotérinaco. Parisitapiraihuë', noya imarama' ni'ton, noya cancantarai. ⁸ Quisocristo imamiatarama' ni'ton, co huachi sëtérainhuë'. Chiníquën cancantarai. ⁹ Capa cancantërai ni'ton, ¿onporahuatëicha noya noya: "Yospar-inquën Tata Yosë," ichii? ¡Co'chi nanitëraihuë paya! ¹⁰ Nani tahuëri tashirë chachin Yosë nontarai canpitataquë pac'a'huaiso marë'. Co ya'ipi Yosë nanamën nitochâtéraramahuë'. Pahuantarinquëma' ni'ton, ina a'chinchinquëma' noya noya imacamaso marë', ténahuë.

¹¹ Tata Yosë chachin catahuaincoi onpopionta' pa'ii. Siniro Quisosonta' catahuahuachincoi, pa'sarai nicapoinquëma'. ¹² Na'con nosororainquëma'. Inapochachin campita capininta' ninosorocamaso' ya'huérin. "Catahuaquë' Siniro noya noya ninosoro'ina'. Ya'ipi piyapi'sa' nosoro'ina", itérahuë, Yosë nontato. ¹³ Noya ninosorohuatama', Quisocristo achinicancanarinquëma' noyasáchin nicacamaso marë'. Catahuahuachinquëma', noyápiachin cancantarama'. Ina quëran Quisocristo o'mantahuachin, Yosë noya ni'sarinquëma'. A'na tahuëri ya'ipi piyapinënpitarë chachin o'mantararin.

4

Yosëri noya ni'ninsopita

¹ Iporaso' iyaro'sa' Siniro Quisoso nanan quëtérincoi ni'ton, pënëntarainquëma'. Iráca pënënainquëma' noya nicacamaso marë'. "Noya nipatama', Yosë noya ni'sarinquëma", itérainquëma', natëramaco. Iporaso' aquë aquëtë' natëtatomá', noyasáchin nico', ténahuë.

² Siniro Quisoso a'chintérincoiso chachin sha'huitérainquëma', natanama'. ³ Yosë no-huantérin noyasáchin nicacaso'. Ama pi'pian téranta' monshihuancosohuë'. ⁴ Sanapi no-huantohuatama', ama monshitocosohuë'. Nitatoma', noya sa'aco'. Yosë yonquiatoma', noya ichiya'huëco'. Nani sa'apatama', inasáchin yonquicaso' ya'huérin. ⁵ A'naquën co Yosë nohuitatonahuë', ichihuë'ëcaisoachin yonquiatona', a'naroáchin mapi. Ama inapita pochin cancantocosohuë'. Téhuëñchachin nosoroatoma', maco'. ⁶ A'na quëmapi sa'in ama së'huacosohuë'. Ama ina pochin ni'toma', so'in nonpintocosohuë'. Së'huahuatama', Yosë no'tequën ana'intarinquëma'. Iráca inachachin chiníquën pënënainquëma'. ⁷ Co Yosë nohuantérinhuë' oshahuanacaso'. Acorinpoa' noyasáchin nicacaso marë'. ⁸ Co quiyaora yonquinéhuëi quëran pënënainquëmahuë'. Co natëhuatamahuë', Yosë chachin co natëaramahuë'. Ina nohuanton, Ispirito Santo ya'coancantérinpoa' noya nicacaso marë'. Inaso' noyasáchin ninin.

⁹ Imaramasopita capini noya ninosoroco'. Nani nitotërama' ni'ton, co aquëtë' sha'huita'huanquëmaso' ya'huérinhue'. Yosë chachin cancanëmaquë anitotérinquëma' ninosorocamaso'. ¹⁰ Nani huachi imapisopita nosoroarama'. Ya'ipi Masitonía parti ya'huëpisopita aquë ya'huëpirinahuë', Quisocristo imapachinara, nosororama'. Iporaso', iyaro'sa', na'con na'con ninosoroco', ténai. ¹¹ Nani tahuëri yonquico' sano piyapi nicacamaso marë'. Ama topinan ya'huëcosohuë'. Ya'ipinquëma' noya sacatoco' ama

pahuanchinquémasohuë'. Iráca inachachin pënénainquéma'. ¹² Inapohuatama', noya ya'huarama'. Co imapisopitahuënta' noya ni'sarinénquéma'. Napohuatama', co manta' pahuantarinquémahue'. Co topinan ma'patacaso' ya'huéaponhuë'.

Chiminpisopita nanpiantarino'

¹³ Chiminpisopita ma'sona onpocaiso' a'chinchinquéma', nitotoco'. Quisoso imaréhuasopita chiminpatéhua', nanpiantarihuá'. Co imapisopitasohuë' nimirinhue', quémopinénpita chiminpachinara, sétapi. "Co onporonta' quénantarihuahuë", ta'tona' sétápi. Ama inapita pochin sétacaso maréhuë' canpitaso' a'chinchinquéma'. ¹⁴ Quisososo' chiminapónahuë', nanpiantarino' nitotéréhua'. Inapochachin imapisopita chiminpachina', Yoséri ananpitaantarin. Quisoso isoro'paquë o'mantahuachin, ananpitaantarin.

¹⁵ O'mantahuachin, co nanpiréhuasopitaráchin pantarihuahuë'. Chiminpisopita'ton nanpiantarapi. Siniro Quisoso sha'huitérinfoaso chachin sha'huichinquéma'. ¹⁶ Chiníquén nanantaton, o'mantararin. Anquén hua'aonta' chiníquén sha'huirarin. Yosé nohuanton, tronpita pihuirarin. Naporó' Quisocristo imatona' chiminpisopita'ton nanpiantarapi. ¹⁷ Ina quérán a'naroáchin nanpiréhuasopitaré'quénpoa' chitoro' ya'huérinqué quépantarinfoa'. Inaque Siniro nacapiarihuá'. Inaré'quénpoa' ya'huémiatarihuá'. ¹⁸ Inapita yonquiatoma', nisha'huitoco' noya cancantacaso maré'. Ama sétacaso maréhuë' ina pochin niachinicancanco'.

5

¹ Onporosona o'mantacaso' tahuëri nanicaso', co ina iyaro'sa' a'chintaranquémahue'. ² Iráca sha'huitérinfoaso' nani nitotérama'. Co nitotasoihuë', o'mantararin. Ni'co' iyaro'sa'. Yono tashi' co nitotaséhuahuë', ihuatona'pi pëinénpoaquë ya'conin. Inapochachin a'nanaya Quisocristo o'mantararin. ³ Co imapisopitasohuë' o'mantacaso' tahuëri co yonquipihuë'. "Noya ya'huaréhua', co manta' onpoarihuahuë", topirinahuë'. A'nanaya chiníquén ana'intacaso' naniarin, co cha'ésapihuë'. Sanapi yahuaihuachina, onporosona iquitacaso' co nitotérinhuë'. A'nanaya iquitérin. Inapochachin a'nanaya Yoséri ana'intarin. ⁴ Canpitaso nimirinhue', co tashi pochin cancantéramahuë'. O'mantacaso' tahuëri nanihuachin, co pa'yanaramahuë'. Ihuatona'pi a'nanaya huë'pachina, apa'yaninfo'. Inapochachin Quisocristoso' a'nanaya o'mahuachin, na'a piyapi'sa' pa'yanapona'. Canpitaso nimirinhue' ina tahuëri ninaarama'. Nanihuachin, co pa'yanaramahuë'. ⁵ Quisocristo imarama' ni'ton, tahuëri pochin cancantatoma', nitotarama'. Ya'ipinpoa' imaréhuasopita co tashi pochin cancantéréhuahuë'. ⁶ Napoaton o'mantacaso' tahuëri yonquiatéhua', noya ninahua'. A'naquénso' hué'érëso pochin cancantatona', co ina tahuëri yonquipihuë'. Canpoaso nimirinhue' no'téquén yonquiatéhua', sano cancantahua'. ⁷ Yahuë'epachinara, tashi' hué'épi. Yano'pihuachinaranta', tashi' no'pipi. ⁸ Canpoaso nimirinhue' tahuëri pochin cancantacaso' ya'huérin. Napoaton noya yonquiatéhua', Yosé imamiatahua'. Ni'co' iyaro'sa'. Inimicoro'sa' hué'pachinara, sontaro'sa' co topinan pa'pihuë'. Coton hua'na quérán nininsa' a'mopi. Casconta' hua'na quérán nininsa' yancopi ama inimicori ohuanacaso maréhuë'. Noya nita-pahuachinara, co inimicori minsérinhuë'. Hua'na a'mopiso pochin canpoanta' Yosé natéahua' catahuainpoa'. Ina natétehua', noya ninosoroa'ahua'. "Yosé a'paialinfoa'. O'mahuachin, noyá nicha'ésarinpoa'", ta'téhua' noya ninahua'. ⁹ Co ana'intinfoaso maré' Yosé acorinfoahuë'. Siniro Quisocristo imaréhua' ni'ton, nicha'ésarinpoa'. Ina nohuanton cha'ésaréhua'. ¹⁰ Canpoa maré' inaso' chiminin. A'naquénpoa' nanpiaréhua', a'naquénpoa' chiminarihuarahuë', o'mantahuachin, ya'ipi imaréhuasopita quépantarinfoa'. Inaré'quénpoa' ya'huémiatarihuá'. ¹¹ Napoaton nani tahuëri nicatahuaco'

chiníquën cancantacamaso marë'. O'mantacaso' tahuëri yonquiatoma', na'con ninontoco' noya noya imacamaso marë'. Nani noya nicatahuarama'. Aquëtë chachin niachinicancanco'.

Piquëran huarë' pënëninsö'

¹² Ansiano'sa' iyaro'sa' noya ni'co', tēnahuë. Sinioro nohuanton, ansiano ya'conpi pënënainquëmaso marë'. Co chirotonahue', a'chintarinënquëma'. Pëshonpatama', otérarinënquëma' ni'ton, noya ni'co'. ¹³ Na'con catahuarinënquëma' noya noya Yosë imacamaso marë'. Napoaton nosoroatoma', noya yonquirapico'. Ya'ipinquëma' noya nini'toma', ya'huëco'.

¹⁴ Canpita capini iyaro'sa' nipënënco'. A'naquën co yasacatopihuë'. Inapita pënënco' ama chiroinasohue'. A'naquën ma'sha onpoahuachinara, Yosë yanariantopi. Inapitanta' noya nontoco' chiníquën cancanchina'. A'naquëonta' cancanëna quëran co chinipihuë'. Catahuaco' ama Yosë nanianchinasohue'. Inapohuatama', ama insonta' no'huicosohue'. Sanoanan quëran pënënco'.

¹⁵ A'napita ma'sha onpotohuachinënquëma', ama yai'huërëtocosohue'. Nani tahuëri noya nontoco'. No'huipirinënquëmaonta', nosoroatoma', catahuaco'. Canpita capini ninosoroatoma', a'napita piyapi'santa' catahuaco'.

¹⁶ Ama sëtocosohue'. Yosë yonquiatoma', nani tahuëri noya cancantoco'. ¹⁷ Apira apira Yosë nontoco'. Ama a'na tahuëri téranta' pahuancosohue'. ¹⁸ Ma'sha onpotopirinënquëmahue', ama sëtocosohue'. Nani tahuëri "Yosparinquë Sinioro," itoco'. Ma'sha onpoapomarahuënta', noya cancantoco'. "Inanta' Sinioro noya," itoco'. Quisocristo imarëhua' ni'ton, ina pochin cancantacaso' Yosë nohuantérin.

¹⁹ Ispirito Santo ya'coancantérinquëma'. Cancanëmaquë nontohuachinquëma', a'naroáchin natëco'. Ni'co'. Pën noya orotohuachina, noya napëntérë'. Inapochachin Ispirito Santo yacatahuarinpoa' noya cancantacaso marë'. Ama pën atacopitérëso pochin nitocosohue'. ²⁰ "Yosë anitötérincoso sha'huichinquëma," itohuachinënquëma', noya natanco'. ²¹ Napoaponahue', ni'cona nonpintochinënquëma'. A'naquën "No'tequën a'chintaranquëma'," itohuachinënquëma', ama a'naroáchin natëtocosohue'. Ya'ipi napopiso' Yosë quiricanën quëran tantiaco'. "Inaora yonquinën quëran a'chinamara," ta'toma', tantiaco'. Yosë nanamënsáchin natëcaso' ya'huërin. ²² Ya'ipi aoshahaninquëmasopita a'poco'.

²³ Yoséíchin asanocancaninpoa'. Canpita marë' ina nontarahuë noyasha anoyacancanchinquëma'. "Catahuaquë' Sinioro, ya'ipi cancanëna quëran noyápiachin yonqui'ina'. Naporahuaton, ya'ipi yonquinëna quëran noya nininsopitaráchin nohuanchina'. Quëma nohuanton, ya'ipi nonëna quëran huarë noyasáchin niina'," itérahuë. Ina quëran Sinioro Quisocristo o'mantahuachin, nónya ni'sarinquëma'. ²⁴ Yosë nani nontérinpoa' imacaso marë'. Huëntonënquë chachin aya'coninpoa'. No'tequën sha'huitérinpoa'. Co onporonta' nonpintarinpoahuë' ni'ton, noya catahuarinpoa'.

²⁵ Quiya marënta' iyaro'sa' Yosë nontoco'.

²⁶ Imaramasopita capini noya ninosoroatoma', nisë'quëco'.

²⁷ Niyontonpatama', iso quirica nontoco' imapisopita nataina'. Sinioro nanan quëtérinco ni'ton, nontoco' ya'ipiya nataina', tēnahuë.

²⁸ Inaora nohuanton, Sinioro Quisocristo nosoroatënquëma', catahuainquëma'. Nani ninshitérinquëma huachi.

Paono

Paonori Tisaronicaquë ya'huëpisopita ninshitaantarindo'

Imapisopita yonquiaton, nanan a'pataantarindo'

¹ Ca Paonoco ninshitaranquëma', ni'co'. Noyanquëma' canpitanta'. Noya quiyanta' ya'huarai. Ya'ipi Yosë imaramasopita Tisaronicaquë ya'huëramaso' ninshitaantaranquëma'. Siripano, Timotio, inapitanta' isëquë ya'huapi. Inapitaro'coi nanan a'patarainquëma'. Tata Yosë natëtoma', Sinioro Quisocristo imarama'. Huëntonënquë chachin aya'coninpoa' ni'ton, "Tata" itérrehua'. ² Inaora nohuanton, catahuainquëma'. Asanocancainquëma'. Sinioro Quisocristonta' inapochachin catahuainquëma', ténahuë.

Oshahuano'sa' ana'intarinso'

³ Iporaso' iyaros'a' noya noya imasarama'. Cancanëma quëran huarë' ina natërama'. Na'con na'con ninosororama' ni'ton, nani tahuëri "Yosparinquën," itérhai Yosë. Ina na'con catahuarinquëma' ni'ton, ina pochin nontacaso' ya'huérin. Ina Yosë nohuantérin. ⁴ Ya'ipi parti Yosë imapisopita sha'huitérhai. "Tisaronicaquë ya'huëpisopita noya imasapi. Imapo marë' na'con aparisitopirinahuë': 'Yosë co nariantarinpoahuë', ta'tona', ahuantapi. Co yaa'popihuë'. Ma'sha onpoaponaraihuënta', chiniquën cancantapi," itérhai. Noya natërama' ni'ton, noya cancantérhai. ⁵ Imaramaso marë' parisitapo-marahuë', noya ahuantérama' ni'ton: "Téhuëñchachin Yosë catahuarinquëma'", ténai. Inaso' no'tequën yonquirin. Yosë nohuanton, ipora parisitarama' noya noya cancantacaso marë'. Ina quëran noya ni'sarinquëma'. A'na tahuëri hua'anëntérinquë quëpantarinquëma'.

⁶ Iporaso' a'napita no'huirinënquëma'. Aparisitapirinënquëmahuë', a'na tahuëri Yosëri no'tequën ana'intarin. Co nariantarinhuë'. "Oshahuano'sa' ana'intacaso' ya'huérin," ténin. ⁷ Quisocristo o'mantahuachin, co huachi parisitaramahuë'. Noya ya'huarama'. Quiyanta' ipora aparisitapirinacoihuë', naporo' ya'ipi imarëhuasopita nöya cancantarihua'. Sinioro Quisocristo chachin inápa quëran o'mantararin. Pén huënaratérinso huáncana ya'noarin. Anquéniro'santa' chiniquën nanantatona', o'mantararin. Inapitaré chachin o'mantararin. ⁸ O'mantarahuaton, co Yosë nohuitopisopitahuë' ana'intarin. Co Sinioro Quisoso nanamën natëpihuë' ni'ton, chiniquën ana'intarin. ⁹ No'tequën ana'intaton, parisitopiquë a'pararin. Aquë a'pahuachin, chiniquën parisitomiatapi, co cha'ësapihuë'. Inatohua' paatona', co onporonta' Quisocristo nohuitapihuë'. Inaso' chini chiniquën nanantaton, noyasáchin niponahuë', inapitaso' co onporonta' nirayarapihuë'. ¹⁰ O'mantahuachin, imarëhuasopitaso' quënanarihua'. "Ma noyacha Quisocristoso paya. Anoyacancantérinpoa'. Inasáchin ya'ipiya chinochina', tosaréhua'. Ya'ipi imarëhuasopita napoaréhua'. A'chintohuatëiniquëmara, canpitanta' natërama' ni'ton, noya ni'sarama'.

¹¹ Napoaton nani tahuëri campita marë' Yosë nontérhai: "Quëma nohuanton Sinioro imarinënquën. Napoaton, catahuaquë' noyasáchin niina'. Noya noya yaimarinënquën ni'ton, catahuaquë' noyápiachin cancanchina'. Quiyaora co nanitérailhuë'. Quëmasáchin Sinioro ananitaparancoi. Catahuaquë' ya'ipi cancanëna quëran natëinënquën," itérahuë, Yosë nontato. Noya nipatama', Yosë noya ni'sarinquëma'. ¹² Ina quëran a'napitanta' nicatënënquëma': "Ma noyacha Sinioro Quisoso ni'ton, ina imatona', noya nisapi paya," tosapi. Canpitanta' ina nohuitérama' ni'ton, noya noya cancantarama'. Inaora nohuanton, Yosë nosoroatënquëma', catahuainquëma' ina pochin cancantacamaso marë'. Sinioro Quisocristonta' catahuainquëma'.

2

Yosë inimiconën ya'nocaso' ya'huérinso'

¹ Apira iyaro'sa' o'mantacaso' tahuëri pi'pian a'chinchinquëma'. Sinioro Quisocristo o'mantahuachin, nacapirahuatëhua', pantarihua'. ² A'naquënso nimirinhuë' co no'tequën nitotopihuë'. "O'mantacaso' tahuëri nani nanirin," itohuachinquëma', ama pa'yancosohuë'. Ama nisha nisha yonquicosohuë'. A'naquën tapon: "Cari ninorahuë. O'mantacaso' tahuëri nani nanirin," itohuachinquëma', ama natëcosohuë'. A'nanta' tapon: "Nanirin mini. Paono chachin naponinshiterincoi," itopirinënquëmahuë', ama ina natëcosohuë'. ³ Ni'cona nonpintochinënquëma'. Co'huara Quisocristo o'mayatérerasohuë', notohuar'o' piyapi'sa' Yosë a'poapi. Co pi'pian térranta' yanatérapihuë'. Napor'o' a'na quëmapi ya'huapon. Ya'ipi piyapi'sa' nonpintarin ama Yosë imacaiso marëhuë'. Pa'pi co noyahuë' nisarin. Sopairi noyá ya'coancantérin ni'ton, chiniquën ana'intacaso' ya'huérin. Ayaro' tahuëri Yoséri ana'intaton, parisitopiquë a'pararin. ⁴ Inaso' Yosë inimicotérin. "Ama Yosë chinotocosohuë". Ama manta' moshacosohuë'. Casáchin natëco. Yosë ya'huérétarahuë," tosarín. Yosë chinotopiso pëiquë chachin huënséapon piyapi'sari chinotacaiso marë'. Pa'pi co noyahuë' nisarin. Chiniquën nanantaton, ya'ipi piyapi'sa' yacamaiapon.

⁵ Canpitataquë ya'huapo, nani sha'huitéranchuëma'. ¿Ina nariantarama' ti? ⁶ Tahuëri nanihuachin, ina quëmapi huë'sarin. Yosë inimiconën inaso'. Yosë nohuanton, macarisona ya'copiarin ni'ton, co iporaso' huë'shatérarinhuë'. Ina nitotérarama'. ⁷ Co Yosë inimiconën ya'noyatéraponahuë', ipora chachin co incari térranta' nitotopirinahuë', nani sacatapi Yosë inimiconën hua'anéntacaso marë'. A'na tahuëriso nimirinhuë', Yosë nohuanton, ya'copirinso' capa nipachin, Yosë inimiconën ya'norarin. ⁸ Ya'nohuachin, piyapi'sa' aquë aquëtë' co noyahuë' cancantapi. Inari camaihuachin, notohuar'o' piyapi'sari natëapi. Ayaro' tahuëriso nimirinhuë', Sinioro Quisosori ana'intarin. Huënaráchin huënaráchin o'mantahuachin, minséarin. Topinan noncharapirinhuë', ata'huantarín. Co huachi nanitarinhuë' piyapi'sa' nonpintacaso'. ⁹ Nimirinhuë', co'huara ina o'mayatérerasohuë', notohuar'o' piyapi'sa' nonpintarin. Satanasëri catastuarin ni'ton, nani ma'sha nanitapaarín nicacaso'. Piyapi inaora co nanitérinhuë' ina pochin nicacaso'. Nonpintaton, nani ma'sha sacai' ninins'o' a'notohuachina, natérapi. Ni'pachina', pa'yanapi. ¹⁰ Co noyahuë' nicaton, na'a piyapi'sa' nonpintarin. Co no'ten nanan nohuantopihuë' ni'ton, Yosë inimiconën natëapi, parisitopiquë pa'sapi huachi. Yosë nanamën nohuantopí naporini, cha'ëitonahuë'. ¹¹ Napoaton, Yoséri tananpitarin nonpin nanan natëcaiso marë'. Sopai nohuanton, natëapi. ¹² Co no'tequën yonquiatonahuë', co noyahuë' nicacaiso' pa'yatapi. Ina pochin cancantopi ni'ton, Yoséri ana'intarin.

Yoséri huayonin nicha'ëcaso marë'

¹³ Canpitaso nimirinhuë' iyaro'sa', imarama'. Sinioro nosororinquëma'. Iráca quëran huarë' Yosë huayoninquëma' huëntonëquë ya'conacamaso marë'. No'ten nanan natëhuatama', Ispirito Santo anoyacancantérinquëma' Yosë nohuantérinso chachin nica-camaso marë'. Ina yonquiatoi, Yosë nontérai: "Ma noya Sinioro inapitaso' nicha'ëran ni'ton, 'Yosparinquën,' " itérai, Yosë nontatoi. ¹⁴ Yosë nanamën a'chintohuatëinquëmara, canpitanta' imarama'. Yosë acorinquëma' Sinioro Quisocristo pochin nicacamaso'. A'na tahuëri o'mantahuachin, ina pochin ya'noarama'.

¹⁵ Napoaton iyaro'sa', chiniquën cancantatoma', ya'ipi cancanëma quëran imaco'. Canpitataquë ya'huasoco, no'tequën a'chintérainquëma'. Ina quëran quirica a'patéranchuëma' na'con na'con nitotacamasso marë'. No'ten nanansáchin imamiatoco'. ¹⁶ Sinioro Quisocristo catastuarinquëma' chiniquën cancantacamaso marë'. Inaora nohuanton, Tata Yosënta' nosoroatonpoa', achinicancamiatérinpoa'. A'na tahuëri ya'huérinquë

chachin quëpantarinpoa'. Sha'huitérinpoo' ni'ton, ina ninarëhua'. ¹⁷ Ina yonquiatoi, canpita marë' Yosë nontarai. "Nani tahuëriya Sinioro catahuaquë', chiníquën cancanchina'. Achinicancanquë' noyasáchin niina'. Catahuaquë' noyásha noina'", itërai.

3

Yosë nontacaso' ya'huërinso'

¹ Iporaso' iyaro'sa', quiya marënta' Yosë nontoco' nanamën noya a'china'huaiso marë'. Ya'ipi parti nahuinacaso ya'huërin. Canpitaso' natanatomaco, noya imarama'. A'napitanta' a'chintohuatoi, noya nohuanchina'. Canpita pochachin noya imaina'. Ina marë' Yosë nontoco'. ² A'naquënsö niperinhue' co yaimapihuë'. Pa'pi co noyahue' cancantopi. No'huitonaco, yaahuërinaco ama a'china'huaiso marëhue'. Yosë nontoco' inapita quëran nicha'einco. ³ Tata Yosëso niperinhue' co onporonta' naniantérinpooahuë'. Achinicancaninpoo'. Sopai yaminsëpirinpoahuë', ina ni'sarinpoa'. Catahuarinpoa' sopai minsëcaso'. ⁴ Pénènpatéinquëmara, noya natëramaco. Co a'poatomahuë', imamiatarama'. Yosë catahuarinquëma' ni'ton, noya imasarama', tñahuë. ⁵ Yosë catahuainquëma' ina nosororinpoaso' na'con yonquicamaso marë'. Parisitopiramahuë', achinicancainquëma' Quisocristo pochin ahuantacamaso marë'.

Sacatacasonta' ya'huërinso'

⁶ Sinioro Quisocristo nanan quëtérinco ni'ton, no'tequënsi iyaro'sa' pénénainquëma'. A'naquëmaso' imapomarahuë', co sacatatomahuë', nisha nisha yonquirama'. Yosë nanamën no'tequënsi a'chintopirainquëmahuë', co natëramacoihuë'. Insosona inapo-huachin, ama inapitarë'quëma' nipayacosohuë'. ⁷ Nani nitotërama' noya nicacamaso'. "Nonancoi," itërainquëma'. Canpitataquë ya'huasoco, co quiyaso' topinan ya'huëraihuë'. Co chiroraihuë'. ⁸ Co a'na piyapi cosharonen topinan ma'paraihuë'. Nani tahuëri chiníquën sacatërai. Tashirë chachin sacatërai ama topinan ma'pata'huaiso marëhue'. ⁹ Hua'qui' a'chintérainquëma' ni'ton, noya topinan ma'patacaso niperinhue', co topinan ma'parainquëmahuë'. Sacatatoi, ma'sha pa'anai. Noya sacatërai nonanamacoiso marë'. ¹⁰ Canpitataquë ya'huasoco, pénénainquëma'. "Insosona co yasacatohuachin-hue', ama coshachinsohuë", itërainquëma'. ¹¹ Nanan nani natantërahuë. A'naquëma' co yasacatatomahuë', topinan pa'sárama'. Naporahuaton, ma'toma ma'toma nonatoma', piyapi'sa' chinotërama', natantërahuë. ¹² Sinioro Quisocristo nanan quëtérinco ni'ton, pénénaranquëma': Ama huachi iyaro'sa' ina pochin cancantocosohuë', tñahuë. Sano yonquiatoma', noya sacatoco' pahuantérinquëmaso' pa'anacaso marë'.

¹³ Na'aquëma' iyaro'sa' noya nisarama'. Ama amiatoma', nisha cancantocosohuë'. Nani tahuëri noya nico'. ¹⁴ Nani ninshitatoi, pénénainquëma'. Inso téranta' co yanatéhuachincoihuë', pénénco'. Co natetohuachinahuë', ama inapitarë'quëma' nipaya-cosohuë' oshanëna marë' tapaina'. ¹⁵ Napoaponahuë', ama inimico pochin nicatoma', no'huicosohuë'. Iyaparima pochin nicatoma', sanoanan quëran pénénco'.

Asanocancaninpooaso'

¹⁶ Sinioroíchin asanocancaninpoo'. Ina catahuainquëma' sano cancantacamaso marë'. Ma'sona onpopiramahuënta', nani tahuëri catahuainquëma' ama pa'yanacamaso marëhue'. Nani tahuëri noya a'painquëma'.

¹⁷ Ca Paonoco caora imirahuë quëran pi'pian ninshitaranquëma' saludos a'pata'huinquëmaso marë'. Nani quirica ninshitérahuëquë iso pochin ninshitérahuë. Ina nicatoma', nitotarama': "Paono mini ninshitérinpoo!", tosarama'. ¹⁸ Sinioro Quisocristo inaora nohuanton, nosoroatënquëma', ya'ipinquëma' catahuainquëma'. Nani ninshitérinquëma huachi.

Paonori Timotio ninshitërinso'

Timotio yonquiaton, nanan a'patërinso'

¹ Ca Paonoco ninshitaranquën, ni'quë'. ¿Noya, ya'huanan? Noya canta' ya'huarahuë. Yosë nohuanton, Quisocristo acorinco nanamën a'china'huaso marë'. Yosë chachin anoyacancantërinpoa'. Oshanënpoa' inquitatonpoa', nicha'ërinpoa'. Quisocristo imatëhua', ina ninarëhua'. A'na tahuëri inápaquë quëpantarinpoa'. ² Timotionquën ninshitaranquën. A'chintëranquën ni'ton, Quisocristo natëton, ina imaran. Napoaton hui'nuhüe pochachin ni'nanguen. Na'con nosororanquën. Tata Yosë inaora nohuanton, catahuainquën. Noya nosoroinquën. Nani tahuëri asanocancainquën. Quisocristonta' inapochachin catahuainquën. Inasáchin natérëhua'.

Nonpin nanan a'china'piro'sa'

³ I'huá Masitoniacuë yapa'patëra, sha'huitëranquën. "Ipisoquë ya'huëtaquë' pënëntamaso marë', itëranquën. Iporanta' inachachin sha'huitaranquën. Inaquéranchin ya'huaton, pënëntáquë'. A'naquën nisha nisha nanan a'chinapi. Inapita sha'huitëquë' ama ina pochin a'chi'inasohüe'. ⁴ Shimashonënpita iráca napopiso' yonquiápi. Inahuara yonquinëna quéraonta' nisha'huitopiso' yonquirápi. Ama huachi inapita yonquicaiso marëhuë' sha'huitëquë'. Ina pochin a'chinpachina', topinan quëran a'chinapi. Piyapi'sa' nisha nisha nonsapi. Co catahuapihuë' Yosë nohuitacaiso'. Yoséíchin natëhuatëhua', catahuarinpoa' noya noya imacaso marë'.

⁵ No'tén nanansáchin imapatëhua', catahuarinpoa' noya ninosorocaso'. Noyápiachin cancantohuatëhua', co nisha nisha yonquiarihuahüe'. Ina quëran cancanënpoa quëran huarë' natëarihua'. Ina pochin cancantohuatëhua', noya nosoroarihua'. Ina Yosëso' nohuantërin. ⁶ Nisha a'china'piro'saso niperinhuë', co ina pochin yonquipihuë'. Yosë nohuantërinso' nariantatona', topinan quëran nonsapi. ⁷ "Quiyaso' maistrocoi. Ya'ipi pënëntërinso' nitotërai," topirinahuë', co no'tequën nitotopihuë'. Chiníquën nonpirinahuë', co nitotopihuë'.

⁸ Moisës pënëntërinso' noya niperinhuë', ma'marë chachinsona pënëntërinso' nitotatëhua', no'tequën sha'huitacaso' ya'huërin. ⁹ Noya nipesopita co pënëncasco' ya'huënhuë'. A'nipitaso niperinhuë' pënëncasco' ya'huërin. Co Yosë natëtonahuë', co insonta' yanatëpihuë'. Co natantonahuë' niconpi. Pa'pi co noyahüe' nipi, os-hahuapi. Yosënta' têhuapi. Co ina chinotopihuë'. A'naquënso' pa'pina', a'shina' inapita co quë'yatonahuë', yatëpapi. A'naquëonta' têpatopi. ¹⁰ Nisha nisha nicacaiso' yonquipi. Sa'ina', so'ina' inapita ya'huëtaponaraihuë', monshihuanpi. Quëmapi capini, sanapi capini nisë'huapi. Piyapi'sa chachin ihuatopi pa'anacaiso marë'. Nonpintopi. "Têhuëñchachin no'tequën nonahuë," taponaraihuë', nonpintopi. Yosëso' noya nicacaiso' a'chintopirinpoahuë', co nohuantopihuë' natëcaiso'. Ina pochin nipesopita têhuëñchinsos pënëncasco' ya'huërin. ¹¹ Yosë nanamënso' noya nónya. Ina quëran nicha'ërinpoa'. "Ma'noyacha Yosëso paya," itërhua'. Ina chachin acorinco nanamën sha'huica'huaso marë'.

Quisocristori catahuarinso'

¹² Ina marë' Siniro Quisocristo achinicancaninco. "No'tequën natëarinco," ta'ton, acorinco a'china'huaso marë'. Napoaton: "Yosparinquën Siniro," itërahuë.

¹³ Iráca caso' nisha cancantërahuë. Quisocristo pinorahuë. Imarinsopita no'huito, aparisitërahuë. Quisocristoso niperinhuë' nosororinco. Co nohuitatohuë', co natëyatërarahuë' ni'ton, nosororinco. ¹⁴ Siniro chachin inaora nohuanton, nosoroatonco, na'con catahuarinco. Catahuahuachincora, "Quisocristoíchin anoyacancantarinco," ta'to, ina natérahuë. Ina imato, nosororahuë canta'. ¹⁵ No'tequën

sha'huitaranquëma'. Ya'ipi piyapi'sa' natëina'. Quisocristo isoro'paquë o'marin oshahuano'sa' anoyacancantacaso marë'. Caso' na'con na'con oshahuanpirahuë', anoyacancantérinco. ¹⁶ Yosë nosororinco. Hua'qui co noyahue' nimirahuë', nosororinco. A'napitanta' natëcaiso marë' napotérinco. "Paono pa'pi co noyahue' nimirihuë', hua'qui ahuantaton, Quisocristori nosororin. Nosoroarinco canta'," ta'tona', natëtapi. Natëtohuachina', Yosë nohuitatona', noya nanopiapi. A'na tahuërinta' inápaquë nanopimiatapi. ¹⁷ Napoaton Yoséíchin natëahua'. Nani tahuërija: "¡Ma noyacha Yosëso paya!" itahua'. Inaso' co onporonta' ta'huantaponhuë'. Co quënanpiréhuahuë', hua'anëntomiatérinpoa'. Inaíchin chinotacaso' ya'huërin. Ama onporonta' ina naniantahuasohuë'. Amen.

¹⁸ Hui'nuhüe pochin api, ni'nanquën. I'huu chachin ansiano'sa' Yosë nontatona', acorinënquën Yosë nanamën a'chinamaso marë'. Naporo' Yosëri anitotérinso' sha'huitatënë, pënëninënquën. "Yosë nohuanton, api, nanamën noya a'chinaran. Ina marë' acorinquë. Parisitaponahuë', catahuarinquën. Napoaton Quisoso a'chiniso chachin a'chinquë," itérinënquën. Iporanta' inachachin pënënaranguë. Quisoso nanamën chachin a'chinquë' sopai minsëcaso marë'. Tëhuëñchachin sopai yacanapirinpoahuë', Quisocristo catahuarinpoa' minsëcaso marë'. ¹⁹ Inasáchin natëton, pënëntéquë'. Quisocristo nohuantérinsoráchin yonquiaton, noya niquë'. Noyápiachin cancantaton, piyapi'sa' a'chintéquë'. A'naquënsa nimirihuë' cancanëna quëran noya nicacaiso' nitotopirinahuë', co yanatépihuë'. Nani Yosë naniantatona', co huachi yonquipihuë'. Quisocristo a'poatona', co huachi imapihuë'. ²⁰ A'naso' Iminio itopi. A'nanta' Aricantéro itopi. I'huu niyontonpatéira, inapita chiniquë pënënhahuë. "Quisocristo nanan quëtérinco ni'ton, ama huachi Tata Yosë a'paiinquëmasohuë'. Satanásé natërama' ni'ton, parisitamaso' ya'huërin," itérahuë. Ama huachi Yosë pinocaiso' marëhuë' chiniquë pënënhahuë. "Oshaquëran co noyahue' yonquipisopita naniantatona', Yosë pochin cancantantapona' nimara," ta'to napotérahuë.

2

Yosë nontacaso' ya'huërinso'

¹ Ya'ipi piyapi marë' Yosë nontacaso' ya'huërin. Niyontonpatama', na'con nontoco' Yosëri catahuain. "A'paniarinpoa' mini," ta'toma': "Yosparinquë Sinioro," itoco'. Ina'ton pënënaranguëma'. ² Copirnoro'sa marë' Yosë nontoco' noya hua'anëntacaiso marë'. Ya'ipi hua'ano'sa marë' Yosë nontoco' noya nicacaiso marë'. Noya hua'an nanopachin, co aquëtë' piyapi'sa' nino'huiapihuë'. Sano yonquiatéhua', noya ya'huarihua'. Ina quëran Yosë yonquiatéhua', noya nisarihua'. ³ Ina pochin Yosë nontacaso' nónya. Inaso' nicha'érinpoa'. Nontohuatéhua', noya nataninpoa'. ⁴ Ya'ipi piyapi'sa' nicha'ëcaso' nohuantérin. Nanamën no'tequënitochina'. ⁵ Yoséíchin chinotacaso' ya'huërin. Oshahuanéhua' ni'ton, inimicotopiréhuahuë', Quisocristo nanan anoyatérinpoa'. Inasáchin Yosë anohuitérinpoa'. Inaso' Yosë niponahuë', piyapi chachin nasitimarín. ⁶ Quisocristo inaora nohuanton, nicha'ëinpoaso marë' chiminin. Chiminaton, oshanënpoa' inquitérinpoa'. Tahuëri nanihuachina', Yosë yanicha'érinpoaso' anitotérinpoa'. ⁷ Ina nanan sha'huica'huaso marë' Yosë acorinco. A'parinco nisha piyapi'sa' a'chinta'huaso marë'. "Yosë no'tequën nontérinpoa'. Ina natëco'," itérahuë. Tëhuëñchachin no'tequënonahuë, co nonpinahuë'.

⁸ Napoaton nani parti niyontonpachina', quëmapi'sa' Yosë nonchina', ténahuë. Ama no'huichinasohuë'. Ama nisha nisha ninonchinasohuë'. Noyápiachin cancantatona', Yosë nonchina'. ⁹ Sanapi'santa' noya niina'. A'naquënsa sanapi'sa' nitapacaisoráchin yonquipi. Na'con na'con yanco nitonpomototopi, notohuar'o miyo pë'pëpi, nisha nisha a'sontanpapi. Pa'ton nininsopita a'mocaiso' pa'yatopi. Ainén tapacaisoráchin yonquipi. Yosë imarinsopitaso nimirihuë', ama inasáchin yonquiatonahuë', sano yonqui'ina'.

Ama piyapi'sari pa'yatacaiso maréáchin nitapainasohue'. ¹⁰ A'mopiso' ama na'con na'con yonqui'inasohue'. Noya nicacaiso' na'con na'con yonqui'ina'. Yosë imapi ni'ton, inaíchin chinochina'. ¹¹ Yosë nanamén a'chinpachina', sanapi'sa' ta'tatona', noya nataina'. Natanahuatona', noya natëina'. ¹² Niyontonpatama', quëmapi'sa' pënënhina'. Sanapi'saso nimirinhue', co pënëntacaso' ya'huérinhue'. Ama quëmapi'sa' camaiinasohue', ténahuë caso'. Ta'tatona' nataina'. ¹³ Atan'ton Yosëri ninin. Ina quëran Ipa ninin Atan catahuacaso marë'. ¹⁴ Naporahuaton, sanapi'ton co noyahuë' ninin. Sopairi nonpintohuachina, ina natëton oshahuanin. Co Atan nonpintërinhue'. ¹⁵ Sanapi'saso nimirinhue' hua'huinpita noya aso'sohuachina', Yosëri noya ni'sarin. "Yosë catahuarincó," ta'tona', imamiachina'. Piyapi'sa' noya nosoro'ina'. Noyasáchin ni'ina'. Sano yonqui'ina'. Inapohuachina', nicha'ésarin.

3

Ansiano'sa' acocaso' ya'huérinso'

¹ No'tequén sha'huitaranquén. Ansiano yaya'compachina', noya yonquiapi. Ansiano'sa' tēhuenchachin catahuarinénpoa'. ² Napoaton yaya'compachina', nóya nipesopitaráchin ya'coina'. Ama piyapi'sari pinocaiso maréhuë' noyasáchin niina'. A'na sa'ináchin ya'huéchina'. Co monshihuanacaiso' ya'huérinhue'. Sano yonqui'ina'. Ama nisha nisha yonqui'inasohue'. Ya'ipi cancanëna quëran imaina'. Ni'toro'sa' huë'pachina', noya nonchina', o'shichina'. A'chinacaiso' noya nitochina'. ³ Ama no'piinasohue'. Ama yaahuéchinasohue'. Sano yonqui'ina'. Ama yano'huichinasohue'. Ama corquiráchin cancanchinasohue'. ⁴ Ya'ipi pëinënqué ya'huëpisopita noya a'paitona', a'chinchina'. Hui'ninpita noya pënëina' no'tequén natëcaiso marë'. Sanoanan quëran pënënpachina', noya natërapi. Pa'pina' noya ni'sapi. ⁵ Co hui'ninpita térranta' pënënpachinhue', a'napitarinta co yanatëponhuë'. Napoaton co nanitërinhue Yosë imapisopita noya catahuacaso'. ⁶ Hua'qui imapisopitaráchin ansiano ya'coina'. Nasha imarinso' ya'compachin, co noyahuë' yonquiamara: "Caso' ansianoco ni'ton, noya noyaco," tapon nimara yonquinënqué. Iráca sopai hua'an ina pochin yonquihuachina, Yosëri ana'intërin. Ni'cona inapochachin ana'intocheinquëma'. ⁷ Noya nininsoráchin ya'coina'. Noya nipayachina', co imapisopitarihuënta' noya ni'sapi: "Inaso' noya quëmapi," tosapi. Co noyahuë' nicaponahuë', ya'compachin, sopai hua'ani nonpintaton, minséarin. Piyapi'sarinta' tēhuapi.

Tiacono'sa' acocaso' ya'huérinso'

⁸ Ansiano'sa' catahuarinsopitaso' tiacono'sa' topi. Inapitanta' natëtono'sa' niina'. No'tequénáchin noina'. Ama nisha nisha noinasohue'. Ama no'piinasohue'. Ama nonpinatona', coriqui canainasohue'. ⁹ Yosë anitotërinpoaso' nóya nitochina'. Nitotatona', cancanëna quëran huarë' natëina'. Inapohuachina', noyápiachin cancantapi. ¹⁰ Ama a'naroáchin aya'concosohue'. Pi'pian ténitoma', ni'co'. Noya nipayachina', ya'coina'. ¹¹ Tiaconaro'santa' natëtono'sa' niina'. Ama ma'tona ma'tona noinasohue'. Ama pinochinasohue'. Ama no'piinasohue'. Noyasáchin niina'. ¹² Tiacono'saso', a'naíchin sa'ina' ya'huéchina'. Hui'ninpita noya pënëina' no'tequén natëcaiso marë'. Ya'ipi pëinënqué ya'huëpisopita noya a'paitona', a'chinchina'. Ina pochin cancantërisopitarachin ya'coina'. ¹³ Tiacono'sa' noya nipayachina', imapisopitari noya ni'sapi. Noya Yosë marë' sacato-huachina', chini chiníquén cancantapi. Quisocristo noya natëtona', nanamén a'chinapi.

Yosë huéntonënqué ya'conpisopita

¹⁴⁻¹⁵ Na'con yonquiatenquén api, nicaponquén yapa'sarahue. "Co hua'quiya quëranhuë' pa'sarahue topirahuë'. Hua'qui quëran a'na' pa'samarahuë," ta'to, iso quirica ninshitaranquén pënëna'huanquénso marë'. Yosë huéntonënqué ya'compatéhua', onpopinsona nicacaso' sha'huitaranquén. Yosëso' nanpiárin. Canpoarë chachin

ya'huërarin. Nanamën no'tequen anitotérinpoa'. Imarëhusopita niyontonpatéhua', no'tequen a'chinarihua'. ¹⁶ Iráca co Yosë nohuitopiréhuahuë', iporaso' Quisocristo anohuitérinpoa': "Ma noyacha inaso paya," ténéhua'.
 Yosë hui'nin isoro'paquë o'maton, piyapi chachin nasitimarín.
 Ispirito Santo chachin anitotérinpoa' Yosë hui'nin nininso'.
 Nanpiantahuachina, anquëniro'sarinta' quënanpi.
 Imapisopitari ya'ipi parti paatona', nanamën sha'huira'piapi.
 Na'a piyapi'sa' natëpi.
 Iporaso' Yosë'pa' noya ya'huërin. Inatohua' Yosëri quëpantarin.

4

Yosë nanamën a'porapiso'

¹ Téhuëñchachin Ispirito Santo ninoton, a'ninquéchin sha'huitérinpoa': "A'na tahuëri a'naquen piyapi'sa' Yosë nanamën a'porapi. Sopai natëtona', nonpin nanan a'chinpachina', imasapi. Ayaro' tahuëri ya'caritohuachin, naporapi," ténin. ² Naporö' nonpina'piro'sa' ya'huapona' piyapi'sa' nonpintacaiso marë'. "Quiyanta' Yosë imarai," topirinahuë', co no'tequen nonsapihuë'. Nitapponaraihuë', co cancanhuanhuë pochin nícatona', co natëtochináchinhue' cancantapi. Hua'qui' sopai natëtona', co huachi nanitapihuë' Yosë natëcaiso'. Inapitaso' nisha a'chinapi. ³ "Ama sanapi macosohuë'. Nisha nisha cosharo' a'poco huachi," tosapi. Napopirinahuë', Yosë ya'ipi cosharo' ninin capacaso marë'. Nanamën nitotatéhua', Yosë natëhuatéhua', co a'poarihuahuë'. "Yosparinquen, Sinioro," itatéhua', caparihua'. ⁴ Ya'ipi ma'sha Yosëri ninin. Napoaton noya. Co manta' a'pocaso' ya'huérinhue'. "Yosparinquen, Sinioro," itatéhua', ya'ipiya noya caparihua'. ⁵ Yosë quiricanen yonquiatéhua', Yosë nontohuatéhua', noya capacaso', ténin Yosë.

Quisocristo marë' noya sacatacaso' ya'huërin

⁶ Nani pënënanquen. Ina nanan a'chinpatan, noya nisaran. Quisocristo noya ni'sarinquen. Cosharo' achinirinposo pochin Yosë nanamën natëhuatan, achinicancanarinquen. No'tequen a'chintérainquen ni'ton, noya imasaran.

⁷ Nonpin nanano'saso nípirinhuë' tananpitëquë'. Inahuara yonquinëna quëran naporapi ni'ton, tananpitëquë'. Inapitaso' topinan quëran a'chinapi. Quëmaso nípirinhuë' nani tahuëri yonquiquë' Yosë noya imacaso marë'. ⁸ Nani tahuëriya sacatohuatuéhuara, chinipiréhuahuë', noya noya Yosë imacaso' yonquihuatéhua', achinicancaninpoa'. Achinicancanpachinpoa', noya noya nísaréhua', ténahuë. Noya noya imapatéhua', isoro'paquë noya nanopiaréhua'. A'na tahuërinta' Yosë'pa' nanopimiatarihua'. ⁹ Caso' no'tequen pënënterahue', ya'ipi piyapi'sa' natëina'. ¹⁰ Ina marë' paatéhua', Yosë nanamën sha'huiráréhua'. Parisitaruhuarahuë', a'chináréhua'. Yoséíchin ninaréhua'. Inaso' nanopiarin ni'ton, ya'ipi piyapi nicha'ëcaso' nohuantérin. Natëhuatéhua', anoyacancantatopoa', nicha'ësarinpoa'.

¹¹ Nani a'chintérinquen ni'ton, inachachin api a'chinque'. A'chinaton, pënëntëquë' natëina'. ¹² Co mashonquenhuë' níponahuë', noya pënëntëquë' mashoro'santa' natëinënquen. Ya'ipi piyapi'sa' noya nontëquë'. Nosoroaton, catahuaquë'. Cancanen quëran huarë' Yosë natëquë'. Sano yonquiaton, noyápiachin cancantëquë'. Noyasáchin níquë' imapisopita nonainënquen marë'. ¹³ Niyontonpachina', Yosë quiricanen nontëquë'. Ina nontaton, pënëntëquë'. Quisocristo nanamën a'chintëquë'. Ca canconahuarë' inapoquë'. ¹⁴ Iráca ansiano'sa' niyontonahuatona', acorinënquen Yosë nanamën a'chinamaso marë'. Së'huamotorahuatënënquen, nanan quëtérinënquen a'chinamaso marë'. Ina quëran Yosë catastuarinquen noya a'chinamaso'. Ama ina nariantaton, topinan ya'huëquësohuë'.

¹⁵ Yosë nanamën na'con yonquiaton, a'chináquë'. Ya'ipi cancanën quëran huarë' imaqué'. Ina quëran pënénpatan, a'napita noya ni'sarinénquën. "Ma noya Yosëri catahuarin ni'ton, noya noya pënentérin," tosapi. ¹⁶ Nani tahuëri yonquiquë' noya imacmaso marë'. Naporahuaton, no'tequën a'chinquë'. Inapohuatan, Yosë catahuaringuën imamiataton cha'ëcaso marë'. A'napitanta' natanpachinquëen, cha'ësapi.

5

A'naya a'naya pënénacaso ya'huérinso'

¹ Mashoro'sa' co noyahuë' nipachina', ama no'huiquësohuë'. Tata pochin nicaton, sanoanan quëran pënénquë'. Napopináchin pi'ipitëramaso', iyaparin pochin ni'quë'. Inapitanta' nosoroaton, sanoanan quëran pënénquë'. ² Sanapi'santa' pënénacaso' ya'huérin. Payaro'sa' nipachin, mama pochin nicaton, sanoanan quëran pënénquë' noya cancanchina'. Imoyer'santa' napopináchin pi'ipitëramaso' oshiparin miáchin pochin ni'quë'. Ama inapita pi'pian téranta' narintéquësohuë'. Noyasáchin yonquiaton, nontequë'.

Quëyorono'sa' napopiso'

³ Isonata' api, imapisopita sha'huitéquë' nitochina'. "Quëyorono'sa' noyá sa'ahuamia nipachina', nosoroatoma' catahuaco'," itéquë'. ⁴ Nipirinhue', hua'huinpita ya'huëtohuachin, inapita pënénquë' a'shina catahuaina'. Aminpitartinta' catahuaina'. Aso'sorin ni'ton, inahuarinta' i'huérétanta'ina'. Nosoroatona', nocomanta'ina'. Ina Yosë na'con nohuantérin. ⁵ A'naquën quëyorono'saso nimirinhue', co hua'huinpita ya'huëterinhue'. Yoséíchin yonquiarin. "Ina catahuarco," ta'ton, nani tahuëri Yosë nontarin. Tashirë chachin nontarin. Inapitaso' catahuahua'. ⁶ A'naquën quëyorono'saso nimirinhue', nipa'yatacasoáchin yonquipi. Nanpiaponahuë', chimipi pochin cancantopi. Co huachi Yosë yonquipihuë' ni'ton, co inapita catahuacaso' ya'huërinhuë'. ⁷ Nani api sha'huitérinquë. Ya'ipi imapisopita pënénquë' natéina'. Ama a'napitari pinocaiso maréhuë' noya niina'. ⁸ Quëmopinëna' têhuëñchachin nosorocaso' ya'huérin. Pahuantohuachina', catahuaina'. A'shina', pa'pina', hui'ninpita, inapita na'con na'con nosorocaso' ya'huérin. Catahuaina', nocoma'ina'. Insoarisona co nocomahuachinahuë', co huachi Yosë natéapihuë'. Co quëmopinëna' nosorohuachinarahuë', na'con na'con oshahuanapi.

⁹ A'naya a'naya niyontonpiquë quëyorono'sa' nininénpita ninshichina' catahuacaiso marë'. Payaro'saráchin accoina', saota shonca pi'ipitërinso'. A'naíchin so'yatérinso'. ¹⁰ Noya nininsoráchin aco'ina'. Iso pochin nipesopita: Hua'huinpita noya aso'sorinso'. Ni'toro'sa' huë'pachinara, o'shitérinso'. Co manta' apirarinsuhue'. Piyapinëñ pochin cancantaton, imapisopita catahuarinso'. Parisitopisopita nosororinso'. Noyasáchin nininso'. Ina pochin nipesopita aco'ina'.

¹¹⁻¹² Nanon quëyorono'saso nimirinhue', ama acoinasohue'. "Quisocristo maréáchin sacatarahuë, co so'yantapohue'," taponahuë', oshaquëran ina nariantaton, naquéranchin so'yaantacaso' yonquiantapon nimara. So'yaantacaso' noya nimirinhue', ma'sona Quisocristo sha'huitérinso' co nariantacaso' ya'huërinhuë'. Nariantohuachin, ina marë' oshahuanarin ni'ton, ama inapitaso' acoinasohue'. ¹³ A'naquëonta' topinan ni'tapona' pa'sápatona', chiropi. Naporahuaton, ma'tona ma'tona nonsapi, pinotapi, co napocasohue' nimirinhue'. ¹⁴ Napoaton nano'sa' so'inari ayananpihuachina', so'yanta'ina', ténahuë. So'yantatona', hua'huaanta'ina'. So'ina', hua'huinpita, inapita nocomahuachina', noya nisapi. Napohuachina', co a'napitari pinosapihuë'. ¹⁵ Ni'quë' api. A'naquën quëyorono'sa' nani nisha cancantopi. Quisocristo a'porahuatona', sopai natépi.

¹⁶ Quisocristo imapatéhua', noya niahua'. Quëyoron quëmopinënpoa' ya'huëhuachin, canpoari chachin catahuahua' noya nanopicaso marë'. Ina quëran a'napita imapisopitarinta' sa'ahuamiaro'sarachin catahuaina'.

Ansiano'sa' nininso'

¹⁷ A'naquën ansiano'sa' noya noya Yosë marë' sacatopi. Paatona', nani tahuëri a'chinápi, pënëntápi. Inapita noya noya ni'co'. ¹⁸ Yosë quiricanën quëran sha'huitérinpoa'. "Toro asacatohuatama', a'caco'. Trico i'nataton to'norayahuachin, ama tonpoanantocosohue'. Tananpitoco' pi'pian pi'pian coshachin," tënín. "Piyapi asacatohuatama', pahuérëco'," tënín anta'. Napoaton ansiano'sa' Yosë marë' sacatopi ni'ton, catahuaco'. Ma'sha quëtoco' ama pahuanchinasohue'.

¹⁹ Nanan natantohuatan, ama a'naroáchin natëquësohue'. A'na piyapiriachin ansiano sha'huirapihuachin, co natëcaso' ya'huërinhuë'. Catoya'pihuë nípon, caraya'pihuë nípon, inachachin sha'huirapihuachina', naporó huarë' natëtëquë'.

Nisha nisha pënëntërinso'

²⁰ Ansiano têhuëñchachin co noyahue' nipachina, pënëncasco' ya'huërin. Ya'ipi imapisopita ayontonahuaton, chiníquën pënëñquë'. A'napitanta' tê'huatatona', noya nicacaiso marë' pënëñquë'.

²¹ Tata Yosë Quisocristorë chachin ni'sarinpoa'. Anquëniro'sa' acorinsopitanta' ni'sarinënpoa'. Napoaton api, ya'ipiya no'tequën pënëñquë'. Ama a'naroáchin ana'intëquësohue'. Noya natantëquë' no'tequën nitotacaso marë'. Ina quëran no'tequën yonquiaton, pënëñquë'. Inso têranta' co noyahue' nipachina, pënëncasco' ya'huërin. ²² Ansiano yaacohuatan, noya yonquiaton, oshaquëran acoquë'. A'naroáchin acohuatan, co noyahue' nipachina, quémanta' na'ianan. Noyasáchin niquë'.

²³ Apira apira yacanioran ni'ton, ama api i'sharáchin o'oquësohue'. Pi'pian huinonta' o'oquë', aquëtë' caniotan.

²⁴ A'naquën co noyahue' nipachina, ya'ipi piyapi'sari nitotopi. "Inaso' oshahuanin. Ina marë' Yosëri ana'intarin," topi. A'naquënsö nípirinhue' oshahuanaponahuë', co a'naroáchin nitotérëhuahuë'. Nípirinhue', co cancanën quëran imarinhuë' ni'ton, oshaquëran nitotarihua'. ²⁵ Inapochachin a'naquën noya nipachina, ya'ipi piyap'sa' nitotopi. A'naquënsö' nónya níponahuë', co a'naroáchin nitotérëhuahuë'. Oshaquëranchi inanta' nitotarihua'.

6

¹ Patron marë' sacatopisopita, pënëñquë' patronëna' noya nicatona' natëina'. Co natëhuachinahuë', no'huitatona', Yosë pinopona' nimara. "Yosë nanamënso' napoonin ni'ton, ina imatona' co yanatérinacohue'," tapona' nimara. Co ina Yosë nohuantérinhuë'. ² "Patronënanta' Quisocristo imapachin, ama ina marë' chiroinasohue'. Iyaparin pochin nicatona', noya noya sacachina'. Imarinso' catahuarapi ni'ton, nónya sacachina'. Ínanta' Yosëri nosororin ni'ton, noya catahuaina'," itëquë'. Ya'ipi carinquëñ pënënanquënsö', a'chinquë'. Onpopionta' pënëñquë' natëina'.

Nonpin nanan a'china'piro'sa'

³ Quisocristo no'tequën a'chintérinpoa'. Natëhuatëhua', noya noya cancantarihua'. A'naquënsö nípirinhue' Sinioro nanamën co natëtonahuë', nisha a'chinpi. Nonpin nanano'sa' a'chinapi. ⁴ "Ya'ipiya nitotërai," topirinahuë', co yonquipihuë'. Topinan quëran nonsápi. Nisha nisha nanano'sa' yonquiatona', nonconpi. Pa'yatopi piyapi'sa' ano'huitacaiso'. Inapita natanpachinara, niapiratopi, nino'huipi, nípinopi. "Nonpintérinco nimara," ta'tona', co huachi natërapihuë'. ⁵ Nitapicancantatona', co niquë'yapihuë'. Iráca Yosë nanamën nitotopirinahuë', ina naniantatona', co huachi no'tequën yonquipihuë'. Ma'sha canacaiso marë' Yosë yaimaconpi. Co ina marë' imacasohue' nípirinhue', napopi. Ama inapitaso' natanquësohue'.

Canamiatérēhuaso'

⁶ No'tequén Yosë imapatéhu', tēhuéñchachin canamiatarihua'. Co na'a ma'sha ya'huëtopirinfoahuë', sano cancantohuatéhu', nóya ya'huarihua huachi. ⁷ Nasitohuatéhu', co manta' ya'huëterinfoahuë'. Naporahuaton, chiminpatéhuanta', ya'ipi ma'shanënpoa' patarihua'. ⁸ Napoaton capacaso', a'mocaso' inapita ya'huëtohuachinpoa', sano cancantahua'. ⁹ A'naquénso nimirinhuë' coriqui canacasoáchin yonquipi. Inasáchin cancantatona', sopai natépi. Nani ma'sha nohuantatona' huëñsonquë ma'sha manëso pochin nisapi. Inasáchin yonquiatona', aquë aquëtë' nohuantapona'. Ina marë' Yosëri chiníquén ana'intarin. ¹⁰ Corquiráchin pa'yatoahuatéra, nisha nisha yonquirë'. Co noyahuë' ninë'. Nonpinë', ihuatérë', no'huitérë', ina pochin yonquirë'. A'naquén corquiráchin yonquiatona', Yosë a'popi. Ina quérana cancanéna quérana co huachi noya cancantopihuë'. Sétatona', chiníquén parisitapi.

Imamiatacaso'ya'huërin

¹¹ Quëmaso nimirinhuë' api Yosë imaran ni'ton, ama corquiráchin yonquiquësohuë'. Noya nicacasoáchin yonquiquë'. Cancañen quérana huarë' Yosë chinotéquë'. "Inaso' nosoroatonco, catahuarinco," ta'ton, noya natéquë'. Naporahuaton, ya'ipi piyapi nosoroquë'. Ma'sha onpoaponahuë', chiníquén cancantéquë'. Sano piyapi niquë'.

¹² Iráca imapisopita niyontonpachinara, chiníquén cancantaton, "Caso' Quisocristo imarahuë," itéran. Napoaton "Yosë catahuarinco," ta'ton, sopai minséquë'. Yosë nani huëñtonenquë aya'coninquén ni'ton, imamiatéquë'. Ina quérana a'na tahuëri inápaquë nanopimiataran. ¹³ Yosë chachin ananpirinfoa'. Inaso' ni'sarinpoa'. Quisocristonta' ni'sarinpoa'. Iráca inanta' chiníquén cancantaton, Ponsio Pirato no'tén nanan sha'huitérin. ¹⁴ Ina yonquiaton, Quisocristo noninso chachin natéquë'. Ama a'napita pinocaiso marëhuë' no'tequén a'chinquë'. Siniro Quisocristo o'mantaquë huarë' noya natéquë'. ¹⁵ Tahuëri nanihuachin, Yosë nohuanton, o'mantararin. Yosëichin hua'anénterinfoa'. Ya'ipi hua'ano'sa' ina natéina'. Copirnorosarinta' natéina'. "Ma noyacha Yosëso paya," ichina'. ¹⁶ Inasáchin co ta'huuantarinhuë'. Nanpirápon inaso'. Noya noya ni'ton, huënaráchin pochin ya'horin. Co ya'carichinachinhuë'. Iráca quérana huarë' co insonta' Yosë quénaninhue'. Ipora huanta' co quénanarihuarahuë', ya'ipi piyapi'sari chinochina'. Ya'ipiya nanitaparin. Amen.

¹⁷ A'naquén na'con coriqui ya'huëterin. Inapitanta' api pënénquë': "Ama a'napita nocancosohuë'. Ama coriquinémáchin pa'yatocosohuë'. Inaso' co ya'huëmiataponhuë'. Yosë na'con na'con pa'yatoco'. Inaso' co apiratérinfoahuë'. Nani ma'sha quëtérinfoa' nóya cancantatéhu', ya'huëcaso marë'. ¹⁸ Na'a coriqui ya'huëtohuachiniquëma', a'napita nosoroatoma', catahuaco'. Ma'sha pahuantohuachina, quëtoco'. Ama manta' apiracosohuë'. Noya nico'. ¹⁹ Inapohuatama', Yosë'pa' canamiatarama'. Inaqué noya noya nanopimiatarama," itéquë'.

Tiquinamén pochin pënéninso'

²⁰ No'tequén api Quisocristo nanamén a'chintéranquén. Ama nariantatonhuë', noya imaqué'. Nonpin nanano'saso nimirinhuë' ama natanquësohuë'. Nisha nisha nonpi. "Ya'ipiya no'tequén nitotérai," topirinahuë', co no'tequén nitotopihuë'. ²¹ A'naquén nisha nanan imatona', Yosë a'popi. Ama inapita natéquësohuë'.

Inaora nohuanton, Yosë noya catahuainquén. Nani ninshitéranchuén huachi.

Paono

Paonori Timotio ninshitaantarino'

Timotio yonquiaton, nanan a'patérinso'

¹ Ca Paonoco ninshitaranquën. ¿Noya quëmanta' ya'huaran? Noya canta' isëquë ya'huarahuë. Yosë nohuanton, Quisocristo acorinco nanamën a'china'huaso marë'. Quisocristo imapatéhua', Yosë nohuitatéhua', nanopimiatarihua'. ² Timotionquën ninshitaranquën. Nosoroaténquën, hui'nahuë pochin ni'nanquën. Tata Yosë inaora nohuanton, catahuainquën. Noya nosoro'inquën. Nani tahuëri asanocancainquën. Quisocristonta' inachachin catahuainquën. Inaso' hua'anënpoa' ni'ton, inasáchin natérëhua'.

Timotio noya imarinso'

³ Iráca shimashonéhuëpita Yosë chinotopi. Inapochachin canta' chinotérahüe. Yosë nanamën no'tequën natëto, chinotérahüe. Ina marë' noyápiachin cancantérahüe. Nani tahuëri tashirë chachin Yosë nontato, quëma yonquiranquën. Noya imaranso marë': "Yosparinquën Siniro," itérahuë. ⁴ Iráca yapatohuaténquëna, sétaton na'néran. Ina yonquiaton, na'con yani'nanquën. Onpopionta' nicato noya cancanchi, ténahuë. ⁵ Cancanën quëran huarë' Quisocristo natéran. Mamapaya'ton natérin. Noita inaso'. Ina quëran mama Ionisanta' natéton, a'chintérinquën. Ipora quëmanta' imaran, ténahuë. Ina yonquiarahuë.

⁶ Iráca së'huamotorahuaténquën, acoranquën pënëntamaso marë'. Naporo' Yosë chachin ananitérinquën ni'ton, nöya pënëntéran. Imapisopita noya a'chintéran. Iporanta' api, ina yonquiaton chiníquën cancantéquë'. Ni'quë'. Pënsha yatacopihuachina, pishitoquatéra noya orotaantarín. Inapochachin chiníquën cancantaton, pënëntaantaquë', ténahuë. Napoaton ninshitaranquën achinicancana'huanguënsa marë'. ⁷ Yosë co nohuantérinhüe' të'huacaso'. Ispirito Santo chachin achinicancaninpoa' sopai minsëcaso marë'. Inasáchin ananitérinpoa' piyapi'sa' nosorocaso'. Catahuarinpoa' cancanënpoa quëran no'tequën yonquicaso'. ⁸ Ama tapanatonhuë', Siniro nanamën a'chináquë'. Ina a'chinahuëso marë' tashinan pëiquë po'morinaco. Ama ina marënta' tapanquësuhüe'. Quëmanta' a'chinanso marë' aparisitohuachinéquën, chiníquën cancantéquë'. Napohuatan, Yosë catahuarinquën noya ahuantamaso'. ⁹ Yosë chachin anoyacancantérinpoa'. Oshanënpoa' inquitatonpoa', acorinpoa' nöya nicacaso marë'. Inaora nohuanton, nosororinpoa'. Co noyahüe' nipayéhuahüe', nosoroatonpoa', catahuarinpoa'. Co'huara isoro'pa' acoyátérerasohüe', ninotonpoa', nosororinpoa'. Naporo' chinotérin Quisocristo a'paimacaso'. Ina imapatéhua', anoyacancantérinpoa'. ¹⁰ Nosororinpoaso' nani anitötérinpoa'. Quisocristo o'marin ni'ton, nitotérëhua'. Quisocristo chachin nicha'ërinpoa'. Nanplantarahuaton, chimirin minsérin. Nanamën natëhuatéhua', Yosë nohuitatéhua', nanopimiatarëhua'. Chiminarihuarahuë', nanopiantarihua'. Nanamën quëran anitötérinpoa'.

¹¹ Yosë acorinco nanamën sha'huica'huaso marë'. Pënënta'huaso marë' a'parinco. Ina nohuanton, nisha piyapi'sa' a'chintarahuë. ¹² Ina marë' aparisitopirinacohüe', co tapanato yaa'porahuë'. Quisocristo imamiatarahuë. Ina nohuitato, inasáchin natérahuë. Ya'ipi nanitaparin. Nani sha'huitérinco nanamën a'china'huaso' ni'ton, noya a'paiarinco. O'mantaquë huarë' nanamën ya'huëmiatarin, ténahuë.

¹³ No'tequën api a'chintérinquën. Inachachin quëmanta' a'chinqué'. "Quisocristoíchin anoyacancantérinpoa'", ta'ton inasáchin natëquë'. Ina nosoroaton, a'napitanta' nosoroquë'. ¹⁴ Yosë nohuanton, nanamën no'tequën nitotéran. Ama manta' nisha a'chinquésohuë'. Ispirito Santo catahuarinquën no'tequën yonquicamaso'. Nani ya'coancantérinpoa' catahuainpoaso marë'.

¹⁵ Tashinan pëiquë po'mohuachinaco, ya'ipi Asiaquë imapisopita patérinaco. Huiquiro, Imoquinisi, inapita quërän huaré' napotérinaco. Nani nitotérän, ténahuë. ¹⁶⁻¹⁷ Onisiporoso nimirinhue', co naniantérincohuë'. Nomaquë huë'sahuaton, yonisápatonco, quënaninco. Co tapanatonhuë', tashinan pëiquë ni'quirinco. Na'aro' achinicancaninco. Ina marë' ya'ipi pëinënquë ya'huérinsopita Siniiorori na'con catahuain, ténahuë. ¹⁸ Ipiquoënta' na'con catahuarincoso' nani nitotérän. Ina marë' Yosë nontérahuë. "Na'con nosororinco ni'ton, Sinioro o'mantahuachin, inanta' nosoroquë!", itérahuë, Yosë nontato.

2

Sontaro pochin nininso'

¹ Quëmanta' api: "Quisocristo catahuarinco," ta'ton chiníquën cancantëquë'. Ina imapatéhua', inaora nohuanton catahuarinpoa' chiníquën cancantacaso'. Hui'nahuë pochin nicatënquën, pënénaranquën. ² Piyapi'sa' niyontonpachinara, Yosë nanamën a'chintérahuë. Quëmanta' natanan. Inapochachin quëmanta' caraíchin quëmapi'sa' huayonahuaton, ina nanan chachin a'chintantaquë'. Noya natérinsopita a'chintëquë'. Inahuanta a'napita a'chintacaiso marë' inapotëquë'.

³ Noya sontaro pochin niquë'. Inaso' parisitohuachina, ahuantérin. Inapochachin quëmanta' Quisocristo marë' parisitohuatan, ahuantëquë'. ⁴ Sontaro ya'compatéra, co huachi a'na sacato yonquiréhuë'. Capitanáchin natérë'. Ina nohuantérinsoáchin ninë'. Inapochachin canpoanta' Quisocristoachin natëcaso' ya'huérin. ⁵ Isonta' yonquiquë'. Canatacaso marë' ya'nipihuatera, ya'nipi hua'an sha'huitérinpo' ma'sona noya nicacaso'. Co natëhuatérahuë', co canatéréhuë'. Inapochachin canpoanta' Quisocristo noninso' natëahua'. ⁶ Iminquë chiníquën sacatérinso pochin Yosë marë' chiníquën sacatacaso' ya'huérin. Sha'tona'pi noya sacatohuachina, cosharo' ya'huétérin. Cayahuachina, inariiton manin. ⁷ A'chintaranquëns' api yonquiráquë'. Quisocristo catahuaarinquën noya noya yonquicamaso marë'.

⁸ Quisocristo na'con yonquiquë'. Isoro'paquë o'maton, piyapi chachin nasitimarin. Tapi shiin inaso'. Chiminaponahuë', nanopiantarin. Ina nanan chachin a'chinárahuë. Ina imapatéhua', nicha'ësarinpao'. ⁹ Ina a'chinahuëso marë' parisitérahuë. No'huitonaco, tashinan pëiquë po'morinaco. Apina'pi pochin nicatonaco, catinatérinaco. Inapotopirinacohue', Yosë nanamëns' co nanitopihuë' inapotacaiso'. Nisha nisha parti a'chinapi ni'ton, nahuinin. ¹⁰ "Yosë nohuanton, huayoninsopita oshaquëran imasapi," ta'to, ya'ipiya ahuantérahuë. Quisocristo imapachina', nicha'ësarín. Oshanëna' inquitahuaton, anoyacancantarín ni'ton, a'na tahuëri Yosë'pa' nanopiantarapi. Inatohua' noya noya ya'huécontapi. Co onporonta' pipiapihuë'.

¹¹ No'tequëñ itéranguëñ.

Yatëpapirinënpoahuënta', imamiatohuatéhua', inarë'quënpoa' nanopimiatarihua'.

¹² Parisitapiréhuahuë', noya ahuantohuatéhua', a'na tahuëri inarë'quënpoa' hua'anéntarihua'

Nimirinhue', ina a'pohuatéhua', inanta' a'poarinpoa'.

¹³ Co no'tequénáchin imapiréhuahuë', inaso' no'tequëñ nontérinpoa' ni'ton, noya a'paigarinpao'.

Nani sha'huitérinpoa' ni'ton, co nanitérinhuë' nonpintinpoaso'. Co onporonta' nisha cancantarinhue'.

Yosë marë' sacatéréhuaso'

¹⁴ Ina nanan chachin api ya'ipi piyapi'sa' sha'huitaantaquë' yonqui'ina': "Yosë ni'sarinpoa ni'ton, ama nisha nisha ninontocosohue'", itequë'. Inahuara yonquinëna quërän nisha nisha ninontohuachinara, topinan quërän nonsapi. Insosona inapita natanpachina', co huachi noya Yosë imasapihuë'. Nisha cancantatona', yaa'poapi.

15 Noyasáchin niquë' Yosë noya ni'inquën. Yosë nanamën ma'sona tapon napor-insopita noya nitotaton, no'tequën a'chinqué'. Ina marë' noya sacatohuatan, co Yosë'pa' tapanaranahuë'. **16** Nonpin nanano'saso nimirinhuë' tananpitëquë'. Ama natantuquësohuë'. Topinan quëran ninontapi. Inapita imapatéhua', co huachi Yosë pochin yonquiaréhuahuë'. **17** Ni'quë'. Panca yonitohuatéra, nohuaroñterë'. Inapochachin nonpin nanano'saso', yatapicananinpoa'. Iminio, Huirito inapitaso', nonpin nanan a'chinapi. **18** Yosë no'tequën a'chintopirinpoahuë', co huachi natépihuë'. "Yosë nani piyapi'sa' ananpitatë pochin nitérin. Co huachi a'na tahuëri ananpitaantarinfoahuë", toconpi. Napopi ni'ton, co huachi a'naquën imapihuë'. **19** Yosë nanamënsa nimirinhuë' ya'huárin, Yosë chachin acorinso'. Natéricho pëi' achinirinso' pochin ni'ton, ya'huëmiatarin. Cato quëran chachin ninshitopi. "Ya'ipi imapisopita Yosëri nohuitérin," ténin. "Quisocristo imapisopita noya cancanchina'. Ya'ipi co noyahue' yonquipisopita nanianchina", ténin anta'.

20 Panca pëiquë nisha nisha ma'sha ya'huërin inaquë o'shitacaso marë'. Ni'toro'sa' huë'pachinara, nasha minë' ninshirayáchin masahuatë', o'shitérë'. Minétë', pa'chitë', inapitaso nimirinhuë' co ina marë' ya'huërinhuë'. Në'huë' acocaso marë', hui'sëcaso marë', inapita marë' ya'huërin. **21** Inapochachin co noyahue' yonquiramaso' naniantohuatama', ninshiraya minë' pochin nisarama'. Noyasáchin cancantohuatama', Yosë nohuantarinquëma'. Acoarinquëma' noya nicacaso marë'.

22 A'naquën hui'napi'saso' nisha nisha yonquiatona', pa'sápi. Ama ina pochin yonquiquësohuë'. Noyasáchin nicacaso' yonquiquë'. Ya'ipi cancanën quëran Quisocristo natéquë'. Ya'ipi piyapi nosoroquë'. Ya'ipi imaréhuaso capininpoa' noya nini'tehua', ya'hua'ahua'. Noyápiachin cancantatéhua', Sinioro nontéröhua' catahuainpoaso marë'.

23 A'naquën co Yosë yonquiatonahuë', nisha nisha ninontapi. Topinan quëran ninontatona', nino'huiapi. Quëmaso nimirinhuë' ama inapitarë'quën chiníquën ninontocosohuë'. **24** Sinioro piyapinënpoa' nipayéhua', co piyapi'sa' no'huicaso' ya'huërinhuë'. Noya nontacaso' ya'huërin. Noya nitotatéhua', a'chintahua'. No'huipirinpoahuë', ama no'huiahuasohuë', ahuantahua'. Sanoanan quëran nontahua'. **25** Nisha nanan imapachina, oshaquëran pënëanhuan'. Ama no'huitatéhuahuë', a'chintahua'. Yosëri catahuahuachin, oshaquëran co noyahue' yonquipisopita naniantatona', no'tequën yonquipona' nimara. **26** Yonquicaiso marë' sanoanan quëran pënëanhuan'. Huëndonquë ma'sha manëso pochachin sopairi nani manin. Camaihuachina, natépi. Nimirinhuë' pënënpatéhua', sopai quëran cha'épona' nimara.

3

Aquë aquëtë' co noyahue' cancantapisopita

1 Isonta' api pënëanta'inquën. Ayaro' tahuëri ya'caritohuachin, co huachi noya ya'huapihuë'. **2** Piyapi'sa' niapiratatona', co huachi a'napita yonquapihuë'. Coriquiráchin cancantapi. A'napita nocanapi. "Caso' noya noyaco," ta'tona', a'napita co noyahue' ni'sapi. Nipinosapi; Yosënta' pinosapi. A'shina', pa'pina', inapita co natérapihuë'. Nani ma'sha quëtopirinahuë', ina marë' "Yosparinquën," co itopihuë'. Co Yosë chinotapihuë'. **3** Co pi'pisha téranta' ninosoroapihuë'. Co niquë'yaapihuë'. Ninonpinapitona' nisha'huirapiapi. Nimonshitapi. Ni'ni pochin cancantatona' niahueäpi. Noya nininsopita co pi'pisha téranta' nohuantapihuë'. **4** Iina niponaraihuë', nonpinapitona' sha'huirapiapi. Co huachi yonquapihuë': "Quiyasáchin nitotérai," tosapi. Nipa'yatacasoáchin yonquiatona', co huachi Yosë nohuantapihuë'. **5** "Quiyanta' Yosë imarai," topirinahuë', co têhuëñchachin imapihuë'. Chinotopirinahuë', co cancanëna quëran huarë' natépihuë' ni'ton, co Yosëri catahuarinhuë' ina pochin cancantacaiso'.

Ama inapita natanquësuhue'. Tananpitëquë' pa'ina'. ⁶ Na'a piyapi'sa' anishacancantapi. A'naya a'naya pëiquë paatona', sanapi'sa' nonpintopi. Nonpintatona', a'chintapirinahuë', a'naquënso' noya natanpi. "Oshahuanco ni'ton, ana'intincoso' ya'huérin," ta'tona', co chiníquën cancantopihuë'. Nani ma'sha nohuantatona', co sano yonquipihuë' ni'ton, a'naroáchin natëtopi. ⁷ Nisha nisha nanan yanatanapona'. Yosë no'tequën noninsoso niperinhuë', co yanatëpihuë'. Napoaton co Yosë nohuitopihuë'. ⁸ Iráca cato' pënotono'sari Moisësë chinitopi. Canisë, Canprisë inapita itopiso'. Moisësë no'huitona', copirno nonpintopi ama natëcaso marëhuë'. Inapochachin ipora nisha a'china'piro'sa' co noyahuë' yonquiatona', co Yosë nohuantopihuë'. No'tequën noninso' co yanatanpihuë'. Nisha nanan imatona', co Yosë imasapihuë'. ⁹ A'chintohuachina, a'naquën natëpirinahuë', oshaquëran co huachi natërapihuë'. "Nonpinápi," ta'tona', co huachi imasapihuë'. Inapochachin iráca ina pënotono'sari nonpintopirinahuë', piyapi'sari oshaquëran no'tequën nitotahuatona', a'popi huachi.

Paonori Timotio pënëninso'

¹⁰ Quëmaso niperinhuë' noya cancantaton, hua'qui' ca'tananco. Yosë nanamën a'chinpatera, noya natanan. Ya'ipi naporahuëso' ni'nan. Yoséichin yonquiat, imamitarahuë. Cancanëhuë quëran huarë' natërahuë. Co piyapi'sa' no'huirahuë', nosororahuë. Ma'sha onpoaporahuë', chiníquën cancantërahuë. ¹¹ Aparisitopirinacohue', ahuantërahuë. Ya'ipi ni'nan ni'ton, nitotëran. Antioquiaquë, Iconioquë, Nistraquë, inaquëpita chiníquën parisitaporahuë', Sinioro catahuarinco ni'ton, cha'ërahuë. ¹² Ya'ipi cancanënpoa quëran Quisocristo imapatëhua', aparisitarinënpoa'. ¹³ Co noyahuë' nipsisopita, nonpintero'sa', inapitaso' aquë aquëtë' co noyahuë' nisapi. Na'con piyapi'sa nonpintopi quëran, a'napitarinta' nonpintapi.

¹⁴ Quëmaso niperinhuë', Yosë nanamën imamiatëquë'. Nani iráca mama, mama paya, ca, a'napitanta' a'chintërainquëen, cancanën quëran huarë' natëran. Noya nohuitérancor ni'ton: "No'tequën a'chintërinaco'i," ta'ton, imamiatëquë'. ¹⁵ Hua'huatapon quëra huarë' Yosë quiricanën nohuitëran. Ina quëran Yosë nontërinpoa' nicha'ëinpoaso marë'. Ina nitotohuatëhua', Quisocristo natëhuatëhua', cancanënpoa' anoyacancantërinpoa'. ¹⁶ Ya'ipi Yosë quiricanënsö' nöya. Yonquirinso chachin Yosëri aninshitërin. Quiricanën quëran a'chintërinpoa'. Pënëninpoa' co noyahuë' ninëhuasopita naniantacaso marë', nöya ayonquirinpoa'. Anitotërinpoa' no'tequën Yosë natëcaso'. ¹⁷ Quisocristo imapatëhua', quiricanën quëran catahuarinpoa' noya nicacaso marë'. Nitotatëhua', natëhuatëhua', nöya nisarëhua'. Ina marë' quiricanën quëtërinpoa'.

4

¹ Yosë ni'sárinpoa ni'ton, pënënaranguë. Quisocristonta' ni'sárinpoa ni'ton, "nanamën a'chináquë'," ténahuë. A'na tahuëri inaso' o'mantararin isoro'pa' hua'anëntacaso marë'. Naporo' chiminpisopita, nanopirëhuasopita, ya'ipinpoa' coisë pochin no'tequën sha'huitarinpoa'. Oshahuano'sa' ana'intarin. Natërhuaopitaso' noya acoarinpoa'. Napoaton Yosë marë' noya sacatëquë'. ² Nanamën a'chináquë'. Piyapi'sa' yanatanpachina', a'chintëquë'. Sacai' a'chinacaso niperinhuë', onpopionta' a'chináquë'. A'naquënso' co yaimapachinahuë', no'tequën sha'huitëquë' natëina'. Co noyahuë' nipachina', pënënquë'. Noya nontëquë' chiníquën cancantatona', imaina'. Ya'ipi piyapi'sa' a'chintëquë' noya nicacaiso marë'. Niperinhuë', ama no'huiquësuhue'. Sanoanan quëran pënënquë'. ³ A'na tahuëri piyapi'sa' co nohuantapihuë' Yosë nanamën natanacaiso'. Nonpin nanano'sa' nisha nisha a'chinpachina', pa'yatapi. Inahuara costapisorachin yanatanapi. ⁴ Yosë no'tequën noninso' a'porahuatona', piyapi yonquirinso' natëapi. ⁵ Quëmaso niperinhuë', yonquínahuan niquë'. Aparisitohuachinënquëen, ama no'huitatonahuë', ahuantëquë'. A'naya a'naya Yosë

nanamën a'chintëra'piaquë'. Co imapisopitahuënta' nitochina'. Ya'ipi imapisopita catahuauquë' noya noya imaina'.

⁶ Ma'sha Yosë marë' tëpapiso pochin co hua'quiya quëranhuë' a'chinahuëso marë' tëpaarinaco. Nani tahuëri naniriarin chimina'huaso'. ⁷ Iráca Yosë sha'huitérinco a'napita a'chinta'huaso'. Nani tiquirahuë. Chiníquën sacatérahuë pochin Quisocristo noya natérahuë. Co pi'pian téranta' a'porahuë'. ⁸ Napoaton Yosë'pa' acanaarinco. Quisocristo o'mantahuachin, coisë pochin nicaton, no'tequën sha'huitarinpoa'. Naporo' noya ni-nahuëso marë' acanaarinco. Co casáchin acanaarincohuë'. A'napitanta' Quisocristo nosoroatona', "Manóton o'manta'in," topisopitanta' Yosë'pa' canaapi.

Timotio huëcacaso' nohuantérinso'

⁹ Manóton api huëquë' ni'quico. Ama hua'quiquësohuë'. ¹⁰ Timasëso' isoro'paráchin yonquiaton, patérinco. Tisaronicaquë pa'nin. Crisinti Carasiaquë pa'nin. Titonta' Tarëmasiaquë pa'nin. ¹¹ Nocaséíchin isëquë ya'huërarin. Marconta' macaton, quëquë'. Inaso' noya catahuarinco. ¹² Tiquicoso' ya'huëapirinhuë', Ipisoquë a'parahuë. ¹³ Aipi a'morahuëso tanontën ninins' Troasëquë huëshirahuë. Carpio pëinénquë ya'huëarin. Huë'patan, quëshico. Quiricaro'santa' quëshico. Quiricanëhuë so'nanpinan nininsopita na'con na'con nohuantérahuë.

¹⁴ Aricantëro hua'naquë sacatérinso' chiníquën sha'huirapirinco. Ina marë' Siniorori ana'intarin. ¹⁵ Yosë nanamën a'chinahuë ni'ton, chiníquën no'huirinco. "Nonpiánin," ténin. Napoaton ni'quëna quëmanta inapotochinquën.

¹⁶ Ya'nan coisëquë sha'huirapiponaco, co insonta' catahuarincohuë'. Ya'ipiya tē'huatona', ta'anapirinaco. Nipirinhuë', co no'huirahuë'. "Ama ina marë' Sinioro ana'intëquësohuë'," itérahuë Yosë nontato. ¹⁷ Ta'anapipirinacohuë', Quisocristo catahuarinco. Co patérincohuë'. Achinicancaninco ni'ton, inaquënta' ya'ipi Yosë nanamën sha'huirahuë. Nisha nisha piyapi'sa' nani natanpi. Pa'pini' yamaninposo pochin yatëpapirinacohuë', Yosë catahuarinco, cha'ërahuë. ¹⁸ Pa'pi co noyahue' yonquirapihuachinaconta', onpopionta' nicha'ësarinco. Quisocristo anoyacancantérinco ni'ton, a'na tahuëri hua'anëntérinquë quëpantarino. ¡Ma noyacha Quisocristoso paya! Ipora quëra huarë' inasáchin chinotahua'. Amen.

Tiquiapon pochin sha'huirinso'

¹⁹ Pirisica, Aquira, Onisiporo, sa'in, hui'ninpita, inapita saludos a'patérahuë. ²⁰ Irasito Corintoquë quëparitërin. Tropimo caniorin ni'ton, Miritoquë huëshirahuë. ²¹ Ama api hua'quiquësohuë'. Co'huara o'napi naniyatërasohuë', huëquë'. Ioporo, Potinti, Nino, Craotia, ya'ipi imapisopita isëquë ya'huëpiso' yonquiatënënquën, saludos a'patarinënquën.

²² Sinioro Quisocristo achinicancainquën. Ya'ipinquëma' imaramasopita inaora no-huanton, noya catahuainquëma'. Nani huachi.

Paono

Paonori Tito ninshitërinso'

Tito yonquiaton, ninshitërinso'

¹ Ca Paonoco ninshitaranquën, ni'quë'. ¿Noya ya'huaran? Noya canta' ya'huarahuë. Tata Yosë hua'anëntérinco ni'ton, inasáchin natërahuë. Quisocristo acorinco nanamën a'china'huaso marë'. Yosë huayoninpoa' ni'ton, huëntonënquë ya'conëhua'. Noya natëcaiso marë' a'chinarahuë. No'tën nanan a'china'huaso marë' acorinco. Ina natëhuatëhua', no'tequën imasarëhua'. ² Quisocristo imapatëhua', a'na tahuëri inápaquë quëpantarinpoa'. Ya'huérin'pa' ya'huëmiatarihuë'. "Ananpitaantarinpoa'", ta'tëhua', ina ninarëhua'. Yosë iráca co'huara isoro'pa' acoyátërasohuë', ninotonpoa' yonquirinpoa'. Inaso' co onporonta' nonpintërinpoahuë'. ³ Iporaso huachi tahuëri nani-huachina, inaora nohuanton, nanamën anitotërinpoa'. Yosë sha'huitërinco ni'ton, ina nanan chachin pënënanquëma'. Inaso' nicha'ësarinpoa'. ⁴ Titonquën ninshitaranquën. A'chintohuatëñquëna natëton, imaran ni'ton, tëhuëñchachin hui'nahuë pochin ni'nanguën. Tata Yosë inaora nohuanton, catahuainquën. Asanocancainquën. Quisocristonta' inachachin catahuainquën. Inaso' nicha'ësarinpoa'.

Ma'sona Tito nicacaso' ya'huërinso'

⁵ Crita parti ya'huarihuë, a'naya a'naya ninanoquë a'chintopirëhuahuë', pahuanarin ya'ipi a'chinacaso' ni'ton, inaquë huëshiranquën: "Imapisopita ya'ipi a'chintacaso ya'huërinso a'chintëquë'. Naporahuaton, ya'ipi ninanoro'saque ansiano'sa' acora'piaquë", itëranquën. ⁶ Ansiano'sa' yaacohuatan, noya imapisopitarächin acoquë'. A'naíchin sa'in ya'huëtinso'. Hui'ninpita' Quisocristo imaina'. A'naquënso' ansiano yaya'conpirinahuë', hui'ninpita co noya cancantopihuë'. Co yonquínahuan nipihuë'. Co pa'pina' yanatëpihuë'. Co hui'ninpita tëranta' pënënpachinahuë', a'napitarinta' co yanatëponahuë'. Napoaton co inapita acocaso' ya'huërinhuë'. ⁷ Yosë nohuanton, ansiano'sa' ya'huëpi imapisopita catahuacaiso marë'. Yosëri acorin ni'ton, noyasáchin niina'. Ama nocanchinasohuë'. "Casáchin no'tequën nitotërahuë", topachina', ama acoquësuhuë'. Ama yano'huichinasohuë'. Ama no'piinasohuë'. Ama yaahuëchinasohuë'. Ama coriquirächin cancanchinasohuë'. Ama pi'pian tëranta' nonpinatona', canainasohuë'. Insosona ina pochin cancantohuachin, ama ansiano acoquësuhuë'. ⁸ Ni'toro'sa' huë'pachina', noya nonchina', o'shichina'. Pahuantërinopita nosoro'ina'. Noyasáchin ni'tona', a'napita catahuaina'. Sano yonqui'ina'. Yosë natëtona', ina pochin cancanchina'. Pi'pisha tëranta' co noyahue' yonquihuachina', a'naroáchin nanianchina'. Ina pochin cancantohuachina', noya ansiano ya'conacaso', tënahue'. ⁹ Yosë nanamën no'tequën a'chintërainquëma'. Ina nanansáchin ansiano'sa' imaina'. Ina na'con yonquihuachina', noya pënëntapona', no'tequën a'chinapona'. A'napitaso nisha nanan a'chinpirinahuë', ansiano'sariso' Yosë nanaménáchin a'chinchina'. Ama imapisopita nonpin nanan natëtacaiso marëhuë' inapochina'.

¹⁰ Na'a quëmapi'sa' co natëtochináchinhuë' cancantopi. Inahuara yonquinëna quëran a'chinapi ni'ton, topinan quëran nonsápi. Cotioro'sa' pënëntérinso' imatona', napopi. Nisha nisha nonatona', yanopinapi. ¹¹ Yapënëntohuachina', sha'huitëquë' ama pënëñchinasohuë'. Ma'sha canacaisoáchin yonquiatona', a'chinapi. Nisha a'chintohuachinara, a'naquën Yosë nanamën yaa'popi. Quëmopinënpitarë chachin nisha imasapi.

¹² Tëhuëñchachin Crita parti na'a nonpina'piro'sa' ya'huëpi. A'na Crita quëmapi chachin iráca tapon: "Critaro'sa' yanopinpi. Ni'ni pochin cancantopi. Chirotéro'sa' nicatona', cosharoachin cancantopi," ténin pënëntona'pi. ¹³ No'tequën nonin. Na'a piyapi'sa' inatohua' ina pochin cancantopi. Napoaton chiníquën pënëñquë' ama nonpin nanan

a'chinacaiso marëhuë'. No'tequën natëhuachina', noya cancantapi. ¹⁴ Ama cotioro'ssa' iráca napopiso' natëinasohuë'. A'naquën no'tën nanan a'porahuatona', inahuara yonquinëna quëran a'chinapi. Ama inapita natëinasohuë'.

¹⁵ Noyápiachin cancantohuatëhua', ya'ipiya noya yonquiarëhua'. A'naquënsö nipi琳huë' co yaimapihuë'. Taparosáchin yonquipi. Co noyahue' cancantohuachinara, nisha nisha yonquipi. No'tën nanan nitotaponaraihuë', co yanatëpihuë'. Napoaton co huachi no'tequën yonquipihuë'. Nitapicancanatona', co huachi nanitopihuë' noya yonquicaiso'. ¹⁶ "Yosë nohuitërahuë," topirinahuë', co noyahue' nipi. Ina marë' co tëhuëñchachin imapihuë', tënahuë. Co Yosëri noya ni'ninhue'. "Napoönpi," tënín. Co manta' yanatëpihuë'. Yosë a'poatona', co pi'pisha têranta' nanitopihuë' noya nicacaiso'.

2

Quëmapi'sa', sanapi'sa' inapita pënëñinso'

¹ Quëmaso nipi琳huë' Yosë nanamën no'tequën a'chinqué'. Ina a'chinaton, pënëñquë' noya nicacaiso marë'. ² Quëmapi'sa' quëran mashomiachin nipesopita pënëñquë' natëtono'sa' niina'. Ama nisha nisha yonqui'inasohuë'. Noya yonquiatona ya'huë'ina'. Yosë nanamën no'tequën imaina'. Ya'ipi piyapi nosoro'ina'. Aparisitopirinahuënta', ama yai'huëñchinasohuë', ahuanchina'. ³ Sanapi'sa' payamiachin nipesopitanta' a'chintéque' sano yonquiatona' ya'huë'ina'. Ama ma'tona ma'tona noinasohuë'. Ama no'picaiso' pa'yachinasohuë'. Noya niina' a'napita sanapi'sarinta' nicatona' nonanacaiso marë'. Naporahuatona', noya nicacaiso' a'chiina'. ⁴ Ina quëran sanapi'saso' nanitopi nasha so'yahuano'sa' a'chintacaiso'. So'ina', hua'huinpita inapita nosorocaiso marë' pënëina'. ⁵ Noya yonquicaiso marë' pënëina'. Ama manta' so'ina' tëhuananpitacaiso' yonqui'inasohuë'. So'ina' noya nocoma'ina'. Ya'ipi piyapi noya nonchina'. So'ina' noya natëina' ama a'napitari Yosë nanamën nonapicaiso marëhuë'.

⁶ Hui'napi'santa' pënëñquë' sano yonqui'ina'. ⁷ Quëmanta' api, noyasáchin niquë' a'napita nonanainquënsö marë'. Noya cancantaton, Yosë nanamën no'tequën a'chinqué'. Ya'ipi yonquinën quëran huarë' a'chinqué'. ⁸ Noyasáchin nonquë' ama a'napita nonapiinquënsö marëhuë'. Ina quëran no'huipirinëñquënhuënta', tapanapi. Co manta' pinoinpoaso' ya'huaponhuë'.

⁹ Patron marë' sacatopisopitanta' pënëñquë' patronëna' noya nicatona', natëina'. Natëtona', noya sacachina'. Camaihuachina', natëina'. Co a'panicaso' ya'huëñchinasohuë'.

¹⁰ Ama ihuachinasohuë'. No'tequën natëtona', ama pi'pian têranta' nonpiinasohuë'. Noya nipayachina', a'napitarinta' noya ni'sapi. "Tata Yosë imatona', noya nipi. Ma noyacha Yosë nanamënsö paya," tapona'. Inaso' tëhuenchachin nicha'ësarinfoa'!

¹¹ Inaora nohuanton, Yosë nosororinfoa'. Ni'ton, hui'nin chachin a'paimarin nanamën anitotinfoaso marë'. Inaso' ya'ipi piyapinfoa' nicha'ësininfoaso' nohuantërin.

¹² Nosoroatoninfoa', pënëñinfoa' ya'ipi co noyahue' yonquirëhuasopita naniantacaso marë'. Ama ma'sharáchin nohuantahuasohuë'. Co monshihuanacaso' ya'huëñchinasohuë'. Sano ya'huatëhua', nónya yonquia'ahua'. Yosë yonquirinsoráchin imahua'. Nani tahuëri Yosë chinotatëhua', noyasáchin niahua'. Ina marë' pënëñinfoa'. ¹³ Noya cancantatëhua', Quisocristo ninarëhua'. A'na tahuëri chiníquënanantaton, o'mantararin. Inaso' Yosë chachin ni'ton, huëñnaráchin huëñnaráchin ya'noarin. Ina quënanpatëhua', nónya cancantarihua'. Chiníquënanantaton, noyá nicha'ësarinfoa'. ¹⁴ Iráca canpoa marë' chiminin oshanëñinfoa' inquitinfoaso marë'. Anoyacancantërininfoa' piyapinënpita nicacaso marë'. Huëntonëñquë chachin ya'conpatëhua', noya nicacasoráchin nohuantarihua'.

¹⁵ Ina nanan a'chintáquë'. Noya nontaton, achinicancanquë'. Co noyahue' nipayachina', chiníquënanantaton, pënëñquë'. Co mashonquënhuë' niperonahuë', Quisocristo nanamën a'chintérana ni'ton, natëinëñquënsö ya'huërin.

3

Imapisopita noya niina'

¹ Imapisopita nani nitotopirinahuë', inachachin quëmarinta' pënëantaquë'. "Copirno natéco'," itéque'. Ya'ipi copirno acorinsopitanta' natëcaso' ya'huérin. Noya nicacaiso' yonqui'ina'. ² Ama pinochinasohuë'. Ama nino'huiinasohuë'. Noya ninicatona' ya'huë'ina'. Ya'ipi piyapi'sa' noya nicatona', sanoanan quëran nonchina'.

³ Iráca canpoanta' co noyahue' cancantérühua'. Co'huarda Yosë nanamén nitochatérarihuahuë', co yonquiréhuahuë'. Co yanatéréhuahuë'. Sopai nonpintérinpoo' ni'ton, nisha nisha nicacaso' nohuantéréhu'. Ma'pitasona pa'yatacasoáchin yonquiréhu'. A'na piyapi ma'shanënpita noyapatéréhu'. Nino'huitéhu', co niquë'yaréhuahuë'. No'huípiro' ninéhu'. Inapoatéhu', topinan quëran ya'huéréhu'.

⁴ Yosëso nípirinhue' nosoroatonpoo', catahuarinpoo'. Inaso' noya ni'ton, hui'nin a'paimarin nicha'ëinpoaso marë'. ⁵ Co canpoara noya ninéhuaso marë' nicha'ërinpoahuë'. Inaora nohuanton, Yosë nosoroatonpoo', nicha'ërinpoa'. Amatérëso pochin ya'ipi oshanënpoo' inquitérinpoo'. Oshanënpoo' inquitatonpoo', anasitaantarëso pochin nasha cancan quëtérinpoo'. Ispirito Santo nohuanton, ina pochin cancantéréhu'. ⁶ Quisocristo anoyacancantérinpoo' ni'ton, Ispirito Santo a'patimarinpoa' ya'coancantinpoaso marë'. Noyá ya'coancantohuachinpoa', na'con catahuarinpoo'. ⁷ Napoaton iporaso' Yosë noya ni'ninpoa'. Iráca oshahuanpiréhuahuë', inaora nohuanton, nosoroatonpoo', nanan anoyatérinpoo'. "Huëntonënquë aya'coninpoa' ni'ton, a'na tahuëri ya'huérin'pa' ya'huëcontarihua', ta'tehua', ninaréhu'. Inatohua' nanopimiatarihua'.

⁸ No'tequen sha'huitéranquen. Quémanta' inachachin a'chintéquë', ténahuë. Pënénáquë' ya'ipi imapisopita noya nicacaiso marë'. A'chintéranchinquënsoso' nónya imacaso'. Natéhuatéhu', noya noya ya'huarihua'. ⁹ A'naquen co noyahue' yonquiatona', nisha nisha nonpi. Cotio mashocoro'sa' yonquiatona', inahuara yonquinëna quëran nisha nisha a'chinpi. Cotioro'sa' iráca pënëntopiso' nisha nisha a'chinatona', nino'huipi. Ama inapita natancosohuë'. Ina pochin ninontohuachinara, topinan quëran ninontopi. Co manta' catahuarinpooahuë'. Yosë nanaménáchin imacaso' ya'huérin.

¹⁰ A'na piyapi nisha nanan a'chinpachin, imapisopita nisha nisha ayonquirin. Inaso' pënénquë' no'tequen a'chinchin. Co yanatéhuachinquënhuë', naquéranchin pënëantaquë'. Ina quëran co yanatéantahuachinquënhuë', sha'huitéquë' ta'chin. Ama insoari téranta' ina natéinasohuë'. Ama huachi imarinso pochin ni'cosohuë'. ¹¹ Nisha nisha yonquiaton, nitapicanarin. Co noyahue' cancantaton, inaora nina'intarin.

Nisha nisha pa'pisopita

¹² Artimasë a'pataranquen. Co ina nanitohuachinhue', Tiquico pa'sarin. Cantonpach-inquen, manoton Nicoporísquë huëcaton, ni'quico. Inaquë o'napi na'huëanatarahuë.

¹³ Sinasë, Aporosë, inapita cantonpachinquënen, noya nontéquë'. Sinasëso' coisë catahuana'pi. Yapa'pachina', catahuauquë' noya pa'ina'. Ma'sha pahuantohuachina', quëtéquë' ama pahuanchinasohuë'. ¹⁴ Ya'ipi imapisopitanta' sha'huitéquë' noya niina'. Pahuantérinsopita catahuaina'. Inapotohuachina', co topinan ya'huapihuë'.

Tiquiapon pochin sha'huirinso'

¹⁵ Ca'taninacosopita yonquiaténénquen, saludos a'patarinénquen. Ya'ipi imaramasopita yonquiarainquëma'. Noya ya'huëco' canpitanta', ténai. Quisocristo imarama' ni'ton, nosororamaco. Yosë inaora nohuanton, noya catahuainquëma'. Nani ninshitéranchinuachi.

Paonori Pirimon ninshitërinso'

Tashinan pëi quëran ninshitaton a'patërinso'

¹ Iya Pirimon, ca Paonoco ninshitaranquën, ni'quë'. ¿Noya quëmanta' ya'huanan? Noya canta' ya'huarahuë. Quisocristo nanamën a'chinahuëso marë' tashinan pëiquë po'morinaco. Iya Timotioro'co nanan a'patarainquën. Nosororainquën iyasha. Quëmanta' catahuarancoi a'china'huaiso marë'. ² Imoya Apianta' yonquiato, ninshitaranquëma'. Arquiponta' yonquirai. Yosë nanamën a'chinpatora, inanta' na'con catahuarincoi. Parisitaponahuë', noya ahuantérin. Ya'ipi imapisopita quëma pëinënquë niyontonpiso' na'con yonquirai. Iso quirica nontëquë' inapitanta' nataina'. ³ Tata Yosë inaora nohuanton, na'con catahuainquëma'. Asanocancainquëma'. Sinioro Quisocristonta' inachachin catahuainquëma'.

Imarinso marë' noya cancantërinso'

⁴⁻⁵ Nani tahuëri iyasha quëma marë': Yosë nontërahuë. Quisocristo noya natëran. Naporahuaton, ya'ipi imapisopita nosororan, natantërahuë. Ina marë' "Yosparinquën Sinioro," itërahuë. ⁶ Quisocristo imaton, a'napitanta' catahuaran imacaiso marë'. Napoaton ina yonquiato, Yosë nontërahuë: "Catahuaquë' Sinioro Quisocristo imaton, noya noya yonqui'in. Ya'ipi ina yonquirincoiso' nitochin," itërahuë. ⁷ Ya'ipi imapisopita nosoroaton, quëmari achinicancanan. Noya noya cancantapi. Ina natantahuato iyasha, canta' noya cancantërahuë. Achinicancananco canta'.

Onisimo marë' nontërinso'

⁸ Iporaso' pi'pian sha'huichinquën ma'sona noya nicamaso'. Quisocristo acorinco nanamën a'china'huaso marë'. Chiníquen nanan quëtérinco ni'ton, nohuantërahuë naporini, camai'tënquënhuë'. Nipirinhuë' co nohuantërahuë'. ⁹⁻¹⁰ Nani caso' mashotërahuë. Quisocristo imarahuëso marë' tashinan pëiquë po'morinaco. Napoaton iyasha nosoroatanco, Onisimonta' nosoroquë', tënahuë. Tashinan pëiquë ya'huasoco, inaso' ni'quirinco. Co hui'nahuë chachinhuë' nipirinhuë', pënënpatëra, inanta' Quisocristo imarin ni'ton, hui'nahuë pochin ni'nahuë.

¹¹ Iráca Onisimo pa'anán asacatacaso marë'. Hua'anëntopiranhuë', co noya catahuanquënhuë'. Ta'anapirinqueñ. Iporaso nipirinhuë' Quisocristo imaton, noya catahuanquë. Quëmanta' noya catahuaarinquën huachi, tënahuë. ¹² Noya catahuapirincohuë', apira a'pataranquën. Na'con nosoropirahuë', quëma piyapinën ni'ton, nani sha'huitërahuë ya'huëranquë panantacaso marë'. Ca pochachin cancantaton, noya ni'quë'. ¹³ Isëquë quëparitacaso' nohuantopirahuë', a'pataranquën. Quisocristo nanamën a'chinahuëso marë' tashinan pëiquë ya'huarahuë. Quëmanta' isëquë ya'huanan naporini, catahuaitoncohuë', tënahuë. Onisimo quëma ya'huërenamën pochin catahuanco ni'ton, co yaa'paporahuë', a'pataranquën. ¹⁴ Isëquë quëparitacaso' nohuantopirahuë', co quëma nohuantomaranhuë' ta'to, a'pataranquën. ¹⁵ Yosë nohuanton, ta'anapirinqueñ nimara Quisocristo nohuitacaso marë', tënahuë. Co hua'qui' patërinquënhuë'. Iporaso' paahuamantarinquën inaquë ya'huëmiatacaso marë'. ¹⁶ Quëma marë' sacatopirinhuë', ama huachi piyapinën pochin ni'quësohuë'. Piyapinën niponahuë', iporas' noya noya ni'quë'. Quisocristo imarin ni'ton, iyanpo pochachin nosoroquë'. Cariso' na'con nosororahuë. Quëmaso' aquëtë huarë' na'con na'con nosoroquë', tënahuë.

¹⁷ Canposo' Quisocristo imatë', noya nipayarë'. Napoaton Onisimo cantonpachinquën, noya nontëquë'. Ca nosororancoso pochin inanta' nosoroquë'.

¹⁸ Tëhuëhuachinhuë nipon, nihuihuachinquënhuë nipon, sha'huitoco carinquën pahuëre'inquëñ. ¹⁹ Caora imirahuë quëran no'tëquëñ ninshitaranquën. Tëhuëncachin

pahuérëaranquën. Isonta' iyasha yonquiquë'. Co a'chintëranquënhuë' naporini, co Yosë anoyacancanchitënquënhuë'. Napoaton quëmanta' nihuirancoso pochin nipuranhue', co manta' ma'paranquënhuë', tēnahuë. ²⁰ Napoaton iyasha ninshitaranquën. Quisocristo imaran ni'ton, Onisimo nosoroquë'. Noya nontohuatan, canta' nóya cancantarahuë. Inapoaton, achinicancanco topirahuë'.

²¹ "Yosë natëton, Onisimo noya nontarin," ta'to, ninshitaranquën. Pi'pian sha'huitopiranquënhuë', quëmariso' na'con na'con catahuaaran, tēnahuë. ²² Naporahuaton, quëma pëinënquë a'na patoana tapatoco. Ca marë' Yosë nontërama' ni'ton, ocoiarinaco nimara, tēnahuë. Tashinan pëi quëran pipihuato, nicaponquën pa'sarahuë.

Tiquiapon pochin sha'huirinso'

²³ Iya Ipapërasë saludos a'patarinquën. Inanta' Quisocristo imarin ni'ton, tashinan pëique ya'huarin. ²⁴ Marco, Aristarco, Timasë, Nocasë, inapitanta' yonquiatënënquën, saludos a'patarinënquën. Inapitaso' catahuarinaco Yosë nanamën a'chinacaso'. ²⁵ Inaora nohuanton, Sinioro Quisocristo noya catahuainquëma'. Nani huachi.

Paono

Cotioro'sa' Quisocristo imapisopita a'na piyapiri ninshitérinso'

Yosë nanamën anitotérinpoaso'

¹ Iráca quëran huarë' Yosëso' nanamën anitotérinpoa'. Shimashonënpoapita, pënëntona'piro'sa quëran na'aro anitotérin. Naporahuaton nisha nisha quëran anitotérin. Co a'naromaráchin ya'ipi anitotérinhue'. ² Iporaso nipurinhue', hui'nin quëran nontérinpoa'. Iráca Yosëri sha'huitohuachina, Quisocristori isoro'pa', inápaquë ya'huërinsopita, ya'ipi ninin. A'na tahuëri Yosë nohuanton, ya'ipi hua'anëntarin. ³ Inaso' pa'pin pochachin noya nóya ninin. Ina pochachin ni'ton, inasáchin Yosë no'téquen anohuitérinpoa'. Chiníquen nanantérin ni'ton, ipora huanta' ina nohuanton, ma'sha ya'huërarin. Co yonquirinpoahuë' naporini, ya'ipiya ta'huanchitërihuahuë'. Iráca oshanënpoa' inquitinpoaso marë' chiminin. Chiminpirinhue', nanopiantarahuaton, inápaquë panantararin. Inaquë panantarahuaton, Yosë inchinanëñ quëran huënsërin. Chiníquen nanantaton, hua'anëntarin.

Quisocristoso' noya noya ninin

⁴ Yosë hui'nin ni'ton, anquëniro'sa quëran chini chiníquen nanantérin inaso'. Yosëri acorin ni'ton, inaso' noya noya. ⁵ Iráca Yosëri sha'huitérin. Quiricanënquë naporin:

"Quëmaso' hui'nahuënquë. Ipora chachin noya nicatënquë, acoaranquëñ piyapi'sa' hua'anëntamaso marë', itérin. Ina quëran taantarin:

"Ca hui'nahuë inaso'. Caso' ina pa'pinco," ténin. Co inso anquëni téranta' ina pochin nontérinhue'.

⁶ Hui'nin chachin nipurinhue' isoro'paquë a'paimahuachina, chini chiníquen nanan quëtaton, tapon:

"Ya'ipi anquëniro'sarinta' ina chinochina'," ténin.

⁷ Anquëniro'sa' yonquiaton, quiricanëñ quëran Yosë tapon:

"Anquëniro'saso' comisionëhuëpita. Cari camairahuë. Camaihuatëra, ihuan pochin a'naroáchin pa'pi.

A'naquëñ ca nohuanto, pën pochin nipi," ténin.

⁸ Hui'ninso nipurinhue', noya noya acorin. Ina nontaton, itapon:

"Quëmanta' Yosënquëñ ni'quëhuarë', ya'ipi hua'anëntaran. Co onporonta' pipiaranhue'. Piyapiro'sa' no'téquenáchin pënënararan ni'ton, noya nicaponëñ.

⁹ Noyasáchin yonquiaran. Co pi'pisha téranta' oshahuanamaso' yonquiaranhue'.

Napoaton noya ni'nanquëñ. Noya noya acoranquëñ ni'ton, ya'ipi nipayaransopita quëran noya noya cancantarán," itérin Yosëri. Quiricanënquë ninshitopi.

¹⁰ Ina quëran itantarin:

"Quëma Sinioro iráca isoro'pa' acoran. Pi'iro'të', tayora, yoqui, inapitanta' acoran.

¹¹ A'na tahuëri ya'ipi inapitasa' ta'huantarán.

A'morëso mocarinso pochin nisapi.

Quëmaso nipurinhue' ya'huëmiataran.

¹² A'morëso si'pirahuatë', të'yatérëso pochin ya'ipi ata'huantarán.

Nasha a'morëso pochin, ya'ipi nasha acoantarán.

Quëmaso nipurinhue' co onporonta' ta'huantaranhue'.

Co nishataranhue'. Inachachin ya'huërápon," itérin.

¹³ Ina quëran hui'nin itantarin:

"Chiníquen nanantaton, inchinanëhuë quëran huënsëquë'

ya'ipi inimiconënpita carinquen minsëchinquen," itérin Yoséri.

Co inso anqueni téranta' ina pochin nontérinhue'. ¹⁴ Inapitaso' inpriatonënpita pochin ni'ton, Yoséri camairin. A'paimarin imaréhuasopita catahuainpoaso marë'. Yosë chachin nicha'ësarinfoa'. Nani ina nitotérama'.

2

Ama Quisocristo nanamën a'poahuasohue'

¹ Nani no'ten nanan natanëhua' ni'ton, nanamën na'con na'con yonquia'ahua', ama pëshonacaso marëhuë'. Ni'cona canpitanta' ina naniantotama'. ² Iráca Yoséri anqueniro'sa' a'paimarin nanan sha'huitacaiso marë'. Natëcaso' ya'huërin ni'ton, co piyapi'sari natëhuachinahuë', Yoséri no'tequen ana'intérin. ³ Iporaso nimirinhue', Quisocristo a'paimarin noya nanan sha'huitiinpoaso marë'. Na'con nosoroatonpoa', yanicha'ërinpoa'. Hui'nin chachin ni'ton, co ina natëhuatëhuahuë', na'con na'con ana'intinfoaso' ya'huërin. Quisocristo chachin noya nanan sha'huirin. Ina quëran ca'tano'sanënpitari natanahuatona', inachachin sha'huitaantarínënpoa'. ⁴ Yoséri catastuarin ni'ton, ca'tano'sanënpita nani ma'sha nanitapapi. Ina nohuanton, Ispirito Santori catastuarin nisha nisha nitotacaiso marë'. A'naya a'naya catastuarin Yosë nohuantérino' nicacaiso'. A'naquen catastuarin cania'piro'sa' a'naroáchin anoyatacaiso'. A'naquëonta' catastuarin Yosë yonquirinso chachin nitotacaiso marë'. Ina nicatehual: "¡Ma noyacha Yoséri catastuarin paya! Ina nohuanton, no'tequen Yosë nanamën sha'huitérinënpoa'," tñehua'.

Quisocristo isoro'paquë o'marinfo'

⁵ Iráca quëran huaré' Yosë yonquihuachinpoara, co nohuantérinhue' anqueniro'sa' hua'anëntinfoaso'. A'na tahuëri nasharo'pa' nipachin, co inapita hua'anëntarinënpoahuë'. Ina sha'huitaranquëma'. ⁶ Iráca a'na piyapi naporinso' Yosë quiricanënqué ninshitopi:

"Topinan piyapicoi Siniro nimirihuë', na'con yonquirancoi. ¿Onpoatonso' nimara na'con nosororancoi? tñai yonquiatoi.

⁷ Quëma nohuanton, co anqueniro'sa pochin chiniquen nanantopiraihuë', co hua'quiya quëranhuë' chiniquen nanan quëtarancoi.

Noya noya acoarancoi.

⁸ Ya'ipi ma'sha hua'anëntarai," itérin. "Ya'ipimiáchin hua'anëntarai," topirinhue', iporaso' co piyapinfoa' ya'ipi ma'sha hua'anëntaréhuahuë'. ⁹ Quisososo nimirinhue' yonquia'ahua'. Inaso' isoro'paquë o'maton, piyapi chachin nasitimarin. Parisitaton, canpoa marë' chiminin. Napoaton Yoséri chiniquen nanan quëtérin ya'ipi hua'anëntacaso marë'. Inaora nohuanton, Yosë nosoroatonpoa', hui'nin a'patimarinpoa' ya'huëretinfoaso marë'. Ya'ipi piyapinfoa marë' chiminin.

Quisocristo parisitérinso'

¹⁰ Yoséri ya'ipiya ninin. Inasáchin yonquicaso marë' nininfoa'. Ina nohuanton, hui'nin parisitérin huëntonënqué aya'coinpoaso marë'. Na'aquenpoa' imaréhua'. Imapatéhua', anoyacancantérinfoa'. Hui'ninpita pochin Yosë ni'ninfoa'. Quisocristo parisitérin ni'ton nanitérin nicha'ëinpoaso'. Napoaton, "noya parisichin," tñin Yosë. Nosoroatonpoa', naporin. ¹¹ Anoyacancantuachinpoara, hui'ninpita pochin ni'ninfoa'. Canpoarinta' "Tata" itéréhua'. Napoaton Quisocristo co tapanatonhuë', iinpitaa pochin ni'ninfoa'. ¹² Quiricanënqué naporin:

"Piyapi'sa' iyahuëpita pochin ni'nahuë. Quëma nanamën, Siniro, a'chintarahuë. Niyontonpatéira, yonquiatéinquen, cantarai," tñin.

¹³ Inanta' piyapi ni'ton, itaantatarin:

"Canta' Tata Yosë natërahuë. Co naniantarincohuë', tñahuë," tñin.

Ina quëran itaantarin:

“Yosë nohuanton, a'naquën piyapi'sa' imasarinaco. Inapitanta' Yosë hui'ninpita pochin ni'nahuë,” ténin.

¹⁴ Piyapinpoa' ni'ton, nonënpoa' ya'huëtérinpoa'. Napoaton Quisocristonta' o'mahuachina, piyapi chachin nasitimarin. Inanta' nonën ya'huëtérin. Piyapi chachin niquimaton, chiminin. Canpoaso' sopai natëtöhua', oshahuanëhua' ni'ton, chiminarëhua'. Quisocristoso nimirinhue' oshanënpoa marë' chiminin. Canpoa marë' chiminaton, sopai minsérin. ¹⁵ Iráca quëran huarë' chimirin tē'huatérëhua'. “Chiminarihua' nimara,” ta'tëhua', tē'huarë'quënpoa chachin ya'huápirëhuahuë', Quisocristoso' nicha'ërinpoa'. Ina imapatëhua', co huachi tē'huatacaso' ya'huërinhuë'. ¹⁶ Co anquëniro'sa' catahuacaso marë' o'marinhue'. Piyapinpoa' catahuarinpoa' cha'ëcaso marë'. Apraan pochin noya cancantohuatëhua', catahuarinpoa'. ¹⁷ Napoaton isoro'paquë o'maton, piyapi chachin nasitimarin. Co piyapi pochin nasitérinhuë' naporini, co catahuainpoaso' nanichitonhue'. Piyapi pochachin inanta' ni'ton, noyá nohuitérinpoa'. Corto hua'an chini chiníquënanantérinso pochin nicaton, canpoa marë' Yosë nontarin nanan anoyatinpoaso marë'. Nosoroatonpoa', chiminin oshanënpoa' inquitinpoaso marë'. Inaso' co nonpintérinpoahuë'. ¹⁸ Inanta' sopairi ténihuachina, parisitérin ni'ton, yanopintérinso' ninatanin anta'. Napoaton sopai yaminsëhuachinpoa', ina nanitérin catahuainpoaso'. Catahuarinpoa' ama sopai natëcaso marëhuë'.

3

Moisësë quëran noya noya nininso'

¹ Imarama' ni'ton, Yosë anoyacancantérinquëma'. Huëntonënqué aya'coninquëma'. Napoaton iyaro'sa' Quisocristo na'con yonquico'. Yosëri a'paimarin nanamëen a'chintinpoaso marë'. Corto hua'an chini chiníquënanantérinso pochin acorin. Ina nohuanton, imarëhua'. ² Yosëri acohuachina, no'tequënatérin. Iráca Moisësënta' Yosë natëton, ya'ipi piyapinënpita catahuarin. ³⁻⁴ Quisososo nimirinhue', Moisësë quëran chini chiníquënanantérin. Ni'co'. Yapéihuachinara, co pëi' inaora ya'huërinhuë'. Piyapiri nipachina, inari hua'anëntérin. Inapochachin Yosëri ya'ipiya ninin ni'ton, ya'ipi hua'anëntérin. Quisocristonta' Yosë hui'nin ni'ton, chiníquënanantaton, ya'ipi hua'anëntérinpoa'. ⁵ Moisësëso' inpriatonënpochin ninin. Yosëri acorin cotioro'sa' pënëncaso marë'. Ma'sona térranta' sha'huitohuachina, inachachin piyapi'sa' sha'huitantarín. ⁶ Quisocristoso nimirinhue' co inpriatohue'. Yosë hui'nin chachin ni'ton, chini chiníquënanantérin. Pa'pin natëton, nónya hua'anëntarinpoa huachi. Napoaton chiníquëcancantatëhua', chiminaquë huarë' Quisocristo natëahua'. “Co naniantarinpoahuë'” ta'tëhua', noya cancantahua'. Imamiatohuatëhua', piyapinënpita chachin nisarihua'.

Asanocancaninpoaso'

⁷ Napoaton iyaro'sa' yonquico'. Iráca Ispirito Santo nohuanton, Yosë noninso' quiricanënquë ninshitopi:

“Ipora tahuëri Yosë nontarinquëma'. Natanpatama', noya natëtoco'.

⁸ Ama naniantocosohue'. Iráca Moisësëri israiro'sa' quëpahuachina, shiashonënpoa' co natëtochináchinhue' cancantopi.

Inotëro parti ya'huasoi', na'con catahuapirahuë', co natërinacohuë'.

⁹ Ténihuachinaconta', ahuantérahuë.

Catapini shonca pi'ipi nani ma'sha sacai' nininso nimirahuë', co yanatërinacohuë'. ‘Co Yosë catahuarinpoahuë’, ta'tona', a'naquën a'porinaco.

¹⁰ Napoaton inapita no'huito, napotérahuë:

Isopita co onporonta' natërinacohuë'.

Co yanohuitérinacohuë'. Co iranëhuë pa'topihuë' ni'ton,

¹¹ no'tequën sha'huitérahuë. Noyeropaqüë ya'huëcaiso marë' yaquëtopirahuë', co imari-nacohuë' ni'ton, co huachi nohuantérahuë'.

Co onporonta' inaquë ya'huëcontapihuë'. Co inaquë sano cancantapihuë', ténin Yosë.

¹² Capitanta' iyaro'sa' a'nayanquëma téranta' co cancanëma quëran huarë' natéhuatamahuë', co noya cancantararamahuë'. Ni'cona Yosë chachin a'potama'. Inaso', iporahuanta' nanopiton ni'sárinpoa'. ¹³ Napoaton nani tahuëri nipënëncö'. Ipora chachin co'huara ayaro' tahuëri naniyatérasohuë', nicatahuaco' ama oshahuanacoso marëhuë'. Ni'cona oshanëma' ano'quihiachinquëma'. Inapotohuachinquëma', oshaquëran Yosë nariantarama' ni'ton, co natétochináchinhuë' cancantararama'. ¹⁴ Iráca Quisocristo natérëhua'. Chiminaquë huarë' noya imahua'. Co a'pohuatëhuahuë', Quisocristoré'quënpoa' ya'huëcontarihua'.

¹⁵ Quiricanënqué naporin:

"Ipora tahuëri Yosë nontarinquëma'. Natanpatama', noya natëtoco'.

Iráca shimashonëmapita co natétochináchinhuë' cancantopi. Ama inapita pochin cancantocosohuë', ténin.

¹⁶ ¿Inpitata' natanaponaraihuë', co yanatëpihuë'? Co'ta cotioro'sa chachin napopi. Moisésëri Iquipito quëran ocoirahuaton, quëpapirihuë', co yanatëpihuë'. ¹⁷ ¿Insopitata' catapini shonca pi'ipi Yosëri co noyahue' ni'nin? Co'tana inapita chachin os-hahuapi ni'ton, no'huiton, ana'intérin. Inotéro parti chachin ya'ipiya chiminpi.

¹⁸ Co'huara chimiyantérasoihuë', Yosëri sha'huitérin: "Noyeropaqüëtopiranquëmahuë', co natéramacohuë' ni'quëhuarë', co onporonta' inaquë ya'huëcontaramahuë', Co inaquë sano cancantararamahuë'. Ca Yosëco ni'to, no'tequën sha'huitaranquëma', ténin.

¹⁹ "Co Yosë nanitérinhuë' nicha'einpoaso'", topiso marë' co Yosëri catahuarinhuë'. Co ya'conpihuë' ni'ton, co sano cancantapihuë'.

4

¹⁻² Yosë nani sha'huitérinpoa'. "Ipora huanta' yacatahuanquëma' sano cancanta-camaso marë', itérinpoa'. Noya nanan nani natanëhua'. Iráca natanpirinahuë', co natëpihuë'. "Yosë no'tequën nontérinpoa'", co topihuë'. Topinan quëran natanpi ni'ton, co Yosëri anoyacancantérinhuë'. Ni'cona capitanta' topinan quëran natantama'. Co natéhuatamahuë', co sano cancantararamahuë'. ³⁻⁴ Iráca Yosëri itérin:

"Co cancanëma quëran huarë' yaimaramacohuë' ni'ton, no'huiranquëma'. Co onporonta' sano cancantararamahuë', ténahuë. Ca Yosëco ni'to, no'tequën sha'huitaranquëma', itérin.

Canpoaso niperinhuë' cancanënpoa quëran huarë' imapatëhua', huëntonënqué chachin aya'coninpoa'. Ina quëran sano cancantarihua'. Sano cancantohuatëhua', co huachi nisha nisha yonquiarihuahuë'. Yosëso' isoro'pa' ténirahuaton, chinotérin. Quiricanënqué sha'huitérinpoa':

"Iráca Yosëri isoro'pa' ninin. Saota tahuëri quëran nani ya'ipi tiquihuachina, tahuëririnquë sano cancantaton, chinotérin," ténin.

⁵ Naquëranchin quiricanën quëran tantarin:

"Co onporonta' ya'conatona', ca pochin sano cancantapihuë', ténin.

⁶ Cotioro'sa'ton noya nanan natanaponaraihuë', co natëpihuë' ni'ton, co ya'conpihuë'.

Napoaton ipora huanta' Yosë yonquiarien piyapi'sa' asanocancantacoso'. Iráca quëran huarë' yonquirinpoa' asanocancainpoaso'. ⁷⁻⁸ Moisésë chiminpachina, Cosoiri israiro'sa' hua'anëntantarín. Noyeropaqüë quëpapirihuë'. "Ya'conpatoi, sano cancantarai huachi," topirinahuë', co sano cancantapihuë'. Iráca Yosëri sha'huitérin. "Piyapi'sa' asanocancantarahuë," itopirinhuë', co cotioro'sa' ina pochin cancantapihuë'. Ina quëran na'a pi'ipi na'huërin piquëran Tapi tapon:

"Ipora tahuëri Yosë nontarinquëma'. Natanpatama', noya natëtoco'. A'naquën co natétochináchinhuë' cancantopi. Ama inapita pochin cancantocosohuë', ténin.

Cosoiri asanocancantérin naporini, co ina pochin Yosëri pënëintonhuë'. ⁹ Napoaton ipora huanta' Yosë nohuantérin asanocancainpoaso'. Yosë anoyacancantuachinpoa', sano cancantarihua'. ¹⁰ Iráca isoro'pa' tiquihuachina, Yosë chinotaton, sano cancantérin. Canpoanta' cancanënpoa quëran imapatéhua', inapochachin sano cancantarihua'. Yosë noya nohuitarihua'. ¹¹ Napoaton na'con yonquia'ahua' Yosë huëntonënquë ya'conacaso marë'. Iráca co natëtonahuë', co imamiatopihuë'. Ama inapita pochin cancantahuaso-huë'.

¹² Yosë nanamën chiníquën nanantérin. Yosë nanopiárin ni'ton, ipora huanta' quiricanëñ quëran nontarinpoa'. Noya natëhuatéhua', nanamën quëran chachin catahuarinpoa' noya noya imacaso marë'. Co'so' natëhuatéhuahuë', aquë aquëtë' co noyahue' cancantarihua'. Sahuëni cato quëran chachin to'nahuatéra, inëshin ni'ton, niahuepatëra, a'naroáchin nansë acopoquë huarë' nipë'sharë'. Inapochachin Yosë nanamëns' chini chiníquën ya'coancantérinpoa'. Ina yonquihiuatéhua', no'tequëñ nitotarihua'. Ya'ipi yonquiréhuaso chachin anitotérinpoa'. Yonquinënpoaquë ma'marësona naporëhuasopitanta' anitotarinpoa'. ¹³ Ya'ipi ninëhuasopita Yosëso' nitotérin. Po'oana quëran niperëhuahuë', ya'ipi ni'ninpoa'. Co pi'pisha térranta' inaso' nonpintarihuahuë'. Ya'ipi yonquiréhuasopitanta' noyá nitotérin. Ayaro' tahuëri ya'ipinpoa' ninëhuasopita aipitarinpoa'. Naporor' coisë pochin nontarinpoa'. Nontohuachinpoa', no'tequëñ sha'huitacaso' ya'huapon.

Corto hua'an chini chiníquën nanantérinso pochin nininso'

¹⁴ Iporaso' Quisoso imaréhua'. Yosë hui'nin chachin inaso'. Nani inápaquë panatarahuaton, Yosë'pa' ya'huarin. Corto hua'an chini chiníquën nanantérinso pochin Yosëri acorin catahuainpoaso marë'. Napoaton ama ina naniantatéhuahuë', imamiatahua'. ¹⁵ Inaso' ya'ipinpoa' noyá nohuitérinpoa'. Sopai yaminsérinpoasonta' nitotérin. Co chiníquën cancantéréhuahuë' ni'ton, sopai sha'huitarinpoa' ama Yosë natëcaso maréhuë'. Quisosonta' isoro'paquë nípon, sopairi na'con yanopintaton, nisha nisha sha'huitopirinhue' minsëcaso marë', co inaso' sopai natérinhuë'. ¹⁶ "Téhuëñchachin nosoroatonpoa', catahuarinpoa', ta'téhua', apira apira Yosë nontahua'. Nontohuatiéhua', oshanënpoa' inquitarinpoa'. Ma'sha onpohuatéhua', ina nontohuatiéhua', inaora nohuanton, catahuarinpoa' noya ahuantacaso marë'.

5

¹ Iráca Yosëri a'naya a'naya corto hua'an chini chiníquën nanantérinso' acorin ina marë' sacatacaso'. Inanta' piyapi níponahuë', a'napita piyapi'sa marë' Yosë nontérin. Co noyahue' nípachinara, chinotopiso pëiquë ma'sha quëpapi. Inaque corto hua'ani téparin oshanëna marë'. Ama Yosëri ana'intacaso maréhuë' inaporin. ² A'naquëñ piyapi'sa' co aquëtë' nitotatonahuë', co noyahue' nípi. Inapita huë'pachinara, corto hua'ani co chiníquën nontérinhuë'. Inanta' piyapi ni'ton, sopairi yaminsérin. Napoaton sanoanan quëran pënënin. ³ Inanta' oshahuanin ni'ton, inaora oshanëñ marë' ton ma'sha tépacaso' ya'huérin. Ina quëran a'napita oshanëna marénta' ma'sha tépaantarín.

⁴ Co inaora nohuanton, corto hua'an ya'coninhuë'. Yosë nohuanton, ya'conin. Iráca Aaron'ton Yosëri acorin. ⁵ Quisocristonta' co inaora nohuanton, corto hua'an chini chiníquën nanantérinso' ya'coninhuë'. Yosëri noya nicaton, itapon:
"Quëmaso' hui'nahuë chachinquëñ.

Ipora chachin acoaranquëñ piyapi'sa' anohuitancoso marë' , itérin. Quiricanënquë chachin naporin.

⁶ Ina quëran quiricanëñ quëran itaantarín:

"Na'a corto hua'ano'sa' ya'conpirinahuë', quëmaso' noya noya acoaranquëñ. Ya'ipi piyapi'sa marë' nontaranco.

Miriquiso pochin nisaran. Co onporonta' pipiaranhue', itérin.

⁷ Quisocristo isoro'paquë o'marahuaton, piyapi chachin nasitimarin. Yatëpahuachinara, chiníquën Yosë nontérin. Na'nëton, itapon: "Quëma nohuantohuatan Tata, nicha'ëco, ama tëpa'inacosohuë'. Nipirinhue', co quëma nohuantohuatanhuë', ma'sona yaonpoto-huatancinta' noya," itérin. No'tequën yanatérin ni'ton, Yosëri natanaton, catahuarin noya natëcaso'. ⁸ Yosë hui'nin chachin níponahuë', piyapi pochachin parisitérin. Co oshahuanaponahuë', piyapi ni'ton, parisitérin quëran noyá nitotérin Yosë natëcaso'. ⁹ No'tequën natëton, canpoa marë' chiminin. Napoaton nanitérin anoyacancantinfoaso'. Ina natëhuatéhua', noya nicha'ësarinfoa' nanopimiatacaso marë'. ¹⁰ Yosë nohuanton, Quisocristo corto hua'an chini chiníquën nanantérinso pochin ya'conin. Miriquiso pochin ninin.

Ama Yosë a'pocaiso marëhuë' pënënins'

¹¹ Iráca ninopiso' na'con yaa'chintopiranquëmahuë'. Co natantochináchinhue' cancantatoma', co yanatantéraramahuë' ni'ton, sacai' a'chinta'huanquëmaso'. ¹² Hua'qui Yosë nanamën natanapomarahuë', co nanitéraramahuë' Yosë no'tequën natëcamaso'. Noya yonquiatoma', a'napita a'chintacamaso nípirinhue', co no'tequën yonquiyátéraramahuë'. Ya'nan a'chintéraranquëmaso' naquéranchin a'chintanta'huanquëmaso' ya'huërin. Co inapita térranta' cancanëma quëran huarë' yanatéraramahuë'. Hua'huaro'sa pochin cancantatoma', co nanitéraramahuë' ya'ipi Yosë nanamën yonquicamaso'. Ni'co'. Canopia'huaya sho'shoráchin yonquirin. Co nanitérinhue' coshatacasó'. ¹³ So'soquë huarë' coshatérin. Canpitaso' co noyahue' yonquiatoma', canopia'huaya pochin yonquiconama'. Co nanitéraramahuë' no'tequën yonquicamaso'. ¹⁴ Chinotonosaso nípirinhue', cosharomia ca'pi. Inapochachin noya noya imapisopitaso' no'tequën yonquiaipi. Noya nicacaso' no'quitona', co noyahue' nininso' a'naroáchin a'porapi.

6

¹ Napoaton noya so'sorinso pochin noya noya imahua'. Ya'ipi Quisocristo nanamën yonquia'ahua'. Ya'nan a'chintohuatéinquëmara, co sacaihuë' nininsopita'ton a'chintérainquëma'. "Co noyahue' nípatama', parisitopique pacacaso' ya'huërin ni'ton, ya'ipi co noyahue' yonquiramasopita naniantoco'. Naporahuaton, Yoséichin natëco'," itérainquëma'. ² Ina quëran aporihuanacasonta' a'chintérainquëma'. Naporahuaton, "Nani imapachina', së'huamotorahuatoma', Yosë nontoco' inari catahuacaso marë'," itérainquëma'. Ina quëran Yosë ananpitaantainpoaso ya'huërinsonta' a'chintérainquëma'. "Ayaro' tahuëri ya'ipinpoa' no'tequën sha'huitarinpoa'. Co noyahue' nípisopita ana'intomiatarin," itérainquëma'. Ya'nan imapoma', inapita'ton anitotérainquëma'. Inaso' noya nípirinhue', co inaíchin yonquicaso' ya'huërinhue'. ³ Ya'ipi Quisocristo nanamën yonquia'ahua' noya noya imacaso marë'. Yosë nohuantohuachin, oshaquëran ina a'chintanta'inquëma'.

⁴ Ama Quisocristo a'pocosohuë'. Ina a'pohuatama', co nanitérinhue' anoyacancantin-quëmaso'. A'naquën Quisocristo nanamën nani nitotopi. "Quisocristo nicha'ësarinfoa'", ta'tona', imapi. Cosharo' pi'nirëso pochin pi'pian nohuitopi. Ispirito Santori chachin catahuarin. ⁵ Yosë nanamën noya natanpi. Yosë chiníquën nanantaton catahuarinsonta' nícaponaraihue', ⁶ Quisocristo a'pohuachina', ¿incaricha anoyacancantérë'poiya? Co huachi nanitapihue' cha'ëcaiso'. Yosë hui'nin chachin canpoa marë' chiminin. Co ina nohuantohuachinahuë', naquéranchin corosëquë patanantopiso pochin cancantapi. Ina a'pohuachina', piyapisari Quisoso têhuapona'. ⁷ Ni'co'. Ya'pirin sha'patëra, o'nán ya'huëhuachina, papotérin. Hua'anénso' inaquë sacatarin. Noya nitohuachina, noya cancantérin. "Yosë nohuanton, noya papotérin," ténin. ⁸ Nípirinhue', nahuan, shihuarin, inapitasáchin papotohuachina, co manta' nitérinhue'. "No'pa' napoonin," topatëra, tananpitérë huachi. Inapochachin Yosë na'con catahuarinpoa'. Noya imapatéhua', Yosë noya ni'sarinfoa'. A'naquënso nípirinhue' nahuan, shihuarin, inapita papotérinso

pochin nicatona', topinan quëran ya'huëpi. Co Yosë yonquipihuë'. Inapitaso' Yosëri tananpitérin. A'na tahuëri parisitopiquë a'parahuaton, pën quëran ana'intarin.

Co Yosë nariantérinpoasohuë'

⁹ Chiníquën iyaro'sa' pënënpiranquëmahuë', nosororanquëma'. Co Yosë a'poaramahuë'. Noya imatoma', cha'ësarama' ténahuë. ¹⁰ Yosë co topinan ana'intarinquëmahuë'. Iráca noya ninama'. Imapisopita nosoroatoma', catahuarama' noya imacaso marë'. Ipora huanta' noya ninosoroarama' ni'ton, co Yosë nariantarinquëmahuë'. ¹¹ Chiníquën cancantatoma', ya'ipinquëma' imamiatoco'. "Yosë co nariantarinpoahuë'. A'na tahuëri ya'huërin'pa' quëpantarinpoo', ta'toma', chiminaquë huarë' nóya imaco'. ¹² Ama amito-marahuë', na'con Yosë yonquico'. Noya natëpisopita nonanco'. Inapitaso' imamiatapi. "Yosë no'téquën nontérinpoa', ta'tona', noya natëapi. Ma'sha onpoaponaraihuë', noya ahuantapi. Iráca Yosëri sha'huitérinso chachin ninapi.

¹³⁻¹⁴ Apraan yonquico'. Iráca Yosëri itérin: "Caso' Yosëco ni'to, no'téquën nontéranquën. Quëma na'con catahuaaranquën. Ca nohuanto, a'na tahuëri hui'nan ya'huëtarinquën. Naporahuaton, oshaquëran notohuaro' shiparinpitanta' ya'huëtarinquën," itérin. Yosëso' chini chiníquën nanantérin. Co a'na' ya'huërinhuë' ina quëran chini chiníquën nanantérinso'. Napoaton: "Caso' Yosëco ni'to, no'téquën nontéranquën," itérin. ¹⁵ Itohuachina, Apraani Yosë natérin. Hua'qui' co hui'nin ya'huëtopirinhuë', noya cancantaton, ninarárin. "Co Yosë nonpintérincohuë", ta'ton, natérin. Napoaton napoin quëran hui'nin nasitérin. ¹⁶ Co piyapi yanatéhuachinpoarahuë', "Yosë ni'sárinco, no'téquën nontaranquën," ténéhua'. Ina pochin nontohuatéhua', natérinénpoa'. "No'téquën nontérinpoa'", topi. ¹⁷ Yosë co onporonta' nonpintérinpoahuë'. Sha'huitérinpoaso' co onporonta' nishatérinhuë'. Napoaton noya nanan sha'huitohuachinpoa': "Caso' Yosëco ni'to, no'téquën nontéranquëma'. Nicha'ësaranquëma', itérinpoa'. ¹⁸ Yosë chachin sha'huitérinpoa'. Naporahuaton "Caso' Yosëco ni'to, no'téquën nontéranquëma", itoman-tarinpoa'. Napoaton co onporonta' nonpintarinpoahuë'. Co pi'pian térranta' nishatapon-huë', ténéhua'. Ina yonquiatéhua', chiníquën cancantahua'. Iráca Yoséíchin imaréhua' catahuainpoaso marë'. "Nicha'ësarinpoa", ta'téhua', ya'ipi cancanénpoa quëran imahua'. ¹⁹ Ni'co'. Nanchaquë pa'pachinara, a'na tahuëri panca ihuan nacapipi. Chiníquën co'sacaitérin. Naporo' hua'na quëquën nininso' a'sonahuatona', tē'yaitopi. Acopoi' no'paquë ni'toromahuachina, sano yanponin. Co co'sacairi térranta' chi'huincarinhuë'. Inapochachin canpoanta' a'na tahuëri ma'sha onporéhua', parisitérehua', sétéréhua', naporéhua'. Inapohuatéhua', Yosë yonquia'ahua'. "Inaso' no'téquën nontérinpoa'. Nicha'ësarinpoa'. Co onporonta' nariantarinpoahuë", topatéhua', sano cancantari-hua'. Yosëso' co quënanarihuarahuë', inápaquë ya'huárin. Ina yonquiatéhua', ninaréhua'. ²⁰ Quisoso'ton nani inápaquë panantarín tapatinpoaso marë'. Inaque' ya'huëmiatarin. Corto hua'an chini chiníquën nanantérinso pochin ni'ton, canpoa marë' Yosë nontarin. Miriquiso pochin ninin. Co onporonta' pipiarinhuë'.

Quisocristo Miriquiso pochin nininso'

¹ Miriquisosó' iráca ya'huérin. Co cotio piyapihuë' niponahuë', noya Yosë imarin. Sarimoquë ya'huëpisopita hua'anéntérin. Naporahuaton, Yosë nohuanton, corto hua'an ya'conin. Piyapi marë' Tata Yosë nontérin. Iráca Apraani nohuitérin. Inimico copirnoro'sa' minsérahuate, o'mantahuachina, Miriquisori nacapirin. Nacapirahuate, Apraan noya nontérin. Ina quëran corto hua'an ni'ton, Yosë nontérin Apraan noya noya ya'huëcaso marë'. ² Nani nontohuachina, Apraani nani ma'sha canarin quëran diesmo Yosë marë' acorinso' quëtérin. Miriquisosó' nóya hua'an. Nininén chachin "hua'an noya nicacaso' yonquirinso" tapon naporin. Naporahuaton, Sarimo hua'an

ni'ton, "hua'an sano cancantérinso" tapon naporin. ³ A'shin, pa'pin, shimashonënpita, inapita co nohuitéréhuahuë'. Onporosona nasitérinso', onpo pi'ipi quëransona chimininso', inapita co nitotéréhuahuë'. Co Yosë quiricanën quëran sha'huitérinpoahuë'. Piyapi marë' Yosë nontárin. Co Yosëri ocoirinhue' ni'ton, pi'pian Yosë hui'nin pochin ni'nin. Nanpiárin pochin cancantéréhua'.

⁴ Iráca na'a corto hua'ano'sa' ya'huëpirinahuë', cotioro'saráchin ya'conpi. Miriquisoso nipurinhuë' nisha piyapi. Co cotio quëmapihuë' niponahuë', a'napita corto hua'ano'sa quëran chini chiníquën nanantérin. Apraani noya ni'nin. Apraan'ton Yosëri acorin piyapinënpita nicacaso marë'. Inaso' chiníquën nanantérin, ténéhua'. Napoaponahuë', inimiconënpita ma'shanëna' matérin quëran, diesmo ocoirinso' Miriquiso quëtérin. Inaso' corto hua'an ni'ton, ma'parin. ⁵ A'na cotio huënton Nihuiro'sa' itopiso'. Iráca Yosë nohuanton, Moisëséri sha'huitérin. "Nihuiro'saráchin corto hua'an ya'coina'. Inapita chinotopiso pëiquë pa'pachina', piyapi marë' Yosë nontapi," itérin. Ina quëran piyapi'sa' itantarín: "Yosë nohuanton, nani ma'sha ya'huëtarinquëma'. Napoaton diesmo quëtoco'. Corto hua'an ma'pahuachinquëma', quëtoco'," itérin Moisëséri. Quëmopinënpita niponahuë', Yosë nohuanton, ma'parin. ⁶ Miriquisoso' co cotio quëmapihuë' niponahuë', diesmo Apraan ma'parin. Naporahuaton, ina marë' Yosë non-tahuaton, "Yosë noya catahuainquën," itérin. Yosëri chachin Apraan nani sha'huitérin noya catahuacaso marë'. ⁷ "Chini chiníquën nanantohuatéra, a'napita marë' Yosë nontérë', 'Yosë noya catahuainquën,' itérë'," ténéhua'. Napoaton Apraan quëran Miriquisoso' chini chiníquën nanantérin. ⁸ Isoro'paqué corto hua'ano'sari diesmo ma'patopirinahuë', inapitanta' piyapi'sa' ni'ton, chiminpi anta'. Miriquisoso nipurinhuë' nanopiarin pochin cancantéréhua'. Yosë quiricanën nontéréhua' quëran, naporéhua'. ⁹⁻¹⁰ Nihuiro'saso nipurinhuë' Apraan shinpita. Corto hua'an ya'conpi ni'ton, diesmo ma'patopirinahuë', co Miriquiso pochin chiníquën nanantopihuë'. Co'huara Nihui shinpita nasichátéraponahuë', Apraani Miriquiso quënanahuaton, diesmo quëtérin. Ni-huiro'sa' ya'huërénamën quëtérin.

¹¹ Iráca Aaron'ton corto hua'an ya'conin. Ina quëran a'naya a'naya Nihuiro'sa' huënton quëran niya'huëretéra'piapi. Naporo' Yosëri, pënëntérinso' nanan sha'huitérin ya'ipi israiro'sa' imacaiso marë'. Nihui corto hua'ano'sa' nanan anoyatérinënpoa' naporini, ¿ma'marëta' a'na corto hua'an Miriquiso pochin nininso' huëcacaso' ya'huëitonhuë'? ¹² Nisha corto hua'an ya'compachina, nisha nanan pënëninpoa'. ¹³⁻¹⁴ Quisocristoso' co Nihui huëntonquë nasitérinhuë'. Cota huëntonquë nasitérin. Inapitaso' co onporonta' corto hua'an ya'compipihuë'. Co ina pochin Moisës pënëntérinhuë'. Napoaton Quisocristo co corto hua'an ya'coninhuë', ténahuë.

¹⁵ Inaso' isoro'paqué o'marin ni'ton, nasha nanan sha'huitérinpoa'. Corto hua'an pochin canpoa marë' Yosë nontárin. Miriquiso pochin co onporonta' pipiarinhuë'. Ina yonquihiuatéhua', naporinso' no'tequën anitotérinpoa'. ¹⁶ Co Nihuiro'sa' huënton quëran ya'compiso pochin nininhuë'. Inaso' chiminaponahuë', nanopiantarahuaton, ya'huëmiatarin. Napoaton chiníquën nanantaton, noya noya ya'conin. ¹⁷ Yosë quiricanën quëran naporin:

"Na'a corto hua'ano'sa' ya'conpirinahuë', quëmaso' noya noya acoaranquën inapita ya'huëretacaso marë'.

Ya'ipi piyapi'sa marë' nontaranco. Miriquiso pochin nisaran. Co onporonta' pipiaran-huë'," itérin Yosëri.

¹⁸ Iráca corto hua'ano'sa' pënëntérinso' nanan imapirinahuë', co oshanëna' inquitérinhuë'. Co tēhuëñchachin catahuarinhuë'. Napoaton co imacaso' ya'huërinhuë'.

¹⁹ Moisës pënëntérinso' nanan co manta' anoyatérinhuë'. Quisocristoso nipurinhuë' anoyacancantérinpoa'. Anoyacancantuachinpoa', nanitéréhua' Yosë nohuitacaso'. Huëntonquë chachin aya'coninpoa'. Inaso' noya noya, ténéhua'.

20-21 Iráca na'a cotioro'sa' corto hua'an ya'conpi. Yosëri acopirinhuë', co ya'huëmiatopihuë'. Nipirinhuë', Quisocristo yaa'paimahuachina, itapon: "Caso' Yosëco ni'to, no'tequën nontaranquën.

Ipora quëran huarë' corto hua'an chini chiniquën nanantérinso pochin nicaton, piyapi marë' nontaranco huachi.

Ya'huëmiataran. Co onporonta' nisha acoaranquënhuë", itérin Yosëri.

22 Napoaton Quisocristoso', nasha quëran canpoarë' anoyatérin. Co nonpintarin-poahuë'. Co onporonta' nisha sha'huitarinpoahuë'. Ina anoyatérinpoaso' noya noya. Pénentérinso' nanan iráca imapisoso', co onpopinchin noyahue'. **23** Iráca na'a corto hua'ano'sa' ya'conpirinahuë', niya'huëretéra'piapi. A'na chiminpachina, a'na ya'coantarín. Ina chimiantahuachina, a'nanta' ya'coantarín. **24** Quisocristoso nipurin-huë' nanopiantarahuaton, ya'huëmiatérin ni'ton, canpoa marë' Yosë nontárin. Co incari téranta' ya'huëretérinhuë'. **25** Napoaton nanitérin noyá nicha'ëinpoaso'. "Quisocristoíchin anoyacancantérinpoa'", ta'tehua', Yosë imaréhua'. Iporahuanta' Quisocristo nanopiárin catahuainpoaso marë'. Nani tahuëri canpoa marë' Yosë nontárin.

26 Quisocristoíchin nanan anoyatérinpoa'. Inaso' corto hua'an chini chiniquën nanantérinso pochin nicaton, noya ninin. Co pi'pian téranta' oshahuaninhuë'. Co né'huëtérinso pochin ninihuë'. Co oshahuano'sa pochin cancantérinhuë'. Inápaquë panantahuachina, Yosëri chini chiniquën nanan quëtérin. **27** Co inaso' a'napita corto hua'ano'sa pochihuë'. Inapitaso' oshahuanatona', inahuara oshanëna marë'ton ma'sha tēpapi. Ina quëran piyapi'sa' oshanëna marënta' ma'sha tēpaantapi. Nani tahuëri naporápi. Quisocristoso nipurinhuë' co oshahuanatonhuë', co ma'sha tēpacaso' ya'huërinhuë'. Inaora nohuanton, canpoa' ya'huërenamënpoa' chiminin. A'naroíchin chiminaton, nanitérin ya'ipi oshanënpoa' inquitinpoaso'. **28** Iráca Moisésë pénentérin quëran na'a quëmapi'sa' corto hua'an ya'cona'piapi. Inahuanta' co noyahue' cancantatona', oshahuanpi. Ina piquëran Yosësa' hui'nin chachin acorin. "Co onporonta' nisha acoaranquënhuë", itaton, oshanënpoa' inquitinpoaso marë' acorin. Inaso' noyasáchin ninin. Co onporonta' oshahuanaponhuë'. Napoaton noya catahuainpoa'.

8

Quisocristo nasha quëran anoyatérinso'

1 No'tequën sha'huitaranquëma'. Quisocristo inápaquë panantaruahuaton, Yosë inchinanën quëran chachin huënsérin. Corto hua'an chini chiniquën nanantérinso pochin ni'ton, nanan anoyatérinpoa'. **2** Iráca cotioro'sa' chinotopiso pëi' nipi Yosë chinotacaiso marë'. Inápaquë ya'huërinso chachin nonanpi. Inaquë corto hua'ano'sari piyapi'sa marë' Yosë nontopi. Quisocristoso nipurinhuë' inápaquë Yosëri acorinquë chachin canpoa marë' ina nontárin. Inaquëso' noya noya catahuainpoa'.

3 Iráca corto hua'ano'sa' ma'sha tēpapi piyapi'sa' oshanëna marë'. Quisocristoso nipurinhuë' inaora nohuanton, chiminin oshanënpoa' inquitinpoaso marë'. **4** Ipora huanta' isoro'paquë ya'huërin naporini, co corto hua'an ya'cointonhuë'. Cotioro'sa' iráca nanan imatona', corto hua'ano'sa' ya'huëtapi ma'sha tēpacaiso marë'. **5** Corto hua'ano'saso chinotopiso pëiquë Yosë marë' sacatopi. Inaso', inápaquë ya'huërinso chachin nonanpiso'. Iráca chinotopiso pëi' yanipachinara, Yosëri Moisésë itérin: "Chinotamacoso marë' né'mëtë pëi' nico'. Motopiquë a'noteranquënsa chachin niquë", itérin. **6** Quisocristoso nipurinhuë', Yosë ya'huërinquë chachin panantaruahuaton, nanan anoyatérinpoa'. Cotioro'saso' iráca anoyatérinso imapirinahuë', Quisocristoso' nasha quëran anoyatérinso sha'huitérinpoa'. "Oshanëma' inquitaténquëma', anoyacancantaranquëma'", itérinpoa' ni'ton, inaso noya noya, ténahuë.

⁷ Iráca anoyatérindo natéröhua quëran noyápiachin cancantéröhua' naporini, co nasha quëran anoyatacaso ya'huéitonhué'. ⁸ Iráca anoyatérindo imaponaraihué', co noya cancantopihué' ni'ton, quiricanën quëran Yosëri sha'huitérin:

"A'na tahuëri ca nohuanto,
ya'ipi piyapinëhuépitare'co nasha quëran anoyatarahué.

⁹ Iráca inapitaso' Iquipito parti ya'huépirinahué',
imiranpo quëran së'quérëso pochin nosoroato, nicha'ërahué.
Napor' inapitarë'co anoyatopirahué',
co natantochináchinhue' cancantopi ni'ton,
tanapitërahué," ténin Yosë.

¹⁰ Ina quëran itantarín:

"Tahuëri nanihuachin, nasha quëran anoyataantarahue.
Napor' anoyacancantarahue noya yonquicaiso marë'.
Nasha cancan quétarahué ca pochin cancantacaiso marë'.
Casáchin chinotarinaco ni'ton, noya a'paíarahué.

Ca pochin cancantatona', piyapinëhuépita chachin nisapi.

¹¹ Iráca a'naya a'naya yanohuitohuachinacora, a'napitari a'chintopi.
'Yosë nohuitoco', itopirinahué', co ya'ipi nanamëhué nitochátërapihué'.
A'na tahuëriso nipurinhué' nitotapi. Nasha cancan ya'huétohuachina', cancanëna quëran
chachin nohuitarinaco.

Insopita téranta' nasha quëran anoyatërahuëso imapachina', nohuitarinaco.
Hua'ano'sahué nípon, topinan piyapi'sahué nípon nohuantohuachina', nohuitarinaco.

¹² Na'con nosoroato, ya'ipi co noyahue' yonquipisopita inquitarahué.

Co huachi oshanëna' yonquiarahué," ténin Yosë.

¹³ Nasha quëran anoyatérindo quétérinpoa. Inaso' iráca ya'huérinso' ya'huérëtérin. Napoatón iráca anoyatérinsoso' nariantacaso' ya'huérin. Co huachi ina imacaso' ya'huérinhué'.

9

Iráca chinotopiso pëi' nininso'

¹ Iráca anoyatérindo sha'huitohuachina, Moisësë nani ma'sha sha'huitérin onporahuatónsona Yosë chinotacaiso marë'. Ina marë' chinotopiso pëi' nipi. ² Në'mëtë', sha'huëtë', inapita quëran nipi. Cato' patoana ya'huérin. Ya'natimarinacoso', noya patoana itopi. Inaquë panca nanoparin pochin nininso' ya'huérin. Misanta' ya'huérin. Inaquë pan acorin, Yosë marë' acopiso'. ³ Nëmëtëquë patonpiso' aquëtë', a'na patoananta' ya'huérin, noya noya patoana itopiso'. ⁴ Në'mëtë' ya'cariya a'na misa'huaya ya'huérin, oro quëran nipiso'. Inaquë yonarin pochin pimóchin nininso' a'pëpi tomontacaso marë'. Yosë caposonëonta' ya'huérin. Aipiran, acoporán, ya'ipi oro quëran achinpitopi. Caposo acopoana yonsha oro quëran nipiso' ya'huérin. Inaquë pi'pian cosharo' Yosëri inápa quëran a'paimarinso' po'morin, mana itopiso'. Aaron pitananëonta' inaquë po'morin. Inaso' noyá yaniponahué', Yosë nohuanton, a'naroáchin papotantarín piyapinënpita yonquicaiso marë'. Naporahuaton, cato' na'pitëa'huayanta' inaquë acopi. Inaquë Yosë pënëntërinso' nani ninshitopi. Iráca anoyatérindo itopiso'. ⁵ Caposo a'tanamëñquë cato' anquënia'huaya pochin nonanatona', acopi. Yosë huénaráchin nininso' ayonquiñpoaso marë' napopi. A'na inchinan quëran, a'na ahuënan quëran ninotëépi. Naporahuaton anpiantëna quëran, caposo a'tanamëñ imotatë pochin nipi. Nisha nisha nininsopita a'chintaca'huanquëmaso' ya'huépirinhué', co apira aquëtë' sha'huitaranquëmahué'.

⁶ Ina pochin ma'sha chinotopiso pëiquë acohuachinara, noya patoanaquëso' ya'ipi corto hua'ano'sa' ya'conpi. Nani tahuëri ya'conpi Yosë chinotacaiso marë'. ⁷ Noya noya patoanaquëso nipurinhué', co ya'ipi ya'conpihué'. A'naíchin chini chiniquëñ nanantérinsoáchin ya'conin. Co ina téranta' nani tahuëri ya'coninhué'. Nani pi'ipiquë

a'na tahuériáchin ya'conahuaton, ma'sha huënainën quëparin. Inaora oshanën marë' quëparin. Naporahuaton, piyapi'sa' co yonquiatonahuë oshahuapiso marënta' quëparin. ⁸ A'napita piyapi'saso' co onporonta' inaquë ya'conpihuë'. Ina yonquihuatéhua', Ispirito Santo anitotérinpoa'. Iráca anoyatérinso' imapachina', piyapi'sa' co nani-topihuë' Yosë nohuitacaiso', ténéhua'. ⁹ Iporahuanta' ina yonquihuatéhua', nitotarihua'. Iráca pënëntérinso' co natéhuachinahuë', ma'sha tēpapi ama Yosëri ana'intacaso marëhuë'. Nipirinhue', co ina marë' oshanën inquitérinhuë'. ¹⁰ Iráca nisha nisha cosharo' a'popi. Nisha nisha o'ocasonta' a'popi. Co noyahue' nipachinara, "Oshanëhuë inqui'i," ta'tona', nisha nisha pa'mopi. "Inapotohuatéhua", Yosë noya ni'sarinpoa", topirinahuë', co ina marë' noya cancantopihuë'. Yosëri nasha nanan sha'huitaton, anoyataquë huarë' inapocaiso' ya'huérin.

¹¹⁻¹² Iporaso nipirinhue', Quisocristo nani o'marin. Corto hua'an chini chiníquë'n nanantérinso pochin nicaton, noya catahuarinpoa'. Co chinotopiso pëiquë ya'conaton, nanan anoyatérinpoahuë'. Co isoro'paqué nipiso pëiquë ya'coninhuë'. Co chipo, ohuaca'huaya, inapita tēparinhue' huënainën macacaso marë'. Inaora huënainën chachin a'parin. Chiminaton, oshanënpoa' inquitérinpoa'. Ina quëran Yosë ya'huérinquë chachin panantarín a'naromaráchin nanan anoyatinpoaso marë'. Inaquë noya noya catahuarinpoa'. Canpoa marë' chiminin ni'ton, anoyacancantarinpoa'. Ina imapatéhua', nicha'ësarinpoa'. ¹³ Cotioro'sa' co ya'ipi Moisës pënëntérinso' natéhuachinahuë', në'huëtérinso pochin ni'tona', co nanitopihuë' chinotopiso pëiquë ya'conacaiso'. Napohuachinara, ma'sharo'sa', chipo, toroa'huaya, inapita chinotopiso pëiquë quëpapi. Inaquë corto hua'ani tēparahuaton, huënainën manin. Huënainën masahuaton, ohuaca'huaya huiquitérinso' yanonën ayontérin. Ayontahuaton, oshahuana'pi ta'satérin. Inapotohuachina, në'huëtérinso' inquirinso pochin ninin ni'ton, naquéranchin nanitérin chinotopiso pëiquë ya'conacaso'. ¹⁴ Quisocristo huënainënsi nipirinhue' noya noya. Inaso' Yosë hui'nin ni'ton, co pi'pisha têranta' oshahuaninhue'. Ispirito Santo ya'huëmiatérinsori catahuarin ni'ton, canpoa marë' chiminaton anoyacancantomiatérinpoa'. Inaso huënainën a'parin oshanënpoa' inquitinpoaso marë'. Inapoaton noyápiachin cancan quëtérinpoa'. Ina quëtohuachinpoa', Yosë noya chinotarihua'. Inaso' nanpiarin ni'ton, canpoanta' ina marë' noya sacatarihua'.

¹⁵ Napoaton nasha quëran anoyatérinso nani sha'huitérinpoa'. Ya'nan anoyatérinso na'a piyapi'sa' imapirinahuë', co noyahue' cancantatona', oshahuanpi. Co ma'sharo'sa' huënainën quëran oshanëna' inquimiatopihuë'. Nipirinhue', Quisocristo chiminin ya'ipi huayoninsopita oshanëna' inquitacaso marë'. Ya'nan anoyatérinso imapisopita oshanënta' inquitérin. ¹⁶⁻¹⁷ Ni'co'. Quëmapi yachiminpachina, quiricatérin ma'shanënpita macacaiso marë'. Co'huara chimiyantérasohue', co macacaiso' ya'huérinhue'. Chimpachina, naporo huarë' mapi. Inapochachin nani Quisocristo chiminin ni'ton, ya'ipi sha'huitérinpoaso' acotérinpoa'. Oshanënpoa' inquitatonpoa', noya catahuarinpoa'. ¹⁸ Napoaton ya'nan anoyatérinsonta' sha'huitohuachina, ma'sharo'sa' tēparahuatona', huënainëna' a'patopi. Inapotatona', iráca anoyatérinso' imapi. ¹⁹ Ya'ipi piyapi'sa' ayontonahuaton, Moisëséri pënénin. Nani ma'sha sha'huitérin natécaiso marë'. Nani sha'huitohuachina, ohuaca'hua, chipo, inapita tēparahuaton, huënainëna manin. Ina quëran narasë'pa' isopo itopiso' masahuaton, quëhuan huaitaquë so'quëtahuaton, i'sharë chachin ta'satérin. Pënëntérinso' quirica, piyapi'sa', inapita ta'satérin. ²⁰ Inapotahuaton: "Nani anoyatérinso Yosë sha'huitérinpoa' natécaso marë'. Iso huënai' pa'nin ni'ton, Yosë canpoarë anoyatérinso anitotérinpoa'", ténin Moisës. ²¹ Ina quëran chinotopiso pëi', ma'sha inaquë ya'huërinsopita, inapitanta' huënaiquë ta'satérin. ²² Iráca pënëntérinso' imapachinara, nani ma'sha huënaiquë ta'satopi anoyatacaiso marë'. "Co huënai' ta'satohuatéhuahuë', co Yosë noya ni'sarinpoahuë'", topi. Téhuëñchachin co huënai' pa'pachinhuë', Yosë co onporonta' oshanënpoa' inquitérinpoahuë'.

Quisocristo oshanënpoa' inquitérinfoaso'

²³ Iráca ma'pitasona inápaquë ya'huérinsopita nonanpiso', huénai quëran ta'satopi anoyatacaso marë'. Ma'sha inápaquë ya'huérinsopitaso nípirinhuë', noya noya huénai' nohuantérin. ²⁴ Iráca chinotopiso pëi', piyapi'sari ninin. Quisocristoso', co inaquë ya'coninhuë'. Yosë ya'huérinquë chachin pantarahuaton, canpoa marë' Yosë nontárin. "Oshanëna' inquita'huaso marë' nani chiminahuë," ta'ton, nontárin. ²⁵ Iráca corto hua'an ma'sha huënainën masahuaton, noya noya patoanaquë ya'conin. Nani pi'ipi inaporin. Quisocristoso nípirinhuë' co na'aro' inaporinhuë'. ²⁶ A'naroíchin chiminaponahuë', ya'ipi piyapinénpita marë' chiminin. Co a'naromaréáchin nanitérinfoahuë' naporini, iráca quëran huarë' na'aro' chimianta'itonhuë'. Iporaso' nani ayaro tahuëri ya'cariapirinfoahuë', a'naroíchin chiminin oshanënpoa' inquitérinfoaso marë'. ²⁷ Yosë nohuanton, ya'ipi piyapinpoa' a'naroíchin chiminéhua'. Ina quëran Yosë chachin coisë pochin nicaton, ma'sona onpotiinfoaso' no'téquën sha'huipon. ²⁸ Quisocristonta' a'naroíchin chiminin oshanënpoa' inquitérinfoaso marë'. Ina quëran inápaquë panantarín. Nani oshanënpoa' inquitohuachinpoa', a'na tahuëri o'mantararin. "¡Ma noyacha Quisocristoso' ni'ton, nicha'érinfoa paya!" ta'téhua', ina ninaréhua'. O'mantahuachin, imaréhuasopita maquimarinpoa huachi.

10

¹ Iráca pënentérinfo' nanan imapachinara, ma'sharo'sa' tëpapi. Oshanëna' yonquia-tona', napopi ama Yosëri ana'intacaso marëhuë'. Quisocristo chiminacaso' ninoton, Yosëri sha'huitérin ma'sharo'sa' huënainëna a'patacaso'. Quisocristoíchin anoyacancantérinfoa'. Ina chiminin ni'ton, oshanënpoa' inquitérinfoa'. Iráca nani pi'iquë ma'sha tëpapirinahuë', co téhuéñchachin piyapinénpita oshanëna' inquitérinfohuë'. ² Oshanëna' inquipi naporini, co nani pi'iquë naquéranchin naquéranchin ma'sha tëpa'itonahuë'. Cancanëna' anoyatopi naporini, noyápiachin cancanchitonahuë'. ³ Nani pi'iquë ma'sharo'sa' tëpahuachinara, yonquiantapi. "Téhuéñchachin oshahuanéhua'", topi. ⁴ Ma'sharo'sa' tëpapirinahuë', ina huënainën quëran co onporonta' oshanëna' inquitérinfohuë'.

⁵ Napoaton Quisocristo isoro'paquë yao'mahuachina, pa'pin itapon: "Iporaso huachi ma'sharo'sa' tëpacaiso', ofrenda quëcacaiso', inapita co nohuantérantuë'. Quëma nohuanton, piyapi chachin nasitomarahuë natëa'huanquëns marë'.

⁶ Na'a ma'sharo'sa' ahuiquitopi.

Nisha nisha ma'sha oshanëna marë' tëpapirinahuë', co inapita marë' noya ni'nanhue'.

⁷ Ina quëran itérahuë: 'Napoaton tata, nani o'marahuë nohuantéranso' nica'huaso marë'. Quiricanéñquë ninorancoso chachin nisarahuë,' itérahuë," ténin.

⁸ Quisocristo pa'pin nontaton, naporin: "Iporaso huachi ma'sharo'sa' tëpacaiso' co nohuantérantuë'. Nisha nisha ma'sha oshanëna marë' tëpapirinahuë', co inapita marë' noya ni'nanhue'," itérin. Iráca pënentérinfo natëtona' inapopirinahuë', naporin. ⁹ Ina quëran itantarín: "Ma'tana nani o'marahuë quëma nohuantéranso' nicaca'huaso marë'," itérin. Napoaton co huachi iráca Yosë chinotacaiso marë ma'sha tëpapiso pochin nicacaso' ya'huérinhuë'. Quisocristo nasha pochin Yosë chinotacaso anitötérinfoa'. ¹⁰ Quisocristo piyapi chachin nasitomarahuaton, oshanënpoa marë' chiminin. Yosë nohuanton, a'naroíchin chiminin. Canpoanta' ina imapatéhua', oshanënpoa' inquitérinfoa'. Noyápiachin cancan quëterinfoa huachi.

¹¹ Nani tahuëri corto hua'ano'sa' sacatápi. Naquéranchin naquéranchin ma'sharo'sa' tëpapirinahuë', co oshanëna' inquipihuë'. ¹² Quisocristoso nípirinhuë' a'naroíchin chiminin oshanënpoa' inquitérinfoaso marë'. Ina quëran inápaquë panantarahuaton, Yosë inchinanën quëran huënséarin. ¹³ Inimiconéñpita minséaquë huarë' inaquë ninarin. ¹⁴ A'naroíchin chiminaponahuë', anoyacancantérinfoa'. Ya'ipi imaréhuasopita

oshanënpoa' inquitatonpoa', noyápiachin cancan quëtérinpoa'. ¹⁵ Ispirito Santonta' inachachin anitotérinpoa'. Quiricanën quëran sha'huitérinpoa'.

¹⁶ "A'na tahuëri piyapinëhuëpitare'co anoyatohuato, iso pochin nisarahuë: Nasha cancan quëtarahuë natëtochináchin cancantacaiso marë'.

Anoyacancantaráhuë noya yonquicaiso marë'.

¹⁷ Co huachi oshanëna' yonquiarahuë'.

Ya'ipi co noyahuë' nipesopita nariantaráhuë," ténin.

¹⁸ Quisocristo oshanënpoa' nani inquitohuachinpoa', co huachi ma'sha tēpacaso' ya'huërinhuë'. Inasáchin anoyacancantérinpoa'.

Quisocristo imatëhua', Yosë nohuitérëhuaso'

¹⁹ Napoaton iyaro'sa', iporaso' nanitérëhua' Yosë chachin nohuitacaso'. Noya noya patoanaquë ya'conëso pochin nohuitérëhua'. Piyapinpoa' niriuhuarahuë', chiníquën cancantatéhua', Yosë nontahua'. Quisoso huënainën pa'nin ni'ton, ²⁰ nasha ira pochin niniso' acorin Yosë nohuitacaso marë'. Noya noya ananpirinpoa'. Iráca noya noya patoanaquë Yosë ya'nopirinhue'. Në'mëtéri ya'copitérin ni'ton, co piyapi'sari nohuitopihuë'. Iporaso' Quisocristo o'maton, piyapi chachin nasitimarin. Chiminin ni'ton, nanitérëhua' Yosë nohuitacaso'. ²¹ Chiníquën nanantaton, noya noya corto hua'an pochin campoa marë' Yosë nontárin. Ya'ipi imarëhuasopita catahuarinpoa'. ²² Napoaton Quisocristoichin natétëhua', ya'ipi cancanënpoa quëran Yosë nontahua'. Nani oshanënpoa' inquitérinpoa' ni'ton, noya cancantaréhua'. Quisocristo anoyacancantérinpoa' ni'ton, noya i'quë amarëso pochin noyápiachin cancantárihua'. ²³ "Yosë no'tequënsa' sha'huitérinpoa'. Quisocristoichin nicha'ësarinpoa', ta'tehua', imamiatahua'. Ama pi'pian téranta' nisha yonquia'huasohuë. Nani sha'huitérinpoa' ni'ton, co non-pintarinfoahuë'. ²⁴ A'napitanta' yonquia'ahua'. Na'con nosoroatéhua', catahuahua' inahuanta' noya ninosorocaiso marë'. Nipënëahuan' noya nicacaso marë'. ²⁵ A'naquënsa' co huachi niyontonpihuë' Yosë chinotacaiso marë'. Ama inapita pochin cancantahuasohuë'. Siniro o'macaso' tahuëri naniriarin ni'ton, niyontonatéhua', na'con na'con nicatahuahua' chiníquën cancantacaso marë'.

²⁶ Quisocristo nanamënsa' nani nitotérëhua'. Nitotarihuarahuë', naquëranchin naquëranchin co noyahuë' nipatëhua', a'popisopita pochin cancantarárihua'. A'pohuatéhua', co insonta' nanitarinhue' oshanënpoa' inquitinpoaso'. ²⁷ Ina quëran pa'pi tê'huatacaso' ya'huërin. Yosë chiníquën ana'intarinfoa'. A'na tahuëri inimiconënpita pënqué a'pararin. ²⁸ Iráca Moisës pënëntohuachina, a'naquënsa' co yaimapihuë'. A'popi. A'pohuachinara, ana'intopi. Coisëquë quëparahuatona', sha'huirapipi. Catoya'pihuë nípon, caraya'pihuë nípon inachachin sha'huirapihuachinara, co nosoropihuë'. "Tëpaquë'" itopi. ²⁹ Yosë hui'nin chachin a'pohuatama', jaquë aquëtë' ana'intinquëmaso' ya'huërin! Quisocristo canpoa marë' chiminin. Huënainën a'parin anoyacancantinfoaso marë'. Inapoaton, nasha quëran anoyatérinsha'huitérinpoa' imacaso marë'. A'naquënsa' nípirinhue' imapirinahuë'. Ina quëran Quisocristo a'popi. Huënainën quëran anoyacancantópirinhue', nisha cancantatona', ina huënainën chachin nocanpi. Ispirito Santori nosoropirinhue', co pi'pian téranta' yanatépihuë'. Inapitasso' Yosëri chini chiníquën ana'intarin. ³⁰ Yosë nohuitérëhua'. Inaso' ya'ipiya nitotérin. "Co noyahuë' nípachina', cari ana'intarahuë. No'tequënsa' ana'intarahuë huachi," ténin Yosë. "Piyapinënpita téranta' co yanatéhuachinahuë', Siniro orina' intarin," ténin anta'. Quiricanënquë naporin. ³¹ Yosës'o' nanpiárin. Chiníquën nanantérin. Co noyahuë' nipatëhua', pa'pi tê'huatacaso' ya'huërin. Ana'intarinfoa'.

³² Ya'nan imaramaso' tahuëri'sa' yonquico'. Quisocristo nanamënsa' a'chintohuachinënquëmara, noya natanatoma', imarama'. Ina marë' parisitapo-marahuë', co yaa'poramahuë'. Noya ahuantérama'. ³³ Imaramaso marë' a'ninquëchin têhuarinënquëma', no'huirinënquëma'. A'na tahuëri ahuepirinënquëmahuënta', noya

cancantërama'. A'napita imapisopitanta' parisitohuachinara, nosoroatoma', catahuarama'. ³⁴ Tashinan pëiquë po'mohuachinara, co të'huatomarahuë', nicapoma' pa'nama'. Paatoma', catahuarama'. Canpitanta' imaramaso marë' ma'shanëma' osérëtopirinënquëmahuë', co sëtëramahuë'. "Yosë chachin nohuitérëhua". Nasha cancan quëtérinpoa'. Co insonta' nanitërinhuë' inaso' osérëtinpoaso', ta'toma', nöya cancantërama'. ³⁵ Ya'nan imapoma', noya imarama'. Ama iporaso' yaa'pocosohuë'. "Yosë nariantérinco," ama tocosohuë'. Chiníquën cancantoco' Yosë nöya acanainquëma'. ³⁶ Ma'sha onpopiramahuënta', noya ahuantoco'. Noya natëhuatama', na'con catahuarinquëma'. Nani sha'huitérinquëma' ni'ton, co nonpintarinquëmahuë'. Noya nicha'ësarinquëma'.

³⁷ Quiricanënquë naporin:

"Tëhuëñchachin o'macaso' nininso' o'mapon.
Co hua'quiarinhue'.

³⁸ Cancanëma quëran huarë' natëhuatamaco,
noya ni'saranquëma' ni'ton, noya nanopimiatarama'.
Nipirihuë' a'pohuatamaco,
pa'pi co noyahue' ni'saranquëma', tënин.

³⁹ Insosona a'pohuachina', parisitopiquë pa'sapi. Canpoaso nipirihuë', co a'poarihuahuë'. Natérëhua' ni'ton, nicha'ësarinfoa huachi.

11

Ya'ipi cancanëna quëran huarë' natëpisopita

¹ "Co Yosë quënanpiréhuahuë', ya'huárin. Nosoroatonpoa' catahuarinpoa', topatëhua', têhuëñchachin ina natérëhua'. Na'con Yosë sha'huitérinpoa'. Co ipora naniyatérarinhuë'. "Oshaquëran naniarin huachi," ta'tehua', noya ninarëhua'. ² Iráca quëran huarë' ina pochin cancantohuachinara, Yoséri noya ni'nin.

³ "Yosë no'tequen nontérinpoa', ta'tehua', natérëhua'. Inaora yonquinën quëran ya'ipi isoro'pa' acorin. Co manta' ya'huëpirihuë', "Ya'huë'in," topachina, ma'sha ya'huérin. Ya'ipi ni'nëhuasopita co inaora ya'huérinhuë'. Yoséri nininso'. Quiricanën quëran anitötérinpoa'.

⁴ Iráca Apiri Yosë natérin. "Yosë catahuarinco," ta'ton, ma'sha têparahuaton, Yosë chinotérin. Inapotohuachina, noya ni'nin. "Noya natérinco," tënин. Cainoso nipirihuë' co ina pochin cancantérinhuë'. Napoaton Apiri nani chiminpirihuë', ipora huanta' "Ma noya Apiri natétérin," tënëhua'.

⁵ Iráca Inoco noya natérin ni'ton, Yoséri inápaquë quëpantarin. Napoaton co chiminihuë'. Piyapi'sari yonisápirinahuë', co quënanpihuë'. Co'huara inápaquë quëpantayátérasohuë', "Inoco nöya ni'nahue", tënин Yosë quiricanënquë. ⁶ Yosë yonquihuatëhua', natétacaso' ya'huérin. "Yosë ya'huárin. No'tequen nontérinpoa'. Ina nontohuatëhua', natanatonpoa' catahuarinpoa', topatëhua', noya ni'sarinpoa'. Co ina pochin cancantohuatëhuahuë', co onporonta' noya ni'sarinpoahuë'.

⁷ Iráca Nointa' ya'huëpirihuë', a'na tahuëri Yoséri itapon: "Co hua'qui quëranhuë' ma'sha onpoarama'. Co ni'chinamasohuë' ni'sarama'. Naporo' ya'ipi oshahuano'sa' ii' quëran ata'huantarahuë," itérin. Co'huara o'nayantérasohuë' napotopirihuë': "Yosë no'tequen nontérinco," ta'ton, Noi natétérin. Sha'huitohuachina, natéton, panca nancha ninin. Ina quëran sa'in, hui'ninpitarë chachin cha'épi. A'napitaso' natanaponaraihuë', co yanatépihuë'. Napoaton na'ipi. Noiso nipirihuë', ya'ipi cancanën quëran natétérin. "No'tequen nontérinco," topachina, Yoséri noya ni'nin.

⁸ Apraanta' Yoséri itérin: "Ya'huérán quëran pipimiatëquë'. A'na parti a'nochinquëen. Ina no'pa' quëchinquen ya'huécamaso marë," itérin. Co no'pa' nohuitaponahuë', Yosë natérin. "Co nonpintarincohuë'," ta'ton, pa'nin. ⁹ Aquë paaton, Canaan parti

canconin. Inaquë ya'huaponahuë', në'mëtë' pëiquéráchin ya'huérin. Pa'sápaton, co ya'huémiatérinhue'. Isaco, Cacopo, inapitanta' në'mëtë' pëiro'saquë ya'huépi. Yosëri nani sha'huitérin. "Iso no'pa chachin quëchinquëma'", itopirinhue', co hua'anënhátérapihuë'. "Co Yosë nonpintarinpoahuë'. A'na tahuëri ina nohuanton, hua'anëntarihua'", ta'tona', Yosë natëpi. ¹⁰ Apraan yonquiárin. "A'na tahuëri Yosë'pa' noya noya ya'huécontarihua'. Inaquë noya ninano' ya'huémiatarin. Yosëri chachin canpoa marë' acorinso'", ta'ton, ina ninararin.

¹¹ Inaso', chiníquën Yosë natërin. "Nani máshoco. Saranta' co hua'huana'pihuë' nimirinhue', Yosë sha'huitérinco ni'ton, oshaquéran hui'nahuë ya'huétarinco," ténins marë', Yosë nohuanton, hui'nahuanin huachi. ¹² Apraan nani másho níponahuë', hui'nahuanin. Ina hui'nin quëran chachin na'api. Oshaquéran hua'huayáterahuë shinpita ya'huétérin. Tayora nápo' ya'huépi. Marë yonsanquë notohuarro' inotéra'huaya ya'huérin. Inotéra'huaya nápo' shinpita ya'huépi. Co pichicasohue'.

¹³ Apraan, Isaco, Cacopo, inapita chiminaquë huarë' Yosë natëpi. "Nani Yosë sha'huitérinpoa'. Co nonpintarinpoahuë'. Pahuanarin nimirinhue', a'na tahuëri Yosë nohuanton, ya'huapon," ta'tona', nöya cancantopi. "Co hua'qui isoro'paquë ya'huarihuahuë'. Iséquëso' topinan yacapatéréhuaso pochin ninëhua'", topi. ¹⁴ "Co isoro'paquë ya'huémiatarihuahuë'. Yosë'pa' tēhuéñchins' ya'huémiatarihuë'", ta'tona', napopi. ¹⁵ Ya'huépi quëran nani pipimiatopi. Ina na'con yonquipi naporini, inaquë ayamanta'itonahuë'. ¹⁶ Nimirinhue', co isoro'pa' na'con yonquipihuë'. Yosë na'con na'con nohuantopi. Ina ya'huérinquë chachin ya'huécaiso' nohuantopi. Napoaton Yosë tapon: "Nöya yonquirinaco ni'ton, hui'nahuépita pochin ni'sarahue'. A'na tahuëri inápaquë quëpantarahuë. Nani tapatérahuë ya'huécaiso'", ténin.

¹⁷⁻¹⁸ Apraan tēhuéñchachin Yosë natërin. A'naíchin hui'nin ya'huétérin. Nasitohuachina, Isaco itérin. Napor' Yosëri sha'huitérin: "Isaco mashotohuachin, hui'nahuanarin anta'. Naporahuaton, oshaquéran notohuarro' shinpita ya'huétarin," itopirinhue'. Hui'nin hui'napitohuachina, Yosëri itantarín: "Hui'nan quëparahuaton, motopi'pa' paquë'. Inaquë hui'nan tēpaquë' chinotancoso marë'", itérin. Ténicaso marë' napotérin. ¹⁹ "Yosë co nonpintérincohue'. Ananpitaantacasonta' nanitérin," ta'ton, Apraan natëtérin. Paaton, Isaco yatéparahuachina, Yosëri itaantarín: "Tananpitéquë'. Ama tēpaquësuhue'", itérin. Napoaton hui'nin chiminin quëran, nanopiantarinso pochin ni'nin.

²⁰ Ina quëran Isaconta' cato' hui'ninpita ya'huétérin, Cacopo, Isao inapita itopiso'. Mashotohuachina, Yosë natëton, nontérin hui'ninpita catahuacaso marë'. ²¹ Cacoponta' mashotahuaton, pitana paquëaponahuë', Yosë chinotarin. Yachiminpachina, ina natëton, Cosi hui'ninpita catahuacaso marë' Yosë nontérin.

²² Cosinta' chiminaquë huarë' Yosë natërin. Yachiminpachina, quëmopinënpita sha'huitérin: "Iquipito parti ipora ya'huérhua'. A'na tahuëriso nimirinhue' Yosë nohuanton, ya'ipi israiro'sa' iséquëran pipiapi. No'pa' Yosë quëtérinpoaquë chachin quëpantarín ya'huécaiso marë'. Napor' nanséhuépita quëpa'ina' pa'pitinacoso marë'", itérin. "Yosë co nonpintarinpoahuë'", ta'ton, naporin.

²³ Ina quëran Iquipito copirnori piyapinënpita camairin: "Israiro sanapi'sa' huai-huachina', quëmapia'huaya nipachin, tēpaco'", itérin. Napopirinhue', Moiséseso' nasitohuachina, a'shini co nohuantérinhue' hua'huin chiminacaso'. Yosë natëton, co copirno téranta' tē'huatérinhue'. "Iso hua'huahuëso' noya," itérin so'in nontaton. Cara yoqui noya po'opi. ²⁴ Ina quëran copirno hui'nini masahuaton, aso'sorin. Napoaponahuë' hui'napitohuachina, Yosë natëton copirno pëinën quëran pipirin. ²⁵ Yosë piyapinënpita catahuacaso marë' pa'nin. Ina marë' parisitopirinhue', co ina yonquirinhue'. Yosë natëcaso' na'con na'con nohuantérin. "Co noyahue' nicatéhua', capa cancantopiréhuahuë', co hua'quiya quëranhuë' ma'sha ta'huantarín," ta'ton, co ma'sharáchin

yonquirinhue'. ²⁶ Copirno hui'nin pochin ni'ton, nohuantérin naporini, Iquipito parti na'con canaitonhué', co ina nohuantérinhué'. Yosë na'con na'con yonquirin. "A'na tahuëri Cristo o'maton, nicha'ësarinfoa'. Iporaso' ina marë' aparisitopirinacohue', Yosë'pa' noya noya acanarinco," ta'ton, noya ahuantérin.

²⁷ Yosë natëton, Moisësë Iquipito quëran pipirin. Copirnori no'huipirinhue', co tē'huatérinhué'. "Yosë co quënanaporahué', ni'sárinco," ta'ton, chiníquën cancantérin. Chiníquën cancantaton, Yosë piyapinënpita catahuarin. ²⁸ "Yosë nicha'ësarinfoa'", ta'ton, natëtérin. Napoaton piyapi'sa' camairin: "Ya'ipinquëma' carniroa'hua tēpacó". Huënainén ya'coanaquë pashitoco' ama anquéniri paninan nininso' tēpacaso marëhué", itérin. Napotohuachina, a'naya a'naya inahuara pëinëna' ya'coanaquë huënaiquë pashitëra'piapi. Napoaton Yosëri catahuarin. Co paninano'sa' chiminpihué'. Pascoa pitaquë napopi.

²⁹ Ina quëran ya'ipi israiro'sa' Yosë natëtona', noya pipipi. "Yosë catahuarinpoa'", ta'tona', Quëhuai marë aquëtérän pa'pi. Panca' níponahué', Yosë nohuanton, a'naroáchin nipatomairin ni'ton, panca' ira pochin yaniro ya'norin. Ina pa'tatona pëntonpi. Iquipito sontaro'saso nípirinhué' co nanitopihué' pëntonacaiso'. Imatapirinahué', iiri imotérin ni'ton, chimiitopi.

³⁰ Ina quëran israiro'sa' Canaan parti canconpi huachi. Yosë natëtona', inimiconënpita minsëpi. Quiricoso' panca ninano'. Natëricho quëran pairatopiso' inápaquë huarë' pantarin. Yosëri sha'huitérin tahuitacaiso'. "Catahuarinpoa mini," ta'tona', natëpi. Canchisë tahuëri tahuitopi. Inapotohuachinara, Yosë nohuanton, paira a'naroáchin nohuaatérin.

³¹ Ya'ipi ya'huëhuano'sa' co Yosë yanatépihué' ni'ton, chiminpi. A'na sanapiáchin natëton, cha'érin. Oshahuana'pi inaso', Nacapa itopiso'. Inimico níponahué', Israiro comisionënpita huë'pachinara, inari po'orin ama sontaro'sari tēpacaiso marëhué'.

³² Co inapitaráchin Yosë natëpihué'. Quitiono, Paraco, Sanson, Quihuiti, Tapi, Samoiro, pënëntona'piro'sa', inapitanta' nónya natëtopi. ¡Notohuaro' ya'huëpi ni'ton, co'chi nanitérahue' ya'ipiya sha'huita'huaso paya! ³³ A'naquëen Yosë natëtona', nisha nisha piyapiro'sa' minsëpi. A'naquëonta' hua'an ya'conatona', no'tëquëen hua'anëntopi. "Yosë sha'huitérinpoa' ni'ton, catahuarinpoa'", ta'tona', a'naquëen natëpi. Napoaton Yosëri catahuarin. A'naquëenso' Yosë natëtona', pa'pini' quëran cha'ëpi. ³⁴ A'naquëen pën chiníquën nénë nénëtapaquë tē'yatopirinahué', co pi'pian téranta' huëyapihué'. Noya cha'ëpi. A'naquëonta' Yosë nohuanton, sahuëni quëran cha'ëpi. Yatëpapirinahué', co chiminpihué'. A'naquëonta' co chinipirinahué', Yosëri catahuarin chiníquën cancantacaiso marë'. Na'a inimicoro'sa' minsërahuatona', a'papi. ³⁵ Sanapi'santa' hua'huinpita chiminpachina, Yosë natëpi ni'ton, ina nohuanton nanopiantapi huachi.

A'naquëenso nípirinhué' Yosë natëtona', chiníquën parisitopi. "Yosë a'poco' tēpachinëñquëma'", itopirinahué', co yaa'popihué'. "Co onporonta' a'poaraihué'. Yosë noya noya ananpitaantarincó," ta'tona', imapiso marë' chiminpi. ³⁶ A'naquëonta' Yosë imapi ni'ton, têhuapi, huihuipi, catinaquë tonpopi, tashinan pëiquë po'mopi, napotopi. ³⁷ A'naquëonta' na'piquë tē'yaratona', tēpapi. A'naquëonta' sérichoquë yatonatona', tēpapi. "Yosë a'poco', tēpachinëñquëma'", itopirinahué', co yaa'popihué'. A'naquëonta' sahuëni quëran tēpapi. A'naquëen co tēpapirinahué', imapiso marë' chiníquën aparisitopi. Yatëpahuachinara, ta'api. Co huachi ya'huëmia ya'huëpihué'. Capa a'mocaiso' ni'ton, ohuica sha'huëtë', chipo sha'huëtë' inapita a'mopi. Co manta' ya'huëtopihué'. Chiníquën parisitopi. ³⁸ Motopiro'sa' parti, inotëro partiro'sa', nisha nisha parti iratopi. Na'pi naninquë ya'conahuatona', huë'ëpi. Inpioro'sari nocanpi: "Inapitaso' napoonpi," topirinahué', Yosëriso' noya noya ni'nin.

³⁹ Yoséíchin yonquiatona', nónya imapi. Napoaponahué', co ya'ipi Yosëri sha'huitérinso' naniyatérasohue', chiminpi. ⁴⁰ Canpoanta' yonquiatonpoa', Yosë ninararinfoa'. Iporaso'

Quisocristo nani chiminin ni'ton, ya'ipinpoa' anoyacancantérinpoa'. Iráca imapisopita, ipora canpoanta', ya'ipinpoa' anoyacancantérinpoa'. A'na tahuérinta' inápaqué pa'patéhua', Yosë noyá nohuitarihua'.

12

Quisocristoíchin yonquia'ahua'

¹ Iráca quëran huarë' na'a piyapi'sa' parisitaponaraihuë', imamiatopi. "Yosë catastuarinpoa', ta'tona', natëpi. Napoaton inapita yonquiatéhua', canpoanta' nóya imahua'. Ni'co'. Quëmapi'sa' nicanacaiso marë' ta'ahuachinara, chiníquën ta'api. Co manta' quëpapihuë'. Torosaréachin ta'api. Naporopi a'mopiso' co ocoihuachinahuë', co nani-topihuë' chiníquën ta'acaiso'. Inapochachin canpoanta' naporopi a'mopiso' ocoipiso pochin ya'ipi oshanënpoa' nariantahua'. Co noyahue' yonquiréhuasopita nariantatéhua', ya'ipi cancanënpoa quëran Quisocristo imahua'. Sacai' nipurinhuë', ahuantatéhua', noya imahua'. ² Quisocristo na'con yonquia'ahua'. Inasáchin catastuarinpoa' Yosë natëcaso'. Naporahuaton, inasáchin catastuarinpoa' noya noya natëtacaso'. Isoro'paquë o'mahuachina, chiníquën parisitérin. Coroséqué parisitohuachina, na'con téhuapirinahuë', co ina yonquirinhuë'. "Chiminpato, piyapi'sa' nicha'ésarahuë," ta'ton, nóya cancantérin. Ina quëran inápaqué panantarahuaton, Yosë inchinanën quëran chachin huënséarin.

³ Isoro'paquë ya'huapon, oshahuano'sari chiníquën no'huipirinahuë', ahuantérin. Ina yonquiatéhua', ama yaa'poa'huasohuë'. Chiníquën cancantoco'. ⁴ Sopai yaminsérinquëma' Yosë a'pocaso marë'. Sacai' nipurinhuë', Quisocristo imamiatoco'. Imaramaso marë' aparisitopirinënquëmahuë', co téparinënquëmahuë'. ⁵ Hui'ninpita pochin nicatonpoa', Yosë pënëninpoa' chiníquën cancantacaso marë'. Nani nitotopiramahuë', ¿nariantérama' ti? Quiricanën quëran napotérinpoa': "Yonquiquë' conpa. A'na tahuéri Yosë nohuanton, parisitaran noya noya imacamaso marë".

A'na tahuéri pi'pian ana'intopirinquënhuë', ama sëtëquësohuë'.

Ama yaa'poquësohuë'. Ahuantacaso' ya'huërin.

⁶ Nosororinpoa' ni'ton, a'na tahuéri ina nohuanton, ma'sha onporéhua'.

Hui'ninpita pochin nicatonpoa', ana'intérinpoa' noya noya yonquicaso marë', ténin.

⁷ Hui'ninpita pochin ni'ninpoa' ni'ton, ahuantacaso' ya'huërin. Ni'co'. Hui'nampo' no'tequën pënënenë' noya noya yonquicaso marë'. ⁸ Co Yosë pënëninpoahuë' naporini, co téhuenchachin hui'ninpita pochin ni'itonpoahuë'. Ya'ipi hui'ninpita yonquirin noya noya cancantacaiso marë'. Co pi'pian téranta' ana'intohuachinquëmahuë', co Yosë hui'ninpitanquëmahuë'. ⁹ Tatapo' pënënpachinpoara, natéréhua'. Pi'pian ana'intopirinpoahuë', co no'huiréhuahuë'. Noya nicatéhua', natéréhua'. Tata Yosëso nipurinhuë' na'con na'con natëcaso' ya'huërin. Inaso' nininpoa' ni'ton, natëhuatéhua', noya noya nanoparihuua'. ¹⁰ Hua'huatarihua', co hua'qui isoro'paquë ya'huëcasohuë' nipurinhuë', tatapo' pënëninpoa'. Inaora yonquiaton, pi'pian ana'intérinpoa' natëcaso marë'. Yosëso nipurinhuë', noya noya yonquiatonpoa', no'tequën catastuarinpoa'. Na'con nosoropirinpoahuë', a'na tahuéri ina nohuanton parisitéréhua' ina pochin cancantacaso marë'. ¹¹ A'na tahuéri Yosë nohuanton, ma'sha onporéhua'. Naporahuaton, a'napita ma'sha onpotérinënpoa'. Naporochachinso' sétéréhua'. Parisitacaso' co nohuantopiréhuahuë', noya ahuantohuatéhua', Yosë na'con catastuarinpoa'. Nirótéatéhua', noya nisaréhua'. Inapoatéhua sano cancantarihuua'.

Ama Yosë a'poa'huasohuë'

¹² Napoaton iyaro'sa', chiníquën cancantahua'. Ama amiatéhuarahuë', chiníquën Yosë imahua'. Ni'co'. Aquë pa'patéra, canotérë', sacai' iratérë'. A'naquëma' ina pochin cancantatoma', co huachi ya'ipi cancanëma quëran Yosë imaramahuë'. Ama huachi canotérëso

pochin cancantocosohuë'. ¹³ Yosë iranën no'tequën imapatama', co pëshonaramahuë'. Yosë catahuarinquëma' noya noya yonquicamaso marë'. A'napitanta' nicatënquëma', chiníquën cancantapi. Co huachi sonpacha pochin cancantapihuë'.

¹⁴ Ama pi'pian téranta' nino'huicosohuë'. Naporahuaton, noya nico'. Co noya nípatamahuë', co manta' Yosë nohuitaramahuë'. ¹⁵ Yosë inaora nohuanton nosoroatonpoa', yacatahuarinpoa'. A'naquëniso nipurinhue', co yatahuërëtopihuë'. Inahuara yonquipisoáchin imatona', co Yosë yonquicaiso' nohuantopihuë'. Ama inapita pochin cancantocosohuë'. Co Yoséíchin yonquiuhuatamahuë', oshaquëran nitapicancanarama'. Ina quëran pënamin a'naroáchin së'cotëtérinso pochachin a'napitanta' atapicancanarama'.

¹⁶ Ni'cona nisha nisha cancantotama'. Ama monshihuancosohuë'. Noyápiachin cancantoco'. Ama ma'sha yonquiatoma', Yosë nariantocosohuë'. Isao iráca naporinso' yonquico'. Ma'sharáchin yonquiaton, co onpopinchin Yosë yonquirinhue'. Tanaton, iin nontérin: "¿Yosë na'con catahuainquënso' nohuantéraran ti? Co caso' ina yonquirahuë'. Cosharo' na'con na'con nohuantérahuë," itérin. ¹⁷ Ina piquëran yonquiantapirinhue'. "Yosë na'con catahuainco," tantapirinhue', co huachi Yoséri nohuantérinhue'. Chiníquën sëtaton na'nëpirinhue', iráca a'porinso' co huachi nanitérinhue' anoyatacaso'. Ina yonquiatoma', ni'cona Yosë nariantotama'.

¹⁸ Iráca Sinai motopi nicotoanaquë huë'pachinara, cotioro'sa' pa'pi tē'huatopi. Inaquë panca pën nénérin. Co ya'caritacaso' ya'huërinhuë'. Tahuëri níponahuë', tashi pochin ninin. Yara yaráchin ninin. Panca ihuan pa'nin. ¹⁹⁻²⁰ Tronpita chiníquën pihuirinso' natanpi. Naporo' Yoséri chiníquën itérin: "Iso motopiquë pënënaranguëma' ni'ton, ama ya'caricosohuë'. Ma'sharo'sa téranta' inaquë pa'pachina', chimiina'. Na'piquë tē'yaratomá', tēpacó'," itérin. Ina natanahuatona': "Sacai' ina nanan natëcaso'," ta'tona', pa'yanpi. "Ama huachi chiníquën nonchincoisohuë," itopi. ²¹ Ni'sahuaton, Moisésénta' pa'pi tē'huatérin. "Canta' tē'huatato, ropa ropátarahuë," ténin.

²² Canpoaso nipurinhue', co ina motopi ya'carirëhuahuë'. Quisocristo imapatéhua', nisha motopi ya'carirëhua', Sion itopiso'. Yosë chachin nohuitarihuá'. Co ipora quënanpirëhuahuë', nanopíarín. A'na tahuëri ya'huërinquë chachin pantarihua'. Nasha Quirosarinquë ya'huëcontarihua huachi. Notohuaro' anquëniro'sa' inaquë niyontonpi. Noya cancantatona', Yosë chinotapi. ²³ Huëntonënquë chachin Yosë nani aya'coninpoa'. Inápaquë nininënpoa' nani ninshitérinpoa' hui'ninpita pochin nicainpoaso marë'. Inatohua' niyontonarihua'. Yosë chachin imarëhua'. Inaso' ya'ipiya hua'anëntaton, co imapisopitahuë' no'tequën ana'intarin. A'naquën imapisopita nani chiminpachinara, hua'yanënas' Yosë'pa' ya'huapi huachi. Yosë pochachin cancantopi. Inapitaré'quënpoa chachin niyontonarihua' ²⁴ Quisocristo chachin nohuitarihuá'. Inaso' nasha quëran anoyatérinso sha'huitérinpoa' imacaso marë'. Huënainën quëran anoyacancantérinpoa'. Iráca Apiri huënainën pa'nin. Iini tēpahuachina, huënainën pa'nin ni'ton, ana'intacaso' ya'huërin. Quisocristo chimininsoso' nipurinhue', noya noya. Huënainën pa'nin ni'ton, nanan anoyatérinpoa'.

²⁵ Napoaton Quisocristo nanamën noya natanco'. Ama pi'pian téranta' a'pocosohuë'. Pënëntérinso nanan sha'huitohuachinara, a'naquën co yanatëtopihuë' ni'ton, a'naroáchin ana'intérin. Quisocristo nanamënso' noya noya ni'ton, ina nariantohuatéhua', aquë aquëtë' ana'intinpoaso' ya'huërin. Inaso' inápa quëran pënëninpoa'. ²⁶ Yoséri pënëntérinso nanan sha'huitohuachina, ina nohuanton, panca ocohua pa'nin. Ina quëran quiricanën quëran sha'huitérinpoa': "A'na tahuëri naquëranchin nontaantahuato, co isoro'paráchin nacontarinhuë'. Inápaquë ya'huërinsopitanta' naco nacóntarin," ténin. ²⁷ A'na tahuëri mini ya'ipi ma'sha isoro'paquë ya'huërinsopita ta'huantarín. Ma'sha ya'huëmiatérinso' acohuachinaso', ya'huëmiatarin. ²⁸⁻²⁹ Hua'anëntérinquë chachin aya'coninpoa'. Inápaquë pa'patéhua', co onporonta' ta'huantarihuahuë'. Napoaton: "Yosparinquë Sinioro," itahua'. Ya'ipi cancanënpoa quëran inasáchin chinotahua'. Noya cancantatéhua',

natëahua' noya nicainpoaso marë'. Ipora huanta' Yosëso' no'tequën ana'intarin ni'ton, të'huatacaso' ya'huërin. Pënqué ma'sha ahuiquitëreso pochin ya'ipi co noyahuë' nininsopita ana'intarin.

13

Onporahuatonsona Yosë noya ni'ninpoaso'

1 Ya'ipi imaramasopita capini noya ninosoroco'. Iyaparima pochin ni'co'. **2** Co nohuitapomarahuë', nosoroco'. Huë'pachina, noya nontatoma', o'shitoco', a'caco'. Iráca a'naquën napopiso' yonquico'. Ni'toro'sa' huë'pachinara, "Huëco' ni'quicoi," itërin. Piyapita'ma' topirinhue', Yosë anquënин chachin a'carin. Inapochachin canpoanta' ni'toro'sa' noya nontahua'.

3 Ama tashinan pëiquë po'mopisopita nariantocosohue'. Catahuaco'. Canpitanta' tashinan pëiquë ya'huëaramaso pochachin yonquico'. A'naquëonta' imapiso marë' chiníquën aparisisotihuachina', noya yonquico'. Canpitanta' inapita ninatanpiso pochin cancantatoma', nosoroco'.

4 Quëmapi'sa' sa'apachina', ama a'na sanapi yonqui'inasohue'. Sanapi'santa' so'yahuachina', ama so'ina' têhuananpichinasohue'. Ama manta' monshihuainasohue'. Monshihuanpatama', Yosë chiníquën ana'intarinquëma'.

5 Ama coriquirächin pa'yatocosohue'. Co na'con ma'sha ya'huëtopirinquëmahuë', sano cancantoco'. Ama na'con na'con nohuantocosohue'. Yosë chachin nani sha'huitërinpoa'. "Co onporonta' pataranquëmahuë'. Co nariantaranquëmahuë", itërinpoa'. **6** Napoaton chiníquën cancantatëhua' naporëhua':

"Yosë catahuarinpoa' ni'ton, co të'huarëhuahuë".

¡Piyapi'sa' ma'sha onpotopirinpoahuënta', co të'huatarihuahuë!" tënëhua'.

7 Ya'nan a'chintërinënquëmasopita yonquico'. Yosë quiricanën noya a'chintërinënquëma'. Chiminaquë huarë' noya nicatona', a'napita catahuapi. Napoaton inapita nonanatoma', noya natëco'.

8 Quisocristo co onporonta' nishataponhuë'. Iráca nosororinpoa'. Ipora huanta' catahuarinpoa'. Co onporonta' nariantarinfoahuë'. Inasáchin imahua'. **9** A'naquën nisha a'chintohuachinënquëma', ama natancosohue', nonpintochinënquëma'. No'tequën yonquico'. Nisha nisha nicacaso' pënënpirlenpoahuë', co ina quëran noya cancellerëhuahuë'. Na'a piyapi'sa' nisha nisha cosharo' a'poaponaraihue', co noya cancellopihuë'. Quisocristoíchin nanitërin anoyacancantinpoaso'. Inaora nohuanton, nosoroatonpoa', catahuarinpoa' imamiatasco'.

10-11 Quisocristo corosëquë chiminaton, oshanëinpoa' inquitërinpoa'. Iráca pënëntërinso imapisopitaso niperinhue', co ina natëpihuë' ni'ton, co oshanëna' inquitërinhuë'. Iráca corto hua'ano'sa' piyapi'sa' oshanëna marë' ma'sha tēpapi. Tēpahuachinara, corto hua'an chini chiníquën nanantërinsoari ma'sha tēpapiso' huënainën manin. Masahuatón, Yosë ya'norinso' patoanaquë quëparin oshanëna marë'. Noshinënsö niperinhue' co ca'pihuë'. Ninano' intonquë quëpapi ahuiquitaciso marë'. **12** Quisocristonta' ninano' aquëcha quëparahuatona', aparisisotopi. Inaqué chiminin oshanëinpoa' inquitinpoaso marë'. Inaora huënainën quëran anoyacancantërinpoa'. **13** Napoaton canpoanta' aparisisotihuachinënpoa', ahuantahua'. Iráca pënëntërinso nanan nariantatëhua', Quisocristoíchin imahua'. Ina no'huipiso pochin no'huipirinënpoaonta', ahuantahua'. **14** Co isoro'paquë ya'huëmiatarihuahuë'. Yosë ya'huërin'pa' pantacaso' ninarëhua'. Inatohua' ya'huëmiatarihuahuë'. **15** Napoaton iporasö' co huachi ma'sha tēparihuahuë' Yosë chinotacaso marë'. Nani tahuëri ina chinotatëhua', "Ma noyanquëñcha Tata Yosë quëmaso paya. Quisocristoíchin anoyacancantërincoi ni'ton, 'Yosparinquë Sinioro,' itërainquëñ," itahua'. **16** Noyasáchin niahua'. Nicatahuacaso' ama nariantahuasohue'.

A'napita ma'sha pahuantohuachina', ama apiratocosohuë'. Inapohuatëhua', Yosë noya chinotarëhua' ni'ton, noya ni'sarinpoa'.

¹⁷ Ansiano'sa' pënënpachinënquëma', noya natëco'. Noya noya imacamaso marë' Yosëri acorin. A'na tahuëri inapitanta' ya'ipi napopisopita Yosë sha'huitapi. Nani tahuëri pënënarinënquëma'. Noya natëhuatama', noya cancantatona', a'chintarinënquëma'. Co yanatëhuatamahuë', sëtapi. Naporahuaton, canpitanta' co noya noya cancantapomahuë'.

¹⁸ Quiya marë' Yosë nontoco'. Noya nisarai, ta'toi, noyápiachin cancantërai. Ya'ipi cancanëhuëi quëran Yosë yanatërai. ¹⁹ Ca marë' chiníquën Yosë nontoco' catahuainco a'naroáchin canpitataquë pa'i.

Quisocristo a'pairinpoaso'

²⁰ Yosë catahuainquëma' noya ninicatoma' ya'huëcamaso'. Inasáchin asanocancanipoa'. Inari chachin iráca Quisocristo ananpitaantarín. Iporaso' ohuicanënpita pochin nicatonpoa', Sinioro Quisoso a'pairinpoa'. Huënainën pa'nin ni'ton, nasha quëran anoyatérinso sha'huitérinpoa' imacaso marë'. Ina anoyatérinsoso' ya'huëmiatarin. Co onporonta' nishataponhuë'. ²¹ Yosë na'con catahuainquëma' ina nohuantérinso' nicacamaso marë'. Pi'pian téranta' co noyahuë' yonquihuatama', anoyacancanchinquëma'. Quisocristo catahuahuachinpoa', nani tahuëri nóya nisarëhua'. Ina quëran noya ni'sarinpoa huachi. Ya'ipi piyapi'sa' inasáchin chinochina'. Ama onporonta' ina naniantahuasohuë'. Amen.

²² Nani pi'pian ninshitérinquëma'. Noya cancantatoma' iyaro'sa' natanco', ténahuë. Achinicancainquëma', ta'to ninshitérahuë. ²³ Co hua'quiya quëranhuë' nicaponquëma' pa'sarahuë. Iya Timotio nani tashinan pëi quëran ocoipi. Manóton huë'pachin, inaro'co pa'sarai.

²⁴ Ansiano'sanquëma' saludos a'pataranquëma'. Ya'ipi imaramasopitanta' yonquiatënquëma', saludos a'pataranquëma'. Itariaro'santa' saludos a'patarinënquëma'.

²⁵ Inaora nohuanton, Yosë nóya catahuainquëma'. Nani ninshitérinquëma huachi.

Santiaco ninshitërinso'

Nisha nisha parti ya'huëpisopita ninshitërinso'

¹ Ca Santiacoco ninshitaranquëma', ni'co'. ¿Noya canpitanta' ya'huarama'? Canta' iséqué noya ya'huarahuë. Tata Yosë hua'anéntérinco ni'ton, Sinioro Quisocristoíchin natérahue. Ya'ipi cotioro'sanquëma' Quisocristo imaramaso' ninshitaranquëma'. Canpitaso' yanquéerahuatomá', nisha nisha parti ya'huarama'. Ya'ipi Yosë piyapinénpitanquëma' ninamaso' ninshitaranquëma'.

Ma'sha onporëhuaso'

² Nisha nisha ma'sha onpoapomarahuë' iyaro'sa', ama sëtocosohuë'. Noya cancantoco'. ³ Yosë téniarinpoa' cancanénpoa quëran huarë' natëcaso marë'. A'naquën ma'sha onpo-huachinara, a'naroáchin Yosë yaa'popi. Canpoaso nipurinhue' parisitohuatëhua', "Yosë co onporonta' nariantarinpoahuë," topatëhua', catahuarinpoa' chini chiníquën cancantasco marë'. ⁴ Noya cancantatoma', ya'ipi ahuantoco' noya noya imacamaso marë'. Chiníquën cancantohuatama', nónya nisarama'. Oshaquëran noya noya cancantarama'.

⁵ "¿Ma'cha ipora niiya?" topatama', Yosë nontoco' noya anitochinquëma'. Onpopionta' Yosë nontacaso' ya'huërin. Co nosororinpoaso' apiratérinpoahuë'. Inaora nohuanton, catahuarinpoa'. Nontérëhuaso marë' co no'huirinpoahuë'. Catahuarinpoa' no'tequën yonquicaso marë'. ⁶ "Yosë noya catahuarinco. Natëmiatarahuë," ta'tehua', Yosë non-tahua'. Ama nisha nisha yonquia'ahuasohuë'. "Co catahuarincohuë' nimara," ama tahuasohuë'. Ni'co'. Co'sacai' co sanoirinhue'. Pancái que ihuaitohuachina, niquëran niquëran niohuërërin. A'naquën piyapi'sa' ina pochin yonquionpi. Nisha nisha yon-quipi. ⁷ Nisha nisha yonquiatoma', nontohuatama', co Yosë a'paniarinquëmahuë', co catahuarinquëmahuë'. ⁸ Co ya'ipi cancanëma quëran huarë' imapatamahuë', co no'tequën yonquiaramahuë'. Cato' cancan pochin ya'huëtohuachiniquëma', nisha nisha yonquiarama'.

⁹ Co na'con coriqui iyaro'sa' ya'huëtopirinquëmahuë', Yosë nónya ni'ninquëma'. Huëntonéñqué chachin aya'coninquëma'. Ina marë' nónya cancantoco'. ¹⁰ A'naquëmaso nipurinhue' na'a coriqui, ma'sha, inapita ya'huëtérinquëma'. Ina niponahuë' Quisocristo imarama' ni'ton, co ma'sharáchin yonquicamaso' ya'huërinhuë'. A'na tahuëri chiminarihua'. Ya'ipi ma'sha papotérinsonta' ta'huantapona'. Quisocristo na'con yonquiatoma', noya cancantoco'. ¹¹ Ni'co'. Pi'i chiníquën picatohuachina, papotérinso' a'naroáchin ahuirin. Yanconéonta' anotohuachina, co huachi noyápiachin ninihuë'. Ahuirin huachi. Inapochachin ma'huano'santa' a'na tahuëri chiminapi anta'. Sacatápirinahuë', chiminapona'. Nani ma'sha ya'huëtopirinahuë', patapi.

Anishacancanipoaso'

¹² Ya'ipinpoa' ma'sha onporëhu'. Caniorëhu', parisitérëhu', naporëhu'. Noya ahuantohuatëhua', nónya cancantarihu'. "Parisitaponaraihuë", nónya imasarinaco," ta'ton, Yosë noya ni'sarinfoa'. Ina marë' inápaquë noya acanararinfoa'. Nan-pimiatarihu'. "Téhuëñchachin nosorohuatamaco, ananpitaantaranquëma'," itérinpoa'. Sha'huitérinpoa' ni'ton, co onporonta' nonpintarinfoahuë'. ¹³ A'naquënso nipurinhue' ma'sha onpohuachinara, a'naroáchin co noyahue' yonquipi. "Yosë nohuanton, co noyahue' ninahuë. Napoaton co ana'intincoso' ya'huërinhuë'," toconpi. Ama ina pochin yonquicosohuë'. Yosëso' noyasáchin yonquirin. Co pi'pisha térranta' oshahuaninhuë'. Co onporonta' aoshahuaninfoahuë'. ¹⁴ Canpoara nohuanton, co noyahue' cancantatëhu', co noyahue' yonquirëhu'. Inachin inachin yonquihuatëhu', chinii' quéparinposo pochin co noyahue' nicacaso' yonquirëhu'. ¹⁵ Ipora huanta' pi'pian co noyahue'

yonquirëhua'. Co a'naroáchin nariantohuatëhuahuë', co noyahuë' nisarëhua'. Naporahuatëhua', oshahuuanarëhua'. Oshahuuanpatëhua', chiminpatëhua' parisitomiatarëhua'. Ni'co'. Sanapi hua'huanpachina, oshaquëran oshaquëran hua'huin nanihuachina, huairin. Inapochachin co noyahuë' yonquihuatëhua', oshaquëran oshaquëran co noyahuë' nisarëhua'. Ina marë' oshahuuanarëhua'.

¹⁶ Nosororanquëma' iyaro'sa'. Ama campitaora yonquinëma quëran ninonpintocosohuë'. No'tëquën yonquico'. ¹⁷ Yosëso' noyasáchin yonquirinpoa'. Noya noya cancanta-caso marë' catahuarinpoa'. Inasáchin noya a'pintérinpoa' no'tëquën yonquicaso marë'. Pi'i, yoqui, tayora, inapita inari acopirinhuë', co ya'ipi tahuëri noya a'pininhuë'. A'na tashinta' co manta' a'pininhuë'. Yosëso nimirinhuë' co ina pochin nininhuë'. Nani tahuëriya nosoroatonpoa', catahuarinpoa'. ¹⁸ Inaora nohuanton, anasitaantatonpoa pochin nasha cancan quëtérinpoa'. Inaso' no'tëquën nonin. Nanamën natëhuatëhua', huëntonënqué aya'coaninpoa'. Hui'ninpita pochachin ni'ninpoa'. Canpoa'ton anoyacancanterinpoa'. Ina quëran oshaquëran na'aya'pi anoyacancantarín.

Cancanënpoa quëran huarë' natëcaso' ya'huërin

¹⁹ Napoaton iyaro'sa', ama topinan nonacamasoáchin yonquicosohuë'. Yosë nanamën na'con na'con natanco'. Naporahuaton, ama yano'huitocosohuë'. ²⁰ No'huitohuatëhua', co nanitarihuahuë' noya nicacaso'. Ina marë' co Yosë noya ni'sarinpoahuë'. ²¹ Napoaton ya'ipi co noyahuë' yonquiramasopita nariantoco'. Ama huachi oshahuancosohuë'. Yosë nanamën nani a'chintérinënquéma'. "Caora Sinioro co nanitërahuë' noya nica'huaso'. Catahuaco," ta'toma', nanamën yonquiráco'. Ina yonquihuatama', nicha'ësarinquëma'.

²² No'tëquën yonquico'. Yosë nanamën a'chintohuachinënquéma', ama topinan quëran natancosohuë'. Ya'ipi cancanëma quëran huarë' natëco'. ²³⁻²⁴ Ni'co'. A'na piyapi isihuicoqué ya'pirin ni'pirinhuë'. Në'huëratérinso' nicaponahuë', a'naroáchin nani-antérin. Co niamirayarinhuë'. Capitanta' Yosë nanamën topinan natanpatama', co natëhuatamahuë', ina piyapi naporinso pochin nicapoma'. ²⁵ Nimirinhuë', natëhuatama', noya nisarama'. Nasha nananso' nöya. Capitaora nohuanton, ina natëhuatama', co sopai camaiarininquëmahuë'. Nani tahuëri Yosë nanamën yonquico'. Natapatama', ama nariantocosohuë'. Noya natëhuatama', Yosë catahuarininquëma' noya nicacamo marë'.

²⁶ "Canta' noya Yosë imarahuë," topi a'naquën. Nimirinhuë', nisha nisha nonin. Co noyahuë' nonpachina, topinan quëran nonsarin, inaora ninonpintarin. Co têhuëñchachin imarinhuë'. ²⁷ Têhuëñchachin Yosë chinotohuatëhua', piyapi'sa' nosoroarëhua'. Sa'ahuaros'a', quëyorono'sa', inapita catahuarëhua'. Ma'sha pahuantohuachina', quëtacaso' ya'huërin. A'naquën piyapi'sa' co noyahuë' cancantatona', co Yosë imapihuë'. Ama inapita nonanhuansohuë'. Noyápiachin cancantohuatëhua', noya imasarëhua'. Inapohuatëhua', Yosë noya ni'sarinpoa'.

2

Ya'ipi piyapi'sa' nosoroa'huá'

¹ Quisocristo hua'anëntérinpoa'. Inasáchin noya noya ninin. Ina imarama' ni'ton, ama iyaro'sa' a'napita nocancosohuë'. Ya'ipi piyapi'sa' napopináchin nosoroco'. ²⁻³ Yosë chinotacaso marë' niyontonpatamara, ma'huanso' huë'pachina, pa'yatërama'. Noyápiachin a'morin. Na'a po'moitëra oro quëran ninins' po'morin. Ina nicatoma': "Huëqué' iyasha," itatoma', noyaquë chachin ahuënsërama'. A'naquënso nimirinhuë', co onpopinchin noyahuë' a'mosahuaton huë'pachina, co onpopinchin noya ni'namahuë': "Inaquë huaniquë". Nohuantohuatan, no'paquë téranta' huënsëqué' ", itërama'. ⁴ ¿Co'ta ina pochin nipatama', co napopianachin nosororamahuë'? Cancanënpoa quëran huarë' Yosë ni'sarinpoa' nimirinhuë', co ina pochin yonquiramahuë'. Co noyahuë' yonquirama'.

⁵ Ni'co' iyaro'sa'. Na'aquënpoa' co na'con coriqui ya'huëtopirinpoahuë', Yosë huayoninpoa' imacaso marë'. Yosë nohuitoahuatéhua', noya cancantarihua'. Huëntonënqué chachin aya'coninpoa' ni'ton, Yosë'pa' noya noya ya'huëcontarihua'. Nani sha'huitérinpoa'. "Nosorohuatamaco, inápaquë quëpantaranquëma'", itérinpoa'.

⁶ Canpitaso nípirinhue', sa'ahua nininsopita co onpopinchin nosororamahuë'. Ma'huano'saso' nonpintaténenquéma', ihuarinënquéma'. Aparisitérinënquéma'. Coisëqué sha'huirapirinënquéma'. ¿Ina nípirinhue' pa'yatarama' ti? ⁷ Quisocristoso' noya níponahuë', tēhuapi: "Co noyahuë' inaso'", toconpi. Imaréhua' ni'ton, Quisocristo piyapinënpitanpoa' canpoaso'. Napoaton ama ma'huano'sa' na'con na'con pa'yatocosohue'.

⁸ Yosë quiricanën quëran noya noya pënëninpoa'. "Quëmaora ninosororanso pochachin a'napitanta' nosoroco'", itérinpoa'. Ya'ipi piyapi'sa' nosorohuatama', noya nisarama'.

⁹ Nípirinhue', a'nasó' nocanpatama', co noyahuë' nisarama'. Co Yosë natéraramahuë' ni'ton, oshahuanarama'. ¹⁰ Yosë chachin pënëninpoa'. "Noya natérai," topiramahuë', pi'pian téranta' co natéhuatamahuë', oshahuanarama'. Ana'intinquëmaso' ya'huërin.

¹¹ "Sa'ahuanpatama', ama a'na sanapi monshitocosohue'", ténin Yosë. Naporahuaton, "Ama piyapi tēpacosohue'", ténin anta'. Co monshihuanaponahuë', piyapi tēpahuatan, oshahuanaran. Co Yosë natéaranahuë'. ¹² Quisocristo imapatéhua', nasha nanan sha'huitérinpoa'. Nicha'éripoa' ni'ton, nanitérhua' noya nicacaso'. Ina nanan chachin yonquiaton, a'na tahuëri Yosë coisë pochin nontarinpoa'. Ni'ton, piyapi nosoroatoma', noya nico', noya nontoco'. ¹³ Co piyapi'sa' nosorohuatamahuë', ayaro' tahuëri Yosënta' co nosoroarinquëmahue'. Napoaton "Yosë na'con nosororinpoa'", ta'téhua', a'napita nosoroa'hu'. Ina quëran ayaro' tahuëri co ana'intarinpoahuë'.

Noya nicacaso' ya'huërin

¹⁴ "Canta' Yosë imarahuë," tapomarahuë', co noyahuë' nipatama', topinan quëran nonsarama'. Ina pochin cancantohuatama', co cha'ësaramahuë'. ¹⁵ Ni'co'. A'na quëmapihuë' nípon, sanapihuë nípon Quisocristo imana'pi, capa capacaso', capa a'mocaso' nípachina, catahuacaso' ya'huërin. ¹⁶ Co catahuarihuarahuë': "Noya ya'huëquë". Ama sëhuëñquësohuë'. Ama tana natanquësohuë", itapomarahuë', co a'mocaiso', cosharo', inapita quëtohuatéhuahuë', jtopinan quëran napotarihua'! ¹⁷ Inapochachin "Canta' Yosë natérahuaë," tapomarahuë', co piyapi'sa' catahuahuatamahuë', topinan quëran nonsarama'. Co tēhuëñchachin imaramahuë'.

¹⁸ A'naquëma' tapoma' nimara: "Quëmaso' 'Yosë imarahuë,' ta'ton, chinotéran. Caso nípirinhue' noya ninahuë. Quëmaso' Yosë chinotaponahuë', co noya nipatanhuë', topinan quëran nonsaran. Caso nípirinhue', noya ninahuëso marë' natérahue'so' ya'noarin," tapoma'. ¹⁹ "A'naíchin Yosë ya'huërin," ¿ténan ti? No'téquënonan. "Yosë ya'huarin mini," topi sopairo'santa'. Ina nitotopi ni'ton, tē'huatatona', ropa ropatapi. Napoaponaraihuë', co Yosë imapihuë'. Co napopiso marë' Yosë'pa' pa'sapihuë'. ²⁰ ¡Co'chi no'téquënonan yonquirahuë paya! Co noya nipatanhuë', "Canta' imarahuë," topiranhuë', topinan quëran nonsaran. ²¹ Tata Apraan yonquique'. Yosëri nontohuachina, "Ama hui'nan apiratocosohue'", itohuachina, Isaco quëparin. Hui'nin níponahuë', co apiratérinhue'. Yosë chinotacaso marë' yatépapirinhue', Yosériso' nicha'érin. ¡Natérinso marë' Yosëri noya ni'nin! ²² "Yosë no'téquënonan yonquirahuë," ta'ton, Apraani natérin. Natéton, noya noya imarin. Co topinan quëran chinotérinhue'. Ya'ipi cancanën quëran huarë' natéton, noya imarin. ²³ Yosë quiricanënqué ninshítérin: "Yosë no'téquënonan yonquirahuë," ténin. "Inaso' Yosérë' nipayarin," ténin anta'. No'téquënonan yonquirahuë'.

²⁴ Co topinan quëran nonacaso' ya'huërinhuë', ténahuë. Yosë natétéhua', noya nípatéhua', noya imaréhua'. Ina marë' Yosë noya ni'sarinpoa'. ²⁵ Inapochachin Nacapanta' oshahuana'pi níponahuë', Yosë yonquiaton, noya ninin. Cosoi a'parinsopita

hue'pachinara, noya a'pairin ama inimicoro'sari tēpacaiso marëhuë'. Ina quëran po'oana quëran catahuarin cha'ëcaso'. Ina marë' Yosëri noya ni'nin. ²⁶ Hua'yanënpo' capa nipachina, co nanopirëhuë'. Inapochachin topinan quëran nonpatëhua', co noya cancantohuatëhuahuë', co Yosë natérëhuahuë'. Chimipi pochin cancantatëhua', co tēhuëñchachin imarëhuahuë'.

3

Nanamënpoa' nininso'

¹ Ama iyaro'sa' na'anquëma' cortoquë pënëntocosohuë'. Piyapi'sa' pënënpirëhuahuë' co canpoa téranta' noya nipatëhuahuë', aquëtë chachin Yosë ana'intarinfoa'. ² Ya'ipinpoa' co noyahuë' nicatëhua', oshahuanëhua'. Noyasáchin nonacasoso' saca sacai'. Noyasáchin nonëhua' naporini, Yosë pochachin cancanchitërihuahuë'. Co huachi aquëtë' tēhuë'itërihuahuë'. ³ Cahuario pa'patëra, pi'pian hua'nayon acatëntëre' no'téquëñ pacacaso marë'. Ina quëran motën no'téquëñ otëërarë'. ⁴ Nanchanta' panca masho niperihuë', quëmapiri otëërin. No'soratëñen hua'huishin naponahuë', noya otëërarin. Panca ihuani mapirionta', noya otëërarin. Inséquësona yaquépahuachina, noya quëparin. ⁵ Inapochachin nanamënpoa' pi'pira'huaya naponahuë', nonpatëhua', na'con nocanëhua'. Noya nonpatëhua', piyapi'sa' achinicancanarihua'. Niperihuë', co noyahuë' nonpatëhuara, anishacancantarihua'. Ni'co'. Pén pi'pira'huaya naponahuë', matohuachina, panca imin a'naroáchin huiquitërin. ⁶ Nanamënpoaso' pén pochin ninin. Pa'pi co noyahuë' ninin. Ina marë' oshahuanëhua'. Sopai chachin camairinfoa' co noyahuë' nonacaso'. Nanamënpoa quëran nippinorëhua', nino'huirëhua'. Ma'tëhua' ma'tëhua' nonëhua'. Co noyahuë' nonpatëhuara, nitapicançanarëhua'.

⁷ Nisha nisha ma'sharo'sa' tananquë ya'huërinsopita pë'tahuarë'. Pë'tahuhuatëra, co huachi maninpohuë'. Anpiantëhuano'sa', i'quë ya'huërinsopita, inapita pë'tahuarë'. Pëhuara, mayo, inapita pochin nininsonta' mapatëra, pë'tahuarë'. ⁸ Niperihuë', co insonta' inaora nanitërinhuë' noya nonacaso'. A'naroáchin co noyahuë' nonëhua'. Co noyahuë' nonpatëhua', ya'huan tomainëñ pochin nonëhua'. A'naroáchin yanquëëterino pochin na'a piyapi'sa' atapicançanarihua'. ⁹ Nanamënpoa quëran Yosë chinotërhua'. "Tata Yosë hua'anëntërinfoaso' nöya," tënëhua'. Ina nanamënpoa quëran chachin piyapi'sa' pinorëhua'. Ya'ipinpoa' Yosë chachin nininpoa'. Ina pochin cancantacaso marë' acopirinfoahuë', nippinorëhua'. ¹⁰ Yosë noya nontapomarahuë', piyapi pinopatama', co noyahuë' cancantarama'. Co iyaro'sa' nisha nisha nonacaso' ya'huërinhue'. ¹¹⁻¹² Ni'co'. Quëpa papotohuachina, quëpa nitërin. Co nisha nitërinhuë'. Miséra papotohuachina, miséra nitërin. Co quëpa nitërinhuë'. A'na huinan ya'huëhuachina, noyai', ca'cai', co cato chachin pipirihuë'. Noyápiachin nipachina, co onporonta' ca'caquëñ pipirihuë'. Inapochachin iyaro'sa', co nisha nisha nonacaso' ya'huërinhue'. Noyasáchin nonco'.

Yosë noya ayonquirinfoaso'

¹³ ¡Tëhuëñchachin noya yonquihuatama', noya nisarama! Napoaton noya nico' a'napitanta' noya yonquiramaso' nitochina'. "Co canpoara noya nitotërhuaahuë'. Yosëíchin catahuarinfoa' noya yonquicaso'," ta'toma', noya nico'. ¹⁴ A'naquëñso niperihuë' a'napita apiratatona', nocanpi. Inahuara nohuantopisoráchin yonquiatona' no'huitápi. Ina pochin cancantohuatama': "Caso' noyaco," ama tocosohuë'. Co no'téquëñ yonquiramahuë'. Nonpiánama'. ¹⁵ Co Yosë nohuanton ina pochin cancantërhuaahuë'. Piyapi'sa' inahuara ina pochin yonquipi. Ninocanatona', niapiratopi. Inachin yonquipi. Sopai nohuanton, ina pochin yonquipi. ¹⁶ Niapiratohuatëhuara, yanino'huirëhua'. Co a'napita nohuantopiso' yonquihuatëhuahuë', nisha nisha cancantarihua'. Inapohuatëhuara', pa'pi co noyahuë' nisarehüa'. ¹⁷ Yosëso niperihuë', no'téquëñ ayonquirinfoa'. Ina catahuhuachinfoa', noyápiachin cancantarihua'. Co manta'

no'huítarihuahuë'. Sanoanan quëran nontarihua'. A'napita pënënpachinpoa', noya natanarihua'. Piyapi'sa' nosoroarihua'. Naporahuaton noyasáchin nisarëhua'. Co nisha nisha yonquiarihuahuë'. Co nonpintarihuahuë'. Yoséíchin catahuarinpoa' ina pochin cancantacaso'. ¹⁸ Yosë yonquihuatëhua', sano cancantatëhua', nanan anoyatarihua'. Napoaton, noya nini'tehua' ya'huarihua'. Noya nipatëhua', a'napitanta' nicatonpoa', noya nisapi.

4

Ma'sharáchin yonquipisopita

¹ ¿Onpoatomata' nino'huítoma', yanahuërama'? ténahuë, yonquiato. Canpitaora can-canëma quëran nisha nisha ma'sha nohuantërama' ni'ton, co noyahue' cancantërama'. Nipa'yatacasoáchin yonquirama'. Napoaton nino'huirama'. ² Nani ma'sha no-huantopiramahuë', co ya'huétérinquëmahuë' ni'ton, yatépatopiso pochin cancantërama'. A'na piyapi ma'shanënpitanta' nohuantaparama'. Co ya'huétohuachinquëmarahuë', nino'huirama', yanahuërama'. Co Yosë nontëramahuë' ni'ton, noya nininsopita co ya'huétérinquëmahuë'. ³ A'naquëma' Yosë nontohuatamara, ma'sha nípiramahuë', co quëtérinquëmahuë'. Canpitaora nipa'yatacamaso marë' ma'sha nohuantërama' ni'ton, co quëtérinquëmahuë'. ⁴ Canpitaso' co huachi Yoséíchin yonquiramahuë'. Yosë yon-quipiramahuë', nani ma'sha na'con na'con nohuantatoma', yamonshihuaninso pochin cancantërama'. Capa cancantacasoáchin pa'yatërama'. Ma'sharáchin yonquiatoma', Yosë inimiconëñ pochin cancantërama'. ⁵ Yosë quiricanëñ quëran sha'huítérinpoa'. "Ispirito Santo aya'coancantërinpoa'. Ya'coancantohuachinpoa', apirarinpoa' Yoséíchin pa'yatacaso marë'", ténin. Co topinan quëran naporinhue'. ⁶ Sacai' Yoséíchin yonquicaso nípirinhue', inari chachin inaora nohuanton catahuarinpoa' ina pochin cancantacaso'. "Caora noya ninahuë," topatëhua', co Yosë noya ni'sarinpoahuë'. Nipirinhue', "Co caora nanitërahuë' noya nica'huaso'. Catahuaco Siniro," topatëhua', Yosë catahuarinpoa'. Nosoroatonpoa', catahuarinpoa', ténin Yosë quiricanëñquë.

⁷ Napoaton Yoséíchin natëco'. Ama pi'pian téranta' sopai nohuantocosohuë'. Chiníquëñ cancantoco'. Yosë nontatoma', sopai a'paco' pa'in. Co ina natëhuatamahuë', patarinquëma'. ⁸ Nani tahuëri Yosë yonquihuatama', inanta' yonquiarinquëma', na'con catahuarinquëma'. Ya'ipi co noyahue' yonquiramasopita naniantatoma', noya nico'. Ama huachi nisha nisha yonquicosohuë'. Noyápiachin cancantoco'. ⁹ Oshanëma' yonquiatoma', sétoco'. Ina yonquiatoma', ama huachi capa cancantamasoachin yon-quicosohuë'. Ama narinamasoachin yonquicosohuë'. Ya'ipi cancanëma quëran os-hanëma marë' sétatoma', na'nëco'. ¹⁰ Ya'ipinquëma', a'naya a'nayanquëma', Yosë chachin ni'sarinquëma'. "Caora Siniro co nanitërahuë' noya nica'huaso'. Catahuaco," topatama', anoyacancantarinquëma'. Ina pochin cancantohuatëhua', noya noya acoarinpoa'.

Pinotona'piro'sa' ana'intacaso'ya'huérinso'

¹¹ Ama iyaro'sa' nípinocosohuë'. Ama coisé pochin cancantatoma', a'napita no'huicosohuë'. Pi'pisha téranta' nanan ya'huéhuachin, ama apancatahuatoma', nisha'huirapicosohuë'. Quisocristo imarama' ni'ton, iyaparin pochachin ninosorocaso' ya'huérin. Pinopatama', co nosoroaramahuë'. Yosë pënënpirinpoahuë'. "Ya'ipi piyapi'sa' nosoroco'," itopirinpoahuë', "Co nosorocaso' ya'huérinhuë'", ta'toma', pinorama'. Can-pitaora yonquinëma quëran pinotatoma', co Yosë natëramahuë'. ¹² Yoséíchin coisé pochin nicaton, no'tequëñ sha'huitarinpoa'. Inasáchin ana'intarinpoa'. Noya cancantohuatëhua', nicha'ésarinpoa'. Co'so' natëhuatëhuahuë', parisitopiquë a'pararinpoa'. Capoña capiniso nípirinhue', co nisha'huirapicoso ya'huérinhuë'.

A'nanaya chiminacaso'ya'huérinso'

¹³ Natanco iyaro'sa'. A'naquëma' co Yosë yonquiatomahuë', nisha nisha yonquiconama'. "Iporahuë nípon, tashirayahuë nípon, sacatapoi a'na ninanoquë pa'sarai. Inaquë a'na pi'ipi pochin sacatohuatoi, na'con canaarai," topiramahuë'. ¹⁴ Co tashiraya téranta' nanitaramahuë' ninocamaso'. Ma'sona onpocamaso' co nitotéraramahuë'. Co canpitaora nohuanton nanopiramahuë'. Chitoro' a'naroáchin sacorinso pochachin a'nanaya a'naquën chiminin. ¹⁵ "Yosë nohuantohuachin nanopihuatoi, ma'sha nisarai," ta'caso nípirinhuë'. ¹⁶ "Quiyaora nohuanton, nani ma'sha nisarai," toconama'. Co Yosë yonquihuatamahuë', co noyahuë' cancantarama'. ¹⁷ Yosë yonquicamaso' nitotapomarahuë', co yonquihuatamahuë', oshahuanarama'. Ma'sona téranta' noya nicacaso' nitotapomarahuë', co ina nipatamahuë', ina marënta' oshahuanarama'.

5

Ma'huan'o'sa' pënëñinso'

¹ Ma'huan'o'santa' co Yosë natëpisopitahuë' pënëin. A'na tahuëri canpitaso' chiníquën parisitarama'. Ina yonquiatoma', sëtoco', na'nëco'. ² Ya'ipi ma'sha canaramaso' chanatarin. A'moramasopitanta', no'soni pë'yarin. ³ Coriquinëmanta' topinan quëran canarama'. Hua'na chi'chirotérinso pochin napoonin nisarin. Co canamiataramahuë'. Canpitaora maréáchin coriqui yontonama' ni'ton, Yosë chiníquën ana'intarinquëma'. Pënqué parisitarama'. Na'a coriqui canapomarahuë', nani ayaro' tahuëri ya'caritériarin. ⁴ Piyapinëmapita nonpintérama'. Iminëmaquë asacatopiramahuë', co no'tequën pahuërtéraramahuë'. Inapitaso' Yosëquë sha'huirapirinënquëma'. Shanëmapita nitérinso' mapirinahuë', co pahuërtéraramahuë'. Inapohuatama', Yosë nitotarin. Inaso' chini chiníquën nanantérin ni'ton, no'tequën i'huërtarinquëma'. ⁵ Isoro'paquë nöya ya'huërama'. Nani ma'sha ya'huërtérinquëma'. Capa cancantaca-soáchin yonquirama'. Nani ma'sha ya'huëtopirinquëmahuë', Yosë ana'intarinquëma'. Ohuacaro'sa' tēpacaso pochin nípon. Yatéparinso' co nitotatonahuë', coshatápirinahuë', tahuëri nanihuachina, a'nanaya hua'anëni huëcapairahuaton, tēparin. Inapochachin canpitaso' noya ya'huápiramahuë', a'nanaya ayaro' tahuëri naniarin. ⁶ Pa'pi co noyahuë' cancantatoma', noya piyapi'sa' nonpinapirama'. Chiníquën aparisitopiramahuë', inapitaso' co nanitopihuë' i'huërténënquëmaso'. Napoaton, Yosë chiníquën ana'intarinquëma'.

Quisocristo noya ninacaso' ya'huërinso'

⁷ Napoaton iyaro'sa' aparisitohuachinënquëma', noya ahuantoco'. A'na tahuëri Siniro o'mantararin. Naporo' ya'ipiya no'tequën ana'intarin. Ni'co'. Sha'tohuatëra, co a'naroáchin manëhuë'. O'nampachina, oshaquëran papotarin. O'naantahuachina, cayarin. "Oshaquëran cayahuachin, mapatéhua' ca'saréhua'," ta'ton hua'anëni ninararin. ⁸ Inapochachin canpitanta' noya cancantatoma', Siniro o'mantacaso' tahuëri ninaco'. Nani ya'caritériarin. Napoaton ama sëtocosohuë'. Chiníquën cancantoco'. ⁹ Ama pi'pian téranta' iyaro'sa' nino'huicosohuë', Yosë ana'intocheinquëma'. Ni'sárinpoa'. Co hua'quiya quëranhuë' o'mararin ana'intinpoaso marë'. ¹⁰ Ni'co' iyaro'sa'. Iráca pënëntona'piro'sa' Siniro nanamën a'chinpirimahuë'. Pënëntohuachinara, a'naquëni no'huitona', aparistopi. Parisitaponaraihuë', ahuantopi. Co no'huipihuë'. ¹¹ Noya ahuantopi ni'ton, Yosëri nöya ni'nin, tënëhua'. Coponta' pa'pi parisitérin, nitotérama'. Na'con parisitaponahuë', chiníquën cancantaton, ahuantérin. Ma'sha onpoaponahuë', Yosëri catastuarin noya noya pipicaso'. Ina nohuanton, napoin quëran noya noya yonquirin. Yosë nosoroatonpoa' na'con catastuarinpoa', tënahuë. Napoaton chiníquën cancantatoma', ahuantoco'.

¹² Na'con iyaro'sa' yonquico' no'tequénáchin nonacamaso': "Pa'sarahuë," topatama', pacó'. "Co pa'sarahuë'," topatama', ama pacosohuë'. Nani tahuëri no'tequénáchin nontohuatama', co "Yoscoaré'," ta'caso' ya'huërinhuë'. Co'ni ma'sha téranta' isoro'paquë

ya'huërinso' a'pitatéhua' nonpinacaso' ya'huërinhuë'. Napoaton nani tahuëri no'téquën nonco', Yosë ana'intochinquëma'.

¹³ A'naquëma' ma'sha onpohuatama', Yosë nontoco' catahuainquëma'. Noya cancantohuatama', Yosë cantanën cantatoma': "Yosparinquën Sinioro," itoco'. ¹⁴ A'naquëma' caniohuatama', ansiano'sa' amatoco' Yosë nonchina'. "Quisocristo catahuainquën," ta'tona', pi'pian tomaquë pashichinquëma'. Ina quëran Yosë nonchina' anoyatacaso marë'. ¹⁵ Ya'ipi cancanëma quëran huarë' natëcaso' ya'huërin. "Ya'ipi Sinioro nanita-paran," topachina', anoyatarin. Oshahuanpachina', inanta' inquitarin. ¹⁶ Napoaton ma'sona téranta' co noyahuë' nipatéhua', imarëhuasopita capini nisha'huitahua'. "Ina marë' caso' oshahuanahuë," nitahua'. Itohuanan capini Yosë nontahua' anoyachinpoa'. Ya'ipi co noyahuë' yonquirëhuasopita naniantohuatéhua', chiníquën ina nontohuatéhua', na'con catahuarinpoa'. ¹⁷ Ni'co'. Iniasë canpoa pochachin niponahuë', chiníquën Yosë nontohuachina, natanin. "Na'a piyapi'sa' Sinioro co imarinënquënhuë'. Quëma nohuanton, ama o'nainsohuë'" itohuachina, cara pi'ipi na'con co pi'pisha téranta' o'nanhuhuë'. ¹⁸ Ina quëran Yosë nontantahuachina: "Quëma nohuanton o'naanta'in," itohuachina, o'naantarin. Sharo'sa' papotantarín. Napoaton canpoanta' noyápiachin cancantatéhua', chiníquën Yosë nontahua'.

¹⁹ Noya iyaro'sa' nipënëncó'. A'nasó' no'tén nanan nitotaponahuë', nisha cancantohuachina, a'naya a'nayanquëma' pënëncó' no'téquën yonquianta'in. ²⁰ Natëhuachinquëma', chiminpachina co parisitomiatapihuë'. Ya'ipi oshanëna' Yosëri inquitarin. Pénënama' ni'ton, noyápiachin cancantantapi huachi. Ina yonquiatoma', nipënëncó'. Nani huachi.

Santiaco

Pitrori Yosë piyapinënpita ninshitërinso'

Nisha nisha parti ya'huëpisopita ninshitërinso'

¹ Ca Pitroco ninshitaranquëma', ni'co'. ¿Noya canpitanta' ya'huarama'? Noya canta' iséquë ya'huarahuë. Quisocristo a'parinco nanamën a'china'huaso marë'. Canpitaso' aparisitatënënquëma', ayanquërinënquëma' ni'ton, nisha nisha parti ya'huëarama'. Pontoquë, Carasiaquë, Capatosiaquë, Asiaquë, Pitiniaquë, inaquëpita ya'huëramaso' nanan a'pataranquëma'. Tëhuëñchachin co isoro'paquë ya'huëmiatarihuahuë'. Yosë nohuanton, Quisocristo imarëhua' ni'ton, Yosë'pa' ya'huëmiatarihuua'. Iséquëso' topinan yacapatatëhua pochin ninëhua'. ² Iráca quëra huarë' Tata Yosë nohuitërinquëma'. Nosoroatënquëma', huayoninquëma' huëntonënquë ya'conacamaso marë'. Ispirito Santo anoyacancantërinquëma' natëcamaso marë'. Quisocristo coroséquë chiminin oshanëma' inquitiinquëmaso marë'. Yosë nontërama' ni'ton, oshanëma' inquitërinquëma'. Yosë inaora nohuanton, noya catahuainquëma'. Asanocancainquëma'.

Yosë'pa' ya'huëcaso' ninarëhuaso'

³ Ma noyacha Tata Yosëso paya. Quisocristo pa'pin inaso'. Na'con nosoroatonpoa', nasitantarëso pochin nasha cancan quëtërinpoa' ina nohuitacaso marë'. Quisocristo hua'anëntërinpoa'. "Chiminaponahuë", nanopiantarin ni'ton, campoanta' nanopiantarihu'a", ta'tëhua', noya ninarëhua'. Natëtomiatërëhua'. ⁴ Yosë'pa' nani tapatërinpoa' noya noya ya'huëcontacaso marë'. Inatohua' co manta' ta'huantarihuahuë'. Co manta' nitapiarinhuë'. Inaquëso' co yanço pochin ahuirinhuë'. Noya noya nisarin. Campoa marë' Yosëri acorin. Inari chachin ni'sarin. ⁵ Tata Yosë ya'ipiya nanitaparin. "Yosë co quënanpirëhuahuë", catastuarinpoa", topatëhua', noya a'paiarinpoa'. Ma'sha onpohuatëhua', catastuarinpoa' ahuantacaso'. Ayaro' tahuëri nôya nicha'ësarinpoa'. Nani yonquirin o'mantacaso'. A'na tahuëri ni'sarëhua'. O'mantaquë huarë' a'paiarinpoa'.

⁶ Ina yonquiatoma', capa cancantarama'. A'na tahuëri Yosë nohuanton, pi'pian ma'sha onporama'. Ipora chachin ma'sha onpotopirinënquëmahuë', co hua'qui' paristaramahuë'. Parisitapomarahuë', o'mantacaso' tahuëri yonquiatoma', noya cancantoco'. ⁷ Ma'sha onpohuatëhua', Yosë catastuarinpoa' ya'ipi cancanënpoa quëran imacaso marë'. Oro tapacaiso marë' a'irotopiso pochin nitarinpoa'. Oro inapotohuachinara, noyäpiachin pipirin. Ya'ipi né'huë huiquitahuaton, orosachin ninin. Inapochachin iporaso' Yosë nohuanton, pënquë ahuiquitëreso pochin ma'sha onpotërinpoa' noya noya acoinpoaso marë'. Oro pa'ton niponahuë', co ya'huëmiatërinhue'. Campoaso niperinhuë', Yosë natëhuatëhua', nanopimiatarihu'a'. Napoaton na'con yonquia'ahua' cancanënpoa quëran huarë' natëcaso'. Ina Yosë nohuitërinso'. Natëmiatohuatëhua', Yosë noya noya ni'sarinpoa'. Quisocristo o'mantahuachin, noya noya acorarinpoa'. Ina pochin ya'noarihua'.

⁸ Quisocristo co onporonta' quënanapomarahuë', nosororama'. Ipora huanta' co nicapomarahuë', "Co nonpintarincohuë". Catahuarinco," ta'toma', ina natërama'. Cancanëma quëran ina nohuitatoma', nôya cancantërama'. Ina yonquiatoma', capa cancantërama'.

⁹ Imarama' ni'ton, anoyacancantërinquëma'. Nicha'ësarinquëma' huachi.

¹⁰ Iráca pënëntona'piro'sa' ninopi. "A'na tahuëri Yosë inaora nohuanton, nosoroatënquëma', nicha'ësarinquëma' canpitanta'", topi. Ninotona' ninshitaponaraihuë', co nitotopihuë' ma'sona tapon napopiso'. Napoaton cancantatona', Yosë quiricanën nontopi no'tëquëñ nitotacaiso marë'. Noya nitotatona no'tëquëñ sha'huitërinënpoa'. ¹¹ Ispirito Santo nohuanton, iráca Cristo ninopi. "Parisitapon. Ina quëran nanopiantarahuaton, noya noya ya'huapon," topi ninotona'. Napoatona', yonquiaapi. "¿Ma quëmapita' o'maton, parisitapon? ¿Onporota' parisitaponso'?" topi.

¹² Ina quëran Yosëri anitotërin. “Pahuanarin nanicaso'. A'na tahuëri ya'huëpisopita nitotacaiso marë' ca nohuanton, ninorama'” itërin Yosëri. Canpita iyaro'sa' nitotacamaso marë' ninopi. Iporaso' ina noya nanan chachin a'chintérainquëma'. Inápa quëran o'maton, Ispirito Santo catahuarincoi noya a'china'huaiso marë'. Anquëniro'sa quëran huarë' yanitotopirinahuë', co ya'ipiya nitotopihuë'.

Noyasáchin nicacaso' ya'huérinso'

¹³ Napoaton chiníquén cancantatoma', yonquico' noya nicacamaso'. Sano yonquico'. Quisocristo o'mantahuachin, inaora nohuanton, nicha'ësarinpoa'. Ina ninatoma', noya cancantoco'. ¹⁴ Hua'huaro'sa' noya nipachinara, pa'pina' natëpi. Inapochachin canpitanta' Yoséichin natëco'. Iráca co Yosë nanamën nitotatomarahuë', co yonquiramahuë'. Yano'pihuatamara, no'pirama'. Co noyahuë' yonquihuatamara, co noyahuë' ninama'. Iporaso nimirinhue' ama inapocosohuë'. ¹⁵ Tata Yosë noyasáchin ninin. Huëntonënqué aya'coninquëma' ni'ton, canpitanta' ina pochin cancantoco'. ¹⁶ Quiricanën quëran Yosë pënëninpoa'. “Caso' noyasáchin ninahuë. Napoaton canpitanta' noyasáchin nico'” itërinpoa'.

¹⁷ Yosë nontohuatamara, “Tata,” itërama'. A'na tahuëri inaso' coisë pochin ni'ton, ya'ipi piyapi'sa' no'tëquén sha'huitarin. Co noyahuë' nipisopita no'tëquén ana'intarin. Ya'ipi oshahuaninsopita ana'intarin ni'ton, të'huatacaso' ya'huérin. Chiminaquë huarë' ina yonquiatoma', noya nico'. ¹⁸ Iráca shimashonënpapita topinan quëran ya'huëpi. Moshatopirinahuë', co Yosë nohuitopihuë'. Inapita nonanatoma', canpitanta' topinan quëran ya'huëpiramahuë', Yosë ocoirinquëma' ina nohuitacamaso marë'. Ocoiinquëmaso marë' co coriqui pahuëretérinhue'. Hui'nin chachin a'paimarin. Coriqui, oro, inapita a'na tahuëri ta'huantarín. ¹⁹ Hui'ninso nimirinhue' noya noya. Ina chiminpachina, huënainen pa'nin. Iráca cotioro'sa' co noyahuë' nipachinara, carniroa'huay noyápiachin nininso' masahuatona', tëpapi. Inapochachin Quisocristoso' noya. Co manta' oshahuanaponahuë', coroséquë chiminin. Oshanënpoa' inquitatonpoa', ocoirinpoa huachi. ²⁰ Iráca co'huara isoro'pa' ya'huëyatérasohuë', Yosë yonquirin hui'nin a'paimacaso marë'. Ipora huarë' ya'norin canpitanta' nicha'ëinquëmaso marë'. Nani ayaro' tahuëri ya'caritapon chachin ya'norin. ²¹ Quisocristo anoyacancantérinquëma' ni'ton, Yosë nohuitatoma', natërama': “Tëhuëñchachin catahuarinpoa'” tënama'. Quisocristo chiminaponahuë', Yosëri ananpitaantarín. Inápaquë quëpantarahuatón, chiníquén nanan quëtérin. Napoaton Yoséichin imarama'. “Canpoanta' ananpitaantarinpoa'” ta'toma', ninarama'.

²² Yosë nanamënso' no'tën nanan. Ina natëhuatama', ya'ipi co noyahuë' yonquiramasopita naniantarama'. Noyápiachin cancantarama'. Yosë anoyacancantérinquëma' ninosorocamaso marë'. Napoaton imaramasopita capini noya ninosoroco. Tëhuëñchachin cancanëma quëran huarë' ninosoroco'. ²³ Yosëso' co onporonta' chiminihuë'. Nanpimiatarin. Inaso' nasha cancan quëtérinquëma' huëntonënqué ya'conacaso marë'. Nasitantarëso pochin noya cancantérama'. Co piyapi quëran nasitatoma' huëntonënqué ya'conamahuë'. Nanamën quëran anoyacancantérinquëma'. Nanamënso' co onporonta' ta'huantarinhue'. Ina natëhuatéhu', canpoanta' nanopimiatarhua'.

²⁴ “Panpatéro' a'naroáchin ahuirin. Inapochachin canpoanta' chiminarihua'. Yan-corosanta' noyápiachin nimirinhue', a'naroáchin ahuihuachina, nohuatérin. Inapochachin nani ma'sha ni'nëhuasopita ta'huantarín anta'. ²⁵ Siniro nanamënso nimirinhue', ya'huëmiatarin,” tënín Yosë quiricanënqué. Ina nanan chachin nani a'chintérainquëma'.

2

¹ Ya'ipi co noyahuë' yonquiramasopita naniantoco'. Ama iyaro'sa' ninonpintocosohuë'. A'naquën noyasha nonaponaraihuë', po'oana quëran co noyahuë' nipi. Ama

ina pochin nicosohue'. Ya'ipi cancanëma quëran no'tequen ninontoco'. A'napita noya ya'huëhuachina', ama noyapatocosohue'. Ama pinotocosohue'. ² Yosë huëntönënqué ya'conpatëhua', hua'huasha nasha huaipiso pochin ninëhua'. Ni'co'. Canopia'huaya sho'sho apira apira nayarin. Sho'shotaton, noya chinirarin. Inapochachin canpitanta' Yosë noninso chachin na'con na'con nohuantoco'. Ina yonquihuatama', oshaquëran noya noya nisarama'. Chiniquen cancantatoma', noya cha'ësarama'. Yosë nanamëñáchin achinicancaninpoa'. ³ "Siniroso' noya," ta'toma', nani imarama'. Cosharo' pi'nirëso pochin pi'pian nohuitërama'. Na'con na'con ina nohuitoco'.

Quisocristo na'pi pochin nininso'

⁴ Na'pi quëran yapëihuatëra, a'na na'piso' na'con na'con nohuantëre' pëi' achinicaso marë'. Quisocristo ina na'pi pochin ninin. Piyapi'sari co nohuantopirinahuë', Yosëriso' nöya nicaton, na'con nohuantërin. Apira apira Quisocristo yonquico'. Inaso' nanopimiatarin. ⁵ Imarama' ni'ton, canpitanta' noya na'piro'sa pochin nisarama'. Nanpimiatarama'. Ya'ipi imarëhuasopita Yosë acorinpoa' pëinën pochin nicacaso marë'. Cancanënpoa quëran huarë' ina na'con chinotërehua' ni'ton, corto hua'ano'sa pochin nisarehua'. Nani tahuëri ina chinotatëhua', "Yosparinquen Sinioro," itahua'. Nicatahuacasonta' ama nariantahuasohue'. Quisocristo catahuarinpoa' ina pochin nicacaso'. Ina marë' Yosë noya ni'sarinpoa'. ⁶ Quiricanën quëran ina ninorin:

"Yapëihuachinara, noya noya na'pi nohuantopi pëi' achinicaso marë'. Cristo ina na'pi pochin nisarin. Sionquë acoarahuë. Ina natëhuatama', 'Co nariantarinfoahuë', ta'toma', co sëtërëso pochin cancantaramahuë'," tënín Yosë quiricanënqué.

⁷ Quisocristo natëhuatëhua', ina na'con nohuantarihua'. A'naquënso niperinhuë' co natëtonaraihuë', co Quisocristo nohuantopihuë'. Quiricanën quëran naporin: "Na'pi quënanpachinara, sacatoro'sa' co nohuantopihuë'. Të'yatopi. Ina na'piso niperinhuë' noya noya ninin pëicaso marë'," tënín.

Inapochachin Quisocristo noya niperinhuë' co nohuantopihuë'. ⁸ Quiricanën quëran itantarín:

"Iratohuatëra, na'pi i'patahuatë', anotëre'," tënín. Inapochachin a'naquën co Quisocristo nanamëñatëtonaraihuë', nisha cancantopi. Ina marë' Yosë nohuanton, na'inpi huachi.

⁹ Imarëhuasopitaso niperinhuë' nohuantërinpoa'. Huayoninpoa' ina nohuitacaso marë'. Inasáchin hua'anëntërinpoa'. Nani acorinpoa' corto hua'ano'sa pochin nicatëhua', ina marë' sacatacaso'. Noyápiachin cancan quëtërinpoa'. Yosë piyapinënpoa' ninëhua'. Iráca tashi pochin cancantopirëhuahuë', Yosë nicha'ërinpoa' tahuëri pochin cancantacaso marë'. Acorinpoa' Yosë noya nosororinpoaso' sha'huicaso marë'. ¹⁰ Iráca co Yosë piyapinënpita niperamahuë', iporaso' nani huëntönënqué aya'coninquëma'. Iráca co insonta' tëhuëñchachin nosororiniquëmahuë'. Iporaso' Yosë nosororiniquëma'.

Yosë noya imahua'

¹¹ Nosororanquëma' iyaro'sa' ni'ton, pënenaranquëma'. Quisocristo imatoma', co isoro'paquë ya'huëmiataramahuë'. Yosë'pa' ya'huëmiataramaso'. Napoaton ama ma'sha isoro'paquë ya'huërinopitaráchin yonquicosohue'. Isoro'paquë no'piápi, monshihuanapi, taparosáchin nonatona', capa cancantapi. Ama ina pochin cancantocosohue'. Ina pochin cancantohuatama', sopai minsëarinquëma', co Yosë pochin cancantaramahuë'.

¹² Co imapisopitahuë' pinorinënquéma'. "Co noyahue' nipi," topi. Ina niperinhuë', noyasáchin nico' ni'inënquéma'. Ina quëran a'na tahuëri Yosëri catahuarin ni'ton, no'tequen yonquihuachina', yonquiarinënquéma'. "Ma noyacha Yosëri catahuarin ni'ton, noya nipi paya," tosapi.

Hua'ano'sa' natëcaso' ya'huërinso'

¹³ Sinioro imarama' ni'ton, hua'ano'sa' natëco'. Ya'ipi acorinsopitanta' natëco'. Copirnoso' chini chiníquën nanantërin ni'ton, natëcaso' ya'huërin. ¹⁴ Ninano hua'ano'sa', chirinchiro'sa', sontaro'sa', ponisiaro'sa', inapita acorin piyapi'sa' a'paicaiso marë'. Co noyahuë' nipachina', ana'intapi. Noya nipachina', noya ni'sapi. Inapitanta' natëco'. ¹⁵ Ina Yosë nohuantërin. A'naquën co Yosë nanamën nitotatonaraihuë', co yonquipihuë'. Quisocristo imarama' ni'ton, a'naroáchin yapinorinënquëma'. Noyasáchin nico' ama pinoinënquëmaso marëhuë'.

¹⁶ "Yosë nicha'ërinpoa'," ta'toma', noya yonquico'. Iráca nanan co natëcaso' ya'huëpirinhuë', ama ina yonquiatoma' têhuëcosohuë'. Yosë hua'anëntérinquëma' ni'ton, ina nohuantërinsoáchin natëco'. ¹⁷ Ya'ipi piyapi'sa' noya nontoco'. Imaramasopita capini noya ninosoroco'. Yosë tê'huatatoma', no'tëquën natëco'. Copirnonta' noya nicatoma', natëco'.

Quisocristo nonanacaso' ya'huërindo'

¹⁸ A'naquëma' patron marë' sacatërama'. Asacatohuachinquëma', natëco'. Yosë ni'sarinquëma ni'ton, noya natëco'. A'naquën patron noya. Nosororinquëma'. A'naquënsö nimirinhue' yáno'huitërin. Co noyahuë' nimirinhue', inapitanta' natëcaso' ya'huërin. ¹⁹ Topinan quëran ana'intoihuachinquëma', ama no'huicosohuë'. Yosë yonquiatoma', ahuantoco'. Ina marë' Yosë noya ni'sarinquëma'. ²⁰ Co noyahuë' nipatama', ana'intarinquëma'. Ahuantohuatama', co ina marë' noya ni'ninquëmahuë': "No'tëquën ana'intoihuachinquëma', ahuantacaso' ya'huërin," topi ya'ipiya. A'na tahuëriso nimirinhue' noya nimiramahuë', aparisitarinënquëma'. Co no'huitatomahuë', ahuantohuatama', Yosë noya ni'sarinquëma'. ²¹ Ina pochin ahuantacaso' Yosë nohuantërin. Quisocristo canpoa marë' parisitërin. Parisitaton, a'chintërinpoa' canpoanta' ina pochin ahuantacaso'. Ina iyaro'sa' nonanco'. ²² Inaso' nónya ninin. Co manta' onporinhuë'. Co pi'pian têranta' nonpininhuë'. ²³ Inimiconënpitari pinopachinara, co yai'huërëtérinhuë'. Aparisitopirinahuë', co no'huirinhuë'. "A'na tahuëri Yosëri no'tëquën ana'intarin," ta'ton, Yosëíchin natërin. ²⁴ Quisocristo isoro'paquë o'maton, piyapi chachin nasitimarin. Oshanënpoa marë' corosëquë chiminin. Inaora ya'huërëtérinpoa'. Ya'ipi co noyahuë' yonquirëhuasopita nariantatëhua' noya nicacaso marë' chiminin. Corosëquë parisitaton, anoyacancantërinpoa'. ²⁵ Ohuica chihuërinso pochin nicatëhua', co Yosë nohuitopirëhuahuë', iporaso' Quisocristo imarëhua'. Inaso' ohuicaro'sa' hua'anënpochin ni'ton, noya a'paiarinpoa'.

3

So'yahuano'sa' pënëninso'

¹⁻² Sanapi'santa' so'yahuachina', so'ina' natëina'. A'naquën quëmapi'sa' co Yosë nanamën natëyátërapihuë'. Inahuanta' imacaiso marë' so'ina' noya natëina'. Noya no-coma'ina'. Ama a'na quëmapi têhuainasohuë'. Yosë yonquiatona', noya niina'. Noyasáchin nipachin, ina nicaton, so'ionta' oshaquëran imapon nimara. Co sa'ini pënënpirinhuë', noya nininso marë': "Noya nanan imasarín," tapon inanta'. ³ Ama imoyaro'sa' nitapacasoráchin yonquicosohuë'. A'naquën sanapi'sa' ainëna tapacasoachin yonquipi. Oro quëran nipiso' a'sontanpapi. Notohuaró miyo pë'pëpi. Pa'ton nininsopita a'mocaiso pa'yatopi. Noyápiachin nitapacasoráchin yonquipi. ⁴ Quisocristo imapatama', ama aipi ya'norinsoráchin yonquicosohuë'. Noyápiachin cancantacamaso' na'con na'con yonquico'. Yosë pochin yonquicaso' ya'huërin. Nitaparamaso' co ya'huëmiatarinhuë'. Cancanënpoa quëran yonquirëhuasopitaso nimirinhue', ya'huëmiatarin. Napoaton imoyaro'sa' sano cancantoco'. Ama pi'pian têranta' no'huitocosohuë'. Nónya cancantohuatama', Yosë noya ni'sarinquëma'. ⁵ Iráca noya sanapi'sa' Yosë natërinsopita ina pochin nipi. "Yosë

catahuarinco," ta'tona', inaíchin yonquipi. So'ina' noya natëtona', noyápiachin cancantopí. ⁶ Apraan sa'in ina pochin ninin, Sara itopiso'. So'in noya natërin. "Camaihuachincora, natërahuë mini," ténin. Canpitanta' imoyaro'sa' noya nipatama', ina pochin cancantarama'. Noyápiachin cancantohuatama', co të'huatochinachin cancantaramahuë'.

⁷ Canpitanta' iyaro'sa', sa'ama' nosoroatoma' noya ichiya'huëco'. Co campita pochin chinipihuë' ni'ton, noya nicatoma', sanoanan quëran nontoco'. Inapitanta' Quisocristo imapi ni'ton, campitarë'quëma chachin Yosë huëntonënquë ya'conpi anta'. Inapitanta' nanopimiatapi. Ina yonquiatoma', sa'ama' noya nosoroco'. Inapotohuatama', Yosë nontohuatama', catahuarinquëma'.

Aparisitërinënpoaso'

⁸ Ya'ipinquëma' noya nini'toma', ya'huëco'. A'naquën sëtohuachina', noya nontoco' ama aquëtë' sëchinasohuë'. Noya cancantohuachina', campitanta' noya cancantoco'. Imaramaso capini ninosoroco'. Ninosoroatoma' iyaro'sa' nicatahuaco'. Ama ninocancosohuë'. Canpitanta' imoyaro'sa', noya ninontoco'. ⁹ Piyapi'sa' ma'sha onpotohuachinënquëma', ama i'huërtacamaso' yonquicosohuë'. Pinopachinënquëma', ama campitariso' pinocosohuë'. Noya nontoco'. Naporahuaton, Yosë nontoco' inapitanta' catahuain. Imapatëhua', ina sha'huitérinpoa' a'napitanta' nosorocaso'. Napohuatëhua', Yosë noya catahuarinpoa'. ¹⁰ Iráca quiricanën quëran itérinpoa':

"Noya ya'huëcamaso' nohuantohuatama', noyasáchin nonco'. Ama insonta' nonpintocosohuë'. Inapohuatama', noya cancantatoma', noya ya'huarama'.

¹¹ Ya'ipi co noyahue' yonquiramasopita nariantatoma', nónya nico'. Sano piyapi nicatoma', ama insonta' no'huicosohuë'. A'napitanta' catahuaco' noya nini'tona' ya'huë'ina'.

¹² Noya nipatama', Siniro a'paiaquinquëma'. Ina nontohuatama', natanarinquëma'. Nipirinhue', co noyahue' nipatama', co Siniro tahuërtarinquëmahuë', ténin.

¹³ ¡Noyasáchin nipatama', co a'napita yai'huërtarinquëmahuë'! ¹⁴ A'na tahuëriso nimirinhue' imaramaso marë' aparisitohuachinënquëma', ama të'huatocosohuë'. "Quisocristo marë' parisitarëhua'," ta'toma', noya cancantoco'. Yosë noya catahuarinquëma' ni'ton, ama pa'yancosohuë'. ¹⁵ Ya'ipi cancanëma quëran Quisocristo yonquico'. Inaso' hua'anëntérinpoa' ni'ton, chinotoco'. Nani tahuëriya chiniquën cancantatoma', yonquico' Quisocristo nanamën sha'huicamaso marë'. Ina quëran "¿Onpoatomata' imarama?" itohuachinënquëma', a'naroáchin no'tequën sha'huitarama'. ¹⁶ Ama no'huitë pochin chiniquën sha'huitocosohuë'. Sanoanan quëran pënëncö'. Yosë yonquihuatama', noya sha'huitarama'. Quisocristo imarama' ni'ton, noyasáchin nicatoma', noyápiachin cancantoco'. Ina quëran pinopirinënquëmahuë', "Co'ta noya nisapi. Quëmariso' nonpinapiran," itarin a'narinta'. Itohuachina, pinotona'piso' tapanarin.

¹⁷ Co noyahue' nipatëra, parisitacaso' ya'huërin. A'na tahuëriso nimirinhue' Yosë nohuanton, imarëhuasopitanta' parisitarëhua'. Noya nimiréhuahuënta', piyapi aparisitarinënpoa'. Ina pochin parisitacaso' Yosë nohuantërin. ¹⁸ Quisocristonta' nónya niplonahuë', oshahuanëhuaso marë' parisitërin. Oshanënpoa' inquitinpoaso marë' chiminin. A'naromarëáchin chiminin. Noya niplonahuë', oshahuano'sa marë' chiminin. Canpoanta' Yosë nohuitacaso marë' chiminin. Piyapi ni'ton têhuëñchachin têpapi. Chiminaponahuë', nanopiantarin ni'ton, noya noya ya'huantarín. ¹⁹ Ina pochin nanopiantaton, pa'nin chimipiro'sa' ya'huërinquë. Inaqué tashinan pëiquë ya'huapiso pochin nininsopita nanan sha'huitonin. ²⁰ Inapitaso' iráca Noi nanopiso', pa'pi co noyahue' cancantopi ni'ton, ina nohuanton, Noi pënëntárin. Pënëntopirinhue', co yanatëpihuë'. Yosëso' co a'naroáchin ana'intérinhue'. Noi panca nancha nicaso', ninarapirinhue', co natëpihuë' ni'ton, ana'intérin. Ipora huanta' parisitapi. Noiso' nancha tinirahuaton, ya'conin. Naporo' posaya'píchin ii' quëran cha'epi. ²¹ Inapochachin iporaso'

Yosë nicha'ësarinfoa'. Anoyacancantuachinpoa', apointerinënpoa'. Co në'huë inquitinënpoaso marë' apointerinënpoahuë'. Aporintohuachinënpoara, Yosë nontéröhua' catahuainpoaso marë'. "Ya'ipi oshanëhuë inquitoco. Catahuaco noyasáchin nicato, noyápiachin cancanchi," itéröhua'. Ina marë' anoyacancantérinfoa'. Quisocristo nanopiantarin ni'ton, nicha'ësarinfoa'. ²² Nanpiantarahuaton, Yosë'pa' pantarin. Yosë inchiinan quëran huënséaton, chini chiníquën nanantarín. Ya'ipi anquëniro'sa', hua'ano'sa', chiníquën nanantérinsopita inapitari natëpi huachi.

4

Iráca naporëhuaso' nariantahua'

¹ Quisocristo isoro'paqué o'maton, tēhuëñchachin parisitérin. Napoaton canpitanta' parisitohuatama', ahuantoco'. Quisocristo yonquiatéhua', noya ahuantohuatéhua', noya noya cancantarihua'. Co huachi oshahuanacaso' pa'yatarihuahuë'. ² Napoaton ama iráca naporamaso pochin yonquicosohuë'. Ipora quëra huarë' Yosë nohuantérinsoáchin natëco'. ³ Hua'qui' co noyahue' ninama'. Monshihuanama', nisha nisha sanapi noyarama', no'pirama'. Pita nicacasoáchin yonquirama'. Mamanshi mosharama', co inapita moshacasohuë' nimirinhue'. Iráca co Yosë imatomahuë', inaporama'. Inapoatomá, tahuëri chiniarama'. ⁴ Iporaso nimirinhue' imarama'. A'napita yano'pihuachinara, amatopirinëñquémahuë'. Co yano'pihuatamarahuë', no'huirinëñquëma'. "¿Onpoatomata' pita nipayéira, co yani'namacoihue'?" itaténëñquëma', pinorinëñquëma'. ⁵ Iporaso' pinopirinëñquémahuë', ayaro' tahuëri nanihuachin, Yosë sha'huitiinfoaso' ya'huérin. Nanpirëhuasopita, chiminpisopita, ya'ipinpoa' coisë pochin nontarinfoa'. Co noyahue' nipesopita no'tequén ana'intarin. ⁶ A'naquén nohuitéramasopita nani chiminpi. Piyapi ni'ton, chiminpi. Chiminaponaraihuë', co'huara chimiyyantérasoihue', Quisocristo nanamén a'chintopi. Natëpi ni'ton, hua'yanëna quëran Yosë pochin nanopimiatapi.

Nisha nisha acorinpoaso'

⁷ Ayaro' tahuëri nani ya'cariarinfoa'. Napoaton ama nisha nisha yonquicosohuë'. Noya yonquiatoma', Yosë nontáco'. ⁸ Ya'ipi cancanëma quëran noya ninosoroco'. Ina na'con na'con Yosë nohuantérin. Piyapi nosorohuatama', co noyahue' nimirinahuënta', a'naroáchin nanan anoyatarama'. Co noyahue' nipesopita nariantatoma', co huachi yonquiaramahuë'. ⁹ Ama apiracosohuë'. Ni'toro'sa' huë'pachina', noya nontoco'. Noya cancantatoma', a'caco', ahuë'etoco'. ¹⁰ Yosë imarëhuasopita acorinpoa' nisha nisha nicaso'. Inaora nohuanton, a'naya a'nayanpoa' catahuarinpoa' ma'sona nohuantérinso' nitotacaso'. Napoaton ama topinan quëran ya'huëcosohuë'. Ma'sona nitotohuatama', noya nico' a'napita catahuacaso marë'. Noya noya imacamaso marë' nicatahuaco'. ¹¹ A'naquén Yosë nohuanton, nitotopi pénëntacaiso'. Nitotohuatama', Yosë noninso chachin pénëntoco'. A'naquéonta' Yosë nohuanton, cania'piro'sa', sa'ahuar'o'sa', inapita catahuapi. Yosë catahuarinquëma' ni'ton, ina yonquiatoma', a'napita noya catahuaco'. Ma'sona térranta' nipatama', ya'ipi cancanëma quëran nico'. Piyapi'sa' nicaténëñquëma' Yosë noya noya yonquicaiso marë' inapoco'. Yosëso' noya noya ninin. Chini chiníquën nanantérin. Ya'ipi piyapi'sari ina chinochina'. Quisocristo catahuarinpoa' ina pochin cancantacaso'. Amen.

Nisha nisha parisitérëhuaso'

¹² Na'con iyaro'sa', imoyaro'sa', nosororanquëma'. Iporaso' chiníquën parisitohuatama', ama pa'yancosohuë'. Co topinan quëran ma'sha onporamahuë'. Imarama' ni'ton, ina pochin parisitacaso' ya'huérin. Yosë nohuanton, napoarama' noya noya imacamaso marë'. ¹³ Quisocristo parisitérinso pochin parisitohuatama', noya cancan-toco'. Ina quëran chiníquën nanantaton o'mantahuachin, noya noya cancantarama'.

14 Imaramaso marë' pinopachinënquëma', Yosë noya ni'sarinquëma'. Ispirito Santo ya'coancantatënquëma' achinicancanarinquëma' ni'ton, noya cancantoco'.

15 A'naquën piyapi'saso' co noyahue' cancantopi. Tëpatopi, ihuatopi, nanan pa'yatopi inapitaso' ana'intacaso' ya'huërin. Ama inapita pochin yonquicosohue'. Ina marë' parisitohuatëhua', tapanacaso' ya'huërin. **16** Nipirinhue', imaramaso marë' aparisito-huachinënquëma', ama tapancosohue'. "Quisocristo imarai mini. Ma noyacha Tata Yosëso paya," topatama', Yosë noya ni'sarinquëma'.

17 Nani ana'intinfoaso' naniriari. Ipora chachin imarëhuasopita pi'pian pi'pian ana'intarinpoa'. Co noyahue' nipatëhua', tatanpoa pochin pi'pian ana'intarinpoa' noya noya yonquicaso marë'. ¡Ayaro' tahuëriso nipirinhue' co nanamën natëpisopitahuë' chiniquën ana'intarin! Parisitopiquë a'pararin ni'ton, parisitomiatapi. **18** Yosë quiricanënquë sha'huitérinpoa': "Noya piyapi'santa' parisi quëran cha'ësapi. ¡Oshahuano'saso nipirinhue' co onporonta' cha'ësapihuë! Ya'ipi co noyahue' nipisopita chiniquën parisitomiatapi," ténin. **19** Napoaton Yosë nohuanton parisitohuatama', noya nico'. "Catahuaco Siniro chiniquën cancanchi," itoco'. Yosë chachin nininpoa'. Inaso' co onporonta' naniantarinfoahuë'.

5

Ansiano'sa' pënënino'

1 Ya'ipi ansiano'sanquëmanta' pënënanguëma'. Canta' ansianoco ni'to, achinicancainquëma', ténahuë. Quisocristo isoro'paqué nípon, nohuitérahuë. Coroséquë parisitohuachina, cari ni'nahuë ni'ton, sha'huirárahue. O'mantahuachin, canpoanta' inarë'quënpoa' hua'anëntarihua'. Napoaton iporaso' pënënaranguëma' noya nicacamaso marë'. **2** Quisoso imapisopita iyaro'sa' noya ni'co'. Yosë acorinquëma' ya'huëramaquë a'chinacamaso marë'. Hua'anëni ohuicanënpita noya a'pairinso pochin noya a'paico' imamiachina'. A'naya térranta' co noyahue' nipachin, sanoanan quëran pënëncó' noya yonquianta'in. Nani tahuëri catahuaco' noya imaina'. Ama chirotomahuë', a'chinco'. Ina pochin nicacaso' Yosë nohuantérin. Ni'ton, canpitanta' noya nohuantatoma', a'chinco'. Ama canacaso marë' a'chincosohue'. Noya cancantatoma', Yosë marë' sacatoco'. **3** Pënëntohuatama', ama chiniquën nontocosohue'. Ama hua'an pochin cancantatoma', camaitocosohue'. Yosë acorinquëma' a'chintëramasopita catahuacamaso'. Napoaton noya yonquiatoma', noya nico' inapitanta' inachachin nonainquëmaso marë'. **4** Quisocristo imarëhua' ni'ton, ya'ipinpoa' hua'anëntérinpoa'. A'na tahuëri o'mantararin. Noya ansiano'sa' nipatama', naporo' noya canaarama'. Isoro'paqué canatohuachinara, yancoté' huëron quëran nipiso' quëtopirinahuë', inaso' a'naroáchin ahuirin. Inapaquëso nipirinhue' canahuatama', ya'huëtomiatarinquëma'. Noya noya ya'huëcontarama'.

Yosë catahuarinfoaso'

5 Hui'napi'sanquëmanta' ansiano'sa' natëco'. Ya'ipinquëma' noya yonquiatoma', nicatahuaco'. Quiricanën quëran itérinpoa': "Caora noya nisarahue, ta'toma', nocantohuatama', Yosë co noya ni'sarinquëmahue'. Nipirinhue', 'Caora co nanitérahuë' noya nica'huaso'. Catahuaco,' topatama', inaora nohuanton, Yosë noya catahuarinquëma'," ténin.

6 Parisitapomarahuë', ama Yosë no'huicosohue'. Chiniquën nanantaton, ni'sárinquëma ni'ton, natëco'. Ina noya yonquihuatama', tahuëri nanihuachin, noya noya acoarinqüëma'. **7** Ama ma'sha onpochináchin yonquicosohue'. Ya'ipiya Yosë sha'huitoco' catahuainquëma'. Ina quëran: "Nosoroatonpoa', co naniantarinfoahuë'," ta'toma' sano cancantoco'.

Sopai yaminsërinpoaso'

⁸ Sopaiso' inimiconënpoa'. Yacamairinpoa' co noyahue' nicacaso marë'. Pa'pini' yamaninposo pochachin sopai pa'sarin piyapi'sa' minsëcaso marë'. Napoaton noya yonquiatoma', ni'sáco'. ⁹ Ama pi'pian téranta' ina tahuërëtocosohue'. Chiníquën cancantatoma', sha'huitoco' pa'in. Yoséíchin natëco'. Co canpitaíchin parisitaramahuë'. Ya'ipi parti Yosë imarëhuasopita parisitarëhua'. Ina yonquiatoma', chiníquën cancantoco'. ¹⁰ Yosë pa'pi nosororinpoa'. Quisocristo imarëhua' ni'ton, a'na tahuëri inápaquë quëpantarinpoa'. Iporaso' ma'sha onpopirëhuahue', catahuarinpoa'. Co hua'qui' parisitarihuahue'. Ina quëran nosoroatonpoa', anoyatarinpoa'. Achinicancanarinpoa'. Noya noya acoarinpoa'. ¹¹ Yosë chini chiníquën nanantërin. Ya'ipiya hua'anëntarin ni'ton, co onporonta' pipiarinhue'. Inasáchin chinochina'. Amen.

Tiquiapón pochin ninshitérinso'

¹² Iya Siripano catahuarinco ninshita'huanquëmaso'. Inaso' noya ni'nahuë. Noya imarin. Nani pi'pian ninshitéränquëma' pënëna'huanquëmaso marë'. Yosë yonquirinpoaso chachin nani sha'huitéränquëma'. Noya nosororinpoa', ténahuë. Ina yonquiatoma', ama a'pocosohue'.

¹³ Papironiaquënta' Yoséri huayoninsopita ya'huëpi. Inapita saludos a'patarinènquëma'. Marconta' saludos a'patarinquëma'. Inaso' hui'nahuë pochin ni'nahuë. ¹⁴ Ya'ipinquëma' noya ninosoroatoma', nisë'quëco'. Quisocristo imarama' ni'ton, Yosë catahuainquëma' sano cancantacamaso marë'. Nani huachi.

Pitro

Pitrori imapisopita ninshitaantarinson'

Imapisopita yonquiaton, nanan a'patérinso'

¹ Ca Simon Pitroco ninshitaranquëma', ni'co'. ¿Noya ya'huarama'? Noya canta' ya'huarahuë. Quisocristoíchin hua'anéntérinco ni'ton, inasáchin natérahuë. Ina acorinco nanamën a'china'huaso marë'. Yosë nohuanton, canpitanta' Quisocristo natërama'. Quiya pochin imarama' ni'ton, canpitanta' nicha'ésarinquëma'. Ma noyacha Quisocristo anoyacancantérinpoa paya, ténéhua'. Inaso' Yosë ni'ton, chinotérëhua'. Oshanënpoa' inquitatonpoa', nónya ni'ninpoa'. Napopianachin nosororinpoa' ni'ton, catahuarinquëma' canpitanta' cancanëma quëran huarë' natëcamaso'. ² Yosë inaora nohuanton noya catahuainquëma'. Asanocancainquëma'. Noya noya nohuitohuatama', noya noya cancantarama'. Sinioro Quisocristo nohuitohuatama', na'con catahuarinquëma' sano cancantacamaso marë'.

Noya noya imacaso' ya'huërin

³ Quisocristoso' chiníquën nanantaton, ya'ipiya nanitaparin. Ina imapatéhua', catahuarinpoa' Yosë pochin cancantacaso marë'. Ina Yosë anohuitérinpoa'. Huéntonënqué nani aya'coninpoa'. Inaso' nónya ni'ton, nohuantérin canpoanta' inapochachin cancantacaso'. Ina nohuitohuatéhua', catahuarinpoa' onporahuatësona noya noya chinotacaso'. ⁴ "Caora nohuanto, catahuarinquëma' noyápiachin cancantacamaso marë', itatonpoa', na'con catahuarinpoa'. Oshanënpoa' inquitatonpoa', anoyacancantérinpoa'. Sopai yacamairinpoa' co noyahue' nicacaso marë'. Sopai natéhuatéra, monshihuanë', canacasoáchin yonquirë', co noyahue' cancantëré'. Inapohuatéra, oshaquëran nitapicancanë'. Quisocristoso nípirihuë' nicha'érinpoa'. Apira apira ina yonquihuatéhua', oshaquëran Yosë pochin cancantarihua'. ⁵ Napoaton Quisocristo imapatama', na'con yonquico' noya nicacamaso marë'. Noya nicatoma', Yosë yonquirinso chachin nitotoco'. ⁶ Ina nitotatoma', co noyahue' yonquihuatama', a'naroáchin naniantoco'. Naporahuatoma', ma'sha onpoapomarahuë', chiníquën cancantoco'. Chiníquën cancantohuatama', ya'ipi cancanëma quëran ina chinotoco'. ⁷ Noyasha chinotatoma', imaramasopita capini noya ninosoroco'. Naporahuatoma', ya'ipi piyapi nosoroco'.

⁸ Ina pochin Yosë pénéninpoa' noya noya imacaso marë'. Ina pochin cancantohuatama', co topinan quëran imasaramahuë'. Oshaquëran noya noya cancantohuatama', noya noya Quisocristo nohuitarama'. ⁹ A'naquënsó nípirihuë' co ya'ipi cancanëna quëran Yosë imapihuë'. Co noyahue' nipi. Co a'napita nosoropihuë'. Ina pochin cancantohuachinara, pétorayatérëso pochin cancantopi. Pétorayatohuatéra, co aquë quénantérëhuë'. Inapochachin inapitanta co ya'ipi cancanëna quëran imatonahuë', isoro'paqué ya'huérinsopitaráchin yonquipi. Noya cancantacaso marë' oshanënpoa' inquitopirinpoahuë', ina naniantopi. Oshaquëran somaraya pochin cancantatona' co huachi nanitapihuë' Yosë nanamën natanacaiso'. ¹⁰ Napoaton iyaro'sa', na'con yonquico' ya'ipi cancanëma quëran huarë' imacamaso marë'. Yosë huayonatënquëma', nontérinquëma' ni'ton, noyá matérëso pochin imamiatoco'. Inapohuatama', co nisha cancantatoma', a'poaramahuë'. ¹¹ Cancanëma quëran huarë' imapatama', a'na tahuëri hua'anéntérinque' quépantarinquëma' noya ya'huémiatacamaso marë'. Sinioro Quisocristo nónya cancantaton, nicha'ésarinpoa'. Inápaqué pa'patéhua', co onporonta' pipiaréhuahuë'.

¹² Ina yonquiaton, co amirahuë' pénénta'huaso'. No'tén nanan nani nitotërama'. Noya nitotopiramahuë', naquéranchin sha'huitantaranquëma' noya noya yonquicamaso marë'. ¹³ Co'huara ca chimiyantérapohuë', ina nanan chachin sha'huichinquëma' ama naniantacamaso marëhuë', ténahuë. ¹⁴ Co hua'quiya quëranhuë' chiminarahuë'.

Sinioro Quisocristo nani anitotérinco. ¹⁵ Napoaton ninshitaranquëma'. Naquéranchin a'chintantaránquëma'. Ina quëran chiminpirahuënta', iso quirica nontohuatama', yonquiantarama'.

Quisocristo ya'norinso'

¹⁶ "Chiníquën nanantaton, Quisocristo o'mantatarin," itérainquëma'. Sinioro o'mantacaso' tahuëri no'tequën a'chintérainquëma'. Co quiyaora yonquinéhuëi quëran a'chintérainquëmahuë'. Co pi'pisha téranta' nonpintérainquëmahuë'. Iráca isoro'paqué nípon, nisha pochin ya'notérincoi. Ya'pirahuëi quëran chachin ni'nai. ¹⁷⁻¹⁸ Quisocristoro'coi a'na motopi'pa' pa'nai. Inaquë Yosë nohuanton, huénaráchin huénaráchin ya'norin, ni'nai. Náporo chachin inápa quëran Tata Yosë noninso natanaí: "Isoso' hui'nahuë, nosororahuëso'. Nóya ni'nahuë," ténin. Yosë nohuanton, inaquë quënanatoi, natanaí. Inapotatoncoi, Quisocristo chiníquën nanantérinso' anitotérincoi.

¹⁹ Ina yonquiatoi: "Ma no'tequëncha Yoséri ninorin paya," ténai. Iráca quëra huarë' pénéntona'piro'sa' ninshítérinénpoa'. Yosë nohuanton, co'huara nasichátéraponhuë', Quisocristo napocaso' ninopi. "No'tequën ninshitopi," ta'toi, quiricanën na'con natërai. Canpitanta' ina nontatoma', yonquico'. No'tequën anitotérinpoa'. Tashi' nipachina, nanoparin noya a'pintérinpoa'. Inapochachin Yosë quiricanën quëran a'pintérinpoa' no'tequën yonquicaso marë'. Tahuërianpitaqué huarë' nanoparin noya orotérin. Inapochachin ipora Quisocristo o'mantaqué huarë' quiricanën ya'huétérinpoa' ina nohuitacaso marë'. O'mantahuachin, noyá nohuitarihua'. Huénio tayora huénaráchin a'pininso pochin a'pintarínpoa'. ²⁰ Iporaso' quiricanën quëran nontérinpoa'. Co canpoara yonquinénpoa quëran ma'sona tapon naporinso' nitotéréhuahuë'. ²¹ Iráca co inahuara nohuanton, ninshitopihuë'. Yoséri acorín nanamën anitotinpoaso marë'. Ispirito Santo nohuanton, Yosë yonquirinso chachin ninshitopi.

2

Nisha a'china'piro'sa'

(Judas 4-13)

¹ Iráca Yoséri acorinsopita no'tequën pénéntopi. A'naquënso nípirinhuë' nonpin nanan pénéntatona', israiro'sa' nonpintopi. Inapochachin iporanta' a'naquën nonpin nanan yaa'chintarinéñquëma'. Noyasha nontapirinéñquëmahuë', nonpintarinéñquëma'. "Quiyanta' imarai," taponaraihue', nonpin nanan a'chinapi anishacancantacaiso marë'. Quisocristo nicha'ëinpoaso marë' chiminin. Inaíchin natëcaso nípirinhuë', nisha a'china'piro'saso' co yanatépihuë'. Ina marë' a'na tahuëri Yoséri ana'intarin. A'nanaya ana'intarin. ² Co no'tequën a'chintatonaraihue', na'a piyapi'sa' nonpintapi. "Noya no'picaso', noya monshihuanacaso'," ta'tona', co noyahuë' nisapi. Na'a piyapi natanahuatona', inapita pochin cancantapi. "Imarai quiyanta'," taponaraihue', co noyahuë' nisapi. Ina marë' a'napitari nicatona', Quisocristo pinosapi. "Quisocristo nanamën co imacaso' ya'huérinhuë'. Ina imapisopitaso' co noyahuë' nipi," ta'tona', co no'ten nanan yaimasapihuë'. ³ Nisha a'china'piro'saso' co nosororinéñquëmahuë'. Canacaiso marë' nonpin nanano'sa' a'chintarinéñquëma'. Inaso nípirinhuë', iráca quëra huarë' Yoséri yonquirin ana'intacaso'. A'na tahuëri no'tequën ana'intarin. Co nariantarinhue' ana'intacaso'.

⁴ Ni'co'. Iráca a'naquën anquëniro'sa' co Yosë yanatépihuë'. Co noyahuë' nipi ni'ton, Yoséri ana'intérin. Co inapita téranta' nicha'ërinhuë'. Parisitacaiso marë' a'parin. Tashinanquë oncorapipinan ya'huérápi. Inaquë ayaro' ninarapi. ⁵ Iráca ya'huépisopitanta' co nicha'ërinhuë'. Co noyahuë' nipachinara, Yosë nohuanton, panca pacon pa'nin. Ii' quëran ta'huantopi. Noiso' Yosë imaton, no'tequën pénéntopirinhuë', co yanatépihuë' ni'ton, ya'ipiya ta'huantopi. Noisáchin nicha'érin. Ya'ipi quëran

posaya'píchin cha'ëpi. ⁶ Ina quëran Sotomaquë ya'huëpisopitanta' ana'intérin. Co noyahuë' cancantohuachinara, Sotoma, Comora, cato' ninano chachin noyá ahuiquitérin. Ya'ipiya chiminpi. Ayonquiinfoaso marë' inapita aninshítérin. "Co noyahuë' nipayehua', chiniquën ana'intarinpoa'", ténëhua'. ⁷⁻⁸ Sotomaquë ya'huëpisopita pa'pi co noyahuë' cancantopi. Monshihuanacaisoáchin yonquipi. A'naratipita co noyahuë' nipi. Inaque a'na quëmapíichin noya ninin, Loto itopiso'. Nani tahuëri, nani tahuëri co noyahuë' nipo nicaton, sétérin. Taparo' nonpachinara, co noya nataninhue'. Sétacasoáchin cancantérin. Sacai' niponahuë', inaora Yosë yonquirin. Ina marë' Yosëri nicha'érin. ⁹ Inapochachin ipora Quisocristo imapatéhuë', Yosë nanitérin catahuainpoaso'. Sopai yaminsépirinfoahuënta', Yosë catahuarinpoa' cha'ëcaso marë'. Oshahuano'saso nipayehuaë' ana'intarin. Nani yonquirin chiniquën ana'intacaso'. Ayaro' tahuëri nanihuachin, no'téquën ana'intaton, parisitopique a'pararin.

¹⁰ A'naquën co pi'pisha téranta' Yosë yanatépihuë'. Inapitaso' chini chiniquën ana'intarin. Co Yosë natétonahuë', co noyahuë' nicacaisoráchin yonquipi. A'naratipita taparo' nisáponaraihuë', co ina marë' tapanpihuë'. "Caora noya nitotérahuë," ta'tona', co inso téranta' yanatépihuë'. Chiniquën nanantopisopita Yosëri acorinso' co quënanpirinahuë', pinopi. ¹¹ Anquéniro'saso nipayehuaë' inapita quëran chini chiniquën nanantaponaraihuë', co nohuantopihuë' pinotacaiso'. "Yosëri ana'inchin," ta'tona', tananpitopi.

¹² Nisha a'china'piro'saso' ma'sharo'sa pochin cancantopi. Co manta' yonquipihuë'. Ma'sona téranta' yanipachinara, nipi. Yosë yonquirinso' co nitotatonaraihuë' pinopi. Ni'co'. Ma'sharo'sa' tananquë quënanpatéra, téparé', co nosororéhuë'. Ina marë' Yosëri acorin. Inapochachin nisha a'china'piro'saso' ta'huantapi. Os-hanëna marë' Yosëri ana'intarin. ¹³ Piyapi'sa' anishacancantopi ni'ton, a'na tahuëri inahuanta' parisitapi. Isoro'paráchin yonquiatona', capa cancantacaisoáchin yonquipi. A'morëso mancharinso pochin nicatona', nitapicancanpi. Imaramasopita niyonton-patamara, "Quiyanta' imarai," ta'tona', ya'conpi. Nonpintaténenquëma', ichicoshatapir-inenquëmahuë', inahuaso' co noyahuë' nicatona taparo' nipi.

¹⁴ Sanapi quënanpachinara, monshitacaisoráchin yonquipi. Co nanitopihuë' naniantacaiso'. Co chiniquën cancantopisopitahuë' nonpintatona', anishacancantapi. Huënsionquë ma'sha manëso pochin nonpintapi. Ma'sharáchin yonquiatona', noyapatopi. Napoaton Yosëri ana'intarin. ¹⁵ No'tén nanan a'porahuatona', Yosë iranën quëran pëshonpi. Paramo pochin cancantopi. Pioro hui'nin inaso'. Iráca pénëntopirinhuë', coriqui na'con na'con nohuantérin. "Nonpinacaso' co noyahuë' nipayehuaë', inapoato, na'con canarahuë," ta'ton, co noyahuë' ninin. ¹⁶ Co yanatérahuë' ni'ton, Yosëri chiniquën no'huirin. Moranën co nitononaponahuë', Yosë nohuanton, piyapi pochin nonin. Ina nonin quëran Yosëri pénënín co noyahuë' yonquirinsopita naniantacaso marë'.

¹⁷ Nisha a'china'piro'sa' co Quisocristo nanamën a'chinpihuë'. Poso yanirinso pochin nipi. Yanihuachina, co huachi o'ocaso' ya'huërinhuë'. Inapochachin nisha a'china'piro'sa' nonpintarinenquëma'. Isonta' yonquico'. Hua'qui' co o'nanpachinahuë', chitoro' yaráton quënanpatéra, pa'yatopiréhuë'. Panca ihuani quëpahuachina, co huachi o'naninhuë'. Inapochachin nisha a'china'piro'sa' nisapi. "Noya noya a'chintarainquëma'," itopirinenquëmahuë', co téhuéñchachin catahuarinenquëmahuë'. Nani iráca Yosëri yonquirin ana'intacaso'. Tashinanquë a'pararin. Inaque parisitápona'. Co onporonta' pipiponahuë'. ¹⁸ Inahuara nipa'yatatona', topinan quëran nontarinenquëma'. Nisha nisha yonquipi. Nasha ya'conpisopita a'naroáchin nonpintopi. Ipora huarë' co noyahuë' yonquipisopita naniantapirinahuë'. "Huéco' no'piahua'. Noya no'picaso'. Noya monshihuanacaso'," itopi nonpintatona'. ¹⁹ "Co insonta' natëcaso' ya'huërinhuë'. Canpitaora nohuanton ya'huéco'. Ma'sona téranta' yanipatama', nico'. Inapohuatama', capa cancantarama'," itopirinenquëmahuë', co inapita téranta' inahuara

nohuanton ya'huëpihuë'. Sopai nohuanton, no'pipi, monshihuanpi, co noyahuë' nipi. Insosona minsëhuachinpoa', hua'anëntërinpoa'. ²⁰ Quisocristo nanamën natanpachinara, natëpirinahuë'. "Cha'ësarahuë huachi," ta'tona', co noyahuë' yonquirinsopita pi'pian niantopi. Ina quëran nisha cancantatona', Yosë a'poantapi. Co noyahuë' niantahuachinara, sopairi minsérin. Ina marë' na'con na'con Yosëri ana'intarin huachi. ²¹ No'tën nanan nitotaponaraihuë', co imamiatopihuë'. Noya nicacaso' a'chintopirinahuë', ina niantopi. Co onporonta' natanpihuë' naporini, noya noya niitonahuë'. Nani Yosë a'popi. ²² Ma'pitacha nipi paya. Imaponaraihuë' a'pohuachinara, iráca ninshitatona napopiso chachin nipi: "Ni'nira imohuachina, co yonquirinhuë'. Imorinso chachin caantarin. Coshinta' i'quë pa'mopirinahuë', naquëranchin shipiroquë quëhuëantaton, në'huëtantarin," topi. Inapochachin inahuanta niconpi.

3

O'mantacaso' tahuëri

¹ Nosororanquëma' iyaro'sa'. Ihua quirica a'patëranquëma' nontacamaso marë'. Iporaso' naquëranchin ninshitantatënquëma', pënëntaranquëma' no'tequën yonquicamaso marë'. ² Iráca noya pënëntona'piro'sa' ya'huëpi. Ninotona', Yosë quiricanënquë ninshitopi, nani nontërama'. Naporahuaton, quiyanta' Quisocristo pënënincoiso' a'chintërainquëma'. Inaso' nicha'ësarainpoa'. Ca'tano'sanënpitacoi chachin a'parincoi. Ama nariantacamaso marëhuë' ninshitaranquëma'.

³ Iso' na'con yonquico'. O'mantacaso' tahuëri ya'caritohuachin, co noyahuë' piyapi'sa' ya'huapona'. Co Yosë natëtonaraihuë', ma'sona yonquipiso' nisapi. Co noyahuë' cancantapi. Quisocristo sha'huitërinpoaso' têhuaapi. ⁴ "¡Ma'pitacha nonama paya! 'O'mantararahuë,' ¿itërinquëma' ti? Intohuaso' Quisocristoso' nimara, capa. Co o'maarinhuë', tënai. Tatanënpoarinta ninarápirinahuë', nani chiminpi. Isoro'pa' ninin quëra huarë' inachachin inachachin nisárin. Co onporonta' nisha tahuëri nisarinhuë'," tosapi. ⁵ Co yanatëtonaraihuë', co yonquiapihuë'. Iráca co manta' ya'huëpirinhuë'. Ina quëran Yosë nonaton, isoro'pa' acorin. Inápaquë ya'huërinsopitanta' acorin. Isoro'passo' iisáchin nimirinhuë', ina nohuanton, yaniro' ya'norin. ⁶ Ina quëran piyapi'sa' co noyahuë' nipachinara, ii' quëran chachin ata'huantërin. ⁷ Inapochachin ipora isoro'pa', pi'iro'të', inapita ya'huëpirinahuë', nani Yosëri chinotërin ana'intacaso': "A'na tahuëri pën quëran ata'huantarahuë," tënín ni'ton, tahuëri nanihuachin, pën quëran chachin ata'huantarın. Naporo' tahuëri ya'ipi oshahuano'sa' chiníquén ana'intarin. Parisitopiquë a'pararin.

⁸ Isonta' iyaro'sa' yonquico'. "A'na tahuëriso' a'naroáchin na'huërin. Huaranca pi'ipiso' hua'qui'," tënëhua'. Yosëso nimirinhuë' co canpoa pochin yonquirinhuë'. Huaranca pi'inta' nimirinhuë', Yosëriso' a'na tahuëriáchin pochin ni'nin. Huaranca pi'ipi, a'na tahuërirë' napopianachin pochin ni'nin. ⁹ A'naquën napopi: "Yosë hua'quiarin. Nariantërinpoa'," topirinahuë', co hua'quirinhuë'. Co topinan quëran sha'huitërinpoahuë'. Nosoroatonpoa', ninarárin. Co nohuantërinhuë' a'na piyapi têranta' parisitopiquë pacacaso'. Na'con na'con piyapi'sa' co noyahuë' yonquipisopita nariantacaiso marë' ninarárin.

¹⁰ Napoaponahuë', tahuërinën nanihuachin, Siniro o'mantararin. Ni'co'. Tashi' co yonquiaséhuë', ihuatë' huë'nin. Inapochachin a'nanaya ayaro' tahuëri naniarin huachi. Naporo' tahuëri pi'iro'të' huëntoncaarin. Chiníquén huëntoncahuachin, ta'huantarın. Pi'i, tayora, inapita huëya ni'ton, soquiarin huachi. Isoro'pa', ya'ipi ya'huërinsopita, inapita huiquitapi.

Noya yonquicaso' ya'huërinso'

¹¹ Co manta' ya'huëmiatarinhuë'. Ya'ipi ta'huantarın ni'ton, ¡Yosë pochin cancantatëhua', noyasáchin niahua'! ¹² O'mantacaso' tahuëri noya ninahua'. "Manoton o'manta'in," ta'tëhua', noyápiachin cancantahua'. Ina tahuëri nanihuachin, ya'ipi

inápaquë ya'huérinsopita pën quëran ta'huantarín. Pi'i, yoqui, tayora, inapita soquiarin. ¹³ Napoaponahuë', nasha ya'huaantapon. Nani Yosë sha'huitérinpoa'. "A'na tahuëri nasharo'pa', nasha pi'iro'të' inapita acoantapo," itérinpoa'. Ina ninarëhua'. Inaqué noyasáchin nisarëhua'.

¹⁴ Napoaton iyaro'sa', ina ninatoma' na'con yonquico' noyasáchin nicacamaso marë'. "Quisocristo nanan anoyatérinpoa'," ta'toma', noya nini'toma', ya'huëco'. Ya'ipi co noyahue' yonquiramasopita naniantatoma', noyápiachin cancantoco'. Ina quëran o'mantahuachin, noya ni'sarinquëma'. ¹⁵ Nosoroatonpoa', hua'qui' Sinioro ninararin na'con na'con piyapi'sari natëcaiso marë'. Ina quëran inapitanta' nicha'ësarín. Ama ina naniantocosohue'. Inachachin iya Paononta' ninshitérinquëma'. Inaso' iyanpoa pochin ni'nëhua'. Yosë nohuanton, no'tequen nitotaton, ninshitérin. ¹⁶ Na'a quirica ninshitaton, nisha nisha ninanoquë ya'huëpisopita a'patérin. Noya pënënpirinpoahuë', pi'pian sacai' yonquicaso'. A'naquen piyapi co Yosë nanamën nitotatonahuë', nisha nisha yonquipi. Paono ninshitérinso' nontopirinahuë', co noya yonquiatonaraihuë', ma'sona tapon naporinso' anishatopi. Yosë quiricanen iráca ninshitopisonta' anishatopi. Ina marë' Yosëri chiníquen ana'intarin huachi.

¹⁷ Napoaton iyaro'sa' nani pënënanquëma' ni'ton, ni'cona nonpintochinënquëma'. Iporaso' noya yonquipiramahuë'. Co noyahue' nipesopita yanopintarinënquëma' inapita pochin nisha nisha cancantacamaso marë'. ¹⁸ Canpitaso niperinhuë', Sinioro Quisocristoíchin yonquico'. Inaora nohuanton, nosororinquëma' ni'ton, nani tahuëri yacatahuarinquëma'. Inasáchin yonquihuatama', oshaquëran noya noya nohuitarama'. Inaso' nicha'ësarínpoa'. Ya'ipi piyapi'sari chinochina'. Ayaro'tahuëriquë huarë' inasáchin yonquia'ahua'. Amen. Nani ninshitérinquëma huachi.

Pitro

Coanshari imapisopita ninshitërinso'

Quisocristo no'tëquën anitotërinpoaso'

¹ Iso quirica a'pataranquëma', ni'co'. ¿Noyanquëma' canpitanta'? Quiyanta' isëquë noya ya'huarai. Quisocristo noya noya nohuitacamaso marë' ninshitaranquëma'. Iráca co'huara isoro'pa' ya'huéyatérasohuë', inápaquë ya'huérin. Ina quëran o'marahuaton, a'chintërincoi, natanai. Quiyaso' ni'nai. Nirayarai. Nonën chachin ya'huëtin, së'huarai. Inasáchin Yosë yonquirinso' anitotërinpoa'. Ina nohuitohuatëhua', nónya nanopimiatarihua'. ² Isoro'paquë o'mahuachina, quiyariso' ni'nai. Nohuitatoi, sha'huitarainquëma'. Inaso' nanopimiatarin. Iráca inápaquë ya'huérin. Tata Yosëre chachin ya'huérin. Napopináchin yonquipi. ³ Inápaquë ya'huaponaahuë', o'mahuachina, piyapicoi ni'nai, a'chininsonta' natanai. Pa'pionta' anohuitërincoi. Hui'nin nohuitatoi, nohuitërai. Nipayarëso pochin ninai. Napoaton ninshitaranquëma' canpitanta' Quisocristo nohuitacamaso marë'. Quiya pochachin Yosë nohuitoco' nipayarëso pochin nicacamaso marë'. ⁴ Ina pochin cancantohuatama', nónya cancantarihua'. Ina marë' ninshitaranquëma'.

Tahuëri pochin nininso'

⁵ Noya nanan Quisocristo anitotërincoi. Ina nanan chachin sha'huitaranquëma'. "Yosëso' noyasáchin ninin. Tahuëri pochin cancantërin. Co pi'pisha téranta' tashi pochin cancantërinhuë", itërincoi. ⁶ Tashi pochin cancantohuatëhua', co Yosë nohuitarihuahuë'. "Yosë nohuitërahuë," tapomarahuë', co noyahue' cancantohuatama', nonpinama'. Co no'tën nanan imaramahuë'. ⁷ Yosëso' noyasáchin ninin. Tahuëri pochin cancantërin. Canpoanta' tahuëri pochin yonquihuatiëhua', Yosë nohuitarihua'. Naporahuaton, noya nini'tëhua' ya'huarihuá. Hui'nin chachin chiminin ni'ton, ya'ipi oshanënpoa' inquitarinpoa'. Huénainen quëran anoyacancantarinpoa'.

⁸ "Co oshahuancohuë", topatëhua', canpoara ninonpintërehua'. Co no'tëquën yonquirëhuahuë', co têhuëñchachin imarëhuahuë'. ⁹ Onporosona co noyahue' nipatëhua', Yosë nontahua'. "Têhuëñchachin co noyahue' nicato, oshahuanco," topatëhua', Yosë oshanënpoa' inquitarinpoa'. Co nonpintërinpoahuë'. Quisocristo chiminin ni'ton, nanitërin ya'ipi oshanënpoa' inquitarinpoaso'. Noyápiachin cancan quëtarinpoa'. ¹⁰ "Ya'ipinquëma' co noyahue' ninama", itërinpoa' Yosë. Napotopirinpoahuë', "Noya ninahuë. Co caso' oshahuancohuë", topatëhua', "Yosë nonpintërinpoa", tënëhuaso pochin cancantërehua'. Nanamën no'tëquën sha'huitopirinpoahuë', co têhuëñchachin natërehuahuë'.

2

Nanan anoyatërinpoaso'

¹ Quisocristo imarama' ni'ton, hui'nahuëpita pochin ni'nanquëma'. Ninshitaranquëma' noyasáchin nicacamaso marë'. Nipirinhue', co noyahue' nipatëhua', Quisocristo catastuarinpoa'. Oshahuanëhua' ni'ton, ana'intinpoaso' ya'huépirinhue'. Canpoa marë' Yosë nontaton, nanan anoyatarinpoa'. Inaso' no'tëquënáchin yonquirin. ² Ya'huérënamënpoa' chiminin ni'ton, nontohuatëhua', oshanënpoa' inquitarinpoa'. Oshanënpoa' inquitatonpoa', nanan anoyatërinpoa'. Ya'ipi piyapi marë' chiminin. Ya'ipinpoa' oshanënpoa' inquitarinpoaso' nohuantopirinhue'.

³ Yosë nohuitohuatëhua', pënëninpoaso' natëarëhua'. No'tëquën natëcaso' nohuantarihua'. Ina natëhuatëhua', têhuëñchachin Yosë nohuitërehua'. ⁴ A'naquënsa nipirinhue' "Nani Yosë nohuitërahuë," topirinahuë', pënëninpoaso' co natëtonahuë', nonpiánpi. Co no'tëquën yonquipihuë'. ⁵ Yosë nanamën natëhuatëhua', noya noya Yosë nosoroarihua'.

Ina pochin cancantohuatéhua', tēhuëñchachin ina nohuitarihua'. ⁶ "Yosë imarahuë," topatéhua', Quisocristo pochachin cancantacaso' ya'huérin.

Nasha pochin pënënipoaso'

⁷ Co iyaro'sa' nasha camaitérinso' ninshitaranquëmahuë'. Iráca quëran huarë' Yosë nanamén natanama'. "Ya'ipinquëma' noya ninosoroco'," itérinpoa'. Inachachin iporanta' pënënararanquëma'. ⁸ Co nasha camaitérinsohuë' niponahuë', nasha pochin ninshitaranquëma' cancanëma quëran huarë' ninosorocamaso marë'. Quisocristo ya'ipi piyapi nosororin. Nosoroatonquëma', a'pintérëso pochin anoyacancantérinquëma' tahuëri pochin cancantacamaso marë'. Ninosorohuatama', co huachi tashi pochin cancantaramahuë'.

⁹ A'na piyapi no'huihuatama', co Yosë imaramahuë'. "Imarahuë," tapomarahuë', co tahuëri pochin cancantéraramahuë'. Ipora huanta' tashi pochin cancantarama'.

¹⁰ Imaramasopita capini ninosorohuatama', tahuëri pochin cancantarama'. Ina pochin nipatama', no'tequën imarama'. ¹¹ Nipirihuë' nino'huihuatama', tashi pochin cancantarama'. Co noyahue' cancantatoma', co manta' yonquiaramahuë'. Co nanitaramahuë' no'tequën yonquicamaso'. Sopai nohuanton, somaraya pochin cancantarama'. Napoaton iyaro'sa', cancanëma quëran huarë' ninosoroco'.

¹² Canpitaso' imarama' ni'ton, ninshitaranquëma'. Hui'nahuëpita pochin nicaténquëma', ninshitaranquëma'. Quisocristo canpoa marë' chiminin. Imapatama', oshanëma' inquitérinquëma'. ¹³ A'naquëma' nani hua'qui' imatoma' a'napita catahuarama' ni'ton, Quisocristo noya nohuitërama'. Inaso' iráca quëran huarë' ya'huérin. Noya imarama' ni'ton, ninshitaranquëma'. Canpitanta' hui'napi'sanquëma', nani sopai minsërama'. Napoaton ninshitaranquëma'.

¹⁴ Ya'ipi imaramasopita hui'nahuëpita pochin ni'nanquëma'. Yosë nohuitërama' ni'ton, ninshitaranquëma' noya noya cancantacamaso marë'. Quisocristo noya nohuitërama' ni'ton, iyaro'sa', ninshitaranquëma'. Inaso' iráca quëran huarë' ya'huérin. Nani tahuëri, apia'huar'o'sa', Yosë nanamén yonquiarama'. Napoaton chiníquën cancantarama'. Chiníquën cancantatoma', sopai nani minsërama'.

Isoro'paráchin pa'yatopisopita

¹⁵ Na'a piyapi'sa' co Yosë natëtonahuë' nisha nisha yonquipi. Isoro'paquë ya'huërisopitaráchin yonquipi. Ama inapita pochin cancantocosohuë'. Ama nani ma'sha nohuantapatosohuë'. Ma'sha na'con yonquihiuatama', co tēhuëñchachin Tata Yosë nosororamahuë'. ¹⁶ Isoro'paquë nisha nisha ya'huérin aoshahuainpoaso marë': Monshihuanacasoráchin cancantérë'. Ma'sha quënanpatëra, nohuantapatérë'. Ma'huanpatëra, yanocantérë', naporë'. Inapitaso' co Tata Yosë nohuanton ya'huérinhue'. Sopai nohuanton, ya'huérin. ¹⁷ Isoro'pa' ta'huantarín. Ya'ipi ma'shanta' ta'huantarín. Inasáchin pa'yatohuatéhua', topinan quëran nanoparihua'. Nipirihuë', Yosë noya imapatéhua', co onporonta' ta'huantarihuahuë'. Ya'huëmiatarihua'.

Quisocristo inimiconëñ

¹⁸ Co hua'quiya quëranhuë', apia'huar'o'sa', Quisocristo o'mantararin. "Cristo yao'mahuachin, inimiconëñ huë'sarin," itérinénpoa'. Nani natantërama' canpitanta'. Iporaso' na'a piyapi'sari Cristo yainimicotopi. Napoaton o'mantacaso' tahuëri nanoparihin, ténéhua'. ¹⁹ "Quiyanta' imarai," topirinahuë', nani pipipi. Co tēhuëñchachin Yosë huëntonéñquë ya'conpihuë'. Ya'conpi naporini, co pipiitonahuë'. Pipipi quëran nitotéréhua'. "Co onporonta' cancanëna quëran huarë' imapihuë'," ténéhua'.

²⁰ Canpitaso' niperihuë' imarama'. Quisocristo nohuanton, Ispirito Santo ya'coancantérinquëma'. Napoaton no'tequën yonquirama'. ²¹ Nitotopiramahuë', naquëranchin pënëantaranquëma' yonquicamaso marë'. No'ten nanan imapatéhua', co nonpin nanan natëarihuahuë'. ²² Tēhuëñchachin nonpin nanan sha'huitarinéñquëma'.

“Quisososo' co Cristohuë'. Co Yosë hui'ninhue'," ta'tona', yanopintérinënquéma'. Inapoatona', Quisocristo inimicotapi. Tata Yosënta' a'popi. ²³ Yosë hui'nin a'pohuachina', co Tata Yosënta' nohuitapihuë'. “Quisocristoso' Yosë hui'nin chachin," topachina', Tata Yosënta' imasapi.

²⁴ Ya'nan imapoma', no'tequen a'chintérainquëma'. Ina chachin imamiatoco'. Ina imapatama', cancanëma quëran Tata Yosë nohuitarama'. Hui'nionta' noya nohuitarama huachi. ²⁵ Quisocristo chachin sha'huitérinpoa': “Imamiatohuatamaco, Yosë nohuitatoma', nanopmiatarama'," itérinpoa'.

²⁶ A'naquen yanopintarinënquéma' ni'ton, ninshitaranquëma'. ²⁷ Canpitaso nimirinhue' Ispirito Santo ya'huëtérinquëma'. Quisocristo imarama' ni'ton, ina nohuanton, ya'coancantérinquëma'. Nani tahuëri a'chintarinquëma'. Cancanëmaquë Yosë nanamën a'chintarinquëma'. Co onporonta' nonpintérinquëmahuë'. No'tequen a'chintérinquëma' ni'ton, co a'napita a'chintinquëmaso' ya'huërinhuë'. Ina natëhuatama', no'tequen yonquiarama'. Sha'huitérinquëmaso pochachin Quisocristo imamiatoco'.

²⁸ Ipora quëran huarë', apia'huaro'sa', Quisocristo imamiatoco'. Inapohuatama', o'mantahuachin, co tapan ya'huëtarinquëmahuë'. Co pa'yanaramahuë'. ²⁹ Quisocristo noyasáchin ninin, nitotéréhua'. Napoaton Yosë huëntonënqué ya'conpatéhua', noya nicarihua'. Inpitasona noya nipachina', nani Yosëri anoyacancantérin ni'ton, hui'nin pochin ni'sarin, ténéhua'.

3

Yosë hui'ninpita

¹ Ma noya Tata Yosë nosororinpoa' ni'ton, hui'ninpita pochachin ni'ninpoa'. Huëntonënqué chachin aya'coninpoa'. Co imapisopitasohue' nimirinhue' co nitotopihuë'. “¿Onpoatonta' Yosë pochin cancantacaso' nohuantopi?” toconpi. Co Yosë nohuitatonahuë', napopi. ² Na'con, iyaro'sa', nosororanquëma'. Iporaso' Yosë hui'ninpita pochin ni'ninpoa'. A'na tahuëri noya noya acoarinpoa'. Onpopinsona nicarihua' nimara. Co ya'ipi nitochatéraréhuahuë'. Nimirinhue', Quisocristo o'mantahuachin, nirayarihua'. Ina ni'patéhua', ina pochachin nicarihua'. ³ “A'na tahuëri Quisocristo ni'saréhua'," ta'téhua', co noyahue' yonquiréhuasopita naniantaréhua'. Quisocristoso' noyápiachin cancantérin ni'ton, canpoanta' noyápiachin cancantacaso' nohuantarihua'.

⁴ Yosë pénéninpoa'. Co ina natëhuatéhuahuë', oshahuanéhua'. Co noyahue' nipayéhua', co Yosë natéréhuahuë'. ⁵ Noya nanan nani nitotérama'. Quisocristo o'marin oshanënpoa' inquitinpoaso marë'. Inaso' co pi'pisha térranta' oshahuaninhue'. ⁶ Téhuëenchachin imapatéhua', noya nisaréhua'. Co pa'yatarihuahuë' oshahuanacaso'. Nani tahuëri co noyahue' nipayéhua', co Yosë nohuitéréhuahuë'. Co ya'coancantérinpoahuë'. ⁷ Ni'cona, apia'huaro'sa', nisha a'china'piro'sa' nonpintochinënquéma'. Noya nipayéhua', noya cancantaréhua'. Quisocristo noya ni'ton, ina pochin cancantacaso' ya'huërin. ⁸ Nani tahuëri co noyahue' nipayatama', sopai imarama'. Iráca quëran huarë' sopai co noyahue' cancantaton, oshahuanin. Inaso' nonpintohuachinpoa', canpoanta' oshahuanaréhua'. Napoaton Yosë hui'nin o'marin sopai minséaton nicha'ëinpoaso marë'. Ya'ipi oshanënpoa' inquitohuachinpoa', co huachi sopai natëcaso' ya'huërinhuë'.

⁹ Huëntonënqué chachin Yosë aya'coninpoa' ni'ton, co iporaso' pa'yataréhuahuë' oshahuanacaso'. Hui'nin pochachin cancantatonpoa', yonquinén chachin quëterinpoa'. Nasitantaréhuaso pochin ninéhua'. Napoaton co huachi nohuantarihuahuë' oshahuanacaso'. ¹⁰ Co sacaihue' Yosë hui'ninpita nohuitacaso'. Noyasáchin nipayéhua', Yosë hui'ninpita pochin nisaréhua'. Nimirinhue', co noyahue' nipayachina', co Yosë huëntonënqué ya'conpihuë'. Co imapisopita nosorohuachinahuë', co Yosë hui'ninpita

pochin nisapihuë'. Sopai hui'ninpita pochin nisapi. Co noyahuë' cancantopi quëran sopai hui'ninpita nohuitarëhua'.

Ninosorocaso' ya'huërinso'

11 Ya'nan imapoma quëran huarë' Yosë nanamën natanama'. "Noya ninosoroco'," itérainquëma'. **12** Iráca Cainoso' sopai natëton, iin teparin. ¿Ma'maréta' teparin? Iins' noya ninin ni'ton, no'huiton, teparin. Ama ina pochin cancantocosohuë'.

13 Napoaton iyaro'sa' co natëpisopitahuë' no'huihuachinënquëma', ama pa'yancosohuë'. **14** Iráca canpoanta' ina pochin co noyahuë' cancantérëhua'. Co Yosë nohuitatëhuahuë', chimipi pochin niperëhuahuë', Yosë anoyacancantérinpoa' ina nohuitatëhuahuë' nanopimiatacaso marë'. Napoaton iporaso' ninosororëhua'. Ina quëran Yosë huëntonënqué ya'conéhuaso' nitotérëhua'. Co ninosorohuatamahuë', co Yosë anoyacancantérinquëmahuë'. Chimipi pochin cancantarama'. **15** A'na piyapi no'huihuatama', tēpatona'piro'sa pochin Yosë ni'sarinquëma'. Tēpatonapiro'saso', co Yosë pochin nanopimiatacaso ya'huërinhuë'. **16** Quisocristoso niperinhuë' na'con nosoroatonpoa', nicha'ëinpoaso marë' chiminin. Chiminaton, nosororinpoaso' anitotérinpoa'. Inapochachin iyaro'sa', ya'ipi Quisocristo imapisopita nosorocaso' ya'huërin. Na'con ninosoroa'ahua'. Quisoso ya'huërenamënpoa' chimininso pochachin nosorocaso' ya'huërin. **17** Quisocristo imarëhuasopita capini noya ninosorocaso' ya'huërin. A'napita ma'sha pahuantohuachina', catahuahua'. Capa capacaiso' nipachin, capa a'mocaiso' nipachin quëtahua'. Co inapita catahuahuatëhuahuë', co tēhuëñchachin nosororëhuahuë'. Co canpoa capini ninosorohuatëhuahuë', co Yosënta' nosororëhuahuë'. **18** "Ya'ipi imapisopita nosororahuë," topatëhua', ama, apia'huaro'sa', topinan quëran napoahuasohuë'. Cancanënpoa quëran huarë' nosoroatëhuahuë', catahuahua'.

Co tē'huatatëhuahuë' Yosë nontérëhuaso'

19 Tēhuëñchachin a'napita nosorohuatëhuahuë', no'tequën Yosë nanamën imasarëhuahuë'. Ina quëran co huachi tē'huatacasó' ya'huëtarinpoahuë'. "Tatanpoa pochin ni'ton, noya ni'ninpoa'," ta'tehua', noya cancantarihua'. **20** Co noyahuë' niperinpoa', cancanënpoa quëran nitotatëhuahuë', sëtérëhua'. Co noyahuë' ninéhuaso' Yosënta' nitotérin. Napoaponahuë', cancanënpoa quëran huarë' yaimapatëhuahuë', inanta' nitotérin. Ina nitotaton, nosororinpoa'. Ina yonquihuatëhuahuë', noya cancantatëhuahuë', Yosë nontarihua'. **21** Napoaton iyaro'sa', cancanënpoa quëran a'naya a'nayanpoa' yonquia'ahua'. "Yosë noya ni'sarinco," topatëhuahuë', co Yosë tē'huatatëhuahuë'. Co tē'huatatëhuahuë', nani tahuëri ina nontarihua'. **22** Yosë pënënipoaso' natëhuatëhuahuë', noya natanarinpoa'. Ina nohuantérinsoáchin yonquihuatëhuahuë', catahuarinpoa'. Ina pochin cancantohuatuatëhuahuë', ma'pitaso niperinpoa', quëtarinpoa'. **23** Yosë nani pënënipoaso' hui'nin imacaso marë'. Naporahuaton, ninosorocasonta' sha'huitérinpoa'. "Quisocristonta' inachachin sha'huitérinpoa'," ta'tehua', cancanënpoa quëran natëahua'. **24** Yosë natëhuatëhuahuë', yonquirinsoráchin imasarihua'. Imapatëhuahuë', ya'coancantomiatérinpoa'. Ispirito Santo quëterinpoa' ya'coancantinpoaso marë'. Ina catahuahuchinpoa', noya nisarëhuahuë'. Ina quëran Yosë nohuitérëhuaso' nitotérëhuahuë'.

4

Nonpin nanan a'chinpiso'

1 Na'con iyaro'sa' nosororanquëma' ni'ton, pënënaranquëma'. Na'a nonpin nanan pënëntona'piro'sa' nonpin nanan a'chinapi. "Yosë nanamën a'chinahuë," topirinahuë', co no'tequën a'chinpihuë'. Napoaton a'chintohuachinënquëma', ama a'naroáchin natëtocosohuë'. "Nonpin nanan nimara," ta'toma', yonquico'. Ya'ipi Yosë quiricanën quëran a'chintérinpoaso' yonquiatoma', tantiacó'. Co ina pochin a'chintohuachinënquëmahuë', ama natëcosohuë'. **2** Ispirito Santo no'tequën anitotérinpoa'.

“Quisocristo Yosë hui'nin níponahuë', isoro'paquë o'maton, piyapi chachin nasitimarin. Nonën chachin ya'huëtin," itérinpoa'. Ina nanan a'chintohuachinénquëma', no'tequën a'chinapi. Ispirito Santori ayonquirin ni'ton, noya nonsapi. ³ A'naquënso nípirinhuë' sopai nohuanton, nonpinapi. Co Quisocristo nanamën no'tequën a'chinpihuë'. “Yosë hui'ninso' co piyapi chachin nasitimarinhuë'” toconpi. Inapitaso' Quisocristo inimicotopi. Co ina pochin Ispirito Santo anitotérinpoahuë'. Iráca ninorinso chachin nani Cristo inimiconën natantéröhua'.

⁴ Canpitaso' apia'huar'o'sa', Yosë hui'ninpitanquëma' ninama'. No'tequën yonquiatoma', nisha a'china'piro'sa' minsëarama'. Sopai nohuanton, nonpin nanano'sa' a'chintopirinénquëmahuë', Ispirito Santo nani ya'coancantérinquëma'. Inaso' sopai quëran chini chiniquënan antarin ni'ton, catahuahuachinpoa', co nonpin nanano'sa' natetarihuahuë'. ⁵ Inapitaso nípirinhuë', co Yosë nohuitatonahuë', co nanamën chachin a'chinpihuë'. Isoro'paquë ya'huërinsopitaráchin yonquiatona', inahuara yonquinëna quëran a'chinpi. Napoaton co imapisopitasohuë' nonpin nanan natëpi. ⁶ Quiyaso nípirinhuë' Yosë nohuitatoi, no'tequën a'chinai. Yosë imapisopita noya nataninacoi. Inaso' no'ten nanan, topi. Co imapisopitasohuë' nípirinhuë', co yanatérinacoihuë'. Ispirito Santoso' no'tequënáchin nonin. Napoaton nonpin nanan pa'yatopisopitaso' co Ispirito Santo yanatépihuë'. Ina quëran nonpin nanano'sa' nohuitéröhua'.

Iráca quëran huarë' Yosë nosororinpoaso'

⁷ Yosë pa'pi nosororinpoa'. Napoaton iyaro'sa', canpoanta' noya ninosoroa'ahua'. Huëntonénquë aya'compachinpoa', catahuarinpoa' a'napita nosorocaso'. Nosorohuatéhua', Yosë nohuitarihuë'. Hui'ninpita pochin ni'ninpoa'. ⁸ Inaso' nosoromiatochinarinpoa'. Napoaton canpoanta' co a'napita nosorohuatéhuahuë', co pi'pisha térranta' ina nohuitarihuahuë'. ⁹ Nosoroatonpoa', hui'nin chachin isoro'paquë a'paimarin anoyacancantinpoaso marë'. A'naíchin hui'nin ya'huëtopirinhuë', a'paimarin. Quisocristo anoyacancantuachinpoa', Yosë nohuitatéhua', nanopimiatarihuë'. ¹⁰ Co canpoariso' nosoropiréhuahuë', Yosëso' na'con nosororinpoa'. Ina nohuanton, hui'nin chachin o'marahuaton, chiminin. Ya'huërenamënpoa' chiminin ni'ton, oshanënpoa' inquitatonpoa', nanan anoyatérinpoa'.

¹¹ Yosë na'con nosororinpoa' ni'ton, canpoanta', iyaro'sa', inapochachin ninosoroa'ahua'. Ina pochin cancantacaso' ya'huërin. ¹² Co inquënpoa térranta' Yosë quënanpiréhuahuë', noya ninosorohuatéhua', Yosë nohuitarihuë', ya'coancantomiatérinpoa'. “Yosë na'con nosororinpoa'” ta'tehua', canpoanta' noya noya ninosoroarihua'. ¹³ Yosë huëntonénquë ya'compatéhua', Ispirito Santo a'patimarinpoa' ya'coancantinpoaso marë'. Hua'yanëñ chachin ni'ton, cancanënpoauquë ayonquirinpoa'. “Téhuëñchachin Yosë ya'coancantérinpoa'” ténëhua'. ¹⁴ Tata Yosëri hui'nin isoro'paquë a'paimarin nicha'ëinpoaso marë'. Quiyariso' ni'nai. Nani tahuëri piyapi'sa' sha'huitárai. ¹⁵ “Quisocristoso' Yosë hui'nin. Ina natérahuë,” topatéhua', Yosë pochin cancantatéhua', imamiatarihuë'. Inanta' ya'coancantérinpoa'.

¹⁶ Yosë nohuitatéhua', natéröhua. “Ma noyacha Yosë nosororinpoa paya,” ténëhua'. Inaso' nosoromiatochinarinpoa'. Canpoanta' nosorohuatéhua', Yosë nohuitarihuë'. Yonquirinsoráchin imasaréhua'. Imapatéhua', ya'coancantomiatérinpoa'. ¹⁷ Yosë noya nohuitoahuatéhua', na'con na'con nosoroarihua'. Ina quëran ayaro' tahuëri nanihuachin, co té'huatarihuahuë'. Quisocristo nosororinpoa' ni'ton, canpoarinta' ina pochachin nosoroarihua'. Napoaton ayaro' tahuëri co pa'yanarihuahuë'. ¹⁸ Imaréhuasopita capini noya ninosorohuatéhua', co nisaitarihuahuë'. Inapochachin Yosëri'quënpoa' ninosorohuatéhua', co té'huatarihuahuë'. A'naquën piyapi'saso' na'con té'huapi. “Yosë ana'intarinco,” ta'tona', té'huatochinachin cancantoppi. Canpoaso nípirinhuë' “Yosë na'con nosoroatonpoa', oshanënpoa' inquitérinpoa'” topatéhua', ya'ipi té'hua inquitarinpoa'.

¹⁹ Yosë' ton na'con nosororinpoa' ni'ton, canpoarinta' Yosë nosoroatëhua', a'napitanta' nosoroarihua'. ²⁰ A'naquënso' "Yosë nosororahuë," taponahuë', iin no'huirin. Co inaso' no'tequën noninhue', nonpiánin. Piyapi quënanëhua'. Yosëso nipurinhue' co quënanëhuahuë'. Piyapi quënanarihuarahuë', co nosorohuatëhuahuë', aquëtë huarë' Yosëso' co nanitarëhuahuë' nosorocaso'. ²¹ Quisocristo pënëninpoa'. "Nosorohuatamaco, piyapinta' nosoroco'," itérinpoa'.

5

Onporahuatësona Yosë imamiatacaso'

¹ Ya'ipi Quisocristo imarëhusopita a'na huënton pochin ninëhua'. "Quisocristo Yosë hui'nin chachin," tënëhua' ni'ton, huëntonënqué ya'conëhua'. Hui'ninpita pochin ni'ninpoa'. Ni'co'. "Quëmapi tëhuëñchachin nosorohuatëra, hui'ninpita' nosororë'," topi. ² Napoaton Yosë nosorohuatëhua', pënëninpoaso' noya natëhuatëhua', tëhuëñchachin hui'ninpita' nosoroarihua', tënahuë. ³ Yosë nosorohuatëhua', pënëninpoaso' no'tequën natëarihua'. Catahuahuachinpoa', nanitaparëhua'. ⁴ Canpoaso' Yosë hui'ninpitanpoa' ni'ton, nanitaparëhua' sopai minsëcaso'. "Quisocristo catahuarinpoa'," topatëhua', co noyahue' yonquirëhusopita naniantarihua'. Isoro'paquë na'a ma'sha, piyapi, inapita ya'huërin anishacancantinpoaso marë'. Nipurinhue', Quisocristo yonquihiatëhua', catahuarinpoa' imamiatacaso'. ⁵ "Quisocristo Yosë hui'nin chachin," topatëhua', achini-cancaninpoa' sopai minsëcaso marë'. A'napitariso' co nanitopihuë' sopai minsëcaiso'.

Yosë anitotërinpoaso'

⁶ Quisocristo isoro'paquë chachin o'marin. O'mahuachina, Yosë nohuanton, i'quë aporihuanin. Nani ya'ipi sha'huitërinso' tiquiaton, corosëqué chiminpachina, huënainen pa'nin. Co topinan aporihuaninhue'. Oshanënpoa' inquitinpoaso marë' chiminin. Naporahuaton, Ispirito Santonta' cancanënpoa quëran anitotërinpoa'. Inaso' no'tequën sha'huitërinpoa'. "Quisososo' Yosë hui'nin chachin," itérinpoa'. ⁷⁻⁸ Tata Yosë noya anitotërinpoa' hui'nin natëcaso'. Ni'co'. "Caraya'pi inachachin sha'huihuachina, naporo huarë' natëtërë'," topi. Inapochachin cancanënpoaquë Ispirito Santo sha'huitërinpoa'. Quisocristonta' i'quë aporihuanpachina, ya'ipiya Yosë natërin. Naporahuaton, canpoa marë' chiminpachina, huënainen pa'nin. Cara chachin napopináchin anitotërinpoa'. ⁹ Piyapi'sa' inachachin sha'huihuachina', natëtërëhua'. Yosëso nipurinhue' noya noya ni'ton, no'tequënáchin nontërinpoa'. Napoaton ina sha'huitohuachinpoa', na'con na'con natëtacaso' ya'huërin. Nani Yosë sha'huitërinpoa' ni'ton, "Quisocristoso' Yosë hui'nin chachin. Ina nicha'èrinpoa," tënëhua'. ¹⁰ Yosë nani sha'huitërinpoa' ni'ton, imarëhusopita nitotërëhua'. Cancanënpoa quëran anitotërinpoa'. A'napitaso nipurinhue', co Yosë natëpihuë'. "Quisoso co Yosë hui'ninhue'. Co nicha'ësarinfoahuë'," ta'tona', Yosëri non-pintërinso pochin cancantopi. No'tequën sha'huitopirinpoahuë', co natëpihuë'. ¹¹ Yosëso' huëntonënqué aya'coninpoa' ina pochin nanopicaso marë'. Hui'nin chachin anoyacancantërinpoa' nanopimiatacaso marë', tënëhua'. ¹² Yosë hui'nin ya'coancantohuachinpoa', nanopimiatiarihua'. Co'so' ina imapatëhuahuë', co nanopimiatiarihua'.

Chiníquën cancantatëhua', imamiatahua'

¹³ Canpitaso' Quisocristo natërama'. "Inaso' Yosë hui'nin ni'ton, imasarahuë," topatama', huëntonënqué nani aya'coninquëma'. Ina nohuitatoma', nanopimiatarama. Ina nitotacamaso marë' ninshitaranquëma'. ¹⁴ Yosë nontohuatëhua', natanarinpoa'. Ina nohuantërinso chachin natanpatëhua', noya nataninpoa'. ¹⁵ "Noya nataninpoa'," ta'tëhua', ina ninahua' nohuantërinso chachin quëchinpao'. "Co onporonta' nonpintarinfoahuë', acotarinpoa'," ta'tëhua', noya cancantarihua'.

¹⁶ A'naquën Yosë imamiataponahuë', co noyahuë' ninin. Co Yosë a'poaponahuë', oshahuanin. Inapita marë' Yosë nontahua' anoyacancanchin. A'naquënso nipi琳huë' imapirinhuë', co noyahuë' yonquiaton, Quisocristo chachin a'pomiatérin. A'pomiatohuachina, chiminpi pochin cancantantapi. Co inapita marë' Yosë nontacaso' ya'huérinhuë'. ¹⁷ Co noyahuë' nipachina', oshahuanpi. Nipirinhuë', co Yosë a'pomiatohuachinahuë', cha'ësapi.

¹⁸ Yosëri imarinsopita huëntonënqué aya'conin. Noyasáchin nicacaso' ya'huérin. Yosë hui'nini chachin a'paíarin. Sopairi yanopintopirinhuë', Quisocristori catahuarin ni'ton, co sopairi minsëarinhuë'.

¹⁹ Imaréhuasopitaso' Yosë hui'ninpitanpoa' ninëhua'. A'napitaso nipi琳huë' co imapihuë' ni'ton, sopairi hua'anéntérin. Camaihuachina, ina natëpi. Ina nitotérëhua'.

²⁰ Yosë hui'nin chachin o'maton, no'téquën Yosë anohuitérinpoa'. Inasáchin no'téquën yonquirin. Yosë nohuitatéhua', yonquirinsoráchin imasaréhua'. Quisocristo nohuitérëhua' ni'ton, catahuarinpoa' no'téquën yonquicaso marë'. Inaíchin Yosëso' ni'ton, chinotacaso' ya'huérin. Ina nohuitohuatéhua', nanopimiatarihua'. ²¹ Apia'huardo'sa'. Mamanshiro'saso', co moshacaso' ya'huérinhuë'. Yoséíchin chinotahua'. Nani huachi.

Coansha

Coanshari ninshitaantarinso'

No'tën nanan imarëhuaso'

¹ Ca ansianoco iso quirica ninshitaranquëma' ¿Noya campitanta' ya'huarama'? Canta' noya isëquë ya'huarahuë. Yosë nohuanton, campitanta' huëntönënquë nani ya'conama'. No'tën nanan imarama' ni'ton, têhuëñchachin nosororanquëma'. Ya'ipi Quisoso imapisopita noya nicatënënquëma', nosororinënquëma'. Ya'ipinquëma' yonquiatënquëma', ninshitaranquëma'. ² Quisocristo no'tequën a'chintérinpoa'. No'tën nanan imamiatatéhua', ninosoroaréhua'. ³ Inaora nohuanton, Tata Yosë na'con catahuainquëma'. Nani tahuëri nosoro'inquëma'. Asanocancainquëma'. Quisocristonta' inachachin catahuainquëma'. Inaso' Yosë hui'nin chachin. Catahuahuachinpoa', no'tequën yonquiarihua'. Ina quëran noya ninosoroarihua'.

⁴ A'naquën ya'huëramaquë noya imasapi quënanconahuë. Tata Yosë pënëninpoaso' no'tequën natëapi. Ina marë' nôya cancantérahuë. ⁵ Iporaso' ya'ipinpoa' noya ninosoroa'ahua', tênhahuë. Co nasha nanan ninshitaranquëmahuë'. Iráca quëra huarë' Yosë sha'huitérinpoa' ninosorocaso'. ⁶ Yosë nosorohuatéhua', natëarihua'. "Ya'ipi piyapi'sa' nosoroco'," itérinpoa'. Ya'nan imarama quëra huarë' ina natanama'.

Nonpin nanan a'china'piro'sa'

⁷ A'naquënsö nípirinhue' piyapi'sa' yanopintatona', nisha a'chinapi. Ya'ipi parti pa'sápi nonpin nanan sha'huicaiso marë'. "Quisocristoso' Yosë hui'nin níponahuë', co piyapi chachin ninihuë'. Co canpoa pochin nonën ya'huëterihuë'", topi. Co no'tequën a'chinpihuë'. Insosona ina pochin a'chinpachina, nonpinarin. Inaso' Quisocristo inimiconëñ, tênhahuë. ⁸ Ni'cona nonpintochinënquëma'. Nani hua'qui Yosë imatoma', ina marë' sacatopiramahuë'. Inapita pochin cancantohuatama', topinan quëran imapoma'. Co Yosë'pa' acanaarinquëmahuë'. Nípirinhue', ya'ipi cancanëma quëran imapatama', inatohua' Yosë noya nohuitatoma', ya'huëmiatarama'.

⁹ A'naquën co Quisocristo nanaménáchin imapihuë'. "Quiyaso' na'con na'con nitotëri," toconpi. Inapitaso' co Tata Yosë nohuitapihuë'. Quisocristo nanamén imapatéhua', Tata Yosë nohuitarihua'. Hui'nonta' nohuitarihua'. ¹⁰ A'na piyapi huë'pachin: "Carinquëma' a'chinchinquëma'", itohuachinquëma', ama a'naroáchin natëcosohuë'. Co Quisocristo nanamén a'chintohuachinquëmahuë': "Inca. Co yanatanainquënhuë", itoco'. Ama ya'huëramaquë aya'concosohuë'. "Yosë catahuainquëñ", ama itocosohuë'. ¹¹ Co Quisocristo natëtonahuë', co noyahue' nipi. Ama pi'pian téranta' natanacamaso' nohuantocosohuë'. Canpitataquë nisha nanan a'chintohuachinquëma', a'naquën nonpin nanan imapona' nimara. Imapachina', ina marë' campitanta' oshahuanarama'.

Nicaponyapa'ninsö'

¹² Na'con na'con yasha'huitopiranquëmahuë', co aquëtë' yaninshiteranquëmahuë'. Co hua'quiya quëranhuë' nicaponquëma' pa'sarahue' topirahuë'. Canconpato, ninontohuatéhua', noya noya cancantarihua'. ¹³ Isëquë Quisocristo imapisopita yonquiarinënquëma'. Yosë nohuanton, huëntönënquë ya'conpi anta'. Inapitanta' saludos a'patarinënquëma'. Nani huachi.

IsonTa' Coanshari ninshitaantarino'

Imapisopita nosoroaton, catahuarinso'

¹ Ca ansianoco ninshitaranquën, iya Acayo. ¿Noya quëmanta' ya'huanan? Canta' noya isëquë ya'huarahuë. No'tën nanan imaran ni'ton, tēhuëñchachin nosororanquën. ² Quëma marë' iyasha, Yosë nontérahuë: "Catahuaquë' Siniro noya ya'huë'in, ama canioinsihuë'. Noya imarinquën ni'ton, catahuaquë' noya ya'huë'in," itérahuë, Yosë nontato.

³ Ihuamiáchin a'napita iyaro'sa' canquirahuatona', sha'huitiirinaco: "Iya Acayo nónya cancantaton, no'téquen imarin," itiirinaco. Ina natanato, nónya cancantérahuë. ⁴ Nani Quisocristo nanamën a'chintéranguëma'. Ina natëtoma', imarama' ni'ton, hui'nahuëpita pochin ni'nanquëma'. Na'con nosororanquëma'. No'tën nanan imapatama', nónya cancantarahuë. Ina na'con na'con nohuantérahuë.

⁵ Ma noya iya imapisopita nosororan. Ni'toro'sa' ya'nohuachinara, Quisocristo imapi ni'ton, o'shitaton, a'caran. Co nohuitaponahuë', noya nontaton, catahuanan, natantérahuë. Yosë natëton iya inaporan. ⁶ Inapitaso' huëñantahuatona', niyontonaiquë sha'huitiirinacoi: "Iya Acayo noya nosororincoi," itiirinacoi. Naquéranchin quëmataquë cancoantahuachina', catahuantaquë' noya pa'ina', ténahuë. Yosë marë' sacatapi ni'ton, catahuaquë' ama pahuanchinasohuë'. ⁷ Quisocristo noninso' a'chinápi. Ina marë' pa'sápi. Co Yosë imapisopitahuë' a'chintaponaraihuë', co manta' ina marë' ma'patopihuë'. ⁸ Napoaton campoa' inapopisopita catahuahua' ama pahuanchinasohuë'. Inapitaso' no'tën nanan a'chinapi. Cosharo', ma'sha inapita pahuan-topiso' quëtohuatéhua', campoorinta' a'napita catahuarihua' Yosë nohuitacaiso marë'. Catahuahuatéhua', na'con na'con piyapi'sa' imasapi.

Tiotripisë co noyahuë' nininso'

⁹ Ya'ipi ya'huëramaquë imaramasopita quirica nani ninshitetéranguëma'. Tiotripisëso nípirinhue', co yanatérincohuë'. Inaso' hua'an pochin yaninin. ¹⁰ Napoaton ya'huëramaquë pa'pato, co noyahuë' nininsopita a'ninquëchin sha'huitarahuë. Inaso' na'con pinorincoi, nonpinapirincoi. Naporahuaton, iyaro'sa' a'chinacaiso marë' canconpachinara, co noya nontérinhue'. Co pëinënquë aya'coninhue'. A'napitari a'china'piro'sa' yacatahuapirinahuë', co ina téranta' nohuantérinhue'. "Ama pëinëmaquë aya'concosohuë", itopirinhue'. Aya'compachinara, no'huiton, inapitanta' niyontonpi quëran yaocoirin. "Ama huachi campita téranta' niyontonpiso pëiquë ya'concosohuë", toconin. Pa'pi co noyahuë' yonquirin inaso'.

¹¹ Ama iya co noyahuë' nípisopita nonanquësohuë'. Noya nípisopita nonanquë'. Noya nípatéhua', tēhuëñchachin Yosë imarihua'. Co noyahuë' nípatéhua', co Yosë nohuitarihuahuë'.

Imitirio noya nininso'

¹² Imitirioso nípirinhue' noya imarin. Ya'ipi ya'quëran napotérinco. Ya'ipi cancanëñ quëran no'téquen yonquirin. Quiyanta' nohuitérai. "Inaso' noya quëmapi," ténai. No'téquen nontérainquën.

¹³ Na'con iya yasha'huitopiranquënhue', co aquëté' yaninshitetéranguënhue'. ¹⁴ Co hua'quiya quëranhuë' nicaponquën pa'sarahuë, topirahuë'. Pa'pato, niquënanpatéhua' noanhua'.

¹⁵ Yosë asanocancainquën. Ina quëran noya cancantaton, noya ya'huanan. Ya'ipi imapisopita isëquë ya'huëpiso' yonquiaténëñquën saludos a'patarinëñquën. Ya'ipi ni-payaraisopita inatohua' ya'huëpiso' yonquiarahuë. Saludos a'patarahue sha'huitéquë'. Nani huachi.

A'na Cotasë ninshitërinso'

Imapisopita yonquiaton, nanan a'patërinso'

¹ Ca Cotasëco ninshitaranquëma'. Santiacos iinco caso'. ¿Noyanquëma' canpitanta'? Canta' noya ya'huarahuë. Quisocristoíchin natërahuë. Ina acorinco pënënta'huaso marë'. Quisocristo imaramasopita ninshitaranquëma'. Tata Yosë nohuanton, imarama'. Inaso' na'con nosororinquëma'. Quisocristo imarama' ni'ton, nöya a'paiarinquëma', nicha'ësarinquëma'. ² Yosë na'con catahuainquëma'. Nanan anoyatërinpoa' ni'ton, na'con asanocancainquëma'. Nani tahuëriya nosoro'inquëma' canpitarinta' noya noya nosorocamaso marë'.

Nonpin nanan a'china'piro'sa'

(2 Pedro 2.1-17)

³ Carinquëma' iyaro'sa' nosororanquëma'. I'huamiáchin yonquirahuë ninshita'huanquëmaso marë'. Yosë anoyacancantërinpoaso' noya noya yaa'chintopiranquëmahuë', apira nanan natantërahuë. A'naquënso' nonpin nanan a'chintarinënquëma', natantërahuë. Napoaton pënëna'huanquëmaso' ya'huërin, tënahuë. Quisocristo nanamën no'tequën a'chintérainquëma'. Yosë nohuanton, no'tequën ninshitërai ya'ipi imapisopita nitotacaiso marë'. Nani ya'ipiya nanamën anitotërinpoa'. Inasáchin natëtoma', a'napitanta' a'chintoco' no'tequën yonquicaiso marë anta'. Ama pi'pian téranta' nisha a'chintocosohuë', tënahuë. ⁴ Téhuëñchachin a'naquënso' nonpin nanan a'chintarinënquëma'. Pa'pi co noyahuë' inapitaso'. "Quiyanta' imarai," taponaraihuë', co no'tequën a'chinpihuë'. "Ma'sona nohuantërehuaso niahua". Yosë nosororinpoa' ni'ton, co ana'intarinfoahuë', ta'tona', pa'pi co noyahuë' nipi. No'pipi, monshihuanpi, a'naratipita nipi. Naporahuatona', co téhuëñchachin Quisocristo imapihuë', inasáchin natëcaso nimirinhuë'. Ina marë' Yosëri chiníquën ana'intarin. Iráca quëra huarë' nani yonquirin ana'intacaso'. Napoaton ni'cona canpitanta' nonpintochinënquëma'. Chiníquën cancantatoma', no'tequën a'chincó'.

⁵ Nani nitotopiramahuë', naquëranchin sha'huitantaranquëma' yonquicamaso marë'. Iráca Yosë piyapinënpita Iquipito parti parisitopirinahuë', Yosëri nicha'ërin. Ya'ipiya noya pipiponaraihuë', ina quëran a'naquën co yanatëhuachinahuë', Yosëri chiníquën ana'intaton, ata'huantërin. Inapochachin iporanta' imaponaraihuë' nisha cancanto-huachina', chiníquën ana'intarin. ⁶ Anquëniro'santa' ya'nan nípon, ya'ipiya noya yonquipirinahuë'. Ina quëran a'naquën nisha cancantatona', co huachi Yosë yanatëpihuë'. "Quiyanta' nöyacoí ni'toi, natëinacoiso' ya'huërin," topiso marë', co huachi Yosë'pa' ya'huëpihuë'. Nani Yosëri yonquirin chiníquën ana'intacaso'. Tashinanquë tonpopinan ya'huapi. Ayaro' tahuëri parisitopique a'pararin. Co onporonta' cha'ësapihuë'. ⁷ Iráca Sotomaquë ya'huëpisopitanta' pa'pi co noyahuë' yonquipi. Monshihuanacaisoáchin cancantopi. A'naratipita taparo' nipi. Co ina pochin nicacasohuë' nimirinhuë', napopi. Ina marë' Yosëri chiníquën ana'intërin. Pén inápa quëran a'paimarin ahuiquitacaso marë'. Sotoma, Comora, inapita huiquitopi. Ya'cariya ninanoro'santa' huiquitopi. Ayonquiinfoaso marë' ninshitërinpoa'. Inapita yonquiatëhua', "A'na tahuëri oshahuano'sa' pënqué parisitomiatapi huachi," tënëhua'.

⁸ Inapochachin iporanta' nisha a'china'piro'saso', huë'ëiri ahua'yantërinso pochin cancantatona', inahuara yonquinëna quëran nonpin nanan imasapi. Na'con monshihuanatona', nitapicancanapi. Co inso téranta' yanatëpihuë'. "Co insonta' camaiinpoaso' ya'huërinhuë'," toconpi. Chiníquën nanantopisopita Yosëri acorinso' inapitanta' téhuapi. ⁹ Iráca Moisësë chiminpachina, Yosëri anquëni hua'an a'paimarin nonën pa'pitacaso marë'. Miquiri itopiso'. Sopairi yaosérëtohuachina, nino'huipi. Napor'o'

anquëni chiníquën nanantaponahuë', co nohuantérinhue' sopai pinocaso'. Co inaora ana'intacaso' yonquirinhue'. "Sinioro ana'inchinquën," itérin. ¹⁰ Nisha a'china'piro'saso nipurinhue' Yosë yonquirinso' co nitotatonaraihuë', tēhuapi. Ma'sharo'sa pochin cancantatona', co yonquipihuë'. Ma'sona tēranta' yanipachinara, nipi. Inapoatona', nitapican-canpi. Ana'intacaso' ya'huërin.

¹¹ ¡Ma'huantacha nisapi paya! Nonpina'piro'saso', Caino pochin cancantatona' co Yosë natépihuë'. Paramo pochin cancantopi. Iráca Paramoso' coriquiráchin cancantaton, piyapi'sa' anishacancantérin. Corinta' iráca co noyahue' ninin. Co hua'ano'sa' yanatérinhue', no'huirin. Ina marë' Yosë nohuanton, chiminin. Inapita pochin cancantopisopita Yosëri chiníquën ana'intarin. ¹² Quisoso imaramasopita coshatacaso marë' niyontonpatamara, nisha a'china'piro'santa' huë'pi. Naporo' Yosë yonquicaso nipurinhue', na'con o'otona', capa cancantopi. Co Yosë tē'huatatonaraihuë', napoli. A'napita catahuacaso' ya'huëpirinhue', co nosoropihuë'. Inahuara noya ya'huëcasoráchin yonquipi. Ni'co' iyaro'sa'. Hua'qui' co o'nampachinahuë', no'pa' yaniromarin. Ina pochin nipauchina, yararo'të' quënanpatamara, pa'yatérama'. "O'nan huë'sarin," topiramahuë', co o'naninhue'. Ihuana' pa'nin. Inapochachin inapitaso' pënënpirlénquëmahuë', nonpin nanan a'chintaténénquëma' co catahuarinénquëmahuë'. Nara nitérinsonta' yonquico'. Pi'ipi tahuëri nanihuachina, nitacaso' ya'huërin. Co nitohuachinahuë', "Nani chiminin huachi," ta'ton, hua'anëni nishítetérin. Itënë chachin ocoirin ni'ton, noyá chiminin huachi. Inapochachin nonpin nanan a'china'piro'sa' ina nara pochin niconpi. Quisocristo nanamëñ nitotaponaraihuë', chimipi pochin nicatona', a'popi. Ina marë' chiníquën ana'intacaso' ya'huërin huachi. ¹³ Pamanta' yonquico'. Panca pamato-huachina, notohuaro' sa'po', amoro', inapita quënin. Nonpina'piro'saso', ina pochin co sano cancantopihuë'. Co noyahue' nipi ni'ton tapanacaso nipurinhue', co nitotapan-pihuë'. Ina marë' Yosëri ana'intarin. Tayloranta' yonquico'. Anotohuachina, tacopirin. Co huachi a'pininhue'. Inapochachin nisha a'china'piro'santa', tashinanquë pa'miatapi. Quisocristo a'pohuachina', parisitopiquë pacacaso' ya'huërin huachi.

¹⁴ Iráca Inocori chachin inapita ninorin. Atan shiin inaso'. Atan quëran saota shinpita ya'huërin piquëran Inoco ya'huërin. Ninoton, naporin: "Sinioro chachin o'mararin huachi. Hua'huayatérahuë' anquëniro'sarë chachin o'mararin. ¹⁵ Naporo' ya'ipi oshahuano'sa' ana'intarin huachi. Pa'pi co noyahue' nipi ni'ton, ana'intacaso' ya'huërin. Yosë no'huipisopita no'tequëñ ana'intarin huachi," ténin iráca. ¹⁶ Yosëo' noya nosoropirimpaoahuë', inapitaso' ma'sha onpohuachinara, ina no'huipi. Co sano cancantopihuë'. Ma'sona tēranta' yonquihuachinara, nipi. Co noyahue' cancantatona', napoli. "Quiyaso' noya noya nitotërai," ta'tona', chiníquën nonconpi. Co piyapi nosoroapponaraihuë', noyasha nontopi. Inahuara canacaiso marë' napotopi.

Chiníquën cancantatëhua', Quisocristoíchin imamiatahua'

¹⁷ Canpitaso nipurinhue' iyaro'sa', noya yonquico'. Nosororanquëma' ni'ton, pënënararanquëma'. Quisocristo ca'tano'sanënpita sha'huitérinfoaso' ama naniantocosohue'. ¹⁸ "Ayaro' tahuëri naniriahuachin, co noyahue' quëmapi'sa' ya'huërapi. Yosë nanamëñ tēhuaapi. Co noyahue' cancantatona', a'naratipita nisapi," itérinfoa'. ¹⁹ Inahuara nohuantopiso' nisapi. Co Ispirito Santori ya'coancantérinhue'. Nisha a'chinatona', piyapi'sa' anishacancantopi, a'na huënton a'na huënton co huachi noya nini'tona', ya'huapihuë'.

²⁰ Canpitaso nipurinhue' iyaro'sa', Yosë nanamëñ na'con yonquico' noya noya imacamaso marë'. Inasáchin no'tequëñ anitotérinfoa' Yosë pochin cancantacaso'. Naporahuaton, Yosë nontáco'. Ispirito Santo catahuarinquëma' cancanëma quëran huarë' noya nontacaso'. ²¹ Inapotatoma', nani tahuëri noya cancantoco' Yosë nosoro'inquëma'. Ina na'con nohuantoco'. Quisocristo yonquiatoma', o'mantacaso' tahuëri ninaco'.

O'mantahuachin, nosoroatonpoa', chimirin quëran nicha'ësarinpoa'. Yosë'pa' nanopimiatarihua'.

²² A'naquënso' co noya natëyátërapihuë'. Inapitaso' nosoroatoma', sanoanan quëran pënënco' no'tëquën yonquicaiso marë'. ²³ Ni'co' iyaro'sa'. Ma'sha pënqué anoto-huachina, a'naroáchin manë' ama huiquitacaso marëhuë'. Inapochachin piyapi'sa' na'con pënënco' ama parisitopiquë paacaiso marëhuë'. A'naquënso nimirinhue' nonpin nanan pa'yatatona', co noyahue' nipi. Inapitanta' nosoroatoma', pënënco'. Nimirinhue', ama pi'pian tërranta' inapita pochin cancantocosohue'. Napopiso' ama yonquicosohue'. Ni'cona sopai minsëchinquëma' canpitanta'.

Ma noyacha Yosëso paya itahua'

²⁴⁻²⁵ Tata Yosëso' ya'ipi nanitaparin. Noya a'paiarinquëma' ama anotérëso pochin têhuëcamaso marëhuë'. Catahuahuachinpoa', co sopai minsëarinfoahuë'. Noya noya tapararinpoa' imamiatacaso marë'. A'na tahuëri ya'huërinquë noya ni'sarinpoa'. Inatohuaso' noya noya. Capa cancantarihua'. Tata Yosëichin hua'anentérinpaoa'. Ina nohuanton, Quisocristo nicha'ësarinpaoa'. Inasáchin catahuuarinpaoa' noya chinotacaso'. Ma noyacha Tata Yosëso paya. Iráca quëra huarë' chini chiníquën nanantérin. Noya noya ni'ton, ya'ipi piyapi'sari chinochina'. Inasáchin natëahua'. Ama onporonta' naniantahuasohue'. Amen. Nani huachi.

Cotasë

A'na tahuëri ma'sha onpocaso' Coansha ninshitërinso'

Quisocristo anitotërinpoaso'

¹ Tata Yosë nohuantërin ya'ipinpoa' iso nanan nitotacaso'. Napoaton a'na tahuëri ma'sha onpocaso' nininso' Quisocristo sha'huitërin anitotinpoaso marë'. Inaso' anquëni a'paimarin ca Coanshaco sha'huitiincoso marë'. Quisocristoíchin caso' natërahuë. Anquëni o'marahuaton, nani ma'sha a'notërinco. ² A'notohuachincora, ni'nahuë. Ina nicato, no'tequën ninshitaranquëma'. Quisocristo chachin Yosë nanamën anitotërinco.

³ Iso quirica nontohuatama', noya cancantarama'. Ina natanpatamanta', noya cancantarama'. A'na tahuëri ma'sona onpocaso' sha'huitaranquëma'. Natëhuatama', Yosë noya ni'sarinquëma'. Ayaro' tahuëri nani ya'caririarinpoa huachi.

Canchisë ninanoro'saquë Yosë imapisopita ninshitërinso'

⁴ Ca Coanshaco quirica a'pataranquëma'. Asia parti ya'huëramasopita ninshitaranquëma'. Imarama' ni'ton, a'naya a'naya ninanoro'saquë niyontonatoma', Yosë chinotërama'. Canchisë ninanoquë niyontonamaso' a'naya a'nayanquëma' yonquiatenquëma', ninshitaranquëma'. Inaora nohuanton, Tata Yosë noya catahuainquëma'. Asanocancainquëma'. Iráca quëran huarë' ya'huërin. Ipora huanta' nanoparin. Inaso' ya'huérápon. Co onporonta' chimianinhue'. Hua'anëntacaso' shiranëñ notënanquë canchisë ispiritoro'sa' ya'huapi catahuainquëmaso marë'. ⁵ Quisocristonta' inaora nohuanton, catahuainquëma'. Asanocancainquëma'. Iráca isoro'paquë o'marahuaton, no'tequën a'chintërinpoa'. Ina'ton chiminaponahuë', nanopantarín. Chimirin minsërahuaton, ya'ipiya hua'anëntarin. Ya'ipi hua'ano'sa quëran chini chiniquëñ nanantarín. Naporahuaton, na'con nosororinpoa'. Oshanënpoa' inquitinpoaso marë' huëñainëñ a'parin. Chiminaton, nicha'ërinpoa. ⁶ Huëñtonëñquë chachin aya'conatonpoa', hua'anëntërinpoa'. Yoséíchin yonquicaso marë' corto hua'ano'sa' pochin acorinpoa'. ¡Ma noyacha inaso paya! Ya'ipi piyapi'sari chinochina'. Ipora quëran huarë' inasáchin natëina'. Amen.

⁷ Ni'cochi. Quisocristo o'mantararin. A'na tahuëri chitororë chachin o'mantararin. Naporo' ya'ipi piyapi'sari ni'sapi. Iráca ohuanpisopitarinta' ni'sapi. Nisha nisha piyapi'sa' sëtatona', na'nërapí. "¿Onpoatëhuacha co natërehuahuë paya?" tosapi. Tëhuëñchachin naporapi. Amen.

⁸ Yosë chachin sha'huitërinpoa': "Ca'ton ya'huërahuë. Co'huara isoro'pa' ya'huëyatërasohuë', ya'huárahuë. A'na tahuërinta' ya'ipi ma'sharo'sa' ta'huantopirinahuë', caso' ya'huápo. Iráca quëran huarë' ya'huërahuë. Ipora huanta' nanopírahüe. Co onporonta' ta'huantapohuë', ya'huérápo. Chini chiniquëñ nanantërahuë," ténin.

Quisocristo ya'norinso'

⁹ Ca Coanshaco ninshitaranquëma'. Capitaro'co chachin imarahuë. Ina marë' parisitopirëhuahuë', hua'anëntërinquë aya'coninpoa'. Quisocristo chachin catahuahuachinpoa', noya ahuantarëhua'. Yosë nanamën a'chinahuëso marë' aparisisitërinaco. Quisocristo imarahuë ni'ton, a'na so'ton'pa' a'parinaco, Patomosë itopiquë. ¹⁰ I'huá Tomio tahuëri Yosë chinotasoco, Ispirito Santo nohuanton, hua'narëso pochin quënanahuë. Co huë'ëpirahuë', pinëhuë quëran chiniquëñ nontërinco, natanahuë. Tronpita pihuirinso pochin natanahuë. ¹¹ Nontatonco, sha'huitërinco:

—Apira nani ma'sha a'notaranquën, quiricaquë ninshitëquë'. Ina quëran canchisë ninanoro'saquë a'patëquë' imarinacosopita nonchina'. Ipiquoë, Ismirinaquë, Pircamoquë, Tiatiraquë, Sartisiquë, Piratiripiaquë, Naotisiaquë inaquëpita ya'huëpisopita a'patëquë' nitochina', itérinco.

¹² “¿Inta' nontarinco?” ta'to, tahuërëtopirahuë', canchisë së'parahuan nanparino'sa pochin nininsopita quënanahuë, oro quëran nipiso'. Inapamiáchin huanipi. ¹³ Ina huancánachin quëmapi huaniarin, ni'nahuë. Piyapi pochachin nipoñahuë', noya noya ya'norin. Naporopi a'mosahuaton, oro pochin niniso quëran të'tëntaquéchin nitonporin. ¹⁴ Huiríchin aintérin. Huirihuaita pochin huiritérinso'. Naporahuaton, ya'pirin chachin pën nënérinso pochin ya'norin. ¹⁵ Nantëonta' sha'pi hua'na pënqué a'pérëso pochin huënaráchin ya'norin. Naporahuaton, chiníquën nonin. Panca so'pora tënëntérinso pochin natanahuë. ¹⁶ Inchinan imirin quëran canchisë tayora pochin niniso' së'quërin. Naporahuaton, nanamën quëran sahuëni pochin niniso' pipirarin. Cato quëran chachin to'napinan. Ya'ipi ya'pirinso' pi'i pochin a'pinin. Huënaráchin huënaráchin ya'norin.

¹⁷ Ina ni'sahuato, pa'yanahuë. Chimipi pochin anotërahuë. Nantëen pirayan anotopirahuë', inchinan quëran së'huarahuatonco, nontérinco.

—Ama të'huatocosohuë'. Caso' iráca quëran huarë' ya'huërahuë. Co onporonta' ta'huantarahuë'. ¹⁸ Nanpiárahuë. Chiminaporahuë', nanopiantarahuë. Caso' chini chiníquën nananterahuë. Onporosona chiminacaiso' cari sha'huitarahuë. Ca nohuantohuato, nanopiapi. Ca nohuantohuato, chiminapona'. Co imarinacosopitahuë' chimpachina', parisitopiquë a'pararahuë. ¹⁹ Ni'nanso' ninshitëquë'. Apira Yosë nohuanton, naquëranchin nani ma'sha niantaran. Ipora naporapiso', a'na tahuëri ma'sha onpocasonta', inapita a'nochinquëen ninshitantaqué'. ²⁰ Ni'nanso' co quëmaora nitotopiranahuë', a'chinchinquëen nitotëquë'. Canchisë së'parahuan nanparino'saso' noya a'pinin. Inapochachin canchisë ninanoro'saquë imarinacosopita ya'huapi. Niyontonatona', chinotarinaco. Canchisë tayloraro'sa' së'quërahuëso pochin ansiano'sa' a'paiarahuë, itérinco.

2

Ipisoquë ya'huëpisopita ninshitërinso'

¹ Ina quëran sha'huitérinco:

—A'na quiricaquë ninshitaton, ansiano Ipisoquë ya'huërinso' a'patëquë' nonto-huachin imapisopita nataina'.

“Ca Quisosoco quirica a'pataranquëma', ni'co'. Inchinanëhuë quëran canchisë tayloraro'sa' së'quërahuë. Canchisë së'parahuan nanoparin pochin nininsopita huancánachin pa'sárahuë. ² Nani nohuitéränquëma'. Ya'ipi ninamasopita nitotërahuë. Chiníquën ca marë' sacatërama'. Co amiatomacohuë', noya ninama'. A'naquën co noyahuë' nipachinara, co noya ni'namahuë'. Nonpin nanan a'china'piro'santa' co noya ni'namahuë'. Yosë a'parincoi, a'chinarai,' itopirinëñquëmahuë', nonpinapi. Inapita natanpatama': ‘Co no'tëquën a'chinpihuë', ta'toma', co natëramahuë'. ³ Imaramacoso marë' aparisitopirinëñquëmahuë', ahuantërama'. Co yaa'poramacohuë'. Ina marë' noya ni'nanquëma'. ⁴ Nipirinhuë', co huachi noya nosororamacohuë'. Iráca ya'nan imapomaco, têhuëñchachin noya nosororamaco. Capita capininta' noya ninosororama'. Iporaso nipirinhuë' co huachi iráca pochin noya ninosororamahuë'. Co huachi canta' noya nosororamacohuë'. Ina marë' sëtato, co noya ni'nanquëmahuë'. ⁵ Iráca naporamaso' yonquiantatoma', noya niantaco'. Ya'ipi co noyahuë' yonquiramasopita niantatoma', ya'ipi cancanëma quëran nosoroantaco. Naporahuaton campita capininta' noya ninosoroantaco'. Co noya cancantantahuatamahuë', paaparahuatëñquëma',

ana'intaranquëma'. Nanparin tacopirinso pochin nisarama'. A'na tahuëri ya'huëramaquë co insonta' imasarinacohüë'. ⁶ Napoaponahuë', nisha a'china'piro'sa' co pi'pian téranta' nohuantëramahuë', Nicoraitaro'sa' itopiso'. Co noyahue' nicacaso' a'chintopirinënquëmahuë', co nohuantëramahuë' natëcamaso'. Carinta' co costarahuë'. ⁷ Imaramaco ni'ton, Ispirito Santo chachin nontarinquëma'. Huëratëhuanpatama', noya natanatoma', yonquico'. Sopai minsëhuatama', Yosë'pa' ya'huëmiatarama'. Inatohua' nanopirin nara nitérinso' ca'patama', noya noya nanopimiatarama'. Nani huachi," itëquë', ninshithuatan, itérinco Quisoso.

Ismirinaquë ya'huëpisopita ninshitërinso'

⁸ Ina quëran sha'huitaantarino:

—Ansiano Ismirinaquë ya'huërinsonta' ninshitëquë' nonchin imapisopita nataina'.

“Ca Quisosoco quirica a'pataranquëma', ni'co'. Iráca quëran sahuëni Co onporonta' ta'huantarahuë'. Chiminaporahuë', nanopiantarahuë. ⁹ Imaramacoso marë' na'con parisitëramaso' nitotërahuë. Co na'a ma'sha ya'huëtopirinquëmahuë', Yosë nohuitacamasoachin cancantatoma', sano cancantërama'. A'na tahuërinta' Yosë'pa' pa'patama', co manta' pahuantarinquëmahuë'. Iporaso nimirinhue' a'naquën chiníquën pinorinënquëma'. ‘Yosë piyapinëncoi quiyaso’, topirinahuë', Satanassë huëntonënquë ya'conpi. ¹⁰ Ipora tahuëri'sa' na'con parisitapiramahuë', ama të'huacosohuë'. Sopai nohuanton, tashinan pëiquë po'moarinënquëma'. Yosë a'pocamaso marë' napotarinënquëma'. Shonca tahuëri pochin parisitarama'. Tëpapirinënquëmaonta', ama a'pocosohuë'. Imamiatohuatamaco, inápaquë acanaranquëma'. Inatohua' nanopimiatarama'. ¹¹ Imaramaco ni'ton, Ispirito Santo chachin nontarinquëma'. Huëratëhuanpatama', noya natanatoma', yonquico'. Sopai minsëhuatama', co parisitopiquë paatoma', parisitomiataramahuë'. Nani huachi," itëquë', ninshithuatan, itérinco.

Pircamoquë ya'huëpisopita ninshitërinso'

¹² Ina quëran sha'huitaantarino:

—Ansiano Pircamoquë ya'huërinsonta' ninshitëquë' nonchin imapisopita nataina'.

“Ca Quisosoco quirica a'pataranquëma', ni'co'. Chiníquën nanantato, sahuëni cato quëran chachin to'napinan pochin nininso' ya'huëtërinco ana'inta'huaso marë'. ¹³ Canpita ya'huëramaquë nohuitërahuë. Inaquë na'a piyapi'sa' co noyahue' cancantopi. Satanassëri hua'anëntopirinhue', canpitaso' noya imaramaco. Antipassë natëtonco, noya pënëntopirinhue', ina marë' tëpapi, ni'nama'. Satanassë chachin inaquë ya'huërin, tënahuë. Parisitapomarahuë', co a'poramacohuë'. Ina marë' noya ni'piranquëmahuë', ¹⁴ co ya'ipinquëma' no'tëquën imaramacohuë'. A'naquëma' Paramo pochin cancantërama'. Iráca inaso' Yosë nanamëñ nitotopirinhue', Yosë piyapinënpita nonpintërin. Inimiconënpita hua'anëñ sha'huitërin anishacancantacaiso marë', Paraco itopiso'. Inari sha'huitohuachina, anishacancantopi. Nisha cancantatona', mamanshi moshapi. Moshatona', nosha mamanshi marë' acopisonta' ca'pi. Naporahuaton, monshihuanapi. ¹⁵ Inapochachin a'naquëma' nisha cancantërama'. Nisha a'china'piro'sa' a'chintohuachinënquëmara, a'naquëma' natëtoma', Nicoraitoro'sa' a'chinpiso' imarama'. ¹⁶ Napoaton ya'ipi co noyahue' yonquiramasopita nariantoco'. Insosona co nariantohuachinhuë', chiníquën ana'intarahuë. Nanamëhuë quëran sahuëni inëshin nininso' ya'huëarin oshahuano'sa' ana'inta'huaso marë'. ¹⁷ Imaramaco ni'ton, Ispirito Santo chachin nontarinquëma'. Huëratëhuanpatama', noya natanatoma', yonquico'. Sopai minsëhuatama', noya cancantarama huachi. Iráca israiro'sa' Yosëri cosharo' a'patimarin, mana itopiso'. Inachachin po'orahuës' carimanta' quëchinguiëma' sano cancantacamaso marë'. Imaramaco ni'ton, nasha nininëma' a'naya a'nayanquëma'

aco'inquëma'. Canpitaora nitotarama'. Huiri na'piquë ninshitahuato, quëchinquëma'. Cancanëma quëran noya noya nohuitaramaco huachi. Nani huachi," itëquë', ninshitohtuan, itërinco.

Tiatiraquë ya'huëpisopita ninshitérindo'

¹⁸ Ina quëran itaantarino:

—Ansiano Tiatiraquë ya'huërinsonta' ninshitëquë' nonchin imapisopita nataina'.

“Ca Yosë hui'ninco quirica a'pataranquëma'. Ya'pirahuë pën nénérinso pochin ni'ton, ya'ipi yonquiramaso quëran huarë' nitotërahuë. Nantëhuënta' sha'pi hua'na pënqué a'pérëso pochin ni'ton, huënaráchin ya'norin. ¹⁹ Canpitaso' noya ninama'. Noya natëtomaco, ninosororama'. A'naquëma' pahuantohuachinquëmara, nicatahuarama'. Ma'sha onpoapomarahuë', noya ahuantërama'. Ya'nan imapomaco, noya ninama'. Iporaso' na'con na'con nicatahuarama'. Ina marë' noya ni'piranquëmahuë', ²⁰ co ya'ipi cancanëma quëran imaramacohuë'. A'na sanapi corto pëiquë chachin nonpin nanan a'chintopirinquëmahuë', co a'paramahuë'. Iráca Quisapira pa'pi co noyahuë' sanapi níponahuë', chiníquën nanantaton, piyapinéhuëpita anishacancantérin. Inapochachin iporaso' ina sanapi pënénarinquëma' co noyahuë' nicacamaso'. ‘Noya monshihuanacaso'. Mamansi moshacaso marë' nosha acohuachina, noya capacaso'. Ca'co', itohuachinquëmara, a'naquëma' natëtoma', monshihuanama'. Nosha mamansi marë' acopiso' ca'nama'. Ina pochin ina sanapi nonpintërinquëma'. ²¹ Co a'naroáchin ana'intërahuë'. Hua'qui' pënénpirahuë', co pi'pisha téranta' nohuantërinhuë' natëincoso'. Oshahuanacaso' co yaa'porinhuë'. ²² Iporaso nípirinhuë' ana'intarahuë huachi. Chiníquën aparisitarahuë. A'napitanta' anishacancantérinsopita co oshanëna' a'pohuachinahuë', chiníquën ana'intarahuë. ²³ Sanapi imarinsopitaso' co natërinacohuë' ni'ton, ata'huantarahuë. Ina nicatona', ya'ipi imarinacosopitanta' yonquiapi. ‘Téhuëñchachin Siniro nohuitérinpoa'. Yonquiréhuasonta' nitotërin. Co noyahuë' nípatëhua', no'tëquën ana'intaripoa', tosapi. ²⁴ A'naquëmaso nípirinhuë' co nonpin nanan natëramahuë'. ‘Noya noya nitotërai', itopirinéñquëmahuë', ‘Sopai imatona', napopi, ta'toma', co ina natëramahuë'. Iporahuanta' noya imaramaco ni'ton, co aquëtë' pënëna'huanquëmaso' ya'huërinhuë'. ²⁵ Chiníquën cancantatoma', o'manta'huaquë huarë' imamiatoco. ²⁶ Sopai minsëhuatama', a'na tahuëri chiníquën nanan quëtaranquëma'. Ayaro' tahuëriquë huarë' natëhuatamaco, catahuaramaco nisha nisha piyapi'sa' hua'anënta'huaso marë'. ²⁷ Tata Yosë nohuanton, chiníquën nanantërahuë. Canpitanta' catahuaramaco copirnoro'sa' co natërinacosopitahuë' ana'inta'huaso'. No'pa huë'ëta hua'naquë pa'quirëso pochin oshahuano'sa' ana'intarihua'. ²⁸ Naporahuaton, huënio tayora huënaráchin a'pininso pochin quëchinquëma'. Noyápiachin a'pintaranquëma'. ²⁹ Imaramaco ni'ton, Ispirito Santo nontarinquëma'. Huëratëhuapatama', noya natanatoma', yonquico'. Nani huachi," itëquë', ninshitohtuan, itërinco.

3

Sartisiquë ya'huëpisopita ninshitérindo'

¹ Ina quëran Quisoso sha'huitaantarino:

—Ansiano Sartisiquë ya'huërinsonta' ninshitëquë' nonchin imapisopita nataina'.

“Ca Quisosoco ninshitaranquëma'. Caso' canchisë ispiritoro'sa' Yosëri camairinso' canta' camairahuë, natërinaco. Naporahuaton, tayloraro'sa' së'quërahuëso pochin, ansianoro'santa' acorahuë a'chinacaiso marë'. Canpitaso' nohuitéranchinquëma'. Ya'ipi co noyahuë' ninamasopita nitotërahuë. A'napitaso' nicatënénquëma', ‘noya imapi', topirinahuë', co téhuëñchachin imaramacohuë'. Chimipi pochin cancantërama'. ² Ipora huanta' niyontonpiramahuë', topinan quëran naporama': ‘Ya'ipi natëtoi, noya ninai', topiramahuë', co huachi Yosë noya ni'ninquëmahuë'. Huë'érëso

pochin cancantërama' ni'ton, co yonquiramahuë'. Pënsha yatacopirinso pochin cancantërama'. Pën yatacopihuachina, pishiterë' noya orotacaso marë'. Inapochachin canpitanta' chiniquën Yosë yonquiantaco'. ³ Ya'nan natanapoma', Yosë nanamëñ no'tequën a'chintérinënquëma'. Ina yonquiatoma', ya'ipi co noyahuë' yonquiramasopita nariantoco'. Ya'ipi cancanëma quëran casáchin yonquico. Co noya cancantaantahuatamahuë', a'naroáchin ana'intaranquëma'. Ihuatona'pi huë'nins pochachin a'nanaya ana'intaranquëma'. Co nitotasënquëmahuë', o'mantararahuë. ⁴ Napoaponahuë', caraichinquëma' noyápiachin cancantërama'. Canpitaráchin noya nicatoma', co né'huëtérinso pochin cancantaramahuë'. Ina marë' canpitaso' noya ni'saranquëma' ni'ton, Yosë'pa' ichiya'huëcontaranquëma'. Inatohua' noya cancantarama' ni'ton, huiríchin a'mocontarama'. ⁵ Inquémasco' sopai minséhuatama', Yosë'pa' pa'sarama'. Noyápiachin cancantarama' ni'ton, huiríchin a'mocontarama'. Inatohua' ya'huëmiatarama'. Nanpirin quiricaquë nininëma' nani ninshitéränquëma'. Co onporonta' tapiarahuë'. Tata Yosë sha'huitarahuë: 'Isopita imamiatérinaco,' itarahuë. Anquëniro'santa' natanapi. ⁶ Imaramaco ni'ton, Ispirito Santo chachin nontarinquëma'. Huëratéhuanpatama', noya natanatoma', yonquico'. Nani huachi," itequë', ninshitohuatan, itérinco.

Piratiripiaquë ya'huëpisopita ninshitérinso'

⁷ Ina quëran itaantarincó:

—Ansiano Piratiripiaquë ya'huërinsonta' ninshitëquë' nonchin imapisopita nataina'. "Ca Quisosoco quirica a'pataranquëma', ni'co'. Caso' noya noyaco. Casáchin no'tequën a'chinahuë. Iráca Yoséri Tapi sha'huitérin. 'A'na tahuëri quëma shiparinquën ya'ipi piyapinëhuëpita hua'anëntarin,' itérin. Iráca ninorincoso chachin nani o'marahuë Yosë huëntonënquë aya'cona'huanquëmaso marë'. Niahuiquë ya'coana i'soarahuaté', aya'conë'. Inapochachin carinquëma' aya'compatënquëma', co insonta' nanitérinhue' ocoinquëmaso'. Oncotohuatéra, co a'napita nanitopihuë' ya'conacaiso'. ⁸ Cari nohuitéränquëma'. Ya'ipi ninamasopitanta' nitotérahuë. Co na'aquëmahuë' nipomarahuë', noya ninama'. Co chiniquën nanantapomarahuë', nanamëhuë noya imarama'. Co tapanatomahuë', 'Quisocristoíchin imarai,' ténama' ni'ton, ya'coana i'soatérëso pochin catahuaranquëma' na'a piyapi'sa' a'chintacamaso'. Ca nohuan-ton, pënëntarama'. Co insonta' nanitarinhue' ata'tëinquëmaso'. ⁹ A'naquën nonpintatënënquëma', 'Yosë piyapinënpitacoí quiyanta,' itopirinënquëmahuë', Satanásë huëntonënquë ya'conpi. A'na tahuëri ca nohuanto, inapitanta' isonahuatona', noya nontarinënquëma'. 'Téhuëñchachin no'tequën imarama'. Quisocristo nosororinquëma', itarinënquëma'. ¹⁰ Chiniquën cancantatoma', imamiatoco, itéränquëma'. Natéramaco ni'ton, carinquëmanta' na'con catahuaranquëma'. A'na tahuëri ya'ipi isoro'paquë ya'huëpisopita chiniquën aparisitarahuë ténica'huaso marë'. Co naporo' parisitaramahuë'. Nicha'ésaranquëma'. ¹¹ Co hua'quiya quëranhuë' o'mantararahuë. Ama nariantatomacohue', imamiatoco. Ni'cona sopai minséchinquëma'. Ina minséhuachinquëma', co inápaquë canaaramahuë'. ¹² Sopai minséhuatama', Yosë ya'huërinquë chachin pantarama'. Piyon pëi' achinirinso pochin na'con nohuantaranquëma'. Napoaton ya'huëmiatontarama'. Co pipiaramahuë'. Yosë co onporonta' a'poarinquëmahuë'. Nininëñ chachin acotaranquëma'. A'na tahuëri panca ninano' ya'huapon. Inápa quëran o'mararin. Nasha Quirosarin itopiso'. Ina nininëonta' acotaranquëma'. Canta' Quisosoco o'mantahuato, nasha nininëhuë acotaranquëma'. Co onporonta' a'poaranquëmahuë'. ¹³ Imaramaco ni'ton, Ispirito Santo chachin nontarinquëma'. Huëratéhuanpatama', noya natanatoma', yonquico'. Nani huachi," itequë', ninshitohuatan, itérinco.

Naotisiaquë ya'huëpisopita ninshitérinso'

¹⁴—Ina quëran ansiano Naotisiaquë ya'huërinso' ninshitëquë' nonchin imapisopita nataina'.

“Ca Quisosoco quirica a'pataranquëma', ni'co'. No'tëquën nonato, no'tëen nanan a'chintëranquëma'. Co onporonta' nonpintëranquëmahuë'. Yosë nohuanton, ya'ipi ma'sha ninahuë. Napoaton, ya'ipi piyapi'sa' natëinacoso' ya'huërin. ¹⁵ Caso' nohuitëranquëma'. Ya'ipi ninamasopitanta' nitotato, co noya ni'ninquëmahuë'. Ni'co'. Të'nai' noyápiachin o'orë'. Ahuahuatéranta', yashin o'orë'. Co noya huairinsuhuë' nimirinhuë' o'opatëra, amirotëre', topi. Inapochachin ni'ninquëma'. A'naquën noya ahuairëso pochin noya imarinaco. Canpitanta' noya imaramaco naporini, noya ni'itënquëmahuë'. A'naquëonta' të'nai pochin nipi. Co nitochátërapihuë' ni'ton, nosororahuë. ¹⁶ Canpitaso nimirinhuë' co noya ahuairëso pochinhuë' ninama'. ‘Noya imarai,’ topiramahuë', co ya'ipi cancanëma quëran imaramacohuë' ni'ton, yaa'poranquëma'. Ma'sha amirotatë' yaimorëso pochin ni'ninquëma'. ¹⁷ Canpitaso' naporama': ‘Na'a ma'sha ya'huëterincoi ni'ton, noya ya'huarai. Quiyaso' noya piyapicoi. A'napita quëran noya noya nitotërai. Co manta' pahuantérincoihuë', topiramahuë', co no'tëquën yonquiramahuë'. Cancanëma quëran yonquiramasopita nitotërahuë. Sa'ahuaya pochin ni'ninquëma'. Coriqui pahuantérinso pochin canpitaso' na'con pahuantarinquëma' noya cancantacamaso'. Somaraya pochin cancantatoma', co têhuëñchachin nohuitëramacohuë'. Sa'ahua capa a'mocaso' nininso pochin co noyápiachin cancantëramahuë'. Pa'pi nosorotërama'. ¹⁸ Napoaton pënénanquëma'. Chiníquën nontoco catahuainquëma'. Ni'co'. Oro a'pëhuatëra, ya'ipi në'huë inquirin. Orosachin quëparitërin, noyasáchin nininso'. Inapochachin canpitanta' nontoco catahuainquëma' noya yonquicamaso marë'. Na'con pahuantarinquëma' Yosë pochin nicacamaso'. Casáchin yonquico Yosë noya ni'inquëma'. Yonquihiatamaco, huiríchin a'morëso pochin noya nisarama'. Somaraya pochin cancantërama' ni'ton, co têhuëñchachin nohuitëramacohuë'. Nimirioquë acorayatëreso pochin anoyacancanchinquëma' cancanëma quëran nohuitamacoso marë'. ¹⁹ Nosoroatënquëma', chiníquën nontëranquëma'. Ana'intaranquëma' noya cancantacamaso marë'. Co noyahue' yonquiramasopita a'porahuatoma', casáchin tahuërtantaco huachi. ²⁰ Cancanëmaquë yaya'coancantëranquëma'. Ina marë' nontaranquëma'. Ya'coana pi'nirëso pochin ninaranquëma'. Natanaahuatamaco: ‘Ya'coancantoco,’ itohuatamaco, ya'coancantaranquëma'. Niichicoshatëreso pochin nöya ninohuitarihua'. ²¹ Nani sopai minsëruhuato, Tata Yosë'pa' ya'huarahuë. Ya'ipi ya hua'anëntarai. Canpitanta' sopai minsëruhama', Yosë'pa' noya acoaranquëma'. Canpitaro'co hua'anëntarahuë. ²² Imaramaco ni'ton, Ispirito Santo chachin nontarinquëma'. Huëratëhuapatama', noya natanaatoma', yonquico'. Nani huachi,” itëquë' ninshitohuatan, itérinco Quisoso.

4

Inápaquë Yosë chinotopiso'

¹ Ina quëran inápaquë në'përuhuato, quënanahuë. Yosë ya'huërinquë chachin ya'coana ni'soatërin, ni'nahuë. Naporahuaton, inápa quëran ya'nan nontërincoso' nontaantarínco. Tronpita pihuipiso pochin natanaahuë.

—Iséquë huëntaquë'. Nani ma'sha a'nochinquën. A'na tahuëri ma'sha onpocaso' ninoto, anitotaranquën, itérinco.

² A'nanaya Ispirito Santo nohuanton, hua'narëso pochin Yosë ya'huërinso' quënanahuë. Hua'anëntacaso' shiranënquë a'nara' huënséarin, ni'nahuë. ³ Inaqué nisha pochin ya'norin. Na'pi noyápiachin nininso pochin huënaratarin. Caspi, cornarina inapita pochin huënaratarin. Noyápiachin ya'norin. Yahua'tani tahuitërin, huënséarin. Yahua'tan níponahuë', huëron pochin caninchin a'pinin. Ismirarita pochin huënaratarin, ni'nahuë.

⁴ Inaquë cato shonca catapini ansiano'sa' hua'anëntacaso' shiraro'saqué tahuishin miáchin huënsëapi. Huirichinachin a'mopi. Yancotë' oro quëran nininso' yancopi.

⁵ Yosë hua'anëntacaso' shiranën quëran o'cori pochin nininso' pipiarin. Huënsa huënsa'tarin. Huiracarintérinso pochin nonpiso' natanahuë. Canchisë pën nënérinso' Yosë notënanquë chachin ni'nuhüe. Inapitaso' canchisë ispiritoro'sa' Yosëri camairinso', tënahuë. ⁶ Shira notënanquë panca sono pochin ya'huërin. Co i'sha pochinhüe'. Isihuico pochin niponahuë', acopoquë huarë' quënantëre'.

Yosë shiranën tahuirinquë catapini ma'sharo'sa pochin nininso' ya'huëpi, nanopirihuuanpiso'. Na'a ya'pirahuanatona', itoparan itoparan quënantöpi. ⁷ Nisha nisha ni'topi. A'naso' pa'pini pochin ya'norin. A'nanta' toro pochin ya'norin. A'nanta' piyapi pochin ya'piratérin. Ya'natoninsoso', panca onian pochin ya'norin. ⁸ Nisha nisha niponaraihuë', ya'ipiya anpiantéhuanpi. Saota saota ya'huëtopi. Ina aipi, ina acopo', cato quëran chachin ya'pirin ya'huëtopi. Inapitaso' tahuërirë chachin, tashirë chachin Yosë chinotápi. Co ta'topihuë'. Napopianachin naporapi:

“¡Ma noyacha Tata Yosëso paya! ¡Noyasáchin ninin! Chini chiníquën nanantaton, ya'ipiya hua'anëntarin. Iráca quëra huarë' ya'huërin. Ipora huanta' nanopíarin. Inaso' ya'huërárin. ¡Ma noyacha inaso paya!” tosapi.

⁹ Apira apira chinotapi. “¡Ma noyacha Yosëso paya! Ya'ipi piyapi'sari chinochina'. Na'con catahuarinpoa' ni'ton, 'Yosparinquë Sinioro,' itahua'. Inaso' hua'anëntomiatarinpoa'. Co onporonta' ta'huantarinhüe'” topachinara, ¹⁰ ansiano'santa' Yosë yonquiapi. “Téhuëñchachin hua'anëntérinpoa'. Co onporonta' chimianinhüe'”, ta'tona', cato shonca catapini chachin isonahuatona', chinotapi: “Quëmasáchin nöyanquë”, itatona', Yosëri ayancotérinso', shiranën notënanquë acoantapi. Chinotatona', itapona':

¹¹ “Quëmasáchin Sinioro imarainquë. Noya noyanquëni'ton, ya'ipi piyapi'sa' chinochinëñquë. Nani tahuëri natëinëñquë. Ya'ipi nanitaparan. Ya'ipi ma'sha ninan. Quëma nohuanton, ipora huanta' ya'huarin,” itopi.

5

Carniroa'hua quirica ma'patérinso'

¹ Yosë nohuanton, hua'narëso pochin niantarahuë. Inápaqué ya'huërinso' quënanato, quirica ni'nuhüe, so'nanpinan. Inchinan imirin quëran Yosëri së'quërarin. Cato quëran chachin nani ninshitérin. To'niquë noyá achinpítérin. Canchisëro' achinpítérin. ² A'na anquëninta' ni'nuhüe. Chiníquën nanantaton, chiníquën nonin.

—¿Inta' noya noya ni'ton, nanan ya'huëtérin to'niro'sa' i'shotahuaton iso quirica oporinacaso'? ténin.

³ Ya'ipiro'paqué yonisápirinahuë', co insonta' nanan ya'huëtérinhuë' oporinacaso'. Inápaqué ya'huëpisopitanta' co nanitopihuë'. Acoporonta' yonípirinahuë', co inso térranta' nanan ya'huëtérinhuë' oporinaton nicacaso'. ⁴ Co insonta' nanitohuachinhuë', chiníquën sëtato, na'nërahuë. Na'nëapirahuë', ⁵ a'na ansiano sha'huitérinco.

—Ama na'nëquësuhüe'. Ni'quë'. Tapi shiin nani ya'ipi minsérin. Cota huëntonëñquë nasitaton, chini chiníquën nanantërin. Inari nanitërin to'ni i'shotahuaton quirica oporinacaso', itérinco.

⁶ Itohuachincora, Quisoso quënanahuë. Huanganachin Yosë huënsérinso ya'cariya huaniarin. Ansiano'sa', catapini ma'sharo'sa pochin nininsopita, inapitari tancapitopi. Quisoso chachin niponahuë', carniroa'hua nani tēpapiso pochin ya'norin. Canchisë pomohuan nisahuaton, canchisë ya'pirin ya'huëtérin. Chiníquën nanantaton, canchisë ispiritoro'sa' a'parin ya'ipiro'paqué nicainpoaso marë'. ⁷ Ina quëran ya'cariconahuaton, Yosë inchinan quëran quirica ma'parin. ⁸ Nani ma'pahuachina, ma'sharo'sa pochin nininsopita isonahuatona', Carniroa'hua chinotapi. Ansiano'santa' isonahuatona', ina

chinotapi. A'naya a'naya arparo'sa' së'quëpi pi'niatona' chinotacaiso marë'. Sënaonta' a'naya a'naya quëpapi, oro quëran nininso'. Inaque yonarin pochin pimóchin nininso' ya'huërin tomontacaso marë'. Tomontérinso pochin imarëhuasopita Yosë nontéröhua'. "Nontohuatéhua", noya nataninpoa", ta'tona', Yosë chinotapi. ⁹ Chinotatona', inahuara yonquinëna quëran nasha cantanën cantarapi.

"Noya noyanquën, Siniro, ni'ton, nanan ya'huëterinquën quirica ni'camaso'. To'ni i'shotohuatan, nani ma'sha anitotarancoi. Iráca têparinënquën. Chiminaton, piyapi'sa' sopai quëran ocoiran Yosë imacaiso marë'. Napoaton quëmasáchin naniteran ya'ipiya hua'anëntacaso'. Nisha nisha parti ya'huëpirinahuë', imarinënquën, Siniro. Nisha nisha nananquë nonpisopita imarinënquën. Nisha nisha copirnori hua'anëntérinsopita naponaraihuë', natérinënquën.

¹⁰ Hua'anëntéreranquë aya'conan. Corto hua'ano'sa pochin acoran Yoséíchin yonquicaiso marë'. A'na tahuëri no'paquë chachin ichihua'anëntaran huachi. Ma noyanquëncha quëmaso paya," itopi, cantatona'.

¹¹ Ina quëran hua'huayáterahuë anquëniro'sa' quënanahuë. Yosë shiranën, ma'sharo'sa pochin nininsopita, ansiano'sa' inapita tancapitopi. Hua'huayáterahuë ya'huëpi, co pichinahuanhuë'. Inapitanta' chiniquën naporapi:

¹² "Ma noyacha Carniroa'huaso paya! Piyapi'sa' oshanëna' inquitacaso marë' chiminin. Noya noya ni'ton, ya'ipi piyapi'sari chinochina'. Chini chiniquën nanantaton, ya'ipi nanitaparin. Nani ma'sha ya'huëterin, ya'ipi hua'anëntarin. Ya'ipi nitotérin. Napoaton ya'ipinpoa' natéahua'. 'Yosparinquën, Siniro,' itahua', tosapi.

¹³ Ina quëran ya'ipi Yoséri nininsopita napopianachin chinotapi, natanahuë. Inápaquë ya'huërinsopita, isoro'paquë ya'huërinsopita, chiminpisopita, marëquë ya'huërinsopita, ya'ipiya Yosë chinotapi.

"Ma noyacha Tata Yosëso paya. Hua'anëntarinpoa' ni'ton, 'Yosparinquën' itahua'. Inasáchin natéahua'. Noya noya ni'ton, chinotahua'. Ya'ipiya nanitaparin. Carniroa'huanta' inapochachin chinotahua'. Ipora quëra huarë' ina natéahua', tosapi.

¹⁴ —Naporinchi paya. Tëhuëñchachin inasáchin natéahua', topi catapini ma'sharo'sa pochin nininsopitanta'. Ansiano'santa' isonahuatona', chinotapi.

6

To'ni i'shorinso'

¹ Yosë nohuanton, hua'narëso pochin niantarahuë. Quirica so'nanpinan nininso' quënantarahuë, canchisë to'niquë achinpítérinso'. Naporo' Carniroa'huari ya'nan achinpítérinso' i'shotérin. I'shotohuachina, a'na ma'sha pochin nininso' chiniquën nonin, huira pochin natanahuë.

—¡Huëquë huachi! itérin.

² Itohuachina, cahuario ya'norin, ni'nahuë, huiríchin nininso'. Ina aipi quëmapi huënséarin. Pë'chinan quëparin. Piyapi'sa' yaminsérin ni'ton, hua'an pochin yancotétaton, pa'sarin minsëcaso marë'.

³ Ina quëran a'na to'niquë achinpítérinso' i'shotantarín. I'shotantahuachina, a'na ma'sha pochin nininsoarinta' pérantarín.

—¡Huëquë huachi! itérin. ⁴ Itohuachina, nisha cahuario ya'norin, quëhuashin nininso'. Ina aipi a'na quëmapinta' huënséarin. Panca sahuëni së'quëarin. Chiniquën nanan ya'huëterin quira nicacaso marë'. Ina nohuanton, isoro'paquë na'a piyapi'sa' niahuéatona', nitéparapi. Nisha nisha parti quira nisapi. Co huachi noya ya'huapihuë'.

⁵ Ina quëran a'na to'niquë achinpítérinso' i'shotantarín. I'shotantahuachina, a'na ma'sha pochin nininsoari pérantarín.

—¡Huëquë huachi! itohuachina, yara cahuario ya'norin, ni'nuahuë. Quëmapi ina aipi huënsérinso' paransa së'quérin cosharo' pë'tënacaso marë'. ⁶ Naporor' catapini ma'sharo'sa' huancánachin, noninso' natanahuë:

—Ya'ipi cosharo' na'con pa'tarin. A'na tahuérira' i'huaquë huarë' sacatopirinahuë', a'na quiroichin trico pa'anapi. Inapochachin a'na cosharonta' pahuanarin. Sipataso' trico pochin niponahuë', co ina pochin pa'topirinhuë', inanta' pa'tarin. A'na tahuérira' i'huaquë huarë' sacatopirinahuë', cara quiroichin pa'anapi. Toma', huino, inapitanta' pahuanarin. Ni'cona chiniatama', ténin.

⁷ Ina quëran a'na to'niquë achinpítérinso' i'shotantarín. Nani catapini i'shotérin. Ina i'shotohuachina, a'na ma'sha pochin nininsoari pérantarin, ya'natomarinso'.

⁸ —¡Huëquë huachi! itohuachina, a'na cahuarionta' ya'noantarin, sha'píchin nininso'. Quëmapi ina aipi huënsérinso', Chimirin itopi. Ina nohuanton, na'a piyapi'sa' chiminapi. Notohuaro' chiminatona', chimipiro'sa' ya'huépique pa'sapi. A'naquë niahuëatona', nitéparapi. A'naquë tanari tēpaarin. Naporahuaton, chiniquën caniori masarin ni'ton, na'a piyapi'sa' chiminapi. Tanan ni'niro'sarinta' tēparapi. Inapoatona', patoma patoma pochin piyapi'sa' chiminapi. Cacharonquë un cuarto itopi.

⁹ Ina quëran a'na to'niquë achinpítérinso' i'shotantarín. I'shotantahuachina, artaro Yosë chinotacaso marë' acorinso' inápaquë ni'nuahuë. Inaanaquë na'a imapisopita chimpisopita quënanahuë. Nanpipona', nónya imapi. Co tē'huatonaraihuë', Yosë nanamén a'chinpi. Ina marë' tēpapi. ¹⁰ Tēpahuachinara, hua'yanëna' inápaquë ya'huécontarahuatona', Yosë nontápi.

—Quëma Sinioro chini chiniquën nanantérán. Noyasáchin nicaton, no'téquën nonan. ¿Onporo huarëta' oshahuano'sa' ana'intaran? Téparinacoiso marë' no'téquën ana'intacaso' ya'huérin, tosapi.

¹¹ Napotohuachinara, Yosëri itérin:

—Ninataco'. Oshaquëran ana'intarahuë. Co tahuéri naniyatérarinhuë'. A'napita imarinacosopita ipora huanta' pënëntapi. A'naquë tēpaantahuachina', iséquë chachin huéantapi anta'. Naporor' tēparinënquëmasopita no'téquën ana'intarahuë, itérin. Itahuaton, huiríchin a'mocaiso' quëtérin. Noyápiachin cancantopi ni'ton, huiríchin a'motérin.

¹² Ina quëran a'na to'niquë achinpítérinso' i'shotaantarin. Inarë' nani saotaro' i'shorin. Inapotohuachina, panca ococua pa'sarin. Pi'i tashiaton yaráchin nisarin. Yoquinta' co huachi a'pianihuë'. Nincoan huë'saponahuë', quëhuashin huënai pochin nisarin. ¹³ Naporahuaton, tayloraro'santa' anotapi. Iquirra nara nitérinso' canora niponahuë', panca ihuan pa'pachina, notohuaro shitatérinso pochin nisapi. ¹⁴ Pi'iro'tënta' capa nisarin. Quirica so'nanëso pochin co huachi ya'noarinhuë'. Naporahuaton, motopiro'sa', so'tono'sa', inapitanta' nacon nacontatona', itopa itopa nichíhuincapi. ¹⁵ Ya'ipi piyapi'sa' pa'yanahuatona', ta'arapi. Copirnoro'sa', hua'ano'sa', sontaro hua'ano'sa', ma'huano'sa', chiniquëno'sa', inapita Yosë tē'huatatona', ta'arapi. Motopi'pa' ta'arahuatona', na'pi nanino'saquë ya'conapi na'picaiso marë'. Patrono'sa' piyapinënpitarë chachin panca na'pianaro'saquë na'pirapi. ¹⁶ Ya'ipi piyapi'sa' tē'huatatona', motopi nontapirinahuë':

—Panca na'piro'sa' notarintatona', ya'copiinacoi ama Yosë quënanaincoiso marëhuë'. Inápaquë hua'anéntarin. Carniroa'huanta' chiniquën no'uirincoi. ¹⁷ Nani ana'intacaso' tahuéri nanirin. Ana'intohuachincoi, co insonta nanitarinhuë ina chinitacaso', tosapi.

parti huaniarin. A'nanta' pi'i ya'coninso' parti huaniarin. Huancanachionta' cato' ninotérapi. Inaquépita Yosëri acorin isoro'pa' ana'intacaiso marë'. Oshaquéran Yosë no-huanton, ana'intapi. Pi'pisha pahuanarin ni'ton, anquéniro'sari ihuan ya'copirapi ama marëquë, isoro'paqué inaquépita ma'sha onpocaiso marëhuë'. Ama nararo'sa térranta' oyanacaiso marëhuë' ya'copirapi. ² Ina quérana'nanaya a'na anquéninta' ya'noantarin. Pi'i pipirinso' parti quérana huë'sahuaton, hua'na'huaya quësarín Tata Yosë marcanén acocaso marë'. Inaso' catapini anquéniro'sa' sha'huitérin:

³ —Ama apiramiáchin ana'intocosohuë'. Ninataco Yosë piyapinénpita catahuai. Co Yosë marcanén acochátéraraihuë'. Të'yainaqué acotéra'piapoi. Nani acotohuatoi, ya'ipiro'pa', marë, nararo'sa', inapita ana'intoco', itiirin.

⁴ Ina quérana tē'yainaqué Yosë marcanén acotéra'piapi a'napitari nohuitacaiso marë'. Notohuaro' acoté'yatéra'piapi. Pichirahuaton:

—Pasa catapini shonca catapini huaranca acotérai, tēnin, natanaahuë. Ya'ipi Israiro huéntono'saqué napotérin. ⁵⁻⁸ Shonca cato' huéntono'sa' ya'huérin, israiro'sa' itopiso'. Nisha nisha nininsopita ya'huépi: Cota, Nopino, Caro, Asiri, Nipitari, Manasisi, Simion, Nihui, Isacaro, Saporono, Cosi, Mincamin, inanapo huéntono'sa' ya'huérin ni'ton, shonca cato huaranca, shonca cato huaranca acoté'yatéra'piapi.

Huiríchin a'mopiso'

⁹ Ina quérana hua'narëso pochin niantarahuë. Hua'huayatérahuë' piyapi'sa' Yosë'pa' quénanahuë. Co pichicasohuë'. Nisha nisha piyapi'sa' Yosë hua'anéntacaso' shiranén noténanqué huaniapi, nisha nisha nananqué nonpisopita. Nisha nisha parti quérana huécatona', Carniroa'huaya yamotatona', notérapi. Inapitaso' huiríchin a'mopi. Mérémë pochin nininso' së'quérahuatona', Yosë chinotapi.

¹⁰ "Tata Yoséíchin nicha'érinpoa'. Inasáchin hua'anéntérinpoa'. Carniroa'huaya anoya-cantérinpoa'. ¡Ma noyacha inaso paya!" tosapi chiniquén nonatona'.

¹¹ Inaqué Yosë chachin hua'anéntacaso' shiranénqué huénséarin. Ansiano'sa', catapini ma'sharo'sa pochin nininsopita, inapitari tancapitopi. Ina tahuirinqué notohuaro' anquéniro'sa' huaniapi. Chinotopiso' natanaahuatona', inapitanta' isonahuatona', Yosë chinotapi:

¹² "Téhuéñchachin Sinioro, piyapi'sa' nicha'érán. ¡Ma noyanquéncha quëmaso paya! Ya'ipiya chinochinénqué. Ya'ipi nitotérano. Chini chiniquén nanantaton, ya'ipiya nanitaparan ni'ton, ya'ipi natéinénqué. 'Yosparinquén,' ichinénqué. Na'con natémiatarainqué. Co onporonta' a'poarainquénuë'. Amen," itapi.

¹³ Ina quérana a'na ansiano nataninco.

—¿Ma piyapi'sata' isopita, huiríchin a'mopiso'? ¿Intohua quéranta' huéntapi? ¿Nitotérano ti? itérinco.

¹⁴ —Co caso' nitotérahuë'. Quëma nitotéranso'. Sha'huitoco canta' nitochi, itohuatéra, sha'huitérinco:

—Isopitaso' chiniquén parisitaponaraihuë', co Yosë a'popihuë'. Carniroa'huari huénainén quérana anoyacancantérin ni'ton, huiríchin a'mopi.

¹⁵ Napoaton Yosë ya'huérinqué huéntapi. Tahuériré chachin tashiré chachin ina chinotapi. Yosëri ichiya'huéaton, ni'sarin. ¹⁶ Co huachi tanaponahuë', co yamoroponahuë'. Co pi'iri picahuachin, parisitaponahuë'. Noya ya'huéintarapi. ¹⁷ Ni'co'. Hua'anéni ohuicanénpita noya a'paiarin. Quéchitérahuaton, noya ii' a'notérin o'ocaiso marë'. Inapochachin Carniroa'huari imapisopita a'paiarin. Yosë'pa' noya noya nanpiapi. Yosëri chachin na'nëi' amitarin ni'ton, co huachi sëtaponahuë', itérinco.

¹ Ina quëran hua'narëso pochin niantarahuë. A'na tahuëri ma'sha onpocaso' a'notantarínco, ni'nuhüe. Ipora huanta' Carniroa'hua quirica së'quëarin. Nani saota to'niquë achinpítérinso' i'shotérin. A'naíchin pahuanarin i'shocaso'. Naporó' a'naíchin nininsö' i'shotarin. I'shotohuachina, ya'ipiya copica topi. Miria ora pochin co manta' nonpihuë'. ² Ina quëran canchisë anquëniro'sa' quënanahuë. Yosë notënanquë huanirapi. Inaquë huanihuachinara, a'naya a'naya tronpita quëtopi pihuicaiso marë'. ³⁻⁴ Co'huara pihuiyatérasoihuë', a'na anquëninta' huëcaton, Yosë chinotopiquë artaroa'huaya notënanquë huaniconin. A'pétinan oro quëran nininsö' së'quërin. Inaquë na'a yonarin pochin pimóchin nininsö' acorin panca tomontacaso marë'. Yosë ya'huërinquë chachin tomontarin. Tomontérinso pochin Yosë imapisopitanta' ina nontápi. "Ma noyanquëncha quëmaso paya. Nani tahuëri catahuacoi, Sinioro," itohuachinara, noya natanin. ⁵ Ina quëran anquëni Yosë artaronënquë ya'caritahuaton, na'a pénaya' manin. A'pétinanquë acorahuaton, isoro'paquë të'yatérin. Të'yatohuachina, a'naroáchin huira pochin natanahuë. Chiníquën ténentérin. O'corinta' huënsa huënsa'tarin. Naporahuaton, panca ocohua pa'nin. (Nani huachi Yosëri ana'intarin, ténahuë.)

Tronpita pihuijiso'

⁶ Naporó' canchisë anquëniro'sa' tronpita yapihirapi. Co napopianachin pihuiapihuë'. A'naya a'naya pihuirapi.

⁷ Ya'nan pihuirinso' irinpachina, Yosë nohuanton, ocai', pén, inapita inápa quëran anotarin. Huënairë chachin anotarin. Pancana huiquitarin. Patoma pochin huiquitarin. [Cacharonquë un tercero, topiso'.] Nararo'sa', panpatéro'inapitanta napochachin huiquitarin.

⁸ Ina quëran a'na anquëninta' tronpita pihuiantarin. Pihuiantahuachina, panca motopi pochin nininsö' ni'nuhüe. Pén pochin orotérimarín. Yosë nohuanton, marëquë anoitérin. Inaquë anotohuachina, patoma pochin marë huënai taranin. ⁹ Patoma pochin ma'sharo'sa' inaquë ya'huërinso' chiminpi huachi. Panca nancharo'santa' patoma pochin ta'huantopi.

¹⁰ Ina quëran a'na anquëninta' pihuiantahuachina, panca tayora anotarin, panca orotérinso'. Anotohuachina, Yosë nohuanton, patoma pochin iiro'sa' tapiarin. ¹¹ Ina tayloraso' Main itopi. Tëquëin, i'shaa'huaro'sa', inapita patoma pochin main nisarin. Máin ni'ton, notohuaro' piyapi'sa' ina o'otona', chiminapi.

¹² Nani cara anquëni pihuirin. A'nanta' pihuiantahuachina, Yosë nohuanton, patoma pochin pi'i tapiarin. Yoqui, tayloraro'sa', inapitanta' patoma pochin tapiapi. Napoaton tahuëri nipachina, co huachi pi'i noya a'pianihuë'. Tashinta' yoqui, tayloraro'sa', inapita co huachi noya a'pianpihuë'.

¹³ Ina quëran panca onian quënanahuë. Inápaquë a'ninquëchin yanponarin. Piyapi pochin noninsö' natanahuë.

—¡Ma'huantacha nisapi paya! Yosë a'popi ni'ton, piyapi'sa' chiníquën parisitapona'. A'napita anquëniro'sa' pihuiantahuachina, isoro'paquë ya'huëpisopita aquë aquëtë' parisitapona', ténin.

9

¹ Ina piquëran a'na anquëninta' pihuiantahuachina, tayora anotérinso pochin a'nanta' o'marin. Yosë nohuanton, chiníquën nanan ya'huëtérin sopairo'sa' oncorapirinso' parti i'soatacaso marë'. Nanin acoporo' pa'ninsö' i'soatarin. ² I'soatoohuachina, acopo quëran conai' pipiarin. Yaráchin tomontarin. Panca pén quëran tomontérinso pochin pipiton, pi'i ya'copiarin. Ya'ipi parti tashiarin. ³ Naporahuaton, conai quëran notohuaro' sopairo'sa' pipiapi. Panca sëquërë pochin ya'norahuatona', pipiapi. Pa'pi të'huatoro'. Sëquërë pochin níponaraihuë', yonpinca pochin huitapi. ⁴ "Ama panpatéro', nara mono', nitérinso'

inapita pë'yacosohue'. Piyapi'sa' co Yosë marcanën të'yainquë ya'huëtohuachinarahuë', inapita aparisitoco", itérin. ⁵ Co tëpaponaraihuë', a'natérápo yoqui pochin aparisitapi. Yonpincari huininso pochin níponahuë', co sanoaponahuë'. Pa'pi iquin natanaponaraihuë', co chiminaponahuë'. ⁶ Na'con parisitatona': "Chimiin nipachin," tosapirinahuë', co chiminaponahuë'. Chiminacaiso' nohuantopirinahuë', co nanitapihuë'.

⁷ Panca sëquérë pochin ya'notona', chiníquën pa'sapi. Cahuarioro'sa' quira nicacaiso marë' tapapiso pochin pa'sapi. Yancotë pochin oro quëran nininso' yancopi. Naporahuaton, piyapi pochin ni'topi. ⁸ Aihuan ni'ton, sanapi pochin aintapi. Pa'pini' pochin natëtopi. ⁹ Sha'huëtëonta' tachiton. Hua'na pochin ni'ton, co ohuanchináchinhue'. Pa'pachinara, anpiantëna quëran chiníquën tënëntërapí. Quira toronano'sa' cahuarioro'sari ohuararinso pochin tënëntapi. ¹⁰ Naporahuaton, yonpinca pochin hui'notopi. Iquin huitatona', a'natérápo yoqui pochin aparisitapi. ¹¹ Hua'anën ya'huëtérin anta'. Inari camairinso', sopairo'sa' oncorapirinso' parti quëran huë'nin. Cocio nananquë Apatono itopiso'. Crico nananquë Aporiono itopi. Tiquitona'pi tapon naporin.

¹² Na'con parisitacaiso' ninoton, nani a'notérinco. Ina ni'pirahuë', na'con na'con parisitacaso' ya'huapon. Catoro' aparisitacaso' pahuanarin nica'huaso'.

¹³ Yosë nohuanton, nani a'natérápo anquëniro'sa' tronpita pihuipi co noyahuë' nípisopita ana'intacaiso marë'. Ina quëran a'na anquëninta' pihuiantahuachina, inápaquë nontérinso' natanahuë. Artaroa'huaya pomonënpita huáncana quëran nontaton, pihuítóna'pi itapon: ¹⁴ "Catapini anquëniro'sa' i'quiritéquë pa'ina' piyapi'sa' aparisitacaiso marë'. Panca i' yonsanquë nani ninarapiso', Iyopiratisii' itopiquë," itérin.

¹⁵ Itohuachina, anquëniro'sa' a'parin piyapi'sa' ana'intacaiso marë'. Iráca inaquë acopirinhue'. Nani ora nanirin ni'ton, a'parin huachi patoma pochin piyapi'sa' tëpacaiso marë'. ¹⁶ Ina quëran hua'huayátérahuë sontaro'sa' huë'sapi, ni'nuahuë. Cahuarioro'sa aipi huënsériapi. "Cato pasa michon huë'sapi," ténin, natanahuë.

¹⁷ Hua'nareso pochin a'ninquéchin quënanahuë. A'na tahuëri ma'sha onpocaso' quënantarahuë. Hua'na coton sontaro'sa' a'mopiso pochin a'mopi. Pënsa pochin huënaráchin nipi. A'naquën caninchin. A'nanta' sha'píchin. Cahuarioro'santa' nisha ya'nopi. Pa'pini' pochin mototopi. Nanamën quëran pën, conai', sha'pi mo'shi', inapita pipiapi. ¹⁸ Cahuarioro'sa nanamëna quëran inapita pipirahuatona', patoma pochin piyapi'sa' tëparapi. Notohuaro' chiminapi. ¹⁹ Nanamëna quëran tëparapi. Huinamëna quëraonta' ya'huan pochin quëtëtatona', tëparapi.

²⁰ Na'a piyapi'sa' chiminpirinahuë', co naporor têranta' a'napitaso' yonquiapihuë'. Ni'saponaraihuë', inachachin co noyahuë' cancantapi. Aquëtë chachin sopairo'sa' chinotapi. Nisha nisha mamansi moshapi. Oro quëran, prata quëran, hua'na quëran, na'pi quëran, nara quëran, ina quëranpita nípiso'. Co inapitaso' quënantopihuë', co natantopihuë', co iratopihuë'. Co nanopirinahuë', mosharapi. ²¹ Pa'pi co noyahuë' cancantatona', têpatapi, pënotapi, monshihuanapi, ma'sha ihuatapi. Yosëri ana'intérinso' ni'sáponaraihuë', co naporor têranta' nohuantapihuë' oshanëna' a'pocaiso'.

10

Quirica'huaya oporininsò'

¹ Ina quëran hua'nareso pochin a'na anquëninta' niantarahuë, chiníquën nanantérinso'. Chitoro' huancana inápa quëran o'mararin. Motën yahua'tani tahuitérin. Ya'pirin pi'i pochin a'pinin. Tonainta' pën pochin ya'noarin. ² Quirica'huaya së'quérin. So'nanpinan nípirinhue', nani oporininsò' së'quérin. O'marahuaton, inchinan nantëñ quëran marëquë i'naitarin. Ahuënan nantëñ quëran isoro'paquë i'narin. Panca masho ni'ton, naporin. ³ Chiníquën nanantaton, chiníquën nonsarin. Pa'pini' përarinsò pochin natanahuë. Përapachina, inápa quëran canchisë huira pochin nininsopitari a'panipi. ⁴ Nonpachinara, natanato quiricaquë yaninshitopirahuë', inápa quëran

a'na sha'huitérinco: "Ama naporinso' ninshitéquësohuë'. Co a'napita sha'huitacaso' ya'huérinhue', " itérinco.

⁵ Naporor' panca anquëni marëquë, no'paquë inaquëpita i'narino' inchinan tanpaquën anquontarin. ⁶ "Yosë ni'sárinco ni'ton, co nonpinahuë'. Inaso' iráca quëran huarë' ya'huaton, co onporonta' ayaponhuë'. Isoro'pa', marë, pi'iro'të', ya'ipi ya'huérinsopita inari ninin. Téhuëñchachin co huachi hua'qui quëranhuë' ana'intomiatarin. ⁷ A'naíchin anquëni pahuanarin tronpita pihuicaso'. Ina pihuantahuachina, oshahuano'sa' ana'intahuaton, ya'ipiya Yosëri hua'anëntarin. Piyapi'sa' inahuara co nitotapihuë'. Iráca quëran huarë' Yosë nohuanton, pënëntona'piro'sa' ninopirinahuë', ipora huarë' nanirin. Inimiconënpita ana'intahuaton, hua'anëntarin," ténin panca anquëni.

⁸ Ipora huanta' a'na nantën quëran marëquë i'naitarin. A'na quëraonta' no'paquë i'narino. Ina quëran inápa quëran nontérincoso' itantarino:

—Paaton, quirica'huaya së'quërinso' ma'paquë', ⁹ itohuachincora, pa'sahuato,
—Quirica'huaya quëtoco, itérahuë.

—Noyahua'. Macaton, ca'quë'. Ninoi pochin cashin ca'saran. Napoaponahuë', nani ni'ipatan, main nisarin, itérinco.

¹⁰ Quirica'huaya masahuato, ca'nahuë. Ninoi pochin cashin ca'pirahuë'. Nani ni'ipatéra, main natanahuë. ¹¹ Ina quëran sha'huitérinaco:

—Na'a piyapi'sa' pënëntacuquë'. A'na tahuëri ma'sona onpocaiso' Yosë anitotarin-quën. Nisha nisha piyapi'sa', nisha nisha nananquë nonpisopita, copirnoro'sa', inapita ma'sona onpocaiso' Yosë ninoton, anitotarinquën ninshitamaso marë', itérinaco.

11

Catoya'pi Yosëri a'parinso'

¹ Ina quëran mitro pochin nininso' quëtérinaco a'nica'huaso marë'.

—Yosë chinotopiso pëi' a'niconquë'. Artaronta' a'niquë'. Nani a'nihuatan, piyapi'santa' Yosë chinotopisopita onposona ya'huëpiso' nitotacaso marë' pichiquë'.

² I'ratëso niperinhuë', ama a'niquësohuë'. Inaquë nisha piyapi'sa' ya'conapi. Co Yosë imaponaraihuë', inaquë ya'conahuatona', tapirapi. Yosë ninanonëonta' tapirapi. Cara pi'ipi miria pochin napotapi. ³ Naporor tahuëri'sa' cato' quëmapi a'pararahuë pënëntacaiso marë'. Yaa'pahuato, chiníquën nanan quëtarahuë no'tequën sha'huicaiso marë'. Piyapi'sa' na'con oshahuani ni'ton, cato' quëmapi sétapi. Sétatona' sa'catën nininso' a'mosapi piyapi'sa' oshanëna' ayonquicaiso marë'. Cara pi'ipi miria pënëntapi, itérinco Yosë.

⁴ Catoya'piso' nöya pënëntapona', Yosëri chachin a'parinso'. Panca nanparino'sa' orotérinso pochin nicatona', Yosë nanamën anitotapona'. Oripo nara pochin nipi anta', Yosë notënanquë ya'huérinso'. ⁵ Yosë nohuanton, sacai' nininsopita nanitapapi. A'napitari yatëpahuachina', nanamëna quëran pën pipiarin. Pipihuachina, yatëpapisopita huëyarapi. Huëyarahuatona', chiminapi. Ina pochin Yosëri catastuarin ni'ton, minsëapi. ⁶ Iráca pënëntona'piro'sa' nani ma'sha nipi piyapi'sa' ayonquicaiso marë'. Inapochachin catoya'pi Yosëri a'parinso', nani ma'sha nanitapaapi. Yosë nontahuachina', co o'nanaponhuë'. Inapotatona', pënëntapona'. Téquëionta' non-tahuachina', huënai' taranapon. Ina quëran Yosë nohuanton, nisha nisha canioro'sa' acorapi Yosë yonquicaiso marë'. ⁷ Nani ya'ipi noyá pënëntohuachina', co huachi aquëtë' pënëntacaso' ya'huaponhuë'. Naporor ma'sha pa'pi té'huatoro nininso' ya'noarin. Acoporo' quëran huë'sarin. Huë'sahuaton, cato ya'pi ahuëquiarin. Ina quëran minsërahuatón, tépararin. ⁸ Quirosarinquë chachin tépararin. Inaquë iráca Quisosonta' tépapi. Inaquë ya'huëpisopita pa'pi co noyahuë' cancantopi. Sotomaquë, Iquipitoquë inaquëpita ya'huëpisopita pochin cancantatona', oshahuancaisoáchin yonquipi. Catoya'pi tépahuachina', cachiquë té'yatapi. Co pa'pitapihuë'. ⁹ Cara tahuëri miria pochin nisha

nisha piyapi'sa', nisha nisha nananquë nonpisopita inapitari ni'sapi. Nicaponaraihuë', co nohuantapihuë' pa'pitacaiso'. ¹⁰ Tëpapi ni'ton, capa cancantatona', pita nisapi. Ma'shanënanta' topinan a'naya a'naya niquëtapi. "Hua'qui' pënénatonpoa', apininpoo' nipurinhue', iporaso' nani chiminpi," ta'tona', capa cancantapi. ¹¹ Cara tahuëri miria napoápirinahuë', a'nanaya Yosë nohuanton, nanopiantarahuatona', huanintarapi. Piyapi'sari ni'sahuatona', pa'pi të'huatapi. ¹² Naporo' inápa quëran nontérinso' natanapi.

—¡Iséquë huëntaco huachi! itarin. Napotohuachina, inimiconënpitari nicasoi', catoya'piso' inápaquë paantapi. Chitororë chachin paantapi. ¹³ Naporo chachin panca ocohua pa'sarin. Pa'pachina, notohuarro' pëiro'sa' ohuatarin. Canchisë huaranca piyapi'sa' chiminapi huachi. A'napitaso' pa'pi të'huatapi. "Yosë nohuanton, naporin. ¡Ma'pitacha nanitaparin paya!" tosapi.

¹⁴ Nani catoro' parisitapiso' ni'nahuë. Shiarahuaton, a'nanta' a'notantarinc. Hua'narëso pochin ni'nahuëso' sha'huichinquëma'.

Ya'natontarinso' pihuirinso'

¹⁵ Ina quëran ya'natontarinso' anquëninta', pihuiuantarin. Pihuihuachina, inápaquë chiníquën nonsapi, natanahuë.

"Iráca quëra huarë' na'a copirnorro'sa' ya'huëpirinahuë', iporaso' Yosëri ya'ipiya hua'anëntarin. Quisocristorë chachin hua'anëntomiatarin. Co onporonta' pipiapihuë', tosapi.

¹⁶⁻¹⁷ Cato shonca catapini ansiano'santa' Yosë'pa' ya'huëpiso' isonahuatona', Yosë chinotapi:

"Yosparinquëen, Sinioro. Quëmasáchin ya'ipi nanitaparan. Iráca quëran huarë' ya'huaton, ipora huanta' nanopiaran. Chini chiníquën nanantaton, ya'ipi hua'anëntaran.

¹⁸ Nisha nisha piyapi'sa' no'huirinënquënsopita ana'intaran. Ya'ipi chiminpisopitanta' no'tequëna ana'intaran. Imarinënquënsopitaso nipurinhue', acanaaran. Inso téranta' natëhuachinquëen, inápaquë quëpaaran. Hua'ano'sa', topinan piyapi'sa', inapita imapachinënquëen, acanaaran. A'napitaso nipurinhue' piyapi'sa' aparisitatona tëpapi ni'ton, chiníquën ana'intaran," itapi.

¹⁹ Ina quëran hua'narëso pochin nicasoco, Yosë pëinën inápaquë ya'huërinso' ni'soatérin ni'nahuë. Iráca chinotopiso pëi acohuan Yosë caposonën ya'huërin. Ina pochin nininso' inápaquë ni'nahuë. Nicasoco, o'coritérin, tënëntérin, huiratérin, ocohua pa'nin, ocai' anotérin, naporin. Yosë chiníquën nanantérin ni'ton, naporin.

12

Panca ya'huan pochin ya'norinso'

¹ Ina quëran Yosë nohuanton, hua'narëso pochin niantarahuë ayonquiinpoaso marë'. A'na sanapi inápaquë quënanahuë. A'morinso' huënaráchin huënaráchin. Pi'i pochin a'pinin. Nantéanaquë yoqui ya'huërin. Shonca cato' tayloraro'sari yancotë pochin motën tahuitérin. ² Inaso' cayoron. Nani yahuaiarin ni'ton, chiníquën iquitaton, parisitárin. ³ Ina quëran a'na ma'sha inápaquë ya'norin, niantarahuë. Panca ya'huan pochin niponahuë', ina quëran panca panca ninin. Quëhuashin nisahuaton, canchisë motën ya'huëterin, shonca pomohuanin. A'naya a'naya motënquë hua'an pochin yancotë yancorin. ⁴ Huinamën quëran inápaquë huihuicontahuachina, tayloraro'sa' a'tëntontarahuaton, isoro'paquë të'yatimarin. Patoma pochin të'yatimarin. Ina quëran hua'narëso pochin quënantarahuë. Panca ya'huan pochin nininso' pa'nin. Sanapi notënanquë huaniarin. "Huaihuachin, hua'huin matahuato, ca'sarahue," ta'ton, ninararin. ⁵ Ninaso', huairin. Quëmapia'huaya huairin. Inaso' chini chiníquën nanantaton, a'na tahuëri ya'ipi piyapi'sa' hua'anëntapon. No'tequëna ana'intapon ni'ton, ya'huani yatëparin. Ina marë' ninarápirinhue'. Nani nasitohuachina, Yosëri nicha'érin.

Ya'huérinqué chachin quëpantarín ichihua'anéntacaso marë'. ⁶ A'shinso nípirinhuë', co piyapi ya'huérinquéhuë' ta'arin. Inaquë Yosëri nani tapatérin ya'huëcaso marë'. Cara pi'ipi miria pochin inaquë ya'huarin ni'ton, cosharo' quëtapi.

⁷ Ina quëran hua'narëso pochin niantarahuë. Inápaquë quira nisapi. Anquëni hua'an Miquiri itopiso' anquënинénpita camairin panca ya'huan pochin nininso' minsëcaiso marë'. Inanta' anquëniro'sa' camairinsopitarë chachin ahuëtopirinahuë', ⁸ co nani-topihuë' minsëcaiso'. Miquiri anquënинénpitari minsërahuatona', isoro'paquë a'paimapi. ⁹ Inapotatona', panca ya'huan pochin nininso' inápa quëran të'yatopi. Inaso' sopai chachin, Satanasë itopiso'. Ya'ipi piyapi'sa' yanopintérin. Ina minsërahuatona', anquëniñénpitarë chachin isoro'paquë të'yatopi.

¹⁰ Ina quëran inápaquë chiníquënon nininso' natanahuë.
"Téhuénchachin sopai yaminsépirinpoahuë', Yosë nicha'érinpoa'. Quisocristorë chachin hua'anéntarinpoa'. Sopairi Yosë nontaton, na'con sha'huirapirinpoa'. 'Oshahuani,' itéra'piarinpoa'. Tahuérirë chachin tashirë chachin sha'huirapiápirinpoahuë', nani Yosëri minsérin.

¹¹ Carniroa'huachiminaton, huénainen quëran anoyacancantérinpoa' ni'ton, sopai minséröhua'. Nanamën sha'huitatéhua', minséröhua'. Yatépapirinénpoahuënta', co a'poréhuahuë', tosapi.

¹² Napoaton inápaquë ya'huëpisopita noya cancanchina'. Ya'ipiro'paquë, marëquë, inaquëpita ya'huëpisopitaso nípirinhuë', parisitapi. ¡Ma'huantacha nisapi paya! Sopai pa'sárin minsëcaso marë'. 'Co hua'quiya quëranhuë' Yosë ana'intarinco,' ta'ton, chiníquënon no'huitérin. No'huitaton, piyapi'sa' yaminsérin."

¹³ Ina quëran Yosë nohuanton, hua'narëso pochin niantarahuë. Ya'huan pochin nininso' nani isoro'paquë të'yatopi. Të'yatohuachina, sanapi huairinso' aparisitapirinhuë', ¹⁴ Yosëri catahuarin cha'écaso marë'. Panca onian pochin anpiantéhuanaton, ta'arin. Co piyapi ya'huérinquéhuë' pa'sahuaton, cara pi'ipi miria pochin inaquë na'piarin. Yosë nohuanton, ma'sha ya'huérin capacaso'. ¹⁵ Chiníquënon no'huiton, ya'huani yamapirinhuë'. Nanamën quëran panca ii' pipirin. Téquëin pochin pipirin sanapi quëpacaso marë'. ¹⁶ Ii' të'yatopirinhuë', no'pa' huéncharohuachina, ya'ipiyananquirin. Co chimiitérinhuë'. ¹⁷ Napoaton sopairi chiníquënon no'huirin. No'huiton, pa'nin a'napita hua'huinpita ahuëpon. Yosë natëpisopita tēpacaso marë' pa'nin. Quisoso imasapi ni'ton, aparisitarin. ¹⁸ Ina yonquiaton, marë yonsanquë huaniarin.

13

Ma'sha marë quëran pipirinso'

¹ Ina quëran hua'narëso pochin niantarahuë. A'na ma'sha pa'pi të'huatoro' nininso' marë quëran pipiarin. Canchisë motohuan nisahuaton, shonca pomonën ya'huétérin. A'naya a'naya pomonënqué yancotë' ya'huétérin. Hua'an pochin chiníquënanantérin ni'ton, naporin. Motënaquë nininénpita nani ninshitérin, Yosë pinorinso'. "Yosë quëran chini chiníquënanantérahuë," ta'ton, ninshitérin. ² Yarani pochin niponahuë', tocani pochin nantétérin. Nanamënsö' pa'pini pochin nanantérin. Panca ya'huani chachin chiníquënanan quëtapon ni'ton, chiníquënanantaton, copirno ya'conapon. ³ A'na motën ahuëtohuachina', chiminatë pochin niponahuë, noyatantarín. Noyatohuachin, ya'ipi piyapi'sa' pa'yanapi. Pa'yatatona', imasapi. ⁴ Panca ya'huan chinotatona', acorinsonta' chinotapi. Notohuaro' piyapi'sa' ina yonquiatona', natëapi: "Ma noyacha inaso paya. Chini chiníquënanantarin. ¿Incarita' nanitérin ina minsëcaso'?" tosapi.

⁵ Sopai nohuanton, ma'sha marë quëran pipirinso' na'con Yosë pinosarin. "Yosë quëran chini chiníquënanantérahuë. Co ina chinotacaso' ya'huérinhuë'," tosarin. Sopairi catahuarin ni'ton, copirno ya'conarin. Chini chiníquënanantarin ni'ton, ya'ipi copirnoro'sa' camaiarin. Cara pi'ipi miria ya'ipiyananquirin. ⁶ Na'con

Yosë pinosarin. “Caso' Yosëco,” toconapon. Yosë ya'huérinsonta' nocanarin. Inaquë ya'huérinsopitanta' pinosarin. ⁷ Yosë imapisopita co quë'yarinhue'. Sopai nohuan-ton, aparisitarin. Quira nisahuaton, canatarin. Notohuaro' piyapi'sa' nisha nisha parti ya'huépisopita hua'anéntarin. Nisha nisha nananquë nonpisopita hua'anéntarin. ⁸ Hua'huayatérahuë' piyapi'sari natëapi. Carniroa'hua imapisopitaíchin co ina chino-tapihuë'. Inaso' a'na quirica ya'huétérin. Nanpirin quirica itopiso'. Inaquë nininénpita nani ninshitérin. Isoro'pa' ninin quëran huarë' imapisopita ninoton, inaquë ninshitérin. “Canpoa marë' Carniroa'hua chiminin,” ta'tona', ina imasapi. A'napitaso nimirinhue' co nanpirin quiricaquë nininénpita ya'huérinhue' ni'ton, ma'sha marë quëran pipirinso' chinotapi.

⁹ Huératéhuapatama', noya natanatoma', yonquico'.

¹⁰ “Mapachinéñquëma', parisitacaso' ya'huérin. Sahuéniquë yatépahuachinéñquëma', ahuantacaso' ya'huérin. Ina yonquiatoma', chiniquën cancantoco'. ‘Yosë catahuarinpoa’, ta'toma', imamiatoco’.”

Ma'sha no'pa quëran pipirinso'

¹¹ Ina quëran hua'narëso pochin niantarahuë. A'na ma'shanta' no'pa quëran pipi-rinso' ni'nuhüe. Carniroa'hua pochin cato' pomona'huaya ya'huétérin. Noya ya'noaponahuë', panca ya'huan pochin chiniquën nonsarin. ¹² Inanta' chiniquën nanantapon. Chiniquën nanantaton, ya'ipi piyapi'sa' camaiarin ma'sha marë quëran pipirinso' chinotacaiso marë'. Inaso' motën ahuétohuachinara, chiminatë pochin niplonahuë', noyatantariso' ni'ton, piyapi'sari chinotapi. ¹³ Ma'sha no'pa quëran pipirinsonta' nani ma'sha nanitaparin piyapi'sa' nonpintacaso marë'. Ina nohuanton, pën inápa quëran anotarin. Piyapi'sa' ni'térantapaquë napoarin. ¹⁴ Nisha nisha acoarin, sacai' nininso'. Ma'sha pa'pi tê'huatoro' nininso' ni'tonéñquë naporin. Piyapi'sari ni'pachina': “Téhuéñchachin inaso' Yosë,” tosapi. Notohuaro' piyapi'sa' nonpintarin. Ina quëran itapon: “Panca mamansi niahua'. Sahuéniquë ahuéatona' shitépapirinahuë', noyataan-tariso' nonanatéhua' chinotahua'”, itohuachina', nisapi. ¹⁵ Ina quëran aquëtë chachin piyapi'sa' nonpintarin. Ina nohuanton, mamansi nanpirinso pochin ya'noarin. Non-inso pochin natanapi. “Insosona co moshahuachincohuë' têpaco'”, tosarin. ¹⁶ Ina quëran camariantarin. “Marca niacotacaso' ya'huérin. Tê'yamaquëhuë niperon, inchinan imiramaquëhuë niperon niacotoco'. Hua'ano'sa', topinan piyapi'sa', ma'huano'sa', sa'ahuaro'sa', patrono'sa' piyapinéñpitare chachin, ya'ipiya niacotacaso' ya'huérin. Co a'naya téranta' pahuantacaso' ya'huérinhue'”, tosarin. ¹⁷ Co marca niacotohuachinahuë', co huachi nanitapihuë' ma'sha pa'anatona' canacaiso'. Co pa'anacaiso téranta' nanitapi-hue'. Ma'sha marë quëran pipirinso' marcanen niacotéra'piapona'. A'naquën nininéñ chachin niacotapi. A'naquën nimirinhue' nomironen niacotapi. ¹⁸ No'tequën yon-quiamaquë huarë' nomironen nitotarama'. “Piyapi niplonahuë', inasáchin natéröhua'”, ta'tona', saota pasa shonca saota niacotapi.

14

Pasa catapini shonca catapini huaranca cantapiso'

¹ Ina quëran hua'narëso pochin niantahuato, Carniroa'hua quénantarahue. Sion motopique' huaniarin. Inarë' pasa catapini shonca catapini huaranca piyapi'sa' ya'huapi, ni'nuhüe. Imapi ni'ton, ina nininéñ niacotë'yatopi. Tata Yosë nininéonta' niacotopi. ² Ina quëran inápaquë chiniquën ténentérinso' natanahuë. Panca so'pora pochin ténentarin. Chiniquën huira pochin natanpirahuë', arparo'sa' pi'niatona', naporapi. ³ Nasha cantanen inápaquë cantarapi. Yosë noténanquë cantarapi. Ansiano'sa', catapini ma'sharo'sa pochin nininsopita, inapitanta' natanapi. Pasa catapini shonca catapini huaranca imapisopita cantapiso'. Isoro'paquë ya'huapona', Quisosori nicha'érin. Oshanëna

marë' chiminaton, anoyacancantérin ni'ton, inapitaráchin nanitopi ina cantacaiso'.
⁴ Noyápiachin cancantapi. Co pi'pisha térranta' monshihuana'pi pochin cancantopihuë'. Yoséíchin yonquiapi. Inséquésona Carniroa'hua pa'pachin, imasapi. Isoro'paqué ya'huépirinahuë', nani Yoséri nicha'érin. Ya'nan cayarinsso macaté' Yosé quétérëso pochin nícatona', inasáchin chinotapi. Nani tahuëri Carniroa'huanta' chinotapi. ⁵ Co pi'pisha térranta' nonpinpihuë'. Noyápiachin cancantapi.

Cara anquéniro'sa' pa'sapiso'

⁶ Ina quëran a'na anquéninta' quénanahuë. Inápaqué yanponarin noya nanan sha'huicaso marë'. Nisha nisha piyapi'sa', nisha nisha nananqué nonpisopita, ya'ipiya sha'huitarin.

⁷ —Yosé té'huatatomá', natëco'. Ana'intacaso' tahuëri nani naniriarin ni'ton, inasáchin imaco'. Ya'ipi isoro'pa', inápaqué ya'huérinso', marë, iiro'sa', ya'ipiya ninin ni'ton, chinotoco', itarin anquéniri chiniquën nontaton.

⁸ Ina quëran a'na anquéninta' paaton, sha'huirarin:

—Iráca na'a oshahuano'sa' Papironiaqué ya'huépi. Panca ninano' nípirinhuë', Yosé nohuanton, ta'huantopi. Inapita pochin cancantopisopita ya'huantapirinahuë', Yoséri ana'intarin. Pa'pi co noyahue' yonquiatona', na'a piyapi'sa' anishacancantopi ni'ton, ta'huantapi. Noyá ta'huantapi, ténin.

⁹ Ina piquëran a'na anquéninta' paaton, chiniquën nonsarin.

—Ama ma'sha pa'pi té'huatoro' nininso' natëcosohuë'. Ama mamanshinëñ moshacosohuë'. Té'yamaqué marcanëñ yaacotarinquëma' hua'anëntinquëmaso marë'. Ama natëcosohuë'. Ina chinotohuatama', Yosé ana'intarinquëma'. ¹⁰ Chiniquën no'huitenquëma', main huino o'shitérëso pochin ana'intarinquëma'. Parisitopiquë a'pahuachinquëma', pënqué parisitarama'. Carniroa'hua, anquéniro'sa' inapita ni'térantapaqué no'tequén ana'intarinquëma'. ¹¹ Co onporonta' pën tacopiaponhuë'. Inaquë conainta' tomontápon. Parisitápona. Co sanoarinhüe'. Insopitasona ma'sha pa'pi té'huatoro' nininso' natëtona', mamanshinëñ moshahuachina', tahuérirë chachin, tashirë chachin chiniquën parisitápona'. Co marcanëñ niacotacaso' ya'huérinhuë', ténin.
¹² Ina yonquiatoma', chiniquën cancantoco'. Yosé nanamëñ natëtoma', Quisocristo imamiatoco'. Aparisitopirinéñquëmahuë', ama a'pocosohuë'.

¹³ Ina quëran inápa quëran noninso' natanahuë:

—Apira sha'huichinquën ninshitéquë': Insosona Sinioro imarinso marë' chimin-pachina, noya cancanchina', ténin. Ina quëran Ispirito Santo tapon:

—Téhuéñchachin Yosé'pa' pa'pachina', chinotapi. Yosé marë' sacatopi ni'ton, inápaqué canapi huachi, ténin.

Piyapi'sa' mapiso'

¹⁴ Ina quëran hua'nareso pochin niantahuato, chitoro' quénanahuë, huiríchin nininso'. Inaquë a'nsa' huënséarin, piyapi pochin ya'norinso'. Chiniquën nanantaton, oro quëran nininso' yancorin. Imirin quëran nisha sahuëni së'quérin nitérinso' macacaso marë'.
¹⁵ Naporó' anquéní Yosé pénén quëran huë'nin. Huécaton, sha'huitiarin:

—Nani ora nanirin, maqué huachi. Trico noya cayahuachina, a'naroáchin sahuéniquë manë'. Inapochachin iporaso' ora nanirin piyapi'sa' macacaso marë', itérin. ¹⁶ Itohuachina, manin. Cayarinsso' manëso pochachin manin huachi.

¹⁷ Ina quëran a'na anquéní ya'huérë Yosé ya'huérin quëran pipiantarin. Inanta' nisha sahuëni ya'huétérin, inéshin nininso'. ¹⁸ A'na anquéninta' Yosé chinotopi quëran huë'nin. Inari pën ni'sarin ora nanihuachin, ana'intacaso marë'. Huécaton, sha'huitérin:

—Nani ora nanirin isoro'pa' ana'intacaso marë'. Opa cayahuachina, manëso pochachin a'naroáchin maqué', itérin anquéniri.

¹⁹ Itohuachina, a'naroáchin co imapisopitahuë' manin ana'intacaso marë'. Yosëri chiníquën no'huiton, no'tequën ana'intarin. ²⁰ Ni'co'. Oparo'sa' mapachinara, ninano aipiran quëparapi. Inaquë panca nanopiquë to'poipi. Opai' pipihuachina, quëhuain ninin. Huënai pochin ya'norin. Inapochachin ana'into huachina, panca huënai' pa'sarin, ni'nuhüe. Cara pasa quiromitro pochin pancaitérinso'. Cahuario motën ya'cari huarë' anpotarin huachi.

15

Canchisë anquëniro'sa' ana'intacaiso marë' acorinso'

¹ Ina quëran Yosë nohuanton, hua'narëso pochin niantarahuë. A'na tahuëri os-hahuano'sa' chiníquën ana'intarin. Ina anitotincoso marë' nani ma'sha a'notérinco. Pa'pi huëhuëpiro' ni'nuhüe. Canchisë anquëni ya'huarin. A'naya a'naya Yosëri yaa'parin piyapi'sa' ana'intacaso marë'. Ina nohuanton, isoro'paqué nani ma'sha onpocaiso' ya'huapon. Inapoaton, ana'intérinso' naniarin.

² Co'huara anquëniro'sa' pa'shaterasoihuë', inápaqué panca sono' niantarahuë. Isihuico pochin niponahuë', huënaratarin. Pëñ pochin ya'norin. Sono yonsanquë na'a piyapi'sa' quënanahuë, ma'sha pa'pi të'huatoro' niniso' minsëpisopita. Isoro'paqué ya'huapona', co mamanshinën moshapihuë'. Co marcanën niacotopihuë'. Parisitaponaraihuë': "Yoséichin imarai," ta'tona', imamiatopi. Iporaso' Yosë'pa' ya'huatona', noya ya'huërapi. Arparo'sa' Yosëri quëtérin pi'niatona' cantacaiso marë'. ³ Iráca Moisésë Yoséichin natëton, inimiconënpita minsërahuaton, cantarin. Inapochachin isopitanta' cantarapi. Carniroa'hu cantarinsonta' cantarapi.

"¡Ma noyanquënta, Siniro, quëmaso paya! Ya'ipi nanitaparan. Ma noyacha catahuarancoi paya. Chiníquën nanantaton, noya ninan. Noya hua'anëntaton, no'tequën ana'intérin. Co onporonta' nonpinanhüe'. Ya'ipi piyapi'sa' natëinënquë."

⁴ Ya'ipiya Siniro të'huachinënquë. Ya'ipiya yonqui'inënquë. Quëmasáchin nóyanquë. A'na tahuëri no'tequën oshahuano'sa' ana'intaran ni'ton, nisha nisha piyapi'sa' huëcatona', chinotarinënquë," topi cantatona'.

⁵ Ina quëran Yosë chinotopiso pëi' inápaqué ya'huërinso' ni'soatérin, ni'nuhüe. Acoana Yosë caposonën ya'huërinquë chachin quënanahuë. ⁶ Canchisë anquëniro'sa' ina quëran piyapi. Huiríchin huiríchin a'mopi. Të'teténquë oro pochin nininquë nitonpopi. Piyapi'sa' oshahuanpi ni'ton, Yosëri a'paarin nisha nisha aparositacaiso marë'. ⁷ Ina marë' canchisë minëro'sa pochin niniso' ya'huërin, oro quëran nipiso'. A'nara' ma'sha pochin niniso' minëro'sa' masahuaton, anquëniro'sa' quëtérin. "Paatoma', minëro'saquë ya'huërinso' të'yanantoco'. A'naya a'naya të'yanantohuatama', Yosëri chiníquën ana'intarin huachi," ta'ton, a'naya a'naya quëtérin. Yosëso' co onporonta' chimianinhüe', ni'sáripoa'. ⁸ Noya noya ni'ton, ya'ipi nanitaparin. Ina të'huataciso marë' conai pochin niniso' tomontarin. Ya'ipi Yosë chinotopiso pëi' inápaqué ya'huërinso' yanquëétérin. Co insonta' nanitérinhuë' inaquë ya'conacaso'. Nani piyapi'sa' ana'into huachina, naporu huarë' noya ya'coantapi.

16

Minëro'saquë ya'huërinso' të'yanantopiso'

¹ Naporu' chinotopiso pëi' inápaqué ya'huërinso quëran chiníquën noniso' natanahuë. —Piyapi'sa' ya'huërinquë paatoma', minëro'saquë ya'huërinso' të'yanantoco'. Të'yanantohuatama', parisitapi. Pa'pi co noyahue' cancantopi ni'ton, Yosëri chiníquën no'huiton, ana'intarin, itérin anquëniro'sa'.

² Ina natanahuaton, a'nara' pa'nin. Isoro'pa' nocorahuaton, minëquë ya'huérinsö' të'yanantérin. Të'yanantohuachina, na'a piyapi'sa' panca ta'tarapi. Sëncopi pochin pipitëra'piapona'. Co noyatochináchinhue' nisapi. Ma'sha pa'pi të'huatoro' nininso' imapiso-pita parisitapi. Marcanën niacotopi ni'ton, Yosë nohuanton, ta'taráchin nisapi. Mamanshinënta' moshapi ni'ton, parisítápona'. A'na tahuëri ma'sha onpocaso' ninoton, a'notérinco, ni'nahue'.

³ Ina quëran a'na anquëninta' paaton, minëquë ya'huérinsö' marëquë të'yaitarin. Inaqué të'yaitohuachina, huënai' taranarin. Chimipi huënainën pochin anën nisarin. Napoaton ya'ipi marëquë ya'huérinsopita taquiapi.

⁴ Ina piquëran a'na anquëninta' pa'nin. Minëquë ya'huérinsö' iro'saquë të'yaitohuachina, inapitanta' huënai' taranarin. Tëquëin, i'sharo'sa', inapita napoapi.

⁵ Napohuachina, anquëni ii' a'pairinsoari Yosë nontaton tapon:
“No'tequë Sinioro ana'intaran. Iráca quëra huarë' ya'huaton, ipora huanta' nanpiaran.
Noyasáchin ninan.

⁶ Na'a imarinënsopita tëpapi. Noya pënëntopirinahuë', tëpapi ni'ton, i'huérëtaton, ana'intaran. Iiro'sa' huënai' atarantérän ni'ton, ina têranta' o'ocaiso' ya'huérin. No'tequëna ana'intaran,” itérin.

⁷ Artaro quëraonta' noninso' natanahuë: “Tëhuëñchachin Sinioro quëmasáchin ya'ipi hua'anëntérän. Chini chiníquënan antataton, no'tequënonan. No'tequëna ana'intaran,” ténin.

⁸ Ina quëran a'na anquëninta' pa'nin ana'intacaso marë'. Minëquë ya'huérinsö' pi'iquë të'yanantohuachina, pi'i chini chiníquën pi'catarin. Pën pochin pi'cataton, piyapi'sa' chiníquën aparisitarin. ⁹ Panca huëyaponaraihuë, co nirotapihuë'. Yosë no'huitona', pinosapi: “Sopai pochin cancantaton, aparisitarinpoa' ni'sora,” tosapi. Parisitaponaraihuë', co nohuantapihuë' oshanëna' a'pocaiso'. Co Yosë yayonquiapihuë'.

¹⁰ Nani catapini anquëniro'sari ana'intapona' pa'pi. Ina quëran a'nanta' ma'sha marë pipirinso' ya'huérinquë pa'nin. Hua'anëntacaso' shiranënquë chachin paaton, minëquë ya'huérinsö' të'yanantarín. Të'yanantohuachina, ya'ipiya tashiarin. Piyapi'sa' chiníquën parisitatona', tarëtapi. ¹¹ Yosëso' chini chiníquënan antopirinhuë', piyapi'sari ta'taráchin nicatona', no'huipi. “Pa'pi co noyahue' ni'ton, aparisitarinpoa'”, topi pintonona'. Co naporon têranta' oshanëna' yaa'poapihuë'.

¹² Ina quëran a'na anquëninta' pa'sahuaton, minëquë ya'huérinsö' panca i'quë të'yaitérin, Iyopiratisii' itopiquë. Inaqué të'yaitohuachina, panca' niponahuë', huinquin-tomatón, yaniromarin. Copirnoros'a' noya pëntonacaiso marë' yaniromarin. Pi'i pipirin parti quëran huë'sapi quiranacaiso marë'.

¹³ Ina quëran panca ya'huan pochin nininso' niantarahuë. Ma'sha marë quëran pipirinso', nonpin nanan pënëntona'pi, inapitanta' niantarahuë. Cara chachin nanamëna quëran cara sopairo'sa' pipipi, inpo pochin ya'nopiso'. ¹⁴ Sopairo'sa' ni'ton, nani ma'sha nanitapapi. Sacai' nininsopita nisapi piyapi'sari natëcaiso marë'. Non-pintatona', napoapi. Nisha nisha copirnoros'a' camaira'piapona' quiranacaiso marë'. Ana'intacaso' tahuëri nani ya'caritériarin ni'ton, niyontonapona'. “Canpoari Yosë minséahua'”, ta'tona', napoapona'. ¹⁵ Nani Quisoso sha'huitérinpoa': “Ni'co', iyaro'sa'. A'nanaya o'mantararahuë. Ihuatë pochin nicato, co nitotasëñquëmahue', o'mantararahuë ni'ton, nani tahuëri ninaco. Noya ninahuatamaco, noya cancantarama'. Yosë noya ni'sarinquëma'. Noyápiachin a'morëso pochin noyasáchin nico'. Ina quëran o'mantahuato, co tapanapomahuë'. Noya cancantarama'”, itérinpoa'. ¹⁶ Ana'intacaso' tahuëri ya'caritohuachin, na'a copirnoros'a' ayontonapi quiranacaiso marë'. Armaquitono itopiquë niyontonapi. Cotio nananquë napopiso'.

¹⁷ A'naíchin anquëni pahuanarin pacacaso'. Ina pa'sahuaton, minëqué ya'huérinso' tē'yanantarin. Ihuanquë tē'yanantohuachina, inápaquë Yosë chinotopiso pëi quëran chiníquën nonin. Hua'anéntérinso shiranëñ quëran “jnani huachi!” tosarín.

¹⁸ Napohuachina, o'coritarin. Huira pochin chiníquën ténéntarin. Naporó' panca ocöhua pa'sarin. Iráca quëran huarë' co onporonta' ina pochin pa'chinihuë' níponahuë', napoarin. ¹⁹ Co Yosë natëpisopitahuë' ya'huépique' nocharotarin. Panca ninano' níponahuë', huéncharoaton, cararo'té huarë' niacoarin. Nisha nisha ninanoro'saquë ta'huantapi. Co Yosëri naniantérinhuë' ana'intacaso'. Papironiaquë na'a piyapi'sa' ya'huépirinahuë', co noyahue' nicacaisoráchin yonquipi ni'ton, ana'intérin. Ínapochachin a'na tahuëri chiníquën no'huiton, ata'huantarin. ²⁰ Naporó' motopiro'sa', so'tono'sa', inapita co huachi ya'huaponahue'. ²¹ Inápa quëran ocai' anotapon. Panca masho ni'ton, quëquëñ. Catapini shonca quiro pochin quë'ninso'. Na'a anotohuachin, piyapi'sa' chiníquën parisitapi. Napoaton Yosë chiníquën no'huitona', pinosapi huachi.

17

Monshihuana'pi pochin nininso'

¹ Ina quëran a'na anquëni minë' së'quëna'pi nininso' huécapairahuatonco, itérinco: “Huëquë' pa'a piyapi'sa' ana'intacaso' ya'huérinso' a'nochinquëñ. Pasëquë a'na sanapi panca iiro'sa' aipi huënséárin. Inaso' pa'pi co noyahue'. Monshihuana'pi pochin piyapi'sa' anishacancantérin. ² Ya'ipi copirnoro'sa' ina natétona', co noyahue' nisapi. Monshihuaninso pochin cancantatona', Yosë naniantapi. Piyapinénpitanta' ina imatona', co noyahue' nicacaisoáchin yonquiapí,” itérinco.

³ Itohuachincora, hua'narëso pochin niantarahue. Ispirito Santo nohuanton, co piyapi ya'huérinquëhuë' quëparinco. Inaquë co noyahue' sanapi ni'nuhüe. Ma'sha pa'pi tē'huatoro' nininsonta' quënanahuë. Iporaso' quëhuanen ya'norin. Canchisë mototahuaton, shonca pomon ya'huétérin. Nisha nisha nininëñ ya'huétérin, Yosë pinorinso'. Ya'ipi nonënquë ninshitéra'piarin. Ina aipi sanapi huënséárin. ⁴ Inaso' noyápiachin a'moponahuë', co noyahue' cancantérin. A'morinso' pa'ton ninin. Quëhuashin, quëhuanen, inapita a'morin. Naporahuaton, oro, na'pia'huaya pa'ton nininsopita, inapita pë'tenin. Monshihuana'pi pochin nitaparin. Minë' oro quëran nininso' së'quërin. Inaquë taparo' nininsoráchin ya'huérin. O'shitérinso pochin na'a piyapi'sa' anishacancantérin. Ano'pirin, amonshihuanin, napotérin ⁵ Nininëñ pochin nininso' tē'inquë ninshitopi. Ninshitopirinahuë', ma'ta' tapon naporinso' co piyapi'sa' nitotopihuë'.

ISO SANAPISO' PAPIRONIAQUË YA'HUÉPISOPITA POCHIN CANCANTÉRIN. PA'PI MONSHIHUANTE'

NI'TON, INA A'CHININ QUËRAN MONSHIHUANPI. NISHA NISHA CO NOYAHUE' YONQUIPI topi, ninshitatona'. ⁶ Téhuénchachin ina sanapi pa'pi co noyahue' cancantérin. Quisoso imapisopita co quë'yarinhue'. “Quisoso imarai,” topachinara, atépatérin. Notohuaro' atépatahuaton, no'pirinso pochin pa'yatérin. Ina nicato, panca pa'yanahuë.

Ina quëran anquëni itérinco: ⁷ “¿Onpoatonta' pa'yananso”? Caringuëñ anitochinquëñ. Sanapi, ma'sha ina aipi huënsérinso' inapita ma'sona tapon naporinso' a'chinchinquëñ nitotéquë'. Ina ma'shaso' canchisë mototahuaton, shonca pomonëñ ya'huétérin. ⁸ Iráca isoro'paquë ya'huérin. Iporaso' co ya'huérinhuë'. A'na tahuériso nípirinhuë' ya'noantarin. Acoporo' quëran huéntarin. Ayaro' tahuëri nanihuachin, parisitopique' pa'sarin. Nípirinhuë', co'huara pa'sháterasohue', a'nanaya ya'noantahuaton, piyapi'sa' a'payanarin. Co Quisoso imapihuë' ni'ton, pa'yanapi. Quisoso imapi naporini, iráca quëran huarë' nininénpita nanopirin quiricaquë ninshichitonhuë'.

⁹ No'tequëñ yonquiaquë huarë' ma'sona tapon naporinso' nitotarama'. Ma'sha canchisë motohuaninso', canchisë motopi tapon naporin. Ina aipi sanapi huënsérinso'. Naporahuaton, canchisë copirnoro'sa' ayonquirinpoa'. ¹⁰ A'natérápo nani iráca hua'anéntéra'piapirinahuë', chimina'piapi. Iporaso' a'nari hua'anéntantarín. A'naíchin

pahuanarin ya'ipiro'pa' hua'anëntacaso'. A'na tahuëri ya'noarin. Nipirinhue', co hua'qui' hua'anëntaponhuë'. ¹¹ Ina piquëran ma'sha pa'pi të'huatoro' nininsoari hua'anëntapon. Nani canchisë copirnoro'sa' ayaponahuë', inapita pochin nica-ton, hua'anëntapirinhue', a'na tahuëri Yosëri ocoiarin. Ocoirahuaton, parisitopiquë a'pararin.

¹² Shonca pomontërinso pochin shonca copirnoro'sa' ya'huapona'. Inapitaso' co hua'anëncatérapihuë'. Tahuëri nanihuachin, nisha nisha piyapi'sa' hua'anëntapona'. Naporo chachin ma'sha pa'pi të'huatoro' nininsonta' hua'anëntapon. Napoaponahuë', co hua'qui hua'anëntapihuë'. ¹³ Shonca copirnoro'saso' napopianachin yonquiatona', ma'sha pa'pi të'huatoro' nininso' natëpona'. Piyapinënpitanta' camaiapona' ina natëcaiso marë'. ¹⁴ Inapitaso' Carniroa'hu yaminséatona', quira nisapirinahuë', co nanitapihuë' minsécaiso'. Ínari minséapon. Inaso' Quisocristo chachin. Chini chiníquën nanantarin ni'ton, ya'ipiya hua'anëntarin. Inasáchin natëcaso' ya'huérin. Piyapinënpitari imasapi. Yosëri huayonin ni'ton, natëmiatapi," itérinco anquëni.

¹⁵ Ina quëran a'chintaantarino.

—Panca iro'santa' ni'nán, ina aipi sanapi huënsérinso'. Inanta' a'chinchinquëñ nitotëquë'. Inapochachin a'na tahuëri nisha nisha piyapi'sa' ya'huapona', nisha nisha nananquë nonpisopita. Hua'huayatérahuë' ya'huapona'. Nisha nisha copirnori hua'anëntérinsopita. ¹⁶ Oshaquëran shonca copirnoro'sa', ma'sha pa'pi të'huatoro' nininso', inapita co huachi sanapi nohuantapihuë'. No'huirahuatona', masapi. Masahu- atona', ai'nanpiratapi. Chiníquën aparisitatona', tëparapi. Ina quëran ahuiquitapi. ¹⁷ Yosë nohuanton, copirnoro'sa' yonquiaipi ma'sha të'huatoro' nininso' natëcaiso marë'. Napopianachin yonquiatona', co noya sanapihuë' nininso' ata'huantapi. Yosë no- huantérinso chachin nisapi. ¹⁸ Sanapi panca iiro'sa' aipi huënsérinso pochin panca ninano' ya'huapon. Ya'huéhuano'sa' pa'pi co noyahuë' cancantapi. Na'a piyapi'sa', copirnoro'sa', inapita anishacancantapona' ma'sharáchin yonquicaiso marë'. Yosë a'pocaiso marë' yanopintapi. Nonpintápirinahuë', Yosë nohuanton, ata'huantapi anta'.

18

Papironia ta'huantérinso'

¹ Ina quëran a'na anquëninta' inápa quëran o'mararin, ni'nahuë, chiníquëñ nanantérinso'. Huénaráchin ni'ton, isoro'pa' a'pintërin. ² O'marahuaton, chiníquëñ nonin.

“Nani huachi Papironia ta'huantarin. Panca ninano' niponahuë', ta'huantarin. Inaquë nisha nisha sopairo'sa' ya'huapona'. Nisha nisha chanaro' ca'téro'santa' inaquë pa'sapi.

³ Papironiaro'sari notohuar'o' piyapi'sa' anishacancantopi. Ina pochin cancantatona', copirnoro'sa', piyapinënpita, inapita co noyahuë' nisapi. Monshihuaninso pochin nicatona', Yosë naniantopi. Ma'huano'santa' inaquë pa'anatona', nani ma'sha canapirinahuë'," ténin anquëni.

⁴ Ina topachina, inápa quëran a'nari itérin:

—Ya'ipi imaramasopita pënënaranguëma', natanco. Ni'cona papironiaro'sa' anishacancantochinënquëma'. Ina quëran pipiramaso pochin nicatoma', ama inapita pochin cancantocosohue'. Co noyahuë' nipatama', Yosë ana'intarinquëma' canpitanta'. ⁵ Na'con oshahuani ni'ton, co Yosëri naniantarinhuë' ana'intacaso'. ⁶ A'napita aparisitopi ni'ton, no'tequëñ ana'intacaso' ya'huérin. Na'con na'con i'huérëtacaso' ya'huérin. Pa'pi co noyahuë' nipi. ⁷ Pita nicacaisoáchin cancantopi. Ma'sharáchin yonquiatona', a'napita nocanpi ni'ton, Yosëri aparischin. Iporaso' cancanëna quëran yonquirapi. “Quiyaso' nóya ya'huéräi. Hua'an pochin nicatoi, co manta' pahuantérincoihuë'. Co quëyoron pochincoihuë'. Co onporonta' sëtaraihuë'” topirinahuë'. ⁸ A'nanaya Yosëri ana'intarin

huachi. Na'a piyapi'sa' caniopona', sëtapona', tanarotapona', napoapona'. Yosëri chini chiníquën nanantaton, ana'intarin. Ahuiquitarin.

⁹ Nisha nisha copirnoro'santa' anishacancantérinsopita sëtapona'. Huiquitérinso' nictatona', na'nëpona'. Yosëri ana'intohuachin, na'nëpona'. ¹⁰ Aquë quëran quënanpachina', pa'pi të'huatapi.

“¡Ma'huantacha ninin paya! Papironia panca ninano' niponahuë', a'naroáchin ata'huantopi. Yosëri ana'intérin,” tosapi.

¹¹ Ma'sha pa'ana'piro'santa' sëtatona', na'nëpona'. Nani ma'sha pa'anacaso marë' ya'huëtopirinahuë', co huachi insoari téranta' pa'antaponhuë'. ¹² Notohuaro' oro, prata, na'pira'huaya pa'ton nininsopita, morin, sita, caninë'mëtë', quëhuanë'mëtë', inapita ya'huëtopirinahuë', co incari téranta' pa'antarinhuë huachi. Nisha nisha pimonontéro'sa', huiripomon quëran ma'sha nipsisopita, nontéro'sa' pa'ton nininsopita quëran ma'sha nipsis', sha'píhua'na, hua'namia, huirina'pi, ina quëranpita ma'sha nipsis ya'huérin.

¹³ Nisha nisha pimoanacaso marënta' ya'huérin. Canina, nisha nisha cosharo' apimotacaso' nininsopita, yonarin pochin pimóchin nininso', pimo yaqui', pimo hua'sai', huino, toma', arina, trico, inapita ya'huérin. Ohuacaro'sa', ohuicaro'sa', cahuarioro'sa', toronano'sa', inapitanta' ya'huérin. Piyapiro'santa' pa'anapi asacatacaino marë'. Piyapi chachin nipsisinhuë', ma'sharo'sa pochin yapa'anpi. Notohuaro' ma'sha ya'huëpirinhuë', co huachi pa'anapihuë'. ¹⁴ Ya'huéhuano'sa' itapona':

“Huayoro'sa' nayaramaso' capa ninin. Na'a ma'sha ya'huëtopirinënquëmahuë', capa nisarin. Co huachi noya ya'huapomahuë”, tosapi.

¹⁵ Ma'sha pa'ana'piro'sa' na'con canapirinahuë', sëtapi huachi. Të'huatatona', aquë quëran notérapí. Na'nëpona pochin ¹⁶ itapona':

“¡Ma'huantacha ninin paya! Panca ninano' niponahuë', ta'huantérin. Sanapi noyápiachin a'morinso pochin nipsisinhuë', co huachi ya'huërinhuë'. Morin, caninë'mëtë', quëhuanë'mëtë', inapita a'mosahuaton, oro, na'pira'huaya pa'ton nininso', inapita pë'pëpirinhuë',

¹⁷ a'naroáchin ma'shanënpitarë chachin ta'huantérin huachi,” tosapi.

Nanchahuano'santa' marë pa'tatona', na'a ma'sha aquë quëran quëpirinahuë'. Inapoatona', na'con canapirinahuë', co huachi pa'sapihuë'. Piyapinënpitanta' inaquë sacata-tona', canapirinahuë', co huachi canapihuë'. Inapitanta' aquë quëran ni'sapi. ¹⁸ Pëiro'sa' huiquitohuachina', panca conaitarinso' quënanapi. Quënanpachina', pa'yanapi. “Co onporonta' a'na ninano' iso pochin ni'chinéhuahuë'. Ma notohuaro' ma'shanënpita ya'huëtopirinahuë', ta'huantopi,” tosapi.

¹⁹ Chiníquën sëtatona', mo'shiquë nipašimototapi. Iráca sëtohuachinara, inachintopiso'. Na'nëpona pochin itapona':

“¡Ma'huantacha ninin paya! Panca ninano' nipsisinhuë', ayarin. Marë nanchaquë pa'tohuatéira, na'a ma'sha pa'anatoi, quënai. Pa'anpatéira, na'con canapiraihuë', a'naromaráchin ma'shanënpitarë chachin ta'huantérin huachi,” tosapi.

²⁰ Ya'ipi inápaquë ya'huéramasopitaso nipsisinhuë', ama ina marë' sëtocosohuë'. Imarama' ni'ton, noya cancantoco'. Aparisitopirinënquëmahuë', nani Yosëri ana'intérin huachi. Ina marë' Quisoso ca'taninsopita, pënëntona'piro'sa', inapitanta' noya cancañchina'.

²¹ Ina quëran hua'narëso pochin niantarahuë. A'na anquëninta' ya'noantarin, chiníquën nanantérinso'. Pancara'pi masahuaton, marëquë të'yaitérin.

“Pancara'pi të'yaitérahuëso pochachin Papironia ta'huantarin. Panca ninano' niponahuë', ta'huantarin. Yosëri chiníquën ana'intarin. Co huachi ya'huaponyahuë'.

²² Iráca na'a arparo'sa' pi'nipi. Pirinano'sa', tronpitaro'sa', inapitanta' pihuipirinahuë', iporasso' co huachi mosica natanapihuë'. Co huachi sacatoro'sa' inaquë sacatapi-huë'. Co huachi cosharo' nipsis' natanapihuë'.

²³ Co huachi nanopara i'chinpiapihuë'. Co huachi inaquë sa'asapihuë'. Iráca notohuar'o' ma'sha pa'ana'piro'sa' inaquë ya'huatona', na'con canapirinahuë', noyá ta'huantapi. Na'con pënnotatona', nisha nisha piyapi'sa' isoro'paquë anishacancan-topirinahuë', Yosëri ana'intarin huachi," ténin.

²⁴ Iráca quëran huarë' inaquë Yosë imapisopita, pënëntona'piro'sa', inapita tëpapi. Ina marë anta' chiníquën ana'intarin huachi.

19

¹ Ina quëran notohuar'o' inápaquë ya'huëpisopita nonsapi natanahuë. Capa cancanta-tona', chiníquën nonsapi:

"¡Ma noyacha Tata Yosëso piyapi'sa' nicha'ërin paya! Chini chiníquën nanantarin ni'ton, ya'ipi piyapi'sari chinochina'.

² Co topinan quëran ana'intérinhue'. Ya'ipiya no'tequë'n ana'intérin. Monshihuana'pi pochin nininso' nani ana'intérin. Inaso' notohuar'o' piyapi'sa' anishacancantérin. Imapisopita tëpapi ni'ton, i'huërëtérin," topi.

³ Ina quëran itantapi:

"¡Ma noyacha Tata Yosëso paya! Co noyahue' nipisopita ana'intérin ni'ton, huiquitapi. Pén co onporonta'tacopiarinhue'. Conainta' tomontápon," tosapi.

⁴ Napohuachinara, cato shonca catapini ansiano'sa', catapini ma'sharo'sa pochin nininsopita, inapitanta' isonahuatona', Yosë chinotapi: "¡Naporinchi paya! ¡Ma noyacha Tata Yosëso paya! Shiranëñqué huënséaton, ya'ipiya hua'anëntarin," tosapi. ⁵ Ina quëran Yosë shiranëñ quëran nonins'o' natanahuë.

"Ya'ipi Yosë imaramasopita ina chinotoco'. Hua'ano'sanquëmahuë nípon, piyap-inënpitanquëmahuë nípon, inasáchin yonquico'. Ina nónya nicatoma' natërama' ni'ton, 'Ma noyanquëncha, Síñoro, quëmaso paya,' itoco'," ténin.

Carniroa'hua sa'acaso' pita nisarindo'

⁶ Ina quëran hua'huayáterahuë piyapi'sa' nonsapiso' natanahuë. Panca so'pora pochin tënëëntarin. Chiníquën huiria ahuëtérinso pochin natanahuë.

"Ma noyacha Tata Yosëso paya. Chini chiníquën nanantaton, ya'ipiya hua'anëntarin.

⁷ Huëco' capa cancantahua'. Noya cancantahua'. Inasáchin noya noya ni'ton, natëahua'. Nani ora nanirin Carniroa'hua sa'arinso pochin nicacaso'. Imapisopitarë' ya'huëmiatarin. Ni'co'. Sanapi yaso'yahuachina, noyápiachin nitaparin. Inapochachin imapisopita nitapacancanpi.

⁸ Huiríchin a'morëso pochin Yosëri noyápiachin cancan quëtérin. Tëhuëñchachin inari catahuarin noya nicacaiso marë'," tosapi.

⁹ Ina quëran anquëni sha'huitérinco ninshita'huaso marë: "Carniroa'hua sa'acaso' pita nininquë përapachinquëma', nónya cancantarama'," itérinco. Ina quëran itaantarínco: "Yosë chachin no'tequë'n sha'huitérinquë'n ni'ton, ina ninshitëquë'," itérinco.

¹⁰ Naporo' isonahuato, yachinotopirahuë'. "Ama chinotocosohuë". Caso' anquëníco. Co Yosëcohüe'. Campita pochachin canta' Yosë natërahuë. Quisoso nanamëñ imarama' ni'ton, Yosëíchin yonquiquë'," itérinco.

Quisoso nanamëñáchin a'chinpatëhua', no'tequë'n pënëntarëhua'.

Quisoso canatérinso'

¹¹ Ina quëran Yosë nohuanton, hua'narëso pochin niantarahue. Pi'iro'të' ni'soatoihuachina, huiria cahuario quënantarahue. Ina aipi quëmapi huënséarin. No'tequë'n nona'pi itérëhuaso'. Ma'sona téranta' sha'huitohuachinpoa', co onporonta' nonpintarinfoahuë'. No'tequë'n hua'anëntarin. Quira nicaton, inimicoro'sa' minséarin.

¹² Ya'pirin pén nénérinso pochin huënaratarin. Na'a yancotéro'sa' oro quëran ninins'o' yancorin. Inaquë a'na nininëonta' ninshitërin, inaora nitotérinso'. ¹³ A'morinso'

huënaiquë a'shitérin. Inaso' Yosë nanamën chachin ninin. ¹⁴ Notohuaro' inápaquë ya'huërinsopitari imasapi, huiríchin a'mopiso'. Inapitanta' huiri cahuarioro'sa' aipi huënséatona', sontaro'sa pochin pa'sapi. ¹⁵ Quëmapi quëchitérinso' nanamën quëran sahuëni pochin nininso' ya'huëtérin. Chiníquëñ nanantaton, nanamën quëran chachin inimiconënpita minsëarin. Noninso' sahuëni pochin nicaton, topinan noncharapirinhuë', co noyahuë' nipesopita minsëarin. Piyapi'sa' no'tëquëñ ana'intarin. Yosëri no'huirin ni'ton, oparo'sa' to'poirëso pochin oshahuano'sa' chiníquëñ ana'intarin.

¹⁶ Aipi a'morinsoquë nani ninshitérin:

ISO QUËmapi CHINI CHINÍQUËN NANANTATON, YA'IPI COPIRNORO'SANTA', HUA'ANËntarin.

INASÁchin NATËcaso' YA'HUËrin

tënin. Tonamëñquënta' ina chachin ninshitérin.

¹⁷ Ina quëran a'na anquëninta' quënantarahuë. Inápaquë pi'i a'pininquë huanirahuaton, soporo'sa' përasarin. Ya'ipi chanaro' ca'téro'sa' chiníquëñ përasarin.

—Huëco' Yosëri ata'huantarinsopita ca'quico'. ¹⁸ Na'a piyapi'sa' chiminapona'. Copirnoro'sa', capitano'sa', chiníquëñ nanantopisopita, inapita chiminapona'. Cahuarionënpitarë chachin ta'huantapona'. Hua'ano'sa' piyapinënpitarë chachin co Yosë imapi-huë' ni'ton, ta'huantapi. Ma'huano'sa', sa'ahuaros'a', inapitanta co cha'ësapihuë', tënin anquëni.

¹⁹ Ina quëran ma'sha pa'pi të'huatoro' nininso' quënantarahuë. Na'a copirnoro'sa' sontaro'sanënpitarë chachin niyontonapi. Huiri cahuario aipi huënsérinso' minsëcaiso marë' quira nisapi. Piyapinënpitanta' yaminsëpirinahuë'. ²⁰ Quira nipachinara, huiri cahuario aipi huënsérinsoari canarin. Canarahuaton, ma'sha pa'pi të'huatoro' nininso' masarin. Nonpin nanan pënentona'pinta', masarin. Inaso', sacai' nininso' nicaton, notohuaro' piyapi'sa' nonpintérin ma'sha pa'pi të'huatoro' nininso' imacaiso marë'. Marcanëñ niacotahuatona', mamanshinëñ moshapirinahuë', minsëarin huachi. Minsërahuaton, cato chachin masahuaton, ana'intomiatarin. Nanpirapirinahuë', parisitopiquë të'yatarin huachi. Inaque' panca sono sha'pimo'shirë chachin pën tënëntápon. Co onporonta' pipiapihuë'. ²¹ Inapita imapisopitanta' ata'huantarín. Inaora nanamën quëran ya'ipiya ata'huantarín. Chiminpachina', chanaro' ca'téro'sari huëcatona', natëaque' huarë' noshinëna' ca'sapi.

20

Huaranca pi'ipi nininso'

¹ Ina quëran a'na anquëninta' inápa quëran o'mararin, ni'nahuë. Panca catina, niahui, inapita së'quërin. Niahuiso' sopairo'sa' oncorapirinso' parti i'soacaso marë' së'quërin. ² O'marahuaton, panca ya'huan pochin nininso' masarin. Sopai chachin inaso'. Iráca quëran huarë' piyapi nonpintérin, Satanásë itopiso'. Ina masahuaton, catinaque' tonporin. Huaranca pi'ipinta' niperinahuë' co ni'quiritarinhuë'. ³ Tonporahuaton, nanin acoporo' nininquë të'yatarin. Nani të'yatahuaton, oncorapiarin. Oncorapirahuaton, noyá pa'pirapitarin ama pipicaso marëhuë'. Huaranca pi'ipi co nanitarinhuë' piyapi'sa' nonpintacaso'. Ina quëran ocoiantapirinahuë', co hua'qui quëranahuë' Yosëri ana'intomiatarin.

⁴ Ina quëran hua'narëso pochin niantarahuë. Na'a piyapi'sa' quënanahuë. Yosëri nani acorin coisë pochin nicacaiso marë'. A'napitanta' ni'nahuë. Isoro'paquë ya'huapona', Quisosoíchin imapi. Yosë nanamën a'chinpi ni'ton, tëpapi. Co ma'sha pa'pi të'huatoro' nininso' chinotopihuë'. Co nonanpiso' mosapihuë'. Co marcanëñ niacotopihuë'. "Quisosoíchin imarai," topachinara, nishitéconotéra'piapi. Inapotopirinahuë', Quisosori ananpitaantarahuaton, ichihua'anëntarin. Huaranca pi'ipi hua'anëntapi. ⁵ Inapita'ton

ananpitaantarin. Ina quëran nani huaranca pi'ipi nanihuachin, a'napita chiminpisopita ananpitaantarin ana'intacaso marë'. ⁶ Quisoso imarëhuasopita'ton ananpitaantarinfoa'. Noya nicatëhua', noya cancantarihua'. Co onporonta' chiminarihuahuë'. Iráca corto hua'ano'sa' ya'huérin Yosë chinotacaiso marë'. A'na tahuëriso nimirihuë', Quisoso imarëhuasopita noya noya chinotarihua'. Huaranca pi'ipi inarë'quënpoa' hua'anëntarihua'.

Sopai hua'an ana'intomiatërinso'

⁷ Nani huaranca pi'ipi nanihuachin, sopai ocoiantarin. ⁸ Ocoiantahuachin, isoro'paquë huënantarin nisha nisha piyapi'sa' nonpintacaso marë'. Ya'ipi parti paaton, notohuaro' piyapi'sa' nonpintarin, Coco, Macoco inapita itopiso'. Inotë pochin co pichicasohuë'. Sopairi nonpintërin ni'ton, niyontonapi quira nicacaiso marë'. ⁹ Nisha nisha parti quëran niyontonahuatona', Yosë piyapinënpita ya'huëpiquë huë'sapi. Huë'sahuatona', ninanonën tancapitapi. Imapisopita yatëpapirinahuë', Yosëri nosoroaton, inápa quëran panca pën a'paimarin. Anotohuachin, no'huipisopita ahuiquitarin. Ya'ipimiáchin ta'huantapi. Yosë imapisopitaíchin cha'ësapi. ¹⁰ Ina quëran sopai ana'intomiatarin. Hua'qui' piyapi'sa' nonpintërin ni'ton, Yosëri ana'intarin. Panca sono sha'pimo'shirë chachin pën orotérinquë të'yatarin. Co onporonta' pipiarinhuë'. Inaquë ma'sha pa'pi të'huatoro' nininsonta' parisitarin. Nonpin nanan pënëntona'pinta' inaquë chachin parisitarin. Tahuërirë chachin, tashirë chachin chiníquën parisitapi. Co onporonta' sanoarinhuë'. Co onporonta' pipiapihuë'.

Ayaro' tahuëri ana'intërinso'

¹¹ Ina quëran panca hua'anëntacaso' shira quënanahuë, huiríchin nininso'. Inaquë Yosë huënséaton, piyapi'sa' ana'intarin. Chini chiníquën nanantarin ni'ton, isoro'pa', pi'iro'të', inapita ta'huantopi. Capa nisarin. ¹² Ayaro' tahuëri nani nanirin ni'ton, ya'ipi chiminpisopita inatohua' huaniápona'. Hua'ano'sa', topinan piyapi'sa', inapita ya'ipiya inaquë pa'sapi. Yosëri ana'intacaso marë' ayontonarin. Naporo' quiricaro'sa' inápaquë ninshítérinso' a'naya a'naya oniriarin. A'naso' nanpirin quirica itopiso'. Inaquë Yosë imapisopita nininënpita nani ninshitopi. A'na quiricanta' ya'huérin. Inaquë ya'ipi ninëhuasopita ninshítérinpoa'. Noya ninëhuasopita, co noyahuë' ninëhuasopita, ya'ipiya nani ninshítérinpoa'. Ina nontaton, Yosëri ana'intarin. ¹³ Ya'ipi piyapi'sa' Yosëri nontarin. Pa'itatona', marëquë chimiitopi quëran huarë' ananpitaantarin no'tëquëñ ana'intacaso marë'. Inséquëso térranta' chiminpisopita ya'ipiya ya'norapi. A'naya a'nayanpoa' nontarinfoa'. Co noyahuë' nipatëhua', no'tëquëñ ana'intarinfoa'. ¹⁴ Chimirin, chiminpisopita ya'huëpiquë, inapita panca sono pën orotárinquë të'yatapi. Inaquë parisitomiatápona'. ¹⁵ Co nanpirin quiricaquë nininënpita ya'huëhuachinahuë' inaquë chachin a'pararin.

21

Nasharo'pa' nininso'

¹ Ina quëran hua'narëso pochin niantarahuë. Nasharo'pa', nasha pi'iro'të', inapita quënanahuë. Yosë nohuanton, isoro'pa' ta'huantapon. Pi'iro'tënta' ta'huantapon. Marënta' co huachi ya'huaponhuë'. Ya'ipiya nasha nisarin. ² Ina quëran noyápiachin ninano' inápa quëran o'mararin ni'nahuë. Yosë ya'huérin quëran o'mararin. Quirosarin pochin niperonahuë', noya noya ninin. Noyápiachin ya'norin. Sanapi so'yacaso marë' nitaparinso pochin noyápiachin ninin. Nasha Quirosarin itopiso'. ³ Inápa quëran chiníquën noninso' natanahuë'.

—Iporaso huachi, Yosë piyapinënpitarë chachin ya'huérarin. Co onporonta' patarinihuë'. Inapitarë' ya'huëmiatarin. ⁴ Yosëri chachin na'nëi' amirayatarin. Co huachi chiminaponahuë'. Co huachi sëtaponahuë'. Co huachi na'nëponahuë'. Co pi'pisha térranta'

iquitaponahuë'. Iráca na'con parisitopirinahuë', co huachi ina pochin ya'huaponahuë'. Noya noya ya'huapona', ténin.

⁵ Ina quëran Yosë hua'anëntacaso' shiranënqué huënsëaton, itérinco:

—Ni'quë'. Ya'ipiya anoyatarahuë. Nashasáchin acoarahuë. No'téquen nontëranquen ni'ton, ninshitëqué'. Ya'ipiya natëtacaiso' ya'huérin, itérinco.

⁶ Ina quëran itantarino:

—Nani ya'ipiya anoyatérahuë. Ca'ton ya'huérahuë. Co'huara isoro'pa' ya'huëyátérasuohuë', ya'huárahuë. A'na tahuërinta' ya'ipi ma'sharo'sa' ta'huantopirinahuë', caso' ya'huápo. Iráca quëran huarë' ya'huárahuë. Co onporonta' ta'huantarárahuë'. Napoaton nontoco catahuainquëma'. Ni'quë'. Chiníquen yamorohuatéra, o'orë'. O'opatéra, chiníquen cancantérë'. Inapochachin canta' catahuaranquëma'. Yamororëso pochin cancantohuatama', nanopirin ii' quëchinquëma' noya cancantacamaso marë'. Caora nohuanto, catahuaranquëma'. Insonquëma tèranta' nohuantohuatamaco, huëco' anoyacancanchinquëma'. ⁷ Sopai minsëhuatama', ya'ipi tapatéränquëmasopita quëchinquëma'. Hui'nahuëpita pochin ni'saranquëma'. Casáchin yonquiaramaco. ⁸ A'napitaso nipurinhuë' parisítápona'. Ayaro' tahuëri na'a piyapi'sa' pënqué pa'sapi. Të'huatona' a'popisopita, co natëpisopitahuë', co natëtochináchinhuë' cancantopisopita, tëpatona'piro'sa', monshihuaninsopita, pënnotono'sa', mamansi chinotopisopita, nonpina'piro'sa', inapita panca sono sha'pimo'shirë chachin pën ténëntápaquë pa'sapi. Inaquë parisítápona'. Huaranca huaranca pi'ipinta' nipurinhuë', co onporonta' pipiapihuë'.

Ninano' inápa quëran o'mararinso'

⁹ Ina quëran a'nara' anquëni huëcapairinco, ana'intacaso marë' minë' quëtopiso'. Huë'sahuaton, itérinco: "Huëquë", nasha ninano' a'nochinquen. Inaquë Carniroa'hua ri huayoninsopita ya'huapona'. Sanapi so'yacaso marë' nitaparinso pochin noyápiachin ninin," itérinco.

¹⁰ Itohuachincora, hua'narëso pochin niantarárahuë. Ispirito Santo nohuanton, panca motopi'pa' quëparinco. Inaquë noya ninano' a'notérinco. Nasha Quirosarin itopiso'. Ina ninanoso' Yosë ya'huérin quëran chachin o'mararin. ¹¹ Yosëso' noya noya ni'ton, ina pochin nicaton, huënaráchin huënaráchin a'pinin. Na'pia'huaya pa'ton nininso pochin huënaratarin. Caspi itopiso'. Isihuico pochin niponahuë', ihua i'huanánshin quënantérë'.

¹² Pairatopiso' inápa masho ninin. Shonca cato' ya'coana ya'huëtérin. A'naya a'naya ya'coanaquë a'na anquëniri ni'sarin. Ya'ipi quëran shonca cato' ya'huëpi. Nisha nisha ya'coanaquë nininén nani ninshitopi. A'naya a'naya israiro'sa' huëntonén ninintérinso'. Shonca cato' ni'ton, ya'ipi ya'coana nanitopi. ¹³ Pi'i pipirinso' parti quëran pairatopiso' cara ya'coana ya'huëtérin. Pi'i ya'coninso' partinta' cara chachin ya'huëtérin. Huancana yonsanquëchin inapochachin cara cara ya'huérin. ¹⁴ Pairatopiso' shonca cato' na'píquë paquëërin, panca nininso'. A'naya a'naya na'píquë Quisoso ca'tano'sanënpita nininénä' ninshitopi. Shonca cato' ya'huérin ni'ton, ya'ipi nanitopi. ¹⁵ Ina ninanoso', pancana. Mitro pochin oro quëran nininso' anquëni ya'huëtérin a'nicaso marë'. Ina masahuaton, a'nirin. Ninano', pairatopiso', ya'coanaro'sa', inapita a'nirin. ¹⁶ Cato huaranca cato pasa quiromitro naporopitérinso'. Inapochachin pancanatérinso' ninin. Inaparinsonta' cato huaranca cato pasa quiromitro inaparin. ¹⁷ Pairatopisonta' a'nirin. Anquëni niponahuë', piyapi'sa' ma'sha a'nipiso pochin a'niton: "Saota shonca a'natérápo mitro ya'huëtérin," ténin.

¹⁸ Pairaso' na'pi pa'ton ninin quëran nipi. Caspi itopiso'. Ina ninanoso' oro quëransáchin ninin. Oro niponahuë', ihua i'huanánshin quënantérë'. ¹⁹ Paire paquëëmarinquë noyápiachin nipi. Nisha nisha na'pi pa'ton nininsopita quëran nipi. Shonca cato' nisha nisha ya'huérin. Ya'natuirinsoso' caninton, caspi itopi. Ina quëran niantarinso' caninchin, sapiro itopi. Ina quëran caninton niponahuë', hui'tonchin

hui'tonchin ninin, acata itopi. Ina piquëran canora niponahuë', caninton pochin ya'norin, ismirarita itopi. ²⁰ Ina quëran quëhuanën nisahuaton, pi'pian huiríton hui'shatérin. Onisi itopi. Ina quëran niantarinsonta' quëhuashin, cornarina itopi. Ina piquërango' sha'pichin, crisorito itopi. Ina quëran caninton, piriro itopi. Ina quëran niantarinso sha'piton, topasio itopi. Ina quërango' crisoprasa itopi. Inanta' caninton chachin. Ina piquërango' caninton niponahuë', pi'pisha pi'pisha quëhuanën ya'huëtérin. Casinto itopi. Ya'natontarinsoso' caninchin, amatista itopi. Ya'ipi quëran shonca cato' ya'huërin. ²¹ Ya'coanaro'santa' noyápiachin. A'naya a'naya panca huirí na'pi quëran nipi. Cachinta' oro quëran chachin ninin. Orosachin niponahuë', i'hua i'huanánshin quënantëre'.

Yosë chachin a'pintarinfoaso'

²² Inaquëso' co Yosë chinotacaso' pëi' ya'huërinhuë'. Yosë chini chiníquën nanantérinso chachin ya'ipi parti ya'huarin. Carniroa'huanta' ya'huarin ni'ton, noya noya chinotarihua'. ²³ Inatohua' pa'patëhua', co huachi pi'i, yoqui, inapita nohuantarihuahuë'. Tata Yosë chachin huënarächin a'pintarinfoa'. Carniroa'huanta' a'pintarinfoa'. ²⁴ Inaquë nisha nisha piyapinfoa' napopianachin yonquiarihua'. Noya a'pintarinfoa'. Nisha nisha copirnoro'santa' isoro'paquë chiníquën nanantaponaraihuë', naporö' Yoséíchin yonquirapi. "Ma noyacha Yosëso' catahuarinfoa paya," tosapi. ²⁵ Inatohua' co huachi tashiarinhuë'. Ya'coanaro'santa' co huachi oncotapihuë'. ²⁶ Naporö' nisha nisha piyapinfoa' noya noya nicatëhua', inaquë ya'huarihua'. "Ma noyacha Yosëso' ni'ton, anoyacancantérinpoa paya," ta'tëhua', inasáchin yonquiarihua'. ²⁷ Noyasáchin inaquë ya'huapona'. Co manta' osha ya'huërarinhuë'. Co noyahuë' nipesopitaso', co ya'conaponahuë'. A'naquënonpinatona': "Imarai quiyanta'," topirinahuë', co inapitaso' ya'conaponahuë'. Carniroa'huai maréhuasopitarächin inaquë ya'huëcontarihua'. Nanpirin quiricaquë nininënpoopita nani ninshitérinpoa'.

22

Nanpirin ii'

¹ Ina quëran Yosë nohuanton, hua'narëso pochin niantarahuë. Nasha Quirosarin niantahuato, anquëni pancai' a'notérinco, noyápiachin nininso'. Inaso', Nanpirin ii' itopiso'. Yosë hua'anëntérin quëran pipirarin. Inaquë Carniroa'huanta' hua'anëntarin. ² Ninano huáncana ii' pa'sarin. Cato yonsan quëran chachin nara papotérin. Nanpirin nara itopiso'. Nani yoqui nitarin. Shonca catoro' nitaso', pi'ipi naniarin. Monoquëonta' ya'ipi piyapi'sa noya ya'huëcaiso marë' ya'huërin. Co huachi canioponahuë'. ³ Inaquë co huachi ana'intinfoaso' ya'huaponhuë'. Tata Yosë Carniroa'huarë chachin hua'anëntarin huachi. Nani tahuëri piyapinënpita ina chinotáparihua'. ⁴ Inaquë pa'patëhua', Yosë chachin nirayarihua'. Inasáchin natëarihua'. Ina piyapinënpita nisarihua' ni'ton, nininëñ të'yaquënpoaquë acotarinfoa'. ⁵ Co onporonta' tashiaponhuë'. Co huachi pi'i nohuantarihuahuë'. Co nanparin térranta' nohuantarihuahuë'. Tata Yoséíchin a'pintarinfoa'. Ichihua'anëntarinpoa'. Co onporonta' pipiarihuahuë'.

Quisocristo o'mantacaso' tahuëri

⁶ Ina quëran anquëni sha'huitérinco: "Iráca quëra huarë' Yosë nohuanton, a'naquënninopi. Iporaso' anquëninëncö a'paimarincö ninoca'huaso marë'. A'notérinquënni'ton, ninshitérin Yosë piyapinënpita nitotacaiso marë'. No'tén nanan nani sha'huitérinquënn. Ya'ipiya natëtacaiso' ya'huërin. Co hua'qui quëranhuë' ma'sha onpoarin," itérinco.

⁷ Quisoso chachinta' naporin: "¡Tëhuëenchachin co hua'quiya quëranhuë' o'mantararahuë! Nani ma'sha anitötérinquënn ninshitacamaso marë'. Insoquëma térranta' natëhuatama', noya cancantarama'," itérinco.

⁸ Caso' Coanshaco nani ma'sha ni'nahuë, natanahuë. Anquëni sha'huitohuachincora, isonahuë chinota'huaso marë'. ⁹ Yachinotopirahuë', sha'huitérinco. "Ama chinoto-cosohuë". Caso' anquënico. Campita pochachin canta' Yosë natérahuë. Iráca quëran huarë' a'naquën Yosë nanamën pënëntërin. Quëmanta' pënëntëran. A'napita iso quirica natanahuatona', natëapi. Ya'ipinpoa' Yosë natéröhua'. Napoaton inasáchin chinotëquë", itérinco.

¹⁰ Ina quëran itantarínco: "Ya'ipi Yosë anitotërinquëns'o nani ninshitëran. Ama topinan ninshitëquësuhuë'. Ninorinso' nani naniriari nni'ton, ya'ipi piyapi'sa' nanan a'patëquë' nitochina'. ¹¹ A'naquën natanaponaraihuë', co natëapihuë'. Co noyahuë' nipesopitaso', aquë aquëtë' co noyahuë' nisapi. Co nishinahuë' cancantopisopitanta', aquë aquëtë' niina'. Noya nipesopitaso' niperinhue', noya noya nisapi. Yoséíchin cancantopisopitanta', noya noya imaina', itérinco.

¹² Ina quëran Quisoso chachin itérinco: "Tëhuëñchachin co hua'quiya quëranhuë' o'mantararahuë. O'mantahuato, ya'ipiya no'tëquëñ i'huërtarahuë. Co noyahuë' nipesopita ana'intarahuë. Noya nipesopitaso' acanaarahuë. ¹³ Ca'ton ya'huërahuë. Co'huara isoro'pa' ya'huëyáterasohuë', ya'huárahuë. A'na tahuërinta' ya'ipi ma'sharo'sa' ta'huantopirinahuë', caso' ya'huápo. Iráca quëran huarë' ya'huárahuë. Co onporonta' ta'huantarahuë', ténin.

¹⁴ Huëñainen quëran anoyacancantërinsopita nöya cancantapona'. A'mopiso' pë'sarëso pochin noyápiachin cancantapi. Inapitasáchin nanan ya'huëtopi nanopirin nara nitérinso' capatona', nanopimiatacaiso'. Naporahuaton, nasha Quirosarinquë noya ya'conapi.

¹⁵ A'naquëns'o niperinhue', co onporonta' Yosë ya'huërinquë pa'sapihuë'. Ni'ni pochin cancantopisopita, pënnotono'sa', monshihuana'piro'sa', têpatoro'sa', mamansi chino-topisopita, inapita aipiran ya'huëmiatapi. A'naquëonta' nonpinápi nni'ton, co nohuantapi-huë' no'tén nanan imacaiso'. Inapitanta' co onporonta' Yosë'pa' pa'sapihuë'.

¹⁶ "Ca Quisoso anquëninéhuë a'patimaranquëñ. Nani nanan sha'huitérinquëñ ya'ipi imarinacosopita nitotacaiso marë'. A'naya a'naya niyontonpiquë a'patëquë' nonchina'. Iráca Tapi ya'huapon, Yoséri sha'huitérin: 'A'na tahuëri shiparin nöya nisarin. Ya'ipi piyapi'sa' nicha'ésarin,' itérin. Ca inaco. Tapi shiinco chachin. Caso' huëñio tayora huëñaráchin a'pininso pochin a'pintaranquëma', itérinco Quisoso.

¹⁷ Ya'ipi Quisoso imaréhuasopita: "O'mantaquë' Sinioro," itéröhua'. Ispirito Santonta', inachachin ténin. Natanaamasopitanta', "O'mantaquë' Sinioro," itoco'. Yamororëso pochin cancantohuatama', huëco' nanopirin ii' quëchinquëma'. Achinirinpoaso pochin quëtarinquëma' noya cancantacamaso marë'. Co manta' pa'térinhue'.

¹⁸ Nani no'tëquëñ ninshitëranquëma'. Ya'ipi ninorinso' no'tëquëñ ninshitëranquëma'. Natapatama', inachachin a'chinacaso' ya'huërin. Iso nanan apancatohuatama', iso quiricaquë sha'huirinso chachin nisha nisha quëran Yosë ana'intarinquëma'. Na'con na'con ana'intarinquëma'. ¹⁹ Iso quirica quëran nani no'tëquëñ anitotëranquëma'. A'na nanayan téranta' apahuantohuatama', co nanopirin nara nohuitararamahuë'. Co Yosë ninanonenquë pa'saramahuë'.

²⁰ Quisoso chachin anitotërincoso' ya'ipi ninshitëranquëma'. "Tëhuëñchachin co hua'quiya quëranhuë' o'mantararahuë," ténin. ¡Inapoquë' Sinioro! A'naroáchin o'mantaquë', itérahuë'.

²¹ Sinioro Quisoso noya catahuainquëma'. Ya'ipi imaramasopita nosoroatëñquëma', catahuainquëma'. Nani ninshitëranquëma huachi.

Coansha